


El Nuevo Testamento
en mixe de
Guichicovi



New Testament in Mixe, Isthmus (MX:mir:Mixe, Isthmus)

El Nuevo Testamento en mixe de Guichicovi **New Testament in Mixe, Isthmus (MX:mir:Mixe, Isthmus)**

copyright © 1988 Wycliffe Bible Translators, Inc.

Language: Mixe, Isthmus

Translation by: Wycliffe Bible Translators, Inc.

Mixe, Guichicovi [mir], Mexico

Copyright Information

© 1988, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixe, Isthmus

© 1988, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022
 4e564219-157f-5807-b810-47a15308b8b8

Contents

San Mateo	1
San Marcos	63
San Lucas	107
San Juan	171
Hechos	225
Romanos	301
1 Corintios	339
2 Corintios	368
Gálatas	388
Efesios	397
Filipenses	408
Colosenses	414
1 Tesalonicenses	421
2 Tesalonicenses	428
1 Timoteo	432
2 Timoteo	441
Tito	447
Filemón	451
Hebreos	453
Santiago	473
1 Pedro	479
2 Pedro	489
1 Juan	495
2 Juan	502
3 Juan	503
Judas	504
Apocalipsis	506

San Mateo

¹ Yaa jaduhñ myiñ cujaay nebiaty ja'a Jesús yhap tieedyhajxy jecy xiøhajty. Abraham xiøhajty ja'a jawyiinhájtäbä. David xiøhajty ja'a cujecy jaac mññäbä.

² Ja'a Abraham yhuung, Isaac je'e xiøhajty. Ja'a Isaac yhuung, Jacob je'e xiøhajty. Ja'a Jacob yhuung tu'ug, Judá je'e xiøhajty. May ja'a Judá ja'a piuhya'ay hñajty miøødä.

³ Ja'a Judá yhuunghajxy, Fares hajxy xiøhajty møødä Zara. Ja'a Fares tiajhajxy, Tamar je'e xiøhajty. Ja'a Fares yhuung, Esrom je'e xiøhajty. Ja'a Esrom yhuung, Aram je'e xiøhajty.

⁴ Ja'a Aram yhuung, Aminadab je'e xiøhajty. Ja'a Aminadab yhuung, Naasón je'e xiøhajty. Ja'a Naasón yhuung, Salmón je'e xiøhajty.

⁵ Ja'a Salmón yhuung, Booz je'e xiøhajty. Ja'a Booz tiaj, Rahab je'e xiøhajty. Ja'a Booz yhuung, Obed je'e xiøhajty. Ja'a Obed tiaj, Rut je'e xiøhajty. Ja'a Obed yhuung, Isaí je'e xiøhajty.

⁶ Ja'a Isaí yhuung, David je'e xiøhajty. Mänitä David tiägøøyy gobiernähajpä. Mänitä Urías yajyagho'cä mänaa ja'a tsip jiadyiijän. Coö ja'a Urías yho'cy, mänitä David ja'a Urías tio'oxiøjc wyiingpøjcä. Mänitä David yaghuungpaaty. Salomón ja'a yhuung hajxy yajxøhajty.

⁷ Ja'a Salomón yhuung, Roboam je'e xiøhajty. Ja'a Roboam yhuung, Abías je'e xiøhajty. Ja'a Abías yhuung, Asa je'e xiøhajty.

⁸ Ja'a Asa yhuung, Josafat je'e xiøhajty. Ja'a Josafat yhuung, Joram je'e xiøhajty. Ja'a Joram yhuung, Uzías je'e xiøhajty.

⁹ Ja'a Uzías yhuung, Jotam je'e xiøhajty. Ja'a Jotam yhuung, Acáz je'e xiøhajty. Ja'a Acáz yhuung, Ezequías je'e xiøhajty.

¹⁰ Ja'a Ezequías yhuung, Manasés je'e xiøhajty. Ja'a Manasés yhuung, Amón je'e xiøhajty. Ja'a Amón yhuung, Josías je'e xiøhajty.

¹¹ Ja'a Josías yhuung tu'ug, Jeconías je'e xiøhajty. Jimä Jeconías ja'a piuhya'ay hñajty miøødä. Mänitä judíoshajxy hadsip yajnøcxä jäguem Babilonia-naaxooty.

¹² Jim hajxy chānaadiaacpøjcy Babilonia. Jimä Jeconías ja'a yhuung yajxøhajty Salatiel. Ja'a Salatiel yhuung, Zorobabel je'e xiøhajty.

¹³ Ja'a Zorobabel yhuung, Abiud je'e xiøhajty. Ja'a Abiud yhuung, Eliaquim je'e xiøhajty. Ja'a Eliaquim yhuung, Azor je'e xiøhajty.

¹⁴ Ja'a Azor yhuung, Sadoc je'e xiøhajty. Ja'a Sadoc yhuung, Aquim je'e xiøhajty. Ja'a Aquim yhuung, Eliud je'e xiøhajty.

¹⁵ Ja'a Eliud yhuung, Eleazar je'e xiøhajty. Ja'a Eleazar yhuung, Matán je'e xiøhajty. Ja'a Matán yhuung, Jacob je'e xiøhajty.

¹⁶ Ja'a Jacob yhuung, José je'e xiøhajty. Coö ja'a María yhuung hñajty tøø myiñ tøø quia'ay, ja'a Jesúshajpä, mänitä José ja'a María wyiingpøjcy. Ja'a Jesús, Cristo je'e xiøhajty; paady yaa quiejxä hädaa yaabä naaxwiin maa højtscøxpän.

¹⁷ Nämajmacts ja'a Jesús ja'a yhap ja'a tieedy hñajty miøødä, møødä Abraham møødä David. Y jaac nämajmacts ja'a yhap ja'a tieedy hñajty miøødä, møødä Salomón møødä Jeconías. Mänitä judíoshajxy yajnøcxä Babilonia-naaxooty. Y jaac nämajmacts ja'a Jesús ja'a yhap ja'a tieedy hñajty miøødä, møødä Salatiel møødä José. Mänitä Cristo myiñguiahy.

¹⁸ Yaa jaduhñ myiñ cujaay nebiä Jesucristo myiñguiahyän. Ja'a Jesucristo tiaj, María hñajty je'e xiøhaty. Tøø hñajty tiødiägøøy coö ja'a Maríahajxy hñajty piøga'añ møødä José. Pero cajnä hajxy hñajty piøcyñä, mänitä María

quiähxø'cy coo hānajty yhuungmøødä. Ja'a Dioshespírituhaam hānajty tøø yhuungpaady.

¹⁹ Jaduhñ ja'a judíosahjxy hānajty quiuhdujthaty, coo ja'a to'oxiøjc yhuungpáadät jabiøcy, mänit jaduhñ yhxøxmájsänät. Pero miøød ja'a José hojoot hānajty; cabä María hānajty ñäxø'øwø'øwa'añ. Mänitä José wyiinmahñdyhajty coo ja'a María yhxøxmádsät hamee'ch, nebiä María jaduhñ quia'a yajtsähdiünät.

²⁰ Yhuuc wiinmahñdyhajpy ja'a José hānajty, mänit miaaho'cy. Mänitä Diosmoonsä wyiinhijxy cuma'ayhaam. Tsajpootyp hānajty chooñ. Mänitä José ñämaayyä:

—José, David miičh hijty mhaphajpy mdeedyhajpy. Ca'a mdajy ca'a mmay. Hoy jaduhñ coo ja'a María mwiingpøgät. Dioshespírituhaam jaduhñ tøø yhuungpaady.

²¹ Ya'ayhāna'c jaduhñ yhuunghadaamby, ja'a Jesúshajpä. Coo ja'a quiu'ug ja'a piojpä quiädieey yajnähwa'adsaanä, paady jaduhñ xiøhata'añ Jesús.

²²⁻²⁵ Coo ja'a José mia'abiädø'cy, mänit quiudiuuñ neby hānajty tøø ñäma'ayijäm ja'a Diosmóonsäm. Mänitä María wyiingpøjcy. Pero cab hajxy ñimiøødmaawä høxtä coonä ja'a María ja'a Jesús yajmiññä. Ja'a coobhuung, je'eds jaduhñ miingahw. Jesús jaduhñ xiøhajty. Coo ja'a Jesús jaduhñ myiiñguiahy, tøjiajt ja'a Diosmädia'agy jaduhñ nebiä Diosmädia'agy-yajwa'xpähajxy jecy quiujahyyän:

Huungpaadaamb ja'a cäxyihāna'c tu'ug.

Ya'ayhāna'c yhuunghadaamby.

Jue'e xiøhata'añ, Emanuel.

Je'eduhñ ñänøømby coo ja'a Dios hajxy xmiøødhájtäm.

2

¹ Ja'a Jesús, jim jaduhñ myiiñguiahy maa ja'a cajpt jaduhñ xiøhatiän Belén, jim Judeanaaxooty. Ja'a Herodes, je'e hānajty tuumb gobiernä. Jim je'e hānajty chāna'ay maa ja'a møjcajptän Jerusalén. Mänitä jäya'ayhajxy jim näje'e miejch maa ja'a Heródesän. Jäguem hajxy hānajty tøø chooñ maa ja'a xøø piädsømiän. Madsa'ahøxtabiä hajxy hānajty wiädity.

² Mänit hajxy yajtøøyy:

—Maa ja'a judíos guibiernähajxy, ja'a tøø myiñ tøø quiá'ayäbä. Jäguem højts ja'a miadsa'a tøø nnäheebøøyyä, jim maa ja'a xøø piädsømiän. Paady højts yaa tøø nmiñ tøø nmech neby højts jaduhñ nwiingudsähgø'øwät.

³ Coo ja'a gobiernä Herodes jaduhñ miädoyhajty møødä Jerusalénpä-jäya'ayhajxy nägøxiä, mänit hajxy tiägøøyy tajpä maabiä.

⁴ Mänitä Herodes miøjyaaxy ja'a teedywiindsønñhajxy møødä ley-yajnahixøøbiähajxy. Mänitä Herodes yajtøøyy:

—Maa ja'a Cristo myina'añ quia'awa'añ, ja'a Dios quiexaambiä.

⁵ Mänit hajxy yhadsooyy:

—Beléncajptøotiäc jaduhñ myina'añ quia'awa'añ yaa Judeanaaxooty. Ja'a Diosmädia'agy-yajwa'xpä jecy cujahy nebiä Dios miänaañän:

⁶ Ja'a cajpt jaduhñ xøhajpä Belén, jim Judeanaaxooty,

jimä wiindsønñ tu'ug myina'añ quia'awa'añ;

je'ečh ja'a ngu'ug xyhane'emáanäp, ja'a judíosahjxy; paadiä Beléncajpt jaduhñ yajmäbaada'añii nebiä møjcajptän.

⁷ Mänitä Herodes miøjyaaxy hamee'ch ja'a madsa'ahøxtabiähajxy. Mänitä Herodes yajtøøyy:

—Mäduhnajtä ja'a madsa'a quiähxø'tsohñ.

⁸ Coo ja'a Herodes tøyhajt miooyyā, mänitā miänáangumbä:

—Nøcx ja'a pigäna'c hajxy jim yajtøw Belén. Naxy hajxy hoy mdehm yajtøwät. Coo mbáadät, mänitøch hajxy min xyhawaanä, nébiøch jim nøcxy nwiingudsähgøøbiä.

⁹⁻¹⁰ Mänitā madsa'ahøxtaabiähajxy tiu'ubøjcy. Jim hajxy ñøcxy Belén nebiä Herodes hänajty tøø miäna'añän. Mänitā madsa'a hajxy jadähooc yhíxcumbä, ja'a hajxy hänajty tøø yhuug hijxpä jäguem maa ja'a xøø piädsømiän. Mänit hajxy jiaanč tehñ xioondaacy. Mänitā madsa'a hajxy piadu'ubøjcy. Mänitā madsa'a jim tøyä tiänaaxiøjpy maa ja'a pigäna'c-huung hänajty yhitiän naaxyp. Tøyä ja'a madsa'a hänajty quiuhjajnaxy maa hänajty quio'na'ayän.

¹¹ Mänitā madsa'ahøxtaabiähajxy tiøjtägøøyy. Jimä regalo hajxy hänajty miøødä caajäjooty. Mänitā pigäna'c-huung hajxy yhiijxy møødä tiaj María. Mänitā pigäna'c hajxy wyiinijcädaacy; wyiingudsähgøøyy hajxy jaduhñ. Mänitā quiaajä hajxy yaghawaach. Mänitā oro hajxy yajpädsøømy møødä poom møødä mirraperfume. Pa'agxuup je'e; tsow ñøcxy. Mänitā pigäna'c hajxy jaduhñ ñä'ä mooyy.

¹² Mänit hajxy wyiimbijnä. Mänit hajxy ñøcxy maa ja'a quiajpthajxiän. Wiingtuum hajxy ñøcxøøñä; cab hajxy jim ñaxøøñä maa ja'a Heródesän. Hix, tøø hajxy hänajty yhawáanäxä cuma'ayhaam coo hajxy jim quia'a naxøøñät.

¹³ Coo ja'a madsa'ahøxtaabiähajxy hänajty tøø wyiimbijnä, mänitā José ja'a Diosmoonsä tu'ug wyiinhijxy cuma'ayhaam, ja'a tsajpootypä. Mänitā José ñämaayyä:

—José, pädø'øg. Nøcx hajxy jim Egiptonaaxooty møødä mhuung møødä mdo'oxy. Jim hajxy mmähmø'øwät høxtä coonä nhawáanämät coo hajxy mwiimbídät. Paady hajxy mbäyø'øgät neby yø'ø mhuung xquia'a yaghó'cät. Ja'a Herodes, xyhøxta'awáanäp yø'ø mhuung jaduhñ; xyajyagho'ogáanäp jaduhñ.

¹⁴ Mänitā José piädø'cy. Mänitā Joséhajxy jim jiaanč nøcxy Egipto møødä yhuung møødä tio'oxy. Mänitcoods hajxy tiehñ tiu'ubøjcy.

¹⁵ Jim hajxy hänajty miähmø'øwa'añ Egipto. Høxtä ja'a Herodes hó'ogäp, mänit hajxy hänajty wyiimbijtagatsa'añ. Jequiän ja'a Diosmädia'agy-yajwa'xpä hänajty tu'ug tøø quiujaay nebiä Dios miänaañän: “Nhøxyaaxpädsømämbiøch ja'a nhuung jiiby Egiptonaaxooty.” Y coo ja'a Joséhajxy jim jiaanč nøcxy Egipto, tøjiajt ja'a Diosmädia'agy jaduhñ.

¹⁶ Coo ja'a Herodes ñajuøøyy coo hänajty tøø wyiinhøøñii ja'a madsa'ahøxtaabiädøjc, mänitā Herodes jiootma'ty. Mänitā Herodes ja'a pigäna'c yajyagho'cä nägøxiä, pønjaty ja'a mejtsjumøjt pä hänajty ca'a yaghabejpnä, ja'a hajxy hänajty tsänaabiä Belén møødä Belén mäwiingón. Hix, tøø hänajty mejtsjumøjt yhiñä coo ja'a madsa'a quiahxø'tsohñ, ja'a madsa'ahøxtaabiädøjc-hajxy hänajty tøø yhiñäbä.

¹⁷⁻¹⁸ Jaduhñ ja'a Diosmädia'agy tiøjiäjcumbä nebiä Jeremías hänajty jecy tøø quiujaayän:

Jim maa xiøhatiän Ramá,

jimä Raquel ja'a yhuung ñäjøøyy ñaxuu'ch.

Coo ja'a yhuung yaghó'cäxä, paady quia'a jootcapxmøcpøgaanä.

Ja'a Jeremías, je'e ja'a Diosmädia'agy jecy yajwa'x.

¹⁹ Coo ja'a Herodes yho'nä, jimnä ja'a Joséhajxy hänajty Egiptonaaxooty. Mänitā José ja'a Diosmoonsä tu'ug wyiinhíxcumbä cuma'ayhaam, ja'a tsajpootypä. Mänitā José ñämaayyä:

20 —Päðø'øg, wiimbit hajxy møødä mhuung møødä mdo'oxy. Nøcx hajxy Israelnaaxooty. Tøø jäya'ayhajxy yho'nä, ja'a mhuung hajxy hijty xyagho'ogáanäbä.

21 Mänitä Joséhajxy piäðø'cy møødä yhuung møødä tio'oxy. Mänit hajxy jim jiaančh nøcxy Israelnaaxooty.

22 Mänitä José miäðoyhajty coo Arquelao hānajty guiobiernāhajnä jim Judeanaaxooty maa ja'a tieedy Herodes hānajty tøø guiobiernāhatiän. Mänitä José chāhgøøyy. Cab hānajty jim ñøcxaanä Judeanaaxooty. Wiingtuum hajxy ñøcxy Galileanaaxooty, nebiä José hānajty tøø yhawāanāxān cuma'ayhaam.

23 Coø hajxy jim miejch Galileanaaxooty, mänit hajxy jim chānaadiaacpøjcy maa ja'a cajpt xiøhatiän Nazaret. Coø hajxy jim chānaadiaacpøjcy, tøjiajt ja'a Diosmädia'agy jaduhñ maa jaduhñ myiñān cujaay coø ja'a Jesús hānajty ñāma'awa'añii coø jim choon Nazaret. Ja'a Diosmädia'agy-yajwa'xpāhajxy jaduhñ jecy cujahy.

3

1 Cujecy ja'a Juan ja'a mäyajnābejpä jim miejch Judeanaaxooty pactuum. Ja'a Diosmädia'agy hānajty yajwa'xyp.

2 Mänitä Juan tiägøøyy mädiaacpä. Mänit miānaañ:

—Najtshixø'ow ja'a mhaxøøgcuhdujt hajxy; habaadāannäp jaduhñ coø ja'a Dios ja'a miājaa yajcāhxø'øga'añ.

3 Ja'a Isaías, ja'a Diosmädia'agy jecy yajwá'xäbä, je'e hānajty jaduhñ jecy tøø quiujaay:

Jimä jäya'ay tu'ug yaaxwädity pactuum:

“Najtshixø'ow ja'a mhaxøøgcuhdujt hajxy, nebiä mwiindsøn hajxy hoy mjøbhíxät;

hoy hajxy jaduhñ mwiingudsähgø'owät.”

Ja'a Juan jaduhñ nänøømä.

4 Ja'a Juan, camellopøjt hānajty wyithajpy; wajhac hānajty wiøønhajpy. Chu'chp mu'u hānajty je'e; yhuucypy cunaaxmøjtsiinnøø hānajty.

5 Majiäya'ay ja'a Juan hānajty ñāmechii. Jerusalén hajxy hānajty näje'e choon. Näje'e hajxy hānajty chohmbä Judeanaaxooty møødä Jordānmøjnøøbaha. Yhamädoowhidāanäp ja'a Juan miädia'agy hajxy hānajty.

6 Mänitä piojpä quiädieey hajxy ñägapxy. Mänitä hajxy jim yajnābejtä ja'a Juängäm maa ja'a Jordānmøjnøøjän.

7 Mänitä Juan yhiixy coø hānajty ñāmechii ja'a fariseoshajxy nämay møødä saduceoshajxy. Ja wi'i ñābetaamb hajxy hānajty je'ebä. Ja'a fariseoshajxy, hoy hajxy hānajty jiaančh tehñ quiudiuñ ja'a Moisés miädia'agy. Ja'a saduceoshajxy, wiingä cuhdujt hajxy hānajty miøødä; cab hajxy hānajty miāna'añ coø hajxy jiuypiojtägatsa'añ. Mänitä Juan miānaañ:

—Hay, møjcu'u, caj mijts hoguiuhdujt mnä'ägädä møødä. Paady hajxy mja wi'i ñābetaambä nebiä Dios hajxy jaduhñ xquia'a yajcumädowät, túhmäts.

8 Hoy hajxy mwädítät neby hajxy jaduhñ myajcāhxø'øgät coø ja'a mhaxøøgcuhdujt hajxy hānajty tøø mjaančh najtshixø'øy.

9 Cab hajxy jaduhñ mmäná'anät: “Abrahámhøch hijty nhaphajpy ndeedyhajpy, páadyhøch ja'a Dios jaduhñ xquia'a yajcumädowa'añ.” Mänitä Dios jaduhñ xyajnáhwá'adsät coø ja'a mhaxøøgcuhdujt hajxy mnajtshixø'owät, ca'a jie'eguiøxpä coø ja'a Abraham hajxy hijty mhaphaty mdeedyhaty.

10 Pøn hoy ca'a wädiip, jaduhñ mäwínäts je'e nebiä quepychaajän, ja'a ca'a tøømhajpä. Piuxaamby hajxy je'e; mänit hajxy ño'oga'añ. Paady hajxy hoy mwädítät nebiä Dios hajxy jaduhñ xquia'a yajcumädowät.

¹¹ Tøyhajt mijts nyajnbety nøøhaam neby hajxy jaduhñ myajcähxø'øgät coo ja'a mhaxøøgcuhdujt hajxy tøø mnajtshixø'ø. Pero xii jäya'ay tu'ug jiaac miñ høxhaam; je'eds mæbøjnäbä ja'a Dioshespíritu hajxy xmio'owaamb. Xyajnähwa'ads xyajcuhwa'adsaamb hajxy jaduhñ. Maas mæcä cuhdujt je'e miøødä quejeech høøch. Cábøch cuhdujt nnä'ägä møødä ni weeñtiä maa jaaya'aguiøxpän.

¹² Ja'a jäya'ayhajxy, coo ja'a trigo hajxy hänäjty tøø tiexy, tøgooty hajxy nøcxy piäda'agy. Pero ja'a trigohac, naaxwiin je'e quia'ay. Jaduhñ mäwíinäts jäya'ayhajxy quia'awa'añ haxøøgtuum, ja'a yhaxøøgcuhdujt hajxy ca'a najtshixø'øwaambä. Cøjxta'axiøø hajxy jiiby chaaçhpøga'añ.

¹³ Mänitä Jesús miejch maa ja'a Juan hänäjty miäyajnäbetiän jim maa ja'a Jordánmøjnøøjän. Galilea ja'a Jesús hänäjty tøø chooñ. Näbetaamb hänäjty je'ebä.

¹⁴ Mänitä Juan ja'a Jesús ñämaayy:

—Cab jaduhñ yhähixø'ø cooch miich nyajnbétät; maas hoy hijty jaduhñ cooch miich cu xyajnäbejty.

¹⁵ Mänitä Jesús miänaañ:

—Høøch yajnäbéjtäc neby jaduhñ ngudiúunämät nebiaty ja'a Dios xyhanéhmäm.

Mänitä Juan jaduhñ miänaañ:

—Ween nyajnbétät.

¹⁶ Mänitä Jesús ñäbejty. Mänit je'e tiø'ødspädsøømy. Mänitä tsajt yhawaach. Mänitä Jesús ja'a Dioshespíritu yhijsy coo hänäjty miänacy nebiä palomän, coo hoy yhäñaaguiäda'agy ja'a Jesús quiuhduum.

¹⁷ Mänitä Dios jim quiapxy tsajpootyp:

—Høøch nHuong yø'ø. Njaanç tehñ chøjpiøch jaduhñ. Jaanç tehñ jiootcújc-høch nnijiäwø'øyii ja'a nHuongcøxpøch.

4

¹ Mänitä Dioshespíritu ja'a Jesús wioonøcxy pactuum. Jimä Jesús hänäjty jia wi'i ñäma'awa'añii ja'a møjcu'ugóngäm coo haxøøg jiatcø'øwät.

² Juxychägui'xxøø ja'a Jesús hänäjty jim tøø yhity jaguiay. Ni xøøm ni coods hänäjty tøø quia'a cay. Mänit yäho'pøjcä.

³ Mänitä Jesús ñämejtsä ja'a møjcu'ugóngäm. Ja wi'i yagjatcø'øwáanäp ja'a Jesús hänäjty haxøøg. Mänitä møjcu'ugong miänaañ:

—Pø miich ja'a Dios tøyhajt xyHuunghajp, näma'aw yø'ø tsaa coo ween chajcaagyquiojy.

⁴ Mänitä Jesús yhadsooyy:

—Jaduhñ ja'a Diosmädia'agy miäna'añ: “Ca'a quiaaguiähajtiä ja'a jäya'ayhajxy miädsänaaby hädaa yaabä naaxwiin; møødä Diosmädia'agy hajxy miädsäna'ay.”

⁵ Mänitä møjcu'ugong ja'a Jesús wioonøcxy jim Jerusalén. Ja'a Dioscajpt je'e jim. Mänitä Jesús miøødwimbejtä ja'a møjtsajtøjcuhduum.

⁶ Mänit ñämaayyä:

—Pø miich ja'a Dios tøyhajt xyHuunghajp, cuhdøpxnax jii. Caj miich nej mjädät. Jaduhñ ja'a Diosmädia'agy miäna'añ:

Ja'a Dios ja'a mioonsä hane'emaamb, ja'a hajxy jim tsajpootypä coo miich xcwieendähädät.

Xchehñhidaamb miich hajxy nej miich tsaajooty jaduhñ mga'a cuhnébät.

⁷ Mänitä Jesús yhadsooyy:

—Pero nøm ja'a Diosmädia'agy miänaambä: “Cabä Dios ja'a mWiindsón mjøjcaxø'øwät.”

⁸ Mänitä møjcu'ugong ja'a Jesús wioonócxumbä maa ja'a tunän, ja'a jaančh tehñ quiøxpä. Mänitä Jesús yajñähixøøyyä ja'a naax ja'a cajpt cøxiä hädaa yaabä naaxwiin, coo ja'a jäya'ayhajxy miøjjä jiaančhä.

⁹ Mänitä Jesús ñämaayyä:

—Høøch nje'e yø'øduhñ cøxiä mäduhñtiä jii quiähxø'øgy. Cooch miičh jijnä'a xwyiingudsähgø'owät, mänitäs yø'ø ngøxy mó'owät.

¹⁰ Mänitä Jesús yhadsooyy:

—Jäwa'ads miičh jim, møjcu'u. Jaduhñ ja'a Diosmädia'agy miäna'añ: “Dios hajxy mwiingudsähgø'owäp, ja'a hajxy mWiindsønñhajpiä. Cab jaduhñ wiingpä mwiingudsähgø'owät.”

¹¹ Mänitä møjcu'ugong wyiimbijnä; nidiuhñ ja'a Jesús miähmøøyy. Mänitä Jesús ñägädaacä ja'a Dios mióonsäm ja'a tsajpootypä. Mänit je'e piuhbejtä.

¹² Coo ja'a Jesús miädoyhajty coo ja'a Juan hñajty tøø chumyii, mänit jim ñøcxy Galileanaaxooty.

¹³ Mänitä Jesús jim ñaxøøyy maa ja'a Nazaretcajptän, pero cab jim miähmøøyy. Mänit jim chänaadiaacpøjcy maa ja'a cajpt jaduhñ xiøhatiän Capernaum. Jimäts je'e Galileamejypia'a maa ja'a Zabulón yhap yhoc-hajxy chäna'ayän. Jimä Neftalí ja'a yhap yhoc-hajxy chänaabiä.

¹⁴ Coo Ja'a Jesús jim chänaadiaacpøjcy Capernaum, tøjiajt ja'a Diosmädia'agy jaduhñ nebiä Isaías hñajty jecy tøø quiujaayän, ja'a Diosmädia'agy jecy yajwä'xäbä:

¹⁵ Ja'a naax maa ja'a Zabulón yhap yhoc-hajxy chäna'ayän, maa ja'a Neftalí yhap yhoc-hajxy chänaabiän, jimä tu'u ñaxø'øy mejypia'a, jim Galilea, jim maa ja'a ca'a judíoshajxy chäna'ayän.

¹⁶ Ja'a jäya'ayhajxy hijty haxøøgwädijpä, tøø ja'a piojpä quiädieey hajxy yajñähwáatsäxä.

Ja'a jäya'ayhajxy hijty hagoonstuum ca'awaambä, nøcxaamb hajxy je'e jim tsajpootyp,

coo ja'a piojpä quiädieey hajxy tøø yajñähwáatsäxäbä.

¹⁷ Mänitä Jesús tiägøøyy yajwiingapxøøbiä ja'a Diosmädia'agy. Mänit miänaañ:

—Najtshixø'ow ja'a mhaxøøgcuhdujt hajxy. Habaadäännäp jaduhñ coo ja'a Dios ja'a miäjaa yajcähxø'øga'añ.

¹⁸ Jimä Jesús hñajty miejypia'ayo'oy maa ja'a Galileamejjiän. Mänitä jäya'ay metsc yhijxy, ja'a Simón, ja'a xøhajpä Pedro, møødä piuhya'ay Andrés. Haxmats hajxy hñajty tiuunghajpy. Jimä yhacxjohmñd hajxy hñajty miejypiäda'aga'añ.

¹⁹ Mänitä Simónhajxy ñämaayyä ja'a Jesúsäm:

—Jam hajxy wädíjtäm. Jue'e mijts mduunghajpy, haxmats; wiingtuunñ mijts nmo'owaamby. Nyajñähixø'øwaamby mijts nebiä jäya'ay hajxy myajwiingapxø'owät ja'a Diosmädia'agy.

²⁰ Tuunä je'eduhñ ñä'ä mänaañ, mäniä ja'a yhacxjohmñd hajxy ñajtswidsoøyy; mänit ja'a Jesús hajxy piadu'ubøjcy.

²¹ Mänitä Jesús jiaag hädaacy mejypia'a. Mänitä Zebedeo yhijxy møødä yhuunghajxy, ja'a Jacobo møødä Juan. Jiiby hajxy hñajty yhäña'ay barcojooty. Yhacxjohmñd hajxy hñajty yhaxodsøøby. Mänitä Jesús ja'a Jacobo miøjyaaxy møødä Juan.

²² Tuunä hajxy jaduhñ ñä'ä mädooyy, mäniä hajxy piädsøømy barcojooty; mänit ja'a Jesús hajxy piadu'ubøjcy; yajmähmøøyy ja'a tieedy hajxy jiiby barcojooty.

23 Mänitä Jesús tiägøøyy wädiipä cajpt-cajpt jim Galilea. Mädia'agy-yajwa'xpä jaduhñ wiädipty coo ja'a Dios ja'a miäjaa yajcähxø'øga'añ. Homiädyii cajptä hänajty ñøcxy, jiiby hänajty yajnähixø'øy maa ja'a judíos chajtøjc-hajxiän. May ja'a jäya'ay yajmøcpøjcy. Homiädyii pa'amä jaduhñ yajnajxy.

24 Mänitä mädia'agy jaduhñ wiädipty ja'a Jesúscøxpä jim maa jaduhñ xiøhatiän Siria. Mänitä pa'amjäya'ayhajxy yajmejtsä maa ja'a Jesúsän, pønjaty ja'a møjcu'u møød, møød pønjaty ja'a pojpa'am møød. Mänitä Jesús ja'a pa'amjäya'ay quiøxy yajmøcpøjcy.

25 Mänitä Jesús piadu'ubøjcä ja'a majiäya'ay. Jim Galilea hajxy hänajty näje'e chooñ. Näje'e hajxy hänajty chooñ maa ja'a majc-hagajptän, näje'e Jerusalén, møødä Judea møødä Jordánmøjnøø'awiimb.

5

1 Coo ja'a Jesús ja'a majiäya'ay yhiixy, mänit ñøcxy tunguhduum. Mänit yhøxtaacy naaxwiin. Mänit ñämejtsä ja'a jiamiøødhajxy.

2 Mänit tiägøøyy yajnähixøøbiä. Mänit miänaañ:

3 —Jootcujc hajxy jaduhñ yhida'añ pønjaty jaduhñ yajpejxp. Paady hajxy jootcujc yhida'añ, coo hajxy jim ñøcxa'añ maa ja'a Diosän.

4 'Jootcujc hajxy jaduhñ yhida'añ pønjaty jootmayhajp. Paady hajxy jootcujc yhida'añ, coo ja'a Dios hajxy quiapxmøcpøga'añíijäm.

5 'Jootcujc hajxy jaduhñ yhida'añ pønjaty mee'xxieemy hidaamb. Paady hajxy jootcujc yhida'añ, coo ja'a Dios hajxy mio'owa'añíijäm nebiaty ja'a Dios tøø yajwiinwaanø'øy.

6 'Jootcujc hajxy jaduhñ yhida'añ pønjaty ja'a jioot tsojp coo hajxy hoy quiudiúnät. Puhbedaanäp hajxy jaduhñ Diósäm.

7 'Jootcujc hajxy jaduhñ yhida'añ pønjaty hojioot møød. Paady hajxy jootcujc yhida'añ, coo ja'a Dios hajxy ñäxuudsa'añíijäm.

8 'Jootcujc hajxy jaduhñ yhida'añ pønjaty haxøøgwiinmahñdy ca'a møød. Paady hajxy jootcujc yhida'añ, coo ja'a Dios hajxy yhixa'añ.

9 'Jootcujc hajxy jaduhñ yhida'añ pønjaty capxcuhgådaacp maa ja'a tsip piädø'øguiän. Paady hajxy jootcujc yhida'añ, coo ja'a Dios hajxy yhuung-hada'añíijäm.

10 'Tsaächpøjp ja'a jäya'ayhajxy näje'e coo hoguiuhdujt hajxy miøødä; pero jootcujc hajxy jaduhñ yhida'añ. Paady hajxy jootcujc yhida'añ, coo hajxy jim ñøcxa'añ maa ja'a Diosän.

11 'Jootcujc hajxy mhida'añ, hoy ja'a jäya'ayhajxy hänajty xjia nämä'ay haxøøg, hoy ja'a jäya'ayhajxy hänajty xjia tuna'añ haxøøg, hoy ja'a jäya'ayhajxy hänajty xjia nähøønø'øwa'añ hoñejpiä ja'a høøchcøxpä.

12 'Jaanä jaduhñ hajxy jecy tøø chaächpøjpä, ja'a Diosmädia'agy hajxy jecy yajwä'xäbä. Pero xoonda'ag hajxy, jootcugø'øw hajxy; jimä hoybä weenbä hajxy mjaançh tehñ piaada'añ jim tsajpootyp.

13 'Ja'a caan, coo ja'a tiaamdspä tiägóyyät, cab jaduhñ mänäa tiaamd-søøñät. Tøø jaduhñ mia'ady. Mänitä jäya'ayhajxy yhøxwøyy, mänit hajxy yajteen. Jaduhñ mäwíinäts mijts nebiä caanän hädaa yaabä naaxwiin; coo ja'a Diosmädia'agy hajxy mnajtshixø'øwät, mmá'adäp hajxy jaduhñ.

14-16 'Ja'a cajpt, ja'a tunguhduum hijpä, caj mänäa yhiixtägøyyii. Y coo ja'a cera hajxy ño'ogy, cab hajxy jaduhñ ñähjupety cachpa'c. Caj pues. Jiiby hajxy jaduhñ piäda'agy cøxp maa ja'a ceratoyøhñdiän, nebiä jäya'ayhajxy nägøxiä quiudøø'xøøjät jiiby tøgooty. Jaduhñ mäwíinäts mijts, hoy hajxy mwädität

nebiä jäya'ay hajxy jaduhñ xyhíxät coo hajxy hñajty hoy mwädity. Mänitä jäya'ayhajxy wyiingudsähg'owät ja'a nDeedyhajtäm jim tsajpootyp.

17 'Páadyhøch yaa tøø nmiñ tøø nmech hädaa yaabä naaxwiin nébiøch mijts jaduhñ nyajñähix'owät nebiä Diosmädia'agy hajxy hamuumdu'joot mgudiünät, ja'a Moisés jecy quiujähyyäbä, ja'a Diosmoonsähajxy yajwá'xäbä, ja'a hajxy hädaa yaabä naaxwiimbä. Cábøchä Diosmädia'agy nyajcuhdägoyya'añ. Cab hajxy jaduhñ mmäná'anät cooch nyajcuhdägoyya'añ.

18 Tøyhájthøch mijts nnäma'ay, mäduhñtiä ja'a tsajtwiing miähmø'owa'añ, mäduhñtiä hädaa yaabä naaxwiin miähmø'owa'añ, cabä Diosmädia'agy quiuhdägoyya'añ, ni weeñtiä, ni tu'lí'xytiädä, høxtä coonä hñajty tøø quiøxy habejnä.

19 Pønjaty ja'a Diosmädia'agy jaduhñ cudiumb, pønjaty ja'a wiinghänäc jaduhñ yajñähixøby coo hajxy quiudiúumbät, je'eds hajxy møj jaançh päda'agáanäp coo ja'a Dios ja'a miäjaa yajcähxø'øga'añ. Pero pønjaty ja'a Diosmädia'agy ni weeñtiä ca'a cudiumb, pønjaty ja'a wiinghänäc yajñähixøby coo hajxy quia'a cudiünät, cab hajxy je'e møj jaançh piäda'aga'añii coo ja'a Dios ja'a miäjaa yajcähxø'øga'añ.

20 Mijtshøch jaduhñ nnämaaby, cabä ley-yajñähixøbiädøjc-hajxy hoy wiädity ni ja'a fariseodøjc-hajxy. Coos mijts maas hoy mwädítät, mänit hajxy jim mnøcxät cøxp maa ja'a Diosän. Pø cab hajxy hoy mwädita'añ, cab hajxy jim mnøcxät.

21 'Tøø hajxy mmädoyhaty nebiä mhäp mdeedyhajxy hijty jecy miäna'añän: "Ca'a hajxy mjäya'ay-yagho'ogy coo ja'a cuduung hajxy xyajcumädówät."

22 Pero høøch mijts nnämaaby, pøn ja'a miäjøøn miädøjc mäjootma'p, je'eds cumädowaamb maa ja'a cuduungän. Pøn ja'a miäjøøn miädøjc nähwaambejp, je'eds cumädowaamb maa ja'a gobiernän. Pøn ja'a miäjøøn miädøjc nämaaby coo je'e quiuhmañø'y, je'eds jiiby ca'awaamb haxøøgtuum, maa ja'a jøøn mänaa quia'a pi'ichän.

23 'Entonces, coo hajxy hñajty tii mänaa myoxa'añ jiiby tsajtøgooty maa ja'a altarän, y coo hajxy mänit mähmiédsät coo ja'a mmäjøøn mmädøjc hajxy hñajty tøø xmiädsibø'y hotyiguiøxpä,

24 jim hajxy mnajtscon'owät altarwiinduum, tijaty hajxy hñajty myoxaamby. Mänit hajxy jim mnøcxät maa ja'a mmäjøønän maa ja'a mmädøjcän, neby hajxy jaduhñ myajtødiäg'owät. Mänit hajxy mwiimbídät. Mänit hajxy mnøcxtägätsät maa ja'a altarän. Mänit hajxy myójxnät.

25 'Coo pøn hñajty mänaa xñäxø'owø'owa'añ maa ja'a cuduungän, jayøjp myajtødiäg'owät tu'haamnøcxpä. Coos jim mga'a yajtødiäg'owät tu'haamnøcxpä, mänit hajxy xyajmédsät cuduungwiinduum. Mänitä cuduung xyajcø'ødäg'owät ja'a policíahajxy. Mänit hajxy xchúmat.

26 Jiiby jaduhñ mmähmø'owät pujxtøgooty. Cab jaduhñ mdsoj pädsómät. Mänit jaduhñ mbädsómät coo hñajty pedyii tøø mniyhøxjuubiädsomyii. Tøyhajt jaduhñ.

27 'Tøø hajxy mmädoyhaty coo jäya'ayhajxy hijty jegyhajty miäna'añ coo hajxy mga'a tu'udägóyyät.

28 Pero høøch mijts jaduhñ nnämaaby, coo pøn wiingto'oxiøjc mänaa yhad-socy, nä'ägädä tu'udägooby je'eduhñ.

29-30 'Coo tii hoyhadsojnä mhíxät, cab jim mmøjhée'pnät ni mga'a nähdonät. Jaduhñ mnibiäda'agøøjät nebiä wiindspän nebiä cø'øducpan. Pø caj, jiiby hajxy mga'awa'añ haxøøgtuum.

31 'Jaduhñä jäya'ayhajxy hijty jegyhajty miänaambä: "Coo pøn ja'a tio'oxiøjc mänaa yhøxmádsät, mänitā haguipøjnocy quiøø'tsnät."

32 Pero høøch mijts jaduhñ nnämaaby, coo pøn tio'oxiøjc mänaa yhøxmádsät, y cabä tio'oxiøjc hānajty nej tøø jiatcø'øy, coo ja'a to'oxiøjc wiingya'adiøjc jiojpøgø'øwät, pues tu'udägoyyäp ja'a to'oxiøjc jaduhñ. Ja'a ya'adiøjc, ja'a hānajty jawyiin tøøbä yhøxmáchäbä, je'edsä pojpa møød. Y ja'a ya'adiøjc tøø jiaac jiojpøgø'øyäbä, jaanä tu'udägooby je'ebä.

33 'Jaduhñä jecyjiäya'ayhajxy hijty ñāma'ayii: "Pø tøø ja'a Dios hajxy mnāma'ay hamuumdu'joot coo hajxy hotyijä mgudiuna'añ, tsipcøxp hajxy jaduhñ mgudiünät."

34-36 Pero høøch mijts nnämaaby coo hajxy tii mga'a yajwiinwaanø'øwät nä'ä nägoobä. Coo hajxy hānajty tii myajwiinwaanø'øwa'añ, cabä tsajpootypä hajxy mgapxpáadät, ni ja'a naaxwiimbä, ni ja'a Jerusalén, ni ja'a mgopc-hajxy. Hix, paadiä tsajpootypä hajxy mga'a capxpáadät je'eguiøxpä coo ja'a Dios jim yhäña'ay. Møød hädaa yaabä naaxwiin hajxy mga'a capxpáatpät je'eguiøxpä coo ja'a Dios yajtānaabiety. Møødä Jerusalén hajxy mga'a capxpáatpät je'eguiøxpä coo je'e Dyioscajptä. Møødä mhamdsoo copc hajxy mga'a capxpáatpät je'eguiøxpä coo ja'a mguhwaay hajxy hoy mga'a yajpó'owät, ni hajxy hoy mga'a yagjiñø'øwät.

37 Jaduhyyä hajxy mmānā'anät pø tøyhajt, pø caj. Coo hajxy waamb mjaac mñānā'anät, ja'a møjcu'ugong hajxy jaduhñ xyajmānaamb.

38 "Tøø hajxy hijty mmädoyhaty nebiä jäya'ayhajxy hijty jegyhajty miäna'añ: "Coo pøn cøxypānejpiä xñä'ä tūnät, myaghawiimbídäp jaduhñ."

39 Pero høøch mijts nnämaaby: cab jaduhñ myaghawiimbídät; coo pøn xyhala'pø'øgät tu'nax, mjaac yégäp jaduhñ ja'a tu'naxpä, ween xjiaac hala'pø'øgy.

40 Coo pøn mänaa xñäxø'øwø'øwät, coo ja'a mgamiixy hānajty xpiøgaanä, myégäp jaduhñ møødä mnähgäjén.

41 Coo pøn hānajty tii xyajtsømnøcxa'añ tu'kilómetro hadsip, mejtskilómetro mnä'ägä tsømnøcxät.

42 Coo pøn hānajty tii xmiäyujwa'ana'añ, mmó'owäp jaduhñ. Tsipcøxp jaduhñ hotyijä mmó'owät.

43 "Tøø hajxy hijty mmädoyhajpä nebiä jäya'ayhajxy hijty jegyhajty miänaambä: "Hoy ja'a mmägu'ughajpä mdsoc mba'häyówät; pero ja'a mmädsip, mmāhanhädäp je'e."

44 Pero høøch mijts nnämaaby: ca'a mmāhanhaty pønjaty jaduhñ xmiädsiphajp. Hoy hajxy mnänómät pønjaty haxøøg xñänøømb. Mnäxúudsäp hajxy pønjaty xmiāhanhajp. Mānuu'xta'ag ja'a Dios hajxy coo ween mio'oy ja'a hoyhajt ja'a weenhajt pønjaty xwyiinwohmb xyhawohmb, pønjaty xyhäyoowhijxp.

45 Jaduhñä Dios hajxy hoy xyhuunghädät, ja'a jim hijpä tsajpootyp. Jaayá'ayäts jaduhñ yajxøøhaamb maa ja'a jäya'ay hoybän chaads jim maa ja'a jäya'ay ca'awiindøybän. Jaayá'ayäts jaduhñ yajtuub maa ja'a jäya'ay hoybän chaads jim maa ja'a jäya'ay ca'awiindøybän.

46 Cab hajxy tii mbáadät nä'ä tagø'øbä coo ja'a mmägu'ughajpähajtiä mmøødnijootpaadøøjät. Høxtä ja'a yajnähjuudiutpädøjc-hajxy niçhojc nibia'häyóowäp. Pero coo ja'a mmädsip hajxy mmée'xät, mänitā Dios hajxy xyhuunghädät.

47 Cab jaduhñ ñejpiä coo ja'a mmägu'ughajpä hajxy mmøødnijootpaadyii. Hopiønä ñijootpaadyii, hoy ja'a Diosmädia'agy hajxy quia'a ja mäßøcy. Pero coo ja'a mmädsip hajxy mmée'xät, hoy hajxy mgudiun.

⁴⁸ Ja'a nDeedyhájtäm, ja'a jim tsajpootypä, jaančh tehñ ñä'ägä hoy je'eduhñ yhity. Hoy hajxy jaduhñ mbahixpät.

6

¹ 'Näje'e ja'a jäya'ayhajxy jia wi'i yajcumaya'añ, paady hajxy jaduhñ ñibiäda'agyii nebiä hojiäya'ayän. Pero cab jaduhñ yhooyä coo hajxy jaduhñ yajcumáyät. Cab hajxy jaduhñ mbahix mbadúnät. Coo hajxy jaduhñ mbahix mbadúnät, cabä Dios hajxy xyhuunghádät, ja'a jim tsajpootypä.

² Jii jäya'ayhajxy näje'ebä, coo ja'a häyoobäya'ay ja'a xädø'øñ hajxy hñajty tøø mio'oy, mänit hajxy tiägø'øy mädiaacpä jiiby tsajtøgooty møød jim tu'haam. Paady hajxy jaduhñ miädia'agy, yajcumayaamb hajxy jaduhñ maa ja'a cu'ugän. Pero cabä Dios hajxy jaduhñ quiumayíjäm, je'eguiøxpä coo hajxy hñajty jim tøø yajcumay maa ja'a cu'ugän.

³ Pero mijts, coo ja'a häyoobäya'ay xädø'øñ hajxy hñajty tøø mmo'oy, cab hajxy waamb mmäná'anät. Ni pøn hajxy mga'a hawáanät, ni ja'a mmägu'ughajpähajxy.

⁴ Hamee'ch ja'a xädø'øñ hajxy jaduhñ myégät. Dios hajxy jaduhñ xyhíxäp; mänit hajxy jaduhñ xyhuunghádät.

⁵⁻⁶ 'Jii jäya'ayhajxy näje'ebä, täna'a ja'a Dios hajxy naxy pia'ya'axy jiiby tsajtøgooty møød jim maa ja'a tu'uxeñän. Pero cabä Dios hajxy tu'joot pia'ya'axy. Nä'ä yajcumayaamb hajxy jaduhñ maa ja'a cu'ugän. Pero cabä Dios hajxy jaduhñ quiumaya'añíjäm. Tøyhajt jaduhñ. Pero mijts, hamee'ch ja'a Dios hajxy mba'yá'axät. Xyhíxäp xmiädówäp hajxy je'eduhñ; mänit hajxy xyhuunghádät.

⁷⁻⁸ 'Ja'a jäya'ay ja'a Diosmädia'agy hajxy ca'a mæbøjpä, cab hajxy ñajuø'øy waambaty ja'a Dios hajxy jia pa'ya'axy. Ja capxp hajxy jaduhñ ja naañ ja tsojc. Paady hajxy jaduhñ jia capxy cooc tyijy ja'a Dios hajxy jaduhñ miädowa'añíjäm. Pero mijts, cab hajxy jaduhñ mbahix mbadúnät. Hix, jäguemiä ja'a Dios ñajuø'øy tijaty hajxy hñajty myajmaajiajpy.

⁹ Jaduhñä Dios hajxy mba'yá'axät:
Teedy, jim miich mdsäna'ay tsajpootyp;
ween miich ja'a cu'ughajxy xwyiingudsähgø'øy.

¹⁰ Ween ja'a mmäjaa min yaa myajcähxø'øgy hädaa yaabä naaxwiin.
Ween ja'a jäya'ay ja'a mmädia'agy hajxy yaa xquiudiuunä hädaa yaabä naaxwiin,
neby jim xquiudiuunän tsajpootyp.

¹¹ Højts ja'a caayyøøc huucøøc móoyyác jabom-jabom.

¹² Højts ja'a nbojpä ngädieey méé'xác neby højts tøø nmämee'xiän ja'a højts tøø xñägädieeyø'yäbä.

¹³ Ca'a højts xyajcädieey; pero pädáacác højts hodium neby højts jaduhñ nga'a cädieeyät.

Miich hanehmb; miich ja'a mäjaa mmøød; miich møj jaančh homiänaajä.
Amén.

¹⁴ 'Coo mijts jaduhñ mmämée'xät ja'a hajxy tøø xñägädieeyø'yäbä, mänitä Dios hajxy jaduhñ xmiée'xpät, ja'a nDeedyhájtäm ja'a jim tsänaabiä tsajpootyp.

¹⁵ Pero coo wiinghäna'c hajxy jaduhñ mga'a mämée'xät, cabä Dios ja'a mbojpä mgädieey hajxy jaduhñ xmiée'xät.

¹⁶ 'Jii jäya'ayhajxy näje'e, coo hajxy hñajty yhayuuhada'añ, jaduhñ hajxy ñibiäda'agyii nebiä jootmayhajpän. Paady hajxy jaduhñ ñibiäda'agyii, jaduhñ hajxy quiähxø'øga'añ jäya'awyiinduum coo hajxy hñajty yhayuuhaty. Tøyhájthøch mijts nnäma'ay, cab hajxy jaduhñ tii piaada'añ.

17 Pero mijts, cab hajxy jaduhñ mnibiäda'agóøjät nebiä jootmayhajpän. Coó hajxy hñajty mhayuuhada'añ, yajxón hajxy mniyhonóøjät mniwyiimbujóøjät.

18 Jaduhñ hajxy mga'a yajcähxó'ögät maa ja'a cu'ugän pø mhayuuhajp hajxy hñajty. Hamee'ch ja'a Dios hajxy jaduhñ xyhíxät, ja'a ca'a cähxø'pä. Jaaya'ay hajxy jaduhñ xmio'owaamb ja'a hoyhajt ja'a weenhajt.

19 'Cabä mjoot hajxy yaa mbädá'agät tijaty yaabä naaxwiin. Haagä ma'adaamb jaduhñ cøxiä mäduhñtiä hädaa yaabä naaxwiin. Y jaanç tehñ wiädiyp ja'a mee'tspähajxy.

20 Pero jaduhñ hajxy mwiinmahñdyhádät neby hajxy hoy mwädítät. Jaduhñ hajxy jootcuyc mhídät jim tsajpootyp; caj pøn jim xyagjootmayhádät.

21 Pøn jaduhñ ja wi'i miäyøøhadaamb hädaa yaabä naaxwiin, jimä jioot hajxy jaduhñ piäda'agy maa ja'a xädø'øñän. Pero pøn hoy wäditaamb, jimä jioot jaduhñ piäda'agy maa ja'a Diosän.

22 'Pø mmøødä howyiinmahñdy hajxy, mänit hajxy hoy mwädítät nebiä Dios choquiän.

23 Pero pø cabä mwiinmahñdyhajxy yhooyä, cab hajxy hoy mwädítät nebiä Dios jia tsoquiän.

24 'Cabä wiindsón hoy metsc mmøødtúnät. Mxøøghadaamb by tu'ug; jatu'ugpä jaduhñ mdsogaamb by. Hoy ja'a miädia'agy jaduhñ mgudiunaanä. Jaanä jaduhñduhmbä, coo ja'a mjoot mbädá'agät maa ja'a xädø'øñän, cabä Dios jaduhñ hoy mwiingudsähgø'øwät.

25 'Jaduhñäts mijts nnäma'ay, ca'a hajxy mwi'i tiajy mwi'i miay tijaty hajxy mnäjuggyhádäp, tii hajxy mwithádäp. Maas tsoobaatp ja'a jugyhajt jaduhñ quejee ja'a cay, y maas tsoobaatp ja'a ni'x jaduhñ quejee ja'a wit.

26 Høxtahñdsä muuxyhajxy, cab hajxy ñi'iby tiuñ, cab hajxy tii piäda'agy tsehñjooty. Pero ja'a nDeedyhájätäm ja'a jim tsajpootypä, je'eds jaduhñ yagjøø'xp yajpøjp. Y mmaas tsoobaatp mijts quejee ja'a muuxyhajxy.

27 Ni pøn jaduhñ hamdsoo quia'a yajniijugyhádóøjät.

28 'Cabä wit hajxy mnädaj mnämáyät. Høxtahñdsä pøjy hujts, cab tii tiuñ.

29 Pero maas yajxón je'e quejee ja'a rey Salomón hijty; jaanç tehñ yajxón ja'a Salomón hijty jegyhajty ñibiäda'agyii.

30 Ja'a pøjy hujts, yajxón ja'a Dios jaduhñ tøø quiunuu'xy. Y häyaa jaboom hajxy jaduhñ ño'oga'añ. Y mijts, xmiaas cunuu'xaamb mijts ja'a Dios, hoy hajxy mga'a ja mäßøcy.

31 Ca'ads hajxy mdajy mmay; ca'a hajxy mwi'i miäna'añ: "Tii ngáayyämb, tii nhúucämb, tii mwithájtämb."

32 Yø'øduhmbä hajxy yhøxtaaby ja'a Dios hajxy ca'a wiingudsähgøøbiä. Pero ja'a nDeedyhájätäm jim tsajpootypä, ñajuøøby je'eduhñ coo mijts myajmaajiaty.

33 Mhøxtá'awäp hajxy jayøjp neby hajxy hoy mwädítät, neby hajxy jaduhñ jim mnócxät maa ja'a Diosän. Jaduhñä Dios chocy. Mänit hajxy jaduhñ cøxiä xmió'owät.

34 Ca'a hajxy mwi'i tiajy mwi'i miay ja'a jaboomgøxpä; ween hamdsoo yhuuc habaady. Mäðøyyä ja'a tsaächpä hajxy xpiaada'añ ja'a jäda'agøxpä.

7

1 'Cabä wiinghäna'c hajxy mnähójät, coo ja'a Dios hajxy jaduhñ xñä'ä yajcumädówät.

2 Jaduhñ hajxy xyajcumädówät nej mijts wiinghäna'c hñajty tøø mnähojjiän.

3-4 Coo ja'a mmägu'ughajpä weeñtiä quiädiéeyät, y coo miich hānajty maas hanaxiä tøø mgädieey, cab jaduhñ yhawinmatsä coo ja'a mmägu'ughajpä waamb mnämä'awät.

5 Mänitā mmägu'ughajpä jaduhñ hawinmats mwiingapx mjøjcapxø'owät, coo miich hānajty tøø myajniñähwa'ačhii.

6 'Cabä jäya'ay hajxy hadsip mnämä'awät coo ja'a Diosmädia'agy hajxy miäbögät. Pø cab hajxy jaduhñ miädoṽa'añ, ca'a hajxy hadsijpc mduñ, coo hajxy jaduhñ ñä'ä jootmä'adät.

7-8 'Coo ja'a Dios hajxy tii mmäyujwä'anät, mänit hajxy jaduhñ xmió'owät; coo hajxy mmānuu'xtä'agät, mänit hajxy jaduhñ xpiuhbédät.

9 'Coo ja'a mhuung ja'a tsajcaagy xmiäyujwa'añ, je'eds jaduhñ mmooby, túhmäts. Cabä tsaa mmo'oy.

10 Y coo hacx jaduhñ xmiäyujwa'añ, je'eds jaduhñ mmooby, túhmäts. Cabä tsahñdy mmo'oy.

11 Hoorä, je'edsä mhuung hajxy mmooby ja'a hoybä, hoy mijts mja haxøøgjäya'ayä. Pero ja'a nDeedyhájtām jim tsajpootypä, hojiäya'ay je'e. Xmió'owaamb ja'a hoyhajt hajxy jaduhñ coo hajxy mmäyujwä'anät.

12 'Jaduhñäts mijts ja'a jäya'ayhajxy mnäxúu'tspät nej mijts myajnäxuudsä'añ. Jaduhñä Moisés jecy miänaañ coo hajxy ngudiúunämät. Jaduhñ hajxy jecy miänaambä, ja'a Diosmädia'agy hajxy jecy yajwä'xäbä.

13-14 'Hamäjaa jim mnöcxät Dioswiinduum. Jaduhñ mäwínäts jim nebiä xu'udstu'ujän; cab hajxy jaduhñ nämay piaady. Pero coo jiiby mhädä'agät haxøøgtuum, cab jaduhñ yhamäjaajä. Jaduhñ mäwínäts je'e nebiä møjtu'ujän; nämay hajxy jiiby yhäda'agy.

15 'Mnigwieendähadøøjäp hajxy maa ja'a jäya'ayhajxy tyijy Diosquexypän. Nä'ä hønndaacp hajxy jaduhñ. Jaduhñ hajxy ñibiäda'agyii nebiä mabøjpan, pero cab hajxy tiehm miäböcy; jaančh tehñ quia'awiindøyy hajxy jaduhñ.

16 Haxøøg hajxy jiatcø'øyy; jaduhñ hajxy mhøxcábät coo haxøøgwiinmahñdy hajxy miøødä. Jaduhñ mäwínäts hajxy je'e nebiä hujts nebiä haptiän. Ja'a wädsats, cab jaduhñ tiøømhaty nebiä tsaatypän. Ja'a hapy, cab jaduhñ tiøømhaty nebiä piidsän.

17-18 Mädyii quepychaa hoy, hoy tiøømhaty; mädyii ca'a hoy, cab hoy tiøømhaty.

19 Mädyii quepychaa jaduhñ hoy ca'a tøømhajp, piujxyp hajxy jaduhñ; mänit hajxy ño'ogy.

20 Ja'a jäya'ayhajxy haxøøg jatcøøbiä, jaduhñ mäwínäts hajxy je'e nebiä quepychaa hoy ca'a tøømhajpän. Jaduhñ hajxy mhøxcábät coo haxøøgwiinmahñdy hajxy miøødä.

21 'Nämäyhøch ja'a jäya'ayhajxy xjia nämä'ay: "Wiindsøn." Pero cab hajxy nägøxiä jim tiägø'øwa'añ Dioswiinduum jim tsajpootyp. Pønjätyhøch ja'a nDeedy ja'a miädia'agy xquiudiúunäp, je'eds jim tägø'øwaamb.

22 Coo ja'a naaxwiimbä hānajty wyiimbida'añ, mänitøch hajxy nämay xjia nämä'awa'añ: "Wiindsøn, tøø højts ja'a Diosmädia'agy nyajwa'xy ja'a miich mmäjaagøxpä; tøø højts ja'a møjcu'u ngøxy yajpäyø'øgy ja'a miich mmäjaagøxpä; tøø højts ja'a hoy-yagjuøøñäjatypä may nyajcähxø'øgy ja'a miich mmäjaagøxpä."

23 Mänitøch hajxy nnäma'awa'añ: "Cábøch mijts mänaa tøø nhixyhaty. Jua'ads hajxy jim; haxøøg ja'a mwiinmahñdyhajxy jaduhñ."

24 'Pønñhøch nmädia'agy xmiädóowäp, coo jaduhñ quiudiúnät nébiøch nhane'emiän, jaduhñ mäwínäts je'e nebiä jäya'ay ja'a tiøjc tøø quiojjiän tsaawiing.

²⁵ Mänit com tiuuyy. Mänitä møjnøø quiomgädaacy. Mänitä tøjc møc miøjpojpejty. Pero cabä tøjc ñä'ä jijty, je'eguiøxpä coo tsaawiing quiojjiä.

²⁶ Pero pøn̄høch nmädia'agy tøø xquia'a cudiuunä nébiøch nhane'emiän, jaduñ māwīnāts je'e nebiä jäya'ay ca'a jajpän. Jiibiä tiøjc quiojy tsabiu'ujooty.

²⁷ Mänit com tiuuyy. Mänitä møjnøø quiomgädaacy. Mänitä tøjc miøjpojpejty møc. Mänit piuumy.

²⁸ Mänitä Jesús miädiaacpädøøyy. Mänitä jäya'ayhajxy yagjuøøyy nebiaty ja'a Jesús hānajtý tøø yajnähixø'øy.

²⁹ Jaduhñ hānajtý yajnähixø'øy nebiä møjcuñdujtmøødpän. Ja'a cu'ug wyi-indsøn̄hajxy, cab hajxy hānajtý jiaty jatý.

8

¹ Tun̄guhduum ja'a Jesús hānajtý tøø yajnähixø'øy. Mänit miānajnä. Mänit majiäya'ay piadu'ubøjcä.

² Mänit pa'amjäya'ay Jesús ñāmejch. Haxøøgpa'am hānajtý miøød. Mänitä Jesús wyiin̄jijcädaacä, wyiingudsähgøøyyä. Mänit ñāmaayyä:

—Wiindsøn̄, pø chojpy ja'a mjoot jaduñ, hóyhøch jaduñ xyajnähwa'ads xyajcuñwä'adsät.

³ Mänitä Jesús ja'a mähdiøjc ñähdooñ. Mänit ñāmaayy:

—Chójp̄øch ja'a njoot jaduñ; tøø jaduñ mnähwa'ačh mguhwa'ačh.

Mänitä ja'a mähdiøjc jiaančh nähwaach jiaančh cuhwaach.

⁴ Mänitä Jesús miānaañ:

—Huuc madow, ca'a pøn̄ mnä'ägädä hawaanä. Nøcx jim̄ Jerusalén maa ja'a teediän. Jim̄ myajcähxø'øgät coo tøø mnähwa'ačh coo tøø mguhwa'ačh. Jim̄ä xädø'øn̄ mguyoxø'øwät nebiä Moisés jecy yhanehm̄iän. Jaduhñä hijxtahñd myajcähxø'øgät coo tøø mnähwa'ačh coo tøø mguhwa'ačh.

⁵ Mänitä Jesús miejch maa ja'a cajpt hānajtý xiøhatiän Capernaum. Coo quiajptägøøyy, mänit ja'a Jesús ja'a soldadowiindsøn̄ ñāmejch.

⁶ Mänit Jesús ñāmaayyä:

—Jím̄høch ja'a nmoonsä tu'ug quio'na'ay tøgooty. Tøø ja'a tiecy miucy. Hanaxiä jaduñ chaačhpøcy tehngajnä.

⁷ Mänitä Jesús miānaañ:

—Nøcxy nhuuc yaghoyø'øy.

⁸ Mänitä soldadowiindsøn̄ yhadsooyy:

—Pero Wiindsøn̄, cab jaduñ yhahixø'øy coo miich jiihy mdägø'øwät maačh ndøgootiän, je'eguiøxpä coo miich mmøjjä mjaančhä. Nägooyyä miich jaduñ mmäná'anät cooçh nmoonsä yhoýø'øwät, pues hoyø'øwäp.

⁹ Hané'emyhøch nhity; jím̄høch nwiindsøn̄bä, y jím̄høch nsoldado. Coočhä nsoldado tu'ug nnämä'awät coo homiaajä ñócxät, nõcxäp jaduñ; y coočh nnämä'awät coo myínät, mínäp jaduñ. Y coočhä nmoonsä waam̄b nnämä'awät, quiudiünäp jaduñ.

¹⁰ Mänitä Jesús jiaančh tehñ yagjuøøyy. Mänit ñāmaayy ja'a hajxy hānajtý pawädiypä:

—Cábøchä nmägunaaxhajxy jaduñ miäbøcy neby yø'ø craa miäbøquiän, y jäguem̄ yø'ø chooñ. Tøyhajt jaduñ.

¹¹ Coo ja'a Dios ja'a miäjaa hānajtý yajcähxø'øga'añ, mänit hajxy hānajtý nāmāy miedsa'añ, ja'a hajxy hānajtý mabøjpä. Wiinduhmyhagajpt hajxy hānajtý choona'añ. Mänit hajxy hānajtý miøødhida'añíjām ja'a Abraham møødä Isaac møødä Jacob.

¹² Pero ja'a judíoshajxy ca'a mabøjpä, cab hajxy hānajty jim quiooda'añ Dioswiinduum. Jiiby hajxy jaduhñ quiuhjuipnaxa'añii møjcu'uhaam maa yhagoodsän. Jiiby hajxy jaduhñ chaachpøga'añ tehñgajnä.

¹³ Mānitä Jesús ja'a soldadowiindsón ñāmaayy:

—Nøcx maa ja'a mdøjcän. Tøø jaduhñ mmäbøcy, tøø ja'a mmoonsä jaduhñ yhojøø.

Mānitä ja'a mioonsä jiaančh hoyøøyy.

¹⁴ Mānitä Jesús ñøcxy maa ja'a Pedro tiøjcän. Jiibiä Pedro miøødhoc hānajty quio'na'ay tomiøød.

¹⁵ Mānitä Jesús ja'a tājāya'ay ja'a quio'ø ñahdoonä. Mānitä tiøy tiøjch. Mānitä tājāya'ay piädø'cy. Mānitä tiägøøyy mayhajtuumbä ja'a Jesúscøxpä.

¹⁶ Coø quioodsøøyy, mānitä pa'amjāya'ayhajxy may yajmejtsä maa ja'a Jesúsän. Tøø hajxy hānajty näje'e miächii ja'a møjcu'ujām. Mānitä Jesús quiapxy. Manityä hajxy yhøxmajtsä ja'a møjcu'ujām. Jaduhñä pa'amjāya'ayhajxy quioxy yajmøcpøjcä; ja'a Jesús jaduhñ yajmøcpøjc.

¹⁷ Tøjajt ja'a Diosmädia'agy jaduhñ maa jaduhñ myiñän cujaay, mānaa ja'a Isaías jecy miāna'añän: “Jaaya'ay ja'a nba'amhājtam tøø xyajñähwáatsäm tøø xyajcuhwáatsäm.” Ja'a Isaías, je'eds ja'a Diosmädia'agy jaduhñ jecy yajwa'x.

¹⁸ Coø ja'a Jesús yhiixy coø hānajty cujc tøø piäda'agyii ja'a majiāya'ay, mānitä miānaañ coø hajxy ñāxāt mejyhawiimb møødä jiamiøødhajxy.

¹⁹ Cajnä hajxy hānajty tiu'ubøcyñä, mānitä Jesús jāya'ay tu'ug ñāmejtsä. Yajñähixøøby hānajty je'ebä maa ja'a tsajtøjcän. Mānitä Jesús ñāmaayyā:

—Wiindsón, min̄ nhuuc jamiøødhaty. Homiaajä mnøcxāt, quipxy nbawädítät.

²⁰ Mānitä Jesús yhadsooyy:

—Ja'a xøøgaa, jimä jiut je'e; ja'a muuxy, jimä pie'eñ je'e; pero høøch, ja'a Diosquexypä, cábøch ndøjc maach nboo'x nhāñá'awät.

²¹ Mānitä Jesús ja'a jiamiøød tu'ug miānaañ:

—Wiindsón, mānitøch miich nbadu'ubøga'añ coöchä ndeedy hānajty tøø yho'nä, coöch hānajty tøø nyajnaaxtägøøñä.

²² Mānitä Jesús yhadsooyy:

—Ween ja'a mjujy ja'a mmägu'ughajxy yajnaaxtägøø. Cábøch ja'a nmädia'agy hajxy xpianøcxaanä. Pero miich, ween quipxy nwädíjtām.

²³ Mānitä Jesúshajxy tiägøøyy barcojooty møødä jiamiøødhajxy. Tiu'ubøjñä hajxy barcojooty.

²⁴ Mānitä poj møc piädø'cy, høxtä cugujjøøyy ja'a nøø jiiby barcojooty. Pero tøø ja'a Jesús hānajty miaaho'nä.

²⁵ Mānit hoy yuxylíjām ja'a miägu'ughajpä tu'ug. Mānit ñāmaayyā:

—Wiindsón, højts yajñähwáatsäc. Cham højts nnøøho'ogø'øwa'añ.

²⁶ Mānitä Jesús yhadsooyy:

—Tii hajxy coø mwi'i chähgøø. Cábøch mijts ja'a nmädia'agy hajxy jaduhñ xñä'a mabøjcä, paady hajxy mdsähgøø.

Mānit piädø'cy. Mānitä poj jiojcunāma'awøøyy møødä mejy coø quia'a miññät. Mānit jaduhñ yuungøøyy. Caj ñä'ägädä pojñä.

²⁷ Mānitä miägu'ughajpāhajxy yagjuøøyy. Mānit hajxy ñiñāmaayyā:

—Nebiäda'a jaduhñ coø miädia'agy miäbøjcäxä høxtä ja'a poj møødä mejy.

²⁸ Mānitä Jesúshajxy jim̄ miejch mejyhawiimb maa ja'a naax hānajty xiøhatiän Gadara. Jimä cabāsantä hānajty tu'ug. Mānitä Jesús jāya'ay nāmetsc ñāmejtsä. Jim̄ hajxy hānajty tøø chooñ maa ja'a cabāsantän. Tøø hajxy hānajty miächii ja'a møjcu'ujām. Jaančh tehñ quia'awiindøyy hajxy hānajty ñibiäda'agyii. Ni pøn hajxy hānajty quia'a yajnaxa'añ maa ja'a tu'ujän.

29 Mänitä Jesús tiägøøyy wiinguyaaxøøyyäbä:

—Jesús, tii højts xwia'ana'añ, miičh Dioshuung. Cajnä yhabaady coo højts xyajcumädówät.

Ja'a mójcu'uhajxy jaduhñ mänaañ, ca'a jiäya'ayä.

30 Jim mayhädsøm hānajty wiädity tunwiinmānac jäguemjuøøby.

31 Mänitä Jesús miānuu'xtaacä ja'a mójcu'uhajxy:

—Pø xyajpädsømaamb højts yaa maa hädaa jäya'ayän nämetscä, na'añ højts jiiby nhuuc tågø'øyy maa yø'ø hädsøm jioodootyhajxiän.

32 Mänitä Jesús miānaañ:

—Nøcx hajxy jiiby tågø'øw.

Mänitä mójcu'uhajxy ñähwaach ja'a jäya'ay nämetspä. Mänitä hädsøm hajxy ñāmejch. Cøjx ja'a hädsømhajxy wyiinmānacpäyø'øgy. Cøjx hajxy quiuhc-ahnaxxy naaxøjpcøxp. Mejjiooty hajxy hoy quiuga'awø'øyy. Cøjx hajxy jiiby yho'ogy mejjiooty.

33 Mänitä hädsømgüeendāhajpāhajxy chähgø'øbäyø'cy. Coö hajxy jim miejch maa ja'a cajptän, mänit hajxy miädiaacy nebiaty hajxy hānajty tøø yhiixy, coö ja'a mójcu'uhajxy hānajty tøø ñähwa'ačh ja'a jäya'ay nämetspä.

34 Cøjx ja'a cu'ughajxy ñøcxy päyø'øguiä maa ja'a Jesúsän. Coö ja'a Jesús hajxy piaaty, mänit hajxy miānuu'xtaacy coö ja'a Jesús jim chóonät maa ja'a ñaaxhajxiän.

9

1 Mänitä Jesúshajxy tiägøøguiumbä barcojooty, ñajxtägajch hajxy jadāhooc mejihawiimb maa ja'a quiajpthajxiän.

2 Mänitä tecymiucypiä tu'ug quiøømiejtsä tsaajiooty maa ja'a Jesúsän. Ja'a mähdiøjc ja'a miägu'ughajpāhajxy jaduhñ cøømiejtsä. Coö ja'a Jesús yhiixy coö hajxy hānajty miäbøcy, mänitä Jesús ja'a mähdiøjc ñāmaayy:

—Huong, jootcugø'øw; tøø ja'a mbojpä mgädieey xñähwa'ačh.

3 Jimä ley-yajñähixøøbiädøjc hānajty näje'e tiāna'ay ja'a Jesús ñähmøjc. Coö hajxy jaduhñ miädooyy nebiä Jesús miānaañ, mänit hajxy näje'e quiopcooty tiägøøyy mädiaacpä: “Capxtägooby hädaa craa jaduhñ maa ja'a Dioscøxpän.”

4 Ñajuøøby ja'a Jesús hānajty neby hajxy hānajty miädia'aguiän quiopcooty. Mänit miānaañ:

—Tii haxøøgwiinmahñdy hajxy coö mmøødhaty mgopcooty.

5 Mädyii mädia'agy maas tsip, coöch hädaa mähdiøjc nnämä'awät: “Tøø ja'a mbojpä mgädieey xñähwa'ačh”, tøgä maas tsip jaduhñ coöch nnämä'awät: “Tānaayyø'øg, yo'oyø'øg.”

6 Nyajcähxø'øgāambiøch coöchä cuhdujt jaduhñ nmøødä hädaa yaabä naaxwiin coöchä pojpä cädieey nyajñähwá'adsät, høøch ja'a Diosquexypä.

Mänitä Jesús ja'a tecymiucypiä ñāmaayy:

—Tānaayyø'øg, widsø'øg yø'ø mdsaa, nøcxnä maa ja'a mdøjcän.

7 Mänitä tecymiucypiä tiānaayyø'cy. Mänit ñøcxnä maa ja'a tiøjcän.

8 Coö ja'a cu'ughajxy jaduhñ yhiixy coö ja'a tecymiucypiä tøø yhooyø'øyy, mänit hajxy chähgøøbiøjcy. Mänitä Dios hajxy wyiingudsähgøøyy, je'eguiøxpä coö ja'a Jesús ja'a mājaa hānajty tøø mio'oyii, ja'a Diosquexypä. Cab hajxy hānajty ñajuø'øyy pø Dioshuung hānajty je'e, ja'a Jesús.

9 Mänitä Jesús jim chohñ. Mänitä jäya'ay tu'ug yhiixy, ja'a xøhajpä Mateo. Jimä Mateo hānajty yhäña'ay maa hānajty yajñājuudi'udiän. Mänitä Mateo ñāmaayyä:

—Jam quipxy wädijtäm.

Mänitä Mateo tiānaayyø'cy. Mänit ja'a Jesús piadu'ubøjcy.

¹⁰ Jimä Jesús hānajtŷ quiaŷ tōgootŷ mōōdā miāgu'ughajpāhajxy. Mānitā ya-jnāhjuudiutpāhajxy may miejch māgaabiā, mōōdā jāya'ayhajxy ca'a panōcxpā ja'a judíos quiuhdujt. Mānitā Jesús hajxy tiāgōōyy mōōdcaabiā.

¹¹ Jimä fariseoshajxy hānajtŷpā, ja'a hajxy hānajtŷ hoy jaanč tehŷ pi-anōcxpā ja'a Moisés miādia'agy. Mānitā fariseoshajxy miānaaŷ:

—Tii yō'ō mwiindsōŷ coo miōōdcay ja'a yajnāhjuudiutpāhajxy mōōdā cubo-jpā cugādieeyhajxy —nōmā Jesús miāgu'ughajpāhajxy ŷāmaayyā.

¹²⁻¹³ Miādoow ja'a Jesús jaduhŷ. Mānit miānaaŷ:

—Pōŷ jaduhŷ mōc, caj yajtsooyō'oy; pōŷ jaduhŷ pa'ammōōd, je'eds jaduhŷ yajtsooyōōby. Jaduhŷ māwīnōch hōōch nebiā mādsooyōōbiān. Pāadyhōch yaa tōō nmiŷ tōō nmech, nébiōch ja'a cubojpā cugādieeybāhajxy nnāmā'awāt coo ja'a yhaxōōgwiinmahŷdy hajxy ween ŷajtshixō'oy. Ja'a hojiāya'ayhajxy, cābōch hajxy je'e waamb nnāma'awa'aŷ. Nōcx hajxy habōc tii ja'a Diosmādia'agy jaduhŷ ŷānōōmby: “Chōjpiōch ja'a njoot jaduhŷ coo hojiōot hajxy mmōōdhādāt; cābōch jaduhŷ nmānaaŷnā coo animal hajxy myōxāt maa ja'a hōōchcōxpān.”

¹⁴ Mānitā Jesús ŷāmejtsā ja'a Juan māyajnābejpā miāgu'ughajpāhajxy. Mānitā Jesús miāyajtōōwā:

—Tii miīch mmāgu'ughajpāhajxy jaguiay quia'a nā'āgādā hida'aŷ. Naxy hōjts jaguiay tu'xōōjaty nhity tāhoocjaty; jaduhŷ hōjts ja'a Dios nwiin-gudsāhgō'oy. Jaanā jaduhŷnā fariseoshajxy yhijpā jaguiay.

¹⁵ Mānitā Jesús yhadsooyŷ:

—Coo ja'a jāya'ayhajxy mānaa piōcy yhu'ugy, cabā woyba wichpā hajxy jiō'oy xiuuč. Xoonāacp hajxy jaduhŷ, je'eguiōxpā coo ja'a jamiō'ōd jyiijā. Jaduhŷ māwīnōch hōōch nebiā jamiō'ōdān. Pāadyhōch nmāgu'ughajpāhajxy jaguiay quia'a hity. Habaadaamb jaduhŷ coōch yaa ndsoonaanā; mānit hajxy mābōcypā jaguiay yhida'aŷ.

¹⁶ Cab jaduhŷ pōŷ tucwit yhagōyō'oy jemŷwyithaam. Mūgāp ja'a jemŷwyit jaduhŷ y maas hanaxiā ja'a tucwit jaduhŷ quiōōdsāt.

¹⁷ Jaanā jaduhŷnāduhmbā, cabā pōŷ jemŷvyino quiudemō'oy tucwajhacxujiooty. Cōōdsāp ja'a wajhacxuy jaduhŷ y hōxyōgāp ja'a vino jaduhŷ. Haagā tāgōyyāp ja'a wajhacxuy jaduhŷ mōōdā vino. Pero jiibiā jemŷvyino hajxy quiudemō'oy maa ja'a wajhacxuy jemŷbiān. Jaduhŷ ni mādyii quia'a tāgōyyāt.

¹⁸ Cajnā ja'a Jesús hānajtŷ miādiaacpādō'oy, mānitā tsajtōjcwiindsōŷ tu'ug miejch. Mānitā Jesús wyiingo'naaguiādaacā. Mānit ŷāmaayyā:

—Naamhō'ogyhōchā nhuung ja'a to'oxypā. Coo miīch nōcxy mnāhdoŷ, mānit jiuypiojtāgātsāt.

¹⁹ Mānitā Jesús piādō'cy. Mānit jaaya'ay miōōdtu'ubōjcy mōōdā Jesús miāgu'ughajpāhajxy.

²⁰⁻²¹ Jimä tājāya'ay hānajtŷ tu'ug hōxhaam pianōcxy. Pa'ammōōd hānajtŷ je'e. Majmetscjumōjt ja'a ŷō'ty hānajtŷ tōō wyi'i xiee'xy, weenjaty weenjaty. Jaduhŷnā tājāya'ay hānajtŷ miādia'agy quiopcooty: “Nāgōōyyōch ja'a wyitpa'a nnāhdōōnāt, mānitōch nmōcpōgāt.” Coo ja'a Jesús ja'a tājāya'ay jiāguyhdiāgōōyyā, mānitā wyitpa'a ŷāhdōōnāxā.

²² Mānitā Jesús yhee'pwiimbijty, Mānit ja'a tājāya'ay yhijsy. Mānit miānaaŷ:

—Huong, jootcugō'ow; tōō jaduhŷ mmōcpōcy, je'eguiōxpā coo tōō mmābōcy. Mānitā ja'a tājāya'ay miōcpōjcy.

²³ Mānitā Jesús hajxy jim miejch maa ja'a tsajtōjcwiindsōŷ tiōjcān. Jiibiā xuuxpādōjc-hajxy hānajtŷ yho'ogyjiāya'awyiinxu'uxy. Jiibiā jāya'ayhajxy hānajtŷ wyi'i yhaamhaty.

²⁴ Mänitä Jesús miänaañ:

—Pädsøm hajxy jiiby. Cab yø'ø tøø yho'ogy, nä'ä maab yø'øduhñ.

Mänitä Jesús ñäxiicä.

²⁵ Cøjx hajxy jaduhñ piädsøm̄y. Mänitä Jesús tiøjtägøøyy. Mänitä to'oxyhäna'c quiø'ømajch. Mänitä to'oxyhäna'c yhäñaayyø'cy.

²⁶ Mänitä mädia'agy wiädijty wiinduhmyhagajpt coo ja'a to'oxyhäna'c tøø yagjujypiogyii.

²⁷ Coo ja'a Jesús hajxy jim̄ chohñ, mänitä wiindshajxy nämetsc piadu'ubøjcy yáaxäp:

—Højts näxúu'tsac. David miich hijty mhaphajpy mdeedyhajpy.

²⁸ Coo ja'a Jesús tiøjtägøøyy, mänitä wiindshajxy miäwiingooñ. Mänitä Jesús miänaañ:

—Nej, mmäbøjpy hajxy jaduhñä coochä mäjaa nmøødä coo hajxy nyaghi-jxø'ögädä.

Mänit hajxy miänaañ:

—Wiindsøn, nmäbøjpy højts.

²⁹ Mänitä Jesús ja'a wiinds wyiinhajxy ñähdoonä. Mänitä Jesús miänaañ:

—Ween hajxy mhijxø'øgy coo hajxy tøø mmäbøcy.

³⁰ Mänit hajxy yhijxø'cy. Mänitä Jesús miänaañ:

—Ca'a pøn hajxy mnä'ägädä hawaanä.

³¹ Coo ja'a wiindshajxy jim̄ chohñ, mänit hajxy tiägøøyy mädia'agy-yajwädijpä coo hajxy tøø yaghijxø'ogyii ja'a Jesúsäm.

³² Mänitä huum tu'ug yajmejtsä maa ja'a Jesúsän. Tøø hänajty miačhii ja'a møjcu'ujäm.

³³ Mänitä Jesús ja'a møjcu'u jiiby yajpäyø'cy. Mänitä ja'a huum quiapxø'cy. Yagjuøøyy ja'a jäya'ayhajxy jaduhñ. Mänit hajxy miänaañ:

—Ni mänaa jaduhñ pøn tii quia'a yagjadyii nebiä hädaajän yaa Israelnaax-ooty.

³⁴ Mänitä fariseoshajxy miänaañ:

—Paady yø'øya'ay ja'a møjcu'u yajpäyø'øgy, coo ja'a møjcu'ugong miäjaa miøødhajtä.

³⁵ Cøjx ja'a Jesús wiädity wiinduhmyhagajpt. Homiaajä hänajty wiädity, jiiby hänajty yajnahixø'øgy tsajtøgooty coo ja'a Dios ja'a miäjaa mobädajp yajcähxø'øga'añ. Yajnaxyp hänajty homiädyyi pa'amä.

³⁶ Ñäxuu'chp ja'a Jesús ja'a majiäya'ay hänajty. Jaduhñ mäwínäts hajxy hänajty nebiä meegän, ja'a cajpä wyiindsøn. Nebiä tägowiädijpän hajxy hänajty je'e. Nebiä jootmayhappän hajxy hänajty je'e.

³⁷ Mänitä Jesús ñämaayy ja'a miägu'ughajpähajxy:

—Yø'ø majiäya'ayhajxy, hoy jaduhñ coochä nmädia'agy hajxy xmiäbøjcät. Pero cab højts nnämäyyäm, højts ja'a mädia'agy nyajwá'xämbä.

³⁸ Mänuu'xta'ag ja'a Dios hajxy coo ween ja'a mägu'ughajpähajxy xjiaac móoyyämät, neby højts ja'a mädia'agy hajxy xmiøødyajwá'xämät.

10

¹ Mänitä Jesús ja'a miägu'ughajpähajxy miøjyaaxy ja'a nämajmetspä. Mänitä cuhdujt miooyy coo ja'a møjcu'u hajxy yajpäyø'øgät, coo homiädyyi pa'amä hajxy yajnáxät.

² Jaduhñä nämajmetspähajxy hänajty xiøhaty: Simón Pedro møødä piuhya'ay Andrés; ja'a Zebedeo yhuunghajxy, Jacobo møødä Juan;

³ Felipe; Bartolomé; Tomás; Mateo ja'a yajnahjuudiuutpä; Jacobo, ja'a Alfeo yhuung; Lebeo Tadeo;

⁴ Simón ja'a cananista; Judas Iscariote, ja'a Jesús hānajty ya-jyagho'ogáanäbä.

⁵ Mänitá Jesús ja'a nāmajmetspāhajxy quiejxy mädia'agy-yajwa'xpä. Mänit nāmaayy:

—Ca'a hajxy jim mnøcxy maa ja'a ca'a judíoshajxy chāna'ayān, y ca'a hajxy jim mnøcxy Samarianaaxooty. Yaayyā hajxy jaduhñ mwädítät, yaa Israel-naaxooty.

⁶ Ja'a jäya'ayhajxy yaabä, jaduhñ mawíinäts hajxy je'e nebiä meeg tågowiädijpān.

⁷ Mnägäpxäp hajxy jaduhñ coo ja'a Dios ja'a miäjaa mobādajpā ya-jcāhxø'øga'añ.

⁸ Myajnáxäp hajxy homiädyi pa'amä møødä haxøøgpa'am. Myagjujypiögäp ja'a ho'ogyjiäya'ay hajxy. Myajpäyø'øgäp ja'a møjcu'u hajxy. Nnā'ä móobiøch mijts hädaa cuhdujt; cábøch mijts nyagjuya'añ; jaduhñ mijtpä, cab hajxy myagjúubiät.

⁹ Cabä xädø'øñ hajxy mgónät ni weeñtiä.

¹⁰ Cabä morral hajxy mwídsät. Tu'uquiä camiixy hajxy mwídsät. Cabä cø'øg hajxy mejtstehñg mmänøcxät. Cabä cuhdajt hajxy mgábät. Jim hajxy mmägaya'añ mmähu'uga'añ maa hajxy hānajty mhamejtsta'aga'añän.

¹¹ 'Coo hajxy maa mgajptägø'øwät, jimä jäya'ay hajxy mhøxtá'awät ja'a hojiootmøødpä; jim hajxy mhamejtstá'agät. Jiiby hajxy mhídät høxtä coonä hajxy hānajty mdu'ubøga'añ.

¹² Coo hajxy mdøjtägø'øwät, mänit hajxy myajpóo'xät.

¹³ Coo hajxy jaduhñ xyajtøjtägø'øwät hamuumdu'joot, mänit hajxy jaduhñ quiunuu'xøøjät ja'a Diósäm; pø caj, cab hajxy jaduhñ quiunuu'xøøjät.

¹⁴ Coo hajxy jaduhñ xquia'a nä'ägä jøjpøgø'øwät, coo ja'a mmädia'agyhajxy xquia'a nä'ägä mädóowät, mänit hajxy jim mdsóonät. Mänitá mdecy hajxy mwiinwop mwiinxídat, nebiä hijxtahñd jaduhñ miähmø'øwät coo mijts jaduhñ tøø xquia'a yajtøjtägø'øy.

¹⁵ Tøyhájtäts mijts nnäma'ay, coo yhabáadät coo ja'a jäya'ayhajxy quiumädowa'añ, maas hanaxiä yø'ø cajpt jaduhñ quiumädowa'añ quejee ja'a Sodomacajpt møødä Gomorracajpt.

¹⁶ 'Maaçh mijts nwiinguexiän, haxøøgwiinmahñdy ja'a jäya'ayhajxy jim miøød. Paady hajxy nähix hahixø'ø mnibiäda'agøøjät. Mee'xxieemy hajxy jaduhñ mwädítät.

¹⁷ Mniyajcopcø'øwøøjäp mijts. Xyajcø'ødägø'øwäp mijts maa ja'a tuungmøødpān. Mänitäts hajxy xwyiinwop xjiøjwóbät maa ja'a chajtøgootyhajxiän.

¹⁸ Høxtä jim hajxy xyajmedsa'añ maa ja'a gobiernä wyiinduumhajxiän, møød jim maa ja'a ca'a judíos wyiinduumhajxiän.

¹⁹ Pero coo hajxy jaduhñ xyajmédsät maa ja'a wyiinduumhajxiän, cab hajxy mdaj mmáyät waambaty hajxy hānajty mmädia'aga'añ. Coo jaduhñ yhabáadät, mänitá Dios jaduhñ xyhawáañät waambaty hajxy jaduhñ mmäná'anät.

²⁰ Cab hajxy hamdsoo mmädia'aga'añ. Dioshespírituhaam hajxy jaduhñ mmädia'aga'añ.

²¹ 'Haxøøg jaduhñ jiada'añii. Hamdsoo hajxy ñiñāhanuu'xø'øwa'añii ja'a tu'que'expä-jäya'ay. Jaduhñ ja'a tieedyhajxy jiatcø'øwaambä møødä yhuung-hajxy.

²² Ja'a høøchcøxpä mijts ja'a jäya'ayhajxy nägøxiä xmiähanhada'añ. Pøn jaduhñ mee'xtujp cøjxta'axiøø, je'eds jaduhñ mähmø'øwaamb hodium.

²³ Coo mijts hajxy xchaačhtiúnät mädu'ughagajpt, mänit hajxy mbäyó'ogät, mänit hajxy mnócxät wiingtuum. Tøyhájtäts mijts nnäma'ay, cooçh hñajty ngäda'aga'añ, hooçh ja'a Diosquexypä, cahnä cajpt hajxy hñajty mwí-inwädityñä maa ja'a judíoshajxy chäna'ayän.

²⁴ 'Cabä pøn jaduhñ jiaty nebiä wyiindsón jiatian.

²⁵ Coo hajxy jaduhñ mjádät nebiä mwiindsøn hajxy jiatian, jootcujc hajxy jaduhñ mhídät. Cooçh jäya'ayhajxy jaduhñ tøø xñäma'ay: "Møjcu'u", jaduhñ mijts hajxy xñäma'awaambä.

²⁶ 'Cabä cu'ug hajxy mdsähgó'owät. Nebiaty hajxy jaduhñ jiatcø'øy hamee'ch, cähxø'øgaamb jaduhñ.

²⁷ Waambátyhøch mijts hamee'chhaam nnajtscapxóøyyäm, ma-jiäya'ayhagujc hajxy myajcapxó'owät.

²⁸ Cab hajxy mdsähgó'owät pøn ja'a mnaaxni'x hajxy xyaghó'cäp; cabä mhääñmä hajxy jaduhñ xyaghó'cät. Ja'a Dios hajxy mdsähgó'owäp; je'edsä cuhdujt jaduhñ mөөд coo hajxy jiiby xquiéxät haxøøgtuum. Jiiby ja'a mnaaxni'xhajxy quihdägóyyät mөөдä mhääñmähajxy.

²⁹ 'Ja'a muuxyhuunghajxy, coo hajxy quia'ay, yhiixyp ja'a nDeedyhájtämhajxy jaduhñ, hoy hajxy quia'a ja tsowä.

³⁰ Jaanä jaduhñ mijts xyhiixpä, høxtä xñajuóøyyäp mijts naag mijts mguh-waay.

³¹ Cabä jäya'ay hajxy mdsähgó'owät; hix, mmaas tsoobaatp mijts quejee ja'a muuxyhajxy.

³² 'Pønjátyhøch ja'a nmädia'agy xmiøødyajtu'ugøøby maa ja'a cu'ugwiinduumän, mänítøch ja'a miädia'agyhajxy nmøødyajtu'ugø'owaambä maaçhä nDeedy wyiinduumän jim tsajpootyp.

³³ Pero pønjátyhøch jaduhñ tu'ugmädia'agy tøø xquia'a mөөдhity maa ja'a cu'ugwiinduumän, ni hooçh jaduhñ tu'ugmädia'agy nga'a mөөдhidaambä maaçhä nDeedy wyiinduumän jim tsajpootyp.

³⁴ 'Cooçh yaa tøø ngäda'agy, paadiä jäya'ayhajxy jaduhñ ñimiädsibø'owa'añii ja'a hooçh nmädia'agyquixpä. Cab hajxy jootcujc yhida'añ.

³⁵⁻³⁶ Tu'tøjc hajxy jaduhñ ñimiädsibø'owa'añii, mөөдä tiaj mөөдä tieedy, mөөдä ñøøx mөөдä miajc, mөөдä jiaxie'eb mөөдä xiocy.

³⁷ 'Pønä tiaj pønä tieedy maas tsojp quejeeçh hooçh jaduhñ xchocy, cábøch ja'a nmädia'agy hoy xpianócxät. Y pønä ñøøx pønä miajc maas tsojp quejeeçh hooçh jaduhñ xchocy, ni je'eçh ja'a nmädia'agy hoy xquia'a panócxäbät.

³⁸ Pønä jioot tsojp cooçh hooçh xpianócxät, pero cabä jioot jaduhñ chocy coo chaačhpógät nébiøch jaduhñ ndsaačhpøga'añän, cábøch nmädia'agy jaduhñ hoy xpianócxät.

³⁹ Pønä jiugyhajt jaduhñ ja wi'i yaghoyø'owaamb, tägóyyäp ja'a jiugyhajt jaduhñ. Pero pønä jiugyhajt najtshixø'owaamb ja'a hooçhcøxpä, je'eds hodi-uum nøcxaamb.

⁴⁰ 'Pøn mijts jaduhñ xchojp, jaduhñ mäwíinøch hooçh xchojpä. Y pøn hooçh hooçh jaduhñ xchojp, jaduhñ mäwíinädsä Dios jaduhñ chojpä, ja'açh tøø xquiéxiäbä.

⁴¹ Ja'a Diosquexyhajxy, hodium hajxy ñøcxa'añ. Jaanä jim hajxy ñøcxaambä pøn jaduhñ tsojp ja'a Diosquexy. Paady hajxy chogyii coo hajxy jaduhñ Dyiosquexiä. Jaanä jim hajxy ñøcxaambä hodium pøn jaduhñ tsojp ja'a hojiäya'ay.

⁴² Coo hädaa häyoobäya'ay tøchñøø ñä'ä mo'owóøjät je'eguiøxpä cooçh jaduhñ xpianócxä, mänit jaaya'ay piäda'agóøjät hodium, ja'a nøø tøø yéquiäbä. Tehm tiøyhajt jaduhñ.

11

¹ Coo ja'a Jesús ja'a jiamiøødhajxy yajwiingapxøøbiädøøyy, mänit jim chohñ. Mänit tiägøøyy yajnahixøøbiä maa ja'a cajpt mäwiingonän.

² Ja'a Juan, tsumyhäñaby hänajty je'e. Coo miädoyhajty coo ja'a Cristo hänajty wiädity yajnahixøøbiä, mänitä miägu'ughajpä metsc quiejxy maa ja'a Jesúsän.

³ Mänitä Jesús hajxy miäyajtøøyy:

—Nej, miich ja'a Crístoja, ja'a Dios jaduhñ quiexaambiä, tögä wiinghäna'c je'ejä.

⁴ Mänitä Jesús yhadsooyy:

—Nøcx ja'a Juan hajxy hawaanä neby hajxy xii mhix mmädoyy.

⁵ Nøcx hajxy yajmøødmädia'ag coo ja'a wiindshajxy tøø yhiixø'øgy, coo ja'a tecymia'adpähajxy tøø yo'oyø'øgy, coo ja'a haxøøgpa'ammøødpähajxy tøø ñähwa'ačh, coo ja'a cuhnatpähajxy tøø miädoowø'øgy, coo ja'a ho'ogyjiäya'ayhajxy tøø jiuypioçy, coo ja'a häyoobäya'ayhajxy tøø yajmøødmädia'agyii ja'a Diosmädia'agy.

⁶ Jootcujc hajxy jaduhñ yhity ja'ačh nmädia'agy hajxy hamuumdu'joot tøø xmiäbøjcäbä.

⁷ Coo ja'a Juan miägu'ughajpähajxy wyiimbijty, mänitä Jesús ja'a cu'ug tiägøøyy møødmädiaacpä ja'a Juancøxpä.

—Coo hajxy tøø mhoy pactuum, ja'a Juan miädia'agy hajxy hänajty mmädoowäänäp, túhmäts. Cabä tsajcapy pojyu'xpä hajxy hoy mhixy. Caj pues, paady hajxy jim tøø mhoy coo ja'a Juan ja'a miädia'agy hajxy hänajty mmädoowaanä.

⁸⁻⁹ Diosquexy je'e, paadiä miädia'agy hajxy hoy tøø mmädoowä, hoy ja'a howyit hänajty quia'a ja møødä nebiä mäyøøjäya'ayhajxy miøødän. Tøyhajt jaduhñ coo ja'a Juan ja'a Diosmädia'agy yajwiingapxø'øy. Pero ja'a Diosmädia'agy hajxy nä'ä jaac yajnahixøøbiä, je'edsä cuhdujt hajxy maas may tøø mio'oyii ja'a Diösäm.

¹⁰ Ja'a Diosmädia'agy jecy mädiäacäbä, Juan je'e. Nømä Dios jecy miänaañ coo ja'a quiuguexy hänajty jayøjp quiexa'añ maa ja'a cu'ugän, ween ya-jwiinxiic yajwiingapxø'øy coo ja'a yhaxøøgcuhdujt hajxy ñajtshixø'owät. Høxháamhøch hänajty ngäda'aga'añ. Jayøjp ja'a Juan jiaančh quejxä; høxháamhøch njaančh cădaacy.

¹¹ Ni pøn jaduhñ jäda'ahaty quia'a mäbaady hädaa yaabä naaxwiin nebiä Juan mäyajnäbejpä ja'a cuhdujt miøødän. Tøyhajt jaduhñ. Pero cooçh hänajty tøø nho'nä, cooçh hänajty tøø nnøcxtägach maach nhuuc tsohmän, pønjaty ja'a Diosmädia'agy mäbøgaamb ja'a høøchcøxpä, maas mayyä cuhdujt hajxy hänajty miøødhada'añ quejee ja'a Juan miøødä, hoy ja'a møjcuhdujt hajxy hänajty quia'a ja møødä.

¹² Coo ja'a Juan tiägøøyy mäyajnäbejpä, høxtä je'enä jäda'anäbaadyñä, nägø'ø nädecypiä ja'a jäya'ayhajxy jia wi'i tiägø'owa'añ maa ja'a Dios wyiinduumän.

¹³⁻¹⁴ Ja'a Diosquexyhajxy jecypiä, jaduhñ hajxy jecy miänaañ coo ja'a Dios ja'a miäjaa yajcähxø'øga'añ. Jaduhñä Moisés miädia'agy miänaambä. Pero jayøjpäc ja'a Elías hijty myina'añ. Y coo ja'a Juan tøø miech, Elías je'e, pø mwiinjuø'øwaamb by hajxy jaduhñ.

¹⁵ Pøn mädohnd møød, ween miädoy.

¹⁶ Pänébiøch jäya'ayhajxy nyajmäbáadät ja'a jäda'ahatypä. Cab hajxy tii yhojiäwø'owa'añ. Jaduhñ mäwlinäts hajxy je'e nebiä pigäna'c wiinhecpän. Coo hajxy naxy miech häyø'pä tøjpa'c, mänitä miäbigäna'c hajxy ñäma'ay:

¹⁷ “Tøø højts nja xu'uxy, pero cab hajxy tøø mhech. Tøø højts hojiøøñä nja høy, pero cab hajxy tøø mjø'øý.”

¹⁸ Coø ja'a Juan miejch, cab hñajty quiaya'añ yhu'uga'añ. Mänit mijts mnänøømy coø je'e quiu'umañøøbiä.

¹⁹ Mänitøch nbamejtpä, høøch ja'a Diosquexypä. Mänitøch ndägøøyy caabiä huucpä. Jadúhñhøch mijts xñänøømbä coøch nwi'i quiaya'añ coøch nwi'i yhu'uga'añ, coøchä cubojpä cugädieeybä nmägu'ughaty møødä yajñahuudiutpädøjc. Pero yajcähxø'øgaamby ja'a Dios jaduhñ ja'a wyiin-mahñdyhaam coøch ja'a tøyhajt jaduhñ nmøødä.

²⁰ Mänitä Jesús tiägøøyy hamänajpä. Ja'a cajptjäya'ayhajxy jaduhñ hojjä, ja'a hajxy hñajty tsänaabiä maa ja'a Jesús ja'a hoy-yagjuøøñäjatypä hñajty tøø jia yajcähxø'øguiän. Paady jaduhñ yhamänajty, coø yhaxøøgwinnmahñdy hajxy hñajty tøø quia'a najtshixø'øý. Mänitä Jesús miänaañ:

²¹ —Haxøøg mijts mjada'añ mhabeta'añ, mijts yaa tsänaabiä Corazín møødä Betsaida. Ja'a jecyjiäya'ayhajxy hijty jim tsänaabiä Tiro møødä Sidón, coø hajxy häxøpy tøø yhixy ja'a hoy-yagjuøøñäjatypä nej mijts tøø mja hixiän, tøø ja'a yhaxøøgwinnmahñdy hajxy häxøpy ñajtshixø'øý.

²² Tøyhajt jaduhñ, coø ja'a Dios yaghabáadät, maas haxøøgtuum mijts jaduhñ xpiäda'aga'añ quejee ja'a jäya'ayhajxy jim jecy tsänáayyabä Tiro møødä Sidón.

²³ Y mijts jim tsänaabiä Capernaum, mja wi'i yajcumayaamb hajxy jaduhñ. Pero cabä Dios hajxy jaduhñ xquiumaya'añ. Ja'a jecyjiäya'ayhajxy hijty jim tsänaabiä Sodoma, coø ja'a hoy-yagjuøøñäjatypä hajxy häxøpy tøø yhixy nej mijts tøø mja hixiän, cab hajxy häxøpy tøø quiuhdägoy.

²⁴ Tøyhajt jaduhñ, coø ja'a Dios yaghabáadät, maas haxøøgtuum mijts xpiäda'aga'añ quejee ja'a jäya'ayhajxy jim jecy tsänáayyabä Sodoma.

²⁵ Mänitxøø ja'a Jesús miänaañ:

—Teedy, miich nba'yaaxyp. Miich jim häñaaby tsajpootyp; miich yaa Dioshajp maa hädaa yaabä naaxwiinän. Dioscujú'uyäp coø ja'a tøyhajt tøø myajñähixø'øý ja'a hajxy tii ca'a jajpä. Caj tøø myajñähixø'øý ja'a hajxy tyijy jajpä.

²⁶ Tøyhajt jaduhñ, Teedy, je'eguiøxpä coø miich mjoot jaduhñ chocy.

²⁷ Mänitä Jesús miänáangumbä:

—Tøøchä nDeedy ja'a tøyhajt xquiøxy yajcø'ødägø'øý. Cábøch pøn xyhixyhaty, høøch ja'a Dioshuung. Tøyhajt jaduhñ. Jagóoyyøch nDeedy xyhixiä. Y cábøch ja'a nDeedy pøn xyhixyhajtä. Jagóoyyøch jaduhñ nhixiä, høøch ja'a Dioshuung. Nyajñähdíjábøch pønjátyhøch nDeedy hixyhádäp.

²⁸⁻³⁰ Mijts, pøn jaduhñ ca'a mee'xtugaamb neby hajxy hijty mguhdujthatiän, høøch nguhdujt habøjcäc. Hojióothøch nmøød; cábøch nyajcumaya'añ. Mänitäts ja'a hoybä weenbä hajxy mbáadät. Cábøch ja'a jemchpä mapxypä jaduhñ nbäda'aga'añ.

12

¹ Mänitxøø ja'a Jesús hajxy hñajty wiädity trigoni'ibyquiujc poo'xxiøøjooty. Yähó'cäp ja'a Jesús jiamiøødhajxy hñajty. Mänit hajxy tiägøøyy trigotøjpä.

² Coø ja'a fariseoshajxy jaduhñ yhijxy, mänitä Jesús hajxy ñämaayy:

—Huug hix, xiidsä mmägu'ughajpä trigo hajxy wyi'i tiøjy. Cabä cuhdujt jaduhñ myiñ coø hajxy tii ndúunämät ja'a poo'xxiøøjooty.

³ Mänitä Jesús miänaañ:

—Nej, cahnä ja'a Diosmädia'agy hajxy mgapxiä. Jim jaduhñ myiñ cujaay coø ja'a Davidhajxy yäho'pøjcä.

⁴ Mänit hajxy tiägøøyy Diostøgooty. Mänitä Diostajcaagy hajxy quiaaay, ja'a teedyhajxy hānajt̃ tøø quiuyoxø'ø'yäbä. Cabä cuhdujt hānajt̃ pøn miøødä coo hajxy quiáyät ni ja'a Davidhajxy. Jagooyyā teedy ja'a cuhdujt hajxy hānajt̃ miøødä coo hajxy quiáyät.

⁵ Jaduhñ cujaay myiimbä maa ja'a Moisés miädia'aguiän coo ja'a teedyhajxy tsajtøgootypä quia'a nä'ägädä poo'xy ja'a poo'xxiøøjooty; y cab jaduhñ ñejpiä.

⁶ Y høøch, maas móc-høch ja'a cuhdujt jaduhñ nmøødä quejee ja'a tsajtøjc.

⁷ Caj mijts mwiinjuø'ø'y waamb ja'a Diosmädia'agy jaduhñ miäna'añ: “Mänáambøch jaduhñ coo hojioot hajxy mmøødhädät; cábøch jaduhñ nmäna'añ coo animal hajxy myóxät ja'a høøchcøxpä.” Coo hajxy jaduhñ mwiinjuø'øwät, cabä jäya'ay hajxy nä'ä nägoodä mwiingapxpédät.

⁸ Høøch ja'a Diosquexypä, nmøødhøch cuhdujt jaduhñ høxtä maa ja'a poo'xxiøøbaadiän.

⁹ Mänitä Jesús jim chohñ. Mänit tiägøøyy tsajtøgooty.

¹⁰ Jiibiä mähdiøjc hānajt̃ tu'ug; cø'ødø'øds hānajt̃ tu'nax. Jiibiä fariseoshajxy hānajt̃ näje'e tiänaabiä. Mänitä Jesús miäyajtøøwä:

—Nej, hoy jaduhñ coo ja'a pa'amjäya'ay myajmøcpøgät ja'a poo'xxiøøjootiä.

Paadiä fariseoshajxy jaduhñ miänaañ, yhøxtaaby ja'a wiinmahñdy hajxy hānajt̃ nebiä Jesús hajxy yajtsumøøjät. Coo ja'a Jesús ja'a pa'amjäya'ay yajmøcpøgät ja'a poo'xxiøøjooty, mänitä Jesús hajxy hānajt̃ yajtsuma'añii.

¹¹ Mänitä Jesús yhadsooyy:

—Hoy pues. Coo pøn mieeg quiuga'awø'ø'y nøøjutjooty ja'a poo'xxiøøjooty, mänit hajxy nøcxy yajpädsømy, túhmäts.

¹² Y maas tsoobaatp ja'a jäya'ay quejee ja'a meeg. Hoy jaduhñ coo jäya'ay mnäxúudsät ja'a poo'xxiøøjooty.

¹³ Mänitä Jesús ja'a mähdiøjc ñämaayy:

—Xajtøw yø'ø mgø'ø.

Mänit xiajtøøyy. Mänit miäbaaty nebiä tu'ugpän.

¹⁴ Mänitä fariseoshajxy tiøjpädsøømy. Mänit hajxy quiojyquiapxyhajty nebiä Jesús hajxy yaghó'ogät.

¹⁵ Coo ja'a Jesús jaduhñ miädoyhajty, mänit jim chohñ. Mänitä jäya'ay may piadu'ubøjcy. Mänitä Jesús ja'a pa'amjäya'ay yajmøcpøjcy nägøxiä.

¹⁶ Mänit jaduhñ miänaañ coo hajxy quia'a nägäpxät pøn je'e.

¹⁷ Jaduhñdsä tiøjiajty nebiä Isaías jecy miänaañän, ja'a Diosquexypä. Dios jaduhñ mänaamb:

¹⁸ Høøchä nmoonsä hädaa, ja'aäch tøø nwiimbíyyäbä.

Ndsøjpiøch jaduhñ. Jootcújc-høch nnijiäwø'øyii yø'øgøxpä.

Nbäda'agáambiøch ja'a nhEspíritu maa yø'øjän.

Høøch nguhdujt jaduhñ xyajwiingapxø'øwáanäp maa ja'a jäya'ayhajxy nägøxiän.

¹⁹ Caj chiptuna'añ; caj ya'axa'añ caj jioga'añ.

Hahuum jaduhñ wiädita'añ cajptooty.

²⁰⁻²¹ Jiootcapxmøcpøgaamby pøn hobiä nejpiä mæbøjp.

Mæbøgáanäxäp ja'a miädia'agy ja'a jäya'ayhajxy nägøxiä.

Mänit jaduhñ tiägø'øwa'añ hoyhanehmä.

²² Mänitä mähdiøjc tu'ug yajmejtsä maa Jesúsän. Wiindsä mähdiøjc hānajt̃, møød hānajt̃ yhuumä, møød ja'a møjcu'uba'am hānajt̃ miøødä. Mänitä Jesús jaduhñ yajnähwaach, yaghijxø'cy, yajcapxø'cy.

²³ Mänitä jäya'ayhajxy nägøxiä yagjuøøyy. Mänit hajxy ñiñämaayyä:

—Nej, David yhap yhocäda'a yø'øduhñä.

24 Coo ja'a fariseoshajxy jaduhñ miädooyy, mänit hajxy miänaañ:

—Coo yø'ø craa ja'a møjcu'uwiiinmahñdy jaduhñ miøødä, paadiä møjcu'uba'am jaduhñ yajñähwa'aäch.

25 Ñajuøøbiä Jesús hānajt̃y nebiä fariseoshajxy hānajt̃y wyiinmahñdyhaty. Mänit miänaañ:

—Coo ja'a tu'hagajtpä jäya'ayhajxy ñimiädsibø'øwøøjät, cuhdägöyyäp ja'a quiajp̃thajxy jaduhñ. Y coo ja'a tu'ugtøgootypä jäya'ayhajxy ñimiädsibø'øwøøjät, cab hajxy hoy yhijnät tu'ugtøgooty.

26 Jaanä jaduhñduhmbä, coo ja'a møjcu'uhajxy ñimiädsibø'øwøøjät, tägöyyäp ja'a wyiinmahñdyhajxy jaduhñ.

27 Hoorä, mijts jaduhñ mänaamb cooäch ja'a møjcu'uba'am nyajñähwa'aäch ja'a møjcu'uwiiinmahñdyhaam. Coo häxøpy jiaduhñä, maa mijts ja'a mjamiøød ja'a wiinmahñdy hajxy piaady coo ja'a møjcu'uba'am hajxy yajñähwa'aäch. Hamdsoo hajxy myajcähxø'øgy coo ja'a tøyhajt hajxy mga'a møødä.

28 Pero høøch, Dioshespírituháamhøch ja'a møjcu'uba'am nyajñähwa'aäch. Cähxø'p jaduhñ coo tøø yhabaatnä coo ja'a Dios ja'a miäjaa yajcähxø'øga'añ.

29 'Coo ja'a møjcu'u xquia'a yajmäjädä'agät, cabä miäjaa jaduhñ mbøjcät.

30 'Pønhøch jaduhñ xquia'a møødpädø'p, høøch nmädsip je'e. Y pønhøch jaduhñ xquia'a møødtuumb, xmiähanhájpøch je'e.

31-32 'Je'eguiøxpøch mijts jaduhñ nnäma'ay, coo pøñ jaduhñ tiu'udägöyyät, hoy jaduhñ ñähwá'adsät, hóyhøch jaduhñ xjia nänømy, høøch ja'a Diosquexypä. Pero coo pøñ jaduhñ ñänómät ja'a Dioshespíritu, cab jaduhñ mänaa ñähwa'adsa'añ.

33 'Mhøxcábäp hajxy jaduhñ pøñ ja'a howyiinmahñdy møød; je'eds hoy wädijp. Pøñ ja'a howyiinmahñdy ca'a møød, cab hoy wiädity.

34 Jaduhñ mäwínäts mijts hajxy mjatcø'øy nebiä tsahñdiän. Paadiä hoybä hajxy mga'a mädia'aga'añ, coo ja'a haxøøgwiiinmahñdy hajxy mmøødä. Haagä mgopcooty ja'a mmädia'agyhajxy jaduhñ chohnäda'agy.

35 Jaaya'ay hojiäya'aybä, hoy jaduhñ quiapxy miädia'agy je'eguiøxpä coo ja'a howyiinmahñdy miøødä quiopcooty. Pero jaaya'ay ca'a hoybä, haxøøg jaduhñ quiapxy miädia'agy je'eguiøxpä coo ja'a haxøøgwiiinmahñdy miøødä quiopcooty.

36 Chaaäch mijts nnäma'ay, coo jaduhñ yhabáadät coo ja'a Dios hānajt̃y yajñähdiä'añ, mänitä Dios hajxy xmiäyajtøwa'añ waambaty hajxy hānajt̃y tøø mgapxtägoy, hoy hajxy jaduhñ tøø mja nä'ä wiingapxnaxy.

37 Pø haxøøg hajxy hānajt̃y tøø mmädia'agy, mänit Dios hajxy xpiäda'aga'añ haxøøgtuum. Pø hoy hajxy hānajt̃y tøø mmädia'agy, mänitä Dios hajxy xpiäda'aga'añ hodiium.

38 Mänitä Jesús ñämaayyä ja'a fariseoshajxy näje'e møødä ley-yajñähixøøbiähajxy:

—Wiindsøn, højts ja'a hijxtahñd huuc yaghíxäc ja'a hoy-yagjuøñäbä.

39 Mänitä Jesús yhadsooyy:

—Ja'a jäya'ayhajxy jäda'ahatypä, haxøøg hajxy jiatcø'øy; cabä Dios hajxy chocy. Ja'a hijxtahñd hajxy mja wi'i yhixaamby. Jagooyyä hajxy jaduhñ mhixa'añ nebiä hijxtahñd jecy quiähxø'quiän ja'a Jonáscøxpä, ja'a Dios jecy quíéjxäbä.

40 Ja'a ballenajoodooty ja'a Jonás yhiyty tägøøgxøø tägøøgtsuhm. Jaduhñäts høøch nhidaambä naaxjutjooty tägøøgxøø tägøøgtsuhm, høøch ja'a Diosquexypä.

41 Coo ja'a Jonás jaduhñ piädsøømy ballenajoodooty, mänitä Diosmädia'agy hoy yajwa'xy maa ja'a cajpt hānajt̃y xiøhatiän Nínive. Coo hajxy jim miädooyy,

mānit hajxy miäbøjcy. Mānitä yhaxøøgwiinmahñdy hajxy ñajtsixøøyy. Y cabä Jonás møjtuung hijty jaduhñ jiaty møødä. Maas møjtuunghøch nmøødä høøch. Pero cábøch nmädia'agy hajxy xmiädowaanä, ja'a jäya'ayhajxy jäda'ahatypä. Coö jaduhñ yhabáadät coö hajxy hānajty yajnāhdija'añii, mānit hajxy ñāma'awa'añii coö hajxy jaduhñ piäda'agøøjät haxøøgtuum. Ja'a jecyjiäya'ayhajxy jaduhñ māna'anaamb, ja'a hajxy hijty jegyhajty tsānaabiä Nīnive.

⁴² Jaduhñdsä to'oxiøjc miāna'anaambä, ja'a jecy gobiernāhajtābä jäguemnaax ja'a jøømbojmānajpā. Mānitä Salomón hoy miāmadoowhity, je'eguiøxpä coö ja'a Salomón hānajty jiaanč tehñ quiuhwijjiä. Y cabä Salomón ja'a møjtuunghøch hijty jiaty møødä. Maas møjtuunghøch nmøødä høøch. Pero cábøch nmädia'agy hajxy xmiädowaanä, ja'a jäya'ayhajxy jäda'ahatypä.

⁴³⁻⁴⁵ 'Ja'a jäya'ayhajxy jäda'ahatypä, haxøøgwiinmahñdy hajxy miøød. Y coöch nmädia'agy hajxy xquia'a mǎbøjcät, maas haxøøg hajxy jaduhñ jiädät. Jaduhñ mǎwīnāts hajxy jiädät nebiä jäya'ay møjcu'umøødpān. Coö ja'a møjcu'u jii by piädsömät maa jaaya'ay quiopcān, mānitä poo'xtaact nøcxy jäguemduum yhøxta'ay maa ja'a tø'ødsnāhgapān. Coö ja'a poo'xtaact jim quia'a pādāt, mānit miāna'ana'añ: “Mejor nnä'ägä nøcxtāgāchhøch maačh nhuuc tsohmān.” Coö jaduhñ wyiimbīdāt, mānitä jäya'ay quiopc jaduhñ piātāt nebiä yajwa'adstøjcān, ja'a yajxón tøø pie'edyijābä. Mānitä jiamioød nøcxy juxtujc jiaac woy, ja'a maas haxøøgpä. Mānit hajxy nāgøxiä tiägøøy maa jaaya'ay quiopcootiān. Y maas haxøøg jaaya'ay jaduhñ jiada'añ quejee hijty yhity.

⁴⁶ Jimnä ja'a Jesús ja'a cu'ug hānajty miøødmädia'agyñä, mānitä tiajhajxy miejch møødä piuhya'ayhajxy. Jim hajxy miāhmøøyy tōba'am. Ja'a Jesús hajxy hānajty miøødmädia'agaamby.

⁴⁷ Mānitä Jesús hoy ñāma'ayii:

—Xiidsä ndaj xmiøødmädia'aga'añ tōba'am møødä mbuhya'ayhajxy.

⁴⁸ Mānitä Jesús yhadsooy:

—Pønhøch ndajhajpy; pønhøch nbuhya'ayhajpy.

⁴⁹ Mānitä jiamioød ñādsiiwøøyy. Mānit miānaañ:

—Høøch ndaj yø'ø; høøch nbuhya'ay yø'ø.

⁵⁰ Pønhøch ja'a nDeedy miädia'agy xquiudiúunāp ja'a tsajpootypä, jaduhñ mǎwīnāts hajxy je'e nébiøch nbuhya'ayān, nébiøch nbuhdo'oxiān, nébiøch ndajjān.

13

¹ Mānitxøø ja'a Jesús jim chohñ tøgooty. Mānit jim miejch mejypia'a. Hoy jim yhāñaaguiäda'agy.

² Mānitä jäya'ay may miejch maa ja'a Jesús hānajtiān. Mānitä Jesús tiägøøyy barcojooty. Hoy jii by yhøxta'agy. Cøjxä jäya'ayhajxy jim miāhmø'øyy pu'uwiiing.

³ Mānitä Jesús tiägøøyy yajnāhixøøbiä madiu'u. Mäbaadyhaam jaduhñ yajnāhixøøyy. Mānit miānaañ:

—Mānitä jäya'ay tu'ug tiu'ubøjcy niippä.

⁴⁻⁸ Coö ja'a tøømd tiägøøyy wøjpä, näje'e ja'a tøømd quiahy tu'haam, näje'e quiahy tsaanāhgøxp, näje'e quiahy haptiooty, näje'e quiahy maa ja'a hoñaaxān. Ja'a jim cáhwäbä tu'haam, yajpādø'c ja'a muuxyhajxy je'e. Ja'a jim cáhwäbä tsaanāhgøxp, paquiä jaduhñ jia mujxy, je'eguiøxpä coö ja'a naax quia'a jaty cøøcä. Coö quiøxxøøjøøyy, mānitä tiøøch, coö ja'a tyicts hānajty quia'a møødä. Ja'a cáhwäbä haptiooty, ja mujx jaduhñ. Ja yee'c jaduhñ, pero cabä ñä'a tøømbejty. Hix, ja'a hpty je'e xaam. Y ja'a

cáhwäbä maa ja'a hoñaaxän, may jaduñ tiøømhajty, näje'e mägo'xhaam, näje'e tägøøghii'xhaam, näje'e hii'xmajc-haam.

⁹ Pøn jaduñ wiinjuøøby, weenčh hädaa nmädia'agy xmiäbøjcä.

¹⁰ Mänitä Jesús ñámejtsä ja'a jiamioødhajxy. Mänit miäyajtøøwä:

—Tii ja'a cu'ug coo myajnähixø'øy yajmäbaadyhaam.

¹¹ Mänitä Jesús yhadsooy:

—Tøø mijts ja'a Dios xyajwiinjuø'øy nebiaty yhane'emy. Cab hijty yajwiinjuø'øy. Y yø'ø cu'ughajxy, cab hajxy hoy wyiinjuø'øwa'añ.

¹² Pøn madiu'u jaduñ møød, maas may jaduñ mio'owa'añii. Pero pøn weeñtiä møød, pøgáanäxäp je'e mäduhñtiä jim miøødä.

¹³ Páadyhøch jaduñ nmädia'agy yajmäbaadyhaam. Jia wi'i yhee'py hajxy, cab hajxy tii yhixy. Jia wi'i miämadoowhijpy hajxy, cab hajxy wyiinjuø'øy, neby hajxy tii quia'a mädoybän.

¹⁴ Tøjiajp jaduñ yø'øya'aguiøxphajxy nebiä Isaías jecy miänaañän, ja'a hijty jegyhajty wädijpä Diosquexy:

Mmädoowaamby hajxy jaduñ, cab hajxy mwiinjuø'øwa'añ;

Mheebaamby hajxy, cab hajxy mhixa'añ.

¹⁵ Tøø hädaa jäya'ayhajxy quiuhxexy;

nebiä cuhnatpän, nebiä wiimbi'idspän hajxy jaduñ ñibiäda'agyii neby hajxy jaduñ quia'a wiinjuø'øwät,

nébiøch nmädia'agy hajxy xquia'a mabøjcät.

Cooch nmädia'agy hajxy xmiäbøjcät,

mänitøch hajxy jaduñ nyajnähwä'adsät.

¹⁶ Jootcujc jaduñ mhity je'eguiøxpä coo hajxy jaduñ mhixy, coo hajxy jaduñ mmädoy.

¹⁷ Tøyhájthøch mijts nnäma'ay, may ja'a Diosquexypähajxy, may ja'a hojiäya'aybähajxy jia hixaañ nej mijts cham mhixiän. Jia mädoowaan hajxy nej mijts cham mmädoyyän.

¹⁸ Huuc mädoow hajxy waamb ja'a niippä cwieento miädia'agytiägø'øy.

¹⁹ Näje'e ja'a jäya'ayhajxy, coo ja'a Diosmädia'agy hajxy miädoy nebiä Dios yhane'emiän, cab hajxy wyiinjuø'øy. Mänitä Diosmädia'agy hajxy piøjcäxä ja'a møjcu'ugong. Jaduñ mäwínäts hajxy je'e nebiä tøømd quiahyyän tu'haam.

²⁰⁻²¹ Näje'e ja'a Diosmädia'agy hajxy hamuumdu'joot yhuuc ja mabøcy. Pero coo hajxy chaachtiiñii ja'a Diosmädia'agyquiøxpä, mänit hajxy piädsøømnä. Jaduñ mäwínäts hajxy je'e nebiä tøømd quiahyyän tsaanähgøxp. Paquiä jaduñ tiø'øch je'eguiøxpä coo ja'a tyicts quia'a hity.

²² Näje'e ja'a Diosmädia'agy hajxy yhuuc ja mädooy. Pero jiaančh tehñ jiahmiejchp hajxy jaduñ hädaa yaabä naaxwiimbä. Jiaančh tehñ yhadsojpy ja'a xädø'øñ hajxy, paadiä Diosmädia'agy hajxy hoy quia'a panøcxa'añ. Jaduñ mäwínäts hajxy je'e nebiä tøømd quiahyyän haptiooty.

²³ Näje'e ja'a Diosmädia'agy hajxy hoy wyiinjuø'øy. Hoy hajxy jaduñ pi-anøcxy hamuumdu'joot. Jaduñ mäwínäts hajxy je'e nebiä tøømd quiahyyän hoñaaxooty.

²⁴ Mänitä Jesús tiägøøguiumbä mädiaacpä yajmäbaadyhaam:

—Coo ja'a Dios yhane'emy, jaduhñhøch nyajmäbaada'añ nebiä tu'jäya'ay hodiøømd tøø wiøjjiäbän maa ja'a ñaaxän.

²⁵ Mänitcoods hajxy quiøxy maaho'cy. Mänitä miädsip ja'a cizañatøømd hoy wiøjy maa ja'a trigotøømd hänajty tøø wiøjjiän.

²⁶ Tu'cuhdujt ja'a trigo miujxy møødä cizaña. Coo ja'a trigo xiäbaajøøyy, mänitä cizaña quiahxø'pä.

²⁷ Mänitä jäya'ay hoy ñäma'ayíjäm ja'a mioonsähajxy: “Wiindsón, hodiøømd miich mwøj, túhmäts. Pämaadä yø'ø cizañahujts tøø chooñ.”

²⁸ Mänitä wyiindsón miänaañ: “Nmädsiphøchäda'a jaduhñ tøø jiatcø'øy.” Mänitä mioonsä miänaañ: “Nej, nõcxäp højts yø'ø cizañahujts nwixiä.”

²⁹ Mänitä wyiindsón miänaañ: “Caj, cab hajxy mwíxät coo ja'a trigo jaduhñ ñä'ä mädäðø'øgø'øwät.

³⁰ Ween yhity; ween tu'cuhdujt yeegy. Coo ja'a trigopux jaduhñ yhabáadät, mänitøch nmoonsä nguexa'añ, weenä cizañahujts hajxy jayøjp quiøxy yajpädø'øgy. Ween hajxy quiøxy haxoch. Mänit hajxy jaduhñ ñó'ogät. Mänitä trigo hajxy ñähmädsät. Mänit hajxy piädá'agät tsehñjooty.”

³¹ Mänitä Jesús tiägøøguiumbä mädiaacpä yajmäbaadyhaam:

—Coo ja'a Dios yhane'emy, jaduhñhøch nyajmäbaada'añ nebiä mostazapajcän. Jim tu'jäya'ay tøø ñi'iby maa ja'a ñaaxän.

³² Tøyhajt jaduhñ coo ja'a mostazapajc jiaançh tehñ chayyä. Pero coo yeegy, cruty jaduhñ jiaty nebiä quepychaajän. Mäðøyyä ja'a muuxyhajxy nõcxy jim mia'ay yhaajjooty.

³³ Mänitä Jesús miänáangumbä yajmäbaadyhaam:

—Coo ja'a Dios yhane'emy, jaduhñhøch nyajmäbaada'añ nebiä to'oxiøjc ja'a tsajcaagychøoy yajmädijø'øybän harinajooty tägøøgquixøhñdy. Mänit jaduhñ cøxiä yajmäyäbicø'øy.

³⁴ Jaduhñä Jesús ja'a cu'ug yajnähixøøyy haagä yajmäbaadyhaam.

³⁵ Jaduhñds tiøjiajty nebiä Diosquexypä jecy quiujahyyän:

Mäbaadyháamhøch nmädia'aga'añ.

Nyajcähxø'øgåambiøch mädyijjaty hñajty yu'uçhtium hijp mänaa hädaa yaabä naaxwiin yhawijy tiøø'xta'aguiän;

cahnä quiähxø'øgyñä.

³⁶ Mänitä Jesús ja'a cu'ughajxy quiejxwiimbijty. Mänit tiøjtägøøyy. Mänit ja'a jiamiøødhajxy miejch. Mänitä Jesús hajxy ñämaayy:

—Højts capxwíjjäc ja'a cizañahujtsøxpä.

³⁷ Mänitä Jesús miänaañ:

—Høøch ja'a Diosquexypä, jaduhñ mäwíinhøch høøch nebiä jaaya'ay hodiøømd tøø wiøjjiäbän.

³⁸ Y hädaa yaabä naaxwiin, jaduhñ mäwíinäts hädaa nebiä naaxän maa ja'a hodiøømd wiøjjiän. Jaaya'ayhajxy hanéhmäbä ja'a Diósäm, jaduhñ mäwíinäts hajxy je'e nebiä hodiøømdän. Jaaya'ayhajxy hanéhmäbä ja'a møjcu'ugong, jaduhñ mäwíinäts hajxy je'ebä nebiä cizañahujtsän.

³⁹ Y ja'a møjcu'ugong, jaduhñ mäwíinäts je'e nebiä jaaya'ay ja'a cizañahujts tøø wiøjjiäbän. Coo ja'a naaxwiimbä wyiimbida'añ, jaduhñ mäwíinäts je'e nebiä trigo hajxy yajpädø'quiän møødä cizañahujts. Y ja'a Dios ja'a mioonsähajxy tsajpootypä, jaduhñ mäwíinäts hajxy je'e nebiä jaaya'ay ja'a trigo hajxy yajpädø'quiän.

⁴⁰ Coo ja'a naaxwiimbä jaduhñ wyiimbida'añ, jaduhñ mäwíinäts je'e nebiä cizañahujts hajxy ño'quiän.

⁴¹ Mänitøch nmoonsä nhane'ema'añ coo hajxy ween nõcxy yajpädsømy pønjaty ja'a haxøøgwiinmahñdy møød, møødä pønjaty jaduhñ ja wi'i yhadugaamb ja'a Diosmädia'agy. Jim hajxy yajpädsøma'añii maaçh hñajty nhane'ema'añän, høøch ja'a Diosquexypä.

⁴² Mänit hajxy hñajty quiujuipø'øwa'añii jøønjooty. Jiiby hajxy jiø'øwa'añ xiuudsa'añ.

⁴³ Ja'a hajxy jaduhñ howiädijpä, jaanč tehñ miøj jaanč tehñ jiaanč hajxy yhida'añ maa ja'a Tieedyhajxy yhane'ema'añän. Pø jii mmädohndhajxy, mmädówäp hajxy jaduhñ.

⁴⁴ 'Coo ja'a Dios ja'a miäjaa yajcähxø'øga'añ, jaduhñ mäwínäts je'e nebiä jäya'ay maxiädø'øñ tiajó'øybän naaxpa'c. Coo pøn piädät, mänitä tia-jøødiägatsa'añ. Xoonda'agaamb jaduhñ. Mänit nøcxy tioogy tijaty jim miøød. Mänitä naax nøcxy jiuy maa ja'a maxiädø'øñ tøø piaadiän.

⁴⁵ 'Coo ja'a Dios ja'a miäjaa yajcähxø'øga'añ, jaduhñ mäwínäts je'e nebiä perlatsaahajuubiän, ja'a jaanč tehñ yajxonbä. Ja'a perlatsaa, pic je'e møød pioobä.

⁴⁶ Coo jaduhñ tu'ug piädät jaanč tehñ chowbä, mänit nøcxy tioogy tijaty jim miøød. Mänitä perlatsaa nøcxy jiuy.

⁴⁷ 'Coo ja'a Dios ja'a miäjaa yajcähxø'øga'añ, jaduhñ mäwínäts je'e nebiä hacxjohmñd hajxy piädá'aguiäbän mejjiooty coo hacx hajxy hñajty jiooma'añ madiu'u.

⁴⁸ Coo ja'a hacxjohmñd jaduhñ yhúdsät, mänit hajxy yhøxwohmñbädsømy. Mänitä hacx hajxy wyiimbiy ja'a hojiatypä. Mänit hajxy piäda'agy cachjooty. Mänitä ca'a hojiatypä hajxy ñøøga'adsø'y.

⁴⁹ Jaduhñ mäwínäts jiada'añ coo ja'a naaxwiimbä wyiimbida'añ. Mänitä Dios ja'a mioonsähajxy wyiimbiwa'añ ja'a hojiäya'aybä.

⁵⁰ Pøn ca'a hojiäya'ay, je'e hajxy cujuipø'øwáanäp jøønjooty. Jiiby hajxy jio'øwa'añ xiuudsa'añ.

⁵¹ Mänitä Jesús miänaañ:

—Nej, mwiinjuøøby hajxy jaduhñä.

Mänit hajxy yhadsooyy:

—Wiindsøn, nwiinjuøøby højts jaduhñ.

⁵² Mänitä Jesús miänaangumbä:

—Coo ja'a ley-yajñähixøøbiähajxy tiägø'øwät habøjpä nebiä Dios yhane'emiän, mejtstu'u ja'a mädia'agy jaduhñ jiada'añ møødä jecypiä møødä jemýbiä. Jaduhñ mäwínäts je'e nebiä cudøjc madiu'u miøødhátiäbän, møødä jemýbiä møødä jecypiä.

⁵³ Coo ja'a Jesús jaduhñ miädiaacpädøøyy, mänit jim chohñ.

⁵⁴ Mänit miejch maa ja'a yhamdsoo cajptän. Mänit tiägøøyy yajñähixøøbiä tsajtøgooty. Mänitä jäya'ayhajxy jiaanč tehñ yagjuøøyy. Mänit hajxy miänaañ:

—Maa yø'ø wiinmahñdiäda'a tøø yhabøcy. Nebiä hoy-yagjuøøñäjatypä jaduhñ yajcähxø'øgy.

⁵⁵ José yhuung yø'ø, yø'ø tsejtspä pujxpä. María ja'a tiaj xiøhaty. Jue'e piuhya'ayhajxy xiøhaty, Jacobo, José, Simón, møødä Judas.

⁵⁶ Yaa hajxy chäna'ay maa højts ngajptän møødä piuhdo'oxyhajxy. Pämaadä yø'ø wiinmahñdy yø'øduhmñbä tøø yajtsooñ.

⁵⁷ Mänitä Jesús miädia'agy quia'a mabójcäxa. Mänitä Jesús miänaañ:

—Homiaajä ja'a Diosquexy wiädity, cumáayyap jaduhñ. Pero cab jim quiumayii maa yhamdsoo naax maa yhamdsoo tøjcän.

⁵⁸ Cabä Jesús ja'a hoy-yagjuøøñäjatypä jim jiaty yajcähxø'cy, je'eguiøxpä coo ja'a miädia'agy hñajty quia'a mabójcäxa.

14

¹ Mänitä Herodes miädoyhajty coo ja'a Jesús hñajty jim wiädity. Ja'a Herodes, jim hñajty je'e guiobernadorhaty Galileanaaxooty.

² Mänitä Herodes ja'a mioonsä ñämaayy:

—Juan mäyajnäbejpäda'a je'e. Tøøda'a jiuypioçy. Paadiä mœcmäjaa jiaançh tehñ miøødä.

³⁻⁴ Tøø ja'a Herodes ja'a Juan hänäjty yajtsumyii. Tøø ja'a Juan hänäjty quiø'øxoçhii cadenahaam. Paadiä Juan jaduhñ chuumä coo ja'a Herodes hänäjty tøø ñäma'ay coo jaduhñ quia'a hoyyä coo ja'a Herodes ja'a piuhya'ay tio'oxioçj miøødtsänäayät. Jue'e ja'a Herodes piuhya'ay hänäjty xiøhaty, Felipe. Jue'e ja'a Felipe tio'oxioçj hänäjty xiøhaty, Herodías.

⁵ Jaduhñä Herodes hänäjty tiajy miay coo ja'a Juan hänäjty yagho'oga'añ. Pero jaançh tehñ chähgøøby ja'a Herodes hänäjty. Ja'a cu'ug hänäjty chähgøøby je'eguiøxpä coo ja'a cu'ughajxy hänäjty miäna'añ coogä Juan ja'a Diosmädia'agy hänäjty yajwa'xy.

⁶ Mänitä Herodes jiumøjt jaduhñ piejtä. Jimä Herodes hänäjty yhäña'ay møødä pawoy pawichpähajxy. Mänit hajxy tiägøøyy wiinhéjtsäbä. Ja'a Herodías yhuung jaduhñ tægøøyy hejtspä. Mänitä Herodes xioondaacy nägø'ø nädecypiä.

⁷ Mänitä Herodes ja'a quixy yajwiinwaanøøyy:

—Hotyijä miich xmiäyujwä'anät, nmó'owäbøch miich jaduhñ.

⁸ Mänitä quixy ja'a tiaj hoy yhawaañä. Mänitä tiaj jaduhñ miänaañ coo ja'a Juan mäyajnäbejpä quiopc jaduhñ miäyujwä'anät. Mänitä quixy ja'a Herodes hoy ñäma'ay:

—Høøchä Juan mäyajnäbejpä quiopc móoyyäc texyjooty.

⁹⁻¹⁰ Mänitä Herodes jiootmadiägøøyy nägø'ø nädecypiä. Pero tøø hänäjty miäna'añ jäya'awyiinduum coog hänäjty yega'añ hotyijatiä. Mänit yhanehmy coo ja'a Juan quiopc yhøxpújxäxät jiiby pujxtøgooty.

¹¹ Mänitä Juan quiopc yajnøcxäxä texyjooty maa ja'a Herodeshajxiän. Mänitä quixy miooyyä. Mänitä quixy ja'a tiaj hoy mio'oy.

¹² Mänitä Juan ñäxäwa'ay yo'tuc hoy quiøøyyäxä; ja'a Juan miägu'ughajpähajxy jaduhñ hoy quiø'øy. Mänitä Juan hajxy hoy yajnaaxtägø'øy. Mänitä Jesús hajxy hoy yhawaañä cooc ja'a Juan hänäjty tøø yagho'ogyii.

¹³ Coo ja'a Jesús jaduhñ miädoyhajty cooc ja'a Juan tøø yagho'ogyii, mänit jim chohñ barcojooty nidiuhm. Mänit ñøcxy hanidiuhmduum. Mänitä cu'ughajxy miädoyhajty cooc ja'a Jesús hänäjty jim tøø choon. Mänitä Jesús hajxy piadu'ubøjcy cajptooty. Tegy-yo'oy hajxy pianøcxy. Jayøjp hajxy jim miejch maa ja'a Jesús hänäjty ñøcxian. Mänitä Jesús piamejch høxhaam.

¹⁴ Coo ja'a Jesús piädsøømy barcojooty, mänitä majiäya'ay yhiijxy. Mänit ñäxuu'ch. Mänitä pa'amjäya'ay yajmøcpøjcy.

¹⁵ Mänittsuu ja'a Jesús miägu'ughajpähajxy piamejch. Mänitä Jesús hajxy ñämaayy:

—Tøø chuujø'øy y cabä tøjc yaa. Quejxwiimbit yø'ø jäya'ayhajxy; weenä caagy hajxy nøcxy jiuyc cajptooty.

¹⁶ Mänitä Jesús miänaañ:

—Caj, ween hajxy yhity. Mijts jaduhñ ween myajcáyät.

¹⁷ Mänit hajxy yhadsooyy:

—Cab højts tii nmøødä. Jagooyyä højts ja'a tsajcaagy mägooxyä nmøødä chaadsä hacx metscä.

¹⁸ Mänitä Jesús miänaañ:

—Mäminxä yø'ø.

¹⁹ Mänitä Jesús ja'a majiäya'ay ñämaayy coo hajxy ween yhøxta'agy møøwyiing. Mänitä tsajcaagy quiøøchooyy møødä hacx. Mänit yuughee'py cøxp. Mänit miänaañ:

—Dioscujú'uyäp.

Mänitä Jesús ja'a tsajcaagy yhaguidøøyy. Mänitä miägu'ughajpähajxy mioøyy. Mänit hajxy hoy yajwa'xy majiäya'ayhagujc.

²⁰ Nägøxiä hajxy jaduhñ quiaaayy cu'uxiä. Mänitä Jesús miägu'ughajpähajxy tsajcaagyhaguijc hajxy yajpädø'cy majmejtscach.

²¹ Nämägøøxmil hajxy quiaaayy haagä ya'adiøjc. Hawiingä to'oxiøjc-hajxy møødä pigäna'c-hajxy.

²² Mänitä Jesús ja'a miägu'ughajpähajxy ñämaayy coo hajxy ween tiägø'øyy barcojooty, coo hajxy ween ñøønajxø'øgy. Mänitä Jesús ja'a majiäya'ayhajxy quiejxwiimbijty.

²³ Mänitä Jesús ñøcxy nidiuhñ tunñähgøxp Diospa'yaaxpä. Coo quiood-søøyy, jimñä Jesús hänajty nidiuhñ tunñähgøxp.

²⁴ Ja'a Jesús ja'a miägu'ughajpähajxy, mejyquiuyc hajxy hänajty tøø miech barcojooty. Møc hajxy hänajty jiøjcubojø'øyy; paadiä nøø hänajty miøjjädseembejty barcomøjc.

²⁵ Coodsnä Jesús tiu'ubøjcy tecz-yo'oy. Mejywyiing jaduhñ yohy. Mänit miech maa ja'a miägu'ughajpähajxiän.

²⁶ Coo ja'a Jesús hajxy yhijsy coo hänajty yo'oy mejywyiing, mänit hajxy chähgøøbiøjcy. Mänit hajxy chähgø'øyyaaxy:

—Haañämäda'a yø'ø.

²⁷ Mänitä Jesús miänaañ:

—Ca'a hajxy mdsähgø'øyy. Høøch ja'a Jesús.

²⁸ Mänitä Pedro miänaañ:

—Wiindsøn, pø miich ja'a Jesús, høøch huuc hanéhmäc cooch jimñ mnøcxät yo'oy maa miichän.

²⁹ Mänitä Jesús yhadsoøyy:

—Minxä.

Mänitä Pedro piädsøømy barcojooty. Mänit tiägøøyy yohbiä mejywyiing. Jimñ hänajty ñøcxa'añ maa ja'a Jesúsän.

³⁰ Coo jiäwøøyy coo møc piojy, mänit chähgøøbiøjcy. Mänit tiägøøyy quiimbä. Mänit yaaxy:

—Wiindsøn, høøch yajpädsøømäc.

³¹ Mänitä ja'a Jesús ja'a Pedro quiø'ø miajtsä. Mänit miänaañ:

—Caj miich mhuuc mabøjpä. Tiich nmädia'agy coo xquia'a mabøjcä.

³² Coo ja'a Jesús tiägøøyy barcojooty møødä Pedro, mänitä poj yuungøøyy.

³³ Mänitä Jesús hajxy wyiinjiicädaacy. Mänitä Jesús hajxy ñämaayy:

—Tøyhajt miich mDioshuungä.

³⁴ Mänit hajxy miech mejyhawiimb maa hänajty xiøhatiän Genesaret.

³⁵ Coo ja'a Jesús yhøxcapä ja'a jäya'ayhajxy jimñä, mänitä mädia'agy tiägøøyy wädijpä coo ja'a Jesús jimñ tøø miech Genesaret. Mänitä pa'amjäya'ayhajxy may yajmejtsä maa ja'a Jesúsän.

³⁶ Mänitä Jesús hajxy miänuu'xtaacy coo ja'a wyitpa'a hajxy ween ñähdoonä. Coo hajxy jaduhñ ñähdoon, mänit hajxy miøcpøjcy.

15

¹ Mänitä Jesús ñämejtsä ja'a fariseoshajxy näje'e møødä ley-yajñähixøøbiähajxy näje'e. Jerusalén hajxy hänajty choon. Mänitä Jesús hajxy miäyajtøøyy:

² —Yø'ø mmägu'ughajpähajxy, tii ja'a cuhdujt hajxy coo quia'a cudiuñ nebiä jecyjiäya'ayhajxy xyajmämähmøøyyäm. Ja'a jecyjiäya'ayhajxy, cø'øbujp hajxy hijty coo hajxy hänajty quiaya'añ. Jaduhñ hajxy hijty quiuhdujthaty. Pero yø'ø mmägu'ughajpähajxy, cab hajxy jaduhñ quiuhdujthaty.

³ Mänitā Jesús yhadsooyy:

—Pero mijts, cabä Dios miädia'agy hajxy myajtuunä. Ja'a mhamdsoo cuhdujt hajxy myajtuumby.

⁴ Ja'a Dios jaduhñ mänaañ coo ja'a ndaj ndeedy hajxy nwiin-gudsähgøyyämät. Jaduhñ miänaambä, coo pøn ja'a tiaj ja'a tieedy haxøøg ñänómät, tsipcøxp jaduhñ yho'oga'añ.

⁵⁻⁶ Pero wiing mijts mmänaambä. Mijts jaduhñ mänaamb coo jaduhñ yhooyä coo ja'a mdaj ja'a mdeedy jaduhñ mnämä'awät: “Cábøchä xädø'øn nmøødä coöch mijts nbuhbédät. Tøøchä Dios ngøxy mo'oy mäduhñtiä mijts hijty nmo'owa'añ.” Coö hajxy jaduhñ mmäna'añ, cabä Diosmädia'agy hajxy hānajt myajtuñ. Ja'a mhamdsoo cuhdujt hajxy hānajt myajtuumby.

⁷ Jaduhñ mäwínäts mijts mnibiäda'agyii nebiä hoyhāna'cān. Pero cab hajxy mhoyhāna'cä. Mijtsøxpä ja'a Isaías Diosquexypä jecy miänaañ:

⁸ Nä'ä mänaamb hajxy jaduhñ cooc tyijy hajxy xwyiingudsähgø'ø y hamuumdu'joot.

⁹ Xiøøbä hajxy jaduhñ ñä'ä mäna'añ;
cábøch nmädia'agy hajxy xñä'ä panøcxä.
Yhamdsoo wiinmahñdy hajxy yajwiinhixøøby,
nømä Dios miäna'añ.

¹⁰ Mänitā Jesús jäya'ay may miøjyaaxy. Mänit miänaañ:

—Huuc mäadow hajxy, huuc wiinjuø'øw hajxy.

¹¹ Mädyijaty tågøøby mhaawjooty, cab jaduhñ xyajtägóyyät. Je'eduhñ xyajtägóyyäp mädyijaty pädsøømb mhaawjooty.

¹² Mänitā Jesús ñämaayyā ja'a miägu'ughajpāhajxy:

—Cabä fariseoshajxy yhojiäwø'ø coo jaduhñ tøø mmäna'añ.

¹³ Mänitā Jesús yhadsooyy:

—Mädyijatyhøch nDeedy tsajpootypä tøø quia'a päda'agy, cab jaduhñ yhojø'owa'añ.

¹⁴ Weends yø'ø fariseoshajxy yhity. Jaduhñds hajxy wiädity nebiä haagä wiindspän coo hajxy ñibiawoyii. Nämetsc hajxy nøcxy wiocca'ay.

¹⁵ Mänitā Pedro ja'a Jesús ñämaayy:

—Cab højts ndu'jootwiinjuø'øy. Højts capxwíjjäc.

¹⁶ Mänitā Jesús miänaañ:

—Nej, ni mijts tii mga'a wiinjuø'øyñä.

¹⁷ Jaduhñds je'e, mädyijaty tågøøby mhaawjooty, jiiby jaduhñ yhäda'agy mjoodooty. Mänitā jaduhñ piädsøømdägach.

¹⁸ Pero mädyijaty jaduhñ pädsøømb mhaawjooty, jiiby jaduhñ chohñda'agy mgopcooty. Je'eduhñ xyajtägóyyäp.

¹⁹ Haagä jiibiä haxøøgwiinmahñdy chohñda'agy mgopcooty hoñä'ä mädyiibä. Je'eduhñ xøhajp ja'a haxøøgwiinmahñdy, ja'a jäya'ay-yagho'ogyiibä, møødä meechiibä, møød coo wiingjäya'ay tio'oxiøjc mmøødtsänáayyät, møød coo mhøhñdá'agät, møød coo hāna'c haxøøg mnänómät.

²⁰ Je'eds jaduhñ xyajtägóyyäp. Pero coo mgáyät jaguiø'øbujoy, cab jaduhñ ñejpiä; cab jaduhñ xyajtägóyyät.

²¹ Mänitā Jesús jim chohñnä. Mänit ñøcxnä Canaán maa ja'a cajpt hānajt xiøhatiän Tiro møødä Sidón.

²² Mänitā Jesús tajjäya'ay tu'ug ñämejtsä. Jim hānajt chāna'ay Canaán. Mänitā Jesús ñämaayyā:

—Wiindsøn, miičh ja'a David hijty mhaphajpy mdeedyhajpy. Høøch näxúu'tsäc. Tøøch ndo'oxyhuung miächii ja'a møjcu'u. Hanaxiä jaduhñ chaächtiuñii —nøm je'e yaaxy.

²³ Cabä Jesús yhadsooyy. Mänitã ñämaayyã ja'a miägu'ughajpähajxy:
—Huuc quejxwiimbit yø'ø tadjäya'ay. Tsaächyáaxäp jaduhñ xpiawädíjtäm.

²⁴ Mänitã Jesús yhadsooyy:
—Yáayyøchä Dios tøø xquiexy maa hädaa judíoshajxiän. Cábøch wiingtuum tøø xquiexy.

²⁵ Mänitã tadjäya'ay ja'a Jesús wyiinjiicädaacy. Mänit ñämaayy:

—Wiindsøn, tunä mayhajt. Høøch puhbéjtäc.

²⁶ Mänitã Jesús yhadsooyy:

—Cab jaduhñ yhooyä coochä huc tsajcaagy nmó'owät mädyii ja'a pigäna'c-hajxy quiaayaamby.

Ja'a judíos Jesús yajmäbaat nebiä pigäna'cän. Ja'a ca'a judíoshajxy, je'eduhñ yajmäbaat nebiä hucän.

²⁷ Mänitã tadjäya'ay miänaañ:

—Tøyhajt jaduhñ. Pero quiaaby ja'a huc ja'a tsajcaagyhawaagy coo jim quia'ay maa ja'a wyiindsøn ja'a mieexän.

²⁸ Mänitã Jesús miänaañ:

—Tøyhájthøch miich nmädia'agy xmiäbøjcä. Weenä mhuung miøcpøcy.

Mänitiä ja'a yhuung jiaançh møcpøjcy.

²⁹ Mänitã Jesús jim chohnnä. Mänit ñøcxnä maa ja'a mejypia'ajän, ja'a xøhajpä Galilea. Mänit hoy piety tunnähgøxp. Mänit yhøxtaacy.

³⁰ Mänitã jäya'ay may miejch maa ja'a Jesúsän, møødä pa'amjäya'ay, møødä cø'ømucypiä tecymiucypiä, møødä wiindspä, møødä huumbä. Mänitã Jesús yajmäbaadøøyy.

³¹ Mänitã jäya'ayhajxy yagjuøøyy coo hajxy jaduhñ yhiixy coo ja'a huumbähajxy tøø quiapxø'øgy, coo ja'a cø'ømucypiähajxy tøø yhooyø'y, coo ja'a tecymiucypiähajxy tøø yo'oyø'øgy, coo ja'a wiindspähajxy tøø yhiixø'øgy. Mänit hajxy miänaañ coogä Dios miøjjä jiaançhä.

³² Mänitã Jesús miøjyaaxy ja'a miägu'ughajpä. Mänit miänaañ:

—Nnäxúu'chpøch yø'øya'ayhajxy. Tägøøgxøøjøch hajxy tøø xpiawädity, y cabä caayyøøc hajxy miøødä. Cábøch hajxy nguejxwiimbida'añ jaguiay maa tiøjcän coo hajxy maa tiu'ugädáwät.

³³ Mänitã Jesús ja'a miägu'ughajpähajxy miänaañ:

—Pero maadsä cay hajxy jaduhñ nnä'ä páatämät maa yø'øya'aguiøxphajxiän. Pactuumäda'a yaa.

³⁴ Mänitã Jesús miäyajtøøyy ja'a miägu'ughajpähajxy:

—Naag tsajcaagy hajxy jii mmøødä.

Mänit hajxy yhadsooyy:

—Juxtujc, chaadsä hacxhuung mejtstägøøg.

³⁵ Mänitã Jesús miänaañ coo ja'a jäya'ayhajxy yhøxtá'agät naaxwiin.

³⁶ Mänitã tsajcaagy quioonðsooyy møødä hacxhuung. Mänitã Dios ñämaayy:

—Dioscujú'uyäp.

Mänitã Jesús ja'a miägu'ughajpä ja'a tsajcaagy hajxy yajnäguidøøyy møødä hacxhuung. Mänit hajxy yajwa'xtägajch maa ja'a jäya'ayhajxiän.

³⁷ Mänit hajxy quiaayy cu'uxiä nägøxiä. Mänitã Jesús miägu'ughajpä ja'a tsajcaagyhaguijc hajxy yajpädø'cy juxtujcach.

³⁸ Nämädaaxmil ja'a ya'adiøjc-hajxy quiaayy. Pagaayy ja'a to'oxiøjc-hajxypä møødä pigäna'c-hajxy. Pero cab jaduhñ yajnajuø'øy nanaagä hajxy hänäjty je'ebä.

³⁹ Mänitã Jesús ja'a jäya'ayhajxy quiejxwiimbijty. Mänit tiägøøyy barcojooty. Mänit ñøcxy Magadánnaaxooty.

16

¹ Mänitā Jesús ñämejtsä ja'a fariseoshajxy näje'e mөөдä saduceoshajxy. Mänitā Jesús ñämaayyā coo hijxtahnd ween yajcähxø'øgy jim tsajpootyp. Paady hajxy jaduhñ miänaañ coo ja'a Jesús hajxy hānajty jia wi'i jiojcapxø'øwa'añ.

² Mänitā Jesús yhadsooyy:

—Coo hānajty chuujø'øy, mänit hajxy naxy mmāna'añ: “Wa'ads ja'a tsajt; wa'ads jaboom yhida'añ.”

³ Y coo hānajty jiojø'øy, mänit hajxy naxy mmāna'añ: “Tøø wyiimbøcy; tu'uwaamb.” Mnajuøøby hajxy jaduhñ nebiä tsajt yhida'añ, pero cabā hijxtahnd hajxy mwiinjuø'øy ja'ačh chaa nyajcäxø'piä. Ja'a jäya'ayhajxy jada'ahatypä, haxøøg hajxy jäya'ayhajnä; cabā Dios hajxy chocy.

⁴ Hijxtahnd hajxy jaduhñ yujwaamby, pero cab hajxy mio'owa'añii. Ja-gooyyā hajxy jaduhñ yaghixa'añii nebiä Jonás jecy jiajty yhabejtiän.

Mänitā Jesús jim jäwaach. Mänit jim tiu'ubøjcy.

⁵ Mänitā Jesús hajxy miejyñajxy. Pero jiahdiägooyy ja'a quiaayyøøc hajxy, ja'a Jesús miägu'ughajpähajxy.

⁶ Mänitā Jesús miänaañ:

—Huuc madow hajxy. Cabā fariseos chajcaagychooyhajxy yhooyä, ni ja'a saduceos chajcaagychooyhajxy quia'a hooyä.

⁷ Mänitā miägu'ughajpähajxy tiägøøyy mädiaacpä:

—Paady jaduhñ miäna'añ, coo ja'a caayyøøc hajxy nga'a jahmiejtsäm.

⁸ Najuøøby ja'a Jesús hānajty nebiaty hajxy hānajty miädia'agy. Mänit miänaañ:

—Tii hajxy jaduhñ coo mwi'i miädia'agy coo ja'a caayyøøc hajxy mga'a mөөдä. Cábøchā nmädia'agy hajxy jaduhñ xñä'ägädä mabøjcä.

⁹ Cahnøch nmädia'agy hajxy xwyiinjuøøyyä. Cab hajxy jaduhñ mjahmiejtsnä nébiøch ja'a mägooxpä tsajcaagy nyajnāwa'xøøyyän ja'a nämägooxmilpä jäya'ay, y coo hajxy maguiach myajpädø'cy.

¹⁰ Ni jaduhñ hajxy mga'a jahmiejtsnä nébiøch ja'a juxtupä tsajcaagy nyajnāwa'xøøyyän ja'a nämädaaxmilpä jäya'ay, y coo hajxy maguiach myajpädø'cumbä.

¹¹ Cooch jaduhñ nmānaañ coo ja'a fariseos chajcaagychooyhajxy quia'a hooyä, coo ja'a saduceos chajcaagychooyhajxy quia'a hooyä, cábøch tsajcaagychooy hānajty ndehmñ ñänøømy. Pero caj mijts mwiinjuøøyy.

¹² Mänit hajxy wyiinjuøøñä tii Jesús hānajty miädiaacpy. Ca'a chajcaagychooyä hānajty tiehmñ miädiaacpy, ja'a hajxy yajtsajcaagyquiojpiä. Jaduhñ hānajty miädia'agy cooc ja'a fariseos miädia'agyhajxy quia'a hooyä, cooc ja'a saduceos miädia'agyhajxy quia'a hooyä.

¹³ Mänitā Jesús hajxy jim miejch maa ja'a cajpt hānajty xiøhatiän Cesarea de Filipo. Mänitā Jesús miäyajtøøyy ja'a miägu'ughajpähajxy:

—Waambátyhøch ja'a cu'ughajxy xñänøømy pøñhøch høøch ja'a Diosquexypä.

¹⁴ Mänit hajxy yhadsooyy:

—Näje'e ja'a cu'ughajxy miäna'añ cooc miich mJuan mäyajnäbejpä; näje'e hajxy miänaambä cooc miich mElíasä; näje'e hajxy miänaambä cooc miich mJeremíasä, ja'a Diosmädia'agy jecy yajwá'xäbä; näje'e hajxy miänaambä cooc miich mDiosquexiä.

¹⁵ Mänitā Jesús miänaañ:

—Mijtsäts, wáambøch mijts xñänøømbä.

¹⁶ Mänitā Simón Pedro miänaañ:

—Miičh je'e ja'a Cristo. Miičh ja'a Dios tøø xquiexy, ja'a jim tsajpootypä. MDioshuung miičh.

¹⁷ Mänitä Jesús yhadsooy:

—Miičh Simón, Jonás miičh xyhuunghajp. Caj miičh pøn tøø xyhawaanä cooçh nDioshuungä. Ja'a nDéedyhøch tøø xyhawaanä, ja'a jim tsajpootypä. Paady miičh hoyhajt weenhajt mbaada'añ.

¹⁸ Miičh jaduhñ nnämaaby coo miičh mxøhata'añ Pedro; je'edu'un ñänøømbý “tsaa.” Miičhcøxpøch ja'a jäya'ay ja'a nmädia'agy hajxy may xmiäbøgaanä. Hoy hajxy cu jia ho'og, cab hajxy jaduhñ quiuhdägoyya'añ. Cøjxta'axiøø hajxy jim yhida'añ tsajpootyp.

¹⁹ Nmo'owáambiøch miičh cuhdujt cooçh miičh nmädia'agy xyajwá'xät nébiøch ja'a jäya'ay ja'a nmädia'agy hajxy jaduhñ xmiäbøjcät. Dios jaduhñ xñajtsapxø'øwáanäp nebiaty ja'a jäya'ayhajxy mhané'emät coo hajxy jaduhñ ween quiudiuñ, coo ja'a yhaxøøgwiinmahñdy hajxy ñajtshixø'øwät.

²⁰ Mänitä Jesús ja'a miägu'ughajpä yhanehmy coo hajxy ween quia'a mädia'agy coo je'e Cristo.

²¹ Mänitxøø ja'a Jesús tiägøøyy hawáanäbä ja'a miägu'ughajpähajxy cooc hñajty jim ñøcxa'añ Jerusalén, cooc hñajty jim yajtsaachpøga'añijäm ja'a martuumädøjc møødä teedywiindsøñhajxy møødä ley-yajnahixøøbiädøjc. Mänit miänaambä cooc hñajty yagho'oga'añii, pero cumáaxcäc hñajty jiu-jypiøga'añ.

²² Mänitä Pedro ja'a Jesús yajwooduuty. Mänitä Jesús wyiingugapxøøyyä:

—Wiindsøn, cab jaduhñ yhooyä miäbaadä coo jaduhñ mjádät mhabétät.

²³ Mänitä Jesús wia'wiimbijty. Mänitä Pedro yhojjä:

—Jua'ads jim, møjcu'u. Náxyhøch miičh xjiøjcaxø'øy. Jaduhñ miičh mwiinmahñdy nebiä jäya'ayhajxy wyiinmahñdyhatiän. Caj miičh mwiinmahñdy tiuhñä nebiä Dios wyiinmahñdiän.

²⁴ Mänitä Jesús ñämaay ja'a miägu'ughajpä:

—Pønhoçh nmädia'agy jaduhñ xpiadu'ubøgáanäp, weenä yhamdsoo cuhdujt ñajtshixø'øy; ween jaduhñ chaaçhpøjpät nébiøch ndsaachpøga'añän; weençh nmädia'agy xjiøjtägøøyyä.

²⁵ Pøn yhamdsoo wiinmahñdy ja wi'i yaghidaamb, cuhdägoyyaamb je'e. Pero coo pøn jaduhñ yhó'ogät ja'a høøchcøxpä, nä'ägä hodium je'e nøcxy miähmø'øwa'añ.

²⁶ Coo pøn jaduhñ quiuhdägóyyät, hoy jaduhñ yaa tøø jia mäyøøhaty hädaa yaabä naaxwiin, caj tii piaada'añ. Cabä jiugyhajt jaduhñ piaadaannä, homiäduhñtiä xädø'øñ cu jia yec.

²⁷⁻²⁸ Cädaactägatsáambøch yaa, høøch ja'a Diosquexypä. Ja'a Diosmóonsøch nmøødcäda'agaambý, ja'a hajxy jim tsajpootypä. Møødhøch nDeedy quiuhdujt jaduhñ ngädaactägatsa'añ. Mänitøch ja'a jugyhajt hñajty njaac mo'owa'añ pønjatý hñajty hoy tøø wiädity. Pero pønjatý hñajty hoy tøø quia'a wädity, je'eds hajxy hñajty yajcumäadowáanäp. Mänitøch ndägø'øwa'añ hanehmbä. Tøyhajt mijts nnäma'ay, cooçh hñajty ngädaactägatsa'añ, mänitøch hajxy näjé'eyyäm xyhixa'añ, ja'a hajxy yaa tänaabiä. Cajnä hajxy hñajty yho'ogyñä.

17

¹ Cudädujxøø ja'a Jesús ja'a Pedro wioonøcxy tunñahgøxp møødä Jacobo møødä Jacobo yhuch Juan. Nämädaaxc hajxy jaduhñ ñøcxy møødä Jesús.

² Mänitä Jesús wiing jiajty maa ja'a Pedro wyiinduumhajxiän. Jaduhñdsä wyiin jiøjp cøjx jiaty nebiä haambän. Mänitä wyit hobioob jiajty.

³ Mänitä Moiseshajxy ñäguehxtøø'xy mөөдä Elías. Mänitä Jesús hajxy tiägøøyy mөөdmädiaacpä. Coö hajxy yhijsä,

⁴ mänitä Pedro ja'a Jesús ñämaayy:

—Wiindsón, hoyøøyy jaduhñ coö højts yaa tøø nbéjtäm. Pø chojpiä mjoot jaduhñ, ween højts tøjquemyhuung tägøøg nhuuc hädiuñ ja'a mijtsçxpä cøjtu'ug; tu'ug miich mje'e, tu'ug ja'a Moisés jie'e, tu'ug ja'a Elías jie'e.

⁵ Mädiaaccujc ja'a Pedrohajxy ñähgädaacpejtä ja'a näma'a. Hajajp ja'a näma'a hñajty. Mänit hajxy miädooyy quiapxy näma'ajooty:

—Høøch nHuung hädaa; njaanç tehñ chójpiøch. Xyagjootcugóøbiøch. Huuc mädoowä ja'a miädia'agy hajxy.

⁶ Coö ja'a Pedrohajxy jaduhñ miädooyy, mänit hajxy miägutscädaacy naaxwiin.

⁷ Mänit hajxy ñähdoonä ja'a Jesús. Mänit hajxy ñämaayyä:

—Pädø'øg hajxy; ca'a hajxy mdsähgø'øy.

⁸ Mänit hajxy piädø'cy. Mänit hajxy yhijswädijsy. Cab hajxy pøn yhijsy; jagooyy ja'a Jesús hajxy nidiuhñ yhijsy.

⁹ Mänit hajxy miänajcy tunñähgøxp. Mänitä Jesús ja'a Pedro ñämaayy:

—Cab hajxy pøn mhawáanät nebiaty hajxy jim tøø mhixy tunñähgøxp, høxtä cóonøch hñajty tøø njujypiøjtägach, høøch ja'a Diosquexypä.

¹⁰ Mänitä Jesús hajxy miäyajtøøyy:

—Yø'ø ley-yajñähixøøbiädøjc, tii hajxy coö miäna'añ cooc ja'a Elías miejtsø'øga'añ.

¹¹ Mänitä Jesús yhadsooyy:

—Tøyhajt jaduhñ coö ja'a Elías hijty miejtsø'øga'añ. Mänit hijty cøxiä wiinä yaghoyø'øwa'añ.

¹² Pero mijts jaduhñ nnämaaby coö ja'a Elías tøø jia hoy; pero caj yhøxcajpä. Jaduhñ tiuunä nebiä jäya'ay jioothajxy chojquiän. Jaduhñch hajxy xchaaçhtiunaambä, høøch ja'a Diosquexypä.

¹³ Mänitä Pedrohajxy wyiinjuøøñä coö ja'a Jesús ja'a Juan mäyajnäbejpä hñajty miädia'agy.

¹⁴ Mänitä Jesús hajxy miehch maa ja'a jäya'ayhajxy miayyän. Mänitä tu'jäya'ay ja'a Jesús wyiinjiçädaacy. Mänitä Jesús ñämaayyä:

¹⁵ —Wiindsón, høøch nhuung näxúu'tsác. Mayhooc jaduhñ tøø quiäday pojmoød. Hanaçiä jaduhñ chaaçhpøcy. Naxy jiøøngädawø'øy; naxy ñøøgädawø'øy.

¹⁶ Yaach tøø nja yajmech maa miich mmägu'ughajpädøjcän, pero cab hajxy hijty yajnähwa'adsa'añ.

¹⁷ Mänitä Jesús miänaañ:

—Caj mijts mnä'ägä mæbøcy. Cábøch nmeexxtugaanä coöch mijts njaac mөөdhídat. Mämín ja'a pigäna'c yaa.

¹⁸ Mänitä Jesús ja'a møjcu'u yhojy. Mänitiä ja'a pigäna'c ñähwaach.

¹⁹ Mänitä Jesús hawiing ñämaayyä ja'a miägu'ughajpädøjc.

—Tii højts ja'a møjcu'u hijty coö nga'a yajpædsøma'añ.

²⁰ Mänitä Jesús yhadsooyy:

—Caj mijts hijty mnä'ägädä mæbøcy. Tøyhajt mijts nnäma'ay, coö hajxy jaduhñ mmäbøgät howieeñtiä, mänit hajxy hotyiijä mjádät. Høxtáhmäts yø'ø tun, coö yø'ø tun hajxy mnämä'awät: “Jua'ads jim, nøcxwiingtuum”; mänitäts yø'ø tun jiaanç jäwá'adsät. Hotyiijä hajxy jaduhñ mjádät coö hajxy tøyhajt mmäbøgät.

²¹ Mänitä møjcu'u hajxy myajpædsømät coö ja'a Dios hajxy mba'yá'axät, coö hajxy mhamajtsç-hádät.

- 22 Jimä Jesús hajxy hānajtŷ wiädity Galileanaaxooty. Mānitä Jesús miānaaŋ:
—Xyajcø'ødägø'øwáambøch ja'a cu'ughajxy, høøch ja'a Diosquexypä.
- 23 Mānitøch hajxy xyagho'oga'añ. Pero cudägøøgxøøch njujypiojtägatsa'añ.
Mānitä miägu'ughajpādøjc-hajxy jiootmadiägøøyy.
- 24 Mānitä Jesúshajxy miejch Capernaum. Mānitä Pedro miäyajtøøwä ja'a yajnähjuudiuutpādøjc:
—Nej, cabä mwiindsøn hajxy ñähjuudiu'udy maa ja'a tsajtøjcänä.
- 25 Mānitä Pedro yhadsooyy:
—Ñähjuudiuutyp pues.
Mānitä Pedro tiøjtägøøyy maa ja'a Jesús hānajtŷ yhäña'ayän. Mānitä Jesús ja'a Pedro ñāmaayy:
—Simón, nej miich mmāna'añ, ja'a gobiernähajxy, pøn hajxy yajnähjuudiuutyp, yhamdsoo cu'ug, tøgä wiingjäya'ay.
- 26 Mānitä Pedro yhadsooyy:
—Wiingjäya'ay hajxy yajnähjuudiuutyp.
Mānitä Jesús miānaaŋ:
—Entonces, cabä yhamdsoo cu'ug hajxy yajnähjuudiu'udy.
- 27 Pero cábøch pøn nyagjootma'ada'añ. Nøcx mejypia'a. Jiibiä xuhñdy mnøøwobø'øwät. Coø hacx mxúyät, mānit myajpādsømät. Jiibiä xādø'øñ mbaada'añ hacxhaawjooty. Mādøyhadaamb jaduhñ coø nāmetsc nya-jniñähjuudiúutāmät. Mānitäts nøcxy mnähjuudiu'udy.

18

- 1 Mānitä Jesús miägu'ughajpādøjc-hajxy miejch maa ja'a Jesús wyiindu-umän. Mānitä Jesús miäyajtøøwä:
—Pønjatŷ ja'a møjtuuñg møød maa ja'a Dios yhane'emiän.
- 2 Mānitä Jesús ja'a pigāna'c tu'ug miøjyaaxy. Mānitä pigāna'c cujc piādaacä.
- 3-4 Mānitä Jesús miānaaŋ:
—Ja'a pigāna'c-hajxy, cabä møjtuuñg hajxy ñiyhøxtáayyāxä. Pøn ja'a møjtuuñg yaa niyhøxtáayyāxäp hädaa yaabä naaxwiin, cab jim tiägø'øwa'añ maa ja'a Dios wyiinduuman. Pero pøn ja'a møjtuuñg jaduhñ ca'a høxtaaby, nebiä hädaa pigāna'c jaduhñ quia'a høxta'ayän, je'eds ja'a møjtuuñg jaduhñ jim paadaamb maa ja'a Dios yhane'emiän. Tøyhajt jaduhñ.
- 5 Pøn jaduhñ māgu'ugpøgäp hädaa pigāna'c jaduhmbä maa ja'a høøhcøxpän, jaduhñ māvínhøch høøch xmiägu'ughaty.
- 6 Hädaa pigāna'c-høch nmādia'agy hajxy xmiäbøjcäbä, coø hajxy pønjatŷ jiojcapxø'øwøøjät, maas hoy hit jaduhñ coø ja'a mājiojcapxøøbiä paan ya-jyo'xodsø'øwøøjät y coø miejjiäwipø'øwøøjät hagamduum.
- 7 Hanaxiä hajxy yaa chaačhpøcy ja'a hajxy hädaa yaabä naaxwiin tsānaabiä. Paady hajxy chaačhpøcy coø ja'a jiojcapxøøbiä hajxy piaady. Pero Dios jaduhñ yajcumādowaamb ja'a mājiojcapxøøbiä.
- 8-9 Coø tii hoyhadsojnä mhíxät, cab jim mmøjhée'pnät ni mga'a nāhdónät. Jaduhñ mnibiäda'agøøjät nebiä wiindspän, nebiä cø'øducpä. Pø caj, jim haxøøgtuum mga'awa'añ.
- 10 'Ca'a yø'ø pigāna'c hajxy mxøøghaty. Cueendähajtäp hajxy jaduhñ. Ja'a Diosmoonsähajxy ja'a Dioswiinduumbä, je'edsä pigāna'c hajxy cueendähajp.
- 11 Høøch møjhajt. Yaač tøø ngāda'agy hädaa yaabä naaxwiin nébiøch ja'a jäya'ayhajxy nyajnähwá'adsät coø hajxy hijty quihdägoyya'añ.
- 12 Tsøc mādíaacäm. Jii tu'jäya'ay meeg māgo'x miøødä. Coø tu'ug tiägóyyät, mānit nøcxy yhøxta'ay. Jimä meeghajxy miähmø'øy tunhøjx, ja'a hajxy tøø quia'a tægóyyäbä.

13 Y coo piáadät, mänit xioonda'aga'añ năgø'ø nădecypiä. Tøyhajt jaduhñ.

14 Jaduhñ măwíinäts je'e neby hōjts nDeedyhájtäm ja'a jim tsajpootypä; cabä jioot chocy coo ni mädyii pigäna'c quia'a cuhdägóyyät.

15 'Coo ja'a mmäjøøn coo ja'a mmädøjc jaduhñ xmiägädiéeyät, mänit hamee'ch mmägapx mhané'emät. Coo jaduhñ xmiäbøjcät, mänit jaduhñ yhojó'owät.

16 Pero coo jaduhñ xquia'a măbøjcät, mänitä jäya'ay mmøjyá'axät mejtstägøøg neby hajxy jaduhñ tiestigohádät waambaty hajxy hănajty mmădia'agy.

17 Y coo ni jaduhñ quia'a măbøgät, mänitäts ja'a hermanodøjc mhawáanät. Y coo ni jaduhñ quia'a măbøgät, mänit hajxy mbuhwá'adsät.

18 'Tøyhajt mijts nnăma'ay coo ja'a Diosmădia'agy hajxy yaa myajwá'xät hădaa yaabä naaxwiin nebiä jäya'ayhajxy jaduhñ hoy yhidät. Dios hajxy jaduhñ xyhané'emăp nebiaty hajxy mmădiá'agät.

19 'Jaduhñ mijts nnămaabiä, coo hajxy nămetsc mnøcxät tu'ugmădia'agy hădaa yaabä naaxwiin, y cooçh nDeedy hajxy homiädyiibä xmiäyujwáanät ja'a jim tsajpootypä, mänit jaduhñ xmió'owät.

20 Coo hajxy nămetsc nădägøøg tiu'ugmúgät maa ja'a høøçhcøxpän, jímhøch jaduhñ nhidaambä cujc.

21 Mănitä Pedro ja'a Jesús ñămaayy:

—Wiindsøn, cooçh nmäjøøn cooçh nmädøjc jaduhñ xmiägädiéeyät, naaghóoc-høch jaduhñ nmămée'xät. Nej, mädøyyä jaduhñ cooçh juxtujc-hooc nmămée'xädä.

22 Mănitä Jesús yhadsooyy:

—Cab jaduhñ miädøyyä. Cunaaghooc hănajty xmiägädieey, mänit nmămée'xät.

23 'Neby hajxy hoy mwiinjuó'owät nebiä Dios yhane'emiän. Tsøc yajmăbáatäm nebiä rey tu'ugän. Mănitä rey wyiinmahñdyhajty coo ja'a mioonsăhajxy ñuu'xycápaxät.

24 Naamñä hănajty ñuu'xycapxtsooñ coo ja'a mioonsă tu'ug miejch. Mamy-illón hănajty miānuu'xyhadyii.

25 Pero cabä mioonsă xădø'øñ hănajty miøødä neby jaduhñ yajnăhwá'adsät. Mănitä rey miānaañ coo ween tioogøøjät møødä yhuung møødä tio'oxy, møødä chømy møødä tiajy, cøxiä nebiä ñuu'xy jaduhñ ñăhwá'adsät.

26 Mănitä rey wyiinjiçădaacä ja'a mióonsăm. Mănit miānuu'xtaacä: “Wiindsøn, mee'x. Cøxáambøch nyega'añ.”

27 Mănitä wyiindsøn hojioot ñă'ä møødhajty. Mănit miānaañ coo tøø ñăhwa'açh, coo ween yhawa'adspădsømy.

28 Coo ja'a moonsă jim chohñ, mănitä miāmoonsă tu'ug piaaty. Mejtsmil tăgøøgmil hănajty miānuu'xyhadyii. Mănitä miāmoonsă yo'mămadsøoyy. Mănit miānaañ: “Høøch móoyyăc mădúhñtiøch miich xmiānuu'xyhaty.”

29 Mănit wyiinjiçădaacä. Mănit miānuu'xtaacä: “Mee'x, cøxáambøch nyega'añ.”

30 Pero cabä craa hojioot ñă'ä møødhajty. Mănitä măhdiøjc yajtsuumă. Jiiby jaduhñ yhida'añ pujxtøgooty høxtä coonă quioøxy yégät.

31 Coo ja'a moonsădøjc-hajxy yhiçy, ja'a hajxy hănajty jaac jimbə, mänit hajxy jiootmabiøjcy. Mănitä wyiindsøn hajxy hoy yhawaañä nebiaty hănajty tøø jiaty tøø yhabety.

32 Mănitä rey ja'a mioonsă miøjyaaxy, ja'a hănajty tøø ñăhwá'açhăbä. Mănit miānaañ: “Haxøøghăna'c miich. Tøøch miich cøxiä nyajnăhwa'açh

mädúhñtiøch miičh hijty xmiānuu'xyhaty. Páadyhøch miičh tøø nya-jnähwa'ačh, cooçh miičh tøø xmiānuu'xta'agy.

³³ Jaduhñ miičh mmämoonsä cu mnäxuu'ch nébiøch miičh tøø nnäxuučhän."

³⁴ Hoyhoy ja'a rey jaduhñ yhawa'andaacy. Mänit miānaañ coo ja'a mioonsä quiumädówät høxtä coonä hñajty tøø yajnähwa'ačh mäduhñtiä hñajty miānuu'xyhadyii.

³⁵ Jaduhñch nDeedy mijts xyajcumädowaambä, ja'a jim tsajpootypä, coo ja'a mmäjøøn coo ja'a mmädøjc hajxy mga'a mämée'xät hamuumdu'joot.

Mänitä Jesús jaduhñ miädiaacmaayy.

19

¹ Mänitä Jesús jim chohñ Galilea. Mänit jim ñøcxy Judeanaaxooty. Jímäts je'e Jordánmøjnøøhawiimb maa ja'a xøø piädsømiän.

² Mänitä jäya'ayhajxy may piadu'ubøjcy. Mänit hajxy yajmøcpøjcä ja'a Jesúsäm.

³ Mänitä Jesús ñämejtsä ja'a fariseoshajxy näje'ebä. Mänitä Jesús hajxy miäyajtøøyy:

—Nej, hoy jaduhñ coo jäya'ay ja'a tio'oxiøjc nä'ä nägoobä yhøxmädsädä.

Paady hajxy jaduhñ miānaañ, jia jøjcaxø'øwaañ ja'a Jesús hajxy jaduhñ.

⁴ Mänitä Jesús yhadsooyy:

—Nej, cajnä ja'a Diosmädia'agy hajxy mgapxyñä. Jiiby jaduhñ myiñ coo ja'a Dios jäya'ay jecy quiunuu'xy ya'adio'oxy.

⁵ Paadiä ya'adiøjc ja'a tiaj ja'a tieedy hajxy ñähgueecnä, coo ja'a to'oxiøjc hajxy wyiingpøjnä. Nämetsc hajxy jaduhñ ñimiøødtsäna'awáañänä.

⁶ Jaduhñ hajxy yhidaañnä nebiä tu'que'expän. Cab jaduhñ yhooyä coo hajxy myajniyhøxmadsoøjät pønjaty ja'a Dios jaduhñ tøø quiunuu'xy coo hajxy ñimiøødtsäna'awóøjät —nømä Jesús miānaañ.

⁷ Mänitä Jesús hajxy miäyajtøøgumbä:

—Tii ja'a Moisés jaduhñ coo miānaañ coo ja'a to'oxiøjc yhøxmadsoøjät cuhdujthaam.

⁸ Mänitä Jesús miānaañ:

—Coo ja'a mgopc-hajxy jaduhñ wyi'i xiexä, paadiä Moisés hajxy jaduhñ xquiuhdujtmoooy coo ja'a mdo'oxiøjc hajxy mhøxmädsät. Pero cabä Dios jaduhñ quiunuu'xy.

⁹ Cab jaduhñ yhooyä coo wiingto'oxiøjc mwiingpøjtägätsät, pø nä'ä nägoobä ja'a mdo'oxiøjc hñajty tøø mhøxmach. Ni jaduhñ quia'a hoyy coo høxmachtio'oxiøjc mwiingpøgät.

¹⁰ Mänitä Jesús ñämaayyä ja'a miägu'ughajpähajxy:

—Maas hoyyäda'a jaduhñ coo mga'a nä'ägädä pøgät.

¹¹ Mänitä Jesús miānaañ:

—Cab hajxy nägøxiä wyiinjuø'øwa'añ hädaaduhmbä. Jayooyyä hajxy jaduhñ wyiinjuø'øwa'añ pønjaty ja'a Dios jaduhñ tøø yajwiinjuø'øy.

¹² Näje'e ja'a ya'adiøjc-hajxy ma'ad myiñguia'ay; paady hajxy quia'a ñibiøgyii. Näje'e hajxy yajtsucy. Coo ja'a Dios hajxy wyiingudsähgø'øwa'añ, paady hajxy näje'e quia'a nibiøgyii. Pøn jaduhñ mee'xtugaamb, ween miee'xtucy.

¹³ Mänitä pigäna'c-hajxy näje'e wiomejtsä maa ja'a Jesús wyiindumän nebiä Jesús ja'a hoyhajt jaduhñ mió'owät. Pero cabä Jesús ja'a miägu'ughajpähajxy jaduhñ yhojiäwøøyy. Mänit hajxy yhojjä, ja'a pigäna'c hajxy hñajty tøø wioméchébä.

¹⁴ Mänitä Jesús miānaañ:

—Caj, wéenhøch ja'a pigäna'c-hajxy xñämech. Ca'a hajxy mhojy. Coö ja'a Diosmädia'agy hajxy jaduhñ mmäbögät nebiä pigäna'c-hajxy miäbøquiän, mänitä Dios hajxy jaduhñ xyhuunghädät.

¹⁵ Coö ja'a Jesús ja'a pigäna'c-hajxy hänajty tøø mio'oy ja'a hoyhajt, mänit jim chohñ.

¹⁶ Mänitä Jesús jäya'ay tu'ug ñämejtsä. Mänit miäyajtøøwä:

—Wiindsøn, tii hóybøch ndúnäp nébiøch njugyhádat cøjxta'axiøø nebiä Dios jiugyhatian.

¹⁷ Mänitä Jesús yhadsooyy:

—Tiičh ja'a hoybä coö xmiäyajtøy. Caj pøn jaduhñ yhojy; jagooyyä Dios jaduhñ yhojy. Pø chojpy ja'a mjoot jaduhñ coö mjugyhádat cøjxta'axiøø nebiä Dios jiugyhatian, mgudiúnäp ja'a Diosmädia'agy jaduhñ.

¹⁸ Mänitä craa miänaañ:

—Mädyibä.

Mänitä Jesús yhadsooyy:

—Caj mjäya'ay-yaghó'ogät; caj mméedsät; caj pøn mnähøøñ'owät;

¹⁹ mwiingudsähgø'owäp ja'a mdaj ja'a mdeedy; mmøødnijootpaadøøjäp ja'a mmäjøøn ja'a mmädøjc hamuumdu'joot.

²⁰ Mänitä craa miänaañ:

—Tøøch jaduhñ ngøxy cudiuhñ. Múutsnøch hänajty coöch jaduhñ ngudiunndsohñ. Tijátyhøch jaduhñ nga'a cudiumyñä.

²¹ Mänitä Jesús miänaañ:

—Pø mjaančh cudiunaamby hoy yajxón, nøcx yø'ø mje'e cøxy toog. Mänitä häyoobädøjc mnä'ä mó'owät cøxiä. Jaduhñ jim mdägø'owät tsajpootyp. Mänitøch jaduhñ xpiadu'ubögät.

²² Coö ja'a craa jaduhñ miädooyy, mänit jaduhñ jiootmadiägøøyy. Hix, mäyøø ja'a craa hänajty. Mänit wyiimbijnä.

²³ Mänitä Jesús ñämaayy ja'a miägu'ughajpähajxy:

—Nä'ägä tøyhajt mijts nnäma'ay, tsip jaduhñ coö mäyøøhäna'c jim ñøcxät tsajpootyp.

²⁴ Tøyhajt jaduhñ, cab jaduhñ jiaty tsipä coö ja'a camello ñáxät xuhñdyjutjooty. Maas tsip coö mäyøøhäna'c jim ñøcxät tsajpootyp.

²⁵ Coö hajxy jaduhñ miädooyy, mänit hajxy yagjuøøyy. Mänit hajxy ñimiäyajtøøwä:

—Pønds jaduhñ nähwá'adsäp.

²⁶ Mänit hajxy wyiinhee'ppejtä ja'a Jesúsäm. Mänitä Jesús miänaañ:

—Cabä jäya'ayhajxy jaduhñ ñä'ä jájpät; pero hotyijä ja'a Dios jaduhñ jiaty.

²⁷ Mänitä Pedro miänaañ:

—Wiindsøn, tøø højts cøxiä nnähgue'egy nhøxyo'oy. Tøø højts miich nbadu'ubøjnä. Tii højts jaduhñ nbaadaamby.

²⁸ Mänitä Jesús yhadsooyy:

—Nä'ägä tøyhajt mijts nnäma'ay, coö ja'a xøøwiimbä naaxwiimbä cøxiä jieemdagátsät, mänitøch jim nøcxy nhøxta'aga'añ maa ja'a Dios wyiinduumän, høøch ja'a Diosquexypä. Jimhøch nhane'ema'añ. Y mijts, jim hajxy jaduhñ nøcxy mhøxta'agaambä pønjátyhøch yaa tøø xpiawädity. Cødu'ug hññaabiejt hajxy jim mbaada'añ, majmetspä. Jim mijts ja'a judíoshajxy mhane'ema'añ, ja'a majmetsc-hagajtpä.

²⁹ Pønjaty ja'a tiøjc jaduhñ tøø ñähgue'egy ja'a høøchcøxpä, o ja'a piuhya'ay ja'a piuhdo'oxy, o ja'a tiaj ja'a tieedy, o ja'a yhuung ja'a tio'oxy, o ja'a ñaax, majiäduhñtiä piaattägatsa'añ, y cøjxta'axiøø jiugyhada'añ nebiä Dios jiugyhatian.

³⁰ Ja'a hajxy mǝjtuungmǝǝdpǎ jǎda'ahaty, nǎmay ja'a tiuung hajxy ya-jtǎgoyya'añ; y ja'a mǝjtuung hajxy jǎda'ahaty ca'a mǝǝdpǎ, nǎmay hajxy miǝjtuungpaada'añ.

20

¹ 'Maa ja'a Dios yhane'emiǎn, tsǝc yajmǎbǎatǎm nebiǎ cudsaatypcamǎn tu'ug. Jopy jaduhñ tiu'ubǝjcy moonsǎhǝxtaabiǎ, pǝñ jaduhñ miǝǝdtúnǎp ja'a chaatypcamjooty.

² Coǝ piaaty, mǎnit hajxy quiojyquiapxtiuuñ coǝ ja'a xiǝǝhajxy jiuyǎanǎxǎ mǎgooxmiljaty. Mǎnit hajxy quiejxǎ tuumbǎ maa ja'a tsaatypcamǎn.

³ Mǝjpetyxiǝǝ ja'a cudsaatypcam tiu'ubǝjcumbǎ moonsǎhǝxtaabiǎ. Mǎnitǎ jǎya'ay jim yhiijxy maa halaplaazǎn. Nǎmetsc nǎdǎgǝǝghajxy hǎnajty jim tiǎna'ay. Cabǎ tuung hajxy hǎnajty miǝǝdǎ.

⁴ Mǎnit hajxy ñǎmaayyǎ: "Jam hajxy cudún maaçh ndsaatypcamǎn. Nǎ'ǎ mǎdǝyyǎjuǝǝbyhǝch jaduhñ njuya'añ." Mǎnit hajxy ñǝcxy cuduumbǎ.

⁵ Mǎnitǎ cudsaatypcam yhǝoguiumbǎ moonsǎhǝxtaabiǎ cujyxiǝǝho'ogy. Mǎnit yhǝoguiumbǎ mǎnacyxiǝǝ.

⁶ Mǝjmǎnacyxiǝǝ tiu'ubǝjcumbǎ. Jimǎ jǎya'ay yhiijxy halaplaaz. Cabǎ tuung hajxy hǎnajty miǝǝdǎ. Mǎnit hajxy ñǎmaayyǎ: "Tii mijts coǝ myaaǎjǎ. Tii hajxy yaa coǝ mwi'i xiunaxy."

⁷ Mǎnit hajxy miǎnaañ: "Cab hǝjts pǝñ waamb tǝǝ xñǎma'ay." Mǎnit hajxy ñǎmaayyǎ: "Jam hajxy cudún maaçh nnaaxootiǎn. Nǎ'ǎ mǎdǝyyǎjuǝǝbyhǝch jaduhñ njuya'añ."

⁸ Coǝ chuujǝǝy, mǎnitǎ cudsaatypcam ja'a moonsǎwiindsǝñ mǝjhajpǎ ñǎmaayy: "Mmǝjyǎ'axǎp yǝ'ǝ moonsǎhajxy. Mǎnit hajxy mmǎjýyǎt. Pǝnjaty hǝxhaam tǝǝ jiaac tǎgǝ'ǝy cuduumbǎ, je'eds hajxy jawyiin mmǎjuuçhóonǎp. Y pǝnjaty jawyiin tǎgǝǝy cuduumbǎ, je'eds hajxy hǝxhaam mmǎjýyǎp."

⁹ Mǎnit hajxy yajmǎjuuyy. Jawyiin hajxy yajmǎjuuyy ja'a hajxy hǎnajty tǝǝ tiǎgǝ'ǝyǎbǎ mǎnacyxiǝǝ. Pedyii hajxy jaduhñ miooyyǎ mǎgooxmiljaty.

¹⁰ Ja'a hajxy hǎnajty tǝǝ tiǎgǝ'ǝyǎbǎ jayǝjp, jaduhñ hajxy hǎnajty tiajy miay coǝ hajxy maas majiaty mio'owa'añii. Pero jaduhñ hajxy miǝǝyǎbǎ mǎgooxmiljaty.

¹¹ Coǝ hajxy jaduhñ yajmǎjuuyy tu'cuhdujtǎ, paadiǎ cudsaatypcam hajxy miǎjootma'ty.

¹² Mǎnit hajxy miǎnaañ: "Yǝ'ǝ hǎna'c-hajxy hǝxhaam tǝǝ jiaac tehñ tiǎgǝ'ǝyǎbǎ, tu'hóráyyǎ hajxy jaduhñ ñǎ'ǎ tuuñ. Pero jaduhñ miich tǝǝ mmǎjuy neby hǝjts tǝǝ xmiǎjúyyǎn. Cab jaduhñ yhooyyǎ. Tǝǝ hǝjts tu'xǝǝ nmee'xtucy. Jaançh tehñ yhan jaduhñ. Hamǎjaa hǝjts jaduhñ tǝǝ nmǎnaxy."

¹³ Mǎnitǎ cudsaatypcam yhadsooyy: "Mǎgu'ughajpǎ, cábǝch miich tǝǝ nyajniwyiindoyii. Jaduhñ ngojyquiapxtiúnǎm cooçh miich mǎgooxmil nmo'owa'añ.

¹⁴ Chaadsǎ mmǎjuhñdy. Nǝcxnǎ. Chǝjpiǝch njoot jaduhñ cooçh yǝ'ǝ craa nmó'owǎt nébiǝch miich tǝǝ nmo'oyǎn, yǝ'ǝ craa hǝxhaam tǝǝ jiaac tǎgǝ'ǝyǎbǎ.

¹⁵ Nej, cábǝch ja'a cuhdujt jaduhñ nmǝǝdǎ cooçh nxǎdǝ'ǝñ jaduhñ nya-jwǎ'xǎt nébiǝch njoot choquiǎn. Tǝgǎ paady jaduhñ mjootma'adiǎ, cooçh hojioot nmǝǝdǎ."

¹⁶ Pǝnjaty hǝxhaam tǎgǝǝby, copc-hadaamb je'e. Pǝnjaty jawyiin tǎgǝǝby, hǝxhaamǝ'ǝwaamb je'ebǎ. Nǎmay hajxy jaduhñ tǝǝ jia mǝjya'axyii, pero nǎweeñtiǎ hajxy tǝǝ wyiimbiyii.

17 Mänitä Jesúshajxy jim chohñ, ñocxy hajxy Jerusalén. Nāmay ja'a cu'ughajxy hānajt ñocxy. Tu'haamnøcxpā ja'a Jesúshajxy yohwia'xy møødä miägu'ughajpādøjc-hajxy nāmajmetspā. Mänitā Jesús miānaañ:

18 —Yam hajxy nnøcxām Jerusalén. Høøch ja'a Diosquexypā, jímhøch hāna'c xyajcø'ødägø'øwa'añ maa ja'a teedywiindsøn'hajxiän, maa ja'a ley-yajñähixøøbiädøjc-hajxiän. Jímhøch hajxy xyajyagho'oga'añii.

19 Mänitøch hajxy xyajcø'ødägø'øwa'añ maa ja'a jāya'ayhajxiän, ja'a jäguemnaaxtsohm̄bā. Mänitøch hajxy xwyiinwoona'añ. Mänitøch hajxy xwiobho'oga'añ. Mänitøch hajxy xmiøjpahbeda'añ cruzcøxp. Pero cudägøøgxøøch jaduhñ njujypiøga'añ cooçh hānajt tøø nho'ogy.

20 Jaduhñä Jesús miägu'ughajpāhajxy hānajt xiøhaty metscä, Jacobo møødä Juan. Zebedeo ja'a tieedyhajxy hānajt xiøhaty. Coø ja'a Jesúshajxy hānajt ñocxy Jerusalén, jimä Jacobo tiajhajxy hānajt piawädijpā. Mänit miejch maa ja'a Jesús wyiinduumän. Mänitā Jesús wyiinjiçädaacä, miäyujwaanä ja'a mayhajt.

21 Mänitā Jesús miānaañ:

—Tii mayhājthøch jaduhñ ndúnäp.

Mänitā tajiāya'ay yhadsooy:

—Coo miiçh hānajt tøø mgoody maa mhane'ema'añän, mänit mhané'emät cooçh nhuunghajxy yaghøxta'agøøjät hahooyhaampiä møødä hanajtyhaampiä maa miiçh mwiinduumän.

22 Mänitā Jesús ja'a nāmajmetspā ñāmaayy:

—Cab hajxy jaduhñ mnajuø'øy tii hajxy jaduhñ myujwaamby. Nej, hoy hajxy jaduhñ mjada'añ mhabeta'añä nébiøch jaduhñ njada'añ nhabeta'añän.

Mänit hajxy yhadsooy:

—Hoy pues.

23 Mänitā Jesús miānaañ:

—Nä'ägä tøyhajt jaduhñ coo mijts jaduhñ mjadaambä mhabetaambä nébiøch njada'añ nhabeta'añän. Pero cábøch cuhdujt jaduhñ nmøødä coo hajxy jim mhøxta'agät maaçh nwiinduumän, hahooyhaampiä møødä hanajtyhaampiä. Pønjätyhøch ja'a nDeedy jaduhñ tøø yajñähdijy, je'eds jaduhñ jim høxta'agaamb maaçh nwiinduumän.

24 Coø ja'a Jesús miägu'ughajpādøjc-hajxy jiaac mädooy ja'a jaac nāmajcpā, mänitā Jacobo hajxy miäjootma'ty møødä Juan.

25 Mänitā Jesús jiämioød quiøxy møjyaaxy. Mänit miānaañ:

—Mnajuøøby hajxy coø ja'a gobiernāhajxy yhane'emy maa hajxy tiuñän. Ja'a hajxy møjtuungmøødpā, je'eds hajxy maas hanehm̄b.

26 Pero mijts, cab hajxy jaduhñ mhane'ema'añ. Pøn ja'a møjtuung jaduhñ tsojp maa mijtsän, tsipcøxp ja'a miägu'ughajpā piuhbédät.

27 Y jaanä jaduhñduhm̄bä, pøn jaduhñ yajcumayaamb maa mijtsän, tsipcøxp ja'a miägu'ughajpā yajtunøøjät.

28 Høøch ja'a Diosquexypā, puhbéjpøch jaduhñ tøø ngäda'agy. Cáboch jaduhñ nyajpuhbeda'añ. Páadyhøch yaa tøø ngäda'agy nébiøch ja'a jāya'ay jaduhñ may nnähho'tú'udät.

29 Tøø hajxy hānajt quioody maa ja'a cajpt hānajt xiøhatiän Jericó. Coø hajxy quiajptpādsøømy, mänitā jāya'ayhajxy may piadu'ubøjcy.

30 Jimä wiindspāhajxy hānajt quiuhxna'ay tu'uba'a nāmetscä. Coø ja'a Jesús hajxy miädooy ñajxy, mänit hajxy yaaxy:

—Wiindsøn, miiçh ja'a David jecy mhaphajt mdeedyhajt. Højts näxúu'tsäc.

31 Mänit hajxy yhojjä ja'a cú'ugām, ween hajxy jaduhñ yhamoñ. Pero cab hajxy miäbøjcy. Mänit hajxy tehngajnä yáaxy:

—Wiindsón, miičh ja'a David jecy mhaphajt mdeedyhajt. Højts näxúu'tsäc.

³² Mänitá Jesús tiänaaxiøjpy. Mänitá wiindspähajxy miøjyaaxy:

—Tii mayhajt hajxy jaduhñ mdsojpy.

³³ Mänit hajxy yhadsooyy:

—Højts yaghixó'cäc.

³⁴ Mänit hajxy ñäxuu'tsä. Mänit hajxy wyiingudsiiwøyyä. Mänit hajxy jiaančh hijxø'cy. Mänitá Jesús hajxy piadu'ubøjcy.

21

¹ Mäwiingoomb ja'a Jesúshajxy hānajtj jim Jerusalén. Mänit hajxy miejch maa ja'a cajpt hānajtj xiøhatiän Betfagé, jim mädøyyä maa ja'a Olivostuñän.

² Mänitá Jesús ja'a miägu'ughajpä nämetsc ñämaayy:

—Nøcx hajxy maa yøø cajpt ximhaampiän. Jimä burrataj hajxy mbaada'añ cuxoch møødä yhuung. Mmägüejó'øwäp hajxy jaduhñ. Mänit hajxy yaa mwitsminät.

³ Coø hajxy pøn waamb xñámá'awät, jaduhñ hajxy mnámá'awät coø ja'a wiindsón jaduhñ yajmaajiaty, coø hajxy mänit mmoodiägatsa'añ.

⁴ Jaduhñds tiøjiajty nebiä Diosmädia'agy-yajwa'xpä jecy quiujahyyän:

⁵ Jaduhñdsä cu'ug hajxy mhawáanät ja'a hajxy jim tsānaabiä Jerusalén: “Huuc heeb hajxy, xiidsä mgobiernä hajxy jaduhñ xñägoody burrohu-ungnähgøxp møødä burrataj.

Cab jaduhñ yajcumaya'añ.”

⁶⁻⁷ Mänitá burrataj hajxy hoy wyich møødä burrohuung, neby hajxy hānajtj tøø ñāma'ayijän. Mänitá Jesús miägu'ughajpä wyithajxy yagjābe'enøyy ja'a burrohuung. Mänitá Jesús yajpejty.

⁸ Jimä cu'ughajxy hānajtj may tøø yhamugø'øy. Mänitá wyit hajxy ye'py tu'haam maa ja'a Jesús hānajtj ñaxø'øwa'añän. Ja'a jäya'ayhajxy näje'ebä, mänitá hujtshaa'x hajxy hoy ñäbuxy. Mänitá hujtshaa'x hajxy hoy ñajtswidso'øy tu'haam.

⁹ Mänit hajxy nägøxiä tiägøyy hayaaxpä:

—¡Viva ja'a rey David yhap yhoc! Tsøg hajxy wiingudsähgøyyäm, ja'a Dios tøø quiéxiabä. Weenä Dios jim wyiingudsähgøyyii tsajpootyp.

¹⁰ Mänitá Jesúshajxy quioo'ty Jerusalén. Coø hajxy tiägøyy cajptooty, mänitá cu'ughajxy tiägøyy haamhajpä. Mänit hajxy nämay ñimiäyajtøwä:

—Pøn jäya'ay yøøduhñ.

¹¹ Mänit hajxy yhadsooyy:

—Jesús yøø. Nazaret choon Galileanaaxooty. Ja'a Diosmädia'agy jaduhñ yajwa'xyp.

¹² Mänitá Jesús tiägøyy Diostsajtøgooty. Jiibiä jäya'ayhajxy hānajtj may jiuudioogy. Mänit hajxy yhøxquejxpädsøømä. Mänitá xädø'øñguiuwijtspädøjc ja'a mieexä hajxy yajtsitø'cäxä møødä palomatoopädøjc ja'a yhäñaabiejthajxy.

¹³ Mänitá Jesús miānaañ:

—Jaduhñ myiñ cujaay maa ja'a Diosmädia'aguiän: “Jue'ečh ndøjc hajxy xwiāanät cooch hajxy jaduhñ jiiby xpia'yá'axät.” Dios jaduhñ mänaañ; pero mijts jaduhñ mwa'añ meedsøhñdy podøhñdy.

¹⁴ Mänitá Jesús ñāmejtsä ja'a wiindspä møødä tecymia'adpä. Jiiby hajxy hānajtj ñä'ägä hity tsajtøgooty. Mänit hajxy yajmøcpøjcä yajmäbaadøyyä.

¹⁵ Jiibiä pigāna'c-hajxy hānajtj wyi'i ya'axy tsajtøgooty: “¡Viva ja'a rey David yhap yhoc!” Ja'a teedywiindsønhajxy møødä ley-yajnähixøøbiädøjc-hajxy, coø hajxy yhiixy nebiä Jesús ja'a hoy-yagjuøøñäjatypä hānajtj yajcähxø'øguiän,

coo hajxy miädooyy coo pigäna'c-hajxy hānajt̃y wyi'i ya'axy, mänit hajxy yhawa'andaacy.

¹⁶ Mänit̃ä Jesús ñāmaayyā:

—Nej, mmädooby jaduhñ waambaty hajxy ya'axiä.

Mänit̃ä Jesús yhadsooyy:

—Jexio'ch, nmädóobiøch jaduhñ. Pero mijts, nej, cajnā hajxy jaduhñ mmädoyhatyñā nebiä Diosmādia'agy myiññān cooc ja'a Dios jaduhñ tøø miāna'añ coo ja'a pigäna'c-hajxy ween yhøy maa ja'a Dioscøxpān.

¹⁷ Mänit̃ä Jesúshajxy jim̃ chohñ. Mänit hajxy ñøcxy maa ja'a cajpt hānajt̃y xiøhatiān Betania. Jim̃ hajxy jaduhñ chuunajxy.

¹⁸ Coo jioobøyy, mänit̃ä Jesúshajxy wyiimbijty. Yähó'cäp hajxy hānajt̃y.

¹⁹ Tu'haamnøcxpā piids hajxy jaduhñ piaaty. Pero cabā tii tøøm hānajt̃y miøødä. Haagā haay hānajt̃y je'e. Mänit̃ä Jesús ja'a piids ñāmaayy:

—Ni mānaa miičh mga'a tøømbejtägatsaanñä.

Mänitiä ja'a piids jaduhñ jiaančh tøøch.

²⁰ Coo ja'a Jesús miägu'ughajpāhajxy jaduhñ yhijxy, mänit hajxy jiaančh tehñ yagjuøøyy. Mänit̃ä Jesús miäyajtøøwä:

—Neby yø'ø piids jaduhñ paquiä jiaančh tøøch.

²¹ Mänit̃ä Jesús yhadsooyy:

—Nä'ägä tøyhājthøch mijts nnāma'ay, coo hajxy hamuumdu'joot mjaančh mǎbøgāt, hotyijā hajxy jaduhñ mjádāt, nébiøch yø'ø piids jaduhñ tøø nya-jtø'øchān. Coo yø'ø tun hajxy jaduhñ mnāmá'awāt: “Jua'ads jim̃, nøcx mejjiooty tǎgø'øw”, mänit jaduhñ jiaančh tǎgø'øwāt.

²² Pø mjaančh mǎbøjp hajxy jaduhñ, coo ja'a Dios hajxy tijaty mmäyujwá'anāt, mänit hajxy jaduhñ xmió'owāt.

²³ Mänit̃ä Jesús tiägøøyy tsajtøgooty. Mänit tiägøøyy yajñähixøøbiä. Mänit̃ä teedywiindsøñhajxy miejch møødä martuumädøjc. Mänit̃ä Jesús miäyajtøøwä:

—Pøñ miičh cuhdujt tøø xmió'oy coo miičh yaa mhané'emāt.

²⁴ Mänit̃ä Jesús yhadsooyy:

—Cooch mijts ja'a tøyhajt xmió'owāt nébiøch mijts cham̃ nmäyajtøwa'aññān, mänitøch mijts ja'a tøyhajt nmoodiägátsāt pøñhøch ja'a cuhdujt tøø xmió'oy cooch yaa nhané'emāt.

²⁵ Pøñä Juan jaduhñ quejx mäyajnābejpā, Dios tøgä jäya'ayä.

Cab hajxy ñā'ä hadsooyy. Mänit hajxy tiägøøyy yajcapxiøøbiä:

—Coo hajxy nhadsóowāmāt coo ja'a Dios quiejxy, mänit hajxy xmiäyajtøwāññān tii ja'a Juan miādia'agy hajxy coo tøø nga'a mǎbøjcām.

²⁶ Ni jaduhñ quia'a hoyyā coo hajxy nhadsóowāmāt coo jäya'ay jaduhñ quiejxy; cabā cu'ughajxy jaduhñ yhojiäwø'øwāt. Jaduhñ hajxy miāna'añ cooc ja'a Juan Dyiosquexiä.

²⁷ Mänit̃ä Jesús ñāmaayyā:

—Cab højts nnajuø'øy.

Mänit̃ä Jesús miānaañ:

—Cábøch nnägapxaambä pøñhøch ja'a cuhdujt tøø xmió'oy cooch yaa nhané'emāt.

²⁸ Mänit̃ä Jesús miānaañ:

—Chaads mijts cuento tu'ug nyajmøødmādia'aga'añ. Jii jäya'ay hijty tu'ug; metscä yhuung hānajt̃y. Mänit̃ä yhuung ñāmaayy tu'ug: “Huung, nøcx jim̃ huuc tuñ maačh ndsaatypcamān.”

²⁹ Mänit̃ä yhuung yhadsooyy: “Cábøch nnøcxa'añ.” Pero mänit wyiin-mahñdyhajty jadāhooc coo jaduhñ ñøcxāangumbä.

³⁰ Mänitā yhuung tu'ug ñāmáaguiumbä coo ñócxät tuumbä. Mänit yhadsooyy coo ñócxä'añ. Pero cab jaduññ ñä'ä nõcxy.

³¹ Mädyii craa jaduññ cudiuññ nebiä tieedy hānajt̃y t̃øø miāna'añ.

Mänit hajxy yhadsooyy:

—Ja'a jawyiinhajpä.

Mänitā Jesús miānaañ:

—Nä'ägä t̃øyhájthøch mijts nnāma'ay, jawyiin ja'a ya-jnāhjuudiuutpādøjc-hajxy tiägø'øwa'añ Dioswiinduum m̃øødä cuh-hiñdo'oxiøjc-hajxy. Pero mijts, h̃øxhaam mijts mdägø'øwa'añ.

³² Ja'a Juan māyajnābejpä, hoy mijts xjia yajnāhixøøyy neby hajxy hoy mwädítät, cab hajxy mmābøjcy. Ja'a yajnāhjuudiuutpādøjc-hajxy m̃øødä cuh-hiñdo'oxiøjc-hajxy, je'eds hajxy jaduññ m̃abøjc. Hoy mijts mja hijxy coo hajxy miābøjcy, caj mijts mwiinmahñdyhajty jadāhooc coo hajxy mmābøjpät.

³³ 'Chaads mijts cuento tu'ug nyajm̃øødmādia'agāangumbä. Jii jāya'ay hijty tu'ug naaxm̃øød. Mänitā tsaatypcam̃ quiojy. Mänit curaa piādaacy. Mänitā tsaatyñøøxee'xøhñdy ñādajøøyy tsaajooty. Mänitā hāña'awøhñdy c̃øxp quiojy.

'Mänitā wiingjāya'ay ja'a tsaatypcam̃ hajxy yaghajoodiujcä. Mänitā cud-saatypcam̃ jim̃ chohñ, ñócx̃y jāguem̃.

³⁴ Coo ja'a tsaatyptuc yhabaaty, mänitā cudsaaatypcam̃ miejtstägajch. Mänitā mioonsä quiejxy coo ja'a tsaatyp hajxy yajm̃edsät mādühñtiä hajxy hānajt̃y mio'owa'añii.

³⁵ Mänitā mioonsāhajxy miājtsäxä; ja'a naaxhajoodiujpāhajxy jaduññ māmajts. Wojpä mähdiøjc tu'ug; yagho'cä tu'ugpä; ca'tsä tu'ugpä.

³⁶ Mänitā cudsaaatypcam̃ ja'a mioonsä quiejxy maas may. Jaanä jaduññ hajxy yhayoowhíxäbä.

³⁷ 'Mänitā yhamdsoo huung jaduññ quiejxy coo tyijy jaduññ wyiin-gudsāhgøøyyäxät.

³⁸ Pero coo yhuung jaduññ yhíxäxä, mänitā naaxhajoodiujpāhajxy ñiñāmaayyā: “Coo yø'ø craa ja'a tieedy yhó'ogät, mänit yø'ø craa ja'a tsaatypcam̃ miāmāhmø'øwa'añ. Tsog hajxy yaghó'cām. Mänit h̃øjts ja'a tsaatypcam̃ jaduññ nmāmāhmøøyyāmät.”

³⁹ Mänit hajxy jiaanč majch. Mänit hajxy yh̃øxjuipädsøømy. Mänit hajxy yagho'cy.

⁴⁰ Hoorä, coo ja'a cudsaaatypcam̃ jaduññ miēdsät, nebiä naaxhajoodiujpāhajxy tiuna'añii.

⁴¹ Mänit hajxy yhadsooyy:

—Yagho'tägatsāanäp hajxy jaduññ je'eguiøxpä coo hajxy quia'awiindøyyä. Mänitā wiingjāya'ay ja'a naax yaghajoodiuga'añ, p̃ønä tsaatyp jaduññ yegaamb coo ja'a tsaatyptuc yhabāadät.

⁴² Mänitā Jesús miānaañ:

—Nej, cajnä ja'a Diosmādia'agy hajxy mgapxyñä maa jaduññ myiñän cujaayä:

Ja'a tsaa mädyii ja'a t̃øjcojpāhajxy quia'a nä'ägä cumaayy,

je'e nä'ägä tuundsohñ.

Dios jaduññ pādaac, paady h̃øjts njaanč tehñ yagjuø'øy.

(Jesús jaduññ hamdsoo niyajmābaatä nebiä tsaajän je'eguiøxpä coo hānajt̃y quia'a tsocy quia'a mee'xylijām ja'a cu'ug. Pero mo'owāanäp ja'a Jesús ja'a m̃øjtuung ja'a hodiung hānajt̃y.)

⁴³ Paady, xpiøgāanäp ja'a mguhdujt hajxy coo hajxy jim̃ mdägø'øwät Dioswiinduum. Wiingjāyā'ayäts jaduññ t̃ägø'øwaamb p̃ønjat̃y jaduññ howiädijp.

44 Pøñ jaduhñ cá'awäp yø'ø tsaanähgøxp, tågóyyäp jaduhñ. Y coo pøñ jaduhñ ñähgahbedøøjät yø'ø tsáajäm, jaanä tågóyyäp je'ebä.

45 Coo ja'a teedywiindsøñhajxy jaduhñ miädooyy møødä fariseodøjc-hajxy, mänit hajxy ñajuøøyy coo hajxy hñajty tøø miädia'agyii ja'a Jesúsäm.

46 Mänitä teedywiindsøñ ja'a Jesús hajxy jia madsaañ; cab hajxy ñä'ä majch je'eguiøxpä coo ja'a cu'ug hajxy hñajty chähgø'ø; hix, jaduhñä cu'ughajxy hñajty miäna'añ cooc ja'a Jesús ja'a Diosmädia'agy hñajty yajwa'xy.

22

1 Mänitä Jesús tiägøøguiumbä mädiaacpä. Mänit miänaañ:

2 —Maa ja'a Dios yhane'emiän, jaduhñ mäwínäts je'e nebiä rey tu'ugän. Yajpøgaamby ja'a yhuung hñajty je'e. Yagjadáañäp ja'a cay ja'a hu'ug hñajty je'e.

3 Mänitä mioonsähajxy quiejxy woobä wijtspä; pero cabä jäya'ayhajxy hñajty ñøcxa'añ mägaabiä.

4 Mänitä rey ja'a mioonsä quiejxcumbä. Mänit miänaañ: “Nøcx hajxy nāma'aw coo ja'a cay ja'a hu'ugy tøø quiøønä, coochä waj tøø nyajyagho'ogyii ja'a ni'xpä. Tøø ja'a cayiibä yhabaady; weends hajxy min quiaiy.”

5 Pero cabä jäya'ayhajxy ñä'ägädä mabøjcy. Tu'jäya'ay ñøcxy maa ja'a quiamän; tu'jäya'ay ñøcxy too'pä.

6 Mänitä rey mioonsähajxy miájtsäxä ja'a jäya'ayhajxy hñajty jaac jimä. Mänit hajxy yaghäyoowhijxy; yagho'cä hajxy jaduhñ.

7 Mänitä rey yhawa'andaacy. Mänitä soldadohajxy quiejxä mäyagho'pä. Ja'a hajxy hñajty tøø mioonsäyagho'oguiäbä, je'e hajxy nøcxy yagho'ogyii; møødä quiajpthajxy nøcxy ñó'cäxä.

8 Mänitä rey ja'a mioonsähajxy ñāmaayy: “Tøø jaduhñ yhabaady coochä nhuung jaduhñ piøga'añ. Pero ja'a jäya'ayhajxy tøø nja woy tøø nja wíchäbøch, cab hajxy hawiinmats myínät.

9 Nøcx hajxy wow wits pøñjaty hajxy mbaatyp jim tu'haam.”

10 Mänitä mioonsähajxy hoy wioy wyich nägøxiä, pøñjaty hajxy jaduhñ piaatyp, møødä hojiäya'ay møødä haxøøgjäya'ay. Mänitädsä tøjc jaduhñ yhujch.

11 'Mänitä rey tiøjtägøøyy woybä wichpä hijxpä. Mänitä craa tu'ug yhiixä, cabä wyit hñajty yhooyä.

12 Mänit ñāmaayy: “Mägu'ughajpä, cab yø'ø mwit yaa hawiinmäts mmädägø'øwät maa ja'a pøc jaduhñ jiadyiijän.” Pero cabä craa ñä'ä had-soowiimbijty.

13 Mänitä rey ja'a mioonsä ñāmaayy, ja'a hajxy hñajty texycøøbiä: “Cø'øxots tecyxiots yø'ø craa. Mänit hajxy mhøxjuipädsømät maa wyiingoodsän. Jim jaduhñ jiø'øwa'añ xiuudsa'añ.”

14 Nāmay hajxy jia møjya'axa'añii, pero näweeñtiä hajxy jaduhñ wyiim-biwa'añii.

15 Mänitä fariseoshajxy jim chohñ. Mänit hajxy quiojyquiapxytiuuñ coo ja'a Jesús hajxy jiøjcaxø'øwa'añ neby hajxy jaduhñ yajnähdsømät.

16 Mänitä miägu'ughajpähajxy quiejxy møødä Herodes miägu'ughajpähajxy. Mänitä Jesús hajxy ñāmaayy:

—Wiindsøñ, nnajuøøby højts coo miičh ja'a tøyhajt myecy, coo ja'a Diostu'u myajnähixø'ø. Caj miičh mmøjpäda'agy nebiaty ja'a cu'ughajxy miädia'agy; caj miičh mmøjpäda'agy pøñ tyijy møjcuhtdujtmøød.

17 Højts capxwíjjäc. Nej, hahixøøby jaduhñ coo ja'a gobiernä xädø'øñ mmó'owädä, ja'a jim tsänaabiä Roma.

18 Ñajuøøbiä Jesús hānajty coo hānajty jia jøjcapxø'øwa'añii. Mānit miānaañ:
—Haxøøg mijts mwiinmahñdyhajxy, hoy hajxy mja nibiāda'agyii nebiä
hojiāya'ayān. Tiich hajxy coo xjia jøjcapxø'øwa'añ.

19 Tsøgä xādø'øñ tu'ug huuc híxām.

Mānitä Jesús wa'xxiādø'øñ miooyyā.

20 Mānit miānaañ:

—Pøñ yhädiuun_naxxy hädaaduh_n; pøñ xiøø hädaaduh_n.

21 Mānit hajxy yhadsooyy:

—Ja'a gobiernä.

Mānitä Jesús miānaañ:

—Mmó'owäbä gobiernä hajxy mädyii je'e jie'e; y mmó'owäbä Dios hajxy
mädyii je'e jie'e.

22 Coo hajxy jaduh_n miädooyy, mānit hajxy yagjuøøyy. Mānit hajxy wyiim-
bijnä.

23 Mānitxøø ja'a saduceodøjc-hajxy näje'e miehch maa ja'a Jesúsän. Jaduh_n
hajxy hānajty miāna'añ cooc tyijy hajxy nga'a jujypiøjtägatsáanām. Mānitä
Jesús hajxy ñāmaayy:

24 —Wiindsón, ja'a Moisés jecy mānaan, coo ja'a pøcy-ya'adiøjc yhó'ogät,
ja'a cajpä yhuung, mánitādsä piuhya'ay ja'a yaamgto'oxy wyiingpøgät, nebiä
yaamgto'oxy jaduh_n yhuungpāadät ja'a ya'adiøjcøxpä, ja'a tøø yhó'oguiäbä.

25-26 Bueno, näjuxtujc hajxy hijty tu'que'ex, haagä ya'adiøjc. Ja'a
coobhuung, jayøjp jaduh_n piøjcy; mānit yho'cy. Cabä yhuung hānajty.
Mānitādsä jiādsømy ja'a yaamgto'oxy wyiingpøjcy. Mānitäts je'e yhó'cumbä.
Mānitādsä miädägøøgpä jaduh_n jiājcumbä. Jaduh_n hajxy nägøxiä jiajty møødä
miājuxtujcpä.

27 Mānitä to'oxiøjc yho'pä høxhaam.

28 Bueno, coo hajxy jaduh_n jiujypiøgät, mädyii tehm tiøybä hānajty
to'oxiøjc-hadaamb, ja'a näjuxtujcpä puhya'ayhajxy, ja'a hajxy hānajty tøø jia
pøquiäbä.

29 Mānitä Jesús yhadsooyy:

—Caj mijts ja'a tøyhajt mnä'ägädä møødä. Cabä Diosmädia'agy hajxy mhixiä
ni ja'a Diosmäjaa.

30 Coo ja'a jäya'ayhajxy jiujypiøga'añ, cab hajxy hānajty piøga'añ, ni cabä
yhuung hajxy hānajty yajpøga'añ. Jaduh_n hajxy yhida'añ nebiä Dios-
moonsāhajxiän, ja'a hajxy jim tsajpootypä.

31 Hamdsoo ja'a Dios hajxy jaduh_n tøø xñāma'ay cujaayhaam coo ja'a
jäya'ayhajxy jiujypiøga'añ:

32 “Xwyiingudsähgøøbiøch ja'a Abraham møødä Isaac møødä Jacob.”
Hoorä, wiingudsähgøøyöp ja'a Dios ja'a jujcyjiäya'ayháxiäm. Cab jaduh_n
wyiingudsähgøøyii ja'a ho'ogyjiäya'ayháxiäm.

33 Coo ja'a cu'ughajxy jaduh_n miädooyy nebiä Jesús hānajty yajnähixø'øy,
mānit hajxy yagjuøøyy.

34 Coo ja'a fariseoshajxy jaduh_n miädoyhajty coo ja'a Jesús quia'a ya-
jmājādaacy ja'a saduceos, mānitä fariseoshajxy yhamugøøyy.

35 Jimä fariseo hānajty tu'ug; ley-yajnähixøøby hānajty je'e. Ja'a Jesús hānajty
jøjcapxø'øwāanāp. Mānitä Jesús miāyajtøøwä:

36 —Wiindsón, mädyii cuhdujt maas møj maa ja'a ley myiñän.

37 Mānitä Jesús yhadsooyy:

—“Wiingudsähgøøw ja'a nDioshájtām hamuumdu'joot; mabøjcä ja'a
miādia'agy; mjahmiédsäp cøjxta'axiøø.”

38 Hädaa cuhdujt, jawyiin jaduh_n myiñ maa ja'a leyän y maas møj jaduh_n.

³⁹ Jaanä jaduhñ ja'a miämetspä miänaambä: “Møødnijootpaadøø ja'a mmäjøøñ ja'a mmädøjc hamuumdu'joot.”

⁴⁰ Hädaa cuhdujt metspä, ja'a ley yhøjx tiecy jaduhñ møødä cøxiä mäduhñtiä ja'a Diosmädia'agy-yajwa'xpähajxy tøø miädia'agy.

⁴¹ Jimnä ja'a fariseoshajxy hñajty tiäna'ayñä.

⁴² Mänitä Jesús miäyajtøøyy:

—Waamb mijts mmäna'añ ja'a Cristocøxpä. Pøñ je'e yhaphajpy tieedyhajpy.

Mänit hajxy yhadsooyy:

—David yhap yhoc je'eduhñ.

⁴³ Mänitä Jesús miänaañ:

—Pero ja'a Dioshespíritucøxpä ja'a David ja'a Cristo ñämaayy: “Wiindsøn.” Jaduhñä David miänaañ:

⁴⁴ Tøøchä Dios ja'a nWiindsøn xñämaayyä:

“Häña'aw yaa hahooyhaamby høxtä coonä ja'a mmädsip jaduhñ quia'a mäjädä'agät”,

nømä Dios miänaañ.

⁴⁵ Bueno, pø tøø ja'a David ja'a Cristo ñäma'ay: “Wiindsøn”, nébiäts jaduhñ yhap hat yhoc-hädät.

⁴⁶ Caj pøñ waamb ñä'ägädä hadsooyy. Y cabä Jesús waamb miäyajtøøwänä høxtä coonä hñajty yho'oga'añ.

23

¹ Mänitä Jesús ja'a cu'ug ñämaayy møødä jiamiøødhajxy:

² —Ja'a ley-yajñähixøøbiädøjc møødä fariseoshajxy, cuhdujtmo'oy hajxy jaduhñ coo ja'a Moisés miädia'agy hajxy yajñähixøøyyä.

³ Mgudiünäp hajxy jaduhñ waambaty hajxy xñäma'ay. Pero cab hajxy mbahixät nebiaty hajxy jiatcø'oy. Cabä yhamdsoo mädia'agy hajxy quiudiunñ.

⁴ Hanaxiä hajxy tsipjaty yajñähixø'oy; y mänaamb hajxy jaduhñ coo ja'a cu'ug tsipcøxp quiudiünät. Pero cab hajxy hamdsoo quiudiunñ.

⁵ Jaanç tehñ yajcumayaamb hajxy maa ja'a cu'ugwiinduumän. Paadiä nocyquiuyaaybä hajxy yajxonñ yajniwyiinnähgopxodsø'oyii; paady hajxy yajniuiø'oxodsø'oyii. Paadiä wit hajxy piägø'oy ja'a høxyoñbä.

⁶ Coo hajxy maa miägay, häña'awaamb hajxy hñajty maa ja'a meexäteecän. Y coo hajxy ñøcxy tsajtøgooty, häña'awaamb hajxy hñajty maa ja'a häñaabiejt yajxonbän.

⁷ Coo hajxy maa wiädity cajptooty, yajwiingudsähgø'øwaamb hajxy hñajty maa ja'a cu'ugän. Yajñäma'awaamb hajxy hñajty: “Wiindsøn.”

⁸ 'Pero mijts, cab hajxy mmäná'anät coo ja'a cu'ug hajxy xñämä'awät: “Wiindsøn.” Tu'ugä mWiindsøn hajxy jaduhñ; ja'a Cristo je'e. Jaduhñ hajxy mnijäwø'øwøøjät nebiä tu'que'expän.

⁹ Cab hajxy pøñ mnämä'awät: “Teedy”, hädaa yaabä naaxwiimbä. Tu'ugä mDeedyhajxy jim cøxp.

¹⁰ Cab hajxy mmäná'anät coo pøñ xñämä'awät coo hajxy xquiopc-hädät. Tu'jaya'ay hajxy jaduhñ xyhané'emät; ja'a Cristo je'e.

¹¹ Pøñ jaduhñ puhbejp ja'a jiamiøødhajxy, je'edsä møjtuunñ jaduhñ paadaamb maa mijtsän.

¹² Hix, pøñ jaduhñ yajcumayaamb, cabä møjtuunñ jaduhñ piaada'añ. Pero pøñ jaduhñ ca'a yajcumayaamb, je'edsä møjtuunñ jaduhñ paadaamb.

¹³ Mänitä ley-yajñähixøøbiädøjc-hajxy ñämaayyä møødä fariseoshajxy:

—Jaduhñ mijts mnibiäda'agyii nebiä hoyhäna'cän; pero cab hajxy mhoyhäna'cä. Haxøøg hajxy mjada'añ mhabeta'añ. Cab hajxy jim mdägø'øwa'añ maa ja'a Dioswiinduumän, y cab hajxy jaduhñ mmäna'añ coo wiinghäna'c jim tiägø'øwät, hoy hajxy hñajty hamdsoo jia mäna'añ coo hajxy jim tiägø'øwa'añ.

¹⁴ Xiøøbä ja'a Dios hajxy jecy tøø mnä'ä pa'ya'axy. Mänitä yaamgto'oxy ja'a tiøjc hajxy mbøjcä. Paady hajxy hoyhoy mdsaačhpøga'añ.

¹⁵ 'Wiinduhmyhagajpt jamiøød hajxy naxy mhøxta'ay pøn jaduhñ xmiøødtúnäp maa ja'a mguhdujthajxiän. Y coo hajxy hñajty tøø mbaady, mänitä haxøøgcuhdujt hajxy myajnähixø'ø. Maas haxøøg hajxy jaduhñ jiatcø'øwa'añ quejee mijts.

¹⁶ 'Cab hajxy hoy mnä'ägä yajnähixø'ø. Jaduhñ hajxy mmäna'añ; coo hajxy hñajty tii myajwiinwaanø'øwa'añ, coo ja'a tsajtøjc mgapxpáadät, cab tyijy jaduhñ ñejpiä coo hajxy mga'a cudiúnät neby hajxy hñajty tøø myajwiinwaanø'øyän. Pero jaduhñ hajxy mmänaambä, coo ja'a oro hajxy mgapxpáadät, ja'a jiiby tsajtøgootypä, tsipcøxp hajxy tyijy mgudiúnät.

¹⁷ Mguhmänøøby hajxy jaduhñ; cab hajxy tii mwiinjuø'ø. Haa ca'a, maas tsoobaatp ja'a tsajtøjc quejee ja'a oro. Hix, Dios ja'a tsajtøjc jaduhñ cunuu'x. Ja'a oro, ñä'ä yajmägunuu'xøøyy je'eduhñ.

¹⁸ Jaanä jaduhñ hajxy mmänaambä, coo mgapxpáadät ja'a cuyoxøhñdy, cábac tyijy jaduhñ ñejpiä coo mga'a cudiúnät. Pero jaduhñ hajxy mmänaambä, coo hajxy mgapxpáadät tijaty tøø mguyoxø'ø, tsipcøxpäc tyijy jaduhñ mgudiúnät.

¹⁹ Nej, cab hajxy mnajuø'øyä coo ja'a cuyoxøhñdy miaas tsoobaady quejee tijaty hajxy mguyoxøøby.

²⁰ Pøn jaduhñ capxpaatp ja'a cuyoxøhñdy, jaanä jaduhñ quiapxpaatpä tijatycøxpä ja'a jäya'ayhajxy jiiby tøø quiuyoxø'ø.

²¹ Pøn jaduhñ capxpaatp ja'a tsajtøjcøxpä, jaanä Dios quiapxpaatpä, ja'a jiiby tsänaabiä tsajtøgooty.

²² Pøn jaduhñ capxpaatp ja'a tsajpootyp, jaanä Dios yhäñaabiejt quiapxpaatpä, møødä Dios ja'a jim häñaabiä.

²³ 'Mijts myajcopcøøby mädyii ca'a tsoobaatp coo hajxy hñajty tii mguyoxø'øwa'añ maa ja'a tsajtøjcän. Pero cabä Diosmädia'agy hajxy myajcopcø'ø coo jaduhñ miäna'añ coo mhojiäya'ayhädät, coo hojioot mmøødhädät, coo ja'a Diosmädia'agy mmäbøgät. Maas hoy jaduhñ coo hajxy mgudiúnät ca'xy pedyii.

²⁴ Jaduhñ mäwíinäts hajxy myajwiinhixø'ø nebiä wiindspän; cab hajxy myajcopcø'ø mädyii tsoobaatp.

²⁵⁻²⁸ 'Jaduhñ mijts mja wi'i quiähxø'øga'añ nebiä hoyhäna'cän maa ja'a cu'ugwiinduumän. Pero haxøøgwiinmahñdy hajxy mmøød. Tsipcøxp ja'a mhaxøøgwiinmahñdy hajxy mnajtshixø'øwät, jaduhñ hajxy tøyhajt hoy mhíädät.

²⁹ 'Naxy hajxy yajxón mguhmuuch maa ja'a Diosquexypähajxy jecy ñaaxtägøøyyän. Hojiäya'ayhajxy hijty.

³⁰ Mänit hajxy mmäna'añ: "Coo højts häxøpy jecy tøø njugyhájtäm, cabä nhap ndeedy hajxy häxøpy tøø nbuhbéjtäm coo ja'a Diosquexypä hajxy yagho'cy."

³¹ Cab jaduhñ tiøyyä. Tøø ja'a mhap mdeedy hajxy häxøpy mbajatcøøbiä;

³² y jaduhñ hajxy mjaanč pajatcø'øwaambä.

³³ 'Jaduhñ mäwíinäts hajxy mga'awiindøyyä nebiä tsahñdiän. Hoyhoy hajxy jaduhñ jiiby mdsaačhpøga'añ møjcu'uhaam.

³⁴ Nguexáambiöch ja'a Diosquexypä maa mijtsän, mөөдä cuhwijypä, mөөдä yajnahixööbiä. Naje'e hajxy myagho'oga'añ; naje'e hajxy mmøjpahbeda'añ cruzcøxp; naje'e hajxy mwobho'oga'añ tsajtøgooty. Naje'e hajxy mbäbo'owa'añ cajpt-cajpt.

³⁵ Mijts jaduhñ mmөөdhadaamby ja'a pojpa coo ja'a hojiäya'ayhajxy nägøxiä yagho'cä mөөдä Abel mөөдä Zacarías, ja'a Berequías yhuung. Tsajtøgooty ja'a Zacarías yagho'cä; ja'a mhap ja'a mdeedyhajxy jaduhñ jecy jatcøøyy.

³⁶ Tehm tiøyhajt jaduhñ, mijts ja'a pojpa mmөөdhadaamby.

³⁷ 'Mijts Jerusalénpäjäya'ay, tөө ja'a Diosquexypä hajxy mguhga'açh. Jaduhñ mäwínhøch mijts mayhooc tөө nja näwa'añ nebiä tseey ja'a yhuung ñähmuhxtägoyyän; pero caj mijts myajnäwa'ana'añ.

³⁸ Mobädájpøch mijts nnähgue'ega'añ,

³⁹ y cábøch jaduhñ xyhixaannä høxtä cóonøch hñajty ngädaactägatsa'añ. Mänit hajxy mmäna'ana'añ: "Tsøc yø'øya'ay wiingudsähgøøyyäm, yø'øya'ay Diosquexypä."

24

¹ Mänitä Jesúshajxy piädsøømy tsajtøgooty. Mänitä Jesús ñämaayyä ja'a miägu'ughajpähajxy:

—Huug hix yø'ø møj tsajtøjc.

² Mänitä Jesús yhadsooyy:

—Tehm tiøyhájthøch mijts nnäma'ay, yø'ø møj tsajtøjcä, cøxaamb jaduhñ piuma'añ; cøxaamb jaduhñ quiuhdägoyya'añ.

³ Mänit hajxy ñøcxy maa ja'a Olivostunän. Mänitä Jesús yhøxtaacy naaxwiin. Mänitä Jesús hamee'ch ñämaayyä ja'a miägu'ughajpähajxy:

—Højts hawáanäc mänaa yø'ø tsajtøjc jaduhñ piuma'añ. Mädyii hijxtahñd jaduhñ cähxø'øgaamb coo hñajty mgädaactägatsa'añ, coo ja'a naaxwiimbä hñajty wyiimbida'añ.

⁴ Mänitä Jesús miänaañ:

—Ca'a hajxy myajwiinhøøñ.

⁵ Minaamb hajxy nämay. Jaduhñ hajxy ñibiäda'aga'añii nébiøch høøchän. Jaduhñ hajxy miäna'ana'añ: "Høøch je'e Cristo." Nämayyä jäya'ay yajwiinhøøna'añ.

⁶ Mänit hajxy mmädoyhada'añ coo ja'a tsip jaduhñ tөө piädø'øgy. Pero cab hajxy mdsähgø'owät. Tsipcøxpä häyohn jaduhñ jiada'añii. Pero cajnä hñajty yhabaady coo ja'a naaxwiimbä hñajty wyiimbida'añ.

⁷ Cajpthaam hajxy jaduhñ ñimiädsibø'owa'añii. Naxaambä yuuba'am wiin-duhmyhagajpt mөөдä hujx.

⁸ Pero nä'ä tsohndaacnä ja'a tsø'ty hñajty jaduhñ.

⁹ 'Mänit mijts myaghäyoowhixa'añ myajyagho'oga'añ. Mänit mijts myajmähanhada'añ maa ja'a høøhcøxpän wiinduhmyhagajpt.

¹⁰ Mänitä Dios hajxy ñajtshixø'owa'añ nämay. Mänit hajxy ñimiähanhada'añii hamiñ haxøpy mөөдä hajxy tijaty yajniñähdsøma'añii.

¹¹ Wäditaambä hønndaacpähajxy hñajty may. Mäna'anaamb hajxy hñajty cooc tyijy hajxy wiädity ja'a Dioscøxpä. Nämayyä cu'ughajxy yajwiinhøøna'añ.

¹² Cab hajxy ñimiägu'ughadäänänä je'eguiøxpä coo ja'a haxøøgpä hñajty jiaançh tehñ wiädity.

¹³ Pero pønjaty jaduhñ ca'a jøjwa'adsaamb, je'eds ja'a hoybä paadaamb.

¹⁴ Wiinduhmyhagajpt ja'a mädia'agy wiädita'añ mädyii jaduhñ mänaamb coo ja'a Dios ja'a miäjaa yajcähxø'øga'añ. Cøxaambä cu'ughajxy miädoyhada'añ; mänitäts ja'a naaxwiimbä wyiimbida'añ.

15 '(Pøñ hædaa nocy capxp, ween jaduñ wyiinjuø'øy.) Ja'a Daniel, Dios jaduñ jecy quejx. Je'eduhñ cujahy coo ja'a haxøøgpä miedsa'añ maa ja'a Diostøjcän, y coo mänit jaduñ yajma'ada'añ. Coö ja'a haxøøgpä hajxy mhíxät,

16 mänit hajxy päyø'øguiä mnøcxät maa ja'a tunän, mijts yaa tsänaabiä Judeanaaxooty.

17 Y ja'a hajxy hijpä tøjwiing, jaduhyä hajxy piäyø'tówät, cab hajxy jaduñ tii yajpädsómät tøgooty.

18 Y ja'a hajxy jim hijpä camjooty, jaduhyä hajxy piäyø'tøbät, cab hajxy jaduñ nøcxy tii wyich maa ja'a tiøjcän.

19 Pobre ja'a to'oxiøjc-hajxy hänajty maaxhuungmøødpä, møød hajxy hänajty huungyajtsi'tspä.

20 Mmänuu'xtá'agäp ja'a Dios hajxy coo hajxy ween mga'a päyø'øgy coo hänajty tiøøchcä, ni ja'a poo'xxiøøjooty.

21 Porque jaančh tehñ miøc ja'a tsaächpä ñaxa'añ. Ni mänäa jaduñ tøø quia'a jadyii nebiä jaduñ jiada'añiiän. Y caj mänäa jiajtägatsa'añii jadähoocän.

22 Pero Dios jaduñ tøø yajnähdiij coo ja'a tsaächpä jejcy quia'a jadøøjät, je'eguiøxpä coo chocy ja'a tøbä wyiimbíyyäbä. Coö häxøpy jaduñ tøø quia'a yajnähdiij, caj pøñ häxøpy cho'oga'añ.

23 'Coo mijts pøñ xñámá'awät: "Huug hix, chaadsä Cristo", o "Huug hix, xiids je'e", cab hajxy mmäbøgät.

24 Hix, minaambä wiinhøhmbähajxy; jaduñ mäwiin hajxy ñibiäda'aga'añii nebiä Criston; jaduñ mäwínäts hajxy ñibiäda'aga'añii nebiä Diosquexypän. Yajcähxø'øgaamby hajxy ja'a hoy-yagjuøøñäjatypä nebiä cu'ug hajxy jaduñ wyiinhøønät; høxtä ja wiinhøønánäp hajxy je'ebä, ja'a Dios tøø wyiimbíyyäbä.

25 Chaads mijts nnäma'ay jäguemiä.

26 Coö pøñ xñámá'awät: "Huug hix, jim wiädity pactuum", cab hajxy jim mnøcxät; o coö hajxy xñámá'awät: "Huug hix, jiiby je'e yu'uçhtium", cab hajxy mmäbøgät.

27 Cooch hänajty nwiimbida'añ, høøch ja'a Diosquexypä, jaduñ mäwiin quiähxø'øga'añ nebiä wädsucän. Wiinduhmyhagájpthøch ja'a jäya'ayhajxy xyhixa'añ.

28 Tsipcøxp jaduñ jiada'añii nébiøch chaa nmäna'añ.

29 'Coo ja'a tsaächpä hänajty tøø ñajxnä, mänitiä hänajty wyiin-goodsø'øwa'añ; cabä po'o hänajty yhana'añ. Chaadsä madsa'a may quia'awa'añ; chaadsä tsajt chäyuyya'añ.

30 Mänitøch ja'a nhijxtahñd jim quiähxø'øga'añ tsajpootyp cooch hänajty nwiimbida'añ, høøch ja'a Diosquexypä. Mänitä jäya'ayhajxy wiinduhmyhagajpt jø'øwa'añ xiuudsa'añ. Mänitøch hajxy xyhixa'añ cooch hänajty ngäda'aga'añ jocjooty. Diosmäjaaháamhøch jaduñ ngäda'aga'añ hajájjäp.

31 Mänitøch ja'a nmoonsä tsajpootypä nhane'ema'añ coo ween hajxy møc xiu'uxy xuuxthaam. Mänitøch ja'a nwiimbiybähajxy xyajtu'ugmugaanä wiinduhmyhagajtpä.

32 'Tsøg ja'a tsø'ty jaduñ yajmäbáatäm nebiä piidsquepiän. Coö yhaabiädsømy, mänit hajxy mnajuø'øy coo pioodtägøøñä.

33 Jaduñ mäwínäts je'e, coö ja'a tsø'ty hajxy jaduñ mhíxät, mänit hajxy mnajuø'øwät cooch hänajty mobädajpä nwiimbida'añ.

³⁴ Tøyhájtäts mijts nnäma'ay, cooçh hänäjty nwiimbida'añ, cajnä jäya'ayhajxy hänäjty quiøxy ho'ogy, ja'a hajxy jäda'ahaty jugyhajpä.

³⁵ Ja'a tsajtwiing jaduññ tägoyyaamb møødä naaxwiimbä. Tøjiadaamb jaduññ nébiøch chamñ nmädia'aguiän.

³⁶ 'Pero ni pøn jaduññ quia'a najuø'øy mänaaxøø jiada'añii ni mäduhnajtä. Ni ja'a Diosmoonsä tsajpootypä hajxy quia'a najuø'øy. Ni høøch nga'a najuø'øy, høøch ja'a Dioshuung. Jagooyyä Dios jaduññ ñajuø'øy, ja'a nDeedyhájtäm.

³⁷ 'Cooçh jaduññ nwiimbida'añ, høøch ja'a Diosquexypä, jaduññ mäwíinäts hänäjty jiada'añii nebiä Noé jecy jiajtiän.

³⁸ Cajnä Dios ja'a nøøgomdägoy hänäjty quiexyñä. Jimä jäya'ayhajxy hänäjty quia'y yhu'ugy, piøcy yhu'ugy, høxtä coo ja'a Noé hänäjty tøø tiägø'øy barcojooty.

³⁹ Ni mänit hajxy hänäjty quia'a najuø'øyñä høxtä coonä ja'a nøøgomdägoy miejch. Mänit hajxy cøjx chømdu'ubøgyii. Jaduññ mäwíinäts jiadäanäbä cooçh hänäjty nwiimbida'añ, høøch ja'a Diosquexypä.

⁴⁰ Mänitxøø ja'a ya'adiøjc-hajxy hänäjty nämetsc yhida'añ camjooty. Tu'ug hänäjty yajnøcxa'añii; tu'ug hänäjty yajmähmø'øwa'añii.

⁴¹ Metscä to'oxiøjc-hajxy hänäjty jiøch. Tu'ug hänäjty yajnøcxa'añii; tu'ug hänäjty yajmähmø'øwa'añii.

⁴² 'Nähix hähixø'ø hajxy mhídät; cab hajxy mnajuø'øy mänaa ja'a mWiindsøn hajxy quiäda'aga'añ.

⁴³ Jaduññ mäwíinäts ja'a cudøjc-hajxy, coo hajxy jaduññ ñajuø'øwät mäduhnajtä ja'a mee'tspä miedsa'añ coods, jujcy hajxy jaduññ yhídät, y cabä mee'tspä hajxy jaduññ yajtøjtägø'øwät.

⁴⁴ Jaduññ mäwíinäts mijtspä, nähix hähixø'ø hajxy mhídät. Cábøch mijts xñä'ägä najuø'øwät mänáajøch jaduññ ngäda'aga'añ, høøch ja'a Diosquexypä.

⁴⁵ 'Ja'a moonsäwiindsøn, je'edsä miämoonsä yajcaaby maa ja'a wyiindsøn tiøjcän. Hoy jaduññ coo ja'a wyiindsøn miädia'agy miäbøjcät, coo cuhwijy tiünät.

⁴⁶ Coo ja'a wyiindsøn miédsät, jootcuyc ja'a moonsä ñijiäwø'øwa'añii mädyii jaduññ cudiumb.

⁴⁷ Tøyhájtäts mijts nnäma'ay, jaduññä moonsä piäda'aga'añii nebiä wyiindsønän jim maa ja'a wyiindsøn tiøjcän, mäduhñtiä ja'a wyiindsøn hänäjty miøødä.

⁴⁸ Pero ja'a moonsä ca'a hoybä, je'eds jaduññ mäna'anaamb cooc tyijy ja'a wyiindsøn quia'a tsoj medsa'añ.

⁴⁹ Mänitä miämoonsä tiägø'øwa'añ häyoowhijxpä. Mänitä mu'ugyjiäya'ay miøødtägø'øwa'añ caabiä huucpä.

⁵⁰ Cabä wyiindsøn jaduññ yhuuc jahmiedsaannä coo wyiimbida'añ. Coo ja'a wyiindsøn jaduññ jiaançh médsät,

⁵¹ mänitäts ja'a craa hoyhoy quiumädo'wa'añ møødä miäga'awiindøybä. Mänit hajxy jiø'øwa'añ xiuudsa'añ.

25

¹ 'Coo ja'a Dios ja'a miäjaa jaduññ yajcähxø'øga'añ, jaduññ mäwíinäts je'e nebiä pøc hu'ug tøø jiadyiijän. Jimä cäxyiidøjc ja'a jamiø'ød hajxy hänäjty yhäxixy. Nämäjc hajxy hänäjty. Candilcøn hajxy hänäjty yhäxixy.

²⁻⁴ Nämägooxc-hajxy, cab hajxy hänäjty nähix hähixø'ø tøø tiu'ubøcy. Cabä guiaastä hajxy hänäjty nä'ä tägø'øbä tøø jiuy. Pero ja'a jiamioødhajxy ja'a jaac nämägooxpä, nähix hähixø'ø hajxy hänäjty tøø tiu'ubøcy mähøjpä. Nä'ä tägø'øbä ja'a guiaastä hajxy hänäjty tøø jiuy.

⁵ Coo ja'a jamiø'ød jaduhñ quia'a tsoj mejch, mänitā cäxyiidøjc-hajxy cøjx miaaho'ogy.

⁶ Coo quiuptsuhmdäjøøyy, mänitā jäya'ay tu'ug yaaxy: “Xiidsä jamiø'ød miech; nøcx hajxy jøjcubaadø'øw.”

⁷ Mänitā cäxyiidøjc-hajxy cøjx piädø'øgy. Mänitā quiandilhajxy quiuhdøø'xøøyy.

⁸ Mänit hajxy miänaañ, ja'a hajxy hänajty nähix hahixø'ø tøø quia'a tu'ubøquiäbä: “Højtsä gaastä weeñtiä móoyyāc; pi'idsaamb højtsä ngandil jaduhñ.”

⁹ Mänit hajxy yhadsooyy, ja'a hajxy hänajty nähix hahixø'ø tøø tiu'ubøquiäbä: “Caj, ni jaduhñ quia'a mädøyhada'añ maa ja'a højtsøxpän. Nøcx hajxy jaduhñ ñijiúuyyāxä maa tioogyiijän.”

¹⁰ Mänit hajxy ñøcxy juubiä. Mänitā jamiø'ød jaduhñ miehch. Ja'a cäxyiidøjc-hajxy gaastämøødpä, mänitā jamiø'ød hajxy miøødtägøøyy tøgooty. Mänitā tøjc hajxy yhagøøñä.

¹¹ Mänitā cäxyiidøjc-hajxy jia mejtsnä, ja'a gaastä hajxy hoy tøø jiúyyäbä. Mänitā hajxy jia cugapxøøyy: “Wiindsøn, huuc yaghawa'ads hädaa tøjc.”

¹² Mänit hajxy ñämaayyā: “Cábøch mijts jaduhñ nhixiä. Tøyhajt jaduhñ.”

¹³ Coo ja'a Jesús jaduhñ miädiaacpädøøyy, mänit miänaañ:

—Jaduhñ hajxy mnibiäda'agøøjät nähix hahixø'ø. Caj mijts mnajuø'øy mänáajøch nwiimbida'añ, høøch ja'a Diosquexypä.

¹⁴ 'Coo ja'a Dios ja'a miäjaa jaduhñ yajcähxø'øga'añ, jaduhñ mawíinäts je'e nebiä jäya'ay tu'ugpän. Nøcxaamb hänajty je'e wiingnaaxooty. Mänitā mioonsähajxy miøjyaaxy. Mänitā xiädø'øñ yajmämähmøøyy.

¹⁵ 'Tu'ug jaduhñ yajmämähmøøyyä mägooxmillón. Paady may miooyyā coo hänajty jiaty xädø'øñyajmayø'øw. Tu'ug jaduhñ yajmämähmøøyyä mejtsmillón. Tu'ug jaduhñ yajmämähmøøyyä tu'millón. Mänitā wiindsøn tiu'ubøjcy.

¹⁶ Jaaya'ay ja'a mägooxmillón wiingpøjcäbä, yajtägøøyy jaduhñ niyhajjtäbä. Yajmayøøyy ja'a xädø'øñ jaduhñ; mägooxmillón jaduhñ jiaac paaty.

¹⁷ Jaanä jaduhñduhmbä, jaaya'ay ja'a mejtsmillón wiingpøjcäbä, mejtsmillón jaduhñ jiaac paaty.

¹⁸ Pero jaaya'ay ja'a tu'millón wiingpøjcäbä, hoy ja'a jut jaduhñ tiajy. Mänitā wyiindsøn xiädø'øñ hoy yú'tsänä jutjooty.

¹⁹ 'Cujecy ja'a wyiindsøñhajxy miejtstägajch. Mänit hajxy tiägøøyy cueentäyajpädsøømbä.

²⁰ Jayøjp jaaya'ay miehch ja'a mägooxmillón hänajty tøø wyiingpøquiäbä. Mänitā wyiindsøn miooyy cøxiä møødä mägooxmillón tøø jiaac páadiäbä. Mänit miänaañ: “Wiindsøn, mägooxmillónhøch jaduhñ xmiooyy; chaads je'e møødä mägooxmillónhøch tøø njaac yajmayø'øyābä.”

²¹ Mänitā wyiindsøn miänaañ: “Hoy miich jaduhñ tøø mgudiuñ. Wéeñtiøch miich nyajmämähmøøyy. Maas máyhøch miich ja'a xädø'øñ jaduhñ njaac mo'owa'añ neby jaduhñ mjaac yajmayø'øwät. Tøjtägø'øw tøgooty, ween nxoondáacām.”

²² Mänitā craa jiaac mejch ja'a mejtsmillón hänajty tøø wyiingpøquiäbä. Mänit miänaañ: “Wiindsøn, mejtsmillónhøch jaduhñ xmiooyy; chaads je'e møødä mejtsmillónhøch tøø njaac yajmayø'øyābä.”

²³ Mänitā wyiindsøn miänángumbä: “Hoy miich jaduhñ tøø mgudiuñ. Wéeñtiøch miich jaduhñ nyajmämähmøøyy. Maas máyhøch miich ja'a xädø'øñ

jaduhn njaac mo'owa'añ neby jaduhn mjaac yajmayó'owät. Tøjtägø'ow tøgooty, ween nxoondáacäm."

²⁴ Mänitä craa jiaac tehñ miejch ja'a tu'millón hänäjty tøø wyiingpóquiäbä. Mänit miänaañ: "Wiindsón, nnajuóøbiøch coo miich hojioot mga'a møødä. Miich ja'a xädø'øñ jaduhn mbaadaamby maa tøø mga'a tuñän.

²⁵ Páadyhøch hijty ndsähgø'ø. Páadyhøch ja'a xädø'øñ hoy nyu'uçh naaxjutjooty. Huug hix, chaads je'e."

²⁶ Mänitä wyiindsón yhadsooy: "Caj miich hoy mgudiuñ. Mjaanç tehñ ñuux miich. Mnajuøøby miich jaduhn cooçh hojioot nga'a møødä, cooçh xädø'øñ nbaada'añ maaçh tøø nga'a tuñän.

²⁷ Páadyhøch nxädø'øñ jaduhn cu xpiädaacä bancojooty. Jiiby cu miayøøyy. Mänitøch nxädø'øñ cu xmiooyy møødä xädø'øñhuung."

²⁸ Mänitä hajxy ñämaayy, ja'a hajxy jim tänaabiä: "Pøjcä yø'ø craa xädø'øñ hajxy tu'millón; mo'ow yø'ø craa hajxy ja'a majcmillónmøødpä.

²⁹ Pøn may nä'ägä møød, maas may jaduhn mio'owa'añii. Hanaxiä jaduhn miøødhada'añ. Pero pøn jaduhn weeñtiä møød, pøgáanäxäp je'e mäduhñtiä miøødä.

³⁰ Yø'ø craa jaanç tehñ ñuuxpä, høxwijspädsøm hajxy hagoodstuum. Jiiby jaduhn jiø'owa'añ xiuudsa'añ."

³¹ 'Cooçh jaduhn ngädá'agät hanehmä, høøch ja'a Diosquexypä, jimhøch jaduhn nhäña'awa'añ maa ja'a hoyhñaabiejtän ja'a yajxonä. Quípxyhøch nmoonsä tsajpootypähajxy xmiøødcäda'aga'añ nägøxiä.

³² Mänitøch ja'a jäya'ayhajxy xwyiingumedsø'owa'añ ja'a wiin-duhmyhagajtpä. Mänitøch hajxy jaduhn nyajwa'xa'añ nebiä meegän nebiä chiibän.

³³ Nbäda'agáambiøch näje'e maaçh nhahooguiø'øjän, näje'e maaçh nhanajtycø'øjän.

³⁴ Ja'a hajxy hijpä hahooguiø'ø, mänitøch hajxy nnäma'awa'añ: "Min hajxy yam; tøøch mijts nDeedy xwyiimbiy coo hajxy mhané'emät. Jequiän hajxy jaduhn xwyiimbiiyy, cajnä ja'a naaxwiin hänäjty yhädiuñ.

³⁵ Mänáajøch hijty nyäho'ogyijän, mänitøch hajxy xyajcaayy. Mänáajøch hijty ndødsø'øyijän, mänitøch hajxy xyajnøøhuucy. Mänáajøch hijty nwäditian nebiä jäguembäya'ayän, mänitøch hajxy xyaghamejtstaacy.

³⁶ Mänáajøch wit hijty nga'a møødän, mänitøch hajxy xñähxojxy. Mänáajøch hijty mba'amgo'na'ayän, ndsumyhäña'ayän, mänitøch hajxy hoy xquiuhixy."

³⁷ Ja'a hajxy hijpä hahooguiø'ø, mänit hajxy yhadsowa'añ: "Wiindsón, mänaa højts miich tøø nyajcay; mänaa højts miich tøø nyajnøøhu'ugy;

³⁸ mänaa højts miich tøø nyaghamejtsta'agy; mänaa højts miich tøø nnähxoxy;

³⁹ mänaa højts miich hoy tøø nguhixy."

⁴⁰ Mänitøch nhadsowa'añ: "Tøyhajt mijts nnäma'ay, cooçh mijts ja'a njamiøødhajxy tøø xñäxuu'tsä, hoy hajxy quia'a ja møjtojcä, jaduhn mäwínhøch tøø xñäxuu'tspä."

⁴¹ 'Mänitøch hajxy nnäma'awa'añ ja'a hajxy hanajtycø'øbä: "Jua'ads hajxy jim, mijts haxøøgtuum hijpä. Häda'ag hajxy jiiby maa ja'a jøøn mänaa quia'a pi'ichän. Paadiä jøøn tøø piäda'agyii, jiibiä møjcu'uhajxy chaachpøga'añ.

⁴² Mänáajøch hijty nyäho'ogyijän, cáboch hajxy xyajcaayy; mänáajøch hijty ndødsø'øyijän, cáboch hajxy xyajnøøhuucy;

⁴³ mänáajøch hijty nwäditian nebiä jäguembäya'ayän, cáboch hajxy xyaghamejtstaacy; mänáajøch wit hijty nga'a møødän, cáboch wit hajxy

xmiooyy; mänáajøch hijty nba'amgo'na'ayän, ndsumyhäñä'ayän, cáboch hajxy hoy xquiuhixy.”

⁴⁴ Mänit hajxy miäna'ana'añ: “Wiindsón, mänaa højts miich nga'a puhbejty; mänaa højts miich nhijxy coo hānajt myāho'ogyii, coo hānajt mdødsø'øyii, coo hānajt mwādity nebiä jäguembāya'ayän, coo wit hānajt mga'a møødä, coo hānajt mba'amgo'na'ay, coo hānajt mdsumyhäñä'ay.”

⁴⁵ Mänitøch nhadsowa'añ: “Tøyhajt mijts nnāma'ay, cooçh mijts ja'a njamiødhajxy tøø xquia'a näxuu'tsä, hoy hajxy quia'a ja møjtøjcä, jaduhñ mäwínhøch tøø xquia'a näxuu'tspä.”

⁴⁶ Yø'øds hajxy jiiby häda'agaamb maa hajxy chaaçhpøga'añän cøjxta'axiøø. Pero pønjátyhøch tøø nwiimbiy, je'eds hajxy cøjxta'axiøø jugyhadaamb nebiä Dios jiugyhätian.

26

¹ Coo ja'a Jesús jaduhñ miädiaacpādøøyy, mänit ñämaayy ja'a jiamiødhajxy:

² —Mnajuøøby hajxy jaduhñ coo ja'a pascuaxøø cumaaxc yhadsu-ujø'øwa'añ. Mänitøch hajxy xyajcø'ødägø'øwa'añ, høøch ja'a Diosquexypä. Mänitøch hajxy xmiøjpahbeda'añ cruzcøxp.

³ Mänitä teedywiindsøn hajxy yhamugøøyy møødä ley-yajñähixøøbiähajxy møødä jäya'ayhajxy martuumähajpä maa ja'a judíoshajxiän. Jim hajxy yhamugøøyy maa ja'a Caifäs tiøjcän, ja'a hānajt møjcuhtuimøødpä maa ja'a teedyhajxiän.

⁴ Mänit hajxy quiojyquiapxyhajty nebiä Jesús hajxy miädsät, neby hajxy jaduhñ yaghó'ogät.

⁵ Mänit hajxy ñiñämaayyä:

—Cab jaduhñ yhooyä coo hajxy nmájtsämät ja'a xøøjooty coo ja'a cu'ughajxy ñä'ä haamhadät.

⁶ Jimä Jesús hānajt maa ja'a cajpt jaduhñ xiøhatiän Betania, maa ja'a Simón tiøgootiän, ja'a hānajt tøø ñähwa'achíjábä ja'a haxøøgpa'am.

⁷ Jimä Jesús hānajt quiaay, mänitä to'oxiøjc tu'ug miejch, perfumecón, ja'a jaançh tehñ chowbä. Mänitä Jesús ja'a perfume yajcuhda'xøøyyä.

⁸ Coo ja'a Jesús jiamiødhajxy jaduhñ yhiixy, cab hajxy jaduhñ yhojiäwøøyy. Mänit hajxy miänaañ:

—Tii yø'ø perfume jaduhñ coo yaghäyooyy.

⁹ Coo jaduhñ cu tiøø'cy, mänitä häyoobāya'ay jaduhñ cu ñä'ägä puhbejty.

¹⁰ Coo ja'a Jesús jaduhñ miädooyy, mänit miänaañ:

—Ca'a yø'ø to'oxiøjc hajxy mhadsipy. Ca'a yhaxøøgpä jaduhñ tøø tiuñ maa ja'a høøchcøxpän.

¹¹ Ja'a häyoobädøjc, homiänaajä mijts jaduhñ xmiøødhida'añ; pero høøch, cáboch mijts jejcy nmøødhida'añ.

¹² Páadyhøch yø'ø to'oxiøjc perfume xyajcuhda'xøøyy, cooçh mobädajpä nho'oga'añ.

¹³ Tøyhajtäts mijts nnāma'ay, homiaajä hädaa hoguiapxy hädaa homiädia'agy hajxy yaghawa'xø'øwät maa hädaa yaabä naaxwiinän, mänit hajxy jaduhñ miädia'aga'añ nébiøch yø'ø to'oxiøjc perfume tøø xyajcuhda'xø'øy. Jaduhñds yø'ø to'oxiøjc jiahmiedsa'añii.

¹⁴⁻¹⁵ Ja'a Jesús jiamiødhajxy ja'a nämajmetspä, tu'ug hānajt xiøhaty Judas Iscariote. Mänitä Judas ja'a teedywiindsøn hajxy hoy ñäma'ay:

—Mädúhñtiøch hajxy xmiäjúyät cooçh ja'a Jesús hajxy nyajcø'ødägø'øwät.

Mänitä Judas miooyyä hii'xmajc plataxädø'øñ.

¹⁶ Mänit wyiinmahñdyhajty nebiä Jesús yajcø'ødägø'øwät.

17 Ja'a teh_m xiøøhadsuujø'ø hajxy hānajt_y quihdujthaty coo ja'a tsajcaagy hajxy hānajt_y quiay ja'a ca'a tsoomiøødpā. Mānitā Jesús ja'a jiamiøøð ñāmejtsā. Mānit miāyajtøøwā:

—Maa hajxy ndsuugáayyāmāt ja'a pascuaxøøjooty.

18 Mānitā Jesús yhadsooyy:

—Nøcx hajxy cajptooty maačh nmāgu'ughajpā tiøjcān. Mānit hajxy mnāmá'awāt: “Nø_m højts nWiindsø_n miāna'añ cooc tøø yhabáatāxā, y cooc højts yaa ndsuugaya'añ ja'a pascuaxøøjooty maa miich mdøgootiān.”

19 Mānit hajxy jiaančh cudiuuñ neby hajxy ñāmaayyān. Mānitā jøø'xy hajxy yhädiuuñ.

20 Coo quioodsøøyy, jimā Jesús hajxy hānajt_y quiay møødā nāmajmetspā.

21 Mānitā Jesús miānaañ caaguujc:

—Tøyhajtāts mijts nnāma'ay cooch mijts mjamiøøð tu'jāya'ay xyajcø'ødägø'øwa'añ maačh nmādsipān.

22 Mānit hajxy jiootmadiägøøyy. Mānit hajxy tiägøøyy yajtøøbā:

—Wiindsø_n, nej, høøch je'ejā.

23 Mānitā Jesús yhadsooyy:

—Ja'ačh tu'ugtēxy xmiøødcaamiujpā, je'ečhāts jaduh_n xya-jcø'ødägø'øwaamb.

24 Jadúh_nhøch njada'añ nhabeta'añ, høøch ja'a Diosquexypā, nebiā Diosmādia'agy jaduh_n miāna'añān. Pero jaančh teh_m chaačhpøgaamb jaaya'ay häyoobā ja'ačh tøø xyhawaanø'øyābā. Mejor häxøpy tøø quia'a miñ tøø quia'a ca'ay.

25 Mānitā Judas miānaañ, ja'a hānajt_y tøø yhawaanø'øyābā:

—Wiindsø_n, nej, høøch je'ejā.

Mānitā Jesús yhadsooyy:

—Miich je'e.

26 Jimnā hajxy hānajt_y quiayñā, mānitā Jesús tsajcaagy quionø'cy. Mānitā Dioscujú'uyāp yejcy. Mānitā tsajcaagy qyijwa'xy. Mānitā jiamiøøð miooyy. Mānit miānaañ:

—Cay hajxy; jaduh_n māwiin hädaa tsajcaagy nébiøchā nni'x nébiøchā ngopcān.

27 Mānitā Jesús taza quionø'cy. Mānitā Dioscujú'uyāp yéjcumbā. Mānitā jiamiøøð ja'a taza miooyy. Mānitā Jesús miānaañ:

—Hu'ug hädaa vino hajxy nāgøxiā.

Mānitā vino hajxy yhuucmujcy tu'ugtaza.

28 Mānitā Jesús miānaangumbā:

—Jaduh_n māwiin hädaa vino nébiøchā nnø'tiān. Hijxtah_{nd} jaduh_n coochā jem_yguiuhdujt nyajwiimbādsøma'añ coochā jāya'ayhajxy may nnāhho'tu'uda'añ, cooch jaduh_n nyajnāhwa'adsaanā ja'a piojpā quiādieey.

29 Pero nnāmāabiøch mijts cooch hädaa vino nga'a huuctāgatsa'añ høxtā cóonøch hānajt_y tøø nho'ogy. Mānitøch mijts jaduh_n nmøødhuucmujtāgatsa'añ jim maačhā nDeedy jaduh_n yhane'emiān.

30 Mānitā Dioshøy hajxy yhøøyy. Mānit hajxy ñøcxy maa ja'a Olivostunān.

31 Mānitā Jesús miānaañ:

—Hädaa coods, cáboch mijts ja'a nmādia'agy hajxy hoy xmiäbøgáanānā. Mānitøch hajxy jaduh_n xñāhgue'ega'añ. Jaduh_nā Diosmādia'agy miāna'añ: “Nyagho'ogāambiøch ja'a meegcueendāhajpā. Mānitā meeghajxy xii yaa ñøcxø'øwa'añ.”

32 Pero cooch hānajt_y tøø njujypiøcy, mānitøch nnøcxø'øga'añ jim Galilea; mānit mijts høxhaam mnøcxa'añ.

³³ Mänitä Pedro miänaaŋ:

—Hoy miičh hajxy nägøxiä xjia nähgué'egät, cáboch miičh nnähgué'egät.

³⁴ Mänitä Jesús miänaaŋ:

—Tøyhájthøch miičh nnäma'ay, coo ja'a tseey hānajty quia'a ya'axyñä hädaa coods, tøø miičh hānajty tägøøghooc mnijioḡapxyii cóogøch tyijy jaduhñ xquia'a hixiä.

³⁵ Mänitä Pedro miänaaŋ:

—Høyhøch miičh näguipxy nja møødhó'ogät, cáboch jaduhñ nnijioḡapxøøjät. Jaduhñ hajxy nägøxiä piamānaambä.

³⁶ Mänitä Jesúshajxy miejch maa hānajty xiøhatiän Getsemaní. Mänitä Jesús miänaaŋ:

—Yaa hajxy høxta'ag naaxwiin; nõcxyhøch jimhaamby nhuuc Diospa'ya'axy.

³⁷ Mänitä Jesús ja'a Pedro wioonøcxy hawiing møødä Zebedeo yhuunghajxy nāmetscä. Mänitä Jesús tiägøøyy jootmayhajpä hoyhoy.

³⁸ Mänit miänaaŋ:

—Jaančh tehñ jootmayhájpøch jaduhñ. Jadúhñhøch nnijiäwø'øyii nebiä ho'ogaambän. Yaa hajxy mmähmó'øwät. Tsøg hajxy jujcy hįjtäm.

³⁹ Mänitä Jesús weeñtiä jiaac nõcxy. Mänit miägutscädaacy. Mänit Dyiospa'yaaxy:

—Teedy, miičh mee'x, ca'a yhndijy jaduhñ cu ndsaačhpøjcy. Pero ca'a yhøøchä nguhdujt jaduhñ nyajtunaamby; miičhä mguhdujt nyajtunāñäm.

⁴⁰ Mänitä Jesús wyiimbijty maa ja'a nädägøøgpä hānajty tøø nähgue'eguiän. Jim hajxy hānajty mia'ay coo ja'a Jesús jim miejch. Mänitä Pedro ñāmaayyā:

—Nej, ni tu'horä hajxy jujcy mga'a hida'añä.

⁴¹ Jujcy hajxy mhídät. MDiospa'yá'axäp hajxy jaduhñ nebiä møjcu'u hajxy jaduhñ xquia'a jøjcapxø'øwät. Jia tsojpiä mjoothajxy jaduhñ coo hajxy jujcy mhídät, pero ja'a mni'x ja'a mgopc-hajxy jaduhñ ca'a mee'xtugaamb.

⁴² Ja'a miāmetsc-hoocpä Jesús ñøcxy Diospa'yaaxpä:

—Teedy, miičh mee'x, cáboch ndijy jaduhñ cu ndsaačhpøjcy. Pero ween miičhä mguhdujt nyajtūñäm.

⁴³ Mänit wyiimbíjcumbä maa ja'a Pedrohajxiän. Tøø hajxy hānajty mi-aahó'cumbä. Jaančh tehñ mia'awaamb hajxy hānajty hanaxiä.

⁴⁴ Mänitä Jesús nähguéeccumbä. Mänit ñøcxcumbä miädägøøghoocpä Diospa'yaaxpä. Mänit jaduhyyä miänāñgumbä.

⁴⁵ Mänit miéjtscombä maa ja'a Pedrohajxiän. Mänit miänaaŋ:

—Ma'awxä hajxy, poo'xxä hajxy. Tøøds je'e yhabaady cooçh hajxy xyajcø'ødägø'øwa'añ maa ja'a cubojpä cugädieejäya'ayän, høøch ja'a Diosquexypä.

⁴⁶ Pädø'øg hajxy, jamds hajxy. Xiids je'e myiñ ja'a høøch jaduhñ xye-gaambä.

⁴⁷ Mädiaacnä ja'a Jesús hānajty coo ja'a Judas miejch, ja'a Jesús hānajty tøø miøødwäditiäbä ja'a miāmajmetspä. Jaančh tehñ miay ja'a jäya'ay hānajty miøødä, pujxtmøødpä, paxycappä. Ja'a teedywiindsønñhajxy jaduhñ quejx møødä martuumädøjc.

⁴⁸ Ja'a Judas ja'a Jesús hānajty yegaamb. Tøø ja'a Judas ja'a jäya'ay hānajty ñāma'ay:

—Ja'a høøch hānajty ndsu'xaambiä, je'eds hajxy mmádsäp.

⁴⁹ Mänitä Judas ja'a Jesús ñāmejch. Mänitä jajpoo'xy. Mänit chu'xy.

⁵⁰ Mänitä Jesús miänaaŋ:

—Mägu'ughajpä, tiičh xwia'ana'añ.

Mänitä Jesús hajxy miajch.

⁵¹ Mänitä Jesús jiamiøød ja'a piujxt jiuu'ty. Mänitä teedywiindsøn mioonsä tu'ug tiaatspujxtúutäxä.

⁵² Mänitä Jesús miänaañ:

—Cuyuugøøw yøø mbujxt. Pønjaty jaduhñ pädø'p pujxthaam, jaanä pujxthaam yho'ogaambä.

⁵³ Nej, caj miich mnajuø'öyä, coöchä nDeedy jaduhñ nnämä'awät coöch ween xpiuhbety, mänitøch ja'a mioonsä tsajpootypä milhaam xyajnäguéxät.

⁵⁴ Pero coöch jaduhñ nnämä'awät, cabä Diosmädia'agy jaduhñ tiøjiädät maa jaduhñ myiñän cujaay coöch jaduhñ tsipcøxp njada'añ nhabetä'añ.

⁵⁵ Mänitä Jesús ja'a majiäya'ay ñämaayy:

—Pujxtmøød paxycap hajxy tøø mbädø'øgy. Jadúhñhøch hajxy tøø xmiach nebiä mee'tspän. Jabom-jabómhøch mijts hijty nyajñähixø'øgy tsajtøgooty, y cábøch hajxy mänaa tøø xmiach.

⁵⁶ Pero páadyhøch jaduhñ njaty nhabety, jaduhñä Diosmädia'agy jaduhñ tiøjiädät, nebiä Diosquexypähajxy jecy quiujahyyän.

Mänitä Jesús jiamiøødhajxy quiøxy päyø'cy. Nidiuhmä Jesús jaduhñ ñähgueecä.

⁵⁷ Mänitä Jesús yajmejtsä maa ja'a Caifás tiøjcän, ja'a mõjcuhdujtmøødpä maa ja'a teedyhajxiän. Jimä ley-yajñähixøøbiähajxy hñajty tøø yhamugø'øgy møødä martuumädøjc-hajxy.

⁵⁸ Ja'a Pedro, jäguemjuøøby hñajty pianøcxy. Mänit jiihy tiägøøyy maa ja'a Caifás tiøjwiingän. Mänitä yhøxtaacy maa ja'a policiahajxiän. Yhixaamby hñajty je'e nebiä Jesús hñajty tiuna'añii.

⁵⁹ Ja'a Jesús, tøø hñajty yajtøjtägø'øgyii maa ja'a teedywiindsøñhajxy hñajty tøø yhamugø'øgyän møødä ley-yajñähixøøbiähajxy møødä mõjtøjc-hajxy. Jiihy hajxy hñajty wyiinmahñdyhaty nebiä Jesús hajxy jaduhñ ñähøønó'øwät, hoy jaduhñ quia'a ja tøyä, nebiä Jesús hajxy jaduhñ yajyagho'ogøøjät.

⁶⁰ Pero cabä tøyhajt hajxy piaaty, hoy jäya'ay may jia wi'i ñähøønøøyy. Mänitä høhndaacpä metsc piädsøømy.

⁶¹ Mänit hajxy miänaañ:

—Nøm yøø craa miänaañ coogä Diostøjc jaduhñ yajma'ada'añ; mänitac cumaaxc wiingpä yajpädø'øgåangumbä.

⁶² Mänitä teedywiindsøn tiänaayyø'cy. Mänitä Jesús ñämaayyä:

—Nej, caj mhadsowa'añä. Tii hajxy jaduhñ coo xñäxø'øwø'øgy.

⁶³ Pero cabä Jesús waamb ñä'a mänaañ. Mänitä teedywiindsøn miänáangumbä:

—Ja'a Dioscøxpä miich ja'a tøyhajt myégät; højts hawáanäc pø tøyhajt jaduhñ coo miich ja'a Dios tøø xquiexy, coo ja'a Dios xyHuunghaty.

⁶⁴ Mänitä Jesús miänaañ:

—Tøyhajt jaduhñ nej miich mmäna'añän. Jadúhñhøch mijts nnämaabiä, høøch ja'a Diosquexypä, coöch hajxy xyhixa'añ hñä'a maa ja'a Dios yha-hooyhaampiän, ja'a mäjaamøødpä; y coöch jaduhñ nmänajtägatsa'añ jocjooty.

⁶⁵ Mänitä teedywiindsøn ja'a wyit quiøø'ch. Paady quiøø'ch coo hñajty yhawa'anda'agy. Mänit miänaañ:

—Tøø hädaa craa quiapxtägoy ja'a Dioscøxpä. Tii testigo hajxy njaac wáanämät. Hamdsoo hajxy tøø mmädoy nej tøø quiapxtägoyyän.

⁶⁶ Neby hajxy mmäna'añ.

Mänit hajxy yhadsooyy:

—Tøø jaduhñ quiapxtägoy ja'a Dioscøxpä; ween yho'ogy.

⁶⁷ Mänitä Jesús wyiingudsujøøyyä. Mänit wiojpä. Mänit wyiingugoxøøyyä.

- 68 Mänit ñämaayyä:
 —Pø tøyhajt jaduhñ coo Dios tøø xquiexy, najuø'øw pøn tøø xquioxy.
- 69 Jimñä ja'a Pedro hänajty yhäña'ay tøjwiing. Mänitä Pedro ñämejtsä to'oxymoonsä tu'ug. Mänit ñämaayyä:
 —Miičh ja'a Jesús hijty mmøødwädijpy, túhmäts, ja'a Galileatsohm̄bä.
- 70 Mänitä Pedro ñijjigapxä maa ja'a jäya'ayhajxiän:
 —Pätiidä jaduhñ mnä'ä mädiaacypy.
- 71 Tøjpädsømáannäp ja'a Pedro hänajty, mänit yhíxägumbä ja'a to'oxymoonsä tu'ug. Mänitä moonsä ñämaayy ja'a hajxy hänajty jim̄bä:
 —Yø'ø mixy ja'a Jesús hijty møødwädijp ja'a Nazarettsohm̄bä.
- 72 Jadähooc ja'a Pedro ñijjigapxä:
 —Tøyhajt, cábøch ja'a craa nhixiä.
- 73 Mänitjuøøby ja'a Pedro ñämáayyägumbä, ja'a hajxy hänajty jim̄bä:
 —Tøyhajt jaduhñ coo miičh ja'a Jesús hijty mmøødwädity; jaduhñ miičh mmädiaacpä nebiä Galileatsohm̄bän.
- 74 Mänitä Pedro miänaañ:
 —Pø cábøch tøyhajt nmädia'agy, wéenhøch ja'a Dios jaduhñ xyajcumädox. Cáboch ja'a craa nhixiä.
 Tuunä ja'a Pedro jaduhñ ñä'ä mänaañ, mänitiä tseey yaaxy.
- 75 Mänitä Pedro quioxy jahmiejch nebiaty ja'a Jesús hänajty tøø miäna'añän: “Cajñä ja'a tseey hänajty ya'axy, tøø miičh hänajty tägøøghooc mnijjigapxyii cóogøch tyijy xquia'a hixiä.” Mänitä Pedro jim̄ chohñ. Mänit tiägøøyy jøøbiä hoyhoy.

27

- 1 Coø jioøøyy, mänitä teedywiindsøn̄hajxy quiojyquiapxytiuuñ møødä martuumädøjc-hajxy nebiä Jesús hajxy yaghó'ogät.
- 2 Mänitä Jesús hajxy cø'øxoch hoy yajcø'ødägø'øy maa ja'a Poncio Pilatän, ja'a hänajty tuumbä gobernador.
- 3 Ja'a Judas ja'a Jesús hänajty tøø yhawaanø'øy. Coø ja'a Judas yhiixy coø ja'a Jesús hänajty yagho'oga'añii, cabä jioot jaduhñ ñä'ä møc-hajty. Mänitä hii'xmajcpä plataxädø'øñ hoy yajwiimbity maa ja'a teedywiindsøn̄hajxiän, maa ja'a martuumädøjc-hajxiän.
- 4 Mänit miänaañ:
 —Tøøch jaduhñ ngädieey coöchä craa ho'cøøc tøø nhawaanø'øy, ja'a cajpä pojpä cädieemiøødpä.
 Mänit hajxy yhadsooyy:
 —Ca'a yhøjts ngüeendä yø'øduhñ. Miičh mgüeendä yø'øduhñ.
- 5 Mänitä Judas ja'a xädø'øñ ñajtsxäbapøøyy jiihy tsajtøgooty. Mänit hoy ñiyo'tøøyyänä.
- 6 Mänitä teedywiindsøn̄ ja'a xädø'øñ hajxy pyiwø'cy. Mänit hajxy miänaañ:
 —Cab hädaa xädø'øñ hajxy hawiinmats nbädáacämät maa ja'a xädø'øñ hajxy quiuyoxø'øyän, je'eguiøxpä coø jäya'ay jaduhñ tøø tioogyii ho'cøøc.
- 7 Mänit hajxy quiojyquiapxytiuuñ coø ja'a naax hajxy hänajty jiuya'añ, ja'a xøhjäpä Tu'tspojtstaact, ja'a xädø'øñhaam ja'a Judas hänajty hoy tøø ñajtsxäbapø'øyäbä. Je'e hajxy hänajty wia'ana'añ cabäsantä maa ja'a jäguembäjäya'ayhajxy ñaaxtägø'øwät.
- 8 Coø ja'a naax hajxy jaduhñ jiuuyy ja'a xädø'øñhaam ja'a Judas hänajty hoy tøø ñajtsxäbapø'øyäbä, paady jaduhñ xiøhaty Nø'ñaax høxtä jäda'anäbaadyñä.
- 9 Jaduhñdsä tiøjiajty nebiä Jeremías jecy miänaañän, ja'a Diosquexypä: “Mänitä plataxädø'øñ hajxy miooyyä hii'xmajc (nebiä judíos hajxy tøø ñägapxiän).

¹⁰ Mänitä tu'tspojtstaact hajxy hoy jiuy nébiøch ja'a Dios tøø xyhane'emiän."

¹¹ Mänitä Jesús yajmejtsä maa ja'a gobernadorän. Mänit miäyajtøøwä:

—Nej, miich ja'a judíoshajxy xguiobiernähajpä.

Mänitä Jesús yhadsooyy:

—Tøyhajt jaduhñ nej miich mmäna'añän.

¹² Mänitä Jesús ñähwaambejtä ja'a teedywiindsønñhajxy møødä martu-umädøjc-hajxy. Pero cabä Jesús waamb ñä'ägä mänaañ.

¹³ Mänitä Pilato miänaañ:

—Nej, caj miich jaduhñ mmädoyyä nebiaty hajxy jaduhñ xñänómiänä.

¹⁴ Pero cabä Jesús ñä'ä hadsooyy; paadiä gobernador jiaanç tehñ yagjuøøyy. Cab hñajty ñajuø'øyy nebiaty jaduhñ wyiinmahñdyhädät.

¹⁵ Jaduhñdsä gobernador hñajty quiuhdujthaty coo ja'a tsumyjiäya'ay hñajty tu'ug yhøxmach xøøjooty pøn ja'a cu'ug jaduhñ ñänómäp coo yhøxmadsøøjät.

¹⁶ Jiibiä craa hñajty tu'ug chumyçhäna'ay ja'a xøhajpä Barrabás. Tøø ja'a Barrabás xiøø hñajty wyi'i wia'xy.

¹⁷ Coo ja'a cu'ughajxy hñajty tøø quiøxy hamugø'øyy, mänitä Pilato yajtøøyy:

—Pøn mijts jaduhñ mnänøømby cooçh nhøxmádsät, Barrabás tøgä ja'a Jesús ja'a Cristohajpä.

¹⁸ Ñajuøøbiä Pilato hñajty coo ja'a Jesús jaduhñ yajcø'ødägøøyyä je'eguiøxpä coo ja'a quiuhdujt hñajty quia'a yajmädsójcäxä.

¹⁹ Jimnä ja'a Pilato hñajty yhäña'ayñä maa hñajty tiuñän, mänitä Pilato quiapxyñäguejxä ja'a tio'oxiøjcäm: "Cab jaduhñ cu mdsaaçhtiuuñ; hoyhäna'c yø'øduhñ. Tøøch haamyquioods haxøøg nguma'ay yø'øgøxpä."

²⁰ Mänitä teedywiindsøn ja'a cu'ug hajxy jiøjcaxøøyy coo ween hajxy miäna'añ coo ja'a Barrabás yhøxmadsøøjät, y coo ja'a Jesús yagho'ogøøjät.

²¹ Mänitä gobernador ja'a cu'ug miäyajtøøgumbä:

—Mädyii häna'c mijts mnänøømby cooçh nhøxmádsät.

Mänit hajxy yhadsooyy:

—Barrabás.

²² Mänitä Pilato yajtøøyy:

—Ja'a Jesúsäts, ja'a xøhajpä ja'a Cristo, nébiøch je'e ndúnät.

Mänit hajxy nägøxiä yhadsooyy:

—Møjpahbet cruzcøxp.

²³ Mänitä Pilato miänaañ:

—Tii haxøøgpä jaduhñ tøø tiuñ coo jaduhñ yagho'ogøøjät.

Mänit hajxy jaduhñ yáaxcumbä:

—Møjpahbet cruzcøxp.

²⁴ Coo ja'a Pilato jaduhñ yhiçxy coo ja'a cu'ughajxy hñajty quia'a madowa'añ, coo hajxy maas hanaxiä yhaamhada'añ, mänitä nøø yujwaañ. Mänit quiø'øbuçy cu'ugwiinduum. Mänit miänaañ:

—Ca'a yhøøch jaduhñ mänaamb coo yø'ø hoyhäna'c jaduhñ yagho'ogøøjät; mijts jaduhñ mänaamb.

²⁵ Mänitä cu'ughajxy nägøxiä miänaañ:

—Tøyhajt jaduhñ. Højts jaduhñ mänaamb møød højts nnøøx møød højts nmajc.

²⁶ Mänitä Pilato ja'a Barrabás yhøxmajch. Mänitä Jesús yajwojpä. Mänit yajcø'ødägøøyy coo nøçxy miøjpahbedyii.

²⁷ Mänitä Jesús yajnøcxä ja'a gobernador soldadohajxy. Mänitä Jesús jiuhibgøøyyä ja'a soldadohajxy nägøxiä.

²⁸ Mänitä wyit yajtsíjjäxä. Mänitä tsaptswit yajpägøøyyä.

29 Mänitā haptycoronā piādaacā maa ja'a quiuhduumän. Mänitā paxy yajcø'ogabøøyyā yhahooyhaampiäcø'ø. Mänit wyiinjiicādaacā. Mänit wyiingapxpejtā:

—¡Viva ja'a judíos ja'a guiobiernāhajxy, viva!

30 Mänitā Jesús wyiingutsujøøyyā. Mänitā paxy piøjcāxā. Mänit wiojpa quiuhduum.

31 Coø yhuuc wiingapxpéjtābā, mänit tsaptswit yajtsíjjägumbā. Mänit yhamdsoo wit yajpägøøyyägumbā. Mänit yajnøcxānā maa hānajty miøjpahbeda'añiijān.

32 Tu'haamnøcxpā jāya'ay hajxy tu'ug jiøjcubaadøøyy ja'a Cirenetsøhmā. Simón hānajty xiøhaty. Mänitā Simón ja'a cruz hadsip yajcajtsoowā.

33 Mänit hajxy miejch maa jaduhñ xiøhatiān Gólgota. Je'eduhñ ñānøømby: “Maa ja'a ho'ogyjiāya'aguiopc ñāhgāda'aguiān.”

34 Mänitā Jesús tsaatyñøø jia yaghuucā ja'a jaančh tehñ tiahmā. Coø jaduhñ yhuucmajch, cab jaduhñ chojcy.

35 Mänitā Jesús miøjpahbéjtānā cruzcøxp. Mänitā soldadohajxy yhäyø'cy dadoshaam nebiā Jesús ja'a wyit hajxy yajwá'xāt. Jaduhñdsā tiøjiajty nebiā Diosquexypā jecy miānaañān: “Dadoshaam hajxy yhäyø'cy nébiøch nwit hajxy jaduhñ xyajwá'xāt.”

36 Mänitā soldadohajxy jim yhøxtaacy nebiā Jesús hajxy jaduhñ wyiinhāñá'awāt.

37 Mänit hajxy jim yuugjahy cruzcuhduum tiiguiøxp ja'a Jesús coø tøø miøjpahbedyii: “Jesús hādaa, ja'a judíos guiobierno hajxy.”

38 Jimā mee'tspā metsc miøjpahbéjtābā. Cujc ja'a Jesús miāhmøøyy, tu'ug hanajtyhaamby, tu'ug hahooyhaamby.

39 Ja'a jāya'ayhajxy hānajty najxpā, wyi'i wyiingapxpejpy hajxy hānajty møød hajxy hānajty wyi'i quiuhjägøñ.

40 Jaduhñ hajxy hānajty ñiñāma'ayii:

—Ja'a, miičh jaduhñ mānaañ coø mahñdy ja'a tsajtøjc myagjida'añ, y cumaaxc mahñdy mhādiuna'añ wiingpā. Niyajmānacøøjāts hamdsoo pø tøyhajt jaduhñ coø miičh Dios xyHuunghaty.

41 Jaduhñ ja'a teedywiindsøñhajxy piamānaambā møødā ley-yajnāhixøøbiāhajxy, møødā fariseøshajxy, møødā martuumädøjc-hajxy.

42 —Tøø jaduhñ yhuuc wi'i miāyajnāhwa'ačh, y caj hamdsoo ñiyajnāhwa'adsa'añii. Pø tøyhajt jaduhñ coø jaduhñ guiobiernāhaty maa ja'a judiøshajxiān, ween jaduhñ hamdsoo ñiyajmānaqyii cruzcøxp neby højts jaduhñ nmäbøjcāmāt.

43 Jaduhñ tøø xnāmáayyām coø yHuunghadyii ja'a Diósām y coø ja'a Dios jaduhñ cwieendāhada'añ. Pø tøyhajt jaduhñ coø ja'a Dios jaduhñ jiaančh tsocy, ween jaduhñ yajnāhwa'ačh.

44 Jaduhñdsā mee'tspāhajxy piamānaambā, ja'a hajxy jim møjpahbetypā cruzcøxp.

45 Mänitcujiyxiøø ja'a naaxwiimbā wyiingoodsøøyy. Tägøøghorā jaduhñ yhiijty wiingoods.

46 Mänitmānacyxiøø ja'a Jesús møc yaaxy: “Elí, Elí, lama sabactani”, je'eduhñ ñānøømby: Dios mee'x, Dios mee'x, tiich jaduhñ coø tøø xñajtshixø'øy.

47 Ja'a hajxy hānajty jim wi'i tiānaabiā, coø hajxy jaduhñ miādoøyy, mänit hajxy nāje'e miānaañ:

—Elías yø'ø craa jaduhñ jia wi'i miøjyaaxyp.

⁴⁸ Mänit tu'jäya'ay xo'od hoy quioñ päyø'øguiä. Mänit quiumadsøyy ja'a tsaatyñøøxunjooty. Cøjx je'e chomø'øy. Mänit paxy yagjøjwøønøyy ja'a xo'od. Mänitä Jesús yaghaguubøyyä neby jaduhñ miúugät.

⁴⁹ Mänitä häna'c-hajxy wiingpä miänaañ:

—Huug hahijxnä, ween yhuuc cähxø'øgy pø minaambä Elías yajnähwa'adsa'añ.

⁵⁰ Mänitä Jesús jadähooc møc yáaxcumbä. Mänit yho'nä.

⁵¹ Mänitä tsajtøjc-hadøødiuc quiøø'tswa'xy cujiä. Cøxp jaduhñ quiøø'tsohñ. Mänitä hujx ñajxy. Mänitä tsaa jaduhñ wia'xy.

⁵² Mänitä ho'ogyjiäya'ajiut may yhawaach. Mänitä ho'ogyjiäya'ayhajxy may jiuypiojcy, ja'a Diosmädia'agy hajxy hänajty tøø miäbøquiäbä.

⁵³ Coø ja'a Jesús hänajty tøø jiuypiojcy, mänitä ho'ogyjiäya'ayhajxy yhawa'adspädsøømy, ja'a hajxy hänajty tøø jiuypioquiäbä. Mänit hajxy quiajptägøøyy Jerusaleñ. Jim hajxy jaduhñ yhiixä nämay.

⁵⁴ Jimä soldadowiindsøn ja'a Jesús hänajty cwieendähaty møødä soldadohajxy. Coø ja'a tsø'ty hajxy jaduhñ yhiixy, mänit hajxy jiaanñ tehñ chähgøøyy. Mänit hajxy miänaañ:

—Tøyhájtäm hijty coø hädaa craa hijty Dyioshuungä.

⁵⁵ Jimä tajjäya'ay ja'a Jesús hajxy hänajty wyi'i ñäheebø'øy jäguemduum. Jimä Jesús hajxy hänajty tøø piadsoñ Galilea. Tøø hajxy hänajty piuhbety.

⁵⁶ Jimä María hänajtypä ja'a Magdalatsohmä, møødä María ja'a Jacobo tiajhajxy, møødä Zebedeo tio'oxiojcy.

⁵⁷ Coø quioodsøyy, mänitä mäyøøjäya'ay tu'ug miejch, ja'a xøhajpä José. Jim hänajty choñ Arimatea. Pianøcxäbä ja'a Jesús miädia'agy hänajty je'e.

⁵⁸ Mänitä José ja'a Pilato cuhdujt hoy miäyujwa'añ coø ja'a ho'ogyjiäya'ay yajmānācāt cruzcøxp. Mänitä José ja'a cuhdujt miooyä.

⁵⁹ Mänit jaduhñ yajmānajcy. Mänitä poobwit yajnähbijty.

⁶⁰ Mänit jaduhñ jiiby piädaacy tsaajutjooty ja'a naamdajypä. Paadiä José ja'a tsaajut hänajty tøø yajtajyii, jiiby hänajty piäda'aga'añii coø hänajty tøø yho'ogy. Mänitä tsaajut yhahāmoomtāgooy tsaahaam maa ja'a Jesús hänajty tøø ñaaxtägø'øyän. Mänitä José wyiimbijty.

⁶¹ Jimä María Magdalatsohmähajxy miähmøøyy møødä María tu'ugpä. Jim hajxy hänajty yhäña'ay maa ja'a Jesús hänajty tøø ñaaxtägø'øyän.

⁶² Viernes ja'a Jesús jaduhñ yho'cy. Cujaboom ja'a teedywiindsøn hajxy miejch maa ja'a Pilatän møødä fariseoshajxy.

⁶³ Mänitä Pilato ñämaayä:

—Miiñ møjteedy, ja'a craa häxøøy hó'cäbä, tøø hijty miäna'añ cooc tyijy cumaaxc hijty jiuypioğa'añ. Pero nä'ä høhñdaac jaduhñ.

⁶⁴ Entonces, quex ja'a soldado jim maa tøø ñaaxtägø'øyän, jaduhñ hajxy jaduhñ jim yhadäná'awät jadu'tsuhñ. Jaduhñsä Jesús miägu'ughajpä ja'a ñaaxni'x hajxy nøcxy quia'a yajpādsøømä. Jaduhñsä cu'ug hajxy quia'a nämá'awät cooc tyijy tøø jiuypiojcy. Maas hanaxiä hajxy jaduhñ cu yhøhñdaacy quejee ja'a Jesús hijty yhøhñda'aguiän.

⁶⁵ Mänitä Pilato miänaañ:

—Xiidsä soldadohajxy. Ween hajxy jim nøcxy yhadäna'ay neby jaduhñ quia'a pädsømät.

⁶⁶ Mänit soldadohajxy jim quiejxä hadänaabiä. Mänitä tsaa hajxy xiøøjøøyy ja'a jim hämoomnaabiä maa ja'a tsaajuthaawän. Mänit hajxy jim miähmøøyy.

28

¹ Cujaboom näxøø jopyñä, mänitä Maríá Magdalatsohm̄bä jim̄ miejch maa ja'a Jesús hānajt̄y tøø ñaaxtägø'øyän møødä Maríá tu'ugpä.

² Mänitiä hujx møc ñajxy. Jim̄ä Dios ja'a mioonsä hānajt̄y tu'ug tiāna'ay. Tsajpootyp hānajt̄y tøø chooñ. Mänitä tsaa jiohāmoomy ja'a hijty hijpä juth-aguum. Mänitä yhøxtaacy tsaanāhgøxp.

³ Jaanč teh̄m yhaamb hānajt̄y je'e. Jaanč teh̄m pioob ja'a wyit hānajt̄y.

⁴ Coø ja'a soldado ja'a Diosmoonsä hajxy yhijsy, mänit hajxy tiägøøyy tsäyuuhiä. Jaanč teh̄m chāhgøøby hajxy hānajt̄y. Mänit hajxy quiādaayy. Jaduh̄n hajxy miāhmøøyy nebiä ho'ogypiän.

⁵ Mänitä Maríahajxy ñāmaayyā ja'a Diosmóonsām:

—Ca'a hajxy mdsāhgø'øy. Nnajuøøbiøch jaduh̄n coø ja'a Jesús hajxy mhøxta'ay, ja'a hijty tøø miøjpahbedyíjābä.

⁶ Cabä jii; tøø jiuypioøcy neby hijty tøø miāna'añän. Min̄ hajxy huug hix̄ maa tøø ñaaxtägø'øyän.

⁷ Coø hajxy jaduh̄n mhíxät, mänitä miägu'ughajpä hajxy nøcxy paquiä mhawaanä coø jaduh̄n tøø jiuypioøcy, coø jaduh̄n ñøcxø'øga'añ Galilea. Jim̄ hajxy jaduh̄n mbaada'añ. Jaduh̄nhøch mijts nhawáanäm.

⁸ Mänitä Maríahajxy hoy yhijsy paquiä maa ja'a Jesús hānajt̄y tøø ñaaxtägø'øyän. Jíibädä hajxy chāhgø'øy, jíibädä hajxy xioonda'agy. Mänitä miägu'ughajpä hajxy hoy yhawaanä päyø'øguiä.

⁹ Tu'haamnøcxpä ja'a Jesús ñäguehtøø'xy. Mänitä Maríahajxy yajpoo'xä. Mänitä Jesús hajxy wyiingumedsøøyy. Mänit hajxy tiecymiāmānenøøyy. Jaduh̄n hajxy wyiingudsāhgøøyy.

¹⁰ Mänit hajxy ñāmaayyā:

—Ca'a hajxy mdsāhgø'øy. Nøcxhøch ja'a nmägu'ughajpä hajxy hawáanäc coø hajxy jim̄ ñøcxät Galilea, coøch hajxy jim̄ xpiaada'añ.

¹¹ Coø ja'a Maríahajxy hānajt̄y tøø wyiimbity maa ja'a Jesús hānajt̄y tøø jiuypioquiän, mänitä soldadohajxy näje'e ñøcxy cajptooty, ja'a hajxy hānajt̄y tøø yhadānā'ayābä. Mänitä teedywiindsøn̄ hajxy hoy yhawaanä nebiaty hajxy hānajt̄y tøø yhijsy.

¹² Mänitä teedywiindsøn̄hajxy hoy miøødmādia'agy ja'a martu-umädøjc-hajxy neby hajxy jaduh̄n quiojyquiapxytiúnät. Mänitä soldado xädø'øñ hajxy may miooyyā.

¹³ Mänitä soldadohajxy ñāmaayyā:

—Jaduh̄n hajxy mmānā'anät coø hajxy coods mmaaho'cy, y coø ja'a Jesús ja'a miägu'ughajpähajxy hoy yajpādsømyii.

¹⁴ Y coodsä gobernador jaduh̄n miädoyhädät, højts jaduh̄n nyajmābøgäp. Jaduh̄n hajxy xquia'a capxpāadät.

¹⁵ Mänitä soldado ja'a xädø'øñ hajxy wyiingpøjcy. Mänit hajxy hoy jiatcø'øy neby hajxy hānajt̄y tøø ñāma'ayiiän. Jaduh̄ndsä judíoshajxy miādia'agyñä høxtä jäda'anābaadyñä.

¹⁶ Mänitä Jesús miägu'ughajpähajxy jim̄ ñøcxy Galilea, ja'a nāmajtu'ugpä. Mänit hajxy jim̄ miejch maa ja'a tunän maa ja'a Jesús hānajt̄y tøø ñāgapxiän.

¹⁷ Coø ja'a Jesús hajxy yhijsy, mänit hajxy wyiingudsāhgøøyy, hoy hajxy hānajt̄y näje'e quia'a ja mabøcy hamuumdu'joot.

¹⁸ Mänit hajxy wyiingumedsøøyyā. Mänit hajxy ñāmaayyā:

—Tøøchä Dios cuhdujt cøxiä xmio'oy jim̄ tsajpootyp, møød hädaa yaabä naaxwiin.

¹⁹ Nøcx hajxy wiinduhmyhagajpt. Yajwiingapxø'ow hajxy nébiøch nmādia'agy hajxy xmiäbøjcät. Jaduh̄n hajxy myajnābétät ja'a

Diosteedycøxpä, møødä høøhcøxpä, møødä Dioshespíritucøxpä. Høøch ja'a Dios xyHuunghajp.

²⁰ Jaduhñ hajxy myajñähixø'øwät coo hajxy jaduhñ miäbøgät nebiátyhøch mijts tøø nhane'emiän. Mjahmiédsäp hajxy jaduhñ coöch mijts nmøødhida'añ cøjxta'axiøø høxtä coonä naaxwiimbä wyiimbídät.

San Marcos

¹ Jaduhnä Diosmädia'agy chohnäda'agy ja'a Jesucristocøxpä, neby jiajty, neby yhabejty. Dioshuungä Jesucristo je'eduhn.

² Jaduhn jim cujaay myiñ nocyjiooty, ja'a Isaías jecy quiujáhyäbä. Ja'a Isaías, je'e ja'a Diosmädia'agy jecy yajwa'x. Jaduhnä Dios ja'a yHuung jecy ñämaayy:

Huuc madow, chámhøchä nguguexy nguejxø'øga'añ maa miich mnøcxø'øwa'añän.

Je'e ja'a mädia'agy nøcxy yajwa'xa'añ coo miich jim nøcxy mwäditaambä.

³ Mänitä Dios jiaac mänaañ:

“Pactúmhøchä nguguexy nøcxy wiädita'añ. Coo ja'a cu'ughajxy jaduhn miädoyhada'añ coo ja'a wiingapx jøjcapxøøbiä jim tøø quiäda'agy pactuum,

mänit hajxy nøcxy wyiingapx jøjcapxø'øwa'añii coo ja'a haxøøgwiinmahñdy hajxy ñajtshixø'ød,

coo ja'a Jesús ja'a miädia'agy hajxy miäbøjcät, ja'a hajxy mWiindsønhadaambiä.”

Ja'a Juan jaduhn nänøømä, ja'a hänäjty mäyajnäbetaambä.

⁴⁻⁵ Mänitä Juan je'e jiaançh tågøøyy mäyajnäbejpä jim jäguemduum, maa ja'a møjnøø hänäjty xiøhatiän Jordán. Mänitä jäya'ayhajxy may miejch maa ja'a Juan hänäjtian. Jim hajxy hänäjty choon maa ja'a naax hänäjty xiøhatiän Judea, møød jim maa ja'a cajpt hänäjty xiøhatiän Jerusalén. Mänitä Juan ja'a cu'ug tiägøøyy yajwiingapxøøbiä coo hajxy ñäbétät, weenä jiootä wyiinmahñdy hajxy yajtagach. Jaduhnä Dios ja'a piojpä quiädieey hajxy yajnähwáatsät. Mänitä cu'ugä piojpä quiädieey hajxy ñägapxy. Jaduhn hajxy hänäjty miäna'añ cooc ja'a yhaxøøgwiinmahñdy hajxy hänäjty ñajtshixø'øwa'añ. Mänit hajxy ñäbejnä.

⁶ Ja'a Juan, camellopøjt hänäjty wyithajpy. Wajhac hänäjty wiøønhajpy. Mu'u hänäjty chu'uçhhajpy. Møjtsiinnøø hänäjty yhu'ugyhajpy.

⁷ Mänitä Juan ja'a cu'ug yajwiingapxøøyy: “Jimhøchä njamiøød tu'ug jiaac medsa'añ yajwiingapxøøbiä. Maas mäjaamøød je'e miedsa'añ quejeech høøch. Cábøch cuhdujt jaduhn njaty møødä nebiä cuhdujt je'e miøødän, ja'a jaac medsaambä.

⁸ Coo mijts nyajnäbejty, nøøhaam mijts nyajnäbejty. Pero ja'a jaac mi-naambä, Dioshespírituhaam hajxy jadähooc xyajnäbejtägatsa'añ.” Jaduhnä Juan miänaañ.

⁹ Cujequiä Jesús jim miejch maa ja'a Juan hänäjty miäyajnäbetiän, jim maa ja'a møjnøø hänäjty xiøhatiän Jordán. Jimä Jesús hänäjty tøø choon maa ja'a cajpt xiøhatiän Nazaret, jim maa ja'a naax hänäjty xiøhatiän Galilea. Mänitä Juan ja'a Jesús yajnäbejty.

¹⁰ Tuunä Jesús ñä'a tøødspädsøømy, mänit yhijsy coo ja'a tsajt yhawaach. Mänitä Jesús ja'a Dioshespíritu yhijsy coo hänäjty ñägäda'agyii nebiä paloman.

¹¹ Mänitä Dios jim quiuhgapxnajxy tsajpootyp. “Høøch miich tu'uquiä nHuunghajpy. Miich njaançh tehñ chojpy. Miich njaançh tehñ quiu-maaby.” Jaduhnä Jesús ñämaayyä.

¹² Mänitä Jesús miødhajtä pactuum ja'a Dioshespíritu.

¹³ Mänitä Jesús jim piuhwaatsä. Nidiuhñ jim miähmøøyy. Jagooyyä animalhajxy hänäjty jim wiädity. Mänitä Jesús ñämejtsä ja'a møjcu'ugong. Mänitä Jesús jia tågøøyyä jøjcapxøøyyäbä. Juxychägui'xxøø ja'a Jesús jim

yhiŋty jäguemduum. Mänitä Jesús ñämejtsä ja'a Diosmoonsähajxy ja'a jim tsajpootypä. Mänitä Jesús piuhbejtä.

¹⁴ Ja'a Juan, cujecy je'e chuuma. Coe je'e jaduhñ chuuma, mänitä Jesús jim ñöcxtägajch Galilea. Mänitä Jesús ja'a cu'ug tiägöøyy yajwiingapxöøbiä ja'a Diosmädia'agy cooc hänäjty yhabaatnä coo ja'a Dios ja'a miöcmäjaa hänäjty yajcähxö'öga'añ.

¹⁵ “Habáatnäp jaduhñ coo ja'a Dios ja'a miöcmäjaa yajcähxö'öga'añ. Paadiä Dios ja'a miädia'agy hajxy mmäböjcat. Weenä mjootä mwiinmahñdy hajxy myajtägach. Weenä mhaxöøgwiinmahñdy hajxy mnajtshixö'öy.” Jaduhñä Jesús miänaañ.

¹⁶ Cujequiä Jesús tiägöøyy wädijpä maa ja'a mejy hänäjty xiöhatiän Galilea. Jim hänäjty wiädity mejypia'a, mänitä jäya'ay metsc yhiŋty, ja'a Simón mööda piuhya'ay Andrés. Hacxmats ja'a Simónghajxy hänäjty tiuunghajpy. Jiibiä yhacxjohmd hajxy hänäjty piäda'agy mejjiooty.

¹⁷ Mänitä Simónghajxy ñämaayyä:

—Jam hajxy wädijtäm. Je'e mijts hijty mduunghajpy, hacxmats. Wiingtuunghööch mijts nmo'owaamby. Nyajñähixö'öwäambiöch mijts nebiä cu'ugä Diosmädia'agy hajxy myajwiingapxö'öwät —nömä Jesús miänaañ.

¹⁸ Tuunä jaduhñ ñä'a mänaañ, mänitä Simón ja'a yhacxjohmd hajxy hoy ñajtswidso'öy mejypia'a. Mänitä Jesús hajxy piadu'uböjcy.

¹⁹ Weeñtiä ja'a Jesúsghajxy hänäjty töø miejypia'ayo'oy, mänitä Jesús ja'a Zebedeo yhiŋty mööda yhuunghajxy, ja'a Santiago mööda Juan. Barcohuungooty ja'a Zebedeohajxy hänäjty yhäña'ay. Jiibiä yhacxjohmd hajxy hänäjty yhaxodsö'öy.

²⁰ Mänitä Jesús ja'a Santiago miöjyaaxy mööda Juan. Mänitä Santiago ja'a Jesús hajxy piadu'uböjpä. Ñähgueec ja'a tieedy hajxy jiiby barcohuungooty mööda mioonsähajxy.

²¹ Mänitä Jesúsghajxy jim miejch maa ja'a cajpt hänäjty xiöhatiän Capernaum. Coe ja'a poo'xxiöø yhabaaty, mänit hajxy jiiby tiägöøyy tsajtögooty. Mänitä Jesús ja'a cu'ug tiägöøyy yajwiingapxöøbiä.

²² Mänitä cu'ughajxy yagjuöøyy coogä Jesús hänäjty hoy yajñähixö'öy nebiä möjcuhdjtmöödpän. Maas hóyyäc hänäjty yajñähixö'öy quejee ja'a häna'c-hajxy, ja'a Diosmädia'agy hajxy hänäjty naxy yajñähixöøbiä tsajtögooty.

²³ Jiibiä mähdiöjc hänäjty tu'ug tsajtögooty, töø hänäjty yajtagö'öyii ja'a möjcu'u. Mänitä möjcu'u tiägöøyy yaaxpä möc:

²⁴ —Miičh Jesús, Nazaret miičh mdsooñ. Tii höjts coo xmiädsibö'öy. Höjts jaduhñ xjia wi'i yajcuhdägoyyaamb, túhmäts. Nnajuöøbiöch pön miičh. Miičhä Dios xyHuunghajp —nömä mähdiöjcä möjcu'u yajmänaañä.

²⁵ Mänitä Jesús ja'a möjcu'u yhojy:

—Hamón, jua'ads jim maa yö'ö mähdiöjcän —nömä Jesús miänaañ.

²⁶ Mänitä möjcu'u ja'a mähdiöjc je'e yajpojpaaty. Yáaxäbä mähdiöjc ñähwaatsä. Ja'a möjcu'u jaduhñ yajyaax.

²⁷ Coe ja'a Jesús ja'a mähdiöjc jaduhñ yajñähwaach, jiaančh tehñ yagjuöøyy ja'a cu'ughajxy jaduhñ nägöxiä. Mänit hajxy tiägöøyy niñämäyābā:

—Maa yö'ö craa cuhdujt jaduhñ töø ñä'a mahñ piöcy coe yö'ö mähdiöjcä möjcu'u jaduhñ yajñähwaatsä. Nej, hawiinjemyguiuhdujtäda'a miöödäjä —nömä Jesús ñänöömä.

²⁸ Paquiä mädia'agy jim wia'xy Galileanaaxooty wiinduhmyhagajpt coe ja'a Jesús ja'a miöcmäjaa hänäjty töø yajcähxö'ögy.

²⁹ Coo ja'a Jesúshajxy jiiby chajtøjpädsøømy mөөдä jiamioødtøjc, mänit hajxy jim ñøcxy maa ja'a Simónghajxy hānajty chāna'ayān mөөдä Andrés. Quipxiā Santiagohajxy hānajty choonā mөөдä Juan.

³⁰ Ja'a Simón ja'a miø'ødhoc, pa'amgo'naaby hānajty je'e. Tobia'am hānajty miøød. Coo ja'a Jesús jim miejch maa ja'a Simón tiøjcān, mänitā Jesús yhawāanāxā coo ja'a pa'amjäya'ay hānajty jiiby tøgooty.

³¹ Coo ja'a Jesús tiøjtägøøyy, mänitā pa'amjäya'ay wyidsø'cy. Mänitiā ja'a tiøy tiøjch. Mänitā Jesús yajcaayyā yaghuucā ja'a Simón ja'a miø'ødhoc.

³² Mänittsuu, coo ja'a xøø hānajty tøø quiuhnaxy, mänitā Jesús pa'amjäya'ay may yajnāmejtsā, jim maa ja'a Simón tiøjcān, mөөдä møjcu'umøødpāhajxy.

³³ Jimā cu'ughajxy hānajty may tiāna'ay tøghaawjooty.

³⁴ Mänitā Jesús jäya'ay may yajpa'amnaxy. Madiu'ujā pa'am hajxy hānajty miøødä. Mөөдä møjcu'umøødpāhajxy, yajnāhwaatsā hajxy je'ebā. Mänitā Jesús ja'a møjcu'u yhanehmy coo hajxy quia'a cāpxāt, je'eguiøxpā coo ja'a Jesús hānajty ñajuø'øyii pøn je'e.

³⁵ Cujaboom, je'enā hānajty wyiingoodsā, mänitā Jesús piädø'cy. Mänit tiøjpädsøømy. Mänit jim ñøcxy jäguemduum. Mänitā Tieedy hoy pia'ya'axy.

³⁶ Coo jioøøyy, mänitā Simónghajxy yhiijxy coo Jesús hānajty tøø tiu'ubøcy. Mänit hajxy tiu'ubøjcy høxtaabiā.

³⁷ Coo ja'a Jesús piaatā, mänit ñāmaayyā:

—Jim miichā cu'ug xjia wi'i yajtøy maachā ndøjcān.

³⁸ Mänitā Jesús yhadsooyy:

—Jam hajxy wiingtuum wädijtām maa ja'a cajpt wiingonbān. Jadúhnhøchā cu'ugā Diosmādia'agy jim nyajwiingapxøøbiāt. Jadúhnhøch nwiinguexiā coochā Diosmādia'agy wiinduhmyhagajpt nmāwädítāt.

³⁹ Mänitā Jesús tiägøøyy wädijpā tsajtøjc-tsajtøjc wiinduhmyhagajpt jim Galileanaaxooty. Ja'a Diosmādia'agy hānajty yajwiingapxøøby, mөөдä pa'amjäya'ay hānajty yajnāhwaatspā, ja'a hajxy møjcu'umøødpā.

⁴⁰ Mänitā Jesús pa'amjäya'ay ñāmejtsā tu'ug, ja'a leprapa'ammøødpā. Mänitā Jesús wyiinjiçādaacā, miānuu'xtaacā:

—Pø chojpy miichā mjoot jaduhñ, høøch hādaa nba'am yajnāhwāatsāc —nømā Jesús ñāmaayyā.

⁴¹ Mänitā mähdiøjc ñāxuu'tsä. Mänit ñāhdoonā. Mänit ñāmaayyā:

—Tii coo quia'a cabā. Tøø jaduhñ mnāhwa'açh.

⁴² Tuunā ja'a Jesús jaduhñ ñā'ā mānaañ, mänitiā mähdiøjcā pia'am ñāhwaatsā.

⁴³⁻⁴⁴ Mänit miägapx yhanehmā:

—Huuc madow, cab jaduhñ pøn mhawāanāt coo tøø mba'amnāhwa'açh. Tu'uda'aquiā jim mnøcxāt maa ja'a teediān, ween jaduhñ xyhixy coo tøø mjaançh pa'amnāhwa'açh. Mänit mguyoxø'øwāt nebiā Moisés jecy yhanehmiān, jaduhñā cu'ughajxy ñajuø'øwāt coo tøyhajtā mba'am tøø ji-aançh naxy —nømā Jesús miānaañ.

⁴⁵ Pero cabā craa ñā'ā mādia'agymiäbøjcy, ja'a pia'am hānajty tøø yajnāhwa'açhijābā. Coo tiu'ubøjcy, mänit tiägøøyy mādiaacpā nebiaty hānajty tøø jiaty. Wiinduhmyhagajptā mādia'agy jaduhñ wia'xy. Coo ja'a pa'amjäya'ayhajxy jaduhñ miädoyhajty coo ja'a Jesús hānajty miäyajpa'amnaxy, mänitā Jesús hajxy tiägøøyy høxtaabiā coo ja'a pia'amhajxy yajnāxāxāt. Paadiā Jesús hānajty quia'a cajptägø'øwaaññā coo ja'a pa'amjäya'ayhajxy hānajty jia wi'i ñāmech. Paadiā Jesús miāhmøøññā jäguemduum maa jäya'ay quia'a hitiān. Mänitā Jesús ja'a pa'amjäya'ay may ñāmejtsā. Wiinduhmyhagajptjaty hajxy hānajty choon.

2

¹ Cujequiä Jesús jadähooc quiajptägøøyy Capernaum. Mänitä mädia'agy wia'xy coo hänajty jim tøø miéjtscombä.

² Mänitä jäya'ayhajxy may miejch maa ja'a Jesús hänajty miejtsta'aguiän. Paquiä ja'a tøjc jaduhñ yhujch. Høxtä tøguubiaady hajxy miejch. Mänitä Jesús ja'a cu'ugä Diosmädia'agy tiägøøyy yajwiingapxøøbiä.

³ Mänitä pa'amjäya'ay tu'ug quiøømiejtsä cø'ømucy tecymiucy. Nämädaaxcä jäya'ayhajxy hänajty quiø'øy tsaajiooty.

⁴ Cabä pa'amjäya'ay hänajty hoy yajmedsa'añii maa ja'a Jesúsän, coo ja'a jäya'ayhajxy hänajty jiaanč tehñ miayyā. Mänitä mähdiøjc miäbejtä cuhjodiøjnähgøxp. Mänitä tøjc hajxy weeñtiä yajcuhwaach, jim mädøyyä maa ja'a Jesús hänajty pia'täna'ayän, mäduhñtiä pa'amjäya'ay hoy ñänaxy. Mänit jaduhñ quiuhdøøñajxä tsaajiooty. Jiiby hoy quiäda'agy maa ja'a Jesús wyiinduumän.

⁵ Paadiä pa'amjäya'ay yajmejtsä maa ja'a Jesúsän, ñajuøøby hajxy hänajty coo ja'a pia'am hänajty yajnaxáañxä. Coo ja'a Jesús jaduhñ yhiyxy coo ja'a miädia'agy hänajty miäbøgáañxä coo hänajty miäyajtso'oga'añ, mänitä pa'amjäya'ay ñämaayyā:

—Mägu'ughajpä, tøø ja'a mboj tøø ja'a mgädieey xñähwa'ačh —nømä Jesús miänaañ.

⁶ Jiibiä häna'c-hajxy hänajty näje'e piahäña'ay, ja'a Diosmädia'agy hajxy naxy yajnähiøøbiä tsajtøgooty. Jiiby hajxy hänajty miämädoonaabiä. Mänit hajxy näje'e miänaañ quiopcooty:

⁷ “Tii yø'ø craa jaduhñ coo miäna'añ cooc tyijy yø'ø pa'amjäya'ay piojpä quiädieey tøø yajnähwáatsäxä. Cap pøn cuhdujt miøødä coo jäya'ayä piojpä quiädieey yajnähwáatsät; jagooyyā Dios tu'uquiä miøødä.”

⁸ Ñajuøøyy ja'a Jesús jaduhñ waambaty hajxy hänajty miädia'agy quiopcooty. Mänit hajxy ñämaayyā:

—Tii hajxy jaduhñ coo mwi'i miädia'agy mgopcooty.

⁹⁻¹¹ Høøch, Diosquéxyhøch høøch, páadyhøch cuhdujt nmøødä coočkä jäya'ayä piojpä quiädieeyhajxy yaa nyajnähwáatsät hädaa yaabä naaxwiin. Hädaa mähdiøjc, nyajpa'amnaxáambiøch hädaa. Jadúhñhøch nyajcähxø'øga'añ coočk njaanč Diosquexiä. Jaduhñä tøyhajt hajxy mmøødhájpät coočk cuhdujt njaanč møødä coočkä jäya'ayä piojpä quiädieeyhajxy nyajnähwáatsät —nømä Jesús miänaañ.

Mänitä pa'amjäya'ay ñämaayyā:

—Tänaayyø'øg. Widsø'øg yø'ø mdsaa. Nøcxnä maa ja'a mdøjcän.

¹² Tuunä ja'a Jesús jaduhñ ñä'a mänaañ, mänitä pa'amjäya'ay jiaanč møcpøjcy. Mänit tiänaayyø'cy. Mänitä chaay wyidsø'cy. Mänit tiu'ubøjnä. Coo ja'a cu'ughajxy jaduhñ yhiyxy, mänit hajxy nägøxiä jiaanč tehñ yagjuøøyy. Mänit hajxy miänaañ:

—Ni mänaa højts jaduhñ nga'a híxäm.

Mänitä Dios hajxy wyiingudsähgøøyy.

¹³ Mänitä Jesús ñøcxtägajch maa ja'a mejjiän. Mänitä jäya'ay jim may ñäméjtsägumbä. Mänitä Diosmädia'agy hajxy yajwiingapxøøyyä.

¹⁴ Jimä Jesús hänajty miejypia'ayo'oy, mänitä Leví yhiyxy, ja'a Alfeo yhuung. Jim hänajty yhäña'ay meexäpa'a maa hajxy hänajty yajnähuudi'udiän. Mänitä Leví ñämaayyā:

—Jam wädíjtäm —nømä Jesús miänaañ.

Mänitä Leví tiänaayyø'cy. Mänit piadu'ubøjcy.

15 Mänitä Jesúshajxy wioowä mägaabiä maa ja'a Leví ja'a tiøjcän, mөөдä jiamioөdtøjc. Nämäyyä jäya'ayhajxy jim piamejch, ja'a Jesús hajxy hānajty pawädijpä. Jiibiä yajnähuudiutpädøjcä Jesús hajxy hānajty may miөөdcaamiucy miөөdhuucmucy, mөөдä cuboj cugädieediøjc.

16 Jiibiä fariseoshajxy hānajty näje'e miähee'pna'ay, mөөдä hāna'c-hajxy, ja'a Diosmädia'agy hajxy hānajty naxy yajnähiøøbiä tsajtøgooty. Coö ja'a Jesús hajxy jaduhñ yhiijxy coö ja'a yajnähuudiutpädøjc-hajxy hānajty miөөdcaamiugyii mөөдä cuboj cugädieejiäya'ayhajxy, mänitä Jesús ja'a jiamioөdhajxy ñāmaayyā:

—Yø'ø mwiindsón, tii yø'ø yajnähuudiutpädøjc coö miөөdcaamiucy, mөөд yø'ø cuboj cugädieejiäya'ay —nømä fariseoshajxy miānaañ.

17 Miädoow ja'a Jesús jaduhñ coö hajxy jaduhñ miānaañ. Mänit hajxy ñāmaayyā:

—Pøn jaduhñ mөc, cab hajxy yajtsooyø'øy. Pøn jaduhñ pa'ammөөd, je'eds hajxy jaduhñ yajtsooyøøby. Páadyhøch yaa tøø ngäda'agy hädaa yaabä naaxwiin coöchä cuboj cugädieebiähajxy nnämä'awät coö ja'a yhäxøøgwiinmahñdy hajxy ween ñajtshixø'øy. Pønäc tyijy pojpa cädieey ca'a mөөд, cábøch hajxy je'e waamb nnāma'awa'añ —nømä Jesús miānaañ.

18 Cujecy, jimä Juan ja'a jiamioөdhajxy hānajty jaguiay yhity, mөөдä fariseoshajxy näje'e. Mänitä jäya'ayä Jesús hajxy hoy näje'e miäyajtøy:

—Yø'ø Juan ja'a jiamioөdhajxy, jaguiay hajxy yø'ø yhity, mөөд yø'ø fariseoshajxy. Pero miichä mjamiөөdhajxy, cab hajxy jaduhñ yhiijpä. Tisän —nømä Jesús ñāmaayyā.

19 Mänitä Jesús yhadsooyy:

—Coö ja'a pөc ja'a hu'ug naxy jiadyii, cabä jäya'ayhajxy yhity jaguiay, ja'a hajxy woybä wichpä, coö ja'a jamiø'өd hajxy hānajty wyiingay wyiinhuy. Cab hajxy hānajty jiootmayhaty.

20 Pero habaadāannäp jaduhñ coöch yaa ndsoonaannä. Mänitøch mäbøjnäbä ja'a njamiөөdhajxy yhida'añ jaguiay. Jootmayhadaamb hajxy hānajtiän.

21 'Ni pønä tucwit quia'a hagø'yø'øy jemyywyithaam. Ja'a jemyywyit, mógäp je'e. Ja'a tucwit, cøödsäp je'ebä. Maas hanaxiä jiaac pagøödsät.

22 Jaanä jaduhñduhmbä, ni pønä jemyyvyino quia'a cudemø'øy tucwajhacxujiooty. Jaac xünäp ja'a jemyyvyino jaduhñ. Mägøödsø'øb ja'a tucwajhacxuy jaduhñ. Cøxäp ja'a jemyyvyino yhäxyocy. Nä'ägä tågóyyäp jaduhñ nāmetsc. Tågóyyäp ja'a tucwajhacxuy. Jaanä tågóyyäbä jemyyvyinäbä. Páadiädsä jemyyvyino hajxy quidemø'øy jemyywiajhacxujiooty —nømä Jesús miānaañ.

23 Poo'xxiøøjooty hānajty je'e, jimä Jesúshajxy hānajty wiädity trigocamjooty, mөөдä jiamioөdtøjc. Mänitä jiamioөdhajxy yohguiujc tiägøøyy trigowiingädsujtspä. Je'e hajxy hānajty jiøø'xaamby.

24 Jimä Fariseoshajxy hānajty näje'e piawädijpä. Mänitä Jesús ñāmaayyā:

—Tii yø'ø mjamiөөdhajxy coö trigowiingädsuch poo'xxiøøjooty. Nej, cab hajxiäda'a ñajuø'øyä coö ja'a cuhdujt jaduhñ myiñä coö hajxy jaduhñ mga'a túnät poo'xxiøøjootiä —nømä fariseoshajxy miānaañ.

25 Mänitä Jesús miānaañ:

—Nej, cahnä Diosmädia'agy hajxy mgapxiä coö ja'a Davidhajxy jecy yäho'pøjcä mөөдä jiamioөdtøjc.

26 Ja'a Abiatar hānajty tuumb teedywiindsón. Mänitä David jiiby tiägøøyy Diostøgooty. Mänitä tsajcaagy quiaayy, ja'a teedyhajxy hānajty tøø quiuy-oxø'øyäbä Dioswiinduum. Mänitä David ja'a jiamioөdtøjc piuhmooyy. Hoorä,

cabä cuhdujt hänajty myiñ coo ja'a David ja'a tsajcaagy hajxy jaduhñ quiáyät. Jagooyyá teedy cuhdujt hajxy hänajty miøødä coo hajxy quiáyät.

²⁷ Mänitä Jesús miänáangumbä:

—Paadiä Dios ja'a poo'xxiøø quiunuu'xy, weenä jäya'ayhajxy mänit pioo'xy. Mijts jaduhñ ja mänaamb, paadiä Dios ja'a jäya'ay piäda'agy cooc tyijy ja'a poo'xxiøø hajxy wyiingudsähgø'øwät. Cab jaduhñ ñä'ä tøyyä.

²⁸ Cooch jaduhñ nDiosquexiä, páadyhöch cuhdujt nmøødä cooch nmähané'emät høxtä poo'xxiøøjootypaady —nømä fariseoshajxy ñämaayyä.

3

¹ Mänitä Jesús jadähooc tiøjtägøøyy tsajtøgooty. Jimä jäya'ay hänajty tu'ug cø'øma'ad.

² Jimä fariseos ja'a Jesús hajxy hänajty miähee'pna'ay pø jaančh mäyajpa'amnaxaamb hänajty je'e poo'xxiøøjooty. Wiinmahñdy hajxy hänajty yhöxtaaby nebiä Jesús hajxy yajtsumøøjät.

³ Mänitä cø'øma'adpä ñämaayyä:

—Tänaayyø'øg. Min yam cujc täna'aw —nømä Jesús miänaañ.

Mänitä mähdiøjc jaduhñ quiudiuuñ.

⁴ Mänitä fariseoshajxy ñämaayyä:

—Nebiä cuhdujt myiñ coo hajxy ndúunämät poo'xxiøøjooty, hoy tøgä haxøøgä. Nej, jaduhñä cuhdujt myiñ coo jäya'ay hajxy nyajtsóocämät poo'xxiøøjootiä, tøgä jaduhñ myiñ coo jäya'ay hajxy nyaghó'cämädä —nømä Jesús miänáangumbä.

Pero cabä fariseoshajxy waamb ñä'ägä hadsooyy.

⁵ Mänit hajxy wyiinhee'ppejtä, mäduhñtiä Jesús hajxy hänajty jiuhdänaawiädity. Jootmayhajpä Jesús hänajty coo ja'a fariseos ja'a cø'øma'adpä hajxy hänajty quia'a näxuuch. Cabä Jesús hänajty jiootcujcä. Mänitä mähdiøjc ñämaayyä:

—Xajtøw yø'ø mgø'ø.

Mänitä quiø'ø jiaančh xajtøøyy. Tuunä jaduhñ ñä'ä xajtøøyy, mänitiä quiø'ø yhöyøøyy.

⁶ Mänitä fariseoshajxy wyiimbijty. Mänit hajxy ñøcxy maa ja'a Herodes jiamioødhajxiän. Ja'a Herodes, gobiernä hänajty tiuumby. Mänitä fariseoshajxy nägøxiä quiojyquiapxyhajty nebiä Jesús hajxy yajyagho'ogøøjät.

⁷ Coo ja'a Jesús hajxy jiihy chohñ tsajtøgooty møødä jiamioødtøjc, mänit hajxy jim ñøcxtägajch maa ja'a mejypia'ajän. Jimä jäya'ayhajxy hänajty may piawädity. Galilea hajxy hänajty choon.

⁸ Tøø ja'a mädia'agy hänajty wia'xy wiinduhmyhagajpt coo ja'a Jesús madiu'u hoy-yagjuøøñäjatypä hänajty yajcähxø'øgy. Coo ja'a jäya'ay ja'a mädia'agy hajxy jaduhñ miädooyy wiinduhmyhagajpt, mänitä Jesús jäya'ay may ñämejtsä. Wiinduhmyhagajpt hajxy hänajty choon, møød jim Judeanaaxooty, møød jim Jerusalén, møød jim Idumea, møød jim Jordánmøjnøøhawiiimb, møød jim Tiro, møød jim Sidón.

⁹⁻¹⁰ Coo ja'a pa'amjäya'ayhajxy hänajty may tøø yajmøcpøgyii, paadiä Jesús hänajty jia wi'i ñähdona'añii ja'a jäya'ayhajxy jaac pa'ammøødpä, ween hajxy jaduhñ ñähwaatspä. Høxtä niyhanø'tsmújcäp hajxy hänajty. Mänitä Jesús ja'a jiamioødtøjc ñämaayy coo barcohuung hajxy jim nähix hahixø'ø miähäñä'awät, jaduhñä Jesús jiihy paquiä piédät coo hänajty pianø'ødsa'añii ja'a cu'ug.

¹¹ Jimä jäya'ayhajxy hänajty wiädijpä ja'a møjcu'umøødpä. Homiaajä Jesús hajxy hänajty yhiy, mänitä Jesús hajxy hänajty wyiinjiicäda'agy, mänitä Jesús hajxy hänajty ñäma'ay:

—Dios miičh xyHuunghajp —jaduhnä møjcu'umøødpähajxy hänajty wyl'i ya'axy.

¹² Mänit hajxy yhanehmä coo ja'a Jesús hajxy quia'a nágápxät ma-jiäya'ayhagujc. Ja'a Jesús jaduñ hanehm.

¹³ Mänitä Jesús jim ñöcxy tunguhduum. Mänitä Jesús ja'a jiamioød miøjyaaxy, pøn hänajty hoy quipxy miøødwäditaamby. Coo hajxy jim quioo'ty maa Jesús hänajtiän,

¹⁴ mänit hajxy nämajmetsc wyiinguejxä coo ja'a Jesús hajxy quipxy miøødwädität, møød coo ja'a Diosmädia'agy hajxy nöcxy yajwa'xy.

¹⁵ Mänitä cuhdujt hajxy miooyy coo jäya'ay hajxy yajnähwá'adsät, ja'a hajxy møjcu'umøødpä.

¹⁶ Jaduhnä Jesús ja'a jiamioødhajxy hänajty xiøhaty, ja'a hajxy nämajmetspä. Tu'ug hänajty xiøhaty Simón. Je'e ja'a Jesús yajxøbejt Pedro.

¹⁷ Jimä Zebedeo yhuunghajxy hänajtypä, ja'a Santiago møødä Juan. Jue'e hajxy yajxødägøøyyä Boanerges. Jaduhn hänajty miädia'agytiägø'øy coo hajxy hänajty paquiä jiaanč tehñ yhawa'anda'agy nebiä häneejän.

¹⁸ Ja'a hajxy hänajty jaac jimä, jaduñ hajxy hänajty xiøhaty Andrés, møødä Felipe, møødä Bartolomé, møødä Mateo, møødä Tomás, møødä Santiago, ja'a Alfeo yhuung, møødä Tadeo, møødä Simón, ja'a hänajty xøhajpä ja'a celote.

¹⁹ Ja'a miämajmetspä hänajty xøhajp Judas Iscariote. Je'e ja'a Jesús cujegy too'c; ja'a Jesús miädsiphajxy cø'ødägøøyyä.

²⁰ Mänitä Jesúshajxy ñöcxy maa tiøjcän møødä jiamioødhajxy.

Mänitä jäya'ayhajxy may miéjtscumbä maa ja'a Jesúshajxy hänajtiän. Paadiä Jesúshajxy hänajty quia'a näbaadøøyyäxä mänaa hajxy jaduñ quiáyät møødä jiamioød, coo ja'a pa'amjäya'ayhajxy hänajty wyl'i yhadsipy coo ja'a pia'amhajxy yajnájxäxät.

²¹ Coo ja'a Jesús ja'a jiuuy miägu'ughajxy jaduñ miädoyhajty coo ja'a Jesús hänajty jiaanč tehñ yhadsibyii, mänitä Jesús hajxy ñämejch. Mänitä Jesús hajxy jia yajnöcxaañ hadsip. Jaduhn hajxy hänajty miäna'añ cooc tyijy ja'a Jesús hänajty tøø quiuhhiñ.

²² Mänitä häna'c-hajxy näje'e quiädaacy, ja'a Diosmädia'agy hajxy hänajty naxy yajnähixøøbiä tsajtøgooty. Jerusalén hajxy hänajty tøø chohnäda'agy. Mänit hajxy miänaañ:

—Yø'ø Jesús, puhbéjtäp yø'ø ja'a møjcu'ugong, paadiä mäjaa miøødä coo jäya'ay yajnähwa'ačh, ja'a hajxy møjcu'umøødpä. Haa ca'a, ja'a møjcu'ugong ja'a møjcu'u hajxy wyiindsønhaipiä —nömä Jesús wyiingapxpejtä.

²³⁻²⁶ Mänitä yajnähixøøbiädøjc-hajxy miøjyaaxä. Mänitä Jesús tiägøøyy yajnähixøøbiä cuento yajmäbaadyhaam.

—Coo jäya'ayhajxy ñimiädsibø'owøøjät quipxyjiaty tu'cajpt, cab hajxy hoy ñimiøødtunáañänä. Jaanä jaduñduhmbä, coo jäya'ayhajxy ñimiädsibø'owøøjät quipxyjiaty tu'que'ex, cab hajxy hoy tøgooty ñimiøødhidáañänä. Jaanä jaduñduhmbä, coo ja'a møjcu'uhajxy ñimiädsibø'owøøjät quipxyjiaty møjcu'u, cab hajxy jaduñ hoy wiäditaannä. Cöxäp hajxy jaduñ quiuhdägoyy. Jaduhnä tøyhajt hajxy mmøødhádät coočhä møjcu'ugong xquia'a puhbety.

²⁷ Jaanä jaduñduhmbä, ni pønä møjjäya'ay hoy mga'a mäméedsät tijaty jiiby miøød tiøgooty. Mänit mäßöcypiä coo jawyiin mgø'øxots mdecyxiódsät, mänitäs hoy mmäméedsät.

²⁸ Tøyhajt jaduñ coo ja'a Dios jäya'ay miämee'xa'añ nebiatiä pojpä cädieey hajxy miøødä, waambatiä Dios hajxy tøø miägapxtägoy.

29 Pero pønä Dioshespíritu tøø miägapxtägoy, je'e mähøcypä, cab hajxy mänaa miämee'xáanänä. Homiänaaxøø ja'a piojpä quiädieey hajxy miäwädita'añ —nømä Jesús miänaañ.

30 Paadiä Jesús jaduhñ miänaañ, coo hñajty tøø ññnømyii cooc tyijy ja'a møjcu'ugong hñajty miøødwädity.

31-32 Jimä Jesús hñajty miädia'agyñä, mänitä tiajhajxy miejch møødä piuhya'ayhajxy. Coo jäya'ayhajxy hñajty jiaanč tehñ miayyä tøgooty, paadiä tiajhajxy tøguum miähmøøyy. Mänitä capxy hajxy quiejxy tøgooty coo ja'a Jesús ween yhuuc pädsømy. Jiibiä Jesús jäya'ay hñajty may jiuhhäñaawiädityii tøgooty. Mänit hajxy miänaañ:

—Ximä mdaj xwyl'i yajtøy møødä mbuhya'ayhajxy møødä mbuhdo'oxyhajxy.

33 Mänitä Jesús yhadsooyy:

—Pønñøch ndajhajpy; pønñøch nbuhya'ayhajpy.

34-35 Mänitä Jesús jäya'ay wyiinhee'ppejty mäduhñtiä hñajty jiuhhäñaawiädityii. Mänit miänaañ:

—Pønjätyhøch nDeedy miädia'agy cudiúunäp, je'eč ndajhajpy, je'eč nbuhya'ayhajpy —nømä Jesús miänaañ.

4

1 Mänitä Jesús jadähooc yhädaaccumbä mejypia'a Diosmädia'agy-yajwiingapxøøbiä. Mänitä jäya'ayhajxy may miejch maa je'e hñajtiän. Coo hawa'adspä hñajty jim quia'a hity pu'uwiing, paadiä Jesús barcohuungooty tiägøøyy mejywyiing. Mänit jiiby yhäñaaguiädaacy. Jimä jäya'ayhajxy miähmøøyy pu'uwiing hamädoowhiipä waambatiä Jesús hñajty miädia'agy.

2 Mänitä Jesús tiägøøyy yajnähixøøbiä cuento-yajmäbaadyhaam.

3 —Huuc mäadow hajxy, mänitä jäya'ay tu'ug tiu'ubøjcy trigowøjpä.

4 Näje'e trigotøømd quiahy tu'haam. Mänitä muuxyhajxy hoy pyiwø'øgy.

5 Wiingtuumä trigotøømd hoy quiähgumbä tsaajoot maa naax hñajty quia'a møødän. Paquiä trigotøømd miujxy coo naax hñajty quia'a cøøcä.

6 Pero nägooyyä xøø piädsøømy, cøjxä trigohuung tiø'øch coo tyicts hñajty cøøc tøø quia'a häda'agy.

7 Wiingtuum hoy quiähgumbä maa hapy hñajty jiaanč tehñ miayyän. Coo hapy jaduhñ yee'cy, cøjx jaduhñ ñähdäna'ayii. Ni tiøøm ja'a trigo quia'a pejty.

8 Wiingtuum hoy quiähgumbä maa ja'a naax hñajty jiaanč tehñ tiao'quiän. Jaanč tehñ yhooyøyy ja'a trigo jim. Näje'e hii'xmajcpajc miøødä tu'wipä; näje'e tägøøghii'xpajc miøødä; näje'e mägo'xpajc miøødä tu'wipä.

9 Mänitä Jesús jiaac mänaañ:

—Pøn hädaaduhñ wiinjuøøby, wéenhøch nmädia'agy xmiäbøjcä.

10 Coo majiäya'ayhajxy wyiimbijty, jimä Jesús ja'a jiamioød miøødmähmøøyy, ja'a hajxy hñajty nämajmetpä, møødä wiingjäya'ay ja'a näwéeñtiäbä. Mänitä Jesús ñämaayyä coo quiapxtøwät waambaty hñajty tøø miädia'agy.

11 Mänitä Jesús yhadsooyy:

—Jaduhñä Dios jioot chocy coo mijts mwiinjuø'øwät nebiä miäjaa ya-jcähxø'øga'añ. Hijty, cap pøn hijty wyiinjuø'øy. Yø'ø wiinghäna'c-hajxy, ni yø'øhajxy quia'a wiinjuø'øy. Pädyyhøch yø'ø häna'c-hajxy nyajnähixø'øy cuento-yajmäbaadyhaam.

12 Hoy hajxy jia mäday, cab hajxy wyiinjuø'øy; jaduhñä Dios hajxy quia'a jøjpøgø'øwät; jaduhñä piojpä quiädieey hajxy quia'a yajnähwáatsäxät.

13 Mänitä Jesús jiaac mänaañ:

—Mijts, pø cab hajxy jaduhñ hoy mwiinjuø'øwa'añ waambátyhøch naamnä tøø ngapxy cuento-yajmäbaadyhaamä, ni jaduhñ hajxy hoy mga'a wiinjuø'øwa'añ waambátyhøch njaac yajmøødmädia'aga'añ cuento-yajmäbaadyhaam.

14 Ja'a jäya'ay trigowøjpä, jaduhñ mäwíinäts miäbaady nebiä Diosmädia'agy-yajwa'xpän.

15 Ja'a trigotøømd cáhwäbä tu'haam, jaduhñ mäwiin miäbaady nebiä jäya'ay ja'a Diosmädia'agy hajxy näje'e jia mädooyän. Pero nägooyä ja'a møjcu'u ñämech, mänitä hajxy yagjahdiägooyäxä waambaty hajxy tøø yajwiin-gapxø'øyii.

16 Ja'a tøømd cáhwäbä tsaaoot, jaduhñ mäwiin miäbaady nebiä jäya'ay ja'a Diosmädia'agy hajxy näje'e paquiä miäbøquiän, Jaanç tehñ xioondaacp hajxy jaduhñ.

17 Pero cab hajxy jejcy miäbøcy. Nägooyä hajxy jaduhñ chaaçhtiuñii ja'a Diosmädia'agyquiøxpä, mänit hajxy ñajtshixøøñä.

18 Ja'a tøømd cáhwäbä maa hapy jiaanç tehñ miayyän, jaduhñ mäwiin miäbaady nebiä jäya'ay ja'a Diosmädia'agy hajxy näje'e jia mäbøquiän.

19 Pero jiaanç tehñ jiahmiejchp hajxy jaduhñ ja'a hädaa yaabä naaxwiimbä. Je'e hajxy jaduhñ wyl'i ñädajpy wyl'i ñämaaby neby hajxy hoy chänä'awät, neby hajxy hoy yhäyowät, møød maa mäyøøhadyiibän. Yajtägoobiä Diosmädia'agy hajxy jaduhñ.

20 Ja'a tøømd cáhwäbä maa naax jiaanç tehñ tioo'quiän, jaduhñ mäwiin miäbaady nebiä jäya'ay ja'a Diosmädia'agy hajxy näje'e hamuumdu'joot miäbøquiän. Hoy hajxy jiaanç tehñ quidiuñ. Jaduhñ hajxy miäbaady nebiä trigo hii'xmajcpajc miøødän tu'wipä, møød nebiä tägøøghii'xpajc miøødän, møød nebiä mägo'xpajc miøødän tu'wipä.

21 Mänitä Jesús jiaac mänaañ:

—Coo jäya'ay jøøn hajxy quiudøø'xø'øy, cøxp hajxy yujcoñ. Cab hajxy jiiby quiuhjupy cubetapa'c. Ni jiiby hajxy quia'a päda'agy maabejtpa'c.

22 Jaanä jaduhñduhmbä, tijaty jaduhñ hijp yu'uçh, tsipcøxp jaduhñ quiøxy cähxø'øga'añ.

23 Pøn jaduhñ wiinjuøøby, wéenhøch nmädia'agy xmiäbøjcä.

24 Mänitä Jesús jiaac mänaañ:

—Huuc wiinjuø'øw hajxy nébiøch chamñ nyajmøødmädia'aga'añ; pøn hädaa mädia'agy hoy wiinjuøøby, maas hoy jaduhñ jiaac yajwiinjuø'øwa'añii.

25 Pøñhøch nmädia'agy tøø xmiäbøjcä, je'eçh njaac yajnähixø'øwaamby. Pero pøñhøch nmädia'agy tøø xquia'a mäbøjcä, cábøch je'e tii nyajnähixø'øwaanä. Høxtä jahdiägooyaaamby je'e mädyii tyijy tøø jia wiinjuø'øy.

26 Mänitä Jesús jiaac mänaañ:

—Coo ja'a Dios ja'a miøcmäjaa yajcähxø'øga'añ, jaduhñ mäwiin miäbaady nebiä jäya'ay ñi'ibiän.

27 Coo ñiippädø'øy, mänit nøcxy miaanä coo tøø quioodsø'øy. Cujaboom, coo jiobø'øy, mänit piädø'cumbä. Pero cab jaduhñ ñajuø'øy nebiä tøømd miuxy. Hix, hamdsoo ja'a tøømd miuxy yeegy.

28 Ja'a tøømd, jiibiä miäjaa piaady naaxooty. Coo miuxy, mänit yeegy. Coo yeegy, mänit piøjy. Coo piøjy, mänit tiøømbety. Coo tiøømbety, mänit miäjay.

29 Coo miäjay, mänit hajxy chucy. Tøø jaduhñ yhabaatnä coo hajxy ya-jpädø'øgät.

30 Mänitä Jesús jiaac mänaañ:

—Nebiaduhñ njaac yajmäbáatämät coo ja'a Dios ja'a miøcmäjaa jaduhñ yajcähxø'øga'añ.

³¹⁻³² Coo ja'a Dios ja'a miøcmäjaa yajcähxø'øga'añ, jaduhñ mäwiin miäbaady nebiä mostazapajcän. Jaanč tehñ chay ja'abi' mostazapajc jaduhñ. Ni mädyii hujts piajc jaduhñ quia'a tsayyā nebiä habi' mostazapajc chayyän. Pero coo mní'ibät, jaanč tehñ piaquiä jaduhñ yeegy cøxp. Mäjatyjaty yhaa'x yeegy. Høxtä hoyyā muuxyhajxy jim pie'eñ yhaa'xjooty.

³³⁻³⁴ Haagä hädaaduhmbä cuento-yajmäbaadyhaamä Jesús ja'a cu'ug hānajty yajwiingapxø'øy, mäduhñtiä hajxy hānajty hoy wyiinjuø'øwa'añ. Pero coo ja'a cu'ug hānajty tøø wyiimbijnä, mänitā Jesús ja'a jiamiøød hawiing ca'xy quiapxtøønä, ja'a hajxy hānajty nāmajmetspä.

³⁵ Coo chuujøøyy, mänitā Jesús ja'a jiamiøød ñāmaayy:

—Tsøc hajxy jáamäm barcojooty; jam hajxy jimhaamby mejyhawiimb.

³⁶ Jiibiä Jesús hajxy hānajty yhäña'ay barcojooty møødä jiamiøødhajxy. Mänit hajxy tiu'ubøjcy. Jiibiä jäya'ayhajxy näje'e piadu'ubøjpä wiingbarcojooty. Pero ja'a majiäya'ay, jim hajxy miähmøøyy mejypia'a.

³⁷ Mänit møc tiägøøyy pojpä. Mänitā mejy tiägøøyy ja'tspä. Mänitā barco ñähja'tspejtä. Mänitā nøø com tiägøøyy barcojooty. Høxtä hujts ja'a barco jaduhñ. Quinaambä barco hānajty.

³⁸ Pero ja'a Jesús, maab hānajty je'e jiiby barcohøjxhaam. Cuhnø'øxø'øy hānajty jiiby mia'ay. Jaanč tehñ chähgøøbiä Jesús ja'a jiamiøødhajxy hānajty. Mänitā Jesús hajxy hoy yuxy. Mänitā Jesús ñāmaayyā:

—Wiindsøn, nej, caj mdajy mmayyā coo hajxy nguhdägoyyāñāmä.

³⁹ Coo ja'a Jesús mia'abiädø'cy, mänitā poj yhojy møødä mejy coo yuungø'øwät. Mänitā poj jiaanč mooñ; møødä mejy, yuungøøyy je'ebä.

⁴⁰ Mänitā Jesús ja'a jiamiøød ñāmaayy:

—Tii hajxy hijty coo mwi'i chähgø'øy. Nej, cab hajxy mmäbøquiä coo ch møcmäjaa nmøødä.

⁴¹ Jaanč tehñ chähgøøby hajxy hānajty. Mänit hajxy hamee'ch ñiñāmaayyā:

—Pønäda'a yø'ø; høxtä poj møødä mejy, cudiúunäxäbä miädia'agy yø'ø.

5

¹ Mänitā Jesús hajxy jim miejch mejyhawiimb, maa ja'a naax hānajty xiøhatiän Gerasa.

² Coo hajxy miänajcy barcojooty, jimä jäya'ay hānajty tu'ug tiäna'ay jäguemjuøøby. Møjcu'u hānajty tøø yajtägø'øyii.

³ Jutjooty hānajty chāna'ay maa ja'a ho'ogyjiäya'ay hajxy hānajty ñaaxtägø'øyän. Jaanč tehñ miøcä craa hānajty. Ni cadenahaamä jäya'ayhajxy hānajty hoy quia'a cø'øxots quia'a tecyxiodsa'añ.

⁴ Mayhooc hajxy hānajty tøø jia cø'øxoch tøø jia tecyxioch cadena-haam. Pero wyi'i yaghapodøøbiä cadena hānajty. Ni pøn hānajty quia'a mäjäda'aga'añ.

⁵ Xøømdsuhñ hānajty jim ya'axy jiocy cabäsantäjooty møød tunjooty. Naxy hānajty tsaahaam hamdsoo ñiçhugyii.

⁶ Coo ja'a Jesús jaduhñ yhijsä jäguem, mänit päyø'øguiä ñänøcxä. Mänit hoy wyiinjiicäda'agyii.

⁷⁻⁸ Mänitā Jesús ja'a møjcu'u ñāmaayy:

—Jua'ads miich jiiby maa yø'ø craajän.

Mänitā møjcu'u møc yaaxy:

—Miich Jesús, miichä Dios xyHuunghajp, ja'a jim tsajpootypä. Nej mni-jiäwø'øyii møød høøchcøxpä. Tunä mayhajt, ca'ačh xchaächtiiñ. Dios, cøxp je'e.

⁹ Mänitä Jesús ja'a mójcu'u miäyajtøøyy:

—Tii mxøhaty.

Mänitä mójcu'u yhadsoooyy:

—Legiónghøch nxøhaty. Páadyhøch jaduhñ nxøhaty coo højts jaduhñ njaanč tehñ ñämayyä.

¹⁰ Mänitä Jesús miänuu'xtaacä coo ja'a mójcu'uhajxy quia'a høxquexøøjät jäguem.

¹¹⁻¹³ Jim wiingón maa ja'a Jesúshajxy hānajtian, jim mejypia'a, jimä hädsømhajxy hānajt may yuumydiajy tunmøjc. Nāmejtsmil hajxy hānajt wiädity. Mänitä Jesús jadāhooc miānuu'xtaacä coo ja'a mójcu'uhajxy ween jim quixeyii maa ja'a mayhädsømän, weenä hädsømhajxy nøcxy yajtägø'øyii. Mänitä mójcu'uhajxy jiaanč quejxä maa ja'a hädsømän. Mänitä craa ñähwaach, ja'a hānajt tøø miøjcu'uyajtägø'øyijäbä. Mänitä hädsømhajxy cøjx yajtägø'øyii. Mänit hajxy päyø'øguiä yhädaacy mejjiooty. Cøjx hajxy jiiby ñøøji'xø'øy.

¹⁴ Ja'a hāna'c-hajxy hānajt jim hädsømgüendähajpä, cøjx hajxy piäyø'øgy. Hoyyä mädia'agy hajxy jim yajwa'xy cajptooty møød cajtpa'a neby hānajt tøø jiadyii tøø tiuñii. Coo ja'a cu'ughajxy jaduhñ miädooyy, mänit hajxy hoy yhixy.

¹⁵ Coo hajxy jim miejch maa ja'a Jesús hānajtian, mänitä craa hajxy yhiixy, ja'a hijty pa'ammøødpä, coo hānajt tøø ñähwáatsänä ja'a mójcu'u. Jim je'e hānajt witmøød yhäñaañä. Coo hijty pia'ammøødä, nähwa'ads høxwa'ads hijty wiädity. Tøø hānajt wyiinmahñmejtsnä. Jaañč tehñ yagjuøøyy ja'a cu'ughajxy jaduhñ coo ja'a craa hajxy yhiixy coo ja'a pia'am hānajt tøø ñähwáatsänä. Høxtä tsähgøøyy hajxy jaduhñ.

¹⁶ Mänit hajxy cøjx yajmøødmädia'agyii neby hānajt tøø jiadyii tøø tiuñii. Ja'a jäya'ayhajxy jaduhñ híxäbä coo ja'a hädsøm ja'a mójcu'u hajxy yajtägøøyyä, je'edshajxy jaduhñ mädiaac.

¹⁷ Mänitä cu'ug ja'a Jesús hajxy miānuu'xtaacy coo jim chóonät maa ja'a quiajpthajxiän.

¹⁸ Coo ja'a Jesús hānajt wyiimbidaannä barcojooty, mänit jaduhñ ñämaayyä coo ween piadu'ubøgyii. Ja'a craa jaduhñ mänaañ, ja'a pia'am hānajt tøø yajnájxäbä.

¹⁹ Mänitä Jesús ja'a craa ñämaayy:

—Caj, ca'ač xpianøcxy. Nøcx jim maa ja'a mdøjcän, maa ja'a mjujy maa ja'a mmägu'ugän. Nøcxä mädia'agy yajwa'x coo miichä Dios tøø xñäxuuch, coo miichä Dios ja'a mójcu'u tøø xyajñähwa'ač.

²⁰ Mänitä craa jiaanč nøcxy maa ja'a tiøjcän. Mänitä mädia'agy jim tiägøøyy yajwa'xpä maa naax hānajt xiøhatiän Decápolis. Jaduhñ je'e miädia'agytiägø'øy majc-cajpt. Jaduhñä miädia'agy hānajt yajwa'xy coo ja'a Jesús ja'a mähdiøjc mójcu'umøødpä hānajt tøø yajnähwa'ač. Coo ja'a cu'ughajxy jaduhñ miädooyy, mänit hajxy jiaanč tehñ yagjuøøyy.

²¹ Mänitä Jesúshajxy wyiimbijnä barcojooty møødä jiamøødhajxy. Coo hajxy jim miéjtscombä mejyhawiimb maa hajxy hānajt tøø chohnda'aguiän, mänit hajxy jim biarcomānajcy mejypia'a. Mänitä Jesús jäya'ay may ñāmejtsä.

²² Mänitä Jesús jäya'ay tu'ug wyiinjiicādaacä. Jairo hānajt xiøhaty. Je'e hānajt jim tuumb wiindsón maa ja'a tsajtøjcän.

²³ Mänitä Jesús miānuu'xtaacä:

—Wiindsón, møjtä'agyhøch nhuung. To'oxiäna'c je'e. Majmetscjumøjt miøødä. Jámhøch nhuung cø'ønähgájpäc, ween jaduhñ miøcpøcy —nømä Jairo miānaañ.

²⁴ Mänitä Jairo ja'a Jesús miødhajty. Jimä jäya'ay ja'a Jesús hajxy hānajty may pianø'øch piabooñ.

²⁵ Jimä tajjäya'ay hānajty tu'ug pa'ammøød majiäya'ayhagujc. Majmetscjumøjtä ñø'ty hānajty tøø xiee'xy jabom-jabom.

²⁶ Tøø ja'a mähdiøjc hānajty jejcy jia yajtsooyø'øy maa ja'a doctorhajxiän. Pero cábädsä pia'am hānajty ñä'ägä yajnájxäxä. Tøø ja'a xiädø'øn hānajty quiøjxnä tii jaduhñ ñä'ä jaac yajniñämäjuyø'øwøøjäp. Coø hānajty jaduhñ ñä'ägä yajtsooyø'øy tehñgajnä, maas hanaxiä pia'am hānajty jaduhñ jiaac tehñ miøjta'agy.

²⁷⁻²⁸ Coø ja'a mähdiøjc jaduhñ miädoyhajty coø ja'a Jesús hānajty wiädity mäba'amyajnajxpä, mänit jaduhñ wyiinmaayy quiopcooty: “Cooch yø'ø wyit häyaa nnä'ä nähdoonät, naxäbøch nba'amäda'a häyaajä.” Mänitä Jesús jioøguyohdiägøøyyä. Mänitä wyit jiaanč nähdoonäxä.

²⁹ Mänitä tajjäya'ay ñø'ty jiaanč hadujcy. Mänit ñijiäwøøyyä coø ja'a pia'am hānajty tøø ñaxy.

³⁰ Mänitä Jesús ñijiäwøøyyä coø tuljäya'ay hānajty tøø miøcpøcy ja'a miäjaahaam. Mänitä Jesús ja'a jäya'ay cøjx wyiinhee'ppety. Mänit miänaañ:

—Pøñhøch nwit tøø xñähdoonä.

³¹ Mänitä jiamioødhajxy yhadsooyy:

—Tii jaduhñ coø myajtøy pø tøø miič jäya'ay mwit xñähdoonä. Haa ca'a, majiäya'ay hajxy jaduhñ xwyi'i pianø'tsäma —nømä Jesús ñämaayyä.

³² Pero jimä Jesús hānajty yhøxta'ayñä pønä wyit hānajty tøø ñähdoonäxä.

³³ Ja'a tajjäya'ayä, jaanč tehñ chähgøøby hānajty je'e. Paady hānajty chähgø'øy coø hānajty ñajuø'øy neby hānajty tøø miøcpøcy. Mänitä Jesús hoy wyiinjiçäda'agyii tsäyúuyyap. Mänitä tajjäya'ay ñägapxy neby hānajty tøø miøcpøcy.

³⁴ Mänitä Jesús miänaañ:

—Huong, paady miič mba'am tøø ñaxy coø tøø mmäbøcy cooçh mäjaa nmøødä cooçhä jäya'ay tøy njaanč yajpa'amnaxy. Nøcxnä jootcujc.

³⁵ Jimä Jesús hānajty miädia'agynä, mänitä jäya'ayhajxy näje'e miejch. Jim hajxy hānajty tøø choñda'agy maa ja'a Jairo tiøjcän. Mänitä Jairo ñämaayyä:

—Tøø ja'a mhuung yho'nä. Ca'a Jesús mhadsijpnä. Tii jaduhñ jim ñä'ä jaac túnäp. Tøø ja'a mhuung yho'nä.

³⁶ Coø ja'a Jesús jaduhñ yhamädoonajxy, mänitä Jairo ñämaayyä:

—Ca'a mga'a mäbøcy. Ca'a mjootmayhaty —nømä Jesús miänaañ.

³⁷ Mänitä Jesús miänaañ coø pøn jim quia'a panøcxät maa ja'a Jairo tiøjcän. Jagóoyyägä Pedrohajxy jim ñøcxät møødä Santiago møødä Juan, ja'a Santiago piuhya'ay.

³⁸ Coø hajxy jim miejch maa ja'a Jairo tiøjcän, jaanč tehñ jiøøby jaanč tehñ yaaxpä jäya'ayhajxy hānajty jim.

³⁹ Mänitä Jesúshajxy tiøjtägøøyy. Mänitä Jesús miänaañ:

—Cajxä yø'ø to'oxiäna'c ñä'ä hó'oguiäbä. Tii hajxy coø mwi'i jiø'øy coø mwi'i ya'axy. Nä'ä maab yø'øduhñ.

⁴⁰ Coø ja'a Jesús jaduhñ miänaañ, mänit ñäxiicä. Mänitä Jesús ja'a jäya'ay cøjx yhøxquejxpädsømy tøghaguuy. Mänitä Jesús ja'a to'oxiäna'c hajxy ñänøcxy maa to'oxiäna'c hānajty quio'na'ayän, møødä Jesús ja'a jiamioødhajxy, møødä to'oxiäna'cä tiaj tieedyhajxy.

⁴¹ Mänitä Jesús ja'a to'oxiäna'c wyidsø'cy. Mänit ñämaayy:

—Quixyhuong, pädø'øg.

⁴² Tuunä ja'a Jesús jaduhñ ñä'ä mänaañ, mänitiä to'oxiäna'c jiaančh pädø'cy. Mänit yo'oyø'cy. Jiaančh tehñ yagjuøøyy ja'a Jairohajxy jaduhñ møødä Jesús ja'a jiamiøødhajxy.

⁴³ Mänitä Jairohajxy yhanehmä coo hajxy jaduhñ quia'a mädiä'agät coogä yhuung hānajtý tøø jiuypio'cy. Mänit hajxy ñāmāyyäbä coo yhuung hajxy yajcāyāt. Ja'a Jesús jaduhñ mānaañ.

6

¹ Coo ja'a Jesús hajxy jim chónhngumbä møødä jiamiøødhajxy, mänit hajxy jim ñøcxy maa ja'a cajpt hānajtý xiøhatiän Nazaret. Jimä Jesús hānajtý ñä'ägädä tsooñ.

² Coo ja'a poo'xxiøø yhabaaty, mänitä Jesús jim ñøcxy maa ja'a tsajtøjcän. Mänit tiägøøyy yajnähixøøbiä. Coo ja'a cu'ughajxy jaduhñ miädooyy, mänit hajxy jiaančh tehñ yagjuøøyy. Mänit hajxy tiägøøyy niñāmāyyäbä:

—Maa yø'ø craa mädiä'agy jaduhñbä tøø ñä'ä maañ yhabøcy coo jaduhñ jiaančh tehñ jiaty jiaančh tehñ ñajuø'øy, coo jaduhñ hoy-yagjuøøñäjatý yajcāhxø'øgy. Haa ca'a, højts nmägunaaxhājtam yø'øjä.

³ Je'e yø'ø, ja'a hijty tsejtspä pujxpä. Ja'a María yhuung yø'ø. Hajchhājtap yø'ø, ja'a Santiago, møødä José, møødä Judas, møødä Simón. Yaa ja'a piuhdo'oxyhajxy chāna'ay maa højts ngajptän.

Coo ja'a Jesús hānajtý jim chooñ Nazaret, paady hānajtý jim quia'a māmøjø'øy quia'a māmāyø'øy.

⁴ Coo ja'a Jesús jaduhñ miädooyy, mänit miānaañ:

—Homiaajä ja'a Dioswiingueypähajxy wyiingudsähgø'øy. Jagooyyā hajxy jim quia'a wiingudsähgø'øy maa yhamdsoo cajpthajxiän, maa yhamdsoo tøjc-hajxiän.

⁵ Coo ja'a Jesús hānajtý jim quia'a māmøjø'øy quia'a māmāyø'øy, paady hānajtý jim madiu'u hoy quia'a yajcāhxø'øga'añ. Nāmets nädägøøquiä pa'amjäya'ayhajxy jim ñä'ä maañ yajpa'amnajxä cø'ønähgapyhaam.

⁶ Jiaančh tehñ yagjuøøbiä Jesús hānajtý jaduhñ coo ja'a miädiä'agy jim quia'a jøjpøgøøyyäxä.

Mänitä Jesús ja'a mädiä'agy jim tiägøøyy yajwa'xpä mäduhñjatiä cajpthuung wiingonbä.

⁷ Mänitä Jesús ja'a jiamiøød wyiinguejxy, ja'a hajxy hānajtý nāmajmetspä, coo hajxy wiäditāt cajpt-cajpt, coo ja'a pa'amjäya'ay hajxy yajnähwá'adsāt, ja'a hajxy hānajtý møjcu'umøødpä. Nāmetscjaty hajxy hānajtý wiädita'añ.

⁸ Mänitä Jesús ja'a jiamiøød jiaac nāmaayy coo hajxy tii quia'a mänøcxāt, ni tsajcaagy, ni morral, ni xädø'øñ. Jagooyyā yomybiaxy hajxy quiábāt tu'uquiä.

⁹ Tu'tehñquiä cø'øg hajxy miänøcxāt møød tu'xojxyä wit.

¹⁰ Mänitä Jesús jiaac mänaañ:

—Coo hajxy jim mmédsāt homiädyii cajptä, jimä tøjc hajxy tu'ug myu-jwá'anāt maa hajxy hānajtý mmejtsta'aga'añän. Jimiä hajxy jaduhñ mhídāt. Cabä tøjc hajxy myajtägätsāt.

¹¹ Majaty mijtsä cu'ugä mmädiä'agy hānajtý xquia'a jøjpøgø'øwaanä, mänitä mdecy hajxy mwiinxit mwiinwóbāt, weenä naaxoc jaduhñ quiøxy ca'ay. Jaduhñä hijxtahñd miähmø'øwāt coo ja'a cu'ugä Diosmädiä'agy hajxy hānajtý tøø quia'a jøjhadsowø'øy. Mänit hajxy jim mdsóonāt.

¹² Mänitä Jesús ja'a jiamiøødhajxy tiu'ubøjnä mädiä'agy-yajwa'xpä. Jaduhñä cu'ug hajxy hānajtý yajwiingapxø'øy coo ja'a Diosmädiä'agy hajxy piadu'ubøjnāt, møød coo ja'a yhaxøøgwinihñdy hajxy ñajtshixøøñāt.

13 Mayyā jāya'ayhajxy hānajty yajnāhwa'ačhii, ja'a hajxy hānajty mōjcu'umōōdpā. Mayyā pa'amjāya'ayhajxy hānajty yajmōcpōgyii coo hon hajxy hānajty yajnāhjaaxyii.

14 Jimā Herodes hānajty guiobiernāhaty maa ja'a naax hānajty xiōhatiān Galilea. Mānitā Herodes miādoyhajty coo ja'a Jesús ja'a hoy-yagjuōōñājatypā hānajty yajcāhxō'ōgy. Mānitā Herodes miānaañ cooc tyijy ja'a Juan māyajnābejpā tōō jiuypiojtāgach. Ja'a Juan, je'e ja'a Herodes yhajodhajt cooc tyijy hānajty je'e Jiesúsā; pāadiāgā hoy-yagjuōōñājatypā yajcāhxō'ōgy ja'a wyiinmahñdycōxpā, cooc tyijy hānajty tōō jiuypiojtāgach.

15 Wiingatiā jāya'ayhajxy hānajty miānaambā. Nāje'e hajxy hānajty miāna'añ cooc tyijy Jesús hānajty je'e yhElíasā. Nāje'e hajxy hānajty miānaambā cooc tyijy ja'a Jesús hānajty wiādity nebiā jecyjiāya'ayhajxy hānajty tōō Dyiosmādia'agy-yajwa'xiān jegyhajty.

16 Pero ja'a Herodes, tehngajná je'e hānajty miāna'añ cooc tyijy je'e Jwiangā, ja'a hānajty tōō yajyo'puxyijābā. Je'eg tyijy jaduhñ tōō jiuypiojtāgach.

17-18 Hix, haxōōgā Herodes hānajty jiāya'ayhaty; ja'a yhamdsoo puhya'ay tio'oxiōjc hānajty miōōdtsānāayyāp. Felipe ja'a Herodes piuhya'ay hānajty xiōhaty. Herodías ja'a Felipe tio'oxiōjc hānajty xiōhājpā, ja'a Herodes hānajty miōōdtsānaabiā. Mānitā Juan ja'a Herodes yhojy: “Cab jaduhñ yhojyā coo ja'a mhamdsoo puhya'ay tio'oxiōjc jaduhñ mmōōdtsānāayyāt.” Coo ja'a Herodes jaduhñ yhojjā, paadiā Juan yajmajtsā. Mānitā Juan chuumā.

19 Cabā Herodías hānajty yhojwiō'ōy coo ja'a Herodes jaduhñ yhojjā, paadiā Herodías ja'a Juan hānajty jia wi'i yajyagho'oga'añii.

20 Pero cabā Herodes hānajty jaduhñ miāna'añ coo ja'a Juan yagho'ogōōjāt. Hix, wyiingudsāhgōōbiā Herodes ja'a Juan hānajty. Nājuōōbiā Herodes hānajty coo ja'a Juan hānajty jiaanč tehñ yhojhāna'cā. Jaanč tehñ yhomiādoonā ja'a Herodes ja'a Juan miādia'agy hānajty miādoowā. Pero cabā Herodes hānajty nājuō'ōy neby jiatcō'ōwāt.

21 Cabā Herodías wiinmahñdy hānajty nā'ägādā paady nebiā Juan yajyagho'ogōōjāt. Mānit yhabaaty coo ja'a Herodes xiōō hānajty jiada'añii. Mānitā Herodes ja'a jiamioōdtōjc miōōdcaayy miōōdhuucy, mōōdā mioonsāhajxy, mōōdā generalhajxy, mōōdā māyōōdōjc-hajxy, ja'a hajxy hānajty jim tsānaabiā Galilea.

22-23 Jim hajxy hānajty quiay yhu'ugy, mānitā Herodías yhuung jiiby tiōjtāgōōyy. Mānitā quixy tiāgōōyy hejtspā pujpā. Jaanč tehñ yajxón yhejch piujty. Jaanč tehñ xioōndaac ja'a Herodeshajxy jaduhñ mōōdā wioybā wyichpā. Mānitā Herodes ja'a quixy nāmaayy:

—Tehñ tiōy nnāmá'awāt, hōōch yajmāyujwāanāc tii mdsogaamby, nmó'owābōch miīch je'e, hotyijā, hōxtā nmó'owābōch miīch naax cupc maačh yaa ngobiernāhatiān.

Paadiā Herodes jaduhñ miānaañ, jaanč tehñ xioōndaacp hānajty jaduhñ coo ja'a quixy hānajty yajxón yhech.

24 Mānitā quixy piādsōōmy. Mānitā tiaj hoy miāyajtōy tiig jaduhñ yujwá'anāp. Mānitā Herodías wiinmahñdy piaaty nebiā Juan māyajnābejpā yajyagho'ogōōjāt. Mānitā yhuung nāmaayy coo ja'a Juan ja'a quiopc yujwāanāxāt.

25 Mānitiā quixy ja'a Herodes hoy nāma'ay:

—Hōōchā Juan quiopc móōyyāc texyjooty.

26 Coo ja'a Herodes jaduhñ nāmaayyā, mānit jiaanč tehñ jiootmadiāgōōyy. Mānit jaduhñ nāhadsooyy. Hix, tōō hānajty jaduhñ miāna'añ cooc hānajty hoy nā'a tiijā yega'añ. Hix, tōō ja'a wioybā wyichpā hānajty jaduhñ yajmādoy.

27 Mänitä Herodes ja'a mioonsä jiiby quiejxy pujxtøgooty coo ja'a Juan nœcxy yo'puxyii.

28 Mänit hoy jiaančh yo'puxyii. Mänitä quixy ja'a Juan quiopc hoy ya-jcø'ødägø'øyii texyjooty. Mänitä tiaj hoy miodiägach.

29 Coo ja'a Juan jiamiøødhajxy jaduhñ miädoyhajty coo ja'a Juan hñajty tøø yagho'ogyii, mänitä Juan ñi'x hajxy hoy yajpädø'cä. Mänit hajxy hoy yajnaaxtägø'øy.

30 Mänitä Jesús ñämejtstägajtsä ja'a jiamiøød, ja'a hajxy nämajmetspä. Cøjxä Jesús yhawáanäxä, nebiaty hajxy hñajty tøø miäba'amyajnaxy, møød waambaty hajxy hñajty tøø yajnähiçø'øy.

31 Jaančh tehñ miayyä Jesús jäya'ay hajxy hñajty ñämečhii. Wiimbijp hadøjpä majiäya'ayhajxy hñajty. Coo ja'a jäya'ayhajxy may wyi'i miech, paadiä Jesúshajxy hñajty quia'a näbaadøyyäxä mäduhñajtä hajxy quia y hñajty. Mänitä Jesús miänaañ:

—Jam hajxy paquiä pøø'xäm wiingtuum maa majiäya'ay hajxy xquia'a paadäänäm.

32 Mänitä Jesúshajxy tiägøøyy barcojooty. Tsohñ hajxy jimän. Mänit hajxy jim nœcxy maa ja'a majiäya'ayhajxy hñajty quia'a jadyhitiän.

33 Coo ja'a Jesúshajxy jaduhñ yhiçtu'ubøjcä, mänitä majiäya'ayhajxy wyi'i piadu'ubøjpä. Ñajuøøby hajxy hñajty jaduhñ maa ja'a Jesúshajxy hñajty nœcxa'añ. Päyø'øguiä hajxy jaduhñ ñä'ägä nœcxy. Jawyiin hajxy jim ñä'ägä mejch maa ja'a Jesúshajxy hñajty nœcxiän. Wiinduhmyguiajpt hajxy hñajty choon.

34 Coo ja'a Jesús jiiby piädsøømy barcojooty, mänitä jäya'ay yaghixøøyy may. Mänit näxuu'tscapxy miøødhajty. Jaduhñ yhiçxy nej coo meeg wyiindsøn ca'a hijpän, coo ja'a Diosmädia'agy hajxy hñajty quia'a yajnähiçø'øyii. Mänitä Jesús madiu'u tiägøøyy yajnähiçøøbiä.

35 Tøø hñajty chuujøønä. Mänitä Jesús ja'a jiamiøød ñämejtsä. Mänitä Jesús ñämaayyä:

—Jue'e jaduhñ yaa, pactuum. Cabä cajpt yaa maa ja'a cu'ug quiaayyøøc hajxy häyaa jiüyät. Tøø jaduhñ hoyhoy jiaančh tehñ chuujø'øy.

36 Nämä'aw yø'ø cu'ug, ween hajxy nœcxy quia y hñajty. Mänitä Jesús ja'a jiamiøød ñämaayyä.

37 Mänitä Jesús yhadsooyy:

—Tsøg hajxy nä'ägä yajcáayyäm højtshájtäm.

Mänit hajxy yhadsóogumbä:

—Haa tií hajxy jaduhñ nhuuc nä'ä yajcáayyämbäp. Cajx nä'ä caayyøøcpä nä'ä huucøøcpä. Nej, jaduhñ miich mmäna'añä coo højts tsajcaagy nœcxy nju y mejtsmägo'x denario —nømä Jesús jiamiøød ñämáayyägumbä.

38 Mänitä Jesús miänáangumbä:

—Huuc mäyajtøw yø'ø cu'ug pøn caayyøøc møød. Pønjat y jaduhñ møød, ween hajxy yajmucy.

Coo hajxy hñajty tøø yajmujnä, mänitä Jesús ñämaayyä:

—Jagooyyä højts tsajcaagy mägooyyä tøø nbaady møødä hacx metsyä.

39-40 Mänitä Jesús miänaañ coo ja'a cu'ughajxy yhøxtá'agät necchooty tu'hagøøbiäjat y, nämägo'xhaam møød näjuxychägui'xmajc-haam. Mänit hajxy jaduhñ jiaančh yhøxtaacy.

41 Mänitä Jesús ja'a tsajcaagy mägooxpä quioondsooyy møødä hacx metspä. Coo chajhee'py, mänitä Dioscuju'uyäp yeycy ja'a tsajcaagy quiooxpä møødä hacx quiooxpä. Mänitä tsajcaagy tiägøøyy haguidøøbiä. Mänitä jiamiøød tiägøøyy moobiä ja'a tsajcaagy møødä hacx, ween hajxy jaduhñ yajwa'xy

maa ja'a cu'ugän. Tehngajnä Jesús ja'a tsajcaagy hänajty yajwa'añguiojy mөөдä hacx. Jiaac tehм yajmayөөby hänajty jaduһн.

⁴² Cu'uxiä jäya'ayhajxy jaduһн jiaančh tehм quiaaayy.

⁴³⁻⁴⁴ Hoyyä jäya'ayhajxy hänajty jaduһн jia mayyä, majmetscachä tsajcaagy quiunajxy mөөдä hacx. Ja'a Jesús jaduһн yajwa'añguioj. Nämägooxmil ja'a ya'adiöjc-hajxy jaduһн quiaaayy yhuucy.

⁴⁵ Mänitiä Jesús ja'a jiamiөөд nāmaayy coo hajxy tiägó'owät jiiby barcojooty, wéenäc hajxy jim ñöcxó'ögät mejyhawiimb maa ja'a cajpt jaduһн xiöhatiän Betsaida. Coogä Jesús ja'a majiäya'ay jaduһн nāhguéecnät, mänitäc hajxy jim ñibiaadööjät.

⁴⁶ Coo ja'a Jesús ja'a majiäya'ay nāhgueecy, mänit jim ñöcxy tungøxp Diospa'yaaxpä.

⁴⁷⁻⁴⁸ Coo quioodsөөyy, jimä Jesús hänajty tөө miähmө'өy mejypia'a nidiuһм. Ja'a barco, jagooyyä hänajty mejyquiujc tөө ñä'ä mahñ miech. Jaančh tehм miöcä barco hänajty jöjcubojö'yii. Tөө ja'a Jesús jiamiөөdhajxy hänajty jiaančh tehм yhanuu'xөөñä coo ja'a barco hajxy hänajty jia wi'i quiaaby. Coo ja'a Jesús jaduһн yhijxy coo hajxy hänajty tөө yhanuu'xөөñä, mänit yo'oyhaam tiu'uböjcy nөөwiing. Mobädajpä hänajty jiobö'owaannä, tөө ja'a Jesús ja'a jiamiөөд hänajty ñajtspaadөөñä. Wyiinnaxáaunnäbä Jesús ja'a jiamiөөд hänajty jaduһн.

⁴⁹ Coo ja'a Jesús yhiixä coo hänajty yo'oy nөөwiing, mänitä jiamiөөdhajxy miānaañ cooc tyijy hänajty je'e yháañamä. Mänit hajxy möc chaächyaaxy.

⁵⁰ Nägöxiä hajxy hänajty chähgө'өy coo ja'a Jesús hajxy jaduһн yhijxy coo hänajty yo'oy nөөwiing. Cab hajxy choj hөxcajpy. Mänitä Jesús miānaañ:

—Mөcä mjoot hajxy päda'ag; hөөчh hädaa; ca'ačh hajxy xchähgө'өy.

⁵¹ Coo ja'a Jesús tiägөөyy barcojooty, mänitä poj miooñ. Jiaančh tehм yagjuөөyy ja'a Jesús jiamiөөdhajxy jaduһн coo poj miooñ.

⁵² Hoy hajxy hänajty tөө jia hixy coo ja'a Jesús ja'a tsajcaagy yajwa'añguiojy mөөдä hacx, cab hajxy hänajty ñajuө'өy coo ja'a Jesús möcmäjaa miөөдä ja'a Dioscөxpä. Jaančh tehм quiuhxex hajxy hänajty.

⁵³ Coo ja'a Jesús hajxy jim miejch mejyhawiimb maa ja'a naax hänajty xiöhatiän Genesaret, mänitä barco hajxy jim quiuxojch mejypia'a.

⁵⁴ Tuunä hajxy jaduһн ñä'ä barcopädsөөmy, mänitiä Jesús yhөxcajpä ja'a cu'ug.

⁵⁵⁻⁵⁶ Paquiä mädia'agy jim wia'xy coo ja'a Jesús hänajty jim tөө miech. Mänit tiägөөyy wädijpä cajpt-cajpt. Mänitä pa'amjäya'ayhajxy tiägөөyy cөөmiéjtsäbä tsaajiooty maa ja'a Jesús hänajty wiäditiän. Jimä pa'amjäya'ayhajxy hänajty tөө ñajtsөyө'өyii möjtu'uba'a maa ja'a Jesús hänajty ñaxө'өwa'añän. Mänitä Jesús hajxy miānuu'xtaacy coo ja'a pa'amjäya'ayhajxy yajpa'amnaxööjät. Pönjatiä Jesús wyitpa'a hänajty nä'ä nāhdóonäxäp, tehм ñajxpä pia'amhajxy hänajty mänitiä.

7

¹ Mänitä fariseos ja'a Jesús hajxy ñāmejch, mөөдä häna'c ja'a Diosmädia'agy hajxy yajnähixөөbiä. Jim hajxy hänajty chooñ Jerusalén.

² Mänitä fariseoshajxy yhijxy coo ja'a Jesús jiamiөөд ja'a cuhdujt hajxy hänajty näje'e quia'a yajtuñ, coo hajxy quia'a cө'өbuju coo hajxy hänajty tiägө'өwa'añ caabiä huucpä. Ja'a fariseoshajxy, jaančh tehм yhooyyä judíocuhdujt hajxy hänajty quiudiuñ.

³ Hix, jaduhnä judíoshajxy hānajty nāgøxiä quiuhdujthatyñä nebiä yhapä tieedyhajxy hānajty jegyhajty tøø yajnāhixø'øyii. Naaghooc hajxy hānajty quiaya'añ, tsipcøxpä quiø'ø hajxy hānajty hoyhoy ñä'ägä pujoy wa'ads.

⁴ Møød coo hajxy hānajty tøø yhooy halaplaaztøjpa'c, cab hajxy hānajty quiaya'añ jaguiø'øbujoy. Madiu'u cuhdujt hajxy hānajty miøødä coo hajxy cøxiä wiinä ñāhbujoy ñāhje'ečh, møødä cayøhñdy hu'ugøhñdy, møødä tu'ts, møødä pujxtu'ts.

⁵ Mānitä fariseos ja'a Jesús hajxy miäyajtøøyy:

—Tii yø'ø mjamiøødhajxy jaguiø'øbujoy coo quiay. Cabä jecyquiuhdujt hajxy yajtuñ neby jäya'ayhajxy hijty jegyhajty quiuhdujthatiän.

⁶ Mānitä Jesús yhadsooyy:

—Jue'e mijts, mjaančh tehñ miāhane'emaamb mijts, pero cab hajxy mnä'ä cudiuñ waambaty hajxy hamdsoo mja hane'emy. Mijtsøxpä ja'a Isaías jecy quiujahy, mānitä Dios miānaañ:

Hādaa jäya'ayhajxy, ja mānaamb hajxy jaduhñ cóogøch tyijy hajxy xwyiin-gudsāhgø'øy,

pero cábøch hajxy hamuumdu'joot xñä'ä tsocy.

⁷ Xiøøbøch hajxy xjia wi'i pia'häyoy.

Jaduhñ hajxy jia māna'añ cóogøch tyijy nmādia'agy hajxy xjia yajnāhixøøyyä, pero yhamdsoo mādia'agy hajxy ñä'ä wi'i miādiaacy, nømä Isaías jecy quiujahy.

⁸ Mijts, tøø ja'a Diosmādia'agy hajxy mnajtshixøøñä. Ja'a mhamdsoo cuhdujt hajxy jaduhñ myaghijnäp —nømä Jesús ja'a fariseos ñāmaayy.

⁹⁻¹⁰ Mānitä Jesús ñāmāguiumbä:

—Paadiä Diosmādia'agy hajxy tøø mnajtshixø'øy, jaduhñä mhamdsoo cuhdujt hajxy hoy myaghida'añ. Jaduhñä Moisés jecy miānaañ coo ja'a mdaj coo ja'a mdeedy hajxy mwiingudsāhgø'øwät. Pero pønägä tiaj ja'a tieedy haxøøg nānøømb, yajcuyagho'ogø'øwāanābäc jaduhñ.

¹¹⁻¹² Pero wiing mijts mja māna'añ cooc tyijy jaduhñ yhawiinmatsä cooc pønä tiajjä tieedy haxøøg ñāmā'awät: “Cábøch mijts nbuhbedaanä. Hix, tøøchä Dios nnāma'ay cooçh je'e cøxiä nmo'owa'añ ja'ačh mijts hijty nmo'owaambiä.”

¹³ Coo hajxy jaduhñ mmāna'añ, myajcāhxø'py hajxy jaduhñ coo ja'a Diosmādia'agy hajxy mga'a yajtuunnä, møød coo ja'a mhamdsoo cuhdujt hajxy myajnāhixøøñä. Madiu'u hajxy jaduhñ myajcāhxø'øgy coo ja'a Diosmādia'agy hajxy tøø mnajtshixøøñä, møød coo ja'a mhamdsoo cuhdujt hajxy yajtuunnä —nømä fariseoshajxy ñāmaayy.

¹⁴ Mānitä Jesús ja'a cu'ug yajwiingapxøøguiumbä:

—Høøch nmādia'agy hajxy hamädoowhjtäc.

¹⁵ Tijaty hajxy mgaaby mhuucypy, cab hajxy xyajcädieey. Pero ja'a haxøøgwiiinmahñdy, je'eds hajxy mēbøcy xyajcädiéeyäp.

¹⁶ Pøn jaduhñ wiinjuøøby, wēenhøch nmādia'agy xmiäbøjcä.

¹⁷ Coo ja'a Jesús ja'a quiapxy miādia'agy jaduhñ yajmaayy, mānitä cu'ughajxy quiøxy wiimbijnä. Mānitä Jesúshajxy tiøjtägøøñä møødä jiamiøødtøjc, ja'a hajxy hānajty ja'a nāmajmetspä. Mānitä Jesús miäyajtøøwä neby hānajty jaduhñ miādia'agytiägø'øy ja'a hānajty jaduhñ jim tøø miādiā'aguiäbä majiäya'ayhagujc. Ja'a Jesús jiamiøødhajxy jaduhñ yajtøøw yajtøø'x.

¹⁸ Mānitä Jesús yhadsooyy:

—Nej, ni mijtshajxy jaduhñ tøø mga'a wiinjuø'øyä waambátyhöch tøø nja mädia'aguiä. Jaduhñds je'e, tijaty hajxy mgaaby mhuucypy, cab hajxy xyajcädieey.

¹⁹ Hix, ja'a jøø'xy ja'a pøcy, jiiby jaduhñ yhäda'agø'øy maa ja'a mjøø'xytiøjc-hajxiän. Jadähooc nøcxy piädsømy. Cab jaduhñ jiiby tiehm tiägø'øy maa ja'a mjuøhñdyhajxiän —nømä Jesús miänaañ.

Jaduhñ hädaaduhñ miädia'agytiägø'øy coo ni mädyii jøø'xy pøcy quia'a hamajtsä.

²⁰ Mänitä Jesús miänaangumbä:

—Pero ja'a haxøøgwiinmahñdy, je'eds hajxy mabøjnbä xyajcädieeyäp.

²¹⁻²² Coo ja'a jäya'ay haxøøgwiinmahñdy hajxy jiaanč tehñ miøødä, paady hajxy haxøøgjaty jiaanč tehñ jiatcø'øy; paady hajxy miämeeč, paady hajxy ñiyagho'ogyii, paadiä jäya'adio'oxiøjc hajxy miøødtsäna'ay, paadiä jäya'ajie'e hajxy yhadsocy, paady hajxy miäwiinhøñ, paady hajxy ñiñähojyii, paady hajxy jiaanč tehñ yajcumaya'añ, paady hajxy quia'a nä'ägädä wiinmahñmech. Coo hajxy naxy miu'ugyii, paadiä hadsojwiinmahñdy hajxy miøødä.

²³ Jaduhñds je'e, jaanč tehñ miadiu'u ja'a haxøøgwiinmahñdy jii. Je'eds hajxy jaduhñ mabøcy xyajcädiehby.

Mänitä Jesús miädiaacpädøøñä.

²⁴ Coo ja'a Jesús jim chohñ, mänit jim ñøcxy maa ja'a naax jaduhñ xiøhatiän Tiro møød Sidón. Mänitä tøjc tu'ug piaaty maa hānajty miejtsta'aga'añ. Hamee'ch jim jia hidaañ. Pero miädoow ja'a cu'ughajxy jaduhñ coo ja'a Jesús hānajty jim tøø miech.

²⁵⁻²⁶ Jimä tājāya'ay hānajty tu'ug chāna'ay. Hagriego hānajty miädia'agy. Ca'a hānajty je'e jiudíosä. Jimä yhuung hānajty tu'ug, to'oxiāna'c. Tøø ja'a to'oxiāna'c hānajty pia'ambety. Møjcu'u hānajty tøø yajtägø'øy. Coo ja'a quixiä tiaj jaduhñ miädoyhajty coo ja'a Jesús hānajty jim tøø miech, mänitä Jesús hoy wyiinjiäcäda'agyii. Mänitä Jesús miānuu'xtaacä coo ja'a to'oxiāna'c nøcxy yajpa'amnājxäxä.

²⁷ Mänitä Jesús miänaañ:

—Cab jaduhñ yhahixø'øy coočhä huc-huung tsajcaagy nmó'owät, ja'a pigāna'c-hajxy hijty quiayaambiä.

Coo ja'a Jesús jaduhñ miänaañ, ja'a judíosahajxy jaduhñ yajmäbaatä nebiä pigāna'cän. Ja'a ca'a judíosahajxy jaduhñ yajmäbaatä nebiä hucän.

²⁸ Mänitä tājāya'ay yhadsooyy:

—Wiindsøn, tøyhajt jaduhñ. Pero jiibiä huc-huunghajxy pia'piy pia'coñ meexäpa'c tijaty ja'a pigāna'c-hajxy yajwiinga'awøøby.

²⁹ Mänitä Jesús miänaañ:

—Coo jaduhñ tøø mmāna'añ, cāhxø'p jaduhñ cooč nmädia'agy xmiäbøjcä. Tøø ja'a mhuungä møjcu'u ñāhwáatsänä. Nøcxnä jootcuyc maa ja'a mdøjcän.

³⁰ Mänitä tājāya'ay wyiimbijty. Coo jim miejch maa ja'a tiøjcän, tøø ja'a yhuungä møjcu'u hānajty jiaanč nāhwáatsänä. Jimä yhuung hānajty quio'na'ay maabejtcøxp hoy weenän.

³¹ Mänitä Jesús jim wyiimbijtägajch maa ja'a naax xiøhatiän Tiro. Mänit jim ñaxøøyy maa ja'a cajpt hānajty xiøhatiän Sidón. Mänit jim ñøcxøøyy maa ja'a naax hānajty xiøhatiän Decápolis. Mänit jim miedsøøyy maa ja'a mejy hānajty xiøhatiän Galilea.

³² Mänitä mähdiøjc tu'ug yajmejtsä maa ja'a Jesús ja'a wyiinduumän. Cabä mähdiøjcä mädia'agy hānajty hoy yhabädsømy, møød hānajty quiuhnatä. Mänitä Jesús miānuu'xtaacä coo ja'a quio'ø yajnāhgäbät maa ja'a mähdiøjc cuhnatpän. Ja'a mähdiøjcä jiamøødhajxy jaduhñ mänaän.

³³ Mänitä Jesús ja'a mähdiøjc jäguemjuøøby miødhajty nidiuhm. Mänitä Jesús ja'a mähdiøjcä tiaatsc piadsihwä. Mänitä Jesús ja'a quiø'øwahxc chujyñähbo'ty. Mänitä mähdiøjc tiaatsc chujyhabo'odøøyyäxä.

³⁴ Mänitä Jesús chajhee'py. Mänit miänaaŋ: "Efata." Jaduhn hädaa miädia'agytiägø'øy: "Hawa'ads."

³⁵ Tuunä ja'a Jesús jaduhn ñä'ä mänaaŋ, mänitiä mähdiøjc quiapxø'cy miädoowø'cy. Jaanč tehñ yhoy jaduhn miädiaacnä.

³⁶ Mänitä Jesús miänaaŋ coo hajxy quia'a mädiä'agät coo ja'a mähdiøjc jaduhn tøø yhooyø'øy. Pero cab hajxy jaduhn jioodhajty. Mänitiä hajxy jaduhn hoy yhamädiaagø'øy. Hoyyä Jesús mayhooc jia hanehmy coo hajxy quia'a hamädiaagø'øwät, maas hanaxiä ja'a mähdiøjc hajxy yhamädiaagøøyy. Cabä Jesús miädia'agy jaduhn ñä'ä yajtúunäxä.

³⁷ Jiaanč tehñ yagjuøøbiä cu'ughajxy hānajty jaduhn. Mänit hajxy tiägøøyy mänaambä: "Jaanč tehñ miøjmayhajt jaduhn tiuumby coo ja'a cuhnatpä yajmädoowø'øgy, møød coo ja'a huumbä yajcapxø'øgy."

8

¹ Cujaboom cumaaxc, mänitä jäya'ayhajxy nämay yhamugøøguiumbä maa ja'a Jesús hānajtiän. Ja yähó'cäp hajxy hānajty, cabä caayyøøc hajxy hānajty ñä'ägädä møødä. Mänitä Jesús ja'a jiamiøødtøjc yaaxmujcy, ja'a hajxy hānajty nämajmetspä. Mänitä Jesús miänaaŋ:

² —Nnäxúu'chpøch hädaa jäya'ayhajxy. Tägøøgxøøjoch hajxy tøø xpi-awädiñä. Tøø ja'a quiaay tøø ja'a yhu'ugyhajxy quiøjxnä. Tii hajxy jaduhn ñä'ä jaac cáyap.

³ Cooč hajxy jaguiay nguejxwiimbídät, wehñdä hajxy jim tiu'uyuugädäwät. Hiç, näje'e hajxy jäguem tøø chohnäda'agy.

⁴ Mänitä Jesús yhadsoowä ja'a jiamiøødtøjc:

—Tii hädaa jäya'ay hajxy häyaa nnä'ä yajcáayyāmb. Cabä cajpt yaa. Maa tsajcaagy hajxy häyaa nnä'ä páatāmät —nømä Jesús jiamiøødhajxy miänaaŋ.

⁵ Mänitä Jesús ja'a jiamiøødtøjc miäyajtøøyy:

—Naag tsajcaagy hajxy jii mmøødä.

—Juxtujc —nøm hajxy yhadsooyy.

⁶ Mänitä Jesús miänaaŋ coo ja'a majiäya'ayhajxy yhøxtä'agät naaxwiin. Mänitä Jesús ja'a tsajcaagy quioondsooyy. Mänitä Dioscuju'uyäp yejcy. Mänitä tsajcaagy tiägøøyy haguiddøøbiä. Mänitä jiamiøødtøjc miooyy. Mänitä majiäya'ayhajxy miooyy. Coo ja'a Jesús ja'a tsajcaagy hānajty yhaguiddø'øy, yajwa'añguiojpy hānajty tehñgajñä.

⁷ Jimä hacxhuung hajxy hānajty miøødäbä mejtstägøøg. Mänitä Jesús quiunuu'xy. Mänit miänaaŋ coo ja'a majiäya'ayhajxy mio'owøøjät. Jaduhn je'e may yajwa'añguiojpä.

⁸ Mänitä jäya'ayhajxy tiägøøyy caabiä. Høxtä cuuxä hajxy hoyhoy. Høxtä jiaac piwø'c hajxy juxtujcach, ja'a hānajty tøø quiunäxiäbä.

⁹ Nämädaaxmil jäya'ayhajxy jaduhn quiaayy yhuucy. Mänitä Jesús miänaaŋ coo hajxy wyiimbijnät.

¹⁰ Mänitä Jesús hajxy jadähooc biarcopéjcumbä møødä jiamiøødtøjc. Mänit hajxy jim ñøcxy maa ja'a cajpt hānajty xiøhatiän Dalmanuta.

¹¹ Mänitä Jesús ja'a fariseos näje'e ñāmejtsä. Mänitä fariseos ja'a Jesús ja'a Diosmädia'agy hajxy miøødyajtsibøøyy. Mänitä Jesús jia nämāayyā:

—Huuc yajcähxø'øgä hijxtahñd hoy-yagjuøøñäbä ja'a tsajpootypä. Jaduhn højtsä tøyhajt nmøødhädät coo miichä Diosmäjaa mjaanč møødä —nømä fariseoshajxy miänaaŋ.

12 Mänitä Jesús jiootmaxiey. Jootmadiägøøyy jaduhñ. Mänit miänaañ:
—Tii ja'a Diosmäjaa hajxy coo mwi'i yhixa'añ. Tøyhajt mijts nnämä'awät
coo hajxy mga'a hixa'añ —nømä fariseoshajxy ñämaayyã.

13 Mänitä Jesús hajxy wyiimbijnä møødä jiamiøødtøjc. Mänit hajxy tiägøøyy
barcojooty. Mänit hajxy tiu'ubøjcy. Mejyhawiimb hajxy hñajty ñøcxa'añ.

14-15 Mänitä Jesús ja'a jiamiøødtøjc ñämaayy:

—Mnigwieendähadøøjöp hajxy. Ca'a ja'a Herodes chajcaagychooy hajxy
mmäwädijtã, ni ja'a fariseos jie'ehajxy.

Mänitä Jesús jiamiøødhajxy yhiyxy coo ja'a tsajcaagy hajxy hñajty tøø quia'a
jaac juy. Jagooyyã tsajcaagy hajxy hñajty tu'uquiã miøødä barcojooty.

16 Mänit hajxy tiägøøyy niñämäayyãbã:

—Paady hajxy jaduhñ xñämäayyãm, coo tsajcaagy hajxy tøø
njahdiägøoyyãm.

17 Coo ja'a Jesús jaduhñ yhamädoonajxy waambatiã jiamiøødhajxy hñajty
ñiñäma'ayii, mänit hajxy ñämaayyã:

—Nej, jaduhñ hajxy mwiinjuø'øyyä coöchã tsajcaagy tøø nmädia'aguiã, ja'a
hajxy tøø njahdiägøoyyãbã. Cab hajxy tøø mnä'ägädã wiinjuø'øyy tijátyhøch tøø
nmädia'agy. Mjaanç tehñ quiuhxex mijts jaduhñ.

18 Xiidsã mwiin hajxy mja møødä, cab hajxy tii mhijxmähmø'øyy. Xiidsã
mmädohnd hajxy mja møødä, cab hajxy tii mmädoomähmø'øyy.

19 Mänäajøchã nämägooxmilpä jäya'ay nyajcayyän ja'a mägooxtsajcaagy,
naac cachã caadiuc hajxy mbiwø'cy.

Mänit hajxy yhadsooyy:

—Majmetsc.

20 Mänitä Jesús miänäängumbã:

—Jaanã mänäajøchã nämädaaxmilpä jäya'ay nyajcayyän ja'a juxtujtsaj-
caagy, naag cach hajxy mbiwø'pä.

Mänit hajxy yhadsóogumbã:

—Juxtujc.

21 Mänit hajxy ñämäayyägumbã:

—Caj mijts tøø mnä'ägã wiinjuø'øyy tijátyhøch tøø nmädia'agy —nømä Jesús
miänaañ.

22 Mänitä Jesús hajxy jim miejtstägajch maa ja'a cajpt hñajty xiøhatiän Bet-
saida. Mänitä wiinds tu'ug wyitsmejtsã maa ja'a Jesúsän. Mänitä Jesús
miänuu'xtaaca coo ja'a wiinds ween ñähdoñii, ween jaduhñ yhiyxø'øgy.

23 Mänitä Jesús ja'a wiinds wyijstsooyy. Mänitä wiinds cajtpa'a quipxy
miødhajtã. Mänitä wiinds wyiingutsujøøyyã. Mänit wyiingumo'xøøyyã. Mänit
miäyajtøøwã pø tøø hñajty yhiyxø'øgy.

24 Mänit tiägøøyy hijxø'pä weenjaty. Mänit miänaañ:

—Tøøch weenjaty nhijxø'øgy. Cábøchã jäya'ay hoy nhøxcaba'añ. Nna-
juøøbiøch jaduhñ coo jiäya'ayã, pero jadúhñhøch nhixy nebiã quepychaajän.

25 Mänitä Jesús ja'a wiinds jadähooc wyiingumo'xøøguiumbã. Mänitä wiinds
hoy tiägøøñã hijxpã. Hotyijã hñajty jäguenjaty yhiyxnä.

26 Mänitä Jesús miänaañ:

—Tu'uda'aquiã mnøcxät maa ja'a mdøjcän. Ca'a cajptooty mguyo'oy
mgubøgø'øyy —nømä craa ñämaayyã, ja'a hñajty tøø yhiyxø'øguiãbã.

27 Mänitä Jesús hajxy jim tiu'ubøjcy møødä jiamiøødtøjc. Jim hajxy hñajty
ñøcxa'añ maa ja'a naax hñajty xiøhatiän Cesarea de Filipo. Cajpt-cajpt hajxy
hñajty wiädita'añ. Tu'haamnøcxpã, jimä Jesús ja'a jiamiøødtøjc miäyajtøøyy:

—Høøch, pønñhøchã cu'ugäda'a xtyijp.

28 Mänitä Jesús yhadsoowã:

—Näje'e hajxy miäna'añ cooc tyijy miich mJuan mäyajnäbejpä. Näje'e hajxy miänaambä cooc tyijy miich mhElíasä. Näje'e hajxy jiaac mänaambä cooc tyijy miich mDiosquexiä, cooc tyijy miichä Diosmädia'agy jecy myajwa'xy.

²⁹ Mänitä Jesús yajtøøgumbä:

—Mijtsäts, pøn̄høch mijtshajxy jaduhñ xtyijp.

Mänitä Pedro yhadsooy:

—Jue'e miich, Cristo. Dios miich tøø xwyiinguexy.

³⁰ Mänitä Jesús ja'a jiamiøødtøjc ñämaayy coo ja'a Jesús hajxy quia'a mädiä'agät pøn̄ hñajty je'e.

³¹ Mänitä Jesús ja'a jiamiøødtøjc tiägøøyy yajwiingapxøøbiä:

—Høøch, Diosquexyhøch høøch. Madiú'ujøchä tsaačpä nøcxy nhab-aada'añ. Xmiähañhadáambøchä jäya'ayhajxy, ja'a hajxy jiiby wiindsøn̄hajpä maa ja'a tsajtøjcän, møødä teedywiindsøn̄hajxy, møødä häna'c-hajxy jiiby Diosmädia'agy-yajnahixøøbiä maa ja'a tsajtøjcän. Mänithøch hajxy jaduhñ xjia yajyagho'oga'añii. Pero cooch hajxy hñajty tøø xyajyagho'ogyii, cudägøøgxøøyyä, mänithøch njujypiojtägatsa'añ.

³² Howyiinjuøñä ja'a Jesús jaduhñ miädiaacy. Mänitä Pedro ja'a Jesús hawiingtuum wioonøcxy. Mänitä Pedro miänaañ:

—Wiindsøn̄, ca'ads jaduhñ mwi'i miäna'añ. Caj miich nej mjada'añ mhabeta'añ —nømä Jesús ñämaayyä.

³³ Mänitä Jesús wia'wiimbijty. Mänitä jiamiøødtøjc wyiinhee'ppejty. Mänitä Pedro yhojjä:

—Møjcu'u, jua'ads yaa maačh nwiinduumän. Jaduhñ miich mwiin-mahñdyhaty nebiä jäya'ayhajxy wyiinmahñdyhjäpän. Caj miich jaduhñ mwiinmahñdyhaty nebiä Dios wyiinmahñdyhatiän —nømä Jesús miänaañ.

³⁴ Mänitä Jesús ja'a cu'ug miøjyaaxy møødä jiamiøødtøjc. Mänitä Jesús miänaañ:

—Pøn̄ jioot tsojp cooch xjamiøødhädät, weenä yhamdsoo cuhdujt hajxy ñajtshixø'oy, weenä jioot hajxy piäda'agy coo hajxy chaachpøjpat nébiøch ndsaachpøga'añän. Wéenhøchä nmädia'agy hajxy tehngajnä xmiäbøjcä.

³⁵ Pøn̄ä jioot ja pädaacp coo hajxy hoy jiugyhädät, cab hajxy cøjxta'axiøø jiu-gyhada'añ nebiä Dios jiugyhatiän. Pero pøn̄ä jioot pädaacp coo hajxy yhó'ogät ja'a høøhcøxpä møødä Diosmädia'agyquiøxpä, je'edshajxy homiänaajä jugy-hadaamb nebiä Dios jiugyhatiän.

³⁶ Coo hajxy hodium mga'a mähmø'owät coo hajxy hñajty tøø mho'ogy, cab hajxy jaduhñ mniyaghoyø'owøøjät, hoy hajxy hñajty yaa tøø mja mäyøøhaty hädaa yaabä naaxwiin.

³⁷ Ni tii yaa quia'a nä'ägädä tsoobaady hädaa yaabä naaxwiin nebiä mju-gyhajthajxy choobaada'añän, coo hajxy homiänaajä mjugyhädät nebiä Dios jiugyhatiän.

³⁸ Pøn̄høch xmiädsähdiuumb møødhøchä nmädia'agyquiøxpä maa hädaa jäya'ay wyiinduumhajxiän, hädaa pojmoødpä cädieemiøødpähajxy, hädaahajxy ca'a Diosmädia'agymiäbøjpä, cooch yaa ngädaactägätsät hädaa yaabä naaxwiin, mänitøch hajxy jadähooc nmädsähdiuundägatsa'añ, pøn̄játyhøch hñajty yaa tøø xmiädsähdiuñ. Diosquexyhøch høøch. Diosmøcmäjaamøødhøch hñajty yaa ngäda'aga'añ, näguipxy møødä Diosmoonsähajxy, ja'a hajxy jim̄ hijpä Dioswiinduum —nømä Jesús miänaañ.

9

¹ Mänitä Jesús miänáaṅgumbä:

—Chaads mijts tøyhajt ndehm ñámá'awät, mijts xii tänaabiä, näje'e hajxy hänajty mga'a ho'ogyñä coo hänajty quiähxø'øga'añ coo ja'a Dios hänajty yhane'ema'añ ja'a miøcmäjaahaam.

² Cudädujxøø, mänitä Jesús ja'a Pedro wioonøcxy maa ja'a tun jaančh tehñ quiøxpän, näguipxy møødä Santiago møødä Juan. Nämädaaxyä hajxy hänajty jim. Mänitä Jesús wyiin jiojy wiing jiajty maa ja'a Pedro wyiinduumhajxiän.

³ Høxtä haamb høxtä tsämaambä Jesús hänajty møødä wyit møødä tiucxy. Jaančh tehñ pioobä wyit hänajty nägø'ø nädecypiä.

⁴ Mänitä Elíashajxy jim ñäguehxtøø'xy møødä Moisés. Jimä Jesús hajxy hänajty wyi'i miøødmädia'agy. Nägoojä Pedrohajxy hänajty ñä'a hijxcäda'agy ñä'a hee'pcäda'agy.

⁵⁻⁶ Jaančh tehñ chähgøøbiä Pedrohajxy hänajty. Cab hajxy hänajty ñajuø'øy waamb hajxy jaduhñ ñä'a mäná'anät. Mänitä Pedro nä'a nägoobä miänaañ:

—Wiindsøn, hoyøøyy jaduhñ coo hajxy yaa tøø nbéjtäm. Nhuuc hädiuñ højts tøjquemyhuung tägøøg maa miltshajxy häyaa cødu'ug myaghäna'awø'øwät, møød miich, møødä Moisés, møødä Elías —nømä Jesús ñämaayyä.

⁷ Tuunä ja'a Pedro jaduhñ ñä'a mänaañ, mänit hajxy ñäma'anähbejty. Mänitä Dios jiiby quiapxy näma'ajooty: “Høøch nHuung hädaa. Njaančh tehñ chójpiøch hädaa. Mäbøjcä miädia'agy hajxy.”

⁸ Coo ja'a näma'a chajpejty, tøø ja'a Moisés hajxy hänajty yhadägoyyø'øy møødä Elías. Coo ja'a Pedrohajxy jia hijxwädipty, cabä Moisés hajxy yhiixnä ni ja'a Elías; jagooyyä ja'a Jesús hajxy jiaag hijxy nidiuhñ.

⁹ Jimä Jesús hajxy hänajty wyiimänacy tunnähgøxp møødä jiamioød nädägøøgpä, mänitä Jesús miänaañ:

—Ca'a hajxy pøn mnä'ägädä hawaanä tijaty hajxy yaa tøø mhixy tøø mmädoy høxtä cóonøch hänajty tøø njujypiojtagach coöch hänajty tøø nho'ogy. Diosquëxyhøch høøch —nømä Pedrohajxy ñämaayyä.

¹⁰ Coo ja'a Pedrohajxy jaduhñ ñämaayyä, paadiä mädia'agy hajxy jaduhñ miäbøjcy. Jioodhajt hajxy jaduhñ nebiaty hajxy hänajty tøø yhiixy tøø miädoy. Hamiñ haxøpy hajxy hänajty jia ñimiäyajtøyyi waambä Jesús hänajty jaduhñ jia mäna'ana'añ coo jaduhñ miänaañ cooc hänajty jiuypiojtagatsa'añ.

¹¹ Mänitä Jesús hajxy miäyajtøøyy:

—Ja'a häna'c hajxy jiiby yajnähixøøbiä maa ja'a tsajtøjcän, jaduhñ hajxy miäna'añ coogä Elías tsipcøxp jawyiin quiädä'agät. Mänitägä Cristo høxhaam jiaac tehñ quiäda'aga'añ. Tii hajxy jaduhñ coo miäna'añ. Nej, tøyhajt jaduhñä.

¹²⁻¹³ Mänitä Jesús yhadsooyy:

—Jaduhñä Diosmädia'agy jiaančh mäna'añ coogä Elías jawyiin quiäda'aga'añ. Tøyhajt jaduhñ. Mänitägä cøxiä wiinä yagjema'añ yajtägatsa'añ. Tøø ja'a Elías jia cäda'agy. Pero tøø jaduhñ jiaančh tehñ chaačhtiüñi nebiatiä jäya'ay jioothajxy chocy. Tøjiajt jaduhñ nebiä Diosquëxyhajxy jecy quiujahyyän. Nej, mnajuøøby hajxy jaduhñä waambátyhøchä Diosmädia'agy xmiädiaacpä, høøch ja'a Diosquëxypä, coöchä jäya'ayhajxy xchaačhtiunaambä, møød coöch hajxy xquia'a jaac hixaannä.

¹⁴ Coo ja'a Jesús hajxy jiiby quiädaacy maa ja'a jiamioødhajxy hänajty tøø miähmø'øyän, ja'a hajxy hänajty jiiby nädaaxtuipä, mänitä Jesús yhiixy coo ja'a jiamioødhajxy hänajty piquiä tøø piäda'agyii ja'a majiäya'ay. Jimä häna'c hajxy hänajty miøødniyhojyii, ja'a häna'c-hajxy jim yajnähixøøbiä maa ja'a tsajtøjcän.

¹⁵ Nägoø ja'a cu'ugä Jesús hajxy jiojcuhiøøyy, mänit hajxy jiaančh tehñ xiooñdaacy. Mänitä Jesús jiojcuäyø'øgøøyyä. Mänit yajpoo'xä.

16 Mänitä Jesús miänaañ:

—Tii hajxy mwi'i yajniguiuhøjøyyäp.

17 Mänit tu'jäya'ay yhadsooy:

—Wiindsøn, chaačhä nhuung tøø nja møødmech. Møjcu'u jaduhñ miøød. Ja'a møjcu'u wi'i yaghuhmb.

18 Naxy jaduhñ yajcädayyii. Mänit tiägø'øy hahoo'pä. Mänitä tiøøts tiägø'øy yajcädajpä. Mänit møc-häwøönä jiaty. Tøøchä mjamiøødtøjc nja mänuu'xta'agy cooçh nhuung hajxy cu xyajpa'amnähwaatsä. Pero cab hajxy tøø miäjäda'agy —nømä Jesús ñämaayyä.

19 Mänitä Jesús ja'a jiamiøødtøjc ñämaayy:

—Ja'a! Cábøch mijtsä nmädia'agy xñä'ä mabøjcä cooçh nDiosquexiä. Tøøch mijts jejcy nja møødwädity, y cahnä hajxy tii mnä'ägädä habøcyñä. Jaançh tehñ yhanaxiä mijts jaduhñ mguhxexä. Nébiøch mijts nnä'ä túnät. Hoorä, witsminxä ja'a pa'amjäya'ay yaa —nømä Jesús miänaañ.

20 Mänitä Jesús miädia'agy quiudiúunäxä. Coö ja'a Jesús yhiixä ja'a møjcu'u, mänitä mähdiøjcä pia'am tiehñ ñämejtsä. Mänitä mähdiøjc quiädaayy naaxwiin. Mänit piayajch piadøø'py. Mänit tiägøøyy hahoo'pä.

21 Mänitä craa tieedy miäyajtøøwäxä:

—Mänaa hädaa mhuung tøø pia'ambety.

Ja'a Jesús jaduhñ yajtøøw.

—Muutsnä hänajyñä —nømä craa tieedy yhadsooyy.

22 Mänitä tieedy miänáangumbä:

—Náxyhøch hädaa nhuung jiøøngädaw jiøømbøgø'øy coö pia'am jaduhñ naxy ñähbaadyii. Naxy ñøøgädaw ñøøbøgøøbiä. Ja weenjaty jaduhñ quiaa yagho'ogyii. Tunä mayhajt. Pø jii miich møcmäjaa mmøødä, højts näxúu'tsäc, højts puhbéjtäc —nømä Jesús ñämaayyä.

23 Mänitä Jesús miänaañ:

—Nej, jadúhñhøch miich xmiøyajtøyyä pø nmøødhøch møcmäjaajä. Pøn jaduhñ mabøjp, hotyiijä jaduhñ yhojø'øwáanäxä.

24 Mänitä pa'amjäya'ay tieedy yaaxy:

—Nmabøjpøch. Høøch puhbéjtäc, jadúhñhøch maas hoy njaac mabøgät.

25 Jimä jäya'ayhajxy hänajty may wyi'i miamiucy. Coö ja'a Jesús ja'a majiäya'ay jaduhñ yhiixy, mänitä Jesús ja'a møjcu'u ñämaayy:

—Høøch miich nhanehmby coö hädaa craa mhøxmájtñät. Cab jaduhñ mänaa mnämejtstägájtñät. Naxy miich hädaa mähdiøjc myaghuumy myajnaty —nømä møjcu'u yhojjä.

26 Mänitä mähdiøjc møc yajtsaačhyaaxä. Mänit jiäwipø'cy xiäyaayyø'cy. Mänit ñähwaatsä quiuhwaatsä. Nebiä ho'ogypiän jiajty. Coö jaduhñ yhiixä, mänitä jäya'ayhajxy may miänaañ cooc tyijy hänajty tøø yho'ogy.

27 Mänitä Jesús ja'a craa wyidsø'cy. Mänitä craa hoy tiänaayyø'nø.

28 Mänitä Jesús hajxy tiøjtägøøyy møødä jiamiøødtøjc. Mänitä Jesús hamee'ch miäyajtøøwä ja'a jiamiøød:

—Tii højts jaduhñ coö tøø nga'a mäjädaacpä.

29 Mänitä Jesús yhadsooyy:

—Coö Dios hajxy mjaançh tehñ miänuu'xtá'agät, mänit yø'øduhmä pa'am hajxy hoy myajnaxät. Pero pø caj, cab hajxy myajnaxät.

30 Coö ja'a Jesús hajxy jim chohñ, mänit hajxy ñøcxy Galilea. Cabä Jesús hänajty yajnajuø'øwa'añii maa hänajty nøcxy wiädita'añ.

31 Mänitä Jesús ja'a jiamiøødtøjc tiägøøyy yajwiingapxøøbiä:

—Høøch ja'a Diosquexypä, nøcxáambøch nniñähduga'añii cooçhä jäya'ayhajxy xyaghó'ogät. Y cooçh hānajtý tøø nho'ogy, cumáaxc-høch hānajtý njujypiojtägatsa'añ —nømä Jesús miānaañ.

³² Cabä Jesús ja'a jiamiøødhajxy ñä'ägädä wiinjuøøyy waambatiä Jesús hānajtý tøø miādia'agy. Cab hajxy hānajtý jia nä'a wi'i miäyajtøwaambä. Hix, tsähgøøby hajxy hānajtý.

³³ Mānit hajxy jim miejch Capernaum maa hajxy hānajtý chāna'ayän. Coø hajxy hānajtý tøø tiojtägø'øyy, mānitä Jesús ja'a jiamiøødtøjc miäyajtøøyy:

—Tii hajxy hijty mwi'i yajcapxiøøby jim tu'haam-miimbä.

³⁴ Pero cab hajxy waamb ñä'ägädä hadsoøyy. Hix, jue'e hajxy hānajtý tøø yajtsibø'øyy tu'haam-miimbä, pønä cuhdujt hānajtý maas møc møød. Tsähdiuumb hajxy hānajtý, paady hajxy quia'a nä'ägädä hadsoøyy.

³⁵ Mānitä Jesús yhäñaaguiädaacy, Mānitä jiamiøødtøjc ñāmaayy, ja'a hajxy hānajtý nāmajmetspä:

—Yam hajxy weeñtiä huuc møjwa'ag. Pøn jaduhñ pøc-juøøby coø møjcuuhdujt miøødhädät, cabä cuhdujt jaduhñ ñä'ägädä møødhada'añ. Moonsä jaduhñ ñä'ägä tunaamby.

³⁶ Mānitä Jesús pigāna'c-huong tu'ug miøjyaaxy. Mānit piädaacy cujc maa ja'a jiamiøødhajxy hānajtian. Mānit chehñø'cy. Mānitä jiamiøødtøjc ñāmaayy:

³⁷ —Pøn hädaa pigāna'c hädaaduhmbä tsojp ja'a høøchcøxpä, jaduhñ māvínhøch xchojpä. Jaanä jadúhñhøchä nDeedy hajxy xchójcäbä —nømä Jesús miānaañ.

³⁸ Mānitä Juan ja'a Jesús ñāmaayy:

—Wiindsøn, tøø højts jäya'ay tu'ug nbaady. Jimä pa'amjäya'ay hānajtý ya-jpa'amnaxy, ja'a hajxy møjcu'umøødpä. Miiçhä mxøø hānajtý xquiapxpáatäp. Mānit højts nnāmaayy coø quia'a yajpa'amnájxnät. Paady højts jaduhñ nnāmaayy, coø højts nāguipxy xquia'a møødwädjätäm.

³⁹ Mānitä Jesús miānaañ:

—Cábäts hajxy waamb cu mnāmaayy. Pønñøchä nxøø xquiapxpáatäp coø ja'a hoy-yagjuøøñäbä hānajtý yajcāhxø'øgy, cábøch jaduhñ xchoj mägapxtägoyya'añ.

⁴⁰ Pøn højts jaduhñ xquia'a mädsiphajtäm, je'eds hajxy jaduhñ xmiägu'ughajtäm.

⁴¹ Coø mijts pøn xyajnoøhú'ugät je'eguiøxpä cooçh mijts xpiawädity, høøch ja'a Cristo, jimä hoyhajtä weenhajt piaada'añ Dioswiinduum.

⁴² 'Pønjátyhøchä nmādia'agy xmiäbøjcäp, hoy hajxy quia'a jagä høxpøquiä, coø hajxy jiøjcaxø'øwøøjät, ja'a häna'c-hajxy jaduhñ mājøjcaxøøbiä, mejor paandsaa hajxy häxøpy tøø yajyo'xodsø'øyii, jaduhñds hajxy häxøpy tøø miejjiäwipø'øyii.

⁴³⁻⁴⁴ Pø jimä mgø'ø hānajtý xyajcädieey, maas hoy jaduhñ coø mnä'ägädä høxpúxät, jaduhñ tehngajnä xquia'a yajcädiéhñät. Jadúhñäts homiānaajä mjugyhädät nebiä Dios jiugyhatiän, hoyyä mgø'ø hānajtý metsc mga'a jagä møødä. Hix, coø tehngajnä mjaac cädieeyät, jiiby mhädä'agät haxøøgtuum maa ja'a jøøn mānaa quia'a nä'ägädä pi'ichän, hoyyä mgø'ø hānajtý jia ca'xiä.

⁴⁵⁻⁴⁶ Jaanä jaduhñduhmbä, pø jimä mdecy hānajtý xyajcädieey, maas hoy jaduhñ coø mnä'ägädä høxpúxät, jaduhñ tehngajnä xquia'a yajcädiéhñät. Jadúhñäts homiānaajä mjugyhädät nebiä Dios jiugyhatiän, hoyyä mdecy hānajtý metsc mga'a jagä møødä. Hix, coø tehngajnä mjaac cädieeyät, jiiby mhädä'agät haxøøgtuum, hoyyä mdecy hānajtý jia ca'xiä.

⁴⁷ Jaanä jaduhñduhmbä, pø jimä mwiin hānajtý xyajcädieey, maas hoy jaduhñ coø mnä'ägädä yajpādsømät, jaduhñ tehngajnä xquia'a yajcädiéhñät.

Jadúhnäts homiänaajä mjugyhádät nebiä Dios jiugyhatiän, hoyyá mwiin hánajty metsc mga'a jagä mөөдä. Hix, coo tehngajnä mjaac cädiéeyät, jiiby mhädä'agät haxөөgtuum, hoyyá mwiin hánajty jia ca'xiä.

⁴⁸ Jiiby haxөөgtuum, cabä tөөnghajxy jiiby mänaa ñä'ägä ho'ogy, mөөд cabä jөөn jiiby mänaa ñä'ägä pi'tspä.

⁴⁹ Pөн jiiby hijp haxөөgtuum, cab hajxy jaduhñ jiiby mänaa quiөxy toya'añ. Jaduhñ mäwíinäts je'e nebiä tsu'u'ch caanө'öybän, cabä jөөn jaduhñ jiiby mänaa pyi'ich.

⁵⁰ Ja'a caan, tuuñpaatp je'e. Pero coo ja'a tiaamdspä quiөxät, cab jaduhñ mänaa tiuñgpáatnät. Jaduhñ mäwíinäts mijtspä, hoy yajxón hajxy mnimiөөdhidөөjät. Cab hajxy jaduhñ mänaa myajniguiudsip myajniguiuma'adө'өwөөjät.

10

¹ Mänitä Jesús jim chóhngumbä Capernaum. Mänit ñөcxy Judea-naaxooty, ja'a xөөbädsөmyhaampiä, jim Jordán-mөjnөөhawiimb. Mänitä jäya'ay may ñäméjtsägumbä. Mänitä Jesús tiägөөguiumbä yajñähixөөbiä, neby hánajty naxы yajñähixө'өyhatiän.

² Mänitä fariseodөjc-hajxy näje'e miejch. Mänitä Jesús hajxy miäyajtөөyy: —Nej, miimbä cuhdujt jaduhñä coo jäya'ayhajxy ñiyhөxmadsөөjädä.

Paadiä Jesús jaduhñ miäyajtөөwä, hijxmadsáanäp hánajty jaduhñ waamb hánajty yhadsowa'añ.

³ Mänitä Jesús yajtөөdägajch:

—Nej, jaduhñä Moisés jecy quiujahyyä coo hajxy mniyhөxmadsөөjädä.

⁴ Mänitä fariseoshajxy yhadsooyy:

—Jaduhñä Moisés jecy quiujahy coogä cuhdujt jaduhñ myiñ coo jäya'ayhajxy ñiyhөxmadsөөjät.

⁵ Mänitä Jesús miänáangumbä:

—Coo mijts mjaan'ch tehñ quiuhxexä, paadiä Moisés ja'a cuhdujt jaduhñ jecy yecy coo mdo'oxiөjc hajxy mhөxmádsät.

⁶ Mänaa ja'a naaxwiimbä jecy yhawijy tiөө'xta'aguiän, mänitä Dios jäya'ay metsc quiunuu'xy ya'adio'oxy.

⁷⁻⁸ Coo ja'a Dios ja'a jäya'ay jaduhñ jecy quiunuu'xy ya'adio'oxy, paadiä ya'adiөjc jaduhñ tio'oxiөjwiingpögät. Jaduhñ hajxy jaduhñ yhiñät nebiä tu'que'expän. Hawiingөөby hajxy jaduhñ. Cab hajxy wioowhíjtänä ja'a tiaj ja'a tiéediäm.

⁹ Pөnjatiä Dios jaduhñ tөө quiunuu'xy coo hajxy ñimiөөdtsäna'awөөд nämetsc, cab hajxy jaduhñ ñiyhөxmadsөөjät —nөmä Jesús miänaañ.

¹⁰ Mänitä Jesús hajxy tiөjtägөөyy mөөдä jiamiөөdtөjc. Mänitä Jesús jadähooc miäyajtөөwä ja'a jiamiөөд waambatiä Jesús ja'a fariseodөjc hánajty tөө miөөdmädia'agy.

¹¹ Mänitä Jesús yhadsooyy:

—Pөнä tio'oxiөjc hөxmajtsp, y mänitä wiingto'oxiөjc wyiingpөcy, miägädiehbiä tio'oxiөjc jaduhñ. Haxөөg jaduhñ jiatcө'өy.

¹² Jaanä jaduhñduhmbä, coo ja'a to'oxiөjc ñihyhap yhөxmádsät, y coo wiingya'adiөjc wyiingpögät, jaduhñä ñihyhap miägädiehbiä. Jaanä haxөөg je'eduhñ jiatcөobiä —nөmä Jesús miänaañ.

¹³ Mänitä Jesús pigäna'c mejtstägөөg yajñämejtsä, coo hajxy ween quiunuu'xyii. Coo ja'a Jesús jiamiөөд hajxy jaduhñ yhiixy cooc tyijy ja'a Jesús hánajty yhadsiba'añii, mänitä pigäna'cä tiajhajxy yhadújcäxä coo ja'a Jesús hajxy jaduhñ quia'a nänөcxät.

14 Coo ja'a Jesús jaduhñ yhiixy coo ja'a pigäna'c-hajxy hñajty wyl'i yhadugyñ, mänitä Jesús ja'a jiamioðd yhojy:

—Ca'a yø'ø pigäna'c hajxy mwil'i yhaducy. Wéenhøch hajxy jaduhñ xñämiñ. Coo mijtsä Diosmädia'agy jaduhñ mmäbøgät neby hädaa pigäna'c-hajxy miäbøquiän, mänit mijtsä Dios jaduhñ xyhuunghädät.

15 Hiix, ja'a pigäna'c-hajxy, cab hajxy tii quia'a nä'a mabøcy. Tsipcøxp hajxy jaduhñ ñä'ägä mabøcy. Jaduhñds je'e, coo mijts mmäbøgät nebiä pigäna'c-hajxy miäbøquiän, mänit hajxy jaduhñ mjugyhädät cøjxta'axioø nebiä Dios jiugyhatiän. Tøyhajt jaduhñ —nømä Jesús miänaañ.

16 Mänitä Jesús ja'a pigäna'c tiägøøyy cunuu'xpä tu'ugjaty-tu'ugjaty. Cø'ønähgäjpäp hajxy hñajty.

17 Mänitä Jesús jim chohñ. Jim hñajty tiu'uyo'oyñä, mänitä Jesús jäya'ay tu'ug päyø'øguiä ñajtspaadøøyyä. Mänit wyiinjiçädaacä. Mänit ñämaayyä:

—Wiindsøn, mjaançh tehñ yhojhäna'c miich. Nébiøch ngudiünät cooçh cøjxta'axioø njugyhädät nebiä Dios jiugyhatiän —nømä Jesús miäyajtøøwä.

18 Mänitä Jesús yhadsooyy:

—Tiiçh miich jaduhñ coo xñäma'ay cooçh nhoyhänä'cä. Ni pøn jaduhñ quia'a hoyhänä'cä. Jagooyyä Dios tu'uquiä yhojhänä'cä.

19 Mnajuøøby miich jaduhñ nebiatiä Moisés cuhdujt jecy yeycy, túhmäts. “Cab hajxy mniyagho'ogøøjät. Cabä wiingto'oxioøc hajxy mmøødtsänä'awät. Cab hajxy mméedsät. Cab hajxy mhøhndä'agät. Cab hajxy mmäméedsät høhnda'agymiädia'agyhaam. Mwiingudsähgø'øwäbä mdajjä mdeedy hajxy” —nømä Jesús miänaañ.

20 Mänitä Jesús ñämaayyägumbä:

—Pero Wiindsøn, homiänáajøch jaduhñ ngudiuñ. Múutsnøçhä hoguiuhdujt nmädsøhndaacy —nømä Jesús ñämaayyä.

21 Mänitä Jesús ja'a craa wyiinhee'ppejty. Jiaançh tehñ chójcäbä craa hñajty je'e. Mänitä Jesús miänaañ:

—Tu'tu'uyyä mga'a cøxy cudiuñ. Nøcx cøxy toog tijaty jim mmøød, jaduhñds mmó'owät pønjaty hajxy häyoob. Coo jaduhñ mgudiünät, mänit jim mnøcxät Dioswiinduum. Jim miichä hoybä weenbä mbáadät tsajpootyp. Hoorä, høøch padu'ubøjcäc.

22 Coo ja'a craa jaduhñ ñämaayyä, mänit jiootmadiägøøyy. Mänit wyiimbijnä tájjäp máayyäp. Hiix, jaançh tehñ miäyøø hñajty je'e.

23 Jimä Jesús ja'a jiamioðdhajxy hñajty piadäna'ay. Mänitä Jesús wyiinhee'ppejty. Mänit miänaañ:

—Jaançh tehñ chip jaduhñ coo yø'ø mäyøødøjc-hajxy jim ñøcxät Dioswiinduum. Tehñ tiøyhajt jaduhñ.

24 Coo ja'a Jesús jaduhñ miänaañ, jiaançh tehñ yagjuøøyy ja'a jiamioðdhajxy jaduhñ. Mänitä Jesús miänáangumbä:

—Mägu'ughajpädøjc, pønhatiä xiädø'øñ hajxy hajoodhajp, jaançh tehñ chip jaduhñ coo hajxy jim ñøcxät Dioswiinduum.

25 Maas paquiä camello tu'ug jiiby ñaxø'øwät xuhñdyjutooty quejee ja'a mäyøøhänä'c-hajxy jim tiägø'øwät Dioswiinduum.

26 Coo ja'a Jesús jaduhñ miänáangumbä, mänitä jiamioðdhajxy maas hanaxiä yagjuøøguiumbä. Mänitä Jesús miäyajtøøwä:

—Pønxada'aduhñ jaançh tøy nähwa'adsaamb.

27 Mänitä Jesús wyiinhee'ppéjcumbä. Mänit miänaañ:

—Ja'a jäya'ayhajxy, cab hajxy hamdsoojoot hoy yajniñähwa'adsøøjät. Pero Dios, je'eds mäyajnähwaatp. Hotyiijä Dios jaduhñ jiaty.

28 Mänitä Pedro ja'a Jesús ñämaayy:

—Huuc mäadow, coo højts miičh nbadu'ubøjcy, cøjx højts nnähgue'egy tijaty højts hijty nmøød.

29-30 Mänitā Jesús yhadsooyy:

—Pønjaty cøxiä tøø ñähgue'egy ja'a høøchcøxpä møødä Diosmädia'agyquiøxpä, maas may hajxy jaduhñ jiaac paada'añ hädaa yaabä naaxwiin tijaty hajxy hänajty tøø ñähgue'egy tøø yhøxyo'oy, tiøjc, piuhya'ay, piuhdo'oxy, tiaj tieedy, yhuung, ñaax. Møød jim hajxy ñøcxa'añ tsajpootyp. Jim hajxy jaduhñ homiänaajä yhida'añ, hoy hajxy hänajty yaa tøø jia tsaačhpøcy ja'a høøchcøxpä hädaa yaabä naaxwiin. Tøyhajt jaduhñ.

31 Pønjatiä møjtuuñg jäda'ahaty ca'a møød, nämay hajxy miøjtägø'owa'añ. Pero pønjatiä møjtuuñg jäda'ahaty ja møød, nämayyä tiuunghajxy piøgáañäxä —nømä Jesús miänaañ.

32 Mänitā Jesús hajxy jim tiu'ubøjcy møødä jiamioødtøjc. Jerusalén hajxy hänajty ñøcxa'añ. Jawyiinä Jesús hänajty yo'oy. Mayyä jäya'ayhajxy hänajty pianøcxy møødä Jesús jiamioødhajxy, ja'a hajxy hänajty nämajmetspä. Jaančh tehñ yagjuøøby hajxy hänajty. Høxtä tsähgøøby hajxy hänajty. Mänitā Jesús ja'a jiamioød hawiing wioonøcxy. Mänitā Jesús tiägøøyy mädiaacpä nebiaty hänajty jiada'añ yhabeta'añ:

33 —Huuc mäadow hajxy, yam hajxy nnøcxäm Jerusalén. Coø hajxy jim ngoodáañäm, mänitøchä teedywiindsøñhajxy xyajcø'ødägø'owa'añ, møødä häna'cä Diosmädia'agy hajxy jim yajnähixøøbiä tsajtøgooty, høøch ja'a Diosquexypä. Mänitøch hajxy jaduhñ xyajnähdiä'añ coøch hajxy xyagho'oga'añ. Mänitøch hajxy xyajcø'ødägø'owa'añ ja'a häna'c-hajxy jim tsohmä Roma.

34 Madiú'ujøch hajxy xchaačhtiuna'añ. Xñäxi'igáambøch hajxy. Xwyiin-woonáambøch hajxy. Xwyiingutsujø'owáambøch hajxy. Xwiobho'ogáambøch hajxy. Mänitøch hajxy xjia yagho'oga'añ. Pero cudägøøgxøøyyøch nju-jypiøjtägatsa'añ, —nømä Jesús miänaañ.

35 Mänitā Jesús wyiinguwa'agøøyyä ja'a Santiago møødä Juan. Ja'a Zebedeo yhuunghajxy hänajty je'e. Mänit hajxy miänaañ:

—Wiindsøn, huuc tunä mayhajt ja'a højtsøxpä.

36 Mänitā Jesús yhadsooyy:

—Tii mayhájthøch ndúnäp.

37 Mänitā Santiagohajxy miänáangumbä:

—Coo miičh hänajty tøø mmøjtägø'ø, coo hänajty tøø mdägø'ø hanehmä, mänit højts cuhdujt xmió'owät coo højts jim nhäñá'awät miičhä mnähmøjc, hahooyhaampiä møød hanajtyhaampiä.

38 Mänitā Jesús yhadsóogumbä:

—Mijts, cab hajxy mnajuø'ø tii hajxy jaduhñ mnänøømby. Nej, mmee'xtúgäp hajxy jaduhmbä nébiøch ndsaačhpøgá'añänä.

39 Mänitā Santiagohajxy yhadsooyy:

—Nmee'xtúgäp højts jaduhñ.

Mänitā Jesús miänáangumbä:

—Jaduhñ mijts mjaančh tsaačhpøgaambä nébiøch ndsaačhpøga'añän. Tøyhajt jaduhñ.

40 Pero cábøchä cuhdujt jaduhñ nmøødä coo mijtsä cuhdujt nmó'owät coo hajxy jim mhäñá'awät høøchä nnähmøjc mänáajøch hänajty tøø ndägø'øyän hanehmä. Dios ja'a cuhdujt møød pøn yajnähdiäamby coo hajxy jim yhäñá'awät. Je'edshajxy jaduhñ jim häña'awaamb —nømä Jesús miänaañ.

41 Coø Jaha Jesús jiamioødhajxy jaduhñ miädooyy, ja'a hajxy hänajty jaac nämajcpä, mänitā Santiagohajxy miäjootma'tä møødä Juan.

⁴² Mänitä Jesús miøjyaaxy ja'a hajxy hānajty jaac nāmajcpä. Mänitä Jesús miānaañ:

—Ja'a gobiernāhajxy, mōødä hāna'c-hajxy yaa mōjtuungmōōdpä hädaa yaabä naaxwiin, ja'a hānā'cātshajxy jaduhñ yaa hanehm̄b. Mnajuōōby hajxy jaduhñ, túhm̄äts.

⁴³⁻⁴⁴ Pero mijts, cab hajxy mbōc-juō'ōwāt coo mōjtuung hajxy mmōōdhādāt. Pōñä jioot tsojp coo wyiingudsāhgō'ōwōōjāt, weenä jioot piāda'agy coo jiamioōd piuhbédāt.

⁴⁵ Hōōchpaady, hōōch ja'a Diosquexypä, mähuhbéjpōch jaduhñ yaa tōō ngāda'agy. Hōxtä nnāhho'tu'udāambiōchä jäya'ayhajxy nägōxiä. Cábōch jaduhñ nmāna'añ coōchä jäya'ayhajxy xpiuhbédāt.

⁴⁶ Mänitä Jesúshajxy quioo'ty maa ja'a cajpt hānajty xiōhatiän Jericó. Coō hajxy jim chōhngumbä, mayyā jäya'ay hajxy piadu'ubōjcä. Jimä wiinds hānajty tu'ug yhäñä'ay tu'haam. Bartimeo hānajty xiōhaty. Timeo ja'a tieedy hānajty xiōhaty. Xädō'ōñyujwaambä Bartimeo hānajty.

⁴⁷ Coō ja'a Bartimeo jaduhñ miādooy coo hānajty je'e Jiesúsä, ja'a hānajty tsohm̄bä Nazaret, mänitä Bartimeo mōc yaaxy:

—Jesús, David miich jecy mhaphajt mdeedyhajt. Hōōch näxúu'tsác.

⁴⁸ Mänitä Bartimeo yhojmujcä nāmāy coo cu yhamooñ. Pero cab jaduhñ ñä'ä hamooñ. Tehngajnä maas mōc tiägōōyy yaaxpä:

—Jesús, miichä David jecy mhaphajt mdeedyhajt. Hōōch näxúu'tsác.

⁴⁹ Mänitä Jesús tiānaaxiōjpy. Mänit miānaañ coo ja'a Bartimeo miøjya'axōōjāt. Mänitä Bartimeo tu'jäya'ay ñāmaayyā:

—Xoonäda'ag, tānaayyō'ōg. Ximä Jesús xmiøjya'axy.

⁵⁰ Mänitä Bartimeo paquiä tiānaayyō'cy. Mänitä yoñwit yajniñāhnajptuutä. Mänitä Jesús päyō'ōguiä hoy wyiingumedsō'oy.

⁵¹ Mänitä Jesús ja'a Bartimeo miāyajtōōyy:

—Tii mayhajt jaduhñ myajtunāanāp.

Mänitä Bartimeo yhadsooyy:

—Wiindsōñ, hōōch yaghixō'cäc.

⁵² Mänitä Jesús miānaañ:

—Ja'a hoy, tisān coo quia'a cabä. Coōchä nmādia'agy tōō xmiäbōjcä, paady tōō mhixō'nō.

Tuunä Jesús jaduhñ ñä'ä mānaañ, mänitä Bartimeo jiaanch hijxō'cy. Mänitä Jesús piadu'ubōjnä.

11

¹ Jimä Jesúshajxy hānajty quioodaannä maa ja'a cajpt hānajty xiōhatiän Betfagé mōōd Betania, jim mādōyyä maa ja'a tun hānajty xiōhatiän Olivos. Jim hānajty miāwiingōñ Jerusalén. Mänitä Jesús ja'a jiamioōd metsc

² ñāmaayy:

—Nōcx hajxy jimhaamby maa yō'ō cajpthuungän. Coō hajxy jim mmedsa'añ, jimä burro hajxy tu'ug mbaada'añ cuxoch. Cahnä pōñ yajpejmachñä. Mmāguejō'ōwäp hajxy. Jaduhñds hajxy yaa mwitsmínāt.

³ Y pō jimä jäya'ay hajxy xmiäyajtōy tii hajxy jaduhñ coo mmāguejō'oy, mänit hajxy mnāmá'awāt: “Ja'a nwiindsōñ hōjts cham yajmaajiajp. Paquiä hōjts nnä'ä yajtuna'añ. Mänit hōjts min nnajtswidsō'oy.” Jaduhñ hajxy mmānā'anāt —nōmā Jesús ñajtsapxōōyy.

⁴⁻⁵ Mänitä burro hajxy hoy jiaanch paady cuxoch jim mōjtu'haam, jim tōjnāhmōjc mādōyyä. Jimä jäya'ayhajxy hānajty näje'e tiāna'ay. Coō ja'a Jesús jiamioōdhajxy tiägōōyy burromāguejōōbiä, mänit hajxy ñāmaayyā:

—Tii yō'ō burro hajxy jaduhñ coo mmāguejō'oy.

⁶ Mänit hajxy jaduhñ yhadsooy waambaty hajxy hānajtý tøø yhane'emyii coo hajxy jaduhñ yhadsówät.

⁷ Mänitā Jesús ja'a burro yajnäméjtsäxä. Mänitā jiamiøødä wyit hajxy jim piädaacy burronähgøxp. Mänitā Jesús jim piejty.

⁸ Jaančh tehñ miayyā jāya'ayhajxy hānajtý pianøcxy. Mänitā wyit hajxy näje'e chijy. Jaduhñds hajxy tu'haam ñajtsye'ebøøyy maa ja'a Jesús hānajtý burronähgøxp ñaxø'øwa'añän. Näje'e hujtsaay hajxy hānajtý piujxpä. Jim hajxy hānajtý piädaacpä tu'haam.

⁹ Cu'ughagujcä Jesús hānajtý ñøcxy. Mänitā cu'ughajxy nägøxiä tiägøøyy yaaxpä jojpä:

—¡Viva Jesús, viva! ¡Gloria a Dios! Diosquexy hädaa Jesús jaduhñ.

¹⁰ ¡Gloria a Dios tsajpootypä! Jaduhñ hädaa Jesús yhane'emaambä nebiä David jecy yhanehmiän, ja'a hajxy jecy nhaphajt ndeedyhajtäm.

¹¹ Mänitā Jesúshajxy jim quioo'nä Jerusalén, møødä jiamiøød ja'a nämajmetspähajxy. Mänit hajxy jim ñøcxøøyy maa ja'a tsajtøjcän. Coö hajxy jiiby chajtøjtägøøyy, mänit hajxy yhiwxwädipty tijaty hānajtý jiiby. Mänit hajxy wyiimbíjcumbä. Mänit hajxy jiiby yhädaaccumbä Betania. Hix, tøø hānajtý chuujø'øy, y jiiby hajxy hānajtý miejtsta'aga'añ Betania.

¹² Cujaboom, mänitā Jesúshajxy jim tiu'ubøjcumbä. Mänitā Jesús yäho'pøjcä.

¹³ Mänitā piids tu'ug ñäheebøøyy coö hānajtý jim tiäna'ay picxumnä. Coö wiingón ñämejch, mänit yhiixy coö tiøøm hānajtý quia'a nä'ägädä hity. Haagä haay hānajtý je'e. Cahnä yhi'its hānajtý yhabaadyñä mänaabä hānajtý naxy tiøømbetiän.

¹⁴ Mänitā Jesús piids ñämaayy:

—Ni mänaa miich mga'a tømbejtägatsaanä.

Coo ja'a Jesús jaduhñ miänaañ, miädoow ja'a jiamiøødhajxy jaduhñ.

¹⁵ Coö ja'a Jesúshajxy jim miejstägajch Jerusalén, mänitā Jesús jiiby chajtøjtägøøguiumbä. Mänitā Jesús ja'a too'pädøjc juubiädøjc tiägøøyy høxpäboobiädsøømbä jiiby tsajtøgooty. Mänitā meexä tiägøøyy høxjuipä maa xädø'øñ hajxy hānajtý quiuwichän, møødä häñaabiejt maa hajxy hānajtý yhäña'ayän coö hajxy hānajtý pialomatoogy.

¹⁶ Mänitā Jesús tiägøøyy hadujpä coö ja'a jāya'ayä tioogy hajxy jiiby quia'a mädägøøñät tsajtøgooty.

¹⁷ Mänitā Jesús tiägøøyy yajwiingapxøøbiä:

—Jaduhñ jim myiñ cujaay maa ja'a Diosmädia'aguiän: “Pa'yaaxtáacthøchä ndøjc hajxy nägøxiä xwiäanät, ja'a jāya'ayhajxy wiinduhmyhagajtpä.” Jaduhñä Dios jecy miänaañ. Pero mijts, wiing mijtsä tsajtøjc mwa'añ. Jaduhñ hajxy mwa'añ nebiä mee'tstaactän —nømä Jesús miänaañ.

¹⁸ Coö ja'a teedywiindsønñhajxy jaduhñ miädooyy, møødä häna'cä Diosmädia'agy hajxy hānajtý jiiby yajnähixøøbiä tsajtøgooty, mänit hajxy tiägøøyy cojyquiapxytiuumä nebiä Jesús hajxy yaghó'ogät. Hix, chähgøøbiä Jesús hajxy hānajtý je'eguiøxpä coö ja'a Jesús ja'a miädia'agy hānajtý jiaančh tehñ yhamädoowhíjtäxä ja'a cu'ug.

¹⁹ Pero coö quioodsøøñä, mänitā Jesúshajxy jiiby yhädaaccumbä Betania.

²⁰ Cujaboomä Jesúshajxy ñøcxtägajch Jerusalén. Coö hajxy jim ñaxøøguiumbä maa ja'a Jesús ja'a piids hānajtý tøø ñäbogø'øyän, mänitā piids hajxy yhiixy coö hānajtý tøø quiøxy tø'øch.

²¹ Coö ja'a Pedro jaduhñ jiahmiejtstaacy, mänitā Jesús ñämaayyä:

—Wiindsøn, huug hix yø'ø piids. Häxøøy miich yø'ø mnäbogøøyy coö ni mänaa quia'a tømhájnät. Tøø yø'ø quiøxy tøøtsnä —nømä Pedro miänaañ.

²² Mänitā Jesús yhadsooyy:

—Mäbøjcä ja'a Dios miädia'agy coo jiaanč tehñ tiømiädia'aguiä.

²³ Coo hajxy hamuumdu'joot mmäbøgät, høxtä yøø tun ja'a mmädia'agyhajxy xquiudiúunäp coo hajxy mnämä'awät coo ween nøcxy miejyquia'awø'øy. Mänitä mmädia'agyhajxy jaduhñ xquiudiúunät coo ja'a Dios ja'a miädia'agy hajxy hamuumdu'joot mmäbøjcät coo tiømiädia'aguiä. Tøyhajt jaduhñ.

²⁴ Coo mijtsä Dios tijaty mmäyujwä'anät, xmió'owäp hajxy jaduhñ, coo ja'a miädia'agy hajxy hamuumdu'joot mmäbøjcät coo tiømiädia'aguiä.

²⁵ Coo mijtsä Dios hñajty mba'ya'axa'añ, tsipcøxpä hñana'c hajxy jayøjp mmämée'xät, ja'a mijts hñajty tøø xñägädieeyø'yäbä, jaduhñä Dios hajxy jaduhñ xmiämée'xpät tijaty hajxy hñajty mgädieeyhajpy.

²⁶ Pero pø cab hajxy mmämee'xa'añ, ni mijtsä mDeedy tsajpootypä xquia'a mämee'xtägatsa'añ —nømä Jesús miänaañ.

²⁷ Coo ja'a Jesúshajxy jim quioo'tägajch Jerusalén, mänitä Jesús jadähooc tiägøøyy tsajtøgooty. Jiibiä Jesús hñajty wiädity, mänit ñämejtsä ja'a teedywiindsøn, møødä hñana'c-hajxy jiiby yajñähixøøbiä tsajtøgooty, møødä majjäya'adiøjc.

²⁸ Mänitä Jesús hajxy miäyajtøøyy:

—Pøñ miich cuhdujt tøø xmio'oy coo miich häxøøy yaa tsajtøgooty tøø mdsiptuñ.

²⁹⁻³⁰ Mänitä Jesús yhadsoooy:

—Nhadsóowäbøch häyaa jaduhñ cooçh mijts häyaa jayøjp xyhadsóowät. Pøñä Juan mäyajnäbejpä quejx, Diosä tøgä jäya'ayä. Hadsóowägøch hajxy. Cooçh hajxy häyaa xyhadsóowät, mänitøch mijts häyaa nhadsoodägajtspät —nømä Jesús miänaañ.

³¹ Cabä teedywiindsønñhajxy hñajty ñajuø'øy waambä Jesús hajxy yhadsóowät. Mänit hajxy tiägøøyy niñämäayyäbä: “Coo hajxy häyaa nmänáanämät coo ja'a Dios ja'a Juan quiejxy, jaduhñ jadähooc xyhadsowáanäm: Aa, pø tøyhajt jaduhñ coo ja'a Dios ja'a Juan jiaanč quejxy, tii ja'a Juan miädia'agy hajxy coo tøø mga'a mäbøjcä.

³² Y coo hajxy häyaa nmänáanämät coo ja'a Dios ja'a Juan quia'a quejxy, mänitä cu'ug hajxy häyaa xmiädsibøøyyämät.” Hix, jaduhñä cu'ughajxy hñajty miäna'añ coogä Juan hñajty Dyiosquexiä.

³³ Mänitä Jesús hajxy ñämaayy coo hajxy hñajty quia'a najuø'øy. Mänitä Jesús yhadsoooy:

—Pues, ni høøch jaduhñ nga'a nägapxaambä pønñhøchä cuhdujt tøø xmio'oy.

12

¹ Mänitä Jesús tiägøøyy yajñähixøøbiä cuentäyajmäbaadyhaam:

—Mänitä jäya'ay tsaatypcam tu'ug piädaacy. Mänit jiuhguraajøøyy. Mänitä tsaatyñøøxee'xøhñdy ñädajøøyy. Mänitä nähbettøjc tu'ug yhädiuuñ coo hajxy jim yhäñá'awät coo ja'a tsaatypcam hajxy hñajty cwieendähada'añ. Mänitä wiingjäya'ay ja'a tsaatypcam hajxy yajcø'ødägøøyyäxä coo hajxy cøguipxyjiaty cwieendähädät. Mänitä cudsaatyp jäguemnaax ñøcxy.

² Coo ja'a tsaatyptuc yhabaaty, mänitä cudsaatyp ja'a mioonsä quiejxy coo hajxy cøgujiä ween yajwa'xy.

³ Coo ja'a craa jim miejch, mänit hoyhoy quioxho'cä. Mänit piäboowyiimbijtä cø'øwa'ads.

⁴ Mänitä cudsaatyp ja'a mioonsä mäwiingpä jia quéjxcumbä. Maas hanaxiä craa je'e wiobhó'cäbä. Høxtä yajtsäbítäxä ja'a quiopc jaduhñ. Hoyhoy jaduhñ chaaçhtiunä.

⁵ Mänitā cudsaatyp ja'a mioonsä mäwiingpä jia quéjxcumbä. Mänit hajxy je'e yagho'cy. Maas mayyā mioonsä jia jaac tehṁ quiejxy. Nāje'e hajxy wiobho'cä; nāje'e hajxy yagho'cä.

⁶ Jīmā cudsaatyp ja'a yhuung hānajtṽ tu'ug. Jiaanč tehṁ chojpiä yhuung hānajtṽ. Mänit ñāmaayy: “Nhuuc quéxyhøch miich jīm. Wehṇdā miich hajxy hāyaa xñā'ä wiingudsāhgø'øwät.”

⁷ Coō ja'a cudsaatyp yhuung jīm miejch, mänit hajxy tiägøøyy niñāmāayyābā, ja'a tsaatypcam hajxy hānajtṽ tøø miāmāhmø'øyyābā: “Coo hādaa craa tieedy hāyaa ñā'ä hó'ogät, hādaa craa jaduhṇ cøxiä māmāhmø'øwaamb māduhṇtiä hādaa tsaatypcam. Tsøc hādaa craa hajxy jaduhṇ nā'ägä yaghó'cām, jaduhṇ højts hādaa tsaatypcam nje'ehájtāmät.”

⁸ Mänitā cudsaatyp yhuung miájtsäxä. Mänit yagho'cä. Mänit hajxy hoy yhøxchømy jäguemjuøøby.

⁹ 'Haa, nebiä cudsaatypāda'a hānajtṽ jiatcø'øwa'añ. Nøcxaambāda'a hajxy yagho'tägatsa'añii, ja'a hajxy hānajtṽ tøø miāyaghó'oguiābā. Mänitā wiinghāna'cä tsaatypcam hajxy hānajtṽ yajcø'ødägø'øwa'añii.

¹⁰ Jaduhṇ jīm myiñ cujaay maa ja'a Diosmādia'aguiän: Ja'a tsaa mädyii ja'a tøjmuu'tspädøjc-hajxy quia'a nā'ägä cumaayy, je'e nā'ägä tuundsohṇ maa ja'a tøjteecän.

¹¹ Ja'a Dios jaduhṇ mānaañ coo ja'a tsaa jaduhṇ jīm tiuundsóonät. Paady hajxy jaduhṇ jaanč tehṁ yajxon nhíjxām —nømä Jesús miādiaacy.

¹² Ja'a teedywiindsøṇhajxy, ñajuøøby hajxy hānajtṽ jaduhṇ coo hajxy hānajtṽ tøø yajmābaadyii nebiä cahwiindøyhāna'cän, ja'a hajxy hānajtṽ tsaatypcueendāhajpā. Coō hajxy jaduhṇ ñajuøøyy, paadiä Jesús hajxy hānajtṽ jia wi'i miadsa'añ. Pero cab hajxy jaduhṇ ñā'ä majch, je'eguiøxpā coo ja'a cu'ug hajxy hānajtṽ chāhgø'øy. Mänitā Jesús hajxy ñāhgueecnä. Mänit hajxy wyiimbijnä.

¹³ Mänitā fariseoshajxy nāje'e wyiinguejxä, møødä Herodes quiu'ughajxy nāje'ebä, coo ja'a Jesús hajxy yajcapxtägóyyät, jaduhṇ hajxy hoy ñäxø'øwø'øwät.

¹⁴ Mänitā Jesús ñāmejtsä. Mänit ñāmaayyā: —Nñajuøøby højts coo miich tøy mjaanč tehṁ miādia'agy. Caj miich jaduhṇ mnā'ägä møjpāda'agy waambatiä cu'ug xjia nāma'ay. Tu'cuhdujt miichä jāya'ay mhixy, pønjaty hajxy mäyøø, pønjaty hajxy hāyoob. Tøyhajt højts miich xyajñāhixø'øy coo højts hoy njāya'ayhādät nebiä Dios choquiän. Hoorä, coo højtsä gobiernä Rómabä hānajtṽ xyajñāhjuudiu'uda'añ, nej, hahixøøby jaduhṇ coo højts nnāhjuudiú'udädä —nømä Jesús miāyajtøøwä.

¹⁵ Mänitā Jesús yhadsooyy: —Tiich hajxy jaduhṇ coo xjia wi'i yajcapxtägoyya'añ. Høøchä xädø'øñ tu'ug huuc yaghíjxäc.

Paadiä Jesús jaduhṇ miānaañ, ñajuøøby hānajtṽ jaduhṇ coo hānajtṽ jia wi'i yajcapxtägoyya'añii.

¹⁶ Mänitā Jesús xädø'øñ jiaanč yaghíjxä. Mänit miānaañ:

—Pøṇ wyiin jìøjp yø'øduhṇ. Pøṇ xiøø yø'øduhṇ jīm miimb.

Mänit hajxy yhadsooyy:

—Ja'a gobiernä wyiin jìøjp yø'ø, ja'a jīm tuumbä Roma. Jaaya'ay xiøø yø'øbä.

¹⁷ Mänitā Jesús miānāangumbä:

—Tøyhajt jaduhṇ. Mo'owxä ja'a gobiernä hajxy pø je'e jie'e yø'ø. Pero mädyii ja'a Dios jie'e, mo'ow hajxy je'ebä.

Coo ja'a Jesús jaduhñ yhadsooy, jaančh tehñ yagjuøøyy ja'a fariseoshajxy jaduhñ.

¹⁸ Mänitä Jesús ja'a saduceos näje'e ñämejtsä. Cabä saduceoshajxy hñajty miäbøcy coogä ho'ogyjiäya'ayhajxy hñajty jiuypiojtägatsa'añ. Jaduhñä saduceoshajxy hñajty miäna'añ cooc tyijy ja'a ho'ogyjiäya'ayhajxy quia'a juypiojtägatsa'añ.

¹⁹ Mänitä saduceos ja'a Jesús hajxy ñämaayy:

—Wiindsón, jaduhñä Moisés jecy quiujahy neby højts nguhdujthájtämät, højts judíojäya'ayhájtäm. Hoorä, coogä ya'adiojc tu'ug yhó'ogät, coog hñajty piøquiä, pø cáhnäg hajxy hñajty yhuungpaadyñä, pø jímägä piuhya'ay, wéenägä piuhya'ay ja'a yaamgto'oxy wyiingpøcy, jaduhñäc hajxy jaduhñ yhuungpáadät. Jaduhñäc quiähxó'ogät coog hñajty je'e yhuungä, ja'a hñajty tøø yhó'oguiäbä.

²⁰ Hoorä, jii jäya'ayhajxy hñajty näjuxtujya'ay, haagä tu'que'ex. Mänitä tehñ quioobhuung tio'oxiojwiingpøjcy. Cab jejcy miøødtsänaayy, mänitä craa yho'cy. Cabä huung hajxy ñä'a paaty.

²¹ Mänitä jiødsømy ja'a yaamgto'oxy wyiingpøjcy. Ni je'ehajxy quia'a huungpaatpä. Mänitä craa yho'pä. Jaduhñä jiødsømy je'ebä jia wiingpøjcumbä. Jaanä jaduhyyä je'e jiajpä nebiä yhajchhajxy jiajtiän.

²² Jaduhñ hajxy näjuxtujc jia møødtsänaayy, ni pøn je'e quia'a yaghuungpaaty. Nägøxiä hajxy jaduhñ yho'cy. Høxtä ja'a to'oxiojc, jaac tehñ yho'c je'ebä.

²³ Bueno, coo ja'a ho'ogyjiäya'ayhajxy hñajty nägøxiä jiuypiojtägatsa'añ, pønda'a je'e tehñ tiøybä møødtsäna'awaamb, ja'a hajxy hñajty näjuxtujcpä. Hix, näjuxtujc hajxy hñajty tøø jia møødtsäna'ay. Paady højtsä tøyhajt ndsocy —nømä Jesús ñämaayyä.

²⁴ Mänitä Jesús yhadsooy:

—Caj mijtsä tøyhajt hajxy mnä'ägä møødä, je'eguiøxpä coo ja'a Diosmädia'agy hajxy mga'a nä'ägädä wiinjuø'ø. Møød cab hajxy mnajuøøbiä nebiatiä Dios ja'a miøcmäjaa yajcähxø'øgy.

²⁵ Coo ja'a ho'ogyjiäya'ayhajxy hñajty jiuypiojtägatsa'añ, cab hajxy mänit piøga'añ, cab hajxy mänit yhu'uga'añ. Jaduhñ hajxy yhida'añ nebiä Diosmoonsähajxy jim yhitiän tsajpootyp.

²⁶ Tii mijts coo mga'a mäsøga'añ coo ja'a ho'ogyjiäya'ayhajxy jiuypiojtägatsa'añ. Jaduhñä Moisés jecy quiujahy coogä Dios tähooc miøødnibiaatä jim pactuum maagä hujts haptymøødpä hñajty tioyyän. Mänitägä Dios ja'a Moisés ñämaayy: “Høøchä Abraham xDyioshajp, møødä Isaac, møødä Jacob.”

²⁷ Coo ja'a Dios jaduhñ jecy miänaañ, jaduhñä tøyhajt hajxy nmøødhájtäm coo ja'a Abrahamhajxy hñajty tøø jiuypiojtägach, møødä Isaac, møødä Jacob. Hix, jujcyjiäya'ay ja'a Dios jaduhñ Dioshájtäp, ca'a yho'oguiäya'ayä. Coo mijts jaduhñ mmäna'añ cooc tyijy ja'a ho'ogyjiäya'ayhajxy quia'a juypiojtägatsa'añ, caj mijtsä tøyhajt hajxy mnä'ägä møødä —nømä Jesús miänaañ.

²⁸ Jimä jäya'ay hñajty tu'ug yhamädoowhity. Tsajtøgooty hñajty tiuñ. Coo miädooy coo ja'a Jesús hñajty hoy tøø yhadsoy, mänitä Jesús hoy wyiinguwa'agø'øyii. Mänit ñämaayyä:

—Madiu'u ja'a Moisés hajxy jecy xyhanéhäm. Mädyii jaduhñ maas tuungpaatp —nømä Jesús miäyajtøøwä.

²⁹ Mänitä Jesús yhadsooy:

—Jaduhñ je'e miäna'añ: “Pønjatiä Israel jecy haphajt teedyhajt, hamädoowhit hajxy. Ja'a Dios hajxy nWindsønñájtäm. Tu'uquiiä Dios jaduhñ Dyioshaty.

³⁰ Hamuumdu'jootä Dios hajxy mjaančh tehñ wyiingudsähgø'owät nägø'ø nädecypiä. Mäbøjcä miädia'agy hajxy homiänaajä. Jahmiets hajxy jaduhñ cøjxta'axiøø.”

³¹ Jaduhñä miämetspä miänaambä: “Mdsógäbä jäya'ay hajxy nägøxiä nej mi-jts hamdsooyyä mničhogyiijän. Ni mädyii mädia'agy jaduhñ quia'a mäbaady neby hädaa mädia'agy metspä tiuunḡpaadiän” —nømä Jesús miänaañ.

³² Mänitä craa miänáangumbä, ja'a hñajty tuumbä tsajtøgooty:

—Wiindsønñ, jaančh tehñ yhoj miičh mhadsooyy. Tøyhajt jaduhñ nej miičh mmäna'añän coo Dios tiu'uquiiä. Cabä wiingDios jyliijä. Xjiaančh tehñ tiuunḡpáatäm hajxy jaduhñ

³³ coo ja'a Dios hajxy hamuumdu'joot nwiingudsähgøøyyämät, møød coo jäya'ay hajxy nägøxiä ndsójcämät neby hajxy hamdsooyyä nničhójcäm. Pero cab hajxy xjiaty tuunḡpáatäm coo animal hajxy jiiby nøcxy nnä'ä hayójxäm tsajtøgooty no'cøøc —nømä Jesús ñämaayyä.

³⁴ Coo ja'a Jesús jaduhñ miädooyy coo ja'a craa hñajty najuøøyyhaamby tøø quiapxy, ja'a hñajty tuumbä tsajtøgooty, mänitä craa ñämaayyä:

—Jaac mäbøc ja'a Diosmädia'agy hamuumdu'joot, jaduhñds miičh jim mnøcxät Dioswiinduum —nømä Jesús miänaañ.

Mänitä häna'c-hajxy yhamoonnä, ja'a Jesús hajxy hñajty jia wi'i yagho'ogaambä. Cabä Jesús hajxy waamb miäyajtøønä je'eguiøxpä coo ja'a Jesús hajxy hñajty chähgø'øj.

³⁵ Jiibiä Jesús hñajty yajnähixø'øj tsajtøgooty. Mänit miänaañ:

—Yø'ø häna'c-hajxy jii yajnähixøøbiä tsajtøgooty, tii hajxy jaduhñ coo miäna'añ coogä David ja'a Cristo yhaphaty yhoc-haty.

³⁶ Haa ca'a, jaduhñ jim myiñ cujaayä maa ja'a Diosmädia'aguiän coo ja'a David hamdsooyyä jecy miänaañ:

Mänitøchä Dios ja'a nWiindsønñ xñämaayyä:

“Yaa minñ häña'aw maachä nhahooyhaampiän,

høxtä cóonøchä mmädsip nga'a yajmäjädáacämät.”

Ja'a Dioshespírituhaamä David jaduhñ jecy miänaañ.

³⁷ Jaduhñä David jecy miänaañ coogä Cristo hñajty wyiindsønñhaty. Hoorä, pø tøyhajt jaduhñ coo ja'a David ja'a Cristo jaduhñ jecy wyiindsønñhajty, tii yø'ø jäya'ayhajxy coo miäna'añ coogä David ja'a Cristo ñä'ä haphaty ñä'ä hoc-haty —nømä Jesús miänaañ.

Jaančh tehñ yhomiädoonä ja'a jäya'ayhajxy hñajty miädoy nebiä Jesús hñajty yajnähixø'øjyän. Nämayyä jäya'ayhajxy hñajty.

³⁸ Mänitä Jesús jiaac mänaañ:

—Yø'ø häna'c-hajxy jii yajnähixøøbiä tsajtøgooty, cab yø'ø miädia'agy hajxy mmäbøjcät. Yoñwitmøød hajxy naxy wiädity cajptooty je'eguiøxpä coo hajxy wyi'i yajcumaya'añ. Wi'i yajwiingudsähgø'øwaamb hajxy jaduhñ.

³⁹ Jiiby hajxy jia wi'i yhäña'awa'añ maa ja'a häñaabiejt yajxonjatypän, hädaa yaabä tsajtøgootypä, møød jim maa ja'a cay hu'ugy naxy jiadyiijän.

⁴⁰ Pero cabä quiuhdujthajxy ñä'ägädä hoyyä. Hix, pøjcäxäbä yaamgto'oxiä tiøjc-hajxy. Hoy hajxy jaduhñ jia jatcø'øj, jecyjiatiä Dios hajxy jia wi'i pia'ya'axy. Pero jaančh tehñ yhojyhoj hajxy jaduhñ yajcumädoowa'añii —nømä Jesús miänaañ.

⁴¹ Mänitä Jesús jim mädøyyä hoy yhøxta'agy maa ja'a jäya'ay xädø'øñ hajxy hänajty naxy quiuyoxø'øyän. Ja'a mäyøøjäya'ayhajxy, majiatiä xädø'øñ hajxy hänajty piäda'agy. Jimä Jesús hänajty miähee'pna'ay.

⁴² Mänitä yaamgto'oxy tu'ug miejch. Jaanč tehñ yhäyoob hänajty je'e. Mejtsmägo'xä häyoobä je'e quiugonøøyy.

⁴³⁻⁴⁴ Mänitä Jesús ja'a jiamiøødtøjc ñämaayy:

—Huug hix yø'ø yaamgto'oxy hajxy. Cøxiä yø'øduhñ tøø yecy mäduhñtiä hijty miøødä, ja'a hijty ñägayaambiä. Pero yø'ø mäyøøhäna'c-hajxy, weeñtiä hajxy jaduhñ ñä'ä puhyejcy.

13

¹ Coö ja'a Jesúshajxy jiiby chajtøjpädsøømy, mänitä jiamiøød tu'ug miänaañ:

—Wiindsøn, huug hix yø'ø tsajtøjc, jaanč tehñ yajxón yø'øduhñ miuuchä.

² Mänitä Jesús yhadsooyy:

—Hoy huuc tehñ yheeb. Hoy yø'ø tøjc jaduhñ jia cruundä, cøxaamb yø'øduhñ jyida'añ. Haxit hatajø'øy yø'ø muuch jiada'añ.

³ Mänitä Jesúshajxy jim ñøcxy maa ja'a tun hänajty xiøhatiän Olivos, jim Jerusalén-woc-hawiimb. Coö hajxy jim miejch, mänitä Jesús hanidiuhmduum hoy yhøxta'agy. Mänitä Pedro ja'a Jesús hajxy ñänøcxy, møødä Santiago, møødä Juan, møødä Andrés. Mänitä Jesús hajxy miäyajtøøyy:

⁴ —Mänaads yø'ø tsajtøjc jaduhñ jyida'añ. Mädyii hijxtáhndäts jaduhñ cähxø'øgaamb coö hänajty jaduhñ yhabaada'añ.

⁵ Mänitä Jesús yhadsooyy:

—Mniyajcopcø'øwøøjäp hajxy. Cab hajxy myajwiinhøønät.

⁶ Mayyä jäya'ayhajxy min miäwiinhøøna'añ. Jaduhñ hajxy hänajty miäna'ana'añ: “Høøch je'e Cristo.” Mayyä jäya'ayhajxy hänajty jiaanč tehñ miäbøga'añ.

⁷ Coö hajxy mmädoyhädät coö tsip pleetä hänajty xii yaa tøø piädø'øgy, cab hajxy jaduhñ mmäná'anät cooc tyijy ja'a naaxwiimbä hänajty wyiimbida'añ. Homiänaajä tsip pleetä jiadyii.

⁸ Nimiädsibø'øwáanäp hajxy hänajty wiinghagajptjaty. Wiinduhmyhagajpt hujx hänajty ñaxa'añ. Jadáanäbä yuuxøø hänajty wiinduhmyhagajpt. Coö jaduhñ jiada'añii, hijxtahnd jaduhñ cähxø'tsoonaamb coö tsø'ty häyohn høchähgøøñajaty hänajty jiada'añii.

⁹ Mniyajcopcø'øwøøjäp hajxy mänit. Mäjahñdium hajxy hänajty mhida'añ. Xmiadsaambä mmädsip hajxy hänajty. Mänit hajxy jim xyajnøcxa'añ haguyc. Møød jim maa ja'a judíos chajtøjc-hajxiän, xwiobho'ogaamb hajxy hänajty jim. Xyajnøcxaamb hajxy hänajty jim maa ja'a gobiernä wyiinduumhajxiän, je'eguiøxpä coöch mijts xpiawädity. Jímhøch hajxy jaduhñ xmiädiä'agät gobiernäwiinduum.

¹⁰ Hix, cahnä naaxwiimbä hänajty wyiimbityñä, cøxaambä jäya'ay ja'a Diosmädia'agy hajxy miädowa'añ wiinduhmyhagajpt.

¹¹ Y coö hajxy jim xyajnøcxät haguyc, cab hajxy mänit mnädaj mnämáyät waambaty hajxy mhadsówät. Hix, ja'a Dios ja'a mädia'agy hajxy hänajty xmio'owaamb. Cab hajxy hänajty hamdsoo mmädia'aga'añ; ja'a Dioshespíritu hajxy hänajty xyajmädia'agaamb.

¹² Hamiñ haxøpiä jäya'ayhajxy hänajty tu'que'ex ñiñähduga'añii coö hajxy yagho'ogøøjät. Jaanä jaduhñä yhuung hajxy hänajty ñähdugaambä. Ja'a muutsc-häna'c-hajxy, jaanä jaduhñä tieedy hajxy hänajty tiunaambä.

13 Nägøxiä mijtsä jäya'ay xmiähanhada'añ je'eguiøxpä cooçh mijts xpi-awädity. Pero pøn hñajty tøø miee'xtucy, hoy hñajty tøø jia ho'ogy, nähwa'adsaamb hñajty je'e.

14 'Habaadaamb jaduhñ coo ja'a haxøøgpä ca'a hoybä miedsa'añ maa ja'a Diostøjcän —pøn hädaa nocy capxp, ween jaduhñ wyiinjuø'øy—. Mänitä Diostøjc jaduhñ yajma'ada'añii. Coo ja'a haxøøgpä hajxy jaduhñ mhíxät, mänit hajxy päyø'øguiä mnøcxät tunjoot, pønjaty yaa tsänaaby Judeanaaxooty.

15 Pønjaty hñajty hñäaby tøjnähgøxp, ween ñä'ägä päyø'øgy, cap nøcxy tii jiiby yajpädsømy tøgooty.

16 Pønjaty hñajty camjooty, cab jaduhñ jim ñøcxät maa ja'a tiøjcän. Cap nøcxy jiiby tii yajpädsømy, ni wyit ni tii.

17 Jaançh tehñ chaachpøgaambä to'oxiøjc-hajxy hñajty, ja'a hajxy hñajty co'na'awaambä, møød ja'a hajxy hñajty huungyajtsi'tspä.

18 Mmänuu'xtá'agäbä Dios hajxy coo tsø'ty häyohn ween quia'a jadyii coo hñajty jiaançh tehñ tiøøchcä.

19 Jaançh tehñ yhyoyhyä jäya'ayhajxy hñajty chaachpøga'añ. Ni mädyii tsaachpä jaduhñ quia'a mäbaada'añ neby hñajty jiada'añiiñän, ni ja'a jecy näjxäbä, ni ja'a jaac minaambä.

20 Tøø ja'a Dios jaduhñ miäna'añ coo ja'a jäya'ayhajxy hñajty jejcy quia'a tsaachpøga'añ, je'eguiøxpä coo chocy pønjaty jaduhñ tøø wyiimbiy. Coo ja'a Dios häxøpy jaduhñ tøø quia'a mäna'añ, jejquiä jäya'ayhajxy häxøpy chaachpøga'añ. Ni pøn häxøpy quia'a nähwa'adsa'añ.

21 'Coo mijts pøn xñämá'awät coog tyijy ja'a Cristo hñajty jii wiädity, cab hajxy mmäbøgät.

22 Hix, mayyä jäya'ayhajxy hñajty wiädita'añ mäwiinhøhmbä, cooc ty-ijy hajxy hñajty je'e Cristo, møød cooc tyijy hajxy hñajty Dyiosquexiä. Piayajcähxø'øgaambiä hijxtahñd hajxy hñajty hoy-yagjuøñäbä. Jaduhñä jäya'ayhajxy hñajty jia wi'i wyiinhøøna'añii, møød ja'a hajxy hñajty Dioswi-imbíyyäbä.

23 Mniyajcopcø'øwøøjäp hajxy. Jäguemiä hajxy cham nnäma'ay coo hajxy mniyajcopcø'øwøøjät.

24 'Mänitxøøbä, coo ja'a tsaachpä hñajty tøø ñajxnä, mänitä xøø wyiin-goodø'øwahñ møødä po'o.

25 Mänitä mamiadsa'a hñajty quia'awa'añ. Tsäyuyyaamb hñajty jaduhñ, tijaty jim cuhdujtmøød tsajtcøxp.

26 Mänitøch hñajty ngäda'aga'añ jocjooty, høøch ja'a Diosquexypä. Møcmäjaamøødhøch hñajty ngäda'aga'añ. Yajxónhøch hñajty mänit ngäda'aga'añ. Mänitøchä jäya'ayhajxy hñajty may xpia'hee'ptägø'øwa'añ.

27 Mänitøchä nmoonsä tsajpootypähajxy hñajty nguexa'añ coo hajxy jaduhñ quiøxy yajtu'ugmúgät pønjátyhøch hñajty tøø nwiimbiy. Wiin-duhmyhagajpt hajxy hñajty wioomuga'añii.

28 'Høxtahñdsä higueraquepy, coo jaduhñ wiámät, hijxtahñd jaduhñ coo hñajty tøø piøodtägøøñä.

29 Jaanä jaduhñduhmbä, coo ja'a tsø'ty hajxy jaduhñ mhíxät nébiøch naamñä tøø nmädia'agy, hijxtahñd hñajty jaduhñ cooçh hñajty mobädajpä ngädaactägatsa'añ hädaa yaabä naaxwiin, høøch ja'a Diosquexypä.

30 Cøxaamb jaduhñ jiada'añii nébiøch naamñä tøø nmädia'agy, cahnä jäya'ayhajxy hñajty quiøxy ho'ogyñä, ja'a hajxy jäda'ahaty jugyhajpä. Tøyhajt jaduhñ.

31 Cuhdägoyyaambä tsajt møødä naaxwiimbä. Pero tsipcøxp jaduhñ tiøjiada'añ nébiøch cham nmädia'aguiän.

³² 'Ni pøn jaduhñ quia'a najuø'øý mänaa jaduhñ jiada'añii. Jagooyyã Dios nidiuhñ ñajuø'øý, ja'a hajxy nDeedyhájtäm. Ni ja'a Diosmoonsähajxy jaduhñ quia'a najuø'øý, ja'a hajxy jim tsajpootypä. Ni høøch nga'a najuø'øý, høøch ja'a Diosquexypä.

³³ 'Paady, nähix hahixø'ø hajxy mhídät homiänaajä, je'eguiøxpä coo hajxy mga'a najuø'øý mänaa jaduhñ jiada'añii.

³⁴ Jii jäya'ay hñajty tu'ug, coo hñajty ñøcxa'añ jäguemnaax, mänitã mioonsä ñämaayy coo ja'a tiøjc cwieendähájtäxät. Nägøxiä hajxy jaduhñ yaagä nä'ä tuungmooyyã. Jaduhñä tu'jäya'ay ñämäayyãbä coo jim tiúnät maa ja'a tøgħaawän, weenä tøjc yaghawa'açh jopy; tsuu jadähooc yhağøøguiumbät.

³⁵⁻³⁶ Ja'a cudøjcä mioonsähajxy, cab hajxy hñajty ñajuø'øý mänaa ja'a wyiindsønñhajxy hñajty miejtstägatsa'añ, pø coodsøññäp hñajty jaduhñ, o pø tsuhmdä hñajty, o pø tu'tseey-yaaxø'øgy hñajty, o pø jobøññäp hñajty. Nähix hahixø'ø ja'a wyiindsønñ hajxy jaduhñ yhañixät. Pø caj, coo hajxy jaduhñ jaguiapxiä ñähmejtspedøjät, wehñdä hajxy hñajty mia'ay. Jaduhñ mäwíñäts mijtspä, cab hajxy jaduhñ mnajuø'øý mänäajøch yaa ngädaactägatsa'añ hädaa yaabä naaxwiin. Paady hajxy nähix hahixø'ø homiänaajä mnä'ägä hídät.

³⁷ Jaduhñhøchä jäya'ayhajxy nägøxiä nnämaabiä coo hajxy nähix hahixø'ø ñä'ägä hídät homiänaajä.

14

¹ Mejtsxøø ja'a pascuaxøø hñajty quia'a habaady mänaa ja'a judíos tsajcaagy hajxy hñajty quiaayän, ja'a cajpä tsoomiøødpä. Ja'a teedywiindsønñhajxy, møødä häna'c-hajxy, ja'a hajxy hñajty jii by yajñähixøøbiä tsajtøgooty, cojyquiapxytiuumb hajxy hñajty jaduhñ nebiä Jesús hajxy yajtsumøjät høhñda'agymiädia'agyhaam, jaduhñ hajxy jaduhñ hoy ya-
jyagho'ogøjät.

² Mänit hajxy näje'e ñiñämaayyã:

—Cab hajxy tsøc nej jatcøøyyäm coo ja'a cu'ug hajxy jaduhñ xñä'ä nãhbädø'cämät.

³ Tøø ja'a Jesús hñajty yhäda'agy Betania. Jim hñajty miädsuugay maa ja'a Simón tiøjcän, ja'a hijty leprapa'ammøødpä. Mänitã to'oxiøjc tu'ug miejch. Jimä nardoperfume hñajty quio'øgonhaty alabastro-vidriojooty. Jaançh tehñ chowä nardoperfume hñajty ñøcxy. Mänitã to'oxiøjcä parfume-vidrio puihy. Mänitã Jesús ja'a parfume yajcuhtemøøyyã.

⁴ Mänitã jäya'ayhajxy näje'e jiootma'ty, ja'a hajxy hñajty jim pahäñaabiä. Mänit hajxy ñiñämaayyã:

—Cap yø'ø parfume jaduhñ cu yaghäyooyy.

⁵ Coo jaduhñ cu ñä'ägä too'cy, tsoobaadaamb yø'ø hijty, tãgøøgmägo'x-xøøguduñ. Jimä häyoobädøjcä chow hajxy jaduhñ cu miooyyã coo jaduhñ cu ñä'ägä too'cy.

Jaduhñä to'oxiøjc yhojjä.

⁶ Mänitã Jesús miänaañ:

—Weends yhity. Ca'a hajxy mwi'i yhojy. Nébiøch yø'ø jaduhñ tøø xtiuñän, cab jaduhñ ñejpiä; hoy jaduhñ.

⁷ Homiänaajä mijtsä häyoobäjäya'ay mhixy. Homiänaajä hajxy jaduhñ mbuhbédät. Pero høøch, cábøch mijts jejcy xyhixa'añ.

⁸ Xwyiingudsähgøøbiøch yø'øya'ay jaduhñ, páadyhøchä parfume jaduhñ xyajcuhtemøøyy. Jaduhñ miäbaady nej cooçh häxøpy tøø nho'oguiän. Jaduhñhøch yø'ø hijty xyajñähdema'añ.

9 Majatiä Diosmädia'agy wiädita'añ wiinduhmyhagajpt ja'a hөөчхөxpä, jaduhñä jäya'ayhajxy miädia'aga'añ nébiöch yө'öya'ay naamnä төө xtiuñ. Jaduhñ yө'ө homiänaajä jiahmiedsäanänä. Төyhajt jaduhñ.

10 Jimä Jesús ja'a jiamiөөд hänäjty tu'ug xiөhaty Judas Iscariote, ja'a hajxy hänäjty nämajmetspä. Mänitä Judas ja'a teedywiindsön hoy miөөdcojyquiapxytiuñ coo ja'a Judas ja'a Jesús hänäjty tiooga'añ.

11 Coo ja'a teedywiindsönhajxy jaduhñ miädooyy, mänit hajxy jaduhñ jiaanch tehñ xioondaacpөjcy. Mänitä Judas yajwiinwaanөөyyä coo xädө'өн hänäjty mio'owa'añii. Mänitä Judas tiägөөyy wiinmaabiä nebiä Jesús paquiä yajcө'өdägө'өwät.

12 Mänitä pascuaxөө yhabaatnä. Jaduhñä judíoshajxy hänäjty quiuhdujthaty coo tsajcaagy hajxy naxy quiaay, ja'a cajpä tsoomiөөдäbä. Jaduhñ hajxy hänäjty quiuhdujthajpä coo meeghuung hajxy naxy yoxы ja'a pascuaxөөjooty. Mänitä Jesús ja'a jiamiөөд miäyajtөөwä:

—Maada'a yhooyä coo pascuaxөө hajxy häyaa nwiindsuugáayyämät.

13 Mänitä Jesús ja'a jiamiөөд nämetsc ñämaayy:

—Nөcx hajxy jim Jerusalem. Jimä jäya'ay hajxy tu'ug mbaada'añ нөөгөн.

14 Je'eds hajxy mbadu'ubөгäp. Mänit hajxy mbadөjtägө'өwät. Mänitä cudөjc hajxy mnämä'awät: “Ja'a nWiindsön hөjts jaduhñ төө xwyiinguexы coo hөjts nyajtөwät maa hөjtsä pascuaxөө häyaa tsuu nwiindsuugáyät.”

15 Mänit mijtsä cudөjc cuarto нөcxy xyajnähixө'өwa'añ nähbettөjcөxp. Jaanch tehñ quiäruundä ja'a cuarto jaduhñ möөд yajxonä. Jimä cay hu'ugy hajxy mnähix mhahixө'өwät coo hajxy jim ndsuugayáanäm —nөmä Jesús miänaañ.

16 Mänit hajxy nämetsc jiaanch нөcxy jim cajptooty. Jiaanch paat hajxy jaduhñ neby hajxy hänäjty төө ñäma'ayiiñ. Mänitä tsuugay hajxy tiägөөyy nähix hahixөөbiä.

17 Coo quioodsөөñä, mänitä Jesús hajxy jim ñөcxy maa ja'a pascuaxөө hajxy hänäjty wyiindsuugaya'añän, möөдä jiamөөdhajxy ja'a jaac nämajcpä. Mänit hajxy tiägөөyy caabiä.

18 Mänitä Jesús miänaañ:

—Tú'ughөch mijts mjamiөөд xñäxө'өwө'өwa'añ. Quipxy hajxy je'e cham xmiөөdcaamiújcäm. Төyhajt jaduhñ —nөmä Jesús miänaañ.

19 Mänit hajxy nägөxiä jiootmadiägөөyy. Mänit hajxy tiägөөyy niñämäayyäbä:

—Nej, hөөчхө je'eda'a tyijy xñänөөmbä.

20 Mänitä Jesús yhadsooyy:

—Mijts mjamiөөд jaduhñ tu'ug jatcө'өwaamb, näguipxiä tsajcaagy hajxy jaduhñ jiiby xmiөөdpaguhmä'tsäm texyjooty.

21 Hөөчхө, ja'a Diosquexypä, jaduhñhөch njada'añ nhabeta'añ nepy jim myiñän cujaay maa ja'a Diosmädia'aguiän. Төjiadaambä Diosmädia'agy jaduhñ. Pero ja'a cráajөch jaduhñ xñähdugaambä, jaanch tehñ yhooy hajduhñ chaaөhpөga'añ. Maas hoy häxөpy coo quia'a nä'ägä naaxwiimbädsөөmy —nөmä Jesús miänaañ.

22 Caabyñä ja'a Jesús hajxy hänäjty, mänitä Jesús ja'a tsajcaagy quionө'cy. Mänitä Dios ñämaayy: “Dioscujú'uyäp.” Mänitä jiamiөөдä tsajcaagy nägөxiä yajnäguidөөyy. Mänit miänaañ:

—Cay hädaa hajxy; hөөчхө nni'x ngopc hädaa —nөmä Jesús miänaañ.

23 Mänitä Jesús ja'a vaso quionө'cy, ja'a hänäjty vinomөөdpä. Mänitä Dios ñämäaguumbä: “Dioscujú'uyäp.” Mänitä Jesús ja'a vino yhuuctsohñ. Mänitä jiamiөөд miooyy. Nägөxiä hajxy jaduhñ yhuucy.

24 Mänitä Jesús miänaangumbä:

—Høøch nnø'ty hädaa. Hijxtahnd hädaa jaduhñ cooçhä nnø'ty nya-jxee'xa'añ cooçhä jäya'ayhajxy hñajty nnähho'tu'uda'añ. Jadúhñhøçhä cuh-dujt nyajtødiägø'øwa'añ, ja'a Dios ja'a Abraham jecy miøødyajcuhdújcäbä.

25 Tøyhájthøch jaduhñ nnämä'awät, cábøçhä vino nhuuctägatsa'añ høxtä cóonøch hñajty jim tøø nnøcxtägach maaçhä nDeediä wyiinduumän. Mänítøchhä vino jemýbiä nhuucmadsa'añ —nømä Jesús miänaañ.

26 Mänitä Jesús ja'a Dioshøy hajxy yhøøyy, møødä jiamiøødtøjc. Mänit hajxy jim chohñ. Mänit hajxy jim ñøcxy maa ja'a tun hñajty xiøhatiän Olivos.

27 Mänitä Jesús ja'a jiamiøødtøjc ñämaayy:

—Nägøxiøch mijts xñähgue'ega'añ, je'eguiøxpä cooç nmädia'agy hajxy xquia'a mabøgaanä. Jaduhñ jim myiñ cujaay maa ja'a Diosmädia'aguiän: “Nyagho'ogáambiøçhä meegcueendähajpä. Cøxaambä meeghajxy piäyø'øga'añ. Xii yaa hajxy ñøcxø'øwa'añ.”

28 Cooç hñajty tøø nho'ogy, mänítøch jadähooc njujypiøjtägatsa'añ. Mänítøch jim nnøcxa'añ Galilea. Mänítøch mijts jim nøcxy xpiaada'añ —nømä Jesús miänaañ.

29 Mänitä Pedro ja'a Jesús ñämaayy:

—Høøch mabøcypä, cábøch miich mänaa nbuhwa'adsa'añ, hoy miich hajxy nägøxiä xjia puhwá'adsät.

30 Mänitä Jesús yhadsooyy:

—Tøyhájthøch miich nnämä'awät, häyaa coods miich tægøøghooc mniguiugapxa'añii cooç tyijy xquia'a hixiä.

31 Pero Pedro, tehngajnä je'e jiaac miänaañ:

—Cábøch mänaa nniguiugapxa'añii cooç tyijy miich nga'a hixiä, hóyhøch miich quipxy nja møødhó'ogät —nømä Pedro miänaañ.

Jaduhñ hajxy nägøxiä piahadsoobä.

32 Mänitä Jesúshajxy jim nøcxy maa hñajty xiøhatiän Getsemaní. Mänitä Jesús ja'a jiamiøødtøjc ñämaayy:

—Jiids hajxy huuc häña'aw, nøcxy nhuuc Diospa'ya'axy.

33 Mänitä Jesús ja'a Pedro hawiing miøødnøcxy, møødä Santiago, møødä Juan. Mänitä Jesús hoyhoy jiaanç tehñ jiootmabiøjcy.

34 Mänitä Pedrohajxy ñämaayyä:

—Hoyhóyhøch jaduhñ njaanç tehñ jiootmayhaty. Høxtä ho'ogáambøch nnijiäwø'øyii. Huuc mähmø'øw hajxy yaa. Cab hajxy mmaahó'ogät. Jujcy hajxy mhídät —nømä Jesús miänaañ.

35-36 Mänitä Jesús weeñtiä jiaac nøcxy. Mänit jaduhñ miägutscädaacy. Mänitä Dios tiägøøyy mänuu'xtaACPä: “Teedy, mee'x, coo miich jaduhñ cu mga'a mänaañ, cábøch häxøpy ndsaachpøga'añ nébiøch cham nmänaa'añän. Pero cábøchhä nguhdujt yhídät nébiøchhä njoot jia tsoquiän. Miichä mguhdujt jaduhñ nä'ägädä hidaamb.”

37 Mänitä Jesús jim ñøcxtägajch maa ja'a Pedrohajxy hñajty tøø miähmø'øyän. Coo jim miejch, mänit jaduhñ yhiijy coo hajxy hñajty tøø quiøxy maaho'ogy. Mänitä Pedro ñämaayyä:

—Simón, nej, mmaabä. Nidu'hora miich tøø mga'a mee'xtucy.

38 Jujcy hajxy hit. Tehngajnä ja'a Dios hajxy mba'yá'axät. Jaduhñä møjcu'ugong hajxy xquia'a jøjcaxø'øwät. Jia tsojpiä mjoothajxy jaduhñ coo hajxy jujcy mhídät, pero cabä mni'x ja'a mgopc-hajxy jaduhñ miee'xtuga'añ.

39 Mänitä Jesús ja'a Dios hoy pia'yáxcumbä. Jaduhñ jadähooc ñämänaañøøgiumbä.

40 Mänit jadähooc miéjtscumbä maa ja'a Pedrohajxy hänajty tøø miähmø'oyän. Tøø hajxy hänajty miaahó'cumbä. Hix, tøø hajxy hänajty jiaanč tehñ yhanuu'xø'oy. Coø hajxy jaduhñ yujxä, cab hajxy hänajty ñä'ägä najuø'oy waamb hajxy yhadsówät.

41 Coø ja'a Jesús jaduhñ miejch ja'a miädägøøghoocpä, mänit miänaañnä:

—Nej, je'enä hajxy mwi'i mia'ayñä. Ween tiuhñä. Tøø yhabaatnä coočä cahwiindøyhäna'c-hajxy xquiø'ødägø'owaannä, høøch ja'a Diosquexypä.

42 Pädø'näts hajxy. Jam hajxy. Ximä craa myiñ ja'ač jaduhñ xya-jcø'ødägø'owaambä.

43 Jimä Jesús hänajty miädia'agyñä, mänitä Judashajxy miejch, møødä majiäya'ay, haagä espada-cap. Näje'e hajxy hänajty wiojptcappä. Ja'a teedywiindsønñhajxy jaduhñ mäguejx, møødä häna'c-hajxy jiiby yajñähixøøbiä tsajtøgooty, møødä majjäya'adiøjc-hajxy.

44 Tøø ja'a Judashajxy hänajty quiojyquiapxytiñ: “Ja'ač hänajty ndsu'xaambiä, je'e hänajty je'e. Mänit hajxy mmädsät. Mänit hajxy nøcxy mdsumy”, nømä Judas hänajty tøø miäna'añ.

45 Mänitä Judas ja'a Jesús ñämejch. Mänit ñämaayy:

—jWiindsøn!

Mänitä Judas ja'a Jesús jiaanč tsu'xy.

46 Mänitä Jesús miajtsä.

47 Ja'a Jesús ja'a jiamiøød tu'ug, jimä espada hänajty miøjnädawhaty. Coø jaduhñ yhiixy coø ja'a Jesús hänajty tøø miächii, mänitä yhespada jiuu'pädsøømy. Mänitä teedywiindsønä mioonsä tu'ug tiaatspujxtuutä.

48 Mänitä Jesús ja'a majiäya'ay ñämaayy:

—Tiich hajxy jaduhñ coø tøø xñämiñ espada-cap wojptcap. Tiich hajxy xyhixy, méé'tspäjä.

49 Tiich hajxy jim coø xquia'a majtspä tsajtøgooty. Nébyhøch hajxy jaduhñ høxtä yaa tøø xñämiñ. Nej, ca'a, jabom-jabomhøch hijty jim nøcxy nya-jñähixø'oyä. Pero páadyhøch chamñ njaty nhabety, jaduhñä Diosmädia'agy tiøjiädät ja'a høøchcøxpä.

50 Nidiuhmä Jesús hänajty jiaac mädia'agy. Tøø ja'a jiamiøødhajxy hänajty quioxy päyø'ogy.

51 Jimä høxcujc-häna'c ja'a Jesús hänajty tu'ug piawädijpä, poob-wit-nähcäjeenä. Mänit jaduhñ jia madsaanä.

52 Mänitä poobwit yajniñähñajptuutä. Nähwa'ads høxwa'ads je'e piäyø'cy.

53 Mänitä Jesús yajñøcxä maa ja'a teedywiindsønñ wyiinduumän, ja'a jaac tehñ miøjpä. Mänitä teedywiindsønñhajxy jiaac tehñ miejch, møødä majjäya'adiøjc-hajxy, møødä häna'c-hajxy jiiby yajñähixøøbiä maa ja'a tsajtøjcän.

54 Jimä Pedro hänajty jäguemjuøøby piadäna'ay maa ja'a teedywiindsønñ tiøjwiingøn. Mänit jim piahøxtaacy maa ja'a hadänaabiähajxy hänajty jiøømba'axamiän.

55 Jimä teedywiindsønñhajxy hänajty jia wi'i wyiinmahñdyhaty nebiä Jesús hajxy yajyagho'ogøøjät. Pero cab hajxy hänajty ñä'ägä wiinmahmybiaady.

56 Hix, hoyyä Jesús hajxy hänajty nämay jia nähøønø'oy, wiingaty hajxy hänajty miädia'agy; cab hajxy hänajty tiu'ugmädia'aguiä.

57-58 Mänitä wiinghäna'c-hajxy tiänaayyø'cy; nømñ hajxy je'e miänaambä:

—Tøø højts jaduhñ nmädoy coø jaduhñ miänaañ: “Hädaa tsajtøjc, jäya'ayhajxy hädaa hädiuun. Pero høøch, nyajñajtsjidø'owäbøch hädaa. Cudägøøgxøøyyøchä wiingpä nhädiuundägätsät. Ca'a jiäya'ayhajxy je'e hädiúnäp” —jaduhñ hajxy je'e yhøhñdaacpä.

59 Ni je'e hajxy hänajty quia'a tu'ugmädiä'aguiäbä.

⁶⁰ Mänitä teedywiindsón tiänaayyø'cy majiäya'ayhagujc, ja'a tehñ miøjpä. Mänitä Jesús ñämaayyä:

—Nej, cab jaduhñ mnä'ä hadsowa'añä waambaty hajxy miäna'añä.

⁶¹ Pero cabä Jesús waamb ñä'ägä hadsooyy. Mänit ñämäayyägumbä:

—Nej, tøyhajt jaduhñä coo miičhä Dios tøø xquixiä, Nej, miičhä Dios xyHuunghajpä.

⁶² Mänitä Jesús yhadsooyy:

—Tøyhajt jaduhñ. Høøch je'e. Xyhixáambøch mijts jaduhñ cooçh jim nhäña'awa'añ Dioswiinduum, maa ja'a yhaoooyhaampiän. Mänitøch hajxy jadähooc xyhixáangumbä cooçh hñajty yaa ngädaactägatsa'añ hädaa yaabä naaxwiin. Jocijotyhøch hñajty nmänaca'añ.

⁶³ Mänitä teedywiindsón ja'a wyit quiøø'ch. Paady jaduhñ jiatcøøyy coo hñajty jiaanç tehñ jiootma'ady. Mänit miänaañ:

—Tii testigo hajxy jaduhñ nnä'ä jaac wáanämät.

⁶⁴ Tøø hajxy jaduhñ mhamdsoo mädoy coo ja'a Dios tøø miägapxtägo. Waamb hajxy jaduhñ mmäna'añ, neby hajxy ndúunämät.

Haagä jaduhñ hajxy miänaañ cooc tyijy ja'a Jesús tøø quiädieey, møød cooc ween yagho'ogyii.

⁶⁵ Mänitä Jesús tiägøøyyä wiingutsujøøyyäbä. Mänit wyiinguxødsøøyyä. Mänit wyiingutexøøyyä. Mänit ñämaayyä:

—Najuø'ow pøn xquiojx.

Mänitä hadänaabiädøjc ja'a Jesús hajxy wyiingula'abøøyy.

⁶⁶⁻⁶⁷ Y ja'a Pedro, jiiyby hñajty je'e hanaaxyp jiøømba'axamy maa ja'a tøjwiingän. Mänitä teedywiindsónä qyixymoosä tu'ug miejch maa ja'a Pedro hñajtiän. Coo ja'a Pedro jaduhñ yhiixä, mänit wyiinhee'ppejtä. Mänit ñämaayyä:

—Naxy miičh yø'ø Jesús mmøødwädity, túhmäts. Haagä Nazaret hajxy mdsooñ nämetsc, túhmäts.

⁶⁸ Mänitä Pedro ñijiøgapxä:

—Ni nga'a híxiøch yø'ø. Ni nga'a najuø'øyhøch jaduhñ tiich jaduhñ xjia wi'i yajmøødmädiaacp —nømä Pedro yhøhndaacy.

Mänitä Pedro quiuraabädsøømy. Mänitä tseey tu'ug jiaanç yaaxø'cy.

⁶⁹ Mänitä quixymoosä ja'a Pedro yhiixcumbä. Mänitä jäya'ayhajxy ñämaayyä, ja'a hajxy hñajty jim jaac padänaabiä:

—Xii Jesús jiamioød tu'ug. Je'e yø'ø —nømä quixymoosä miänaañ.

⁷⁰ Mänitä Pedro jadähooc ñiguiugäpxägumbä. Cab jaduhñ ñä'ä jegøøyy, mänitä Pedro ñämäayyägumbä:

—Mbawädiipy miičhä Jesúsä, túhmäts. Nyo'mädooby højts jaduhñ coo miičh jim mdsooñ Galilea.

⁷¹ Mänitä Pedro jadähooc miänáangumbä:

—Tøyhajt, cáboch jaduhñ nnä'ägä híxiä pøn hajxy jaduhñ mja mädiaacypy.

Tähooccapxiä ja'a Pedro jaduhñ miänaañ cooc tyijy ja'a Jesús hñajty quia'a nä'ägädä híxiä.

⁷² Mänitä tseey miämetsc-hoocpä yáaxcumbä. Mänitä Pedro jiahmiejtstaacy coo ja'a Jesús hñajty tøø miäna'añ: “Cahnä tseey hñajty miämetsc-hoocpä ya'axy, tøø miičh hñajty tägøøghooc mniguiugapxyii cooçh miičh hñajty xquia'a híxiä.” Mänitä Pedro jiøøguioo'ty coo ja'a tseey miämetsc-hoocpä jiaanç yaaxy.

15

¹ Coo jiobøøyy, mänitä teedywiindsønhajxy nägøxiä yhamugøøguiumbä, møødä majjäya'adiøjc-hajxy, møødä häna'c-hajxy jiiyby yajnähiixøøbiä

tsajtøgooty. Mänit hajxy quiojyquiapxytiuuñ nebiä Jesús hajxy hānajty tiuna'añ. Mänitä Jesús hajxy quio'øxojch. Mänitä Pilato hajxy hoy yajcø'ødägø'y maa je'e hānajty guiobiernāhatiān.

² Mänitä Pilato ja'a Jesús miāyajtøyy:

—Nej, tøyhajt jaduhñä coo miičhä judíos hajxy xguiobiernāhatiä.

Mänitä Jesús yhadsooyy:

—Tøyhajt jaduhñ.

³ Madiu'u ja'a teedywiindsøn ja'a Jesús hajxy hānajty jia wi'i ñäxø'øwø'y. Pero cabä Jesús hānajty waamb ñä'ägä hadsooyy.

⁴ Mänitä Pilato miänāangumbä:

—Nej, caj mhadsowa'añä. Madiu'u miičhä hajxy xjia wi'i ñäxø'øwø'y —nømä Jesús ñämaayyä.

⁵ Pero cabä Jesús waamb ñä'ägädä hadsooyy. Jiaančh tehñ yagjuøyy ja'a Pilato jaduhñ coo ja'a Jesús jaduhñ quia'a nä'ägädä hadsooyy.

⁶ Jaduhñä Pilato hānajty jomøjt-jomøjt quihdujthaty coo xøø hānajty jiadyyi, mänitä tsumyjiäya'ay naxy tu'ug yajpadsømy, ja'a judíos hajxy hānajty yajnāhdijpiä.

⁷ Jiibiä jäya'ay hajxy hānajty näje'e chumyčhāna'ay. Tsip hajxy hānajty tøø yagjadyii. Tøø hajxy hānajty miäjäya'ay-yagho'ogy. Tu'ugä tsumyjiäya'ay hānajty xiøhaty Barrabás.

⁸ Coo ja'a cu'ughajxy jim miejch maa ja'a Pilato wyiinduumän, mänitä Pilato hajxy jaduhñ ñämaayy coo ja'a tsumyjiäya'ay tu'ug yhøxmädsät.

⁹ Mänitä Pilato yhadsooyy:

—Nej, jaduhñ hajxy mmāna'añä coočhä Jesús nhøxmädsädä, ja'a tyijy hajxy mgobiernāhajpiä.

¹⁰ Paadiä Pilato jaduhñ miänaañ, ñajuøøby hānajty je'eduhñ tiiguiøxpä ja'a Jesús coo yajcø'ødägøyyä ja'a teedywiindsøn. Paadiä Jesús jaduhñ yajcø'ødägøyyä je'eguiøxpä coo ja'a miädia'agy hānajty quia'a yajmädsójcäxä.

¹¹ Mänitä teedywiindsøn ja'a cu'ug hajxy jiojcapxøyy coo ja'a cu'ughajxy jaduhñ miäná'anät coo ja'a Jesús ween quia'a høxmächii, weenä Barrabás ñä'ägä høxmächii. Coo ja'a cu'ughajxy jaduhñ jiaančh mēnaañ,

¹² mänitä Pilato ja'a cu'ug jadähooc miāyajtøyy:

—Y yø'ø Jesúsäts, ja'a tyijy hajxy mgobiernāhajpiä, neby hajxy yø'ø mya-jnāhdijy nébiøch yø'ø ndúnät.

¹³ Mänitä cu'ughajxy møc yaaxy:

—Møjpahbet hajxy cruzcøxp.

¹⁴ Mänitä Pilato miänāangumbä:

—¡Pero tisän! Tii tøø quiädieey.

Mänit hajxy maas møc yáaxcumbä:

—Møjpahbet hajxy cruzcøxp.

¹⁵ Mänitä Pilato jiaančh mēnaañ coo ja'a Barrabás hajxy ween nøcxy yajpadsømy pujxtøgooty. Hix, cabä Pilato ja'a cu'ug hānajty yagjootma'ada'añ. Mänitä Pilato miänaañ coo ja'a Jesús wiobho'ogøjät. Mänit miänāangumbä coo ja'a Jesús hajxy nøcxy cruzcøxp miøjpahbety.

¹⁶ Mänitä soldado ja'a Jesús hajxy yajnøcxy maa ja'a haguycän. Mänitä soldado ja'a jiamiøød hajxy quioxy møjyaaxy.

¹⁷ Mänitä Jesús hucywyit yajnāhtämoogøyyä. Mänitä hptycorona yajcuh-jenøyyä.

¹⁸ Mänitä Jesús tiägøyyä wiinyáaxäbä:

—¡Viva ja'a Jesús, ja'a judíos hajxy jaduhñ guiobiernāhajpiä! ¡Viva!

Jaduhñä Jesús hānajty wyiinwooñii.

19 Mänit hoyhoy wiojpa quiuhduum paxyhaam. Møød wyiingutsujøøyyä. Mänit wyiinjiicädaacä. Jaduhnä soldadohajxy hänajty jiatcø'ø y nebiä wyiingudsähgøøbiän.

20 Pero wyiinwohmbiä Jesús hajxy hänajty jaduhn. Mänitä hucywyit hajxy yajtsijy. Mänitä yhamdsoo wit yajpøgøøyyäxä. Mänit hajxy yajnøcxy maa hajxy hänajty miøjpahbeda'añän.

21 Mänitä jäya'ay hajxy tu'ug jiøjcubaadøøyy. Camjooty hänajty tøø yhoy. Simón hänajty xiøhaty. Jim hänajty choon Cirene. Jue'e yhuunghajxy hänajty xiøhaty Alejandro møødä Rufo. Jimä Jesús cruz hänajty chømä. Mänitä Simón hadsip ñämaayyä coo ja'a Jesús ween piuhdsømø'ø y. Mänitä Simón ja'a cruz jiaançh tsømø'cy.

22 Mänitä Jesús yajmejtsä maa ja'a nähgaphuung hänajty xiøhatiän Gólgota. Jaduhnä nähgaphuung hänajty quiähxø'øgy nebiä ho'ogyjiäya'aguiopcän, paady hajxy jaduhn yajxøbejty Gólgota.

23 Mänitä Jesús vino jia mooyyä. Mirra ja'a vino hajxy hänajty tøø yajmädemø'ø y. Pero cabä Jesús jaduhn ñä'ägä huucy.

24-25 Mänitä Jesús miøjpahbejtä cruzcøxp. Møjpetyxiøø hänajty jaduhn. Tøø ja'a Jesús ja'a wyit hänajty jadähooc yajtsijjähä. Mänitä soldado ja'a Jesús ja'a wyit hajxy tiägøøyy yajniGUIUHÄYØ'cäbä.

26 Mänit hajxy jim yuugjahy cruzcopcuhduum tiiguiøxpä ja'a Jesús jaduhn coo miøjpahbejtä: “Hädaa ja'a judíoshajxy guiobiernähajpy”, nøm hajxy jim quiujahy.

27 Mänitä mee'tspähajxy nämetsc miøjpahbéjtäbä. Tu'jäya'ay miøjpahbejtä maa ja'a Jesús yhahooyhaampiän. Jatu'ug miøjpahbéjtäbä maa ja'a Jesús yhanajtyhaampiän. Cujcä Jesús jaduhn hoy piäda'agyii.

28 Coo ja'a Jesús ja'a mee'tspä jaduhn näguipxy miøødho'cy, jaduhnä Diosmädia'agy tiøjajty maa jaduhn myiñän cujaay: “Haxøøghäna'c jaduhn pianänøømä.”

29 Ja'a jäya'ayhajxy hänajty jaduhn jim naxøøbiä, høxtä yagjuøøby hajxy hänajty coo ja'a Jesús hajxy jim yhijxy cruzcøxp. Møød hajxy hänajty wyiinwoon:

—Ja'a, miiçh mahñdy ja'a tsajtøjc mwi'i yagjidaamby, y cudägøøgxøøyyä mahñdy miiçh je'e mhädiuundägätsät.

30 Pø tøy miiçh møcmäjaa mjaançh møødä, tiids miiçh jim coo mga'a mänacy cruzcøxp. Jaduhnäts mbäyø'øgät —nømä Jesús ñämaayyä.

31 Jaanä jaduhnä teedywiindsøñhajxy hänajty miäwiingapxpejpä, møødä häna'c-hajxy hänajty jim yajnahixøøbiä maa ja'a tsajtøjcän. Jaduhn hajxy hänajty ñiñäma'ayii:

—Tøø yø'ø wiinghäna'c may yajnahwa'açh, pero caj yø'ø hamdsoo hoy yajniñähwa'adsa'añii. Jaduhn hijty ñibiäda'agyii nebiä Dioshuungän. Jaduhn hijty niñänømyii cooc tyijy ja'a judíoshajxy guiobiernähaty.

32 Mänit hajxy häyaa njaançh mæbøjcämät, nägooyyä jim miänácät cruzcøxp. Jaanä jaduhnä mee'tspähajxy hänajty miäwiingapxpejpä, ja'a Jesús hajxy hänajty näguipxy tøø miøødmøjpahbedyijäbä.

33 Nägooyyä quiujyxiøøjøøyy, mänit jaduhn cøjx wyiingoodsø'ø y. Tägøøghora jaduhn yhiyty wiingoods.

34 Coo ja'a xøø jaduhn wyiinajtúutcumbä, mänitä Jesús møc yaaxy: “Eloi, Eloi, lema sabactani.” Jaduhn miädia'agytiägø'ø y: “Diosteedy, Diosteedy, tiich coo tøø xñähgue'egy.”

35 Jimä jäya'ayhajxy hänajty näje'e miähee'pna'ay. Coo hajxy jaduhn miädooyy, mänit hajxy miänaañ:

—Mäadow, Elíasäda'a møjyáaxäp.

³⁶ Mänit tu'jäya'ay esponja hoy quioñ päyø'øguiä. Mänit jilby piama'tsnajxy xunvinojooty. Mänitä esponja yujxojch paxyjøbhaam. Mänitä Jesús yagha-gaabøøyyä coo jaduhñ wyiinnmúgät. Mänit jaaya'ay miänaañ:

—Tsøc huuc híxäm pø minaam̄bä Elías, pø yajmānacāan̄bä Jesús cruzcøxp.

³⁷ Mänitä Jesús møc yáaxcumbä. Mänit yho'nä.

³⁸ Tuunä ja'a Jesús jaduhñ ñä'a ho'cy, mänitä tsajtøjc-hadøødiujt cu-jjiä quioø'tswa'xy. Quiuhduum chohn̄daacy, høxtä yhoxhaam jaduhñ yhagøødsøyy.

³⁹ Jimä capitán ja'a Jesús hānajty tu'ug wyiindāna'ay. Coo yhiijxy coo ja'a Jesús hānajty tøø yho'ogy, mänit miänaañ:

—Tøyhajt yø'øduhñ hijty Dyioshuungä.

⁴⁰ Jimä tajiäya'ayhajxy hānajty naje'e miähee'pna'ay jäguemjuøøby. Jimä María hānajtypä, ja'a hānajty jim̄ tsohm̄bä Magdala, møødä Salomé. Ja'a María, ja'a Santiago møødä José tiaj, jim̄ hānajty je'ebä. Ja'a muutspä Santiago jaduhñ ñānøøm̄by.

⁴¹ Hädaa tajiäya'ayhajxy, quipxiä Jesús hajxy hānajty tøø piawädity jim̄ Galilea. Tøø hajxy hānajty piuhbety mānaa hānajty jim̄ tøø yhitiän. Y coo ja'a Jesús jaduhñ piejnä Jerusalén, quipxy hajxy piabejty, näguipxy møødä wiingjäya'ayhajxy nāmāy.

⁴²⁻⁴³ Ja'a viernes hānajty tsuujøøby. Ja'a poo'xxiøø hānajty tsohnda'agaam̄b, ja'a pascuaxøø. Ñähix yhahixøøbiä judíoshajxy hānajty ja'a pascuaxøøgøxpä. Jimä jäya'ay hānajty tu'ug chooñ Arimatea. José hānajty xiøhaty. Jim̄ hānajty miøjtuungmøødä tsajtøgooty. Jaan̄ch teh̄m yhojiäya'ayä José hānajty. Jiøbhijxyp hānajty jaduhñ coo ja'a Dios ja'a møcmājaa hānajty yajcāhxø'øga'añ. Mänitä José ja'a Pilato ja'a Jesús ñaaxni'x hoy miäyujwaan̄ä. Hix, cabä José ja'a Pilato hānajty chāhgø'øy.

⁴⁴ Cahnä Pilato hānajty miädoyhatyñä coo ja'a Jesús hānajty tøø yho'nä. Yagjuøøyy je'eduhñ coo ja'a Jesús paquiä yho'cy. Mänitä Pilato ja'a capitán miøjyaaxy. Mänit miäyajtøøyy mäduhñajtä ja'a Jesús yho'cy.

⁴⁵ Coo ja'a Pilato jaduhñ yhawāan̄axä coo ja'a Jesús hānajty tøø jiaan̄ch ho'ogy, mänit miänaañ coo ja'a José ja'a ho'ogyjiäya'ay ween yajmānacy cruzcøxp.

⁴⁶ Mänitä José sávana hoy jiuy. Mänitä Jesús hoy yajmānacy cruzcøxp. Mänit ñāhbijty ñāhmojch sávanahaam. Mänit hoy yajnaaxtägø'øy tsaajutjooty. Mänitä tsaajut ja'a tsaa hajxy yaghadäguejtägooyy.

⁴⁷ Jimä Maríahajxy hānajty miähee'pna'ay, møødä Magdala-tsohm̄bä, møødä José tiaj.

16

¹ Coo ja'a poo'xxiøø hānajty tøø ñajxnä, mänitä María perfume hajxy hoy jiuy, møødä Magdala-tsohm̄bä, møødä Santiago tiaj, møødä Salomé. Ja'a Jesús ja'a perfume hajxy hānajty yajnähjaaxaam̄by.

² Cujaboom jopy ja'a Maríahajxy jim̄ ñøcxy maa ja'a Jesús hānajty tøø ñaaxtägø'øyän. Näxøø hānajty je'e. Tøø ja'a xøø hānajty piädsøøm̄nä.

³ Tu'haamnøcxpā hajxy tiägøøyy niñāmāyyäbä:

—Pøñä tsaa häyaa hadäguejtú'udäp.

⁴ Teh̄m miejtsp hajxy hānajty jim̄, mänitä tsaajut hajxy yhiijxy coo hānajty yhawa'adsän. Tøø häna'cä tsaa hānajty yagjua'açh, hoyyä tsaa hānajty jia cruundä.

⁵ Coo hajxy jiiby chaajuttägøøyy, mänitā muutsc-häna'c hajxy tu'ug yhiixy. Jiiby hänajty yhäñ'a'ay hahooyhaamby. Yomybioobwit hänajty miøød. Coo ja'a Maríahajxy jaduhñ yhiixy, mänit hajxy chähgøøyy.

⁶ Mänit hajxy ñämaayyā:

—Ca'a hajxy mdsähgø'øyy. Ja'a Jesús hajxy mhøxtaaby, ja'a jim tsohm̄bä Nazaret, ja'a tøø miøjpahbedyíjábä cruzcøxp. Tøø jiuypiojtägach. Tøø yaa chohññä. Huuc tehñ yhiix hajxy, cab je'e yaajän maa je'e piädaacän.

⁷ Nøcx ja'a jiamiøød hajxy hawaanä. Møødä Pedro, mhawáanäp je'ebä. Jaduhñ hajxy mhawáanät cooc jim ñøcxa'añ Galilea. Jímäc hajxy nøcxy piaady, neby hajxy hijty tøø yajmøødmädia'agyíjän —nømä muutsc-häna'c miänaañ.

⁸ Päyø'øguiä Maríahajxy jiutpädsøømy. Tsähgøøyyäp tsäyúuyyap hajxy piädsøømy. Cab hajxy jaduhñ pøn ñä'ägädä hawaanä. Hix, jaanč tehñ chähgøøby hajxy hänajty.

⁹ Näxøø jopy ja'a Jesús jiuypiojtägajch. Mänitā María jayøjp yhiixtsohññä, ja'a hänajty jim tsohm̄bä Magdala, ja'a mõjcu'u juxtuyc-hooc yajnähwáatsäbä. Ja'a Jesús jaduhñ mäyajnähwaats.

¹⁰ Mänitā María ja'a Jesús jiamiøød hoy jia hawaanä. Wi'i jiøøby wi'i xiuu'tsp ja'a Jesús jiamiøødhajxy hänajty.

¹¹ Hoy hajxy jia nämaayyā coogä Jesús hänajty tøø jiuypiojcy, møød coogä María hänajty tøø yhiixy hajujcy, cab hajxy ñä'ägä mabøjcy.

¹² Cujecy, jimä Jesús ja'a jiamiøødhajxy hänajty nämetsc ñøcxy camjooty. Mänitā Jesús ñäguehxtøø'xy maa wyiinduumhajxiän.

¹³ Mänitā jiamiøød hajxy hoy jia hawáanäbä. Ni je'e ja'a miädia'agyhajxy jaduhñ quia'a mabøjcäxä.

¹⁴ Cujequiä Jesús jiamiøødhajxy hänajty quia'y, ja'a hajxy hänajty nämajtu'ugpä. Mänitā Jesús jim ñäguehxtøø'xcumbä maa hajxy hänajty quiayyän. Mänit hajxy jaduhñ ñämaayyā:

—Tii mijtsä miädia'agy hajxy coo tøø mga'a mabøjcä, ja'a mijts tøø xjia hawáanäbä cóogøch hajxy tøø xyhiixy hajujcy, cóogøch tøø njuypiojtägach.

¹⁵ Nøcx hädaa mädia'agy hajxy yajwa'x wiinduhmyhagajpt. Jaduhñä jäya'ay hajxy nägøxiä myajwiingapxø'øwät neby hajxy ñähwá'adsät.

¹⁶ Pønjaty jaduhñ mabøjp, pønjaty jaduhñ näbejp, je'edshajxy jaduhñ nähwa'adsaamb. Pero pønjaty jaduhñ ca'a mabøjp, haxøøgtuum hajxy je'e miähmø'owa'añ.

¹⁷ Pønjaty jaduhñ mabøjp, hijxtahnd hajxy yajcähxø'øgaamby hoy-yagjuøøñäbä. Ja'a høøchcøxpä, jaduhñä pa'amjäya'ay hajxy yajnähwá'adsät, ja'a hajxy mõjcu'umøødpä. Wiinghayuuc hajxy miädia'agáañäp.

¹⁸ Hoyyä tsahñdy hajxy tiehñ wyidsø'øgät, cab hajxy nej tiunøøjät. Hoyyä veneno hajxy tiehñ yhú'ugät, ni jaduhñ hajxy nej quia'a jádät. Y coo ja'a pa'amjäya'ay hajxy quio'ønähgábät, náxäbä pia'amhajxy.

¹⁹ Coo ja'a Jesús ja'a jiamiøødtøjc miøødmädiaacpädsøøyy, ja'a hajxy nWi-indsønähjtämbä, mänit ñøcxnä tsajpootyp. Mänit hoy yhøxta'agy maa ja'a Tieediä yhahooyhaampiän.

²⁰ Mänitā jiamiøødhajxy jiaanč tu'ubøjcy. Mänitā mädia'agy hajxy hoy yajwa'xy wiinduhmyhagajpt. Piuhbejpä Jesús ja'a jiamiøødtøjc hänajty. Majaty hajxy hänajty wiädity, yajcähxø'piä hijxtahnd hajxy hänajty hoy-yagjuøøñäjaty. Jaduhñ hänajty yajnajuø'øyy coo hajxy hänajty tiømiädia'agy. Amén.

San Lucas

¹⁻⁴ Mägu'ughajpä Teófilo, miičhcøxpøch hädaa nocy nhädiuñ nej miičh ja'a tøyhajt jaduhñ mmøødhádät ja'a Jesucristocøxpä, nej jiajty nej yhabejty, nej ñibianøcxyii. Pedyíjøch jaduhñ tøø nhabøcy. Jaduhñ miičh tøø mmädoyhajpä. Nämaj jäya'ay ja'a nocy capxy hajxy tøø yajpædø'øgy ja'a Jesucristocøxpä. Ja'a Diosmädia'agy-yajwa'xpähajxy, je'eds hajxy jaduhñ tøø xyajmädoyhajtäm. Yhamdsoo wiinhaam hajxy tiehm yhijxy.

⁵ Coö ja'a Herodes hänajty jim guobiernähaty Judeanaaxooty, jimä jäya'ay hänajty tu'ug xiøhaty Zacarías. Teedy ja'a Zacarías hänajty tiuumby maa ja'a judíos ja'a quiuhdujthajxy hänajty myiñän. Ja'a Abías ja'a quiuhdujt hänajty yajtúunäxäp neby hänajty jecy tøø yhane'emiän. Ja'a Zacarías ja'a tio'oxiøjc, Elisabet hänajty xiøhaty. Ja'a Aarón yhap yhoc ja'a Elisabet jaduhñ.

⁶ Pedyii ja'a Zacarías hajxy hänajty quiudiñ ja'a Diosmädia'agy. Hoy hajxy hänajty yajtuñ nebiä Dios choquiän.

⁷ Pero cabä yhuunghajxy hänajty nitu'ugtä. Cahnä Elisabet hänajty ñä'ägädä huungpaadyñä. Tøøds hajxy hänajty miäjaanä.

⁸ Tu'ugxøøbä, jiibiä Zacarías hänajty tiuñ møjtsajtøgooty.

⁹ Mänitä piaatä coö ja'a poom jiiby jiógät maa ja'a poomjojtaactän, jim Dioswiinduum. Jaduhñä teedyhajxy hänajty quiuhdujthaty.

¹⁰ Mänit yhabaaty coö ja'a Zacarías ja'a poom hänajty jiiby jioga'añ. Mänitä cu'ughajxy yhamugøøyy møjtsajtøghaguuy. Mänit hajxy tiägøøyy Diospa'yaaxpä.

¹¹ Jimä Zacarías hänajty pioomjocy, mänitä Dios mioonsä tu'ug ñäguexxtøø'xy hahooyhaamby maa ja'a poom hänajty jioquiän. Jim hänajty tøø chooñ Dioswiinduum.

¹² Coö ja'a Zacarías jaduhñ yhijxy, mänit chähgøøyy. Cabä wiinmahñdy piaaty nej jiatcø'øwät.

¹³ Mänit ñämaayyä:

—Zacarías, ca'a mdsähgø'øy. Tøø ja'a Dios miädoy nej tøø mmägapxiän coö huung xmió'owät. Huungpaadaamb ja'a mdo'oxiøjc jaduhñ. Juan ja'a mhuung myajxøhätät.

¹⁴ Mxoonda'agaamb miičh jaduhñ ja'a mhuungcøxpä. Nämaj ja'a jäya'ayhajxy jaduhñ xioonä'agaambä coö mhuung myínät miédsät.

¹⁵ Cumaj ja'a mhuung piädsøma'añ ja'a Dioscøxpä. Miøødhadaambiä Diosh-espíritu; jaduhñ miämin miäga'awa'añ. Cabä jocnøø yhu'uga'añ ni ja'a vino.

¹⁶⁻¹⁷ Jaduhñdsä cuhdujt miøødhada'añ nebiä Elías jecy miøødhajtiän. Ja'a Diosmädia'agy jaduhñ yajwa'xaamby. Mänitä judíos ja'a Dios hajxy jiahmiejt-staactägatsa'añ jadähooc. Jaduhñä Juan yajwiingapxø'øwa'añ coö ja'a yhuung hajxy quia'a møødnimiädsiphajtänät, y coods hajxy miäbøjnät ja'a hoguiapxy ja'a homiädia'agy pøn yhamdsoo cuhdujt ja wi'i yajtunaamb. Coö hajxy jaduhñ quiudiünät, mänitä Dios jaduhñ quiuhbøga'añ.

¹⁸ Mänitä Zacarías miänaañ:

—Nébiøch ja'a tøyhajt jaduhñ nmøødhádät coöch nhuung myina'añ. Tøø højts nmäjaanä møødhøch ndo'oxiøjc.

¹⁹ Mänitä Dios mioonsä yhadsooyy:

—Gabrielhøch nxøhaty. Jímhøch ndsooñ Dioswiinduum. Je'ečh tøø xquiexy coöch miičh min nhawaanä coö ja'a mhuung jaduhñ myina'añ.

20 Coočh miičh ja'a nmädia'agy tøø xquia'a mabøjcä, huum miičh mmähmø'owa'añ. Høxtä coonä ja'a mhuung myínät, mänit mgapxø'øga'añ. Tøjiadaamb jaduhñ nébiøch chamñ nmädia'aguiän.

21 Jimä cu'ug ja'a Zacarías hajxy hñajty jia wi'i yhahixy møjtsajtøghaguuy. Yagjuøøby hajxy hñajty coo ja'a Zacarías jiiby wyi'i jiecyc tsajtøgooty.

22 Coo ja'a Zacarías tiøjpädsøømnä, tøø hñajty jiaančh huummy. Mänitä cu'ughajxy ñajuøøyy coo ja'a Zacarías ja'a tsø'ty hñajty tøø yhixy. Hix, cø'øhaam yajnähixøøñä.

23 Hoorä, coo ja'a Zacarías yaghabejty mäduhñtiä hñajty tiuna'añ tsajtøgooty, mänit ñøcxnä maa ja'a quiajptän.

24 Mänitä tio'oxiøjc jiaančh mähmøøyy maaxhuungmøød. Jiiby ñä'ägä mähmøøyy tøgooty mägoøxpø'o. Caj ñä'ägä tøjpdädsøømnä. Jaduhñ hñajty wyi'i miädiaacta'agy quiopcooty:

25 “Päadyhøch ja'a Dios jaduhñ tøø xñäxuuch nébiøch ja'a cu'ughajxy jaduhñ xquia'a péjxnät.”

26 Tädujpo'o ja'a Elisabet hñajty tøø yhity maaxhuungmøød, mänitä Dios ja'a Gabriel quiejxcumbä. Jimä Gabriel quiejxä maa ja'a cajpt xiøhatiän Nazaret jim Galileanaaxooty.

27 Ja'a María jaduhñ yajnäguejxä. Cäxyiihajpnä hñajty je'enä. Tøø hñajty tiødiägø'øy coo ja'a José hñajty piøga'añ. Jue'e ja'a José, David yhap yhoc je'e, ja'a hijty jegyhajty gobiernätuumbä.

28 Mänitä Gabriel tiøjtägøøyy maa ja'a María hñajtiän. Mänitä María ñämaayyä:

—Diøshøch tøø xquiexy cooçh miičh jaduhñ nmägápät. Miičhcøxpä ja'a Dios ja'a mayhajt tiuna'añ. Xmiøødhijp miičh ja'a Dios. Maas hoy miičh ja'a Dios xyhixy quejee ja'a mmädo'oxiøjc-hajxy.

29 Cabä María hñajty ñajuø'øy tii jaduhñ coo tøø ñäma'ayii ja'a Dioscøxpä. Tsähgøøyy jaduhñ siémpräm.

30 Mänitä ñämáayyägumbä:

—María, ca'a mdsähgø'øy. Møj ja'a Dios ja'a mayhajt tiuna'añ ja'a miičhcøxpä.

31 Mhuungpaadaamb miičh jaduhñ. Jesús ja'a mhuung myajxøhata'añ.

32 Møj jaančh jaduhñ yhida'añ. Høxcabáanäp jaduhñ coo Dyioshuungä. Dios jaduhñ päda'agaamb gobiernä nebiä David jecy tiuunñän, ja'a Jesús yhap tieedy.

33 Paady jaduhñ piäda'aga'añii gobiernä nebiä judíoshajxy yhané'emät cøjxta'axiøø. Nimänaa jaduhñ quia'a hanehmädø'øwa'añ.

34 Mänitä María yajtøøyy:

—Nébiøch jaduhñ nnä'ä huungpáadät; cáhnøch ya'adiøjc nhixyhatyñä.

35 Mänitä Gabriel yhadsooyy:

—Minaambä Dioshespíritu xyhuungmo'owa'añ. Dioshuung jaduhñ mi-naamb ca'awaamb. Cabä pojpa cädieey mänaa tiuna'añ.

36 Y miičh mhocmaam, ja'a Elisabet, jaduhñ je'e miaaxhuungpaadaambä, hoy jaduhñ jia majjä jia petiä. Tädujpo'ohájñäp je'e. Cábäc tyijy hijty miaaxhuungpaada'añ; jaduhñä cu'ughajxy hijty miäna'añ.

37 Pero cabä Dios tii tsip ñä'ägä juø'øy. Hotyijä jaduhñ tiuna'añ.

38 Mänitä María miänaañ:

—Wéenhøch ja'a Dios jaduhñ xñä'ägä moonsähaty. Wéenhøch jaduhñ njaty nébiøch tøø xñäma'ayän.

Mänitä Gabriel wyiimbijnä.

39-40 Mänitiä ja'a María ñøcxy maa ja'a Elisabethajxiän. Judeanaaxooty hajxy hänajty chäna'ay tunjooty. Mänitä María tiøjtägøøyy.

41 Mänitä Elisabet yajpoo'xä. Mänitä maaxhuung jiiby yu'xy Elisabet jioodooty. Mänitä Elisabet ja'a Dioshespíritu ñämejtsä.

42 Mänitä Elisabet møc yaaxy:

—Maas hoy miich ja'a Dios xyhixy quejee ja'a mmädo'oxiøjc-hajxy. Jaduhn miich mhuung xyhixáanabä.

43 Ja'a miich mhuung, nwiindsønhadáambiøch je'e. Nyagjuøøbiøch jaduhn cooçh miich xwyiingudsähgø'øyy.

44 Túunøch miich xñä'ä yajpoo'xy, mänítiøch nhuung yaaby jiaançh tehñ yu'xy njoodóotyhøch. Jootcujc jaduhn ñijiäwø'øyyi, paady yu'xy.

45 Tøjiadaamb jaduhn nej miich ja'a Dios tøø xñäma'ayän. Coø jaduhn mmäbøcy, jootcujc mhida'añ —nømä Elisabet ja'a María ñämaayy.

46 Mänitä María miänaañ:

Tøyhajtä Dios miøjjä jiaançh.

47 Jootcujc-høch nnijiäwø'øyyi cooçh je'e xyhixy.

48 Xjiahmiéjtspøch jaduhn, hóyhøch nja häyoy.

Jootcujc-høch ja'a jäya'ayhajxy xñä'ägä nänømaannä,

49 je'eguiøxpä cooçh ja'a Dios tøø xyhuungmo'oy.

Møj jaançh ja'a Dios.

50 Pønjaty ja'a Dios jaduhn wiingudsähgøøby,

Dios jaduhn näxuudsaañb cøjxta'axiøø.

51 Tøø ja'a Dios ja'a miäjaa yajcähxø'øgy;

tøø hajxy quia'a mäjäda'agy, ja'a hajxy hijty yajcumayaambä.

52 Tøø ja'a gobiernä quiuhdujthajxy piøjcäxä,

tøø ja'a häyoobäjäya'ayhajxy miøjtägø'øyy.

53 Tøø ja'a häyoobäjäya'ayhajxy cøxiä wiinä mio'oyii;

cabä mäyøøjäya'ayhajxy tii tøø piaady.

54 Piuhbejt ja'a Dios ja'a judíoshajxy.

Cøjxta'axiøø ñäxuuch pia'häyoy,

55 nebiä Abrahamhajxy jecy ñämaayyän,

ja'a nhaphájtäm ja'a ndeedyhájtäm.

56 Tägøøgpø'o ja'a María jim jiaac hijty maa ja'a Elisabetän. Mänit yhädaacnä maa ja'a quiajptän.

57 Mänitä Elisabet miaaxhuungpaatnä; ya'ayhäna'c jaduhn miingahw.

58 Mänitä Elisabet hoy quiuhixyijäm ja'a jiuju ja'a miägu'ughajxy møødä miädøjc-hajxy. Mänit hajxy nägøxiä xioondaacy coø Dios ja'a mayhajt jaduhn tøø tiuñ.

59 Cuductujxøø ja'a pigäna'c hajxy hoy yajcircuncidarhadyii nebiä judíoshajxy hänajty quiuhdujthatiän. Mänit hajxy jia yajxøhataañ Zacarías nebiä tieedy hänajty xiøhatiän.

60 Mänitä tiaj miänaañ:

—Cábøch jaduhn nyajxøhata'añ. Juánhøch jaduhn nyajxøhata'añ.

61 Mänitä Elisabet ñämaayyä:

—Tii jaduhn coø myajxøhata'añ. Caj pøn jaduhn xiøhaty maa miich mjuju maa miich mmägu'ugän.

62 Mänitä Zacarías miäyajtøøwä cø'øhaam nebiä yhuung xiøhátät.

63 Mänitä pu'uyhuung ñädsiiwøøyy coø mio'owøøjät. Mänit yuugjahy pu'uguiøxp: “Juan xiøhata'añ.” Mänit hajxy nägøxiä yagjuøøyy.

64 Mänitä Zacarías quiapxø'nä. Mänitä Dios Dioscujú'uyäp miooyy.

⁶⁵ Jaančh tehñ yagjuøøyy ja'a cu'ughajxy jaduhñ. Mänitä mädia'agy tiägøøyy wädiypä jim Judeanaaxooty jim tunjooty nebiaty ja'a Zacarías tøø jiaty.

⁶⁶ Coø ja'a jäya'ayhajxy nägøxiä miädoyhajty, mänit hajxy tiägøøyy najuøødiaacpä. Mänit hajxy miänaañ:

—Pätiidä yø'ø pigäna'c tiunaamby coø hānajtý tøø yeegy.

Tøyhajtä Dios hānajtý piuhbeda'añ.

⁶⁷ Mänitä Zacarías ñāmejtsä ja'a Dioshespíritu. Mänitä Zacarías jiomädiaacnajxy neby hānajtý tøø miøødmädia'agyijän ja'a Diósäm:

⁶⁸ Møj jaančh ja'a Dios;

paady jaduhñ tøø quiäda'agy coø højts xyajñähwa'ads xyajcuhwa'adsāñäm, højts judíoshájtäm.

⁶⁹ Tøø højts ja'a yajñähwaatspä yajcuhwaatspä xyajñäguéjxäm; je'edsä mõjcuħdujt jaduhñ mõøð; ja'a David yhap yhoc je'e.

⁷⁰⁻⁷³ Jaduhñä Dios jecy miänaañ coø højts xyajñähwa'ads xyajcuhwa'adsāñäm højts nmädsiphájtäm.

Jaanä jaduhñ miänaambä coø xñäxuuds xpia'häyowāñäm.

Yajtøjiadaamby jaduhñ nebiä Abrahamhajxy jecy miøødyajcuħdujquiän, ja'a nhap ja'a ndeedyhajtämhajxy.

Ja'a Diosquexyhajxy jaduhñ jomädiaacnajx.

⁷⁴ Coø ja'a Dios hajxy jaduhñ xñäwāñäm maa ja'a nmädsiphajtämhajxiän, paady hajxy nga'a tsähgøøyyänä. Hoyyā Dios hajxy nbanøcxämät.

⁷⁵ Hawa'adstuum hajxy xyaghidāñäm cøjxta'axiøø.

⁷⁶ Huang, miich nnāmaaby coø Diosmädia'agy-yajwa'xpä mwädita'añ.

⁷⁷ Myajwiingapxø'øwaamby ja'a Dios quiu'ughajxy neby hajxy jaduhñ ñähwa'ads quiuhwá'adsät.

Coo ja'a Dios ja'a piojpä quiädieey hajxy yajmøødmädiá'agät, mänit hajxy yajñähwa'ads yajcuhwa'adsøjät.

⁷⁸ Xñäxúu'tsäm ja'a Dios hajxy jaduhñ, paadiä yajñähwaatspä yajcuhwaatspä quiejxy.

⁷⁹ Xpiädāacām hajxy hawa'adstuum, xmiøoyyām ja'a hoyhajt ja'a weenhajt hajxy, nømä Zacarías miänaañ.

⁸⁰ Hoorä, yee'c mõjjøøyy ja'a Juan jaduhñ. Wiinmahñdymejts jaduhñ. Ñajuøøyy jaduhñ mädyii hoy mädyii mäbaad. Miøødhajt ja'a Dioshespíritu jaduhñ. Coø mõjjøøyy, mänit tiägøøyy wädiypä hanidiuhmduum. Jim yhiyty høxtä coonä tiägøøyy Diosmädia'agy-yajwa'xpä.

2

¹ Coø ja'a xøøjomøjt yhabaaty, mänitä gobiernä Augusto yhanehmy coø ja'a jäya'ayhajxy ween nøcxy nägøxiä ñiguiujaayii maa ja'a yhamdsoo cajpthajxiän, ja'a hajxy wiinduhmyhagajtpä.

² Ja'a Augusto jaduhñ hanehmðsohñ; cahnä pøn hānajtý jaduhñ yhane'emyñä. Ja'a Cirenio, je'e hānajtý jim tuumb gobernador Sirianaaxooty.

³ Mänitä jäya'ayhajxy nägøxiä jiaančh cudiiuñ nebiä Augusto hānajtý tøø yhane'emiän.

⁴⁻⁵ Jue'e ja'a José hānajtý, ja'a David yhap yhoc hānajtý je'e. Belén ja'a cajpt hānajtý xiøhaty maa ja'a David hānajtý tøø myiñ tøø quia'ayän, jim Judeanaaxooty. Coø ja'a David hānajtý jim tøø myiñ tøø quia'ay, paadiä Joséhajxy hānajtý jim nøcxy ñiguiujaaya'añii mõøðä María. Tøø hānajtý tiødiägøøñä coø hajxy

hänajty piøgaannä. Maaxhuungmøød ja'a María hänajty. Galileanaaxooty hajxy hänajty tøø chohnä'agy maa ja'a cajpt xiøhatiän Nazaret.

⁶ Coø hajxy jim miejch Belén, mänitä María miaaxhuungpaaty.

⁷ Ja'a quioobhuung jaduhñ miingahw. Mänitä María ñähbijty ñähmojch. Mänit quiugo'ogøøyy wajjøø'xøhñdyjooty. Hix, cabä mejtstaact hajxy hänajty maa tøø ñä'ägädä paady jim cajptooty. Paady hajxy jim ñä'ä nøcxøøyy tøjpa'c maa häna'c ja'a waj hajxy hänajty yajtäna'ayän.

⁸ Jim häna'c-hajxy hänajty näje'e mieegcueendähaty cajtpa'a. Coods hänajty je'e.

⁹ Mänitä Dios ja'a cujajpä cudøø'xpä yajcähxø'cy maa hajxy hänajty mieegcueendähatiän. Mänitä Diosmoonsä tu'ug ñäguehxtøø'xy maa wyiindu-umhajxiän; jim hänajty tøø choon tsajpootyp. Mänit hajxy chähgøøyy.

¹⁰⁻¹¹ Mänit hajxy ñämaayyä:

—Ca'a hajxy mdsähgø'øy. Naamñä ja'a Cristo tøø myiñ tøø quia'ay jim Belén. Mijts jaduhñ xyajñähwa'ads xyajcuhwa'adsaamb. MWi-indsønähadaamby hajxy jaduhñ. Páadyhøch nhawáanäm nebiä jäya'ayhajxy nägøxiä xioonä'agät.

¹² Coø ja'a pigäna'c hajxy jaduhñ mbáadät nähbity nähmoch wajjøø'xøhñdyjooty, jaduhñ hajxy mnajuø'øwät coø hänajty jie'ejä.

¹³ Mänitä Diosmoonsähajxy nämay jiaac näguehxtøø'xy; haagä jim hajxy hänajty tøø choon tsajpootyp. Mänit hajxy miänaañ:

¹⁴ Møj jaançh ja'a Dios; tsajpootyp jaduhñ yhity.

Jootcujc ja'a jäya'ayhajxy yaa yhida'añ hädaa yaabä naaxwiin pønjaty ja'a Dios quiumaaby.

¹⁵ Mänitä Diosmoonsä hajxy wyiimbijnä, ñøcxnä hajxy tsajpootyp. Mänitä meegcueendähajpähajxy ñiñämaayyä:

—Jam hajxy híxäm Belén nebiä Diosmoonsä hajxy tøø xyhawáanäm.

¹⁶ Päyø'øguiä hajxy tiu'ubøjcy. Mänitä Jesucristo hajxy hoy jiaançh paady møødä María møødä José. Jiibiä Jesucristo hänajty quio'na'ay nähbity nähmoch wajjøø'xøhñdyjooty.

¹⁷ Mänitä mädia'agy hajxy hoy yajwa'xy nebiaty hajxy hänajty tøø yhixy tøø miädoj ja'a Jesucristocøxpä.

¹⁸ Ja'a jäya'ayhajxy jaac mädojhájtäbä, yagjuøøyy hajxy jaduhñ.

¹⁹ Pero cabä María jaduhñ yagjuøøyy. Tøø hänajty miøødmädia'agyii coø jaduhñ jiada'añ yhabeta'añ. Jiiby quiopcooty miädiaactacy. Caj pøn ya-jmøødmädiaacy.

²⁰ Haa ja'a meegcueendähajpähajxy, mänit hajxy wyiimbijnä, ñøcxnä hajxy. Mänitä Dios ja'a Dioscujú'uyäp hajxy miooyy coø hajxy tøø yhixy tøø miädoj nebiaty hajxy hänajty tøø miøødmädia'agyii.

²¹ Cuductujxøø ja'a Jesús hajxy yajcircuncidarhajtä. Mänit hajxy yajxøbejty Jesús nebiä María hänajty tøø ñäma'ayii coø hänajty quia'a huungmo'oyiinä. Ja'a Diosmoonsä tsajpootypä hänajty hoy tøø ñäma'ay.

²² Coø ja'a xøø hänajty tøø yhabejnä, mänit hajxy hoy chi'iy nebiä ley myiñän, ja'a Moisés jecy quiujähyyäbä. Mänitä Jesús hajxy jiiby chehñhådaacy Jerusalén jim mõjtsajtøgooty.

²³ Jaduhñ jiiby myiñ maa ja'a Diosmädia'aguiän: “Ja'a coobhuung ya'ayhäna'cpähajxy, Diostuung hajxy tiunaamby.”

²⁴ Mänitä paloma hajxy metsc yojxy nebiä jiiby myiñän cujaay maa ja'a Diosmädia'aguiän.

²⁵ Jimä jäya'ay hānajty tu'ug chāna'ay Jerusalén; Simeón hānajty xiøhaty. Hojiäya'ay hānajty je'e. Hoyyā Dios hānajty wyiingudsähgø'ø. Miøød ja'a Dioshespíritu hānajty je'e.

²⁶ Tøø hānajty miøødmädia'agyíjäm ja'a Dioshespíritu coo hānajty quia'a tsoj ho'oga'añ høxtä coonä ja'a Cristo hānajty tøø yhamdsoo hixy, ja'a Dios hānajty quiexaambiä.

²⁷ Mänitā Simeón ñāmaayyā ja'a Dioshespíritu coo jim ñøcxät tsajtøgooty. Mänitā Jesús hoy jiiby piaady møødä tiajhajxy. Cahnä hajxy hānajty wyiimbityñä.

²⁸⁻²⁹ Mänitā Simeón ja'a Jesús chehñdsooyy. Mänitā Simeón miānaañ:

Diosteedy, Dioscujú'uyäp, jootcújc-høch nhó'ogät,
je'eguiøxpä coo tøø myajtøjiaty nébiøch hijty tøø xmiøødmädia'aguiän.

³⁰ Hamdsóojøch tøø nhixy ja'a yajnähwaatspä, ja'a yajcuhwaatspä,

³¹ ja'a miich tøø mguéxiäbä hädaa yaabä naaxwiin.

³² Ja'a hajxy ca'a judíosä, yajwiingapxø'øwáanäp ja'a hoguiapxy ja'a homiädia'agy hajxy.

Ja'a judíoshajxy, cumayáanäp hajxy je'e;

møj jaanč hajxy piäda'aga'añii.

³³ Mänitā Jesús tiajhajxy yagjuøøyy coo yhuunghajxy hānajty jaduhñ tøø ñänøømäxä.

³⁴⁻³⁵ Mänit hajxy ñāmaayyā:

—Weenä Dios ja'a hoyhajt ja'a weenhajt xmio'oy.

Mänitā Maríā nidiuhñ ñāmaayyā:

—Näje'e ja'a judíoshajxy yhida'añ tu'ugmädia'agy møød miich mhuung. Piaadaamby ja'a hoyhajt ja'a weenhajt hajxy je'e. Pero nämay hajxy jaduhñ quia'a møødhida'añ tu'ugmädia'agy. Nähwaambedaamby hajxy je'e. Tu'udägoyyaamb hajxy jaduhñ. Cähxø'øgaambä wyiinmahñdyhajxy jaduhñ neby hajxy tiajy miay.

³⁶⁻³⁷ Jiibiä yaamgto'oxy hānajty tu'ug tsajtøgooty; Ana hānajty xiøhaty. Fanuel ja'a tieedy hānajty tøø xiøhaty. Aser ja'a yhap ja'a tieedy jegyhajty xiøhaty. Juxtujcjomøjt ja'a ñihyhap hānajty tøø miøødtsäna'ay. Mänitā ñihyhap yho'nä. Mänitäts hānajty tøø jiaac jugyhaty mädaaxc-hii'xcumädaaxcjomøjt nidiuhñ. Tøø hānajty miäjaanä. Ja'a Diosmädia'agy hānajty yajwa'xyp. Jiiby hānajty ñä'ägä tuñ tsajtøgooty. Xøømdsuhñ ja'a Dios hānajty wyiingudsähgø'ø. Hayuu hānajty yhity tähoocjaty nebiä Diosmädia'agy jaduhñ maas hoy wyiinjuó'øwät.

³⁸ Coo ja'a Ana jaduhñ miädooyy nebiä Simeón ja'a Jesús ñänøømiän, mänitā Dios miooyy Dioscujú'uyäp. Mänitā mädia'agy tiägøøyy yajwa'xpä jim Jerusalén coo ja'a Cristo tøø quiäda'agy. Nägøxiä jäya'ayhajxy miädoyhajty, ja'a Cristo hajxy hānajty yhahijxypä.

³⁹ Coo ja'a Maríahajxy hānajty tøø quiudiuñ nebiä Diosley myiñän, mänit hajxy wyiimbijnä, yhädaacnä hajxy Nazaret jiiby Galileanaaxooty, maa hajxy hānajty tøø chooñän.

⁴⁰ Yee'c möjjøøyy ja'a Jesús jaduhñ. Wiinmahñdymejts jaduhñ. Dios jaduhñ mooyy ja'a hoyhajt ja'a weenhajt.

⁴¹ Wiingujomøjt ja'a judíos ja'a xøø hajxy hānajty yagjadyii jim Jerusalén mänaabä ja'a meeghuung hajxy hānajty yoxiän.

⁴² Coo ja'a Jesús majmetscjomøjt yaghabejty, mänitā Maríahajxy ñøcxy xøøhajpä Jerusalén møødä Jesús, nebiä cuhdujt hajxy hānajty miøødän.

⁴³ Coo ja'a xøø hānajt̃y tøø miaañä, mänit hajxy wyiimbijnä. Pero ja'a Jesús, jīm je'e miāhmøøyy Jerusalén nidiuhm̃. Cabä tiajhajxy hānajt̃y ñajuø'øyy pø tøø miāhmø'øyy.

⁴⁴ Jaduhn hajxy hānajt̃y miāna'añ cooc tyijy hajxy hānajt̃y jīm piamānaqyīi møødä miägu'ughajpāhajxy. Tu'xøø ja'a Mariāhajxy hānajt̃y tøø tiu'uyo'oy, mänitä Jesús hajxy yhixpaaty coo hānajt̃y jīm quia'a pamānacy høxhaam. Mänit hajxy jia høxtaayy maa ja'a jiuuy ja'a miägu'ughajxiän.

⁴⁵ Coo hajxy quia'a paaty, mänit hajxy wyiimbíjcumbä. Mänit hajxy ñøcxtägajch Jerusalén jadāhooc.

⁴⁶ Jīmä Jesús hajxy jiaañch paaty tsajtøgooty. Miädägøøgxøøbä hānajt̃y jīm tøø yhity. Jiiby hānajt̃y yhäñ'a'ay maa ja'a ley-yajñähixøøbiädøjc-hajxiän, ja'a hajxy jiiby tsajtøgootypä. Jiibiä capxy mädia'agy hānajt̃y miämädoona'ay. Cøxiä wiinä hānajt̃y yajtøy.

⁴⁷ Jaduhn hānajt̃y yhadsoy nebiä jajpān, nebiä tøøbä quiapxtä'aguiäbān. Yagjuøøby hajxy hānajt̃y, ja'a hajxy hānajt̃y jiiby häñ'aabiä tsajtøgooty.

⁴⁸ Coo ja'a Jesús jaduhn piaatä ja'a tiajhajxy, mänit hajxy yagjuøøyy. Mänitä tiaj miānaañ:

—Huong, tii højts jaduhn coo tøø xyhäyoowhixy coo tøø mmāhmø'øyy. Jiiby højts miičh nja wi'i yhøxta'ay.

⁴⁹ Mänitä Jesús yhadsooyy:

—Tiičh mijts coo xyhøxta'ay. Nej, cab hajxy mnajuø'øyā cooçh tsipcøxp nduna'añ maaçh nDeedy tiøjcānā. Haa ca'a, Dióshøch jaduhn nDeedyhajpiä.

⁵⁰ Pero cabä tiajhajxy wyiinjuøøyy tii jaduhn coo tøø miāna'añ.

⁵¹ Mänitä Jesús jiaañch padu'ubøjnä, piahädaacy jiiby Nazaret. Hix, jiaac mabøjcāp ja'a tiaj miädia'agyhajxy hānajt̃y. Y ja'a María, jiiby hānajt̃y yajnøcxy yagjuø'øyy quiopcooty nebiä yhuung hānajt̃y tøø xyl'igy tøø miädia'agy jiiby tsajtøgooty.

⁵² Yee'c-habejt̃y ja'a Jesús jaduhn; jaac wiinmahñdymejts jaduhn. Quiu-maayy ja'a Dios jaduhn møødä tsaan møødä cu'ug.

3

¹⁻² Coo ja'a Juan hānajt̃y tøø miøjjøøñä, ja'a Zacarías yhuung, mänit miägäpxä ja'a Diósäm. Mänit tiägøøyy wädiypä hanidiuhm̃dum. Majmocxjomøjt̃y ja'a Tiberio hānajt̃y tøø guiobiernähaty. Ja'a Poncio Pilato hānajt̃y tuumb gobernador Judeanaaxooty. Ja'a Herodes hānajt̃y tuumb gobernador Galileanaaxooty. Ja'a piuhya'ay Felipe hānajt̃y tuumb gobernador Itureanaaxooty møødä Traconitenaaxooty. Ja'a Lisanas hānajt̃y tuumb gobernador Abilinianaaxooty. Ja'a Anás hānajt̃y tuumb teedywiindsøn møødä Caifás.

³ Mänitä Juan ñøcxøøyy maa ja'a Jordānmøjnøø mäwiingonān. Jaduhnä tsaangu'ug hānajt̃y yajwiingapxø'øyy coo hajxy ñäbétät, coo ja'a yhaxøøgwiinmahñdy hajxy ñajtshixø'øwät, nebiä piojpä quiädieey hajxy jaduhn ñähwá'adsät.

⁴⁻⁵ Tøjiajt̃y jaduhn nebiä Isaías ja'a Diosquexypä jecy jiahyyān:

Jīmä jāya'ay tu'ug yaaxwädity hanidiuhm̃dum:

“Ñajtshixø'øw ja'a mhaxøøgwiinmahñdy hajxy.

Jaduhn ja'a mWiindsøn hajxy hoy mhahíxät;

jaduhn hajxy hoy mwiingudsähgø'øwät.

⁶ Nägøxiä jāya'ayhajxy jaduhn ñajuø'øwa'añ neby hajxy yajnähwa'adsøjät ja'a Diósäm.”

⁷ Coo ja'a tsaangu'ughajxy hānajt̃y yajnäbeta'añíjām ja'a Juángām, jaduhn hajxy hānajt̃y ñāma'ayii:

—Haay møjcu'u, caj mijts hoguiuhdujt mnä'ägä mөөдä. Paady hajxy jaduhñ mhuuc näbetaambä nebiä Dios hajxy jaduhñ xquia'a yajcumädówät, túhmäts.

⁸ Hoy hajxy mwädítät neby jaduhñ quiäxó'ögät coo ja'a mhaxөөгwiinmahñdy hajxy hānajtý tөө mnajts'hixөөñä. Y cab hajxy jaduhñ mmānā'anāt: “Abrahámhøch nhaphajt ndeedyhajt, páadyhøch ja'a Dios xquia'a yajcumädowa'añ.” Mānitä Dios hajxy xyajñāhwá'adsät coo ja'a mhaxөөгwiinmahñdy hajxy mnajts'hixó'ówät; ca'a jie'eguiøxpä coo Abraham hajxy mhaphajtý mdeedyhajtý.

⁹ Hoy hajxy mwädítät nebiä Dios hajxy jaduhñ xquia'a pädá'agät haxөөgtuum. Pøn hoy ca'a wädijp, jaduhñ māvīnāts je'e nebiä quepychaa ca'a төөmhajpān. Piuxaamby hajxy je'e; mānit hajxy ño'oga'añ.

¹⁰ Mānitä tsaangu'ughajxy miānaañ:

—Neby højts ndúnāt coo højts hoy nwädítät.

¹¹ Mānitä Juan yhadsooyy:

—Pøn camiixy metsc mөөд, ween tu'ug ñä'ä mo'oy pøn quiamiixy ca'a hijp. Jaanä jaduhñduhmbä, pøn jөө'xypøcy mөөд, ween mio'oy pøn mähdiøjc ca'a mөөд —nømä Juan miānaañ.

¹² Nāje'e ja'a yajñāhuudiutpāhajxy miejtspä näbejpä. Mānitä Juan hajxy ñāmaayy:

—Wiindsón, højtsäts, neby højts jaduhñ ndúnāt.

¹³ Mānitä Juan yhadsooyy:

—Cab hajxy nä'ä tægø'øbä myagjuuñáxät.

¹⁴ Jaanä jaduhñä policíahajxy nāje'e yajtөөбä. Mānitä Juan yhadsooyy:

—Cabä xädø'øñ pøn mbøjcät nä'ä nagoobä. Y caj pøn mnähwaambédät nä'ä nagoobä. Mjootcädá'agäp ja'a mmājuhñdy hajxy.

¹⁵ Ja'a tsaangu'ughajxy, jaduhñ hajxy hānajtý wyi'i yajtøy wyi'i yajtø'xy pø Cristo je'e ja'a Juan. Paady hajxy hānajtý wyi'i yajtøy, coo ja'a Cristo hajxy hānajtý yhahixy.

¹⁶ Mānitä Juan yhadsooyy:

—Nөөháamhøch mijts chaa nyajñäbety. Pero xiichä jäya'ay tu'ug xji-aac pamiñ. Je'eds mijts mävøcy xmio'owaamb ja'a Dioshespíritu. Xya-jñāhwa'ads xyajcuhwa'adsaamb hajxy jaduhñ. Maas møc cuhdujt jaaya'ay miөөдä quejeech hөөч. Cábøchä cuhdujt nnä'ägä mөөдä ni weeñtiä maa jaaya'aguiøxpān.

¹⁷ Pøn ja'a haxөөгwiinmahñdy jaduhñ ca'a najts'hixөө'owaamb, haxөөgtuum piäda'aga'añii. Cøjxta'axiөө jii by chaächpøga'añ. Pero pønä homiädia'agy pawädijp, cøjxta'axiөө hajxy jim yhida'añ tsajpootyp.

¹⁸ Madiu'u ja'a Juan ja'a cu'ug hānajtý yajwiinxiiic yajwiingapxø'øy ja'a Diosmādia'agy. Møc hānajtý jiaanč tehñ miädia'agy.

¹⁹ Mānitä Juan ja'a Herodes hoy yhojy, ja'a hānajtý tuumbä gober-nador. Paadiä Herodes yhojjä coo yhamdsoo puhya'ay ja'a tio'oxiøjc hānajtý miөөдtsānaayyā. Felipe ja'a piuhya'ay hānajtý xiøhaty. Jiinā hānajtý jiugy-hatyñä. Herodías ja'a Felipe tio'oxiøjc hānajtý xiøhaty. Madiu'u ja'a Herodes hānajtý jiatcø'øy haxөөг.

²⁰ Coo ja'a Herodes jaduhñ yhojjä, mānitä Herodes ja'a Juan yajtsuumä. Hix, haxөөгwiinmahñdy ja'a Herodes hānajtý miөөд.

²¹ Coo ja'a Juan hānajtý quia'a tsumyiinā, jimä cu'ug hānajtý yajñäbety. Mānitä Jesús miehch näbejpä. Juan hānajtý je'e yajñäbetaamb. Jimä Jesús hānajtý Dyiospa'ya'axy, mānitä tsajpootyp yhawaach.

²² Mänitä Dioshespíritu ja'a Jesús ñägädaacy nebiä paloman. Mänit hoy yhäñaxiøpy ja'a Jesús ja'a quihduum. Mänitä Dios jim quiapxy tsajpootyp: —NHuunghájpíøch miich. Njaanç tehñ chójpiøch miich. Jootcuje-høch jaduhñ nnijäwø'øyii maa miichcøxpän.

²³ Hii'xmajcjomøjt ja'a Jesús hñajty miøødä mänaabä tiägø'øyän ya-jñähixøøbiä. Ja'a cu'ug jaduhñ mänaan cooc tyijy ja'a Jesús ja'a José hñajty tieedyhaty. Ja'a José yhap tieedyhajxy, jaduhñä xiøøhajxy ñibianøcxä: Elí ja'a José tieedy xiøhajty.

²⁴ Ja'a Elí tieedy, Matat je'e xiøhajty. Ja'a Matat tieedy, Leví je'e xiøhajty. Ja'a Leví tieedy, Melqui je'e xiøhajty. Ja'a Melqui tieedy, Jana je'e xiøhajty. Ja'a Jana tieedy, José je'e xiøhajty.

²⁵ Ja'a José tieedy, Matatías je'e xiøhajty. Ja'a Matatías tieedy, Amós je'e xiøhajty. Ja'a Amós tieedy, Nahúm je'e xiøhajty. Ja'a Nahúm tieedy, Esli je'e xiøhajty. Ja'a Esli tieedy, Nagai je'e xiøhajty.

²⁶ Ja'a Nagai tieedy, Maat je'e xiøhajty. Ja'a Maat tieedy, Matatías je'e xiøhajty. Ja'a Matatías tieedy, Semei je'e xiøhajty. Ja'a Semei tieedy, Josec je'e xiøhajty. Ja'a Josec tieedy, Judá je'e xiøhajty.

²⁷ Ja'a Judá tieedy, Joanán je'e xiøhajty. Ja'a Joanán tieedy, Resa je'e xiøhajty. Ja'a Resa tieedy, Zorobabel je'e xiøhajty. Ja'a Zorobabel tieedy, Salatíel je'e xiøhajty. Ja'a Salatíel tieedy, Neri je'e xiøhajty.

²⁸ Ja'a Neri tieedy, Melqui je'e xiøhajty. Ja'a Melqui tieedy, Adi je'e xiøhajty. Ja'a Adi tieedy, Cosam je'e xiøhajty. Ja'a Cosam tieedy, Elmodam je'e xiøhajty. Ja'a Elmodam tieedy, Er je'e xiøhajty.

²⁹ Ja'a Er tieedy, Josué je'e xiøhajty. Ja'a Josué tieedy, Eliezer je'e xiøhajty. Ja'a Eliezer tieedy, Jorim je'e xiøhajty. Ja'a Jorim tieedy, Matat je'e xiøhajty.

³⁰ Ja'a Matat tieedy, Leví je'e xiøhajty. Ja'a Leví tieedy, Simeón je'e xiøhajty. Ja'a Simeón tieedy, Judá je'e xiøhajty. Ja'a Judá tieedy, José je'e xiøhajty. Ja'a José tieedy, Jonam je'e xiøhajty. Ja'a Jonam tieedy, Eliaquim je'e xiøhajty.

³¹ Ja'a Eliaquim tieedy, Melea je'e xiøhajty. Ja'a Melea tieedy, Mena je'e xiøhajty. Ja'a Mena tieedy, Matata je'e xiøhajty. Ja'a Matata tieedy, Natán je'e xiøhajty.

³² Ja'a Natán tieedy, David je'e xiøhajty. Ja'a David tieedy, Isaí je'e xiøhajty. Ja'a Isaí tieedy, Obed je'e xiøhajty. Ja'a Obed tieedy, Booz je'e xiøhajty. Ja'a Booz tieedy, Sala je'e xiøhajty. Ja'a Sala tieedy, Naasón je'e xiøhajty.

³³ Ja'a Naasón tieedy, Aminadab je'e xiøhajty. Ja'a Aminadab tieedy, Admin je'e xiøhajty. Ja'a Admin tieedy, Esrom je'e xiøhajty. Ja'a Esrom tieedy, Fares je'e xiøhajty. Ja'a Fares tieedy, Judá je'e xiøhajty.

³⁴ Ja'a Judá tieedy, Jacob je'e xiøhajty. Ja'a Jacob tieedy, Isaac je'e xiøhajty. Ja'a Isaac tieedy, Abraham je'e xiøhajty. Ja'a Abra'am tieedy, Taré je'e xiøhajty. Ja'a Taré tieedy, Nacor je'e xiøhajty.

³⁵ Ja'a Nacor tieedy, Serug je'e xiøhajty. Ja'a Serug tieedy, Ragau je'e xiøhajty. Ja'a Ragau tieedy, Peleg je'e xiøhajty. Ja'a Peleg tieedy, Heber je'e xiøhajty. Ja'a Heber tieedy, Sala je'e xiøhajty.

³⁶ Ja'a Sala tieedy, Cainán je'e xiøhajty. Ja'a Cainán tieedy, Arfaxad je'e xiøhajty. Ja'a Arfaxad tieedy, Sem je'e xiøhajty. Ja'a Sem tieedy, Noé je'e xiøhajty. Ja'a Noé tieedy, Lamec je'e xiøhajty.

³⁷ Ja'a Lamec tieedy, Matusalén je'e xiøhajty. Ja'a Matusalén tieedy, Enoc je'e xiøhajty. Ja'a Enoc tieedy, Jared je'e xiøhajty. Ja'a Jared tieedy, Mahalaleel je'e xiøhajty. Ja'a Mahalaleel tieedy, Cainán je'e xiøhajty.

³⁸ Ja'a Cainán tieedy, Enós je'e xiøhajty. Ja'a Enós tieedy, Set je'e xiøhajty. Ja'a Set tieedy, Adán je'e xiøhajty. Ja'a Adán, Dios jaduhñ cunuu'x pädaac.

4

¹ Jimä Jesús hānajt̃y maa ja'a Jordānmōjnōjān. Miōōdā Jesús ja'a Diosh-espíritu hānajt̃y. Mānitā Jesús wioonōcxā hanidiuhm̃duum ja'a Dioshespíritu.

²⁻³ Jim jaduhñ yhĩjty juxychāgui'xxōō. Hayuu hānajt̃y ñā'āgā hity. Jimä Jesús hānajt̃y jia jōjcapxō'ōwa'añii ja'a mōjcu'ugōngām coog tyijy cu tiu'udāgooyy. Mānitā Jesús yuu piaatā. Mānitā Jesús ñāmaayyā ja'a mōjcu'ugōngām:

—Pō tōy miīch ja'a Dios xyHuunghaty, yajwa'añguiōj yō'ō tsaa nebiā tsaj-caaguiān —ja jōjcapxō'ōwaanā ja'a Jesús jaduhñ, paady jaduhñ ñāmaayyā.

⁴ Mānitā Jesús yhadsooyy:

—Jaduhnā Diosmādia'agy miāna'añ: “Ca'a quiaaguiā ja'a jāya'ayhajxy miājuyghādāt hādaa yaabā naaxwiin; mōōdā Diosmādia'agy hajxy miājuyghādāt.”

⁵ Mānitā mōjcu'ugong ja'a Jesús wioonōcxy maa ja'a tun jaañch teh̃m quiōxpān. Mānitā Jesús tu'habaquiā yajnāheebōōyyā ja'a naax ja'a cajpt cōxiā hādaa yaabā naaxwiin.

⁶⁻⁷ Mānitā Jesús ñāmaayyā:

—Hōōch nje'e yō'ōduh̃n cōxiā māduh̃ñtiā jii quiāhxō'ōgy. Yajxōñ yō'ō cajpt jaduhñ. Mōj jaañch ja'a jāya'ayhajxy, ja'a hajxy xiiby tsānaabiā. Hōōch jaduhñ cōxiā tōō xquiōxy cō'ōdāgō'ōy. Nmōōdhōch ja'a cuhdujt jaduhñ coōch hopiōnā nyajcō'ōdāgō'ōwāt. Y coōch miīch jaduhñ xwyiingudsāhgō'ōwāt, mānitōch miīch ngōxy mó'owāt.

⁸ Mānitā Jesús yhadsooyy:

—Jaduhnā Diosmādia'agy miāna'añ: “Mwiingudsāhgō'ōwāp ja'a Dios; je'eduh̃n mWiindsōnhādāp. Cab jaduhñ wiingpā mwiindsōnhādāt.”

⁹ Mānitā mōjcu'ugong ja'a Jesús wioonōcxy jim̃ Jerusalén-cajptooty. Mānit miōōdwiimbejty mōjtsajtojcuhdūum. Mānitā mōjcu'ugong miānaañ:

—Pō tōy miīch ja'a Dios xyHuunghaty, cuhdōpxnax̃ jiiby naaxwiin.

¹⁰ Caj miīch nej mjādāt. Jaduhñ jiiby myiñ̃ maa ja'a Diosmādia'aguiān: Dios hane'emaamb̃ ja'a mioonsāhajxy tsajpootypā coo miīch xcwieendāhādāt.

¹¹ Xchehñhidaamb̃ miīch hajxy jaduhñ nej miīch tsaajooty jaduhñ mga'a cuhnébāt.

¹² Mānitā Jesús yhadsooyy:

—Jaduhnā Diosmādia'agy miānaambā: “Cabā Dios mjōjcapxō'ōwāt, ja'a mWiindsōnhajpiā.”

¹³ Coō ja'a mōjcu'ugong miādia'agy hānajt̃y quia'a jōjtāgō'ōwāanāxā, mānit ñāhgueecnā.

¹⁴ Mānitā Jesús yhādaactāgajch Galileanaaxooty. Diosmājaa hānajt̃y miōōd. Mānitā mādia'agy wiādijty ja'a Jesúscōxpā wiinduhmyhagajpt.

¹⁵ Cajpt-cajpt ja'a Jesús hānajt̃y wiādity yajnāhixōōbiā tsajtōgooty. Mānitā Jesús quiumaayyā ja'a jāya'ayhajxy nāgōxiā.

¹⁶ Mānitā Jesús miejch Nazaret maa hānajt̃y tōō miuutsc-hatiān. Coō ja'a poo'xxiōō yhabaaty, mānit tiāgōōyy tsajtōgooty. Jaduhñ hānajt̃y ñā'āgā cuhdujthaty ja'a poo'xxiōōjooty. Mānit ñāmaayyā coō ja'a Diosmādia'agy quiāpxāt. Coō tiānaayyō'cy majiāya'awyiinduum,

¹⁷ mānitā libro mioōyyā, ja'a Isaiās hānajt̃y jegyhajty tōō jiāayābā, ja'a Diosquexypā. Mānitā libro quiejtōōyy. Mānit tiāgōōyy capxpā:

¹⁸ Ja'a Dioshespíritōch nmōōd.

Je'ečh tōō xpiāda'agy coōchā hāyoobāya'ayhajxy nhawāanāt coo hajxy yaghoyō'ōwa'añii.

Jaduhñhōch tōō xwyiinguexy coōchā jāya'ayhajxy nhawāanāt nebiā piojpā quiādieey hajxy ñāhwa'ads quiuhwá'adsāt,

nebiä Diosmädia'agy hajxy pedyii quiudiúnät.

¹⁹ Tøø jaduhñ yhabaady coo ja'a Dios ja'a mayhajt jaduhñ tiuna'añ møj may.

²⁰ Mänitä Jesús ja'a libro yhabädiñä. Mänitä tsajtøjyohbiä jaduhñ miooyä. Mänitä Jesús yhäñaaguiädaacy. Wyi'i wyiinhee'ppejpy ja'a cu'ug ja'a Jesús hajxy hñajty.

²¹ Mänitä Jesús miänaañ:

—Tøø ja'a Diosmädia'agy tiøjiaty nébiøch tøø ngapxiän.

²² Mänitä cu'ughajxy yagjuøøyy coo ja'a Jesús hñajty hoy tøø quiapxy. Hoy ja'a Jesús hajxy hñajty ñänømy:

—Maa yø'ø capxy yø'ø mädia'aguiäda'a tøø yhuug habøjpä. Haa ca'a, ja'a José yhuung yø'øduhñ, cabä —nøm hajxy hñajty miäna'añ.

²³ Mänitä Jesús miänaañ:

—Jadúhñhøch mijtsäda'a xñäma'awa'añ: “Huuc yajcähxø'øg ja'a hijxtahñd yaa maa ja'a mhamdsoo cajptän nej miičh jim tøø mhuuc yajcähxø'pän jim Capernaum.”

²⁴ Mänitä Jesús jiaac mänaañ:

—Pero høøch jaduhñ mänaamb, ja'a Diosquexypähajxy, cabä miädia'agyhajxy miäbøgáanäxä maa yhamdsoo cajpthajxiän. Tehm tiøyhajt jaduhñ.

²⁵⁻²⁶ Coo ja'a Elías hñajty jegyhajty wiädity Diosmädia'agy-yajwa'xpä yaa Israelpä-naaxooty, tågøøgiomøjtä cupc caj ñä'ägädä tuuyy. Chaadsä yuuxøø jiaančh tehñ jiajtä. Mänitä Dios ja'a Elías quiejxy maa ja'a cajpt hñajty xiøhatiän Sarepta, jim Sidón mäwiingón. Jimä Elías ja'a yaamgto'oxy hoy tu'ug piuhbety. Pero ja'a yaamgto'oxyhajxy yaabä, cab hajxy yajnäguejxä, hoy hajxy hñajty jia nämayyä.

²⁷ Jaanä jaduhñduhmbä, jii haxøøgpa'ammøødpähajxy hñajty nämay yaa Israelpä-naaxooty mänaa ja'a Eliseo hñajty yaa wiäditiän Diosmädia'agy-yajwa'xpä. Pero cabä pia'amhajxy jaduhñ yajnax yajmáayyaxä. Jagooyyä Naamán pia'am nidiuhñ ñajxy miaayy, y jäguem hñajty chäna'ay jim Sirianaaxooty, ca'a yaajä.

²⁸ Coo ja'a jäya'ayhajxy jaduhñ miädooyy nebiä Jesús miänaañän, ja'a hajxy hñajty jiiby tsajtøgootypä, cøjx hajxy jiootma'ady.

²⁹ Mänitä Jesús hajxy ñädänaayyø'cy. Mänitä Jesús hajxy jim yajnøcxy tunguhduum jim cajtpa'a. Jimä Jesús hajxy hñajty quihjuipnaxa'añ.

³⁰ Pero cabä Jesús hajxy nej ñä'a tuuñ. Jaduhyyä je'e yajyohñajxy ma-jiäya'ayhagujc. Mänit jim wyiimbijnä.

³¹ Mänitä Jesús ñøcxy Capernaum, jim Galileanaaxooty. Coo ja'a poo'xxiøø yhabaaty, mänitä Jesús ja'a cu'ug tiägøøyy yajnähixøøbiä tsajtøgooty.

³² Jaduhñä Jesús hñajty yajnähixø'øyy nebiä capxta'agypiän, paadiä cu'ughajxy hñajty yagjuø'øyy.

³³ Jiibiä jäya'ay hñajty tu'ug ja'a møjcu'uba'ammøødpä. Mänit møc yaaxy:

³⁴ —Ween højts nhity. Tii jaduhñ mhøxtaaby maa højtsän. Nej, xya-jcuhdägoyyaamb højtsä. Nhíxyhøch miičh. Jesús mxøhaty. Nazaret mdsooñ. Nnajuøøbiøch jaduhñ coo miičhä Dios xyHuunghaty.

³⁵ Mänitä Jesús ja'a møjcu'u yhojy:

—Hamón, jua'ads jim maa yø'ø craajän.

Mänitä mähdiøjc quiädaayy naaxwiin maa ja'a jäya'ay wyiinduumhajxiän. Mänitä møjcu'u piädsøømy. Cabä mähdiøjc nej jiajnä.

³⁶ Mänitä jäya'ayhajxy nägøxiä chähgøøyy. Mänit hajxy ñiñämaayyä:

—Høxtahm̄ds jaduh̄n quiapxy miädia'agy. Cuhdujtmøødäda'a yø'øduh̄n maa ja'a møjcu'uhajxiän. Jaan̄ch pädsøømb hajxy jaduh̄n coo hajxy ñäma'ayii coo hajxy piädsø̄mät.

³⁷ Mänitä mädia'agy tiägøøyy wädiypä ja'a Jesúscøxpä jim wiin-duhmyhagajpt.

³⁸ Mänitä Jesús piädsøømy tsajtøgooty. Mänit ñøcxy maa ja'a Simón tiøjc-hajxiän. Jiibiä Simón miø'ødhoc hānajty pia'amgo'na'ay tomiøød. Mänitä Jesús hajxy miānuu'xtaacy coo ja'a toy ween yajtøjtsäxä.

³⁹ Mänitä Jesús ja'a pa'amjäya'ay wyiinguwoodsøøyy. Mänit miānaañ coo ja'a toy ween ñāhwa'ačhii. Mänitä ja'a toy jiaan̄ch tøjtsnä. Mänitä pa'amjäya'ay piädø'cy. Mänit tiägøøyy mayhajt-tuumbä maa ja'a Jesúshajxiän.

⁴⁰ Coo chuujøøyy, mänitä pa'amjäya'ayhajxy may wioomejtsä maa ja'a Jesúsän. Madiu'u ja'a pa'am hajxy hānajty miøødä. Mänitä Jesús nägøxiä quiø'nāhgajpy tu'ugjaty-tu'ugjaty. Jaduh̄nä pia'amhajxy ñāhwaats quih-waatsä.

⁴¹ Nāmay hajxy hānajty miøjcu'uba'ammøødä. Coo ja'a møjcu'uhajxy piädsøømy, mänit hajxy yhayaaxy:

—Dios miich xyHuunghajp.

Mänitä Jesús ja'a møjcu'u yhojy. Cab hajxy ñä'ägä yajcapxä. Hiḡ, ñajuøøby hajxy hānajty coo ja'a Jesús jie'ejä ja'a Cristo, ja'a Dios tøø quiéxiäbä.

⁴² Coo jiojøøyy, mänitä Jesús ñøcxy cajtpa'a hanidiuhm̄duum. Jimä cu'ug ja'a Jesús hajxy hānajty yhøxta'ay. Coo hajxy piaaty, mänit hajxy jia yajmāhmø'øwaañ.

⁴³ Mänitä Jesús miānaañ:

—Páadyhøch ja'a Dios yaa tøø xquiexy hädaa yaabä naaxwiin cooç wiin-duhmyhagajpt nwädítät, cooç nyajwiingapxø'øwät coo ja'a Dios ja'a miäjaa yajcāhxø'øgaan̄nä. Paady, cáboch yaa nmāhmø'øwa'añ.

⁴⁴ Jaduh̄nä Jesús hānajty wiädity yajnāhixøøbiä jim Galileanaaxooty. Wiin-duhmyçhajtøjc hānajty wiädity.

5

¹ Mänitä Jesús hānajty jim tiāna'ay Genesaretmejypia'a. Mänitä jäya'ayhajxy may miejch Diosmädia'agymiädoobä. Nø'øchpān ja'a jäya'ayhajxy hānajty tiāna'ay maa ja'a Jesúsän. Cabä hawa'adspä hānajty maa.

² Mänitä Jesús barco yhiḡxy metsc jim mejypia'a. Yajwa'adsä barco hānajty. Jimä cubarcohajxy hānajty quihjuijptsabiujy mäwiingón.

³ Mänitä Jesús ja'a barco tu'ug yajpejty ja'a Simón jie'e. Mänitä Jesús ja'a Simón ñāmaayy coo barco weenä yajmäwiingónät wiinduum. Jimä Simón ja'a Zebedeo yhuunghajxy hānajty miøødä nāmetscä. Jacobo hānajty tu'ug xiøhaty. Tu'ug hānajty xiøhajpä Juan. Mänitä Jesús yhäñaaguiädaacy barcojooty. Mänitä cu'ughajxy tiägøøyyä yajwiingapxøøyyäbä.

⁴ Coo ja'a Jesús jaduh̄n quiapxpädsøøyy, mänitä Simón ñāmaayyä:

—Yajmøjyo'oy ja'a mbarco ja ween com̄duum. Jiibiä mguhjuijptsay hajxy mbädä'agät.

⁵ Mänitä Simón yhadsooyy:

—Wiindsøn, tu'tsuhm̄ hōjts tøø nja cuhjuipy. Cab hōjts tii tøø nnä'ägädä mach. Pero cooç miich jaduh̄n tøø xñāma'ay, nōcxyhøch nhuuc jaac juipy.

⁶ Coo hajxy jaduh̄n jiaan̄ch cudiuuñ, mänitä hacx hajxy may miajch, høxtä tsøømgøø'tsä ja'a cuhjuijptsay jaduh̄n.

⁷ Mänitä miägu'ughajpä hajxy miøjyeemy, ja'a hajxy hānajty wiingbarco-jootypä, coo hajxy min̄ piuhbedyii. Mänitä barco hajxy metsc yaghujch. Ja weenjaty hajxy quia'a mäguiinä.

8-10 Mänit hajxy yagjuøøyy coo hacx hajxy may miajch. Mänit hajxy ñajuøøyy coo ja'a Jesús ja'a hijxtahnd jaduhñ yajcähxø'cy hoy-yagjuøøñä. Mänitä Simón Pedro ja'a Jesús wyiinijcädaacy. Mänit miänaañ:

—Wiindsón, cábøch miičh hawiinmats xmiøødhídät. Cábøch hoguiuhdujt nmøødä.

Mänitä Jesús ja'a Simón ñämaayy:

—Ca'a mdsähgø'øyy. Wiingtuung mbanøcxáañp. Myajwiin-gapxø'øwaambiä cu'ug ja'a Diosmädia'agy.

11 Mänitä barco hajxy yajmøjyohbiejty mejypia'a. Mänitä Jesús hajxy piadu'ubøjcy. Ñähgueecy hajxy jaduhñ cøxiä.

12 Mänitä Jesús wiingcajt miejch. Jimä jäya'ay hānajt tu'ug haxøøgpu'udsmøød. Coo ja'a Jesús yhiixä, mänit wyiinijcädaacä. Mänit ñämaayyä:

—Wiindsón, miičh nnämaaby, høøch nbu'uds yajtsóocäc.

13 Mänitä Jesús ja'a mähdiøjc ñähdooñ. Mänitä Jesús miänaañ:

—Tøø jaduhñ mdso'ogy.

Tuunä ja'a Jesús jaduhñ ñä'ä mänaañ, mänitiä ja'a mähdiøjc choocy.

14 Mänitä Jesús miänaañ:

—Caj pøn mhawáañät coo tøø mdso'ogy. Nøcx tu'uda'aquiä maa ja'a teediän. Jimä xädø'øñ mguyoxø'øwät nebiä Moisés jecy yhanehmiän. Paadiä xädø'øñ mguyoxø'øwät, jaduhñä hijxtahnd myajcähxø'øgät coo tøø mdso'ogy.

15 Mänitä mädia'agy hajxy yajwädipty jäguembaady cooc ja'a Jesús ja'a hijxtahnd tøø yajcähxø'øgy. Mänitä jäya'ayhajxy maas may jiaac hamugøøyy maa ja'a Jesúsän. Ja'a Jesús miädia'agy hajxy hānajt yhamädoowhidáañp. Møødä pia'amhajxy hānajt yajnaxáañäxä.

16 Coo ja'a jäya'ayhajxy hānajt wyi'i yhamugø'øyy maa ja'a Jesúsän, paadiä Jesús hanidiuhmduum ñøcxy Diospa'yaaxpä.

17 Wiinghoocä Jesús ja'a cu'ug hānajt yajwiingapxø'øyy. Jaanč tehñ yhujs ja'a tøjc hānajt. Jiibiä fariseoshajxy hānajt yhäña'ay møødä ley-yajnähixøøbiähajxy. Wiinduhmyhagajpt hajxy hānajt chooñ Galileanaaxooty møødä Judeanaaxooty møødä Jerusalén. Miøødä Jesús ja'a Diosmäjaa hānajt nebiä pa'am jaduhñ yajnaxät.

18 Mänitä cø'ømucypiä tecymiucypiä tu'ug quiøømiejtsä tsaajiooty. Jiiby hajxy jia yajtøjtägø'øwaañ maa ja'a Jesús hānajt miädia'aguiän.

19 Pero jaanč tehñ yhujs ja'a tägø'øwøødiaact hānajt. Mänit hajxy ñiñämaayyä coo hajxy jim yaghawa'adsa'añ tøjnähgøxp. Mänit pa'amjäya'ay hajxy quiuhdøøñhajxy tøjcuhduum maa ja'a Jesús hānajt pia'täna'ayän.

20 Coo ja'a Jesús ñajuøøyy coo ja'a miädia'agy hānajt miäbøgáañäxä, mänitä cø'ømucypiä tecymiucypiä ñämaayyä:

—Mägu'ughajpä, miičh nnämaaby coo ja'a mbojpä mgädieey tøø xñähwa'ačh tøø xquiuhwa'ačh.

21 Mänitä fariseoshajxy quiopcooty tiägøøyy mädiaactaäcpä møødä ley-yajnähixøøbiä: “Tii yø'ø craa jaduhñ coo miäna'añ. Capxtägooby yø'øduhñ. Jagooyyä Dios ja'a cuhdujt jaduhñ miøødä coo ja'a pojpa cädieey miée'xät.”

22 Mänitä Jesús ñajuøøyy nebiaty hajxy hānajt miädiaacta'agy quiopcooty. Mänit miänaañ:

—Tii hajxy jaduhñ coo mmädiaacta'agy mgopcooty.

23 Nej, maas páquiøch yø'ø mähdiøjc nnämä'awädä: “Tøøch miičh mbojpä mgädieey nmämee'xy”, tøgä maas páquiøch jaduhñ nnämä'awädä “Tänaayyø'øg, yo'oyø'øg.”

²⁴ Mhuug híxäp hajxy nébiøch hädaa mähdiøjc nyajmøcpøga'añ. Jaduhn hajxy mnajuø'øwät cooçhä cuhdujt jaduhn nmøødä hädaa yaabä naaxwiin cooçhä pojpä cädieey jaduhn nmée'xät, høøch ja'a Diosquexypä.

Mänitä mähdiøjc ñämaayyä:

—Tänaayyø'øg; widsø'øg yø'ø mdsaa; nøcxnä maa ja'a mdøjcän.

²⁵ Mänitiä ja'a mähdiøjc jaduhn tiänaayyø'cy maa ja'a wyiinduumhajxiän. Mänitä tsaay wyidsø'cy maa hänajty tøø quio'na'ayän. Mänit ñøcxnä maa ja'a tiøjcän. Mänitä Dios Dioscujú'uyäp miooyy.

²⁶ Mänit hajxy nägøxiä jiaanç tehñ yagjuøøyy. Jaanç tehñ chähgøøyy hajxy jaduhn. Mänitä Dios Dioscujú'uyäp hajxy miooyy. Mänit hajxy miänaañ:

—Tøødsä hoy-yagjuøøñäbä hajxy nhíxäm jäda'a.

²⁷ Mänitä Jesús wyiimbijnä. Mänitä jäya'ay tu'ug yhiixy, ja'a Levíhajpä. Jimä Leví hänajty yhäña'ay maa hajxy hänajty yajñähuudiu'udiän. Je'e ja'a Leví hänajty tiuunghajpy. Mänitä Jesús ja'a Leví ñämaayy:

—Høøch pamíñäc.

²⁸ Mänitä Leví tiänaayyø'cy, pianøcxy ja'a Jesús. Cøjx jaduhn ñähgue'egy mäduhñtiä hänajty miøødä.

²⁹ Mänitä Leví ja'a xøø yagjajtä maa ja'a tiøjcän ja'a Jesúscøxpä. Jiibiä yajñähuudiuutpähajxy hänajty nämay miägaabiä møødä wiinghänä'c-hajxy.

³⁰ Jiibiä fariseoshajxy hänajty miägaabiä møødä ley-yajñähixøøbiähajxy. Mänitä Jesús jiamiøødhajxy ñämaayyä ja'a fariseoshajxy:

—Tii yø'ø yajñähuudiuutpä hajxy coo mmøødcay coo mmøødhu'ugy. Haa ca'a, jue'e yø'ø hajxy, pojpäya'ay cädieejäya'ayhajxy jaduhn.

³¹ Mänitä Jesús yhadsooyy:

—Pøñ møc, cab hajxy yajtsooyø'øy. Pøñ pa'ammøød, je'eds hajxy yajtsooyøøby.

³² Jaduhn mäwíinäts høøch ja'a pojpäya'ay cädieejäya'ay nyajñähwa'açh nyajcuhwa'açh. Pero mijts jaduhn mänaamb cooc tyijy pojpä cädieey hajxy mga'a møødä. Páadyhøch mijts waamb nga'a nämä'ay.

³³ Mänitä Jesús hajxy ñämaayy:

—Ja'a Juan jiamiøødhajxy, naxy hajxy yhity hayuu; naxiä Dios hajxy pia'ya'axy. Jaduhnä fariseos jiamiøødhajxy naxy quiudiumbä. Pero miich mjamiøødhajxy, nä'ä caaby nä'ä huucp hajxy je'e. Cab hajxy yhity hayuu. Cab jaduhn yhooyä.

³⁴ Mänitä Jesús miänaañ:

—Coo ja'a pøc hu'ug maa jiadyii, cabä woybä wichpähajxy hayuu wyiimbity. Jaduhn mäwíinäts høøch nebiä jamiø'ødän ja'a pøgaambä. Páadyhøch njamiøødhajxy hayuu quia'a hity.

³⁵ Habaadäänäp jaduhn cooçh yaa ndsoonaannä. Mänitøch njamiøødhajxy yhida'añ hayuu mabøcypä.

³⁶ Mänitä Jesús jadähooc wyiingapxøøguiumbä:

—Cabä tucwit pøñ yhagøyyø'øy jemýwyithaam. Cøødsäp ja'a jemýwyit jaduhn; cab jaduhn ñibiaada'añii møødä tucwit.

³⁷ Jaanä jaduhnñuhmbä, cabä jemývyino pøñ quiudemø'øy ja'a tucwajhacxujiooty. Cøødsäp ja'a tucwajhacxuy jaduhn; høxyógäp ja'a vino jaduhn. Haagä tågöyyäp ja'a tucwajhacxuy jaduhn møødä vino.

³⁸ Pero jiibiä jemývyino hajxy quiudemø'øy ja'a jemýwiajhacxujiooty. Cab jaduhn tii mia'ady, ni ja'a jemývyino, ni ja'a jemýwiajhacxuy.

³⁹ Cabä jemývyino pøñ hoyhuucnä jiäwø'øy coo ja'a vino hänajty tøø yhu'ugy ja'a tehñ jiecypä. “Maas hoyhuucnä ja'a jecyvyino” —nømä jäya'ayhajxy miäna'añ.

6

¹ Mänitxøø ja'a Jesúshajxy hānajt wiädity trigoni'ibiquiujc. Poo'xxiøøjooty hānajt je'e. Mänitā jiamioød ja'a trigo hajxy tiøjy. Mänit hajxy ñāhxajtstuuty. Mänit hajxy jiøø'xy.

² Mänitā fariseoshajxy näje'e miānaaŋ:

—Cabā cuhdujt jaduhñ myiñ coo hajxy jaduhñ mdúnāt ja'a poo'xxiøøjooty.

³ Mänitā Jesús miānaaŋ:

—Nej, cahnā ja'a Diosmādia'agy hajxy mgapxiā nebiā David tiuuñ coo hānajt yāho'ogyii møødā jiamioødhajxy.

⁴ Mänit hajxy jiiby tiägøøyy tsajtøgooty. Mänitā tsajcaagy hajxy quiaaay ja'a teedyhajxy hānajt tøø quiuyoxø'øyābā. Cabā David ja'a cuhdujt hajxy hānajt miøødā coo hajxy jaduhñ quiáyāt. Jagooyyā teedy ja'a cuhdujt hajxy hānajt miøødā coo hajxy quiáyāt.

⁵ Høøch ja'a Diosquexypā, jadúhñhøch høøchpā, nmøødhøch ja'a cuhdujt jaduhñbā høxtā maa ja'a poo'xxiøøbaadiān —nømä Jesús miānaaŋ.

⁶ Jatu'ugpā poo'xxiøøjootypā ja'a Jesús tiägøøyy tsajtøgooty. Mänit tiägøøyy yajwiingapxøøbiā. Jiibiā mähdiøjc hānajt tu'ug hadu'ugcø'ødø'øds ja'a yha-hooyhaampiā.

⁷ Jiibiā fariseoshajxy hānajt tiāna'ay møødā ley-yajñāhixøøbiāhajxy. Jiibiā Jesús hajxy hānajt wyi'i yheeby. Yhijxmajchp ja'a Jesús hajxy hānajt pø ya-jnaxaambiā pa'am ja'a poo'xxiøøjooty. Yhøxtaabiā fariseos ja'a wiinmahñdy hajxy hānajt nebiā Jesús hajxy yajtsumøøjāt coo ja'a pa'amjäya'ay hānajt yajmøcpøgyii ja'a poo'xxiøøjooty.

⁸ Ja'a Jesús, ñajuøøby hānajt je'e nebiā fariseoshajxy hānajt tiajy miay. Mänitā Jesús ja'a mähdiøjc ñāmaayy ja'a hadu'ugcø'ødø'ødspā:

—Tānaayyø'øg, min huuc tāna'aw cujc.

Mänit jiaančh tānaayyø'cy.

⁹ Mänitā Jesús ñāmaayy ja'a fariseoshajxy:

—Mijts nmäyajtøøby, nej, yejpiā Dios ja'a cuhdujt jaduhñ coo hajxy hoy ndúunāmāt ja'a poo'xxiøøjootiā, tøgā yejpiā cuhdujt coo hajxy haxøøg ndúunāmāt ja'a poo'xxiøøjootiā. Jaanā jaduhñduhñbā, nej, yejpiā Dios ja'a cuhdujt coo ja'a jäya'ay hajxy nyajñāhwātsāmāt ja'a poo'xxiøøjootiā, tøgā yejpiā cuhdujt coo jäya'ay hajxy nyajcuhdägóoyyāmāt ja'a poo'xxiøøjootiā.

¹⁰ Mänitā Jesús ja'a jäya'ay wyiinhee'ppejty nāgøxiā. Mänitā Jesús ja'a mähdiøjc ñāmaayy:

—Xajtøw yø'ø mgø'ø.

Mänitā quiø'ø jiaančh xajtøøyy. Mänitā quiø'ø hoy jiajnā.

¹¹ Mänitā fariseoshajxy jiootma'ty hoyhoy. Mänit hajxy quiojyquiapxyhajt nebiā Jesús hajxy tiuna'añ.

¹² Cujaboomgumaaxc ja'a Jesús ñøcxy tunghdum. Tu'tsuhmā Tieedy pia'yaaxy.

¹³ Coo jiobøøyy, mänitā jiamioødhajxy miøjyaaxy. Mänitā nämajmetspāhajxy wyiimbiiwā coo ja'a Diosmādia'agy hajxy yajwá'xāt.

¹⁴ Jaduhñdsā nämajmetspāhajxy hānajt xiøhaty: Simón, ja'a Jesús hānajt tøø yajxøbėtiābā Pedro, møødā piuhya'ay Andrés, møødā Jacobo, møødā Juan, møødā Felipe, møødā Bartolomé,

¹⁵ møødā Mateo, møødā Tomás, møødā Jacobo, ja'a Alfeo yhuung, møødā Simón ja'a celote,

¹⁶ møødā Judas, ja'a Jacobo yhuung, møødā Judas Iscariote; je'e ja'a Jesús hānajt yajcø'ødägø'øwaamb ho'cøøc maa ja'a fariseoshajxiān.

17 Mänitä Jesúshajxy miänajnä tunguhduum. Mänit hajxy hoy ñaaxoguiädaacnä. Jimä Jesús jiamiøðhajxy hñajty nāmāy. Jimä jäya'ayhajxy hñajty may tøø miech. Ja'a Jesús miädia'agy hajxy hñajty yhamädoowhidáanäp. Yajnaáanäxäp ja'a pia'amhajxy hñajty. Jäguembaady hajxy hñajty tøø chooñ Judeanaaxooty, møødä Jerusalén, møødä mejypia'a jim Tiro møød jim Sidón.

18 Ja'a jäya'ayhajxy hñajty møjcu'uba'ammøødpä, yajnájxäxä ja'a pia'amhajxy je'ebä.

19 Nägøxiä ja'a Jesús hajxy hñajty ñähdona'añ. Mänitä pia'amhajxy yajnájxäxä ja'a Jesús miäjaahaam.

20 Mänitä Jesús wyiinhee'ppejty ja'a jiamiøðhajxy. Mänit miänaañ:

—Jootcuyc mijts mhity, mijts häyoobädøjc. Paady hajxy jootcuyc mhity coo hajxy jim mnøcxa'añ maa ja'a Diosän.

21 Jootcuyc mijts mhity, mijts yajmaajiajpä. Paady hajxy jootcuyc mhity coo ja'a Dios hajxy cøxiä wiinä xmio'owa'añ.

Jootcuyc mijts mhity, mijts jøøbiä xuu'tspä. Paady hajxy jootcuyc mhity coo hajxy mxi'ig mxoonäda'aga'añ.

22 Jootcuyc mijts mhity, hoy mijts jäya'ay xjia mähanhaty ja'a høøchcøxpä, hoy mijts jäya'ay xquia'a ja tsocy xquia'a ja mee'xy, hoy mijts xjia nänømy, hoy mijts xjia pexy.

23 Mxi'ig mxoonäda'agäp hajxy jaduhñ. Mbaadaambiä hoyhajt ja'a weenhajt hajxy jim tsajpootyp. Jaduhñ hajxy jiajpä yhabejpä, ja'a Diosmädia'agy hajxy jecy tøø yajwá'xiäbä.

24 Pero mijts mäyøøjäya'ayhajxy, ja'a tsaačhpä hajxy mbaadaamby. Cab hajxy mxoonäda'agaannä neby hajxy hijty mxoonäda'aguiän.

25 Hoy mijts tii hamaay mga'a ja juø'øy, myajmaajiadaamby hajxy jaduhñ.

Hoy mijts mja xi'igy mja xoonäda'agy, pero mnä'ägädä jøøw mnä'ägädä xuudsaamb hajxy.

26 Tsipcøxpä tsaačhpä hajxy mbaada'añ, hoyyä cu'ug hajxy xjia cumay. Jaduhñä jäya'ayhajxy hijty yajcumay ja'a hajxy hijty jegyhajty nä'ä wädijpä hønndaacpä. Nä'ä mänaamb hajxy hijty jaduhñ cooc tyijy ja'a Diosmädia'agy hajxy yajwa'xy.

27 Huuc mädown hajxy, mdsógäp hajxy pøn jaduhñ xmiädsiphajp hädaa yaabä naaxwiin; mmée'xäp hajxy pøn jaduhñ xmiähanhajp.

28 Mmänuu'xtá'agäp ja'a Dios hajxy coo ja'a Dios ween mio'oy ja'a hoyhajt ja'a weenhajt pønjaty mijts jaduhñ xyhäyoowhijxp, pønjaty mijts jaduhñ haxøøg xñänøømb.

29 Coo pøn xyhatejxø'øgät tu'nax, mmøjcøogumbäp jadu'nax; ween jaduhñ jadu'nax xjiaac tehñ yhatejxø'øgy. Coo pøn mjocxwit xpiójcät, mänitä mgamiixy mjaac tehñ mió'owät.

30 Coo pøn tii jaduhñ xmiäyujwá'anät, mmó'owäp jaduhñ. Y coo pøn tii xpiójcät, cab je'e mmäyujwaandägátsnät.

31 Jaduhñds mijts wiinghänä'c mnäxúudsät nej mijts hñajty myajnäxuudsa'añän.

32 Coo ja'a mmägu'ughajpähajtiä hajxy mmøødnijootpaadøøjät, cab hajxy tii mbáadät; jaduhñdsä pojpyä'ay cädiejiäya'ayhajxy ñiçhójcäbä.

33 Coo hajxy jagooyyä mmøødniñäxuudsøøjät pønjaty jaduhñ xñäxuu'tsp, cab hajxy tii mbáadät; jaduhñdsä pojpyä'ay cädiejiäya'ayhajxy ñiñäxúu'tsäbä.

34 Coo jagooyyä xädø'øñ hajxy myaghanúu'xät pøn jaduhñ mnajuøøby xmioodiägatsaamb pedyii, cab hajxy tii mbáadät; jaduhñdsä pojpyä'ay

cädiejiäya'ay xädø'øñ hajxy yajnimiähanúu'xäbä. Ñajuøøby hajxy jaduhñ coo hajxy pedyi mioodiägatsa'añii.

³⁵ Mdsógäp hajxy pøn jaduhñ xmiädsiphajp. Mnäxúudsäp hajxy jaduhñ. Coo pøn xädø'øñ xmiäyujwá'anät, mnä'ä mó'owäp jaduhñ. Mänitä hoyhajt ja'a weenhajt hajxy mbáadät may. Mänitä Dios hajxy xyhuunghádät jim tsajpootyp. Hix, Dios, ñäxuu'chp ja'a jäya'ayhajxy høxtä ja'a jäya'ayhajxy ja'a Dioscujú'uyäp hajxy quia'a yejpiä, møød ja'a hojioot hajxy ca'a møødpä.

³⁶ Mmøødhádäp ja'a hojioot hajxy jaduhñ nebiä nDeedy hojioot miøødhájtäm.

³⁷ 'Cabä wiinghäna'c hajxy mnähójt coo ja'a Dios hajxy xyajcumädówät. Pero mmämée'xäp hajxy jaduhñ; mänitä Dios hajxy jaduhñ xmiämée'xpät.

³⁸ Mäduhñtiä wiinghäna'c hajxy mmo'oy, nä'ä tågø'øbä hajxy mbaattägatsa'añ.

³⁹ Jaduhñhøch mijts nyajmäbáadät nebiä wiindspän. Coo ja'a wiindspähajxy ñiwyitswädityi, tsipcøxp hajxy jiutca'ay. Paady mijts jaduhñ mga'a wädität nebiä wiindspän.

⁴⁰ Cabä capxtaACPäna'c-hajxy jiaty jaty nebiä wyiindsøn hajxy jiatian. Coo hajxy nägø'ø nädecypiä quiapxtá'agät, mänit hajxy jaduhñ ñajtspaadó'owät.

⁴¹⁻⁴² 'Coo ja'a mmägu'ughajpä weeñtiä quiädiéeyät, y coo miich hānajt maas hanaxiä tøø mgädieey, cabä mmägu'ughajpä hawiinmats waamb mnä'ägädä nämá'awät. Coo miich hānajt tøø mnähwa'açh, mänitä mmägu'ughajpä hawiinmats mwiingapx mjøjcaxø'owät.

⁴³ 'Mädyi quepychaa pa'ag nä'ägädä tømbejp, ni mānaa ja'a tiøm quia'a xunä. Jaanä jaduhñduhmbä, mädyi quepychaa xun nä'ägädä tømbejp, ni mānaa ja'a tiøm quia'a pa'agø'oy. Tøyhajt jaduhñ.

⁴⁴ Mnajuøøby hajxy jaduhñ mädyi quepychaa hoy tømhajp. Ja'a hapy, cab jaduhñ tiømhaty nebiä piidsän. Y ja'a wädsats, cab jaduhñ tiømhaty nebiä tsaatypän.

⁴⁵ Jaduhñ mäwínädsä hojiäya'ay ja'a howyiinmahñdy miøødä. Hoy jaduhñ wiädity. Pero ja'a ca'awiindøjiäya'ayhajxy, cabä howyiinmahñdy hajxy miøødä. Haxøøgwiiinmahñdy hajxy miäwädiipy. Haxøøg hajxy jaduhñ ñä'ägädä capxy ñä'ägädä mädia'agy.

⁴⁶ 'Wiindsøn høch mijts xwyi'i ñāma'ay; pero cab hajxy jaduhñ mgudi-una'añ nébiøch mijts nja hane'emiän.

⁴⁷ Pøn høch nmädia'agy xmiädóowäp, pøn høch nmädia'agy xmiäbøjcäp, jaduhñ mäwínäts je'e

⁴⁸ nebiä jäya'ay tøjcojjiän. Cøøc jaduhñ tiajøøyy. Tsaawiing jaduhñ miuu'tsø'cy. Coo ja'a nøøgomdägoy quiädaacy, coo ja'a tøjc jaduhñ ñøønähgoombejty, cab jaduhñ piädø'cy, je'eguiøxpä coo hānajt cøøc miuu'tsø'øguiä.

⁴⁹ Pero pøn høch nmädia'agy jaduhñ xquia'a mabøjcäp, jaduhñ mäwínäts je'e nebiä jäya'ay tøjc cøøc quia'a muu'tsø'quiän. Coo ja'a tøjc ñøønähgoombejty, pädø'c jaduhñ; cøjx jaduhñ quiäday.

7

¹ Coo ja'a Jesús miädiaacpädøøyy, mänit quiajptägøøyy Capernaum.

² Jimä soldadowiindsøn hānajt tu'ug. Roma hānajt chooñ. Tøø ja'a mioonsä hānajt tu'ug pia'ambety. Jaduhñ hānajt jiäwø'øy nebiä yhamdsoo puhya'ayän. Nä'ägädä ho'ogáannäp hānajt je'e.

³ Coo ja'a soldadowiindsón miädoyhajty coo ja'a Jesús ja'a pa'amjäya'ay hānajtj yajmøcpøcy, mānitā majtøjc nāje'e quiejxy maa ja'a Jesúsān. Judíos hajxy je'e.

⁴ Mānitā Jesús hajxy hoy miānuu'xta'agy coo ja'a pa'amjäya'ay ween nøcxy yajmøcpøcy. Mānitā Jesús ñāmaayyā:

—Ja'a soldadowiindsón, hojiäya'ay je'e. Hahixøøby jaduhñ coo mbuhbédät.

⁵ Xchójcām hajxy jaduhñ. Tøø højts ndsajtøjc xyajcójjām.

⁶⁻⁷ Mānitā Jesús ja'a majtøjc miøødtu'ubøjcy. Ja ween hajxy hānajtj quia'a coody maa ja'a soldadowiindsón tiøjcān, mānitā soldadowiindsón ja'a Jesús capxy yajnāguejxy:

—Wiindsón, jaduhyyā mmānā'anāt cooñ nmoonsä miøcpøgāt. Cábøch cuhdujt nmøødä nej miich cuhdujt nmøødān; paady jaduhñ caj yhawii-nmatsä coo mdägø'owät maañ ndøgootiān. Pāadyhøch miich hamdsoo tøø nga'a mägapy.

⁸ Hix, hané'emyhøch nhity; y cooñ nsoldado howiaambā nhané'emāt møødhøch nmoonsä, xquiudiúunābøch nmādia'agy hajxy —nømā soldadowiindsón ja'a Jesús quiapxyñāguejxy.

⁹ Jaanñ tehñ yagjuøøyy ja'a Jesús jaduhñ coo jaduhñ ñāmaayyā. Mānitā cu'ug wyiinhee'ppejty. Mānit miānaañ:

—Cábøch nmägunaaxhajxy jaduhñ miäbøcy nej yø'ø craa miäbøquiān, y jäguem choon.

¹⁰ Ja'a majtøjc hānajtj tøø quiexyíjābā maa ja'a Jesúsān, mānit hajxy wyi-imbijnā. Coo hajxy miejtstägajch maa ja'a soldadowiindsón tiøjcān, tøø ja'a soldadowiindsón mioonsä hānajtj miøcpøjnā.

¹¹ Mānitā Jesús hajxy ñøcxy maa ja'a cajpt hānajtj xiøhatiān Naín møødä miägu'ughajpāhajxy. Nāmayyā jäya'ayhajxy hānajtj pianøcxy.

¹² Jim hajxy hānajtj miäwiingoñ cajptpa'a, mānitā ho'ogyjiäya'ay hajxy hoy jiojcubaadø'øyy. Cabāsantā hānajtj nøcxy ñaaxtägø'øyy. Tu'ughuung hānajtj je'e. Yaamgto'oxy ja'a tiaj je'ebā. Majiäya'ay hānajtj panøcxp.

¹³ Coo ja'a Jesús ja'a yaamgto'oxy yhijxy, mānit ñāxuul'ch. Mānit ñāmaayy:

—Ca'a mjø'øyy ca'a mxuuch.

¹⁴ Mānitā Jesús miānaañ coo hajxy yhuuc yaghahíxāt. Mānitā cøøbiädøjc-hajxy tiānaaxiøjpy. Mānitā Jesús ja'a ho'ogyjiäya'aguiajä hoy ñāhdoñ. Mānitā ho'ogyjiäya'ay ñāmaayy:

—Jexy, pädø'øg.

¹⁵ Mānitā craa yhäñaayyø'cy. Mānit quiapxø'cy. Mānitā tiaj miødhajnā.

¹⁶ Mānitā jäya'ayhajxy nāgøxiā jiaanñ tehñ yagjuøøyy. Mānitā Dios hajxy ñāmaayy:

—Dioscujú'uyäp.

Mānit hajxy ñiñāmaayyā:

—Diosquexy yø'ø craa. Møj jaanñ yø'øduhñ. Paadiä Dios tøø quiexy, piuhbedaamby ja'a quiu'ug jaduhñ, ja'a hajxy hädaa yaabā naaxwiimbā.

¹⁷ Mānitā mādial'agy tiägøøyy wädijpā jim Judeanaaxooty coo ja'a Jesús ja'a ho'ogyjiäya'ay tøø yagjuypioøcy. Wiinduhmyhagajpt ja'a mādial'agy jaduhñ wiädijty.

¹⁸ Ja'a Juan, tøø je'e hānajtj chumyii. Coo ja'a miägu'ughajpāhajxy miädoyhajty nebiatiä Jesús hānajtj tiuñ, mānitā Juan hoy yhawāanāxā.

¹⁹⁻²⁰ Mānitā Juan ja'a miägu'ughajpā metsc miøjyaaxy. Mānit hajxy quiejxā maa ja'a Jesúsān. Coo hajxy jim miejch, mānitā Jesús hajxy ñāmaayy:

—Juan mäyajnābejpā højts tøø xquiexy coo højts miich nmäyajtøwät pøn miich. Nej, miich ja'a Dios hijty jaduhñ xquiexaambā, tøgä wiinghāna'c je'ejä.

²¹ Jimä Jesús ja'a pa'amjäya'ay hānajtŷ yajmøcpøcy. Madiu'u ja'a pa'am hajxy hānajtŷ miøødä møødä møjcu'u. Møødä wiindspāhajxy hānajtŷ nāmāy yaghijxø'øgyi.

²² Mānitä Jesús yhadsooy:

—Nøcxä Juan hajxy hawaanä nebiaty hajxy yaa mhixy mmädoy. Hijxø'p ja wiindspāhajxy, yo'oyø'p ja'a tecymia'adpāhajxy, nähwaatsp ja'a haxøøgpa'ammøødpāhajxy, mädooowø'p ja'a cuhnatpāhajxy, jujypiojp ja'a ho'ogyjiäya'ayhajxy, yajwiingapxøøyyäp ja'a häyoobäya'ay ja'a Diosmädia'agy hajxy.

²³ Pønjätyhøch nmädia'agy xmiäbøjcäp tehngajnä, jootcuyc hajxy jaduhñ ñijjāwø'øyii —nømä Jesús miānaañ.

²⁴ Coø ja'a Juan miägu'ughajpāhajxy wyiimbijnä, mānitä Jesús miānaañ:

—Coø hajxy tøø mhoy pactuum, Juan miädia'agy hajxy hānajtŷ mmädowāanäp, túhmäts. Cabä tsajcapy pojyu'xpä hajxy hoy mhixy. Caj pues, paady hajxy jim tøø mhoy coø ja'a Juan ja'a miädia'agy hajxy hānajtŷ mmädowāanä.

²⁵ Diosquexy je'e, paady hajxy hoy tøø mmädooowä, hoyyā howyit je'e quia'a ja møødä nebiä mäyøøjäya'ayhajxy miøødän.

²⁶ Tøyhajt jaduhñ coø ja'a Juan ja'a Diosmädia'agy yajwa'xy. Maas may ja'a Dios ja'a Juan cuhdujt tøø mio'oy quejee ja'a jäya'ay ja'a Diosmädia'agy hajxy jecy yajwä'xäbä.

²⁷ Ja'a jäya'ay ja'a Diosmädia'agy jecy nägäpxäbä, Juan je'e. Jaduhñä Dios jecy miānaañ coø ja'a quiuguexy hānajtŷ jayøjp quiexa'añ coø ja'a cu'ug ween yajwiinxiic yajwiingapxø'øy coø ja'a yhaxøøgcuhdujt hajxy ñajtshixø'øwät. Høxháamhøch hijty ngäda'aga'añ. Jayøjpä Juan quiejxä; høxháamhøch njaanñ cādaacy.

²⁸ Ni pøn jaduhñ jäda'ahaty quia'a mäbaady hädaa yaabä naaxwiin nebiä Juan mäyajnābejpä ja'a cuhdujt miøødän. Tøyhajt jaduhñ. Pero coøch hānajtŷ tøø nho'nä, coøch hānajtŷ tøø nnøcxtägach maañ nhuuc tsohmñbän, pønjatŷ ja'a Diosmädia'agy hānajtŷ mabøgaamb ja'a høøchcøxpä, maas may ja'a cuhdujt hajxy hānajtŷ miøødhada'añ quejee ja'a Juan jäda'ahaty miøødän, hoyyā møjcuhtdujt hajxy hānajtŷ quia'a ja møødä.

²⁹ Coø ja'a cu'ughajxy jaduhñ miädooy møødä yajnähjuudiutpädøjc-hajxy, mānitä Dios hajxy quiapxpaaty coø yhooyä, je'eguiøxpä coø hajxy hānajtŷ tøø yajnābetyi ja'a Juángäm.

³⁰ Pero ja'a fariseoshajxy møødä ley-yajnähixøøbiähajxy, cab hajxy hānajtŷ tøø yajnābetyi ja'a Juángäm. Paadiä Dios hajxy quia'a jøjpøgøøyy. Cabä jioot hajxy hānajtŷ chocy coø hajxy yajnähwa'adsøøjät ja'a Diósäm.

³¹ Mānitä Jesús miānaañ:

—Nhuuc yajmäbāadyhøch ja'a jäya'ayhajxy jäda'ahatypä.

³² Cab hajxy tii yhojiāwø'øwa'añ. Jaduhñ mäwīnāts hajxy je'e nebiä pigāna'c-hajxy wiinhecpän. Coø hajxy naxy miech häyø'pä tøjpa'c, mānitä miābigāna'c hajxy ñāma'ay: “Tøø højts nja xu'uxy, pero cab hajxy tøø mhech. Tøø højts hojiøøñä nja høy, pero cab hajxy tøø mjø'øy.”

³³ Hoorä, coø ja'a Juan mäyajnābejpä miejch, cabä tsajcaagy hānajtŷ quia'añ, ni ja'a vino hānajtŷ quia'a hu'uga'añ. Y mijts jaduhñ mānaamb coø quihmāñø'øy.

³⁴ Y coøch nnamejtspä, høøch ja'a Diosquexypä, mānitøch ndägøøyy caabiä huucpä. Jaduhñch mijts xñänøømbä coøch nwi'i quia'añ, coøch nwi'i yhu'uga'añ, coøchä pojpäya'ay cādiejiäya'ay nmägu'ughaty møødä yajnähjuudiutpädøjc.

³⁵ Põnjaty ja'a Dios jaanč jahmiejtsp, yajcähxø'py hajxy jaduñ coo ja'a Dioswiinmahñdy hajxy miøødä.

³⁶ Mänitä fariseo ja'a Jesús tu'ug hoy wioy caabiä. Simón hänajty xiøhaty. Mänit hajxy yhäñaaguiädaacy caabiä maa ja'a Simón tiøjcän.

³⁷ Mänitä to'oxiøjc tu'ug miehch cuhhiñbä. Haxøøgcuhdujt hänajty miøød. Tøø hänajty miädoxyhaty coo ja'a Jesús jiiby tøø miech maa ja'a Simón tiøjcän. Perfume quionmejts alabastrofrascooty.

³⁸ Mänit tiägøøyy jøøbiä. Mänitä Jesús tiecypiuju wyiinnøøhaam. Mänit tiecymieexy quihwaayhaam. Mänit tiecychu'xy. Mänit tiecynähjahxy perfumehaam.

³⁹ Mänitä Simón tiägøøyy tajpä maabiä: "Coo ja'a Jesús häxøpy quiuna-juøhñdiä, tøø häxøpy ñajuø'oy coo yø'ø to'oxiøjc quihhiñä."

⁴⁰ Mänitä Jesús ja'a Simón ñämaayy:

—Simón, tsøg mädiäacäm.

Mänitä Simón yhadsooyy:

—Wiindsøñ, tsøc.

⁴¹ Mänitä Jesús miänaañ:

—Jimä jäya'ay hijty tu'ug miänuu'xyhadyi jäya'ay metscä. Tu'jäya'ay hänajty miänuu'xyhaty mägooxmägo'x denarios. Jatu'ug, juxychägui'xmajc.

⁴² Cab hajxy hänajty tii miøødä nebiä ñuu'xy hajxy yajnähwá'adsät. Mänit hajxy ñämaayy: "Weends yhyty." Hoorä, pønäda'a maas mädsógäp.

⁴³ Mänitä Simón yhadsooyy:

—Jue'eda'a, ja'a craa ja'a ñuu'xy maas may hijty miøødpä.

Mänitä Jesús miänaañ:

—Je'e pues.

⁴⁴ Mänitä Jesús ja'a to'oxiøjc miøjhee'py. Mänitä Simón ñämaayy:

—Cooch yaa ndägøøyy maa miič mdøgootiän, cáboch miič nøø tøø xmiø'oy cooch ndecypiuñät. Jaduñ hajxy naxy nguhdujthájtäm. Pero yø'ø to'oxiøjc, wyiinnøøháamhøch ndecy tøø xpiujjä, quihwaayháamhøch ndecy tøø xmieexä.

⁴⁵ Cáboch miič tøø xchu'xy, pero yø'ø to'oxiøjc, tehngájnøch ndecy xwyi'i chu'xä.

⁴⁶ Cáboch miič ja'a nguhwaay tøø xyhoonä. Jaduñ hajxy naxy nguhdujthájtäm. Pero yø'ø to'oxiøjc, perfumeháamhøch ndecy tøø xyhoonä.

⁴⁷ Xjiaanč tehñ chójpøch yø'øduñ; paadiä piojpä quiädieey yajnähwáatsäxä, hoy hijty may jia møødä. Pero pønä pojpa cädieey hijty ca'a jaty møød, cáboch jaduñ xjiaty wiingudsähgø'oy.

⁴⁸ Mänitä Jesús ja'a to'oxiøjc ñämaayy:

—Tøøch miič ja'a mbojpä mgädieey nyajnähwáatsäm.

⁴⁹ Ja'a hajxy hänajty jiiby pahäñaabiä, mänit hajxy tiägøøyy niñämäayyäbä:

—Maa ja'a cuhdujtäda'a tøø yhuuc paatpä coo ja'a pojpa cädieey yajnähwa'ačh.

⁵⁰ Mänitä Jesús ja'a to'oxiøjc ñämäaguiumbä:

—Cooch nmädia'agy tøø xmiäbøjcä, páadyhøch ja'a mbojpä mgädieey tøø nyajnähwa'ačh. Nøcxnä jootcuyc.

8

¹ Mänitä Jesúshajxy tiägøøyy wädiypä wiinduhmyhagajpt møødä jiamioødhajxy ja'a nämajmetspä. Diosmädia'agy-yajwa'xpä hajxy hänajty wiädity. Jaduñä Jesús hänajty miäna'añ cooc ja'a Dios ja'a miäjaa hänajty yajcähxø'øgaanä.

² Quipxiä to'oxiøjc-hajxy hänajty nämay piawädijpä, ja'a Jesús hänajty tøø yajpa'amnáxiäbä, møød ja'a møjcu'u hajxy hänajty tøø yajnähwa'a'chíjábä. Paadiä Jesús hajxy hänajty piawädity, mioobiä Jesús hajxy hänajty tijaty je'e hänajty miäjuggyhajpy. María ja'a to'oxiøjc hänajty tu'ug xiøhaty ja'a Magdalat-sohmä. Juxtujc ja'a møjcu'u hänajty tøø yajnähwa'a'chii.

³ Jatu'ug hänajty xiøhaty Juana, ja'a Cuza tio'oxiøjc. Ja'a Cuza hänajty copc-hajp maa ja'a Herodes hänajty yhane'emiän. Møødä Susana hänajty piawädijpä.

⁴ Mänitä Jesús jäya'ay may ñänøcxä. Mayhagajpt hajxy hänajty chooñ. Coø hajxy hänajty may tøø yhamugøøy, mänitä Jesús tiägøøyy yajwiingapxøøbiä yajmäbaadyhaam:

⁵ —Mänitä jäya'ay tu'ug tiu'ubøjcy niippä. Coø ja'a tøømd tiägøøyy wøjpä, näje'e ja'a tøømd quiahy tu'haam. Mänitä muuxy hajxy hoy yajpädøøgy. Mäduhñtiä ja'a muuxy hajxy quia'a yajpädøøcy, je'edsä jäya'ay jiaac yajtehn.

⁶ Näje'e ja'a tøømd quiahy tsaanähgøxp. Ja mujx je'eduhn, pero tøøts. Hix, weeñtiä ja'a naax jim tsaanähgøxp.

⁷ Näje'e ja'a tøømd quiahy haptiooty. Ja mujx je'eduhn. Ja yee'c, pero caj ñä'a tøømbejty. Hix, ja'a hapti je'e xaam.

⁸ Näje'e ja'a tøømd quiahy maa ja'a hoñaaxän. May je'e tiøømhajty høxtä mägo'xhaam.

Mänitä Jesús møc miänaañ:

—Pøñ hädaa wiinjuøøby, wéenhøch hädaa nmädia'agy xmiäbøjcä.

⁹ Mänitä Jesús miäyajtøøwä neby jaduhn miädia'agytiägøøy. Ja'a miägu'ughajpähajxy jaduhn yajtøøw.

¹⁰ Mänitä Jesús yhadsooyy:

—Choppiä Dios jioot jaduhn coø mijts mwiinjuø'øwät nebiä miäjaa ya-jcähxø'øga'añ. Pero ja'a häna'c-hajxy jaac yaabä, cabä Diosmädia'agy hajxy tiu'joottsocy. Hoyyä mädia'agy hajxy jia mädoy, pero cab hajxy wyiinjuø'øy tii jaduhn jia mädiaacypy.

¹¹ 'Jaduhnds miädia'agytiägøøy nébiøch hajxy tøø nyajwiingapxø'øyän. Jaduhndsä tøømd miäbaady nebiä Diosmädia'aguiän.

¹² Ja'a tøømd cáhwäbä tu'haam, jaduhn miäbaady nebiä jäya'ay ja'a Diosmädia'agy hajxy jia mädoyyän. Coø ja'a møjcu'u miech, mänit hajxy wyiinhøøñii neby hajxy jaduhn quia'a mäßögät, nebiä piojpa quidiieyhajxy jaduhn quia'a nähwä'adsät.

¹³ Y ja'a tøømd cáhwäbä tsaanähgøxp, jaduhnds je'e miäbaatpä neby hajxy jia mädoyyän. Tu'habaquiä hajxy jaduhn xioonda'agy. Pero cab hajxy hamuumdu'joot pianøcxy. Coø hajxy cøxypänejpiä tiuñii, mänit hajxy ñajtshixøøñä.

¹⁴ Y ja'a tøømd cáhwäbä haptiooty, jaduhnds je'e miäbaatpä neby hajxy jia mädoyyän. Pero cabä yhamdsoo cuhdujt hajxy ñajtshixø'øwa'añ møødä miäyøøhajt. Cabä Diosmädia'agy hajxy hoy quiudiuna'añ.

¹⁵ Y ja'a tøømd cáhwäbä hoñaaxooty, jaduhn miäbaady nebiä Diosmädia'agy hajxy hamuumdu'joot mäßøjpän. Jaanç tehñ yhoy hajxy jaduhn quiudiun.

¹⁶ 'Coø jäya'ay jøøn hajxy quiuhno'ogøøy, cøxp hajxy yujcoñ neby hajxy quidøø'xøøjät, ja'a hajxy tøjtagøøbiä. Cabä pøñ jøøn quiuhjupy, ni maabejtpa'c hajxy quia'a päda'agy.

¹⁷ Jaduhn mäwlinäts mijts ja'a nmädia'agyhøch hajxy xwyiinjuø'øwaanä, ja'a tsipjátypøch jaduhn tøø nyajwiingapxø'øyabä.

¹⁸ 'Huuc wiinjuø'øw hajxy hoy. Pøñhøch nmädia'agy tøø xmiäbøjcä, njaac yajnähixø'øwäämbiøch je'e. Pøñhøch nmädia'agy tøø xquia'a mäßøjcä, cábøch

tii nyajnáhixø'øwaanä. Høxtä jiahdiägoyyaamby hajxy je'e mädyii tyijy ja'a tøø wyiinjuø'y.

¹⁹ Mänitä Jesús ñämejtsä ja'a tiaj møødä piuhya'ayhajxy. Cab hajxy hoy tiehm wyiingumedsøøyy, je'eguiøxpä coo ja'a jäya'ayhajxy hānajtjy ñāmayyā jiiby tøgooty maa ja'a Jesús hānajtjān.

²⁰ Mänitä Jesús ñāmaayyā:

—Ximä mdajhajxy tøghaguuy møødä mbuhya'ayhajxy. Miičh hajxy xjia wi'i miøødmädia'agaamb.

²¹ Mänitä Jesús miānaañ:

—Pønä Diosmädia'agy jaduhñ mäßøjp, pøn jaduhñ cudiumb, je'ečh ndahajpy, je'ečh nbuhya'ayhajpy.

²² Miäwiinghoocpä ja'a Jesúshajxy tiägøøyy barcojooty møødä miägu'ughajpāhajxy. Mänitä Jesús miānaañ:

—Jam hajxy jim mejyhawiimb.

Mänit hajxy jiaañch tu'ubøjcy.

²³ Nøcxnä hajxy hānajtjy jaduhñ, mänitä Jesús miaaho'cy. Mänitä poj møc piädø'cy. Mänitä nøø quiubojøøyy barcojooty. Hújtsnäp ja'a barco hānajtjy.

²⁴ Mänitä Jesús hajxy hoy yuxy. Mänit hajxy ñāmaayy:

—Wiindsón, Wiindsón, pädø'øg, quinaambä barco cham.

Mänitä Jesús piädø'cy. Mänitä poj yhojy møødä nøø. Mänitä poj yuungøøyy. Moñdiucy jaduhñ jiajnä.

²⁵ Mänitä Jesús ja'a miägu'ughajpāhajxy ñāmaayy:

—Tii hajxy coo mwi'i chähgø'øyy. Nej, cab hajxy mnajuø'øyyä coočh mijts homiānaajä ngüeendähada'añ.

Jaančh tehñ yagjuøøyy hajxy jaduhñ. Mänit hajxy hamiñ haxøpy ñiñāmaayyā:

—Pønäda'a yø'øduhñ coo ja'a miädia'agy miäßøjcäxä ja'a poj møødä nøø.

²⁶ Mänit hajxy miejyhawiimpädsøømnä jim maa ja'a naax hānajtjy xiøhatiān. Gadara, jim jaduhñ mejyhawiimpä maa ja'a Galileanaaxootiān.

²⁷ Coo ja'a Jesús biarcopädsøømy, mänitä jäya'ay tu'ug miehch Jesús wyiinduum, ja'a jim cajptooty tsänaabiä. Tøø hānajtjy jieğø'øyy mänaa ja'a mähdiøjc møjcu'u hānajtjy tøø ñāmečhiijān. Cabä wit hānajtjy miøødhajnä, ni quia'a hāña'ay hānajtjy tøgooty. Jim hānajtjy yhity maa ja'a cabāsantān.

²⁸ Coo ja'a Jesús yhiixy, mänit wyiinjiicādaacy. Mänitä møjcu'uhajxy yaaxy:

—Jesús, tii højts xwia'ana'añ. Dios miich xyHuunghajp ja'a tsajpootypä. Tunä mayhajt, ca'a højts jiiby xquiexy maa jiaañch tehñ chaačhpän.

²⁹ Paadiä mähdiøjc jaduhñ yaaxy, je'eguiøxpä coo ja'a Jesús ja'a møjcu'u hānajtjy tøø yhane'emy coo ñāhwa'adsøøjät. Mayhooc ja'a mähdiøjc hānajtjy tøø ñāmečhii ja'a møjcu'ujām. Paadiä jäya'ayhajxy hānajtjy jia wi'i yaghida'añ cø'øxoch tecyxioch cadenahaam neby jaduhñ hoy yhidät. Pero nimiäpodøøyyäp hānajtjy je'e, y yajnøcxäp hānajtjy pactuum ja'a møjcu'ujām.

³⁰ Mänitä Jesús ja'a mähdiøjc miäyajtøøyy:

—Tii mxøhaty.

Mänit yhadsooyy:

—Legiónhøch nxøhaty.

Paady jaduhñ miānaañ coo ja'a møjcu'u hānajtjy may miøødä.

³¹ Mänitä møjcu'u ja'a Jesús hajxy miānuu'xtaacy coo hajxy jiiby quia'a quexøøjät møjcu'uhaam maa jiaañch tehñ chaačhpän.

³² Jimä mayhädsøm hānajtjy yuummy tunmøjc. Mänitä møjcu'u ja'a Jesús hajxy miānuu'xtaaccumbä coo hajxy jim quieçøøjät maa ja'a mayhädsøm hānajtjān. Mänitä Jesús cuhdujt miooyy.

³³ Mänitä mähdiøjc ja'a møjcu'u ñähwáatsänä. Mänitä hädsømhajxy hoy ñämechii. Mänit hajxy wyiinmänacpäyø'cy. Mänit hajxy quiuhgahnajxy naaxøjpcøxp mejjiooty. Jiiby hajxy cøjx ñøøho'ogø'øy.

³⁴ Coø ja'a hädsømgüeendähajpähajxy jaduhñ yhiijxy, mänit hajxy piäyø'cy. Mänitä cu'ug hajxy hoy yhawaanä cajptooty mөөdä cajtpa'a.

³⁵⁻³⁶ Mänitä cu'ughajxy hānajtý nөcxy yhixa'añ neby hānajtý tөө jiadyiijän. Mänit hajxy miejch maa ja'a Jesús hānajtīän. Jiibiä mähdiøjc ja'a Jesús hānajtý wyiinhāña'ay, ja'a møjcu'u hānajtý tөө ñähwa'ačhíjābā. Tөө wit hānajtý piägөөñä. Tөө hānajtý wyiinmahñdymejtsnä. Coø ja'a cu'ughajxy jaduhñ yhiijxy, mänit hajxy chähgөөbiøjcy. Paady hajxy chähgөөyy, haxөөgjāya'ay tyijy ja'a Jesús. Mänitä cu'ughajxy yhawāñāxä nebiä mähdiøjc ja'a møjcu'u hānajtý tөө ñähwa'ačhiijän. Ja'a hajxy hānajtý tөө yhíxiābā, je'e hajxy jaduhñ nägapx.

³⁷⁻³⁹ Mänitä Jesús hajxy tiägөөyy mänuu'xtaapä coø jim choonät Gadara. Hix, jaanč tehñ chähgөөby hajxy hānajtý. Jim tyijy ja'a Jesús cөxypanejpiä jiaac jatcø'øwa'añ. Ja'a mähdiøjc hānajtý tөө ñähwa'ačhābā, mänitä Jesús miānuu'xtaacy coø cu miødhajty. Mänitä Jesús yhadsooyy coø miähmø'øwät maa quiajptän:

—Nөcx maa ja'a mdøjcän; mädia'ag nebiaty ja'a Dios tөө xpiuhbety.

Mänitä craa jiaanč nөcxy, miädiaacy jiiby cajptooty nebiaty hānajtý tөө piuhbedyíjām ja'a Jesús. Mänitä Jesús biarcotägөөñä, wyiimbijnä.

⁴⁰ Coø ja'a Jesús jim miejtstägajch mejyhawiimb, jimä cu'ughajxy hānajtý yhahixy. Mänit hajxy xioondaacy.

⁴¹ Mänitä jäya'ay tu'ug miejch ja'a xøhajpä Jairo. Tsajtøjwiindsøn hānajtý tiuumby. Mänitä Jesús wyiinjiicādaacy. Mänit miānuu'xtaacy coø ñөcxāt maa ja'a tiøjcän.

⁴² Jimä Jairo yhuung hānajtý yho'ogaannä. Tiu'ughuung hānajtý je'e. Majmetscjomøjt ja'a to'oxyhāna'c hānajtý miөөdä. Mänitä Jesús tiu'ubøjcy. Mayyā jäya'ayhajxy piadu'ubøjcy, høxtä yhanø'tsmujpy ja'a Jesús hajxy hānajtý.

⁴³⁻⁴⁴ Mänitä Jesús ja'a tāj jāya'ay tu'ug jiøguyohdiägөөyyä. Pa'ammөөd hānajtý je'e. Majmetscjomøjt ja'a pa'am hānajtý tөө miähäyoy. Ñø'ty hānajtý wi'i xiee'xp, pero weenjaty weenjaty. Ni pøn hānajtý quia'a najuø'øy nebiä choomiáyät. Mänitä Jesús wyitpa'a ñähdöönāxä. Mänitä ja'a tāj jāya'ay ñø'ty yhadujnä.

⁴⁵ Mänitä Jesús miānaañ:

—Pønhoč xñähdoon.

Ni pøn quia'a mänaañ coø hajxy ñähdooñ. Mänitä Pedrohajxy miānaañ:

—Wiindsøn, xjiaanč tehñ yhanø'tsmujp miich ja'a cu'ug. Tii nyajna-juøøyyām pøn tөө xñähdoñ.

⁴⁶ Mänitä Jesús miānāngumbä:

—Nnajuøøbiøch coø pøn tөө miäbaadø'øy hөөč nmājaahaam. Páadyhøch jaduhñ tөө nnä'ä najuø'øy cooč hajxy tөө xñähdoñ.

⁴⁷ Mänitä tāj jāya'ay jaduhñ ñajuøøyy coø ja'a Jesús hānajtý ñajuø'øy coø je'e hānajtý tөө miāñhdoñ. Mänitä Jesús wyiingumedsøøyy tsäyúuyyāp. Mänitä Jesús wyiinjiicādaacy. Mänit ñägapxy cu'ughagujc cooc ja'a Jesús wyit hānajtý tөө ñähdoonä, y cooc mänitä pia'amnajxy.

⁴⁸ Mänitä Jesús ja'a tāj jāya'ay ñāmaayy:

—Huong, paady miich tөө mba'amnaxy coø tөө mmäbøcy. Nөcxnä jootcuyc.

⁴⁹ Jimä Jesús hānajtý miädia'agyñä, mänitä jäya'ay tu'ug miejch. Jim hānajtý tөө chohnda'agy maa ja'a Jairo tiøjcän. Mänitä Jairo ñāmaayyä:

—Tөө ja'a mhuung yho'ogy. Cabä wiindsøn mhadsípnät.

⁵⁰ Miädoow ja'a Jesús jaduhñ. Mänitä Jairo ñämaayy:

—Ca'a mjootmayhaty. Mäbøc. Juypioögäp ja'a mhuung häyaa.

⁵¹ Mänit hajxy jim miejtsnä maa ja'a Jairo tiøjcän. Coo ja'a Jesús tiøjtägøøyy, caj pøn miøødtøjtägøøyy, jagooyyä Pedro møødä Juan møødä quixy tiaj tieedy.

⁵² Tøghaguuy ja'a cu'ughajxy miähmøøyy jøøbiä xuu'tspä. Mänitä Jesús miänaañ:

—Ca'a hajxy mwi'i jio'øy mwi'i xiuuñ. Caj tøø yho'ogy, nä'ä maab jaduhñ.

⁵³ Mänitä Jesús ñäxiicä. Ñajuøøby hajxy hñajty coo ja'a quixy hñajty tøø yho'ogy.

⁵⁴ Mänitä Jesús ja'a quixy quio'ø miajtsä. Mänitä Jesús møc miänaañ:

—Huang, pädø'øg.

⁵⁵ Mänitä quixy jiuypiojcy. Mänit piädø'cy. Mänitä Jesús miänaañ coo hajxy yajcáyät.

⁵⁶ Jaanñ tehñ yagjuøøyy ja'a tiaj ja'a tieedy jaduhñ. Mänitä Jesús miänaañ coo hajxy pøn quia'a yajmøødmädiá'agät neby hñajty tøø jiatian.

9

¹ Mänitä Jesús ja'a jiamioød miøjyaaxy ja'a hajxy nämajmetspä. Mänitä cuhdujt hajxy miooyyä coo ja'a møjcu'uba'ammøødpä hajxy nägøxiä yajñähwá'adsät. Møødä mäjaa hajxy mióoyyabä coo ja'a pa'amjäya'ay hajxy yajmøcpøgät.

² Mänit hajxy wyiinguejxä coo ja'a Diosmädia'agy hajxy yajwá'xät, coo ja'a pa'amjäya'ay hajxy yajmøcpøgät. Jaduhñ hajxy miädiá'agät coo ja'a Dios ja'a miäjaa yajcähxø'øga'añ.

³ Mänit hajxy ñämaayyä:

—Cab hajxy tii mmänøcxät, ni cuhdajt, ni pijty, ni tsajcaagy, ni xädø'øñ. Tu'xojxc-hajtiä ja'a mwit hajxy mmänøcxät, ca'a mietscä.

⁴ Homiädyii tøjcä hajxy mmejtstä'agät, jim hajxy mmähmø'øwät høxtä coonä hajxy jim jadähooc mwiimbídät.

⁵ Y coo hajxy maa xquia'a yajtøjtägø'øwá'anät, mänit hajxy jim mdsóonät maa ja'a cajptän. Mänitä mdecy hajxy mwiinwóbät nebiä hijxtahñd jaduhñ miähmø'øwät coo mijts tøø xquia'a yajtøjtägø'øy —nømä Jesús miänaañ.

⁶ Mänit hajxy tiu'ubøjcy. Wiinduhmyhagajpt hajxy hñajty wiädity Diosmädia'agy-yajwa'xpä, pa'amjäya'ay-yajmøcpøjpä.

⁷ Ja'a Herodes hñajty jim tuumb gobernador. Mänit miädoyhajty nebiatiä Jesús ja'a hijxtahñd hñajty yajcähxø'øguiän. Cab hñajty ñajuø'øy nebiä wyiinmahñdyhädät. Hix, näje'e hajxy hñajty miäna'añ cooc tyijy ja'a Juan hñajty tøø jiuypiojcy. Hix, tøø ja'a Juan hñajty yagho'ogyii.

⁸ Näje'e hajxy hñajty miänaambä cooc tyijy je'e Elías, ja'a Diosmädia'agy jecy yajwá'xäbä. Näje'e hajxy hñajty jiaac mänaambä cooc tyijy ja'a jecyjiäya'ay tøø jiuypiojcy, ja'a Diosmädia'agy jecy yajwá'xäbä.

⁹ Mänitä Herodes miänaañ:

—Høøchä Juan nyajyo'pujxä. Pønäda'a jaduhñ wädiyp. Madiú'ujøch jaduhñ nmädoy yajcähxø'øgy.

Jiaanñ tehñ yhixaambiä Herodes ja'a Jesús hñajty.

¹⁰ Coo ja'a Jesús jiamioødhajxy wyiimbijtagajch, mänitä Jesús hajxy yajmøødmädiaacy nebiaty hajxy hñajty tøø wiädity. Mänit hajxy miøødnøcxä pactuum, jim mäwiingón maa ja'a cajpt hñajty xiøhatiän Betsaida.

¹¹ Coo ja'a cu'ughajxy jaduhñ miädoyhajty, mänitä Jesús hajxy jim piamejch. Mänit hajxy ñämaayyä coo hajxy jim miähmø'øwät. Mänitä Diosmädia'agy

hajxy yajmøødmädiaacä cooc ja'a Dios ja'a miäjaa yajcähxø'øga'añ. Møødä pa'amjäya'ayhajxy may yajmøøcpøjcä.

¹² Tsuujøøñäp hänäjty, mänitä Jesús wyiingumedsøøyyä ja'a jiamiøødhajxy ja'a nämajmetspä. Mänitä Jesús ñämaayyä:

—Näma'aw yø'ø jäya'ayhajxy coo hajxy nøcxy pioo'xnä, coo hajxy nøcxy quiayhøxta'ay wiingtuum maa ja'a cajpt miäwiingonän. Yaa maa hajxy nhíjtäm, cabä tii yaa.

¹³ Mänitä Jesús miänaañ:

—Huuc yajcay mijts.

Mänit hajxy yhadsooyy:

—Cab højts tii nmøødä; jagooyyä højts tsajcaagy mägoøxc nmøødä møødä hacx metscä. Tøgä nøcxäp højts njuuyyä ja'a hajxy quiaayaambiä, hoy hajxy jia nämayyä.

¹⁴ Nämägoøxmil ja'a ya'adiøjc-hajxy hänäjty nägøxiä. Mänitä Jesús ñämaayy ja'a jiamiøødhajxy:

—Näma'aw hajxy ween hajxy yhäñaaguiäda'agy naaxwiin näjuxychägui'xmajcjaty.

¹⁵ Mänit hajxy ñämaayy coo hajxy jaduhñ yhäñaaguiädä'agät. Mänit hajxy yhäñaaguiädaacy nägøxiä.

¹⁶ Mänitä Jesús ja'a mägoøxpä tsajcaagy quioonsooyy møødä metspä hacx. Mänit chajhee'py. Mänitä Dios pia'yaaxy, miänaañ:

—Dioscujú'uyäp coo højts hädaa tøø xmio'oy.

Mänit jaduhñ yhaguidøoyy. Mänitä jiamiøød miooyy coo hajxy jaduhñ yajwá'xät maa ja'a cu'ugän.

¹⁷ Mänit hajxy nägøxiä quiaayy cu'uxiä. Majmejtscach ja'a caadiuc quiuna-jxy.

¹⁸ Wiingxøø hänäjty je'ebä, jimä Jesús ja'a Tieedy hänäjty pia'ya'axy hanid-iuhmduum. Jimä jiamiøødhajxy hänäjty miøødä. Mänitä Jesús yajtøøyy:

—Nébyhøch ja'a cu'ughajxy xñänømy pøñhøch høøch.

¹⁹ Mänit hajxy yhadsooyy:

—Näje'e hajxy miäna'añ cooc tyijy miičh mJuangä ja'a hijty mäyajnäbejpä. Näje'e hajxy miänaambä cooc tyijy miičh mhEliasä. Näje'e hajxy jiaac mänaambä cooc tyijy ja'a jecyjiäya'ay tøø jiuypioøcy, ja'a Diosmädia'agy jecy yajwá'xäbä, y cooc tyijy miičh mje'ejä.

²⁰ Mänitä Jesús yajtøøgumbä:

—Míjtsäts, nej mijts mmänaambä pøñ xtyijy høøch.

Mänitä Pedro yhadsooyy:

—Diosquexy miičh.

²¹ Mänitä Jesús møc miänaañ coo hajxy quia'a nägápxät pøñ hänäjty je'e.

²² Mänitä Jesús miänaangumbä:

—Høøch ja'a Diosquexypä, hoyhóyhøch njaanč tehñ chaačhpøga'añ. Cábøch ja'a tsajtøjwiindsøñhajxy xñä'ägädä wiingudsähgø'øwa'añ, ni ja'a teedywiindsøñhajxy, ni ja'a jäya'ayhajxy jim cuhdujtmøødpä tsajtøgooty. Xyagho'ogäämbøch hajxy, pero cudägøøgxøøjøch njuypioøga'añ.

²³ Mänit jiaac mänáangumbä:

—Pøñjátyhøch nmädia'agy xpiadu'ubøgáañäp, ween yhamdsoo cuhdujt hajxy ñajtshixø'øy, ween hajxy chaačhpøjpä jabom-jabom nébiøch nd-saačhpøga'añän. Jadúñhøch nmädia'agy hajxy hoy xpianøcxät.

²⁴ Pøñ jiuqyhajt ja wi'i yaghoyø'øwaamb, nä'ägä cuhdägoyyaamb je'e. Pero pøñ jiuqyhajt jaduhñ yajtägoyyaamb ja'a høøchcøxpä, nä'ägä hodium je'e miähmø'øwa'añ.

25 Coo hajxy hodiumm mga'a mmähmø'owät, cab hajxy jaduhñ mniyaghoyø'owøjät, hoy hajxy mja mäyøøjä hädaa yaabä naaxwiin.

26 Pøñhøch xmiädsähdiuumb møødhøch nmädia'agyquiøxpä, mänitøch jaduhñ nmädsähdiunaambä cooçh hänajty ngädaactägatsa'añ. Hajajaamb hänajty yaa neby jim yhajajjiän tsajpootyp maaçh nDeedy yhitiän, maa ja'a mioonsähajxy yhitiän.

27 Tøyhájthøch jaduhñ nmäna'añ, ja'a hajxy yaa tänaabiä, näje'e hajxy jaduhñ quia'a tsoj ho'oga'añ høxtä coonä ja'a Dios ja'a miäjaa hänajty yajcähxø'oga'añ.

28 Cuductujxøø ja'a Jesús ja'a Pedro miøødwiimbejty tunguhduum Diospa'yaaxpä, møødä Juan møødä Jacobo.

29 Jimä Jesús ja'a Tieedy hänajty pia'ya'axy, mänitä wyiin jiøjp høxtä haamb høxtä tsämaamb quiähxø'cy. Jaançh tehñ pioob ja'a wyit jaduhñ jiajnä.

30-31 Mänitä Moisésahajxy ñäguehxtøø'xy maa jiajy maa chämamiän møødä Elías. Mänitä Jesús hajxy miøødtägøøyy mädiaacpä. Je'e hajxy hänajty miädiaacypy coo ja'a Jesús hänajty jim nøcxy yho'oga'añ Jerusalén.

32 Hoyyä Pedrohajxy hänajty jia wi'i mia'awa'añ, cab hajxy ñä'ägädä maaho'cy. Mänit hajxy yhijxy coo ja'a Jesúsahajxy hänajty jiajy chämamy møødä Moisés møødä Elías.

33 Coo ja'a Moisésahajxy hänajty wyiimbidaañnä, coo ja'a Jesús hajxy hänajty piuhwa'adsaañnä, mänitä Pedro ja'a Jesús ñämaayy:

—Wiindsøn, hoyøøyy jaduhñ coo hajxy yaa tøø nbéjtäm. Ween højts tøjquemy tægøøg cu nhädiuñ, tu'ug miich mje'e, tu'ug Moisés jie'e, tu'ug Elías jie'e.

Nä'ä nagoobä ja'a Pedro jaduhñ miänaañ.

34 Mänitä näma'a tehñ miapxy quiädaacy maa hajxy hänajtiän. Nädägooyy hajxy jaduhñ. Mänitä Pedrohajxy chähgøøbiøjcy.

35 Mänit hajxy miädooyy ja'a Dios quiapxy näma'ajooty:

—Høøch nHuong hädaa. Høøch tøø nwiinguexy. Mhamädoowhíjtäp ja'a miädia'agy hajxy.

36 Mänitä Jesús hajxy yhijxy coo hänajty nidiuhñ tiänaañä. Hamoñ hajxy jaduhñ miähmøøñä. Cab hajxy pøn yajmøødmädiaacy nebiaty hajxy hänajty tøø yhiçy.

37 Cujaboom hajxy jim wyiimbijnä tunguhduum. Mänitä Jesús jäya'ay may jiøjcubaadøøyyä.

38-39 Mänit tu'jäya'ay møc quiapxy maa ja'a cu'ugän:

—Wiindsøn, tú'uquiøch nhuung. Náxyhøch nhuung møjcu'u xjiaançh tehñ ñämejtsä. Møc jaduhñ ya'axy, møc chäyuy. Høxtä hahoo'p jaduhñ. Hanaxiä jaduhñ chaachtuñii, y cab jaduhñ ñä'ägädä nähwa'açh. Wiindsøn, tunä mayhajt, yajnähwáatsägøch nhuung.

40 Tøøch ja'a mjamiøød nja wi'i miänuu'xta'agy cooçh nhuung hajxy xya-jnähwáatsät, pero cab hajxy jaduhñ ñä'ä jajt.

41 Mänitä Jesús ja'a jiamiøød ñämaayy:

—Nej, cájtäm mijts mänaa mmäbøga'añä. Pämädúhñtiøch mijts jaduhñ njaac mämee'xtuga'añ.

Mänitä cuhuung ñämaayy:

—Woomiñxä mhuung.

42 Cahnä craa hänajty miechñä maa ja'a Jesúsän, mänit yajcädaawä ja'a møjcú'ujäm. Mänit yajtsäyuuyy. Mänitä Jesús ja'a møjcu'u yhøxquejxy. Mänitä craa nähwaach. Mänitä tieedy yajcø'ødägøøyyä.

⁴³ Mänitä cu'ughajxy nägøxiä yagjuøøyy coo ja'a Dios miøjjä jiaančhä, nebiä Jesús ja'a hijxtahnd hānajty yajcāhxø'øguiän.

Mänitä Jesús ñāmaayy ja'a jiamioødhajxy:

⁴⁴ —Hoy hajxy wiinjuø'ow; ca'a hajxy mjahdiägoy; høøch ja'a Diosquexypä, nmädsiphøch hajxy jim xyajcø'ødägø'øwaamb maa ja'a cu'ughajxiän nägøxiä.

⁴⁵ Pero cabä jiamioødhajxy ñä'ägädä wiinjuøøyy neby hajxy hānajty tøø miøødmädia'agyijän. Hix, Jesús jaduhñ ca'a yajwiinjuøøyy. Cab hajxy jaduhñ yajtøøyy. Tsähgøøby hajxy hānajty.

⁴⁶ Mänit hajxy tiägøøyy yajtsiptaacpä pøn cuhdujt maas møj mo'owāanäp.

⁴⁷ Ñajuøøbiä Jesús hānajty nebiaty hajxy hānajty tiajy miay. Mänitä pigāna'c hoy tu'ug wioy, piädaacy miøjc-haamby.

⁴⁸ Mänit miānaañ:

—Pøn hädaa pigāna'c jaduhñ tsógäp ja'a høøchcøxpä, jaduhñ mäwínäts høøch xchojpä. Y pøn høch jaduhñ xchojp, je'ečh nDeedy jaduhñ xjiah-miéjtsäp ja'ačh jaduhñ tøø xquiéxiäbä. Pøn ja'a møjcuhtdujt ca'a tsogaamb maa mijsän, je'eds ja'a møjcuhtdujt jaduhñ nä'ägädä mo'owāanäp.

⁴⁹ Mänitä Juan miānaañ:

—Wiindsøn, tøø højts tu'jäya'ay nhixy. Miičhcøxpä ja'a møjcu'u hijty yhøxquexy. Mänit højts jaduhñ nnāmaayy coo quia'a høxquéjxnät, je'eguiøxpä coo højts xquia'a møødwädíjtäm.

⁵⁰ Mänitä Jesús miānaañ:

—Cab hajxy jaduhñ cu mnāmaayy. Pøn højts jaduhñ xquia'a mädsiphájtäm, je'e højts jaduhñ xmiägu'ughájtäm.

⁵¹ Tøø hānajty miäwiingoonnä coo ja'a Jesús hānajty ñøcxaannä tsajpootyp, mänitä jioot yajmøødmädiaacy coo jim ñøcxnät Jerusalén.

⁵² Mänitä jiamioød mejtstägøøg quiejxø'cy. Mänitä mejtstaact hajxy hoy jia høxta'ay maa ja'a cajpthuung tu'ugän jim Samarianaaxooty.

⁵³ Pero cab hajxy jaduhñ ñä'a tøjmooyy, je'eguiøxpä coo hajxy hānajty jim jiaac nøcxa'añ Jerusalén. Hix, cabä Samariabä-jäya'ayhajxy hānajty miøødnijiootpaadyi ja'a jäya'ayhajxy hānajty tsānaabiä Jerusalén.

⁵⁴ Coo ja'a Jacobo jaduhñ miädooyy møødä Juan, mänitä Jesús hajxy ñāmaayy:

—Wiindsøn, tähooc ja'a Elías jøøn jim miøjyaaxy tsajpootyp nebiä haxøøgjäya'ayhajxy jaduhñ tióyät. Nej, mmāná'anäp miičh jaduhñ coo højts jøøn jim nmøjyáxpät tsajpootyp neby hajxy jaduhñ tióobiät ja'a højts jaduhñ xquia'a tøjmo'owaambä.

⁵⁵ Mänitä Jesús wyiinhee'ppejty; mänit yhojy:

—Mijts, cab hajxy mnajuø'øyy coo haxøøgwiinmahñdy hajxy mmøødä.

⁵⁶ Páadyhøch yaa tøø ngäda'agy hädaa yaabä naaxwiin nébiøch ja'a jäya'ayhajxy jaduhñ nyajnähwa'ads nyajcuhwá'adsät. Cábøch hajxy jaduhñ nyajcuhdägoyya'añ.

Mänit hajxy jim tiu'ubøjnä, ñøcxy hajxy wiingcajpt.

⁵⁷ Jim hajxy hānajty tiu'uyo'oyñä, mänitä jäya'ay hajxy tu'ug piaaty jim tu'haam. Mänitä Jesús ñāmaayyä:

—Wiindsøn, nja wi'i pianøcxáambiøch miičh majaty miičh mnøcxa'añän.

⁵⁸ Mänitä Jesús miānaañ:

—Ja'a xøøgaa, jimä jiut je'e; ja'a muuxy, jimä pie'eñ je'e; pero høøch ja'a Diosquexypä, cábøch ndøjc jaduhñ maačh nboo'x nhäñá'awät.

⁵⁹ Mänitä Jesús wiinghäna'c ñāmáguiumbä:

—Høøch padu'ubøjcäc.

Mänitä Jesús ñāmaayyä:

—Mänítøch miich nbadu'ubógát cooch ndeedy hānajtý tøø yho'nā, cooch hānajtý tøø nyajnaaxtägøøñā.

⁶⁰ Mänitā Jesús miānaañ:

—Ja'a jāya'ayhajxy ca'a mǎbøjpā, je'e miich ja'a mdeedy hajxy xyaj-naaxtägø'øwāañ. Pero miich, nøcx ja'a Diosmādia'agy yajwa'x coo ja'a Dios ja'a miājaa yajcāhxø'øga'añ.

⁶¹ Mänitā Jesús ñāmaayyā wiingjāyā'ayägumbā:

—Wiindsøn, nja wi'i pianøcxāambiøch miich, pero nøcxyhøch ja'a njujy nmāgu'ug nhuuc hawaañ jāyøjp cooch miich jaduhñ nbadu'ubøgaaññā.

⁶² Mänitā Jesús yhadsooy:

—Pøñhøch jaduhñ xjia wi'i piawäditaamb, cooch nmādia'agy hamuumdu'joot xquia'a mǎbøjcāt, cǎbøch jaduhñ hoy xpianøcxāt.

10

¹ Mänitā Jesús jāya'ay jiaac wiimbiiyy nädägøøghii'xcumajc. Mänit hajxy metscaty metscaty quiejxø'cā majaty ja'a Jesús hānajtý ñøcxa'aññā.

² Mänit hajxy ñāmaayyā:

—Nāmayyā jāya'ayhajxy jia mǎbøga'añ; je'eds ca'a hijp pøn ja'a Diosmādia'agy yajwā'xāp. Mānuu'xta'ag ja'a Dios hajxy coo ja'a Diosmādia'agy-yajwa'xpā jiaac quéxāt.

³ Nøcx hajxy. Mnigwieendāhadøøjāp hajxy. Ca'awiindøyhāna'c-hagujc hajxy mwädita'añ.

⁴ Cabā xuummy hajxy mmänøcxāt, ni xädø'øñ. Tu'tehngā cø'øg hajxy mmänøcxāt. Cab hajxy pøn mwiindānaaxiøbāt tu'haam.

⁵ Coo hajxy muum maa mhamejtstā'agāt, myajpóo'xāp ja'a cudøjc hajxy. “Weenā Dios hajxy xmio'oy ja'a hoyhajt ja'a weenhajt.” Jaduhñ hajxy mnāmá'awāt.

⁶ Pø hojiāya'ay ja'a cudøjc-hajxy jaduhñ, mänitā Dios jiaančh mó'owāt ja'a hoyhajt ja'a weenhajt; pø caj, cab hajxy jaduhñ mio'owøøjāt. Y cab hajxy jim mnā'ägā mǎhmø'owāt.

⁷ Cab hajxy tøjc-tøjc mwäditāt. Jim hajxy mnā'ägädā hídāt maa hajxy hānajtý tøø mmejtsta'aguiān. Jim hajxy mmāhu'ug mmägáyāt. Je'e hajxy jaduhñ mhú'ugāp mgáyāp tijaty hajxy jaduhñ xmiooby. Hawiinmats jaduhñ coo hajxy jaduhñ xmió'owāt, je'eguiøxpā coo hajxy mwiinguexiā.

⁸ Homiädyyi cajptā hajxy jaduhñ xtiøj mó'owāt, mgáyāp hajxy jaduhñ tijaty hajxy xmiooby.

⁹ Myajmøcpøgāp ja'a pa'amjāya'ay hajxy maa ja'a cajptān. Jaduhñ hajxy mnāmá'awāt: “Tøø miāwiingoonñā coo ja'a Dios ja'a miājaa yajcāhxø'øga'añ ja'a mijtscøxpā.”

¹⁰ Pero homiädyyi cajptā hajxy jaduhñ xquia'a tøjmó'owāt, callejooty hajxy nøcxy mya'axy:

¹¹ “Hādaa cajpt yaabā, cabā quiuhdujthajxy yhooyā. Paady højts ndecy nwiinwoba'añ. Jaduhñā hijxtahñd miāhmø'owāt coo ja'a mguhdujthajxy quia'a hoyyā. Mjahmiédsāp hajxy jaduhñ coo miāwiingoonñā coo ja'a Dios ja'a miājaa yajcāhxø'øga'añ ja'a mijtscøxpā.”

¹² Tøyhájhøch jaduhñ nmāna'añ, coo ja'a naaxwiimbā hānajtý wyiimbida'añ, maas hanaxiā ja'a cajpt jaduhmbā chaačhpøga'añ quejee ja'a Sodomacajpt jecy chaačhpøjquiān.

¹³⁻¹⁴ 'Mjaančh tehñ chaačhpøgaamb hajxy pønjatý jim tsānaaby Corazíncajptootý møødā Betsaidacajptootý. Maas hanaxiā hajxy mdsaačhpøga'añ quejee ja'a jāya'ayhajxy jecy chaačhpøjquiān, ja'a hajxy jecy tsānāayyābā Tirocajptootý møødā Sidóncajptootý. Coo je'e hajxy cu yhiixy

ja'a hijxtahnd nej mijts mja hixiän, cu ñajtsixøøyy ja'a yhaxøøgcuhdujt hajxy; cu jiøøyy cu xiuu'ch hajxy jaduhñ.

¹⁵ Y mijts jim tsänaabiä Capernaum, haagä jii by mijts mhäda'aga'añ møjcu'uhaam. Cab hajxy jim mnøcxa'añ tsajpootyp neby hajxy mdijjiän.

¹⁶ Mänitä Jesús ñämaayy ja'a jiamiøødhajxy ja'a nädägøøghii'xcumajcpä:

—Pønjaty mijts mmädia'agy xyhamädoowhíjtäp, jaanä jadúhñhøch nmädia'agy hajxy xyhamädoowhíjtäbä. Pero pønjaty mijts mmädia'agy xquia'a hamädoowhíjtäp, ni høøch nmädia'agy hajxy xquia'a hamädoowhíjtäbä; ni ja'a nDéedyhøch miädia'agy xquia'a hamädoowhíjtäbä, ja'açh tøø xquiéxiäbä.

¹⁷ Mänitä nädägøøghii'xcumajcpähajxy tiu'ubøjcy Diosmädia'agy-yajwa'xpä. Cujecy hajxy wyiimbijtagajch. Jaançh tehñ jiootcuje hajxy hñajty. Mänit hajxy miänaañ:

—Wiindsón, høxtä ja'a møjcu'u højts nmädia'agy hajxy tøø xmiäbøjcä ja'a miichcøxpä.

¹⁸ Mänitä Jesús miänaañ:

—Tøyhajt jaduhñ. Nhíxhøch ja'a Satanás coo jim quiahay tsajpootyp. Nebiä wädsucän jaduhñ jiatcøøyy.

¹⁹ Huuc mädoow hajxy, tøøch mijts ja'a mäjaa nmo'oy coo mijts tsahñdy myajténät møødä caa'pty, y coo ja'a møjcu'u hajxy mga'a yajmäjädá'agät; y cab hajxy nej mjada'añ.

²⁰ Paady hajxy mxoondá'agät coo ja'a mxøødhajxy jim yhity cujaay tsajpootyp. Cab jaduhñ ñejpiä pø tøø ja'a møjcu'u ja'a mmädia'agyhajxy xmiäbøjcä.

²¹ Mänitä Jesús jiaançh tehñ yajxoondaacpøjcä ja'a Dioshespíritu. Mänitä Jesús miänaañ:

—Teedy, míichäts jim Wiindsønñajp tsajpootyp møød hädaa yaabä naaxwiin. Chojpy miich mjoot jaduhñ coo ja'a hajxy ca'a høxpøcypiä wyiinjuø'øwät tijaty ja'a hajxy høxpøcypiä tøø mga'a yajwiinjuø'øy. Páadyhøch miich hoy nnänømy.

²² Mänitä Jesús ñämaayy ja'a jiamiøødhajxy:

—Tøøch nDeedy ja'a cuhdujt xquiøxy mo'oy. Cábøch pøn xñajuø'øy pønñøch høøch, jagóoyyøch nDeedy jaduhñ xñajuø'øy. Y jagóoyyøch nDeedy nnajuøøbiä. Ñajuøøby hajxy je'ebä pønjátyhøch tøø nyajnähdiij coo hajxy ñajuø'øwät.

²³ Mänitä Jesús ja'a jiamiøød wyiinhee'ppejty ja'a hajxy nämajmetspä. Mänit hajxy hawiing ñämaayyä:

—Jootcuje hajxy jaduhñ mhídät je'eguiøxpä cooçh mijts ja'a hijxtahnd may tøø nyajnähixø'øy.

²⁴ Tøyhájthøch jaduhñ nmäna'añ. Ja'a Diosmädia'agy-yajwa'xpähajxy møødä gobiernähajxy, nämay hajxy jia hixaañ tijaty mijts mhixyp. Nämaj hajxy jia mädoowaañ tijaty mijts mmädooby.

²⁵ Mänitä ley-yajnähixøøbiä tu'ug tiänaayyø'cy. Mänitä Jesús hoy miäyajtøy:

—Wiindsón, tiich ngudiúnäp nébiøch cøjxta'axiøø njugyhádät nebiä Dios jiugyhatiän.

Paadiä Jesús jaduhñ ñämaayyä, nä'ä mädia'agyhixáañäp hñajty je'e waamb hñajty yhadsowa'añ.

²⁶ Mänitä Jesús yhadsooyy:

—Neby jaduhñ jim myiñ cujaay maa ja'a leyän. Neby jaduhñ mwiinjuø'øy.

²⁷ Mänitä ley-yajnähixøøbiä yhadsooyy:

—Jaduhñ jim myiñ maa ja'a leyän coo ja'a Dios mwiingudsähgø'owät hamuumdu'joot. Jaanä jaduhñ jim myiimbä coo hopiønä mdsógät mba'häyowät nebiä mni'x nebiä mgopc mdsoguiän.

²⁸ Mänitä Jesús miänaañ:

—Hoy jaduhñ tøø mhadsoy; coo jaduhñ mgudiúnät, mänit jim mnócxät tsajpootyp.

²⁹ Pero yajcumayaambä ley-yajnahixøøbiä hñajty. Mänit miänáangumbä:

—Pøn jaduhñ mnänøømby cooñ hopiønä ndsógät nba'häyowät.

³⁰ Mänitä Jesús yhadsógumbä:

—Nhuuc yajmøødmädiä'agyhøch mädiä'agy tu'ug, nej miich jaduhñ hoy mwiinjuø'owät. Jiibiä jäya'ay hñajty tu'ug yhäda'agy Jericó. Jerusalén hñajty tøø chohnda'agy. Tu'haamhädaacpä ja'a mee'tspä piaaty. Cøjx jaduhñ miée'tsäxä møødä wyit. Mänit hoyhoy wiobho'cä. Nebiä ho'ogypiän hajxy jaduhñ ñähgueecy.

³¹ Mänit teedywiindsøn tu'ug ñajxy. Coo ja'a mähdiøjc jaduhñ yhiixy, cab jaduhñ tiänaaxiøjpy. Jiuhyohy jaduhñ.

³² Jaduhñdsä tsajtøjcueendähajpä tu'ug ñajxpä; jaduhñ je'e jiuhyohbiä.

³³ Mänitä Samariabäya'ay tu'ug ñajxpä. Coo jaduhñ yhiixy, mänitä hojioot miøødhajty.

³⁴ Mänitä mähdiøjc chooyøøyy aceitehaam møødä vinohaam. Mänit yhamäguijty withaam maa hñajty tøø jiotiän. Mänitä yhamdsoo jäyujcøxp yujtseñ. Mänitä mähdiøjc hoy ñajtsøømø'oyii maa ja'a mejtstaactän. Mänit jim yhiixä.

³⁵ Cujaboomä Samariabäya'ay ja'a cudøjc plataxädø'øñ metsc miooyy. Mänit ñämaayy: “Tunä mayhajt, huuc cueendähät yø'ø mähdiøjc. Mäduhñtiä xädø'øñ mjaac yajtuñ, mänitøch jaduhñ nmoodiägätsät cooñ nwiimbi-jtägätsät.”

³⁶ Mänitä Jesús ja'a ley-yajnahixøøbiä miäyajtøøyy:

—Pøn maas hoyhäna'c tøø piädsømy yø'ø nädägøøgpähajxy.

³⁷ Mänitä ley-yajnahixøøbiä yhadsooyy:

—Ja'a häna'c hojioot møødhajtäbä.

Mänitä Jesús miänaañ:

—Nøcx, y jaduhñ miich hojioot mmøødhajpät.

³⁸ Mänitä Jesús hajxy tiu'ubøjcumbä. Mänit hajxy miejch wiingcajttooty. Mänitä Jesús yajtøjtägøøyyä ja'a to'oxiøjc tu'ug ja'a xøhajpä Marta.

³⁹ Jimä Marta piuhdo'oxy hñajty tu'ug ja'a xøhajpä María. Mänitä María ja'a Jesús wyiinhøxtaacy. Yhamädoowhidaamby hñajty je'e waambaty ja'a Jesús hñajty miädiä'aga'añ.

⁴⁰ Pero wyi'i jioodhadøøtsäp ja'a Marta tiuung hñajty. Mänitä Jesús ñämaayy:

—Wiindsøn, nej miich jaduhñ mnijiäwø'oyii cooñ nbuhdo'oxy ja'a tuung tøø xyajmänähgueegø'øy. Huuc näma'aw weenç xpiuhbety.

⁴¹ Mänitä Jesús yhadsooyy:

—Marta, Marta, madiu'u miich mwi'i tiajy mwi'i miay.

⁴² Tu'tu'uyyä jaduhñ yhawiinmatsä. Hoyyä mbuhdo'oxy jaduhñ quiudiuñ. Cabä María ja'a cuhdujt jaduhñ pøn piøgáanäxä cooñ nmädiä'agy jaduhñ xyhamädoowhijtät.

11

¹ Wiingtuumä Jesús ja'a Dios hñajty pia'ya'axy. Coo pia'yaaxpädøøyy, mänitä jiamioød tu'ug miänaañ:

—Wiindsón, hõjts Diospa'ya'ax yajnáhixóoyyác nebiä Juan ja'a jiamiøøð yajnáhixóoyyän.

² Mänitä Jesús miänaañ:

—Coo ja'a Dios hajxy hānajtý mba'ya'axa'añ, jaduhñ hajxy mmānā'anāt: Dios, miich hõjts nDeedyhajpy. Jim̃ mhity tsajpootyp. Weenä jāya'ayhajxy nāgøxiä xwyiingudsähgø'øý. Weenä mmājaa mya-jcähxø'øgy.

Weenä mmādia'agy hajxy yaa xmiäbøjcä hädaa yaabä naaxwiin neby hajxy jim̃ xmiäbøjcän tsajpootyp.

³ Móoyyác hõjts ja'a cay jādaxøø neby hõjts cu'uxiä ngáyät.

⁴ Hõjts ja'a pojpä cādieey māmée'xác neby hõjts jaduhñ nmāmee'xiän pønajatý hõjts xñāgādieeyøøby.

Cabä møjcu'ugong cuhdujt mmó'owät coo hõjts xjiøjcapxø'øwät, coo hõjts ja'a haxøøgpä xyajnáhdjät.

⁵ Mänitä Jesús miänaangumbä:

—Tsøg hajxy jaduhñ mánāanām coo mijts mmāgu'ughajpä mmøøðä tu'ug. Coo miich cuptsuhmdä nõcxy mnāma'ay: “Māgu'ughajpä, høøchä tsajcaagy tægøøg yajyujwāañäc.

⁶ Ja'a nmāgu'ughajpøch tu'ug tøø miech. Jāguem̃ chooñ. Cábøch tii nmøøðä tiich jaduhñ nnä'ä mó'owäp.”

⁷ Wehñdä mmāgu'ughajpä jiiby tøgootý xyhadsówät: “Ca'a xyhadsipy. Hagø'øý ja'a tøjcän. Tøø hõjts ngøxy maaho'nä møødhøch nhuunghajxy. Cábøch nbādø'øgaanñä cooch miich jaduhñ tijaty nmó'owät.”

⁸ Tøyhājthøch jaduhñ nmāna'añ, hoy jaduhñ xjia māgu'ughaty, cab jaduhñ xñä'ä nābādø'øgāmbät coo miich tijaty xmió'owät. Pero coo miich tehngajnä mwi'i ñé'emät, mānit jaduhñ piädø'øgät, mānit jaduhñ xmió'owät tijaty miich hānajtý myajmaajiajpy.

⁹ Tøyhājthøch jaduhñ nmāna'añ, coo mijts ja'a Dios tijaty mmāyujwā'anāt tehngajnä, tsipcøxp jaduhñ xñä'ägädä mó'owät.

¹⁰ Coo pønä Dios tijaty miäyujwā'anāt tehngajnä, tsipcøxp jaduhñ ñä'ägädä mo'owa'añii.

¹¹ 'Pø jim̃ mhuunghajxy, coo tsajcaagy xmiäyujwā'anāt, cabä tsaa mmo'owa'añ; coo hacx xmiäyujwā'anāt, cabä tsahñdy mmo'owa'añ.

¹² O coo tseediu'udy xmiäyujwā'anāt, cabä caa'pty mmo'owa'añ.

¹³ Hojiatypä ja'a mhuung hajxy jaduhñ mmooby, hoy hajxy mja ca'awiindøyyä. Mānaxiä ja'a mDeedyhajxy jim̃ tsajpootypä xmió'owät ja'a yhEspíritu coo mijts jaduhñ mmāyujwā'anāt.

¹⁴ Wiinghoocä Jesús ja'a møjcu'u hānajtý yhøxquexy. Tøø jāya'ay hānajtý tu'ug yaghuumyii. Coo ja'a mähdiøjc ñähwaatsnä, mānit quiapxø'nä. Yagjuøøyy ja'a jāya'ayhajxy jaduhñ.

¹⁵ Pero nāje'e hajxy jaduhñ miänaañ:

—Yø'ø craa, ja'a møjcu'ugongä miājaa jaduhñ miøødhajtäp, paadiä møjcu'u yhøxquexy. Ja'a møjcu'ugong, ja'a møjcu'u wyiindsøñhajxy je'e.

¹⁶ Nāje'e hāna'c ja'a Jesús hajxy hānajtý ñāma'ay coo hijxtahñd ween ya-jcähxø'øgy, ja'a jim̃ tsajpootypä. Wyiinmahñdyhixaambiä Jesús hajxy hānajtý.

¹⁷ Pero ñajuøøbiä Jesús hānajtý nebiaty hajxy hānajtý wyi'i tiajy wyi'i miay. Mānit miänaañ:

—Homiädyyi cajptä, coo ja'a cu'ughajxy ñiyhawiingpäda'agøøjät, coo hajxy tu'tøjc ñimiädsibø'øwøøjät, cuhdägøyyäp ja'a chāna'ahajxy jaduhñ.

18 Jaanä jaduhnduhmbä, coo Satanášhajxy ñimiädsibø'owóøjät, cuhdägóyyäp hajxy je'ebä. Mijts jaduhñ mänaamb cooçh tyijy ja'a mójcu'uhajxy nhøxquexy ja'a mójcu'ugongä miäjaagøxpä.

19 Pero coo häxøpy jaduhñ tiøyyä, maa mijts mjamiøød ja'a mäjaa hajxy yhuuc paatpä coo ja'a mójcu'u hajxy yhøxquexy. Cähxø'p jaduhñ coo mijts ja'a tøyhajt hajxy mga'a møødä.

20 Pero høøch, ja'a Diosmäjaagøxpøch ja'a mójcu'uhajxy nhøxquexy. Y cähxø'p jaduhñ coo miäwiingoonnä coo Dios ja'a miäjaa yajcähxø'øga'añ ja'a mijtscøxpä.

21 'Tsøg jaduhñ mänáanäm, coo ja'a jäya'ay jaançh møcpä cwieendähádät ja'a yhamdsoo tøjc, coo pujxt coo wojpt hānajty miøødä, cabä mee'tspä jaduhñ tiägø'øwät.

22 Pero coo jäya'ay maas ca'awiindøybä miédsät, cabä cudøjc jaduhñ miäjädá'agät. Pójcäxäp ja'a piujxt ja'a wiojpt jaduhñ ja'a tyijy yajmäjäda'agaambiä. Møød jaduhñ piójcäxäbät tijaty jiiby miøød tøgooty. Y høøch, jaduhñ mäwíinäts høøch ja'a mójcu'ugong nga'a yajmäjäda'agy.

23 'Pønñhøch jaduhñ xquia'a møødpädø'p, høøch nmädsip je'eduhñ. Y pønñhøch jaduhñ xquia'a møødtuumb, je'e jaduhñ yajma'p pønjátyhøch nmädia'agy xjia wi'i miäbøgáanäp.

24 Mänitä Jesús miänáangumbä:

—Tsøg jadähooc mädiáaccumbä. Coo ja'a mójcu'u piädsómät maa jäya'ay tu'ugän, mänit tiägø'øy poo'xtaacthøxtaabiä pactuum. Y coo jaduhñ quia'a páadät, mänit miäna'añ cooc jim wyiimbida'añ maa tøø yhuuc pädsøømbän.

25 Coo jim miejtstägátsät maa ja'a jäya'ayän, tøø ja'a jäya'ay hānajty wyiin-mahñdymech nebiä tøjc wa'adspän.

26 Mänitä mójcu'u ja'a jiamiøød nøcxy wioy juxtuyc ja'a maas haxøøgpä. Mänit hajxy nägøxiä tiägø'øy maa ja'a jäya'ayän tsänaabiä. Y maas haxøøg ja'a jäya'ay ñä'ägä jaty quejee hānajty.

27 Jimä Jesús hānajty miädia'agynä, mänitä to'oxiøjc tu'ug yaaxy cu'ughajuc:

—Jootcujc miich mdaj mdsi'tsc jaduhñ yhity je'eguiøxpä coo miich tøø xyajtso'ogy tøø xyajyeegy.

28 Mänitä Jesús miänaañ:

—Je'eds maas jootcujc hijp, pønñatiä Diosmädia'agy cudiumb.

29-30 Tehñgajnä ja'a Jesús ja'a cu'ug hānajty jiaançh tehñ ñämugø'øyii may. Mänitä Jesús miänaañ:

—Cabä jäya'ay howyiinmahñdy hajxy miøødä, ja'a hajxy jäda'ahatypä. Ja'a hijxtahñd hajxy jia wi'i yhixaamby, ja'a hoy-yagjuóñäbä. Pero cab hajxy jaduhñ yaghixa'añii. Jagooyyä hajxy jaduhñ yhixa'añ cooçh høøch jaduhñ njada'añ nebiä Jonás jecy jiajtiän mänäa jim quiexyiijän Nínivecajttooty. Dios jaduhñ quejx.

31 Coo jaduhñ yhabáadät coo ja'a jäya'ayhajxy hānajty yajnähdija'añii, mänitä to'oxiøjc piädø'øga'añ, ja'a jecy hanéhmäbä jim jäguemnaax ja'a jøømbojmānājpä. Je'e jaduhñ mäna'anaamb coo ja'a jäya'ayhajxy jäda'ahatypä piäda'agøøjät haxøøgtuum. Je'eds ja'a Salomón hoy tøø miämädoona'ay, je'eguiøxpä coo ja'a Salomón hānajty jiaançh tehñ quihwijiä. Y cabä Salomón cuhdujt hānajty jiaty møødä nébiøch høøch jaduhñ nmøødän.

32 Y ja'a jäya'ayhajxy jecy tsänáayyäbä Nínivecajttooty, jaduhñ hajxy miäna'anaambä coo ja'a jäya'ayhajxy jäda'ahatypä piäda'agøøjät haxøøgtuum. Coo ja'a Jonás ja'a Diosmädia'agy hoy yajwa'xy jim Nínivecajttooty, mänitä

jäya'ay ja'a yhaxøøgwiinmahñdy hajxy ñajtschixøøyy. Y cabä Jonás cuhdujt hānajtj iaty mōōdä nébiōch hōōch nmōōdān.

³³ 'Coo ja'a jäya'ay jōōn hajxy quiuhno'ogø'øy, cøxp hajxy jaduhñ piäda'agy, nebiä jäya'ayhajxy jaduhñ quiudøø'xōjät ja'a hajxy tōjtägøøbiä. Cabä jōōn hajxy yu'učh, ni cab hajxy quiuhjupy cajónghaam.

³⁴⁻³⁶ Coočh mijts ja'a nmädia'agy hamuumdu'joot xmiäbōjcät, hoy hajxy jaduhñ mwäditāt homiānaajä. Pero coočh nmädia'agy hajxy xquia'a mabōjcät, hagoonstuum hajxy jaduhñ mhídāt. Homiānaajōch nmädia'agy hajxy xmiäbōjcät neby hajxy hagoonstuum mga'a cá'awät.

³⁷ Coo ja'a Jesús miädiaacpādøøyy, mänitä Jesús wioonøcxä mägaabiä ja'a fariséwām. Coo jim miejch maa ja'a fariseo tiōjcän, mänit yhäñaaguiädaacy meexäwiinduum.

³⁸ Jaguiø'øbuju ja'a Jesús yhäñaaguiädaacy. Caj quiø'øbuju nebiä judíoshajxy hānajtj quiuhdujthatiän. Coo hajxy hānajtj tiägø'øwa'añ caabiä, mänit hajxy hānajtj quiø'øbuju. Coo ja'a Jesús quia'a cø'øbuju, yagjuøøyy ja'a fariseo jaduhñ.

³⁹ Mänitä Jesús miānaañ:

—Mijts fariseodøjc, jaduhñ hajxy mja wi'i quiähxø'øga'añ nebiä hoyhāna'cän jim cu'ughagujc. Pero cabä mjoot cabä mjuøhñdyhajxy yhooyä, je'eguiøxpä coo hajxy mwi'i mieēch mwi'i pioty.

⁴⁰ Caj mijts mwiinmahñdy yhooyä. Tøø ja'a Dios ja'a mni'x ja'a mgopc-hajxy xquiunuu'xä. Tøø ja'a mjoothajxy xjia cunuu'xäbä coo ja'a mjuøhñdyhajxy hoy cu mhijty.

⁴¹ Coo ja'a häyoobäya'ay hajxy mbuhbédāt hamuumdu'joot, mänit hajxy jaduhñ mnähwá'adsät.

⁴² 'Mijts fariseodøjc, haxøøg hajxy mjada'añ mhabeta'añ. Xiøøbä hajxy mja nä'ä wi'i quiuyoxø'øy yø'øbi'c jøø'xychooy jiiby tsajtøgooty. Pero cabä Diosmädia'agy hajxy mgudiuna'añ maa jaduhñ myiñän coo hajxy hoy mwäditāt, coo ja'a Dios hajxy mwiingudsähgø'øwät. Pedyii ja'a Diosmädia'agy hajxy mgudiúnät.

⁴³ 'Mijts fariseodøjc, haxøøg hajxy mjada'añ mhabeta'añ. Mjaančh tehñ yajcumayaamb hajxy jaduhñ. Jiiby hajxy mja wi'i yhäña'awa'añ maa ja'a häñaabiejt hojiatypän jiiby tsajtøgooty. Y chojpy ja'a mjoothajxy jaduhñ coo ja'a cu'ug hajxy xi'ig xon xwyiingudsähgø'øwät jiiby halaplaaz.

⁴⁴ 'Mijts fariseodøjc, mijts ley-yajnähixøøbiädøjc, mhøhñdaacp hajxy jaduhñ. Cab hajxy myajcähxø'øgy coo ja'a mguhdujthajxy quia'a hoyyä. Y pønjatj ja'a mmädia'agyhajxy xpianøcxäp, tu'udägooby hajxy je'ebä, je'eguiøxpä coo hajxy quia'a najuø'øy coo mijts mguhdujt jaduhñ yhaxøøgä.

⁴⁵ Mänitä Jesús ñāmaayyā ja'a ley-yajnähixøøbiä tu'ug:

—Wiindsōñ, coo jaduhñ mmāna'añ, haxøøg hōjts jaduhñ xñānøømbä.

⁴⁶ Mänitä Jesús miānaañ:

—Mijts ley-yajnähixøøbiädøjc, jaanä haxøøg mijts mjadaambä mhabetaambä. Hanaxiä mijts ja'a tsipjatypä myajnähixø'øy. Ni pøn jaduhñ quia'a jada'añ nej mijts myajnähixø'øyän. Y cab hajxy hamdsoo mgudiuna'añ neby hajxy myajnähixø'øyän ni weēñtiä.

⁴⁷⁻⁴⁸ 'Haxøøg hajxy mjada'añ mhabeta'añ. Haxøøg mijts mguhdujt nebiä mhap ja'a mdeedyhajxy hijty chāna'ay yhäyoyyän jegyhajty. Je'eds hajxy jaduhñ yagho'c ja'a Diosmädia'agy hajxy jecy yajwá'xäbä. Y mijts ja'a tiōjc-huunghajxy myajcójjāp maa hajxy jecy ñaaxtägøøyyän. Myajcähxø'py hajxy jaduhñ coo ja'a mhap ja'a mdeedy hajxy tu'ugwiinmahñdy mmøødhity.

49 'Ñajuøøbiä Dios jaduhñ. Je'e jaduhñ mänaañ: "Nguexáambiøch nguguexyhajxy maa yø'ø häna'c-hajxiän. Näjë'ejøch nguguexyhajxy xyagho'ogaanä. Näjë'e hajxy ñä'ä tsaaçhtiuna'añii."

50 Ja'a jäya'ayhajxy jäda'ahatypä, pojpätuum cädieedium hajxy jaduhñ miähmø'øwa'añ ja'a Dios quiuguexycøxpähajxy, ja'a hajxy tøøbä yagho'ogyijäbä nägøxiä. Mänit hajxy tiägøøyyä yaghó'cäbä mänaa hädaa yaabä naaxwiin yhawijy tiøø'xta'aguiän.

51 Møødä Abel yaghó'cäbä møødä Zacarías. Tsajtøghaguuy ja'a Zacarías yagho'cä jim mädøyyä maa ja'a altarän. Tøyhajt jaduhñ coo ja'a jäya'ayhajxy jäda'ahatypä miähmø'øwa'añ pojpätuum cädieedium.

52 'Mijts ley-yajnähiøøbiädøjc, haxøøg hajxy mjada'añ mhabeta'añ. Cabä cu'ug ja'a tøyhajt hajxy mnä'ä mo'owa'añ. Cabä tøyhajt hajxy hamdsoo mnä'ä tsocy. Mijts ja'a cu'ug mwi'i quiapxhiimby nebiä tøyhajt hajxy jaduhñ quia'a páadät.

53 Mänitä Jesús jiaançh tehñ miäjootma'tä ja'a fariseodøjc møødä ley-yajnähiøøbiädøjc. Mänit hajxy tiägøøyy mäyajtøøbä madiu'u.

54 Jia wiinmahñdyhixaañ ja'a Jesús hajxy jaduhñ neby hajxy jaduhñ cu yajnähdsoømy.

12

1 Mänitä jäya'ayhajxy yhamugøøyy milhaam høxtä niñø'tsmujcä hajxy jaduhñ. Mänitä Jesús ja'a jiamiøød hawiing ñämaayy:

—Cabä fariseos miädia'agy hajxy mmäbøjcät. Nämäy häna'c jaduhñ tiu'udägoy coo ja'a fariseos miädia'agy hajxy miäbøjcä. Hix, høhndaacp ja'a fariseoshajxy jaduhñ. Yajnajuø'øwaamb jaduhñ tsipcøxp coo hajxy jaduhñ yhøhnda'agy. Hoy hajxy hoy jia capxy jia mädia'agy, cab hajxy hamdsoo hoy quiudiuñ.

2 Hix, cab jaduhñ tii ñä'ägädä mähmø'øwa'añ jañägapxy. Haagä cähxø'øgaamb jaduhñ cøxiä.

3 Jaanä jaduhñduhmbä ja'a mijtsøxpä, waambaty hajxy tøø mmäna'añ hamee'ch, yajmädowaamb jaduhñ cu'ughagujc.

4 'Mägu'ughajpädøjc, cab hajxy mdsähgø'øwät pøn ja'a mni'x ja'a mgopc xyaghó'cäp. Cab jaduhñ nej xjiaac túnät.

5 Pero ja'a Dios hajxy jaduhñ mdsähgø'øwäp. Je'edsä cuhdujt møød coo ja'a mjugyhajthajxy xyajcuhdägooyät, y coo hajxy xpiädä'agät haxøøgtuum.

6 'Høxtahñdsä muuxyhuunghajxy, hoy hajxy yaa tii quia'a ja wa'añ, jiah-miejchpä Dios je'e.

7 Mänaxiä mijts ja'a Dios xquia'a jahmiédsät. Paady hajxy jaduhñ mga'a tsähgø'øwät. Xjiaançh tehñ chojp mijts ja'a Dios høxtä xmiooby hajxy tijaty hajxy myajmaajiajpy.

8 'Tøyhájthøch jaduhñ nmäna'añ, høøch ja'a Diosquexypä, pøn høch xquiapx-paatp cu'ughagujc, je'eçh jaduhñ ngapxpaattägatsaamby jim tsajpootyp ja'a Diosmoonsäwiinduum.

9 Pero pøn høch jaduhñ xquia'a capxpaatp cu'ughagujc, ni je'eçh jaduhñ nga'a capxpaadaambä ja'a Diosmoonsäwiinduum.

10 'Pøn høch haxøøg xñänøømb, mee'xáanäp je'e. Pero coo ja'a Dioshespíritu hajxy haxøøg ñänómät, cab hajxy jaduhñ miée'xänät.

11 'Coo mijts häna'c mädsibø'øbä xyajnócxät tsajtøgooty o jim maa ja'a hagujtøjcän, cab hajxy mdaj mmáyät waamb hajxy mmädiá'agät,

12 je'eguiøxpä coo ja'a Dioshespíritu hajxy xñajtsapxøøyyät waambaty hajxy jaduhñ mhadsówät.

13 Mänitä Jesús ñämaayyä tu'jäya'ay maa ja'a cu'ugän:

—Wiindsón, nämáayyägöch nbuhya'ay coöchä nnädeedyñaax xpiuhmó'owät.

¹⁴ Mänitá Jesús miänaañ:

—Pónhöch tøø xquiuhdujtmó'oy coöch mijts nhané'emät.

¹⁵ Mänitá Jesús miänáangombä:

—Mnigwieendähadóøjäp hajxy coo hajxy tii mga'a hadsógät. Cab hajxy nõcxy mdajy mmay coo hajxy cõxiä mga'a mõødä.

¹⁶ Mänit miänáangombä:

—Tsög hajxy mänáanäm, jii jäya'ay hijty tu'ug jaančh tehñ miäyøø. Mänitá ñøø miooc may yajpädø'cy.

¹⁷ Mänit tiägøøyy tajpä maabiä: “Nébiöch nnøø nmooc ndúnät. Maačh jaduhñ nnä'ä pädá'agät.”

¹⁸ Mänit miänáangombä: “Tøøch nnajuø'øyy maačh nbädá'agät. Nya-jmá'adäbøch yø'ø ndsehñ. Maas crúundøch ngójät. Jíbyhöch nnøø nmooc ngøxy pädá'agät, mädúhñtiöch nmøødä.

¹⁹ Cáböch jaduhñ tii ndájnät nmáañät. Jootcuyc-höch jaduhñ ndsänáañät nhäyóonät majiomøjt. Poo'xáamböch, cayáamböch hu'ugáamböch, xoonä'agáamböch.”

²⁰ Mänitá Dios ja'a craa ñämaayy: “Miičh, cab jaduhñ mnä'ägä mäßøcy. Jäda'a coods mho'oga'añ. Yø'øduhñ tøø mwi'i piädá'aguiäbä, pøn jaduhñ mämähmø'øwaamb.”

²¹ Jaduhñdsä mäyøøjäya'ayhajxy jiaty yhabety pønjaty maxiädø'øñ jaduhñ tehñgajnä yajmuyp yhamdsoogøxpähajxy. Pero maa ja'a Dioswiinduumän, häyoob hajxy jaduhñ.

²² Mänitá Jesús ja'a jiamiøød ñämaayy:

—Ca'a hajxy mdajy mmay tii hajxy mnäjyghadaamby, tii hajxy mgayaamby, tii hajxy mwithadaamby.

²³ Cab hajxy nõcxy mdajy mmay coo hajxy cõxiä wiinä mga'a mõødä.

²⁴ Høxtahñds yø'ø muuxy hajxy, cab hajxy tiuñ xiajy. Cab hajxy tii ñi'iby; cab hajxy tii yajpädø'øgy; cabä tsehñ hajxy miøødä. Ja'a Dios jaduhñ yagjøø'xp. Y mijts, mmaas tsoobaatp hajxy quejee ja'a muuxy hajxy.

²⁵ Hoy hajxy mäduhñtiä mja taj mja máyät, cab hajxy hamdsoo mniyajy-eegøøjät ni weeñtiä.

²⁶ Pø cab hajxy hoy hamdsoo mniyajyeega'añii, cab hajxy tii mdaj mmáyät.

²⁷ 'Høxtahñds yø'ø pøjy, yee'p yø'ø. Pero cab tiuñ xiajy; cab pyiidyhädiuñ. Tøyhajt jaduhñ, ni ja'a rey Salomón jecy quia'a nä'ägä mäbaaty nej yø'ø pøjjiän, hoy howyit hñajty jia mõødä.

²⁸ Hoyyá Dios yø'ø pøjy yajxón jia cunuu'xy, cab jecy. Mänaxiä mijts ja'a Dios xquia'a witmó'owät, hoy mijts jaduhñ mga'a ja mäßøcy.

²⁹ Ca'a hajxy mwi'i tiajy mwi'i miay tii hajxy mgayaamby mhu'ugaamby.

³⁰ Ja'a hajxy jaduhñ ca'a mäßøjpä, je'eds hajxy wyi'i tiajpy wyi'i miaaby. Pero mijts, ñajuøøbiä mDeedyhajxy tijaty hajxy myajmaajiajpy.

³¹ Taj may hajxy nebiä Diosmädia'agy hajxy hoy mgudiúnät, mänitá Dios cõxiä xmió'owät.

³² 'Mägu'ughajpädøjc, ca'a hajxy mdsähgø'øyy, hoy hajxy jaduhñ mja nä'ä weeñtiä. Choipiä mDeedy jioot jaduhñ coo mijts xyhuunghädät.

³³ Mdóogäp hajxy mäduhñtiä hajxy mmøødä; mänitá häyoobäya'ay hajxy mnä'ä mó'owät cõxiä. Jaduhñ mijts hoyhajt weenhajt jim mbáadät tsajpootyp. Cab jaduhñ pøn jim tii xpiójcät.

³⁴ Coo ja'a Diosmädia'agy hajxy hamuumdu'joot mgudiúnät, mbáadäp ja'a hoyhajt ja'a weenhajt hajxy jaduhñ. Coo ja'a yaabä naaxwiimbä hajxy mbøcjuó'owät, cab hajxy tii mbáadät.

³⁵⁻³⁶ Mänitä Jesús tiägøøyy mädiaacpä nebiä jiamioødhajxy nahix hahixø'ø yhidät coo hñajty quiädaactägatsa'añ jadähooc. Mänit miänaañ:

—Nähix hahixø'ø hajxy mhídät nebiä homioonsähajxiän coo ja'a wyiindsøñhajxy wyiimbídät mägaabiä mähuucpä maa ja'a pøc hu'ug jiadyiijän. Jøønmøød hajxy jaduhñ yhahixy. Coo ja'a wyiindsøñhajxy miech maa ja'a tiøjcän, mänit hajxy yajtøjtägø'øy.

³⁷⁻³⁸ Pø jujyñä ja'a mioonsähajxy hñajty, hoy ja tsuhmdä, hoy ja moññä, cumayaambä wyiindsøñ jaduhñ. Tøyhajt jaduhñ. Høxtä yajcayøøjäp hajxy ja'a yhamdsoo wiindsøñ.

³⁹ Y jaanä jaduhñduhmbä, coo ja'a cudøjc jaduhñ ñajuó'owät mäduhnajtä ja'a mee'tspä miédsät, cab jaduhñ ñä'ägä maahó'ogät nebiä mee'tspä jaduhñ quia'a tøjtägø'owät.

⁴⁰ Jaduhñ mijts nahix hahixø'ø mhíjpät. Cab hajxy mnä'ägä najuó'owät mänáajøch ngädaactägatsa'añ, høøch ja'a Diosquexypä.

⁴¹ Mänitä Pedro yajtøøyy:

—Wiindsøñ, pøñ miich hädaa myajmøødmädiaacpy, højtsyähajtiä tøgä nägøxiä.

⁴² Mänitä Jesús yhadsoooy:

—Pøñ jaduhñ cudiumb nebiatiä wyiindsøñ yhane'emiän, je'eds jaduhñ hoy copc-hajp maa ja'a wyiindsøñ tiøjcän. Coo ja'a wyiindsøñ maa ñøcxy, je'eduhñ mähmøøby coo jaduhñ yajcáyät pøñ jiiby hijp tøgooty.

⁴³ Pø cudiumbä copc-hajpä hñajty hoy, coo ja'a wyiindsøñ wyiimbi-jtägätsät, cumayáanäp jaduhñ ja'a wyiindsøñ.

⁴⁴ Mänitä wyiindsøñ yajnähdi ja'añii coo jaduhñ quiopc-hádät mäduhñtiä ja'a wyiindsøñ miøødä cøxiä.

⁴⁵ Pero coo ja'a copc-hajpä miäná'anät coo ja'a wyiindsøñ quia'a tsoj medsa'añ, coo ja'a miämoonsä yhäyoowhíxät, coo tiägø'owät huucpä caabiä, coo miu'ugøøjät,

⁴⁶ mänitä wyiindsøñ miejtstägatsa'añ jaguiapxy, mänit jaduhñ jiaanč tehñ chaächtiuna'añii neby hajxy chaächtiunñiijän ja'a hajxy ca'a mabøjpä.

⁴⁷ 'Mädyii moonsä jaduhñ ca'a mädia'agymiäbøjp, hoy jia najuø'øy nebiaty ja'a wyiindsøñ yhane'emyii, jaanč tehñ chaächtiunáanäp je'e.

⁴⁸ Pero mädyii moonsä ca'a mädia'agymiäbøjp je'eguiøxpä coo quia'a najuø'øy, cab jaduhñ jiaty tsaaçhtiuna'añii. Pøñ madiuung jaduhñ yajcø'ødägøøyyäp, tsipcøxp jaduhñ quiudiúnät nebiaty yhane'emyii.

⁴⁹ 'Páadyhøch yaa tøø ngäda'agy hädaa yaabä naaxwiin nebiä tsip jaduhñ piädø'ogät. Weenä jäya'ayhajxy ñimiädsibø'øyyii.

⁵⁰ Mobadájpøch nho'oga'añ. Jiaanč tehñ chójpøch njoot coo paquiä yhabáadät.

⁵¹⁻⁵² Páadyhøch yaa tøø ngäda'agy hädaa yaabä naaxwiin nebiä jäya'ayhajxy ñimiädsibø'owøøjät. Cabä jäya'ayhajxy jootcuyc ñä'ägä hidaannä. Nimiädsibø'owáanäp hajxy tu'ugtøgooty. Nädägøøgpäna'c-hajxy yajmuga'añ ja'a nämetspäya'ay.

⁵³ Miøødnimiädsibø'owáanäp ja'a tiaj ja'a tieedyhajxy. Miøødhoc ji-axie'ebhajxy ñimiädsibø'owa'añii.

⁵⁴ Mänitä Jesús ja'a cu'ug ñämaayy:

—Coo ja'a joc piädø'øgy maa ja'a xøø quiuhnaxiän, hijxtahñd je'e coo tiu'uwa'añ.

⁵⁵ Y coo jiøømbojy, hijxtahnd jaduhñ coo han yhida'añ. Y mnajuøøby hajxy jaduhmbä.

⁵⁶ Tøyhajt jaduhñ, mnajuøøby hajxy jaduhñ nebiä xøø ñaxa'añ, pero cab hajxy mnajuø'ø y tijaty jadáannäp habetáannäp. Hix, hamdsoo ja'a mjoothajxy quia'a tsocy coo hajxy jaduhñ mnajuø'øwät.

⁵⁷ 'Tii hoguiuhdujt hajxy hamdsoo coo mga'a jada'añ.

⁵⁸ Coo pøn hñajty tøø xñäxø'øwø'øy, coo hñajty xyajnøcxy haguyc, tu'haamnøcxpä myajtødiägø'øwät. Pø caj, xchúmäp hajxy jaduhñ.

⁵⁹ Y cab jaduhñ mdsoj pädsømät høxtä coonä mnuu'xy myajñähwá'adsät pedyii. Jaduhñ mäwíinäts Dios hajxy xyajcumädówät.

13

¹ Mänitiä ja'a Jesús yhawáanäxä coo ja'a Pilato ja'a Galileabäya'ay hñajty näje'e tøø yajyagho'ogyii tsajtøghaguuy. Animalyøjxpä Galileabäya'ayhajxy hñajty. Jaduhñ hajxy hñajty quihdujthaty.

² Mänitä Jesús miänaañ:

—Nej, mmänaamb hajxy jaduhñä, paady yø'ø hñä'a-c-hajxy yagho'cä je'eguiøxpä coo maas may ja'a pojpä cädieey hajxy hñajty tøø tiuñ quejee ja'a miägunaaxhaxiä.

³ Høøch jaduhñ mänaamb, caj. Y coo mijts ja'a mhaxøøgcuhdujt hajxy mga'a najtshixø'øwät, jaduhñ hajxy mjájpät nägøxiä.

⁴ Y yø'ø hñä'a-c-hajxy nämajmocxtägøøgpä tøø yhó'oguiäbä jim Siloé mänaa ja'a møj torre tøø ñähgahbetiän, nej, mmänaamb mijts jaduhñä coo maas may pojpä cädieey hajxy hñajty tøø tiuñ quejee ja'a jiamioødhajxy jim tsänaabiä Jerusalén.

⁵ Høøch jaduhñ mänaamb, caj. Y coo mijts ja'a mhaxøøgcuhdujt hajxy mga'a najtshixø'øwät, jaduhñ hajxy mjájpät nägøxiä.

⁶ Mänitä Jesús miänaangombä:

—Tsøc mädiäacäm, jii jäya'ay piids hijty tu'copc miøødä maa ja'a ñaaxän. Mänit hoy jia hixø'øy pø tøø tiøømbety. Cahnä hñajty tiøømbetyñä.

⁷ Mänitä mioonsä ñämaayy: “Huug hix yø'ø piids, tøø ndijy häxøpy tiøømbejnä cudägøøgjomøjt, y cahnä ñä'ägädä tøømbetyñä. Púxäts, xiøøbä jim ñä'ä naaxñähdäna'ay.”

⁸ Mänitä mioonsä miänaañ: “Wiindsøn, ween jiaac täna'ay tu'jomøjt. Nhuuc nä'ä juhdajtú'udyhøch. Nhuuc tsooyø'øyhøch abonohaam.

⁹ Wehndä jaduhñ ñä'ä tøømbédät. Pø caj, mänitøch nbúxät.”

¹⁰ Wiinghoocä Jesús hñajty jiiby yajwiingapxø'øy tsajtøgooty. Poo'xxiøøjooty hñajty je'e.

¹¹ Jiibiä tajiäya'ay hñajty tu'ug. Majmocxtägøøgjomøjt ja'a pa'am hñajty tøø miähäyoy. Jøney ja'a mähdiøjc hñajty tøø yagjadyii ja'a møjcü'ujäm; ni cab hñajty hoy ñä'ägä tøwa'añ.

¹² Coo ja'a Jesús ja'a tajiäya'ay yhiixy, mänit miøjyaaxy. Mänit miänaañ:

—Pi'maam, tøø ja'a mba'am jaduhñ xñähwa'açh.

¹³ Mänitä Jesús ja'a pa'amjäya'ay ñähdooñ. Mänitiä ja'a mähdiøjc tiøøyy. Mänit miänaañ coo ja'a Dios miøjjä jiaanchä.

¹⁴ Mänitä tsajtøjwiindsøn jiootma'ty je'eguiøxpä coo ja'a Jesús ja'a pa'am yajnajxy ja'a poo'xxiøøjooty. Mänitä cu'ug ñämaayy:

—Tädujxøø ja'a Dios tøø quiunuu'xy coo hajxy ndúunämät. Mänitä mba'am hajxy min myajniñähwa'açhii. Pero cab hajxy myajniñähwa'adsøjät ja'a poo'xxiøøjooty.

¹⁵ Mänitä Jesús miänaañ:

—Mhøhndaacp mijts jaduhñ. Nej, caj mijts mweey mburro hajxy mya-jnøøhu'ugy ja'a poo'xxiøøjootiä. Hoy hajxy hoy mja capxy mja hane'emy, cab hajxy hamdsoo hoy mgudiuñ.

¹⁶ Y hädaa tajiäya'ay, Abraham yhap yhoc hädaaduhñ. Majmocxtägøøgjomøjt hijty tøø yaghidyii pa'ammøød ja'a møjcü'ujäm. Nej, cábøch ja'a cuhdujt hijty nmøødä cooçh poo'xxiøøjooty tøø nyajnähwa'açhä.

¹⁷ Mänitä Jesús miädsiphajxy chähdiuuñ. Pero ja'a cu'ug, jaançh tehñ xioondaac hajxy jaduhñ je'eguiøxpä coo ja'a Jesús ja'a hoy-yagjuøøñäjatypä hñajty tøø yajcähxø'øgy.

¹⁸ Mänitä Jesús miänaañ:

—Coo ja'a Dios ja'a miäjaa hñajty yajcähxø'øga'añ, jadúhñhøch nya-jmäbaada'añ

¹⁹ nebiä habi'c mostazapajcän. Coo jäya'ay jaduhñ ñí'ibät maa ja'a ñaaxän, cøxp jaduhñ yéegät. Høxtä pe'eñhädiúnäp ja'a muuxyhajxy yhaa'xcøxp.

²⁰ Mänitä Jesús miänaangombä:

—Coo ja'a Dios ja'a miäjaa hñajty yajcähxø'øga'añ, jadúhñhøch nya-jmäbaada'añ

²¹ nebiä to'oxiøjc tsajcaagychooy hajxy yajtuñän coo tsajcaagy hajxy yhädiuñ. Tägøøgquixøhñdy ja'a harina hajxy yajmäbädaagø'øy ja'a tsajcaagychooy. Mänit jaduhñ hoy piädø'øgy.

²² Mänitä Jesús tiu'ubøjcy. Jerusalén hñajty ñøcxa'añ. Tu'haamnøcxpä ja'a Jesús hñajty yajnähixø'øy maa ja'a cajpthuungän.

²³ Mänitä Jesús miäyajtøøwä:

—Nej, näweeñtiä hajxy ñähwa'adsa'añ ja'a piojpä cädieeyhajxiä.

Mänitä Jesús yhadsooy:

²⁴ —Tsipcøxpä Diosmädia'agy hajxy hoy mgudiúnät nebiä cuhdujt hajxy hoy mmøødhädät neby hajxy jim mdägø'øwät tsajpootyp. Nämäy hajxy jia wi'i tiägø'øwa'añ, pero cab hajxy hñajty yajtägø'øwa'añii coo cuhdujt hajxy hñajty quia'a møødä.

²⁵ Coo ja'a Dios ja'a tøjc hñajty tøø yhagøøñä, mänitä tøghagø'øw hajxy hñajty jia wi'i quiojxnoga'añ, pønjaty tøba'am hñajty tøø miähmø'øy. Mänit hajxy hñajty jia wi'i miäna'ana'añ: “Dios, yaghawa'ads yø'ø tøjc.” Mänitä Dios yhadsowa'añ: “Cábøch mijts nhixiä.”

²⁶ Mänit hajxy hñajty miäna'anáangombä: “Pero tøøds miiçh nmøødcay nmøødhu'ugy; tøøds miiçh mmädia'agy xyajnähixø'øy mänaa jim mhitiän maa højts ngajptän.”

²⁷ Mänitä Dios hñajty yhadsowáangombä: “Tøø hajxy nnäma'ay coo hajxy nga'a hixiä. Wiimbit hajxy. Caj mijts mguhdujt ñä'ägä hoyyä.”

²⁸ Mänitä Abraham hajxy hñajty jim mhixa'añ tsajpootyp jim Dioswiinduum møødä Isaac møødä Jacob møødä Diosquexyhajxy nägøxiä. Mänit hajxy mjø'øwa'añ mxuudsa'añ coo ja'a Dios hajxy tøø xquia'a yajtägø'øy.

²⁹ Nøcxaambä jäya'ayhajxy miägaya'añ Dioswiinduum ja'a hajxy wiinduhmyhagajpt-tsohmbä.

³⁰ Jaaya'ayhajxy jäda'ahaty péjxäbä, näje'e møjtuung hajxy piaada'añ. Y jaaya'ayhajxy jäda'ahaty møjtuungmøødpä, näje'e tiuunghajxy piøgáanäxä.

³¹ Mänitxøøbä ja'a fariseoshajxy näje'e miejch maa ja'a Jesúsän. Mänitä Jesús hajxy ñämaayy:

—Mdsóonäp yaa coo ja'a Herodes xjia wi'i yajyagho'oga'añii.

³² Mänitä Jesús yhadsooy:

—Ca'awiindøyyä Herodes jaduñ. Nøcx hajxy näma'aw cooç mejtsxøø tågøøgxøø njaac tuna'añ. Njaac høxquexáambiøch ja'a møjcu'uhajxy. Njaac yajmøcpøgåambiøch ja'a pa'amjäya'ayhajxy. Mänitøch nduumbädø'owa'añ.

³³ Jexioo, mejtsxøø tågøøgxøøjoch njaac tu'uyo'oya'añ. Mänitøch jim nmedsa'añ Jerusalén. Cab jaduñ yhawiinmatsä coo ja'a Diosquexy wiingtuum yhö'ogät.

³⁴ Mänitä Jesús miänaangombä:

—Ja'a häna'c-hajxy jim tsänaabiä Jerusalén, tøø ja'a Diosquexy hajxy may quiuhga'aç. Tøøch mayhooc nja wi'i näma'ay coo ja'a yhaxøøgcuhdujt hajxy ñajtshixø'owät; pero cab hajxy ñä'ä najtshixø'owa'añ.

³⁵ Cooç jim ngoodät Jerusalén, páquiøch jim nhida'añ. Mänitøch mijts jim nnähgue'egáangombä. Cábøch hajxy xyhixaannä høxtä cóonøch hānajtj ngādaactāgatsa'añ. Mänit hajxy hānajtj mmāna'ana'añ: “Jaanç tehñ miøj jaanç tehñ jiaanç ja'a Dios tøø quiéxiäbä.”

14

¹ Wiinghoocä Jesús ñøcxy mägaabiä maa ja'a fariseowiindsønä tiøjcän. Poo'xxiøøjooty hānajtj je'e. Jiibiä Jesús hānajtj miähijxna'ayijām tøgooty ja'a fariseoshajxy.

² Jiibiä mähdiøjc hānajtj tu'ug qui'ixypa'ammøød. Jesúswiinduum hānajtj tiāna'ay.

³ Mänitä Jesús miäyajtøøyy ja'a ley-yajnähiøøbiähajxy møødä fariseoshajxy:

—Nej, jii cuhdujt jaduñ coo ja'a pa'amjäya'ay myajmøcpøgät poo'xxiøøjootiä.

⁴ Pero cab hajxy waamb ñä'ä hadsooyy. Mänitä Jesús ja'a pa'amjäya'ay ñähdoon, yajmøcpøjcy. Mänit ñämaayy coo wyiimbídät.

⁵ Mänitä fariseoshajxy ñämäayyägombä:

—Coo mijts mburro mweey quiuga'awø'owät nøøjutjooty, nej, cab hajxy mänitiä myajpäsømädä, hoy hānajtj jia poo'xxiøøjootiä.

⁶ Cab hajxy waamb ñä'ägä hadsooyy.

⁷ Mänitä Jesús yhiijxy coo ja'a woybä wichpä hoyhāñaabiejt hajxy jia wi'i yhøxta'ay. Mänit miānaañ:

⁸ —Coo ja'a pøc ja'a hu'ug hānajtj mānaa jiadyii, coo mijts myajwówät, cabä hoyhāñaabiejt hajxy myaghāña'awø'owät. Hix, coo häna'c maas cuhdujtmøødpä jiaac médsät,

⁹ mänitä cudøjc xñamá'awät: “Pädø'øg, mo'ow yø'ø hāñaabiejt yø'ø häna'c tøø jiaac méchäbä.” Xyajtsähdiünäp jaduñ. Mänit nøcxy mhāña'ay maa ja'a hāñaabiejt ca'a hojiatypän.

¹⁰ Pero jayøjp mhøxtá'awät ja'a hāñaabiejt ca'a hojiatypä. Mänitä cudøjc xñamá'awät: “Mägu'ughajpä, yaa naç maa hädaa hāñaabiejt hojiatypän.” Xquiumáyäp ja'a jäya'ayhajxy ja'a hajxy jim hāñaabiä.

¹¹ Pøn ja wi'i yajcumayaamb, yajpexaamb je'eduhñ. Pøn ca'a yajcumayaamb, je'eds jaduñ møjtagø'øwaamb.

¹² Mänitä Jesús ja'a fariseowiindsøn ñämaayy, ja'a hānajtj tøø miäwóyyäbä:

—Coo ja'a tsuunax hānajtj mānaa myagjada'añii, cabä mmägu'ughajpähajxy mwówät, ni ja'a mbuhya'ayhajxy, ni ja'a mjujy ja'a mmägu'ughajxy, ni ja'a mmäjøøn ja'a mmädøjc-hajxy ja'a mäyøøbä. Xwiødägätsäp hajxy je'e ja'a miich hānajtj tøø mwóyyäbä.

¹³ Pero je'eds mwówäp ja'a häyoobä, ja'a ca'a hoybä, ja'a tecymia'adpä, ja'a wiindspä.

14 Hoy miich jaduhñ xquia'a ja woodägátsät, jootcujc mhídät jadähooc je'eguiøxpä coo ja'a hoyhajt ja'a weenhajt mbaada'añ mänaa ja'a jäya'ayhajxy hñajty jiuypijøjtägatsa'añän, ja'a Diosmädia'agy hajxy hñajty tøø quiudiüñäbä.

15 Jimä jäya'ay hñajty tu'ug yhäña'ay meexäwiinduum. Mänitä Jesús ñämaayy:

—Jootcujc je'e, pøn mägayaamb Dioswiinduum.

16 Mänitä Jesús miänaañ:

—Tsøc mädiäacäm. Jaduhñä jäya'ay tsuunax tu'ug yagjajtä. Mänitä jäya'ay may yajwoowä.

17 Coo hñajty tøø yhabaady, mänitä mioonsä ñämaayy: “Nøcx ja'a woybä wichpähajxy näma'aw coo hajxy yhadø'ødsät, coo ja'a cay tøø yhabaatnä.”

18 Pero mänit hajxy nägøxiä yhadsooyy cooc hajxy quia'a näbaadø'øwaañäxä. Tu'jäya'ay miänaañ: “Tøøchä naax njuy; nøcxáambøch cham nhixa'añ. Huuc mee'x, cábøch xñäbaadø'øwaañä.”

19 Mänit wiingpä miänáangombä: “Tøøchä waj njuy mägooxmancuerno. Je'eéch nøcxy nyajtuunghabøga'añ. Huuc mee'x, cábøch xñäbaadø'øwaañä.”

20 Mänitä wiingpä jiaac mänáangombä: “Naambøcyhøch høøch; páadyhøch nga'a nøcxa'añ mägaabiä.”

21 Coo ja'a moonsä wyiimbijtägajch, mänit je'e cøjx ñägapxy waambaty hajxy yhadsooyy. Mänitä wyiindsøn jiaanç tehñ jiootma'ty. Mänitä mioonsä ñämäaguionbä: “Nøcx jim päyø'øguiä maa ja'a møjtu'ujän. Pønjaty jim mbaatyp, ja'a häyoobä, ja'a ca'a hoybä, ja'a tecymia'adpä, ja'a wiindspä, je'e jaduhñ mwoomínäp.”

22 Coo ja'a moonsä jadähooc wyiimbijtägajch, mänit miänaañ: “Wiindsøn, Tøøch ngudiüñ nébiøch miich tøø xyhane'emiän. Pero xiinä hawa'adspä.”

23 Mänitä wyiindsøn yhadsooyy: “Nøcx jim maa ja'a xu'udstu'ujän, maa ja'a padu'ujän; pønjaty jim najxp, mnämä'awäp hadsip coo hajxy myínät, nébiøch ndøjc jaduhñ yhúdsät.

24 Pero pønjátyhøch tøø nja yajwoyii, cab hajxy min quiaya'añ maaçh ndsuunax nyagjadyiijän.”

25 Nämäyyä jäya'ay ja'a Jesús hñajty pianøcxy. Mänitä Jesús wia'wiimbijty. Mänit miänaañ:

26-27 —Pønjátyhøch xpianøcxaamb, wéenhøch xmiaas tsocy quejee ja'a tiaj ja'a tieedyhajxy chocy, møødä yhuch ja'a piuhya'ay; quejee ja'a yhuungä tio'oxy chocy. Pø caj, cábøch hoy xpianøcxät. Pøn ja'a jiugyhajt ca'a nähdujp, cábøch jaduhñ hoy xpianøcxät.

28 Coo pønä tøjc hñajty quioja'añ, jayøjpä xiädø'øñ miächoy pø pedáanäp jaduhñ.

29 Pø caj, mänit jaduhñ ñäxi'igøøjät coo hñajty quia'a maya'añ.

30 Jaduhñ hajxy miäná'anät: “Xiøøbä yø'ø craa ñä'ä yajtsohñdaacy; maa jaduhñ ñä'ä yajmaayy.”

31 Coo ja'a reyhajxy hñajty ñimiädsibø'øwa'añii, jayøjp hajxy yhahixø'øy pø mäjäda'agaamb coo nämajcmil soldado jia møødä, coo ja'a miädsip ja'a soldado nähii'xmil miøødä.

32 Pø caj, jäguemiä ja'a quiuguexy quiéxät weenä miädsip jaduhñ miee'xy.

33 Jaanä jaduhñ mijtspä, coo hajxy cøxiä wiinä mga'a najtshixø'øwät ja'a høøchcøxpä, cábøch hajxy hoy xpianøcxät.

34 Tuungpaatpä caan hit. Pero coo jiø'øwät, cab jaduhñ mänaa yhoyøøñät.

35 Cab jaduhñ tiuungpaadaannä. Nä'ä tägooby jaduhñ. Pø mwijnjuøøby hajxy, wéenhøch hädaa nmädia'agy xmiäbøjcä.

15

¹ Mänitä Jesús ñämejtsä ja'a yajñähjuudiutpähajxy nämay mөөдä cubojpä cugädieeybähajxy. Miädo^waam^biä miädia'agy hajxy hänäjty.

² Mänitä fariseos ja'a Jesús hajxy tiägөөyy mädiaacpä mөөдä ley-yajñähixөөbiähajxy:

—Cab jaduhñ yho^yyä coo yө'ө craa ja'a cubojpä ja'a cugädieeybä miägu'ughädät, coo miөөdcäyät.

³ Mänitä Jesús tiägөөyy mädiaacpä:

⁴—Tsөc mänáañäm, pөñ meeg hänäjty mөөд mägo'x, coo tu'ug tiägöyyät, nej, cabäda'a nägө'ө nädecypⁱä mhөxtá'awädä.

⁵ Y coo mbäädät, mänit mxoon^dá'agät. Mänitä meeg mdsehnө'өгät. Mänit mdsehnⁿөcxät maa ja'a mdөjcän.

⁶ Coo jim mmédsät, mänit mmäjөөн mmädөjc mwoomúgät mөөдä mmägu'ughajpähajxy. Mänit mmäná'anät: “Tsөг hajxy xoon^dáacäm; төөчä meeg nbaady ja'a hijty төө tiägöyyäbä.”

⁷ Tөyhajt, jaanä jaduhñ hajxy jim xioonda'agaambä tsajpootyp coo ja'a cubojpä cugädieeybä yhaxөөgcuhdujt hajxy ñajtshixө'өwät. Ja'a jaac nämädaaxc-hii'x-cumajmocxmädaaxc jäya'ayhajxy, ja'a hijty төө quia'a tu'udägöyyäbä, cab hajxy jiaty näxoon^dá'aga'añii.

⁸ Tsөг jaac mänáañäm, mädyii to'oxiөjc xädө'өñ majc mөөд, coo tu'ug tiägöyyät, mänitä jөөн quiudөө'xө'y. Mänit tiägө'y төjpeetpä hodia'agyhaamby, cham jaduhñ yhөxta'ay.

⁹ Coo ja'a xädө'өñ piaady, mänitä miäjөөн miädөjc wioomucy mөөдä miägu'ughajpähajxy. Mänit miäna'añ: “Tsөг hajxy xoon^dáacäm; төөчä xädө'өñ nbaady ja'a hijty төө tiägöyyäbä.”

¹⁰ Tөyhajt jaduhñ, jaanä jaduhñ ja'a Diosmoonsähajxy jim xioonda'agaambä tsajpootyp coo ja'a cubojpä cugädieeybä yhaxөөgcuhdujt hajxy ñajtshixө'өwät.

¹¹ Mänitä Jesús jadähooc miänáangombä:

—Tsөc mädiáacäm, jaduhñä jäya'ay hänäjty tu'ug, metsc yhuung.

¹² Mänitä muutspä ñämaay ja'a tieedy: “Teedy, hөөчä xädө'өñ móoyyäc mädúhñtiөch hijty төө xyajñähdijy.” Mänitä yhuunghajxy miooyy ja'a xädө'өñ.

¹³ Cujaboom cumaaxcä craa muutspä tiu'ubөjnä. Cөjxä xiädө'өñ miädu'ubөcy. Mänit ñөcxy jäguemnaax. Mänitä xiädө'өñ cөjx ñähaduñ ñähanäma'awө'y. Haxөөg hänäjty wiädity.

¹⁴ Coo ja'a xiädө'өñ hänäjty төө quiөjxnä, mänitä yuu miejch maa ja'a craa hänäjtian. Mänitä yuu hoyhoy piátänä.

¹⁵ Mänitä tuung hoy piaady mähädsөmyagjөө'x.

¹⁶ Jia wi'i jioө'xaamby hänäjty ja'a hädsөm hänäjty jioө'xypä, pero cab hänäjty tii ñä'ägä mo'oyii.

¹⁷ Mänit wyiinmahñdymejch: “Jim maaçh ndeedy tiөjcän, jaançh tehñ quiu'uxiä ja'a moonsähajxy jim quia^y yhu'ugy. Y hөөч, coöch yaa nmähmө'өwät, yuuhө'ogäbөch häyaa.

¹⁸ Nnä'ägä nөcxyhөch jim maaçh ndeedy tiөjcän. Jadúhñhөch nnäma'awa'añ: Teedy, төөч ngädieey ja'a Dioscөxpä mөөдä miiçhcөxpä.

¹⁹ Cäbөch miiçh hawiinmats xyhuunghájnät. Hóyhөch miiçh xñä'a wá'anät moonsä.”

²⁰ Mänitä craa wyiimbijty, ñөcxtägajch maa ja'a tieedy tiөjcän.

Mөjnä hänäjty quia'a mech, mänitä tieedy jiojcuheebөөyyä. Mänitä tieedy jioot xiuu'tspөjcy jadähooc. Mänit päyө'өguiä hoy jiojcuhaadө'y. Mänit ñähmäneeñ quiuhmäneeñ. Mänit chu'xy.

²¹ Mänitä yhuung miänaañ: “Teedy, tõeçh ngädieey ja'a Dioscøxpä mөөдä miichcøxpä. Cábøch miich hawiinmats xyhuunghájñät.”

²² Mänitä tieedy ja'a moonsä tu'ug ñämaayy: “Tsógäm, nøcx ja'a howyit yajpädsøm. Yajniguiubøgøø. Pädaacä cø'øjädsøhñdy tu'ug mөөдä xäguiø'øg.

²³ Nøcxä wajhuung hajxy yagho'og ja'a ni'xpä. Tsögä xøø hajxy yagjajtäm. Tsög hajxy caayy tsög hajxy húucäm.

²⁴ Jadúhñhøch hádaa nhuung hijty nebiä ho'ogypiän nebiä tågoybän. Pero tõeçh jadähooc xyhajuø'oyii. Y chaaçh tøø xñämech.” Mänitä xøødsuu hajxy yagjajtä.

²⁵ Ja'a craa möjpä, jim hänäjty je'e camjooty. Mänit wyiimbijty. Coö hänäjty miedsaannä maa tøjcän, mänit miädooyy coö hajxy wyi'i xiu'uxy, coö hajxy wyi'i yhech wyi'i piuty.

²⁶ Mänitä moonsä tu'ug miøjyaaxy. Mänit miäyajtøøyy: “Tii jaduhñ jajtäp.”

²⁷ Mänit ñämaayy: “Tøø ja'a mhuch miech hoy ween. Paadiä mdeedy ja'a wajhuung ni'xpä tøø yajyagho'ogyii.”

²⁸ Mänitä craa möjpä jiootma'ty. Cab hänäjty tiøjtägø'øwa'añ. Mänitä tieedy tiøjpädsøømy. Mänit hoy miänuu'xta'agyii coö tiägø'øwät.

²⁹ Mänitä craa ja'a tieedy ñämaayy: “Tõeçh miich majiomøjt nja mөөдtuñ. Homiänáajøch miich mmädia'agy tøø nmäbøjcam. Pero cápøch miich mänaa tii tøø xñä'ägä mo'oy, nébiøchä xøø jaduhñ nyagjadóøjät mөөdhøch nmägu'ughajpädøjc-hajxy.

³⁰ Pero xiidsä mhuung tøø miech. Tøø miich mxädø'øñ xñä'a yaghäyø'cä maa ja'a cuhhiñdo'oxiøjcän. Y yø'ø craagøxpä miichä wajhuung ni'xpä tøø myajyagho'ogyii.”

³¹ Mänitä tieedy miänaañ: “Huung, homiänáajøch miich tøø xmiøødhity. Y haagä miich mje'e jaduhñ mädúhñtiøch jii nmөөдä.

³² Pero hawiinmats jaduhñ coö ja'a xøø nyagjajtämät, coö nxoonäacämät, je'eguiøxpä coö yø'ø mhuch tøø miech. Jaduhñ hijty nebiä ho'ogypiän nebiä tågoybän. Pero tøøds jadähooc xyhajuøøyyäm.”

16

¹ Mänitä Jesús ja'a jiamiøød ñämaayy:

—Jaduhñdsä mäyøøjäya'ay hänäjty tu'ug. Mänit hoy yhawáañäxä coö ja'a xiädø'øñ hänäjty yajtúunäxä ja'a mioonsä.

² Mänitä mioonsä miøjyaaxy: “Nej, tøyhajt jaduhñ coøch miich ja'a nxädø'øñ xwyi'i yajtúunäjä. Hoorä, høøch móoyäc mädúhñtiøch miich hijty tøø nya-jcø'ødägø'øy. Cápøch miich nmoonsähadaañnä.”

³ Mänitä craa tiägøøyy tajpä maabiä: “Nébiøch jaduhñ nnä'a jatcø'øwät. Xpiøgáanäbøch ja'a nduung jaduhñ. Cápøch møcmäjaa nmөөдä coøch nyu'uw coøch nbúxät. Tsähdiúnäbøch jaduhñ coøch ndägø'øwät xädø'øñyujwaambä.

⁴ Tøøch nnajuø'øy nébiøch njatcø'øwät, nébiøchä jäya'ayhajxy xtiøjmó'owät, coøch nduung hänäjty tøø xpiøjcä.”

⁵ Mänit tu'ugjaty tu'ugjaty miøjyaaxy pønjaty ja'a wyiindsøn hänäjty mänuu'xyhajp. Mänitä tu'jäya'ay jayøbajt miäyajtøøyy: “Mädúhñtiøch yø'ø nwiindsøn xmiänuu'xiä.”

⁶ Mänit yhadsooyy: “Mägo'xlatä acéitøch nmänuu'xiä.” Mänitä craa miänaañ: “Hádaa nocy jaduhñ mänaamb coö miich mägo'xlatä mmänuu'xyhaty. Chaadsä nocy wiingpä. Huug hädiuundägats coö juxychägui'xmajc-latä mmänuu'xyhaty.”

⁷ Mänitä tu'ug miäyajtøøgombä: “Míichäts, mädühñtiä mnuu'xy.” Mänit yhadsooyy: “Mägo'xquípøhñdyhøchä trigo nmänuu'xyhaty.” Mänitä craa

miänaañ: “Chaadsä nocy wiingpä. Huug hädiuundägats coo mädaaxc-hii'x mmänuu'xyhaty.”

⁸ Manitä mäyøøjäya'ay ja'a mioonsä quiumaayy coo quiuhwijjiä. Maas cuhwijy ja'a Diosmädia'agy hajxy ca'a mabøjpä maa ja'a tiuunghajxiän quejee yø'ø Diosmädia'agy hajxy mabøjpä.

⁹ 'Tsipecøxpä xädø'øñ quiøxa'añ hädaa yaabä naaxwiin. Myajtúnäp hajxy jaduhñ nebiä jäya'ay hajxy jaduhñ xmiägu'ughädät. Coo hänäjty tøø mho'nä, mänitä Dios jim xwyiingpøgät tsajpootyp.

¹⁰ 'Pønä xädø'øñ hoy yajtuumb, hoy jia weeñtiä, coo ja'a xädø'øñ hänäjty miayyä, mänit hoy yajtuungombät. Pero pønä xädø'øñ hoy ca'a yajtuumb coo hänäjty weeñtiä, ni jaduhñ hoy quia'a yajtúnät coo hänäjty miayyä.

¹¹ Jaduhñds je'e, coo mijts ja'a xädø'øñ hoy mga'a yajtúnät hädaa yaabä naaxwiin, caj mijts ja'a Dios xyajcø'ødägø'øwät mädyii jaančh tsoobaadaamb.

¹² Y coo wiingjäya'ay xiädø'øñ hajxy hoy mga'a yajtúnät, cabä hoyhajt ja'a weenhajt hajxy jim mbáadät tsajpootyp.

¹³ 'Coo ja'a moonsä ja'a wyiindsøn metsc miädúnät, ja'a tu'jäyá'ayäbä, je'e miädia'agy hoy quiudiúunäp; ja'a tu'jäyá'ayäbä, cabä miädia'agy miäbøjcät. Jaanä jaduhñduhmbä, coo ja'a xädø'øñ hajxy mwi'i chógät, cabä Dios hajxy hoy mmädúnät.

¹⁴ Jimä fariseoshajxy hänäjty näje'e miämädoona'ay. Jiaančh tehñ piøcjuøøbiä fariseos ja'a xädø'øñ hajxy hänäjty. Mänitä Jesús hajxy ñäxiicy.

¹⁵ Mänitä Jesús miänaañ:

—Mijts, mjaančh tehñ yajcumayaamb hajxy jaduhñ maa ja'a cu'ughagujcän. Pero xñajuøøyyäp ja'a Dios ja'a mwiinmahñdyhajxy. Mädyiijaty ja'a jäya'ayhajxy quiumaaby, je'edsä Dios jaduhñ piejxyp.

¹⁶ 'Ja'a Moisés miädia'agy hijty cudiúunäxäp møødä Diosquexy miädia'agyhajxy. Pero coo ja'a Juan ja'a Diosmädia'agy tiägøøyy yajwa'xpä, nägøxiä jäya'ayhajxy jia wi'i tiägø'øwa'añ maa ja'a Diosmädia'aguiän.

¹⁷ 'Pero cabä Moisés miädia'agy tiägoyya'añ. Maas paquiä ja'a tsajpootyp tiägóyyät møødä naaxwiin quejee ja'a Moisés miädia'agy.

¹⁸ 'Pønä tio'oxiøjc høxmajtsp, tu'udägooby jaduhñ coo wiingto'oxiøjc wyiingpøjnät. Jaanä jaduhñ tiu'udägoobiä pønä to'oxiøjc wiingpøjp ja'a tøø yhøxmächíijäbä.

¹⁹ 'Jaduhñdsä mäyøøjäya'ay hänäjty tu'ug. Jaančh tehñ yajxón ja'a wyit hänäjty miøødhaty. Jabom-jabom ja'a xøø hänäjty yagjadyii jaančh tehñ yajxón.

²⁰ Jimä mähdiøjc hänäjty tu'ug xiøhaty Lázaro. Jaančh tehñ ñähbu'uds jaančh tehñ quiuhbu'udsä Lázaro hänäjty. Jim naxy yhäña'ay naaxwiin maa ja'a mäyøøhäna'c tiøghaawän.

²¹ Je'e ja'a Lázaro hänäjty jia wi'i quiayaamby tijaty jiiby cahb naaxwiin maa ja'a mäyøøjäya'ay mieexän. Høxtä nähwéhyyäxäbä Lázaro piu'uds hänäjty ja'a húcäm.

²² Mänitä Lázaro yho'nä. Mänitä yháañämä yajnøcxäxä tsajpootyp maa ja'a Abraham wyiinduumän. Ja'a Diosmoonsä yajnøcx. Mänitä mäyøøjäya'ay yho'pä. Mänit yajnaaxtägøøyyä.

²³ Mänitä yháañämä yhädaacy møjcu'uhaam. Mänit tiägøøyyä tsaačhtiúunäbä. Mänit chajhee'py. Jimä Abraham ñäheebøøyy møødä Lázaro.

²⁴ Mänit yaaxy: “Abraham, høøch näxúu'tsäc. Høøchä Lázaro yajnäguéjxäc. Weenä quiø'øjøjp yajxoogy wéenhøch ndoots min xyajtøjtsä. Jaančh tehñ chaächpøjpøch yaa jøønjooty.”

²⁵ Mänitä Abraham yhadsooyy: “Huung, jahmiets jaduhñ nej tøø mdsäna'ay nej tøø mhäyoyyän yajxón. Pero Lázaro, jaançh tehñ yhäyoob je'e hijty. Pero coo yaa tøø quioo'nä, jootcuje yhiñä. Míichäts jiiby tsaaçhpójnáp.

²⁶ Y chaads je'ebä, cabä najxtaact maa, coo ja'a Lázaro jiiby yhädá'agät, ni coo miich yaa mbédät.”

²⁷ Mänitä mäyøøjäya'ay miänaañ: “Abraham, tunä mayhajt, huuc quex ja'a Lázaro jim maaçh ndeediän.

²⁸ Mägóoxc-høch nbuhya'ay jim. Weenä Lázaro nøcxy ñäma'ay coo ja'a yhaxøøgcuhdujt hajxy ñajtshixø'owät, neby hajxy yaa min quia'a tsaaçhpójpät.”

²⁹ Mänitä Abraham miänaañ: “Jim hajxy je'e miøødä ja'a Moisés miädia'agy møødä Diosquexy miädia'agyhajxy. Je'e hajxy quiudiúnáp.”

³⁰ Mänitä mäyøøjäya'ay miänaangombä: “Abraham, tøyhajt jaduhñ, pero coo ja'a ho'ogyjiäya'ay jim miédsät maaçh ndeedyhajxiän, mänit mæbøcypiä yhaxøøgcuhdujt hajxy ñajtshixø'owät.”

³¹ Mänitä Abraham yhadsóogombä: “Pø cab hajxy quiudiuna'añ nebiä Moisés jia hanehmian, nebiä Diosquexyhajxy jia hanehmian, nej, je'e hajxy nøcxy ñä'a mæbøquiä coo ja'a ho'ogypiä jia médsädä.”

17

¹ Mänitä Jesús ja'a jiamiøød ñämaayy:

—Tspicøxpä jäya'ay hajxy xjia wi'i yajtu'udägoyya'añ. Pero pøn jaduhñ jatcøøby, haxøøg jiada'añ.

²⁻³ Nägüeentä hajxy mwädität. Coo pøn yø'ø pigäna'c ya-jtu'udägöyyät, haxøøg jaduhñ jiädät. Mejor ñä'ägä mejjwyipø'owóøjät molinopaanyo'xodsø'øy.

'Coo ja'a mbuhya'ay xñägädieeyø'owät, mhójäp jaduhñ. Y coo xñämä'awät coo mmée'xät, mmée'xäp jaduhñ.

⁴ Coo juxtuje-hooc xñägädieeyø'owät tu'xøøbä, y coo juxtuje-hooc xñämä'awät coo quia'a jatcø'øwaanä jaduhñ, mmée'xäp jaduhñ.

⁵ Mänitä Jesús ñämaayyä ja'a jiamiøødhajxy:

—Højtsä mäjaa jaac móoyyæc neby højts maas hoy nmæbógät.

⁶ Mänitä Jesús yhadsooyy:

—Coo mijts häxøpy mmæbøcy hoy jia tu'lii'xiä, coo yø'ø quepychaa hajxy mnämä'awät coo nøcxy ñimiejjwyipø'øyii, xquiudiúunäbä mmädia'agyhajxy jaduhñ.

⁷ Tsøg jaduhñ mänäänäm, coo ja'a mmoonsä tu'ug wyiimbídät camjooty, nej, jaduhñ mnämä'awädä: “Min cay.”

⁸ Caj pues, cab jaduhñ mnämä'awät. Jaduhñ mnämä'awät: “Høøch njøø'xy hädiúunäc, høøch puhbéjtäc maaçh cham ngaya'añ nhu'uga'añän. Mänit miich häyaa høxhaam mgáyät mhú'ugät.”

⁹ Ni mga'a Diosmó'owät coo ja'a mmädia'agy hänäjty tøø xquiudiunä.

¹⁰ Jaanä jaduhñ mijtspä, coo hajxy hänäjty tøø mgudiuñ nebiatiä Dios hänäjty tøø xyhane'emiän, jaduhñä Dios hajxy mnämä'awät: “Cab højts hawiinmats xmió'owät Dioscuju'uyäp. Jaduhyyä højts tøø ngudiuñ neby højts miich tøø xyhane'emiän” —nømä Jesús miänaañ.

¹¹ Tu'uyóhñäbä Jesúshajxy hänäjty. Jerusalén hajxy hänäjty nøcxy. Mänit hajxy jim miejch maa ja'a Samarianaax miøødnibiaadyiiñ ja'a Galileanaax.

¹² Mänit hajxy miejch maa ja'a cajpthuung tu'ugän. Mänitä Jesús jiojcubaadøøyyä ja'a häna'c nämajcpä ja'a haxøøgpu'udsmøødpä. Pero cabä Jesús wiingón tiehm ñämejtsä.

13 Mänit hajxy yaaxy:

—Jesús, Wiindsón, hõjts näxúu'tsäc.

14 Coo ja'a Jesús jaduhñ yhiijxy, mänit miänaañ:

—Nøcx hajxy niyajcähxø'øgøø maa ja'a teedyhajxiän.

Coo hajxy wyiimbijty, mänit hajxy cøjx ñähwa'ačh ja'a piu'uds.

15 Coo hajxy yhiijxy coo hajxy hänäjty tøø ñähwa'ačh, mänit tu'jäya'ay wyiimbijcumbä. Mänit møc yaaxy coo ja'a Dios miøjjä jiaančhä.

16 Mänitä Jesús hoy wyiinijicäda'agy. Høxtä mägujtsädaac naaxwiin. Mänitä Jesús Dyiosmooyy. Samaria ja'a craa hänäjty chooñ.

17 Mänitä Jesús miänaañ:

—Nämajc ndijy hajxy tøø ñähwa'ačh. Maa ja'a jiamiøødhajxy ja'a nädaaxtucpä.

18 Jagooyyä hädaa craa nidiuhñ tøø wyiimbity Diospa'yaaxpä, y Samaria chooñ.

19 Mänitä Jesús ja'a craa ñämaayy:

—Tänaayyø'øg, nøcxnä. Coo tøø mmäbøcy, paadiä mbu'uds tøø cho'ogy.

20 Mänitä fariseos ja'a Jesús hajxy miäyajtøøyy mänaa hänäjty yhabaada'añ coo ja'a Dios ja'a miäjaa hänäjty yajcähxø'øga'añ. Mänitä Jesús yhadsooyy:

—Cab jaduhñ yaghixa'añ mänaa jaduhñ yhabaada'añ.

21 Cab hajxy jaduhñ miäna'ana'añ: “Xiids je'e”, o “Chaads je'e.” Tøø yhabaatnä coo ja'a Dios ja'a miäjaa yajcähxø'øga'añ.

22 Mänitä Jesús ja'a jiamiøød ñämaayy:

—Habaadaamb jaduhñ cooçh mijts xjia wi'i yhiijxtägatsa'añ, høøçh ja'a Diosquexypä; pero cábøch hajxy xyhixa'añ.

23 Mänitä cu'ughajxy miäna'ana'añ cóogøch tyijy tøø ngäda'agy; pero cab hajxy mmäbøgät.

24 Jadúhñhøch ngäda'aga'añ nebiä wädsucän coo xim yam tiägø'øy hajajpä.

25 Pero jaančh tehñ chaächpøgáambøch jayøjp. Cáboch jäya'ayhajxy xmiee'xa'añ ja'a hajxy jäda'ahatypä.

26 Cooçh hänäjty ngädaactägatsa'añ, jaduhñä jäya'ayhajxy hänäjty jiatcø'øwa'añ nebiä jecyjäya'ayhajxy hänäjty jiatcø'øyän mänaa ja'a Noé hänäjty jyijän.

27 Wi'i quiaaby wi'i yhuucp hajxy hänäjty, wi'i piøjp wi'i yhuucp hajxy hänäjty. Mänitä Noé tiägøøyy barcojooty. Mänitä Dios ja'a nøgogomdagoy quiejxy. Cøjx hajxy jaduhñ yho'ogy.

28 Jaduhñ hajxy hänäjty jiatcøøbiä mänaa ja'a Lot hänäjty jyijän. Wi'i quiaaby wi'i yhuucp hajxy hänäjty, wi'i jiuuby wi'i tioo'p hajxy hänäjty, wi'i ñiip hajxy hänäjty, wi'i tiøjcojp hajxy hänäjty.

29 Coo ja'a Lot jim chohñ maa ja'a Sodomacajptootiän, mänitä jøøn tiägøøyy cahbä møødä azufre. Cøjxä jäya'ayhajxy yho'ogy.

30 Jaduhñä jäya'ayhajxy hänäjty jiatcø'øwáangombä cooçh hänäjty ngädaactägatsa'añ, høøçh ja'a Diosquexypä.

31 'Mänitxøø, pøn hänäjty hijp tøjwiing, caj tiøjtägø'øwät coo cøxiä wiinä ya-jpädsømät; jaduhyyä piäyø'øgät. Y pøn hänäjty hijp camjooty, caj wyiimbídät maa ja'a tiøjcän; jaduhyyä tiu'ubøjtøwät.

32 Høxtahmñsä Lot tio'oxiøjc jiajty.

33 Pønä jiugyhajt hädaa yaabä naaxwiin ja wi'i yaghoyø'øwaamb, haxøøgtuum piäda'aga'añii. Pero pønä jiugyhajt nähdugaamb, hodium je'e ñä'ägä nøcxa'añ.

34 'Tøyhajt jaduhñ, mänitcoods, nämetsc hajxy hänäjty mia'awa'añ tu'ugmaabejt. Tu'ug yajnøcxa'añii, tu'ug yajmähmø'øwa'añii.

³⁵ Jaduhnä to'oxiøjc-hajxy hānajtj jīøjtspā nāmetsc. Tu'ug yajnøcxa'añii, tu'ug yajmāhmø'øwa'añii.

³⁶ Jaduhnä ya'adiøjc-hajxy hānajtj nāmetsc tiuumbā camjooty. Tu'ug yajnøcxa'añii, tu'ug yajmāhmø'øwa'añii.

³⁷ Mānitā Jesús miāyajtøøwā:

—Wiindsøn, maa jaduhn jiada'añii.

Mānitā Jesús yhadsooy:

—Tsipcøxp jaduhn jiada'añii nébiøch cham nmādia'aguiän.

18

¹ Mānitā Jesús tiägøøyy yajwiingapxøøbiä coo hajxy tehngajnā Dyiospa'yá'axāt, coo hajxy mānaa quia'a jootmayhādāt, hoyyā Dios quia'a ja tsoj hadsówāt.

² Mānit miānaañ:

—Tsøg hajxy mādíacām. Jaduhnä jäya'ay hijty tu'ug quiuduunghaty. Cabä Dios hānajtj wyiingudsähgø'øy ni ja'a miägajptjäya'ay.

³ Jimä yaamgto'oxy hānajtj tu'ug maa ja'a cajptän. Ja'a miädsip hānajtj jia wi'i ñäxø'øwø'øwaamby. Paady hānajtj jabom-jabom ñøcxy maa ja'a cuduungän neby jaduhn piuhbedøøjät.

⁴ Cabä yaamgto'oxy miādia'agy hānajtj ñä'ägä cudiunāanäxä. Mānitā cuduung tiägøøyy tajpā maabiä: “Cábøch pøn nwiingudsähgø'øy ni ja'a Dios ni ja'a jäya'ay.

⁵ Pero cooçh yø'ø yaamgto'oxy xwyi'i yhadsipy, ngudiunāanäbøçhā miādia'agy jaduhn, nébiøch min xquia'a wi'i yhadsípnāt. Pø caj, jootmá'adäbøch häyaa.”

⁶ —Nømä cuduung miānaañ, ja'a Dios ca'a wiingudsähgøøbiä.

⁷ Jaduhnä Dios ja'a yhuung piuhbedaambä, ja'a hajxy xøømdsuhm pa'yaaxpā.

⁸ Paquiä yhadsowa'añ. Pero høøch ja'a Diosquexypä, cooçh yaa ngädaactägätsāt hädaa yaabä naaxwiin, nej, je'enä ja'a jäya'ay ja'a Diosmādia'agy hajxy hānajtj miäbøcyñäjä.

⁹ Jimä jäya'ayhajxy hānajtj näje'e, wi'i yajcumayaamb hajxy hānajtj. Wyi'i piejxyp wyi'i tiehmby ja'a miägu'ughajpā hajxy hānajtj. Mānitā Jesús miānaañ:

¹⁰ —Tsøg hajxy mādíacām. Jaduhnä jäya'ay metsc ñøcxy tsajtøgooty Diospa'yaaxpā. Tu'ug hānajtj tiuñ fariseo, tu'ug hānajtj tiuñ yajnähjuudiutpā.

¹¹ Ja'a fariseo, täna'a hānajtj Dyiospa'ya'axy: “Haay Dios, Dioscujú'uyäp cooçh nguhtujt quia'a haxøøgä. Cábøch nmeeçh cábøch nboty, cábøçhā to'oxiøjc nmøødä wiingpā. Cábøch jaduhn njatcø'øy nej yø'ø yajnähjuudiutpän.

¹² Hayúujøch naxy nhity metsc-hooc tu'ugpā semana. Nyéjpiøçhā diezmo homiānaajä.”

¹³ Jäguemjuøøbiä yajnähjuudiutpā hānajtj tiāna'ay. Cab hānajtj ñä'ägä tsajheeby. Jaançh tehñ jiootmayhajp hānajtj je'e. Jaduhn hānajtj miāna'añ: “Haay Dios, høøch näxúu'tsäc. Nnajuøøbiøch cooçh ngubojpā cooçh ngugädieeyä.”

¹⁴ Tøyhajt jaduhn, coo ja'a yajnähjuudiutpā wyiimbijnä, tøø ja'a piojpā quiädieey hānajtj yajnähwa'açhíjäm ja'a Diósäm. Pero ja'a fariseo, cab jaduhn yajnähwaatsä. Pøn ja wi'i yajcumayaamb, cabä Dios quiumay. Pero pøn ca'a yajcumayaamb, je'edsä Dios jaduhn quiumaaby.

¹⁵ Mänitä pigäna'c-huunghajxy näje'e wioomejtsä maa ja'a Jesúsän, nebiä Jesús jaduhñ quiunúu'xät. Coö ja'a jiamioødhajxy jaduhñ yhijsy, mänit hajxy tiägøøyy hojpä ja'a pigäna'c-hajxy tøø wioomechíjábä.

¹⁶⁻¹⁷ Mänitä Jesús ñämaayy ja'a jiamioødhajxy:

—Weençh yø'ø pigäna'c-hajxy xñämiñ. Ca'a hajxy mhaducy. Yø'ø pigäna'c-hajxy, chojpä jioothajxy coö ja'a Diosmädia'agy hajxy miäbógät. Cab hajxy yajcumaya'añ. Pøñä jioot jaduhñ tsojp coö ja'a Diosmädia'agy miäbógät, pøñ ca'a yajcumayaamb, je'eds jim nøcxaamb maa ja'a Dioswiin-duumän. Tøyhajt jaduhñ.

¹⁸ Mänitä Jesús miäyajtøøwä ja'a copc-hajpä tu'ug:

—Wiindsøn, mhoyhäna'c miich. Tiiçh ngudiúnäp nébiøch cøjxta'axiøø njugyhádät nebiä Dios jiugyhatiän.

¹⁹ Mänitä Jesús yhadsooyy:

—Tiiçh coö xñäma'ay coöch nhoyhäna'cä. Jagooyyä Dios tu'ug yhooyä.

²⁰ Mjajpy jaduhñ nebiä Dios tøø xyhanéhmäm, tuhmds: “Cabä to'oxiøjc wiingpä mmøødhádät; ca'a mjäya'ay-yagho'ogy; ca'a mmeech; ca'a mhøhnda'agy; mwiingudsähgø'øwäp ja'a mdaj ja'a mdeedy.”

²¹ Mänitä copc-hajpä miänaañ:

—Ngudiúumbiøch jaduhñ. Chúucnøch jaduhñ nmädsøhndaacy ja'a wiin-mahñdy hoybä.

²² Mänitä Jesús miänaañ:

—Jadu'tu'uyyä mga'a yajpedyii. Cøx toog mäduhñtiä mmøødá; mänitä häyoobäya'ay mnä'ä mó'owät. Coö jaduhñ mgudiúnät, mänit jim mdägø'owät tsajpootyp. Hoorä, høøch padu'ubójcäc.

²³ Mänitä craa jiootmabiøjcy, je'eguiøxpä coö hänäjty jiaançh tehñ miäyøøjä.

²⁴ Coö ja'a Jesús yhijsy coö ja'a craa hänäjty tøø jiootmabiøcy, mänit miänaañ:

—Jaançh tehñ chip jaduhñ coö ja'a mäyøøjäya'ayhajxy jim tiägø'owät Dioswiinduum.

²⁵ Maas paquiä ja'a camello ñaxø'owät ja'a xuhñdyjutjooty quejee ja'a mäyøøjäya'ayhajxy jim tiägø'owät Dioswiinduum.

²⁶ Mänitä jäya'ayhajxy miänaañ, ja'a hajxy hänäjty jim mämädoonaabiä:

—Pøñäda'a jim nä'ä tägø'owäp Dioswiinduum.

²⁷ Mänitä Jesús miänáangombä:

—Mädyii ja'a jäya'ayhajxy quia'a jadaamby, Dios mæbøcypä jadaamb.

²⁸ Mänitä Pedro miänaañ:

—Tøøds højts ngøxy najtshixø'øy mäduhñtiä højts hijty nmøødá, neby højts miich hoy nbanøcxät.

²⁹ Mänitä Jesús yhadsooyy:

—Tøyhajt jaduhñ, pøñä tiøjc najtshixø'øwaamb, o ja'a tiaj ja'a tieedy, o ja'a piuhya'ay, o ja'a yhuung ja'a tio'oxy, ja'a Diosmädia'agyquiøxpä,

³⁰ piaadaamby ja'a maas hoybä ja'a maas weenbä hädaa yaabä naaxwiin. Y coö hänäjty tøø yho'nä, mänit hänäjty cøjxta'axiøø jiugyhada'añ nebiä Dios jiugyhatiän.

³¹ Mänitä Jesús ja'a jiamioød hawiing wioonøcxy ja'a nämajmetspä. Mänit miänaañ:

—Yam hajxy nnøcxäm Jerusalén. Jímhøch njada'añ nhabeta'añ nébiøchä Diosquexyhajxy jecy xmiädiaaquiän, høøch ja'a Diosquexypä.

³² Xquiø'ødägø'øwáambøch ja'a teedywiindsøn_hajxy ja'a jäguembäya'ayhajxy. Xñäxi'igáambøch hajxy. Xwyiinwoonáambøch hajxy. Xwyiingutsujø'øwáambøch hajxy.

³³ Xwiobho'ogáambøch hajxy. Mänitøch hajxy xyagho'ogaannä. Y cudägøøgxøøjoch njujypiøga'añ.

³⁴ Cabä Jesús ja'a jiamiøødhajxy hänajty ñä'ägä wiinjuø'øy nebiä Jesús hänajty miädia'agy. Tsip hänajty miädia'agy.

³⁵ Coø ja'a Jesúshajxy hänajty tøø miäwiingoonnä maa ja'a cajpt hänajty xiøhatiän Jericó, jimä wiindspä hänajty tu'ug yhäña'ay tu'haam. Xädø'øñ hänajty yujwaamb_y.

³⁶ Coø miädooyy coø jäya'ay hänajty may wyi'i ñaxy, mänit yajtøøyy tii jájtäp.

³⁷ Mänitä yhawáanäxä coø ja'a Jesús hänajty ñaxy, ja'a Nazaret-tsohm_{bä}.

³⁸ Mänitä wiindspä yaaxy:

—Jesús, miičhä David xyhaphajp xyhoc-hajp. Høøch hii näxúu'tsäc.

³⁹ Ja'a hajxy hänajty jawyiin najxpä, mänit hajxy yhojy coø yhamónät. Pero maas møc jaduh_n jiaac yaaxy:

—Miičhä David xyhaphajp xyhoc-hajp. Høøch hii näxúu'tsäc.

⁴⁰ Mänitä Jesús tiänaaxiøjpy. Mänit miänaañ:

—Yajmets yø'ø wiindspä yaa.

Coø ja'a mähdiøjc yajmejtsä maa ja'a Jesúsän, mänitä Jesús ja'a wiindspä miäyajtøøyy:

⁴¹ —Nébiøch miičh nbuhbédät.

Mänitä mähdiøjc yhadsooyy:

—Wiindsøn, høøch hii yaghijxø'cäc.

⁴² Mänitä Jesús miänaañ:

—Tøø jaduh_n mhijxø'øgy coø tøø mmäbøcy.

⁴³ Mänitiä ja'a wiindspä jiaanč hijxø'cy. Mänitä Jesús piadu'ubøjcy. Mänit tiägøøyy mänaambä coø ja'a Dios miøjjä jiaančhä. Ja'a jäya'ayhajxy jaduh_n híxäbä, jaduh_n hajxy miänaambä nägøxiä coø ja'a Dios miøjjä jiaančhä.

19

¹ Mänitä Jesús quiajptägøøyy Jericó. Mänit ñajxy cajptooty.

² Jimä mäyøøjäya'ay hänajty tu'ug ja'a xøhajpä Zaqueo. Wiindsøn hänajty tiuum_y maa ja'a yajnähjuudiutpähajxiän.

³ Ja'a Zaqueo, jia wi'i yhixaambiä Jesús hänajty, pero cab hänajty hoy yhixa'añ je'leguiøxpä coø hänajty jiaanč teh_m ñaaxypä, møødä jäya'ayhajxy hänajty jiaanč teh_m miayyä.

⁴ Mänit päyø'øguiä ñøcxy maa ja'a Jesús hänajty ñaxø'øwa'añän. Mänit piejty quepyquiøxp, nebiä Jesús jaduh_n hoy yhíxät.

⁵ Coø ja'a Jesús jimä ñajxy, mänit yuughee'py maa ja'a Zaqueo hänajty yhäña'ayän. Mänitä Jesús miänaañ:

—Zaqueo, tsógämäts, mänácäts, mejtsta'agáambøch jimä maa miičh mdøjcän.

⁶ Mänitiä ja'a Zaqueo miänajcy. Mänitä Jesús hoy yajtøjtägø'øy jootcu_j.

⁷ Coø ja'a cu'ug jaduh_n yhi_jxy, mänit hajxy tiägøøyy mänaambä cooc jaduh_n quia'a hoyyä coø ja'a Jesús jimä miejtstä'agät maa ja'a cubojpäya'ay cugädieejäya'ay tiøjcän.

⁸ Mänitä Zaqueo tiänaayyø'cy. Mänitä Jesús ñämaayy:

—Wiindsøn, huuc mädow, mädúhñtiøch nmøødä, cúpc-høchä häyoobäya'ay nnä'a mo'owa'añ. Pønjátyhøch tøø nmämeech høhnda'agymiädia'agyhaam, mädaaxcjadúhñtiøch nyajwiimbida'añ.

⁹ Mänitä Jesús miänaañ:

—Jädá'ajøchä piojpä quiädieeyhajxy nyajnáhwa'adsaanä hädaa tøgootypä, je'eguiøxpä coo yhAbraham yhap yhocä hädaa craabä, hoy jia nä'a yajnáhuudi'uudy.

¹⁰ Páadyhøch yaa tøø ngäda'agy hädaa yaabä naaxwiin, høøch ja'a Diosquexypä, nébiøchä jäya'ay piojpä quiädieeyhajxy jaduhñ nyajnáhwa'adsät. Jadúhñhøch njoot chocy.

¹¹ Mäwiingóonnäbä Jesúshajxy hánajty Jerusalén. Miädóowäbä cu'ugä Jesús miädia'agy hánajty. Jaduhñ hajxy hánajty miäna'añ cooc hánajty tøø yhabaatnä coo ja'a Dios ja'a miäjaa hánajty yajcähxø'øga'añ.

¹² Paadiä Jesús tiägøøyy mädiaacpä:

—Jaduhñä mäyøøhänä'c hánajty tu'ug. Nøcxaamb hánajty jäguemnaax coo hánajty mio'owa'añii mõjtuung maa ja'a yhamdsoo cajptän. Mänit hánajty wyiimbida'añ.

¹³ Coo hánajty tiu'ubøga'añ, mänitä mioonsä ja'a majcpä miøjyaaxy. Mänitä maxiädø'øñ hajxy nägøxiä yajcø'ødägøøyyä. Mänitä mäyøøjäya'ay miänaañ: “Mädúhñtiøch jäguem nhida'añ, myajmayø'owäp hädaa xädø'øñ hajxy.” Mänitä craa tiu'ubøjcy.

¹⁴ Jaanç tehñ xiøøghájtäbä craa jim maa ja'a yhamdsoo cajptän. Mänitä cu'ugä capxy quiejxy coo hajxy hánajty quia'a tsocy coo ja'a craa jim quiopc-hádät maa ja'a quiajpthajxiän.

¹⁵ Coo ja'a craa hánajty tøø tiuungwiingpøjnä, mänit wyiimbijnä maa ja'a quiajptän. Mänitä mioonsä miøjyaaxy ja'a xädø'øñ hajxy hánajty tøø yajcø'ødägø'øyijäbä. Yajtøwaambiä craa hánajty mäduhñjaty hajxy hánajty tøø yajmayø'øy.

¹⁶ Mänit tu'ug miejch. Mänit miänaañ: “Wiindsón, majcjaduhñtiä ja'a mxädø'øñ tøø miayø'øy.”

¹⁷ Mänitä craa yhadsooyy: “Jaanç tehñ yhoy miich tøø mgudiuñ. Wéeñtiøch miich hijty tøø nyajcø'ødägø'øy. Coo hoy tøø mgudiuñ, páadyhøch miich nyajnáhdijy coo mgopc-hádät maa yø'ø majcpä cajptän.”

¹⁸ Mänitä wiingpä miejtpä. Mänit miänaañ: “Wiindsón, mägooxcjaduhñtiä ja'a mxädø'øñ tøø miayø'øy.”

¹⁹ Mänitä craa yhadsóogombä: “Jim miich mgopc-hada'añ maa ja'a mägooxpä cajptän.”

²⁰ Mänitä wiingpä jiaac mejtpä. Mänit miänaañ: “Wiindsón, chaadsä mxädø'øñ. Paayyäjóotyhøch hijty nyaghity.

²¹ Míichhøch hijty ndsähgøøby je'eguiøxpä coo miich mjootmøjjä, coo miich myajpädø'øgy maa hijty tøø mga'a päda'aguiän.”

²² Mänitä mäyøøhänä'c miänaañ: “Caj miich hoy tøø mgudiuñ. Hamdsoo miich mmäna'añ cooch njootmøjjä, cooch nyajpädø'øgy maach hijty tøø nga'a päda'aguiän.

²³ Jímhøch nxädø'øñ häxøpy tøø xpiädaacä maa ja'a bancon, neby jaduhñ cu miayøøyy, mäduhñtiøch hoy jäguem tøø nwädity.”

²⁴ Mänitä craa ja'a jäya'ay ñämaayy ja'a hajxy hánajty jiiby tänaabiä: “Pøjcä yø'ø craa yø'ø xädø'øñ. Mo'ow yø'ø craa ja'a xädø'øñ majcjaduhñtiä tøø yajmayø'øyäbä.”

²⁵ Mänit hajxy yhadsooyy: “Wiindsón, tisän, ximä xädø'øñ may miøødäbä.”

²⁶ Mänitä mäyøøhänä'c yhadsooyy: “Høøch jaduhñ mänaamb; pøñ may møød, maas may mio'owa'añii. Pero pøñ weeñtiä møød, pøgáanäxäp cøxiä mäduhñtiä miøødä.

²⁷ Y ja'a nmädsiphøchhajxy, ja'a høøch hajxy xxiøøghajpä, yajmín hajxy yaa; yagho'og hajxy yaa maach nwiinduumän” —nømä Jesús miänaañ.

28 Mänitä Jesúshajxy tiu'ubójcombä. Jerusalén hajxy hānajty ñøcxy.

29 Mäwiingomb hajxy hānajty maa ja'a cajpt hānajty metsc xiøhatiän Betfagé mөөдä Betania, mäwiingón maa ja'a tun hānajty xiøhatiän Olivos. Mänitä Jesús ja'a jiamiөөд metsc

30 ñāmaayy:

—Nøcxø'øg hajxy jim maa yø'ø cajptän. Jim cajptpa'a ja'a burrohuung hajxy tu'ug mbaada'añ cuxoch. Cahnä pøn ñä'ägä yaghāñaabietyñä.

Mmāguejø'owäp hajxy; mänit hajxy yaa mmäminät.

31 Coø pøn xmiäyajtöwät tii ja'a burro hajxy coø mmāguejø'ø, mänit hajxy mhadsöwät coöch hөөч jaduhñ nmāna'añ.

32 Mänitä burro hajxy hoy jiaanch paady nebiä Jesús hānajty tөө miāna'añ.

33 Jimä burro hajxy hānajty miāguejø'ø, mänit hajxy ñāmaayyā ja'a cubur-rohajxy:

—Tii yø'ø burro hajxy coø mmāguejø'ø.

34 Mänit hajxy yhadsooyy:

—Højts nwiindsón jaduhñ mānaamb.

35 Mänitä burro hajxy yajnøcxy maa ja'a Jesúsän. Mänitä wyit hajxy piādaacy burronähgøxp. Mänitä Jesús hajxy yajpejty burronähgøxp.

36 Mänitä cu'ugä wyit hajxy tiägøøyy najtswidsoöbiä tu'haam maa ja'a Jesús hānajty ñaxø'owa'añ.

37 Olivostunmøjcä tu'u hānajty ñaxø'ø. Coø hajxy miejtsnä maa ja'a wi-inmānacän, mänitä Jesús jiamiөөdhajxy tiägøøyy yaaxpä jojpä je'eguiøxpä coø hajxy hānajty xioonda'agy. Nāmayyā Jesús jiamiөөdhajxy hānajty. Jaduhñ hajxy hānajty ya'axy coø ja'a Dios miøjjä jiaanchä, coø hajxy hānajty tөө yhixy ja'a hoy-yagjuøøñajatypä ja'a Jesús hānajty tөө yajcāhxø'øguiäbä:

38 —Møj jaanch hädaa gobiernä; Diosquexy hädaaduhñ. Møj jaanchä Dios jim tsajpootypä; ween hajxy jim xioonda'agy —nøm hajxy hānajty ya'axy.

39 Jimä fariseoshajxy hānajty naje'e piadāna'ay. Mänitä Jesús hajxy ñāmaayy:

—Wiindsón, mhøjäp yø'ø mjamiөөdhajxy.

40 Mänitä Jesús yhadsooyy:

—Hóyhøch yø'ø hāna'c cu nja hoj, cab hāna'c häyaa ñä'a hamóombät; maas møc hajxy ñä'ägä yä'axät.

41 Coø ja'a Jesús hānajty jim miedsaannä Jerusalén, coø jaduhñ ñāheebøøyy, mänit tiägøøyy jøöbiä.

42 Mänit miānaañ:

—Yø'ø Jerusalēnpäya'ayhajxy, coöch hajxy cu xchojcy, jootcuyc hajxy häxøpy yhity. Tөө yhabaady coø ja'a cu'ughajxy cu jiootcugøøyy. Pero cab hajxy wyiinjuø'owa'añ. Cábøch hajxy xchoga'añ xmiee'xa'añ.

43 Haxøøg hajxy jiada'añ yhabeta'añ. Medsaambä miädsiphajxy. Mänit hajxy jiuhguraajø'owa'añii piquiä.

44 Cab hajxy yajmājāda'aga'añii. Yagho'ogāanäp hajxy jaduhñ. Mänitä quiajpthajxy quihdägoyya'añ. Paady hajxy jaduhñ jiada'añ yhabeta'añ coöch hajxy jaduhñ xquia'a tsoga'añ.

45 Coø ja'a Jesús miejch cajptooty, mänit tiägøøyy tsajtøgooty. Mänit tiägøøyy høxquejxpädsøömbä pønjaty jiiby juuby too'p.

46 Mänit miānaañ:

—Jim jaduhñ myiñ cujaay maa ja'a Diosmädia'aguiän: “Jue'eçh ndøjc hajxy xwiāanät coöch hajxy jiiby xpia'yä'axät.” Ja'a Dios jaduhñ mānaañ. Pero mijts, jaduhñ hajxy mwa'añ meedsøhñdy.

⁴⁷ Najxpäxøø ja'a Jesús hānajtj jiiiby yajnāhixø'øý tsajtøgooty. Pero ja'a teedywiindsøn

⁴⁸ Pero cab hajxy hānajtj ñajuø'øý neby hajxy jiatcø'øwät je'eguiøxpä coo ja'a cu'ug ja'a Jesús miādia'agy hajxy hānajtj jiaanč tehñ miāmādoonaayyā.

20

¹ Jiiibiä Jesús ja'a cu'ug ja'a Diosmādia'agy hānajtj yajnāhixø'øý tsajtøgooty, mänitā Jesús ñāmejtsä ja'a teedywiindsøn

² Mānit hajxy miānaañ:

—Pønā cuhdujt tøø xmio'oy coo ja'a cu'ug tøø mhøxquejxpädsømy tsajtøgooty, y coo tøø mdägø'øý yajnāhixøøbiā.

³ Mānitā Jesús miānaañ:

—Chaads mijts nmāyajtøwaambä. Mhadsówäp hajxy jaduhñ:

⁴ Coo ja'a Juan hijty wiädity mājajnābejpä, pøn jaduhñ quejx, Dios tøgä jäya'ayä.

Cab hajxy ñä'ä hadsooyy.

⁵ Mānit hajxy tiägøøyy yajcapxiøøbiä:

—Neby hajxy nnä'ä hadsówämät; coo hajxy nmānāanämät coo ja'a Dios quiejxy, mänit yhadsowa'añ: “Tii hajxy coo mga'a mabøjcä.”

⁶ Y coo hajxy nmānāanämät coo jäya'ay quiejxy, mänitā cu'ug hajxy xquiuhgä'tsämät. Hix, haagä mānaamb hajxy jaduhñ coo ja'a Juan tøø quiexylijäm ja'a Dios.

⁷ Mānit hajxy yhadsooyy coo hajxy quia'a najuø'øý pønā Juan quejx mājajnābejpä.

⁸ Mānitā Jesús miānaañ:

—Ni høøch nga'a nägapxa'añ pøn

⁹ Mānitā Jesús ja'a cu'ug tiägøøyy møødmādiaacpä:

—Jaduhñä jäya'ay tsaatypcam piädaacy maa ja'a ñaaxän. Mānit yhadoo'tujcy. Mānit tiu'ubøjcy. Jäguem ñøcxy. Jegaamb hānajtj jim.

¹⁰ Coo ja'a tsaatryptuc yhabaaty, mänitā mioonsä tu'ug quiejxy coo ja'a tsaatypcam piuhmo'owøøjät. Mānitā mioonsä quioxhó'cäxä. Caj tii ya-jmäwiimbijtä.

¹¹ Mānitā mioonsä tu'ug quiejxcumbä. Jaduhñä mähdiøjc quioxhó'cägombä. Haxøøgjaty jaduhñ ñāmaayyā. Ni je'e tii quia'a mooyyā.

¹² Mānitā wiingpä jiaac quējxcombä. Nähdsäbit cuhdsäbit ja'a mähdiøjc piädäacänä.

¹³ Mānitā cudsaatypcam miānaañnā: “Nébiøch nnä'ä jiatcø'øwät. Tøøch cham nnajuø'øý. Hädaa nhúunghøch, njaanč tehñ chópiøch njaanč tehñ pia'häyóobiøch hädaa. Nhuuc quéxyhøch hädaa. Coo yhøxcabøøjät, wehñdä wyiingudsähgø'owøøjät.” Mānitā yhuung quiejxy.

¹⁴ Coo yhøxcajpä, mänit hajxy tiägøøyy ñiñāmāayyābä, ja'a tsaatypcam hajxy hānajtj hajoodiujpä: “Ja'a cudsaatypcam yhuung yø'ø. Coo yø'ø tieedy jaduhñ yhó'ogät, yø'ø mähmø'øwaamb cudsaatypcam. Tsøg hajxy yaghó'cäm neby hajxy jaduhñ nmāmähmøøyyämät.”

¹⁵ Mānitā cudsaatypcam yhuung yhøxwijspädsøømäxä. Mānit hajxy yagho'cy.

Mānitā Jesús yajtøøyy:

—Nebiä cudsaatypcam jiatcø'øwa'añ coo yhuung yaghó'cäxä.

16 Nøcxaamb yagho'tägatsa'añ ja'a yhuung tøø yaghó'cäxäbä. Mänitä wi-
inghäna'c ja'a tsaatypcam yaghajoodiuga'añ.

Coo ja'a cu'ughajxy jaduhñ miädooyy, mänit hajxy miänaañ:

—Ni ja'a Dios jaduhñ quia'a mäná'anät.

17 Mänitä Jesús ja'a cu'ug wyiinhee'ppejty. Mänit miänaañ:

—Nej mijts ja'a Diosmädia'agy myajmädia'agytiägø'ø coo miäna'añ:

Ja'a tsaa mädyi ja'a tøjcojpä hajxy quia'a nä'ägä cumaayy,

je'e nä'ägä tuundsohñ.

(Jesús hamdsoo niñänøømä nebiä tsaajän je'eguiøxpä coo hänajty quia'a tsocy
quia'a mee'xyijäm ja'a cu'ug. Pero mo'owäänäbä Jesús hänajty møjtuung.)

18 Mänitä Jesús miänáangumbä:

—Pøn jaduhñ cá'awäp yø'ø tsaanähgøxp, tågóyyäp jaduhñ. Y coo pøn
ñähgahbedøjät yø'ø tsaa, tågóyyäp je'ebä.

19 Mänitiä ja'a Jesús jia madsaana ja'a teedywiindsøñhajxy møødä
ley-yajnähixøøbiähajxy. Ñajuøøby hajxy hänajty coo hajxy hänajty tøø
miädia'agyii. Pero cabä Jesús ñä'ä majtsä je'eguiøxpä coo ja'a cu'ug hänajty
chähgø'øyiijäm ja'a teedywiindsøñhajxy.

20 Mänitä häna'c hajxy yajnähdijy coo hajxy ñibiäda'agøjät nebiä
hoyhäna'cän. Nøcxäp hajxy miädoy nebiaty ja'a Jesús hänajty miädia'aga'añ.
Coo ja'a Jesús quiapxtägóyyät, mänit hajxy ñäxø'øwø'øwa'añ maa ja'a
governadorän.

21 Mänitä Jesús hajxy miäyajtøoyy:

—Wiindsøn, nnajuøøby højts coo miichä tøyhajt myajnähixø'ø ja'a
Diosmädia'agy. Hopiønä miich mmøødmädia'agy; y caj miich pøn
mmøjpäda'agy, hoy pøn møjtuung jia møødä.

22 Højtsä tøyhajt móoyyác. Coo højtsä gobiernä hänajty xyagjuy xya-
jmo'ona'añ, nej, hoyyäda'a jaduhñ coo højts njúyädä.

23 Pero ñajuøøbiä Jesús hänajty coo hänajty jia yajcapxtägoyya'añii. Mänit
miänaañ:

—Tiich hajxy coo xjia wi'i jøjcapxø'øwa'añ.

24 Høøchä xädø'øn tu'ug yaghíxác. Pøn yhajahñaxy yø'øduhñ, pøn xiøø
yø'øduhñ.

Mänit hajxy yhadsooyy:

—Ja'a gobiernä.

25 Mänitä Jesús miänáangombä:

—Pues, mmó'owäp ja'a gobiernä hajxy tijaty yø'ø jie'ehajpy. Y mmó'owäbä
Dios hajxy tijaty yø'ø jie'ehajpy.

26 Cabä Jesús hajxy hänajty hoy yajcapxtägoyya'añ cu'ughagujc. Yagjuøøyy
hajxy jaduhñ coo hoy yhadsooyy. Y cab hajxy waamb miänaañnä.

27 Mänitä Jesús ñämejtsä ja'a saduceoshajxy näje'e, ja'a hajxy jaduhñ
mänaambä cooc tyijy ni pøn quia'a jujypiøga'añ. Mänitä Jesús hajxy ñämaayy:

28 —Wiindsøn, jaduhñsä Moisés jecy quiujahy, cooc ja'a ya'adiøjc hänajty
tu'ug tøø yho'ogy, y cooc ja'a yaamgto'oxy ja'a huung quia'a møødä,
mänitägä quiapy wyiingpógät, nébiägä yhuung jaduhñ miähmó'owät ja'a
piuhya'aguiøxpä.

29 Jaduhñä häna'c-hajxy hänajty, näjuxtujc tu'que'ex. Ja'a craa møjpä, mänit
jia pøjcy. Mänit yho'cy. Nitu'ugtä yhuung quia'a mähmøøyy.

30 Mänitä jødsoomy ja'a yaamgto'oxy jia wiingpójcombä. Mänit je'e
yhó'combä. Nitu'ugtä yhuung quia'a mähmøøbiä.

³¹ Mänitā yaamgto'oxy ja'a quiapy jia wiingpøjcombä jatu'ug. Jaanä jaduhñ yho'combä. Nägøxiä ja'a yaamgto'oxy ja'a quiapy jia mөөдtsänaayy ja'a näjuxtupä; cøjx hajxy yho'ogy, y ni pøn yhuung quia'a mähmөөyy.

³² Mänitā yaamgto'oxy jiaag ho'pä.

³³ Hoorä, coo hajxy hānajtý tөө jiuypiojnä, pønä to'oxiojc tøyhajt mөөдtsäna'awaamb ja'a näjuxtupä, jim tsajpootyp.

³⁴ Mänitā Jesús yhadsooyy:

—Hādaa yaabä naaxwiin, pøjp huucp ja'a jäya'ayhajxy yaa.

³⁵ Pero pønjatý juiypioğaamb, pønjatý nөcxaamb tsajpootyp, cab hajxy jim piogaannä yhu'ugaannä.

³⁶ Cab hajxy mänāa yho'tägatsaannä. Coo hajxy hānajtý tөө jiuypiojnä, jaduhñ hajxy miähmө'owaannä nebiä Dioshuungän, nebiä Diosmoonsän.

³⁷ Hamdsoo ja'a Moisés hajxy xyajñähixөөyyām coo ja'a ho'ogyjiäya'ayhajxy jiuypioğa'āñ, jiiby maa jaduhñ myiñän coo ja'a hujtshuung hānajtý tiöy tu'ug. Jaduhñ jiiby myiimbä coo ja'a Dios wyiingudsähgө'öyijäm ja'a Abraham mөөдä Isaac mөөдä Jacob.

³⁸ Cabä Dios wyiingudsähgө'öyijäm ja'a ho'ogypiähajxy. Ja'a jujcyjiäya'ayhajxy, je'eds hajxy jaduhñ wiingudsähgөby ja'a Dios.

³⁹ Mänitā ley-yajñähixөbiähajxy näje'e miānaañ:

—Wiindsón, yajxon miičh jaduhñ mmädia'agy.

⁴⁰ Cabä Jesús hajxy waamb ñāmaañä je'eguiөxpä coo hajxy hānajtý chähgөñä.

⁴¹ Mänitā Jesús miānaañ:

—Tii hajxy coo mmāna'āñ cooc ja'a David yhuunghaty ja'a Diosquexy.

⁴² Hamdsoo ja'a David miānaañ maa ja'a Salmos quiujahyyän:

Mänitөchä Dios ja'a nwiindsón xñāmaayyā:

“Yaads min hāña'aw nhahooguiө'ohāampiөch,

⁴³ hөxtä cóonөchä mmädsip tөө nga'a yajmājädäacām.”

⁴⁴ Coo ja'a David ja'a Diosquexy hamdsoo ñāmaayy “wiindsón”, nébiäts jaduhñ ñä'a huunghädät.

⁴⁵ Jimä cu'ughajxy hānajtý nägøxiä miāmädoona'ay, mänitā Jesús ñāmaayy ja'a jiamioөdhajxy:

⁴⁶ —Ca'a yө'ө ley-yajñähixөbiä miädia'agy hajxy mmäbөjcä. Yoñwitmөөд hajxy wyi'i wiädity je'eguiөxpä coo hajxy wyl'i yajcumaya'āñ. Jaduhñä jioothajxy jia tsocy coo hajxy jim wyiingudsähgө'өwөjät halaplaaz. Jiiby hajxy yhäña'awa'āñ maa ja'a hāñaabiejt yajxonjatypän jiiby tsajtөгooty, chaads jim maa ja'a xөө jiadyiijän.

⁴⁷ Y piöjcäbä yaamgto'oxy ja'a tiөjc hajxy. Wi'i yajcumayaamb hajxy, paady hajxy wyl'i Dyiospa'ya'axy jejcyjiaty. Hanaxiä hajxy chaačhtiuna'āñii.

21

¹ Tsajtөгootiä Jesús hānajtý, mänitā mäyөөjāya'ay yhijsy coo xädө'өн hajxy hānajtý quiuyoxө'öy.

² Mänitā yaamgto'oxy tu'ug yhijsy ja'a jaanč tehñ yhäyoobä. Jagooyyä xädө'өнhuung hānajtý miөөдä metsc. Je'eduhñ cøjx yecy.

³ Mänitā Jesús miānaañ:

—Tөyhajt jaduhñ, maas may hādaa yaamgto'oxy häyoobä ja'a xädө'өн tөө quiuyoxө'öy quejee yө'ө mäyөөjāya'ayhajxy.

⁴ Yө'ө mäyөөjāya'ayhajxy, je'e hajxy quiuyoxөөyy mäduhñtiä hajxy tөө yajcunaxy. Pero hādaa yaamgto'oxy, je'e cøjx quiuyoxө'öy mäduhñtiä hijty ñägaya'āñ.

⁵ Jiibiä jäya'ayhajxy hānajty nāje'e tsajtøgooty. Jaduhñ hajxy hānajty miādia'agy coo ja'a tsaa jiaañch tehñ yajxonjatiä, coo hajxy tøgooty yajxon jiaañch tehñ yhixy nebiatiä jäya'ayhajxy hānajty tøø piäda'aguiän. Mānitä Jesús miānaañ:

⁶ —Habaadaamb jaduhñ coo hädaa tsajtøjc jyida'añ cøxiä.

⁷ Mānitä Jesús ñāmaayyā:

—Wiindsøn, mānaa jaduhñ jiada'añii. Tii hijxtahñd jaduhñ naxaamb coo hānajty tøø yhabaatnä.

⁸ Mānitä Jesús yhadsooyy:

—Mniyajcopcø'øwøjöp hajxy, cab hajxy myajwiinhøønät. Nāmay hajxy wiādita'añ. Jaduhñ hajxy miāna'ana'añ: “Høøchä Dios tøø xquiexy”, y “Tøø yhabaatnä.” Pero cab hajxy mmäbøgät.

⁹ Coo hajxy jaduhñ mmädoyhädät coo tsip piädø'øga'añ, cab hajxy mdsähgø'øwät. Jayøjpä tsip jiada'añii, cahnä hānajty yhabaadyñä.

¹⁰ Mānitä Jesús jiaac mānaañ:

—Nimiädsibø'øwāanäbä wiingcajptjaty.

¹¹ Møc hujx jiādita'añ. Jadāanäbä yuuxøø møødä pa'am wiinduhmyhagajpt. Y jimä høchähgøøñäjatypä quiähxø'øga'añ tsajtwiing.

¹² 'Pero cahnä hānajty yhabaadyñä, xmiadsaamb mijts ja'a jäya'ayhajxy. Xyajnøcxaamb hajxy maa ja'a tsajtøjcän. Jiiby hajxy xñäxø'øwø'øwa'añ. Xchumaamb hajxy jaduhñ. Xyajnøcxaamb hajxy maa ja'a gobiernäwiinduumhajxiän. Ja'a høøchcøxpä hajxy xchaaçhtiuna'añ.

¹³ Coo hajxy jaduhñ mjädät mhabétät, mānitøch hajxy xmiädiä'agät.

¹⁴ Wiinjuø'øw hajxy jaduhñ. Cab hajxy jäguemiä mwiinmahñdyhädät waambaty hajxy mhadsówät.

¹⁵ Høøch mijts nbuhbedaambby. Nmo'owāambiøch mijts ja'a wiinmahñdy nebiä mmädsip hajxy mga'a yajmäjäda'agät.

¹⁶ Høxtä xñähdugaambä mdeedy hajxy møødä mbuhya'ayhajxy møødä mjujy mmägu'ughajxy møødä mmägu'ughajpähajxy. Nāje'eyyām mijts häna'c xyagho'øga'añ.

¹⁷ Nægøxiä hajxy xxiøøghada'añ maa ja'a høøchcøxpän.

¹⁸ Hoy hajxy cøxypänejpä cu mja jat cu mja habet, tsipcøxp hajxy hodium mnøcxa'añ.

¹⁹ Coo hajxy hamuumdu'joot mmee'xtúgät, mdägø'øwäp hajxy jim tsajpootyp.

²⁰ 'Coo hajxy mhíxät coo ja'a Jerusaléncajpt hānajty tøø jiuhibigø'øyíjäm ja'a miädsip, mānit hajxy mnajuø'øwät coo hānajty tøø yhabaatnä coo Jerusalén quiuhdägoyya'añ.

²¹ Pønjaty hānajty yaa hijp Judeanaaxooty, tsipcøxp hajxy piäyø'øgät, nøcxäp hajxy jim maa ja'a tunän. Pønjaty hānajty yaa hijp Jerusaléncajptooty, tsipcøxp hajxy yaa chøonät. Pønjaty hānajty hijp camjooty, cab hajxy ñøcxtägätsät quiajptootyhajxy.

²² Jaanç tehñ chaaçhpøgaambä jäya'ayhajxy nægø'ø nädecypiä. Jadāanäp jaduhñ nebiaty jiiby myiñän cujaay maa ja'a Diosmädia'aguiän coo jiada'añii.

²³ Jaanç tehñ chaaçhpøgaambä to'oxiøjc-hajxy hānajty, ja'a hajxy hānajty moxtsa'amhajpä, ja'a hajxy hānajty maaxhuungmøødpä. Hoyhoyyā jäya'ayhajxy yaa chaaçhpøga'añ hädaa yaabä naaxwiin. Jaanç tehñ yajcumädowāanäp hajxy jaduhñ.

²⁴ Nāje'e hajxy yho'øga'añ coo ja'a tsip jiada'añii. Nāje'e hajxy miadsa'añii. Mānit hajxy yajnøcxa'añii wiinduhmyhagajpt. Minaambä jäguemjäya'ay ja'a

Jerusaléncajpt hajxy yajma'ada'añ, høxtä coonä yhabétät coo ja'a cuhdujt hajxy piójcäxät coo hajxy jaduhñ quia'a jatcøøñät.

²⁵ 'Cähxø'øgaambä hijxtahnd maa ja'a xøøjän, maa ja'a po'ojän, maa ja'a madsa'ajän. Pädø'øgaambä mejy; jäditaamb jaduhñ. Paadiä cu'ughajxy chähgø'øwa'añ wiinduhmyhagajpt.

²⁶ Wiinmahñtiägoyyaambä jäya'ayhajxy coo hočhähgøøñä yaa jiada'añii hädaa yaabä naaxwiin. Tsäyuyyaambä xøø chaadsä po'o chaadsä madsa'a.

²⁷ Mänitøch ngädaactägatsa'añ joc-hagujc, høøch ja'a Diosquexypä. Hajájábøch ngäda'aga'añ mäjaaamøød. Xyhixáambøchä jäya'ayhajxy.

²⁸ Coo jaduhñ jiadøøjät, mänit hajxy mjootcugø'øwät. Mänit hajxy mbädsøma'añ hawa'adstuum.

²⁹ Mänitä Jesús miänáangombä:

—Høxtahmdsä quepychaa,

³⁰ coo hajxy mhixy coo wiamy, mnajuøøby hajxy coo piodtägøøñä.

³¹ Jaduhñ mäwínäts je'e coo ja'a hijxtahnd hajxy mhijxtsøonät, mna-juø'øwäp hajxy jaduhñ coo yhabaatnä coo Dios ja'a miäjaa yajcähxø'øga'añ.

³² 'Coo jaduhñ yhabaadät nébiøch cham nmädia'aguiän, cahnä jäya'ayhajxy hänajty quiøxy ho'ogyñä ja'a hajxy jäda'ahatypä. Tøyhajt jaduhñ.

³³ Tägoyyaambä tsajtwiing møødä naaxwiin, pero tøjiadaamb nébiøch cham nmädia'aguiän.

³⁴⁻³⁵ 'Mniyajcopcø'øwøøjäp hajxy. Cab hajxy mnajuø'øy mänáajøch ngädaactägatsa'añ. Paady hajxy hoy mhídät. Cab hajxy mhu'ug cab hajxy mjøø'xät. Cab hajxy tii mhadsógät hädaa yaabä naaxwiin. Pønjaty jaduhñ ca'a cudiumb, haxøøg hajxy jiada'añ yhabeta'añ, høxtä hoy hajxy maa cu jia tsäna'aw.

³⁶ Nähix hahixø'ø hajxy mhídät. Homiänaajä hajxy mDiospa'yá'axät neby hajxy haxøøg mga'a jat mga'a habétät, nébiøch hajxy hoy xwyiin-gudsähgø'øwät, høøch ja'a Diosquexypä.

³⁷ Xøømbaadiä Jesús hänajty yajnähixø'øy tsajtøgooty. Coodspaady hänajty wiädity maa ja'a tun xiøhatiän Olivos.

³⁸ Jopyñä ja'a jäya'ayhajxy hänajty quiøxy hamugø'øy tsajtøgooty coo ja'a Jesús miädia'agy hajxy hänajty wyi'i yhamädoowhidaañä.

22

¹ Tøø ja'a pascuaxøø hänajty miäwiingoonnä mänaa ja'a tsajcaagy hajxy hänajty quiayyän ja'a cajpä tsooy miøødäbä.

² Jia wi'i xyiictaacy py jia wyi'i miädiaactaacy py ja'a teedywiindsøn hajxy hänajty møødä ley-yajnähixøøbiähajxy nebiä Jesús hajxy yaghó'ogät. Pero chähgøøbiä cu'ug hajxy hänajty.

³ Mänitä Judas Iscariote ja'a Satanás jioottägøøyy quioptägøøyyä. Jesús jiamioød hänajty je'e tu'ug maa ja'a nämajmetspän.

⁴ Mänitä Judas ja'a teedywiindsøn hoy miøødmädia'agy møødä møjhappä hajxy maa ja'a tsajtøjcän. Je'e yajmøødmädiaac nebiä Jesús yajcø'ødägø'øwät.

⁵ Mänitä teedywiindsøn hajxy xioondaacy. Mänitä Judas hajxy ñämaayy coo xädø'øñ hajxy mio'owa'añ.

⁶ Mänitä Judas ñähadsooyy. Mänit tiägøøyy wiinmahñdyhappä nebiä Jesús yajcø'ødägø'øwa'añ, mänaa ja'a cu'ughajxy hänajty quia'a jaty mayyän.

⁷ Mänitä pascuaxøø yhabaatnä mänaa ja'a tsajcaagy hajxy quiayyän, ja'a cajpä tsooy miøødäbä. Yojxypä meeghuung hajxy hänajty ja'a pascuaxøøjooty.

⁸ Mänitä Jesús ñämaayy ja'a Pedro møødä Juan:

—Nøcx ja'a tsuugay hajxy yaghoyø'ow. Tøø yhabaady coo hajxy ndsuu-gayáanäm ja'a pascuaxøøgøxpä.

⁹ Mänitä Jesús hajxy miäyajtøøyy:

—Maa højts nyaghoyø'owät.

¹⁰ Mänitä Jesús yhadsooyy:

—Coo hajxy mgajptägø'owät, mbaadaambiä jäya'ay hajxy tu'ug majtcón. Mbanøcxäp hajxy maa tiøjtägø'owa'añän.

¹¹ Mänitä cudøjc hajxy mnämä'awät: “Højts nWiindsón tøø xquiexy coo højts miich nmäyajtøwät maa hawa'adspä jii maa højts ndsuugáyät ja'a pascuaxøøgøxpä.”

¹² Mänitä hawa'adspä hajxy xmio'owa'añ cruundä jim cøxp. Tøø hajxy hānajty hoy yajxón yaghoyø'oy. Jimä tsuugay hajxy myaghoyø'owät.

¹³ Mänit hajxy hoy piaady nebiatiä Jesús hānajty tøø miāna'añän. Mänitä tsuugay hajxy yaghoyøøyy ja'a pascuaxøøgøxpä.

¹⁴ Coo yhabaatnä, mänitä Jesús hajxy yhäñaaguiädaacy meexäwiinduum møødä jiamioødhajxy.

¹⁵ Mänitä Jesús miānaañ:

—Cooch nho'ogaanä, jootcújc-høch nnijiäwø'oyii cooch mijts nmøødsuugaya'añ ja'a pascuaxøøgøxpä.

¹⁶ Cábøch mijts nmøødsuugaadiägatsa'añ høxtä coonä yhabáadät mānaa ja'a Dios ja'a miājaa yajcāhxø'oga'añän. Tøyhajt jaduhñ.

¹⁷ Mänitä Jesús ja'a vaso tu'ug quionø'cy vinomøød. Mänitä Dioscujú'uyäp yejcy. Mänit miānaañ:

—Huucmuc hajxy hädaa nägøxiä.

¹⁸ Cábøchä vino nhuuctägatsa'añ høxtä coonä yhabáadät coo ja'a Dios ja'a miājaa yajcāhxø'oga'añ.

¹⁹ Mänitä Jesús tsajcaagy quionø'cy. Mänitä Dioscujú'uyäp yéjcombä. Mänitä tsajcaagy qyijwa'xy. Mänitä jiamioød miooyy. Mänit miānaañ:

—Høøch nni'x ngopc hädaa. Ja'a mijts cøxpøch nniñähduga'añii cooch mijts nnähho'tu'uda'añ. Naaghóoc-høch mijts xjiahmiejsta'agy, jaduhñä tsajcaagy hajxy mgáyät.

Coo hajxy quiaabiädøøyy, mänitä Jesús ja'a vaso quionø'cy, ja'a hānajty vinomøødpä. Mänit miānaañ:

²⁰ —Hädaa vino, hijxtahñd jaduhñ miähmø'owa'añ nébiøch nnø'ty nyaghäyowa'añän cooch mijts nnähho'tu'uda'añ.

²¹ 'Pero ja'a craa xyegáambøchä, yaaçh jaduhñ xmiøødhäña'ay maa hädaa meexän.

²² Tsipcøxpøch nho'oga'añ nébiøchä Dios tøø xyajnähdijjiän, høøch ja'a Diosquexypä. Pero ja'a craa xyegaambä, maas haxøøg jiada'añ yhabeta'añ.

²³ Mänitä Jesús jiamioødhajxy tiägøøyy nimiäyajtøwäbä hamiñ haxøpy pønä Jesús yegaamb.

²⁴ Mänit hajxy tiägøøyy yajcapxiøøbiä pøn møjtuung mo'owáanäp.

²⁵ Mänitä Jesús miānaañ:

—Hädaa hajxy yaa gobiernähajpä hädaa yaabä naaxwiin, nä'a hanehmb hajxy. Tsipcøxpä cu'ughajxy quiudiuñ neby hajxy yhane'emyiijän.

²⁶ Pero mijts, cab hajxy mnibiäda'agøøjät nebiä gobiernän. Pøn møjtuung møød maa mijtsän, ween ñibiäda'agyii nebiä tuung møj ca'a møødpän. Pøn hanehmb maa mijtsän, ween ñibiäda'agyii nebiä moonsän.

²⁷ Pøn møjtuung møød, ja'a craa caabiä, tøgä craa mäyajcaabiä. Ja'a craa caabiä, je'eds møjtuung møød. Pero høøch mijts nyajcaaby, hóyhøch møjtuung nja møødä.

28 'Tøøch mijts xmiøødyo'oy xmiøødnaxy tsip xex.

29 Páadyhøch mijts møjtuung nmo'owa'añ, nébiøch nDeedy tøø xmio'oyän,

30 neby hajxy jim mgay mhú'ugät maaçh nmeexäwiinduumän maaçh ngo-biernähada'añän, nebiä hoyhãñaabiejt hajxy myaghãña'awø'øwät mänaa ja'a judíos hajxy mhane'ema'añän, ja'a nämajmetsc-hagajtpä.

31 Mänitä Jesús ja'a Pedro ñämaayy:

—Simón, Simón, mniyajcopcø'øwøøjäp. Tøøchä Satanás cuhdujt xjia mäyujwa'añ coo mijts xyajtu'udägóyyät.

32 Pero tøøchä Dios nmänuu'xta'agy ja'a miichcøxpä nébiøch miich nmädia'agy homiänaajä xmiäbøjcät. Coö miich hänäjty tøø mwiinmahñdymejtsnä, mjoodcapxmøcpøgäp ja'a mjamiøødtøjc neby hajxy jaduhñ quia'a tu'udägóyyät.

33 Mänitä Pedro ja'a Jesús ñämaayy:

—Homiäajøch miich nbanøcxät, hoy jia pujxtøgootiä. Høxtä näguipxy jaduhñ nmøødhó'ogät.

34 Mänitä Jesús miänaañ:

—Pedro, chamñ nnäma'ay, cahnä tseey hänäjty ya'axyñä, tøø miich hänäjty tægøøghooc mnijijøgapxyii coöch tyijy xquia'a hixiä.

35 Mänitä Jesús miäyajtøøyy ja'a jiamioødhajxy:

—Cooch mijts nguejxy Diosmädia'agy-yajwa'xpä, mänitøch mijts nnämaayy coö hajxy tii mga'a wáhátät, ni xuummy, ni xädø'øñhidøhñdy, ni cø'øg. Y tii hajxy myajmaajiajt.

Mänit hajxy yhadsooyy:

—Ni tii.

36 Mänitä Jesús miänaañ:

—Pero chaaçh nmänaañnä coö xuummy hajxy mwähátät møødä xädø'øñhidøhñdy. Pøñ espada ca'a møød, weenä wyit tioogy nebiä espada jiúyät.

37 Tsipcøxp tiøjiada'añ neby jim myiñän cujaay maa ja'a Diosmädia'aguiän ja'a høøhcøxpä: “Ca'awiindøyhäna'c jaduhñ tyijjä.” Cøxiä jaduhñ tiøjiada'añ neby jim myiñän cujaay ja'a høøhcøxpä.

38 Mänit hajxy miänaañ:

—Chaa højts espada metsc nmøødä.

Mänitä Jesús yhadsooyy:

—Mädøyyä jaduhñ.

39 Mänitä Jesús tiu'ubøjcy. Mänit ñøcxy maa ja'a Olivostunän neby hänäjty ñä'ägä cuhdujthatiän. Quipxiä jiamioødhajxy pianøcxy.

40 Coö hajxy jim miejch, mänitä Jesús miänaañ:

—Tsøgä Dios hajxy pa'yáaxäm; jaduhñ hajxy mga'a tu'udägóyyät.

41 Mänitä Jesús ñøcxy jäguemjuøøby nidiuhñ Diospa'yaaxpä. Mänit jyi-jcädaacy.

42 Mänit miänaañ:

—Teedy, coö miich jaduhñ mmäná'anät, cábøch hädaa tsaachpä peenä nmänáxät. Pero ca'a yhøøch nguhtuñtä nyaghidaamby; miich mguhdujt hidaamb.

43 Mänitä Diosmoonsä tu'ug ñäguehxtøø'xy. Tsajpootyp hänäjty chooñ. Ja'a Jesús ja'a majaa hoy mio'oy.

44 Jaançh tehñ chaaçhpøjpä Jesús hänäjty. Mänitä Dios miänuu'xtaacy nägø'ø nädecypiä. Mänit xiäbitnøø tiägøøyy ta'xpä naaxwiin nebiä nø'tiän.

⁴⁵ Coo ja'a Jesús Dyiospa'yaaxpädøøyy, mänit tiänaayyø'cy. Mänitä jiamioødhajxy hoy yhixø'øy. Haagä maab hajxy hānajty je'eguiøxpä coo hajxy hānajty jiaanč tehñ jiootmayhaty.

⁴⁶ Mänitä Jesús miānaañ:

—Tii hajxy coo mwi'i mia'ay. Pädø'øg hajxy. MDiospa'yá'axäp hajxy; jaduhñ hajxy mga'a tu'udägóyyät.

⁴⁷ Jimñä ja'a Jesús hānajty miādia'agyñä, mänitä cu'ug miejch. Ja'a Judas hānajty copc-hajp maa ja'a cu'ughajxiän. Je'e ja'a Jesús hānajty tøø jiamioødhaty maa ja'a nāmajmetspāhajxiän.

⁴⁸ Mänitä Jesús hoy chu'xy. Mänitä Jesús miānaañ:

—Judas, nej, tsu'xyháamhøch miich xyega'añä, høøch ja'a Diosquexypä.

⁴⁹ Mänitä Jesús jiamioødhajxy miānaañ:

—Wiindsøn, nej, pädø'øgäp højts espadahaamä.

⁵⁰ Mänitä Jesús jiamioød tu'ug tiaatspujxtuuty ja'a teedywiindsøn mioonsä. Ja'a hahooybä taatsc ñäbujx.

⁵¹ Mänitä Jesús miānaañ:

—Ween hajxy yhity. Ween tiuhñä.

Mänitä Jesús ja'a craa tiaatsc piādaacä. Tsooc je'e.

⁵² Mänitä Jesús ñāmaayy ja'a teedywiindsøñhajxy, møødä tsajtøjwiindsøñhajxy, møødä møjtøjc-hajxy, ja'a Jesús hajxy hānajty yajpädø'øgaambä:

—Nej, méé'tspøch hajxy jaduhñ xtyijjiä coo espada coo wojpt hajxy mmäbädø'øguiä.

⁵³ Cooch mijts hijty nmøødhity tsajtøgooty najxpäxøø, cábøch mijts hijty nej xtiuñ. Pero tøø yhabaatnä cooch mijts xmiādsät ja'a haxøøgpä miäjaagøxpä.

⁵⁴ Mänitä Jesús hajxy miajch. Mänit hajxy yajnøcxy maa ja'a teedywiindsøn tiøjcän. Jäguemjuøøbiä Pedro hānajty piayo'oy.

⁵⁵ Mänitä soldado jøøn hajxy tiägøøyy yajmøjjøøbiä jim tøba'amhagujc. Mänit hajxy yhøxtaacy piquiä jøømba'axaambä. Mänitä Pedro piahøxtaapä.

⁵⁶ Mänitä to'oxymoonsä ja'a Pedro yhijxy coo jiiby piahäñaabiä. Mänit miānaañ:

—Yø'ø mixy, ja'a Jesús jiamioød yø'ø.

⁵⁷ Mänitä Pedro ñijiøgapxä:

—Pi'muuxy, cábøchä Jesús nhixiä.

⁵⁸ Mänitä Pedro yhøxcájpägombä wiinghāna'c. Mänit ñāmaayyä:

—Miich mjamiøød je'e, tuhñds.

Mänitä Pedro yhadsooyy:

—Joom, caj tiøyyä.

⁵⁹ Tøø hānajty tu'horä yhity, mänitä Pedro ñänøømä:

—Tøyhajt jaduhñ coo ja'a Jesús jiamioød yø'ø. Galilea yø'ø craa chohñbä.

⁶⁰ Mänitä Pedro miānaañ:

—Joom, pätiidä miich jaduhñ mnä'ä mädiaacy.

Tuunä Pedro jaduhñ ñä'ä mānaañ, mənitiä ja'a tseey jiaanč yaaxy.

⁶¹ Mänitä Jesús ja'a Pedro miøjhee'py. Mänitä Pedro cøjx jiahmiech waambaty hānajty tøø ñāma'ayijām ja'a Jesús: “Cahnä tseey hānajty ya'axyñä, tøø miich hānajty tägøøghooc mnijiøgapxyii cóogøch tyijy xquia'a hixiä.”

⁶² Mänitä Pedro wyiimbijnä. Mänit hoyhoy jiøøyy.

⁶³ Mänitä Jesús tiägøøyyä näxícäbä näyáaxäbä ja'a hāna'c-hajxy hānajty hadānaabiä. Mänit tiägøøyyä wobhö'cäbä.

⁶⁴ Mänit hajxy wyiinguxodsøøyy. Mänit hajxy wyiinguwobøøyy. Mänitä Jesús ñāmaayyä:

—Najuø'ow pøn tøø xwiopy.

⁶⁵ Jaanč tehñ yhaxøøgiatiä Jesús ñämaayy.

⁶⁶ Coø jioðøøyy, mänitä judíoshajxy yhamugøøyy, møøðä møjtøjc-hajxy, møøðä teedywiindsønñhajxy, møøðä ley-yajñähixøøbiähajxy. Mänitä Jesús hajxy yajnøcxy maa junta hajxy hñajty yagjadyiijän. Mänit hajxy miäyajtøøyy:

⁶⁷ —Højtsä tøyhajt móoyyác, nej, miich Dios tøø xquiexiä.

Mänitä Jesús yhadsooyy:

—Hóyhøch jaduhñ cu nja mäna'an, cáboch mijts häyaa xñä'a mabójcäbät.

⁶⁸ Y coøch mijts waambaty nmäyajtøwät, cáboch hajxy xyhadsówät, ni cáboch hajxy xyhøxmádsät.

⁶⁹ Tøø yhabaatnä coøch jimñ nnøcxaannä maa ja'a Diosän, ja'a møjcuñdujtmøødpä. Jimñhøch nøcxy nhñä'awa'añ maa ja'a yhahooyhaampiän, høøch ja'a Diosquexypä.

⁷⁰ Mänit hajxy wyl'i miäyajtøøyy:

—Nej, miichä Dios xyHuunghajpä.

Mänitä Jesús yhadsooyy:

—Tøyhajt jaduhñ nej mijts mmäna'añän.

⁷¹ Mänit hajxy miänaañ:

—Tii testigo hajxy nnä'a jaac wáañämät. Hamdsoo hajxy tøø nmädóowäm coo hamdsoo tøø ñimiädia'agyii.

23

¹ Mänit hajxy nägøxiä tiänaayyø'cy. Mänitä Jesús hajxy yajnøcxy maa ja'a Pilato wyiinduumän.

² Mänit hajxy tiägøøyy nähwaambejpä:

—Jimñ hädaa craa ja'a cu'ug hijty wyl'i quiapxhiñ. Nømñ hijty miäna'añ coo højtsä gobiernä xädø'øñ nga'a mó'owät ja'a jimñ tsänaabiä Roma. Jaduhñ hijty miänaambä cooc tyijy ja'a Dios tøø quiexyii gobiernähajpä.

³ Mänitä Pilato ja'a Jesús miäyajtøøyy:

—Nej, jaduhñ miich mnibiäda'agyii nebiä gobiernän maa hädaa judíoscáptänä.

Mänitä Jesús yhadsooyy:

—Tøyhajt jaduhñ nej miich mmäna'añän.

⁴ Mänitä Pilato ñämaayy ja'a teedywiindsønñhajxy møøðä cu'ug:

—Cáboch hädaa craa nhixy coo tii pojpä quia'a møøðä.

⁵ Mänit hajxy tehñgajnä wyl'i ya'axy:

—Høhñda'agymiädia'agyhaam yø'ø craa yajnähixø'øyy ja'a Jude-abä-jäya'ayhajxy. Jimñ yajtsohñdaacy Galilea. Yaa tøø miech. Jaduhñ yaa jiatcøøbiä.

⁶ Coø ja'a Pilato jaduhñ miädooyy, mänit yajtøøyy pø jimä Jesús jiaañch tsooñ Galilea.

⁷ Coø ja'a Pilato yhawáañäxä cooc ja'a Jesús jimñ chooñ, mänitä Pilato ja'a Jesús quiejxy maa ja'a Herodes wyiinduumän. Hix, gobernador ja'a Herodes hñajty jimñ tiuumby Galilea. Tøø hñajty quioody Jerusalén xøøhajpä.

⁸ Coø ja'a Herodes ja'a Jesús yhiixy, mänit jiootcugøøyy je'eguiøxpä coo hñajty jia wyl'i yhixa'añ. Tøø hñajty miädoyhaty coo ja'a Jesús ja'a hoy-yagjuøøññajtypä hñajty tøø yajcähxø'øgy. Jaduhñä Herodes hñajty jia wyl'i yhixa'añ coo ja'a Jesús ja'a hoy-yagjuøøññäbä yajcähxø'øgät.

⁹ Mänitä Herodes ja'a Jesús madiu'u jia wyl'i miäyajtøøyy, pero cabä Jesús ñä'ägä hadsooyy.

¹⁰ Tehñgajnä ja'a Jesús hñajty nähwaambedyíijäm ja'a teedywiindsønñhajxy møøðä ley-yajnähixøøbiähajxy.

11 Mänitä Herodes ja'a Jesús hajxy tiägøøyy näxiicpä näyaaxpä møødä soldadohajxy. Mänitä wit hajxy yajpägøøyy yajxonbə nebiä rey wyitän. Mänitä Herodes ja'a Jesús quiejxwiimbijty maa ja'a Pilatän.

12 Mänitxøø ja'a Pilato ja'a Herodes miøødnimiägu'ughajpøjcä. Nimiädsiphajtäp hajxy hānajtý.

13 Mänitä Pilato yaaxmujcy ja'a teedywiindsøn hajxy møødä copc-hajpāhajxy møødä cu'ughajxy.

14 Mänit miānaañ:

—Mijtshøch hädaa craa tøø xyajnämech. Mmänaamb mijts jaduhñ coo ja'a cu'ug hijty quiapxhiñ. Tøøch nja yajmäyach maa mijts mwiinduumhajxiän, y tøø hajxy mhixy mmädoy coo ja'a pojpa quia'a møødä nej mijts tøø mja nähwaambetiän.

15 Ni ja'a Herodes quia'a mäna'añ coo ja'a pojpa miøødä, paady tøø quiejxwiimbity. Tøø hajxy mhixy coo ja'a pojpa quia'a møødä. Paady, cáboch nyajyagho'oga'añii.

16 Jayøjphøch nyajcumädowa'añ, mänitøch nhøxmadsaanñä.

17 Jaduhñ hajxy hānajtý quiuhdujthaty coo ja'a tsumyjiäya'ay hajxy hānajtý tu'ug yhøxmach ja'a pascuaxøøjooty.

18 Mänit hajxy nägøxiä yaaxy:

—Ca'a yø'ø craa mhøxmach. Jue'e mhøxmádsäp ja'a craa Barrabáshajpä.

19 Paadiä Barrabás hānajtý tøø chumyii coo ja'a tsip hānajtý tøø yajpādø'øgy cajptooty, møød coo hānajtý tøø miäjäya'ay-yagho'ogy.

20 Jia wi'i yhøxmadsaamby ja'a Pilato ja'a Jesús hānajtý. Jaduhñä cu'ug jia nämáaguiombä.

21 Mänitä cu'ughajxy maas møc jiaac yaaxy:

—Møjpahbet hajxy cruzcøxp, møjpahbet hajxy cruzcøxp.

22 Miädägøøghoocpä ja'a Pilato jia mänáangombä:

—Pero nébiämäts jaduhñ tøø jiatcø'øy. Cabä pojpa tii miøødä. Nébiøch nyajyagho'ogøøjät. Nyajcumädowáambiøch. Mänitøch nhøxmadsaanñä.

23 Pero tehngajnä hajxy jiaanč tehñ ya'axy coo ja'a Jesús miøjpahbedøøjät cruzcøxp. Jaduhñdsä teedywiindsøn hajxy yaaxpä. Mäjädaac hajxy jaduhñ neby hajxy hānajtý miäna'añän.

24 Mänitä Pilato miānaanñä coo ja'a Jesús miøjpahbedøøjät cruzcøxp.

25 Mänit Barrabás yhøxmajch, ja'a cu'ughajxy hānajtý tøø yajnähdíjiäbä, ja'a hānajtý tøø chumyijäbä je'eguiøxpä coo tsip hānajtý tøø yajpādø'øgy, møød coo hānajtý tøø miäjäya'ay-yagho'ogy. Mänitä Pilato yhanehmy coo ja'a Jesús miøjpahbedøøjät cruzcøxp.

26 Jimä soldado ja'a Jesús hajxy hānajtý yajnøcxy maa hajxy hānajtý miøjpahbeda'añän. Mänitä jäya'ay hajxy tu'ug miajch, ja'a xøhajpä Simón, ja'a Cirenetsohmbä. Camjootiä Simón hānajtý tøø yhoy. Mänitä cruz hadsip yajtsømdu'ubøjcä. Høxhaamä cruz miäyohy.

27 Jaanč tehñ ñāmay hajxy hānajtý pianøcxy møødä to'oxiøjc-hajxy. Jóøyyäp yáaxäbä to'oxiøjc-hajxy hānajtý ñøcxy. Jootmayhajp hajxy hānajtý ja'a Jesús cøxpä.

28 Mänitä Jesús ja'a to'oxiøjc-hajxy miøjhee'ppejty ja'a hajxy tsohmbä Jerusalén. Mänit hajxy ñāmaayyä:

—Ca'ačh hajxy xñäjø'øy. Mijts hamdsoo mniñäjø'øwøøjäp møødä mhuung-hajxy.

29 Habaadaamb jaduhñ coo ja'a jäya'ayhajxy miäna'ana'añ: “Jootcujcä to'oxiøjc-hajxy yhity ja'a yhuung ca'a hijpä.”

³⁰ Mänitä jäya'ay ja'a tun hajxy ñäma'awa'añ: “Højts nähgahbéjtäc, højts yú'tsäc.”

³¹ Xchaaçhtiunáambøch ja'a jäya'ayhajxy, hóyhøchä pojpa cädieey nga'a ja mөөдä. Maas hanaxiä mijts mjada'añ mhabeta'añ.

³² Metscä mee'tspädøjc ja'a Jesús hānajty quipxy nøcxy miøødmøjpahbeda'añii.

³³ Coø hajxy jim miejch maa hānajty xiøhatiän “Maa ja'a Ho'ogyjiäya'aguiopc Ñähgädä'aguiän”, mänitä Jesús miøjpahbejtä cruzcøxp mөөдä mee'tspädøjc, tu'ug hanajtyhaamby, tu'ug hahooyhaamby.

³⁴ Jimnä ja'a Jesús hānajty miøjpahbedyiinä, mänit miänaañ:

—Teedy, mee'x yø'ø hāna'c-hajxy; cab hajxy ñajuø'ø y tii hajxy jaduhñ coø jiatcø'øy.

Mänitä soldado ja'a Jesús wyit hajxy tiägøøyy yajniguiuhäyø'cäbä.

³⁵ Jimä cu'ughajxy hānajty miähee'pna'ay mөөдä tuungmøødpähajxy. Jimä Jesús hajxy hānajty wyi'i ñäxi'igy:

—Yajnähaachp yø'ø craa hijty wiinghāna'c. Ween hamdsoo yajniñähwa'açhii pø tøy jaduhñ Dyioshuungä, pø tøy jaduhñ Dyiosquexiä.

³⁶ Jaanä jaduhñä soldadohajxy wyi'i ñäxiicpä. Mänitä Jesús vinagre yaghu-ucä.

³⁷ Mänit ñämaayyä:

—Pø tøy miichä judíoshajxy xquiobiernähaty, hamdsoods yajniñähwa'adsøø.

³⁸ Mänitä soldado pu'uyhuung hajxy jim yujpahy cruzcuhduum. Tägøøgtu'u hayuuc hānajty mөөдä cujaay: “Hädaadsä judíoshajxy quiobiernähajpy.” Griegohaam hānajty quiujaayä, mөөдä latínhaam, mөөдä hebreohaam.

³⁹ Mänitä mee'tspä tu'ug miänaañ, ja'a hānajty tøø miøjpahbéjtäbä cruzcøxp:

—Pø tøyä Dios tøø xquiexy, hamdsoods yajniñähwa'adsøø, y yajnähwäatsägäts højtspä —nømä Jesús ñämaayyä.

⁴⁰⁻⁴¹ Mänitä craa yhojjä jiamøød:

—Nej, cájtämä Dios mwiingudsähgø'øyyä. Paady højts ngumadowáanäm coø tøø ngädiéhyäm. Pero hädaa craa, caj nej tøø jiatcø'øy.

⁴² Mänitä Jesús ñämaayyä:

—Jesús, høøch xjiahmiédsäp coø miich hānajty mdägø'øwa'añ gobiernähajpä.

⁴³ Mänitä Jesús yhadsooyy:

—Tøyhajt jaduhñ nnäma'ay, jädä'ajøch miich jim xmiødhada'añ tsajpootyp.

⁴⁴ Cujyxiøø hānajty je'e, mänit wyiingoodsøøyy wiinduhmyhagajpt. Tägøøghorä yhiyty wiingoods.

⁴⁵ Cabä xøø hānajty maa ñä'ä hañ. Mänitä tsajtøjc-hadøødiuc quiøø'tswa'xy cujjiä.

⁴⁶ Mänitä Jesús yaaxy:

—Teedy, høøch miich njoot njuøhñdy nyajcø'ødägø'øwaamby.

Jagoo jaduhñ jiaac mänaannä, mänitiä yho'nä.

⁴⁷ Mänitä soldadowiindsøn yhiyty nebiä Jesús jiajtiän. Mänit jia mänaañ coø ja'a Dios miøjjä jiaanchä, coø ja'a Jesús ja'a pojpa hijty quia'a mөөдä.

⁴⁸ Coø ja'a cu'ughajxy yhiyty nebiä Jesús jiajtiän, mänit hajxy wyiimbijnä jootmayhajtäp.

⁴⁹ Jimä Jesús miägu'ughajpähajxy hānajty tiäna'ay jäguemjuøøby mөөдä to'oxiøjc-hajxy, ja'a hajxy hānajty jim tøø piadsóoñäbä Galilea. Yhiyx hajxy je'ebä nebiä Jesús jiajtiän.

⁵⁰ Jimä hojiäya'ay hānajt̃y tu'ug ja'a xōhajt̃pā José. Arimatea hānajt̃y chooñ jim Judeanaaxooty. Mōjtuung hānajt̃y miøød maa ja'a judíoscajptān.

⁵¹ Pero cab jaduhñ piamānaañ coo ja'a Jesús cu yagho'cā. Jiøbhijxyp hānajt̃y je'e coo ja'a Dios ja'a miājaa yajcāhxø'øga'añ.

⁵² Mānitā José ja'a Pilato ja'a cuhdujt̃ hoy miäyujwa'añ coo ja'a ho'ogyjiäya'ay yajmānácāt cruzcøxp.

⁵³ Coo ja'a cuhdujt̃ jaduhñ miooyyā, mānit yajmānajcy. Mānitā poobwit ya-jnābhijty. Mānit hoy yajnaaxtägø'øy maa ja'a tsaajutān ja'a naamhādiúñbā.

⁵⁴ Mānacyxiøø hānajt̃y je'e mānaa ja'a Jesús ñaaxtägø'øyān. Viernes hānajt̃y je'e. Hadsuujøñāp hānajt̃y; ja'a poo'xxiøø hānajt̃y habāatnāp.

⁵⁵ Ja'a to'oxiøjc-hajxy, ja'a Jesús hajxy hānajt̃y tøø piadsóoñbā Galilea, mānitā Jesús hajxy hoy yhixy maa hānajt̃y tøø ñaaxtägø'øyān.

⁵⁶ Coo hajxy wyiimbijty, mānitā pa'agxuu'pāhōñ hajxy hoy jiuy. Mānit hajxy pioo'xnā ja'a poo'xxiøøjooty neby hajxy hānajt̃y quiuhdujthatiān.

24

¹ Näxøøjopiä to'oxiøjc-hajxy ñøcxtägajch maa ja'a Jesús hānajt̃y tøø ñaaxtägø'øyān møødä jiamioødhajxy wiingpä. Pa'agxuu'pāhōngōñ hajxy ñøcxy ja'a hajxy hānajt̃y tøø jiuyyābā.

² Coo hajxy jim miejch, mānit hajxy yhiixy coo ja'a tsaajut hānajt̃y tøø yhawa'ačh.

³ Mānit hajxy jiiby tiägøøyy. Cab hajxy jiiby pōñ piaaty.

⁴ Mānit hajxy chāhgøøyy. Cab hajxy hānajt̃y ñajuø'øy neby hajxy jiatcø'øwāt. Mānit hajxy yhiixy coo ja'a jāya'ay hajxy hānajt̃y metsc miøødtāna'ay. Ya-jxonjatiä wyithajxy hānajt̃y. Høxtā haambā wyithajxy hānajt̃y.

⁵ Mānitā to'oxiøjc-hajxy ñaaxcooyy je'eguiøxpā coo hajxy hānajt̃y chāhgø'øy. Mānit hajxy ñāmaayyā:

—Tii ja'a Jesús hajxy yaa coo mhøxta'ay maa ja'a ho'ogyjiäya'ayhagujcān.

⁶ Cab je'e yaajān. Tøø jiujypiøjnā. Nej, cab hajxy mjahmiechā neby hajxy jiiby tøø xyajmøødmādia'aguiān Galilea.

⁷ Nōmā Jesús ja'a Diosquexypā hajxy xyhawaanā cooc hijty quiø'ødägø'øwa'añii ja'a cubojpāya'ay ja'a cugādieejäya'ay, cooc hijty miøjpahbeda'añii cruzcøxp, cooc cudägøøgxøø hijty jiujypiøga'añ.

⁸ Mānit hajxy jiaančh jahmiejtsnā neby hajxy hānajt̃y tøø ñāma'ayiiñān Jesúsām.

⁹ Mānit hajxy wyiimbijnā. Mānitā jiamioødhajxy hoy yhawaanā ja'a nāmajtu'ugpā møødä nāmāybā.

¹⁰ Ja'a to'oxiøjc ja'a mādia'agy hajxy māméjtsäbā, jue'e hajxy hānajt̃y nāje'e xiøhaty María Magdalatsohmā, møødä Juana, møødä María ja'a Jacobo tiaj.

¹¹ Pero cabā to'oxiøjc ja'a miādia'agyhajxy miäbøjcāxā ja'a Jesús jiamioødhajxy. Nebiä cuhhiimbā-mādia'aguiān hajxy jaduhñ miädooyy.

¹² Pero ja'a Pedro, miäbøjc je'e. Päyø'øguiä ñøcxy maa ja'a Jesús hānajt̃y tøø ñaaxtägø'øyān. Coo jiiby quiuwoodsøyy, mānitā poobwit yhiixy coo wiingtuum yhiñā. Mānit wyiimbijnā. Yagjuøøyy jaduhñ neby hānajt̃y tøø jiadyiiñā.

¹³ Mānitxøøbā ja'a Jesús jiamioødhajxy hānajt̃y metsc ñøcxy maa ja'a cajpt hānajt̃y xiøhatiān Emaús. Majtu'ugkilómetro hānajt̃y jiäguemā maa ja'a Jerusaléncajptān.

¹⁴ Mādiācāp hajxy hānajt̃y tiu'uyo'oy tijaty tøø jiadyii.

¹⁵ Mānit hajxy wyiingumedsøyyā ja'a Jesús. Mānit hajxy miøødtu'ubøjcy.

¹⁶ Hoy hajxy jia hijxy, cab hajxy yhøxcajpy.

17 Mänitä Jesús miänaañ:

—Tii hajxy mmädiaacy. Tii hajxy coo mdajy coo mmay.

18 Tu'jäya'ay hänajty xiøhaty Cleofas. Mänit yhadsooyy:

—Hopionä ñajuø'øy tii jim tøø jiadyii Jerusalén jäda'a xøøbä. Nej, miich nidiuhm mga'a najuøøby tii jim tøø jiadyiijä, hoy miich jim tøø mja hijpä.

19-20 Mänitä Jesús yhadsooyy:

—Tii jaduhñ tøø jiadyii.

Mänit hajxy yhadsooyy:

—Ja'a Jesús tøø yagho'ogyii cruzcøxp. Ja'a teedywiindsønñhajxy yejc møød højts ngopc-hajpä. Diosquexy hijty wiädity. Hoy-yagjuøøñäjatypä hijty ya-jcähxø'py. Hoy hijty miädia'agy ja'a Dioscøxpä cu'ughagujc.

21 Jaduhñ højts njoot hijty chocy coo ja'a Jesús ja'a gobiernä Rómaba ja'a quiuhdujt cu piøjcä nebiä gobiernä yaa quia'a hanéhmñät maa højts ngajptän, højts judiosjäya'ayhajxy. Maaxtøjcy mädägøøy jaduhñ yagho'cä.

22 Haamiän ja'a to'oxiøjc-hajxy näje'e yhooyy maa ja'a Jesús hänajty tøø ñaaxtägø'øyän.

23 Pero cábac hajxy piaaty. Mänitägä Diosmoonsä hajxy metsc yhijxy ja'a tsajpootypä-tsohmä. Mänitac hajxy yhawáanäxä cooc ja'a Jesús hänajty tøø jiuypiojnä. Hoy-yagjuøøñä højts hajxy xyajmøødmädiaacy.

24 Mänit højts njamiøødhajxy hoy yhiixpä. Jadúhñac hajxy piaatpä nebiä to'oxiøjc-hajxy hänajty tøø ñägapxiän. Ni jé'egädsä Jesús hajxy quia'a hijxy.

25 Mänitä Jesús miänaañ:

—Nej, cab hajxy mnä'ägä wiinjuø'øy, cab hajxy mnä'ägä mabøquia nebiä Diosquexyhajxy jecy miänaañän.

26 Tsipcøxpä Diosquexy chaaçhpøga'añ coo hänajty jim ñøcxaanñä tsajpootyp.

27 Mänit tiägøøyy yajwiingapxøøbiä ja'a Diosmädia'agy majaty miädia'agyiiän. Jim quiapxtsohñ maa ja'a Moisés hänajty tøø quiujaayän. Cøjx quiapxy mäduhñtiä ja'a Diosquexyhajxy quiujahyyän.

28 Coø hajxy jim miejch Emaús, mänitä Jesús miänaañ cooc jiaac yo'oya'añ.

29 Mänit hajxy ñämaayho'cy:

—Huuc mähmø'øw yaa maa højtsän. Tøø chuujøøñä. Coodsøñäp jaduhñ.

Mänitä Jesús jiaançh mähmøøyy. Mänit hajxy tiøjtägøøyy.

30 Mänit hajxy yhäñaaguiädaacy meexäwiinduum. Mänitä Jesús tsajcaagy quionø'cy. Mänitä Dioscuju'uyäp yejcy. Mänitä tsajcaagy qyijwa'xy. Mänitä jiamioød miooyy.

31 Mänitnäs hajxy yhøxcajpnä. Mänitä Jesús yhadägoyyøøñä.

32 Mänit tu'jäya'ay miänaañ:

—Wíinghøch hijty nnijiäwø'øyii tu'haambejpä coo ja'a Diosmädia'agy xya-jmøødmädiáacäm.

33 Mänitä hajxy wyiimbijnä, ñøcxtägajch Jerusalén. Mänitä jiamioød hajxy hoy piaady maa hajxy hänajty tøø yhamugø'øyän, ja'a nämajtu'ugpä møød hajxy nämaybä.

34 Mänit hajxy nämetspä ñämaayyä:

—Tøyhajt jaduhñ coo ja'a nWiindsønñajtäm tøø jiuypiojcy. Ja'a Simón jaduhñ tøø yhiixy.

35 Mänit hajxy je'e ñägapxpä cooc ja'a Jesús hajxy tøø piaady tu'haam. Mänitac hajxy yhøxcajpnä coogä Jesús ja'a tsajcaagy qyijwa'xy.

36 Jiiby hajxy hänajty miädia'agynä, mänitä Jesús ñäguehxtøø'xy maa hajxy hänajty yhäña'ayän. Mänit yajpoo'xy ja'a jiamioødhajxy.

37 Mänit hajxy jiaançh tehñ chähgøøyy. Háañämä tyijy hajxy nämejtsä.

³⁸ Mänitä Jesús miänaañ:

—Tii hajxy coo mwi'i chähgø'ø. Tiič hajxy coo xquia'a høxcapy.

³⁹ Høxtáhmdsøch hädaa ngø'ø, høxtáhmdsøch hädaa ndecy. Høøch je'e Jesús. Høøch hajxy nähdoónäc. Cabä hääñämä ni'x copc miøødä nébiøch høøch nmøødän.

⁴⁰ Mänitä Jesús ja'a quiø'ødiecy yaghijxy ja'a jiamiøødhajxy.

⁴¹ Pero cab hajxy hamuumdu'joot ñä'ägä mæbøjcy. Xoonäacp hajxy hänäjty møød hajxy hänäjty yagjuø'ø. Mänitä Jesús miänaañ:

—Tii hajxy jii mmøød cooçh ngáyät.

⁴² Mänitä hacxtsa'ay hajxy miooyy møødä møjtsiinjøødy.

⁴³ Mänitä Jesús quioonäsooyy. Mänit quiaayy maa ja'a wyiinduumhajxiän.

⁴⁴ Mänit miänaañ:

—Nébiøch tøø njatiän, tøøds hajxy hijty nhawáanäm mänaa hajxy quipxy tøø nhíjtäm. Tøjiajt jaduhñ ja'a høøchcøxpä neby jiiby myiñän cujaay maa ja'a Moisés miädia'aguiän, chaads jiiby maa ja'a Sálmosän, chaads jiiby maa ja'a librän ja'a Diosquexyhajxy jecy jiähyyäbä.

⁴⁵ Mänitä Diosmädia'agy quiapxtøøyy:

⁴⁶ —Jaduhñ myiñ cujaay maa ja'a Diosmädia'aguiän cooc ja'a Diosquexy tsipcøxp yho'oga'añ, y cooc cudägøøgxøø jiuypiojtägatsa'añ,

⁴⁷ y cooc miädia'aga'añii wiinduhmyhagajpt. Yaa Jerusalén miädiaactsoona'añii. Jaduhñä cu'ughajxy yajwiingapxø'øwa'añii coo ja'a yhaxøøgcuhdujt hajxy ñajtshixø'øwät. Mänit hajxy yajnähwa'adsa'añii ja'a piojpä quiädieey hajxy.

⁴⁸ Hamdsoo hajxy tøø mhixy tøø mmädoy nébiøch cham nmädia'aguiän.

⁴⁹ Nyajnäguexáambiøch mijts ja'a Dioshespíritu ja'a nDéedyhøch tøø xya-jwiinwaanø'øyäbä cooçh mijts nmó'owät. Jim choona'añ tsajpootyp. Yaa hajxy mmähmø'øwät Jerusalén høxtä coonä ja'a Dioshespíritu hajxy hänäjty tøø xñägäda'agy.

⁵⁰ Mänitä Jesús miøødcajptpädsøømy ja'a jiamiøødhajxy. Mänit hajxy miejch maa ja'a cajpt xiøhatiän Betania. Mänitä Jesús ja'a quiø'ø chajxajy. Mänitä Dioscuju'uyäp yejcy ja'a jiamiøødcøxpähajxy.

⁵¹ Mänit hajxy ñähguécänä. Mänitä Jesús jim ñøcxy tsajpootyp.

⁵² Mänitä Jesús hajxy wyiingudsähgøøyy. Mänit hajxy wyiimbijnä jaançh tehm jiootcujc. Mänit hajxy ñøcxy Jerusalén.

⁵³ Jabom-jabom hajxy hänäjty ñøcxy tsajtøgooty. Nøcxy hajxy hänäjty quiapxy miädia'agy coo ja'a Dios miøjjä jiaançhä. Amén.

San Juan

¹ Ja'a Dioshuung, je'e hajxy xyajnáhixóøyyám nebiä Dios jiäya'ayhatiän. Jíiyyám hánajty je'e mánaa hádaa yaabä naaxwiin yhawijy tiøø'xta'aguiän. Jíiyyám hánajty je'e møødä Dios; Diósäts je'e.

² Jim hánajty je'e møødä Dios mánaa hádaa yaabä naaxwiin yhawijy tiøø'xta'aguiän.

³ Jaaya'ay jaduhñ hädiuun cøxiä. Nidiuhm yhädiuñ.

⁴ Ja'a Dioshuung, yejpy ja'a jugyhajt je'e. Jaduhñ mäwiin je'e nebiä cujajpä nebiä cudøø'xpän. Xyajpädsøømäm hajxy hagoonstuum.

⁵ Coø jøøn yhajajy hagoonstuum, hoy jaduhñ nhíxäm. Ja'a Dioshuung, jaduhñ mäwiinäts je'e nebiä jøønän coø xyaghíxäm neby hajxy hoy nwädíjtämät.

⁶ Mänitä Dios jäya'ay tu'ug quiejxy, ja'a xøhajpä Juan.

⁷ Paadiä Juan quiejxä, jaduhñä Dioshuung ñägápxät, jaduhñä jäya'ayhajxy nägøxiä miäbøgät.

⁸ Ja'a Juan, ca'a je'e Dyioshuungä. Nä'ä nägapxpä jaduhñ quiejxä.

⁹ Tøø ja'a Dioshuung hánajty yaa miejtsnä hádaa yaabä naaxwiin. Je'e ja'a tøyhajt hajxy xmióoyyám nägøxiä maa hajxy yaa ndsänáayyám hádaa yaabä naaxwiin. Cøxiä xyajnáhixóøyyám.

¹⁰ Coø yaa miejch hádaa yaabä naaxwiin, cabä miädia'agy miäbøjcäxä, hoy hánajty cøxiä tøø jia hädiuñ.

¹¹ Jim je'e jia medsøøyy maa ja'a yhamdsoo cajptän, pero cab jim chojcä.

¹² Pero näje'ejaty hajxy chojcy. Pøn jaduhñ tsojc, pøn ja'a miädia'agy mäbøjcä, je'edsä cuhdujt hajxy mooyyá coø hajxy yhidät nebiä Dioshuungän.

¹³ Cab hajxy xyhuunghajtäm nebiä yaabä teedy hajxy xyhuunghajtäm. Pero coø hajxy nmäbøjcämät ja'a Dios ja'a miädia'agy, mänit hajxy jaduhñ xyhuunghajtämät.

¹⁴ Ja'a Dioshuung, jäya'ayhajt je'e neby højts chaa njäya'ayhajtäm. Hádaa yaabä naaxwiin je'e chänaayy maa højtshajtäm. Tøø højts nhixy coø je'e miøjjä jiaančhä. Paady miøjjä jiaančhä coø je'e Dyioshuungä. Tiumby je'e ja'a mayhajt homiänaajä. Tømiädiaacp je'e homiänaajä.

¹⁵ Jaayá'ayädsä Juan jaduhñ ñägapx:

—Yø'øya'ayhøch hijty nnägapxyp, yø'ø høxhaam tøø jiaac méchäbä. Høøch hijty jayøjp tøø nmech. Yø'ødsä møjcuhtajt nä'ägädä møød. Høøch, cábøchä cuhdujt jaduhñ nmøødä neby yø'øya'ay miøødän. Jímiäm yø'øya'ay hánajty coøch yaa nmiiñ ngahy.

¹⁶ Jaayá'ayäts ja'a mayhajt tuumb ja'a højtscøxphajtäm homiänaajä.

¹⁷ Dios ja'a Moisés ja'a cuhdujt jaduhñ mooyy. Højts ja'a Moisés ja'a cuhdujt xmiødiägätsäm. Pero xchøjcäm ja'a Dios hajxy møød xmiøoyyám ja'a tøyhajt. Paadiä Jesucristo yaa quiejxä.

¹⁸ Ni pøn ja'a Dios quia'a hixyñä. Ja'a yHuung, je'e hajxy xyhawáanäm nebiä Dios jiäya'ayhatiän. Jiaanč tehñ chojpy ja'a Dios ja'a Jesucristo. Tu'ughuunghajp ja'a Jesucristo.

¹⁹ Mänitä teedyhajxy näje'e jim quiejxä møødä levitashajxy maa Juangän. Ja'a levitashajxy, tsajtøjcueendähajpä hajxy hánajty tiuunghajpy. Jim hajxy chohñdaacy maa ja'a cajpt jaduhñ xiøhatiän Jerusalén. Ja'a judíos wyiindsønhajxy jaduhñ mäguejx. Paadiä teedyhajxy jaduhñ quiejxä coø ja'a Juan hajxy ween nøcxy tiøyhajtmädoyp pøn je'e.

²⁰ Coo ja'a Juan jaduhñ miäyajtøøwa, yejc je'e ja'a tøyhajt. Caj yhøhndaacy:
—Ca'a yhøøchä je'e ja'a Cristo, ja'a hajxy nhahíxämbä, ja'a Dios tøø wyiin-guëxiäbä coo hajxy xyhanéhñämät.

²¹ Mänitä jadähooc miäyajtøøwägumbä:

—Pøñ miičh. Nej, miičh Elíashajpä ja'a mináambäjä.

Mänitä Juan yhadsooyy:

—Caj.

Mänitä miäyajtøøwägumbä:

—Nej, tøgä miičh ja'a Diosmädia'agy jecy tøø mhuuc mäwädiypä.

Mänitä Juan yhadsóogumbä:

—Cábämäts.

²² Mänitä miäyajtøøwägumbä:

—Pøñ miičh. Højts ja'a tøyhajt móoyyác neby højts ja'a nwiindsøñ häyaa nhawaandägäjsät pøñ miičh.

²³ Mänitä Juan yhadsooyy:

—Høøch, nyajcapxøøbiøch ja'a Diosmädia'agy møc pactuum. Panøcx ja'a Diostu'u hajxy nebiä Isaías jecy miänaañän coo hajxy mbanøcxät. Diosmädia'agy ja'a Isaías jecy yajwa'x.

²⁴ Ja'a hajxy hñajty tøø quiexyíjábä maa ja'a Juangän, näje'e hajxy hñajty pianøcxä ja'a fariseos ja'a miädia'agy hajxy.

²⁵ Mänitä Juan miäyajtøøwa:

—Tii miičh coo mnä'a mäyajnäbejpä pø cá'adäm miičh mGrístäjä, pø cá'adäm miičh ja'a jäya'ay ja'a Diosmädia'agy jecy tøø yajwá'xiäbä.

²⁶ Mänitä Juan yhadsooyy:

—Høøch, nøøháamhøch nmäyajnäbety. Pero xima jäya'ay tu'ug ma-jiäya'ayhagujc. Cahnä hajxy mhixyhatyñä.

²⁷ Jayøjphøch nmejch. Mänit yø'øya'ay høxhaam jiaac mejch. Møjcuhtujt yø'øya'ay miøød quejeech nmøødä.

²⁸ Jimä Juan hñajty miäyajnäbety maa ja'a cajpt hñajty xiøhatiän Betábara, ja'a Jordángpä møjnøøhaawiimbä jaduhñ maa ja'a xøø piädsømiän.

²⁹ Cujaboom ja'a Juan ja'a Jesús yhiixy. Jimä Jesús hñajty miänacy maa ja'a Juan hñajty tiäna'ayän. Mänitä Juan miänaañ:

—Huug hix hajxy, xii jäya'ay tu'ug miänacy. Yø'ø jaduhñ xøhajp ja'a Meeghu-ung ja'a Dios tøø quiéxiäbä. Yø'øds hajxy je'e xñähho'tu'udáanäm. Yø'øds hajxy je'e xyajnáhwa'ads xyajcuha'adsáanäm ja'a nbojpä ngädieeyhajtäm.

³⁰ Yø'øch hijty nnänøømby ja'a høxhaam tøø jiaac méchäbä. Høøch hijty jayøjp tøø nmech. Yø'øds je'e ja'a møjcuhtujt møød quejeech nmøødä. Jímiäm yø'øya'ay hñajty mänaäch nmiñ nga'ayän.

³¹ Cábøch hijty nnajuø'øy pøñ jaduhñ tunaamb nébiøch tøø nmädia'aguiän. Pero páadyhøch tøø nmech mäyajnäbejpä nøøhaam neby hajxy jaduhñ mna-juø'øwät pøñ je'e, mijts judíos.

³² Mänitä Juan miänáangumbä:

—Tøøchä Dioshespíritu nhixy coo jim tøø chooñ tsajpootyp. Mänitøch nhixy coo hñajty miänacy nebiä palomän. Mänitä ñaaxcädaacy. Mänitä jim yhøxtaacy yø'øya'ay quiuhduum.

³³ Cahnøch hñajty nnajuø'øy pøñ je'e. Pero jaayá'ayhøch tøø xquiéxiäbä mäyajnäbejpä nøøhaam, je'ečh jaduhñ xñämaayy: “Mhixaambiä Dioshespíritu maa je'e miänacø'øwa'añän. Jim jaduhñ miähmø'øwa'añ maa tu'jäya'ay quiuh-duumän. Jaayá'ayäts ja'a Dioshespíritu jaduhñ yegáanpäp.”

³⁴ Tøøch njaančh hixy. Tøøch nnägapxy coo yø'øya'ay jiaančh Dioshuungä. Nyéjpiøch ja'a tøyhajt jaduhñ.

35 Cujaboom ja'a Juan hānajt̃ jīm tiānāaguiumbā mōōdā jiamiōōd metscā.

36 Jīmā Jesús hānajt̃ wiādijpā. Coō ja'a Juan ja'a Jesús miōjhee'py, mānitā Juan miānaaŋ:

—Yō'ōds jaduhŋ xōhāj ja'a Meeghuung ja'a Dios tōō quiéxiābā.

37 Coō ja'a Juan ja'a jiamiōōdhajxy jaduhŋ miādooyy, mānitā Jesús hajxy piadu'ubōjcy nāmetscā.

38 Coō Jesús jiāwōōyy coō hānajt̃ pianōcxyii, mānitā wia'wiimbijty. Mānitā yhiijxy coō hānajt̃ nāmetscā pianōcxyii. Mānitā miānaaŋ:

—Tii hajxy mhōxtaaby.

Mānit hajxy yhadsooyy:

—Wiindsōŋ, maa miīch tōō mmejtsta'agy.

39 Mānitā Jesús yhadsooyy:

—Jam huug híxām.

Mānit hajxy hoy jiaanč hixy maa Jesús hānajt̃ tōō miejtsta'aguiān. Tōō hānajt̃ miānacyxiōōjōōñā. Jīm hajxy miāhmōōñā maa Jesúsān.

40 Tu'ugā Juan ja'a jiamiōōd hānajt̃ xiōhaty Andrés, ja'a Simón Pedro piuhya'ay. Je'eds ja'a Jesús hānajt̃ tōō piadu'ubōcy mōōdā jiamiōōd tu'ug.

41 Mānitā Andrés ja'a piuhya'ay hoy piaady, ja'a xōhāj ja'a Simón. Mānitā Simón ñāmaayy:

—Tōō hōjts ja'a Mesías nbaady —je'e jaduhŋ ñānōōmby ja'a Cristo, ja'a Dios tōō wyiinguéxiābā coō hajxy yaa xyhanéhmāmāt.

42 Mānitā Andrés ja'a Simón jīm wioonōcxy maa ja'a Jesús hānajt̃iān. Coō ja'a Jesús ja'a Simón yhiijxy, mānit miānaaŋ:

—Miīch, Simón miīch mxōhaty. Jonás miīch mdeedyhajpy. Pero Pedro mxōhataannā —je'e jaduhŋ ñānōōmby tsaa.

43 Cujaboom ja'a Jesús hānajt̃ ñōcxa'añ Galilea. Mānitā Felipe hoy piaady. Mānitā Felipe ñāmaayy:

—Jámhōch quipxy mōōdwādijtāc. Hōōchā nmādia'agy habōjcāc.

44 Jīmā Felipe hānajt̃ choōñ maa ja'a cajpt hānajt̃ xiōhatiān Betsaida. Jīm ja'a Andrés hānajt̃ chohmbā mōōdā Pedro.

45 Mānitā Felipe ja'a Natanael hoy piaady. Mānitā Natanael ñāmaayy:

—Tōō hōjts jaaya'ay nbaady ja'a Moisés tōō ñāgāpxiābā maa ja'a nocy piādō'quiān, ja'a Diosmādia'agymiāwādijpāhajxy tōō ñāgāpxiābā. Jesús jaduhŋ xiōhaty. José yhuung je'eduhŋ. Jīm jaduhŋ choōñ Nazaret.

46 Mānitā Natanael miānaaŋ:

—Nazaretā. Cabā ndiijy hoybāda'a jīm Nazaret.

Mānitā Felipe yhadsooyy:

—Jam huug híxām.

47 Jīmā Natanael ja'a Jesús hānajt̃ ñāmech. Coō Jesús ja'a Natanael yhiijxy, mānitā Jesús miānaaŋ:

—Yō'ō judío xii miimbā, hamuumdu'joot ja'a Diosmādia'agy quiudiuŋ. Ni mānaa quia'a hōhnda'agy.

48 Mānitā Natanael ja'a Jesús miāyajtōōyy:

—Maač miīch tōō xyhixy coōch miīch jaduhŋ tōō xyhōxcapy.

Mānitā Jesús yhadsooyy:

—Jiiby miīch hānajt̃ mdāna'ay piidspa'c. Cahnā Felipe hānajt̃ xmiāgapxy.

49 Mānitā Natanael miānaaŋ:

—Wiindsōŋ, Dios miīch xyhuunghajp. Mhanehmby miīch ja'a judíoshajxy.

50 Mānitā Jesús miānaaŋ:

—Páadyhøch ja'a nmädia'agy xmiäbøjcä cooçh jaduhñ nmänaañ cooçh miich jiiby tøø nhixy piidspa'c. Pero mhixaamby cooçh maas hoy-yagjuøøñäjatypä nyajcähxø'øga'añ.

⁵¹ Mänitä Jesús miänáangumbä:

—Chaads mijts nnämä'awät, mhixaamby hajxy coo ja'a tsajpootyp yhawa'adsa'añ. Mhixaamby ja'a Diosmoonsä hajxy ja'a tsajpootypä coo hajxy chajpeda'añ coo hajxy ñaaxcäda'aga'añ maaçhä nwiinduumän, høøch ja'a Diosquexypä.

2

¹ Cumaaxc ja'a pøc hu'ug hänäjty jiada'añii maa ja'a cajpt hänäjty xiøhatiän Caná de Galilea. Jimä Jesús ja'a tiaj wioowä

² møødä Jesús møødä jiamiøødhajxy.

³ Mänitä vino quiøjxy. Mänitä Jesús ñämaayyä ja'a tiaj coog ja'a vino tøø quiøxy.

⁴ Mänitä Jesús yhadsooyy:

—Maam, ca'a mhaaw mbäda'agy. Ca'a myiichä mgüeendä. Høøch nna-juøøby. Cahnä yhabaadyñä cooçh nmayhajtúnät.

⁵ Mänitä Jesús ja'a tiaj miänaañ, ñämaayyä ja'a moonsähajxy:

—Naxy hajxy mdehm miäbøgät coo Jesús hajxy xmiägapx xyhané'emät.

⁶ Jimä hamøj tsaanøøgow hänäjty quiärumna'ay tädujcä. Tägø'øwaamb jiiby tu'nøøgow mädaaxc-hii'xlitro o mägo'xlitro. Jue'e ja'a judíos hajxy hänäjty wia'añ, cø'øbujnøøhidøhñdy. Jaduhñ hajxy hänäjty quiuhdujthaty.

⁷ Mänitä Jesús miänaañ, ñämaayyä ja'a moonsähajxy:

—Cudemø'øw nøø hajxy nøøgowooty. Cøxy yaghuts hajxy.

Mänit hajxy jiaançh yaghujch.

⁸ Mänit Jesús miänáangumbä:

—Jee'ppädsøñ nøø hajxy weeñtiä. Nøcx ja'a mwiindsøñ hajxy mo'ow.

Mänit hajxy jaduhñ quiudiuñ.

⁹ Tøø ja'a nøø hänäjty wia'añguiojy vino. Jesús jaduhñ yajwa'añguioj. Mänitä moonsäwiindsøñ ja'a vino quiøøchooyy. Mänit yhuucmajch. Cab hänäjty ñajuø'øy maa ja'a vino tøø chooñ. Pero ñajuøøby ja'a moonsähajxy hänäjty; hix, je'e ja'a nøø hajxy hänäjty tøø jiee'ppädsømy. Mänitä moonsäwiindsøñ ja'a jamiø'ød miøjyaaxy.

¹⁰ Mänit ñämaayyä:

—Jayøjp ja'a hovyino hajxy naxy ñä'ägädä temy. Coo ja'a woybä wichpähajxy hänäjty com tøø yhu'ugy, mänit hajxy hänäjty jiaac tema'añ ja'a vino ca'a jaty hoybä. Pero miich, cahnä hovyino mdemyñä.

¹¹ Coo Jesús ja'a vino yajwa'añguiojy jim Caná de Galilea, hijxtahnd jaduhñ yajcähxø'tsohñ coo miøjjä coo jiaançhä. Coo Jesús ja'a jiamiøødhajxy jaduhñ yhiixy coo Jesús ja'a vino yajwa'añguiojy, paadiä Jesús miädia'agy miäbøjcäxä.

¹² Mänitä Jesúshajxy jiiby yhädaacy maa ja'a cajpt jaduhñ xiøhatiän Capernaum, møødä tiaj, møødä piuhya'ayhajxy, møødä jiamiøødhajxy. Coo hajxy jiiby quiädaacy, mejtsxøø tægøøgxøø hajxy jiiby yhiyty.

¹³ Jadáanäp ja'a pascuaxøø hänäjty jim maa ja'a cajpt jaduhñ xiøhatiän Jerusalén. Ja'a judíoshajxy hänäjty jim yagjadáanäp. Mänit Jesús jim ñøcxy Jerusalén.

¹⁴ Coo jim quioo'ty, mänit jiiby tiøjtägøøyy maa ja'a tsajtøjc hamøjpän maa ja'a judíos ja'a Dios hajxy hänäjty wyiingudsähgø'øyän. Jiiby ja'a wa-jtoo'pähajxy hänäjty møødä meegtoo'pä møødä palomatoopä. Jaanä jiipiä xädø'øñguiuwijtspähajxy hänäjty yhäñaabiä.

¹⁵ Coo Jesús jaduhñ yhijsy, mänitã xaaçh wyidsø'cy. Mänitã ju'xt yhädiuuñ. Mänitã jäya'ayhajxy cøjx yhäxpäbo'oyii jiiby tsajtøgooty møødä waj møødä meeg cøxiä. Mänitã Jesús yajtsitø'cy ja'a xädø'øñguiuwijtspä mieexähajxy. Cøjx ja'a xiädø'øñhajxy yhäxxity.

¹⁶ Mänitã palomatoo'pähajxy ñämaayyã:

—¡Yajpädsøñ yø'ø mbaloma hajxy! ¡Cábøch nDeedy ja'a tiøjc hajxy xwiáanät halaplaaz!

¹⁷ Mänitã jiamioødhajxy jiahmiejtstaacy coo jaduhñ yhity cujaay: “Mjaançh tehñ cwieendhadáanäbøch hädaa miich mdøjc nägø'ø nädecypiä, hóyhøch hajxy cu xjia yajcuyagho'ogø'øw.”

¹⁸ Mänitã judíoshajxy miänaañ, ñämaayyã Jesús:

—Tii hijxtahñd højts xyajcähxø'øgáanäp hoy-yagjuøøñäjatypä pø mmøød miich cuhdujt jaduhñ coo yø'øya'ayhajxy tøø mgøxy häxpäbo'oy.

¹⁹ Mänitã Jesús yhadsooyy:

—Coo hädaa tsajtøjc hajxy myagjidät, pues cudägøøgxøøyyøch nyaghoyøødiägätsät.

²⁰ Mänitã judíoshajxy miänaañ:

—Cujuxychägui'xtädujcjumøjt hädaa tsajtøjc jecy miaayy y tægøøgxøøyyä miich myaghoyøødiägatsa'añ. Cab højts jaduhñ nmäbøcy.

²¹ Pero jue'e Jesús hänajty ñänøøñby “ja'a tsajtøjc”, ja'a yhamdsoo ni'x ja'a yhamdsoo copc.

²² Coo Jesús hänajty cujecy tøø jiaançh jujypiøcy, mänitã jiamioødhajxy jiahmiejtstaacy nebiaty hänajty tøø miäna'añän. Mänitã Diosmädia'agy hajxy miäbøjnä møødä Jesús ja'a miädia'agy.

²³ Mänaa ja'a Jesús jim yhitiän Jerusalén ja'a pascuaxøøjooty, mänitã cu'ugä Jesús hajxy yhijsy coo ja'a Jesús ja'a hoy-yagjuøøñäjatypä hänajty yajcähxø'øgy. Mänitã Jesús ja'a miädia'agy miäbøjcäxä nämøj nämay.

²⁴ Pero cabä Jesús hänajty yajwiinhøøñ, je'eguiøxpä coo hänajty ñajuø'øy hamdsoohaamby coo ja'a cu'ughajxy hänajty hamuumdu'joot quia'a mäbøcy.

²⁵ Hix, hamdsoohaambiä Jesús hänajty ñajuø'øy coo hajxy haxøøg nwiinmahñdyhåjtäm nägøxiä. Cabä Jesús hänajty pøñ miäyajtøy neby hajxy nwiinmahñdyhåjtäm.

3

¹⁻² Coo maxioø hänajty tøø yhijnä, mänitã copc-hajpä jim tu'ug miejch maa Jesúsän. Nämay hajxy hänajty quiopc-haty maa judíoshajxiän. Nicodemo ja'a copc-hajpä hänajty xiøhaty. Pianøcxäp ja'a fariseos miädia'agyhajxy hänajty. Tøø hänajty quioodsø'øy coo jim miejch maa Jesúsän. Mänitã Jesús ñämaayyã:

—Wiindsøñ, nnajuøøby højts coo miichä Dios tøø xquiexy yajnähixøøbiä. Coo miichä Dios häxøpy xquia'a puhbety, caj miich hoy-yagjuøøñäjatypä häxøpy myajcähxø'øgy.

³ Mänitã Jesús miänaañ:

—Chaads miich tehñ tiøyhajt nnämä'awät, coo mga'a miindägats mga'a cahdägätsät, cabä Dios xyhan'e'mät.

⁴ Mänitã Nicodemo yajtøøyy:

—Pero neby jaduhñ mmiindägats mgahdägätsät coo hänajty tøø mmäjaanä. Neby jiiby mdägøødiägätsät ja'a mdaj jioodooty coo jiiby jadähooc mmaax-huunghädät.

⁵ Mänitã Jesús yhadsooyy:

—Pues caj. Chaads miich tehñ tiøyhajt nnämä'awät, coo mga'a miindägats mga'a cahdägätsät nøøhaam møødä Dios yhEspirituhaam, cabä Dios xyhané'emät.

⁶ Coo tøø mmiñ tøø mga'ay nebiä maaxhuungän, Dios je'e xmiøoy ja'a mni'x ja'a mgopc møødä mjuøhñdy. Yjaduhñ mäwíinäts je'e, coo Dioshespíritu mbadu'ubógät, nebiä miindägach cahdägachpäñ mmähmø'owät.

⁷ Ca'a myagjuø'øy cooñ jaduhñ nnäma'ay coo tsipcøxp mmiindägats mgahdägätsät.

⁸ Coo poj jaduhñ xiämemy, cab hajxy nnajuøøyyäm maa myinø'øy maa ñøcxø'øy. Homiaajä poj xiämemy. Mmädowäp jaduhñ pero caj mhíxät. Jaduhñ mäwíinäts ja'a Dios yhEspíritu coo xjioottägø'ow coo xquioptägø'owät. Coo jaduhñ mmäbógät hamuumdu'joot, jaduhñ mjádät nebiä miindägach cahdägachpäñ —nømä Jesús miänaañ.

⁹ Mänitä Nicodemo yajtøøgumbä:

—Neby je'eduhñ mnänømy.

¹⁰ Mänit Jesús yhadsooy:

—Yajñähixøøbiä miich mduunghajpy maa ja'a judíoshajxiän pero cáhnøch nmädia'agy xwyiinjuøøyyäbä.

¹¹ Chaads miich tehñ tiøyhajt nnämä'awät. Nmädiaacy py højts mädyiijaty højts nnajuøøby y nnägapxyp højts mädyiijaty højts tøø nhíxy. Pero mijts, cab højts mijts nmädia'agy xñä'ägädä mabøjcä.

¹² Tøø hajxy nja yajmøødmädia'agy tijaty yaa ja hijp hädaa yaabä naaxwiin, pero cab hajxy mmäbøcy. Hoora, cooñ ja'a tsajpootypä hajxy nya-jmøødmädiä'agät, ni je'e hajxy mga'a wiinjuø'owät.

¹³ 'Ni pøn jim quia'a hoyñä tsajpootyp. Jagóoyyøch jim nidiuhñ ndsooñ, høøch ja'a Diosquexypä. Páadyhøch ja'a tøyhajt nmøødä neby jim.

¹⁴ Ja'a Moisés, jimä tsahñdyhahädiuunxay yujpahy quepyquiøxp jim pactuum. Jaanä jadúhñhøch jäya'ay xyujpa'awaambä, høøch ja'a Diosquexypä.

¹⁵ Pønjátyhøch nmädia'agy xmiäbøjcäp, cabä yháañämähajxy mänaa quiuhdägoyya'añ. Cøjxta'axiøø hajxy jiugyhada'añ nebiä Dios jiugyhatiän —nømä Jesús miänaañ.

¹⁶ Xjiaanç tehñ chojc xjiaanç tehñ pia'häyóowäm ja'a Dios hajxy nägøxiä, mäduhñtiä hajxy yaa nhíjtäm hädaa yaabä naaxwiin; paadiä tiu'ughuung ñähdujcy. Coo ja'a mädia'agy hajxy hamuumdu'joot nmäbøjcämät ja'a Dioshuungcøxpä, cabä nháañämähajxy mänaa quiuhdägóoyyämät. Jaduhñ hajxy cøjxta'axiøø njugyhájtämät nebiä Dios jiugyhatiän.

¹⁷ Paadiä Dios ja'a yHuung yaa tøø quiexy hädaa yaabä naaxwiin coo hajxy jaduhñ ween xñähho'túutäm. Cab hajxy jaduhñ xyajcumäadowáañäm.

¹⁸ Pønjetiä Dios yHuung ja'a miädia'agy mabøjcäxäp, cab hajxy je'e yajcumäadowa'añii. Pønjaty ca'a mabøjpy, tøø Dios miäna'añ cooc hajxy yajcumäadowa'añii, coogä Dios ja'a yHuung ja'a miädia'agy quia'a mabøjcäxä.

¹⁹ Coo Dios yHuung yaa yhooyy hädaa yaabä naaxwiin, hagoonstuum jäya'ayhajxy hñajty yhity. Paady hajxy hñajty yhity hagoonstuum coo haxøøgwiinmahñdy hajxy hñajty tiuñ. Cabä Dios yHuung miädia'agy hñajty miäbøjcäxä. Jaduhñ mäwíinäts je'e nebiä jøønän. Paady jaduhñ nebiä jøønän, jaduhñ jäya'ayhajxy piädsömät hagoonstuum. Pønjaty hagoonstuum mähmø'owaamb, je'eds Dios ñänøømby coo hajxy yajcumäadowa'añii.

20 Pønjaty haxøøgwiinmahñdy tuumb, cab hajxy chocy maa jiajjiän. Cähxø'øgaamb yhaxøøgwiinmahñdyhajxy je'e, paady hajxy quia'a pädsøma'añ jajtuum.

21 Pønjaty panøcxaamb ja'a tømia'dia'agy, je'eds jaduñ pädsømaamb jajtuum. Paady hajxy jaduñ piädsøma'añ, jaduñ quiähxø'øga'añ coo Dios hajxy tøyhajt jiaanč puhbedyii.

22 Mänitä Jesúshajxy jim ñøcxy Judeanaaxooty møødä jiamiøødhajxy. Coo hajxy jim miejch, mänit hajxy tiägøøyy mäyajnäbejpä. Maxiøø hajxy jim yhjity mäyajnäbejpä.

23 Jaanä jimä Juanghajxy hänajty miäyajnäbejpä maa ja'a cajpt hänajty xiøhatiän Enón. Salim cajpt mäwiingón jaduñ. Comä nøø hänajty jim. Mejtsp jäya'ayhajxy hänajty jim näbejpä.

24 Cahnä Juan hänajty chumyii.

25 Mänitä Juan ja'a jiamiøødhajxy tiägøøyy mädiaacpä møødä judíoshajxy nämejtsc nädägøøg. Je'e hajxy hänajty miädiaacpy neby hajxy näbétät.

26 Mänit Juan hoy ñäma'ayii:

—Wiindsón, xiiby yø'øya'ay miäyajnäbety, ja'a miich hijty jim xmiøødhijpä ja'a Jordángpä møjnøøhawimb, ja'a miich tøø mnägápxiäbä coo Dios tøø quiexy. May jäya'ay tøø ñämech maa miäyajnäbetiän.

27 Mänit Juan miänaañ:

—Coo ja'a Dios jaduñ tøø miäna'añ, paadiä Jesús miädia'agy pianócxäxä nämay.

28 Tøø hajxy mmädoy cooch nga'a Cristo. Jawyíinhøch Dios xquiejxy. Páadyhøch jawyiin xquiejxy cooch mädia'agy nyajwá'xät yø'ø Jesúsøxpä.

29 Coo ja'a pøc hu'ug maa jiadyii, ja'a jamiø'ød, je'eds ja'a jaxie'eb møød. Ja'a jamiø'ød ja'a miägu'ughajpä jii hijpä, xoonäacp je'eduhñ coo jamiø'ød quiapxy. Jaanä xoonäacpøch høøchpä je'eguiøxpä coo Jesús miädia'agy pianócxäxä nämay.

30 Tehngahnä hajxy miayø'øwa'añ, ja'a Jesús miädia'agy hajxy panócxäbä. Pero pønjatyhøchä nmädia'agy xpianócxäp, haweenø'øwaamb hajxy je'e.

31 Xyhanéhäm hajxy je'e nägøxiä, jaaya'ay jim tsohmä tsajpootyp. Yaayyä hajxy ndsänäayyäm hädaa yaabä naaxwiin, y hädaa yaabä naaxwiimbä mädia'agy hajxy nmädiäcäm. Pero jaaya'ay jim tsohmä tsajpootyp,

32 je'eduhñ miädiaacpy nebiaty jim tøø yhixy tøø miädoyyän tsajpootyp. Pero cabä miädia'agy miäbójcäxä nämay.

33 Pønjatiä Jesús miädia'agy mabójcäp, je'eds tøyhajt yejp coo Dios tiømiädia'agy.

34 Jaaya'ay Dios tøø quiéxiäbä, Diosmädia'agy je'eduhñ miädiaacpy. Hamuumdu'joot Dios ja'a Jesús ja'a Dioshespíritu miooyy nebiä Jesús jaduñ miädiaactägätsät.

35 Choippy ja'a Dios ja'a yHuung; paadiä cøxiä wiinä tøø yajcø'ødägø'ø.

36 Pønä Dios yHuung ja'a miädia'agy mabójcäp, je'eds cøjxta'axiøø jugyhadaamb nebiä Dios jugyhatiän. Ja'a hajxy ca'a mabøjpä, cab hajxy jaduñ jugyhada'añ nebiä Dios jugyhatiän; yajcumadowáanäp hajxy je'e ja'a Diósäm.

4

1-3 Coo Jesús miädoyhajty coogä fariseoshajxy hänajty tøø miädoyhaty coogä Jesús ja'a jiamiøødhajxy hänajty maas may yajmabøcy y yajnäbety quejee Juan, mänit Jesúshajxy wyiimbijty Judea. Galilea hajxy ñøcxtägajch.

4 Jim hajxy ñaxøøyy Samarianaaxooty.

⁵ Mänit hajxy jim miejch maa ja'a cajpt hänajty xiøhatiän Sicar jim Samari-anaaxooty, mäwiingón maa José ñädeedyñaaxän. Ja'a tieedy jaduhñ jecy xøhajt Jacob.

⁶⁻⁸ Jimä nøøjut mädyii José yajmämähmøøyyä coo Jacob yho'cy. Coo Jesús hajxy jim miejch maa nøøjutän, tøø Jesús hänajty yhanuu'xø'ø. Mänit Jesús yhøxtaacy nøøjutpa'a. Tøø hänajty quiujyxiøø'ø. Mänitä jiamioødhajxy ñøcxy cajptooty juuguiaabiä. Mänitä to'oxiøjc tu'ug quiädaacy nøøgoombä; Samaria hänajty chooñ. Mänit Jesús to'oxiøjc ñämaayy:

—Høøchä nøø móoyyác.

⁹ Mänit Jesús ñämaayyä:

—Tiiçh miich nøø coo xmiäyujwa'añ. Jue'e miich mdsooñ Judea. Høøch, yaaç ndsooñ Samaria.

(Ix, cabä Judéabä jäya'ayhajxy hänajty miøødnijootpaadyii ja'a Samáriabä jäya'ayhajxy.)

¹⁰ Mänit Jesús yhadsooyy:

—Coo häxøpy mnajuø'ø tii mayhajt Dios tiunaamby maa miichcøxpän y pønch høøch cooçh ja'a nøø tøø nja yujwa'añ, mänitøch cu xmiäyujwaañ ja'a nøø ja'a ni mänaa ca'a tøøtspä.

¹¹ Mänitä to'oxiøjc yhadsooyy:

—Tsäguhm, cøøc hädaa nøøjut. Caj miich tii mmøødä coo ja'a nøø myaj-wohmädsømtät. Maa tyijy miich ja'a nøø mbáadät, ja'a ni mänaa ca'a tøøtspä.

¹² Nejj, maas móctäm miich cuhdujt mmøødä quejee Jacob cuhdujt jeyhajty miøødä, ja'a hajxy hijty nhaphajt ndeedyhajtäm. Je'e hädaa nøøjut xyajmämähmøøyyäm. Yaa jecy ñøøhuucy møødä yhuunghajxy møødä yhanimalhajxy.

¹³ Mänit Jesús yhadsooyy:

—Coo hädaa nøø hajxy yhu'ugy, najxp tiødsø'øhajxy jaduhñ. Mänit hajxy tiødsø'øbáatägumbä cujaboom cumaaxc.

¹⁴ Høøch, nyépiøch ja'a nøø, ja'a ni mänaa ca'a tøøtspä. Coo hajxy yhu'ugät, ni mänaa ja'a tødsø'ø hajxy quia'a paattägátsänät. Cøjxta'axiøø hajxy jaduhñ jiugyhada'añ nebiä Dios jiugyhatiän.

¹⁵ Cahnä to'oxiøjc ja'a mädia'agy hänajty wyiinjuø'øyñä nebiä Jesús ja'a nøø ñägapxiän. Jue'e Jesús jaduhñ ñänøøm ja'a mayhajt ja'a Dios jaduhñ tiunaamby maa højtscøxpän. Mänit to'oxiøjc miänaañ:

—Høøchä nøø móoyyác nébiøch tødsø'ø xquia'a páatnät. Jadúhnhøch yaa min nga'a nøøwóhñnät.

¹⁶ Mänit Jesús miänaañ:

—Nøcx ja'a mnihyhap møjya'ax; mänit yaa mwoomínät.

¹⁷ Mänit to'oxiøjc yhadsooyy:

—Cábøch nnihyhap.

Mänit Jesús miänaañ:

—Tehm tiøyhajt miich jaduhñ mmäna'añ coo nihyhap mga'a møødä.

¹⁸ Mägooxcä mnihyhap tøø mmøødtsäna'ay, y yø'ø ya'adiøjc xim mmøødpä, tøyhajt, ca'a myiiçh mhamdsoo nihyhap yø'ø.

¹⁹ Mänit to'oxiøjc miänaañ:

—Tsäguhm, nyo'mädóobiøch jaduhñ coo miich ja'a Dioshespíritu mmøødä.

²⁰ Jim højts nhap ndeedy ja'a Dios hajxy hijty jecy wyiingudsähgø'ø maa yø'ø tunän. Pero mijts mänaamb coo hajxy jim nwiingudsähgøøyyämät jim Jerusalén.

²¹ Mänit Jesús yhadsooyy:

—Muuxy, mǎbójcǎgǒch nmǎdia'agy. Habaadáannǎp je'ejǎn coo mijts ja'a Diosteedy homiaajǎ mwiingudsǎhgǒ'ǒwaannǎ. Ca'a ñǎ'ǎ jiiyyǎ hajtiǎ mwiingudsǎhgǒ'ǒwa'añ maa yǒ'ǒ tunǎn ni jim Jerusalén.

²² Hoy Dios hajxy mja wiingudsǎhgǒ'ǒy, cab hajxy mhixiǎ. Hǒjts, nhixy hǒjts ja'a Dios. Jaduhñ ja'a Diosmǎdia'agy miǎna'añ coo ja'a judíos jáya'ay tu'ug yajnǎhwa'ads yajcuhwa'adsa'añ.

²³ Pǒñ ja'a Dios tehñ tiǒyhajt wiingudsǎhgǒ'ǒñǎp, je'eds hamuumdu'joot wiingudsǎhgǒ'ǒby. Jadúhñǎts ja'a Dios chocy coo wyiingudsǎhgǒ'ǒwǒǒd hamuumdu'joot.

²⁴ Jaduhñǎ Dios nebiǎ poj nebiǎ táxa'ajǎn. Tsipcǒxp hit ja'a Dios hajxy nwiingudsǎhgǒ'ǒyyǎmǎt.

²⁵ Mǎnit to'oxiǒjc miǎnaañ:

—Ja'a Cristo, ja'a Dios quixaambiǎ, je'e hǒjts nhahíxǎm. Coe je'e quiǎda'aga'añ, mǎnit hǒjts je'e cǒxiǎ xyhawaanǎanǎm.

²⁶ Mǎnit Jesús miǎnaañ:

—Hǒǒchǎts je'e ja'a Cristo.

²⁷ Mǎnit Jesús jiamǒǒdhajxy miejch. Coe hajxy yhiixy coe Jesús ja'a to'oxiǒjc hǎnajty miǒǒdmǎdia'agy, yagjuǒǒyy hajxy jaduhñ. Pero cab hajxy yajtǒǒyy tiiguiǒxpǎ Jesús ja'a to'oxiǒjc hǎnajty coe miǒǒdmǎdia'agy.

²⁸ Mǎnitǎ to'oxiǒjc jiiby chohñ maa hajxy hǎnajty miǎdia'aguiǎn. Jiibiǎ miajt ñǎhgueecy, ñǒcxy je'e cajptooty, hoy ja'a cu'ughajxy ñǎma'ayii:

²⁹ —Jam jáya'ay hajxy tu'ug huug híxǎm. Tǒǒch je'e xñajuǒ'ǒy nebiǎtyhǒch haxǒǒgpǎ tǒǒ nduñ. Jadúhñhǒch je'e tǒǒ xyhawaanǎ. Je'e ndijjiǎda'a je'e ja'a Cristo.

³⁰ Mǎnitǎ cu'ughajxy tiu'ubǒjcy cajptooty, ñǎnǒcxy ja'a Jesús hajxy.

³¹ Jimǎ Jesús hǎnajty ñǎma'ayii ja'a jiamǒǒdhajxy:

—Wiindsǒñ, cay.

³² Mǎnit Jesús yhadsooyy:

—Xiǐch jǒǒ'xypǒcy nmǒǒdǎ. Cab hajxy mnajuǒ'ǒy tii je'eduhñ.

³³ Mǎnitǎ jiamǒǒdhajxy ñiñǎmaayyǎ:

—Nejy, tǒǒ jǒǒ'xypǒquiǎda'a yajméjtsǎxǎ.

³⁴ Mǎnit Jesús miǎnaañ:

—Cooch jaduhñ nmǎnaañ cooch jǒǒ'xypǒcy nmǒǒdǎ, je'eǎh hǎnajty jaduhñ nnǎnǒǒmby cooch njootcujǎ, cooch ngudiúnǎt nébiǒch Dios tǒǒ xyhane'emiǎn, cooch tiuung nyajmǎayyǎt; je'eǎh jaduhñ tǒǒ xquiexy.

³⁵ Huug hix yǒ'ǒya'ay hajxy xii mǎnajpǎ. Xmiǎbǒgǎanǎbǒch nmǎdia'agy hajxy yǒ'ǒ. Jaduhñ mǎwínǎts hǒǒchǎ nmǎdia'agy nebiǎ tǒǒmd paquiǎ miayǒ'ǒyǎn. Tehñ quiǎhxǒ'p jaduhñ. Cab hajxy jaduhñ mdehñ miǎná'anǎt nebiǎ niippǎdǒjc-hajxy miǎna'añǎn cooc mǎdaaxpo'o yhabety, mǎnitǎc hajxy je'e yajpǎdǒ'ǒga'añ.

³⁶ Pǒñhǒch jáya'ay ja'a nmǎdia'agy xyajmǎbǒgǎanǎp, xoonǎda'agaamb hajxy je'e coe hajxy je'e may miǎbǒga'añ. Quipxy hajxy miǒǒdxoonǎda'aga'añ ja'a Diosmǎdia'agy hajxy jayǒbajt yaghawa'xǒǒchóhñǎbǎ. Ja'a hajxy yajmǎbǒgǎanǎbǎ, je'edshajxy cǒjxta'axiǒǒ jugyhadaamb nebiǎ Dios jiugyhatiǎn.

³⁷ Tǒyhajt je'eduhñ nebiǎ jáya'ayhajxy miǎna'añǎn: “Wiingpǎ je'e niip, y wiingpǎ je'e yajpǎdǒ'p.”

³⁸ Tǒǒch mijts nwiinguexy coe mijts jáya'ay ja'a Diosmǎdia'agy hajxy myajmǎbǒgǎt, ja'a hajxy hijty tǒǒ miǎdoyhǎtiǎbǎ. Wiingpǎ hajxy jayǒbajt yajmǎdoyhajt; mijts hǒxhaam myajmǎbǒgaamb —nǒm Jesús miǎnaañ.

³⁹ Ja'a Sicarpǎ jáya'ayhajxy, nǎmay hajxy je'eduhñ miǎbǒjcǎ ja'a Jesús miǎdia'agy. Paady hajxy je'eduhñ miǎbǒjcy coe ja'a to'oxiǒjc hǎnajty jaduhñ

tøø ñägapxy cooc yhäxøøgwiinmahñdy cøjx ñajuøøyyäxä, møød cooc cøjx yhäwaandøøwäxä. Jimä Sicarpä jäya'ayhäjxy hänajty xiøønaxy Samarianaax-ooty.

⁴⁰ Mänit Jesús hoy miänuu'xta'agyii coo jim miähmó'øwät maa quiajptha-jxiän. Mänit jiaančh mähmøøyy. Mejtsxøø je'eduhñ jim yhiyty.

⁴¹ Coo Jesús jiaac yajmøødmädiaacy ja'a jäya'ayhäjxy, nämay ja'a miädia'agy jiaac mähøjcäxä.

⁴² Mänitä to'oxiøjc hajxy ñämaayy:

—Høxtahm̄ds miičh jim hoy mnägapxiän cajptooty, cab højts tu'joot nmäbøjcy. Pero coo højts jiiby ngädaacy, mänit højts je'e xtiehm̄ yhamd-soo møødmädiaacy. Mänit højts nmäbøjcy. Mänit højts nnajuøøyy coo yø'øyá'adiäm Cristohaty. Yø'øds hajxy xyajnähwa'ads xyajcuhwa'adsaanäm nägøxiä mäduhñtiä hajxy yaa ndsänäayyäm hädaa yaabä naaxwiin.

⁴³ Nägooyyä mejtsxøø yhäbejty, mänit Jesús hajxy tiu'ubøjñä, ñøcxnä hajxy jim Galilea.

⁴⁴ Hamdsoo Jesús je'eduhñ miänaañ cooc hajxy quia'a wiingudsähgø'øyii maa yhamdsoo cajptän, ja'a Diosmädia'agy hajxy yaghawa'xøøbiä.

⁴⁵ Pero coo Jesús jim miejch Galilea maa yhamdsoo cajptän, mänit yajpoo'xä haxi'ig haxón. Paadiä Jesús yajpoo'xä, coo jäya'ayhäjxy hänajty tøø yhixy hoy-yagjuøøñäjatypä, nebiaty Jesús jim tøø tiuñ tøø yajcähxø'øgy Jerusalén ja'a pascuaxøøjooty.

⁴⁶ Mänit Jesús jim jadähooc miéjtscombä Caná de Galilea maa ja'a nøø hänajty tøø yajwa'añguiojjiän vino. Jimä gobiernä mioonsä hänajty tu'ug tøø miech. Tu'ugä yhuung hänajty tøø pia'ambety jim Capernaum.

⁴⁷ Coo ja'a gobiernä mioonsä miädoyhajty coo Jesús hänajty tøø miech jim Galilea, mänit Jesús hoy miänuu'xta'agyii coo yhuung nøcxy yajmøcpøjcäxä. Møjta'agy yhuung hänajty.

⁴⁸ Mänitä gobiernä mioonsä ñämaayyä:

—Mijs, cahnä hajxy mmäbøcyñä, hoy hajxy tøø mja mädoxyaty cooč hoy-yagjuøøñäjatypä tøø nduñ. Mänit hajxy mmäbøga'añ coo hajxy mhuuc tehñ yhixa'añ.

⁴⁹ Mänitä gobiernä mioonsä miänaañ:

—Tsógäm, jam hadø'øchä; chámhøch nhuung yho'ogaanä.

⁵⁰ Mänit Jesús miänaañ:

—Wiimbit jootcujc. Cabä mhuung yho'oga'añ.

Mänit Jesús miädia'agy jiaančh mähøjcäxä. Mänit gobiernä mioonsä jiaančh wiimbijty.

⁵¹ Tu'haamhädaacpä ja'a mioonsähajxy jiøjcubaadøøyyä. Mänit yhawáanäxä cooc yhuung hänajty tøø jiaančh møcpøcy.

⁵² Mänit yajtøøyy mädunajtä hänajty tøø miøcpøcy. Mänit ñämaayyä:

—Häxøøy ja'a tiøy tiøjch cujyxiøøho'ogy.

⁵³ Mänit ja'a gobiernä mioonsä jiaančh jahmiejch coo Jesús hänajty häxøøyhajty cujyxiøøho'ogy tøø miäna'añ cooc yhuung miøcpøga'añ. Mänit Jesús ja'a miädia'agy cøjx miäbøjcäxä mäduhñtiä hajxy tiu'ugtøjcä.

⁵⁴ Miämetsc-hoocpä Jesús je'eduhñ yajcähxø'cy ja'a hoy-yagjuøøñäjatypä jim Galilea. Mänit je'eduhñ yajcähxø'cy coo hänajty tøø yhoj Judea.

5

¹ Mänit Jesús ñøcxcumbä jim Jerusalén xøøhajpä. Ja'a judíos xiøøhajxy hänajty jadäänäp.

² Jimä tsiidaact jaduñ tu'ug xiøhaty Betzata, ja'a hebreohayuuc-haamby. Jimä tsiidaact mädøyyä maa ja'a meegtoo'taactän. Mägooxc-hit ja'a tøjwiing wäditiä jim maa ja'a tsiidaactän.

³ Mayyä pa'amjäya'ay hänäjty jim quio'na'ay møødä wiindspä møødä tecymia'adpä møødä tecymiucypä. Jim hajxy hänäjty yhäixy coo ja'a nøø jaduñ jiädsenyó'oyät.

⁴ Wiingumänaa ja'a Dios mioonsä tsajpootypä hänäjty tu'ug quiäda'agy nøøyagiädsenyohbiä maa ja'a tsiidaactän. Pero cab hänäjty quiähxø'øgy. Nägooyy ja'a nøø hajxy hänäjty jaduñ yhäixy tiägø'øgy jädsenyohbiä, mänitä pa'amjäya'ayhajxy tiägø'øgy nøøjooty. Ja'a hänäjty jayøbajt tehñ tiägøøchohmbä, je'eds hänäjty jaduñ møcpøjp nidiuhñ. Hoy tyii pa'amä hänäjty jia møødä, yajnaxyp je'e.

⁵ Jim jäya'ay hänäjty tu'ug pia'amgo'na'ay. Miähii'xmajmocxtägøøgjumøjtpä hänäjty jim tøø yhity.

⁶ Coo Jesús ja'a pa'amjäya'ay jaduñ yhäixy, mänit Jesús yajtøøyy:

—Nejy, mmøcpøgaambä.

⁷ Mänitä pa'amjäya'ay yhadsooyy:

—Cábøch nbøn pønøch xpiädá'agäp nøøjooty coo ja'a nøø tiägø'øgy jädsenyohbiä. Cooch hänäjty jii by nja tægø'øwa'añ, tøø wiingpä hänäjty tiägøøñä.

⁸ Mänit Jesús miänaañ:

—Pädø'øg, yajpädø'øg mdo'ogy, yohñä.

⁹ Mänitiä pa'amjäya'ay jaduñ jiaanç møcpøjcy. Mänitä miaabejt jiaanç yajpadø'cy yo'oyø'cy. Poo'xxiøøjooty hänäjty je'e.

¹⁰ Mänitä judíoshajxy miänaañ, ñämaayy ja'a craa ja'a hänäjty tøø yajmøcpøgyíjábä:

—Poo'xxiøø jäda'a. Cabä cuhdujt jaduñ myiñ coo yø'ø mdo'ogy jäda'a mgapwädität.

¹¹ Mänit jäya'ay yhadsooyy ja'a hänäjty tøø miøcpøquiäbä:

—Jaayá'ayhøch tøø xyajmøcpøquiäbä, je'eç jaduñ xñämaayy cooch ndo'ogy nyajpädø'øgät.

¹² Mänit miäyajtøøwa:

—Pøn jaduñ tøø xñäma'ay coo mdo'ogy myajpädø'øgät, coo myo'oyø'øgät.

¹³ Cabä mähdiøjc ñä'a hadsooyy. Hix, jaanç tehñ ñämay jäya'ayhajxy hänäjty jim. Tøø Jesús hänäjty yhäixtägóoyyänä. Paadiä mähdiøjc hänäjty quia'a najuø'øgy waamb yhadsówät.

¹⁴ Mänit cueeñtiä, mänit Jesús yhäixcumbä maa ja'a tsajtøjc hamøjpän. Mänit Jesús miänaañ:

—Huuc madow, chaa miiç nnämä'awät, tøø miiç mmøcpøcy. Ca'a tii pojpa cädieey mduñ coo maas haxøøg mjädät.

¹⁵ Mänitä mähdiøjc hoy ñägapxy maa ja'a judíoshajxiän cóodäm Jesús je'e, ja'a hänäjty tøø miäyajmøcpøquiäbä.

¹⁶ Coo Jesús ja'a hoy-yagjuøøñäjatypä yajcähxø'cy ja'a poo'xxiøøjooty, paadiä judíos Jesús hajxy miädsiphajty; paady hajxy wyiinmaayy nebiä Jesús hajxy yaghó'ogät.

¹⁷ Mänit Jesús miänaañ, ñämaayy ja'a judíoshajxy:

—Cábøch nDeedy mänaa tiuumbädø'øgy. Jäda'anäbaadyñä tiuñ. Páadyhøch jaduñ nbadiumbä, hoy jaduñ jia poo'xxiøøjootiä.

¹⁸ Paady hajxy jia wiinmaayy nebiä Jesús hajxy yaghó'ogät, coo Jesús ja'a hoy-yagjuøøñäjatypä yajcähxø'cy ja'a poo'xxiøøjooty, møød coo jaduñ miänaañ cooc Dios Tieedyhaty, møød coo yajnimiäbaatä nebiä Diosän.

19 Mänit Jesús miänaañ, ñämaayyā ja'a judíoshajxy:

—Chaads mijts tehñ tiøyhajt nnámá'awät, cáboch nhamdsoo tuung nduñ; jadúhñhøch nduñ nébiøch nDeedy jim tiuñän. Nebiátyhøch nDeedy tiuñ, jadúhñhøch nduumbä.

20 Xchójpøch nDeedy. Xyajnáhixøøbiøch nebiaty je'e tiuñ. Maas hoy-yagjuøøñátyhøch nDeedy xyajnáhixø'øwa'añ neby hajxy myagjuø'owät.

21 Yagjuypiojpiøch nDeedy ja'a ho'ogyjiäya'ay. Jaanä jadúhñhøch nyagjujypiøgaambä, pønjátyhøch nyajnáhdíjap.

22 NDéedyhøch, cab je'e pøñ yajcumädowa'añ. Høøch je'e tøø xquiuhdujtmø'oy cooçh jäya'ay nyajcumädowät, ja'a hajxy ca'a mädia'agymiäbøjpä.

23 Páadyhøch jaduhñ tøø xquiuhdujtmø'oy cooçh jäya'ayhajxy ween xwyiingudsähgø'øy nébiøch nDeedy wyiingudsähgø'øyijän. Pønjátyhøch hajxy xquia'a wiingudsähgøøby, ni NDéedyhøch hajxy xquia'a wiingudsähgøøyyäbä, ja'açh tøø xquiéxiäbä.

24 'Chaads mijts tehñ tiøyhajt nnámá'awät, pønjaty højts nmädia'agy hajxy xmiäbøgaanäp møødhøch nDeedy, tøø ja'a haxøøgpä hajxy quiøxy najtshixøøñä. Je'eds hajxy cøjxta'axiøø jugyhadaamb nebiä Dios jiugyhatiän. Cab hajxy je'e mänaa quiumädowa'añ.

25 Ja'a hajxy ca'a mæbøjpä, tøø yhabaady cooçhä nmädia'agy hajxy xmiäbøgaanä. Cooçhä nmädia'agy hajxy jaduhñ xmiäbøjcät, jaduhñ hajxy jiugyhada'añ cøjxta'axiøø nebiä Dios jiugyhatiän.

26 Miøødhøch nDeedy cuhdujt coo jäya'ayhajxy ñámá'awät coo hajxy jaduhñ jiugyhádat tsajpootyp cøjxta'axiøø. Je'eçh cuhdujt tøø xmio'oy cooçhä jäya'ayhajxy jaduhñ nnámá'awät coo hajxy jim yhídät cøjxta'axiøø.

27 Cooçh je'eduhñ tøø xwyiinguexy, páadyhøch jaduhñ tøø xquiuhdujtmø'oy cooçh nyajnáhdíjät nebiaty jäya'ayhajxy jiädät.

28 Ca'a hajxy myagjuø'øy. Habaadaamb je'e cooçhä ho'ogyjiäya'ayhajxy nyaaxpædsøma'añ. Mänitøch nmädia'agy hajxy xmiädowaanä.

29 Mänit hajxy nägøxiä quiøxy jutpædsøma'añ mäduhñtiä hajxy hånajty tøø yho'ogy. Ja'açh nmädia'agy hajxy hånajty tøø xmiäbøjcäbä, je'eds hajxy nøcxaamb tsajpootyp. Ja'açh nmädia'agy hajxy hånajty tøø xquia'a mæbøjcäbä, je'eds hajxy ca'awaamb haxøøgtuum.

30 'Nyajtødiägøøbiøch nébiøch nDeedy xñäma'ayän. Ca'a yhøøchä nhamdsoo wiinmahñdy nyaghijpy. Ngudiúumbiøch jaduhñ nébiøch nDeedy xmiägapxy xyhane'emiän. Cooçh jaduhñ ngudiuñ, páadyhøch ja'a tøyhajt nyecy cooçh nyajtødiägø'øy.

31 Cooçh häxøpy hamdsoo nniñägapxyii, mänit hajxy cu mmänaañ cooçhä tøyhajt nga'a mädia'agy.

32 Jiichä wiingpä xñägapxy; nnajuøøbiøch coo ja'a tøyhajt je'eduhñ yecy. Dióshøch je'e xñägapxp.

33 Tøøch mijts hoy xyajtøy maa Juangän pø Dióshøch tøø xjiaançh quexy. Mänitä Juan ja'a tøyhajt hajxy xmiooy.

34 Pero høøch, ca'a jiäyá'ayhøch tøø xyhawaanä cooçh Dios tøø xquiexy. Nyagjahmiéjchpøch mijts nebiä Juan hajxy tøø xyhawaanän cooçh Dios tøø xquiexy, neby hajxy jaduhñ mnähwa'ads mguhwá'adsät.

35 Yajwa'xyp ja'a Juan ja'a Diosmädia'agy hijty. Xyajnáhixøøby hajxy hijty neby hajxy mnähwa'ads mguhwá'adsät. Hoy ja'a miädia'agy hajxy hijty mmädóowä. Pero cabä miädia'agy hajxy hijty mmæbøgaanä.

36 Ndúumbiøch nébiøch nDeedy tøø xyhane'emiän. Cooçh jaduhñ nduñ, cähxø'p jaduhñ cooçh nDeedy tøyhajt tøø xquiexy. Cooçh hajxy jaduhñ

xyhixy nébiøch nduñän, páquiøch nmädia'agy hajxy xmiäbøjcät, hoy ja'a Juan ja'a miädia'agy hajxy tøø mga'a ja mæbøjcä ja'a høøchcøxpä cooçh xñägapxy.

³⁷ Ja'a nDeedyhøch, ja'açh tøø xquiéxiäbä, høøchcøxpä jiihy tøø xyajcu-jaayii maa Diosmädia'aguiän. Pero cab hajxy mnajuø'ø y cooçh nDeedy ja'a miädia'agy jaduhñ nmädiaacä. Cab hajxy mnajuø'ø y cooçh jaduhñ nduñ nébiøch nDeedy tiuñän.

³⁸ Pero cábøch mijts nDeedy ja'a miädia'agy tøø xmiäbøjcä, ja'açh tøø xquiéxiäbä. Coø hajxy häxøpy tøø mmæbøcy, cu xmiäbøjcøch mijts ja'a nmädia'agy.

³⁹ Myajmädiaac-ho'py ja'a Diosmädia'agy hajxy, ja'a jecy mähmøøyyäbä cujaay. Paady hajxy jaduhñ myajmädiaac-ho'ogy coo tyijy hajxy jaduhñ mjugyhádat nebiä Dios jiugyhatiän. Chaads mijts hajxy nnámá'awät, cooçh nmädia'agy hajxy xyajtúunät, mänit hajxy jaduhñ mjugyhádat. Pero hóyhøch Diosmädia'agy xjia nägapxy,

⁴⁰ cábøch mijts ja'a nmädia'agy xmiäbøgaanä. Coøch mijts nmädia'agy hamuumdu'joot xmiäbøjcät, mänit hajxy mæbøcy mjugyhádat nebiä Dios jiugyhatiän.

⁴¹ 'Cábøch nmøjpäda'agy, hóyhøch jäya'ayhajxy xquia'a ja wiingudsähgø'ø y.

⁴² Nnajuøøbiøch coo mijts Dios mga'a tsocy.

⁴³ NDeedyhøch tøø xjia hamdsoo quexy. Pero cábøch mijts nmädia'agy xmiäbøgaanä. Coø wiingpä miédsät, je'eds mijts ja'a miädia'agy paquiä mmæbøgaanäp.

⁴⁴ Cábøch mijts nmädia'agy hoy xmiäbøgaanä. Jia tsojpy ja'a mjoothajxy jaduhñ coo jäya'ay hajxy xwyiingudsähgø'øwät. Pero cabä mjoothajxy chocy coo Dios hajxy xchógät.

⁴⁵ Ca'a yhøøchä mijts jimñ nnäxø'øwø'øwaamby maa Dios wyiinduumän. Ja'a Moisésäts mijts jaduhñ xñäxø'øwø'øwaamb. Mmänaamb hajxy jaduhñ coo tyijy Diosmädia'agy hajxy mmæbøcy, ja'a Moisés jecy quiujähyyäbä.

⁴⁶ Coø mijts cu mjaançh mæbøjcy, cu xmiäbøjcøch nmädia'agy hajxypä. Høøchcøxpä Moisés jaduhñ jecy quiujahy.

⁴⁷ Pero pø cab hajxy mmæbøga'añ nebiä Moisés jecy quiujahyyän, ni høøchä nmädia'agy hajxy xquia'a mæbøgaanäbä.

6

¹ Cumejtspo'o cudägøøgpo'o Jesús jimñ ñøcxy mejyhawiimb. Mejtstu'u ja'a mejy xiøhaty Galilea møød Tiberias.

² Nämäy Jesús hänajty pianøcxyii jäya'ayhajxy. Paady hänajty pianøcxyii coo hoy-yagjuøøñäjatypä hänajty tøø yajcähxø'øgy, møød coo pa'amjäya'ay hänajty tøø yajmøcpøcy.

³ Mänit Jesús hajxy jimñ wyiimbejty maa ja'a tunguhdumän møødä ji-amiøødhajxy. Mänit hajxy jimñ yhøxtaacy tunguhdum.

⁴ Mäwiingoomb ja'a pascuaxøø hänajty, ja'a judíoshajxy yagjätäbä.

⁵ Mänit Jesús wyiinhee'ppejty coo jäya'ay hänajty may pianøcxyii. Mänit Jesús ja'a Felipe ñämaayy:

—Maa ja'a caayyøøc hajxy nbáatämät coo yø'øya'ay hajxy nyaicáayyämät nämäy.

⁶ Paadiä Jesús jaduhñ miänaañ, yhuuc nä'ä mädia'agyhixaamby hänajty waambä Felipe hänajty yhadsowa'añ. Tøø Jesús hänajty hamdsoo wyiinmay nebiä jäya'ayhajxy hänajty yajcaya'añii.

⁷ Mänitä Felipe yhadsooyy:

—Ni mejtsmägo'x denariojuy ja'a tsajcaagy quia'a mädøyhádät, hoy hajxy tu'lii'xyjaty cu nja móoyyäm.

⁸ Andrés ja'a Jesús ja'a jiamioðod hānajtý tu'ug xiøhaty, ja'a Simón Pedro piuhya'ay. Mānitā Andrés ja'a Jesús ñāmaayy:

⁹ —Chaadsä pigāna'c ja'a cebadatsajcaagy mioðdā māgooxcā, mōødā hacx metscā. Pero cab jaduhñ miädøyhádät. Hix, majiäya'ay yø'øduhñ.

¹⁰ Mānit Jesús miānaañ:

—Nāma'aw hajxy ween hajxy yhøxta'agy.

Møj jim mioðjootā. Jim hajxy yhøxtaacy ja'a māgooxmilpā ya'adiøjc-hajxy mōødā to'oxiøjc-hajxy hawiing.

¹¹ Mānit Jesús ja'a tsajcaagy quioonðsooyy. Mānit Jesús Dios jaduhñ ñāmaayy: “Dioscujú'uyäp.” Mānit Jesús ja'a jiamioðod ja'a tsajcaagy miooyy. Mānitā jiamioðod ja'a tsajcaagy hajxy tiägøøyy yajwa'xpā maa jāya'ayhajxy hānajtý yhäña'ayän. Mōødā hacx hajxy yajmāwa'xøøbiä. Jaduhñtiä jāya'ayhajxy miooyyā mäduhñtiä hajxy hānajtý quiaya'añ.

¹² Coø hajxy quiaabiädøøyy, mānit Jesús ja'a jiamioðod ñāmaayy:

—Yajpādø'øg tsajcaagyquiaadiuc hajxy mōødā hacxtsu'tstuc, neby hajxy jaduhñ nga'a nähguécāmät.

¹³ Mānit ja'a tsajcaagyquiaadiuc hajxy cøjx yajpādø'øgy mōødā hacxtsu'tstuc. Majmetscach hajxy yaghujch ja'a tsajcaagyquiaadiuc.

¹⁴ Coø jāya'ayhajxy yhiijxy nebiä Jesús ja'a tsajcaagy hānajtý tøø ya-jwa'añguiojjiän, mānit hajxy tiägøøyy mānaambä:

—Pues tehñ tiøyhajt, yø'øds je'e, ja'a hajxy hijty nhahíxämbä coø hajxy hijty xñāmedsāañām nebiä Diosmādia'agy miāna'añän.

¹⁵ Coø Jesús ñajuøøyy coø hānajtý nøcxy piäda'aga'añii gobiernä mädsibø'øbä, mānit jim chohñnä. Mānit jim ñøcxnä nidiuhñ tunjoot.

¹⁶ Coø chuujøøyy, mānitā Jesús jiamioðdhajxy yhädaacy mejypia'a.

¹⁷ Mānit hajxy tiägøøyy barcojooty. Mānit hajxy tiu'ubøjcy. Jim Capernaum hajxy hānajtý ñøcxa'añ mejyhawiimb. Wiingoods hānajtý. Cahnä Jesús ja'a jiamioðod hānajtý piaadyñä.

¹⁸ Mānitā poj piädø'cy møc. Mānitā mejy chajcuju cøxp.

¹⁹ Māgooxkilómetro tädujkilómetro hajxy hānajtý tøø ñøcxy, mānitā Jesús hajxy yhiijxy coø ja'a barco hānajtý tøø ñajtspaadø'øyy. Yohby Jesús hānajtý mejywyiing. Mānitā jiamioðdhajxy chähgøøbiøjcy.

²⁰ Mānit hajxy ñāmaayyä:

—Ca'a hajxy mdsähgø'øyy; Jesúshøch høøch.

²¹ Mānit hajxy jiootcugøøyy. Mānitā Jesús yajtägøøyyä barcojooty. Mānitā hajxy jim miejtsnä mejypia'a maa hajxy hānajtý ñøcxiän.

²² Cujaboom, jimñä majiäya'ayhajxy hānajtý mejyhawiimbnä, maa hajxy hānajtý tøø yajcayiijän. Ñajuøøby hajxy hānajtý coø Jesús hānajtý tøø quia'a mōødtu'ubøgyii ja'a jiamioðdhajxy quipxy. Hijxä ja'a Jesús jiamioðdhajxy coø hajxy tiu'ubøjcy barcojooty ja'a majiäya'ayhajxy. Jagoo barco hānajtý tu'ug; je'e hajxy hānajtý tøø yajtu'ubøcy.

²³ Mānitā barco hajxy yajmejch wiingpā, ja'a Tiberiastsohmä. Jim hajxy miedsøøyy maa jāya'ayhajxy hānajtý tøø chajcaagyquiayyän, mānaa Jesús ja'a Dioscujú'uyäp yequiän.

²⁴ Coø ja'a majiäya'ayhajxy yhiijxy coø Jesúshajxy quia'a jiijän, mānit hajxy tiägøøyy barcojooty. Mānit hajxy tiu'ubøjcy Jesúshøxtaabiä. Jim hajxy ñøcxy mejyhawiimb jim Capernaum.

²⁵ Coø hajxy jim miejch mejyhawiimb, mānitā Jesús hajxy jim piaaty. Mānit Jesús hajxy ñāmaayy:

—Wiindsón, mänaa mmejch.

²⁶ Mänit Jesús miänaañ:

—Chaads mijts tehñ tiøyhajt nnämä'awät, páadyhøch mijts hijty xyhøxta'ay cooçh mijts je'e cu'uxiä nyajcaayy. Cábøch mijts je'e xmiäyajtøwa'añ ti-iguiøxpøch ja'a hoy-yagjuøøñäbä coo nyajcähxø'cy.

²⁷ Paady hajxy mduñ, jaduhnä cay hu'ugy hajxy mbaady. Pero chaads mijts nnämä'awät jadunajtä coo hajxy mhøxtá'awät neby hajxy mjugyhádat nebiä Dios jiugyhatiän. Høøch mijts cuhdujt nmo'owaamby coo hajxy jaduhn mjugyhádat. Páadyhøch mijts jaduhn nmo'owa'añ, cooçhä Dios tøø xquihdujtmø'oy, høøch ja'a Diosquexypä.

²⁸ Mänit Jesús miäyajtøøwa:

—Neby højts ngudiúnät nebiä Dios choquiän.

²⁹ Mänit Jesús yhadsooyy:

—Chojpy ja'a Dios cooçh mijts ja'a nmädia'agy xmiäbøjcät, ja'açh tøø xquiéxiäbä.

³⁰ Mänit Jesús miäyajtøøwägumbä:

—Tii hijxtahñd hoy-yagjuøøñäbä myajcähxø'øgaamby neby højts miich ja'a nmädia'agy jaduhn nmäbøjcät coo miich ja'a Dios tøø xquiexy.

³¹ Ja'a hajxy hijty nhaphájtäm ndeedyhájtäm ja'a jecypiä, jimä maná hajxy quiaayy maa hñajty pøn quia'a tsäna'ayän. Moisés ja'a maná ya-jwa'añguioj. Ja'a maná, nebiä tsajcaaguiän je'e. Jiiby jaduhn myiñ cujaay maa ja'a Diosmädia'aguiän: “Yajcaayyä jäya'ayhajxy ja'a tsajcaagyhajpä ja'a tsajpootyptsohmä. Dios jaduhn quejx.”

³² Mänit Jesús yhadsooyy:

—Chaads mijts tehñ tiøyhajt nnämä'awät: Caha Mioisésä mijts ja'a tsajcaagy xyajnäguejx ja'a tsajpootyptsohmä. Dios, je'eds hajxy je'e xyaj-näguejx. Je'eds hajxy je'e xquihdujtmø'owaamby coo hajxy jim mdägø'owät tsajpootyp.

³³ Ja'a Dios tøø quiéxiäbä, jim tsajpootyp je'e tøø chooñ. Paady je'e yaa tøø quiäda'agy nejy mijts xquihdujtmø'owät coo hajxy mjugyhádat nebiä Dios jiugyhatiän.

³⁴ Mänit Jesús ñämaayyä:

—Højts yøø tsajcaagy móoyyäc cøjxta'axiøøbä, ja'a tsajpootyptsohmä.

Paady hajxy jaduhn miänaañ coo hajxy quia'a wiinjuøøyy coo Jesús jaduhn ñiñänøøma hamdsoo coo je'e tøø quiexyii ja'a Dios.

³⁵ Mänit Jesús miänaañ:

—Høøch je'e, ja'a Dios tøø quiéxiäbä. Cuhdujtyéjpøch coo hajxy jim tiägø'owät tsajpootyp pønjátyhøch ja'a nmädia'agy xmiäbøjcäp. Cøjxta'axiøø hajxy jim yhidät.

³⁶ Pero mijts, cábøch ja'a nmädia'agy hajxy tøø xmiäbøjcä, hoy hajxy tøø mja hixy cooçhä hoy-yagjuøøñäbä tøø nja yajcähxø'øgy.

³⁷ Pønjátyhøch ja'a nDeedy jaduhn xyajcø'øwaanøøby, je'eçhä nmädia'agy xmiäbøgåañäp. Nguhbøgåambiøch hajxy je'e.

³⁸ Páadyhøch tøø ndsooñ tsajpootyp cooçh ngudiúnät nébiøch nDeedy xy-hane'emiän, ja'açh tøø xquiéxiäbä. Cábøch ja'a nhamdsoo wiinmahñdy nyaghida'añ.

³⁹ Cábøçhä nDeedy miäna'añ coo hajxy haxøøgtuum quiá'awät, ja'açh hajxy tøø xyajcø'øwaanø'øyäbä, coo ja'a xøø jumøjt jaduhn yhabéjnät. Pero jaduhn miäna'añ cooçh hajxy nyajnøcxät tsajpootyp.

⁴⁰ Jadúhnhøch ja'a nDeedy miäna'añ coo hajxy cøjxta'axiøø jiugyhádat neby jaaya'ay jiugyhatiän, pønjaty jaduhn najuøøby cooçhä Dios xyHuunghaty,

pønjátyhøch ja'a nmädia'agy xmiäbójcäp. Je'ečh hajxy jim nyajnøcxaamby tsajpootyp coo ja'a xøø jumøjt yhabéjnät.

⁴¹ Coo Jesús miädiaacpädøøyy, mänit tiägøøyyä wiingapxpéjtäbä ja'a judíoshajxy. Paadiä wyiingapxpejtä coo hñajty tøø miäna'añ coo jim chooñ tsajpootyp.

⁴² Jaduhn hajxy ñiñämaayyä:

—Jesús yø'øya'ay xiøhaty; José yhuung yø'ø. Nhixyhájtäm ja'a tiaj tieedy yø'ø. Høhndaacp yø'øduhn cooc tyijy jim tøø chooñ tsajpootyp.

⁴³ Mänitä Jesús ja'a judíos yhojy:

—Ca'a hajxy mgapxtägoonä.

⁴⁴ Pønñhøch ja'a nDeedy yajnähdiipy, je'ečhä nmädia'agy xmiäbøgáanäp. Je'ečh nyajnøcxaamby tsajpootyp coo ja'a xøø jumøjt yhabéjnät.

⁴⁵ Jiiby jaduhn myiñ cujaay maa ja'a Diosmädia'aguiän coo Dios jäya'ay nägøxiä yajnähixø'øwa'añ. Pønjátyhøch ja'a nDeedy ja'a miädia'agy tøø xwyi-injuøøyyä tøø xyhabøjcä, je'edshøch ja'a nmädia'agy tøø xmiäbøjcä.

⁴⁶ 'Cábøch nDeedy mänaa yhixyii jäyá'ayäm; høøch nidiuhm tøø nhixy. Jímhøch ndsooñ Dioswiinduum.

⁴⁷ Chaads mijts tehñ tiøyhajt nnämä'awät, pønñhøch nmädia'agy xmiäbójcäp, je'eds jugyhadaamb cøjxta'axiøø nebiä Dios jiugyhatiän.

⁴⁸ Høøch hajxy jaduhn jim nyajtägø'øwaamby.

⁴⁹ Ja'a nhaphájtäm ndeedyhájtämhajxy, ho'c hajxy je'e, hoy ja'a maná hajxy jia caayy pactuum. Ja'a maná, mäjaayejc jaduhn. Pero paquiä ja'a miäjaahajxy quiøjxy.

⁵⁰⁻⁵¹ Høøch, páadyhøch tøø ndsooñ jim tsajpooty nébiøch jäya'ayhajxy jim nyajtägø'øwät. Jim hajxy yhida'añ cøjxta'axiøø pønjátyhøch nmädia'agy xmiäbójcäp. Nnähdugáambiøch ja'a nni'x ja'a ngopc. Nnähho'tu'udáambiøch jäya'ayhajxy nägøxiä.

⁵² Mänitä judíoshajxy yajcapxiøøyy ja'a Jesús ja'a miädia'agy:

—Nejy, xmio'owáanäm yø'øya'ay ñi'x quiopcäda'a coo ndsú'tsämadä.

⁵³ Mänitä Jesús ñämaayy ja'a judíoshajxy:

—Chaads mijts tehñ tiøyhajt nnämä'awät, høøch ja'a Diosquexypä, cooçh mijts ja'a nni'x ja'a ngopc xquia'a tsú'tsät, cooçh mijts ja'a nnø'ty ja'a njoot xquia'a húucät, cab hajxy jim mdägø'øwät maa Dioswiinduumän.

⁵⁴ Pønjátyhøch ja'a nni'x ja'a ngopc xchú'tsäp, pønjátyhøch ja'a nnø'ty ja'a njoot xyhúucäp, je'eds je'e hidaamb cøjxta'axiøø jim tsajpootyp.

⁵⁵ Tsu'tsøc-høch ja'a nni'x ja'a ngopc; huucøc-høch ja'a nnø'ty ja'a njoot.

⁵⁶ Pønjátyhøch ja'a nni'x ja'a ngopc xchú'tsäp, pønjátyhøch ja'a nnø'ty ja'a njoot xyhúucäp, je'ečh jaduhn nnänøømby ja'a nmädiá'agyhøch hajxy xmiäbójcäp. Je'ečh hajxy nguhdujtmø'owaamby coo hajxy yhidät cøjxta'axiøø jim tsajpootyp. Tu'ugmädiá'agyhøch hajxy nmøødhida'añ.

⁵⁷⁻⁵⁸ Ja'a nDéedyhøch, ja'ačh tøø xquiéxiäbä, je'ečh jaduhn tøø xquiuhdujtmø'oy cooçh jäya'ayhajxy jim nyajnøcxät tsajpootyp, pønjátyhøch ja'a nmädia'agy xmiäbójcäp. Jim hajxy yhida'añ cøjxta'axiøø. Ja'a nhaphájtäm ja'a ndeedyhájtäm, ho'c hajxy je'e jequiän, hoy ja'a maná hajxy jia caayy. Pero pønjátyhøch ja'a nmädia'agy xmiäbójcäp, cab hajxy quia'awa'añ haxøøgtuum mänaa.

⁵⁹ Jaduhn Jesús jim miädiaacy Capernaum coo hñajty yajnähixø'øy tsajtøgooty maa ja'a judíos ja'a Dios hajxy hñajty wyiingudsähgø'øyän.

⁶⁰ Coo Jesús ja'a jiamiøødhajxy jaduhn jim miädooyy, mänit hajxy näje'e miänaañ:

—Cab hajxy jaduhn nguhbójcämät; tsip xex yø'ø mädia'agy jaduhn.

⁶¹ Ñajuøøyy Jesús jaduhñ nebiaty hajxy hānajtý miādia'aguiān. Mānit hajxy ñāmaayyā:

—Nejy, cábøçhā nmādia'agy hajxy xjiøjpøgø'øwāanājā.

⁶² Cooçh mijts xyhíxāt cooçh hānajtý jim nnøcxy tsajpootyp, mánitøch mijts ja'a nmādia'agy xmiäbøgaanā cooçh jim ndsooñ tsajpootyp, høøçh ja'a Diosquexyypā.

⁶³ Ja'a mjuøhñdyhajxy, je'eds hajxy yaa xyagjugyhajp. Ja'a mni'x ja'a mgopc-hajxy, cab hajxy je'e yaa xyagjugyhaty. Cooçh mijts ja'a nmādia'agy xmiäbøjcāt, mānit hajxy mdägø'øwāt jim tsajpootyp.

⁶⁴ Pero cahnā hajxy nägøxiā mmäbøcyñā.

Paadiā Jesús jaduhñ miānaañ, ñajuøøby hānajtý jaduhñ pønajatý hānajtý je'e ca'a mādia'agymiäbøgaamb. Ñajuøøby hānajtý je'ebā pøn hānajtý yegāanāp ho'cøøc. Jäguemiā Jesús jaduhñ ñajuøøyy mānaa ja'a miägu'ughajpähajxy tiägø'øyān yajñähixøøbiä.

⁶⁵ Mānit Jesús miānaangumbä:

—Páadyhøch mijts jaduhñ nnāmaayy: “Pønhøch ja'a nDeedy yajñähdiypy, je'eçhā nmādia'agy xmiäbøgāanāp.”

⁶⁶ Coo Jesús jaduhñ miādiaacpādøøyy, mánitā jiamiøødhajxy nāmay wyiimbi-jnā. Cabā Jesús hajxy hānajtý miøødwāditaanā.

⁶⁷ Mānitā Jesús ja'a jiamiøød miäyajtøøyy ja'a nāmajmetspähajxy:

—Nejy, xpiuhwa'adsāambøch mijtspā.

⁶⁸ Mānitā Simón Pedro yhadsooyy:

—Wiindsøn, caj. Tii højts miich coo nnä'ä puhwá'adsāt. Miich højts je'e xyajñähixøøby neby højts jim ndägø'øwāt tsajpootyp.

⁶⁹ Nmäbøjcāp højts miichā mmādia'agy. Nñajuøøby højts coo jim tøø md-sooñ maa Diosān, coo mGristāhaty, ja'a højts hijty nhahijxypā, ja'a Dios hijty quiexaambiä.

⁷⁰ Mānitā Jesús yhadsooyy:

—Páadyhøch mijts tøø nwiimbiy nébiøch hajxy jaduhñ xmiøødwādítāt, mijts ja'a nāmajmetspā. Pero xii hajxy tu'jäya'ay mmøødä, ja'a møjcu'uwiinmahñdymøødpä.

⁷¹ Ja'a Judas jaduhñ nänøøma, ja'a Simón Iscariote yhuung. Ja'a Judas, je'edsā Jesús hānajtý yegaamb ho'cøøc, hoy ja'a Judas ja'a Jesús hānajtý jia møødwādity møødä nāmajtu'ugpähajxy.

7

¹ Mānitā Jesús tiägøøyy cajpthayohbiä jim Galilea. Cab hānajtý jim wiāditaanā jim Judea, je'eguiøxpā coo ja'a judíos hajxy hānajtý yhøxta'ay nebiä Jesús hajxy yaghó'ogāt.

² Jadāanāp ja'a judíos xiøøhajxy hānajtý coo ja'a ramada hajxy yhädiuñ. Jim hānajtý jiada'añii Jerusalén.

³ Mānitā Jesús ñāmaayyā yhuchhajxy:

—Ca'a yaa mmähmø'øy. Nøcx jim Judea. Ween ja'a mmägu'ughajpähajxy jimbā yhuug hijxpā nejy miich ja'a hoy-yagjuøøñājatypā myajcähxø'øguiān.

⁴ Myajcähxø'py miich hijty maa jäya'ay quia'a mayyān. Pero pø chojpy ja'a mjoot jaduhñ coo ja'a mmādia'agy wiädítāt ja'a miichcøxpā, mānit hijxwiin-duum myajcähxø'ogāt majiäya'ayhagujc.

⁵ Cabā Jesús ja'a miādia'agy hānajtý miäbøjcäxä ni ja'a yhamdsoo huchhajxy. Paady hajxy jaduhñ miānaañ.

⁶ Mānitā Jesús miānaañ:

—Cahnä yhabaadyñä cooĉ jāya'ayhajxy nhawáanät pónhøch høøĉh. Pero mijts, homiänaajä hajxy jim mnøcxät Jerusalén.

⁷ Caj mijts cu'ug xmiähanhaty. Pero høøĉh, xmiähanhájpøch cu'ug. Páadyhøch hajxy xmiähanhaty cooĉ nnägapxy coo hajxy yhaxøøgwädity.

⁸ Nøcx mijts xøøhat. Cábøch nnøcxa'añ høøĉh. Cahnä yhabaadyñä cooĉ jāya'ayhajxy nhawáanät pónhøch høøĉh.

⁹ Mänit Jesús miädiaacpädøøñä. Mänit jim jiaanĉ mähmøøñä jim Galilea.

¹⁰ Mänit Jesús yhuchhajxy jim ñøcxy xøøhajpä Jerusalén. Mänit Jesús jim pianøcxy hamee'ch.

¹¹ Jimä judíos ja'a Jesús hajxy hānajty yhøxta'ay maa ja'a xøø hānajty jiadyi-ijän. Jaduhñ hajxy hānajty miāna'añ:

—Maada'a tyijy je'e.

¹² Mädiāacäp ja'a Jesús hānajty ja'a majiäya'ayhajxy. Nāje'e hajxy hānajty miāna'añ cooc yhojiäya'ayä. Nāje'e hajxy hānajty miānaambä cooc tyijy yhaxøøgjäya'ayä, cooc tyijy hānajty wiädity cu'ugwiinhøhmbä.

¹³ Pero hamee'ch hajxy hānajty miädia'agy. Hix, chähgøøby hajxy hānajty ja'a judíos wyiindsønhaixy.

¹⁴ Mägujnä xøø hānajty jiadyii, mänit Jesús tiägøøyy tsajtøgooty yajñähixøøbiä.

¹⁵ Mänitä judíos hajxy yagjuøøyy, miānaañ hajxy:

—Tii yø'øya'ayäda'a coo jiaanĉ tehñ jiaty madiu'u y caj yhøxpøquiä.

¹⁶ Mänit Jesús yhadsooyy:

—Ca'a yhøøĉhä nhamdsoo mädia'agy hädaa; nDéedyhøch miädia'agy hädaa jaduhñ, ja'aĉh tøø xquiéxiäbä.

¹⁷ Pøn jaduhñ cudiunaamb nebiä Dios miāna'añän, je'e najuø'øwaamb coo quia'a yhøøĉhä nhamdsoo mädia'agy hädaa, coo Diosmädia'agy hädaa.

¹⁸ Pøn jioot jaduhñ tsojp coo yajcumáyät, je'edsä yhamdsoo mädia'agy mädiaacp. Pero chójpøch njoot coo Dios wyiingudsähgø'øwøøjät, ja'aĉh tøø xquiéxiäbä. Nmøødhøch ja'a tøyhajt; cábøch nhøhñda'agy.

¹⁹ Tøyhajt coo Moisés ja'a ñocy jecy yejcy, túhmäts. Jiiby jaduhñ miāna'añ ñocyjiooty coo hajxy hoy mjäya'ayhädät. Pero cab hajxy mgudiuñ. Mmänaamb hajxy jaduhñ cooĉ hajxy xyagho'oga'añ.

²⁰ Mänitä cu'ug yhadsooyy:

—Nej, mguhmäñøøbiä coo jaduhñ mmäna'añ coo højts miich nyagho'oga'añ. Pøñdsän miich xyagho'ogaamb.

²¹ Mänitä Jesús miänáangumbä:

—Tähøoc-høch ja'a hoybä tøø nduñ ja'a poo'xxiøøjooty; mänit hajxy myagjuøøyy nägøxiä. Mmänaamb hajxy jaduhñ coo hajxy tii nga'a túunämät ja'a poo'xxiøøjooty; paady hajxy myagjuøøyy.

²² Moisés ja'a cuhdujt jecy yejc coo hajxy mnicircuncidarhadøøjät. (Ca'a Mioisésä yajtsohñdaac; yhaphajpä tieedyhajpähajxy jecy yajtsohñdaac.) Paadiä mhuung hajxy mcircuncidarhaty hoy jia poo'xxiøøjootiä.

²³ Mgudiumby hajxy jaduhñ nebiä Moisés ja'a cuhdujt jecy yejquiän; pero mjootma'p hajxy cooĉhä jāya'ay tøø nyajmøcpøcy ja'a poo'xxiøøjooty.

²⁴ Cabä jāya'ay hajxy paquiä mwiinmahñdyhixät nebiä wyiinmahñdy je'e. Coø jejcy mmøødhidät, mänitäts ja'a wyiinmahñdy je'e mhixät. Cooĉhä pa'amjäya'ay tøø nyajmøcpøcy ja'a poo'xxiøøjooty, paady hajxy jaduhñ mmäna'añ cóogøch tyijy ja'a haxøøgwiinmahñdy nmøødä. Mmänaamb hajxy jaduhñ coo tii nga'a túunämät ja'a poo'xxiøøjooty. Pero Dios mänaamb coo yhahixø'øy coo hajxy ndúunämät.

²⁵ Mänitä Jerusaléngpä jāya'ayhajxy näje'e tiägøøyy mänaambä:

—Yø'øds hajxy yhøxtaaby coo hajxy yagho'oga'añ.

²⁶ Xiidsä quiapxy majiäya'ayhagujc, y caj waamb ñäma'ayii. Nej, mänaamb højts nwiindsønhajxiäda'a coo yø'ø Miesíasä, ja'a hajxy nhahíxämbä.

²⁷ Nnajuøøyyäm hajxy maa yø'øya'ay chooñ. Pero ja'a Mesías, ja'a gobiernähadaambä, cab hñajty yajnajuø'øwa'añ maa hñajty chooñ.

²⁸ Jiibiä Jesús hñajty yajnähixø'øy tsajtøgooty. Coo jaduhñ miädooyy waambaty hajxy hñajty miäna'añ, mänitä møc miänaañ:

—Xyhixyhájpøch hajxy. Mnajuøøby hajxy maaçh ndsooñ. Pero ca'a yhøøchä hamdsoo tøø nwiinmay cooçh yaa ngädá'agät. Ja'a nDéedyhøch tøø xquiexy. Pero cab hajxy mnajuø'øy.

²⁹ Nhíxyhøch je'e. Jímhøch ndsooñ. Je'eçh jaduhñ tøø xquiexy.

³⁰ Coo Jesús jaduhñ miänaañ, mänitä jia madsaanä. Pero caj ñä'a yajmajch. Cajnä hñajty yhabaadyñä coo Jesús yagho'ogøjät.

³¹ Hoy ja'a Jesús hñajty jia madsa'añii, nämay ja'a Jesús ja'a miädia'agy hñajty miäbøjcäxä. Mänit hajxy miänaañ:

—Coo ja'a Mesías jaduhñ miédsät, ja'a hajxy nhahíxämbä, nej, maas hoy-yagjuøøñajaty ja'a Mesíasäda'a yajcähxø'øga'añ quejee nej yø'øya'ay jaduhñ yajcähxø'øguiän.

³² Mänitä fariseoshajxy jaduhñ miädoyhajty waambaty Jesús hñajty miädia'agyii. Mänitä policiahajxy quiejxä coo Jesús hajxy miádsät. Ja'a fariseoshajxy jaduhñ mäguejx møødä teedywiindsøn.

³³ Mänitä Jesús miänaañ:

—Cábøch mijts jejcy nmøødhidaañä. Nøcxáañnábøch maaçhä ndsohñän.

³⁴ Xjia høxta'awáambøch hajxy, pero cápøch hajxy xpiaada'añ. Cab hajxy jim hoy mnøcxät maaçh nhida'añän.

³⁵ Mänitä judíoshajxy ñiñämaayyä:

—Maa yø'øya'ayäda'a ñøcxa'añ coo hajxy jaduhñ nga'a páatämät. Nej, nøcxaambäda'a jim maa ja'a judíoshajxy wa'xyjaty chäna'ayän maa ja'a hajxy ca'a Israelpähajpän, coo Diosmädia'agy yajnähixø'øwät ja'a hajxy ca'a judíoshajpä.

³⁶ Tiida'a tyijy coo miäna'añ cooc hajxy nja høxta'awáañäm, pero cápäc hajxy nbaadäänäm, y cooc hajxy hoy nga'a nøcxämät maa yhida'añän.

³⁷ Coo ja'a xøø hñajty miayaañä, ja'a møjxøøjooty, mänitä Jesús tiänaayyø'cy. Mänitä møc miänaañ:

—Pøñ tødsøøyyäp, ween yaa myiñ maaçh høøchän, ween min yhu'ugy mädyíibøch nmo'owaamby.

Jaduhñ Jesús yajnimiäbaatä nebiä møjnøøgopcän. Mänitä miänáangumbä:

³⁸ —Pønjátyhøch ja'a nmädia'agy xmiäbøjcäp, je'eçhä nmädia'agy xya-jwa'xtägäjtsäp, nebiä Diosmädia'agy miäna'añän.

³⁹ Jaduhñ Jesús miänaañ, pønjaty ja'a miädia'agy mæbøgáañäp, mänitä Diosh-espíritu mio'owa'añii. Cahnä Dioshespíritu hñajty quiäda'agyñä. Cahnä Jesús hñajty yagho'ogyii; cahnä hñajty yhoodiägachñä maa ja'a Tieediän.

⁴⁰ Coo ja'a cu'ughajxy jaduhñ miädooyy nebiä Jesús hñajty tøø miädia'aguiän, mänit hajxy näje'e miänaañ:

—Tehm tiøyhajt ja'a Dios ja'a quiugapxy yø'ø, ja'a Dios hijty quiexaambiä.

⁴¹ Näje'e hajxy miänaambä:

—Ja'a Mesías yø'ø, ja'a gobiernähadaambä.

Pero näje'ehajxy miänaambä:

—Pero cabä Mesías jim choona'añ Galilea.

⁴² Jaduhñ Diosmädia'agy miäna'añ cooc ja'a Mesías ja'a David yhaphada'añ tieedyhada'añ, y cooc jim choona'añ Belén maa ja'a David jecy chänaayyän.

⁴³ Coo hajxy hānajty jaduhñ miādia'agy, cab hajxy hānajty tu'ugmādia'agy ñibiaadyii ja'a Jesúscøxpä.

⁴⁴ Nāje'e ja'a Jesús hajxy hānajty jia madsa'añ, pero caj pøñ ñä'ä majch.

⁴⁵ Mānitā policíahajxy wyiimbijty maa ja'a teedywiindsøñhajxiän, maa ja'a fariseoshajxiän. Mānitā policíahajxy ñāmaayyā:

—Tii hajxy coo mga'a yajmejch.

⁴⁶ Mānit hajxy yhadsooyy:

—Cab jaduhñ pøñ mānaa miādia'agy nej yø'øya'ay miādia'aguiän.

⁴⁷ Mānitā fariseoshajxy miānaañ:

—Cab jaduhñ yhooyy coo mijts jaduhñ tøø myajwiinhøhmbä.

⁴⁸ Caj yø'øya'ay ja'a miādia'agy miäbøjcäxä ja'a wiindsøñhajxy møødä fariseoshajxy.

⁴⁹ Pero yø'ø cu'ughajxy, cabä jecyquiuhdujt hajxy jiaty. Ween hajxy chaačhpøcy.

⁵⁰ Jimä Nicodemo hānajty, ja'a Jesús hānajty tøø ñähóyyäbä. Fariseohajp hānajty je'ebä. Mānitā Nicodemo miānaañ:

⁵¹ —Cab højts nguhdujthájtām jaduhñ myíñām coo jāya'ay nyajcumädóowāmāt coo hānajty tøø nga'a mādia'agymiädóowām jayøjp.

⁵² Mānitā Nicodemo wyiinwohnä ñāmaayyā:

—Jaduhñ miich mbamādiaacpä nebiä Galileabä jāya'ayhajxy miādia'aguiän. Huuc tehñ yajmādia'ag ja'a Diosmādia'agy. Cab jaduhñ jiiby maa myiñ coo ja'a Dios ja'a quiugapxy jim choona'añ Galilea.

⁵³ Mānit hajxy ñøcxnä maa ja'a tiøjc-hajxiän.

8

¹ Mānitā Jesús jim ñøcxy maa ja'a tuñ jaduhñ xiøhatiän Olivos.

² Cujaboom jopyjiajjø'øgyñä, mānitā Jesús ñøcxy maa ja'a tsajtøjcän. Mānitā Jesús ja'a cu'ug ñāmejtsä. Mānitā Jesús yhäñaaguiādaacy, tiägøøyy yajñähixøøbiä.

³ Mānitā to'oxiøjc tu'ug yajmejtsä maa Jesúsän. Ja'a cuhdujtya-jñähixøøbiähajxy māyajmejts møødä fariseoshajxy. Paadiä to'oxiøjc hānajty tøø miächii coo hānajty tøø tiu'uma'ady tøø tiu'udägoy. Mānitā to'oxiøjc jim yajnøcxä maa ja'a cu'ughagujcän.

⁴ Mānitā cu'ug ja'a Jesús hajxy ñāmaayy:

—Wiindsøñ, paady hädaa to'oxiøjc tøø miächii coo tøø piaadyii wiingya'adiøjmøød.

⁵ Jiiby maa ja'a Diosmādia'aguiän, jiibiä Moisés hajxy xyhanéhñām coo ja'a to'oxiøjc jaduhmbä hajxy nguhgá'tsämat. Míichäts, waamb miich mmānaambä.

⁶ Paady hajxy jaduhñ yajtøøyy, coo hajxy hānajty miädowa'añ pø tu'ugmādia'agy ja'a Jesús hānajty møødä Diosmādia'agy. Yhøxtaaby hajxy hānajty nebiä Jesús hajxy ñähwaambédät coo häxøpy quia'a tu'ugmādia'aguiä. Pero cabä Jesús waamb yhadsooyy. Mānitā Jesús ñaaxcooyy. Mānitā tiägøøyy jahbiä cø'øhaam naaxwiin.

⁷ Mānitā Jesús jaduhñ miäyajtøøwägumbä. Mānit yhäñaaguiugøøyy. Mānit miānaañ:

—Pøñä pojpä cädieey ca'a møød, ween quia'tstsooñ.

⁸ Mānitā Jesús ñaaxcóogumbä. Mānit tiägøøguiumbä jahbiä naaxwiin.

⁹ Coo hajxy jaduhñ miädooyy nebiä Jesús hānajty tøø miāna'añän, mānit hajxy je'e tiu'ubøjnä hanidiuhmjaty. Ja'a møjpä, je'e jawyiin tehñ tiu'ubøjtsohn. Niñajuøøyyä hajxy hamdsoo coo ja'a pojpä cädieey hajxy hānajty miøødä,

paady hajxy tiu'ubøjcy. Mänämetscä Jesús ja'a to'oxiøjc miøødmähmøøyy. Jimä to'oxiøjc hänajty tiäna'ay Jesús ja'a wyiinduum.

¹⁰ Mänitä Jesús yhäñaaguiugøøyy. Mänitä Jesús ja'a to'oxiøjc ñämaayy:

—Maa jaaya'ayhajxy, ja'a hajxy hijty xquiuhga'adsaambä. Nej, caj pøn tøø xñä'ä cuhga'ačhä.

¹¹ Mänitä to'oxiøjc yhadsooyy:

—Wiindsøn, caj.

Mänitä Jesús miänaañ:

—Ni høøch jaduhñ nga'a mänaambä coo miich myajcuhgá'adsät. Nøcx; cab jaduhñ haxøøg mjatcøøñät.

¹² Mänitä Jesús miänáangumbä:

—Jaduhñ mäwínhøch nyajnimiäbaadyii nebiä jøønän coočhä jäya'ayhajxy nyajñahixø'øyy ja'a tu'u hoybä. Pønjaty ja'a nmädia'agy xpianøcxáanäp, cab jaduhñ wiädita'añ hagogdstuum. Cøjxta'axiøø jim yhida'añ tsajpootyp.

¹³ Mänitä fariseos ja'a Jesús hajxy ñämaayy:

—Hamdsoo miich mniñänømyii. Pero caj miich mnä'ä tømiädia'agy.

¹⁴ Mänitä Jesús yhadsooyy:

—Tømiädiäacpøch, hóyhøch hamdsoo nja niñänømyii. Nnajuøøbiøch maačh ndsooñ maačh nnøcxy. Pero mijts, cab hajxy mnajuø'øyy.

¹⁵ Nä'ä nägóobøch mijts xñä'ä nähwaambety. Pero høøchä, cábøch jäya'ay nä'ä nägoobä nnähwaambety.

¹⁶ Tøyhájthøch nnä'ägädä mädia'agy. Ca'a yhøøchä nhamdsoo mädia'agy hädaa; ja'a nDéedyhøchä miädia'agy hädaa, ja'ačh tøø xquiéxiäbä.

¹⁷ Miimb jaduhñ cujaay maa ja'a Diosmädia'aguiän, coo jäya'ayhajxy tiu'ugmädia'aguiä nämetscä, pues tøyhajt hajxy jaduhñ yejpy.

¹⁸ Pues højts, tu'ugmädia'agy højts møødhøch nDeedy cooch je'e tøø xquiexy.

¹⁹ Mänitä fariseoshajxy miänaañ:

—Maa mDeedy.

Mänitä Jesús yhadsooyy:

—Cábøch mijts xñajuø'øyy; ni ja'a nDéedyhøch hajxy xquia'a najuøøyyä. Cooch mijts häxøpy xñajuø'øyy, xñajuøøyyäbøch ja'a nDeedy hajxy häxøpy.

²⁰ Yajñahixøøguiujc ja'a Jesús jaduhñ miänaañ jiiby tsajtøgooty, jiiby mädøyyä maa ja'a cajän maa ja'a xädø'øñ hajxy hänajty yajñahgäda'aguiän. Pero cabä Jesús hänajty pøn miadsa'añii, hoy hänajty jia mädia'agy cu'ughagujc. Cahnä hänajty yhabaady coo je'e miadsøøjät.

²¹ Mänitä Jesús miänáangumbä:

—Nøcxáanbøch høøch. Xjia høxta'awáambøch mijts, pero cábøch hajxy xpiaada'añ. Cab hajxy hoy mnøcxät maačh nnøcxa'añän. Coo hajxy mho'oga'añ, jiiby hajxy mga'awa'añ haxøøgtuum.

²² Mänitä judíoshajxy ñiñämaayyä:

—Nej, hamdsooda'a ñiyagho'oga'añii, coo hajxy jaduhñ nga'a nócxämät maa ñøcxä'añän.

²³ Mänitä Jesús miänaañ:

—Yaa mijts mdsooñ, hädaa yaabä naaxwiin. Pero høøch, tsajpootypøch ndsooñ, ca'a yaajä.

²⁴ Tøøch mijts jaduhñ nnäma'ay, coo hajxy hänajty tøø mho'ogy, cahnä mbojpä mgädieey hajxy hänajty xñähwa'ačhñä. Cabä mbojpä mgädieey hajxy xñähwa'adsa'añ coočhä nmädia'agy hajxy xquia'a mabøjcät pønhøch høøch.

²⁵ Mänitä Jesús hajxy miäyajtøøyy:

—Pønäsän miich.

Mänitä Jesús yhadsooyy:

—Tøøch mijts nja hawáanäm pónhøch høøch.

²⁶ Madiú'ujøch nnägápxät coo hajxy haxøøg mjäya'ayhaty. Cábøch mijts ja'a nmädia'agy xmiäbøjcä. Nhawáanäm mijts jaduhñ nebiátyhøch jaaya'ay tøø xñajtsapxøøyyän, ja'açh tøø xquiéxiäbä.

²⁷ Pero cab hajxy wyiinjuøøyy coo Jesús ja'a Tieedy jaduhñ ñägapxy.

²⁸ Mänitä Jesús miänaañ:

—Cooch mijts hānajty tøø xmiøjpahbety, mänit hajxy mnajuø'øwa'añ pónhøch høøch, y coochä nhamdsoo cuhdujt nga'a yajtuñ. Pero jaduhñ nhawáanäm nebiátyhøch ja'a nDeedy tøø xyajñähixø'øy.

²⁹ Xmiøødwädíjpøch je'e, ja'açh tøø xquiéxiäbä. Cábøch nidiuhñ tøø xñähgue'egy je'eguiøxpä cooch homiänaajä ngudiuñ nébiøch tøø xyhane'emiän.

³⁰ Coo ja'a Jesús jaduhñ miädiaacy, mänitä miädia'agy miäbøjcäxä nämay.

³¹ Mänitä Jesús ñämaayy ja'a judíoshajxy, ja'a Jesús ja'a miädia'agy hajxy hānajty tøø miäbøjcäbä:

—Cooch mijts ja'a nmädia'agy xquiudiúunät homiänaajä, mänitøch mijts hamuumdu'joot xmiøødwädítät.

³² Jaduhñdsä tøyhajt hajxy mmøødhádät cooch ja'a Dios tøø xquiexy. Jaduhñdsä mhaxøøgwiinmahñdy hajxy mnajtshixø'øwät, nebiä møjcu'ugong hajxy jaduhñ xquia'a hané'emät.

³³ Mänitä judíoshajxy yhadsooyy:

—Abraham højts hijty nhaphajpy ndeedyhajpy. Cab højts pøn xyhane'emy. Tii jaduhñ coo mmāna'añ coo højts ja'a møjcu'ugong xquia'a hané'emät.

³⁴ Mänitä Jesús yhadsooyy:

—Chaads mijts tehñ tiøyhajt nnämä'awät, pønjaty ja'a pojpa cädieey jaduhñ møød, møjcu'ugong jaduhñ hanehm̄b.

³⁵ Ja'a moonsähajxy, cab hajxy jim̄ yhity cøjxta'axiøø maa hajxy quiuduñän. Pero ja'a cumoonsä yhuungä, je'eds jim̄ nä'ägä hijp maa ja'a tiøjcän.

³⁶ Høøch, nbuhbédäbøch mijts jaduhñ nebiä mhaxøøgwiinmahñdy hajxy mnajtshixø'øwät, nebiä møjcu'ugong hajxy jaduhñ xquia'a hané'emät.

³⁷ Nnajuøøbiøch jaduhñ coo Abraham hajxy hijty mhaphaty mdeedyhaty. Pero xyagho'ogáambøch mijts, je'eguiøxpä coo hajxy tu'joot mga'a tuna'añ nébiøch mijts nja nāma'ayän.

³⁸ Nmädiäacypiøch nébiøch ja'a nDeedy tøø xyajmøødmädia'aguiän. Pero mijts, jaduhñ mijts mjäya'ayhaty nebiä mdeedy yaa jiäya'ayhatiän hädaa yaabä naaxwiin, nebiä cu'ug yhane'emiän.

³⁹ Mänit hajxy yhadsooyy:

—Abraham højts hijty nhaphajpy ndeedyhajpy.

Mänitä Jesús miänaañ:

—Pø tøyhajt ja'a Abraham hajxy hijty mhaphaty mdeedyhaty, jaduhñ hajxy mjäya'ayhájpät nebiä Abraham jecy jiäya'ayhajtiän.

⁴⁰ Pero xyagho'ogáambøch mijts, hóyhøch mijts ja'a tøyhajt tøø nja yajmøødmädia'agy, mädyíibøch ja'a Dios tøø xyajmøødmädia'agy. Cábøchä Abraham häxøpy xyagho'oga'añ. Caj mijts mjäya'ayhaty nebiä Abraham jecy jiäya'ayhajtiän.

⁴¹ Jaduhñ mijts mjäya'ayhaty nebiä mdeedyhajxy jiäya'ayhatiän.

Mänitä Jesús ñämaayyä:

—Tøyhajt højts ja'a Abraham hijty nhaphaty ndeedyhaty. Jaduhñ højts njäya'ayhaty nebiä Abraham jecy jiäya'ayhajtiän. Tu'ug højts nDeedy; Dios je'e.

⁴² Mänitä Jesús miänaañ:

—Coo Dios hajxy häxøpy tøyhajt mDeedyhaty, xchójpøch mijts häxøpy yaabä. Jímhøch tøø ndsooñ maa Diosän; pero yaačh nhijnä hädaa yaabä naaxwiin. Ca'a yhamdsoo jóothøch yaa tøø ngäda'agy. Dióshøch xquiejx.

⁴³ Xióøbøch yaa nja mädia'agy; cábøch mijts ja'a nmädia'agy xñä'ä cudiunaanä.

⁴⁴ Ja'a møjcu'ugong hajxy mdeedyhajpy. Jaduhñ hajxy mjäya'ayhaty nebiä mdeedy jiäya'ayhatiän. Mänit je'e tiägøøyy jäya'ay-yagho'pä mänaabä naaxwiin yhawijy tiøø'xta'aguiän. Cabä tiømiädia'agy. Cabä hädaa yaabä naaxwiin hoy jiäya'ayhaty. Høhndaacp je'e; jaduhñ ñä'ägä cuhdujthaty. Jaduhñ jäya'ayhajxy yaa yajnähixø'øyyi ja'a møjcu'uwiinmahñdy.

⁴⁵ Pero høøch, cooçh mijts ja'a tøyhajt nyajmøødmädia'agy, cábøch nmädia'agy hajxy xmiäbøjcä.

⁴⁶ Hopiønä ñajuø'øyy cooçhä pojpa cädieey nga'a møødä. Jaduhñ hajxy mnajuø'øwät cooçhä tøyhajt nmädia'agy.

⁴⁷ Ja'a Dios ja'a yhuungä, miädóowäp je'e ja'a Dios ja'a miädia'agy. Pero mijtsä, caj mijts Dios xyhuunghaty; paadiä Dios miädia'agy hajxy mga'a mädowaanä.

⁴⁸ Mänitä Jesús ñämaayyä ja'a judíoshajxy:

—Nej, cab jaduhñ tiøyyä coo jim mdsooñ Samaria, coo møjcu'ugong tøø xyajtägø'øyyä.

⁴⁹ Mänitä Jesús yhadsooyy:

—Cábøçhä møjcu'ugong tøø xyajtägø'øyy. Nwiinguhdsähgøøbiøch ja'a nDeedy. Pero cábøch mijts xwyiingudsähgø'øyy.

⁵⁰ Cábøch hamdsoo nmäna'añ cooçh hajxy xwyiingudsähgø'øwät. Ja'a nDéedyhøch jaduhñ mänaamb. Yajcumädowaamby je'e pønñhøch haxøøg xñänøømb.

⁵¹ Chaads mijts tehñ tiøyhajt nnämä'awät, cooçhä nmädia'agy pøn xmiäbøjcät, ni mänaa quia'a hó'ogät.

⁵² Mänitä judíoshajxy yhadsooyy:

—Hoorä sí, tøø højts nnajuø'øyy coo møjcu'ugong tøø xyajtägø'øyy. Tøø ja'a Abraham yho'ogy møødä Dios ja'a quiugapxyhajxy. Pero miich mänaamb coo mmädia'agy pøn xmiäbøjcät, ni mänaa quia'a hó'ogät.

⁵³ Nej, maas møc miichä cuhdujt mmøødä quejee ja'a Abraham jecy miøødhajty, ja'a hajxy hijty nhaphájtäm ndeedyhájtämbä. Tøø je'e yho'ogy. Jaduhñ ja'a Dios ja'a quiugapxyhajxy tøø yho'pä. Pøn tyijy miich coo jaduhñ mniñänømyii.

⁵⁴ Mänitä Jesús yhadsooyy:

—Cab jaduhñ yahixø'øyy cooçh hamdsoo nniguiumayøøjät. Pero Dióshøch xquiumaaby, ja'a tyijy mijts mDioshajpy.

⁵⁵ Cahnøch nDeedy hajxy xñajuøøyyä. Pero høøch, nhíxyhøch høøch. Cooçh nmäná'anät cooçh nga'a hixiä, høhnda'agäbøch jaduhñ nej mijts mhøhnda'aguiän. Pero nhíxyhøch høøch. Nmäbøjcäbøch ja'a miädia'agy je'e.

⁵⁶ Ja'a Abraham, ja'a hajxy jecy nhaphájtäm ja'a ndeedyhájtämbä, xoondaacp je'e hijty cooçh hänäjty xyhixa'añ mänáajøch hänäjty nhida'añän hädaa yaabä naaxwiin. Tøøch je'e xjiaançh hixy. Mänit jiaançh xoondaacy.

⁵⁷ Mänitä Jesús ñämaayyä ja'a judíoshajxy:

—Je'enä jaduhñ mdsanä. Nej, tøø ja'a Abraham mhixiä.

⁵⁸ Mänitä Jesús yhadsooyy:

—Chaads mijts tehñ tiøyhajt nnämä'awät, jíiyyämøch hänäjty; cahnä Abraham hänäjty jiinä.

⁵⁹ Mänitä tsaa hajxy quionø'cy; Jesús hajxy hānajt̃y quiuhga'adsaamby. Pero tøø ja'a Jesús hānajt̃y ñiguu'učhii. Mānit piādsøømnā tsajtøgooty.

9

¹ Jimā Jesús hānajt̃y ñaxy. Mānitā wiindspā tu'ug yhijsy. Jaduhnā mähdiøjc ñä'ägā maaxhuunghajt̃y wiinma'ad.

² Mānitā Jesús ñāmaayyā ja'a jiamioødhajxy:

—Wiindsøñ, tii yø'øya'ay wyiināda'a coo mia'adā. Pøñā pojpa cādieeyāda'a tøø tiuñ, yø'øya'ayā, tøgā tiaj tieediā.

³ Mānitā Jesús yhadsooyy:

—Ni pøñ. Paady yø'øya'ay wyiin mia'adā nebiā Dios ja'a miājaa jaduhn quiāhxø'øgāt maa yø'øya'aguiøxpān.

⁴ Tsøc Diostuung hajxy túunām, ja'ačh tøø xquiéxiābā, mādühñtiā jugy-hajt hajxy nmøødhajtām. Coø hajxy nhó'cānāt, cab hajxy jaduhn mānaa ndúunānāt.

⁵ Coočh yaa nhity hādaa yaabā naaxwiin, nyajcāhxø'piøch jāya'ay piojpa quiādieeyhajxy.

⁶ Mānitā Jesús ñajtsujøøyy naaxwiin. Mānitā chujy yajmo'ondscojy. Mānitā pyiinø'cy. Mānitā wiindspā yajwiingupiinøøyy ja'a chujy, ja'a hānajt̃y tøø mio'ondscójiābā.

⁷ Mānitā Jesús ja'a wiindspā ñāmaayy:

—Nøcx niwyiimbujøø maa ja'a tsiidaact jaduhn xiøhatiān Siloé —je'e jaduhn ñānøømby, Quexy.

Mānitā wiindspā hoy jiaančh niwyiimbujyii. Coø wyiimbijnā, tøø hānajt̃y wyiindøø'xø'nā.

⁸ Mānitā mähdiøjc yhijsā ja'a miādøjc-hajxy møødā hajxy hijty yhijsypā coø hānajt̃y xiādø'øñyujwa'añ. Mānitā hajxy miānaañ:

—Nej, caj jie'e yø'øjä, ja'a hijty naxy xādø'øñyujwaambā hāña'a.

⁹ Nāje'e hajxy hānajt̃y miāna'añ:

—Jaančh je'e yø'ø.

Nāje'e hajxy hānajt̃y miāna'añ:

—Ca'a jie'ejä; pero tehñ jiaduhn quiāhxø'øgy.

Pero ja'a mähdiøjc, hamdsoo hānajt̃y ñiñānømyii:

—Høøch je'e hijty wiinds.

¹⁰ Mānitā miāyajtøøwā:

—Nejy mwiindøø'xø'cy.

¹¹ Mānit yhadsooyy:

—Jaaya'ay ja'a Jesúshajpā, jaaya'ay ja'a chujy yajmo'ondscoj. Mānitøch xyajwiingubiinøøyy. Mānitøch xñāmaayy coøch nøcxy nniwyiimbujyii maa ja'a tsiidaact jaduhn xiøhatiān Siloé. Mānitøch hoy njaančh niwyiimbujyii. Mānitøch nwiindøø'xø'cy.

¹² Mānitā miāyajtøøwägumbā:

—Maa jaaya'ayāda'a.

Mānit yhadsooyy:

—Pämäadādā.

¹³ Mānitā mähdiøjc yajnøcxā maa ja'a fariseos wyiinduumhajxiān, ja'a hānajt̃y tøø wyiindøø'xø'øguiābā.

¹⁴ Poo'xxiøøjooty ja'a Jesús ja'a chujy yajmo'ondscojy, yajwiindøø'xø'cy ja'a wiindspā.

¹⁵ Mānitā mähdiøjc miāyajtøøwägumbā ja'a fariseoshajxy:

—Nejy mwiindøø'xø'cy.

Mānit yhadsooyy:

—Chujy jaaya'ay yajmo'ondscoj; je'ečh je'e xyajwiingubiinøyy. Mänítøch hoy nniwyiimbujy. Mänítøch nwiindøø'xø'nä.

¹⁶ Mänitä fariseoshajxy näje'e miänaañ:

—Ca'a yø'øya'ay Dyiosquexiä. Tuumb yø'øduhn poo'xxiøøjooty. Cabä cuhdujt miøødä coo jaduhñ tiünät poo'xxiøøjooty.

Pero näje'e hajxy hñajty miäna'añ:

—Pero nebiä cuboj cugädieejäya'ay ja'a hoy-yagjuøøñäjatypä jaduhñ ñä'ä yajcähxø'øgät.

Cab hajxy hñajty tu'ugmädia'agy ñibiaadyii.

¹⁷ Mänitä mähdiøjc ñämaayä, ja'a hñajty tøø wyiindøø'xø'øguiäbä:

—Miičhäts, waamb miičh mmäna'añ. Nejy yø'øya'ay mnänømy, ja'a tøø xyaghijxø'øguiäbä.

Mänit yhadsooyy:

—Dios je'e tøø quiexy.

¹⁸ Cabä judíoshajxy hñajty miäbøga'añ coo jaaya'ay hijty wyiindsä, coo jaaya'ay hijty tøø wyiindøø'xø'øgy. Paady hajxy miøjyaaxy jaaya'ay tiaj tieedy.

¹⁹ Mänit hajxy miäyajtøøwa:

—Nej, mijts ja'a mhuung yø'ø, ja'a hajxy mnänøømbiä coo hijty wiinds tøø miaaxhuunghatiä. Nebiäda'a tøø yhiixø'øgy.

²⁰ Mänitä tiaj tieedyhajxy yhadsooyy:

—Højts nhuung jaančh yø'ø. Wiinds jiaančh maaxhuunghajty.

²¹ Pero cab højts nnajuø'øy nejy tøø yhiixø'øgy o pøn jaduhñ tøø yaghi-jxø'øgy. Yø'ø hajxy mäyajtøw. Møj yø'øjän. Ween hamdsoo ñägapxy.

²² Paady hajxy jaduhñ miänaañ, coo ja'a teedywiindsøn hajxy hñajty chähgø'øy. Tøø ja'a teedywiindsøn hajxy hñajty quiojyquiapxyhaty coo hajxy hñajty yajpädsøma'añ tsajtøgooty pøn jaduhñ mäna'anaamb cooc Jesús Miesiashaty. Nägooyä hajxy hñajty yajtøjpädsøma'añ, cab hajxy hñajty yajtøjtägø'øwaanä tsajtøgooty.

²³ Paady jaaya'ay tiaj tieedyhajxy miänaañ: “Yø'ø hajxy mäyajtøw. Møj yø'øjän.”

²⁴ Mänitä mähdiøjc miøjyáaxägumbä, ja'a hñajty tøø yhiixø'øguiäbä. Mänitä ñämaayä:

—Højts tøyhajt móoyäc. Nnajuøøby højts coo Jesús quiuboj quiugädieeyä.

²⁵ Mänit yhadsooyy:

—Cábøch nnajuø'øy pø cuboj pø cugädieey je'e. Pero nnajuøøbiøch cooçh tøø nhijxø'øgy, hóyhøch hijty nja wiindsä.

²⁶ Mänit ñämaayä:

—Nej xyaghijxø'cy.

²⁷ Mänit yhadsooyy:

—Tøøds mijts nja hawáanäm. Pero cab hajxy mmäbøjcy. Tii hajxy coo mmädozáangombä. Nej, mbanøcxäänäp ja'a miädia'agy hajxypä.

²⁸ Mänit yhojjä ñämaayä:

—Miičh jaduhñ mbanøcxäp ja'a miädia'agy. Højtsä, Moisés ja'a miädia'agy nbanøcxäp.

²⁹ Nnajuøøby højts coo Dios ja'a Moisés miøødmädiaacy jequiän. Pero jaaya'ayä, cab højts nnajuø'øy maa chooñ.

³⁰ Mänitä mähdiøjc yhadsooyy:

—Hoy-yagjuøøñä jaduhñ. Cab hajxy mnajuø'øy maa jaaya'ay chooñ, hóyhøch tøø xjia yaghijxø'øgy.

³¹ Hoy piõñä jaduhñ ñajuø'øy coo Dios jaduhñ quia'a mädoowa ja'a miädia'agy ja'a cuboj ja'a cugädieey. Pero pøn ja'a Dios jaduhñ wiingudsähgøøby, pøn jaduhñ cudiumb nebiä Dios yhane'emiän, je'e ja'a miädia'agy jaduhñ mädóowäxäp ja'a Diósäm.

³² Høxtahm̄ds ja'a naaxwiin yhawijy tiøø'xta'aguiän, ni mänaa jaduhñ quia'a yajmädooyhaty coo jäya'ay yaghijxø'øgyii, ja'a wiinds tøø miaaxhuunghátiäbä, høxtä jäda'anäbaady.

³³ Coo jaaya'ay häxøpy quia'a Diosquexiä, cab jaaya'ay cu yajcähxø'cy hoy-yagjuøøñäbä.

³⁴ Mänitä mähdiøjc yhojjä:

—Nej, xyajñähixø'øwaamb højts miičhä. Pojpätuum cädieedium miič tøø mmaaxhuunghaty.

Mänitä mähdiøjc je'e yajpädsøøma tsajtøgooty.

³⁵ Mänitä Jesús miädooyhajty coo ja'a mähdiøjc hānajtý tøø yajpädsøømyii tsajtøgooty. Mänitä Jesús ja'a mähdiøjc yhøxtaayy. Mänit jiaañ paaty. Mänitä Jesús miānaañ:

—Nej, mmäbøjcäp ja'a miädia'agy, ja'a Dios tøø quiéxiäbä.

³⁶ Mänitä mähdiøjc yhadsooyy:

—Wiindsøn, pøn jaduhñ mnänøømby. Høøch hawáañac nébiøch ja'a miädia'agy nmäbøjcät.

³⁷ Mänitä Jesús miānaañ:

—Tøø je'e mhixy. Høøch je'e.

³⁸ Mänitä mähdiøjc miānaañ:

—Wiindsøn, mähøjpøch.

Mänitä Jesús wyiinijcädaacä, wyiingudsähgøøyyä.

³⁹ Mänitä Jesús miānaañ:

—Päadyhøch yaa tøø ngäda'agy hädaa yaabä naaxwiin neby hajxy jaduhñ yhijsø'øgät, ja'a hajxy hijpä nebiä wiindspän; møød neby hajxy jaduhñ wyiindsø'øwät, ja'a hajxy hijpä nebiä hijxpän.

⁴⁰ Jimä fariseoshajxy hānajtý nāje'e tiāna'ay maa Jesús hānajtý mädøyyän. Coo hajxy jaduhñ miädooyy nebiä Jesús miānaañän, mänitä Jesús hajxy ñāmaayy:

—Nej, mmānaamb miič jaduhñä coo højts jaduhñ nhijpä nebiä wiindspän.

⁴¹ Mänitä Jesús yhadsooyy:

—Coo hajxy häxøpy mhity nebiä wiindspän, cabä pojpa cädieey hajxy häxøpy mhixyhaty. Pero coo hajxy jaduhñ mmāna'añ coo hajxy mhity nebiä hijxpän, paadiä mbojpä ja'a mgädieey hajxy xquia'a nähwa'ačñä.

10

¹ Mänitä Jesús miānāangombä:

—Chaads mijts tehñ tiøyhajt nnämä'awät: cabä mee'tspähajxy jiiby tiägø'øwø'øy maa ja'a meegcuraahaawän. Wiingtuum hajxy je'e tiägø'øwø'øy maa ja'a curaahaaw quia'a hitiän.

² Pero ja'a cumeeg, je'eds jiiby tägø'øwøøby maa ja'a curaahaawän.

³ Yajtägøøby ja'a curaagüendähajpä ja'a cumeeg jiiby curaajooty. Coo hānajtý mieegmøjya'axa'añ, mänitä mieeg quiøxy xøøguya'axy. Yo'mädooby ja'a meeg ja'a wyiindsøn hajxy. Mänitä cumeeg yhøxwoobädsømy.

⁴ Coo ja'a meeghajxy hānajtý tøø piädsømy, mänitä wyiindsøn hajxy cøjx piadu'ubøcy. Paady hajxy jaduhñ piadu'ubøcy coo ja'a wyiindsøn hajxy yo'mädoy.

⁵ Cabä wiingjäya'ay hajxy pianøcxa'añ. Coö wiingjäya'ay hajxy yo'mädoý, cøjx hajxy chähgø'øbäyø'øgy.

⁶ Ja'a Jesús, yajmäbaadyhaam hänäjty miädia'agy; pero cabä miädia'agy hänäjty wyiinjuøøyyäxä.

⁷ Mänitä Jesús miänaangumbä:

—Chaads mijts tehñ tøyhajt nnämä'awät: Øøch, jaduhñ mäwíinhøch nebiä curaahaawän maa ja'a meeghajxy tiägø'øwø'øyän.

⁸ Cahnøch hänäjty nmech, tøø jäya'ayhajxy hänäjty may miech høhndaacpä. Jaduhñ hajxy ñibiäda'agyii nebiä Diosquexypän. Jaduhñ mäwíináts hajxy miäbaady nebiä meegmee'tspän. Pero cabä miädia'agyhajxy miäbøjcäxä. Jaaya'ayädshajxy jaduhñ ca'a mabøjc, pønjátyhøch nmädia'agy xmiäbøjcäp. Jaduhñ mäwíináts hajxy je'e miäbaatpä nebiä meeg mädia'agymiäbøjpän.

⁹ Ja'a meeghajxy, jii hajxy je'e tiägø'øwø'øy maa ja'a curaahaawän. Høøch, jaduhñ mäwíinhøch nebiä curaahaawän. Pønñhøch ja'a nmädia'agy xmiäbøjcäp, je'eçh ngüendähadaamby.

¹⁰ 'Ja'a hajxy jäya'awyiinhøhmbä, Diosmädiá'aguiäc tyijy hajxy je'e ya-jwa'xyp. Yhamdsoo copcooty ja'a mädia'agy hajxy hänäjty yajpädsømy. Pero høøch, páadyhøch tøø ngäda'agy hädaa yaabä naaxwiin nebiä jäya'ayhajxy jaduhñ jim ñøcxät tsajpootyp, neby hajxy jaduhñ jim yhidät cøjxta'axiøø.

¹¹ Ja'a cumeeg, cwieendähajpy ja'a mieeg je'e. Jaduhñ mäwíinhøch je'e, ngüendähadaambiøch ja'açh nmädia'agy hajxy xmiäbøjcäbä. Jaaya'ay ja'a meeg jaançh tehñ chojpä, høxtä ñähho'tú'udäp ja'a mieeg.

¹²⁻¹³ Ja'a moonsähajxy, cabä meeg hajxy tu'joot cwieendähaty. Paady hajxy je'e tu'joot quia'a cueendähaty, coö hajxy je'e quia'a yhamdsoo je'ejä. Mäjuy hajxy je'e jia cuduñ. Coö ja'a pahuc miech meegtsu'tspä, mänitä moonsähajxy piäyø'øgy. Mänitä meeg mähdiøjc-hajxy ñä'ägä machii. Mänit hajxy chähgø'øbäyø'øgy.

¹⁴⁻¹⁵ 'Pero høøch, jaduhñ mäwíinhøch nebiä jäya'ay meeg hajxy jaançh tehñ chojpän. Xyhixyhájpøch ja'a nDeedy, y nhixyhájpøch je'ebä. Jaanä jaduhñds je'e, jaanä nhixyhájpøch pønjátyhøch nmädia'agy hajxy xmiäbøjcäp. Nñähho'tu'udäämbiøch hajxy je'e.

¹⁶ Jaanä xmiäbøgáañbøch ja'a nmädia'agy hajxy, ja'a jäya'ayhajxy tsänaabiä wiinghagajpt. Tu'ugmädia'agy hajxy yhida'añ møød hädaa jäya'ayhajxy yaabä. Tu'cuhdújthøch ja'a nmädia'agy hajxy xmiäbøgaanä nägøxiä.

¹⁷ 'Páadyhøch ja'a nDeedy xchocy coöch jaduhñ nmäna'añ coöch häna'c ween xyagho'ogy nébiøch jaduhñ njujypiøgät jadähooc.

¹⁸ Høøch, hamdsoöch nmäna'añ coöchä jäya'ay xyaghó'ogät. Coöch häxøpy nga'a mänaambä, cábøchä jäya'ay häxøpy xyagho'oga'añ. Nmøødhøch cuhdujt coöch nhó'ogät; y nmøødhøch cuhdujt coöch njujypiøgät jadähooc. Páadyhøch ja'a nDeedy tøø xwyiinguexy coöch nhó'ogät, coöch njujypiøgät.

¹⁹ Coö Jesús jaduhñ miädiaacy, paadiä judíoshajxy tu'ugmädia'agy quia'a nibiaatä.

²⁰ Mänit hajxy nämay miänaañ:

—Møjcu'uda'a miøød. Cuhmäñøøbiäda'a jaduhñ. Tii yø'ø miädia'agy hajxy coö mmädowaanä.

²¹ Mänit hajxy näje'e miänaañ:

—Cabä møjcu'umøødpä jaduhñ miädiá'agät. Cabä møjcu'u ja'a wiindspä jaduhñ yaghijxø'øgät.

²² Jäjtäbä xøø hänäjty jim Jerusalén, ja'a xøhajpä ja'a Dedicación. Tøøchpojooty hänäjty.

²³ Jiibiä Jesús hānajty wiädity tsajtøgooty, jiiby maa ja'a tøjwiingän, ja'a xøhajpä Salomón.

²⁴ Mänitä judíoshajxy jim̄ yhamugøøyy maa Jesús hānajty wiäditiän. Mänitä Jesús ñāmaayyā:

—Mānaa højts xyhawaanaana pø tøyhajt mMesíashaty.

²⁵ Mänitä Jesús yhadsoooy:

—Tøøds mijts nja hawáanām, pero cab hajxy mmäbøjcy. Cooch jaduhñ ngudiuñ nébiøch ja'a nDeedy tøø xyhane'emiän, cāhxø'pøch jaduhñ cooçh nGristohaty.

²⁶ Pero, cooçh mijts ja'a nmädia'agy hajxy xquia'a panøcxä, páadyhøch ja'a nmädia'agy hajxy xquia'a mæbøgaanä.

²⁷ Nhixyhájpíøch pøn̄høch ja'a nmädia'agy xmiäbøjçäp; je'eçh ja'a nmädia'agy xpianøcxäp.

²⁸ Nyajnøcxáambiøch hajxy jim̄ tsajpootyp. Jim̄ hajxy yhida'añ cøjxta'axiøø. Cábøch hajxy je'e pøn̄ xpíøjçät.

²⁹ Miøødhøch ja'a nDeedy ja'a mājaa. Cabä pøn̄ ja'a mājaa jaduhñ miøødä nébiøch ja'a nDeedy miøødän. Ja'a nDéedyhøch jaduhñ tøø miäna'añ cooçh jaaya'ay ja'a nmädia'agy hajxy xmiäbøjçät. Cábøch ja'a nDeedy jaaya'ayhajxy mānaa piøgáanaxä.

³⁰ Høøch møødhøch ja'a nDeedy, tu'ugmädia'agy højts nhity.

³¹ Mänitä judíoshajxy tiägøøguiombä tsaagonø'pä. Jesús hajxy hānajty quia'adsaamby.

³² Mänitä Jesús ja'a judíos ñāmaayy:

—Madiú'ujøch ja'a hoybä tøø ngudiuñ nébiøch ja'a nDeedy tøø xyhane'emiän. Tiiguiøxpøch mijts coo xquia'adsa'añ.

³³ Mänit hajxy yhadsoooy:

—Paady højts miiçh nga'adsa'añ coo Dios haxøøg mnänømy, coo mnibiäda'agyii nebiä Diosän; ca'a jie'eguiøxpä coo hodiunung jaduhñ tøø mduñ.

³⁴ Mänitä Jesús yhadsoooy:

—Jiiby jaduhñ myiñ maa mijts mguhdujtän coo Dios jaduhñ miänaañ: “Mdioshajp hajxy.”

³⁵ Tøyhajt ja'a Diosmädia'agy jaduhñ ñä'ägädä mädia'agy. Jaduhñ miäna'añ cooc hajxy jaduhñ dyioshaty, ja'a jäya'ayhajxy tøø wyiingpøquiäbä ja'a Diosmädia'agy.

³⁶ Hoorä, Diøshøch tøø xquiunuu'xy tøø xpiäda'agy. Yaaçh tøø xquiexy hädaa yaabä naaxwiin. Cábøch Dios tøø nwiingapxpety cooçh nmānaañ cooçhä Dios xyHuunghaty. Tøyhájthøch jaduhñ xyHuunghaty.

³⁷ Cooçh häxøpy nga'a tuñ nébiøch ja'a nDeedy tiuñän, cábøçhä nmädia'agy hajxy häxøpy xmiäbøjçä.

³⁸ Pero jaançh túumbøch jaduhñ. Mmäbøgäp hajxy jaduhñ cooçhä Dios tøø xquiexy, hóyhøçhä nmädia'agy hajxy xquia'a ja mæbøjçä. Jaduhñds hajxy mnajuøñät coo højts tu'ugjäya'ay nhity møødhøçhä nDeedy.

³⁹ Mänitä Jesús jia madsáanägumbä. Pero cabä ñä'a yajmajch.

⁴⁰ Mänitä miøjnøønájxcumbä ja'a Jordángpä møjnøøbä maa ja'a Juan miäyajnäbejtsøhñän.

⁴¹ Mänitä Jesús hajxy ñāmejch nāmay. Mänit hajxy miänaañ:

—Cabä Juan ja'a hoy-yagjuøøñäbäjaty ñä'a yajcāhxø'cy. Pero tøyhajt jaduhñ cøxiä nebiä Juan yø'øya'ay tøø ñägapxiän.

⁴² Mänitä Jesús ja'a miädia'agy hajxy jim̄ miäbøjçä nāmay.

11

¹ Tu'ug jäya'ay hānajty xiøhaty Lázaro. Tøø hānajty pia'ambety. Jim hānajty chāna'ay Betania møødä piuhdo'oxyhajxy, ja'a María møødä Marta.

² Cahnä hānajty yhabaady mānaa María ja'a Jesús ja'a perfume hānajty yajtecytia'xø'øwa'añ, mānaa María ja'a Jesús hānajty tiecymie'exa'añ ja'a quiuhwaayhaam.

³ Coø Lázaro hānajty tøø pia'ambety, mānitä piuhdo'oxy ja'a capxy hajxy quiejxy maa Jesúsän coogä Lázaro tøø pia'ambety. Jesús ja'a miägu'ughajpä hānajty je'e.

⁴ Coø Jesús ja'a mādia'agy jaduhñ miädooyy, mānit miānaañ:

—Cabä mähdiøjc tiehñ yho'oga'añ. Paady tøø pia'ambety neby jaduhñ quiähxø'øgät coø Dios miøjjä jiaančhä, neby jaduhñ quiähxø'øgät cooch nmøjjä njaančhä. Dióshøch xyHuunghajp.

⁵ Hoy ja'a Jesús hānajty jia jaanč tehñ miøødnijootpaadyii ja'a Lázaro hajxy,

⁶ mejtsxøø jim jiaag hijty maa hānajty ñä'ägä hitiän.

⁷ Mānitä Jesús ja'a jiamiøød ñāmaayy:

—Jamds hajxy jadähooc Judea.

⁸ Mānitä Jesús hajxy ñāmaayy:

—Wiindsøn, cahnä jiegø'øy mānaa ja'a judíoshajxy xjia cuhga'adsa'añän. Tii jim coø mnøcxtägatsa'añ.

⁹⁻¹⁰ Mānitä Jesús yhadsooyy:

—Ja'a Diostuung hajxy tuumbä, coø ja'a tiuunghajxy je'e quia'a mayñä, cahnä hajxy je'e yho'oga'añ. Jaduhñ mawínäts hajxy je'e nebiä xøømbä tiu'uyo'oyän. Cab hajxy je'e quiuhnepy. Hoy hajxy je'e yhixy.

¹¹ Mānitä miānāngombä:

—Tøø højts nmägu'ughajpä Lázaro miaahó'cäm. Nøcxäämbøch cham nyuxa'añ.

¹² Mānitä jiamiøødhajxy miānaañ:

—Pero, wiindsøn, pø nä'ä maaho'c jaduhñ, møcpøjtägatsaambäda'a jaduhñ, cabä.

¹³ Coø Jesús jaduhñ miānaañ cooc Lázaro miaaho'cy, jaduhñ hānajty miāna'anaañ cooc tøø yho'ogy. Pero cabä jiamiøødhajxy jaduhñ wyiinjuøøyy coø Lázaro tøø yho'ogy. Jaduhñ hajxy wyiinjuøøyy coø tøø miaaho'ogy.

¹⁴ Mānitä Jesús howyiinjuøøñä tiehñ ñägapxnä:

—Tøø ja'a Lázaro yho'ogy.

¹⁵ Xoondáacpøch jaduhñ cooch hānajty nga'a jimä. Coø hajxy jaduhñ mhixa'añ nébiøch nduna'añän, mānitøch mijts ja'a nmādia'agy xmiaas mabøgaanä. Páadyhøch jaduhñ nxoonda'agy. Jamds hajxy jim maa Lázarän.

¹⁶ Tu'ugä Jesús ja'a jiamiøød hānajty xiøhaty Tomás, ja'a hajxy hānajty ñänøømbiä hametsc-huung. Mānitä Tomás ñāmaayy ja'a jiamiøødhajxy:

—Jamxä Jesús hajxy møødhó'cäm.

¹⁷ Coø hajxy jim miejch Betania, mānitä Jesús yhawáañäxä coø ja'a Lázaro hānajty jiiby tøø yhity mādaaxxøø jutjooty maa cabäsaantän.

¹⁸ Mäwiingón Betania hānajty jim Jerusálén. Jaduhñda'a jiäguema, mejt-skilómetro ja cupcäda'a.

¹⁹ Nāmay ja'a judíoshajxy hānajty tøø ñāmech ja'a Marta møødä María. Capxmøcpøgäänäp hajxy hānajty coø ja'a piuhya'ayhajxy hānajty tøø yho'ogy.

²⁰ Coø ja'a Marta jaduhñ miädooyhajty coø Jesús hānajty miäwiingoñ, mānit hoy jiøjcubaadø'øy. Pero María, jiiby miähmøøyy maa ja'a tiøgooty hajxiän.

²¹ Mānitä Marta ja'a Jesús ñāmaayy:

—Wiindsøn, coø häxøpy myaajä, cábøchä nbuhya'ay häxøpy tøø yho'ogy.

22 Nnajuóbiøch jaduhñ, hoytyiijä Dios mmäyujwá'anät, xmió'owäp je'e.

23 Mänitä Jesús ja'a Marta ñämaayy:

—Jujypiøgaambä mbuhya'ay.

24 Mänitä Marta miänaañ:

—Nnajuóbiøch coo jiuypipiøga'añ coo ja'a naaxwiimbä hānajtj wyiimbida'añ, coo hajxy nägøxiä njuypipiøgañäm.

25-26 Mänitä Jesús miänaañ:

—Nyagjuypipiøgáambiøch hajxy je'e pønjátyhøch ja'a nmädia'agy xmiäbøjcäp. Nyajnøcxáambiøch hajxy je'e jim tsajpootyp, hoy hajxy hānajtj jia jujcyñä, hoy hajxy hānajtj tøø jia ho'ogy. Nejy, mmäbøjpy jaduhñä.

27 Mänitä Marta miänaañ:

—Wiindsón, nmäbøjpiøch coo miich ja'a Dios xyHuunghaty, coo mMesíashaty, coo miich ja'a Dios tøø xquiexy hädaa yaabä naaxwiin.

28 Mänitä Marta ja'a piuhdo'oxy hamee'ch hoy ñäma'ay:

—Tøø ja'a nWiindsónhajtäm miéjtsäm. Miich xyajtøøb.

29 Coo ja'a María miädooyy, mänitiä tiänaayyø'cy. Mänitä María ja'a Jesús ñänøcxy.

30 Jimä Jesús hānajtj tøø miähmø'øy maa ja'a Marta hānajtj hoy tøø miøødmädia'aguiän. Cahnä Jesús hānajtj quiajptägø'øy.

31 Ja'a judíoshajxy hānajtj jiiby maa ja'a María tiøgootyhajxiän, coo hajxy yhiixy coo María tiänaayyø'cy, coo tiøjpädsøømy, mänitä María hajxy piadøjpädsøømy. Jim tyijy María hānajtj ñøcxy cabäsaantä jøøbiä xuu'tspä.

32 Coo ja'a María jim miejch maa ja'a Jesús hānajtj tøø miähmø'øyän, mänitä Jesús yhiixy. Mänitä María ja'a Jesús wyiinjiicädaacy. Mänitä María miänaañ:

—Wiindsón, coo miich häxøpy myaajä, cábøchä nbuhya'ay häxøpy tøø yho'ogy.

33 Coo Jesús jaduhñ yhiixy coo María hānajtj jiø'øy møødä judíoshajxy, ja'a hānajtj tøø piamechíjábä, mänitä Jesús jiøotmabiøjcy.

34 Mänit miänaañ:

—Maa hajxy tøø myajnaaxtägø'øy.

Mänitä Jesús ñämaayyä:

—Wiindsón, jam nyajñähixø'øy.

35 Mänitä Jesús jiøøyy.

36 Mänitä judíoshajxy miänaañ:

—Høxtahmñds jiø'øy coo Lázaro hijty jiaañch tehñ miøødnijiootpaadyii.

37 Mänit hajxy näje'e miänaañ:

—Tisän yø'øya'ay ja'a Lázaro coo quia'a yajmøcpøjcy. Tøø yø'øya'ay ja'a wiindspä yaghijxø'øgy, túhmäts.

38 Mänitä Jesús jiøotmabiøjcombä. Mänit jim ñøcxy maa ja'a naaxjutän maa ja'a Lázaro hānajtj tøø ñaaxtägø'øyän. Jimä tsaa ja'a jut hānajtj yhadäguéc-haty.

39 Mänitä Jesús ñämaayy ja'a hajxy hānajtj jim tänaabiä juthaguum:

—Hadäguejtu'ud yø'ø jut hajxy.

Jimä cuhäyohnd hānajtj tiänaabiä, ja'a Martahajpä. Mänitä Marta ja'a Jesús ñämaayy:

—Wiindsón, pero mädaaxxøø jiiby tøø yhity jutjooty. Haxøøgxuu'päda'a yø'øjän.

40 Mänitä Jesús ja'a Marta ñämaayy:

—Tøøch miich nhawáañäm, coo mmäbøgät, mänit mhíxät coo Dios miøjjä jiaañchä.

41 Mänitā jut hajxy jiaančh yhadäguejtuuty. Mänitā Jesús chajhee'py. Mänit miänaañ:

—Teedy, Dioscujú'uyäp cooçh miich ja'a nmädia'agy tøø xmiädoowa.

42 Nnajuøbiøch jaduhñ cooçh miich ja'a nmädia'agy hoymiänaajä xmiädoowa. Páadyhøch miich tøø nnäma'ay “Dioscujú'uyäp” neby hajxy miäbøgät cooçh miich tøø xquiexy, yø'øya'ayhajxy xii tänaabiä.

43 Mänitā Jesús møc yaaxy:

—¡Lázaro, pädsømäts!

44 Mänitā Lázaro jiaančh pädsømy, ja'a hānajty tøø yhó'oguiäbä. Nähbity nähmoch pädsømy. Mänitā Jesús nāmaayy ja'a hajxy hānajty jim tänaabiä:

—Nāhbijtu'ud yø'ø hajxy. Ween nøcxy maa ja'a tiøjcän.

Mänitā Lázaro hajxy jiaančh nähbijtuuty. Mänit nøcxy maa ja'a tiøjcän.

45 Mänitā Jesús ja'a miädia'agy miäbøjcäxä nāmay ja'a judíos hajxy, ja'a María hajxy hānajty tøø miøødhitiäbä maa ja'a tiøjc-hajxiän, ja'a hajxy hānajty tøø yhiäbä coo ja'a Jesús ja'a ho'ogyjiäya'ay yagjuyjpiøjcy.

46 Pero cab judíos hajxy nāje'e miäbøjcy. Paady ja'a fariseos hajxy hoy yhawaanä nebiä Jesús hānajty tøø tiuñ.

47 Mänitā teedywiindsøn hajxy yhamugøøyy møødä fariseoshajxy møødä tuuñgmøødpāhajxy. Mänit hajxy nīñāmaayyā:

—Neby hajxy nwiinmahñdyhājāmāt. Madiu'u jaaya'ay ja'a hoy-yagjuøøñābājaty tøø yajcāhxø'øgy.

48 Coo hajxy nga'a mājtsāmāt, mänitā miädia'agy miäbøgāanäxä nāgøxiä. Minaambä romano jāya'ayhajxy ja'a møjcuħdujtmøødpä. Mänitā ndsajtøjc hajxy xyajma'adāanām. Mänitā nguħdujt hajxy xpiøgāanām.

49 Caifās ja'a teedywiindsøn hānajty xiøhaty ja'a møjcuħdujtmøødpä. Mänit miänaañ:

—Cab hajxy tii mjaty mnajuø'øy.

50 Cab hajxy mwiinjuø'øy coo maas hoy hit jaduhñ coo ja'a cu'ug tu'jāya'ay xñāhho'túutāmāt. Cab hajxy jaduhñ nāgøxiä nguħdägøoyyāmāt.

51 Ca'a Quiaifās ja'a yhamdsoo wiinmahñdy jaduhñ. Pero coo hānajty tiuñ teedywiindsøn møjcuħdujtmøødpä, paadiä Dios ja'a Caifās jaduhñ yajnāgapxy coo ja'a Jesús ja'a judíos hānajty nāhho'tu'uda'añ,

52 møød hajxy nāgøxiä, ja'a Dios hānajty tøø wyiimbíyyäbä, ja'a wiinghaga-jptjatypä.

53 Mänitā møjcuħdujtmøødpāhajxy quiojyquiapxyhajty coo Jesús hajxy hānajty yagho'oga'añ.

54 Paadiä Jesús hānajty jim quia'a wäditaannä mayjiäya'ayhagujc maa ja'a Israelpāhajxiän. Mänitā Jesús hajxy jim chohñ jim Judea, nøcxy hajxy jim maa ja'a cajpt jaduhñ xiøhatiän Efraín. Jimä Jesús hajxy miähmøøyy møødä jiamioødhajxy. Mäwiingón ja'a cajpt hānajty tø'ødsnāhgäp.

55 Habaadāannäp ja'a pascuaxøø hānajty, ja'a judíos hajxy yagjājtäbä. Nāmay hajxy jim nøcxy xøøhajpä jim Jerusalén, ja'a hajxy jim tsohmäbä maa ja'a cajpthuungän. Cahnä xøø hānajty jim chohñda'agy coo hajxy jim quioo'ty. Jayøjp hajxy hānajty yhuuc tsi'iwa'añ. Jadúhñäc tyijy hajxy hānajty nāhwa'adsa'añ ja'a piojpä quiädieey.

56 Jiibiä Israelpājāya'ay ja'a Jesús hajxy hānajty yajcopcø'øy tsajtøgooty. Jiiby hajxy hānajty nīmiäyajtøyii:

—Nej, cabä Jesúsäda'a miedsa'añ xøøhājpäjä.

57 Tøø ja'a teedywiindsøn hajxy hānajty yhane'emy møødä fariseoshajxy, coo Jesús pøn yhiät, mänit hajxy nāgāpxät, nebiä Jesús hajxy jaduhñ miädsät.

12

¹ Ja tädujxøø ja'a pascuaxøø hänajty quia'a habaady. Mänitä Jesús jim ñøcxy Betania, maa Lázaro hänajty chäna'ayän, ja'a Jesús hänajty tøø yagjujypiøquiäbä coo hänajty tøø yho'ogy.

² Nämayyä jäya'ayhajxy jiiby yhamugøøyy tsuugaabiä ja'a Jesúscøxpä. Ja'a Marta hänajty texyhabøgøøby. Jiibiä Lázaro ja'a Jesús hänajty miøødtsuugay tøgooty.

³ Mänitä María ja'a perfume quionmejch cuplitro. Haagä nardopøjy ja'a perfume hänajty ja'a tsowjatypä. Mänitä María ja'a Jesús yajtecytia'xøøyy ja'a perfume. Mänitä María ja'a Jesús tiecymieexy quihwaayhaam. Mänitä perfume tiägøøyy pu'xø'pä tøgooty.

⁴ Jiibiä Judas hänajty, ja'a Simón Iscariote yhuung. Jesús ja'a jiamiøøð hänajty je'ebä. Je'edsä Jesús hänajty yegaamb coo hänajty yajcø'ødägø'øwa'añii maa ja'a soldadohajxiän. Mänitä Judas miänaañ:

⁵ —Maas hoy hijty coo yø'ø perfume cu ndóo'cäm nebiä häyoobädøjc ja'a xädø'øñ cu nnä'a móoyyäm.

⁶ Pero cabä Judas ja'a häyoobädøjc hänajty ñä'ägädä näxuuch. Je'e ja'a xädø'øñ hänajty yajconwädijtäp. Pero hamdsoo hänajty wyl'i yajpädsømy. Paady jaduhñ miänaañ coo ja'a perfume hajxy cu tiøø'cy nebiä xädø'øñ jaduhñ miéedsät.

⁷ Mänitä Jesús ja'a Judas ñämaayy:

—Ween yø'ø to'oxiøjc yhity. Ca'a waamb mnäma'ay. Ween yø'ø perfume yaghity høxtä cóonøch nhó'ogät. Mänitøch yø'ø perfume xyajñähjáaxät.

⁸ Hoymiänaajä mijts ja'a häyoobädøjc xmiøødhida'añ. Pero høøch, cábøch mijts hajxy jejcy nmøødhida'añ.

⁹ Nämayyä Israelpä jäya'ayhajxy miädoyhajty coogä Jesús hänajty jim tøø miech Betania. Mänitä Jesús hajxy hoy yhiixy møødä Lázaro, ja'a Jesús hänajty tøø yagjujypiøquiäbä.

¹⁰⁻¹¹ Coo Jesús ja'a Lázaro hänajty tøø yagjujypiøcy, paadiä Israelpä jäya'ay ja'a Jesús hajxy hänajty tøø piadu'ubøcy nämay. Y paadiä Jesús ja'a miädia'agy hajxy hänajty tøø miäbøjcäxä nämay. Coo ja'a teedywiindsøn ja'a miädia'agyhajxy hänajty quia'a jaty panøcxäxä, paady hajxy quiojyquiapxytiuuñ coo ja'a Lázaro hajxy ween yagho'ogy nebiä Jesús hajxy hänajty yagho'oga'añän.

¹² Nämayyä jäya'ayhajxy hänajty jim tøø miech Jerusalén pascuaxøøhajpä. Cujaboom hajxy miädoyhajty coo ja'a Jesús hänajty miedsa'añ cajptooty.

¹³ Mänitä xi'iwhaay hajxy hoy piuxy. Mänitä Jesús hajxy hoy jiøjcubaadø'øy xi'iwhaaguiaap. Yáaxäp ja'a Jesús hajxy hänajty ñänøcxy:

—¡Viva Jesús! Tsøc yø'øya'ay hajxy wiingudsähgøøyyäm, yø'ø Dios tøø quiéxiäbä. Paadiä Dios tøø quiexy coo hajxy ngobiernähájtämät, højts ja'a Israelpäjäya'ayháltäm.

¹⁴ Mänitä Jesús ja'a burrohuung tu'ug piaaty. Mänit yajpejty. Jaduhñ jiiby myiñ cujaay maa ja'a Diosmädia'aguiän:

¹⁵ Ca'a hajxy mdsähgø'øy, mijts jim tsänaabiä Jerusalén.

Huug hix hajxy, xiidsä mgobiernähajxy piety burrohuungnähgøxp.

¹⁶ Cabä Jesús ja'a jiamiøøðhajxy hänajty ñajuø'øy pøn jaduhñ ñänøømby coo miedsa'añ burrohuungnähgøxp, ja'a Dios quiexaambiä. Pero kujecy, coo Jesús hänajty tøø jiuypijpnä, coo hänajty tøø ñøcxnä tsajpootyp, mänitä jiamiøøðhajxy jiahmiejstaacnä coo jaduhñ jiaanç miñ cujaay ja'a Jesúscøxpä y coo Jesús hajxy hänajty tøø piuhbety.

¹⁷ Mädiaacp hajxy hānajty neby hajxy hānajty jim tōø yhixy mānaa Jesús ja'a Lázaro jii by yhōxyaaxpādsōmīān tsaajutjooty. Ja'a hajxy hānajty tōø quia'a yhíxiābā, je'eds hajxy hānajty miōōdmādiaacyy.

¹⁸ Coo jaduhñ yajmādoymhajty nebiā Jesús ja'a Lázaro hānajty tōø yagju-jypioquiān, paadiā Jesús hajxy hānajty nōcxy jiojcubaadō'oy mayjiāya'ay.

¹⁹ Mānitā fariseoshajxy ñiñāmaayyā:

—Nejy yō'ōya'ay ndúunāmāt coo jaduhñ piawādityii nāgōxiā.

²⁰ Tōø ja'a ca'a Israelpāhajpāhajxy hānajty nāje'e quioo'pā xōøhajpā. Dioswi-ingudsāhgōōbiā hajxy hānajty tōø quioody.

²¹ Mānitā Felipe hajxy hoy ñāmech. Betsaida Felipe hānajty chooñ jim Galileanaaxooty. Mānitā Felipe ñāmaayyā:

—Tsāguhm, maa ja'a Jesús. Je'eds hōjts nja mōōdmādia'agañ.

²² Mānitā Felipe ja'a Andrés hoy yhawaanā coogā Jesús hajxy hānajty hoy tōø jia mōōdmādia'aga'añ. Mānitā Felipe ja'a Jesús hajxy hoy yhawaanādagajtsā mōōdā Andrés.

²³ Mānitā Jesús miānaañ:

—Tōø yhabaady cooñ nhó'ogāt. Páadyhōch Dios tōø xquiexy.

²⁴ Chaads mijts tehñ tiōyhajt nnāmā'awāt, coo jāya'ay ja'a trigo hajxy ñi'iby, mānitā tōōmd tiictspādsōmy yhaabiādsōmy. Coo jaduhñ tiictspādsōmāt yhaabiādsōmāt, mānit hoy tiāgōōñā yee'pā. Mayō'ōb ja'a trigo jaduhñ. Pero coo quia'a tiictspādsōmāt quia'a haabiādsōmāt, jaduhyyā piú'udsāt. Cabā miúxāt. Cabā trigo miayō'ōwāt.

²⁵ Pōnjátyhōchā nmādia'agy xquia'a mābōgāañāp, cab hajxy jim ñōcxāt tsajpootyp. Páadyhōchā nmādia'agy hajxy xquia'a mābōgaanā coo hajxy chāhgō'oy coo hajxy yagho'oga'añii. Pōnjátyhōchā nmādia'agy xmiābōjcāp, je'eds hajxy jim nōcxaamb tsajpootyp, hoy hajxy jia yagho'ogyii ja'a hōōchcōxpā.

²⁶ Pō xWyiindsōnhadāambōch hajxy je'e, wéenhōchā nmādia'agy hajxy xpi-anōcxā. Nwowyhídābōch hajxy je'e. NDéedyhōch pāda'agaamb coo hajxy wyiingudsāhgō'ōwōōd wiingjāya'aybā.

²⁷ 'Jootmayhājōch cham. Cab jaduhñ yhahixō'oy cooñā nDeedy nnāmā'awāt ween xyajtso'ogy cooñ hānajty yaa nho'oga'añ hādaa yaabā naaxwiin. Páadyhōch yaa tōø ngāda'agy cooñ yaa nhó'ogāt.

²⁸ Teedy, yajcāhxō'og ja'a mmājaa.

Mānitā Dios jim yhadsooy tsajpootyp:

—Tōōch tāhooc nyajcāhxō'ogy. Nyajcāhxō'ogāambiōch jadāhooc.

²⁹ Ja'a hajxy hānajty jim tānaabiā nāmay maa ja'a Jesús ja'a wyiinduumān, jia mādōow hajxy, pero cab hajxy wyiinjuōōyy. Nāje'e hajxy miānaañ cooc tyijy hānee yaaxy. Nāje'e hajxy miānaañ cooc tyijy ja'a Dios ja'a mioonsā jim tsajpootyp tu'ug quiapxy.

³⁰ Mānitā Jesús miānaañ:

—Ca'a yhōōchcōxpā ja'a Dios jaduhñ miānaañ. Paady jaduhñ miānaañ nej mijts mnajuō'ōwāt cooñ jaduhñ xmiāgapxy.

³¹ Cooñ nhó'ogāt, cābōch ja'a mōjcu'ugong nyajmājāda'aga'añ, jaaya'ay hanehmā hādaa yaabā naaxwiin. Dios jaduhñ mānaamb coo hajxy ween yajcumādoym, ja'a hōōchā nmādia'agy hajxy xquia'a mābōjcābā.

³² Hōōch, cooñ nyajmōjpahbēdāt cruzcōxp, mānithōchā nmādia'agy hajxy xmiābōgaanā, ja'a hajxy tsānaabiā wiinduhmyhagajpt.

³³ Paadiā Jesús jaduhñ miānaañ, neby hajxy ñajuō'ōwāt neby hānajty yagho'oga'añii.

³⁴ Mānitā Jesús ñāmaayyā:

—Jiiby jaduhñ myiñ maa hõjts nguhdujtän coo jaaya'ay hñajty yhane'ema'añ mayjiomõjt, ja'a Dios quixaambiä, ja'a hõjts nhahixypä. Pero miich jaduhñ mänaamb coo tsipcõxp ja'a Diosquexypä yajmõjpahbeda'añ cruzcõxp. Põñ miich jaduhñ mnänõõmby ja'a Diosquexypä.

³⁵⁻³⁶ Mänitä Jesús miänaañ:

—Cábõch mijts hajxy jejcy nmõõdhida'añ. Jaduhñ mäwínhõch mijts ngudõõ'xy nebiä jõñän. Mäbõjcägõch ja'a nmädia'agy hajxy, mäduhñtiõch hädaa yaabä naaxwiin nhidät, nébyhõch mijts jaduhñ hoy xpianõcxät, neby hajxy mga'a hídät hagoonstuum. Põñ hajxy jaduhñ hijp hagoonstuum, tägodium hajxy ñä'ägädä hity. Hõõch, nõcxáannäbõch. Cábõch ja'a nmädia'agy hajxy xmiadowáanänä.

Coo ja'a Jesús jaduhñ miädiaacpådõõy, mänitä tiu'ubõjnä. Mänit ñiguiu'tsä.

³⁷ Cabä Jesús ja'a miädia'agy hñajty miäbõgáanäxä, hoy hñajty madiu'u hoy-yagjuõõñajaty tõõ jia yajcähxõ'õgy.

³⁸ Paady hajxy hñajty quia'a mäbõga'añ nebiä profeta Isaías ja'a miädia'agy jaduhñ tiõjiädät, nebiä jecy quiujahyyän:

Dios, cab hõjts ja'a nmädia'agy põñ tõõ xmiäbõjcä.

Tõõ ja'a mmäjaa mja yajcähxõ'õgy, pero cab hajxy tõõ xmiõjpäda'agy.

³⁹ Cabä Jesús ja'a miädia'agy miäbõgáanäxä nebiä Isaías wiingtuum quiujahyyän:

⁴⁰ Tõõ ja'a Dios miäna'añ:

Tõõchä quiopc-hajxy nyajxejxä nébyhõchä nmädia'agy hajxy xquia'a wiinjuõõyyät,

nebiä yhaxõõgwiinmahñdy hajxy quia'a najtshixõ'õwät.

Cábõch ja'a piojpä quiädieey hajxy nyajnähwáatsät.

⁴¹ Jaduhñä Isaías jecy quiujahy nebiä Isaías ja'a Jesús hñajty tõõ yhixiän tsajpootyp. Cahnä Jesús hñajty yaa quiäda'agy hädaa yaabä naaxwiin.

⁴² Siémpräm ja'a Israelpä jäya'ay ja'a Jesús ja'a miädia'agy hajxy miäbõjcä, mõõdä copc-hajpähajxy nämay. Pero hamee'ch hajxy miäbõjcy. Cabä Jesús hajxy hñajty quiapxpaady mayjiäya'ayhagujc. Tsähgõõby hajxy hñajty coo hajxy yajpadsõmõõd maa ja'a chajtõjc-hajxiän ja'a fariseoshajxy.

⁴³ Ja'a judíoshajxy, cab hajxy chocy coo hajxy quiumayõõd ja'a Dios. Je'e hajxy chojpy coo hajxy ween wyiingudsähgõ'õyii ja'a cu'ug.

⁴⁴ Mänitä Jesús mõc miänaañ:

—Põnhõch ja'a nmädia'agy xmiäbõjcäp, jaanä xmiäbõjcäbõchä nDeedy ja'a miädia'agy hajxypä, ja'a ch yaa tõõ xquiéxiäbä hädaa yaabä naaxwiin.

⁴⁵ Põnhõch jaduhñ xyhijxp, jaanä xyhíxäbõchä nDeedy hajxypä.

⁴⁶ Páadyhõch yaa tõõ ngäda'agy hädaa yaabä naaxwiin, neby hajxy quia'a mähmõ'õwät hagoonstuum põnjátyhõch nmädia'agy hajxy xmiäbõjcäp. Jaduhñ mäwínhõch ngudõõ'xy nebiä jõñän neby hajxy hoy yhíxät.

⁴⁷ Ca'a yhõõchä hajxy nyajcumädownaamby, ja'a nmädiá'agyhõch hajxy xquia'a mäbõjcäbä, hoy hajxy jaduhñ tõõ jia mädoxyaty. Páadyhõch yaa tõõ ngäda'agy hädaa yaabä naaxwiin, nébyhõch ja'a jäya'ayhajxy jaduhñ nnähho'tú'udät. Ca'a yhõõchä hajxy je'e nyajcumädownaamby.

⁴⁸ Põnhõchä nmädia'agy hajxy xquia'a mäbõjcäp, mänit hajxy quiumadowa'añ coo ja'a naaxwiimbä hñajty wyiimbida'añ. Paady hajxy quiumadowa'añ, coõchä nmädia'agy hajxy hñajty tõõ xquia'a mäbõjcä.

⁴⁹ Ca'a yhõõchä nhamdsoo mädia'agy jaduhñ tõõ nyaghity. Ja'a nDeedyhõch, ja'a ch tõõ xquiéxiäbä, je'e ch jaduhñ tõõ xyhane'emy nebiátyhõch nmädiá'agät.

⁵⁰ Høøchä, nmøødhøch ja'a tøyhajt jaduhñ coo hajxy jim yhida'añ tsajpootyp cøjxta'axiøø, pøjátyhøch ja'a nDeedy ja'a miädia'agy mabójcäp. Nmädiácypioch nébyhøchä nDeedy tøø xyhane'emiän.

13

¹ Mänitä pascuaxøø hänajty tiehm yhadsooy. Tøø ja'a Jesús hänajty ñajuø'oy coo hänajty tøø yhabaady coo hänajty yaa choonaannä hädaa yaabä naaxwiin, coo hänajty jim ñøcxaannä maa ja'a Tieediän. Chojpy ja'a Jesús ja'a jiamioød hänajty hamuumdu'joot hädaa yaabä naaxwiin.

² Coo ja'a Jesúshajxy hänajty chuugaya'añ, tøø Judas hänajty wyiinmahñdyhaty, ja'a Simón Iscariote yhuung, coo Jesús hänajty yajcø'øwaanø'øwa'añii maa ja'a soldadohajxiän. Ja'a møjcu'ugong ja'a Judas jaduhñ yajwiinmahñdiägooyy.

³ Ñajuøøbiä Jesús hänajty nebiaty ja'a cuhdujt hänajty tøø mio'oyii ja'a Tieedy. Ñajuøøby hänajty coo hänajty jim tøø choon maa ja'a Tieediän, coo hänajty jim ñøcxaangombä jadähooc.

⁴ Coo hajxy hänajty tøø chuugaabiädøøñä, mänitä Jesús tiänaayyø'cy. Mänitä wyit chijy. Mänitä cuhbe'en tu'ug yajnimioxmäguittøøyyä.

⁵ Mänitä nøø quiudemøøyy palanganajooty. Mänitä Jesús tiägøøyy tecypiu-jpä ja'a jiamioød. Coo tiecypiu-jpä, mänitä tiecymiéexcombä.

⁶ Coo ja'a Jesús ja'a Simón Pedro hänajty tiecypiuja'añ, mänitä Simón Pedro miänaañ:

—Nej, xtiēcypiujaambøch høøchpäjä.

⁷ Mänitä Jesús yhadsooyy:

—Miičh, caj miičh mnajuø'oy tiiguiøxpøch miičh coo ndecypiu-jy. Mänit jaduhñ mnajuø'øwa'añ cooçh jaduhñ njädät nhabétät.

⁸ Mänitä Pedro miänaañ:

—Cab jaduhñ yhahixø'oy cooçh miičh jaduhñ xtiēcypiu-jät.

Mänitä Jesús yhadsooyy:

—Pø cájtäm miičh myajtecypiuja'añ, cájtämøch miičh hoy xji-amiøødhadaannä.

⁹ Mänitä Simón Pedro miänaañ:

—Bueno, Wiindsón, cøxiøch jaduhñ xpiú-jät møødhøchä ndecy, møødhøchä ngø'ø, møødhøchä ngopc.

¹⁰ Mänitä Jesús yhadsooyy:

—Pøn tøø chi'iy, wa'ads ja'a ñi'x ja'a quiopc je'e. Jagoo ja'a tiecy piú-jät. Mijts, mwa'ads mijts hajxy, pero cab hajxy nägøxiä mwa'adsä.

¹¹ Ñajuøøbiä Jesús hänajty pøn hänajty yajcø'øwaanø'øwaañäp. Paady jaduhñ miänaañ coo tu'jäya'ay hänajty quia'a wa'adsä.

¹² Coo ja'a Jesús cøjx tiecypiu-jpä, ja'a jiamioødhajxy, mänitä Jesús wyitpägøøñä. Mänit yhøxtaannä. Mänit miänaañ:

—Chójpiøchä njoot jaduhñ coo hajxy mnajuø'øwät tiiguiøxpøch mijts coo tøø ndecypiu-jy.

¹³ Hoy jaduhñ cooçh mijts jaduhñ xñäma'ay: “Wiindsón.” Tøyhájthøch mijts hajxy jaduhñ xWyindsønhaty.

¹⁴ Tøøch mijts hajxy ndecypiu-jy, hóyhøch Wiindsón nja tuñ. Jaanä jaduhñ mijtspä, mnidiecypiu-jøb hajxy hamiñ haxøpy.

¹⁵ Mbahíäp hajxy jaduhñ nebiátyhøch mijts tøø nduñ.

¹⁶ Chaads mijts tehñ tiøyhajt nnämä'awät, cabä moonsä cuhdujt møc miøødä quejee ja'a wyiindsón. Jaanä jaduhñ je'ebä ja'a tøø quiexyíjábä, cabä cuhdujt je'e møc miøødäbä quejee ja'a tøø miäguéxiäbä.

¹⁷ Coočhä nmädia'agy hajxy xwyiinjuóøyyät, coo hajxy jaduhñ mgudiúnät, jootcuyc hajxy jaduhñ mhídät.

¹⁸ 'Cábøch mijts nägøxiä nnägapxy. Nnajuóøbiøch pønjátyhøch tøø nwiimbiy. Pero tøjiajpä Diosmädia'agy maa jaduhñ miäna'añän: "Ja'a craačh tu'ugmucy xmióødcaabiä, tøøch je'e xmiädsibø'øy."

¹⁹ Jäguémioch mijts chaä nhawáañäm cooçh haxøøg njada'añ nhabeta'añ. Cooçh jaduhñ njaančh jádät njaančh habétät, mänit hajxy mhuuc mabógät cooçhä Dios tøyhajt tøø xjiaančh quexy.

²⁰ Chaads mijts tehñ tiøyhajt nnámá'awät, pøn hajxy mägu'ugpøgaamb ja'ačh nguexaambiä, møød høøch jaduhñ xmiägu'ugpøgaambä. Jaanä jaduhñds je'ebä, pønñhøch je'e xmiägu'ugpøgaamb, møødä Dios jaduhñ miägu'ugpøgaambä, ja'ačh tøø xquiéxiäbä.

²¹ Coo ja'a Jesús miädiaacpádøøñä, mänit jiootmadiägøøñä. Mänit miänaañ: —Chaads mijts tehñ tiøyhajt nnámá'awät cooçh mijts ja'a mjamiøød tu'ug xyega'añ ho'cøøc.

²² Mänitä jiamiøødhajxy ñiwyiinhee'ppejtä. Cab hajxy hñajty ñajuø'øy pøn ja'a Jesús hñajty jaduhñ ñänøømby.

²³ Jimä Jesús ja'a jiamiøød hñajty yhäña'ay tiehñ ñähmøjc. Jaančh tehñ yhoy ja'a Jesús hñajty miøødnijiootpaadyii.

²⁴ Mänitä Simón Pedro ja'a craa miäwø'xy. Mänit hamee'ch ñämaayy: —Huuc mäyajtøw pøn jaduhñ ñänøømby.

²⁵ Mänitä craa ja'a Jesús tiaatsmägowøøyy. Mänit miäyajtøøyy: —Pøn jaduhñ mnänøømby.

²⁶ Mänitä Jesús yhadsooyy:

—Nbama'tsnaxáambiøch hädaa tsajcaagyhaguijt. Mänitøch ja'a craa nmo'owa'añ, ja'ačh xyegaambä ho'cøøc.

Mänitä Jesús ja'a tsajcaagyhaguijt jiaančh pama'tsnajxy. Mänitä Judas yajcø'øgonøøyy, ja'a Simón Iscariote yhuung.

²⁷ Tuunä Judas ja'a tsajcaagy ñä'ä coondsooyy, mänitiä miøjcu'ujoottägøøyyä. Mänitä Jesús ja'a Judas ñämaayy:

—Tsógäm. Nøcx jatcø'øw ney mjatcø'øwa'añän.

²⁸ Ja'a hajxy hñajty jim caabiä, cab hajxy hñajty ñajuø'øy tiiguiøxpä Jesús jaduhñ coo miänaañ.

²⁹ Naje'e hajxy hñajty wyiinmahñdyhaty coo tyijy ja'a Jesús ja'a Judas hñajty quiexy juubiä mädyiijaty tyijy hñajty yajtunaamby xøøjooty. Naje'e hajxy hñajty wyiinmahñdyhjäp coo tyijy Jesús ja'a Judas ja'a häyoobäya'ay hñajty yajmo'owa'añ xädø'øñ. Paady hajxy hñajty wyiinmahñdyhaty, coo ja'a Judas ja'a xädø'øñ hñajty yajwijtswädityii.

³⁰ Tuunä Judas ja'a tsajcaagy ñä'ä coondsooyy, mänitiä tiøjpädsøømy. Tøø hñajty quioodsøøñä.

³¹ Coo ja'a Judas tiøjpädsøømy, mänitä Jesús miänaañ:

—Tøø yhabaady cooçh ngähxø'øga'añ cooçh nmøjjä njaančhä. Høøchcøxpä Dios jaduhñ quiähxø'øga'añ coo miøjjä jiaančhä. Dióshøch tøø xwyiinguexy.

³² Nyajcähxø'øgáambiøch ja'a Dios coo miøjjä jiaančhä. Mobädäjpøch ja'a Dios xyajcähxø'øgaambä cooçh nmøjjä njaančhä.

³³ Mägu'ughajpädøjc, cábøch mijts jejcy nmøødhida'añ. Xjia høxta'awáambiøch mijts, pero cábøch hajxy xpiaada'añ. Chaads mijts hajxy nnámá'awät nébyhøchä Israelpä jäya'ayhajxy tøø nnäma'ayän: Cab hajxy jim hoy mnøcxät maačh nhida'añän.

³⁴ Chaads mijts hajxy ja'a hawiinjemyguiuhdujt nmó'owät coo hajxy hamiñ haxøpy mničhogøød nébyhøch mijts ndsoquiän.

³⁵ Coo hajxy mničhogøød mnibia'häyowøød, cähxø'øgäp jaduhñ cooçh mijts ja'a nmädia'agy xjiaančh panøcxä. Xyhíxäp ja'a jäya'ayhajxy jii nägøxiä.

³⁶ Mänitä Simón Pedro ja'a Jesús miäyajtøøyy:

—Wiindsón, maa mnøcxa'añ.

Mänitä Jesús yhadsooyy:

—Cábøch miich jadunajtä hoy xpianøcxät maačh nnøcxa'añän. Miich, høxhaam miich mnøcxät.

³⁷ Mänitä Pedro ja'a Jesús miäyajtøøgumbä:

—Tiich miichäda'a jadunajtä hoy coo nga'a panøcxät. Nnähho'tú'udäbøch miich häyaa.

³⁸ Mänitä Jesús yhadsooyy:

—Jaančhä; cabä ndijy miichäda'a xñähho'tú'udät. Chaads miich jadunajtä nnämä'awät, cahnä tseey hñajty ya'axyñä, tøø miich hñajty tägøøghooc mnijjøgapxyii cooçh tyijy miich hñajty xquia'a hixiä.

14

¹ Mänitä Jesús miänaañ:

—Ca'a hajxy mwi'i tiajy mwi'i miay. Mäbøjcä ja'a Dios ja'a miädia'agy hajxy, y mäbøjcägøch ja'a nmädia'agy hajxypä.

² Jim tsajpootyp maachä nDeediän, mayyä tsäna'awøhñdy jim. Coo häxøpy quia'a tøyyä, cab hajxy cu nhawáañäm. Nøcxäambøch ja'a tsäna'awøhñdy nbäda'aga'añ nähix hahixøø maa mijts mhídat.

³ Cooçh jim nnøcxa'añ, cädaactägatsáambøch jadähóocägumbä. Mänitøch mijts jim ngøxy woonøcxa'añ maačh nhida'añän. Näguipxy hajxy jim nhidaañäm.

⁴ Mnajuøøby hajxy maačh nnøcxa'añ. Jaduhñ hajxy mnajuøøbiä neby hajxy jim mnøcxät.

⁵ Mänitä Tomás ja'a Jesús ñämaayy:

—Wiindsón, pero cab højts nnajuø'ø y maa miich mnøcxa'añ. Neby højts jaduhñ jim nnä'ä nøcxät.

⁶ Mänitä Jesús yhadsooyy:

—Jaduhñ mäwíinhøch høøch nebiä tu'ujän. Høøhcøxpä hajxy jim mgooda'añ pønjátyhøch ja'a nmädia'agy xmiäbøjcäp. Høøhcøxpä hajxy jim mhida'añ cøjxta'axiøø. Paady hajxy jim mhida'añ cooçhä tøyhajt nya-jcähxø'øgy ja'a Dioscøxpä.

⁷ Pønjátyhøch je'e xyhixyhajp, jaanä xyhixyhájtäbøch ja'a nDeedy je'ebä. Tøø hajxy mhixy.

⁸ Pero cab hajxy wyiinjuøøyy waambä Jesús jaduhñ jia mänaañ. Mänitä Felipe ja'a Jesús ñämaayy:

—Wiindsón, ween højts ja'a mDeedy xyhuuc yaghíxät. Mänit højts jootcuje nmähmø'øwät.

⁹ Mänitä Jesús yhadsooyy:

—Felipe, tii jaduhñ coo mmäna'añ. Tøøch miich jejcy xpiawädity. Xyhixyhájpøch miich jaduhñ. Pønch xyhixp, jaanä xyhíxäbøch ja'a nDeedy je'ebä. Tiich miich jaduhñ coo xñäma'ay cooçh mijts ja'a nDeedy nyaghíxät.

¹⁰ Nej, cab jaduhñ mmäbøquiä cooçhä nDeedy tu'ugmädia'agy nmøødhity. Ja'a nDéedyhøch miädia'agy, je'eçh jaduhñ nmädiäacäp; ca'a yhøøchä nhamd-soo mädia'agy nmädiacypy. Ja'a nDéedyhøch ja'a mäjaa jaduhñ xmiooby; je'eçh ja'a tiuung jaduhñ ndúunäp.

¹¹ Mäbøjcägøch ja'a nmädia'agy hajxy cooçhä nDeedy jaduhñ tu'ugmädia'agy nmøødhity. Hoy hajxy mwiinjuø'øy mga'a ja wiinjuø'øy,

mmäbógäp hit hajxy jaduhñ. Páadyhøch hit hajxy ja'a nmädia'agy xmiäbójcät, cooñ hoy-yagjuøøñäjatypä nyajcähxø'øgy.

¹² Chaads mijts tehñ tiøyhajt nnämäaguimbä, pónhøch ja'a nmädia'agy xmiäbójcäp, jaanä yajcähxø'øgaamby je'ebä ja'a hoy-yagjuøøñäjaty. Maas hoy-yagjuøøñäjatypä je'e yajcähxø'øga'añ quejeeñ nyajcähxø'øgy. Paady jaduhñ yajcähxø'øga'añ cooñ jimñ nnøcxa'añ maaçhä nDeediän.

¹³⁻¹⁴ Coö hajxy mmäbógät cooñ ja'a cuhdujt tøyhajt nmøødä, coö hajxy hñanjty tii myujwa'ana'añ, ngudiünäbøch jaduhñ neby jaduhñ quiähxø'øgät cooñhä nDeedy je'eduhñ miøjjä jiaañhä.

¹⁵ 'Pø xchójpøch mijts, mänítøch mijts ja'a nmädia'agy xquiudiúunät nebiátyhøch mijts tøø nmägapxy tøø nhane'emiän.

¹⁶ Nnämäabiøch ja'a nDeedy coö mijts ja'a jootcapxmøcpøjpä wiingpä xya-jnägüexät, ja'a tømíadiacpä. Ja'a Dioshespíritu je'e. Cøjxta'axiøø hajxy jaduhñ xmiøødhida'añ.

¹⁷ Pønjaty ja'a Diosmädia'agy ca'a mæbøjp, cabä Dioshespíritu hajxy choga'añ. Cab hajxy mänaa yhixyhada'añ. Pero mijts, mobädajpä hajxy je'e mhixyhada'añ. Xmiøødhidáañnäp hajxy je'e. Jiiby hajxy mmøødhada'añ mjoodootyhajxy.

¹⁸ Cábøch mijts je'e nnähgue'ega'añ nidiuhñ nämetsc. Cädaactägatsáambøch yaa jadähooc maa mijtsän.

¹⁹ Mejtsxøø tægøøgxøøch ja'a jäya'ayhajxy xjiaag hixa'añ. Cábøch hajxy hñanjty yaa xyhixaannä cooñ yaa ndsoonaannä. Cooñ cøjxta'axiøø nhida'añ, paady mijts cøjxta'axiøø mhidaambä.

²⁰ Mobädajpä hajxy jaduhñ mnajuø'øwa'añ cooñhä nDeedy tu'ugmädia'agy nmøødhity. Jaanä tu'ugmädia'agy hajxy jaduhñ nhidáañnämbä.

²¹ Pønjátyhøch ja'a nmädia'agy xquiudiúunäp nébiøch tøø nmägapxy tøø nhane'emiän, xchójpøch je'e. Jaanä ndsojpy højts je'ebä móødhøch ja'a nDeedy. Nyaghixáambiøch ja'a nwiinmahñdy hajxy.

²² Jii Jesús ja'a jiamiøød hñanjty tu'ug xiøhaty Judas. Pero ca'a je'e yhIscariote. Mänitä Judas ja'a Jesús miäyajtøøyy:

—Wiindsøn, tii højts ja'a mwiinmahñdy coö xyaghixa'añ, pero cabä cu'ughajxy myaghixa'añ.

²³ Mänitä Jesús yhadsooyy:

—Pónhøch xchojp, xquiudiúunäbøch ja'a nmädia'agy je'e. Y chójpiøchä nDeedy je'ebä. Tu'ugmädia'agy højts nmøødhida'añ móødhøch ja'a nDeedy.

²⁴ Pónhøch jaduhñ xquia'a tsojp, cábøchä nmädia'agy xyajtuunä. Ca'a yhøøchä nhamdsoo mädia'agy hädaa, hädaa hajxy nyajmøødmädiacypiä. Ja'a nDéedyhøch miädia'agy hädaa, ja'açh tøø xquiéxiäbä.

²⁵ 'Mijts, nyajmøødmädiacypiøch mijts jaduhñ mäduhñtiä hajxy yaa nmøødhitiän.

²⁶ Nägóoyyøch nnøcxaannä ndu'ubøgaannä, mänítøch ja'a nDeedy yhEspíritu quixa'añ maa mijtsän. Je'eñ jaduhñ nguwitshadaamby. Mijts jaduhñ xjiootcapxmøcpøgaamb. Cøxaamb hajxy xyajnähxø'øwa'añ. Cøxaamb hajxy xyagjahmiejtsta'aga'añ nebiátyhøch mijts yaa tøø nyajmøødxil'igy tøø nyajmøødmädia'agy.

²⁷ 'Jootcújc-høch mijts nyajmähmø'øwa'añ. Cab mijtsä cu'ug xyagjootcugø'øwät nébiøch mijts jootcujc tøø nyaghitiän. Ca'a hajxy tii mnädajy mnämay. Ca'a hajxy mdsähgø'øy mdsähdiuñ.

²⁸ Tøøch mijts nhawáañäm cooñ nnøcxa'añ ndu'ubøga'añ. Pero cädaactägatsáambøch jadähooc. Pø xchójpøch mijts tøyhajt, mxoonä'agäp

hajxy coo nhawáanäm cooch jim nnøcxa'añ maačhä nDeediän. Miaas møødä mājaa je'e quejeech nmøødä.

²⁹ Tøøch mijts jäguemiä nhawáanäm nébiøch yaa njada'añ hädaa yaabä naaxwiin y cooch jim nnøcxaanä maačhä nDeediän. Cooch jaduhñ njádät, cooch jim nnøcxät, mänit hajxy mhuuc tehñ miäbøgät.

³⁰ 'Tu'habáquiøch mijts nhuuc jaac møødmädia'agynä. Medsaambä møjcu'ugong, ja'a yaa cu'ughanehmbä; pero cabä cuhdujt miøødä maačh høøchcøxpän.

³¹ Ngudiunáannäbøch nébiøch ja'a nDeedy tøø xmiägapxy tøø xyhane'emiän. Páadyhøch jaduhñ ngudiuna'añ neby jaduhñ quiähxø'øgät coochä nDeedy tøyhajt njaančh tsocy. Tänaayyø'øg hajxy. Jam hajxiän.

15

¹ 'Høøch, jaduhñ mäwíinhøch høøch nebiä tsaatptequiän ja'a tøyhajtpä. Ja'a nDéedyhøch, jaduhñ je'e nebiä cudsatypcamän.

² Ja'a nDéedyhøch, xyhøxpújxäbøch ja'a nhaads mädyii ca'a tøømbejp; pero mädyiids jaduhñ tøømbejp, je'eds jaduhñ weenjaty yhøxpujxyp, nebiä maas majiaty tiøømbédät.

³ Coo hajxy jaduhñ tøø mmäbøcy nebiátyhøch mijts je'e tøø nyajnáhixø'öyän, jadúhñhøch ja'a nDeedy mijts tøø xyajnáhwa'ačh ja'a mhaxøøgwiinmahñdyhajxy. Jaduhñ mäwíinäts je'e nebiä tsaatyp hajxy jøjpuxiän.

⁴ Tehngájñøch ja'a nmädia'agy hajxy xpianøcxät; tehngájñøch mijts nbuhbeda'añ. Ja'a tsaatypaads, cab je'e tiøømbeda'añ coo ja'a yhøjxä tiecy hānajt quia'a hity. Jaduhñ mäwíinäts mijtspä, pø cábøch ja'a nmädia'agy hajxy tehngajnä xpianøcxaanä, cab hajxy hoy mwädítät.

⁵ 'Høøch, jaduhñ mäwíinhøch høøch nebiä tsaatptequiän. Høøch mijts jaduhñ nhaadshajpy. Coochä nmädia'agy hajxy tehngajnä xpianøcxät, mänit hajxy hoy mwädítät. Nbuhbédäbøch mijts jaduhñ. Cooch mijts nga'a puhbédät, cab hajxy tii hoy mduna'añ.

⁶ Pøñhøchä nmädia'agy xquia'a panøcxäp, jaduhñ mäwíinäts je'e nebiä tsaatypaads hajxy yhøxpuxiän. Coo jaduhñ tiø'øch, mänit hajxy yajpädø'øgy; mänit hajxy ño'ogy.

⁷ 'Coochä nmädia'agy hajxy tehngajnä xpianøcxät, coo hajxy mga'a jahdiägóyyät nebiátyhøch mijts tøø nyajnáhixø'öy, ngudiúnäbøch jaduhñ mädyiibäjaty mijts xmiäyujwa'anaamb.

⁸ Coo hajxy hoy mwädítät, cāhxø'øgäp jaduhñ coochä nmädia'agy hajxy tøyhajt xpianøcxä. Jaanä cāhxø'øgaamb jaduhmbä coochä nDeedy je'e miøjjä jiaančhä.

⁹⁻¹⁰ Nébiøchä nDeedy xchoquiän, jadúhñhøch mijts ndsojpä. Coochä nmädia'agy hajxy xyajtúunät, ngumáyäbøch mijts jaduhñ; hoy miänáajøch mijts ndsógät. Jadúhñhøchä nDeedy xchocy coochä miädia'agy nyajtúunäbä.

¹¹ 'Páadyhøch mijts jaduhñ nyajmøødx'i'igy nyajmøødmädia'agy coo hajxy tehngajnä mxoondá'agät nébiøch nxoondá'aguiän.

¹² Míjtshøch jaduhñ nmägapxyp nhanehmbä coo hajxy hamiñ haxøpy mniçhogøød mnibia'häyowøød nébiøch mijts ndsoquiän.

¹³ Pøñ jaduhñ jaančh tehñ chójcäp, coo hānajt yagho'oga'añii, nähho'tu'udøøb je'e ja'a miägu'ughajpä.

¹⁴ Coo hajxy mgudiúnät nebiátyhøch mijts tøø nmägapxy tøø nhane'emy, xmiägu'ughájpøch mijts hānajt jaduhñ.

¹⁵ Cábøch mijts nnäma'awaannä “moonsä.” Ja'a moonsä, cabä ñajuø'øy tii ja'a wyiindsøn tiuumby. Pero mijts, tøø mijts ngøxy hawáanäm nebiátyhøch ja'a nDeedy je'e tøø xyhawaanä. Páadyhøch mijts nnäma'awaannä “mägu'ughajpä.”

¹⁶ Ca'a yhøøch mijts je'e tøø xwyiimbiy; høøch mijts je'e tøø nwiimbiy. Tøøch mijts jaduhñ nwiinguexy coo hajxy hoy mwädítät, coo Diosmädia'agy hajxy myajwá'xät, neby hajxy jaduhñ mmayó'owät. Weenä Diosmädia'agy hajxy tehñgajnä pianøcxpä; ween hajxy hoy wiädijpä. Jadúhñhøch mijts nDeedy xmió'owät tijaty mijts hānajtj mdsogaamby, cooçhä nmädia'agy hajxy hānajtj xmiäbøjcä.

¹⁷ Chámhøch mijts jadähooc nmägapxy nhane'emy coo hajxy mniçhogøød mnibia'häyowøød hamiñ haxøpy.

¹⁸ 'Mijts, xmiähanhadaamb ja'a tsaan ja'a cu'ug hajxy. Moorä høøch hajxy tøø xmiähanhajpä.

¹⁹ Xmiähanhadaamb mijts je'e, ja'a hajxy haxøøgwädijpä. Paady mijts xmiähanhada'añ coo mijts ja'a haxøøgpä tøø mgøxy najtshixøøñä. Tøø mijts ja'a mbojpä mgädieey nyajñhwaatsäm. Coo mijts haxøpy tøø mga'a najtshixø'øy ja'a haxøøgpä, cu xmiägu'ughajtj jäya'ay hajxy may.

²⁰ Huuc jahmiets hajxy nejy mijts tøø nnäma'ayän, cabä moonsähajxy quiuhdujtmøød quejee wyiindsønñhajxy. Cooçhä jäya'ayhajxy näje'e xmiädsiphaty, paady mijts hajxy xmiädsiphadaambä. Y cooçhä nmädia'agy hajxy näje'e xmiäbøjcä, paady mijts ja'a nmädia'agy hajxy xmiäbøgåanäbä.

²¹ Høøchcøxpä mijts ja'a cu'ug xmiädsiphada'añ, je'eguiøxpä cooçhä nDeedy hajxy xquia'a hixyhajtä, ja'açh tøø xquiéxiäbä.

²² 'Tøøch jäya'ay ja'a nmädia'agy hajxy hoy nyajmädoyhaty. Cooçhä nmädia'agy hajxy tøø xquia'a mæbøjcä, paady hajxy quiumädowa'añ. Cooçhä nmädia'agy hajxy haxøpy tøø xquia'a mädoyhajtä, cab hajxy haxøpy quiumädowa'añ.

²³ Pøñhøch xmiähanhajtj, jadúhñhøchä nDeedy xmiähanhajtäbä.

²⁴ Tøøçhä hoy-yagjuøøñäjatypä nyajcähxø'øgy. Caj pøn jaduhñ yajcähxø'øgy hädaa yaabä naaxwiimbä. Hoy jäya'ayhajxy tøø jia hixy tøø jia mädoy, xmiähanhajtj højts møødhøchä nDeedy. Paady hajxy je'e quiumädowa'añ. Cooçhä hoy-yagjuøøñäjatypä haxøpy tøø nga'a yajcähxø'øgy, cab hajxy haxøpy quiumädowa'añ.

²⁵ Cooçhä jäya'ayhajxy xmiähanhaty, tøjiajp jaduhñ nebiä Diosmädia'agy myiñän, neby hajxy jecy quiujahyyän: “Pues, nä'a nägóobøch hajxy xmiähanhaty.”

²⁶ 'Nguexáambiøch ja'a Dioshespíritu, ja'a mijts xjiootcapxmøcpøgaambä, ja'a tømíadiaacpä. Jim jaduhñ choona'añ maachä nDeediän. Coo quiäda'aga'añ, mänítøch je'e xñägapxa'añ.

²⁷ Jadúhñhøch mijts xñägapxaambä, nebiátyhøch mijts yaa tøø nmøødwädity. Høxtáhmdsøchä jäya'ayhajxy nyajñhixøøchooñän, quípxyhøch mijts nmøødtägøøyy wädijpä høxtä jäda'anäbaadyñä.

16

¹ 'Páadyhøch mijts cham nyajmøødxi'igy nyajmøødmadia'agy, cooçhä mijts ja'a nmädia'agy ni mänaa xquia'a najtshixøøyyät, hoy mijts jäya'ay mäduhñtiä xjia mädsiphaty xjia mähanhaty.

² Xyajpædsømaamb mijts je'e tsajtøgooty. Høxtä habaadaamb jaduhñ coo mijts xyagho'oga'añ je'eguiøxpä cooc tyijy ja'a Diosmädia'agy hajxy quiudiuñ.

³ Paady mijts je'e xmiädsiphada'añ coo hõjts je'e xquia'a hixiä móødhõchä nDeedy.

⁴ Coo hajxy jaduhñ mjádät mhabétät, mänit hajxy jaduhñ mjahmiédsät coo hajxy nhawáañäm. Paady chamñ nhawáañäm.

'Cooch mijts hijty quipxy nmøødwädity, paady hajxy hijty nga'a hawáañäm.

⁵ Nøcxáañnbøch jimñ maaçhä nDeediän, ja'açh tøø xquiéxiäbä. Jimñhøch nhidaañnä. Pero cábøch mijts xmiäyajtø y maaçh nnøcxa'añ.

⁶ Mjootmayhajp mijts jaduhñ cooçh mijts jaduhñ tøø nyajmøødmädia'agy.

⁷ Chaads mijts tehñ tiøyhajt nnämä'awät, hoyø'øwaamb jaduhñ mijtsçøxpä cooçh nnøcxa'añ. Nguexáambiøch pønñ mijts xjiootcapxmøcpøgaamb. Cooçh nga'a nõcxät, cab jaduhñ quiädá'agät maa mijtsän.

⁸⁻⁹ Tsipcøxp jaduhñ ñä'ägä cäda'aga'añ. Mänitä jäya'ayhajxy yajwiinjuø'øwa'añii coo pojpä cädieey hajxy tøyhajt jiaañch møødä. Paady hajxy miøødä, cooçhä nmädia'agy hajxy tøø xquia'a mæbøjcä. Paady hajxy yajcumädowa'añii ja'a Diósäm.

¹⁰ Jaduhñ hajxy yajwiinjuø'øwáañbä cooçh ja'a pojpä cädieey nga'a møødä. Nøcxáambøch jimñ maaçhä nDeediän; cábøch mijts yaa xyhixaañnä.

¹¹ Jaduhñ hajxy yajwiinjuø'øwáañbä coo hajxy yajcumädowa'añii ja'a Diósäm, pønjat y ja'a møjcu'ugong ja'a miädia'agy panøcxäp, ja'a yaa hanehmbä hädaa yaabä naaxwiin. Tøø ja'a Dios miäna'añ coo ja'a møjcu'ugong quiumädowa'añ.

¹² 'Madiu'u mijts nja hawaañáañäm, pero cab hajxy mwiinjuø'øwät.

¹³ Coo ja'a Dioshespíritu hñajty quiäda'aga'añ, mänit mijts ja'a tøyhajt xquiøxy yajwiinjuø'øwa'añ. Ca'a yhamdsoo mädia'agy je'e miädia'agaamb y. Piamädia'agaamb y jaduhñ nebiaty je'e tøø miädo y. Je'e mijts xyajmädoyhadaamb tijaty jadaañ tunáañäp.

¹⁴ Xñägäpaxáambøch je'e cooçh nmøjjä njaañchä. Mijts xyajmädoyhadaamb nebiátyhøch je'e tøø nnäma'ayän.

¹⁵ Coo hõjts nhity tu'ugmädia'agy móødhõchä nDeedy, páadyhøch mijts chamñ nnäma'ay coo mijts ja'a Dioshespíritu xyajmädoyhada'añ nebiátyhøch je'e tøø nnäma'ay.

¹⁶ 'Mobädájpøch jimñ nnøcxaañnä maaçhä nDeediän. Pero cábøch njega'añ; mänitøch mijts hñajty xyhijxtägatsa'añ.

¹⁷ Mänitä Jesús ja'a jiamioødhajxy näje'e ññämaayyä:

—Pätiidä yø'øya'ay jaduhñ coo ñä'ä mäna'añ cooc mobädajpä ñøcxaañnä; cábäc jaduhñ jiega'añ. Mänitäc nhixáañägombä. Pätiidä coo ñä'ä mäna'añ cooc ñøcxa'añ maa ja'a Tieediän.

¹⁸ Pätiidä coo ñä'ä mäna'añ “mobädajpä.” Päwaambtä jaduhñ jia mäna'ana'añ.

¹⁹ Ñajuøøbiä Jesús hñajty coo hñajty miäyajtøwa'añii. Mänit miänaañ:

—Xmiäyajtøwáambøch mijts tijátyhøch jaduhñ tøø nja mädia'agy, túhñämäts.

²⁰ Chaads mijts tehñ tiøyhajt nnämä'awät, mjø'øwaamb mxuudsaaamb mijts ja'a høøchcøxpä. Pero yø'ø cu'ughajxy, jaañch tehñ xioonda'agaamb hajxy. Pero cab hajxy jejcy mjootmayhada'añ. Paquiä hajxy mjootcugø'øwáañgombä.

²¹ Coo ja'a to'oxiøjc ja'a xiøøbio'ohajxy piedyii, mänitä jioothajxy piädø'øgø'øgy. Nägooyyä ja'a yhuunghajxy je'e miejtsnä, hagädaacp ja'a jioothajxy je'e. Cab hajxy je'e jiahmiejtsnä coo ja'a jioothajxy hñajty tøø piädø'øgy. Xoondáacnäp hajxy coo yhuunghajxy hoy ween tøø myiñ tøø quia'ay.

²² Jaduhñ mäwíinäts hajxy mjootmayhaty nebiä to'oxiøjc ja'a jiootha-jxy piädø'øguiän. Pero nägooyyä højts nniyhíjxägumbä, mänit mijts mx-oonda'aga'añ. Caj mijts pøñ xyagjootmayhadaañnä.

²³ 'Cábøch mijts hñajty tii xmiäyujwa'anaañnä. Chaads mijts tehñ tiøyhajt nnámá'awät, cooçh mijts nDeedy hñajty tijaty xmiäyujwa'anaañ, xmio'owaamb mijts je'e ja'a høøçhcøxpä.

²⁴ Cahnä hajxy tii mhuuc yujwa'añ ja'a høøçhcøxpä. Coø hajxy tijaty myujwá'anät, xñä'ägä mo'owaamb hajxy je'e. Jaduhñ hajxy hoy jootcuje mhídat.

²⁵ 'Yajmäbaadyháamhøch mijts tøø nmøødmädia'agy. Habáatnäp jaduhñ cooçh nga'a mädia'agaañnä yajmäbaadyhaam. Howyiinjuøøñøch ja'a nDeedy nmädia'agaañnä.

²⁶⁻²⁷ Mänitøch mijts ja'a nDeedy hoy tyijä xmiäyujwa'anaañ ja'a høøçhcøxpä. Mänit hajxy xmio'owa'añ. NDéedyhøch mijts xyhamdsoo mäyujwa'anáañp je'eguiøxpä cooçh mijts nDeedy xjiaançh tehñ chocy. Paady mijts xchocy cooçh mijts xchojpä, cooçh mijts ja'a nmädia'agy hajxy tøø xmiäbøjcä cooçh jim tøø ndsooñ maaçhä nDeediän. Hamdsoo hajxy mmäyujwa'ana'añ; cábøch waamb nmäna'ana'añ.

²⁸ Høøch, jímhøch tøø ndsooñ maaçhä nDeediän. Yaaçh tøø ngäda'agy hädaa yaabä naaxwiin. Pero tsoonáambøch yaa jadähóocägumbä. Nøcxtägatsáambøch jímägumbä maaçhä nDeediän.

²⁹ Mänitä Jesús ja'a jiamiøødhajxy miänaañ, ñämaayyä Jesús:

—Hoorä sí, howyiinjuøøñä miich mmädiaacnä.

³⁰ Tøø højts nnajuø'øy. Cab højts miich tii nmäyajtøwaanä. Nmäbøjnäp højts jaduhñ cóodäm miich jim mjaançh tsooñ maa Diosän.

³¹ Mänitä Jesús yhadsooyy:

—Mjaançh mäbøjpiäda'a tyijy hajxiä.

³² Habáatnäp jaduhñ coo mijts ja'a cu'ug xquiøxy päboowia'xa'añ. Mänit hajxy jim mnøcxaañnä maa mdøjc-hajxiän. Nidiühmhøch hajxy yaa xñähgue'egaañnä. Pero cábøch nidiuhñ tøyhajt nhida'añ. Ja'a nDéedyhøch jaduhñ xmiøødhidaamb.

³³ Páadyhøch mijts jaduhñ cham nyajwiinxiiic nyajwiingapxø'øy coo mijts ween jootcuje mhíñät cooçhä nmädia'agy hajxy xmiäbøjcät. Mbaadaambiä tsaaçhpa peenä hajxy hädaa yaabä naaxwiin. Pero ca'a hajxy tii mdajy mmay; cábøchä møjcu'ugong nyajmäjäda'aga'añ.

17

¹ Nägooyyä Jesús miädiaacpädøøyy, mänit yuughee'py tsajpootyp. Mänit miänaañ:

—Teedy, tøø yhabaatnä. Huuc yajcähxø'øg cooçh nmøjjä cooçh njaançhä. Jaduhñhøch nyajcähxø'øgaambä coo miich nmøjjä coo miich mjaançhä.

² Tøøch miich cuhdujt jaduhñ xmio'oy cooçhä jäya'ayhajxy nägøxiä nguh-dujtmó'owät coo hajxy jim jaduhñ ween yhity maa miichän cøjxta'axiøø, pøñjatyhøch miich tøø xyajcø'øwaanø'øy.

³ Jaduhñ hajxy jim cøjxta'axiøø yhida'añ maa miichän, coo højts ja'a nmädia'agy jaduhñ xmiäbøjcämät coo miich nidiuhñ mDioshaty, coo miich mdømiädia'agy, cooçh miich yaa tøø xquiøxy hädaa yaabä naaxwiin.

⁴ 'Høøch, ngudiúumbiøch hädaa yaabä naaxwiin nébiøch miich tøø xy-hane'emiän. Nyajcähxø'piøch jaduhñ coo miich ja'a mājaa tøyhajt mmøødä.

⁵ Teedy, høøchä mājaa yajcähxø'cäc jim maa miichä mwiinduumän nébiøchä mājaa hijty jim nmøødän mänaabä hädaa yaabä naaxwiin yhawijy tiøø'xta'aguiän.

⁶ 'Pønjaty miičh yaa tøø mwiimbiy hädaa yaabä naaxwiin, je'ečh hajxy jayøjp nyajmädoyhajt coo miičh nidiuhm mDioshaty, coo miičh mdømiädia'agy. Miičhä mgø'øjooty hajxy je'e hijty. Pero jadähóoc-høch miičh je'e tøø xyajcø'øwaanøøguiumbä. Tøø ja'a mmädia'agy hajxy je'e xmiäbøjcä xquiudiunä.

⁷ Ñajuøñäp hajxy cooçh miičh jaduhñ tøø xmio'oy mädúhñtiøch nmøødä.

⁸ Tøøçh hajxy ngøxy yajnähixø'ø nebiátyhøch miičh tøø xyajnähixøøbiän. Ñajuøñäp hajxy cooçh jim tøyhajt ndsooñ maa miičhän. Tøøçhä nmädia'agy hajxy jaduhñ xmiäbøjcä cooçh miičh tøø xquiexy.

⁹ 'Teedy, tunä mayhajt. Cueendähat hädaa jäya'ayhajxy, hädäajøch miičh tøø xyajcø'øwaanø'øybä. Ca'a jie'emøødøch jaduhñ nnänømy ja'a mmädia'agy hajxy tøø xquia'a mabøjcäbä.

¹⁰ Højts hädaa jäya'ay nje'ehajmújcäm; páadyhøch miičh nnäma'ay coo mgüeendähádät. Hädaa jäya'aguiøxpä jaduhñ quiähxø'øga'añ coo højts nmøjhájtäm coo højts njaançhjájtäm.

¹¹ 'Cábøch yaa nhidaannä hädaa yaabä naaxwiin. Nøcxáannäbøch jim maa miičhän. Pero yaaçhä njamiøødhajxy miähmø'øwa'añ. Cueendähat hajxy neby hajxy jaduhñ yhidät tu'ugmädia'agy neby højts nhíjtäm tu'ugmädia'agy. Miičhä mmäjaagøxpä mgüeendähádät. Miičhøch hajxy tøø xyajcø'øwaanø'øy. Jaançh tehñ wia'ads miičhä mjoot miičhä mwiinmahñdy.

¹² Høxtä jäda'anäbáadyñøch hajxy ngüeendähaty miičhä mmäjaagøxpä. Caj miičhä mmädia'agy hajxy nägøxiä tøø xñajtshixøøyyä. Jagooyyä tu'jäya'ay ja'a mmädia'agy tøø xñajtshixøøyyä, ja'a hijty nä'ägä tu'udägoyyaambä. Paady jaduhñ tiu'udägooyy nebiä mmädia'agy jaduhñ tiøjiádät nebiä cujaaybä miähmøøyyän.

¹³ 'Høøch, nøcxáannäbøch jim maa miičhän. Páadyhøch miičh jaduhñ cham nyajmøødmädia'agy hädaa jäya'ay wyiinduumhajxy neby hajxy jaduhñ xioondáacpät nébiøch nxoonä'aguiän.

¹⁴ Tøøçh miičhä mmädia'agy hädaa jäya'ayhajxy nyajmøødmädia'agy. Paady hajxy yaa miähanhadyi hädaa yaabä naaxwiin, coo hajxy haxøøgtuum quia'a wädijnä. Høøch hajxy xpiahijxp cooçh haxøøgtuum nga'a wädity.

¹⁵ Chaads miičh nnämä'awät coo miičh hädaa jäya'ayhajxy mgüeendähádät maa ja'a møjcu'ugongän. Cábøch jaduhñ nmäna'añ coo hajxy yaa chóonät hädaa yaabä naaxwiin.

¹⁶ Hoy hajxy jaduhñ wiädity nébiøch nwäditiän.

¹⁷ Cunuu'x hädaa jäya'ayhajxy ja'a miičhä mhomiädia'agyhaam nebiä mmädia'agy hajxy tehngajnä xpianøcxät xquiudiúnät. Mäduhñtiä miičhä mmädia'aguiä, tøyhajt je'e.

¹⁸ Høøch, hädaa yaabä naaxwíinhøch miičh tøø xquiexy nébiøch miičh ja'a jäya'ay ja'a mmädia'agy hajxy nyajmädoyhádät. Jadúhnhøch yø'øya'ayhajxy nwiinguexaambä nebiä mmädia'agy hajxy xyaghawa'xøøyyät.

¹⁹ Nnähho'tu'udáambiøch hädaa jäya'ayhajxy nejy miičhä mmädia'agy hajxy tehngajnä xpianøcxät xquiudiúnät.

²⁰⁻²¹ 'Jadúhnhøch nmänaambä coo jäya'ayhajxy ween yhity tu'ugmädia'agy nägøxiä mädúhñtiøch ja'a nmädia'agy hajxy xmiäbøgaanä majaty-hagájpthøchä njamiøød ja'a nmädia'agy hajxy xyajwa'xaanä. Ween hajxy xmiøødhíjtäm tu'ugmädia'agy neby højts nhíjtäm tu'ugmädia'agy. Jaduhñdsä jäya'ayhajxy miäbøga'añ cooçh miičh tøyhajt tøø xjiaançh quexy.

²² Tøøçh hajxy nguhdujtmø'oy coo hajxy yhidät tu'ugmädia'agy, nébiøch miičh tøø xquiuhdujtmø'oyän coo nhíjtämät tu'ugmädia'agy.

²³ Tu'ugmädiá'agyhøch hajxy xmiøødhity nébiøch miich nmøødhitiän tu'ugmädia'agy. Nägøxiä hajxy jaduhñ yhidät tu'ugmädia'agy, ja'a nmädiá'agyhøch hajxy tøø xmiäbøjcäbä. Jaduhñdsä jäya'ayhajxy ñajuø'øwa'añ nägøxiä cooçh miich tøø xquiexy, coo miich hajxy jaduhñ mdsocy nébiøch miich xchoquiän.

²⁴ Teedy, mänáambøch jaduhñ cooçh hajxy jim ween xmiøødhity maaçh nhida'añän, ja'açh miich tøø xyajcø'øwaanø'øyäbä. Jaduhñhøch nmänaambä coo ja'a mäjaa hajxy ween yhixy, ja'açh miich tøø xmió'øyäbä. Xji-aançh tehñ chójpøch miich hñajty mänaabä hädaa yaabä naaxwiin yhawijy tiøø'xta'aguiän. Høxtä jäda'anäbáadyñøch miich xchocyñä.

²⁵ Teedy, tøyhajt miich mnä'ägädä mädia'agy. Ja'a cu'ughajxy, cab hajxy wyiinjuø'øy coo miich mdømiädia'agy. Pero høøçh, nhíxyhøch miich. Hädaa njamiøødhøch hajxy chaa tänaabiä, ñajuøøby hajxy je'e cooçh miich tøø xquiexy.

²⁶ Tøøch hajxy je'e nyajmøødmädia'agy coo miich nidiuhñ mDioshaty, coo miich mdømiädia'agy. Tehngájñøch jaduhñ nyajmøødmädia'aga'añ neby hajxy jaduhñ ñiçhogøød ñibia'häyowøød nébiøch miich xchoquiän. Wéenhøch hajxy tu'ugmädia'agy xmiøødhity.

Mänitä Jesús miädiaacpäðøøyy.

18

¹ Coo Jesús miädiaacpäðøøyy, mänitä Jesúshajxy chohñ cajptooty møødä jiamiøødhajxy. Mänitä woc hajxy yajnajxy, ja'a hñajty xøhajpä Cedrón. Mänit hajxy tiägøøyy olivocamjooty.

² Ja'a Judas, yhixy hñajty je'e jiiby olivocamjooty. Mayhooc ja'a Jesúshajxy hñajty jiiby tøø yhamugø'øy. Ja'a Judas ja'a Jesús hñajty yegaamb. Ja'a Jesús ja'a miädsiphajxy hñajty yajcø'ødägø'øwáanäp.

³ Mänitä Judas ja'a soldadohajxy hoy wioy. Møødä policíahajxy hoy wioy maa ja'a teedywiindsønñajxiän, maa ja'a fariseoshajxiän. Mänitä Jesús jiiby ñägädaacä olivocamjooty, ja'a Judashajxy møødä soldado møødä policía. Tøø hñajty quioodsøñä. Møødä jiøøn møødä quiuhmd hajxy quiädaacy.

⁴ Ja'a Jesús, ñajuøøby hñajty je'e nebiaty hñajty je'e tiuna'añii. Mänitä Jesús hoy jiøjcuyo'øyø'øy ja'a Judashajxy. Mänit miäyajtøøyy:

—Pøñ hajxy mhøxtaaby.

⁵ Mänit hajxy yhadsooyy:

—Jesús Nazaretpä højts nhøxtaaby.

Mänitä Jesús miänaañ:

—Høøch jaduhñ xøhajp.

⁶ Coo ja'a soldadohajxy jaduhñ miädooyy, mänit hajxy jaduhyyä yhøxtägø'øwa'cy. Jaduhyyä hajxy cøjx quiäday.

⁷ Mänit Jesús miäyajtøøgumbä:

—Pøñ hajxy mhøxtaaby.

Mänitä Judashajxy yhadsóogumbä:

—Ja'a Jesús Nazaretpä højts nhøxtaaby.

⁸ Mänit Jesús miänaañ:

—Tøøds mijts nja hawáanäm. Høøchämäts je'e. Pø høøçhtiäm mijts xyhøxtaaby, wéenhøchä njamiøødhajxy wyiimbity.

⁹ Paadiä Jesús jaduhñ miänaañ neby jaduhñ tiøjiädät nebiä Tieedy hñajty tøø ñäma'ayän: “Pøñhøch miich tøø xyajcø'øwaanø'øy, cáboch pøñ xpiøgaanä. Cab hajxy nej jiada'añ.”

¹⁰ Mänitä Simón Pedro ja'a espada jiädujpädsøømy. Mänitä teedywiindsøn ja'a mioonsä tiaatsc ñä'ä pújxäxä, ja'a hahoodiaatsc. Malco hänajty xiøhaty.

¹¹ Mänitä Jesús ja'a Pedro yhojy:

—Cuyuugøøw yøø mhespada. Tsipcøxpøch nho'oga'añ nébiøchä nDeedy tøø xñäma'ayän.

¹² Mänitä Jesús miajtsä quiø'øxojsä. Ja'a soldadohajxy jaduhñ jatcøøyy møødä wyiindsønñhajxy møødä policíahajxy, ja'a judíoshajxy hänajty tøø quiéxiäbä.

¹³ Mänitä Jesús yajnøcxä maa ja'a Anás ja'a tiøjcän. Ja'a Anás ja'a Caifás hänajty miø'ødhajpy. Teedywiindsøn ja'a Caifás hänajty tiuumby.

¹⁴ Ja'a Caifás, je'e ja'a judíoshajxy hänajty tøø ñäma'ay cooc yhahixøøy jaduhñ coo tu'jäya'ay ja'a cu'ug ñähho'tú'udät.

¹⁵ Høxhaam ja'a Simón Pedro ja'a Jesús hajxy hänajty pianøcxy nämetscä. Ja'a Jesús ja'a jiamiøødhajxy nämetscä. Ja'a Simón Pedro miägu'ughajpä, yhi xy ja'a teedywiindsøn hänajty je'e. Mänitä Jesús piadägøøyyä ja'a Simón Pedro miägu'ughajpä maa ja'a teedywiindsøn tiøghawa'adsän.

¹⁶ Ja'a Pedro, jim je'e miähmøøyy tøghawa'adshaguum. Mänitä Pedro miägu'ughajpä piädsøømy. Mänitä to'oxymoonsä miägapxy ja'a tøjcueendähajpä. Mänitä Pedro quiuwowøøyyäbä tøghawa'ads ja'a yhamdsoo mägu'ughajpä.

¹⁷ Mänitä to'oxymoonsä ja'a Pedro miäyajtøøyy:

—Miiçh yøøya'ay mmøødwädiipy, túhñämäts.

Mänitä Pedro yhadsooyy:

—Ca'a yhøøchä.

¹⁸ Jimä policíahajxy hänajty jiøømba'axamy møødä moonsähajxy. Tøøchc hänajty. Paady hajxy hänajty tøø jiøønyajmøjjøøy. Jimä Pedro hänajty jiøømba'axaambä.

¹⁹ Mänitä Jesús miäyajtøøwa ja'a jiamiøødcøxpä møødä miädia'agyquiøxpä. Ja'a teedywiindsøn jaduhñ yajtøøw.

²⁰ Mänitä Jesús yhadsooyy:

—Jimhøch hijty tøø nmädia'agy majiäya'ayhagujc. Jimhøch hijty nmäyajnähixøøy Diostøgooty møød tsajtøgooty maa ja'a judíoshajxy naxy yhamugøøyän. Cábøch jim mänaa pactuum tøø nmädia'agy.

²¹ Tiich miiçh coo xmiäyajtøy. Yøøya'ayhajxy mmäyajtøwäp yøø nmädia'agyhøch hajxy tøø xmiädóowäbä. Yøøhajxy je'e najuøøby nebiátyhøch jim tøø nmädia'aguiän.

²² Tuunä Jesús jaduhñ ñä'ä hadsooyy, mänit yhala'abø'cä. Policía jaduhñ tu'ug jatcøøyy. Mänitä policía Jesús ñämaayy:

—Cab jaduhñ yhooyä coo ja'a teedywiindsøn jaduhñ mhadsówät.

²³ Mänitä Jesús miänaañ:

—Pøtøøch ngapxtägoy, yec ja'a tøyhajt yaa. Pø caj, cab jaduhñ yhooyä cooçh miiçh nä'ä nägoobä xñä'ä hala'abø'øgät.

²⁴ Mänitä Anás ja'a Jesús quiejxy cø'øxoch maa ja'a Caifás ja'a wyiinduumän. Caifás hänajty teedywiindsøn tuumb.

²⁵ Ja'a Simón Pedro, jim hänajty jiøømba'axamy. Mänit miäyajtøøwa:

—Miiçh yøøya'ay mmøødwädiipy, túhñämäts.

Mänitä Pedro ñiguiugapxä:

—Ca'a yhøøchä.

²⁶ Mänitä Pedro miäyajtøøwägumbä:

—Tøøch miiçh jiiby nhixy olivocamjooty møød yøøya'ay, túhñämäts.

Ja'a teedywiindsón ja'a mioonsä jaduñ mäyajtøøw, jaaya'ayä jiuuj miägu'ug ja'a tiaatsc hñajty tøø ñä'ä púxäxä ja'a Pedro.

²⁷ Mänitä Pedro ñiguiugápxägumbä. Tuunä jaduñ ñä'ä mänaañ, mänitä tseey yaaxy.

²⁸ Mänitä Jesús yajnøcxä maa ja'a gobernador tiøjcän. Pilato hñajty tuumb gobernador. Jobø'øwaamb hñajty. Coø hajxy jim quioo'ty, cabä teedywiindsøn hajxy ñä'ä tøjtagøøyy. Cabä Israelpä quiuhdujthajxy hñajty jaduñ myiñ coø hajxy jiiby tiøjtägø'øwät maa ja'a tiøjc-hajxiän, ja'a hajxy ca'a Israelpähajpä, ja'a pascuaxøøjooty. Coø hajxy jiiby tiøjtägø'øwät, cädiéeyäp hajxy jaduñ. Coø hajxy jaduñ quiädiéeyät, cab hajxy miägáyät ja'a pascuaxøøjooty. Paady hajxy jiiby quia'a tægøøyy Pilato tiøgooty.

²⁹ Coø Pilato miädooy coø hajxy hñajty tøø quioody, mänit hajxy ñädøjpädsøøma. Mänitä Pilato miänaañ:

—Tii mijts yø'øya'ay myajcuxø'øwø'øwaamby.

³⁰ Mänit hajxy yhadsooyy:

—Coø hädaa jäya'ay häxøpy tøø quia'a cädieey, cab højts miičh häxøpy tøø nyajnägoody.

³¹ Mänitä Pilato miänaangumbä:

—Yajwiimbit yø'øya'ay hajxy. Nøcx mijts mädia'agymiäadow nej mijts ja'a mguhdujt myiñän pø tøø quiädieey.

Mänitä judíoshajxy yhadsooyy:

—Ja mäná'anäp højts jaduñ coø yagho'ogøød; pero højts, cab højts ja'a cuhdujt jaduñ nmøødä coø højts jäya'ay nyaghó'ogät.

³² Paady hajxy jaduñ yhadsooyy, ween ja'a Pilato jaduñ ñägapxy pø tøø Jesús tøyhajt jiaanč cädieey. Tøjiajt jaduñ nebiä Jesús hñajty tøø miäna'añän coø hñajty yega'añii maa ja'a ca'a Israelpähajxiän, coø hñajty yagho'oga'añii cruzcøxp.

³³ Mänitä Pilato tiøjtägøøyy. Mänitä Jesús quiuyaaxøøyyä tøgooty. Mänit miäyajtøøwa:

—Nej, miičh judíoshajxy xguiobiernähajpä.

³⁴ Mänitä Jesús yhadsooyy:

—Pøn jaduñ xñämaayy. Tøgä miičh mhamdsoo copcooty mnä'ä yajcojjiä.

³⁵ Mänitä Pilato jadähooc yhadsóogumbä:

—Tiičh nyajnajuø'øb. Ca'a yhøøchä Israelpäjäya'ay. Miičh mhamdsoo mägunáxhøch miičh tøø xyajnägoody møødä teedywiindsøn hajxy. Tii jaduñ tøø mgädieey.

³⁶ Mänitä Jesús yhadsooyy:

—Høøch, cábøch yaa nduñ gobiernä hädaa yaabä naaxwiin. Cooch häxøpy nduñ, tøøchä nmoonsähajxy häxøpy xñäwa'añ. Cábøchä judíoshajxy häxøpy tøø xñä'ä mach. Cábøch yaa nduñ gobiernä.

³⁷ Mänitä Pilato miänaañ:

—Mduumbäda'a gobiernä.

Mänitä Jesús miänaañ:

—Jexioo, túumbøch jaduñ. Høøch, nmädiácypioch ja'a tøyhajt hädaa yaabä naaxwiin. Páadyhøch yaa tøø nmiñ tøø nga'ay. Pønjaty ja'a tømiaadia'agy mabøjp, je'echä nmädia'agy xmiäbøjcäp.

³⁸ Mänitä Pilato miänaañ:

—Pätiidä miičh jaduñ mnänøømby ja'a tøyhajt.

Mänitä Pilato tiøjpädsøømgumbä. Mänitä judíoshajxy ñämaayyä:

—Høøch, cábøch yø'øya'ay tøø nhamdsoo hixy tøø nhamdsoo paady pø tøø quiädieey.

³⁹ Jii mijtsä mguhdujt jaduhñ cooñ mijts ja'a jäya'ay tu'ug nhøxmájtsämät ja'a pascuaxøøjooty. Nej, mmänaamb hajxy jaduhñä coo ja'a mgobiernähajxy nhøxmájtsämät.

⁴⁰ Mänit hajxy mœc yhadsooyy:

—¡Ca'a yø'øya'ay mhøxmach! ¡Høxmats ja'a craa Barrabášhajpá!

Paadiä Barrabás hänajty chumyčhänä'ay coo hänajty tøø mieečh tøø pioty. Mänitä Pilato tiøjtägøøñä.

19

¹ Mänitä Pilato ja'a Jesús yajwojpä.

² Mänitä soldado ja'a wädsatscorona hajxy yhädiuñ. Mänitä Jesús ja'a quiuhduum piädáacäxä. Mänitä Jesús ja'a hucywyit yajnähgäjenøøyyä nebiä gobiernähajxy hänajty wyithatiän. Paadiä Jesús jaduhñ tiuunä, neby hajxy hänajty ñä'a wi'i ñäxi'iga'añ ñä'a wi'i ñäya'axa'añ. Paady hajxy hänajty ñä'a wi'i ñäxi'iga'añ coo ja'a Pilato hänajty tøø miäna'añ coogä Jesús hänajty guiobiernähaty.

³ Mänitä Jesús miäwiingoonä. Mänit ñäxiicä:

—¡A poco miich tuumb gobiernäjä!

Mänitä Jesús tiägøøyyä coxhó'cäbä.

⁴ Mänitä Pilato tiøjpädsøømgumbä. Mänitä judíoshajxy ñämaayyä:

—Nyajtøjpädsøømambiøch yø'øya'ay nebiä tøyhajt hajxy jaduhñ mmøødhádät cooñ tøø nhixy tøø nbaady coo tøø quia'a cädieey.

⁵ Mänitä Jesús piadøjpädsøømy hucywyitmøød, coronamøød. Mänitä Pilato ñämaayy ja'a Israelpäjäya'ayhajxy:

—Xiids yø'øya'ay tøø tiøjpädsøømy.

⁶ Coo Jesús jaduhñ yhiixä ja'a teedywiindsønñhajxy møødä policíahajxy, mänit hajxy ñäyaaxøøyy:

—¡Møjpahbétäts hajxy cruzcøxp! ¡Møjpahbétäts hajxy!

Mänitä Pilato miänaañ:

—Hamdsoo hajxy mmøjpahbédät. Høøch, cábøch jaduhñ nmäna'añ coo tøø quiädieey.

⁷ Mänitä Israelpäya'ayhajxy yhadsooyy:

—Jaduhñ højts nguhdujt myiñ coo yø'øya'ay ween yagho'ogyii je'eguiøxpä coo tøø miäna'añ coogä Dios Tieedyhaty.

⁸ Coo Pilato jaduhñ miädooyy, mänitä chähgøøbiøjcy.

⁹ Mänitä Pilato ja'a Jesús miøødtøjtägøøñä. Mänitä miäyajtøøyy:

—Maa miich mjaančh tsooñ.

Pero cabä Jesús waamb miänaañ.

¹⁰ Mänitä Pilato miänáangumbä:

—Nej, cábøch xñä'ägä hadsowa'añä. Nej, caj miich mnajuø'øyä cooñhä cuhdujt nmøødä cooñ miich nhøxmádsät, ó cooñ miich nyajmøjpahbedøød.

¹¹ Mänit Jesús yhadsooyy:

—Coo Dios miich cuhdujt häxøpy tøø xquia'a mo'oy, caj miich ja'a cuhdujt häxøpy mmøødä maačh høøchcøxpän. Paady miich ja'a pojpa caj mjaty møødä quejee ja'a teedywiindsønñ, ja'a høøch yaa tøø xyajméchäbä maa miichä mwiinduumän.

¹² Mänit Pilato jia wiinmahñdyhajty nebiä Jesús yhøxmádsät. Pero mänitä Israelpäya'ayhajxy ñäyaaxøøguiumbä:

—¡Pø mmägu'ughajpy miich ja'a gobiernä César, caj miich yø'ø craa mhøxmádsät! Pøñ jaduhñ wi'i ñibiädáacäp nebiä gobiernän, je'edsä gobiernä César møøtnimiädsiphájtäp.

13 Coo Pilato jaduhñ miädooyy, mänitä Jesús miøødtøjpädsøømägumbä. Mänitä Pilato yhoxtaacy hññaabiejtøxp maa hajxy hñajty xiøhdaacthatiän. Jue'e hñajty jim xiøhaty Gabata, hebreohayuuc-haamby. Je'eduhñ ñänøømby “maa ja'a tsaa quiøøña'ayän.”

14 Tøø hñajty quiujyxiøøjøø. Hadsuujø'øwaambä pascuaxøø hñajty. Mänitä Pilato ñämaayy ja'a Israelpäya'ayhajxy:

—iXiidsä mgobiernähajxy!

15 Mänit hajxy ñäyaaxøøguiumbä:

—iWeen yho'ogy! iWeen yho'ogy! iNøcx hajxy mõjpahbet!

Mänit Pilato miänaañ:

—Nej, mmäná'anäp mijts jaduhñä coo mijts ja'a mgobiernä nmøjpahbéjtämät.

Mänit teedywiindsøñhajxy yhadsooyy:

—César højts ngobiernähajpy. Ca'a wyiinghänä'cä.

16 Mänitä Pilato Jesús yajcø'ødägøøyy maa ja'a Israelpähajxiän, coo Jesús miøjpahbedøød.

17 Mänitä Jesús jim yajnøcxä maa jaduhñ xiøhatiän “Maa ja'a Ho'ogyjiäya'aguiopcän.” Gólgota jim xiøhaty hebreohayuuc-haamby. Yhamdsoo cruz je'e yajquejyquiaphajtä.

18 Jimä Jesús hoy miøjpahbedyii. Metscä jäya'ay jim miøjpahbéjtäbä Jesús ja'a ñähmøjc. Cujc ja'a Jesús quiuba'awøøyyä.

19 Mänitä Pilato yagjahyyä pu'uyhuungcøxp: “Jesús Nazaretpä, ja'a Israelpäjäya'ay ja'a guiobiernähajxy.” Mänitä pu'uyhuung yajyuipahwä cruzcuhduum.

20 Tägøøghayuuc-haamby jaduhñ yagjahyyä, møødä hebreo, møødä griego, møødä latín. Cajptmäwiingón Jesús miøjpahbejtä. Paadiä judíoshajxy nämay yajmädiaacy nebiä Pilato hñajty tøø yajyuugjaayiiyän cruzcøxp. Mänitä teedywiindsøn ja'a Pilato hajxy ñämaayy:

21 —Cab hijty jaduhñ yhahixø'øyy coo jaduhñ cu mjahy: “Ja'a Israelpäjäya'ay ja'a guiobiernähajxy.” Jaduhñ cu mjahy: “Nä'a nibiädáacäp jaduhñ nebiä Israelpäjäya'ay ja'a guiobiernähajxiän.”

22 Mänitä Pilato yhadsooyy:

—Tøøch jaduhñ njaay; cábøch nyajtägatsa'añ.

23 Coo Jesús hñajty tøø miøjpahbedyii, mänitä soldado ja'a Jesús ja'a wyit hajxy yajpædø'cä. Nämädaaxc ja'a soldadohajxy hñajty. Mänitä wit hajxy yajwa'xy cødu'ug. Jii Jesús ja'a yoñwit hñajty tu'ug. Tu'ugwit hñajty tøø quiojy; cab hñajty maa xiuyyä.

24 Mänitä soldadohajxy ñiñämaayyä:

—Cab jaduhñ yhooyä coo hädaa wit hajxy nhagøødsøøyyämät. Tsøg hajxy häyø'cäm. Pøn hädaa wit jaduhñ cuhäyø'øgäp, je'e jaduhñ je'ehádäp.

Mänitä soldadohajxy jaduhñ jiaançh häyø'cy. Jaduhñsä Diosmädia'agy tiøjiajty maa jaduhñ cujaay myiñän: “Xyajwá'xøch ja'a nwit hajxy; xquiuhäyø'cøch ja'a nwit hajxy jaduhñ.”

25 Jimä Jesús ja'a tiaj hñajty tiäna'ay maa hñajty mädøyyä tøø miøjpahbedyiiän, chaadsä tiaj ja'a piuhdo'oxy, chaadsä María ja'a Cleofas ja'a tio'oxiøjc, chaadsä María Magdalena. Jimä Jesús ja'a miägu'ughajpä hñajty tu'ug tiäna'ay maa ja'a Jesús tiaj mädøyyän, ja'a Jesús hñajty jiaançh tehm chojpiä.

26 Coo hajxy yhiixä ja'a Jesús, mänitä Jesús ja'a tiaj ñämaayy:

—Maam, hädaads mhuunghádäp.

27 Mänitä Jesús ja'a miägu'ughajpä ñämaayy:

—Hädaads mdajhádäp, ja'a hөөчhä ndaj.

Mänit jiaančh tajnábøjcy.

²⁸ Mänitä Jesús miänaañ:

—Tødsøyyäbøch.

Tøjiajt ja'a Diosmädia'agy jaduhñ. Ñajuøøbiä Jesús hānajty coo hānajty tøø yhabejnä.

²⁹ Jimä texy hānajty tu'ug quiøøña'ay vinoxunmøød. Mänitä xo'od hajxy quiugonøøyy vinojooty. Cøjx je'e chomø'ø. Mänitä paxy hajxy yagjøjwøønøøyy ja'a xo'od. Mänitä Jesús ja'a xo'od hajxy yaghayuugøøyy.

³⁰ Coo Jesús ja'a vino miuu'cy, mänitä miänaañ:

—Tøøds jaduhñ miaañä.

Mänitä quiopc yagjänaañnä. Mänit yho'nä.

³¹ Mānaa ja'a Jesús yho'oguiän, ja'a pascuaxøø hānajty tehñ yhadsuujøøby. Cujaboom ja'a møjpasuaxøø hānajty jiada'añii, poo'xxiøøjooty. Jaduhñdsä judíoshajxy hānajty quiuhdujthaty, cabä ho'ogyjiäya'ay hajxy hānajty jim yajmähmø'ø cruycøxp ja'a poo'xxiøøjooty. Mänitä Israelpä ja'a Pilato hajxy hoy ñāma'ay coo soldado quiéxät weenä Jesús ja'a tiecyhajxy nøcxy tiøjjäxä neby hajxy paquiä yho'ogät. Nägooyä hajxy jaduhñ yho'ogät, mänit hajxy yajmānacøød cruycøxp.

³²⁻³³ Mänitä Pilato ja'a soldado jiaančh quejxy. Coo ja'a soldadohajxy jim miejch, mänit hajxy yhiijxy coo ja'a Jesús hānajty tøø yho'ogy. Cabä tiecy hajxy je'e ñä'a tøjjä. Mänitä ñähmøjcpähajxy tiecytiøjjä nämetscä. Cahnä hajxy hānajty yho'ogy.

³⁴ Mänitä Jesús quiaačhmägumøøyyä cuhmðhaam. Soldado jaduhñ tu'ug jatcøøyy. Mänitä nø'ty piädsøømy chaadsä nøø.

³⁵ Hөөчh, tøyhájthøch jaduhñ tøø nhixy. Páadyhøch mijts jaduhñ nya-jmädoyhaty neby hajxy jaduhñ mmäbøgät.

³⁶⁻³⁷ Jecy hajxy jaduhñ quiujahy Diosmädia'agyjiooty ja'a Jesúscøxpä: “Cabä piajc tiøjāanäxä.” Jaduhñ hajxy quiujahbiä ja'a Jesúscøxpä: “Wyiin-hee'ppedaamby hajxy, ja'a hajxy hānajty tøø quiúmiäbä.” Coo ja'a Jesús ja'a tiecy jaduhñ quia'a jaančh tøjjäxä, coo jaduhñ jiaančh cuuma, tøjiajt ja'a Diosmädia'agy jaduhñ.

³⁸ Tu'ugä jäya'ay hānajty jim choon Arimatea. José hānajty xiøhaty. Hamee'ch ja'a Jesús hānajty miøødnimiägu'ughadyii. Chähgøøbiä José ja'a judíos hānajty. Paadiä Jesús hānajty hijxwiinduum quia'a møødwädityii. Mänitä José ja'a cuhdujt hoy yajpādsømy maa ja'a Pilatān coo ja'a Jesús yajmānaca'añ cruycøxp. Mänitä Pilato ja'a cuhdujt jiaančh yejcy. Mänitä José ja'a Jesús yajmānajcy cruycøxp.

³⁹ Mänitä Nicodemo ja'a perfume miämejch hii'xmajc kilo. Mäyābicø'ø miämejch møødä mirra møødä áloes. Tøø hānajty jiegø'ø coo ja'a Nicodemo hānajty tøø yhuug hoobiä coods maa ja'a Jesúsān.

⁴⁰ Mänitä José ja'a Jesús hajxy ñähbijty møødä Nicodemo. Jiibiä perfume hajxy yajmānähbidøøyy. Jaduhñdsä judíoshajxy hānajty quiuhdujthaty. Perfumemānähbidø'ø ja'a ho'ogyjiäya'ay hajxy hānajty yajnaaxtägø'ø.

⁴¹ Jimä olivocam hānajty tu'ug mäwiingón maa ja'a Jesús hānajty tøø miøjpahbedyijän. Jiibiä tsaajut hānajty tu'ug olivocamjooty wiinmøjtuum. Naamba'ay ja'a tsaajut hānajty. Cahnä ho'ogyjiäya'ay hānajty jiiby piädaactsooñiinä.

⁴² Ja'a judíoshajxy, tsuu ja'a pioo'xxiøø hajxy hānajty yajtsohnda'agy. Cab hajxy hānajty quiuhdujthaty coo hajxy tii tiünät ja'a poo'xxiøøjooty. Ja ween ja'a poo'xxiøø hānajty quia'a habaady, paadiä Joséhajxy quia'a näbaadøøyyä

coo hajxy hoy jäguem cu yajnaaxtägøøyy. Paady hajxy jimíä ñä'a pädaacy tsaajutjooty ja'a olivocamjootypä.

20

¹ Cumaaxc, näxøø hänajty je'e. Mänitä María Magdalenahajxy jim ñøcxy maa ja'a tsaajutän, maa ja'a Jesús hänajty tøø ñaaxtägø'øyan. Cahnä hänajty hoy jiajjø'øgyñä. Coodsjuøøbyñä hänajty. Mänit hajxy yhijxy coo ja'a tsaa jim tøø jiøwa'açh juthaguuy.

² Coo ja'a María yhijxy coo ja'a tsaa quia'a jimän juthaguuy, mänit wyiimbijty päyø'øguiä. Mänitä Simón Pedrohajxy piaatä chaadsä Jesús ja'a miägu'ughajpä, ja'a Jesús hänajty jiaançh tehñ chojpiä. Mänitä María miänaañ:

—Tøø ja'a nWiindsøn hájtäm hajxy xyajpádsøømäm tsaajutjooty. Cab højts nnajuø'øy pämaadä hajxy tøø piäda'agy.

³ Coo ja'a Pedrohajxy jaduhñ miädooyy, mänit hajxy jim ñøcxy päyø'øguiä maa ja'a tsaajutän. Mänitä María jadähooc pianøcxcumbä.

⁴ Mänitä Pedro yhøxpäyø'cä. Jayøjp ja'a Pedro jiamiøød jim miejch maa ja'a tsaajutän.

⁵ Mänit jii by quiuwoodsøøyy tsaajutjooty. Mänitä wit yhijxy coo jii by yhohxna'ay jutjooty. Pero cab jii by tiehñ tiägøøyy. Nä'a cuhixøøyy jaduhñ.

⁶ Mänitä Simón Pedro høxhaam jiaac mejch. Tu'uda'aquiä jii by tiägøøyy tsaajutjooty. Jaduhñ wit yhi xpä coo jii by yhohxna'ay.

⁷ Mänitä paayyä yhi xy, ja'a Jesús hajxy hänajty tøø yajcuhmäguítiäbä. Hawiing hänajty jim ñe'na'ay.

⁸ Mänitä Pedro jiamiøød piädägøøbiä, ja'a hänajty jayøjp tøø miéchäbä. Mänitä paayyä yhi xpä coo hawiing ñe'na'ay. Paady jaduhñ miäbøjcy coo ja'a Jesús hänajty tøø jiuypioøcy.

⁹ Cahnä Diosmädia'agy hajxy hänajty hoy wyiinjuø'øyñä ja'a jecypiä maa jaduhñ myiñän coo ja'a Jesús hänajty jiuypioøga'añ coo hänajty tøø yho'ogy.

¹⁰ Mänitä Pedrohajxy wyiimbijnä, ñøcxnä hajxy maa ja'a tiøjc-hajxiän.

¹¹ Tøø ja'a María hänajty piaméjtscumbä høxhaam maa ja'a tsaajutän. Coo ja'a Pedrohajxy wyiimbijnä, mähmøøyy ja'a María jim nidiuhñ. Wi'i jiøøby hänajty. Mänit jii by quiuwoodsøøguiumbä tsaajutjooty.

¹² Mänitä Diosmoonsä metsc yhi xy, ja'a tsajpootyptsohmä. Haagä nähboobwit hajxy hänajty. Jii by hajxy hänajty yhäña'ay maa ja'a Jesús hänajty tøø wyiitsna'ayän. Tu'jäya'ay hänajty yhäña'ay maa ja'a Jesús ja'a quiopc hänajty tøø quioonna'ayän. Y tu'jäya'ay hänajty yhäña'ay maa ja'a Jesús ja'a tiecy hänajty tøø quiajpna'ayän.

¹³ Mänitä María miäyajtøøwa:

—Muuxy, tii coo mwi'i jiø'øy.

Mänitä María yhadsooyy:

—Tøøchä nWiindsøn hajxy xyajpádsøømä. Pämaadä hajxy tøø piäda'agy.

¹⁴⁻¹⁵ Tuunä María jaduhñ ñä'a hadsooyy, mänitä wia'wiimbijty. Mänitä Jesús yhi xy. Jim hänajty tiäna'ay; pero cab jaduhñ yhøxcajpy. Olivo-camgüeendähajpä je'e yhajoodhajt. Mänitä Jesús miänaañ:

—Muuxy, tii coo mwi'i jiø'øy. Pøn mhøxtaaby.

Mänitä María yhadsooyy:

—Tsäguhm, pø miiçh tøø myajpádsømy, høøch hawáanäc maa tøø mbäda'agy nébiøch häyaa nøcxy nyajpádsø'øgy.

¹⁶ Mänitä Jesús yhadsooyy:

—¡María!

Tuunä María jaduhñ ñä'ä nämäaayä, mänitä wyiinhee'ppejty. Mänitä yhxajpy coo je'e Jiesúsä. Mänitä jaduhñ miänaañ hebreohayuuc-haamby:

—¡Raboni! —je'e jaduhñ ñänøømby “Wiindsøn.”

¹⁷ Mänitä María ja'a Jesús jia mats jia mäneñaañ. Mänitä Jesús miänaañ:

—Ca'ačh xmiach. Cahnøch jim nhoyñä maačhä nDeediän. Nøcxhøčhä njamiøødhajxy hawáanäc coočh jim nnøcxa'añ maačhä nDeediän, maačhä nDiosän. Jaanä je'e mijts mDeedyhajpä mDioshajpä.

¹⁸ Mänitä María ja'a Jesús ja'a jiamiøødhajxy hoy jiaančh nämä'ay:

—Tøøch je'e nhixy, ja'a hajxy nWiindsønñájtämbä.

Mänit hajxy cøjx yhawáanäxä nebiaty ja'a María hñajty tøø ñäma'ayii.

¹⁹ Coo quioodsøñä, mänitä Jesús ja'a jiamiøødhajxy ñiyhagøøyyänä. Hix, chähgøøby ja'a judíos hajxy je'e hñajty; paady hajxy ñiyhagøøyyä. Mänitä Jesús jiiby ñäguehxtøø'xy haguyc hawa'ads. Mänitä Jesús miänaañ:

—Mäguieppe hajxy. Ca'a hajxy tii mdajy mmay.

²⁰ Mänitä Jesús yajcähxø'cy ja'a quiø'øjoot møødä quiaačhhac maa hñajty tøø jiotiän. Coo hajxy yhiyxy, mänit hajxy ñajuøøyy coo je'e Jiesúsä. Mänit hajxy xioondaacy.

²¹ Mänitä Jesús miänaañ:

—Ca'a hajxy tii mdajy mmay. Nébiøčhä nDeedy tøø xwyiinguexiän, jaanä jadúhñhøch mijts nwiinguexaambä.

²² Mänitä Jesús ñäbäxujy ja'a jiamiøødhajxy. Mänitä miänaañ:

—Wiingpøc ja'a Dioshespíritu hajxy.

²³ Høøch mijts ja'a mājaa nmo'owaamby. Pønjaty mijts mhawáanäp coo Dios ja'a piojpä quiadieeyhajxy tøø yajnähwa'ačh, pues tøyhajt jaduhñ coo Dios tøø yajnähwa'ačh. Pønjaty mijts mhawáanäp coo Dios tøø quia'a yajnähwa'ačh, pues tøyhajt jaduhñ coo Dios tøø quia'a yajnähwa'ačh.

²⁴ Majmetscjäya'ay ja'a Jesús hñajty tøø miøødwädity. Tu'ug hñajty xiøhaty Tomás, ja'a hajxy hñajty ñänøømbiä “Hametsc-huong.” Mänaa ja'a Jesús ñäguehxtøø'xtsooñän jayøbajt, cabä Tomás hñajty jim.

²⁵ Mänitä Tomás ñämaayä ja'a jiamiøødhajxy:

—Tøø højts nhixy, ja'a hajxy nWiindsønñájtämbä.

Mänitä Tomás miänaañ:

—Mänitøch nmäbøgät coočh ndehm yhíxät pø jaančh jot ja'a quiø'ø, coočhä ngø'ø jiiby nhuuc tehñ piädá'agät maa ja'a quiaačhmøjc jiutän. Pø cabä, cábøch jaduhñ nnä'ägä mäbøgät.

²⁶ Cuductujxøø, jiibiä Jesús ja'a jiamiøødhajxy hñajty tøgóotiägumbä. Jiibiä Tomás hñajtypä. Tøø ja'a tøjc hajxy hñajty yhagøøguiumbä. Mänitä Jesús jiiby ñäguehxtøø'xcumbä haguyc hawa'ads. Mänitä miänaañ:

—Mäguieppe hajxy. Ca'a hajxy tii mdajy mmay.

²⁷ Mänitä Tomás ñämaay:

—Tehñ quiudsiiwø'øw yø'ø mgø'ø yaaby ngø'øjóotyhøch maa ja'a clavo-haawän. Híxägøch hädaa ngø'ø. Páda'ag yø'ø mgø'ø yaaby ngaachmøjc-høch. Miich, caj miich hijty mmäbøcy. Chaačh miich nnämä'awät coo mmäbøgät.

²⁸ Mänitä Tomás yhadsooyy:

—Miichhøch nWiindsønñajpy, nDioshajpy.

²⁹ Mänitä Jesús miänaañ:

—Coočh miich tøø xyhixy, paady jaduhñ mmäbøcy. Jootcuyc hajxy je'e, ja'a hajxy tøø miäbøquiäbä, hóyhøch hajxy je'e tøø xquia'a ja hixy.

³⁰ Madiu'u ja'a Jesús ja'a hoy-yagjuøøñäjätypä yajcähxø'cy ja'a jiamiøødä wyiinduumhajxy. Cab yam cøxiä quiujaayä hädaa librocøxp. Cujwa'xy je'e yam quiujaayä.

³¹ Paady yam quiujaayä neby hajxy jaduhñ mmäbögät coo Jesús ja'a Dios Tieedyhaty, coo Jesús je'e Miesíashaty, coo ja'a Dios jaduhñ tøø quiexy. Coo ja'a Jesús ja'a miädia'agy hajxy mmäböjcät, mhídäp hajxy jim tsajpootyp cøjxta'axiøø.

21

¹ Jadähooc ja'a Jesús yhíxägumbä ja'a jiamiøødhajxy jim mejypia'a ja'a xøhajpä Tiberias.

² Jimä Simón Pedrohajxy hñajty møødä Tomás, ja'a hajxy hñajty ñänøømbiä “Hametsc-huung”, møødä Natanael ja'a Caná de Galilea tsohmbä, møødä Zebedeo yhuunghajxy, møød hajxy jaac nämetspä. Haagä Jesús ja'a jiamiøødhajxy jaduhñ.

³ Mänitä Simón Pedro miänaañ:

—Nøcxy nhuuc jaac hacxmach.

Mänitä jiamiøødhajxy miänaañ:

—Ween hajxy nnøcxäm.

Mänit hajxy jiaančh nøcxy mejypia'a. Mänit hajxy biarcotägøøyy. Mänit hajxy hoy jia hacxmadsa'añ. Tu'tsuhm hajxy jaduhñ jia wädipty. Pero cab hajxy tii ñä'ägä paaty.

⁴ Coo jioøøyy, jimä Jesús hñajty tiäna'ay pu'uwiing. Pero cabä Jesús yhøxcapjä ja'a jiamiøødhajxy.

⁵ Mänitä Jesús miänaañ:

—Mägu'ughajpädøjc, nej, cab hajxy tii tøø mnä'ägä paadiä.

Mänit hajxy yhadsooyy:

—Joom mägu'ughajpä, cab højts tii tøø nnä'ägä paady.

⁶ Mänitä Jesús miänaañ:

—Päda'ag yø'ø mdsaa hajxy jimhaamby ja'a barcohahooyhaampiä pa'ahaam. Mänit hajxy jaduhñ mbáadät.

Mänitä chaay hajxy jim jiaančh pädaacy. May ja'a hacx hajxy jiaančh tehñ yaghadjy. Cab hajxy hñajty miaya'añii coo ja'a tsaay hajxy hñajty jia wijtspädsøma'añ nøøjooty.

⁷ Mänitä Pedro ñämaayyä ja'a Jesús ja'a jiamiøød, ja'a Jesús hñajty jiaančh tehñ chojpiä:

—jJa'a nWiindsønhtëmñhajxy yø'ø!

Tuunä Pedro jaduhñ ñä'ä mädooyy coo je'e Jiesúsä, mänitä wyitpägøøyy. Høxyø'øhuungmøød hajxy hñajty yhacxmach. Mänitä quiuhtøpxnajxy nøøjooty. Nøcxaamb hñajty pu'uwiing maa ja'a Jesúsän.

⁸ Ja'a jiamiøødhajxy, jiiby hajxy miähmøøyy barcojooty. Mejypia'a mäwiingón hajxy hñajty yhacxjoomy. Jaduhñäda'a ja'a mejypia'a hajxy hñajty tøø ñähgue'egy mägo'xmetro. Hujts ja'a tsaay ja'a hacx hñajty miøødä. Mänitä tsaay hajxy pawich yajnøcxy mejypia'a barcojooty.

⁹ Mänit hajxy biarcopädsøømy. Mänitä juhñdy hajxy yhiixy coo jim wyl'i tioy pu'uwiing. Jimä Jesús hñajty yhacxtsa'ay. Jimä tsajcaagy hñajty yajcoonna'ay.

¹⁰ Mänitä Jesús miänaañ:

—Mämín ja'a hacx hajxy mejtstägøøg, ja'a hajxy tøø mmächäbä.

¹¹ Mänitä Pedro tiägøøguiumbä barcojooty. Mänitä tsaay pawich yajmejj mejypia'a. Mägo'x cu juxychägui'xmajtägøøg ja'a hacx hñajty jiiby tsaajiooty, haagä majatypä. Hujts ja'a tsaay hñajty, pero cabä hacx yajcøø'ch.

¹² Mänitä Jesús miänaañ:

—Minds hajxy cay.

Cab hajxy miäyajtøøyy pøn je'e. Tøø hajxy hñajty yhøxcapy coo je'e Jiesúsä.

¹³ Mänitä Jesús ja'a jiamiøød ja'a tsajcaagy hajxy miooyy møødä hacxtsa'ay.

¹⁴ Miädägøøghoocpä ja'a Jesús hajxy hānajt̃y tøø yhĩxy mānaa hānajt̃y tøø jiũypiõquiān.

¹⁵ Coø hajxy quiaabiädøøyy, mänitä Jesús ja'a Simón Pedro ñāmaayy:

—Simón, Juan miich mdeedyhajpy. Pøñhøchāda'a xmiaas tsojp, yø'ø njamiøødhajtām o miich.

Mänitä Pedro yhadsooyy:

—Mnajuøøby miich coøch miich njuø'øy nebiä hajch nebiä puhya'ayän.

Mänitä Jesús miānaañ:

—Yaghójcägøchā nmeeghuunghajxy.

Ca'a mieeghuungä ja'a Jesús jaduñ tiehm ñānøøm. Je'eduhñ ñānøøm coø ja'a Simón Pedro ja'a jäya'ayhajxy yajnähixø'øwät, ja'a Jesús ja'a miädia'agy hajxy panøcxäbä.

¹⁶ Mänitä Jesús miānāangumbä:

—Simón, nej, xchójpøch miichä.

Mänitä Pedro yhadsooyy:

—Mnajuøøby miich coøch miich njuø'øy nebiä hajch nebiä puhya'ayän.

Mänitä Jesús miānaañ:

—Cueendähajtägøchā nmeeghajxy.

¹⁷ Ja'a miädägøøghoocpä ja'a Simón Pedro ñāmáayyägumbä:

—Simón, nej, jaduñch xjwiø'øyā nebiä hajch nebiä puhya'ayän.

Mänitä Pedro jiootmadiägøøyy coø miäyajtøøwa ja'a miädägøøghoocpä.

Mänitä Pedro yhadsooyy:

—Cøxiä miich mnajuø'øy. Mnajuøøby jaduñ coøch miich njuø'øy nebiä hajch nebiä puhya'ayän.

Mänitä Jesús miānāangumbä:

—Pues, yaghójcägøch ja'a nmeeghajxy.

¹⁸ Tehm tiøyháthøch miich chaa nnāmá'awät, coø hijty mdsucywiajy-hatyñä, hamdsoo ja'a mwit hijty mbägø'øy. Mwädĩp hijty maa ja'a mjoot hijty choquiān. Pero coø hānajt̃y tøø mmājaanä, mänit mgø'ø mxajtøwa'añ. Mänitä wiinghāna'c ja'a mwit xyajpägø'øwa'añ. Mänit xyajnøcxa'añ maa ja'a mjoot hānajt̃y quia'a tsoquiān.

¹⁹ Paadiä Jesús jaduñ miānaañ nebiä Pedro jaduñ ñajuø'øwät neby hānajt̃y yagho'oga'añii, nebiä Dios ja'a miäjaa jaduñ yajcähxø'øgät ja'a Pedrocøxpä. Mänitä Jesús ja'a Pedro ñāmaayy:

—Jam hajxy wädíjtām.

²⁰ Mänitä Pedro quioowiimbijty. Mänitøch xyhijxy coøchä Jesús hānajt̃y nbanøcxpä. Høøch, Juáñghøch høøch. Høøchä Jesús hijty xjiaanç tehñ chojp. Høøch je'e hāñaayy ja'a Jesús ja'a ñähmøjc mānaa højts ndsuugayyän. Høøch jaduñ nyajtøøw: “Wiindsón, pøñ miich jaduñ xyegaamb.”

²¹ Coøchä Pedro xyhijxy, mänitä Jesús miäyajtøøyy:

—Wiindsón, yø'øyá'ayäts, nej yø'øya'ay jiada'añ.

²² Mänitä Jesús yhadsooyy:

—Ca'a myiichä mgüeentä yø'ø pø chójpøchä njoot jaduñ coø yø'øya'ay hānajt̃y jiinä coøchä ngädaactägätsät. Pero miich, panøcxägøch ja'a nmädia'agy.

²³ Mänitä mädia'agy jii wiädĩjty maa ja'a jäya'ayhajxiān ja'a Diosmädia'agy hajxy panøcxpä cóogøch tyijy nga'a ho'oga'añ. Pero cabä Jesús jaduñ miānaañ cóogøch nga'a ho'oga'añ. Nøm jaduñ miānaañ: “Ca'a myiichä mgüeentä yø'ø pø chójpøch ja'a njoot jaduñ coø yø'øya'ay hānajt̃y jiinä coøch ngädaactägätsät.”

²⁴ Høöch, Juánghøch høöch. Tehm tiøyhájthøch jaduhñ tøø nhixy nébiøch chaa ngujaayän. Ñajuøøbiøchä njamiøødhajxy coöchä tøyhajt nmøødä.

²⁵ Madiu'u ja'a Jesús jaduhñ jiaančh tuuñ. Cáboch yam cøxiä tøø ngujaay. Cooch häxøpy cøxiä tøø ngujaay, cabä ndijy hädaa naaxwiimbä miädøyhádät. Amén.

Hechos

¹ Mägu'ughajpä Teófilo, mänáajøch miiçh jayøbajt nnäjaayø'øyän, mänitøch ngøxy cujahy nebiatiä Jesús yaa wiädipty hädaa yaabä naaxwiin, møød nebiaty yajnähixøøyy,

²⁻⁴ mänaa jaduhñ tiägø'øyän wädipty høxtä coonä hänajty ñøcxtägatsa'añ tsajpootyp. Cahnä Jesús hänajty yho'ogyñä, tøøyyämä jiamiøød hänajty wyiinguexy coo miädia'agy yajwá'xäxät wiinduhmyhagajpt. Coo Jesús yho'cy, mänit jiuypijøjtägajch. Coo Jesús jaduhñ yhiixä ja'a jiamiøødhajxy, jaduhñä tøyhajt hajxy miøødhajty coo Jesús hänajty tøø jiaançh jujypijøjtägach. Coo Jesús jaduhñ jiuypijøjtägajch, mänitä jiamiøød jiaac møødwädipty juxy-chägui'xxøø. Jaduhñä Jesús hänajty yajnähixø'øy coo Dios hajxy xyhanéhmäm ja'a miøcmäjaahaam. Coo juxychägui'xxøø yhabejty, mänitä Jesús ja'a jiamiøød miøødhamugøøyy maa tun hänajty xiøhatiän Olivostún. Mänitä Jesús tiägøøyy hanehmä ja'a Dioshespíritu miäjaahaam. Mänit miänaañ:

—Coo hajxy jim mnøcxtägätsät Jerusalén, cab hajxy jim mdsohndägätsät. Jim hajxy jaduhñ mjøbhixøt cooçh mijtsä nDeedy ja'a yhEspíritu xyajnäguexät nej mijts tøø nnäma'ayän. Tøøch mijtsä nDeedy xyhuuc yajwiinwaanøøbiä coo hajxy jaduhñ xyajnäguexa'añ.

⁵ Ja'a Juan, nøøhaam hijty miäyajnäbety. Tøyhajt jaduhñ. Pero ja-boom juxtøpc mijtsä Dios ja'a yhEspíritu xjiaançh yajnäguexa'añ. Ja'a yh-Espirituhaam hajxy jaduhñ xyajnäbeta'añ —nømä Jesús ja'a jiamiøød ñämaayy, ja'a hajxy hänajty tøø yhamugø'øyäbä.

⁶ Mänitä Jesús miäyajtøøwä:

—Wiindsøn, nej, jaduhñ miiçh tøø mwiiinmahñdyhatiä coo højtsä nmädsip mga'a yajmäjädaacnädä, højts judíos, møød coo højtsä nhamdsoo mägunaax ngobiernähájnät.

⁷ Mänitä Jesús yhadsooyy:

—Ja'a nDéedyhøçh tøyhajt møød mänaa jaduhñ yajtøjiada'añ nej mijts myajtøyyän. Je'e cuhdujt nidiuhm møød coo jaduhñ yajtøjiädät. Pero mijts, caj yahixø'øy coo mijtsä tøyhajt mmøødhädät.

⁸ Coo mijtsä Dioshespíritu xñägädä'agät, mänitä mäjaa hajxy xmio'owa'añ. Mänitøch hajxy jim xmiädiä'agät Jerusalén cooçh tøø njuypijøjtägach, hóyhøch hänajty tøø nja ho'ogy. Møød jim hajxy xmiädiäacpät Judea-naaxooty, møød jim Samaria-naaxooty, møød jim wiinduhmyhagajpt høxtä mäduhñtiä cajpt quiugøxø'øyän.

⁹ Mänitä Jesús miädiaacpädøøyy. Jimä Jesús hänajty wyiinhee'ppedyii ja'a jiamiøødhajxy, mänitä Jesús nä'ä nägoobä chajpejty. Mänit hoy tiägø'øy jocjooty. Mänitä Jesús yhiixtägøøyyä ja'a jiamiøødhajxy.

¹⁰ Jim hajxy hänajty chajheebyñä, mänitä jäya'ayhajxy metsc ñäguehxtøø'xy jim maa Jesús ja'a jiamiøødä wyiinduumhajxiän. Nähboobwit hajxy hänajty nämetsc.

¹¹ Mänitä Jesús ja'a jiamiøødhajxy ñämaayyä:

—Mägu'ughajpädøjc, jim hajxy mdsoon Galilea maa Jesús choonän. Mijtsä mmägunaax yø'ø. Quipxy hajxy hijty mmøødwädity. Ca'a hajxy mwi'i yuugheeby. Ca'a hajxy mwi'i tiajy mwi'i miay. Tøø Jesús jaduhñ ñøcxnä tsajpootyp. Pero coo yhabädät, mänit jaduhñ wyiimbijtagatsa'añ neby hajxy tøø mhijxnøcxian.

¹² Mänitä Jesús ja'a jiamiøødhajxy jim chohñ maa tun hänajty xiøhatiän Olivos. Mänit hajxy ñøcxy Jerusalén. Tu'kilómetro hänajty jiäguemä.

¹³ Jue'e Jesús ja'a jiamiøødhajxy hänajty xiøhaty: Pedro, Juan, Andrés, Felipe, Tomás, Bartolomé, Mateo, Simón ja'a Celote, møødä Judas. Nämetsc hajxy hänajty xiøhaty Santiago. Judas ja'a piuhya'ay je'e ja'a tu'jäya'aybä. Alfeo ja'a Judas ja'a tieedyhajxy hänajty xiøhaty.

¹⁴ Naxy hajxy hänajty yhamugø'øy Diospa'yaaxpä nägøxiä, näguipxy møødä Jesús ja'a tiaj María, møødä Jesús ja'a piuhya'ayhajxy, møødä to'oxiøjc-hajxy, ja'a Jesús hänajty quipxy tøø piawädityijäbä.

¹⁵ Cujaboom cumaaxc, mänitä mæbøjpädøjc-hajxy yhamugøøyy. Nämägo'x-cu-ii'x hajxy hänajty. Mänitä Pedro tiänaayyø'cy. Mänit miänaaŋ:

¹⁶⁻²⁰ —Mägu'ughajpädøjc, jéquiänä David quiujahy salmosjooty ja'a Judascøxpä, nebiatiä Dioshespíritu ñajtscaxøøyyä: Pactsacä tiøjc jiada'aŋ; caj pøñ jīm chäna'awaannä. Ja'a Judas ja'a tiøjc jaduhñ nänøømäxä. Jaduhñ jīm miänaambä coogä Judas wiingjäya'ay hänajty ñähduundu'uda'aŋii. Jaančh tøjiajt jaduhñ ja'a Judascøxpä nebiatiä David jecy quiujahyyän. Näguipxy højtsä Judas hijty xmiøødwädijtäm. Näguipxy højts hijty xmiøødtuunmújcäm. Mänitä Judas wyiinmahñdyhajty coo Jesús ñähdúgät. Mänitä Judas ja'a jäya'ay wiomejch maa Jesús hänajtiän, ja'a Jesús hajxy hänajty madsaambä. Coö Judas jaduhñ haxøøg jiatcøøyy, mänit miäjuuyy. Mänitä naax hoy jiuy. Mänit hoy quiuhgahnaxy cuhmänac. Coö mioxtsäbijty, mänitä tyi-inčh yhøxhänøømbädsøømy. Coö jäya'ayhajxy jaduhñ miädoyhajty, ja'a hajxy hänajty jīm tsänaabiä Jerusalén, coö ja'a Judas hänajty tøø yho'ogy, mänitä naax hajxy yajxøbejty Acéldama, ja'a Judas hänajty tøø jiúyyäbä; jaduhñ miädia'agytiägø'øy yhamdsoo hayuuc-haambyhajxy, Nø'ñaax.

²¹⁻²² 'Jii højtsä nmägu'ughajpähajtäm, näguipxy hajxy tøø xmiøødwädijtäm mänaa Jesús hijty jiiän, mänaa Juan ja'a Jesús yajnäbetiän, høxtä coö Jesús chajpejty cøxp. Hahixøøby jaduhñ coö hajxy tu'jäya'ay nwiinguéjxämät, ja'a Judas nähduundu'udaambä. Näguipxiä mädia'agy hajxy xmiøødyajwá'xämät coö Jesús tøø jiuypioçy —nømä Pedro miänaaŋ.

²³ Mänitä jäya'ay metsc ñänøømä. Tu'ug hänajty xiøhaty Matías. Jatu'ugpä, tægøøgtu'u hänajty xiøhaty: José, Barsabás, Justo.

²⁴ Mänitä Pedrohajxy tiägøøyy Diospa'yaaxpä:

—Teedy, miičh mnajuøøby neby højts nägøxiä nwiinmahñdyhatiän. Højts hawáaŋac mädyii miičh tøø mwiimbiy hädaahajxy nämetspä,

²⁵ mädyiibä Judas jaduhñ nähduundu'udäp. Coö Judas jaduhñ quiädiehy, paadiä tiuunŋ yajtägooyy. Paady jiiby yhädaacy haxøøgtuum —jaduhñä Dios hajxy pia'yaaxy.

²⁶ Mänit hajxy yhäyø'cy suertehaam mädyii hänajty tuungtägø'øwaamb. Mänitä Matías piaatä. Mänitä Matías hajxy quiumaayy, ja'a hajxy hänajty nämajtu'ugpä.

2

¹ Coö Pentecostés-xøø yhabaaty, mänitä mæbøjpädøjc-hajxy nägøxiä yhamugøøyy.

² Jiiby hajxy hänajty tøgooty yhäña'ay. Mänit hajxy miädooyy nebiä poj yhamuuyän coö møc piojy. Cøxp jaduhñ chohndaacy. Møc jiiby yhawaandsøøyy tøgooty.

³ Mänit hajxy nägøxiä ñägädaacä hanidiuhmjaty ja'a Dioshespíritäm. Jaduhñ hänajty quiähxø'øgy nebiä tootsän, nebiä jøønhaayän.

⁴ Mänit hajxy nägøxiä yhadägøøyyä jioottägøøyyä ja'a Dioshespíritäm. Mänit hajxy tiägøøyy mädiaacpä wiinghayuucjaty. Ja'a Dioshespíritu hänajty jaduhñ yajmädiaacp.

⁵ Tøø judíos hajxy hānajtý nāmay miech Jerusalén xøøhəjpä. Wiin-duhmyhəgəjpt hajxy hānajtý chooñ. Paady hajxy miech Jerusalén xøøjooty, quiudiunaambiä quiuhdujt hajxy hānajtý jaduhñ neby hajxy hānajtý quiuhdujthatiän.

⁶⁻⁷ Coo judíos hajxy miädooyy coo poj hānajtý møc yhamuuy jiiby tøgooty maa mähəjpädəjc-hajxy hānajtý tøø yhamugø'øyän, mänitä judíos hajxy jiiby tiøjtägøøyy. Coo judíos hajxy jaduhñ miädooyy coo mähəjpädəjc-hajxy hānajtý quiapxy miädia'agy wiinghayuucjaty, mänitä judíos hajxy wyiinjuøøyy yhamdsoo hayuuc-haamby neby hajxy hānajtý miädia'aguiän majaty hajxy hānajtý chooñ wiinduhmyhəgəjpt. Coo hajxy jaduhñ miädooyy, mänit hajxy jiaanč tehñ yagjuøøyy nägø'ø nädecypiä. Mänit hajxy ñiñāmaayyā:

—Yø'ø jäya'ayhajxy xiiby capxpä mädiaacpä, haagä Galilea yø'ø hajxy chooñ.

⁸ Tii hajxiäda'a coo tøø nmädóowäm nebiaty hajxy cəjwiinghayuuc tøø nmämín tøø nmäga'awøøyyäm.

⁹ Hix, wiinduhmyhəgəjpt hajxy ndsóhñäm, Partia, Media, Elam, Mesopotamia, Judea, Capadocia, Ponto, Asia,

¹⁰ Frigia, Panfilia, Egipto, møød jim Libia, Cirene mäwiingón. Høxtä Roma hajxy näje'e ndsóhñäm,

¹¹ møød Creta, møød Arabia. Näje'e hajxy judíos nmämín nmäga'awøøyyäm. Näje'e ja'a judíos quiuhdujt wyiinmahñdy hajxy tøø njəjpəgøøyyäm neby hajxy quiuhdujthatiän. Coo yø'ø Galileabä-jäya'ayhajxy jaduhñ tøø quiapxy tøø miädia'agy wiinghayuucjaty nebiatiä Dios ja'a hoy-yagjuøøñäbä tøø ya-jcähxø'øgy, jaduhñ hajxy tøø nwiinjuøøyyäm ja'a nhamdsoo hayuuc-haamby cəjwiinduum —nømä judíos hajxy ñiñāmaayyā.

¹² Coo judíos hajxy jaduhñ wyiinjuøøyy ja'a yhamdsoo hayuuc-haamby, paady hajxy jiaanč tehñ yagjuøøyy nägø'ø nädecypiä. Mänit hajxy ñimiäyajtøøwä:

—Tii yø'ø jäya'ayhajxy coo quiapxy coo miädia'agy wiinghayuucjaty, yø'ø hajxy tsohm̄bä Galilea.

¹³ Mänit hajxy näje'e yhadsooyy xi'igy hanähaty:

—Múucäp hajxiäda'a.

¹⁴⁻¹⁵ Mänitä Pedrohajxy tiänaayyø'cy møødä jiamioødhajxy ja'a nāmajtu'ugpä, ja'a hajxy hānajtý jaduhñ Dioswiinguexypä. Mänitä Pedro møc tiägøøyy mädiaacpä:

—Mägu'ughəjpädəjc, nägøxiä hajxy njudíos hajtäm mäduhñtiä hajxy yaa nyajpáatäm, mäduhñtiä hajxy jäguem mdsooñ, møød mijts yaa tsohm̄bä Jerusalén. Näje'e mijts mmāna'añ cooc tyijy højts nmu'ugyii. Pero cab jaduhñ tiøyyä. Cab jaduhñ pøñ yhu'ugy jopyñä.

¹⁶ Coo hajxy tøø mhixy tøø mmädoy coo højts tøø ngapxy tøø nmädia'agy wiinghayuucjaty, jaanč tøjiajt jaduhñ nebiä Joel jecy quiujahyyän ja'a Dioscəxpä. Diosquexiä Joel hānajtý. Jaduhñä Joel jecy quiujahy:

¹⁷ Jaduhñä Dios miānaañ: Coo hānajtý yhabaadaañnä coo naaxwiimbä hānajtý wyiimbidaañnä,

mānithøchä nhEspíritu nguexa'añ maa jäya'ayhajxy nägøxiän, mäduhñtiä hajxy yaa yhity hädaa yaabä naaxwiin.

Y mijtsä mnøøx mmajc-hajxy, mānithøchä nmädia'agy hajxy xyajwa'xaanä.

Ja'a høxcujc-hāna'c-hajxy, hoy-yagjuøøñäjätyhøch hānajtý nyajwiinhixa'añ.

Jaanä jaduhñä majjäya'adiəjc-hajxypä, nyajcuma'awáambiøch hajxy hānajtý hoy-yagjuøøñäjäty.

18 Coo hānajt̃ yhabaada'añ, mǎnithōchā nhEspíritu nyajnāguexaambā ja'a nmoonsāhajxy, ja'a ya'aybā, ja'a to'oxypā.

Mǎnithōchā nmǎdia'agy hajxy xyajwa'xāanābā.

19 Nyajcāhxō'ogāambiōchā hijxtahnd hoy-yagjuōōñājatypā jim̃ tsajtcōxp mōōd hādaa yaabā naaxwiin.

Hochāhgōōñājatyhōch jaduhñ nyajcāhxō'oga'añ nebiā nō'tiān, nebiā jōōnān, nebiā jōōnjocān.

20 Wiingoodsō'owaambā xōō hānajt̃.

Ja'a po'o, tsapts hānajt̃ yhana'añ nebiā nō'tiān.

Ja ween hānajt̃ quia'a habaadyñā coōchā naaxwiimbā nyajwiimbidaannā, coōchā nHuung Jesucristo yaa quiādaactāgatsa'añ hādaa yaabā naaxwiin.

Mānitā jāya'ayhajxy nāgōxiā yajtōyhajtyega'añii.

Jadúhñhōchā nmōcmājaa hānajt̃ nyajcāhxō'oga'añ.

21 Pōnjatiā Jesucristo hānajt̃ capxpaadaamb, je'e hānajt̃ hodium mǎhmō'owaamb,

nōmā Dios miānaañ. Jim̃ jaduhñ myiñ maa Joel jecy quiujahyyān.

22 'Mijts israelitas, huuc hamādoowhit hajxy hoy. Mnajuōōby hajxy jaduhñ coo Dios ja'a Jesús ja'a Nazarettsohm̃bā wyiinguejxy coo jii tiūnāt maa mijtsān. Madiu'u ja'a Jesús hijxtahnd yajcāhxō'cy hoy-yagjuōōñājatypā maa mijtsā mwiinduumhajxiān.

23 Tōō Dios hānajt̃ yajnāhdijy coo mijtsā Jesús mmādsāt. Mānitā cahwiindōyhāna'c hajxy hoy myajcō'odāgō'oy. Mānitā Jesús hoy miōjpahbedyii cruzcōxp. Mānit̃ yho'cy.

24 Pero mānitā Dios ja'a Jesús yagjujypiojtāgajch. Jaduhñā Dios hānajt̃ tōō miāna'añ coogā Jesús tsipcōxp jiuypiojgāt.

25 Hix, jaduhñā David jecy miādiaacy ja'a Jesúscōxpā:

Nnajuōōbiōch jaduhñ coōch homiānaajā xpiuhbety.

Homiānāajōch jaduhñ xcwieendāhaty, jadúhñhōch pōñ xquia'a hadsāhgō'owōt.

26 Páadyhōch jootcujc njaanč tehñ ñijiāwō'oyii.

Páadyhōchā Dios jootcujc nba'ya'axy.

Cábōchā nho'og ndsāhgō'oy je'eguiōxpā coōchā njuōhñdy nbāda'agy maa Diosān.

27 Xyagjujypiojgāambōch miīch jaduhñ.

Cábōch miīch jiiby jutjooty xyajmǎhmō'owa'añ coōch jiiby nbú'udsāt,

je'eguiōxpā coōch miīch xyHuunghaty.

28 Xyagjugyhadāambōch miīch cōjxta'axiōō nej miīch homiānaajā mjugyhatiān.

Cōōch miīch jaduhñ xmiōōdhida'añ tehñgajnā, páadyhōch jootcujc nni-jiāwō'owa'añii.

29 Mānitā Pedro miānāangumbā:

—Māgu'ughajpādōjc, nmōōdhajtāmā tōyhajt hajxy jaduhñ coo David jaduhñ jecy quia'a nimiādiaacā hamdsoo. Hix, coo David jecy yho'cy, mānit̃ hoy ñaaxtāgō'oy. Jiiby jaduhñ yhityñā jutjooty hōxtā jāda'anābaadyñā.

30 Coo David jaduhñ jecy miādiaacy, ñajuōōby hānajt̃ jaduhñ coo yhapā yhoc hānajt̃ tu'ug wyiinguexāanāxā ja'a Diósām, mōōd coo hānajt̃ yhane'emaambā nebiā David jecy yhanehmīān. Tōōyyāmā Dios hānajt̃ miāna'añ coo hānajt̃ yajtōjiada'añ coo David ja'a yhapā yhoc hānajt̃ tu'ug wiindsōñ tiuna'añ.

³¹ Jaduhnä David tøyhajt jecy miøødhajty coo Dios ja'a wyiinguexypä yagjujypiøga'añ coo hānajty tøø yho'ogy, møød coo hānajty quia'a mähmø'øwa'añ jutjooty, møød coo ñi'xä quiopc hānajty jiiby quia'a pu'uda'añ.

³² Ja'a Jesúscøxpä David jecy miädiaacy coo Jesús hānajty jiuypijøjtägsa'añ. Tøø højts nhamdsoo hixy coo jiaančh jujypijøjcy.

³³ Mānitä Jesús jim miøjyaaxä maa Tieediä wyiinduumän. Mānit ñāmaayyā coo jim yhøxtä'agāt maa Tieediä yhahooyhaampiän. Mānitä Jesús jaa Tieediä yhEspíritu miooyyā nebiä Tieedy hānajty tøø yajwiinwaanø'øyiijän. Mānitä Jesús ja'a Tieediä yhEspíritu yaghawa'xøøyyä. Je'e hajxy jaduhn tøø mhixy tøø mmädoy.

³⁴ Ja'a Jesúsäts jim møjyaaxä tsajpootyp, ca'a Diavitä. Hix, jaduhnä David jecy miānaambä:

Ja'a høøčhā nWiindsøn, je'e jaduhn nāmaayyā ja'a Tiéediām:

“Min yaa hāña'aw maach nhahooyhaampiän.

³⁵ Nmo'owāambiøch miich cuhdujt jaduhn coo mmädsip mga'a yajmäjäädä'agāt.” Jaduhnä Dios ja'a yHuung ñāmaayy.

³⁶ Mānitä Pedro miānāangumbä:

—Jaduhnds je'e, ja'a Jesús, ja'a mijts mmøjpahbéjtäbä cruzcøxp, je'e ja'a Dios jaduhn wyiinguejx coo hajxy nWiindsøn hájtämät, coo hajxy xya-jnähwáatsämät. Tøyhajt jaduhn. Hahixøøby jaduhn coo hajxy nägøxiä mmäbøgāt ja'a Jesúscøxpä, mijts israelitas. Ca'a hajxy mga'a mäbøcy —nømä Pedro miānaañ.

³⁷ Ja'a jäya'ayhajxy hānajty jiiby hamädoowhiipä, coo hajxy jaduhn miädooyy, mānit hajxy tiägøøyy tajpä maabiä hoyhoy. Mānitä Pedrohajxy ñāmaayyā møødä jiamioødtøjc:

—Mägu'ughajpädøjc, neby jaduhn yhahixø'øy højts ngudiúnät.

³⁸ Mānitä Pedro yhadsooyy:

—Najtshixø'ow ja'a mhaxøøgcuhdujt hajxy. Jøjpøgøøyyä ja'a Dios ja'a quiuhdujt hajxy. Näbet hajxy ja'a Jesucristocøxpä. Jaduhnä Dios ja'a mbojpä mgädieeybä hajxy xyajnähwáatsät. Jaduhnä yhEspíritu hajxy xmióobiät.

³⁹ Pønjatä Dios ja'a nWiindsøn hájtämbä miøjyaaxyp, jé'egädsä piojpä quiädieeybä yajnähwáatsäxäp, jé'egädsä Dios yhEspíritu mio'owaamby, møød mijts, møødä mhap møødä mhoc-hajxy, møød pønjaty jäguem tsänaaby. Jaduhn hajxy xyajwiinwaanø'øyyäm —nømä Pedro miānaañ.

⁴⁰ Madiu'ujä Pedro jiaac mädiaacy. Mānit jiaac tehñ miānaañ:

—Yø'ø cahwiindøjiäya'ayhajxy, ca'a hajxy tehngajnä mbahixy neby hajxy quiuhdujthatiän, coo hajxy jaduhn mnä'ä padägóyyät —nømä Pedro miägapy yhanehmy.

⁴¹ Mānitä Pedro miädia'agy miäbøjcäxä nädägøøgmil-jäya'ay. Mānit hajxy hoy nägøxiä ñäbety.

⁴² Hamuumdu'joot hajxy hānajty miäbøcy nägøxiä neby hajxy hānajty yajnähixø'øyiijän ja'a apóstoldøjcām. Naxy hajxy hānajty yhamugø'øy tsajcaagyquiaamiujpä, møød hajxy hānajty Dyiospa'ya'axy. Tu'ugjoot tu'ugwiinmahñdy hajxy hānajty yhity. Hamiñ haxøpy hajxy hānajty ñibiuhbedyii.

⁴³ Madiu'ujä apóstoldøjcø hijxtahñd hajxy hānajty yajcähxø'øgy hoy-yagjuøøñäjaty. Jiaančh tehñ yagjuøøbiä mäbøjpädøjc-hajxy hānajty neby hajxy hānajty yhiixiän.

⁴⁴ Tu'ugmädia'agy hajxy hānajty yhity mäduhñtiä hajxy hānajty miäbøcy. Yajtuunmujpy hajxy hānajty tijaty hajxy hānajty miøød.

⁴⁵ Mänit hajxy nägøxiä tiägøøyy too'pä tijaty hajxy hānajty miøød. Pønjetiä xädø'øñ hānajty yajmaajiajp, mänitā xädø'øñ hajxy hānajty mio'oyii mäduhnjaty hajxy hānajty yajmaajiaty.

⁴⁶ Jabom-jabom hajxy hānajty yhamugø'øy maa møjtsajtøjcān Diospa'yaaxpä. Jootcujc hajxy hānajty quiaamiucy yhuucmucy maa yhamdsoo tøjc-hajxiān. Hojiot hajxy hānajty miøød.

⁴⁷ Wyiingudsähgøøbiä Dios hajxy hānajty. Møødä cu'ug hajxy hānajty wyiingudsähgøøbiä. Jabom-jabomä mabøjpädøjc-hajxy hānajty yajmayø'øyii ja'a Diósäm. Jaduhñ hajxy hānajty yajnahwa'ačhii.

3

¹ Tu'ugxøøbä Pedrohajxy hānajty ñøcxy tsajtøgooty møødä Juan. Mānacyxiøø hānajty je'e. Jaduhñ hajxy hānajty quihdujthaty jabom-jabom coo hajxy mānacyxiøø Dyiospa'ya'axy.

² Jimä pa'amjäya'ay hānajty tu'ug yhäña'ay maa tsajtøghaawān. Tecymia'adä mähdiøjc hānajty tøø myiñ tøø quia'ay. Jabom-jabom hānajty jim yajmečhii maa tsajtøjcān xädø'øñyujwaambä. Jim hānajty jabom-jabom ñajtshäña'awø'øyii maa tsajtøghaawān, ja'a hānajty xøhajpä ja'a yajxonbä. Pønjaty hānajty jiiby tägøøby, mänitā xädø'øñ hajxy hānajty miäyujwa'añii ja'a pa'amjäya'ay.

³ Coo Pedrohajxy hānajty jiiby tiøjtägø'owa'añ tsajtøgooty, mänit hajxy yhi-jxä ja'a pa'amjäya'ay. Mänitā xädø'øñ hajxy miäyujwaanä.

⁴ Mänitā Pedro ja'a mähdiøjc ñaaxcuheebøøyy maa hānajty yhäña'ayän. Mänitā Pedro miānaañ:

—Højts wiinhee'ppéjtäc.

⁵ Mänitā Pedrohajxy jiaañch wiinhee'ppejtä. Jaduhñä mähdiøjcä yhaa jioot hānajty yagjaty coo xädø'øñ hānajty mio'owa'añii.

⁶ Mänitā Pedro miānāangumbä:

—Cab højtsä xädø'øñ nnä'ä møødä tii højts miich nnä'ä mó'owäp. Pero ndunaamby højtsä mayhajt maa miichcøxpān. Jaduhñ højts miich nnäma'ay coo mbädø'øgät, coo myo'oyø'øgät. Ja'a Jesucristocøxpä højts miich jaduhñ nnäma'ay, ja'a hijty jim tsohmä Nazaret.

⁷⁻⁸ Mänitā Pedro ja'a mähdiøjcä yhaoguiø'ø miajtsä. Mänitiä ja'a mähdiøjcä tiecy miøgøøyy møødä tiecy-yo't. Coo Pedro wyidsø'cy, mänitā pa'amjäya'ay tiøpxø'cy. Mänit yo'oyø'cy. Mänitā Pedrohajxy jiiby miøødtøjtägøøyyä tsajtøgooty. Tøpxäp júhyäp ja'a craa tiøjtägøøyy, ja'a hānajty tøø miøcpøquiäbä. Mänit tiägøøyy Dioscapxpaatpä.

⁹ Jiibiä jäya'ayhajxy hānajty nāmay tsajtøgooty. Mänit hajxy yhiixy coo craa hānajty yo'oy, møød coo Dios hānajty quiapxpaady.

¹⁰ Mänitā craa yhøxcajpä coo hānajty je'e jie'ejä, ja'a hānajty jim tøø xiädø'øñyujwä'añäbä maa tsajtøghaawān, ja'a hajxy hānajty tyijpiä ja'a jaanč tehñ yajxonbä. Mänitā jäya'ayhajxy jiaañch tehñ yagjuøøyy nägø'ø nädecypiä coo craa hānajty tøø miøcpøcy.

¹¹ Jimä Pedrohajxy hānajty tiāna'ay maa hajxy hānajty tyijjiān Pórtico de Salomón, møødä Juan, møødä craa ja'a hānajty tøø miøcpøquiäbä. Cabä Pedrohajxy hānajty piuhwa'adsa'añii. Mänitā jäya'ayhajxy jim ñøcxøøyy yagjuøøyyäp maa Pedrohajxy hānajty tiāna'ayän.

¹² Coo Pedro jaduhñ yhiixy coo jäya'ayhajxy hānajty yagjuø'øy, mänitā jäya'ay nāmaayy:

—Mägu'ughajpädøjc, israelitadøjc, tii hajxy jaduhñ coo mwi'i yagjuø'øy. Tii højts jaduhñ coo xwyi'i yheeby. Coo hädaa craa tøø miäbøcy ja'a Jesúsøxpä,

paady jaduñ tøø yo'oyø'ogy, ca'a jie'eguiøxpä coo højts mäjaa nmøødä, ni quia'a je'eguiøxpä coo højtsä Dios hoy nwiingudsähgø'øy.

13-15 Jue'e hajxy jecy nhaphájtäm ndeedyhájtäm, ja'a Abrahamhajpä, møødä Isaac-hajpä, møødä Jacobhajpä. Wyiingudsähgøøbiä Abraham ja'a Dios hajxy hānajtý jegyhajty. Pero coo Dios ja'a yHuung Jesús yaa quiejxy hädaa yaabä naaxwiin, cab hajxy mwiingudsähgøøyy. Mānit hajxy hoy mmach. Mānitä tuuñgmøødpä hajxy hoy myajcø'ødägø'øy. Mānitä Pilato ja'a Jesús jia yaghøxmadsaanä. Pero mijts, caj mijts jaduñ mmānaañ coo Jesús yhøxmadsojät, hoyyā Jesús tii pojpa tii cādieey hānajtý quia'a jagä møødä. Mānit mijtsä haxøøghāna'c mnä'ägä nähdujcy coo yhøxmadsojät, ja'a hānajtý tøø jiäya'ay-yaghó'oguiäbä. Mānit hajxy mmānaañ coo Jesús yagho'ogøjät. Coe Jesús jaduñ yho'cy, xyajnhwáatsām hajxy jaduñ; jaanä jaduñ hajxy xyagjugyhadāanām cøjxta'axiøø neby je'e jiugyhatiän. Mānitä Dios ja'a Jesús yagjujypiojtagajch. Jaduhñä Dios ja'a Jesús yajmøjtägøøyy. Coe Jesús hānajtý tøø jiujypiojcy, mānit højts nhijxy, paady højts tøyhajt jaduñ nmøødä.

16 Hoorä, hädaa craa, mnajuøøby hajxy hijty coo hijty tiecymia'adä. Mhíxnäp hajxy jaduñ coo tøø choocnā. Paady tøø cho'ogy coo tøø miäbøcy ja'a Jesúscøxpä, coo Jesús møcmājaa miøødä, møødä møccuhdujt.

17 'Mägu'ughajpādøjc, huuc madow hajxy. Nnajuøøbiøch jaduñ coo mijts hānajtý mga'a najuø'øy coo Jesús Dyioswiinguexiä, paady hajxy myajyagho'cä. Ni ja'a mwiindsønhajxy hānajtý quia'a najuø'øy coo je'e Dyiosquexiä.

18 Jéquiänä Dios ja'a profetadøjc ñajtsapxøøyy coo Mesías hānajtý tsipcøxp yho'oga'añ, ja'a Dios hānajtý tøø wyiinguéxiäbä. Jaduhñä profetadøjc-hajxy jiaanč cujahy. Y coo Jesús jaduñ jiaanč ho'cy, jaduhñä Dios yajtøjajty neby hānajtý jecy tøø miāna'añän.

19 Paadiä mhaxøøgcuhdujt hajxy mnajtschixø'owät. Jøjtägøøyyä ja'a Dios ja'a miädia'agy hajxy. Jaduhñä Dios ja'a mbojpa mgādieeybä hajxy xya-jnähwáatsät. Y jaduhñä hoybä weenbä hajxy xmió'owät.

20 Coe yhabáadät, mānitä Dios ja'a Jesús yaa quiejxtägatsa'añ hädaa yaabä naaxwiin, ja'a tøø wyiinguéxiäbä coo mijts xyajnhwá'adsät.

21 Cahnä yhabaady coo Jesús jim chohndägätsät tsajpootyp, coo yaa miānajtägätsät hädaa yaabä naaxwiin. Jim jaduñ yhida'aññä høxtä coonä yhabáadät coo Dios yaghoyøødiägätsät tijaty yaa hijp hädaa yaabä naaxwiin. Jaduhñä Dios ja'a profetadøjc jecy ñāmaayy coo hajxy quiujāyāt, ja'a Dios hānajtý tøø wyiinguéxiäbä.

22 Hix, jéquiänä Moisés jaduñ ñāmaayy ja'a nhaphájtäm ja'a ndeedyhájtäm: “Tøøchä Dios xwyiinguexy coöchä profeta ndúnät. Coe yhabáadät, mānitä Dios tu'jäya'ay wyiinguexa'añ, ja'a højts nmāgunāxām. Jaduhñ je'e tiunaambä profeta nébiøch nduñän. Nebiaty mijts xyhane'ema'añ, mgudiúunäbä miädia'agy hajxy.

23 Pønjatý hānajtý ca'a mabøgaamb, yajcuhdägoyyāanäp hajxy hānajtý ja'a cú'ugām”, nømä Moisés jecy miānaañ.

24 'Jaduhñä profetadøjc-hajxy jecy miädiaacy nāgøxiä nebiaty jäda'ahaty jiadyii tiuñii, møødä Samuel, møød hajxy jaac túunäbä profeta.

25 Ja'a hajxy jecy túunäbä profeta, mānitä Dios hajxy ñajtsapxøøyyä coo mijtsä Dios xñāmaayy coogä Dios ja'a Mesías hānajtý wyiinguexa'añ mi-jtscøxpä. Jaanä jaduhñduhmbä, jéquiänä Dios yajcuhdujcy møød højtsä nhaphájtäm møød højtsä ndeedyhájtäm coo Mesías hānajtý wyiinguexa'añ mijtsøxpä. Hix, jaduhñä Dios ja'a Abraham jecy ñāmaayy: “Ja'a miichä

mhapä mhoccøxpä tu'ug, jadúhnhøchä jäya'ay nägøxiä ngunuu'xa'añ wiin-duhmyhagajpt", nømä Dios jecy miänaañ.

²⁶ Y coo Dios ja'a yHuung yagjujypiøjtägajch mänaa hänäjty tøø yho'oguiän, mijts jayøjp xyajnäguejx. Paady mijts jaduñ xyajnäguejxy coo mijts jaduñ xquiunúu'xät, coo weenä mhaxøøgcuhdujt hajxy jaduñ nägøxiä mnajt-shixø'øwät, —nømä Pedro miänaañ.

4

¹⁻² Jimä Pedro ja'a cu'ug hänäjty miøødmädia'agyñä tsajtøgooty, mänitä teedyhajxy miädoyhajty møødä saduceodøjc coogä Pedro ja'a cu'ug hajxy hänäjty yajnähixø'øy coogä Jesús hänäjty tøø jiuypipiøjtägach mänaa hänäjty tøø yho'oguiän. Coogä Jesús jaduñ jiuypipiøjcy, jadúhñägä Pedro tøyhajt hajxy hänäjty miøødä coogä ho'ogyjiäya'ayhajxy hänäjty jiuypipiøgaambä. Coo teedyhajxy jaduñ miädoyhajty coogä Pedrohajxy hänäjty jaduñ yajnähixø'øy, mänitä teedyhajxy jiaanč tehñ jiootma'ty møødä saduceodøjc-hajxy, møødä tsajtøjcueendähajpä wyiindsønñhajxy. Mänitä Pedrohajxy ñämejtsä møødä Juan.

³ Mänitä Pedrohajxy hoy chumyii. Tøø hänäjty chuujø'øy. Mänit hajxy jiiby yhiyty pujxtøgooty tu'tsuhñ.

⁴ Mänitä jäya'ayhajxy nämay miäbøjcy ja'a Jesúscøxpä, ja'a hajxy hänäjty tøø miädóyyäbä nebiä Pedrohajxy yajnähixøøyyän tsajtøgooty. Nämägøoxmil ja'a mäbøjpädøjc-hajxy jaduñ jiajty, haagä ya'adiøjc.

⁵ Cujaboom, mänitä judíos wyiindsønñhajxy jim yhamugøøyy Jerusalén, møødä majjäya'adiøjc-hajxy, møødä cuhdujtyajnähixøøbiädøjc-hajxy,

⁶ møødä Anás, ja'a hänäjty tuumbä teedywiindsønñ, møødä Caifás, møødä Juan, møødä Alejandro, møødä teedywiindsønñ jiuju miägu'ughajxy.

⁷ Mänitä Pedrohajxy yajnöcxä møødä Juan jim maa judíos wyiindsønñhajxy hänäjty tøø yhamugø'øyän. Mänitä Pedrohajxy piädaacä cujc. Mänit hajxy miäyajtøøwä:

—Coo mijts hädaa craa tecymia'adpä tøø myajtso'ogy, pønä quihdujthaam, pønä miäjaahaam hajxy jaduñ myajtsoocy.

⁸ Haa ja'a Pedro, miøødä Dioshespíritu hänäjty je'e. Mänitä Pedro miänaañ:

—Mijts cu'ugwiindsønñdøjc, mijts majjäya'adiøjc,

⁹ mijts højts jaduñ xmiäyajtøøb neby højts hädaa mähdiøjc tøø nyajtso'ogy, hädaa hijty tecymia'adpä.

¹⁰ Huuc tunä mayhajt hajxy, huuc hamädoowhit hajxy weeñtiä neby højts chamñ nmädia'aga'añän maa mijtsä mwiinduumhajxiän. Jaduñä tøyhajt hajxy nägøxiä mmøødhädät møødä israelitadøjc-hajxy nägøxiä neby hädaa mähdiøjc miøcpøjcy, hädaa hijty tecymia'adpä, hädaa yaa tänaabiä mijtsä mwiinduum. Ja'a Jesucristo jaduñ yajmøcpøjc, ca'a yhöjtsä. Nazaret ja'a Jesucristo hijty choon. Mänit mijts myajmøjpahbejtä cruzcøxp. Mänitä Dios yagjujypiøjtägajch.

¹¹ Jaduñ jim myiñ cujaay maa Diosmädia'aguiän: “Jaa tsaa mädyiibä tøjcojpädøjc-hajxy quia'a cumaayy, je'eds jaduñ jayøjp pädaactsohnä jim tøjteec.” Haa jaa Jesucristo, jaduñ je'e miäbaady nebiä tsaajän, ja'a jayøjp jim pädaactsohnäbä teectuum. Pero mijts, cab hajxy mgumaayy, paady hajxy myajyagho'cä.

¹² Jaaya'ay hajxy jaduñ xyajnähwaats xyajcuhwáatsäm. Ja'a Dios jaduñ mänaañ coo Jesús hajxy jaduñ xyajnähwaats xyajcuhwáatsämät —nømä Pedro miänaañ.

¹³ Coo Pedrohajxy hänäjty quiapxy hamøj jootmøj, paadiä møjtojc-hajxy hänäjty yagjuø'øy. Hix, ñajuøøbiä møjtojc-hajxy hänäjty coo Pedrohajxy

hänajty quia'a hõxpõquiä. Mänitä mõjtõjc-hajxy ñajuõõyy coo Pedro ja'a Jesús hänajty tõõ piawädity, paady hajxy hänajty quiapxy hamõj jootmõj.

¹⁴ Cabä Pedrohajxy hänajty hoy quiapxhaduga'añii, je'eguiõxpä coo hajxy hänajty piuhdäna'awõ'õyii ja'a craa ja'a hänajty tõõ chõ'oguiäbä.

¹⁵ Mänitä Pedrohajxy jiiby yhõxquejxpädsõõmä. Mänitä teedyhajxy tiägõõyy yajcapxiõõbiä:

¹⁶ —Neby hajxiäda'a nnä'ä jatcõõyyämät maa yõ'õ häna'cõxpän. Mäduhñtiä cu'ughajxy yaa chäna'ay Jerusalén, quiõxy hixy quiõxy mäday hajxy jaduhñ coo yõ'õ häna'c yõ'õ tecymia'adpä hajxy tõõ yajtso'ogy. Neby hajxy jaduhñ nnä'ä mänáanämät coo jaduhñ quia'a tõyyä neby yõ'õ häna'c yõ'õ tecymia'adpä hajxy tõõ yajtso'oguiän. Pero cab jaduhñ yhahixõ'õy coo yõ'õ capxy coo yõ'õ mädia'agy jaduhñ tehngahnä yhawa'xõ'õwät.

¹⁷ Hahixõõby jaduhñ coo hajxy nhadsähgõõyyämät, jaduhñä dijuuntä Jesús hajxy tehngahnä quia'a ja wi'i quiapxpäadät —nõmä teedyhajxy ñiñämaayyä.

¹⁸ Mänitä Pedrohajxy yajmõjyaaxä mõõdä Juan. Mänit hajxy yhanehmä coo Jesús hajxy quia'a capxpäatnät, coo cu'ug hajxy quia'a yajnähixõõñät ja'a Jesúscõxpä.

¹⁹ Mänitä Pedrohajxy yhadsooyy:

—Huuc wiinmahñdyhat hajxy waambä Diosäda'a miäna'añ, põ hahixõõby jaduhñ coo hõjts mijtsä mmädia'agy ngudiüunämät, cahnä hõjtsä Dios ja'a miädia'agy hänajty ngudiüunä.

²⁰ Caj pues, cab jaduhñ yhahixõ'õy coo hõjts mijtsä mmädia'agy ngudiüunämät, cahnä hõjtsä Dios ja'a miädia'agy hänajty ngudiüunä. Hoorä, jaduhñ hõjtsä Dios tõõ xyhane'emy coo hõjtsä miädia'agy tehngahnä ngapxwá'xät coo hõjtsä Jesús tõõ nhijxjuypioy, coo hõjts tõõ nmäday nebiatiä Jesús tõõ yajnähixõ'õyän. Paady hõjts jaduhñ nga'a hamona'añ —nõmä Pedrohajxy miänaañ.

²¹⁻²² Mänitä Pedrohajxy jadähooc yhadsähgõõyyä. Mänit hajxy yhõxmajtsä. Paady hajxy jaduhñ yhõxmajtsä coo teedywiindsõñhajxy hänajty quia'a najuõ'õy nebiä Pedrohajxy ñä'ä tsaächtiunõjät. Hix, chähgõõbiä teedywiindsõñä cu'ug hajxy hänajty je'eguiõxpä coo cu'ugä Dios hajxy hänajty tehngahnä wyi'i quiapxpaady coo mähdiõjc tõõ cho'ogy, ja'a hänajty tõõ myiñ tõõ quia'ayäbä tecymia'ad. Jiaanç tehñ yagjuõõbiä cu'ughajxy hänajty jaduhñ, je'eguiõxpä coo mähdiõjc juxychägui'x naxy jomõjt hänajty miõõdä, ja'a tõõ chõ'oguiäbä.

²³ Coo Pedrohajxy yhõxmajtsänä mõõdä Juan, mänit hajxy jim ñõcxy maa jiamioõdhajxiän. Mänit hajxy quiõxy mädiaacy waambatiä teedywiindsõñhajxy hänajty tõõ miäna'añ, mõõdä majtõjc-hajxy.

²⁴ Coo jiamioõdhajxy jaduhñ miädooyy, mänit hajxy nägõxiä tiägõõyy Diospa'yaaxpä:

—Diosteedy, miich hõjts nWiindsõñhajpy. Miichä tsajt jaduhñ mhädiuun mõõd hädaa yaabä naaxwiin, mõõdä mejy, mõõd tijaty jim hijp tsajtcõxp, mõõd hädaa yaabä naaxwiin, mõõd jiiby mejjiooty.

²⁵⁻²⁶ Jaduhñ miichä David jecy mnajtsapxõõyyä ja'a mhEspírituhaam: Nä'ä nägoobä jäya'ayhajxy yhawa'anda'agy, ja'a Dios hajxy ca'a wiingudsähgõõbiä.

Xiõõbä hajxy ñä'ä wiinmahñdyhaty, cab hajxy tii yhoyõõyyäxä.

Mänitä gobiernähajxy yhamugõõyy, ja'a hajxy yaa hanehmä hädaa yaabä naaxwiin.

Mänitä Dios hajxy jia näbädõ'cy.

Jaanä Mesías jaduhñ ja näbädõ'cäbä, ja'a Dios hänajty wyiinguexaambiä,

nõmä David jecy miänaañ, ja'a miich jecy mmoonsähájtäbä, ja'a hõjts jecy nhaphajt ndeedyhájtabä.

²⁷ 'Coo Jesús jaduhñ miajtsä, mänitä Herodeshajxy yaa yhamugøøyy jun-tahajpä yaa Jerusalén, møødä Poncio Pilato, møødä israelitahajxy, møødä jäya'ayhajxy ca'a israelítäbä. Jaduhñ jiaančh tøjiajty nebiä David jecy jiaančh mänaañän. Mänitä Herodes ja'a Jesús hajxy ñähwaambejty, hoyyä Jesús hñajty tii cädieey quia'a jagä møødä. Miičhä mHuung je'e. Miičh je'e mwiinguejx coo Mesías tiünät.

²⁸ Tøøyyäm miičh hñajty jaduhñ mmäna'añ coo Jesús hñajty jaduhñ tsipcøxp jiada'añ yhabeta'añ, paady miičh jaduhñ waam̃b m̃ga'a mänaañ coo Jesús jaduhñ jiaančh jajty jiaančh habejty.

²⁹ Hoorä, Diostedy, mnajuøøby miičh jaduhñ coo hõjtsä teedywi-indsøñdøjc tøø xjia hadsähgø'ø. Hõjts miičh jaduhñ xmioonsähajp. Hõjtsä mājaa jaac móoyäc, jaduhñ hõjts miičhä mmädia'agy jaduhñ hoy njaac yaghawa'xøøyyät hamøj jootmøj.

³⁰ Hõjts jaac puhbéjtäc, jaduhñ hõjtsä pa'amjäya'ay nyajmøcpøgät ja'a miičhä mHuungä miäjaagøxpä, ja'a Jesúsahajpä, weenä cu'ughajxy jaduhñ jiaančh tehñ yagjuø'ø nej mijtsä møcmājaa hajxy mjaančh tehñ miøødä —nõmä Pedro ja'a Dios hajxy pia'yaaxy.

³¹ Coo Pedrohajxy jaduhñ Dyiospa'yaaxpādøøyy, mänit jim̃ chäyuuyy maa hajxy hñajty tøø yhamugø'øyon. Mänitä Dioshespíritu hajxy nāgøxiä yhadägøøyyä jioottägøøyyä. Mänitä Diosmädia'agy hajxy tiägøøyy yajwa'xpä hamøj jootmøj.

³² Tu'ugjoot tu'ugwiinmahñdiä mabøjpadøjc-hajxy hñajty nāgøxiä. Mäduhñjaty hajxy hñajty miøødä cøxiä wiinä, tu'ugmucy hajxy hñajty yajtuunmucy. Cab hñajty pøñ miäna'añ coo hñajty nidiuhñ jie'ehaty.

³³ Haa ja'a apóstoldøjc-hajxy, Diosmäjaamøød hajxy hñajty quiapxy miädia'agy coogä Jesús hñajty tøø jiuypioçy, ja'a hajxy nWiindsøñhájtabä. Jaančh tehñ piuhbéjtäp hajxy hñajty nāgøxiä ja'a Diósäm.

³⁴ Cab hñajty pøñ tii yajmaajiaty. Hix, pøñjatiä naax̃ hñajty møød, møødä tøjc, tioo'py hajxy hñajty. Pøñjaty hñajty tøø ñaax̃toogy tøø tiøjtoogy,

³⁵ mänitä xädø'øñ hajxy hñajty yecy maa apóstoldøjc-hajxiän. Mänitä mabøjpadøjcä xädø'øñ hajxy hñajty yajniñäwa'xø'øyii pøñjaty hñajty yajmaa-jiajp.

³⁶ Jim̃ä mabøjpä hñajty tu'ug xiøhaty José. Chiprenaaxooty hñajty chooñ. Ja'a Leví ja'a José hñajty jegyhajty tøø yhaphaty tøø tieedyhaty. Bernabé ja'a José yajxøbejtä ja'a apóstoldøjcäm. (Jue'e Bernabé miädia'agytiägø'øy hahebreohaam, “mäjootcapxmøcpøjp.”)

³⁷ Jim̃ä José naax̃cam̃ hñajty miøødä. Mänit tioo'cy. Mänitä xädø'øñ hoy yecy maa apóstoldøjc-hajxiän.

5

¹ Jim̃ä jäya'ay hñajty tu'ug xiøhaty Ananías. Safira ja'a tio'oxiøjc hñajty xiøhaty. Mänitä ñaax̃ hajxy je'e piadoo'pä.

² Tøø hajxy hñajty quiojyquiapxytiuñ møødä tio'oxiøjc coogä xädø'øñ hajxy hñajty cujiä yega'añ maa apóstoldøjc-hajxiän. Cújiäc hajxy hñajty miämähmø'øwa'añ. Coo Ananías ja'a Pedro ja'a xädø'øñ yajnāmejch, mänitä Ananías miänaañ cooc tyijy ja'a xädø'øñ hñajty tøø quioxy yecy mäduhñtiä hñajty tøø tioogy.

³⁻⁴ Mänitä Pedro miänaañ:

—Ananías, coo miičhä mnaax̃ tøø mdoogy, cujiä xädø'øñ tøø mmämähmø'øy mäduhñtiä tøø xquiujuuyy. Cooch miičhä xädø'øñ cujiä tøø

xmio'oy, jaduñ miič tøø mmäna'añ cooč tyijy cøxiä tøø xmio'oy. Coø naax hänäjty mğa'a toogyñä, mje'ehajpyñä hänäjtyñä. Coø tøø mdoo'nä, miič mje'e hijtyje'e ja'a naaxtsow. Coø jaduñ tøø mhøhnda'agy, mgädiehy jaduñ. Ja'a Dios miič mja wiinhøønaa, ca'a yhøjtsä. Ja'a møjcu'ugong miič jaduñ xyajcapxtägooy, paadiä Dioshespíritu jaduñ mja wiinhøønaa —nømä Ananías ñämaayyä.

⁵ Coø Ananías jaduñ miädooy, mäniä ho'ogy quiädaay. Pønjaty jaduñ mädoyhajt coø Ananías jaduñ yho'cy, mäniä hajxy chähgøøbiøjcy.

⁶ Mäniä høxcujc-häna'c-hajxy näje'e miejch. Mäniä ho'ogyjiäya'ay hajxy ñähbijty. Mäniä hajxy hoy yajnaaxtägø'oy.

⁷ Cudägøøghorä, mäniä Ananías tio'oxiøjc piamejtspä, ja'a hänäjty xøhajpä Safira. Cahnä Safira hänäjty miädohyatñä coø ñihyhap hänäjty tøø yho'ogy. Mäniä Safira tiøjtägøøyy maa Pedro hänäjtiän.

⁸ Mäniä Pedro ja'a Safira miäyajtøøyy:

—Nej, jaduñä mnaax hajxy mjaanč yejquiä, neby hajxy tøø mnägapxiän.

—Jaduñ —nømä Safira yhadsooy.

⁹ Mäniä Pedro miänáangumbä:

—Tii hajxy coø mja cojyquiapxytiuñ coø hajxy hänäjty mhøhnda'aga'añ. Nej, cab hajxy mnajuø'oyä coø Dioshespíritu hotyijä yajcopcø'oy. Cab hajxy jaduñ hoy mwiinhøønät. Coø mnihyhap yhøhndaacy, paady tøø yho'ogy. Xii häna'c-hajxy je'e tiøjtägø'oy, ja'a hajxy hoy tøø miäyajnaaxtägø'oyäbä. Nøcxaamb miič yø'ø häna'c xyajnaaxtägø'øwaambä —nømä Safira ñämaayyä.

¹⁰ Tuunä Safira jaduñ ñä'a mädooy, mäniä Pedro tiecyquiädawøøyyä ho'ogy. Coø høxcujc-häna'c-hajxy tiøjtägøøyy, mäniä Safira hajxy yhijxy coø hänäjty tøø yho'ogy. Mäniä hajxy yhøxcøøbiädsøømy. Mäniä hajxy hoy yajnaaxtägø'oy maa ñihyhapä ñähmøjcän.

¹¹ Pønjaty jaduñ mädoyhajt nebiä Ananías hajxy hänäjty tøø jiaty tøø yha-betiän, mäniä hajxy nägøxiä chähgøøbiøjcy, møødä mabøjpädøjc-hajxy nägøxiä.

¹² Mäniä apóstoldøjc-hajxy jim tiägøøyy mäba'amyajnajxpä cajptooty. Jaanč tehñ yhoj-yagjuøøñä hajxy hänäjty tiuñ. Jaduñ hajxy hänäjty yajcähxø'ogy coø Dios mäjaa jiaanč tehñ miøødä. Jimä mabøjpädøjc-hajxy hänäjty yhamugø'oyhaty tsajtøgooty maa hänäjty xiøhatiän ja'a Pórtico de Salomón.

¹³⁻¹⁴ Tehngahnä mabøjpädøjc-hajxy hänäjty miayø'oy näya'ay-nädo'oxy, ja'a hajxy hänäjty mabøjpä ja'a Jesucristocøxpä. Haa ja'a jäya'ayhajxy hänäjty ca'a mabøjpä, cab hajxy hänäjty jim ñä'ägädä nøcxy maa mabøjpädøjc-hajxy hänäjty naxy yhamugø'oyän, hoyyä mabøjpädøjc-hajxy hänäjty jiaanč tehñ quiumayii ja'a cú'ugäm. Paady hajxy hänäjty jim quia'a nøcxa'añ, ja'a hajxy hänäjty ca'a mabøjpä, coø hajxy hänäjty chähgø'oy.

¹⁵ Coø apóstoldøjcä pa'amjäya'ay hajxy hänäjty may yajmøcpøcy, paadiä pa'amjäya'ayhajxy hänäjty jim quioøñøcxyii tu'haam maa Pedro hänäjty ñaxø'øwa'añän. Jaduhñägä pa'amjäya'ayhajxy jaduñ näje'e miøcpøgät coogä Pedro yhapc hajxy ñä'a páatät maa hajxy hänäjty quio'na'ayän cøjxcøxp, møød to'ogyquiøxp.

¹⁶ Mayyä pa'amjäya'ayhajxy hänäjty jim yajmečhii Jerusalén, møød ja'a hajxy haxøøgpä ca'a hoybä møødpä, ja'a hajxy hänäjty tsohmä Jerusaléncajtpa'a mäwiingön. Nägøxiä hajxy hänäjty yajmøcpøgyii.

¹⁷ Coø teedywiindsøñhajxy jaduñ miädoyhajt coø pa'amjäya'ayhajxy hänäjty may tøø wyi'i miøcpøcy, mäniä hajxy nägø'ø nädecypiä jiootma'ty, møødä saduceodøjc-hajxy. Hix, cabä apóstoldøjc-hajxy hänäjty yajmädsogyii coø hajxy hänäjty tehngahnä wyi'i yajnähiø'oy ja'a Jesúsøxpä.

¹⁸ Mänitä apóstoldøjc-hajxy hoy chumyii.

¹⁹ Mänitcoodsä Diosmoonsä ja'a pujxtøghaaw hoy yaghawa'ačh. Mänitä apóstoldøjc-hajxy yhøxwoobädsøømä ja'a Diosmóonsäm.

²⁰ Mänit hajxy ñämaayyā:

—Coo jioð'øwät, mänit hajxy jim mnøcxät maa tsajtøjcän. Jimä cu'ug hajxy myajnähið'øwät neby hajxy ñähwá'adsät, neby hajxy jaduhñ jiugyhádät cøjxta'axiðø nebiä Dios jiugyhatiän —nømä Diosmoonsä miänaañ.

²¹ Coo jioðøyy, mänitä apóstoldøjc-hajxy jim jiaančh nøcxy tsajtøgooty neby hajxy hänäjty tøø ñäma'ayijän ja'a Diosmóonsäm. Mänitä cu'ug hajxy tiäðøyy yajnähiðøbiä.

Mänitä teedywiindsønhajxy miänaañ coo hajxy nägøxiä yhamugø'øwät juntahajpä, møødä majtøjc-hajxy israelítabä. Mänit hajxy miänaañ coo tsumyähäna'c-hajxy jim yajmedsøøjät maa junta hajxy hänäjty yagjadyijän.

²² Coo policíashajxy jim miejch maa pujxtøjcän, cab pøn hänäjty jiibiän. Mänitä policíashajxy wyiimbijty.

²³ Mänit hajxy miänaañ:

—Coo højts jim nmejch maa pujxtøjcän, je'enä hänäjty hoy yhaawguiichä. Jimä soldadohajxy hänäjty yhadäna'ayñä maa pujxtøghaawän. Pero coo højts jiiby nja tøjtäðøyy, cab pøn hänäjty jiibiän —nømä policíashajxy miänaañ.

²⁴ Coo teedywiindsønhajxy jaduhñ miädooyy, møødä tsajtøjcueendähajpä wyiindsønhajxy, møødä møjteedywiindsøn, mänit hajxy jiaančh tehñ yagjuøyy. Cab hajxy hänäjty ñajuø'øy tii hänäjty jájtäp túunäp.

²⁵ Mänitä jäya'ay tu'ug miejch maa teedywiindsønhajxy hänäjty jiunta-hatiän. Mänitä craa miänaañ:

—Ximä cu'ug wyl'i yajnähiðøyyägumbä tsajtøgooty —nømä teedywiindsønhajxy ñämaayyā.

²⁶ Mänitä apóstoldøjc-hajxy hoy wioyii. Ja'a tsajtøjcueendähajpähajxy hoy miäwoy møødä policíashajxy. Hahoy haweenä apóstoldøjc-hajxy jaduhñ jim yajmejtsä maa junta hänäjty jiadyijän. Hiñ, tsähgøøbiø policíashajxy hänäjty coo hajxy ñä'a paga'ads ñä'a pawobøøjät ja'a cú'ugäm.

²⁷ Coo apóstoldøjc-hajxy jim wioomejtsä maa junta hänäjty jiadyijän, mänit hajxy jim yajnøcxä maa møjteedywiindsønä wyiinduumän. Mänitä apóstoldøjc-hajxy ñämaayyā:

²⁸ —Tøø højts mijts nja näma'ay coo hajxy mga'a nä'ägädä yajnähiðøñät ja'a dijuuntä Jesúscøxpä. Pero cab højts mijtsä nmädia'agy tøø xquiudiuunä. Tøø cu'ug hajxy jaduhñ mgøxy yajnähiðø'øy, mäduhñtiä hajxy yaa chäna'ay Jerusalén. Y højts mijts jaduhñ xjia wi'i yajnähdsømaamb cooc tyijy højtsä dijunto Jesús nyajyagho'cä.

²⁹ Mänitä Pedrohajxy yhadsooyy møødä jiamiøødhajxy:

—Cab yhähiðø'øy coo højtsä jäya'ay miädia'agy ngudiúunät, cahnä højtsä Dios miädia'agy hänäjty ngudiúunä.

³⁰ Coo mijtsä Jesús myajyujmänoönä cruzcøxp, mänitä Dios ja'a Jesús yagju-jypiøjtägajch, ja'a højtsä nhapä ndeedyhájtäm jecy wyiingudsähgøøyyäbä.

³¹ Mänitä Dios ja'a Jesús cuhdujt miooyy coo Jesús jim miähané'emät tsajpootyp maa Dios yhahooyhaampiän. Coo judíos ja'a yhäxøøgcuhdujt hajxy ñajtsxið'øwät, jaduhñä piojpä quiädieeybä hajxy jaduhñ yajnähwaats yajcuhwáatsäxät Jesúsäm.

³² Højtsä tøyhajt nyejpy coo Jesús jiuypjøjtägajch coo hänäjty tøø yho'ogy. Jaanä jaduhñä Dioshespíritu tøyhajt yejpä coo Jesús jiuypjøjcy. Pønatiä Dios ja'a miädia'agy jaduhñ cudiúunäp, je'e ja'a Dios ja'a yhEspíritu miooby —jaduhñä Pedrohajxy miänaañ.

³³ Coo teedywiindsøn_hajxy jaduh_n miädooyy, mänit hajxy jiaanč_h teh_m jiootma'ty. Mänit hajxy jaduh_n jia mänaa_ñ coo Pedrohajxy yagho'ogó_jät.

³⁴ Jimä fariseo hänajty tu'ug teedywiindsøn_hagujc. Jue'e hänajty xiøhaty Gamaliel. Ley-yaj_nähixøøbiä hänajty tiuunghajpy. Jaa_nč_h teh_m wyiin-gudsähgøøyyäp hänajty je'e ja'a cú'ugäm. Mänit tiänaayyø'cy. Mänit yhanehm_y coo apóstoldøjc-hajxy nøcxy yajpädsø_myii tu'habaquiä.

³⁵ Mänitä Gamaliel ja'a jiamioødtøjc ñämaayy:

—Mägu'ughajpädøjc, huuc wiinmahñdyhat hajxy hodiägaamby neby yø'ø häna'c hajxy mduna'añ.

³⁶ Huuc jahmiets hajxy nebiä Teudas jecy jiajtiän. Mänit jootmø_j ñibiädaacä. Mänit ñiñänøømä cooc tyijy miøjjäya'ay jiaanč_hjäya'ayä. Mänit piadu'ubøjcä nämädaaxmägo'x jäya'ay. Mänitä Teudashajxy tiägøøyy tsiptuum_bä. Mänitä Teudas yagho'cä. Ja'a soldadohajxy jaduh_n mäyagho'c. Mänitä Teudas jiamioødhajxy xii yaa ñøcxøøyy. Mänitä tsip jaduh_n yhamaadiujnä.

³⁷ Mänitä tsip wiingpä jadähooc choh_ndáaccumbä mänaa censo hajxy hänajty yajpädø'oguiän. Ja'a craa Judas ja'a tsip jaduh_n yajtsoh_ndaac, ja'a hänajty jim tsohm_bä Galilea. Mänitä cu'ug may piadu'ubøjcäbä. Mänitä Judas yagho'cäbä ja'a soldadohajxy. Jaduh_nä Judas jiamioødhajxy xii yaa ñøcxøøbiä.

³⁸ Paady, høxmats yø'ø häna'c hajxy. Cab jaduh_n yhahixø'øy coo hajxy nej mdúnät. Hix, pø yhamdsoo wiinmahñdy hajxy jaduh_n yajtuum_bby, cab jaduh_n yhoyó'øwät; tu'umá'adäp jaduh_n.

³⁹ Pero pø yø'ø häna'cä Dios wyiinmahñdy hajxy yajtúunäp, cab hajxy jaduh_n hoy mgapxhadúgät. Hix, jaduh_n quiähxó'ögät nejpiä Dios hajxy hänajty mmädsiphajpiän —jaduh_nä teedywiindsøn_hajxy ñämaayyä.

Jiaanč_h mabøjc hajxy jaduh_n nebiä Gamaliel miänaa_ñän.

⁴⁰ Mänitä apóstoldøjc-hajxy jadähooc quiuyaaxøøyyä tøgooty. Mänit hajxy wiobho'cä. Mänit hajxy yhanehmä coo Jesús hajxy quia'a capxpáatnät. Mänit hajxy ñajtsmadsøøyyä.

⁴¹ Xoon_dáacäp hajxy tiøjpädsøø_my maa junta hänajty jiadyiijän. Paady hajxy hänajty xioonda'agy, hix, hahixøøby hänajty jaduh_n coo hajxy hočhähdiuun_nä chaächpógät ja'a Jesúscøxpä.

⁴² Mänit hajxy tiägøøguiumbä yaj_nähixøøbiä ja'a Jesúscøxpä, tsajtøgooty møød tøgootypaady. Tehngahnä hajxy hänajty yaj_nähixø'øy jøjwidsø'ø.

6

¹ Tehngahnä mabøjpädøjc-hajxy hänajty jiaanč_h teh_m miayø'øy. Jaduh_n hajxy hänajty quiuhdujthaty coo yaamgto'oxy cay hu'ugy hajxy jabom-jabom mio'owó_jät. Cujwa'xiä mabøjpädøjc-hajxy hänajty quiapxy hagriego. Cujwa'xiä hajxy hänajty quiapxy hahebreo. Ja'a hajxy hänajty capxpä hagriego, mänit hajxy tiägøøyy mänaambä coo yaamgto'oxy cay hu'ugy hajxy hänajty pedyii quia'a móoyänä, ja'a hajxy hänajty capxpä hagriego. Høxtä yajtsip yajma'adøøby hajxy hänajty ja'a yaamgto'oxycøxpä.

² Mänitä apóstoldøjc ja'a nämajmetspähajxy miänaa_ñ coo mabøjpädøjc hajxy nägøxiä yhamugó'øwät. Mänitä apóstoldøjc-hajxy miänaa_ñ:

—Mägu'ughajpädøjc, cab jaduh_n yhahixø'øy coo højtsä cay hu'ugy njaac yajwá'xät tehngahnä. Hix, cab højtsä Diosmädia'agy jaduh_n hoy ngapxwa'xa_nnä.

³ Paadiä, hahixøøby jaduh_n coo hajxy mniwyiimbiwó_jät näjuxtujc coo cay hu'ugy hajxy yajwá'xät. Jue'e hajxy mwiimbiwäp mädyii hoyhäna'c, mädyii Dioshespíritumøød, mädyii jajp najuøøby.

⁴ Y hõjts ja'a nämajmetspä, tehngahnä hõjtsä Dios nba'ya'axa'añ. Tehngahnä hõjtsä miädia'agy nyajnähixø'owaanä —nõmä apóstoldøjc-hajxy miänaañ.

⁵ Mänitä mabøjpädøjc-hajxy nägøxiä cojyquiapxy miähmøøyy pønjaty hajxy hänajty wyiimbiwaamby. Jue'e hajxy jaduhñ wiimbiiwä, ja'a Esteban, møødä Felipe, møødä Prócoro, møødä Nicanor, møødä Timón, møødä Parmenas, møødä Nicolás. Haa ja'a Esteban, hoyyä Diosmädia'agy hänajty jiaançh tehñ miäböcy. Miøødä Dioshespíritu hänajty je'e. Haa ja'a Nicolás, Antioquía hänajty chooñ. Coö hänajty tøø miøjjø'øyy, mänit jaduhñ tiägøøyy maa judíos quiuhdujthajxiän.

⁶ Mänitä näjuxtupähajxy jim wioonøcxä apóstolwiinduumhajxy. Coö näjuxtupähajxy jim miejch, mänit hajxy quiø'ønähgajpä ja'a apóstoldøjc. Mänitä apóstoldøjcä Dios hajxy pia'yaaxy coö näjuxtupä cuhdujt hajxy mio'owøøjät coö hajxy jaduhñ tiünät nebiä apóstoldøjc-hajxy hänajty tiuñän.

⁷ Tehngahnä Diosmädia'agy hänajty yhawa'xø'øyy. Mayøøbyñä ja'a mabøjpädøjc-hajxy hänajty tehngahnä jim Jerusalén. Mayyä teedywiindsønñhajxy hänajty miäbøjpä.

⁸ Haa ja'a Esteban, miøødä Diosmäjaa hänajty je'e. Dioswiinguexy hänajty jaduhñ. Mänit tiägøøyy pa'amyajnajxpä maa cu'ugän. Hoy-yagjuøøñä hänajty jaduhñ wyi'i tiuñ.

⁹ Mänitä judíos ja'a Esteban hajxy näje'e tiägøøyy yajcapxiøøbiä nebiatiä Esteban hänajty yajnähixø'øyy. Tøø hajxy hänajty yhity nebiä cudoogø'øybän. Pero tøø hajxy hänajty yhøxmäjtsänä. Jimä yhamdsoo tsajtøjc hajxy hänajty miøødä. Jäguembaady hajxy hänajty chooñ wiinghagajptjaty, møød jim Cirene, møød jim Cilicia-naaxooty, møød jim Asia-naaxooty.

¹⁰ Pero cab hajxy hänajty miäjäda'aga'añ je'eguiøxpä coö Esteban hänajty jiaançh tehñ jiaty mädia'ag. Hix, miøødä Esteban ja'a Dioswiinmahñdy hänajty nebiaty hänajty mio'oyii ja'a Dioshespíritäm.

¹¹ Mänitä judíoshajxy quiojyquiapxytiuuñ coö wiinghäna'c hajxy miäjúyät coö weenä Esteban ñähwaambedyii cooc tyijy ja'a Moisés hänajty haxøøg tøø ñänømyii møødä Dios.

¹² Coö Esteban jaduhñ ñähwaambejtä, mänitä cu'ughajxy hoyhoy jiootma'ty, møødä majtøjc-hajxy, møødä ley-yajnähixøøbiädøjc-hajxy. Mänitä Esteban yajmujcä. Mänit miajtsä. Mänit yajnøcxä maa teedywiindsønwiinduumhajxiän, maa junta hajxy hänajty yagjadyiijän.

¹³ Mänitä wiinghäna'c-hajxy yajmejtsä maa junta hänajty jiadyiijän. Mänitä Esteban tiägøøyyä ñähwaambéjtäbä:

—Tehngahnä yø'ø craa hädaa tsajtøjc haxøøg ñänømy maa Dios hajxy nwiingudsähgøøyyämän. Jaduhñä ley haxøøg ñänøømbä, ja'a Moisés jecy quiujähyyäbä.

¹⁴ Jaduhñ hõjts nmädooyy coö jäya'ayhajxy miänaambä cooc tyijy ja'a Jesús Nazaretpä hädaa tsajtøjc yajma'ada'añ, cooc tyijy ja'a cuhdujt ya-jtägatsa'añ, ja'a Moisés hajxy jecy xyajmänähgueegøøyyämbä —nõmä Esteban ñähwaambejtä.

¹⁵ Mänitä tuungmøødpä Esteban hajxy wyiinhee'ppejty, mäduhñtiä hajxy hänajty jim yhäña'ay maa junta hänajty jiadyiijän. Haamb tsämaambä Esteban wyiin jøjp hänajty quiähxø'øgy nebiä Diosmoonsä wyiin jøjphajxy quiähxø'øguiän, ja'a hajxy jim hijpä tsajpootyp.

7

¹ Mänitä teedywiindsønä Esteban miäyajtøøyy:

—Nej, jaançh tøyhajt jaduhñä nej miich yø'ø häna'c xñänømiän.

² Mänitā Esteban yhadsooy:

—Majtøjc, puhya'adiøjc, høøchā nmādia'agy hajxy huuc hamādoowhíjtāc. Ja'a Abraham hajxy jecy nhaphajt ndeedyhájtām. Jim hānajty chāna'ayñā Mesopotamia-naaxooty maa Caldeabā-jāya'ayhajxy hānajty chāna'ayān. Cahnā Abraham hānajty jim jibajnaxyñā maa naax hānajty xiøhatiān Harán. Mänitā Dios tsajpootypā jim ñāguehxtøø'xy maa Abraham wyiinduumān.

³ Mänitā Dios ja'a Abraham ñāmaayy: “Mdsóonāp yaa maa mnaax maa mgajptān. Mnāhgué'egābā mjujy mmāgu'ug. Jim mnøcxāt maačh miich nwoonøcxa'añān. Mänitøch miich jim nyajñāhixø'øwāt maa mdsānaadiaacpøgāt”, nømā Abraham jecy nāmaayyā.

⁴ Mänitā Abraham jim jiaañch tsohnñā Mesopotamia. Mänit jim ñøcxy tsānaadiaacpøjpā Harán-naaxooty. Pero cab jim jejcy yhiyty Harán-naaxooty. Coø Abraham tieedy yho'cy, mänit jim chóhngumbā. Mänitā Dios ja'a Abraham yaa wiomejch hādaa yaabā naax hādaa yaabā cajpt maa hajxy jāda'ahaty nhíjtām.

⁵ Pero cabā Dios ja'a Abraham cuhdujt ñā'ägā mooyy ni weeñtiā coø yaa chānaadiaacpøgāt. Jaduhnā Abraham cuhdujt ñā'a mooyyā coø yaa ñā'a hahídāt. Mänitā Dios ja'a Abraham yajwiinwaanøøyy coogā cuhdujt hānajty mio'owa'añ coø yhap yhoc-hajxy yaa chānaañāt coø Abraham hānajty tøø yho'ogy, hoyyā Abraham yhuung hānajty quia'a jagā jiiā mānaa jaduhn yajwiinwaanøøyyān.

⁶ Jaduhnā Dios jiaac mānaañ coogā Abraham yhap yhoc-hajxy hānajty wiingnaaxooty nøcxy yhadsāna'awa'añ, møød coog hajxy hānajty yhida'añ nebiā cudoogø'øybān mādaaxmāgo'xjumøjt, møød coog hajxy tsaačhtiuñ yhida'añ.

⁷ Mänitā Dios miānaāngumbā: “Coo miichā mhapā mhoc-hajxy hānajty tøø yagjaamduñ tøø yajtsaačhtiuñ, mánithøchā jāya'ay nyajcumādowa'añ, ja'a miichā mhapā mhoc hānajty tøø xjiaamduun tøø xchaačhtiuñābā. Mänitā mhapā mhoc-hajxy jim choona'añ. Mänit hajxy yaa myina'añ. Yaačh hajxy jaduhn xwyiingudsāhgø'øwa'añ.”

⁸ Coø Dios ja'a Abraham jaduhn yajmøødmādiaacy, yajcuhdujc hajxy jaduhn neby hajxy jaduhn miādiaaquiān. Mänitā Dios ja'a Abraham yhanehmy coø Abrahamhajxy yajcircuncidarhádāt, møødā yhuunghajxy, møødā yhapā yhoc-hajxy. Jaduhnā hijxtahnd miāhmøøyy coø Dios ja'a Abraham jaduhn miøødyajcuhdujcy. Paadiā, coø Abraham yhuung Isaac jiaañch miñ jiaañch cahy, cuductujxøø ja'a Abraham ja'a yhuung jiaañch circuncidarhajty. Y coø Isaac hānajty tøø miøjjø'øy, jaduhnā yhuung Jacob tiuumbā. Y ja'a Jacob, jaanā jaduhnā ñøøx miajc yajpanøcxpā, ja'a nāmajmetspā, ja'a højts jecy nhaphajt ndeedyhájtāmbā.

⁹ 'Jue'e Jacob yhuung hānajty tu'ug xiøhaty José. Coø José hānajty jiaañch tehm chogyii ja'a tiéediām, paadiā José yhajchhajxy jiootma'ty. Mänitā José jim quiudoogøøyyā Egipto-naaxooty. José yhajchhajxy jaduhn jatcøøyy. Pero tehngahnā Dios ja'a José hānajty cwieendāhaty.

¹⁰ Coø José hānajty hoyhoy tøø chaačhtiuñii, mänit yajñāhwaatsā ja'a Diósām. Mänitā José wiinmahñdy miooyyā. Mänitā Dios miānaañ coø José quiu-mayøøjāt ja'a Faraóngām, ja'a hānajty jim tuumbā gobiernā Egipto-naaxooty. Mänitā Faraón ja'a José wyiinguejxy coø José jim yhané'emāt māduhñtiā Egipto-naax, møød jimbaady maa Faraón tiøjcān.

¹¹ 'Mänitā yuuxøø hoyhoy jiajtā jim Egipto møød jim Canaán-naaxooty. Mänit højtsā nhapā ndeedyhajxy jiaañch tehm chaačhpøjcy ja'a yuugøxpā, coø cay hu'ugy hānajty jim quia'a hijñā.

¹² Pero coo Jacob jaduhñ miädoyhajty coo trigo hānajtj jīm yajpaady Egipto, mānitā ñøøx miajc jīm quiejxy trigojuubiä. Coo Jacob yhuunghajxy yhoöchohñ jayøbajt, cabä José choj høxcajpä ja'a yhājchām.

¹³ Coo hajxy miāmetsc-hoocpä yhoodiāgajch, mānitā José ñiñāgapxä. Mānit yhøxcájpānā. Mānitā Faraón ñajuøøñä coo José yhajchhajxy hānajtj je'e.

¹⁴ Mānitā José quiapxyñāguejxy coo tieedyhajxy jiiby ween miānacy Egipto, møødä jiuju miägu'ughajxy nāgøxiä. Jue'e hajxy hānajtj nāgøxiä, nādägøøghii'xcumajmocx.

¹⁵ Mānitā Jacobhajxy jiiby jiaančh hādaacnā Egipto møødä yhuunghajxy. Jiiby hajxy nāgøxiä yho'taacy, ja'a hajxy jecy nhaphajt ndeedyhājtmāmbä.

¹⁶ Cujequiä Jacob piajc-hajxy yagjødsohññāxäxä møødä José piajc. Jīmā piajc-hajxy yajnøcxäxä maa cajpt hānajtj xiøhatiän Siquem. Jīm hajxy hoy ñaaxtägøødiāgach maa Abraham ja'a naax hānajtj tøø jiuuyän. Ja'a Hamor yhuungä naax hajxy too'c.

¹⁷ Coo hānajtj yhabaadaannä coo Dios hānajtj yajtøjiada'añ nebiä Abraham hānajtj tøø yajwiinwaanø'øyijän, tøø højtsä nhaphājtmā ndeedyhājtmāhajxy hānajtj miayøøñä jīm Egipto.

¹⁸ Mānitā wiinggobiernä jīm tiägøøyy tuumbä Egipto-naaxooty. Cabä gobiernä miøjpādaacy nebiä José hānajtj tøø tiuñän.

¹⁹ Mānit højtsä nhaphājtmā ndeedyhājtmāhajxy wyiinhøhnä. Ja'a gobiernä jaduhñ mäwiinhøhn. Mānit hajxy jiaamduunä chaačhtiuunä. Mānit hajxy yhanehmā hadsip coo yhuung hajxy yhøxtsēenät yhøxcōnät, ja'a naammiñ ja'a naammechpä, coo hajxy jaduhñ ween yho'ogy.

²⁰ Mānitā Moisés myiiñguiahy. Yajxón jiaančh tehñ miaaxhuunghajty. Cabä Moisés yhøxtsehnä nebiä gobiernä hānajtj tøø jia hane'emiän. Yu'učhā Moisés yaghijtä tägøøgpō'o tøgooty.

²¹ Coo Moisés hānajtj hoy yu'učh quia'a hidaannä, mānitā gobiernä tio'oxyhuungä Moisés yohbiaaty. Mānit yajtsoocy nebiä hamdsoo huungän.

²² Coo Moisés miøjjøøyy, mānitā cuhdujt cøxiä yajwiinhixøøyyä nebiä egipcioshajxy hānajtj quiuhdujthatiän. Jaančh tehñ jiajp jaduhñ piädsøømy. Jaančh tehñ yajxón hānajtj quiapxy miädia'agy nebiä jajp nebiä najuøøbiän. Jaančh tehñ yhoj hānajtj miähane'emy.

²³ Coo Moisés jiumøjt juxychāgui'x yhabejty, mānit wyiinmaadiaacy coo ja'a miägunaax nøcxy quiuhixa'añ.

²⁴ Jīmā Moisés ja'a miägunaax hānajtj tu'ug chaačhtiuñii ja'a egipcio-jäyá'ayäm. Coo Moisés jaduhñ yhiixy, mānitā miägunaax ñāwaañ. Mānitā egipcio-jäyā'ay yagho'cy, ja'a hānajtj mäsaačhtiuumbä.

²⁵ Paadiä Moisés jaduhñ jiatcøøyy, jaduhñ hānajtj tiajy miay coo miägunaaxhajxy hānajtj tøø miäbøcy coo Moisés hānajtj tøø wyiinguexyii ja'a Diósäm coo miägunaax jaduhñ yajnähwá'adsät. Pero cab hajxy jaduhñ ñä'a mabøjcy.

²⁶ Cujaboom, jīmā israelitahajxy hānajtj nāmetsc ñiguioxyii. Coo Moisés jaduhñ yhiixy, mānit jia mānaañ coo hajxy ñiyhøxmadsøøjät. Mānit miānaañ: “Mägu'ughajpādøjc, jue'e mijts jaduhñ, mdu'ugcunaax mijts jaduhñ. Cab jaduhñ yhahixø'øy coo hajxy jaduhñ mniguioxøøjät.”

²⁷ Mānitā Moisés yhøxjahmā tu'jäyā'ay, ja'a hānajtj mājāda'agaambä. Mānitā Moisés ñāmaayyā: “Pøñ miich tøø xpiāda'agy coo højts miich xyhané'emät.

²⁸ Nej, jaduhñ miich mdaj mmaabiä coo ch miich xyagho'ogaambä nej miichä egipcio-jäyā'ay häxøøyy myagho'quiän.”

²⁹ Coo Moisés jaduhñ miädooyy, mānit piäyø'cy. Mānit jīm ñøcxy jäguem maa naax hānajtj xiøhatiän Madiän. Mānit jīm tiägøøyy hadsänaabiä. Mānitä jäyā'ay

wyiingpøjcy. Mänitä huung hajxy metsc piaaty.

³⁰ 'Coo Moisés hänajty jim tøø yhiñä Madián juxychägui'xjumøjt, mänit jim tiägøøyy wädijpä pactuum, jim mädøyyä maa ja'a tun hänajty xiøhatiän Sinaí. Mänitä Moisés yhiñxy coo ja'a wädsats hänajty tioy. Mänitä Diosmoonsä tu'ug ñäguehxtøø'xy jøønhaajiooty. Tsajpootyp hänajty tøø chooñ.

³¹ Coo ja'a Moisés jaduñ yhiñxy, mänit jaduñ jiaanč tehñ yagjuøøyy. Mänitä Dios ja'a Moisés ñämaayy:

³² “Høøch Dioshajp. Høøchä Abrahamhajxy jecy xwyiingudsähgøøyy, møødä Isaac, møødä Jacob, ja'a miich jecy mhaphajt mdeedyhajtäbä.” Mänitä Moisés tiägøøyy tsäyuubiä. Jaanč tehñ chähgøøby hänajty jaduñ. Cab hänajty jim ñä'ägä møjheeba'añ maa hänajty miägapxyiñ.

³³ Mänitä Moisés ñämäayyägumbä: “Jeñ yø'ø mgø'øg. Høøch nwiinduum miich yaa mdäna'ay.

³⁴ Tøøch nhixy coöchä ngu'ughajxy jim jiaanč tehñ chaačhpøcy Egipto-naaxooty. Tøøch nmädoy coo hajxy wyi'i jioøyy wyi'i xiuuuch. Päädyhöch yaa tøø ngäda'agy hädaa yaabä naaxwiin, ja'a ngü'ughöch nyajñahwa'ads nyajcuhwa'adsaamby. Miich jim nguexaamby Egipto yajñahwaatspä”, nømä Dios miänaañ.

³⁵ Mänitä Esteban jiaac mädiaacy:

—Tøø ja'a Moisés ja'a miädia'agy hänajty quia'a mabøjcäxä. Ja'a yhamdsoo miägunaaxhajxy hänajty tøø quia'a mabøcy. Mänit hajxy miänaañ: “Pøn miich tøø xwyiinguexy coo mmøjhädät, coo mmähané'emät.” Hoyyä Moisés hänajty jaduñ tøø jia näma'ayii, mänitä Dios ja'a Moisés wyiinguejxy wiindsønñajpä maa ja'a quiu'ugän, coo hajxy jaduñ ñähwa'ads quiuhwá'adsät. Ja'a Diosmoonsä ja'a Moisés jaduñ najtsapxøøyyä, ja'a hänajty tøø ñäguehxtøø'xiäbä maa ja'a wädsats hänajty tioyyän.

³⁶ Mänitä Moisés ja'a hoy-yagjuøøñäjatypä may yajcähxø'cy jim Egipto-naaxooty. Mänitä miägunaax jim hoy wioobädsømy. Majatiä Moisés hajxy hänajty wiädity, yajcähxø'piä Moisés ja'a hoy-yagjuøøñäjatypä hänajty, møød jim maa ja'a Tsaptsmejiñ, møød jim pactuum. Juxychägui'xjumøjt hajxy jim wiädipty pactuum.

³⁷ Mänitä Moisés ja'a miägunaax ñämaayy: “Nébiøchä Dios tøø xwyiinguexiän coo mijts nyajñahwá'adsät, jaanä jaduñä Dios wiinghäna'c wyiinguexaambä, ja'a jaac miimbä ja'a jaac cahbä. Mijtsä mmägunaax jaduñ pädsømaamb. Naxiä miädia'agy hajxy mdehm quiudiúunät waambaty hänajty miäna'ana'añ”, nømä Moisés jecy miänaañ.

³⁸ Hanäguipxiä Moisés ja'a miägunaax jim miøødwädipty pactuum, ja'a højts nhaphajt ndeedyhajtäm. Coo hajxy jim miejch maa ja'a tun hänajty xiøhatiän Sinaí, mänitä Diosmoonsä ja'a Moisés jim tu'ug miägapxy, ja'a hänajty jim tsohmä tsajpootyp. Mänitä Moisés ja'a Diosmädia'agy ñajtsapxøøyyä. Paady jaduñ ñajtsapxøøyyä, coo højts jaduñ xyajmännähgueegøøyyämät. Ja'a Diosmädia'agy, cab jaduñ mänaaxøø quiuhdägoyya'añ.

³⁹ 'Pero cabä Moisés ja'a miädia'agy hänajty yajtunáanäxä. Ja'a højts nhaphajt ndeedyhajtäm hajxy hänajty ca'a cudiunaamb. Jaduñä jioot hajxy hänajty tøø piäda'agy coo hajxy hänajty wyiimbida'añ, coo hajxy hänajty jim ñøcxtägatsa'añ Egipto.

⁴⁰ Jimä Moisés ja'a piuhya'ay hänajty tu'ug xiøhaty Aarón. Coo ja'a Moisés hänajty tøø ñøcxy tunmøjc, mänitä cu'ugä Aarón hajxy ñämaayy: “Huuc tunä mayhajt, højtsä saandä mejtstägøøg hädiúunäc, jaduñ højts nwiingudsähgøøwät. Je'e højts jaduñ xwyiinwówäp. Ja'a Moisés, ja'a højts

tøø xwioobädsøømämbä jim Egipto-naaxooty, cab jaduhñ yajnajusø'oy neby jaduhñ tøø jiaty tøø yhabety", nømä Aaron ñämaayyä.

⁴¹ Mänitä saandä hajxy yhädiuñ wajhuunghahädiuñnaxy. Mänitä saandä hajxy tiägøøyy wiingudsähgøøbiä. Mänitä animal hajxy tiägøøyy yojxpä ja'a saandäcøxpä. Mänitä saandä hajxy wyiinxoonäacy, ja'a hajxy hänajty hamdsoo tøø yhädiuñäbä.

⁴² Mänitä Dios ja'a tsaangu'ug piuhwaatsnä. Mänit ñähgueecnä, je'eguiøxpä coo ja'a xøø hajxy hänajty tøø tiägø'oy wiingudsähgøøbiä møødä po'o møødä madsa'a. Hix, jaduhñ jim myiñ cujaay maa ja'a profeta jecy quiujahyyän:

Mijts Israelpäjäya'ay,

mänaa hajxy jecy mwädiän pactuum juxychägui'xjumøjt,

ca'a yhøøhcøxpä ja'a animal hajxy mwi'i yojxy,

ca'a yhøøchä mijts xwyiingudsähgøøyy.

⁴³ Caj pues, ca'a yhøøchä.

Je'e hajxy mwiingudsähgøøyy ja'a saandä hänajty xøhajpä Moloc.

Je'e chajtøjc-hahädiuñnaxy hajxy mmädajnajxä, møødä saandä Renfán ja'a miadsa'ahahädiuñnaxy.

Hamdsoohaambiä saandä hajxy mhädiuñ neby hajxy jaduhñ mwiingudsähgø'owät.

Coo hajxy jaduhñ mjatcø'oy, paady mijts nhøxquejxpädsøma'añ maa ja'a mhamdsoo naaxhajxiän.

Jäguem mijts nguexa'añ Babilonia-nänaxy.

Jaduhñ jim myiñ cujaay maa ja'a Diosmädia'aguiän.

⁴⁴ Hoorä, mänaa højts nhaphajt ndeedyhajtämhajxy jecy wiädiän pactuum, carpa-tøbia'cä Dios hajxy hänajty wyiingudsähgø'oy. Tsajtøjcä carpa-tøy hajxy hänajty wia'añ. Hoy ñä'a majatiä carpa hajxy hänajty ñä'a tøy. Jaduhñä carpa-tøy hajxy yhädiuñ nebiä Dios ja'a Moisés ja'a hijxtahñd jecy yaghijxiän coo jaduhñ piahädiünät.

⁴⁵ Ja'a nhaphajt ja'a ndeedyhajtämhajxy, ja'a hajxy jaac pühwäbä jaac hí'cäbä, tehñgahnä cuhdujt hajxy hänajty jiaac panøcxy coo ja'a Dios hajxy hänajty wyiingudsähgø'oy carpa-tøbia'c. Jaduhñ hajxy hänajty jiaac paduññä mänaa ja'a Josué hajxy jim wioonøcxyiijän wiinghagajpt maa ja'a wiingjäya'ayhajxy hänajty chäna'ayän. Coo ja'a nhaphajt ja'a ndeedyhajtämä naax hajxy ñädägøøyy tsiptuumbä, ja'a Dioscøxpä hajxy miäjädaacy. Ja'a miädsiphajxy, cøjxä ñäax hajxy yhøxpäyø'ogy. Y coo ja'a David cujecy tiägøøyy gobiernähajpä, je'enä ja'a nhaphajt ja'a ndeedyhajtämä cuhdujt hajxy hänajty jiaac paduñ coo ja'a Dios hajxy hänajty wyiingudsähgø'oy carpa-tøbia'c, ja'a hajxy hänajty tøø jiaac tehñ piú'uyäbä, ja'a hajxy hänajty tøø jiaac tehñ yhi'iguiäbä.

⁴⁶ Ja'a David, jaanç tehñ quiumaabiädsøøm jaaya'ay maa ja'a Diosän. Mänitä David ja'a Dios cuhdujt miäyujwaañ coo ja'a tsajtøjc yhädiünät maa ja'a Jacob yhap yhoc ja'a Dios hajxy jaduhñ pia'yá'axät.

⁴⁷ Ca'a Diavitä ja'a tsajtøjc hädiuñ ja'a Dioscøxpä. Ja'a David ja'a yhuung Salomón, je'edsä tsajtøjc jaanç hädiuñ.

⁴⁸ Pero ja'a Dios tsajpootypä, cab jaduhñ tiehm yhity tsajtøgooty, ja'a jäya'ayhajxy yhädiuñbiä. Jaduhñä profeta tu'ug jecy quiujahy coogä Dios miänaañ:

⁴⁹ Høøch Dioshajp. Yaaç nhäña'ay tsajpootyp.

Yaaç nmähane'emy. Jiiby naaxwiin, jiibyhøchä ndecy nyaghity.

Cábøchä tøjc nyajmaajiaty maach nbóo'xät. Cab jaduhñ yhahixø'oy coo mijtsä tøjc xquiójjät.

Tiichä tøjc jaduhñ nnä'ä wá'anät.

⁵⁰ Haa ca'a, hөөч cөxiä tөө nhuuc hädiuumbä mäduhñtiä yaa tsajpootypä mөөd jiihy naaxwiin, nөmä Dios miänaañ.

⁵¹ Mänitä Esteban jiaac miänaañ:

—Ja'a mijtsä mhapä mdeedyhajxy ja'a jecypiä haampiä, jaančh tehñ quiuhxex hajxy hijty, nebiä Diosmädia'agy hajxy ca'a mähөjpän. Jaanä jaduhñ mijtspä, caj mijtsä Diosmädia'agy mmäbөgaambä. Hөxtä Diosh-espíritupaady hajxy jaduhñ homiänaajä mmädsiphaty.

⁵² Ja'a mijtsä mhapä mdeedyhajxy ja'a jecypiä haampiä, quiөxy jaamduun quiөxy tsaächtiun ja'a profetadөjc hajxy jecy, ja'a Dios hänajty tөө wyiin-guexiäbä coo ja'a mädia'agy hajxy yajwá'xät coogä Dios ja'a yHuung hänajty yaa quiexa'añ hädaa yaabä naaxwiin, ja'a pojpä cädieey ca'a mөөdpä. Hөxtä yagho'cä ja'a profetadөjc-hajxy jaduhñ. Y coo ja'a Dios yHuung yaa jiaančh cädaacy, mänit mijts mgө'өyejcy coo yagho'ogөjät.

⁵³ Coo ja'a Dios ja'a Moisés cuhdujt jecy miooyy, ja'a Diosmoonsä ja'a Moisés najtsapxөөyyä, ja'a jim tsohmä tsajpootyp, mänit mijtsä mhapä mdeedy ja'a cuhdujt hajxy jaduhñ mioodiägajtsä. Hoyyä Diosmoonsä ja'a cuhdujt hajxy jia yejcy, cab hajxy jaduhñ mgudiuñ —nөmä Esteban miädiaacpädөөyy.

⁵⁴ Coo ja'a teedywiindsөñhajxy jaduhñ miädooyy nebiä Esteban hänajty miädia'aguiän, mänitä Esteban hajxy jaduhñ jiaančh tehñ miäjootma'ty. Hөxtä tөөtscadajp hajxy hänajty.

⁵⁵ Pero cabä Esteban jaduhñ ñä'ä möjpädaacy. Hix, miөөdhajpiä Esteban ja'a Dioshespíritu hänajty. Mänitä Esteban yuughee'py tsajpootyp. Mänit jaduhñ yhiyxy coo jim jiaančh tehñ yajxonä maa ja'a Dios yhäña'ayän. Mänitä Jesús jaduhñ yhiyxäbä coo jim yhäñaabiä maa ja'a Dios ñähmөjcän yhahooyhaamby.

⁵⁶ Mänitä Esteban miänaañ:

—Huug hix hajxy. Jaduhñhөчhä tsajt nhixy nebiä hawa'adspän. Ximä Jesucristo yhäña'ay Diosnähmөjc maa yhahooyhaampiän.

⁵⁷ Mäduhñtiä jäya'ayhajxy hänajty yhamädoowhity, mänit hajxy ñidiaatsmo'xä; haa ca'a, cab hajxy hänajty tehñgahnä miädowaannä nebiatiä Esteban hänajty miädia'agy. Mänit hajxy tiägөөyy yaaxpä jojpä mөcjaty. Mänitä Esteban yajmujcä.

⁵⁸ Mänit yajnөcxä cajtpa'a hadsip. Ja'a häna'cä Esteban hajxy hänajty tөө ñähwaambétiäbä, mänitä jiocxwit hajxy nägөxiä yhөxchijy. Jimä hөxcujc-häna'c hänajty tu'ug piädäna'ay, ja'a hänajty xөhajpä Saulo. Mänitä Saulo ñämaayyä coo ja'a jiocxwithajxy cwieendähajtäxät. Mänitä Esteban tiägөөyyä ca'adshö'cäbä.

⁵⁹ Jimä Esteban hänajty quia'adsho'ogyii, mänit tiägөөyy Diospa'yaaxpä. Mänit miänaañ:

—Wiindsөñ Jesús, tunä mayhajt, hөөч njuөhñdy jim wiingpөjcäc tsajpootyp.

⁶⁰ Mänitä Esteban jyijcädaacy. Mänit mөc yaaxy:

—Dios, ca'a jaduhñ mmөjpäda'agy nébiөch yө'ө häna'c xchaaächtiunän, hoy jia möjpoj jia möjcädieeyä.

Coo ja'a Esteban jaduhñ jiaac tehñ quiapxy, mänit yho'nä.

8

¹ Y ja'a Saulo, quiumaayy je'eduhñ coo ja'a Esteban yagho'cä.

Ja'a mänitxөөbä ja'a mähөjpädөjc-hajxy tiägөөyyä jaamduun tsaächtiunäbä jim Jerusalén. Mänit hajxy xii yaa ñөcxөөyy. Näje'e hajxy

miähmøøyy Judea-naaxooty wiinduhmyhagajpt. Näje'e hajxy ñøcxøøbiä Samaria-naaxooty. Jagooyyä ja'a apóstolädøjc-hajxy jim jiaac mähmøøyy Jerusalén.

² Mänitä dijuuntä Esteban hoy yajnaaxtägø'øyyi. Näje'e jäya'ayhajxy hoy miäyajnaaxtägø'øyy, pønjetiä hojiot hänajty møød. Hoyhoyyä Esteban ñäjøøyy ñäxuu'tsä.

³ Y ja'a Saulo, tehngahnä ja'a mäbøjpädøjc hänajty jiaamduñ chaaçhtiuñ wiinduhmyhagajpt. Høxtä jäya'adiøgootypaadiä Saulo hänajty tiägø'øyy. Pønjaty hänajty yajpaatp tiøgooty, mänit hajxy hänajty yhøxwich yhøxwooñii, ja'a ya'adiøjc ja'a to'oxiøjc.

⁴ Y ja'a mäbøjpädøjc-hajxy, ja'a hajxy hänajty tøø chøoñäbä Jerusalén, je'enä ja'a Diosmädia'agy hajxy hänajty tehngahnä yajwa'xy ja'a Jesúscøxpä, majaty hajxy hänajty wiädity.

⁵ Høxtähmdsä craa Felipehajpä, coo jim chohñ Jerusalén, mänit jim ñøcxy Samaria-cajptooty. Coo jim miejch, mänit jaduhñ tiägøøyy mädiaacpä ja'a Jesúscøxpä, coo hänajty je'e Dyiosquexiä.

⁶ Mayyä jäya'ayhajxy hänajty yhamugø'øyy mädia'agyhamädoowhijpä waambatiä Felipe hänajty miäna'añ. Madiu'u ja'a Felipe hoy-yagjuøøñäjatypä hänajty yajcähxø'øgy, paadiä miädia'agy hänajty jiaanç tehñ yhamädoowhijtäxä.

⁷ Pønjetiä haxøøgpä ca'a hoybä hänajty møød, mänit hajxy nämay pia'amnajxy. Yáaxäp jójcäbä haxøøgpä ca'a hoybähajxy hänajty piädsømy. Jaduhñä cø'ømucypiä tecymiucypiähajxy hänajty miøcpøjpä møødä tecymia'adpähajxy.

⁸ Paadiä cu'ughajxy hänajty jiaanç tehñ xioonda'agy jim Samaria.

⁹⁻¹¹ Jimä jäya'ay hänajty tu'ug xiøhaty Simón. Tøø ja'a magia-wiinmahñdy hänajty jejcy tiuñ jim Samaria. Tøø ja'a Simón ja'a jäya'ay hänajty jim may jiaanç tehñ wyiinhøøñ. Jaduhñä Simón hänajty ñiñänømyii cooc tyijy jiaanç tehñ miøj jiaanç tehñ jiaançä, je'eguiøxpä cooc tyijy ja'a magia hänajty jiaanç tehñ jiaty. Madiu'u ja'a Simón ja'a hoy-yagjuøøñäjatypä hänajty jiaanç tehñ yajcähxø'øgy, paadiä miädia'agy hänajty jiaanç tehñ miäbøjcäxä nägøxiä høxtä ja'a møjtøjcpaady:

—Yø'ø Simón, jue'eda'a yø'ø, Dioswiinguexiäda'a yø'ø, paadiä møcmäjaa jaduhñ jiaanç tehñ miøødä.

Jaduhñä Simón hänajty ñänømyii ja'a cú'ugäm.

¹² Jaduhñä Felipe hänajty yajnähixø'øyy coogä Dios yhane'emy ja'a miøcmäjaahaam, møød coogä Jesús Dyioswiinguexiä. Mänitä jäya'ayhajxy may miäbøjcy näya'ay nädo'oxy. Mänit hajxy nägøxiä hoy ñäbety.

¹³ Y ja'a Simón, miäbøjc je'eduhmbä. Mänit hoy pianäbejpä. Mänitä Simón ja'a Felipe tiägøøyy møødwädijpä. Yagjuøøbiä Simón hänajty nebiä Felipe ja'a hoy-yagjuøøñäbä hänajty yajcähxø'øguiän.

¹⁴ Y ja'a apóstoldøjc-hajxy, ja'a hajxy hänajty tøø miähmø'øyabä Jerusalén. Mänit hajxy miädoyhajty coogä cu'ug ja'a Diosmädia'agy hajxy hänajty tøø jiojpøgø'øyy jim Samaria. Mänitä Pedrohajxy jim quiejxä møødä Juan.

¹⁵ Coo hajxy jim miejch Samaria, mänit hajxy tiägøøyy Diospa'yaaxpä ja'a mäbøjpädøjcøxpähajxy, weenä Dioshespíritu hajxy nägøxiä yhadägø'øyy jioottägø'øyyi.

¹⁶ Hix, cahnä Dioshespíritu hänajty pøn yhadägø'øyy jioottägø'øyyi. Tøø hajxy hänajty jia näbety ja'a Jesúscøxpä. Cahnä hajxy hänajty miädoyhatyñä ja'a Dioshespíritucøxpä.

17 Coo ja'a Pedrohajxy Dyiospa'yaaxpādøøyy møødä Juan, mänitä mabøjpādøjc-hajxy quiø'ønähxajjä. Mänit hajxy yhadägøøyy jioottägøøyyä ja'a Dioshespíritäm.

18 Y ja'a Simón, coo jaduhñ yhijsy, mänitä Pedro xädø'øñ hajxy jia ya-jmähawaanøøyyä.

19 Mänitä Simón miänaañ:

—Høøch yø'ø mājaa jaduhmbä yaghabójcäc. Hix, cooch pøn jaduhñ ngø'ønähxájät, tehñ jiaduhñ je'e yhadägøøyy jioottägøøyyäbät ja'a Diosh-espíritäm.

20 Mänitä Pedro yhadsooyy:

—Coo miich jaduhñ mwi'i tiajy mwi'i miay coo højts miich ja'a Diosmājaa nyaghabógät juyhaam, paady miichä Dios xyajcuhdägoyya'añ møødä mxädø'øñ. Hix, ñä'a yeipiä Dios jaa miājaa jaduhñ, caj pøn yajmādoogy.

21 Caj miich cuhdujt mnä'ägädä møødä coo højts miich ja'a Diostuung xmiøødtúnät, je'eguiøxpä coo miichä mwiinmahñdy quia'a nä'ägädä hoyyā ja'a Dioscøxpä.

22 Najtshixø'ow ja'a mhaxøøgwijnmahñdy jaduhñ. Jímädä Dios xñä'a mämée'xät coo mmānuu'xtá'agät.

23 Tøøch miich nhøxcapy coo miichä mhaa mjoot jiaanç tehñ yhaxøøgä, møød coo miich haxøøg mjaanç tehñ tiajy mjaanç tehñ miay mjoodooty mgopcooty.

24 Mänitä Simón yhadsooyy:

—Huuc tunä mayhajt hajxy, huuc Diospa'ya'ax hajxy ja'a høøchcøxpä, jaduhñhøchä Dios xquia'a yajcumädówät nébiøch hajxy tøø xyajmøødmädia'aguiän —nømä Simón miänaañ.

25 Jímä Pedrohajxy hānajtj jiaac capxy jiaac mädia'agy ja'a Jesúsøxpä møødä Juan, nebiaty hajxy hānajtj tøø yhamdsoo yajnähixø'øyii ja'a Jesúsäm. Mänit hajxy wyiimbijnä, mänit hajxy jím ñøcxtägajch Jerusalén nāguipxy møødä Felipe. Tu'haamnøcxpä, nøødānāyyāp tu'udānāyyāp hajxy hānajtj ñøcxy. Majatiä cajpthuung jím Samaria-naaxooty, jaduhñä Diosmädia'agy hajxy hānajtj yajwa'xy nebiä cu'ugä piojpä quiädieeybä ñāhwa'ads quiuhwá'adsät.

26 Coo hajxy jím quioo'ty Jerusalén, mänitä Felipe ja'a Diosmóonsäm tu'ug ñāmaayyā, ja'a jím tsohm̄bä tsajpootyp:

—Nøcxø'ow jím jøømboj mānājpä. Ja'a møjtu'u mbanócxäp, ja'a jím nøcxpä maa ja'a cajpt jaduhñ xiøhatiän Gaza.

Ja'a møjtu'u jaduhmbä, pactuum jaduhñ ñøcxø'øyy.

27-28 Mänitä Felipe jiaanç tu'ubøjcy. Ja'a tu'haamnøcxpä, mänitä Felipe ja'a jāya'ay tu'ug piaaty, ja'a hānajtj tsohm̄bä Etiopía. Tøø jaaya'ay hānajtj yhoj Jerusalén Dioswiingudsähgøøbiä. Quiajptooty hānajtj ñøcxnā. Eunuco je'e. Møjtuung hānajtj jím miøød maa ja'a ñaax maa ja'a quia-jptän. Xädø'øñgwieendāhajpā hānajtj jím tiuumby. Ja'a reina mioonsä hānajtj je'eduhñ, ja'a hānajtj jím mähanehm̄bä Etiopía. Carretajooty jaaya'ay hānajtj ñøcxy nocyhée'päp. Jue'e hānajtj quiapxyp, ja'a nocy ja'a Isaías jecy quiujähyyäbä, ja'a jecy túunäbä profeta.

29 Mänitä Felipe ñāmaayyā ja'a Dioshespíritäm coo jím miøjwá'agät car-retawiinduum.

30 Coo ja'a Felipe jím jiaanç møjwa'cy carretawiinduum, mänitä Felipe miädooyy coo ja'a Etiopíabä jāya'ay ja'a nocy hānajtj quiapxy, ja'a Isaías jecy quiujähyyäbä. Mänitä Felipe jaaya'ay miäyajtøøyy:

—Nej, mwiinjuøøby miich jaduhñä nebiaty mgapxiän.

31 Mänitä jaaya'ay yhadsooyy:

—Cábøch nwiinjuø'øy. Cábøch pøn nmøødä pønhoch jaduhñ xquiapxtøwäp. Mänitä Felipe ñämaayyä coo jim piédät carretajooty, coo jim yhøxtá'agät maa ja'a Etiopíabä jäya'ay ñähmøjcän.

³² Jaduhñä jaaya'ay hānajt̃y quiapxy:
Hadsipä mähdiøjc yajnøcxä maa ja'a yagho'taactän, jaduhñ nebiä meeg yajnøcxyijän maa ja'a yagho'taactän.

Cabä mähdiøjc waamb ñä'ägädä capxy;
jaduhñ hamoñ yhipty nebiä meeg hamoñ yhitiän coo ñähme'xyii.

³³ Hočhähdiuunnä ja'a mähdiøjc yagho'cä.

Cab jaduhñ pøn ñähgapxtuuty.

Cabä ñøøxä miajc miøødhajty; hix, tøø ja'a jiugyhajt hānajt̃y yaa quiøjxnä hädaa yaabä naaxwiin.

³⁴ Mänitä Felipe ñämaayyä:

—Tunä mayhajt, høøch huuc hawáanäc, coo ja'a Isaías jaduhñ jecy quiu-jahy, pøn jaduhñ miädiaac, wiingjäya'ay tøgä je'eguiøxpä —nømä Etiopíabä jäya'ay yajtøyy.

³⁵ Mänitä Felipe tiägøøyy capxtøøbä waambaty hānajt̃y jaduhñ miädia'agytiägø'øy. Mänit miädiaacy ja'a Jesúscøxpä, coo hajxy hoy xñähho'túutäm.

³⁶ Weeñtiä hajxy jaduhñ jiaac yohy carretajooty, mänitä nøø hajxy piaaty. Mänitä Etiopíabä jäya'ay miänaañ:

—Xii nøø. Nej, cab jaduhñ yhahixø'øyä coöch nnäbétädä.

³⁷ Mänitä Felipe yhadsooyy:

—Hahixøøby jaduhñ pø tøyhajt jaduhñ mmäbøcy hamuumdu'joot.

Mänitä Felipe yhadsoowä:

—Nmäbøjpjoch jaduhñ coo ja'a Jesucristo Dyioshuungä.

³⁸ Mänitä Etiopíabä jäya'ay ja'a carreta yajyajtānaaxiøjpä. Mänitä Felipehajxy nämetsc quiarretamānajt̃y, møødä Etiopíabä jäya'ay. Mänit hajxy nämetsc ñøødgøøyy. Mänitä Etiopíabä jäya'ay ñäbejty.

³⁹ Coo hajxy ñøøbädsøømgumbä, mänitä Felipe wiingtuum yajnøcxä ja'a Dioshespíritäm. Cabä Felipe yhixtägátsänä ja'a Etiopíabä jäya'ayäm. Xoonäacäp ja'a Etiopíabä jäya'ay ñøcxnä.

⁴⁰ Y ja'a Felipe, mänit jim miejch maa ja'a cajpt hānajt̃y xiøhatiän Azoto. Mänit tiägøøyy wädijpä cajpt-cajpt. Yajwa'xypä Felipe ja'a Diosmädia'agy hānajt̃y nebiä cu'ugä piojpä quiädieeybä ñähwa'ads quiuhwá'adsät. Mänit jim miejch Cesarea.

9

¹ Y ja'a Saulo, tehngahnä ja'a mähøjpädøjc hānajt̃y yhadsähgø'øy yhajuø'øy coo hajxy hānajt̃y yagho'oga'añii, pønajt̃y hānajt̃y mähøjp ja'a Jesúscøxpä. Coo ja'a Saulo hānajt̃y jaduhñ tehngahnä jia wi'i miähadsähgø'øwa'añ, paady jim ñøcxy maa ja'a teedywiindsønän.

² Mänitä Saulo cuhdujt miooyyä nocyhaam coo jim ñøcxät Damasco, coo ja'a mähøjpädøjc-hajxy jim yhøxta'awøøjät wiinduhmčhajtøjc, majatiä judíoshajxy hānajt̃y yhamugø'øyän. Jaduhñä Saulo hānajt̃y tiajy miay coo ja'a mähøjpädøjc-hajxy hānajt̃y jim nøcxy chuma'añii Jerusalén, ya'adiøjcä tio'oxiøjcä.

³ Mänitä Saulohajxy tiu'ubøjcy møødä jiamioød nämetsc nädägøøg. Ja ween hajxy hānajt̃y jim quia'a mech Damasco, mänitä Saulo jøøn møc quiuhja-jcädaacä wäditiä. Tsajpootypä jøøn chohñdaacy.

⁴ Mänitä Saulo quiädaayy. Mänit miädooyy coo jäya'ay hānajt̃y tu'ug quiapxy:
—Saulo, Saulo, tiich miich jaduhñ coo xwyi'i miädsibø'øy.

⁵ Mänitä Saulo yajtøøyy:

—Wiindsón, pøn miich jaduhñ.

Mänit yhadsoowä:

—Jesúshøch høøch. Høøch miich jaduhñ xwyi'i miädsibøøby. Cooch miich jaduhñ xwyi'i miädsibøøy, hamdsoo miich jaduhñ mniçhaačhtiuñii.

⁶ Tsähgøøyy tsäyúuyyäbä Saulo yajtøøgumbä:

—Wiindsón, neby yhäxøø'y njatcø'øwädøch.

Mänit yhadsoowägumbä:

—Pädø'øg, nøcx cajptooty. Jim häna'c xyhawáanät nej mjatcø'øwät.

⁷ Y ja'a Saulo jiamiøødhajxy, coo hajxy jaduhñ miädooyy nebiatiä Saulo hänajty tøø miägapxyijän, jaanč tehñ chähgøøyy hajxy jaduhñ. Hix, cab hajxy pøn yhiixy. Høxtä hahuum høxtä hawiinds hajxy miähmøøyy.

⁸ Mänitä Saulo jiaanč tänaayø'cy. Coo jaduhñ jia wiindøø'xy, cab jaduhñ tii yhiixy. Hix, tøø hänajty wyiinxooč. Coo hajxy jaduhñ tiu'ubøjtägajch, wichhaamä Saulo jim yajmejtsä Damasco.

⁹ Tägøøgxøø ja'a Saulo jim yhiixy wiinxoods Damasco. Ni quia'a cay ni quia'a hu'ugy hänajty tii.

¹⁰ Jimä jäya'ay hänajty tu'ug chäna'ay Damasco, ja'a hänajty xøhajpä Ananías. Tøø ja'a Diosmädia'agy hänajty miäböcy. Mänitä Ananías ja'a Jesús wyiinhijxy haguma'ayhaam. Mänitä Ananías miägäpxä:

—Ananías.

Mänit yhadsooyy:

—Wiindsón, chaač høøch, tisän.

¹¹ Mänitä Jesús miänaañ:

—Pädø'øg. Nøcx jim maa ja'a møjtu'u jaduhñ xiøhatiän Tødiu'u. Jimä jäya'ay tu'ug chäna'ay, ja'a xøhajpä Judas. Jimä craa tu'ug yhähity, ja'a xøhajpä Saulo. Jim je'e choon maa ja'a cajpt xiøhatiän Tarso. Diospa'yaaxp jim jadunajtä maa ja'a Judas tiøjcän. Coo jim mmédsät, mänitä Saulo myajtøwät.

¹² Tøø miichä Saulo xwyiinhixy haguma'ayhaam coo miich hoy mnähdoñ, jaduhñ yhiixtägätsät.

¹³ Coo ja'a Ananías jaduhñ miädooyy, mänit miänaañ:

—Wiindsón, tøøch jaduhñ mayhooc nmädoyhaty nebiä craa Saulo naxy jiatcøø'y jim Jerusalén. Náxiägä mabøjpädøjc-hajxy jim jiaamduñ chaačhtiuñii, ja'a miichä mmädia'agy hajxy xmiäböjcäbä.

¹⁴ Jaduhñhøch tøø nmädoyhajpä coogä cuhdujt jim miooyyä coo ja'a mabøjpädøjc-hajxy yaabä yajnøcxøøjät jim Jerusalén, coo hajxy jim chúumäbät, pønjaty miich jaduhñ yaa xquiapxpaatp. Ja'a teedywiindsønä cuhdujt hajxy jaduhñ yejc. Hoorä, tøø ja'a Saulo yaa miejtsnä Damasco —nømä Ananías miänaañ.

¹⁵ Mänitä Jesús ja'a Ananías ñämäaguiumbä:

—Tsógäm, nøcx cudiún nébiøch miich tøø nhane'emiän. Tøøchä Saulo nya-jnähdiij coo miädiä'agät ja'a høøchcøxpä jim maa ja'a israelitahajxiän, møød jim maa ja'a ca'a israelitahajxypän, møød jim maa ja'a guiobiernähajxiän.

¹⁶ Høøchä Saulo nyajnähdiijamby mäduhñtiä jaduhñ yhäxøø'y chaačhpögät ja'a høøchcøxpä.

¹⁷ Mänitä Ananías jiaanč nøcxy maa ja'a Saulo hänajty tøø miejtsta'aguiän. Coo ja'a Ananías tiøjtägøøyy, mänitä Saulo quiø'ønähgajpä. Mänit ñämaayyä:

—Mägu'ughajpä Saulo, ja'a Jesús miich jaduhñ jim mhijx tu'haammimmbä. Jaayá'ayhøch jaduhñ yaa tøø xquiexy nej miich jaduhñ mhijxø'tägätsät hoy. Y jaduhñ miichä Dioshespíritu xyhadägø'øw xjioottägø'øwät.

18 Tuunä ja'a Ananías jaduhñ ñä'ä mänaañ, mänitiä Saulo wyiingahduutä nebiä tsaamghacän. Mänitä yhijsø'tägajch. Mänit tiänaayyø'cy. Mänit hoy ñäbety.

19 Mänit quiaayy yhuucy. Møcpøjc je'e jaduhñ. Mänit jim jiaac mähmøøyy mejtsxøø tägøøgxøø Damasco maa ja'a mæbøjpädøjc-hajxiän.

20 Mänitä Saulo tiägøøyy mädia'agy-yajwa'xpä wiinduhmčhajtøjc jim Damasco maa ja'a judíos chajtøjc-hajxiän. Jaduhñ hānajty miädia'agy coogä Jesús Dyioshuungä.

21 Pønjaty ja'a Saulo miädia'agy hānajty hamädoowhíjtäp, jiaančh tehñ yagjuøøby hajxy hānajty jaduhñ nebiä Saulo hānajty miädia'aguiän ja'a Jesúscøxpä. Mänit hajxy tiägøøyy niñámáayyäbä:

—Yø'ø craa Saulo, jue'e yø'ø, yø'ø ja'a mæbøjpädøjc jim wi'i miädsibøøby Jerusalén, pønjetiä Jesús capxpaatp. Paady yø'ø yaa tøø piejpä Damasco coo ja'a mæbøjpädøjc-hajxy yaa miäjsäbät, møød coo hajxy jim yajnøcxøød Jerusalén hadsip, jaduhñ hajxy jim nøcxy quiø'øyegyii maa ja'a teedywiindsønħajxiän —nømä Saulo ñänøømä.

22 Y ja'a Saulo, tehñgahnä hānajty hamøj jootmøj jiaty coo ja'a tsaanä cu'ug hānajty yajwiinxiic yajwiingapxø'øy coogä Jesús Dyioswiinguexiä. Jaančh tehñ homiäbøjnä hānajty miädia'agy. Y ja'a judíoshajxy, ja'a hajxy hānajty jim tsānaabiä Damasco, cabä Saulo hajxy hānajty hoy quiapxhaduga'añ, je'eguiøxpä coo Saulo hānajty miädia'agy hamøj jootmøj.

23 Cujecy, mänitä judíoshajxy jim yhamugøøyy. Mänit hajxy quiojyquiapxytiuuñ coogä Saulo hajxy hānajty yagho'oga'añ.

24 Xøømdsuhmä Saulo hānajty miäxojna'ayii mäduhnjatiä tägø'øwøødiaactän maa ja'a Damasco-cajpt jiuħmuu'tswäditian. Mänitä Saulo jaduhñ miädoyhajty cooc hānajty yagho'oga'añii.

25 Mänitä mæbøjpädøjcä Saulo hajxy coods piädaacy møjcachjooty. Mänit hajxy quihdøøñajxy maa ja'a cajpt hānajty piquiä yhamuudsø'øguiän. Jaduhñdsä Saulo piäyø'cy.

26 Coo Saulo jim chohñ Damasco, mänit jim ñøcxtägajch Jerusalén. Coo jim quioo'ty, mänit jim ñøcxøøyy maa ja'a mæbøjpädøjc-hajxiän. Pero je'enä ja'a Saulo hajxy hānajty nägøxiä jiaančh tehñ chähgø'øy. Hix, cab hajxy hānajty ñajuø'øy pø mæbøjp hānajty je'ebä.

27 Jimä mæbøjpä hānajty tu'ug xiøhaty Bernabé. Je'e mæbøcypiä, cab hānajty chähgø'øy. Mänitä Bernabé ja'a Saulo wioonøcxy maa ja'a apóstoldøjc-hajxiän. Mänitä Bernabé ja'a apóstoldøjc yajmøødmädiaacy coogä Saulo ja'a Jesús hānajty tøø wyiinhixy tu'haamnøcxpä jim Damasco-mäwiingón, møød coogä Jesús ja'a Saulo jim miägapxy, møød coogä Saulo tiägøøyy mädiaacpä hamøj jootmøj jim Damasco ja'a Jesúscøxpä. Jaduhñä Bernabé ja'a apóstoldøjc yajmøødmädiaacy ja'a Saulocøxpä.

28 Mähmøøyy ja'a Saulo jim Jerusalén. Mänitä Saulo ja'a apóstoldøjc tiägøøyy møødwädijpä. Mänitä mädia'agy tiägøøyy yajwa'xpä ja'a Jesúscøxpä hamøj jootmøj.

29 Jimä judíoshajxy hānajty näje'e, hagriego hajxy hānajty yhayuuc-hajpy. Mänitä Saulo tiägøøyy møødyajcapxiøøbiä ja'a Jesúscøxpä. Pero cabä judíoshajxy jaduhñ yhojiäwøøyy. Mänit hajxy wyiinmaayy coo ja'a Saulo hajxy yaghó'ogät.

30 Coo ja'a mæbøjpädøjc-hajxy jaduhñ miädoyhajty coogä Saulo hānajty yagho'oga'añii, mänitä Saulo hajxy miøødnøcxy jim Cesarea. Coo hajxy jim miejch, mänitä Saulo hajxy quiejxtägajch Tarso.

³¹ Mänitä tsip jaduñ yhamaadiujnä ja'a mabøjpädøjcøxpähajxy, mäduñjaty hajxy hänajty xii yaa chäna'ay, møød jim Judea, jim Galilea, jim Samaria. Tehngahnä møcmäjaa hajxy hänajty mio'oyii jøjwidsø'ø ja'a Dioshespíritäm, paady hajxy hänajty jabom-jabom miayø'øy.

³² Y ja'a Pedro, wiinduhmčhajtøjc hänajty wiädity mäduñjatiä mabøjpädøjc-hajxy hänajty chäna'ay. Mänit jim ñøcxøøbiä maa ja'a cajpt hänajty xiøhatiän Lida. Jimä mabøjpädøjc-hajxy hänajty chänaabiä.

³³ Jimä jäya'ay hänajty tu'ug pia'amgo'na'ay, ja'a hänajty xøhajpä Eneas. Tuctujcumøjt hänajty tøø piøgyii. Jue'e hänajty je'e, cø'ømucy tecymiucy. Coø ja'a Pedro jim miejch Lida, mänit jim ñøcxy maa Eneas tiøjcän.

³⁴ Mänitä Pedro miänaañ:

—Eneas, ja'a Jesucristo miich xyajmøcpøgaamb. Pädø'øg. Pädit yø'ø mgøjxt.

Tuunä ja'a Eneas jaduñ ñä'ä nämaayyä, mäniä jiaanč pädø'cy.

³⁵ Mäduñtiä jäya'ayhajxy hänajty chäna'ay jim Lida møød jim maa ja'a joy hänajty xiøhatiän Sarón, coø hajxy jaduñ miädoyhajty coogä Eneas hänajty tøø pia'amnaxy, mänitä Eneas hajxy nägøxiä hoy yhiy coø tøø jiaanč møcpøcy. Mänitä Diosmädia'agy hajxy tiägøøyy mabøjpä ja'a Jesúscøxpä. Mänitä yhamd-soo cuhdujt hajxy ñajtshixøñä.

³⁶ Jimä tajiäya'ay hänajty tu'ug chäna'ay maa ja'a cajpt hänajty xiøhatiän Jope. Tabita ja'a tajiäya'ay hänajty xiøhaty arameo-ayuuc-haamby. Hagriegohaamby, jue'e hajxy hänajty tyijy Dorcas. Jaduñ miädia'agytiägø'øy “Gacela.” Hoorä, ja'a Dorcas, miäbøjpiä Diosmädia'agy hänajty je'e, paadiä häyoobädøjc hänajty naxy piuhbety, pønjaty hänajty tii yajmaajiajp. Jaanč tehñ yhooyy Dorcas hänajty jiäya'ayhaty.

³⁷ Mänitä Dorcas pia'ambejty. Mänit yho'cy. Mänitä ho'ogyjiäya'ay hajxy yajtsiiyy. Mänit hajxy hoy piäda'agy cøxp nähbettøgooty.

³⁸ Jim Jope, wiingón hänajty jim Lida maa ja'a Pedro hänajty yhiäñ. Hoorä, ja'a mabøjpädøjc-hajxy hänajty jim tsänaabiä Jope, coø hajxy jaduñ miädoyhajty coogä Pedro hänajty jim wiädityñä Lida, mänitä cugapxy hajxy metsc quiejxy coø Pedro paquiä yhuuc nøcxät jim Jope maa ja'a Dorcas hänajty tøø yho'oguiän.

³⁹ Mänitä Pedro jiaanč panøcxy. Coø hajxy jim miejch Jope, mänitä Pedro wioonøcxä nähbettøgooty maa ja'a ho'ogyjiäya'ay hänajty wyijtsna'ayän. Piquä ja'a yaamgtø'oxy ja'a ho'ogyjiäya'ay hajxy hänajty tøø piäda'agy. Wi'i jiøøby wi'i xiuu'tsp hajxy hänajty. Mänitä Pedro ja'a wit tucxy yaghijxä mädyijatiä Dorcas hänajty tøø yhädiuñ.

⁴⁰ Mänitä Pedro ja'a jäya'ay nägøxiä yhøxquejxpädsøømy. Mänitä Pedro jyiicädaacy. Mänit Dyiospa'yaaxy. Mänitä ho'ogyjiäya'ay wyiinhee'ppejty. Mänit miänaañ:

—Tabita, pädø'øg.

Mänitä Dorcas wyiindøø'xø'cy. Coø ja'a Dorcas ja'a Pedro yhiyxy, mänitä Dorcas yhänaayyø'cy.

⁴¹ Mänitä Pedro ja'a Dorcas wyidsø'cy. Mänitä Pedro ja'a mabøjpädøjc quiyuaxøøyy tøgooty møødä yaamgtø'oxy. Coø hajxy tiøjtägøøyy, mänit hajxy yhiyxy coø ja'a Dorcas hänajty tøø jiuypipijnä.

⁴² Mänitä mädia'agy paquiä wia'xy jim Jope cooc jaduñ tøø jiuypioøcy. Mänitä jäya'ayhajxy may jiaanč mabøjcy ja'a Jesúscøxpä.

⁴³ Mänitä Pedro jim jiaac mähmøøyy Jope maxiøø. Jim hänajty miejtsta'agy maa ja'a Simón tiøjcän, ja'a wajhacyajtøøtspä.

10

¹ Jimä jäya'ay hänajty tu'ug chäna'ay Cesarea, ja'a hänajty xøhjäpä Cornelio. Soldado-wiindsón hänajty tiuumby. Italia ja'a soldadohajxy hänajty choon. Nämäyvä soldadohajxy hänajty jim yhity Cesarea.

² Hoyyä Cornelio ja'a Dios hajxy hänajty wyiingudsähgø'øyy mөөдä yhung mөөдä tio'oxy. Hojiootä Cornelio hänajty jiaanch tehñ miөөд. Naxiä judioshajxy hänajty piuhbedyii xädø'øñhaam, ja'a hajxy hänajty häyoobä. Jabom-jabomä Cornelio hänajty Dyiospa'ya'axy.

³ Mänacyxiөө hänajty jaduhñ, jimä Cornelio hänajty tiuñ xiajy tøgooty, mänitä Diosmoonsä tu'ug ñäguehxtø'xy maa Cornelio hänajtiän. Tsajpootyp ja'a Diosmoonsä hänajty tөө chohñda'agy. Mänitä Diosmoonsä ja'a Cornelio ñämaayy:

—Cornelio.

⁴ Coö ja'a Cornelio ja'a Diosmoonsä jaduhñ yhiixy, chähgøøyy jaduhñ. Jejcy-juөөby miähee'pnaayy. Mänit miäyajtøøyy:

—Wiindsón, tii mdsojpy.

Mänitä Diosmoonsä yhadsooyy:

—Xquiumaaby miichä Dios jaduhñ coö miich tehñgahnä mba'ya'axy, mөөд coö miichä häyoobäjäya'ay naxy mbuhbety.

⁵⁻⁶ Jim Joep, jimä jäya'ay tu'ug chäna'ay mejypia'a, ja'a xøhjäpä Simón. Jue'e Simón tiuunghajpy, waihacyajtøøtsp. Jimä craa tu'ug yhäñña'ay maa ja'a Simón tiöjcän. Mejtstu'u ja'a craa xiөө, Simón mөөд Pedro. Jimä cugapxy mejtstägøøg mguéxät Joep, weenä Pedro jaduhñ nөcxy ñäma'ayii cooc miich yaa min xquihixy. Jaaya'ay jaduhñ xyhawáanäp tii miichä Dios xyajmädsojp coö mgudiünät —nөmä Diosmoonsä miänaañ.

⁷ Coö ja'a Diosmoonsä wyiimbijnä, mänitä Cornelio ja'a mioonsä metsc quiyuaxøøyy mөөдä soldado tu'ug. Dioswiingudsähgøøbiä soldado hänajty. Miөөdnijiootpäatäbä Cornelio ja'a soldado hänajty.

⁸ Mänitä Cornelio quiøxy yajmөөdmädiaacy waambaty hänajty tөө ñäma'ayii ja'a Diosmoonsäm. Mänitä Cornelio ja'a mioonsä jim quiejxy Joep nädägøøg mөөдä soldado.

⁹ Cujaboom cujyxiөө, jim hajxy hänajty tiu'uyo'oyñä. Ja ween hajxy hänajty jim quia'a mech Joep. Y ja'a Pedro, mänit jim wyiimbejty tøjnähgøxp Diospa'yaaxpä.

¹⁰ Jaanch tehñ yähó'cäbä Pedro hänajty. Jaguiay hänajty je'eduhñ. Jimä quiaay hänajty yaghoyøøyyäxä. Mänit jaduhñ wyiinhijxy

¹¹ coö ja'a tsajt hänajty tөө yhawala'ch. Mänit jaduhñ yhiixy coö tii jaduhñ quihdøøñaxyii nebiä poobwit crutypän. Mädaaxc-hitä poobwit hänajty xiojtsø'øguiä. Jaduhñ hänajty miänoonna'ay.

¹² Madiu'u animalhajxy hänajty jim quiähxø'øgy poobwittøguiøxp, mөөдä hamädaaxtecypiahajxy, mөөдä tsahñdy, mөөдä muuxy.

¹³ Mänitä Dios ja'a Pedro ñämaayy:

—Pedro, pädø'øg. Yagho'og yø'ø animal maybä. Mänit mdsú'udsät.

¹⁴ Mänitä Pedro yhadsooyy:

—Wiindsón, caj; cábøch yø'ø animal jaduhmbä mänaa ndsu'u'ch. Hix, cab højts nguhdujt jaduhñ myiñ coö højts animal hoñä'ä mädyibä ndsú'udsät.

¹⁵ Mänitä Pedro ñämäayyägumbä:

—Tijátyhøch nyajnähdiipy coö hajxy mdsú'udsät, cab jaduhñ yhäñxø'øgy coö hajxy mwiingápxät —nөmä Dios miänaañ.

¹⁶ Tägøøghoocä Pedro jaduhñ miägäpxä, mänit yhiixy coö ja'a poobwit chajpécumbä tsajpootyp.

¹⁷ Wyi'i tiajpy wyi'i miaabiä Pedro hänajty tiiguiøxpä hänajty jaduhñ coo tøø wyiinhixy. Y ja'a Cornelio quiugapxyhajxy, tøø ja'a Simón ja'a tiøjc hajxy hänajty piáatänä.

¹⁸ Mänit hajxy møc quiugapxøøyy pø jiibiä Simón Pedro jiaančh hity.

¹⁹ Y ja'a Pedro, je'enä hänajty wyi'i tiajpy wyi'i miay tiiguiøxpä hänajty jaduhñ coo tøø wyiinhixy. Mänitä Dioshespíritu ja'a Pedro ñämaayy:

—Mäadow, xiiby miich häna'c nädägøøg xyhøxta'ay.

²⁰ Mänac, nøcx yø'ø häna'c yajtøjtägø'ow. Hoy jaduhñ coo mbanócxät coo hajxy hänajty wyiimbida'añ. Hix, høøch yø'ø häna'c jaduhñ tøø nguexy coo miich jaduhñ xwioonócxät maa ja'a quiajpthajxiän.

²¹ Mänitä Pedro jiaančh mänajcy. Mänitä Pedro ja'a häna'c nädägøøgpä ñämaayy:

—Høøch Pedrohajp. Høøch mijts xyhøxtaaby. Tiičh mijts xwia'ana'añ.

²² Mänit hajxy yhadsooyy:

—Ja'a Cornelio højts tøø xquiexy, ja'a soldado-wiindsón. Jaančh tehñ yhojiäya'ay je'e. Dioswiingudsähgøøby je'e. Jiaančh tehñ chojpiä judíos ja'a Cornelio hajxy. Jiaančh tehñ quiumaaby hajxy jaduhñ —nømä Pedro ñämaayy.

²³ Mänitä Pedro ja'a häna'c nädägøøgpä ñämaayy coo hajxy tiøjtägø'owät, møød coo hajxy jim miejststá'agät. Cujaboom hajxy wyiimbijnä näguipxy møødä Pedro. Näje'e ja'a mabøjpädøjc-hajxy pianøcxpä, ja'a hajxy hänajty jim tsänaabiä Jope.

²⁴ Cumaaxc hajxy jim miejch Cesarea. Jimä Cornelio hänajty yhahixy, møødä jiuju møødä miägu'ug, møødä miägu'ughajpähajxy.

²⁵ Coo ja'a Pedro jim miejch maa ja'a Cornelio tiøjcän, mänitä Cornelio ja'a Pedro yajpoo'xy. Mänitä Cornelio ja'a Pedro wyiinjiicädaacy. Wyiingudsähgø'owaambiä Cornelio ja'a Pedro hänajty jaduhñ.

²⁶ Mänitä Pedro ja'a Cornelio ñämaayy:

—Tänaayyø'og, ca'ačh nDiosä. Nä'ä pajäya'ayhájpøch høøch nej miichän. Cab jaduhñ yhahixø'øy cooçh miich xwyiingudsähgø'owät.

²⁷ Mänitä Cornelio jiaančh tänaayyø'cy. Mänit hajxy paquiä miädiaacy. Mänit hajxy tiøjtägøøyy maa ja'a Cornelio miägu'ughajpähajxy hänajty nämay tøø yhamugø'øyän.

²⁸ Mänitä Pedro miänaañ:

—Højts judíos-jäya'ay, jaduhñ højts nguhdujt myiñ coo højts jiiby nga'a tøjtägø'owät maa jäya'ay tiøjc-hajxiän, ja'a hajxy ca'a judiøspä, nébiøch chaa tøø ndøjtägø'øyän. Coočhä Dios jaduhñ xyajwiinhijxy, jaduhñhøch tøø xya-jwiinjuø'øy coo jaduhñ quia'a hahixø'øy cooçh pøn nbéxät.

²⁹ Paady, coočhä Cornelio tøø xyajmøjya'axyii, páadyhøch jaduhñ tøø nga'a mäna'añ cooçh hänajty nga'a mina'añ. Huuc tunä mayhajt, høøch huuc hawáanäc tiičh jaduhñ coo tøø xyajmøjya'axyii.

³⁰ Mänitä Cornelio yhadsooyy:

—Maaxtøjcy mädägøøyy, yáabiøch hänajty nDiospa'ya'axy tøgooty. Mänacyxiøø hänajty je'e. Mänitä jäya'ay tu'ug ñäguehxtøø'xy høøch nwiinduum. Jaančh tehñ yhaambä wyit hänajty.

³¹ Mänitøch xñämaayy: “Cornelio, tøø miichä Dios xmiädoy coo jaduhñ jabom-jabom mba'ya'axy. Xquiumaaby miichä Dios jaduhñ coo miichä häyoobädøjc mnäxuuch.

³² Capxyñäguex ja'a Simón Pedro jim Jope coo ween yaa myiñ. Jim jaduhñ yhahäña'ay maa ja'a craa Simónhajpä tiøjcän, ja'a wajhacyajtøøtspä.

Mejypia'a mädöyyä chäna'ay. Coö ja'a Simón Pedro yaa miédsät, mänit miich jaduhñ xmiöödmädia'aga'añ."

³³ Mänitöch häna'c jim njaanč quejxy coö miich nöcxxy xwioy. Hoy jaduhñ coö töö mmiñ. Paady höjts yaa töö nhamugö'öy coö höjts miich mgapxy mmädia'agy nhamädoowhidáañäm nebiaty miichä Dios töö xñajtsapxöyyän coö höjts jaduhñ xyajmöödmädiaactägsät. Xyhijxp höjtsä Dios jaduhñ coö höjts hamuumdu'joot nmäböga'añ —nömä Pedro ñämaayy.

³⁴ Mänitä Pedro tiägöyy mädiaacpä:

—Tööch nwiinjuöñä coö höjtsä Dios tu'cuhdujt xchöjcäm. Cabä Dios pön hixy heeby piäda'agy. Töyhajt jaduhñ.

³⁵ Pönjatiä Dios jaduhñ wiingudsähgööby hamuumdu'joot, pönjaty hojioot mööd, je'edsä Dios quiumaaby, homiädyii cajptä hajxy jia tsoon.

³⁶⁻³⁷ Mänaa ja'a Juan tiägö'öyän mäyjnäbejpä, mänitä mädia'agy jim tiägöyy yajwa'xpä Galilea-naaxooty cooc ja'a Dios ja'a Jesucristo hänajty quixa'añ maa ja'a israelita-jäya'ayhajxiän, majaty hajxy hänajty chäna'ay, jaduhñä piojpä quiädieebä hajxy ñähwa'ads quihwá'adsät. Jaaya'ay hajxy nägöxiä nWiindsöñhajtäm.

³⁸ Nazaret ja'a Jesús hänajty choon. Mänitä Dios ja'a Jesús ja'a yhEspíritu miooy möödä mäjaa. Jaduhñä Jesús wyiinguejxä coö wiädität mayhajuumbä. Pönjaty hänajty pöjcäp, yajpa'amnáxpä hajxy hänajty. Pönjatiä haxöögpä ca'a hoybä hänajty mööd, yajnahwáatsäp hajxy hänajty. Puhbéjtäbä Jesús hänajty ja'a Diósäm.

³⁹ Höjts, hamdsoo höjts nhijxy tijatiä Jesús jim tiuun Judea-naaxooty mööd jim Jerusalén. Paady höjtsä töyhajt nmöödä coö tiöyyä. Mänitä Jesús miöjpahbejtä cruzcöxp. Jaduhñ yho'cy.

⁴⁰⁻⁴¹ Pero cumaaxcä Dios ja'a Jesús yagjuypiöjcy. Mänit höjtsä Dios ja'a Jesús xyaghijxy coö hänajty töö jiaanč juypiojcy. Cabä jäya'ayhajxy nägöxiä yhijxy. Jagooyyä höjts nhijxy. Paady höjtsä Dios xyaghijxy coö höjts hänajty jaduhñ töö xyajnahdijy. Mänit höjtsä Jesús nmöödcaayy nmöödhuucy.

⁴² Mänit höjtsä Jesús xwyiinguejxy coö höjtsä Diosmädia'agy nöcxxy nyajwa'xy wiinduhmyhagajpt ja'a Jesúsöxpä, coö ja'a Dios ja'a Jesús töö piäda'agy coö jäya'ayhajxy nägöxiä yajtöyhajtyegöjät, yho'oguiä, jiuuyquiä.

⁴³ Jaduhñä profetadöjcy-hajxy jecy quuijahy coögä jäya'ayä piojpä quiädieey hajxy yajnahwa'ač yajcuhwa'ačhii, pönjatiä Jesús ja'a miädia'agy maböjcäp.

⁴⁴ Cahnä ja'a Pedro hänajty miädiaacpädö'öyñä, mänit hajxy nägöxiä yhadägöyy jioottägöyyä ja'a Dioshéspiritäm, pönjatiä Pedro ja'a miädia'agy hänajty hamädoowhijtäp.

⁴⁵ Y ja'a judíoshajxy, ja'a Pedro hajxy hänajty töö piamechíjábä, ja'a hajxy hänajty maböjpä, coö hajxy jaduhñ yhijxy coö ja'a jäya'ayhajxy ca'a judíoshajpä yhadägöyy jioottägöyyä, mänit hajxy jiaanč tehñ yagjuöyy.

⁴⁶ Hix, miädoow ja'a judíoshajxy jaduhñ coö ja'a ca'a judíospähajxy hänajty wiinghayuuc miädia'agy. Jaduhñä Dios hajxy hänajty quiapxpaady coö miöjjä coö jiaančä.

⁴⁷ Mänitä Pedro ja'a judíos ñämaayy:

—Neby höjtsä Dioshéspiritu xyhadägöyy xjioottägöyyäm, jaanä jaduhñ hädaa jäya'ayhajxy yaabä töö yhadägöyy töö jioottägöyyäbä, hädaa ca'a judíoshajxpä. Hahixööby jaduhñ coö hajxy ñäbéjpät.

⁴⁸ Mänitä Pedro ja'a jäya'ay ca'a judíospä jiaanč nämaayy coö hajxy ñäbétät ja'a Jesucristocöxpä. Mänit hajxy hoy jiaanč näbety. Mänitä Cornelio ja'a Pedro ñämaayy coö Pedro jim jiaac hídät mejtsxöö tögögxöö maa ja'a Cornelio tiöjcän.

11

¹ Mänitä mädia'agy jim wia'xy Judea-naaxooty wiinduhmyhagajpt coogä jäya'ayä Diosmädia'agy hajxy hānajt̃y t̃øø j̃iøjp̃øgø'øy, ja'a hajxy ca'a judíos̃pä. Jaduhñä apóstoldøjc-hajxy miädoyhajty m̃øødä m̃äbøjpädøjc-hajxy.

²⁻³ Pero coo ja'a Pedro jim ñ̃øcxtägajch Jerusalén, mänit ñ̃ähojjä:

—Tii miichä jäya'ay hoy coo t̃øø mguhix̃y, ja'a hajxy ca'a judíos̃pä. Tii hoy coo t̃øø mm̃øødcaj coo t̃øø mm̃øødhu'ugy.

Ja'a m̃äbøjpädøjc-hajxy jaduhñ m̃ānaañ, ja'a hajxy hānajt̃y m̃ānaambä coo ja'a ca'a judíos̃hajxy tsipcøxp yajcircuncidarhájpat nebiä judíos̃hajxy quihdujthatiän.

⁴ Mänitä Pedro quiøxy mädiaacy tiiguiøxpä hānajt̃y coo t̃øø yhoy Cesarea:

⁵ —Jímhøch hānajt̃y nDiospa'ya'axy maa ja'a cajpt xiøhatiän Jope, mänitøch nwiinhijxy coo tii hānajt̃y quihdøøñaxyi tsajpootyp nebiä poobwit crutypän. Mädaaxc-hit hānajt̃y xiojtsø'øguiä. Jaduhñ hānajt̃y miānoonna'ay. Coo jaduhñ ñ̃äaxcādaacy maaçh hānajt̃iän,

⁶ mänitøch j̃iiby nguheebøøyy poobwittøjiooty. Mänithøchä animal madiu'u nhijxy m̃øødä hamädaaxtecyiähajxy, m̃øødä hawa'anjatypä, m̃øødä tsahñdy, m̃øødä muuxy.

⁷ Mänithøchä Dios xñāmaayy: “Pedro, pädø'øg. Yagho'og yø'ø animal. Mänit mdsú'udsät.”

⁸ Mänitøch nhadsooyy: “Wiindsón, caj, cábøch yø'ø animalduhmbä m̃ānaa ndsu'uçh. Hix̃, cab højts nguhdujt jaduhñ myiñ coo højtsä animal hoñä'a mädyiibä ndsú'udsät.”

⁹ Mänithøchä Dios jadähooc xñāmāguiumbä: “Tijátyhøch nyajñähdiipy coo hajxy mdsú'udsät, cab jaduhñ yhahixø'øy coo hajxy mwiingápxät.”

¹⁰ Tägøøghóoc-høchä Dios jaduhñ xñāmaayy, mänithøchä poobwit nhijxy coo chajpéjcumbä tsajpootyp.

¹¹ Mänithøchä hāna'c nädägøøg xñāmejch maaçh hānajt̃y nmejtsta'aguiän. Jim hajxy hānajt̃y t̃øø chohñda'agy Cesarea.

¹² Mänithøchä Dioshespíritu xñāmaayy cooçh tähooccapxiä nbadu'ubógät. Mänitøch njaançh m̃øødnøcxy. Mänit hädaa m̃äbøjpädøjc-hajxy nädädujc piadu'ubøjpä. Jope hajxy chooñ. Coo højts jim nmejch Cesarea, mänit højts jim ndøjtägøøyy maa ja'a craa Corneliohajpä tiøjcän.

¹³ Mänit højtsä Cornelio xyajm̃øødmädiaacy nébiägä Diosmoonsä tsajpootypä ñ̃äguehxtøø'xiän ja'a Cornelio wyiinduum. Mänitägä Diosmoonsä ja'a Cornelio ñ̃āmaayy: “Jimä craa tu'ug yhity Jope, ja'a xøhajpä Simón Pedro. Capxyñäguex̃ ja'a craa jaduhñ coo yaa myínät.

¹⁴ Coo yaa miédsät, mänit miich xyhawaanaañä nebiä mbojpä mgädieeybä hajxy mnähwa'ads mguhwá'adsät, m̃øødä mhuung m̃øødä mdo'oxy.”

¹⁵ Cooçh ndägøøyy mädiaacpä, mänitä Corneliohajxy yhadägøøyy jioottägøøyyä ja'a Dioshespíritäm, neby højts jayøbajt xyhuuc nägädaacämbän.

¹⁶ Mänitøch njahmiejtstaacy nebiä Jesús tähooc miānaañän: “Ja'a Juan, nøøhaam hijty miäyajnäbety. Tøyhajt jaduhñ. Pero mijts jaduhñ xyajñäbetaamb ja'a Dios yhEspirituhaam”, nøm højtsä Jesús xñāmaayy.

¹⁷ Y coo hajxy t̃øø nm̃äbøjcäm ja'a Jesucristocøxpä, paadiä Dios ja'a yh-Espíritu hajxy t̃øø xmióoyyäm. Hoorä, ja'a jäya'ayhajxy ca'a judíos̃pä, t̃øø ja'a Dios ja'a yhEspíritu mioobiä, neby hajxy t̃øø xmióoyyämbän. Põnhøch høøch cooçhä Dios jaduhñ nnä'a capxhadúgät —nømä Pedro miädiaacy.

¹⁸ Coo ja'a m̃äbøjpädøjc-hajxy jaduhñ miädoyhajty jim Jerusalén, mänit hajxy hamoñ haducy miähmøøyy. Mänitä Dios hajxy pia'yaaxy coo miøj coo jiaançh. Mänit hajxy miānaañ:

—Ja'a jäya'ayhajxy ca'a judíos, tøø ja'a cuhdujt hajxy mióoyyabä coo ja'a Dios hajxy jiøjpøgø'owät, møød coo ja'a yhaxøøgcuhdujt hajxy ñajtshixø'owät, jaduñ hajxy cøjxta'axiøø jiugyhádät nebiä Dios jiugyhatiän.

¹⁹ Tøøyyämä Esteban hānajtj jīm yagho'ogyii Jerusalén, mānitä mǎbøjpǎdøjc-hajxy jīm tiägøøyyä jaamdúunäbä tsaächtiúunäbä. Coo hajxy jīm chohñ, näje'e hajxy jäguembaady ñøcxøøyy, Fenicia, Chipre, Antioquía. Coo ja'a Diosmǎdia'agy hajxy hānajtj yajwa'xy ja'a Jesucristocøxpä homiaajä, jagooyyä judíos ja'a Diosmǎdia'agy hajxy hānajtj yajnähixø'oyii. Pønajatj hānajtj ca'a judíos, cab hajxy hānajtj yajnähixø'oyii.

²⁰ Ja'a mǎbøjpǎdøjc-hajxy hānajtj jīm tsohmǎ Chipre møød Cirene, coo hajxy näje'e miejch maa ja'a cajpt hānajtj xiøhatiän Antioquía, hopiønǎ Diosmǎdia'agy yajnähixøøyyä ja'a Jesúsøxpä, møødä judíos hajxy, møødä ca'a judíos hajxypä. Jaduhñ hajxy yajnähixøøyyä coo ja'a Jesús hajxy nWi-indsønǎjtäm.

²¹ Ja'a mǎbøjpǎdøjc-hajxy, miøødhǎjtäbä Dios ja'a miøcmǎjaa hajxy hānajtj. Mānitä jäya'ay ja'a jiecyquihdujt hajxy nāmāy ñajtshixøøyy. Mānitä Dios hajxy jiøjpøgøøyy.

²² Ja'a mǎbøjpǎdøjc-hajxy, ja'a hajxy hānajtj hijpǎ Jerusalén, coo hajxy jaduñ miädoyhajty coo ja'a mǎbøjpǎdøjc-hajxy hānajtj jīm miayø'øy Antioquía, mānitä Bernabé hajxy jīm quiejxy.

²³ Coo ja'a Bernabé jīm miejch Antioquía, mānit yhiijxy coo ja'a Dios ja'a mayhajt hānajtj møj tøø tiuñ, coo ja'a mǎbøjpǎdøjc-hajxy hānajtj tøø jiaančh mayø'øy. Mānitä Bernabé jiaančh tehñ xioondaacpøjcy. Mānitä Bernabé ja'a mǎbøjpǎdøjc ñāmaayy coo ja'a Diosmǎdia'agy hajxy tehñgahnä miäbøgāt hamuumdu'joot ja'a Jesucristocøxpä.

²⁴ Hojiootä Bernabé hānajtj jiaančh tehñ miøød. Jiaančh tehñ miøødä Dioshespíritu hānajtj je'eduhñ. Hamuumdu'jootä Diosmǎdia'agy hānajtj miäbøcy. Paadiä mǎbøjpǎdøjc-hajxy hānajtj jaduñ tehñgahnä miayø'øy, ja'a hajxy hānajtj mǎbøjpä ja'a Jesúsøxpä.

²⁵ Coo ja'a Bernabé jīm chohñ Antioquía, mānitä Saulo hoy piaady. Mānit hajxy jīm nāmetsc ñøcxtägajch Antioquía.

²⁶ Tu'jumøjtä Bernabé hajxy jīm yhiijty møødä Saulo maa ja'a mǎbøjpǎdøjc-hajxiän. Jīmä cu'ugä Diosmǎdia'agy hajxy nāmāy yajwiingapxøøyyä. Jīm Antioquía, jīmä mǎbøjpǎdøjc-hajxy yajxøbejtsohñä cristianos, je'eguiøxpä coo ja'a Jesucristo hajxy hānajtj tøø jiøjpøgø'øy.

²⁷ Mānitä jäya'ayhajxy näje'e jiiby quiädaacy Antioquía. Jerusalén hajxy hānajtj tøø chohñda'agy. Tøø hajxy hānajtj ñajtscapxøøyyä ja'a Diósäm.

²⁸ Tu'jäya'ay hānajtj xiøhaty Agabo. Tøø ja'a mǎbøjpǎdøjc-hajxy hānajtj yhamugø'øy. Mānitä Agabo tiānaayyø'cy jäya'ayhagujc. Mānit miānaañ coogä yuuxøø hānajtj jejcy jiada'añii wiinduhmyhagajpt. Mānit jaduñ jiaančh tøjiajty cujcy mānaa ja'a Claudio hānajtj jīm tiuunǎgmøødän Roma.

²⁹ Mānitä mǎbøjpǎdøjc-hajxy quiojyquiapxytiuuñ jīm Antioquía coo ja'a xädø'øñ hajxy hānajtj jīm quixa'añ Judea maa ja'a mǎbøjpǎdøjc-hajxy jimbän. Jaduhñ hajxy hanidiuhmjaty jejcy, mäduhñtiä xädø'øñ hajxy hānajtj miøødä.

³⁰ Mānitä xädø'øñ hajxy jaduñ jiaančh quejxy. Ja'a Bernabé hajxy jīm mänøcx Judea møødä Saulo. Mānitä majjäya'adiøjc ja'a xädø'øñ hajxy hoy mio'oyii, ja'a hajxy hānajtj tsānaabiä jīm Judea.

12

¹ Mānitä mǎbøjpǎdøjc-hajxy näje'e tiägøøyyä jaamdúunäbä tsaächtiúunäbä. Ja'a Herodes jaduñ jatcøøyy, ja'a hānajtj tuumbä gobiernä jīm Judea.

² Mänitä Herodes ja'a Santiago yajyagho'cä espadahaam, ja'a Juan yhajch.

³ Coö ja'a Herodes jaduñ yhijsy coö ja'a judíoshajxy hñajty xioonda'agy je'eguiøxpä coö ja'a Santiago hñajty tøø yagho'ogyi, mänitä Herodes ja'a Pedro yajmajtsä. Ja'a xøø hñajty jajtäp mänaa ja'a judíos ja'a tsajcaagy hajxy hñajty quiayyän, ja'a ca'a tsoomiøødpä.

⁴ Coö ja'a Pedro jaduñ yajmajch, mänit chuumä. Xøømdsuhm ja'a Pedro hñajty cwieendähadyi ja'a soldádäm. Tädujc-horajatiä soldadohajxy hñajty nämädaaxcjaty yhadäna'ay. Niguiuwíjtsäp hajxy hñajty. Tøø ja'a Herodes hñajty wyiinmay coö ja'a Pedro hñajty xøønaxy yajtøyhajtyega'añii cu'ughagujc.

⁵ Hoyyä Pedro hñajty jia tsumiä, tehngahnä mæbøjpädøjc ja'a Dios hajxy hñajty pia'ya'axy ja'a Pedrocxpä, coö yhøxmdsøøjät.

⁶ Cujaboomä Herodes ja'a Pedro hñajty yajnøcxa'añ cu'ughagujc, jimä Pedro hñajty mia'ay pujxtøgooty. Coods hñajty jaduñ. Soldadohajxy hñajty mia'ay. Cøøxoch hñajty jaduñ mejtsnax. Jimä soldadohajxy hñajty yhadäna'ay pujxtøghaawjooty.

⁷ Mänitä Diosmoonsä tu'ug näguehxtøø'xy ja'a Pedro wyiinduum. Mänitä jøøn jii by yagjajøøyy pujxtøgooty. Mänitä Diosmoonsä ja'a Pedro jiahmyu'xy. Mänitä Pedro ñämaayyä:

—Tsógäm, pädø'øg.

Mänitä Pedro ja'a cadena quiø'øghaduutä.

⁸ Mänitä Diosmoonsä miänaangumbä, ja'a hñajty jim tsohmä tsajpootyp:

—Niwiøhnda'adsøø. Pägø'øw yø'ø mgø'øg.

Coö ja'a Pedro jaduñ quiudiuuñ, mänit ñämäayyägumba:

—Pägø'øw yø'ø mjocxwit. Høøch pajáamäc.

⁹ Mänitä Pedro ja'a Diosmoonsä jiaanç padu'ubøjcy. Cabä Pedro hñajty ñajuø'øy pø tøyyä ja'a Diosmoonsä jiaanç hijxy, tøgä ñä'a wiinhijx jaduñ.

¹⁰ Mänitä Pedrohajxy jim ñajxy maa ja'a soldado jayøjpä hñajty yhadäna'ayän. Mänit hajxy ñajxy maa ja'a miämetspän. Coö hajxy jim miejch maa tehñ piujxtøghaawän, mänit yhawaach hamdsoo. Coö hajxy piädsøømy, mänit hajxy weeñtiä jiaac nøcxy. Mänitä Diosmoonsä yhadägoyyøøñä. Nidiuhmä Pedro jaduñ miähmøøyy.

¹¹ Mänitä Pedro wyiinmahñmejtsnä. Mänit miänaañ quiopcooty:

—Tøyhajt jaduñ coöchä Dios ja'a mioonsä tøø xyajnäguexy. Tøøch jaduñ xyajnähwa'açh ja'a Herodescxpä møødä judíoshajxy.

¹² Mänitä Pedro jim ñøcxy maa ja'a María tiøjcän, ja'a Juan ja'a tiaj. Jaduñä Juan hajxy hñajty tyijpä Marcos. Tøø jäya'ayhajxy hñajty may yhamugø'øy tøgooty Diospa'yaaxpä.

¹³ Coö ja'a Pedro jim miejch, mänitä tøgaaaw quiojxnojcy. Mänitä quixy tu'ug jim miejch maa ja'a tøgaaawän, ja'a hñajty xøhjäpä Rode. Miädoowaambiä Rode hñajty jaduñ pønä tøjc cojxnojcy.

¹⁴ Coö ja'a Rode ja'a Pedro yo'mädooyy, mänitä Rode päyø'øguiä wyiimbijty xoonäacäp. Cabä Rode ja'a tøjc ñä'a yaghawaach. Mänit hoy ñägapxy coögä Pedro hñajty jim tiäna'ay tøguuy.

¹⁵ Mänitä Rode ñämaayyä:

—Tøø miichäda'a mguhhiñ.

Pero tehngahnä Rode hñajty miäna'añ cooc hñajty jie'ejä ja'a Pedro. Mänit hajxy yhadsooyy:

—Ca'ada'a yø'ø jie'ejä. Ja'a yhaañämädah yø'ø.

¹⁶ Jimä Pedro ja'a tøgaaaw hñajty tehngahnä jia wi'i quiojxnocy. Coö hajxy hoy yaghawa'açh, mänit hajxy yhijsy coö hñajty jiaanç je'ejä.

¹⁷ Mänitä Pedro seña tiuun̄ quiø'øhaam coo hajxy yhamónät. Mänit jaduhñ miädiaacy neby hānajt̄y tøø yajpādsømyii pujxtøgooty ja'a Diósām. Mänit jiaac mānaañ:

—Nøcxä Santiago hajxy hawaanä møødä mæbøjpädøjc cooçh tøø nnähwa'açh.

Coo ja'a Pedro jaduhñ miädiaacpādøøyy, mänit wiingtuum ñøcxnä.

¹⁸ Coo jioðøñä, mänitä soldadohajxy jiaançh tehñ yagjuøøyy coo ja'a Pedro hānajt̄y quia'a jiibiän pujxtøgooty.

¹⁹ Mänitä Herodes yhanehmy coo ja'a Pedro yhøxta'awøøjät. Coo ja'a Pedro maa quia'a yajpaaty, mänitä soldadohajxy yajnähdsøømä, ja'a hajxy hānajt̄y tøø yhadäná'ayäbä maa ja'a pujxtøjcän. Mänitä Herodes yhanehmy coo ja'a soldadohajxy yagho'ogøøjät. Mänitä Herodes jim chohñ Judea. Mänit jim ñøcxy tsānaabiä Cesarea.

²⁰ Mänitä Herodes ja'a cu'ug jiaançh tehñ miäjootma'ty, ja'a hajxy hānajt̄y tsānaabiä jim Tiro møød jim Sidón. Mänitä cu'ughajxy nägøxiä quiojyquiapxytiuuñ coo hajxy nägøxiä jim ñøcxät ja'a Herodes wyiinduum. Jimä Herodes ja'a mioonsä hānajt̄y tu'ug xiøhaty Blasto. Møjtuungä Blasto hānajt̄y jim miøød maa ja'a Herodes wyiinduumän. Mänitä cu'ugä Blasto hajxy miājuuy coo ja'a Blasto ja'a cu'ug piuhbédät, weenä tsip jaduhñ ñaxy miay. Hix, jimä cu'ughajxy hānajt̄y tiuundaacthaty maa ja'a Herodes ñaaxootiän.

²¹ Coo hajxy hānajt̄y tøø yajcuhducy mānaa hajxy hānajt̄y jim yhamugø'øwa'añän maa ja'a Herodes wyiinduumän, mänitä Herodes ja'a reewyit piägøøyy. Mänit jim yhøxtaacy maa ja'a yhäñaabiejtän, maa ja'a cu'ughajxy hānajt̄y tøø yhamugø'øyän. Mänitä Herodes ja'a cu'ug tiägøøyy møødmädiaacpä.

²² Mänitä cu'ughajxy tiägøøyy yaaxpä:

—Yø'ø craa xim capxpä, jue'e yø'ø, Diosäda'a yø'ø; ca'ada'a yø'ø jiäya'ayä neby højtshájtäm.

²³ Tuunä hajxy jaduhñ ñä'a mānaañ, mänitä ja'a Diosmoonsä ja'a Herodes yajpa'ambejty. Paady jaduhñ yajpa'ambejtä je'eguiøxpä coo ja'a Dios hānajt̄y tøø quia'a wiingudsähgø'øy. Mänitä Herodes tiøøngcuhdsu'tsä. Mänit yho'nä.

²⁴ Pero ja'a Diosmädia'agy, tehñgahnä hānajt̄y jaduhñ wia'xy wiinduhmyñaax wiinduhmyguiajpt.

²⁵ Hoorä, coo ja'a Bernabé møødä Saulo ja'a majjäya'adiøjc ja'a xädø'øñ hajxy hānajt̄y tøø mio'oy jim Jerusalén, mänit hajxy wyiimbijnä. Mänit hajxy ñøcxtägajch jim Antioquía. Quipxiä Juan Marcos pianøcxy.

13

¹ Jim Antioquía, jimä jäya'ayhajxy hānajt̄y may tøø yhamugø'øy Jesúswiingudsähgøøbiä. Näje'e hajxy hānajt̄y tiuñ Diosmädia'agy-yajwiingapxøøbiä. Näje'e hajxy hānajt̄y tiuumbä yajnähixøøbiä. Ja'a hajxy hānajt̄y jaduhñ tuumbä, jue'e hajxy hānajt̄y xiøhaty: Bernabé, Simón ja'a humybiä, Lucio ja'a Cirene-tsohmä, Saulo, møød Manaén. Quipxiä Manaén ja'a Herodes hānajt̄y tøø miøødmuutsc-haty, ja'a hānajt̄y jim tøø guiobiernähátiäbä Galilea.

² Jiibiä Dios hajxy hānajt̄y wyiingudsähgø'øy jaguiay jayhu'ugy maa ja'a chajtøjc-hajxiän. Mänit hajxy ñāmaayyā ja'a Dioshespíritäm:

—Tøøçhā Bernabé møødä Saulo nyajnähdiyy cooçhā nduung hajxy xtiúunät. Mwiinguéxäp hajxy jaduhñ.

³ Coo ja'a mæbøjpädøjc-hajxy jaduhñ Dyiospa'yaaxpādøøyy, mänitä Bernabéhajxy quiø'ønähgajpä møødä Saulo. Mänitä Bernabéhajxy tiu'ubøjnä møødä Saulo.

⁴ Mänitä Bernabéhajxy wyiinguejxä ja'a Dioshespíritäm coo hajxy wiädität Diosmädia'agy-yajwa'xpä. Mänit hajxy jiiby yhädaacy maa ja'a cajpt hänajty xiøhatiän Seleucia. Mänit hajxy hoy biarcotägø'ø. Mänit hajxy ñøcxy mejy-hawiimb maa ja'a naax hänajty xiøhatiän Chipre, ja'a mejyhagujpä.

⁵ Coo hajxy jim miejch, mänit hajxy jim biarcomänajcy maa ja'a cajpt hänajty xiøhatiän Salamina. Mänit hajxy tiägøøyy Diosmädia'agy-yajwiingapxøøbiä maa ja'a judíos chajtøjc-hajxiän. Jimä Juan Marcos hänajty piawädiipä nä'ä jamiøød.

⁶ Coo ja'a Bernabé ja'a cajpthuung hajxy hänajty tøø quiøxy hawädity jim Chipre, mänit hajxy miejch maa ja'a cajpt hänajty xiøhatiän Pafos. Jimä jäya'ay hänajty tu'ug wiädiipä, ja'a hänajty xøhjäpä Barjesús. Judío hänajty je'e. Wiinmahñmøød hänajty je'e. Jaduhñ hänajty yhøhnda'agy cooc tyijy hänajty je'e Dyiosquexiä.

⁷ Hoyyä Barjesús ja'a Sergio Paulo hänajty miøødnimiägu'ughadyii, ja'a hänajty tuumbä gobernador. Coo ja'a Sergio Saulo jaduhñ miädoyhajty coo ja'a Bernabé ja'a Diosmädia'agy hajxy hänajty miäwädity, mänitä Bernabéhajxy miøjyaaxä møødä Saulo. Miädozáambiägä Sergio Paulo ja'a Diosmädia'agy hänajty.

⁸ Haa ja'a Barjesús, Elimas hänajty xiøhaty hagriegohaam. Hoorä, coo ja'a Elimas jaduhñ miädoyhajty coogä Sergio Paulo ja'a Diosmädia'agy hänajty miädozáañ, cabä Elimas jaduhñ yhojiäwøøyy. Mänitä Elimas ja'a Sergio Paulo jia jøjcäpxøøyy coo quia'a mabøgät.

⁹ Haa ja'a Saulo, mejtstu'u hänajty je'e xiøhjäpä møødä Pablo. Hoorä, miøødä Pablo ja'a Dioshespíritu hänajty. Mänitä Pablo ja'a Elimas wyiin-hee'ppejty.

¹⁰ Mänit yhojy:

—Møjcu'uhuung, mjaanč tehñ yhøhndaacp miičh. Jaanč tehñ yhaxøøg miičhä mwiinmahñdy. Caj miičh myajmädsocy coo jäya'ayhajxy hoy quiuh-dujthädät. Tii miičh jaduhñ coo mwi'i miäna'añ cooc tyijy ja'a Diosmädia'agy quia'a tøyyä.

¹¹ Xyajcumädozáamb miičhä Dios. Xyajwiinxoodsaamb miičh jaduhñ. Jecy miičh wiinds mmähmøøwa'añ. Caj miičhä jaijpä mdsoj hixa'añ, —nømä Elimas ñämaayyä.

Mänitä Elimas jiaanč wiinxoo'ch. Hobiänejpä hänajty tioonda'ay maa ñøcxøøwät. Yhøxtaaby hänajty jaduhñ pøn jaduhñ wiinwidsäp.

¹² Coo ja'a Sergio Paulo jaduhñ yhiixy nebiä Elimas hänajty tøø jiaty tøø yhabetiän, mänit yagjuøøyy. Mänitä Diosmädia'agy jiaanč mabøjcy coo tiøyyä.

¹³ Mänitä Pablohajxy jim biarcotägøøguiumbä, møødä Bernabé, møødä Juan Marcos. Mänit hajxy miejyñäjcumbä. Mänit hajxy miejch maa ja'a cajpt hänajty xiøhatiän Perga, jim maa ja'a naax hänajty xiøhatiän Panfilia. Jimä Juan Marcos wyiimbijnä nidiuhñ. Mänit yhädaacnä Jerusalén.

¹⁴ Coo ja'a Pablohajxy jim chohñ Perga, møødä Bernabé, mänit hajxy jiaac nøcxy maa ja'a cajpt hänajty xiøhatiän Antioquíä, jim maa ja'a naax hänajty xiøhatiän Pisidia. Coo ja'a poo'xxiøø yhabaaty, mänitä Pablohajxy chajtøjtägøøyy maa ja'a judíos chajtøjc-hajxiän. Mänit hajxy jiiby yhäñaaguiädaacy.

¹⁵ Ja'a häna'c-hajxy hänajty jiiby tuumbä tsajtøgooty, mänitä Diosmädia'agy hajxy quiapxy maa ja'a Moisés jecy quiujahyyän, møødä maa ja'a profetahajxy jecy quiujahyyän. Mänitä Pablohajxy ñämaayyä:

—Mägu'ughajpädøjc, pø jii mijts mädia'agy hajxy mmädia'aga'añ, huuc capx hajxy, weenä cu'ughajxy miädoy.

¹⁶ Mänitä Pablo tiänaayyø'cy. Mänitä quiø'ø chajtsihy, weenä cu'ughajxy jaduhñ yhamädoowhity. Mänit miänaañ:

—Huuc hamädoowhit hajxy nägøxiä, mijts israelitashajxy, møød mijts ca'a israelítabä. Mhaagä wiingudsähgøøbiä Dios hajxy.

¹⁷ Højts israelítabä, Dios højts nDioshajpy. Jegyhajty højtsä nhapä ndeedyhajxy hijty jim yhadsäna'ay maa ja'a naax xiøhatiän Egipto. Mänit hajxy jaduhñ yajnähdiijä ja'a Diósäm coo hajxy hānajty quiu'ughada'añii ja'a Diósäm. Mänit hajxy jim Egipto yhøxwoobädsøømä ja'a Diósäm. Jaduhñä Dios ja'a miäjaa yajcähxø'cy.

¹⁸ Coo hajxy jim wiomejtsä pactuum maa hānajty pøn quia'a tsäna'ayän, jim hajxy miähmøøyy juxychägui'xjomøjt. Míee'xtujpiä Dios hānajty jaduhñ, hoyyä miädia'agy hānajty quia'a jagä yajtúunäxä.

¹⁹ Mänitä israelitashajxy jim ñøcxy maa ja'a naax hānajty xiøhatiän Canaán. Ja'a jäya'ayhajxy hānajty jim tsänaabiä, ja'a näjuxtujc-hagajptpä, cøjx hajxy yajcuhdägoyyii ja'a Diósäm. Mänit højtsä nhapä ndeedyhajxy ñaaxpaatnä.

²⁰ Mädaaxmägo'xjomøjt ja cupc hānajty tøø yhity coo hajxy hānajty tøø chooñ Egipto.

'Mänitä Dios miänaañ coo cuduung hajxy miøødhädät. Jaduhñ hajxy jejcy miøødhajty. Ja'a Samuel, je'eds jaac tehm tiuun cuduung.

²¹ Mänitä cu'ughajxy miänaañ coo gobiernä hajxy mio'owøøjät, coo hajxy jaduhñ yhane'emøøjät. Mänitä Dios ja'a Saúl yajnähdiijy coo je'e tiúnät gobiernä, ja'a Cis yhuung. Benjamín ja'a Cis hānajty jegyhajty tøø yhaphaty tøø tieedyhaty. Juxychägui'xjomøjtä Saúl jaduhñ tiuun gobiernä.

²² Mänitä Dios miänaañ coo Saúl jaduhñ quia'a túunnät gobiernä. Jaduhñ miänaañ coo David jaduhñ ween tiuunnä gobiernä: “Njaanç tehm quiumáabiøchä David jaduhñ, ja'a Isaí yhuung. Cøxaamb jaduhñ quiudiuna'añ waambátyhøch nnäma'awa'añ”, nømä Dios ja'a David jecy ñänøømy.

²³ Mänitä Jesús cujecy jiaac mejch. Ja'a Jesús ja'a David jecy yhaphajt tieedyhajt. Paadiä Dios ja'a Jesús quiejxy coo ja'a israelitashajxy jaduhñ ween min yajnähwa'açhi. Jéquiänä Dios hajxy jaduhñ yajwiinwaanøøyyä coogä yajnähwaatspä hānajty quiexa'añ.

²⁴ Cahnä Jesús hānajty tiägø'øyñä wädijpä, jimä Juan ja'a israelitas ja'a Diosmädia'agy hānajty yajwiingapxø'øy coo ja'a yhaxøøgcuhdujt hajxy nägøxiä ñajtshixø'øwät, møød coo ja'a Dios hajxy hamuumdu'joot wyiin-gudsähgø'øwät, møød coo hajxy ñäbétät.

²⁵ Coo ja'a Juan hānajty tiuumbädø'owaannä, mänit miänaañ: “Jaduhñhøch mijtsäda'a xñänømy cooc tyijy høøch nGristo. Ca'açh nje'ejä. Jímhøchä njamiøød tu'ug jiaac medsa'añ. Maas møcmäjaamøød je'e miedsa'añ queeçh høøch. Cábøch cuhdujt jaduhñ njaty møødä nebiä cuhdujt je'e miøødän ja'a jaac medsaambä.”

²⁶ 'Mägu'ughajpädøjc, højtsä Abraham jecy nhaphajt ndeedyhajtäm; møød mijts ca'a judióspä, mwiingudsähgøøbiä Dios hajxypä. Nägøxiä ja'a Dios hajxy tøø xyajnähdiijäm coo hajxy nägøxiä xyajnähwa'adsaanäm.

²⁷ Coo ja'a Jesús quioo'ty Jerusalén, cabä cu'ughajxy hānajty ñajuø'øy coo hānajty je'e Dyiosquexiä. Ni ja'a teedywiindsøn hajxy hānajty quia'a najuøøbiä. Coo ja'a Jesús hajxy yajyagho'cä, jaduhñä Diosmädia'agy hajxy yajtøijajty nej myiñän cujaay coo ja'a Diosquexy hānajty yagho'oga'añii. Ja'a profetadøjc-hajxy jaduhñ jecy cujahy, ja'a Diosmädia'agy hajxy hānajty jegyhajty mäwädijpä. Hoyyä cu'ugä Diosmädia'agy hānajty jia mädoy wiingusábadohaam

nebiä profetadøjc ja'a Diosquexy hajxy hānajtj jia mādia'aguiān, cabā cu'ughajxy hānajtj ñajuø'øyc coo ja'a Jesús hānajtj Dyiosquexiā.

²⁸ Jaduhnā cu'ughajxy hānajtj tehngajnā ñā'ägā mānaañ cooc tyijy ja'a Jesús hānajtj hanaxiā tøø quiādieey. Pero cab hānajtj jaduhn ñā'ā tøyābā. Hoy hānajtj quia'a jagā tøyā, tehngajnā cu'ug ja'a Pilato hajxy jaduhn ñāmaayy coo ja'a Pilato ja'a Jesús yajyagho'ogøøjät.

²⁹ Coo ja'a Jesús jaduhn jiaančh ho'cy, cøjx jaduhn tiøjiaty nebiaty jim miādia'agyiijān maa ja'a Diosmādia'agy myiñān. Mānit yajmānajcā cruzcøxp. Mānit hoy yajnaaxtägø'øyii.

³⁰ Mānitā Dios ja'a Jesús yagjujypijtägajch.

³¹ Mayhoocā Jesús jaduhn jiaac hijxā ja'a jiamioødhajxy, ja'a hajxy hānajtj quipxy tøø piadsohndā'aguiābā jim Galilea. Quipxiā Jesús hajxy piagoo'ty Jerusalén. Hoorā, jādā'ahatiā Jesús hajxy miādiaacpā maa ja'a judiøshajxiān coogā Jesús Quiārsto.

³² Paady højts mijts jaduhn nyajwiingapxø'øyc ja'a Jesúscøxpā. Jequiān højts nhap ndeedyhajxy yhawāanāxā ja'a Diósām coogā Dios ja'a yajnāhwaatspā hānajtj quixa'añ.

³³ Coo ja'a Jesús hajxy tøø xñāhho'túutām, møød coo jiuypijtägajch, jaduhnā Jesús hajxy tøø xjiaančh yajnāhwaatsām. Jaduhnā Dios ja'a miādia'agy yajtøjiajty neby højts nhap ndeedyhajxy jecy yhawāanāxām coogā Dios ja'a yajnāhwaatspā hānajtj quixa'añ. Jaduhn jim myiñ cujaay maa ja'a salmo miāmetspān: “Høøch miičh nHuunghajpy. Jāda'ačh miičh tøø nyagjujypijtägach.”

³⁴ Jēquiānā Dios jaduhn miānaañ coogā yHuung hānajtj yagjujypijtägatsa'añ, jaduhnāc je'e quia'a pú'udsāt. Jaduhn jim myiimbā cujaay maa ja'a Diosmādia'aguiān: “Mijtshøch ngunuuxaamby nébiøchā David tøø nyajnāma'ayān. Nyajtøjiadāambiøch jaduhn.”

³⁵ Jaduhn jim myiimbā cujaay wiingsalmojooty: “Caj miičh mmāna'ana'añ coo ja'a mHuungā ñi'xā quiopc piú'udsāt, coo hānajtj tøø yho'ogy. Myagjujypijtägatsaamby miičh jaduhn”, nømā Dios ñāmaayyā.

³⁶ Hoorā, coo ja'a David jecy miāhanehmbādøøyy nebiā Dios hānajtj tøø yajnāhdijjiān, mānitā David yho'nā tiāgoonā. Mānit hoy ñaaxtägø'øyc. Mānit piuutsnā. Tøyhajt jaduhn.

³⁷ Pero ja'a Jesús, coo je'e yho'cy, cab je'e piuuch, je'eguiøxpā coo yagjujypijtägajtsā.

³⁸⁻³⁹ Māgu'ughajpādøjc, huuc hamādoowhit hajxy, jaduhn højts mijts nyajwiingapxø'øyc coo ja'a Jesús hajxy nāgøxiā tøø xñāhho'túutām, møød coo jādāhooc jiuypijtägajch. Pønjatj jaduhn mabøjp, nāhwa'adsaamb hajxy je'e; hawa'adstuum hajxy miāhmø'øwa'añ. Hoyyā jecyquihdujt hajxy hijty nja wi'i quiudiunāanām, ja'a Moisés jecy quiujahyyābā, cab hajxy hoy pedyii ngudiunāanām, paady hajxy hijty nga'a nāhwa'adsāanām.

⁴⁰ Naxy hādaa mādia'agy hajxy mdehm miäbøgāt neby højts mijts cham nyajwiingapxø'øyān. Pø caj, wehndā hajxy mjat mhabétāt nebiā profetadøjc-hajxy jecy quiujahyyān:

⁴¹ Huuc mādow hajxy, pønjatj jaduhn māwiingapxpejp,

myagjuø'øwāp hajxy jaduhn;

mniguiu'uds mniguiuhhāmeedø'øwøøjāp hajxy.

Hix, hoy-yagjuøøñøch jaduhn njaančh tehñ yajcāhxø'øga'añ maa mijts mwi-induumhajxiān.

Pero cab hajxy jaduhn miäbøga'añ, ja'a hajxy hamdsoo ca'a hixaambā, nømā Dios jecy miānaañ.

⁴²⁻⁴³ Mänitä Pablo miädiaacpädöönä. Coo ja'a Pablohajxy chajtøjpdädsöomy mөөдä Bernabé, mänit hajxy ñämaayyä coo hajxy jadähooc ween min miädia'agy ja'a sábadö hänäjty jaac miimbä, neby hajxy hänäjty tөө yhuuc mädiaacpän. Mänitä Pablo jäya'ay hajxy may piadu'uböjcä, mөөдä judíoshajxy, mөөдä ca'a judíospähajxy, ja'a Diosmädia'agy hajxy hänäjty mäßöjpä. Mänitä Pablohajxy miänaañ coo ja'a jäya'ayä Dios hajxy homiänaajä yhajodhädät.

⁴⁴ Coo ja'a sábadö hänäjty jadähooc yhabáatcumbä, mänitä cu'ughajxy jim miejch maa ja'a judíos chajtöjc-hajxiän. Tөө ja'a cu'ughajxy hänäjty miädoxyaty coo ja'a Pablo ja'a Diosmädia'agy hänäjty jadähooc miädia'agäängumbä.

⁴⁵ Coo ja'a judíos wyiindsönhajxy jaduhñ yhiijxy coo ja'a cu'ughajxy hänäjty jaanç tehñ miay tөө miech Diosmädia'agyhamädoowhiipä, mänit hajxy jiootma'ty. Mänit hajxy tiägööyy mänaambä cooc tyijy ja'a Pablohajxy hänäjty yhöñda'agy. Wiingapxpéjtäbä Pablohajxy hänäjty jaduhñ.

⁴⁶⁻⁴⁷ Pero cabä Pablohajxy ñä'ägä möjpädaacy. Mänit hajxy yhadsooyy:

—Jaduhñ höjtsä Dios tөө xwyiinguexy coo höjts mijts judíospä jayöjp nyajwiingapxö'owät ja'a mädia'agy ja'a Jesúscöxpä. Pero caj mijts hädaa mädia'agy mnä'ägä mädowa'añ. Coo hajxy jaduhñ mga'a mäßöga'añ, paady jaduhñ quia'a hawiinmatsä coo hajxy homiänaajä mjugyhädät nebiä Dios homiänaajä jiugyhatiän. Cab höjts mijts hädaa mädia'agy nyajmöödmädia'agaannä. Jim höjtsä jäya'ay nöcxxy nnä'ägä yajwiingapxö'owaannä, ja'a hajxy ca'a judíospä. Jaduhñ jim myiñ cujaay maa ja'a Diosmädia'aguiän.

⁴⁸ Coo hajxy jaduhñ miädooyy, ja'a hajxy ca'a judíospä, mänit hajxy xioondaacpöjcy. Mänit hajxy tiägööyy mänaambä coogä Diosmädia'agy ja'a Jesúscöxpä jiaanç tehñ yhooyä. Mänit hajxy nägöxiä miäböjcy, pönjatiä Dios hänäjty tөө yajnähdiij coo hajxy jiugyhada'añ homiänaajä neby je'e jiugyhatiän.

⁴⁹ Mänitä Diosmädia'agy ja'a Jesúscöxpä tiägööyy wa'xpä wiin-duhmyhagajpt.

⁵⁰ Mänitä mäyöøjäya'ayhajxy jiojcapxööyyä mөөдä to'oxiöjc-hajxy, ja'a hajxy hänäjty Dioswiingudsähgööbiä. Jaduhñ hajxy ñämaayyä coo ja'a Pablo miädia'agyhajxy quia'a mäßöjcäxät. Ja'a judíowskiindsönhajxy jaduhñ mänaañ. Jaduhñ hajxy hänäjty miänaambä coo ja'a Pablohajxy yhöxpäbo'owöjät.

⁵¹⁻⁵² Mänitä Pablo ja'a tiecy hajxy wyiinxiijty wyiinwojpy, weenä naaxoc jaduhñ quiöxy ca'ay. Hijxtahnd hajxy jaduhñ yajcähxö'c coo ja'a jäya'ay ja'a Diosmädia'agy hajxy hänäjty nämay quia'a mäßöga'añ. Pero ja'a jäya'ayhajxy hänäjty mäßöjpä, jaanç tehñ xioondaacp hajxy hänäjty. Höxtä piaatypä Dioshespíritu hajxy hänäjty. Mänitä Pablohajxy jim chohñnä mөөдä Bernabé. Mänit hajxy jim nöcxxy maa ja'a cajpt hänäjty xiöhatiän Iconio.

14

¹ Mänitä Pablohajxy jim miejch Iconio. Coo sábadö yhabaaty, mänit hajxy nöcxxy maa ja'a judíos ja'a chajtöjc-hajxiän. Mänitä Pablo ja'a Diosmädia'agy hajxy yajwiingapxööyy. Mänitä jäya'ayhajxy may miäböjcy, mөөдä judíoshajxy, mөөд hajxy ca'a judíospä.

² Pero cabä judíoshajxy nägöxiä miäböjcy. Mänitä jäya'ayhajxy jiojcapxööyyä, ja'a hajxy hänäjty ca'a judíospä, ja'a hajxy hänäjty mäßöjpä. Jaduhñ hajxy jiojcapxööyyä coo ja'a Pablo miädia'agy hajxy quia'a mäßöjcäxät. Ja'a judíoshajxy jaduhñ mänaañ, ja'a hajxy hänäjty ca'a mäßöjpä. Jaduhñ hajxy hänäjty miänaambä coo ja'a Pablohajxy wyiingapxpedöjät.

³ Jejquiä Pablohajxy jim jiaac hijty Iconio. Cabä Diosmädia'agy hajxy hānajty tsāhgø'ø-tsāhgø'ø ñä'ä mädia'agy. Jaduhñ hajxy hānajty miädia'agy coogä Dios hajxy xjiaanč tehñ chójcām. Madiu'u ja'a Pablo pa'am hajxy hānajty yajnaxy. Hijxtahñd hajxy hānajty yajcāhxø'py jaduhñ coo ja'a Pablo ja'a Jesús ja'a miäjaa hajxy hānajty tøø mio'oyii. Hix, ja'a Jesús ja'a miäjaahaamä pa'am hajxy hānajty yajnaxy. Jaduhñä cu'ughajxy hānajty ñajuø'øy coo ja'a Dios hajxy tøyhajt xjiaanč tsójcām.

⁴ Pero cabä cu'ughajxy hānajty tiu'ugmädia'aguiä. Naje'e ja'a judíos miädia'agy hajxy hānajty miäbøjcä. Naje'e ja'a Pablo miädia'agy hajxy hānajty miäbøjcä. Dioswiinguexiä Pablohajxy hānajty tiuumby møødä Bernabé.

⁵ Mänitä møjtuungmøødpāhajxy quiojyquiapxytiuuñ coo ja'a Pablohajxy quihga'adsøjät. Jaduhñä judíoshajxy piamānaambä møød hajxy ca'a judíospä.

⁶ Coo ja'a Pablohajxy jaduhñ miädooyy, mänit hajxy jim piäyø'cy. Mänit hajxy ñøcxy maa ja'a naax hānajty xiøhatiän Licaonia, møød maa ja'a cajpt hānajty xiøhatiän Listra møød Derbe.

⁷ Mänitä Diosmädia'agy hajxy jim tiägøøyy yajwiingapxøøbiä Licaonia-naaxooty wiinduhmyhagajpt.

⁸ Jimä pa'amjäya'ay hānajty tu'ug chāna'ay Listra. Tecymiuquiä mähdiøjc hānajty tøø myiñ tøø quia'ay. Cahnä hānajty mānaa yo'oyø'øgy.

⁹ Jiaanč tehñ yhamädoowhijpiä mähdiøjc hānajty waambatiä Pablohajxy hānajty miädia'agy. Coo ja'a Pablo ja'a mähdiøjc jaduhñ yhiixy coo ja'a mähdiøjcä jioot hānajty tøø piäda'agy coo miøcpøgät, møød coo hānajty miäbøcy coo ja'a Pablo ja'a Jesús miäjaa hānajty miøødhajtä,

¹⁰ mänitä Pablo ja'a mähdiøjc ñāmaayy:

—Pädø'øg, tänaayyø'øg.

Møcä Pablo jaduhñ miānaañ. Mänitä craa jiaanč tänaayyø'cy. Mänit hoy tiägøøñä yohbiä.

¹¹⁻¹² Coo ja'a cu'ugä craa hajxy jaduhñ yhiixy coo hānajty tøø miøcpøcy, mänit hajxy tiägøøyy yaaxpä yhamdsoo hayuuc-haambyhajxy:

—Tøø ja'a Zeus hajxy xñägädāacām møødä Hermes, ja'a hajxy nwiingudsāhgøøyyāmbä. Tøø hajxy jaduhñ ñibiäda'agyii neby jäya'ayän —nømä Pablohajxy ñänøømä.

Jaduhñä Bernabé hānajty yhajodhadyii nebiä Zeusän. Haa ja'a Pablo, jaduhñ hānajty je'e yhajodhajtäbä nebiä Hérmesän, je'eguiøxpä coo ja'a Pablo hānajty jiaanč tehñ miädia'agy.

¹³⁻¹⁴ Pero cabä Pablohajxy hānajty wyiinjuø'øy waambaty hajxy hānajty ñänømyii. Hoorä, jimä tsajtøjc hānajty tu'ug cajptpa'a maa ja'a cu'ugä Zeus hajxy hānajty wyiingudsāhgø'øyän. Ja'a jäya'ay hānajty jim tuumbä teedy, mänitä waj may yajmejch maa ja'a Pablohajxy hānajty cajptpa'a tøø miähmø'øyän. Mayyä pøjy jaduhñ yajmejtspä. Mänitä Pablohajxy tiägøøyyä wiingudsāhgøøyyäbä. Ja'a cu'ughajxy møødä teedy, je'e hajxy hānajty mäwiingudsāhgøøby. Mänitä teedyhajxy tiägøøyy mānaambä coogä waj hajxy hānajty yoxa'añ ja'a Pablocøxpāhajxy. Hagriegohaam hajxy jaduhñ miānaañ. Coo ja'a Pablohajxy jaduhñ wyiinjuøøñä nebiä cu'ughajxy hānajty jiatcø'øwa'añ, mänitä Pablohajxy tiägøøyy tajpä maabiä. Mänitä wyit hajxy quioø'ch. Mänit hajxy jim tiägøøyy cu'ughagujc. Mänit hajxy yaaxy:

¹⁵ —Mägu'ughajpädøjc, ca'a højts xwyiingudsāhgø'øy. Jäya'ay højts nej mijtsän. Paady højts yaa tøø nmech maa mijts mgajptän, coo højts mijtsä Diosmädia'agy nyajwiingapxø'øwät, jaduhñä Dios juppiä ja'a miädia'agy hajxy mmäbøjcät. Jéquiänä Dios ja'a tsajt yhädiuuñ, møødä naaxwiin, møødä

mejy, mөөд tijaty jaac jii, cөxiä. Jaduhnä Dios miäna'añ coo hajxy je'e mwiingudsähgöñät, coo ja'a mhamdsoo cuhdujt hajxy mnajtshixöñät, ja'a ca'a tsoobaatpä.

¹⁶ Hijty, jaduhnä Dios hijty miäna'añ coo ja'a jäya'ayä yhamdsoo cuhdujt hajxy ween yajtuñ.

¹⁷ Homiänaajä ja'a Dios yajcähxø'øgy coo hojioot jiaančh tehñ miөөдä maa mijtscөxpän, mөөд coo yajtu'uy coo yajta'xy, mөөд coo ja'a camä tu'u yaghoyø'øy, jaduhn hajxy ngaayy nhúucäm jootcujc —nөmä Pablohajxy miänaañ.

¹⁸ Hobiänejpä ja'a Pablo ja'a cu'ug hajxy jaduhn yajmäbøjcy coo ja'a waj hajxy quia'a yóxät, coo ja'a Pablohajxy jaduhn quia'a wiingudsähgø'øwөөд mөөдä Bernabé.

¹⁹ Mänitä judíoshajxy näje'e miejch. Antioquía hajxy hānajty choon mөөд Iconio. Mänitä cu'ug hajxy yajmäbøjtägajch cooc tyijy ja'a Pablohajxy hānajty yhöñda'agy mөөдä Bernabé. Mänitä cu'ugä Pablo hajxy jaduhn jia ca'ch. Jaduhn hajxy hānajty yhajodhaty coo ja'a Pablo hānajty tөө yho'ogy, pero cab hānajty tөө ñä'a ho'pä. Mänitä Pablo hajxy hoy yhöxwich cajtpa'a.

²⁰ Ja'a jäya'ayä Diosmädia'agy hajxy hānajty jaduhn tөө miäbøquiäbä, mänitä Pablo hajxy hoy jiuhmugø'øy. Mänitä Pablo jadähooc wyiinmahñmejch. Mänitä Pablohajxy jaduhn jiiby tiägøøguiumbä cajptooty mөөдä mäsøjpädøjc. Cujaboomä Pablohajxy jim chohñ mөөдä Bernabé. Mänit hajxy ñöcxy maa ja'a cajpt hānajty jaduhn xiøhatiän Derbe.

²¹ Coo ja'a Pablohajxy jim miejch Derbe, mänitä Diosmädia'agy hajxy tiägøøyy hawaan hayaaxøöbiä. Coo ja'a cu'ughajxy jaduhn miädooyy, mänit hajxy may miäbøjcy. Mänitä Pablohajxy jim wyiimbíjcumbä. Mänit hajxy jim ñöcxtägajch Listra, mөөд jim Iconio, mөөд jim Antioquía, majaty hajxy hānajty tөө yhuuc hoobiän.

²² Ja'a jäya'ayä Diosmädia'agy hajxy hānajty tөө miäbøquiäbä, mänit hajxy wyiingapxøøyyä coo ja'a Diosmädia'agy hajxy hamuumdu'joot pianöcxät tehngahnä, hoy hajxy jaduhn cu jia mānax cu jia yajnax ja'a tsaächpä ja'a peenä. Mänit hajxy jaduhn jim ñöcxät Dioswiinduum.

²³ Majatiä Pablohajxy hānajty wiädity, wyiinguejxyp hajxy hānajty pøn jaduhn jim túnäp wiindsøn maa ja'a tsajtøjcän. Mänitä Pablo ja'a Dios hajxy pia'yaaxy coo hajxy jaduhn quiuweendähadøøjät ja'a Diósäm, ja'a hajxy hānajty tөө miäbøquiäbä. Jaguiay jayhu'uguiä Dios hajxy hānajty miānuu'xta'agy.

²⁴ Mänitä Pablohajxy jim ñaxøøyy mөөдä Bernabé maa ja'a naax hānajty xiøhatiän Pisidia. Mөөд hajxy jim yhoobiä maa ja'a naax hānajty xiøhajpän Panfilia.

²⁵ Mänitä Pablohajxy jim jadähooc miéjtscumbä Perge. Jimä Diosmädia'agy hajxy jadähooc yajwá'xcumbä. Mänit hajxy ñöcxy jadähooc Atalia.

²⁶ Jim hajxy jadähooc hoy biarcotägø'øy. Mänit hajxy jim ñöcxcumbä Antioquía maa hajxy hānajty jaduhn tөө yhuuc tsohñdaacpän, maa hajxy hānajty jaduhn tөө wyiinguexyiijän coo ja'a Dios ja'a tiuung hajxy tiúnät. Coo hajxy jaduhn jim miejtstägajch Antioquía, yaghabejt hajxy jaduhn nebiä Dios hānajty tөө yhane'emiän coo hajxy jaduhn tiúnät.

²⁷ Coo hajxy jim miejch Antioquía, mänitä Pablo ja'a mäsøjpädøjc hajxy wioomujcy. Mänit hajxy miädiaacy nebiatiä Dios hajxy hānajty tөө piuhbedyiijän, mөөд coo ja'a Dios cuhdujt jaduhn tөө yecy coo ja'a jäya'ayhajxy jaduhn miäbøjpät, ja'a hajxy hānajty jaduhn ca'a judíospä.

²⁸ Jejquiä Pablohajxy jim yhiyty Antioquía. Xyiicy xioonäacy hajxy jaduhn mөөдä mäsøjpädøjc-hajxy.

15

¹ Mänitä jäya'ayhajxy jaduhñ jim näje'e miejch Antioquía. Judea hajxy hñajty tøø chohnda'agy. Mänitä mabøjpädøjc-hajxy yajñähixøøyyä coo hajxy jaduhñ quiudiúnät nebiä Moisés hñajty jegyhajty tøø yhane'emiän, coo hajxy yajcircuncidarhádät. Cooc hajxy jaduhñ quia'a cudiúnät, cábac hajxy jaduhñ ñähwá'adsät. Ja'a jäya'ayhajxy hñajty jim tsohm̄bä Judea, je'edsä mabøjpädøjc hajxy jaduhñ yajñähixøøyy.

²⁻³ Pero cabä Pablohajxy jaduhñ quiumaayy coo ja'a mabøjpädøjc-hajxy jaduhñ yajñähixø'owóøjät. Mänitä Pablo ja'a mädia'agy hajxy jaduhñ yajcapxiøøyy coo ja'a mabøjpädøjc-hajxy jaduhñ quia'a mabøgät neby hajxy hñajty tøø yajñähixø'oyiijän coo hajxy tsipcøxp yajcircuncidarhádät. Mänitä Pablohajxy jim quiejxä Jerusalén møødä Bernabé, møødä wiinghāna'c-hajxy. Ja'a mabøjpädøjc-hajxy jaduhñ maguejx coo ja'a tsip ja'a pleetä jaduhñ ween nøcxy yajcøxy yajmay. Ja'a jäya'ayhajxy hñajty jim tuumbä Jerusalén maa ja'a tsajtøjcän, je'edsä tsip ja'a pleetä hajxy hñajty miøødyajcøxaamby miøødyajmayaamby, jaduhñ hajxy quia'a tsipyajpádø'nät. Coo ja'a Pablohajxy jim tiu'ubøjcy Antioquía, mänit hajxy jim ñaxøøyy maa ja'a naax hñajty xiøhatiän Fenicia, møød jim maa ja'a naax hñajty xiøhatiän Samaria. Jimä Pablo ja'a mabøjpädøjc hajxy miøødmäiaacy, ja'a hajxy hñajty tsānaabiä jim Fenicia møød jim Samaria. Jaduhñä Pablohajxy miädiaacy coogä jäya'ayä Diosmädia'agy hajxy hñajty tøø piadu'ubøcy, ja'a hajxy hñajty ca'a judíospä, møød coogä yhamdsoo cuhdujt hajxy hñajty tøø ñajtshixøøñä. Coo ja'a mabøjpädøjc-hajxy jaduhñ miädooyy, mänit hajxy jaduhñ jiaančh tehñ xioondaacy.

⁴ Coo ja'a Pablohajxy jim miejch Jerusalén møødä Bernabé, mänitä mabøjpädøjc-hajxy jim yhamugøøyy maa ja'a tsajtøjcän, møødä Dioswiingueypähajxy, møødä tsajtøjc-wiindsønñhajxy. Mänitä Pablohajxy miädiaacy nebiatiä Dios hajxy hñajty tøø piuhbedyiijän.

⁵ Jimä fariseoshajxy näje'ebä. Tøø ja'a Diosmädia'agy hajxy hñajty miäbøjpä ja'a Jesucristocøxpä. Mänit hajxy tiānaayyø'cy. Mänit hajxy miānaañ:

—Tsipcøxpä mabøjpädøjc-hajxy yajcircuncidarhájpat, hoy hajxy jaduhñ quia'a jagä judíospä; weenä mädia'agy hajxy jaduhñ quiudiun̄ nebiä Moisés jecy yhanemiän —nømä fariseoshajxy miānaañ.

⁶ Mänitä Dioswiingueypähajxy yhamugøøyy møødä tsajtøjc-wiindsønñhajxy. Mänit hajxy tiägøøyy mädiaacpä waambatiä fariseoshajxy tøø miāna'añ.

⁷ Mänitä Pedro tiānaayyø'cy mädiaaccujc. Mänit yajcapxøøyy:

—Puhya'adiøjc, mnajuøøby hajxy jaduhñ coochä Dios jecy xwyiinguejxy coochä jäya'ayä Diosmädia'agy nyajwiingapxø'owät, ja'a hajxy ca'a judíospä, coo hajxy miäbøgät, jaduhñ hajxy ñähwa'ads quiuhwá'adsät.

⁸ Haa ja'a Dios, xyhixyhájtämä njootä njuøhñdyhajxy. Coo ja'a Diosmädia'agy hajxy jaduhñ miäbøjcy, ja'a ca'a judíospä, mänitä Dioshespíritu hajxy mióoyyäbä, nebiä Dios ja'a yhEspíritu hajxy tøø xmióoyyäm højtshájtäm. Jaduhñä tøyhajt hajxy nmøødhájtäm coo ja'a nähwaatstaact hajxy jaduhñ piaatpä, neby højts tøø nbáatäm.

⁹ Tu'cuhdujtä Dios hajxy tøø xyajñähwaats tøø xyajcuhwáatsäm møødä cajpä judíospähajxy. Coo hajxy jaduhñ tøø miäbøjpä, paadiä piojpä quiädieeyhajxy tøø ñähwaatspä.

¹⁰ Pero jaduhñ mijts mja mäna'añ coo ja'a cajpä judíospä ja'a mädia'agy hajxy jaduhñ quiudiúumbät nebiä Moisés jecy yhanemiän. Ni højts pedyii nga'a cudiúunäm, højts judíoshájtäm. Ni højtsä nhapä ndeedyhajxy hijty jegyhajty hoy quia'a cudiúunämbä. Coo mijts jaduhñ mja mäna'añ coo ja'a

cajpä judíoshajxy jaduhñ quiudiúumbät, jaduhñ hajxy myajcähxø'ogy nebiä Dios ja'a miädia'agy hajxy mga'a mabøjcäbän.

¹¹ Pero jaduhñ hajxy nnajuøøyyäm coo ja'a Jesús hajxy tøø xñä'a ya-jnähwáatsäm tu'cuhdujt, møød højts judíospähájtäm, møødä cajpä judíoshajxy. Hojiotä Jesús jaduhñ miøødhajpy maa højtscøxphájtäm —nømä Pedro miänaañ.

¹² Mänitä mabøjpadøjc-hajxy miädiaacpådøøyy, ja'a hajxy hñajty jim tsänaabiä Jerusalén. Mänitä Pablohajxy tiägøøyy mädiaacpä møødä Bernabé nebiatiä Dios ja'a miäjaa hñajty tøø yajcähxø'ogy maa ja'a jäya'aguiøxpähajxiän, ja'a cajpä judíospähajxy, møød nebiatiä Pablo ja'a hoy-yagjuøøñäjatypä hajxy hñajty tøø tiuñ.

¹³ Coo ja'a Pablohajxy jaduhñ miädiaacpådøøyy, mänitä Santiago miänaañ: —Puhyä'adiøjc, huuc tunä mayhajt hajxy, huuc hamädoowhit hädaa mädia'agy hajxy.

¹⁴ Jaduhñä Simón tøø miädia'agy coo ja'a Dios ja'a hojiot miøødhajnä maa ja'a jäya'aguiøxpähajxiän, ja'a hajxy cajpä judíospä, møød coo ja'a Dios wyiimbiy pønjaty jaduhñ quiu'ughádäp.

¹⁵ Jaduhñ jim myiñ cujaay maa ja'a Diosmädia'aguiän nebiä profetadøjc-hajxy jecy quiapxy miädiaaquiän coo ja'a Dios hojiot hñajty miøødhada'añ maa ja'a jäya'aguiøxpähajxiän, ja'a hajxy cajpä judíospä. Jaduhñä profeta Amós jecy quiujahy quiuguee'ch

¹⁶ coo ja'a Dios jaduhñ miänaañ:

Nguexáambiøchä nguguexy coo ween jaduhñ yhanehm̄bä nebiä David jecy yhanehm̄iän,

¹⁷ jadúhñhøchä jäya'ayhajxy xwyiingudsähgø'owät, ja'a hajxy cajpä judíospä, pønjätyhøch tøø nwiimbiy cooçh je'e ngu'ughádät.

¹⁸ Jéquiänä Dios jaduhñ miänaañ coo jaduhñ yajtøjiada'añ.

¹⁹ Mänitä Santiago jiaac mänaañ:

—Tøyhajt jaduhñ nebiä Diosmädia'agy miäna'añän. Cab jaduhñ yhahixø'øyy coo ja'a mabøjpadøjc hajxy nhanéhm̄ämät, ja'a hajxy ca'a judíospä. Cab hajxy nnämäáyyänät coo højtsä nguhtdujt hajxy xpiahíxämät, højts judíoshájtäm.

²⁰ Jaduhñ mabøcypä, tsøc hajxy yajnäjaayøøyyäm coo hajxy jaduhñ quia'a tsú'udsät tijatiä jäya'ayhajxy tøø yoxy quepychechwiinduum, møød coo wiingto'oxiøjc hajxy quia'a møødmá'awät, møød coo animal hajxy quia'a tsú'udsät ja'a jañø'xíe'xypä, møød coo animalnø'ty hajxy quia'a hu'ug quia'a jøø'xät.

²¹ Jaduhñä Moisés jecy quiujahy coo højts jaduhñ nguhtdujthájtämät, højts judíoshájtäm. Jaduhñ højts wiindu'ugpoo'xxiøø nyajñähixøøyyäm maa ja'a tsajtøjcän wiinduhmyhagajpt.

²² Mänitä mabøjpadøjc-hajxy nägøxiä quiojyquiapxyhajty møødä Dioswi-inguexyphajxy, møødä tsajtøjc-wiindsøñhajxy, coo ja'a cunocy hajxy jim quiéxät Antioquia, coo ja'a Pablohajxy miøødhadøøjat møødä Bernabé. Mänitä Judashajxy jaduhñ wyiinguejxä møødä Silas coo hajxy jaduhñ quiunocyhádät. Jimä Judashajxy hñajty quiopc-haty møødä Silas maa ja'a tsajtøjcän. Mejtstu'u ja'a Judas hñajty xiøhaty møødä Barsabás.

²³ Mänitä mabøjpadøjcä nocy hajxy yhädiuñ. Mänitä Pablo ja'a nocy hajxy yajcø'ødägøøyyä coo hajxy miänøcxät Antioquia. Jaduhñä nocy hajxy quiujahy:

“Puhyä'adiøjc, mijts hädaa nocy nyajñäguejxyp, mijts ca'a judíospä, coo ja'a Diosmädia'agy hajxy tøø mmabøcy, pønjaty jim tsänaaby Antioquia, møød jim

Siria, mөөд jim Cilicia. Højts hädaa nocy tөө nhädiuñ, højts mähöjpädöjc yaa hijpä Jerusalén, mөөдä Dioswiinguexyypähajxy, mөөдä tsajtöjc-wiindsönhajxy.

²⁴ Tөө højts jaduhñ nmädoyhaty coo højtsä nmägu'ughajpähajxy näje'e jim tөө yhoy maa mijtsän. Ca'a yhöjts jaduhñ nguejx; hamdsoo joot hajxy jim tөө ñöcxy. Jaduhñ højts tөө nmädoyhaty coo mijtsä häna'c xjia wi'i wyiinhöøna'añ, ja'a hajxy jim tөө yhöyyäbä maa mijtsän, mөөд coo mijts näje'e tөө myajwiinhöøñ.

²⁵ Coo mijtsä häna'c jaduhñ xjia wi'i wyiinhöøna'añ, paady højts tөө ngojyquiapxyhaty coo højtsä nmägu'ughajpähajxy nämetsc jim nguéxät maa mijtsän näguipxy mөөдä Pablo mөөдä Bernabé. Højtsä Pablo njaanč tehñ chojpy njaanč tehñ pia'häyooby mөөдä Bernabé.

²⁶ Jaanč tehñ yhooyä Pablo ja'a Jesucristo hajxy miäduñ. Coo hajxy jaduhñ hoy miäduñ, paady hajxy mayhooc tөө jia wi'i yagho'oga'añii.

²⁷ Ja'a Judas højts nwiinguejxyp mөөдä Silas coo hajxy jim ñöcxät maa mijtsän. Hajäya'ayhaam mijts jaduhñ xmiöödmädia'aga'añ waambaty højts cham njaay ngueečhän nocyquioxp.

²⁸⁻²⁹ Jaduhñ højtsä Dioshespíritu tөө xmiöödcöjyquiapxyhaty coo mijts nhané'emät coo hajxy mga'a tsú'udsät mädyijaty animal ja'a häna'c tөө yoxy quepychechwiinduum, mөөд coo animal hajxy mga'a tsú'udsät ja'a jañö'xiee'xypä, mөөд coo wiingto'oxiöjc hajxy mga'a mөөdmá'awät. Coo hajxy jaduhñ mgudiünät, jaduhñ hajxy mniyaghoyö'öwöjät. Cabä wiingcuhdujt yaghane'ema'añ. Ja'a Dios hajxy jaduhñ xcwieendähädäp." Jaduhñä mähöjpädöjcä nocy hajxy yhädiuñ, ja'a hajxy hänajty jim hijpä Jerusalén.

³⁰ Mänitä Pablohajxy jim tiu'uböjcy mөөдä Bernabé, mөөдä Judas, mөөдä Silas. Mänit hajxy jim ñöcxy Antioquía. Coo hajxy jim miejch, mänitä mähöjpädöjc-hajxy nägöxiä jim yhamugöøyy maa ja'a tsajtöjcän. Mänitä Pablo ja'a mähöjpädöjcä nocy hajxy yajcö'ödägöøyy.

³¹ Mänitä mähöjpädöjcä nocy hajxy quiapxy. Mänit hajxy jiaanč tehñ jiootcugöøyy je'eguiöxpä coo hajxy jaduhñ quiapxmöcpöjcä nocyhaam.

³² Mänitä Diosmädia'agy hajxy yajwiingapxöøyyä. Ja'a Judashajxy jaduhñ capx mөөдä Silas. Yoñ hajxy jaduhñ quiapxy miädiaacy. Diosquexiä Judashajxy hänajty mөөдä Silas nämetsc.

³³ Maxiöö ja'a Judashajxy jim yhiyty Antioquía mөөдä Silas. Coo hajxy hänajty wyiimbidaannä, mänit hajxy ñämaayy coo ja'a Dioscujú'uyäp hajxy jim nöcxy yecy Jerusalén. Mänitä Judashajxy ñöcxnä Jerusalén maa hajxy hänajty tөө yhuuc tsohndaacpän.

³⁴ Pero cabä Silas ja'a Judas pianöcxy. Jim miähmööyy Antioquía

³⁵ näguipxy mөөдä Pablo mөөдä Bernabé. Mänitä Diosmädia'agy hajxy tiägöøyy yajwiingapxööbiä näguipxy mөөдä mähöjpädöjc-hajxy nämaybiä.

³⁶ Mänitä Pablo ja'a Bernabé cujecy ñämaayy:

—Jam jadähooc wädíjtäm majatiä Diosmädia'agy hoy nyajwá'xäm. Jamä mähöjpädöjc cuhíxäm pö tehngahnä ja'a Diosmädia'agy hajxy hoy pianöcxy.

³⁷ Jia nähadsoow ja'a Bernabé jaduhñ. Mänit jaduhñ jia mänaañ coo ja'a Juan Marcos hajxy cu miödhajty.

³⁸ Pero cabä Pablo jaduhñ miänaañ coo ja'a Juan Marcos hajxy jaduhñ miödhädät je'eguiöxpä coo ja'a Juan Marcos hajxy hänajty tөө piuhwa'ačhi mänaa hajxy hänajty jim wiäditiän Panfilia maa ja'a Diosmädia'agy hajxy hänajty yajwa'xiän.

³⁹ Coo ja'a Pablo hänajty quia'a tu'ugmädia'aguiä mөөдä Bernabé, paady hajxy mänit ñiwia'xä. Mänitä Bernabé ja'a Marcos wiowö'cy. Mänit hajxy

tiägøøyy barcojooty. Mänit hajxy jim̃ ñøcxy mejyhawiimb maa ja'a naax hānajty xiøhatiān Chipre.

⁴⁰ Haa ja'a Pablo, mänit je'eduhñ miānaañ cooc ja'a Silas hānajty miøødwädita'añ. Mänitā mǎbøjpädøjcā Dios hajxy miānuu'xtaacy coo ja'a Pablohajxy piuhbedøøjät. Mänitā Pablohajxy tiu'ubøjnā møødä Silas.

⁴¹ Mänit hajxy jim̃ ñaxøøyy Siria møød jim̃ Cilicia. Majatiä Pablohajxy hānajty wiädity, jim̃ä mǎbøjpädøjc hajxy hānajty quiapxmøcpøcy.

16

¹ Mänitā Pablohajxy jim̃ ñøcxy Derbe. Coo hajxy jim̃ tiu'ubøjcumbä, mänit hajxy jim̃ ñøcxcumbä Listra. Jim̃ä craa hajxy tu'ug hoy piaady. Timoteo ja'a craa hānajty xiøhaty. Miäbøjpiä Timoteo ja'a Diosmädia'agy hānajty. Ja'a Timoteo ja'a tiajjä, judía hānajty je'e. Jaanä miäbøjpiä Diosmädia'agy hānajty je'ebä. Ja'a Timoteo ja'a tieediä, ca'a hānajty je'e jiudíosä.

² Quiumaabiä mǎbøjpädøjcā Timoteo hajxy hānajty, ja'a hajxy hānajty jim̃ tsānaabiä Listra møød jim̃ Iconio.

³ Mänitā Pablo ja'a Timoteo ñāmaayy coo hānajty miøødwädita'añ. Pero cahnä Timoteo hānajty yajcircuncidarhaty. Mänitā Pablo ja'a Timoteo yajcircuncidarhajtä, jaduhñä judíosahajxy jaduhñ quia'a jootmä'adät. Hix, ñajuøøbiä judíosahajxy hānajty nägøxiä coo ja'a Timoteo hānajty quia'a yajcircuncidarhatyñä. Coo ja'a Timoteo ja'a tieedy hānajty quia'a judíosä, paadiä Timoteo hānajty quia'a yajcircuncidarhatyñä.

⁴ Mänitā Pablohajxy tiägøøyy wädijpä cajpt-cajpt møødä Silas møødä Timoteo. Majaty hajxy hānajty wiädity, jim̃ä mǎbøjpädøjc hajxy hānajty yajmädoyhaty waambatiä Dioswiinguexyypāhajxy hānajty tøø yhane'emiän, møødä tsajtøjc-wiindsønñhajxy, ja'a hajxy hānajty jim̃ hijpä Jerusalén.

⁵ Jaanä jaduhñä Pablo ja'a mǎbøjpädøjc hajxy hānajty quiapxmøcpøjpä wiinduhmyhagajpt, paadiä mǎbøjpädøjcā Diosmädia'agy hajxy hānajty hoy jiaac tehñ miäbøcy. Møød hajxy hānajty jiaac tehñ miayø'øy jabom-jabom.

⁶ Pero cabä Pablo cuhdujt hajxy choj mooyyā ja'a Dioshespíritäm coo ja'a Diosmädia'agy hajxy jim̃ nøcxy yajwa'xy Asia. Paady hajxy jim̃ jiaac wädijty Frigia møød jim̃ Galacia.

⁷ Mänit hajxy jim̃ miejch maa ja'a naax hānajty xiøhatiän Misia. Mänit hajxy jia mānaañ coo hajxy jim̃ ñøcxät maa ja'a naax hānajty xiøhatiän Bitinia. Pero cabä Jesús yhEspíritu jaduhñ miānaañ coo hajxy jim̃ ñøcxät.

⁸ Coo hajxy jim̃ ñaxøøyy Misia, mänit hajxy jim̃ miejch maa ja'a cajpt hānajty xiøhatiän Troas.

⁹ Mänitcoodsä Pablo jäya'ay tu'ug wyiinhijxy. Jim̃ hānajty choon maa ja'a naax hānajty xiøhatiän Macedonia. Tānaaby hānajty jaduhñ. Mänitā Pablo ñāmaayyā: “Huuc tunä mayhajt, jam̃ højtsä Diosmädia'agy yajwiingapxøøyyäc jim̃ Macedonia.” Jaduhñä Pablo miānuu'xtaacä.

¹⁰ Coo ja'a Pablo jaduhñ wyiinhijxy, mänit højts jaduhñ nwiinmaayy coo højts jim̃ njaančh nøcxät Macedonia. Jaduhñ højts hānajty nwiinjuø'øy coo højtsä Dios hānajty tøø xwyiinguexy coo højtsä Diosmädia'agy jim̃ nøcxy nyajwa'xy.

¹¹ Mänit højts hoy nbarcotägø'øy. Mänit højts jim̃ ndsohñ Troas. Mänit højts nnøcxy mejyhawiimb maa ja'a naax hānajty xiøhatiän Samotracia. Mejihagujcā naax jaduhñ. Cujaboom højts jadähooc nbarcotägøøguiumbä. Mänit højts njaac nøcxy mejyhawiimb maa ja'a cajpt hānajty jaduhñ xiøhatiän Neápolis. Coo højts jim̃ nmejch mejyhawiimb, mänit højts nbarcopädsøømnä.

¹² Mänit højts nnøcxumbä maa ja'a cajpt hānajty jaduhñ xiøhatiän Filipos, jim Macedonia-naaxpa'a. Jimä Rómabä jāya'ayhajxy hānajty nāmāy chāna'ay. Jim højts jaduhñ maxiøø nhijnä.

¹³ Coø ja'a poo'xxiøø yhabaaty, mänit højts jim nnøcxy møjnøøba'a, jim cajtpa'a. Jimä judíos ja'a Dios hajxy hānajty naxy pia'ya'axy. Jimä to'oxiøjc-hajxy hānajty naje'e tøø yhamugø'ø. Mänit højts jim nhøxtaacy. Mänit højtsä jāya'ay ndägøøyy yajmøødmädiaacpä ja'a Diosmädia'agy, ja'a hajxy hānajty tøø yhamugø'øyābä. Haagä to'oxiøjc hajxy hānajty je'e.

¹⁴ Tu'jāya'ay hānajty xiøhaty Lidia. Jim hānajty choon maa ja'a cajpt hānajty xiøhatiän Tiatira. Hucywyit hānajty tioo'py, ja'a hojiatypä. Wyi-ingudsähgøøbiä Lidia ja'a Dios hānajty. Mänitä Dios ja'a Lidia yajmābøjcy waambatiä Pablo hānajty yajnähixø'ø.

¹⁵ Mänitä Lidiahajxy hoy ñäbety nägøxiä mäduhñtiä hajxy hānajty jim yhity maa ja'a tiøjcän. Mänit højtsä Lidia xñāmaayy:

—Pø mmānaamb hajxy jaduhñ coøchä Dios ja'a miädia'agy hamuumdu'joot nmābøjcä, jam hajxy jim mejtsta'ag maačhä ndøjcän —nøm højts jaduhñ xñāmaayho'cy.

Mänit højts jim hoy nmejtsta'agy.

¹⁶ Wiinghooc højts hānajty jim nnøcxy maa ja'a Dios hajxy hānajty pia'ya'axiän. Tu'haamnøcxpä, jim højtsä cäxyiihäna'c tu'ug hoy nbaady. Cudoogø'ø hānajty je'eduhñ. Ja'a haxøøgpä hānajty miøød. Cuwiinmahñdy hānajty je'eduhñ. Cøxiä hānajty jaduhñ ñajuø'ø tijaty hānajty jadāanäp tunāanäp. Majiatiä xädø'øñ hānajty ñāmečhii coø hānajty jaduhñ cøxiä ñajuø'ø. Coø xädø'øñ hānajty mio'oyii, cøxiä wyiindsøn hānajty miøodiägach, mäduhñtiä hānajty quianarhaty.

¹⁷ Mänit højtsä cäxyiihäna'c xpiadu'ubøjcy høxhaam. Mänit tiägøøyy yaaxpä jojpä:

—Yø'ø jāya'ayhajxy, ja'a Dios hajxy miäduumby, ja'a maas møc cuhdujt møødpä. Mijts hajxy xyajwiingapxø'øwaamb neby hajxy mnähwa'ads mguhwá'adsät.

¹⁸ Maxiøø højtsä quixy jaduhñ xpiawädipty yáaxäp wāanäp. Coø ja'a Pablo jaduhñ chíjpänä coø ja'a quixy jaduhñ wyi'i ya'axy, mänitä Pablo ñāwa'wiimbijty. Mänitä Pablo ja'a haxøøgpä yhøxquejxy:

—Ja'a Jesucristocøxpøch miič nhøxquexy; pädsøm jiihy maa yø'ø cäxyiihäna'cän —nømä Pablo miānaañ.

Mänitä haxøøgpä jaduhñ jiaanč pädsøømy.

¹⁹ Coø ja'a quixiä wyiindsøn hajxy jaduhñ yhipty coø ja'a quixy hānajty jaduhñ tøø ñähwa'ačhii, mänit hajxy jaduhñ ñajuøøyy coø ja'a quixy hānajty jaduhñ quia'a canarhadaannä, møød coø xädø'øñ hajxy hānajty quia'a mo'owāanänä. Mänitä Pablohajxy miajtsä møødä Silas. Mänit hajxy yajnøcxä haguyc.

²⁰ Mänit hajxy jaduhñ ñäxø'øwøøyyä:

—Hädaa judíoshajxy, cajptyajma'p hajxy jaduhñ.

²¹ Wiingcuhdujt højts xjia wi'i yajnähixø'øwāanäm. Cab hajxy hawiinmats nmābøjcämät, je'eguiøxpä coø hajxy jim ndsøhñäm Roma —nømä Pablohajxy ñänøømä.

Ja'a quixiä wyiindsøn hajxy jaduhñ mänaañ.

²² Mänitä Pablohajxy ñäbädø'cä ja'a cú'ugäm. Mänitä cuduunghajxy miānaañ coø ja'a Pablo ja'a wyithajxy yajtsíjxät, møød coø hajxy wiobho'ogøøjät paxyhaam.

²³ Coo ja'a Pablohajxy hānajty tōø wiobho'ogyii, mānit hajxy hoy chumyii. Mānitā tsumyjiāya'agwieendāhajpā yhanehmā coo ja'a Pablohajxy hoy cwieendāhadōjāt.

²⁴ Mānit hajxy hoy piāda'agyii hadsihxtuum jiiby pujxtōgooty. Pu'uyhawa'adsootiā tiecyhajxy jaduhñ yhame'mújcāxā.

²⁵ Cuptsuhmdā hānajty jaduhñ, jiibiā Pablo ja'a Dios hajxy hānajty pia'høy pia'ya'axy. Jiibiā miādsumyjiāya'ayhajxy hānajty jaduhñ yhamādoowhity.

²⁶ Mānitā hujx mōc ñajxy. Høxtā tsāyuuyy ja'a pujxtōjc jaduhñ. Cōjxā tōghaaw jaduhñ yhawa'ačh. Mōødā cadena jaduhñ cōjx pioty maa ja'a tsumyjiāya'ayhajxy hānajty jaduhñ quiuxochān.

²⁷ Coo ja'a tsumyjiāya'agwieendāhajpā mia'abiādō'cy, mānit jaduhñ yhiijxy coo ja'a tōghagō'ow hānajty jaduhñ tōø quiōxy hawa'ačh. Mānit jaduhñ miānaañ cooc tyijy ja'a tsumyjiāya'ayhajxy tōø quiōxy pāyō'ogy. Mānitā espada jiuu'ty. Niyagho'ogāanāp hānajty jaduhñ hamdsoo je'eguiōxpā coo hajxy cu piāyō'cy.

²⁸ Mānitā Pablo yaaxy:

—Ca'a jaduhñ mniyagho'ogyii. Chaa højts jaduhñ nāgōxiā. Caj pōñ tōø piāyō'ogy —nōmā tsumyjiāya'agwieendāhajpā ñāmaayyā.

²⁹ Jaančh tehñ chāhgōby hānajty je'eduhñ. Høxtā tsāyuuby hānajty je'eduhñ. Mānitā jōøn hoy quioñ. Pāyō'oguiā tiōjtāgōōguiumbā. Mānitā Pablohajxy hoy wyiinjiāda'agyii mōødā Silas.

³⁰ Mānit hajxy yhōxwoobādsōmā pujxtōgooty. Mānit hajxy miāyajtōōwā:

—Wiindsōndōjc, ja wi'i ñāhwa'adsāambōch hōōch. Nébyhōch jaduhñ njatcō'owat.

Ja'a tsumyjiāya'agwieendāhajpā jaduhñ mānaan.

³¹ Mānitā Pablohajxy yhadsooyy:

—Coo hajxy jaduhñ mmābōgāt ja'a Wiindsōñ Jesúscōxpā, jaduhñ hajxy mnāhwā'adsāt māduhñtiā hajxy jim mhity maa ja'a mdōjcān.

³² Mānitā tsumyjiāya'agwieendāhajpā ja'a Dioscapxy ja'a Diosmādia'agy hajxy hoy yajwiingapxō'oyii māduhñtiā hajxy hānajty jim yhity maa ja'a jiōøn maa ja'a tiōjcān. Ja'a Pablohajxy jaduhñ māyajwiingapxōoyy.

³³ Moññā hānajty jaduhñ. Mānitā Pablohajxy hoy yajtsi'iyii mōødā Silas ma-jaty hajxy hānajty jaduhñ tōø chaačhō'oyān. Ja'a tsumyjiāya'agwieendāhajpā jaduhñ māyajtsiīw. Mānit hajxy nāgōxiā hoy ñābety māduhñtiā hajxy hānajty jiiby yhity maa ja'a jiōøn maa ja'a tiōjcān.

³⁴ Mānitā Pablohajxy jim wioonōcxā maa ja'a craa tiōjcān. Mānit hajxy ya-jcaayy yaghuucā. Jaančh tehñ xioondaac ja'a craahajxy jaduhñ je'eguiōxpā coo ja'a Dioscapxy ja'a Diosmādia'agy hajxy hānajty tōø miābōcy.

³⁵ Coo jioōyoyy, mānitā cuduungā policia hajxy quiejxy maa ja'a pujxtōjcān. Mānitā policia ja'a tsumyjiāya'agwieendāhajpā hajxy hoy ñāma'ay coo ja'a Pablohajxy ween yhōxmačhii mōødā Silas.

³⁶ Mānitā Pablo hoy ñāmaadiāgachii:

—Tōōchā cuduunghajxy jaduhñ xyhane'emy coōch mijts nhōxmādsāt. Nōcx hajxy jaduhñ jootcujc.

³⁷ Mānitā Pablo ja'a policia ñāmaayy:

—Højts, Roma højts nxōnaxy. Jaduhñ højts cuhdujt nmōødā nebiā Rómabā jāya'ayhajxy miōōdān. Hoy højts jim nja xōnaxy Roma, tōø højtsā cud-uung xyajwobho'ogyii hijxwiinduum. Hoy højts tii pojpa tii cādieey nga'a jagā mōødā, tōø højts xyajtsumyii. Hoorā, tsāhdiuumbā cuduunghajxy jaduhñ coo højts jaduhñ tōø xchaačhtiuñ. Paady højts hamee'ch xjia wi'i

yaghøxmadsa'añii. Ween højts min xyhamdsoo høxmach —nømä policíahajxy ñämaayyä.

³⁸ Mänitä cuduunghajxy hoy yhawáanäxä waambatiä Pablo hñajty tøø miäna'añ. Coø ja'a cuduunghajxy jaduhñ miädooyy coogä Pablohajxy hñajty jim xiønaxy Roma, mänit hajxy chähgøøbiøjcy.

³⁹ Mänitä Pablohajxy hoy ñäma'ayii møødä Silas:

—Huuc tunä mayhajt hajxy, højts huuc mämée'xäc —nømä cuduunghajxy hoy miäna'añ.

Mänitä Pablohajxy yhøxmájtsänä. Mänit hajxy miänuu'xtaacä coø hajxy jim chóonät Filipos.

⁴⁰ Coø ja'a Pablohajxy piujxtøjpädsøømy, mänit hajxy jim ñøcxy maa ja'a Lidia tiøjcän. Mänitä mæbøjpädøjc-hajxy jim yhamugøøyy. Mänit hajxy quiapxmøcpøjcä ja'a Pablo. Mänitä Pablohajxy jim chohñnä møødä Silas.

17

¹ Mayhagajptä Pablohajxy ñaxøøyy, møød jim Anfípolis, møød jim Apolonia. Mänit hajxy jim miejch maa ja'a cajpt hñajty xiøhatiän Tesalónica. Jimä judíos ja'a chajtøjc-hajxy hñajty tu'ug.

² Jaduhñä Pablo hñajty quiuhdujthaty coø jaduhñ chajtøjyo'oy. Wiindu'ugpoo'xxiøø hñajty jaduhñ jim ñøcxy maa ja'a tsajtøjcän. Tägøøghoocä Pablo jim yhooyy maa ja'a tsajtøjcän jim Tesalónica. Jimä Pablo ja'a jäya'ay hñajty miøødcapxy miøødmädia'agy. Ja'a Diosmädia'agy hajxy hñajty yaj-capxiøøby.

³ Jaduhñä Pablo hñajty quiapxtøy coø jaduhñ jim myiñ cujaay maa ja'a Diosmädia'aguiän coogä Dios ja'a Mesías hñajty yaa quiexa'añ hädaa yaabä naaxwiin, møød cooc hñajty yho'oga'añ, møød cooc hñajty jiu-jypiøjtätsa'añ:

—Ja'a Jesúshøch mijts nyajmøødmädiaacypy. Jue'e je'e, ja'a Mesías je'e, ja'a Dios jecy ñänøømäbä cooc hñajty yaa quiexa'añ ho'pä —nømä Pablo miänaañ.

⁴ Näje'e ja'a judíoshajxy miäbøjcy. Nämayyä jäya'ayhajxy miäbøjpä, ja'a hajxy hñajty ca'a judíospä, ja'a Dios hajxy hñajty wiingudsähgøøbiä. Nämayyä to'oxiøjc-hajxy miäbøjpä, pønatiä ñihyhaphajxy hñajty jim tuungmøød haguyc. Mänitä Pablohajxy miägu'ugpøjcä møødä Silas, ja'a jäya'ayhajxy hñajty tøø miäbøquiäbä.

⁵ Coø ja'a Pablohajxy jaduhñ miägu'ugpøjcä, mänitä judíoshajxy jiootma'ty, ja'a hajxy hñajty ca'a mæbøjpä. Mänitä haxøøghäna'c-hajxy hoy wioomugyii. Mänit hajxy ñämaayyä coø hajxy ween quiajptyajma'ady. Mänitä haxøøgjäya'ayhajxy miädoyhajty cooc tyijy ja'a Pablohajxy hñajty jim tøø miech maa ja'a Jasón ja'a tiøjcän. Jue'e ja'a haxøøgjäya'ayhajxy hñajty jiatcø'øwa'añ møødä judíoshajxy, jimä Pablohajxy hñajty yajnøcxa'añii haguyc. Mänitä Jasón ja'a tiøjc hadsip yhajahmdúutäxä.

⁶ Coø ja'a Pablohajxy jim quia'a paatä, mänitä Jasónhajxy jim wyitsnøcxä haguyc hadsip, møødä mæbøjpädøjc-hajxy näje'e. Mänitä judíoshajxy tiägøøyy yaaxpä jojpä, ja'a hajxy hñajty ca'a mæbøjpä:

—Ja'a Pablohajxy, cajptyajma'pä hajxy jaduhñ wiädity homiaajä. Tøø hajxy yaa miejtpä.

⁷ Jim hajxy miejtsta'agy maa ja'a Jasón ja'a tiøjcän, paadiä Jasón ja'a pojpä miøødäbä. Homiaajä Pablohajxy jaduhñ wiädity, jaduhñä cu'ug hajxy jiojcapxø'oy coø ja'a gobiernä miädia'agy hajxy quia'a mæbøjcänät, ja'a jim møjhajpä Roma. Jaduhñä Pablohajxy yhøhñdaacpä cooc tyijy ja'a Jesús jaduhñ

miøjhajpä nebiä gobiernän —nømä judíoshajxy miänaañ, ja'a hajxy hñajty ca'a mæbøjpä.

⁸ Coø ja'a cu'ughajxy jaduhñ miädooyy møødä møjhøjpähajxy, mänit hajxy tiägøøyy yaaxpä waambä.

⁹ Mänitä Jasónhajxy ñiñähjuudiutä møødä mæbøjpädøjc-hajxy, ja'a hajxy hñajty tøø miächíjábä. Mänit hajxy yhøxmájtsänä.

¹⁰ Coø quioodsøøyy, mänitä Pablohajxy ñämaayyä møødä Silas coø hajxy jim chónat, coø hajxy ñócxät jim maa ja'a cajpt hñajty xiøhatiän Berea. Ja'a mæbøjpädøjc-hajxy jaduhñ mänaañ. Mänitä Pablohajxy jim jiaançh nøcxy Berea. Coø hajxy jim miejch, mänit hajxy ñócxy maa ja'a judíos chajtøjc-hajxiän.

¹¹ Mänitä Diosmädia'agy hajxy tiägøøyy yajñähixøøbiä. Coø ja'a judíoshajxy jaduhñ miädooyy, mänit hajxy jaduhñ jiootcugøøyy. Cab hajxy jaduhñ jiootma'ty nebiä miäjudíoshajxy hñajty tøø jiootma'adiän jim Tesalónica. Mänitä Diosmädia'agy hajxy tiägøøyy capxtaACPä jabom-jabom pø jaançh tøyhajt hñajty jaduhñ nebiä Pablo hajxy hñajty miädia'aguiän.

¹² Paady hajxy jaduhñ may miäbøjcy. Møødä jäya'ayhajxy may miäbøjpä, ja'a hajxy hñajty ca'a judíospä, møødä møjhøjpädhøjc-hajxy, ya'adiøjc-hajxy møødä to'oxiøjc-hajxy.

¹³ Ja'a jäya'ayhajxy hñajty jim tsänaabiä Tesalónica, ja'a hajxy judíospä, coø hajxy jaduhñ miädoyhajty coø ja'a Pablo ja'a Diosmädia'agy hñajty jim yajwa'xy Berea, mänit hajxy jiootma'ty. Mänitä jäya'ayhajxy Beréabä hoy jiojcapxø'øyyi coø ja'a Pablo ja'a miädia'agy quia'a mæbøjcäxät.

¹⁴ Ja'a jäya'ayä Diosmädia'agy hajxy hñajty mæbøjpä jim Berea, mänit hajxy miänaañ coø ja'a Pablo jim chónat, coø wiingtuum ñócxät mejypia'a. Paady hajxy jaduhñ miänaañ je'eguiøxpä coø hajxy hñajty chähgø'øyy coø ja'a Pablo cøxypänejpä tiunøjät. Coø ja'a Pablo jim jiaançh tsohñ Berea, jimä Silashajxy miähmøøyy møødä Timoteo.

¹⁵ Yajmøødquejxä ja'a Pablo ja'a mæbøjpädøjc nämetsc nädägøøg. Coø ja'a Pablohajxy jim miejch mejypia'a, mänit hajxy biarcotägøøyy. Mänit hajxy ñócxy barcojooty maa ja'a cajpt hñajty xiøhatiän Atenas. Coø hajxy jim miejch, mänitä Pablo jiamioødhajxy wyiimbijnä. Mänitä Pablo capxy jim quiejxy Berea coø ja'a Silashajxy jim paquiä ñócxpät Atenas møødä Timoteo, coø ja'a Pablo hajxy jim piäadät.

¹⁶ Jimä Pablo ja'a Silas hñajty yhäixy Atenas møødä Timoteo, mänitä Pablo yhiixy coø tsaasaandä hñajty jim jiaançh tehñ miayyä cajptooty. Je'e ja'a cu'ughajxy hñajty wyiingudsähgøøby. Coø ja'a Pablo jaduhñ yhiixy, mänit jiaançh tehñ jiootmayhajty.

¹⁷ Naxiä Pablo hñajty jim ñócxy maa ja'a judíos chajtøjc-hajxiän. Ja'a Jesucristocøxpä ja'a Pablo hñajty jim yajcapxy yajmädia'aguiø'øyy møødä judíoshajxy, møødä jäya'ayhajxy ca'a judíospä, ja'a Dios hajxy hñajty wiingudsähgøøbiä. Jabom-jabomä Pablo hñajty jim ñócxy cajptcujc. Møød jimä Pablo ja'a Jesucristocøxpä hñajty yajcapxy yajmädia'aguiøøbiä møødä cu'ug, ja'a hajxy hñajty jim yohby najxpä.

¹⁸ Mänitä jäya'ayä Pablo hajxy näje'e wyiingumedsøøyy. Cujwa'xy hajxy hñajty yhabøcy ja'a epicureodøjcä miädia'agy. Møød kujwa'xy hajxy hñajty yhabøjpä ja'a estoicodøjcä miädia'agy. Mänit hajxy näje'e miänaañ:

—Yø'ø craa, jaançh tehñ yajcumayaamb yø'øduhñ cooc tyijy jiaançh tehñ yhøxpøquiä. Pero cap yø'øduhñ tii ñä'ägädä jaty —nømä Pablo jaduhñ ñänøømä.

Mänitä wiinghäna'c-hajxy miänaañ:

—Jäguem yø'ø craa chooñ. Wiingdiosäda'a miädiaacypy.

Paady hajxy jaduhñ miänaañ, je'eguiøxpä coo ja'a Pablo ja'a Jesucristo hñajty miädia'agy, cooc hajxy hoy xñähho'túutäm, møød cooc jadähooc jiu-jypiøjtägajch.

¹⁹ Mänitä Pablo jim wioonøcxä maa ja'a tunhuung hñajty xiøhatiän Areópago. Jimä jäya'ayhajxy hñajty may tøø yhamugø'øy. Mänitä Pablo ñämaayyä:

—Højts hawáanäc tii miich jaduhñ mmädiaacypy hawiinjemybiä.

²⁰ Jaanç tehñ wyiing miich jaduhñ mmädia'agy. Højts capxwíjjäc neby jaduhñ miädia'agytiağø'øyän —nømä Pablo miäyajtøøwä.

²¹ Hix, ja'a jäya'ayhajxy hñajty jim tsänaabiä Atenas, møødä jäya'ayhajxy hñajty jim hadsänaabiä, jaduhñ hajxy hñajty quiuhdujthaty coo hajxy hñajty cøxiä wiinä miädoſa'añ, ja'a hñajty hawiinjemybiä.

²² Mänitä Pablo tiänaayyø'cy cu'ughagujc. Mänit miänaañ:

—Mägu'ughajpädøjc, mijts yaa tsänaabiä Atenas, tøøch jaduhñ nhixy coo mijtsä tsaasaandä madiu'u mwiingudsähgø'øy.

²³ Mayhitä wiingudsähgøødiaact hajxy mmøødä. Tøøchä altar tu'ug nhixy coo letra jaduhñ yuugjaay miøødä: “Jii ja'a Diosäda'a tu'ug, cahnä pøn yhixyñä. Je'e yhaltar hädaa.” Hoorä, mwiingudsähgøøby yø'ø Dios hajxy jaduhñ, hoy hajxy mga'a jagä hixyhatyñä. Pues je'eçh mijts jaduhñ nya-jmøødmädiaacypy.

²⁴ 'Ja'a Dióshøch jaduhñ nmädiaacypiä, cøxiä je'e yhädiuun møød hädaa yaabä naaxwiimbä, møød tijaty yaa hijp. Wiindsønhaip je'e jim tsajpootyp møød hädaa yaabä naaxwiin. Cøxiä wiinä jaduhñ yhane'emy homiaajä. Cab jaduhñ jiiby chäna'ay tsajtøgooty, ja'a jäya'ayhajxy jaduhñ yhädiuumbiä.

²⁵ Cabä Dios tii yajmaajiaty. Cab jaduhñ miäna'añ coo højts nbuhbéjtämät. Pero jaaya'ay hajxy cøxiä xmióoyyäm tijaty hajxy nyajmaajiájtäm, møødä jugyhajt, møødä poj, cøxiä.

²⁶ 'Tu'ug jäya'ay ja'a Dios jecy yhädiuundsohñ. Je'e hajxy nägøxiä nhøjxhájtäm ndecyhájtäm mäduhñtiä hajxy yaa ndsänaayyäm hädaa yaabä naaxwiin wiinduhmyhagajpt. Cahnä Dios hajxy hñajty xyhädiuunäm, tøøyyäm hajxy hñajty xyajnähdíjjäm mänaa hajxy nmiin ngähwämät, maa hajxy ndsänaayy nhäyóowämät.

²⁷ Chojpiä Dios ja'a jioot jaduhñ coo hajxy nwiingudsähgøøyyämät, paady hajxy tøø xyhädiuunäm. Coo ja'a Dios hajxy hamuumdu'joot nba'yáaxämät, xyhadsóowäm hajxy jaduhñ.

²⁸ Hix, jaaya'ay hajxy xyagjugyhájtäm. Jaduhñ hajxy tøø xquiunúu'xäm coo hajxy ndsänaayy nhäyóowämät, møød coo hajxy nyohy nnáxämät. Jaduhñä yaabä jäya'ayhajxy näje'e tøø quiujaay coogä Dios hajxy xyhuunghájtäm.

²⁹ Tøyhajt jaduhñ coo ja'a Dios hajxy xyhuunghájtäm. Pero coo jäya'ayä jäya'ayhahädiuunnaxy hajxy yhädiuñ, jue'e hajxy yajtuumby, oro, møødä poobhoro, møødä tsaa. Cab jaduhñ yhahixø'øy coo jaduhmbä jäya'ayhahädiuunnaxy hajxy nwiingudsähgøøyyämät. Hix, ca'a Dyiosä je'e jaduhñ.

³⁰ Jegyhajty, cabä jäya'ayhajxy hijty ñajuø'øy pø jii Dios. Y cabä Dios hijty miøjpäda'agy coo hijty quia'a wiingudsähgø'øyii. Pero jäda'ahaty, tøø ja'a Dios hajxy xyhanéhmäm coo ja'a nhaxøøgcuhdujt hajxy nägøxiä nnajt-shixøøyyämät, mäduhñtiä hajxy yaa ndsänaayyäm hädaa yaabä naaxwiin.

³¹ Hix, tøø ja'a Dios wyiinmay coo hajxy nägøxiä xyajtøyhajtyegáanäm. Jaanä jaduhñ tøø wyiinmaabiä mänaa hajxy jaduhñ xyajtøyhajtyegáanäm.

Tøø ja'a Dios tu'jäya'ay yajnähdijy coo hajxy mänitxøøbä xya-jcueendäyegáanäm. Coö tu'jäya'ay jaduhñ yho'cy, mänitä Dios jaaya'ay yagjuypiojtägajch jadähooc. Coö jaaya'ay jaduhñ jiaanñ juyypiojtägajch, jaduhñä tøyhajt hajxy nmøødhájtäm coö jaaya'ay hajxy tøyhajt xyajcueendäyegáanäm mänitxøøbä —nømä Pablo miänaañ.

³² Coö ja'a cu'ughajxy jaduhñ miädooyy coö ja'a Pablo jaduhñ miänaañ cooc tu'jäya'ay hñajty tøø jiuypiojtägach, ja'a hñajty tøø yho'oguiäbä, mänitä Pablo hajxy näje'e ñäxiicy. Mänit wiinghänä'c-hajxy näje'e miänaañ:

—Mminäp yaa jadähooc. Njaac mädowaamby højts jaduhñ nej miich mmädia'aguiän —nømä Pablo ñämaayyä.

³³ Mänitä Pablo wyiimbijnä.

³⁴ Näje'e jäya'ayä Pablo hajxy pianøcxy. Miäbøjc hajxy jaduhñ. Tu'jäya'ay hñajty xiøhaty Dionisio. Møjhajp hñajty je'e jim maa ja'a Areópagon. Jaanä jaduhñä to'oxiøjc tu'ug miäbøjpä. Dámaris hñajty xiøhaty. Nämaj hajxy jaduhñ miäbøjcy.

18

¹ Mänitä Pablo jim chohñ Atenas. Mänit wiingtuum ñøcxy maa ja'a cajpt hñajty xiøhatiän Corinto.

² Jimä Pablo ja'a judío tu'ug miøødnibiaatä. Jue'e ja'a judío hñajty xiøhaty Aquila. Jim hñajty choon maa ja'a naax hñajty xiøhatiän Ponto. Jue'e tio'oxiøjc hñajty xiøhaty Priscila. Naam mech hajxy hñajty jim Corinto. Jim hajxy hñajty tøø chohnda'agy maa ja'a naax hñajty xiøhatiän Italia. Paady hajxy jim chohñ Italia, je'eguiøxpä coö ja'a gobiernä Claudio hñajty tøø yhane'emy coö ja'a judíoshajxy jim quiøxy tsóonät Roma. Mänitä Pablo jim ñøcxy cuhijxpä maa ja'a Aquilahajxy hñajty yhäñña'ayän.

³ Jue'e Aquilahajxy hñajty tiuunghajpy, loondø y hajxy hñajty yhädiuumby. Y ja'a Pablo, jaanä jaduhñ hñajty tiuungmøødäbä. Paadiä Aquila ja'a Pablo ñämaayy coö ja'a Pablo jim miøødtúnät. Mänitä Pablo jim miähmøøñä.

⁴ Wiindu'ugäsábado ja'a Pablo hñajty jim ñøcxy maa ja'a judíos chajtøjc-hajxiän. Jiibiä Pablo ja'a Diosmädia'agy hñajty yajwiingapxø'ø y ja'a Jesucristocøxpä, weenä jäya'ayhajxy jaduhñ miäbøcy, møødä judíoshajxy, møødä ca'a judíoshajxpä.

⁵ Mänitä Silashajxy jim miejch Corinto møødä Timoteo. Macedonia hajxy hñajty tøø chohnda'agy. Mänitä Pablo jaduhñ wyiinmaayy coö tu'tu'uuyy hñajty tiunaannä, coö ja'a Diosmädia'agyhajtä hñajty miäwäditaannä. Mänitä Pablo ja'a judíos tiägøøyy yajmøødmädiaacpä coogä Jesús hñajty ja'a Mesías, ja'a Dios hñajty jecy tøø yajnähdijjiäbä coö hñajty quixa'añ yajnähwaatspä.

⁶ Mänitä judíoshajxy jiootma'ty. Mänit hajxy miänaañ cooc tyijy ja'a Pablo hñajty yhöñda'agy. Mänitä Pablo ja'a wyit wyiinxijty. Jaduhñä hijxtahnd yejcy coö ja'a judíos wyiinmahñdyhajxy hñajty quia'a hoyyä. Mänitä Pablo miänaañ:

—Hamdsooyyä pojpa hajxy jaduhñ mmøødä coö hajxy jaduhñ mga'a nähwa'adsa'añ. Paady hajxy jaduhñ mga'a nähwa'adsa'añ coö haxøøgwiinmahñdy hajxy mmøødä. Ca'a yhöøchä pojpa jaduhñ nmøød coö hajxy mga'a nähwa'adsa'añ. Cábøch mijtsä Diosmädia'agy nyajwiingapxø'øwaañnä. Ja'a jäya'ayhajxy ca'a judíospä, je'eñ hajxy jaduhñ nyajwiingapxø'øwaañnäp —nømä Pablo ja'a judíos ñämaayy.

⁷ Mänitä Pablo chajtøjpädsøømy. Mänit jim ñøcxy maa ja'a craa Ticio Justo tiøjcän, jim tsajtøjnähmøjc. Wyiingudsähgøøbiä Ticio Justo ja'a Dios hñajty, hoy hñajty je'e quia'a jagä judíosä.

8 Jimä jäya'ay hānajty tu'ug xiøhaty Crispo. Jue'e hānajty tiuumby tsajtøjwiindsøn. Mānitä Crispo ja'a Diosmädia'agy hajxy miäbøjcy nägøxiä, møødä yhuung møødä tio'oxy. Nāmāyā jäya'ayä Diosmädia'agy hajxy miäbøjpä, ja'a hajxy hānajty jim tsānaabiä Corinto. Mānit hajxy hoy ñābety.

9 Mānitä Pablo ja'a Jesucristo wyiinhijxy coods. Mānitä Jesucristo miānaañ: —Ca'a pøn mdsähgø'øy. Høøch nmädia'agy tehngajnā yajwá'xäc. Caj mhamónät.

10 Høøch miich ngüeendāhajpy. Caj miich pøn nej xtiuna'añ. Hix, nāmāyhøchä jäya'ay ja'a ngapxy ja'a nmädia'agy hajxy yaa xmiäbøjcä maa hädaa cajptän —nømä Pablo ñāmaayä.

11 Tu'jomøjtä cupcä Pablo jim yhiyty Corinto. Jue'e ja'a Pablo hānajty jaduhñ ñä'ägädä tuunghajpy, ja'a Diosmädia'agy-yajwa'xyiibä.

12 Pero coo ja'a craa Galiön jim tiägøøyy tuumbä gobernador maa ja'a naax hānajty xiøhatiän Acaya, mānitä judíos ja'a Pablo hajxy tiägøøyy mäsibøøbiä. Mānit hajxy jim yajnøcxy haguyc maa ja'a Galiön hānajty tiuñän.

13 Mānitä judíos ja'a Galiön hajxy ñāmaayy:

—Jue'e hädaa craa jiatcø'øy, jiojcapxøøby hädaa craa ja'a cu'ug coo højts nguhtuht hajxy xquia'a yajtuunät neby højtsä Dios nwiingudsähgø'øyän. Wiingwiinmahñdy jaduhñ yajnahixøøby coo højtsä Dios wiing nwiingudsähgø'øwät —nømä Pablo ñähwaambejtä.

14 Coo ja'a Pablo hānajty yhadsowa'añ, mānitä Galiön yaghadsowøøyy:

—Coo hädaa craa häxøpy tøø quiädieey, mānitøch mijtsä mmädia'agy häxøpy nmädowaanä.

15 Pero ja'a mhamdsoo cuhtuht hajxy jaduhñ myajtsibøøby. Ja'a mhamdsoo mädia'agy hajxy jaduhñ myajcapxiøøby pøn jaduhñ xøhajt ja'a Mesías. Hamdsoo mijts myajtødiägø'øwät. Cábøch jaduhmbä nmädowa'añ —nømä judíoshajxy yhojjä.

16 Mānitä Galiön ja'a judíos yhøxquejxy maa ja'a haguhtøjcän.

17 Jimä jäya'ay hānajty tu'ug xiøhaty Sóstenes. Copc-hajt hānajty je'e maa ja'a judíos chajtøjc-hajxiän. Mānitä cu'ugä Sóstenes hajxy miajch. Mānit hajxy jim yajnøcxy haguyc. Mānit hajxy jim quioxho'cy. Pero cabä Galiön jaduhñ miøjpädaacy.

18 Y ja'a Pablo, maxiøø je'e jim jiaag hijty Corinto. Mānitä Pablo ja'a mabøjpädøjc ñāmaayy coo hānajty jim choonaannä. Jim hānajty ñøcxa'añ Siria barcojooty näguipxy møødä Priscila møødä Aquila. Cahnä hajxy hānajty jim biarcotägø'øy Cencrea, mānitä Pablo cuhdøø'x yajcuhme'xy. Paady jaduhñ yajcuhme'xy coo ja'a Dios hānajty cøxiä wiinä tøø miäyujwa'añ. Mānitä Pablohajxy tiu'ubøjnä barcojooty.

19 Mānit hajxy mejyhawiimb ñajxy. Mānit hajxy jim miejch maa ja'a cajpt hānajty xiøhatiän Efeso. Jimä Pablohajxy ñibiuhyohdiúutänä møødä Priscila møødä Aquila. Mānitä Pablo jim ñøcxy nidiuhm maa ja'a judíos chajtøjc-hajxiän. Mānitä Pablo ja'a judíos tiägøøyy møødmädiaacpä.

20 Mānitä judíoshajxy jia mānaañ coo ja'a Pablo jim jejcy yhidät. Pero cabä Pablo jaduhñ miānaañ.

21 Mānit miānaañ: “Nøcxáambøch cham Jerusalén xøøhajtä. Pero coo ja'a Dios jaduhñ miāná'anät, mānitøch yaa nmiindägätsät maa mijtsän.”

Coo ja'a Pablo jaduhñ quiapxpädøøyy, mānit jadähooc biarcotägøøguiumbä. Mānit jim chohñ Efeso.

22 Mānit jim ñøcxy barcojooty maa ja'a cajpt hānajty xiøhatiän Cesarea. Coo jim miejch, mānit biarcopädsøømy. Mānit ñøcxy Jerusalén. Coo jim quioo'ty, mānitä mabøjpädøjc-hajxy hoy quihixy. Mānitä Pablo jim ñøcxy Antioquia.

²³ Maxioø jim yhiyty. Mänit jim tiu'ubójcumbä. Mänit jim ñöcxy maa ja'a naax hänajty xiøhatiän Galacia mөөd jim Frigia. Majatiä Pablo hänajty wiädity, jimä mäßöjpädöjc-hajxy hänajty quiapxmөcпögyii nebiä Diosmädia'agy hajxy jaduhñ hoy yajnócxät.

²⁴ Mänitä judíos jim tu'ug miejch Efeso. Apolos hänajty xiøhaty. Jue'e hänajty chooñ Alejandría maa ja'a naax hänajty xiøhatiän Egipto. Jøjwidsø'ø hänajty quiapxy miädia'agy. Ca'xiä Diosmädia'agy hänajty jiaanñ tehñ jiaty.

²⁵ Tøø ja'a Diostu'u hänajty jaduhñ hoy yhaböcy. Hamuumdu'joot hänajty yajnähixø'öy ja'a Jesúscөxpä, neby hänajty tøø jiaty tøø yhabetiän. Ñajuøöbiä Apolos hänajty jaduhñ coo ja'a Juan hänajty tøø miäyajnäbety. Pero cahnä Apolos hänajty miädoyhatyñä coo ja'a mäßöjpädöjc-hajxy hänajty ñäbejnä ja'a Jesucristocөxpä.

²⁶ Mänitä Apolos jim ñöcxy maa ja'a judíos chajtöjc-hajxiän. Mänitä Apolos ja'a Diosmädia'agy tiägöøyy yajwiingapx yajwiinmädiaagøöbiä. Mөcjoot hänajty miөөd. Jimä Priscilahajxy hänajty yhamädoowhity tsajtögooty mөөdä Aquila. Coo ja'a Apolos jaduhñ miädiaacpädöøyy, mänitä Priscila ja'a Apolos hajxy hawiing wioonöcxy. Mänitä Apolos hajxy ca'xy yajmөөdmädiaacy nebiä Apolos ja'a Diosmädia'agy jaduhñ maas hoy yajnócxät.

²⁷ Mänitä Apolos miänaañ coo hänajty jim ñöcxa'añ Acaya. Mänitä mäßöjpädöjc-hajxy jaduhñ piamänaañ coo ja'a Apolos jim ñöcxät. Mänitä mäßöjpädöjc nocy hajxy yhädiuun coo ja'a Apolos jim piuhbedøjät Acaya. Ja'a mäßöjpädöjc-hajxy hänajty jim hijpä Acaya, je'edsä Apolos hajxy puhbédäp. Mänitä Apolos jim chohñ Efeso. Mänit jim ñöcxy Acaya. Coo jim miejch, mänitä mäßöjpädöjcä Apolos hajxy piuhbejty nägø'ø nädecypiä. Paady hajxy hänajty tøø miäböcy ja'a Jesucristocөxpä, je'eguiөxpä coo ja'a Dios hojiot jiaanñ tehñ miөөdä.

²⁸ Majatiä Apolos ja'a judíos ja'a Diosmädia'agy hänajty miөөdyajcapxiø'öy cu'ughagujc, cabä judíoshajxy hänajty yajmäjäda'agyii. Jaduhñä Apolos yajnähixø'öy coogä Jesús hänajty je'e Miesíasä, ja'a Dios hänajty jecy tøø yajnähdiijiäbä coo hänajty yaa quixa'añ hädaa yaabä naaxwiin. Jaduhñä Apolos hänajty yajnähixøöbiä coo jaduhñ jim myiñ cujaay maa ja'a Diosmädia'aguiän coo ja'a Dios jaduhñ jecy tøø miäna'añ coogä Mesías hänajty yaa quixa'añ.

19

¹ Jimä Apolos hänajty yhityñä Corinto, mänitä Pablo jim chohñ Antioquia. Mänit jim ñaxöøyy tunjoot. Mänit jim miejch Efeso. Jimä Pablo ja'a mäßöjpädöjc may piaaty.

² Mänitä Pablo miänaañ:

—Mänaa mijtsä Diosmädia'agy mmäßöquiän, nej, mänitiä ja'a Dioshespíritu hajxy xquiorazóngtägöøyyä —nömä mäßöjpädöjc-hajxy miäyajtøöwä.

Mänit hajxy yhadsooyy:

—Tii jaduhñ mnänøømby ja'a Dioshespíritu. Cahnä højts jaduhñ nmädoyhatyñä.

³ Mänitä Pablo miänáangumbä:

—Mänaa mijts mnäbetiän, pønä quiuhdujt hajxy myajtuunä.

Mänit hajxy yhadsooyy:

—Ja'a Juan quiuhdujt højts nyajtuunä.

⁴ Mänitä Pablo jiaac mänáangumbä:

—Jue'e ja'a Juan hänajty yajnäbejpy, pønatiä yhaxøøgwiinmahñdy hänajty tøø ñajtshixø'öy. Jaduhñä Juan hänajty yajnähixøöbiä coo ja'a Jesús ja'a miädia'agy

miäbójcäxät, ja'a hānajt̃ jaac medsaambä —nōmā Pablo ja'a mǎbøjpadøjc ñāmaayy.

⁵ Coō hajxy jaduhñ miādooyy, mǎnit hajxy hoy ñābety ja'a Jesucristocōxpā.

⁶ Mǎnitā Pablo ja'a mǎbøjpadøjc tiägōōyy cō'oguhxajpā hanidiuhmjaty. Mǎnitā Dioshēspīritu hajxy ñāhgādaacā. Mǎnit hajxy tiägōōyy capxpā wiinghayuuc-haamby. Mǎnitā Dios ja'a miādia'agy hajxy tiägōōyyā nājtsapxōōyyābā.

⁷ Nāmajmetscā mǎbøjpadøjc-hajxy hānajt̃.

⁸⁻⁹ Mǎnitā Pablo tiägōōyy nōcxpā maa ja'a judíos chajtøjc-hajxiān jīm Efeso. Sábadohaam hānajt̃ ñōcxy. Mǎnitā Pablo ja'a judíos ja'a Diosmādia'agy tiägōōyy yajwiingapx yajwiinmādiaagōōbiā nebiatiā Dios yhane'emiān. Mōcjootā Pablo miōōdhajt̃. Jia wi'i yajmābōgaambiā Pablo ja'a judíos hānajt̃. Jia mǎbøjc hajxy jaduhñ nāje'e. Pero cab hajxy nāgōxiā miābøjcy. Ja'a hajxy hānajt̃ ca'a mǎbøjpā, mǎnit hajxy haxōōgjaty ñā'ägā mānaannā jāya'ayhagujc. Haxōōgā Diostu'u hajxy piādaacnā. Mǎnitā Pablo wyiinmaayy coō hānajt̃ jīm quia'a nōcxaannā maa ja'a judíos chajtøjc-hajxiān. Tägōōgpō'o hānajt̃ tōō yhabety coō ja'a Pablo jīm tiägōōyy nōcxpā. Coō ja'a Pablo jīm chohñ, mǎnitā Pablo ja'a mǎbøjpadøjc jiaac mōōdnōcxy. Mǎnit hajxy tiägōōyy hamugōōbiā maa ja'a Tirano tiōjcān. Hamōj ja'a Tirano tiōjc hānajt̃. Jabom-jabomā Pablohajxy hānajt̃ jīm ñōcxy capxpā mādiaacpā.

¹⁰ Mejtsjomōjtā Pablo jīm jiaac yajnāhixōōyy. Nāmāyyā jāya'ayā Diosmādia'agy hajxy jaduhñ jīm miādooyy maa ja'a naax hānajt̃ xiōhatiān Asia, wiinduhmyhagajpt, mōōdā judíoshajxy, mōōd hajxy hānajt̃ ca'a judíospā.

¹¹ Madiu'ujā Pablo pa'am jīm yajnajxy ja'a Dios miājaahaam. Hoy-yagjuōōñājatiā Pablo jaduhñ tiuūñ.

¹² Coō ja'a Pablo wyit hānajt̃ ñāhdōōnāxā, hōxtā najxpā pia'amhajxy hānajt̃, hōxtā nāhwāatsāp ja'a haxōōgpoj hajxy hānajt̃.

¹³ Jīmā judíoshajxy hānajt̃ nāje'e wiādity. Jāya'ay hajxy hānajt̃ yajñāhwaachp, ja'a hajxy hānajt̃ haxōōgpoj mōōdpā. Coō ja'a judíoshajxy jaduhñ miādooyy coō ja'a Pablo jāya'ay haxōōgpoj hānajt̃ yajnāhwa'ačh ja'a Jesús miājaagōxpā, mǎnit hajxy wyiinmaadiaacy coō ja'a Pablo hajxy hānajt̃ jaduhñ piāhixaambā. Mǎnitā haxōōgpoj hajxy tiägōōyy nāmaabiā:

—Ja'a Jesús miājaagōxpā, ja'a Pablo naxy miādiaacypiā, jaduhñ miīch nhane'emy coō miīch jiiby mjōwā'adsāt.

¹⁴⁻¹⁵ Jaduhñā Esceva yhuunghajxy hānajt̃ jiatcōōbiā, ja'a hajxy hānajt̃ nājxutjupā. Teedywiindsōñā Esceva hānajt̃ tiuumby maa ja'a judíos chajtøjc-hajxiān. Mǎnitā jāya'ay hajxy tu'ug piaaty. Haxōōgpoj hānajt̃ miōōd. Mǎnitā haxōōgpoj hajxy ñāmaayy:

—Ja'a Jesús miājaagōxpā miīch nhane'emy coō miīch jiiby mjōwā'adsāt.

Mǎnitā haxōōgpoj yhadsooyy:

—Nhíxyhōchā Jesús. Nnajuōōbiōch pōñ je'e ja'a Pablo. Pero mijts, caj mijts nhixiā —jaduhñā Esceva yhuunghajxy yhadsoowā.

¹⁶ Mǎnit hajxy hoyhoy quioxhō'cā. Ja'a craa jaduhñ jatcōōyy, ja'a haxōōgpoj hānajt̃ mōōdpā. Hoyhoy hajxy jaduhñ chaačhōōyy. Nāhwa'ads hōxwa'ads hajxy jaduhñ piādaacā. Mǎnit hajxy jiiby yhōxpābooyyā maa craa tiōjcān.

¹⁷ Mǎnitā mādia'agy jīm wiādipty Efeso nebiā Esceva yhuunghajxy jiajty yhabejty. Nāgōxiā jāya'ayhajxy jaduhñ miādoyhajty, mōōdā judíoshajxy, mōōdā ca'a judíoshajxpā. Jaanč tehñ chāhgōōyy ja'a cu'ughajxy jaduhñ. Mǎnitā Jesús hajxy tiägōōyy wiingudsāhgōōbiā nāgō'ō nādecypīā, ja'a hajxy nWiindsōñhājtmābā.

¹⁸ Mänitä mǎbǝjpǎdǝjc-hajxy nǎmay hoy ñǎgapxy cu'ughagujc nebiaty hajxy hǎnajty haxǝǝg tǝǝ jiǎya'ayhaty.

¹⁹ Ja'a jǎya'ayhajxy hǎnajty tǝǝ tiúñǎbǎ magiahaam, mǎnitǎ magianocy hajxy quiǝxy yajmejch. Mǎnit hajxy quiǝxy no'cy hijxwiinduum. Jue'egǎ noquiǎda'a hǎnajty tǝǝ choobaady juxychǎgui'xmajcmil.

²⁰ Coǝ ja'a ñocy hajxy jaduhñ ño'cy, jaduhñǎ hijxtahñd hajxy yejcy coǝ ja'a Diosmǎdia'agy hajxy hǎnajty hoy tǝǝ miǎbǝcy. Tehñgajnǎ ja'a Diosmǎdia'agy hajxy jim jiaac yajwa'xy wiinduhmyhagajpt.

²¹ Mǎnitǎ Pablo wyiinmaadiaacy coǝ hǎnajty jim nǝcxy wiǎdita'añ Macedonia mǝǝd jim Acaya. Coǝ hǎnajty jim tǝǝ quiǝxy wǎdity, mǎnit hǎnajty jim ñǝcxa'añ Jerusalén. Mǎnit miǎnaañ:

—Cooch hǎnajty tǝǝ nhoy Jerusalén, mǎnitǝch jim nnǝcxa'añ Roma.

²² Jimǎ Pablo jiamioǝd hǎnajty mioǝdǎ nǎmetsc, ja'a Timoteo mǝǝdǎ Erasto. Mǎnit ja'a Pablo ja'a jiamioǝd jim quiejxǝ'cy Macedonia. Haa ja'a Pablo, maxiǝǝ jim jiaag hijty Asia.

²³ Mǎnitǎ jǎya'ayǎ tsip hajxy nǎje'e jim yajpǎdǝ'cy Efeso. Paady hajxy jaduhñ yajpǎdǝ'cy je'eguiǝxpǎ coǝ ja'a Diosmǎdia'agy hajxy hǎnajty quia'a tsocy.

²⁴ Jimǎ jǎya'ay hǎnajty tu'ug xiǝhaty Demetrio. Saandǎtǝjc-hahǎdiuunnaxiǎ Demetrio hǎnajty yhǎdiuumby poobhorohaam maa ja'a saandǎ hǎnajty yhi-tiǎn, ja'a xǝhajpǎ Artemisa. Mayyǎ Demetrio moonsǎ hǎnajty mioǝdǎ. Jaançh tehñ quianarhajp hajxy hǎnajty jaduhñ coǝ ja'a saandǎtǝjc-hahǎdiuunnaxy hajxy hǎnajty tioogy.

²⁵ Mǎnitǎ Demetrio ja'a mioonsǎ mioǝdhamugǝǝyy nǎgǝxiǎ mǝǝd pǝnjaty hǎnajty hawiing saandǎhǎdiuumbǎ. Mǎnitǎ Demetrio miǎnaañ:

—Mǎgu'ughajpǎdǝjc, coǝ hǎdaaduhmbǎ tuung hajxy ndúunǎm, paady hajxy njaançh tehñ quianarhǎjtǎm. Tǝyhajt jaduhñ.

²⁶ Tǝǝ hajxy mhixy, tǝǝ hajxy mmǎdoy coǝ ja'a Pablo jii wiǎdity, coǝ jii quiapxy coǝ jii miǎdia'agy cooc tyijy hǝjtsǎ nsaandǎ quia'a jújquiǎm. Tǝǝ jǎya'ayhajxy may miǎbǝcy; ca'a yaayyǎ Efeso, pero cǝxiǎ wiinduhmyhagajpt yaa Asianaaxooty.

²⁷ Coǝ jǎya'ayhajxy maas may jiaac mǎbǝgǎt, cab hajxy majiaty nganarhǎjtǎnǎt. Y cabǎ jǎya'ayǎ nsaandǎhajxy xwyiingudsǎhgǝ'ǝwǎanǎnǎ, ni ja'a saandǎtǝjc maa yhi-tiǎn. Jiahdiǎgoyyaamby hajxy jaduhñǎn. Wiinduhmyhagajptǎ saandǎ Artemisa wyiingudsǎhgǝ'ǝyii yaa Asianaaxooty mǝǝd jǎguembady.

²⁸ Coǝ ja'a jǎya'ayhajxy jaduhñ miǎdooyy, mǎnit hajxy jiootma'ty. Mǎnit hajxy tiǎgǝǝyy yaaxpǎ jojpǎ.

—¡Viva Artemisa, viva! Hǝjtsǎ Artemisa yaa nsaandǎhǎjtǎm yaa Efeso.

²⁹ Coǝ ja'a cu'ughajxy jaduhñ miǎdooyy coǝ ja'a Demetrio mioonsǎhajxy hǎnajty jaduhñ wyi'i ya'axy wyi'i jiocy cajptooty, mǎnitǎ cu'ughajxy tiǎgǝǝyy haamhajpǎ. Jimǎ Pablohajxy hǎnajty wiǎdity cajptooty. Jue'e ja'a jiamioǝdhajxy hǎnajty xiǝhaty, Gayo mǝǝd Aristarco. Macedonia hajxy hǎnajty nǎmetsc chooñ. Mǎnitǎ Gayohajxy miajtsǎ mǝǝdǎ Aristarco. Ja'a cu'ughajxy jaduhñ mǎmajts. Mǎnitǎ Gayohajxy piawijtsǎ piajǎgujca maa ja'a hamugǝǝdiaactǎn. Mǎnit hajxy jim ñǎxǝ'ǝwǝǝyyǎ.

³⁰ Haa ja'a Pablo, coǝ jaduhñ miǎdoyhajty coǝ ja'a jiamioǝd jaduhñ miǎjtsǎxǎ, mǎnit jii by jia wi'i tiǎgǝ'ǝwǎañ jǎya'ayhagujc. Ja'a jiamioǝd hǎnajty jia wi'i ñǎhgapxtu'udaamby. Pero cabǎ mǎbǝjpǎdǝjca Pablo hajxy jaduhñ quiejxy.

³¹ Jimä Pablo ja'a miägu'ughajpähajxy näje'e miøjhaty Asia. Mänitä Pablo nocy yajnäguejxä coo jiiby quia'a tägø'øwät jäya'ayhagujc.

³² Jaanč tehñ yaaxp jaanč tehñ jiojpä cu'ughajxy hñajty jim maa hajxy hñajty tøø yhamugø'øyän. Wiingjaty hajxy hñajty ya'axy. Cab hajxy hñajty tu'cuhdujt ya'axy. Ni quia'a najuø'øy hajxy hñajty tii hajxy hñajty jaduñ tøø ñähämugø'øy.

³³ Jimä judíos hñajty tu'ug xiøhaty Alejandro. Mänitä Alejandro jaduñ piajahmä jäya'ayhagujc. Ja'a miägunaaxhajxy jaduñ näje'e jatcøøyy. Mänitä Alejandro yhawáanäxä tiiguiøxpä yø'ø jäya'ayhajxy hñajty jaduñ coo wyl'i yhaamhaty. Mänitä Alejandro ja'a judíos jia nähgapxtu'udaañ jäya'ayhagujc.

³⁴ Coo ja'a cu'ugä Alejandro hajxy jaduñ yhøxcajpy coo hñajty je'e jidüospä, mänit hajxy tiägøøguiumbä yaaxpä jojpä.

—¡Viva Artemisa, viva! Højtsä Artemisa yaa nsaandähájtäm yaa Efeso.

Mejtshora hajxy jaduñ jiaac yaaxy jiaac jojcy.

³⁵ Hobiä nejpiä ja'a secretario ja'a cu'ug yaghamooñ. Mänit miänaañ:

—Mägu'ughajpädøjc, mijts yaa tsänaabiä Efeso, jéquiänä tsaa tu'ug quiahy tsajtwiing. Artemisa hajxy nyajxøhájtäm. Je'e hajxy yaa nwiingudsähgøøyyäm yaa Efeso. Tøø ja'a tiøjc hajxy jaduñ nhädiuunäm coo jaduñ jiiby yhidät jiiby tiøgooty. Højtsä cuhdujt jaduñ nmøød'ájtäm coo højtsä Artemisa ngüeendähájtäm.

³⁶ Tøyhajt jaduñ. Hopiønä jaduñ miäna'añ. Hoorä, huuc tunä mayhajt hajxy. Huuc hamón hajxy. Hoy hajxy jaduñ mhuuc tehñ tiaj mhuuc tehñ miáyät jayøjp tii hajxy mdunaamby.

³⁷ Hädaa mähdiøjc hajxy tøø mmáchäbä, cabä tii pojpa tii cädieey hajxy hädaa tøø tiuñ. Cabä Artemisa hajxy tøø miägapxtägoy, ni cab hajxy tii tøø mieech maa ja'a Artemisa tiøgootiän.

³⁸ Pø tøø hädaa mähdiøjc-hajxy jaduñ jiaanč cädieey nebiä Demetriohajxy ñäxø'øwø'øyän, weenä Demetriohajxy jim nøcxy ñäxø'øwø'øy maa ja'a hagu-jtøjcän. Jaduñä cuhdujt ñä'ägä miñ. Paadiä cuduung yhuuc jimäbä.

³⁹ Pø jimä tsip wiingpä hajxy jaduñ mjaac møødä, mänit hajxy mnägäpxät coo junta hñajty jiaac jada'añii.

⁴⁰ Cab jaduñ yhahixø'øy coo hajxy jaduñ nwi'i yhaamhájtäm nä'ä nägoobä, coo tsip hajxy jaduñ nä'ä nägoobä nyajpädø'cäm. Coo ja'a gobiernä Rómabä jaduñ miädoyhädät neby hajxy jada'a tøø njatcøøyyäm, wehñä häyaa xñäxø'øwø'øyyämät. Neby hajxy häyaa nnä'ä hadsóowämät.

⁴¹ Mänitä secretario quiapxpädøøñä. Mänit miänaañ coo ja'a jäya'ayhajxy wyiimbíjnät.

20

¹ Coo ja'a jäya'ayhajxy hñajty tøø mioon tøø tiujnä, mänitä Pablo ja'a mabøjpädøjc miøjyaaxy. Mänitä Pablo miägapxy yhanehmy. Mänit miänaañ coo hñajty jim wyiimbidaannä, møød coo hñajty jim ñøcxaannä Macedonia.

² Coo jim miejch, mänit jim tiägøøyy wädiipä cajpt-cajpt. Majaty hñajty wiädity, jimä mabøjpädøjc hñajty miägapxy yhane'emy. Mänitä Pablo jim chónngumbä Macedonia. Mänit jim nøcxy Grecia.

³ Coo jim miejch, mänit jim yhiyty tägøøgpo'o. Coo hñajty jim choonángumbä, mänit hñajty jim ñøcxa'añ Siria barcojooty. Cahnä Pablo hñajty biarcotägø'øyñä, mänit miädoyhajty coogä judíoshajxy hñajty tøø quiojyquiapxytiun coogä Pablo hajxy hñajty miadsa'añ, nágóoyyädsä Pablo jiiby tiägø'øwät barcojooty. Mänitä Pablo wyiinmahñdyhajty coo

hänajty quia'a tu'ubøgaannä barcojooty. Jaduhñ wyiinmahñdyhajnä coo jim ñøcxø'øwät Macedonia tecy-yo'oyhaam.

⁴Nämayyä Pablo miägu'ughajpähajxy jim miøødnøcxy Asia, møødä Timoteo, møødä Sópater, ja'a hänajty jim tsohm̄bä Berea, ja'a Pirro yhuung, møødä Gayo, ja'a hänajty jim tsohm̄bä Derbe, møødä Aristarco, møødä Segundo, møødä Tíquico, møødä Trófimo. Tesalónica ja'a Aristarcohajxy hänajty chooñ møødä Segundo. Asia ja'a Tíquicohajxy hänajty chooñ møødä Trófimo.

⁵Coo ja'a Pablohajxy jim miejch Filipos møødä jiamioødhajxy, mäníthøchä Pablo jim nbaattägajch, høøch Lucas. Høøch hädaa nocy jaduhñ nhädiuumby. Mänitä Pablo jiamioødhajxy jim ñøcxø'cy Troas. Jim højts hänajty xyhahixa'añ, høøch møødä Pablo.

⁶Paady højts jim nmähmøøyy Filipos, coo ja'a judíos ja'a xiøøhajxy hänajty jiada'añii mänaa ja'a judíos ja'a tsajcaagy hajxy quiayyän, ja'a ca'a levadura møødpä. Coo ja'a xøø jaduhñ miaaay, mänit højts jim nbarcotägøøyy. Mänit højts jim ndsohñnä Filipos barcojooty. Mägoøxxøø højts mejjiooty nyohy. Mänit højts jim nmejch Troas. Mänit højtsä Pablo ja'a jiamioød jim nbaattägajch, ja'a højts hänajty jim xyhahijxpä. Jim højts njaac hijty juxtujxøø nägøxiä.

⁷Coo näxøø jaduhñ yhabaaty, mänit højts nhamugøøyy, højts mæbøjpädøjc. Mänit højtsä Santa Cena nyagjajtä. Mänit højtsä Pablo xtiägøøyy ya-jnähixøøbiä. Jejcy jaduhñ miädiaacy je'eguiøxpä coo hänajty cujaboom tiu'ubøgaannä. Cuptsuhmdä hänajty tøø jiaty, jimnä ja'a Pablo hänajty miädia'agynä.

⁸Maa højts hänajty tøø nhamugø'øyän, nähbettøjtøgooty hänajty jaduhñ jim. Jiibiä jøøn hänajty may tioy.

⁹Jimä høxcujc-häna'c hänajty tu'ug yhäña'ay ventanahaguuy nähbettøjnähgøxp ja'a miädägøøgpisobä. Eutico ja'a craa hänajty xiøhaty. Jim Eutico ja'a Pablo hänajty yhamädoowhity. Tøø ja'a Pablo hänajty jejcy miädiaacnä. Mänitä Eutico jim miaaho'cy maa hänajty yhäña'ayän ventanahaguuy. Mänit jim quiuhgahnajxy. Ho'ogy hoy wyidsø'cänä.

¹⁰Coo ja'a Pablo jaduhñ yhijxy, mänit jiiby yhädaacy naaxyp maa ja'a Eutico hänajty tøø quia'ayän. Mänitä Pablo ja'a Eutico miäneeñø'cy. Mänit højtsä Pablo xñämaayy:

—Ca'a hajxy mdsähgø'øy. Jujcyñä hädaa craa jaduhñ.

¹¹⁻¹²Jujcy ja'a craa jiaançh yajnøcxä maa ja'a tiøjcän. Mänitä mæbøjpädøjc-hajxy jiaançh tehñ xioondaacy. Mänitä Pablo jim ñøcxtägajch cøxp maa hänajty yajnähixø'øyän. Mänitä Pablo ja'a tsajcaagy yajwa'xy. Mänit højts ngaayy nhuucy nägøxiä. Mänitä Pablo jiaac tægøøyy yajnähixøøbiä. Jim højts jaduhñ ngujobøøyy. Mänitä Pablo miädiaacpädøñä. Mänit jim chohñnä Troas.

¹³⁻¹⁴Tøø højtsä Pablo hänajty xñäma'ay cooc hänajty tecy-yo'oyhaam ñøcxa'añ jim maa ja'a cajpt hänajty xiøhatiän Aso. Pero højts, barcojooty højts jim nnøcxy, høøch Lucas møødä Pablo jiamioødhajxy. Coo højts jim nmejch Aso, mänitä Pablo jim tiägøøbiä barcojooty. Mänit højts jim ndu'ubøjcumbä Aso näguipxy møødä Pablo. Mänit højts jim nägøxiä nnøcxy maa ja'a cajpt hänajty xiøhatiän Mitilene.

¹⁵Coo højts jim ndsøhngumbä, mänit højts cujaboom nnaxøøyy jim mädøyyä maa ja'a naax hänajty xiøhatiän Quío. Mänit højts jim cujaboom nmejch maa ja'a cajpt hänajty xiøhatiän Samos. Coo højts jim ndsøhngumbä, cujaboom højts jim nméjtscumbä maa ja'a cajpt hänajty xiøhatiän Mileto.

¹⁶Tøø ja'a Pablo hänajty wyiinmay coo hänajty jim quia'a näxø'øwáangumbä Efeso. Hix, cabä Pablo hänajty jim jejcy wiädita'añ Asianaaxooty. Paady

hänajty jim quia'a wädita'añ Asia coo hänajty jim ñöcxa'añ Jerusalén. Mobädajpä ja'a Pentecostésxøø hänajty jim jiada'añii. Paadiä Pablo hänajty yhadø'öch, jaduhñä Pentcostés-xøø mädøyyä piáadät.

¹⁷ Jimnä højts hänajty nhityñä Mileto, mänitä Pablo capxy jim quiejxy Efeso coo ja'a tsajtøjwiindsøñhajxy jim ñöcxät Mileto, ja'a hajxy hänajty jim tuumbä Efeso.

¹⁸ Coo hajxy jim miejch Mileto, mänit hajxy ñämaayyä:

—Mänáajøch jim nhitiän maa mijtsän jim Asianaaxooty, jaançh tehñ yhóyhøch jim nduunñ mädúhñtiøch jim nhijty. Mnajuøøby hajxy jaduhñ cooçh jaduhñ nga'a hønñda'agy.

¹⁹ Jaançh tehñ yhóyhøchä Jesús ja'a tiuung hänajty nduunä, ja'a hajxy nWiindsøñhajtämbä. Mee'xxiéemyhøch hänajty nduñ. Náxyhøch hänajty njootmayhaty cooçhä nmägunaaxä Jesús ja'a miädia'agy hajxy hänajty quia'a mabøgaanä. Mayhooc hajxy jaduhñ quiojyquiapxytiuuñ cooçh hajxy hänajty xjia wi'i yagho'oga'añ.

²⁰ Cøxyhøch mijts hänajty nyajwiinxiic nyajwiingapxø'ø y neby hajxy hoy mhídät. Homiänáajøch mijts hänajty nyajnähixø'ø y, møød jim jäya'ayhagujc, møød jim maa ja'a mdøjc-hajxiän.

²¹ Jadúhñhøch mijts hänajty nmägapxy nhane'emy coo ja'a mhaxøøgcuhdujt hajxy jaduhñ mnajtshixø'øwät, møød coo ja'a Diosmädia'agy hajxy mmäbøgät ja'a Jesúscøxpä, ja'a hajxy nWiindsøñhajtämbä. Nägøxiøch mijts hänajty jaduhñ nmøødmädia'agy, møød mijts judíoshajxy, møød mijts cajpä judíospä.

²² Hoorä, tøøchä Dioshespíritu xñäma'ay cooçh jim nnöcxät Jerusalén. Pero cábøch nnajuø'ø y nébyhøch jim njada'añ nhabeta'añ.

²³ Jagóoyyøch jaduhñ nnajuø'ø y cooçh jim nyajtsuma'añ, cooçhä tsaachpä peenä jim nbaada'añ. Majátyhøch jaduhñ tøø nwädity, jadúhñhøchä Diosh-espíritu tøø xyhawaanä cooçh jaduhñ njada'añ nhabeta'añ.

²⁴ Pero cábøch tii ndajy nmay. Cabä cueentä jaduhñ cooçh nnä'a hó'ogät. Je'eyähajtjøch nbøcjuøøby cooçhä nduung nyajmayaanä, ja'a Jesúshøch xmióoyyäbä, ja'a hajxy nWiindsøñhajtämbä. Jadúhñhøch xtiuungmooyy cooçh mädia'agy jaduhñ nyajwä'xät coo ja'a Dios hojioot jiaançh tehñ miøødä.

²⁵ Tøøch mijts nyajwiinxiic nyajwiingapxø'ø y coo ja'a Dios yhane'ema'añ ja'a miøcmäjaahaam. Hoorä, cábøch mijts mänäa xyhijxtägatsaanä. Tøyhajt jaduhñ.

²⁶ Coo mijtsä Diosmädia'agy mga'a mabøgät nébyhøch tøø nja mädia'aguiän, ca'a yhøøchä pojpä jaduhñ nmøød.

²⁷ Hix, pedyijøch mijts tøø nyajmøødmädia'agy nebiatiä Dios tøø yhane'emiän.

²⁸ Mniyajcopcø'øwøøjäp hajxy. Mgüeendähádäbä mabøjpädøjc hajxy nägøxiä. Ja'a Dioshespíritu hajxy jaduhñ xpiädaac coo hajxy jaduhñ mgüeendähádät. Coo ja'a Jesucristo hajxy tøø xñähho'túutäm, paadiä Dios hajxy jaduhñ xyhuunghajtäm, coo ja'a miädia'agy hajxy nmäbøjcäm.

²⁹ Cooçh mijts jaduhñ nbuhwa'adsaanä, mänitä wiinghänä'c-hajxy yaa miedsa'añ maa mijtsän. Mäwiinhøhmbä hajxy jaduhñ miedsa'añ. Xjia wi'i jiojcapxø'øwaamb mijts jaduhñ coo ja'a Diosmädia'agy hajxy mnajtshixø'øwät. Jaduhñ mäwíinäts hajxy jiatcø'øwa'añ nebiä pahucä meeg hajxy chu'uçhän. Tøyhajt jaduhñ.

³⁰ Høxtä mijtsä mjamiøød näje'e tiägø'øwaambä hønñdaacpä. Näje'e ja'a mabøjpädøjc-hajxy jaduhñ yajtägoyyáanäbä nebiä hønñdaacpähajxy tiägoyya'añän.

³¹ Naxy hajxy jaduhñ mdehm ñiyajcopcø'øwøøjät. Tägøøgjomøjthøch mi-jts jaduhñ nmägapxy nhanehmy xøømdsuhm. Jaanç tehñ chaaçhpøjpøch hānajtý. Naxy hajxy jaduhñ mdehm jiahmiédsät.

³² 'Hoorä, mæbøjpädøjc, mijtsä Dios nyajcø'øwaanøøby ween hajxy jaduhñ xcwieendähaty. Jaduhñä Diosmädia'agy miäna'añ cooc ja'a Dios hojioot jiaanç tehñ miøødä. Cooc ja'a Diosmädia'agy hajxy hamuumdu'joot mmäbøgät, jaduhñä Dios hajxy xjiaac tehñ piuhbédät ja'a miäjaahaam. Møød hodium hajxy jaduhñ xpiädä'agät näguipxy møød pønjatý ja'a Dios yhuung-hajpy.

³³ Cábøch pønä wyitä xiädø'øñ tøø nhadsojcä.

³⁴ Ja'a nhamdsoo cø'øháamhøch jaduhñ tøø nniyhixyíi. Jadúhñhøchä nmägu'ughajpä tøø nbuhbejpä. Tøyhajt jaduhñ.

³⁵ Homiänáajøch mijts tøø nmägapxy tøø nhane'emy coo hajxy mnigu-iudúunäxät, møød coo ja'a pa'amjäya'ay hajxy jaduhñ mbuhbédät møødä häyoobäjäya'ay. Mjahmiédsäp hajxy jaduhñ coo ja'a Jesús jaduhñ jecy miänaañ: "Coo wiinghāna'c mbuhbédät, jaduhñds jootcuyc mhídät. Pø mnä'ä yajpuhbedaamb jaduhñ, cab jaduhñ jootcuyc mhídät."

³⁶ Cooc ja'a Pablo jaduhñ quiapxpädøøyy miädiaacpädøøyy, mänit hajxy nägøxiä jyijcādaacy näguipxy møødä Pablo. Mänit hajxy tiägøøyy Diospa'yaaxpä.

³⁷ Mänit hajxy tiägøøyy jøøbiä xuu'tspä coo ja'a Pablo hajxy hānajtý piuhwa'adsāanānā. Mänitä Pablo hajxy miajch miāneeñ. Mänitä Pablo hajxy chu'xy.

³⁸ Jaanç tehñ jiootmayhajp hajxy hānajtý je'eguiøxpä coo ja'a Pablo hānajtý tøø miäna'añ cooc ja'a Pablo hajxy hānajtý quia'a hijxtägatsaanñä. Mänitä Pablo hajxy hoy ñajtshixøøñä maa ja'a Pablo hānajtý biarcotägø'øwa'añän.

21

¹ Mänit højtsä mæbøjpädøjc nbuhwaatsnä. Mänit højts nbarcotägøøyy. Mänit højts jim ndsohñnä Mileto. Mänit højts jim tu'uda'aquiä nnøcxy maa ja'a cajpt hānajtý xiøhatiän Cos. Cujaboom højts njaac nøcxy maa ja'a naax hānajtý xiøhatiän Rodas. Cooc højts jim ndsøhñgumbä, mänit højts jim njaac nøcxy maa ja'a cajpt hānajtý xiøhatiän Pátara.

² Jim højtsä barco wiingpä hoy nbaady. Jim hānajtý ñøcxa'añ maa ja'a naax hānajtý xiøhatiän Fenicia. Mänit højts ndu'ubøjcumbä wiingbarcojootý.

³ Mänit højtsä naax nnäheebøøyy, ja'a hānajtý xøhajpä Chipre. Hahooy-haamby højts jim nwiinnajxy jäguemjuøøby. Jim højts hānajtý nnøcxø'øy maa ja'a naax hānajtý xiøhatiän Siria. Cooc højts jim nmejch, mänit højts jim nbarcopädsøømy maa ja'a cajpt hānajtý xiøhatiän Tiro. Paadiä barco jim miedsøøyy Tiro coo tsømy hajxy hānajtý jim ñähdsøømdu'uda'añ.

⁴ Jim højtsä mæbøjpädøjc näje'e nbaaty. Mänit højts jim nhiyty Tiro juxtujxøø maa ja'a mæbøjpädøjc-hajxiän. Mänitä Pablo hajxy jia nāmaayy coo jim quia'a jaac nøcxät Jerusalén. Jadúhñäc hajxy hānajtý tøø ñajtscapxø'øyíi ja'a Dioshespíritäm. Pero cabä Pablo jaduhñ ñä'ä møjpädaacy.

⁵ Cooc juxtujxøø yhabejty, mänit højts jim ndu'ubøjcumbä. Mänit højtsä mæbøjpädøjc nägøxiä hoy xñajtshixø'øy cajtpa'a møødä yhuung møødä tio'oxy. Mänit højts jim njijcādaacy pu'uwiing. Mänit højts nDiospa'yaaxy.

⁶ Mänit højtsä mæbøjpädøjc xpiuhwaatsnä. Mänit hajxy wyiimbijnä maa ja'a tiøjc-hajxiän. Mänit højts ndägøødiägajch barcojootý.

⁷ Mänit højts jim ndsóhngumbä Tiro. Mänit højts jim njaac nøcxy maa ja'a cajpt hānajtj xiøhatiän Tolemaida. Coø højts jim nmejch, mänit højtsä mæbøjpädøjc hoy nguhixy. Tu'tsuhm højts jim nhijty maa ja'a mæbøjpädøjc-hajxiän.

⁸ Cujaboom højts jim ndu'ubøjcumbä. Mänit højts jim nnøcxy maa ja'a cajpt hānajtj xiøhatiän Cesarea. Coø højts jim nmejch, mänit højts jim nnøcxøøyy maa ja'a Felipe tiøjcän. Mänit højtsä Felipe xñämaayy coø højts jim nmejtstá'agät maa ja'a tiøjcän. Jue'e ja'a Felipe hānajtj tiuunghajpy, ja'a Diosmädia'agy hānajtj yajwa'xyp. Tøø hānajtj jaduhñ wyiinguexyii coø ja'a mæbøjpädøjc piuhbédät. Näjuxtujc hajxy hānajtj jaduhñ wyiinguejxä coø hajxy jaduhñ miäbuhbédät.

⁹ Mädaaxcä Felipe yhuung hānajtj haagä cäxyii. Nämädaaxcä Diosmädia'agy hajxy hānajtj ñajtsapxø'øyy.

¹⁰ Maxiøø højts hānajtj jim tøø nhity maa ja'a Felipe tiøjcän, mänitä jäya'ay tu'ug miejch. Agabo hānajtj xiøhaty. Jim hānajtj chooñ Judea. Ñajtsapxøøbiä Diosmädia'agy hānajtj je'ebä.

¹¹ Coø ja'a Agabo jim miejch maa højts hānajtj nmejtsta'aguiän, mänitä Pablo ja'a wiøøn wiähájtäxä. Mänitä Agabo hamdsoo ñiguiø'øxojs ñidiecyxiojtsä ja'a Pablo ja'a wiøønhaam. Mänitä Agabo ja'a Pablo ñämaayy:

—Jadúhñhöchä Dioshespíritu tøø xñäma'ay cooçh miich nnajtsapxøøyyät. Jadúhñäc miichä judíos xquiø'øxots xtiecyxiodsaambä jim Jerusalén nébyhöch cham tøø nhamayyän. Mänitac miich xyajcø'ødägø'øwa'añ ja'a soldadohajxy Rómabä.

¹² Coø højts jaduhñ nmädooyy, møødä mæbøjpädøjc-hajxy, mänit højtsä Pablo nja nämäayy coø jim quia'a nøcxät Jerusalén.

¹³ Mänitä Pablo yhadsooyy:

—Tii hajxy coø mjø'øyy coø mxuuch. Tiiçh hajxy coø xyagjootmayhaty. Cabä cueentä jaduhñ cooçhä häna'c jaduhñ jim xquiø'øxots xtiecyxiódsät Jerusalén. Cabä cueentä jaduhñ cooçh häna'c jim xyaghó'ogät ja'a Jesúscøxpä, ja'a hajxy nWiindsøñhåjtämbä —nømä Pablo miänaañ.

¹⁴ Coø højts jaduhñ nhijxy coø ja'a Pablo hānajtj quia'a mæbøga'añ, mänit højts nmänaañnä:

—Ween jaduhñ jiadyii nebiä Dios tøø miäna'añän.

Mänit højts nhamoonnä.

¹⁵ Mänit højts nhadsøømbøjcy, høøçh møødä Pablo. Mänit højts jim nnøcxy Jerusalén.

¹⁶ Naje'e højtsä mæbøjpädøjc jim xpianøcxy, ja'a hajxy hānajtj jim tsohmäbä Cesarea. Coø højts jim nmejch Jerusalén, mänit højts hoy xñajtswowø'øyy maa ja'a Mnasón ja'a tiøjcän. Jimä Mnasón hānajtj jecy tøø choñda'agy Chipre. Tøø hānajtj jiegø'øyy coø ja'a Mnasón ja'a Diosmädia'agy hānajtj tøø miäbøcy. Jim højts nmejtstaacy maa ja'a Mnasón ja'a tiøjcän.

¹⁷ Coø højts jim nmejch maa ja'a mæbøjpädøjc-hajxiän, mänit højts xquiøñdymooyy xoonðáacäp.

¹⁸ Cujaboom højtsä Pablo jim xmiødhajty maa ja'a tsajtøjcän. Jimä Santiago hānajtj møødä tsajtøjwiindsøñhajxy nägøxiä.

¹⁹ Mänitä Santiagohajxy miøødnijajpoo'xä ja'a Pablo. Mänitä Pablo tiägøøyy mädiaacpä nebiatiä Diosmädia'agy hānajtj tøø yajwa'xiän maa ja'a cajpa judíoshajxiän, cooc jaduhñ quiapxy miädiaacy ja'a Dios miäjaahaam.

²⁰ Coø ja'a Santiagohajxy jaduhñ miädooyy, mänitä Dios hajxy wyiin-gudsähgøøyy. Mänitä Pablo hajxy ñämaayy:

—Mägu'ughajpä Pablo, mnajuøøby miich jaduhñ coo ja'a judíos ja'a Jesús ja'a miädia'agy hajxy nämay tøø miäbøjcä. Jaduhñ hajxy nägøxiä miäna'añ coo ja'a cuhdujt hajxy tsipcøxp ngudiünämät, ja'a Moisés jecy yhanéhmäbä.

²¹ Tøø hajxy jaduhñ miädoxyhaty cooc tyijy miichä judíos wiingcuhdujt tøø myajnähiø'øy, ja'a hajxy jäguembaady hadsänaabiä. Jaduhñäc tyijy tøø myajnähiø'øy coo cuhdujt hajxy ñajtshixó'øwät, ja'a Moisés jecy yhanéhmäbä. Jaduhñäc tyijy tøø myajnähiøøbiä coo højts ja'a nguhdujt nga'a cudiünänät, højts judíos, møød coo højts nhuung nga'a circuncidarhajtänät.

²² Coo ja'a cu'ughajxy jaduhñ miädoxyhädät coo miich yaa tøø mgoody Jerusaleñ, mänitä tøyhajt hajxy choga'añ pø tøyhajt jaduhñ coo miichä judíos jaduhñ tøø mjaançh yajnähiø'øy, ja'a hajxy jäguembaady hadsänaabiä.

²³ Tøø højts ja'a wiinmahñdy tu'ug nbaady nej miich myajniyhoyø'øwøøjät. Jii højtsä nmägu'ughajpä nämädaaxcä. Tøø xøø hajxy yhagapxtucy coo meeg hajxy hñajty yoxa'añ nebiä Moisés jecy yhanehmiän coo hajxy jaduhñ nguhdujthajtämät.

²⁴ Mmødhädäp miich yø'ø häna'c yø'ø nämädaaxpä. Jaduhñ miich mnämäjuyø'øwät coo meeg hajxy hñajty yoxa'añ. Jaanä jaduhñ miichä meeg tu'ug myóxpät. Coo miich jaduhñ mnämäjuyø'øwät, jaduhñ hajxy hoy ya-jcuhmé'xät. Coo miich jaduhñ mguhdujthädät, jaduhñ miichä cu'ug xyhíxät coo miichä cuhdujt jaduhñ mgudiumbä, ja'a Moisés jecy yhanéhmäbä. Jaduhñä cu'ugä tøyhajt hajxy miøødhada'añ coo miich wiingcuhdujt tøyhajt mga'a yajnähiø'øy.

²⁵ Pero ja'a jäya'ayhajxy ca'a judíosä, ja'a hajxy mäbøjpä, tøø højtsä nocy nyajnäjaayø'øy. Jaduhñ højts tøø nmägapxy tøø nhane'emy coo hajxy quia'a tsú'udsät mädyiibä häna'c tøø yoxy quepychechwiinduum, møød coo hajxy quia'a tsú'tspät ja'a tøø quia'a nø'xié'xiäbä, møød coo wiingto'oxiøjc hajxy quia'a møødmá'awät —nømä Pablo ñämaayyä.

²⁶ Mänitä Pablo ja'a häna'c miødhajty ja'a nämädaaxpä. Mänit hajxy cuja-boom hoy quiudiuñ nebiä judíos quiuhdujthajxy hñajty myiñän. Mänit hajxy tiøjtägøøyy tsajtøgooty. Mänit hajxy ñägapxy cooc juxtujxøø hñajty quia'a habetyñä neby hajxy hñajty tøø yhagapxtuquiän coo meeg hajxy hñajty yoxa'añ.

²⁷⁻³⁰ Ja weenjaty hñajty quia'a habety ja'a juxtujxøøbä. Mänitä jäya'ayhajxy näje'e tiägøøyy tsajtøgooty. Jim hajxy hñajty chooñ Asia. Coo ja'a Pablo hajxy jiiby yhiyxy tsajtøgooty, mänit hajxy tiägøøyy yaaxpä cooc ja'a Pablo hñajty jiiby wiädity:

—Judíostøjc, højts puhbéjtäc. Xiids yø'ø craa Pablo wiädity. Yø'ødsä wi-ingcuhdujt homiajaty nøcxy yajwiinhixø'øy. Jaduhñ yø'ø craa ja'a cu'ug jiøjcaxø'øy coo højtsä nguhdujt hajxy xquia'a cudiünämät, nebiä Moisés jecy jia hanéhmian. Jaduhñ yø'ø craa yajwiinhixøøbiä cooc tyijy hädaa tsajtøjc jaduhñ quia'a tsoobaady. Maas hanaxiä haxøøg tøø jiatcø'øy coo jäya'ay yaa tøø miøødtägø'øy tsajtøgooty, ja'a hajxy ca'a judíosä. Hix, cabä cuhdujt jaduhñ ñä'ägä miñ coo hajxy yaa tiägø'øwät tsajtøgooty, pønjaty ca'a judíos.

Paady hajxy jaduhñ miänaañ, je'eguiøxpä coo ja'a Pablo hñajty tøø yhixyii cajptooty coo ja'a Trófimo hñajty miøødä. Jaduhñä Asiabäjäya'ayhajxy hñajty miäna'añ cooc tyijy ja'a Pablo ja'a Trófimo hñajty tøø miøødtägøøyy tsajtøgooty. Efeso ja'a Trófimo hñajty chooñ. Ca'a jiudíosä hñajty je'e. Hoorä, coo ja'a cu'ughajxy jaduhñ miädooyy cooc ja'a Pablo hñajty jiiby wiädity tsajtøgooty, mänit hajxy tiägøøyy haamhajpä. Mänitä Pablo hajxy miajch. Mänit hajxy piawijch piajädujty jim tsajtøghaguuy. Mänitiä tsajtøjc hajxy yhagøøyy.

³¹ Jimä cu'ugä Pablo hajxy hānajtŷ nā'ägä yagho'ogaannä, mänitā soldado-wiindsōnā mädia'agy nāmejtsä coogä cu'ughajxy hānajtŷ jim wyl'i yhaamhaty Jerusalén. Roma ja'a soldadohajxy hānajtŷ chooñ.

³² Tuunä ja'a soldado-wiindsōn jaduhñ nā'ä mädooyy, mänitā soldadohajxy yhamugøøyy. Mänit hajxy päyø'øguiä yhädaacy maa ja'a cu'ughajxy hānajtŷ yhaamhatiän. Coö ja'a cu'ugä soldado hajxy jaduhñ jiojcuheebøøyy coö ja'a soldadohajxy hānajtŷ miānacy maa ja'a Pablo hānajtŷ wiobho'ogyiijän, mänitā Pablo yhøxmajtsä.

³³ Coö ja'a soldado-wiindsōn jii by quiädaacy, mänitā Pablo chuumä. Hamejtsadena quiø'øxojs tiecyxiojtsä. Mänitā soldado-wiindsōnā cu'ug miäyajtøøyy pōñä Pablo, møød tii hānajtŷ coö tøø wiobho'ogyii.

³⁴ Mänitā jäya'ayhajxy may yhadsooyy haagä wiingjaty. Cab hajxy hānajtŷ tiu'ugmädia'aguiä. Coö ja'a cu'ughajxy hānajtŷ jaduhñ wyl'i ya'axy, cabä soldado-wiindsōnā tøyhajt hānajtŷ hoy piaada'añ. Mänit miānaañ coö ja'a Pablo jim yajnøcxøjät maa ja'a cuartelän.

³⁵ Coö ja'a soldado ja'a Pablo hajxy jim miøødcoo'ty maa ja'a escalera jaduhñ chohñda'aguiän, mänitā Pablo hajxy quiø'yø'cy. Paady hajxy jaduhñ quiø'yø'cy coö ja'a cu'ugä Pablo hajxy hānajtŷ jia wyl'i yagho'oga'añ.

³⁶ Høxhaamä cu'ugä soldado hajxy hānajtŷ pianøcxy yāaxäp coö ja'a Pablo yagho'ogøjät.

³⁷ Jimä soldado ja'a Pablo hajxy hānajtŷ miøødtägø'øwa'añ cuarteltøgooty, mänitā Pablo ja'a soldado-wiindsōn nāmaayy:

—Huuc min, nhuuc møødmädiä'agyhøch miich paquiä.

Hagriego haamä Pablo jaduhñ miānaañ. Mänitā soldado-wiindsōn yhadsooyy:

—Mjájpytiämä hagriego jaduhñä.

³⁸ Cäjtäm miich jim ndsooñ Egipto-naaxootiä. Tøø jiegø'y coö hāna'c tsip jim tøø yajpädø'øgy Egipto. Nämädaaxmilä jiamioød hānajtŷ, haagä cahwiindøyhāna'c. Mänit hajxy piäyø'cy. Mänit hajxy jim nñcxøøyy pactuum maa pōñ quia'a tsāna'ayän.

³⁹ Mänitā Pablo miānaangumbä:

—Cábøch jim ndsooñ Egipto. Judíojäyá'ayhøch høøch. Jímhøch ndsooñ maa ja'a cajpt jaduhñ xiøhatiän Tarso jim Cilicianaxooty. Møjjuøøbyhøch ngajpt. Huuc tunä mayhajt, nhuuc cøxy møødmädiä'agyhøch yø'ø cu'ug.

⁴⁰ Mänitā soldado-wiindsōnā Pablo cuhdujt miooyy coö quiäpxät. Mänitā Pablo piejty escaleracøxp. Mänitā quiø'ø chajxajy. Mänitā cu'ughajxy cøjx yhamoñ. Mänit tiägøøyy xiicpä mädiaacpä hebreohayuuc-haamby:

22

¹ —Mägu'ughajpädøjc, huuc hamädoowhit hajxy hoy; mijts nmøødmädia'agaamby.

² Coö ja'a cu'ughajxy jaduhñ miädooyy coö ja'a Pablo hānajtŷ quiapxy miädia'agy hebreohayuuc-haamby, tehngajnä hajxy hānajtŷ hoy yhamädoowhity. Mänitā Pablo jiaac mädiaacy:

³ —Judíojäyá'ayhøch høøch. Jímhøch nnaaxque'exä Tarso, jim Cilicianaxooty. Múutsnøch yaa ngoo'ty Jerusalén. Ja'a teedyhap Gamaliélhøch yaa xyajcapxtaac. Jaanç tehñ yhóyhøch xyajnáhixøøyy ja'a jecyquiuhdujt. Jaanç tehñ yhóyhøchä Dioscuhdujt hijty nbaduñ hamuumdu'joot nej mijts jada'ahaty mbaduñän.

⁴ Nyajtsaaçhpøjpøchä jäya'ay hijty, ja'a Diosmädia'agy hajxy mæbøjpä ja'a Jesúscøxpä, to'oxiojcä, ya'adiøjcä. Høxtä nyaghó'piøch hijty tähoocjaty. Pawíçhøch hijty pujxtøgooty nyajnøcxy cø'øxoch tecyxioch.

⁵ Ja'a teedywiindsón yaa tuumbä Jerusalén, coo hajxy jaduhñ mmäyajtówät pø tøyhájhøch jaduhñ tøø njatcø'ø, xmió'owäbä tøyhajt hajxy jaduhñ. Jaanä jaduhñä majtøjcä tøyhajt hajxy yéjpät coo hajxy jaduhñ mmäyajtówät. Yø'øchä nocy hajxy tøø xyajmäguexy coo højts nmägunaax jim nmó'owät maa ja'a cajpt jaduhñ xiøhatiän Damasco. Jimhøchä jäya'ay hñajty nøcxy nhøxta'awa'añ Damasco pønhatiä Diosmädia'agy mæbøjp ja'a Jesúscøxpä. Je'eçh hñajty nøcxy nmadsa'añ. Yaaçh hñajty nyajmänaca'añ Jerusalén. Yaaçh hñajty min ndsaächtiuna'añ.

⁶ Jim tu'haamnøcxpä, ja weenjátyhøch hñajty jim nga'a coody Damasco, mänitä jøøn quiuhajcädaacy jaançh tehñ miøc, mädúhñtiøch hñajty nyo'oy. Cujyxiøøho'ogy hñajty jaduhñ.

⁷ Túunøchä jøøn jaduhñ nnä'a hijxy, mänitiøch jaduhñ ngädaayy. Mänitøch nmädooyy cooçh hñajty xxiøøguya'axy: "Saulo, Saulo, tiich jaduhñ coo xwyi'i miädsibø'øy."

⁸ Mänitøch nmäyajtøøyy: "Wiindsón, pøn miich." Mänitøch xyhadsooyy: "Jesúshøch høøch. Nazaréthøch hijty ndsooñ. Høøch miich jaduhñ xmiädsibøøby."

⁹ Pønjátýhøch hñajty nmøødnøcxyp, yhiix ja'a jøøn hajxy. Pero cab hajxy miädooyy cooçhä Jesús jaduhñ xmiägapxy.

¹⁰ Mänitøchä Jesús nmäyajtøøgumbä: "Wiindsón, tiich jaduhñ ndúnäp." Mänitøch xyhadsøogumbä: "Tänaayyø'øg. Jaac nøcx jim Damasco. Coo miich jim mgóodät, mänit miich hñajty xxiøøguya'axy: "Saulo, Saulo, tiich jaduhñ coo xwyi'i miädsibø'øy."

¹¹ Hoorä, cooçhä jøøn nhijxy, wiinxóo'tshøch jaduhñ. Cábøch hñajty hoy nhijxnä. Ja'a njamiøødhøch hajxy jim xjiaac witscoo't Damasco.

¹² Jimä jäya'ay hñajty tu'ug chäna'ay. Ananías hñajty xiøhaty. Jaançh tehñ yhooyä Ananías ja'a cuhdujt hñajty piaduñ nebiä Moisés jecy yhanehmiän. Jimä judíoshajxy hñajty näje'e chänaabiä Damasco. Jiaançh tehñ quiumaabiä judíos ja'a Ananías hajxy hñajty jaduhñ.

¹³ Hoorä, cooçh jim ngoo'ty Damasco, mänitøchä Ananías hoy xquiuhixy. Mänitøch xñämaayy: "Puhya'ay Saulo, hijxø'øg jadähooc cham jaduhñajtä." Tuunä ja'a Ananías jaduhñ nñä'a mänaañ, mänitiøch jaduhñ njaançh hijxø'cy.

¹⁴ Mänitøchä Ananías xñämäaguümbä: "Ja'a nhaphájtämhajxy ja'a ndeedyhájtämhajxy ja'a jecypiä haampiä, ja'a Dios hajxy hijty wyiingudsähgøøby jegyhajty. Jaaya'ay miich jaduhñ tøø xyajnáhdijy coo jaduhñ mdúnät neby je'e jioot choquiän, møød coo ja'a Jesús mhamdsoo híxät coo mhamdsoo mädówät nebiaty je'e miädia'agy.

¹⁵ Nøcxaamb miich mmädia'aga'añ wiinduhmyhagajpt ja'a Jesúscøxpä, nebiaty tøø mhixy nebiaty tøø mmädooyy.

¹⁶ Hoorä, tsógänämäts, nøcx näbejnä. Jaduhñä Jesús mmänuu'xtá'agät coo weenä mbojpä mgädieey xyajnáhwaats xyajcuhwáatsät", nómhøchä Ananías xñämaayy.

¹⁷⁻¹⁸ Mänitøch yaa nwiimbijtägajch Jerusalén. Mänitøch nnøcxy tsajtøgooty Diospa'yaaxpä. Mänitøchä Jesús nwiinhijxy, ja'a hajxy nWiindsønähájtämbä. Mänitøchä Jesús xñämaayy: "Tsógänämäts, mdsóonäp yaa. Caj miichä cu'ugä mmädia'agy yaa xmiäbøgaanä cooçh miich yaa xjia wi'i miädia'aga'añ."

¹⁹ Mänitøch nhadsooyy: "Wiindsón, nñajuøøbiä cu'ughajxy cooçh hijty nwädity wiinduhmyhagajpt maa ja'a judíos chajtøjc-hajxiän, cooçhä jäya'ay hijty nyajnøcxy pujxtøgooty pønhatiä mmädia'agy xmiäbøjcäp. Náxyhøch hijty nyajwobyii.

20 Y coo ja'a Esteban yagho'cä, jímhøch hānajty nbadsóonäbä. Móødhøch hānajty nbamānaambä coo yagho'ogóøjät. Ja'a hāna'cä Esteban hajxy yagho'cäbä, høøchä wyit ngüeendāhajtä. Paadiä Esteban jaduhñ yagho'cä je'eguiøxpä coo miichä mmādia'agy hānajty xyajwa'xä.”

21 Mānitøchä Jesús xñāmāguiumbä: “Cabä cueentä jaduhñ. Nøcxnä. Jäguémhøch miich nguexa'añ maa ja'a jäya'ayhajxy chāna'ayän, ja'a hajxy ca'a judíosä.”

22 Māduhñjatiä Pablo hānajty miādia'agy, hamādoowhíjtäxäbä miādia'agy hānajty jaduhñ. Pero coo jaduhñ miānaañ cooc hānajty jäguem quíexa'añii maa ja'a jäya'ayhajxy chāna'ayän, ja'a hajxy ca'a judíosä, cabä cu'ugä Pablo ja'a miādia'agy hajxy hānajty yhamādoowhidāanā. Mānitä cu'ughajxy tiägøøyy yaaxpä jojpä:

—Ween yø'ø craa yho'ogy. Yagho'og yø'ø craa hajxy.

23 Tehñgajnä hajxy hānajty jaduhñ wyl'i ya'axy wyl'i jiocy. Yamä wyit hajxy hānajty wyl'i chajyemy. Yamä naaxoc hajxy hānajty wyl'i chajwøjy. Paady hajxy hānajty jaduhñ wyl'i jiatcø'øy coo ja'a Pablo hajxy hānajty jiaanch tehñ miädsipaty.

24 Mānitä soldado-wiindsøn miānaañ coo ja'a Pablo jiiby yajtøjtägø'øwóøjät cuarteltøgooty. Mānit jiaac mānaañ coo ja'a Pablo wiobho'ogóøjät, ween jaduhñ quiøxy nägapxy tiiguiøxpä cu'ugä Pablo hajxy hānajty coo tøø wyl'i ñäya'axy.

25 Mānitä soldado ja'a Pablo hajxy quiø'øxojch. Wiobho'ogaambiä Pablo hajxy hānajty. Mānitä Pablo ja'a capitán miägapxy, ja'a hānajty jim tanaabiä wiinduum:

—Caj mijts cuhdujt mmøødä cooch mijts xwióbät nä'ä nägoobä. Cab hajxy mnajuø'øy pø tøøch ngädieey. Høøch, jadúhñhøchä cuhdujt nmøødä nebiä Rómabä jäya'ayhajxy miøødän —nømä Pablo ja'a capitán ñāmaayy.

26 Coo ja'a capitán jaduhñ miädooyy, mānitä wyiindsøn ñāmaayy:

—Ca'a hajxy jaduhñ mwopy. Jadúhñäc yø'ø craa cuhdujt miøødä nebiä Rómabä jäya'ayhajxy miøødän.

27 Mānitä soldado-wiindsønä Pablo hoy miäyajtøy:

—Nej, tøyhajt jaduhñ coo miichä cuhdujt jaduhñ mmøødä nebiä Rómabä jäya'ayhajxy miøødänä.

Mānitä Pablo yhadsooyy:

—Tøyhajt jaduhñ.

28 Mānitä soldado-wiindsøn miānaañ:

—Jadúhñhøchä cuhdujt nmøødäbä nebiä Rómabä jäya'ayhajxy miøødän. Pero jaanch tehñ chówhøch jaduhñ tøø xyhabädsøømä coochä cuhdujt jaduhñ tøø njuy.

Mānitä Pablo miānaañ:

—Cooch jim nnaaxque'exä Tarso, páadyhøchä cuhdujt jaduhñ nmøødä nebiä Rómabä jäya'ayhajxy miøødän.

29 Ja'a soldadohajxy hānajty māvobaambä, coo hajxy jaduhñ miädooyy coogä Pablo cuhdujt hānajty jaduhñ miøødä nebiä Rómabä jäya'ayhajxy hānajty miøødän, mānitä Pablo hajxy piuhwaach. Y ja'a soldado-wiindsøn, coo je'e jaduhñ miädooyy, tsähgøøyy je'eduhñ je'eguiøxpä coo ja'a Pablo hānajty tøø quiø'øxoçhii tøø tiecyxioçhii.

30 Cujaboomä soldado-wiindsøn jaduhñ miānaañ coo ja'a Pablo quiø'øguejøøjät. Mānit miānaañ coo ja'a teedywiindsøñhajxy yhamugø'øwät møødä majtøjc-hajxy. Mānitä Pablo jim yajnøcxä maa ja'a teedywiindsøñhajxy hānajty tøø yhamugø'øyän. Mānitä Pablo jim yajtānaaguiādaacä

cu'ugwiinduum. Miadowaambiä soldado-wiindsón hānajty jaduhñ tiiguiøxpä judíos ja'a Pablo hajxy hānajty coo tøø ñäxø'øwø'øy.

23

¹ Mānitä teedywiindsøn hajxy wyiinhē'ppejtä ja'a Páblām. Mānitä Pablo miānaañ:

—Mägu'ughajpādøjc, Dióshøch jaduhñ xyhijxp cooñ homiānaajä nho-jiäya'ayhaty.

² Coo ja'a Pablo jaduhñ miānaañ, mānitä hāna'c-hajxy ñāmaayyā coo ja'a Pablo hajxy yhapo'xø'øgāt, ja'a hāna'c-hajxy hānajty jim tanaabiä Pablo wyiinduum. Ja'a Ananías jaduhñ mānaañ coo hajxy jaduhñ jiatcø'øwāt. Møjhajpā Ananías hānajty jim maa ja'a teedywiindsøn hajxiän.

³ Mānitä Pablo ja'a Ananías ñāmaayy:

—Dios miich jaduhñ xyajcumadowaamb. Caj miich hoy mduñ. Jaduhñ miich mduungmøddä cooñ miich xyajtøyhajtyégāt hoy yajxón nebiä cuhdujt myiñän. Pero coo miich jaduhñ tøø mmāna'añ cooñ hāna'c xquióxāt, myajcāhxø'py miich jaduhñ coo miichä cuhdujt hoy mga'a yajtuñ.

⁴ Ja'a hāna'c-hajxy hānajty jim tanaabiä, mānitä Pablo hajxy ñāmaayy:

—Tøø miich jaduhñ ngapxtägoy coo yø'ø møjteedywiindsøn jaduhñ tøø mwiingapxpety. Haa ca'a, Dios yø'øduhñ tøø yhuuc pädaacpä.

⁵ Mānitä Pablo yhadsooyy:

—Mägu'ughajpādøjc, huuc mee'x hajxy, cábøch hijty nnajuø'øy coo yø'ø jaduhñ tiuñ møjteedywiindsøn. Jaduhñ jim myiñ cujaay maa ja'a Diosmādia'aguiän coo hajxy nga'a nānømāt haxøøg, pønatiä tuung møød maa ja'a tsaan maa ja'a cu'ugän.

⁶ Mānitä Pablo jaduhñ yhijxy coo hāna'c-hajxy hānajty mejtstu'u tøø yhamugø'øy, møødä saduceoshajxy, møødä fariseoshajxy. Mānitä Pablo møc quiapxy:

—Mägu'ughajpādøjc, høøch, jue'eçh høøch, fariséoshøch høøch. Haagä fariseos højts jaduhñ. Cooñ jaduhñ nmäbøcy coo ja'a ho'oguiäya'ayhajxy jaduhñ jiuypijøjtägatsa'añ, páadyhøchä hāna'c jaduhñ tøø xñäxø'øwø'øy.

⁷ Coo ja'a Pablo jaduhñ miānaañ, mānitä fariseoshajxy tiägøøyy yajcapxiøbiä møødä saduceoshajxy. Cabä miādia'agyhajxy hānajty ñibiaadyii.

⁸ Hix, jaduhñä fariseoshajxy hānajty miäbøcy cooc ja'a ho'oguiäya'ayhajxy jiuypijøjtägatsa'añ. Jaduhñ hajxy hānajty miäbøjpä cooc ja'a Dios ja'a mioonsä jim miøødä tsajpootyp, møød cooc ja'a nhaañāmähajtāmhajxy quia'a hó'cām. Pero cabä saduceoshajxy hānajty miäbøcy nebiä fariseoshajxy hānajty miäbøquiän.

⁹ Tehngajnä hajxy hānajty miaas nāmayø'øy haamhajpā. Tehngajnä hajxy hānajty yhambøcy. Mānitä fariseoshajxy naje'e tiānaayyø'cy, ja'a hajxy hānajty yajnähixøbiä maa ja'a tsajtøjcän. Mānit hajxy miānaañ:

—Yø'ø craa, cap tii pojpä cādieey miøødä. Jimbädä Diosmoonsä tøø miägapxyii, o hāñāmä.

¹⁰ Maas hanaxiä hajxy hānajty yhambøcy. Tsähgøøbiä soldado-wiindsøn hānajty coo ja'a Pablo hānajty yagho'oga'añii. Mānitä soldado-wiindsønä soldado miøjyaaxy coo ja'a soldado ja'a Pablo hajxy jiiby wyitstsóonät, møød coo hajxy jim yajnøcxāt maa ja'a cuartelän.

¹¹ Mānitcoodsä Jesús jiiby ñäguehxtø'xy maa ja'a Pablo wyiinduumän. Mānitä Jesús ja'a Pablo ñāmaayy: “Ca'a mdsähgø'øy. Nébyhøch miich yaa tøø xmiādia'aguiän Jerusalén, jaanä jaduhñhøch miich jim nøcxy xmiādia'agáangumbä Roma.”

¹² Cujaboomä judíoshajxy näje'e hoy quiojyquiapxyhaty coo ja'a Pablo hajxy yaghó'ogät. Mänit hajxy ñiñämaayyā:

—Mäduhñtiä Pablo jiaac jugyhaty, cab hajxy nnä'ägä caayy nnä'ägä húucāmät.

¹³ Näjuxychägui'xnaxy hajxy hānajtj je'eduhñ, ja'a hajxy hānajtj jaduhñ tøø quiojyquiapxyhātiäbä.

¹⁴ Mänit hajxy hoy ñägapxy maa ja'a majtøjc-hajxiän:

—Tøø højts jaduhñ ngojyquiapxyhaty coo højtsä Pablo nyaghó'ogät. Høxtä mänit højts ngaya'añ nhu'uga'aññä.

¹⁵ Hoorä, mijts, nøcxä soldado-wiindsøn hajxy jaduhñ nāma'aw coo weenā Pablo yaa yajmechii mijts mwiinduum. Jaduhñ hajxy mwiinhøønät coo tyijj ja'a Pablo hajxy mjaac tehñ miäyajtøwa'añ. Cahnä Pablo hānajtj yaa quioody maa mijts mwiinduumän, jim højts nyaghó'ogät tu'haam —nømä teedywiindsønhajxy ñämaayyā.

¹⁶ Mänitä Pablo chojmajc jaduhñ miädoyhajty coogä Pablo hānajtj yagho'oga'añii. Mänitä Pablo hoy yhawáanäxä maa hānajtj chumiän.

¹⁷ Mänitä Pablo ja'a capitán tu'ug miøjyaaxy. Mänit ñämaayy:

—Huuc tunä mayhajt, huuc woonøcx hädaa craa jim maa ja'a mwiindsønän. Jim jaduhñ miøødmädia'aga'añ.

¹⁸ Mänitä Pablo chojmajc wioonøcxäxä maa ja'a soldado-wiindsønän. Mänitä capitán ja'a soldado-wiindsøn ñämaayy:

—Ja'a Pabløch jaduhñ tøø xñäma'ay cooçh hädaa craa yaa nwoomínät maa miichän. Míichäc jaduhñ xmiøødmädia'agaamb.

¹⁹ Mänitä Pablo chojmajc wiingtuum wyitsnøcxäxä. Mänitä soldado-wiindsøn miänaañ:

—Tiiçh jaduhñ xyhawaanāanäp —nømä Pablo chojmajc miäyajtøwäxä.

²⁰ Mänitä Pablo chojmajc yhadsooyy:

—Tøø ja'a judíoshajxy näje'e quiojyquiapxytiun cooc miich xñäma'awa'añ coo miichä Pablo jaboom ween mguexy maa ja'a teedywiindsønä wyiinduumhajxiän. Jaduhñäc miich xwyiinhøøna'añ cooc tyijj ja'a Pablo hajxy cøxiä wiinä jiaac tehñ miäyajtøwa'añ.

²¹ Caj miich jaduhñ mmäbøgät. Näjuxychägui'xnaxiä jäya'ayhajxy jaduhñ tøø quiojyquiapxyhaty coo ja'a Pablo hajxy yaghó'ogät tu'haamnøcxpä. Cábäc hajxy jaduhñ ñä'ägä caya'añ ñä'ägä hu'uga'añ. Høxtä coogä Pablo hajxy yaghó'ogät, mänitäc hajxy quiaaya'añ yhu'uga'aññä. Míichäc hajxy xyhuuc jaac hahijxp cooc miich jaduhñ mmäná'anät pø mgudiunaamby jaduhñ —nømä soldado-wiindsøn ñämaayyā.

²² Mänitä Pablo chojmajc ñämäayyāxä coo quia'a nāgäpxät wiingtuum waambaty hānajtj jaduhñ tøø miädia'agy. Mänitä soldado-wiindsøn jaduhñ miänaañ coo ja'a Pablo chojmajc wyiimbijnät.

²³⁻²⁴ Mänitä soldado-wiindsønä capitán metsc miøjyaaxy. Mänit hajxy wyiinguejxä coo ja'a Pablo hajxy coods jim yajnøcxät Cesarea. Nämäyyä soldadohajxy hānajtj pianøcxä'añ. Nāmejtsmägo'x hajxy hānajtj ñøcxä'añ tecy-yo'oyhaam; møød nädägøøghii'xcumajc hajxy hānajtj ñøcxä'añ cuaañähgøxp; møød nāmejtsmägo'x hajxy hānajtj ñøcxäambä cuhmdcap. Jaduhñä capitánhajxy ñämäayyābä coo ja'a Pablo cuaañähgøxp ñøcxät, møød coo hoy cwieendāhadøøjät, jaduhñ nejy quia'a jat quia'a habétät. Jaduhñä soldado-wiindsøn yhanehmbä coo ja'a Pablo ja'a gobernador Félix yajcø'ødägø'øwøøjät.

²⁵ Mänitä soldado-wiindsønä nocy yhädiuun. Ja'a gobernador Félix hānajtj yajnäguexaamby. Jaduhñ soldado-wiindsøn quiujahy:

²⁶ “Høøch hädaa nocy nhädiuumby, høøch Claudio Lisias. Wiindsón Félix, miich jaduhñ cham nyajpoo'xyp.

²⁷ Hädaa jäyá'ayhøch miich nyajnäguejxyp. Pablo jaduhñ xiøhaty. Häxøøyy maaxtøjquiä Pablo yaa miajtsä Jerusalén. Ja'a judíoshajxy jaduhñ mämajts. Yagho'ogáañbä Pablo hñajty. Pero cooçh jaduhñ nmädoyhajty coo ja'a Pablo cuhdujt jaduhñ miøødä nebiä Rómabä jäya'ayhajxy miøødän, mänitøchä soldado ja'a Pablo hoy nmøødyajñähwa'açh.

²⁸ Je'eçh hñajty nmädowaamby tiiguiøxpä Pablo hñajty coo tøø miächii, páadyhøch jiiby nmøødhädaacy maa ja'a judíos ja'a junta hajxy hñajty yag-jadyiijän.

²⁹ Mänitøch nmädooy coogä Pablo tii pojpä tii cädieey quia'a møødä. Je'eduhñ yajcumadsøøyyä coo ja'a judíos ja'a quihdujthajxy wyiingjatiä. Páadyhøch jaduhñ nga'a mänaañ coo ja'a Pablo yagho'ogøøjät, ni coo chumøøjät.

³⁰ Cooçh jaduhñ nmädoyhajty coo ja'a judíoshajxy hñajty näje'e tøø quiojyquiapxyhaty coo ja'a Pablo hajxy hñajty yagho'oga'añ, mänitøch jaduhñ nwiinmaay cooçh miich jaduhñ nyajnäguéxät. Ja'a hñä'cä Pablo hajxy ja wi'i yagho'ogaambä, tøøch nnäma'ay coo ja'a Pablo jim nøcxy ñäxø'øwø'øyyi miich mwiinduum.”

³¹ Mänitä soldadohajxy jiaançh cudiuuñ nebiä wyiindsón hajxy hñajty tøø ñäma'ayijän. Mänitä Pablo hajxy jim coods yajnøcxy maa ja'a cajpt hñajty xiøhatiän Antípatris.

³² Cujaboomä soldadohajxy wyiimbijty, ja'a hajxy hñajty tøø ñøcxy teci-yo'oyhaam. Ja'a hajxy hñajty cuaañähgøxpä, je'edsä Pablo hajxy jaac møødnøcxnä.

³³ Mänit hajxy jim quioo'ty Cesarea. Mänitä Pablo ja'a Félix hoy yajcø'ødägø'øyyi møødä nocy, ja'a soldado-wiindsón hñajty tøø quiéxiäbä.

³⁴ Mänitä Félix ja'a nocy quiapxy. Mänitä Félix ja'a Pablo miäyajtøøyy maa je'e chooñ. Mänitä Pablo yhadsooy coo hñajty jim chooñ Cilicianaaxooty.

³⁵ Coo ja'a Félix jaduhñ miädooy, mänitä Pablo ñämaayy:

—Weenä jäya'ayhajxy yhuuc mech, ja'a miich hajxy jaduhñ xñäxø'øwø'øwaambä, mänitøchä tøyhajt nmädowa'añ ja'a miichcøxpä.

Mänitä Félix ja'a soldado ñämaayy coo ja'a Pablo piäda'agøøjät møjtoogooty, ja'a hñajty xøhajpä Palacio de Herodes. Jaanä jaduhñä Félix miänaambä coo ja'a Pablo hoy cwieendähadøøjät.

24

¹ Cumägooxxøø ja'a Ananíashajxy jim quioo'ty Cesarea. Møjteedywiindsönä Ananías hñajty tiuumby jim Jerusalén. Näguipxiä majtøjc-hajxy näje'e pia-goo'pä møødä licenciadä tu'ug, ja'a hñajty xøhajpä Tértulo. Mänit hajxy jim ñøcxy maa ja'a gobernador Félix hñajty tiuñän. Mänitä Félix hajxy ñämaay coo ja'a Pablo hajxy hñajty ñäxø'øwø'øwa'añ.

²⁻³ Mänitä Félix miänaañ coo ja'a Pablo yajmedsøøjät maa ja'a Félix wyiinduumän. Coo Pablo jaduhñ yajmejtsä, mänitä Tértulo ja'a Pablo tiägøøyy näxø'øwøøbiä:

—Wiindsón Félix, hoy højts njaançh tehñ ñijiäwø'øyyi maa miichcøxpän, coo miich hoy mjaançh tehñ tiuñ. Tøø højts miichä nnaaxä ngajpt xjiaançh tehñ yaghoyøøyyä. Cabä tsip cabä pleetä jaduhñ maa yajpaady. Coo miich jaduhñ hoy mjaançh tehñ tiuñ, paady højts Dioscujú'uyäbä njaançh tehñ yecy maa miichcøxpän.

⁴ Cábøch miich jejcy nhadsiba'añ. Huuc tunä mayhajt, højtsä nmädia'agy hamädoowhíjtäc. Paquiä højts jaduhñ nmädia'aga'añ.

⁵ Yø'ø craa Pablohajpä, nmøødhajpy højtsä tøyhajt jaduhñ coo yø'ø højts xjiaanč tehñ miädsibø'øy majaty højts nhity, højts judíosahajpä. Jaduhñ højts xjia wi'i jiojcapxø'øy coo højtsä nguhdujt nnajtshixø'øwät. Jaduhñä tsip homiaajä yajpädø'øgy. Ja'a jäya'ayä Jesús Nazaretpä miädia'agy hajxy panøcxäbä, je'e ja'a Pablo hajxy wiindsønñhajp.

⁶ Mänitä Pablo jäya'ay nämädaaxc miøødtøjtägøøyy maa højtsä nmøjtsajtøgootiän. Ja'a hajxy nämädaaxpä, ca'a hajxy je'e jiudíosä. Cab højtsä nguhdujt jaduhñ myiñ coo wiingjäya'ay jiiby tiägø'øwät. Mänit højtsä Pablo nyajmajtsä. Nyajcumädowaamby højts hänajty, tii hänajty jiiby tiuumby tsajtøgooty. Jaduhñ højtsä nguhdujt myiñ coo jaduhñ quiumädowät.

⁷ Mänitä soldado-wiindsønñ piayajcahw piayajpøgøøyy, ja'a xøhajpä Lisias. Mänit højtsä Pablo mädsibø'øbä xpiøjcä.

⁸ Mänit højtsä Lisias xñämaayy coo højts yaa nmínät maa miichä mwiinduumän, coo højtsä Pablo yaa nnäxø'øwø'øwät. Hoorä, hamdsoo miichä Pablo mmäyajtøwät pø tøyhajt jaduhñ neby højts chamñ nnäxø'øwø'øyän —nømä Tértulo ja'a Félix ñämaayy.

⁹ Jaduhñä judíosahajxy piamänaambä.

¹⁰ Mänitä gobernador Félix ja'a Pablo miäwø'xy coo ja'a Pablo miädiä'agät. Mänitä Pablo miänaañ:

—Wiindsønñ Félix, jaanč tehñ jiootcújc-høch chamñ nnijiäwø'øyii cooçh yaa nniguiugapxa'añii miichä mwiinduum. Hix, nnajuøøbiøch jaduhñ coo miich møjtuung jejcy yaa tøø mmøødhaty maa højtsä nnaax maa højtsä ngajptän.

¹¹ Chaanä miajmetsxøøhaty cooçh jimñ ngoo'ty Jerusalén. Jímhøçhä Dios hänajty nwiingudsähgø'øwa'añ tsajtøgooty. Tøyhajt jaduhñ. Hoy piønä jaduhñ miäna'añ.

¹² Pero cábøçhä tsip jimñ nhøxtaayy. Cábøçhä tsip ni maa nhøxtaayy, majátyhøch tøø nwädity, ni jiiby møjtsajtøgooty, ni jiiby muuttsajtøgooty, ni jimñ cajptooty. Cáboch pønñ jimñ nmøødyajcapxiøøyy.

¹³ Hoorä, yø'ø häna'c-hajxy ximñ xwyiingapxpéjpøçhä, hønñdaacp hajxy yø'ø. Cab hajxy tøyä ñä'ä mädia'agy.

¹⁴ Pero jaduhñ mäsøcypä, nwiingudsähgøøbiøçhä Dios. Nebiä jecyjiäya'ayä Dios hajxy wyiingudsähgøøyyän, jaduhñhøch nwiingudsähgøøbiä. Cooçhä Dios jaduhñ nwiingudsähgø'øy, páadyhøçhä yHuang Jesús ja'a miädia'agy jaduhñ nbanøcxä. Yø'ø häna'c-hajxy ximbä, cabä Jesús ja'a miädia'agy hajxy wyiinguøøyyä. Cábac tyijy jaduhñ tiøyyä. Pero nmäbøjpøçhä jecymiädia'agy, ja'a Moisésahajxy jecy quiujähyyäbä møødä profetadøjc-hajxy.

¹⁵ Yø'ø häna'c-hajxy, jaduhñ hajxy miäbøcy cooc ja'a ho'oguiäya'ayhajxy nägøxiä jiuypijøjtägatsa'añ, hoyhäna'cä, haxøøghäna'cä. Jaanä jaduhñhøch nmäbøjpä. Coo ja'a Dios jaduhñ miänaañ cooc hajxy nägøxiä xyagjujpiøjtägatsaanäm, tøy jaduhñ.

¹⁶ Cooçh jaduhñ nmäbøcy, páadyhøçhä njoot homiänaajä nbäda'agy cooçhä Diosmädia'agy hoy tehngajnä nbadúnät. Jaduhñhøçhä Dios xquiumáyät. Jaanä jaduhñhøçhä cu'ug xquiumáabiät.

¹⁷ 'Mänäajøch hoy nwäditiän jäguembaady mejtsjomøjt tægøøgiomøjt, mänitøch jimñ nmejtstägajch Jerusalén. Xädø'øñhøch jaduhñ nmämejts. Ja'a nmägunäaxhøch hänajty nmo'owaamby. Møødhøçhä meeg hänajty nyoxa'añ ja'a Diosøxpä.

¹⁸ Jaduhñhøch hänajty jiiby nguhdujthaty møjtsajtøgooty, mänithøçhä judíosahajxy näje'e xyhijxy, ja'a hajxy jimñ tsohmä Asia. Tøøçh hänajty ngudiunñ neby højtsä nguhdujt myiñän. Cáboçhä häna'c hänajty nämay nmøødä. Cab højts hänajty nhaamhaty.

19 Ja'a jäya'ay højts jaduhñ xyhíxäbä møjtsajtøgooty, je'eds jaduhñ hahixøøby xñäxø'øwø'øwäbøch yaa miichä mwiinduum, pø tøøch hajxy jaduhñ xyhixy cooçh ngädiehy.

20 Yø'ø häna'c-hajxy xim tänaabiä, ween yø'øhajxy jaduhñ ñägapxy pø tøøch hänajty ngädieey mänaächä häna'c jim xyajmechän maa ja'a teedywiindsønä wyiinduumhajxiän jim Jerusalén.

21 Wéhñdøch mänit ngapxtägooyy cooçh nmänaañ cooçh nmäbøcy coo ja'a ho'oguiäya'ayhajxy jiuypipøga'añ. Møc-høch jaduhñ nmänaañ.

Mänitä Pablo quiapxpädøñä.

22 Coo ja'a Félix jaduhñ miädooyy, mänit jaduhñ wyiinmahñdyhajty coo ja'a tsip hänajty quia'a tsoj yajtødiägø'øwa'añ ja'a Pablocøxpä. Hix, ñajuøøbiä Félix hänajty jaduhñ coo ja'a jäya'ayhajxy hänajty hoy quihdujthaty, ja'a Jesús ja'a miädia'agy hajxy hänajty panøcxäbä. Mänitä Félix ja'a judíos ñämaayy:

—Mhahíxäbä Lisias hajxy. Coo je'e yaa quiädá'agät, mänitøchä mdsiphajxy nyajtødiägøøyyät —nømä Félix miänaañ.

23 Mänitä Félix ja'a capitán ñämaayy coo ja'a Pablo jiaac yaghidøøjät tsumy, møød coo quia'a tsaachtunøøjät ni weeñtiä. Jaduhñä Félix miänaambä coo ja'a Pablo quihixøøjät ja'a miägu'ughajpädøjc, møød coo hoy tyijä ween yajnämechii.

24 Cumejtsxøø cudägøøgxøø ja'a Félix ja'a tio'oxiøjc miøødmejh maa hagu-jcän. Drusila hänajty xiøhaty. Judía hänajty je'e. Mänitä Félix miänaañ coo ja'a Pablo yajmedsøøjät maa ja'a Félix wyinduumhajxiän. Miädowaambiä Félixhajxy hänajty tiiguiøxpä Pablo ja'a Jesús ja'a miädia'agy hänajty coo pi-anøcxä.

25 Mänitä Pablo tiägøøyy mädiaacpä coo hajxy hoy njäya'ayhajtämät, møød coo hajxy hoy nguhtujthajtämät, møød coo ja'a Dios hajxy cøxiä xya-jnägapxäänäm nebiaty hajxy hänajty tøø njäya'ayhajtäm. Coo ja'a Félix jaduhñ miädooyy, mänit chähgøøbiøjcy. Mänitä Félix ja'a Pablo ñämaayy:

—Ween tiuhñä. Tøø ja'a mmädia'agy nmädóowäm. Nøcxnä. Coo jadähooc ñäbaadø'øwät, mänit miich jadähooc nyajmøjya'axøøjät —nømä Félix ja'a Pablo ñämaayy.

26 Jaduhñä Félix hänajty miäna'añ cooc tyijy xädø'øñ mio'owa'añii Pábläm, cooc tyijy ja'a Pablo jaduhñ yajpädsømøøjät pujxtøgooty. Paadiä Félix ja'a Pablo hänajty ja naañhooc yajmøjya'axyii coo hänajty miøødmädia'aga'añii.

27 Mejtsjomøjtä Pablo hänajty jim tøø chumyçhäna'ay Cesarea, mänitä gobernadorhajxy ñiguiuwijtsä. Coo ja'a Félix piädsøømy, mänit wiinghäna'c tiägøøguiumbä. Porcio Festo hänajty xiøhaty. Cabä Félix ja'a judíos hänajty yagjootma'ada'añ, paadiä Félix miänaañ coo ja'a Pablo jaduhñ jiaac hídät tsumy.

25

1 Mänitä Festo tiägøøyy tuumbä gobernador jim Cesarea. Cudägøøgxøø jim ñøcxy Jerusalén.

2 Coo jim quioo'ty, mänitä teedywiindsønñhajxy jim miehch maa ja'a Festo wyiinduumän, møødä møjhapä judíoshajxy. Mänitä Pablo hajxy tiägøøyy näxø'øwøøbiä.

3 Mänitä Festo hajxy miänuu'xtaacy coo mayhajt cu tiuñ, coo cu yhanehmy coo ja'a Pablo jim cu quiejxä Jerusalén. Hix, tøø ja'a judíoshajxy hänajty quiojyquiapxyhaty coo ja'a Pablo hajxy yaghó'ogät tu'haamnøcxpä.

4 Pero cabä Festo jaduhñ ñähadsooyy. Mänit miänaañ coo ja'a Pablo hänajty jiiby chumyçhäna'ay Cesarea. Jaduhñä Festo miänaambä coo hänajty paquiä jim yhida'añ Jerusalén, møød coo hänajty jiiby yhäda'agáangumbä Cesarea.

⁵ —Põn cuhdujt mөөд maa mijtsän, wéenhøch hajxy jiiby xpiahäda'agy Cesarea. Y pø tөөдsä Pablo jaduhñ jiaanč cädieey, jiiby jaduhñ ñäxø'øwø'øwøjät —nømä Festo ja'a judíos ñämaayy.

⁶ Tuctujxøø ja'a Festo jim jiaac hijty Jerusalén. Mänit jiiby yhädaactägajch Cesarea. Coø jiiby quiädaacy, mänit jim tiägøøyy tuumbä hagujc. Mänit miänaañ coø ja'a Pablo jim yajmedsøjät.

⁷ Coø ja'a Pablo jim miejch hagujc, mänitä judíos ja'a Pablo hajxy piquiä piädaacy, ja'a hajxy hänajty tøø chohndá'aguiäbä Jerusalén. Mänitä Pablo hajxy cøxypänejpy ñähwaambejty.

⁸ Mänitä Pablo ñijigapxä:

—Cábøchä cädieey jaduhñ maa nmөөдä, ni jim maa ja'a judíos quiuhdujthajxiän, ni jim maa ja'a chajtøjc-hajxiän, ni jim Roma maa ja'a gobiernä yhane'emiän.

⁹ Mänitä Festo ja'a Pablo ñämaayy:

—Nej, mmänaamb miič jaduhñä coø højts jim nnøcxämät Jerusalén, coø miič jim mdøyhajtyégät maachä nwiinduumän.

Paadiä Pablo jaduhñ ñämaayy, je'eguiøxpä coø ja'a Festo ja'a judíos hänajty quia'a yagjootma'ada'añ.

¹⁰ Mänitä Pablo yhadsooyy:

—Cab jaduhñ yhawiinmatsä coøch jim ndøyhajtyégät Jerusalén. Hix, cábøch tii cädieey nmөөдä maa yø'ø judíoshajxiän. Mnajuøøby miič jaduhñ. Jaduhñ mábøcypä yhawiinmatsä coøch yaa ndøyhajtyégät maa ja'a gobiernä yhane'emiän, ja'a jim tuumbä Roma.

¹¹ Coøch häxøpy tøø ngädieey, hahixøøby hijty jaduhñ coøch nhó'ogät. Pero cábøch tøø ngädieey, hoy yø'ø judíoshajxy jaduhñ tøø xia nähwaambety. Cab jaduhñ yhäxø'øy coøch pøn xyégät maa yø'ø judíoshajxiän. Jaduhñhøch nja mäna'añ coøch jim ndøyhajtyégät maa ja'a gobiernä wyiinduumän jim Roma —nømä Pablo miänaañ.

¹² Mänitä Festo ja'a jiamioød miäyajtøøyy neby jaduhñ wyiinmahñdyhädät ja'a Pablocøxpä. Mänitä Festo ja'a Pablo ñämaayy:

—Miič jaduhñ tøø mmäna'añ coø miič jim nøcxy mdøyhajtyega'añ jim Roma maa ja'a gobiernä wyiinduumän. Pues jímhøch miič njaanč quexa'añ Roma tøyhajtyejpä.

¹³ Cumejtspo'o cudägøøgpo'o, mänitä Agripahajxy jim miejch Cesarea mөөдä tio'oxiøjc Berenice. Gobiernä ja'a Agripa hänajty tiuumby wiingtuum. Mänitä Agripa ja'a Festo hajxy yajpoo'xy.

¹⁴ Maxiøø ja'a Agripahajxy hänajty jim yhida'añ maa ja'a Festo tiøjcän. Mänitä Festo ja'a Agripa ñämaayy:

—Jimä jäya'ay tu'ug chumyčhäna'ay. Pablo jaduhñ xiøhaty. Coø ja'a Félix yaa piädsøømy tuumbä, jimä Pablo jaduhñ jiaac mähmøøyy tsumy.

¹⁵ Mänáajøch jim nhoyyän Jerusalén, mänitøchä judíoshajxy xñähooyy, ja'a hajxy hänajty møjhajpä, mөөдä teedywiindsøñhajxy. Mänitä judíos ja'a Pablo hajxy ñäxø'øwøøyy maach nwiinduumän. Mänitä judíoshajxy miänaañ coø ja'a Pablo cu yagho'cä.

¹⁶ Mänitøch nhadsooyy: “Jaduhñ hajxy jim quiuhdujthaty Roma, cab jaduhñ pøn yagho'ogyii, pø cahnä hänajty ñijigapxyii maa ja'a jäya'ayä wyiinduumhajxiän, ja'a hajxy hänajty mänäxø'øwøøbiä”, nómhøchä judíos nnämaayy.

¹⁷ Hoorä, coøch yaa ngädaactägajch Cesarea, mänitøchä judíos xpiamänajcy. Cujabóomhøch ndägøøyy tuumbä. Mänitøchä Pablo nyajmøjyaaxä.

¹⁸ Coo ja'a judíoshajxy jim miejch maačh nwiinduumän, mänitä Pablo hajxy tiägøøyy näxø'owøøbiä. Haxøøgaty ndijy ja'a Pablo hänajty ñäxø'owø'owa'añii. Pero cabä Pablo jaduhñ haxøøgaty ñä'ä nänøømä.

¹⁹ Jue'e ja'a judíoshajxy hänajty yajcapxiøøby, nebiatiä quiuhdujt hajxy yaghity, møød coogä Pablo hoy quia'a cudiuñ. Møød hajxy hänajty yajtsi-bøøbiä pø tøø ja'a Jesús jiaančh jujypiøjtägach, ja'a hänajty tøø yho'oguiäbä. Jaduhñä Pablo yhajodhaty coogä Jesús tøyhajt tøø jujypiøcy.

²⁰ Høøčh, cábøch hänajty nnajuø'øy nébiøčhä capxy mädia'agy jaduhñ nyajtødiägø'owät. Mänitøčhä Pablo nmäyajtøøyy pø nøcxaamb hänajty jim Jerusalén coo jim cu tiøyhajtyecy.

²¹ Mänitä Pablo yhadsoooy cooc hänajty jim quia'a nøcxa'añ Jerusalén. Mänit miänaañ cooc hänajty jim nøcxy yajtøyhajtyega'añii Roma maa ja'a gobiernä tiuñän. Coo jaduhñ yhadsoooy, páadyhøch jaduhñ nmänaañ coo yaa jiaac hídät tsumy. Coo jaduhñ ñäbaadø'owät, mänitøch jim nguexa'añ Roma, ween jim nøcxy tiøyhajtyecy maa ja'a gobiernä wyiinduumän —nømä Festo quiapxy miädiaacy.

²² Mänitä Agripa ja'a Festo ñämaayy:

—Nmädowáambiøch høøčhpä waambä craa jaduhñ miädia'aga'añ.

Mänitä Festo yhadsoooy:

—Jaboom mmädówät —nømä Agripa ñämaayyä.

²³ Cujaboomä Agripahajxy jim miejch haguyc møødä Berenice. Wiinxu'uxy wiinwopy hajxy jim miejch. Mänit hajxy jiiby tiøjtägøøyy maa ja'a Festo hänajty tiuñän, näguipxy møødä soldado-wiindsøñhajxy, møødä møjtøjc-hajxy. Mänitä Festo ja'a Pablo yajmøjyaaxä.

²⁴ Coo ja'a Pablo jiiby tiägøøyy, mänitä Festo miänaañ:

—Wiindsøn Agripa, møød pønjaty yaa tøø miech maa højts nwiinduumän, mįjtsäts jaduhñ nmägapxyp. Yø'ø craa xii tänaabiä, yø'øds jaduhñ xøhajp Pablo. Yø'ødsä judíoshajxy tøø wyi'i ñäxø'owø'øy yaa Cesarea møød jim Jerusalén. Jaduhñ hajxy tøø wyi'i ya'axy tøø wyi'i jiocy coo yø'ø Pablo ween yho'ogy.

²⁵ Pero høøčh, cábøch jaduhñ nmäna'añ coo tøø quiädieey. Páadyhøch jaduhñ nmäna'añ coo quia'a hó'ogät. Pero hamdsoo yø'øduhñ tøø miäna'añ coo jim ñöcxät Roma, coo jim nøcxy yajtøyhajtyega'añii maa ja'a gobiernä wyiinduumän. Páadyhøch jaduhñ jim nguexa'añ.

²⁶⁻²⁷ Cábøch nnajuø'øy waambátyhøčhä gobiernä Rómabä nno-cyñäjaayø'owät ja'a Pablocøxpä. Cab jaduhñ yhawinmatsä coočhä Pablo jim nguéxät Roma tsumy, pø cábøch tøyhajt nmøødä pø tøø jiaančh cädieey. Hoorä, páadyhøčhä Pablo yaa tøø nyajmech coo mįjts jaduhñ ween myajtøyhajtyecy. Miičh, Wiindsøn Agripa, miičh mjaančh tehñ jiajpy mjaančh tehñ ñajuøøby. Coo mįjts hänajty tøø myajtøyhajtyecy nebiaty jaduhñ tøø jiaančh cädieey, mänitøch mäßøcy nnajuø'owät nébiøch njáayät —nømä Festo miänaañ.

26

¹ Mänitä Agripa ja'a Pablo ñämaayy:

—Hahixøøby jaduhñ coo miičh hamdsoo mnijiøgapxøøjät.

Mänitä Pablo ja'a quiø'ø chajxajy. Mänit tiägøøyy mädiaacpä:

² —Wiindsøn Agripa, chámhøch nnijiøgapxa'añii nebiátyhøčhä judíoshajxy tøø xñähwaambety. Jootcújc-høch jaduhñ nnijiäwø'øyii coočh yaa nmädia'aga'añ miičh mwiinduum.

³ Páadyhøch jootcujc nnijiäwø'øyii je'eguiøxpä coo miičh mjaančh tehñ jiaty mjaančh tehñ ñajuø'øy nebiatiä judíoshajxy quiuhdujthaty, møød tijaty

hajxy naxy yajtsibøøby. Høøch huuc mée'xác. Høøchä nmädia'agy huuc hamädoowhíjtäc.

⁴ Najuøøbiä judíoshajxy jaduhñ nägøxiä cooçhä quiuhdujthajxy hoy ngudi-uunä homiänaajä, møød jim maächä nhamdsoo cajptän, møød jim Jerusalén. Múutsnøch hānajtý jaduhñ cooçhä quiuhdujthajxy jaduhñ nbadu'ubøjcä.

⁵ Jaanä jaduhñä judíoshajxy ñajuøøbiä cooçhä fariseos quiuhdujthajxy hoy nyajtúunäbä. Múutsnøch hānajtý jaduhñbä cooçh ndägøøyy habøjpä. Miøødä judíos ja'a tøyhajt hajxy jaduhñ. Hahixøøby jaduhñ coo hajxy jaduhñ ñägápxät. Ja'a fariseoshajxy, ca'xiä cuhdujt hajxy yajnøcxy nebiä judíoshajxy yajnähixø'øyän.

⁶⁻⁷ Jéquiänä Dios jaduhñ miänaañ coogä ho'ogyjiäya'ay yagjujypiøga'añ. Højts judíos, jaduhñ højtsä nhapä ndeedyhajxy jecy xyajwiinwaanøøyyä ja'a Diósäm. Nägøxiä højts jaduhñ njøbhixy coo ja'a Dios jaduhñ yajtøjiada'añ neby jecy miänaañän, højts ja'a majmetsc-hagajtpä. Paady højtsä Dios xøømdsuhñ nwiingudsähgø'øy. Hoorä, Wiindsøn Agripa, cooçh jaduhñ nmäbøcy coo ja'a Dios ja'a ho'ogyjiäya'ay yagjujypiøga'añ, páadyhøch yøø judíoshajxy cham xñäxø'øwø'øy miich mwiinduum —nømä Pablo ja'a Agripa ñämaayy.

⁸ Mänitä Pablo ja'a judíos ñämaayy:

—Tii hajxy jaduhñ coo mga'a mäbøga'añ coo ja'a Dios ja'a ho'ogyjiäya'ay yagjujypiøga'añ.

⁹ Mänitä Pablo jiaac mänaañ:

—Bueno, jaduhñhøch hijty nmäna'añ coo hijty yhahixø'øy cooçhä jäya'ayhajxy ndsaaçhtiünät, ja'a Jesús Nazaretpä ja'a miädia'agy hajxy hānajtý panøcxäbä.

¹⁰ Jaduhñhøch jim njaançh jatcøøyy Jerusalén. Ja'a teedywiindsønñhøchä cuhdujt hajxy jim xmiooyy cooçhä jäya'ayhajxy nyajtsumøød, ja'a Jesucristo miädia'agy hajxy hānajtý panøcxäbä. Nämäyhøch hajxy jaduhñ njaançh yajtsuumä. Y coo hajxy yagho'cä, jaduhñhøch hānajtý nbamänaambä coo hajxy yagho'ogøøjät.

¹¹ Ja naañhóoc-høch hajxy tøø nyajtsaaçhtiuñii coo hajxy ñijigapxøøjät ja'a Jesúscøxpä. Wiinduhmyçhajtøjc-høch hijty ndsaaçhtiuñ. Hanáxiøch hajxy hijty nmäjootma'ady, páadyhøch hajxy hijty jäguembaady ndsaaçhtiuñ.

¹² Mänitøchä teedywiindsønñhajxy jim xwyiinguejxy Damasco cooçhä mäbøjpädøjc jim nyajtsaaçhtiuñøøjät.

¹³ Tu'haamnøcxpä, mänit højtsä jøøn xquiuhajcädaacy jaançh tehñ miøc. Cujyxiøøho'ogy hānajtý je'e. Cabä xøø hānajtý miäbaady nebiä jøøn hānajtý jiajiän. Høxtä xquiuhajwädiht højts jaduhñ.

¹⁴ Coo højtsä jøøn jaduhñ nhixy, mänit højts nägøxiä ngädaayy. Mänitøch nidiuhñ nmädooyy cooçhä häna'c xmiägäpxy hahebreohaam. Mänitøch xñämaayy: “Saulo, Saulo, tiich miich jaduhñ coo xwyi'i miädsibø'øy. Cooçh miich jaduhñ xwyi'i miädsibø'øy, hamdsoo miich jaduhñ mniçhaaçhtiuñii.”

¹⁵ Mänitøch nmänaañ: “Wiindsøn, pøn miich.” Mänitøch xyhadsooyy: “Jesúshøch høøch. Høøch miich jaduhñ xmiädsibøøby.

¹⁶ Tānaayyø'øg. Pāadyhøch jaduhñ tøø nnäguehxtøø'xy ja'a miichcøxpä, miichhøch nwiinguexaamby coo ja'a mädia'agy jaduhñ myajwá'xät nebiátyhøch tøø xyhixy, møød nebiátyhøch miich njaac yajnähixø'øwa'añ.

¹⁷ Nnāwa'anāambiøch miich majaty miich mwädita'añ, jim maa ja'a judíoshajxiän, jim møød maa ja'a wiingjäya'ayhajxiän, ja'a hajxy ca'a judíospä. Jímhøch miich jaduhñ nguexa'añ maa ja'a wiingjäya'ayhajxiän.

¹⁸ Pāadyhøch miich jim nguexa'añ, jaduhñ miichä Diosmädia'agy myajwiingapxø'øwät, jaduhñä yhaxøøgcuhdujt hajxy ñajtshixø'øwät. Cabä møjcu'ugong

ja'a miädia'agy jaduhñ miäbójcäxät. Ja'a Diosmädia'agy hajxy jaduhñ miäbógäp. Y coochä nmädia'agy hajxy jaduhñ xmiäbójcäbät, jaduhñhøch nyajnáhwá'adsät ja'a piojpä quiädieeyhajxy, jaduhñ hajxy miähmó'øwät hawa'adstuum", nómhøchä Jesús xñämaayy.

¹⁹ Wiindsón Agripa, coochä Jesús jaduhñ jim xmiägapxy tsajpootyp, páadyhøchä miädia'agy jaduhñ ngudiuunä.

²⁰ Mänitøchä Diosmädia'agy ndägøøyy yajwa'xpä coo jäya'ayä yhaxøøgcuhdujt hajxy ñajtshixó'øwät, coo ja'a Diosmädia'agy hajxy piadu'ubógät. Coö hajxy jaduhñ yhojiäya'ayhädät, jaduhñ hajxy yajcähxó'øgät coö yhaxøøgcuhdujt hajxy tøø jiaançh najtshixø'øy. Jímhøchä Diosmädia'agy nyajwa'xtsohñ Damasco. Mänitøch jim njaac yajwa'xy Jerusalén, møød jim Judeanaaxooty wiinduhmyhagajpt. Mänitøchä jäya'ayhajxy njaac yajnáhixøøyy, ja'a hajxy ca'a judíosä.

²¹ Coochä jäya'ayhajxy jaduhñ nyajnáhixøøyy, ja'a hajxy ca'a judíosä, páadyhøchä judíoshajxy näje'e jim xjia majch møjtsajtøgooty, jim Jerusalén. Cooch hajxy jaduhñ xmiäjch, mänitøch hajxy xjia yagho'ogaañ.

²²⁻²³ Pero Dióshøch xpiuhbejp. Tehngájnochä Diosmädia'agy nyajwa'xy høxtä jäda'anäbaady, ja'a Jesúscøxpä. Nägøxiøchä jäya'ayhajxy jaduhñ nyajnáhixø'øy, møjtcøj, häyoobädøjc. Jaduhñhøch nnä'ägä mädia'agyhaty neby jim cujaay myiñän nocyjiooty, ja'a profetadøjc-hajxy jecy yhädiúunäbä, ja'a Moisés jecy yhädiúunäbä. Jaduhñ hajxy jecy quiujahy coögä Dios ja'a wyi-inguexypä hñajty quiexa'añ, ja'a xøhajpä Cristo. Jaduhñ hajxy jecy quiujahbiä coögä Cristo hñajty yho'oga'añ. Jaayá'ayäc hñajty jayøjp juyypiøgaamb. Jaduhñägä jäya'ayhajxy hñajty yajnáhwa'adsa'añii, møødä judíoshajxy, møødä wiingjäya'ayhajxy. Hoorä, coö ja'a Jesús yaa yhooyy hädaa yaabä naaxwiin, Dios jaduhñ wiinguejx. Jaduhñ tiøjiajty nebiä profetadøjc-hajxy jecy quiujahyyän, nebiä Moisés jecy quiujahyyän —nømä Pablo ñijiøgapxä.

²⁴ Mänitä Festo yaaxy:

—Pablo, tøø miich jaduhñ mguhhiñ. Coö hanaxiä tøø mgapxta'agy, je'e tøø xyajcuhhiñ.

²⁵ Mänitä Pablo yhadsooyy:

—Wiindsón Festo, cáboch nguhiñ. Ja'a tøyhajt, je'eçh nmädiaacpy. Homiäbójnoch jaduhñ nmädia'agy.

²⁶ Mänitä Pablo ja'a Agripa ñämaayy:

—Wiindsón Agripa, cøxiøch cham nmädia'agy maa miich mwiinduumän. Nmøødhøchä tøyhajt jaduhñ coö miich jaduhñ mgøxy najuøøbiä nebiätyhøch cham nmädia'agy. Hijxwiinduum jaduhñ tøø jiadyii tøø tiuñii, ca'a yhayu'uch ca'a yhamee'chä.

²⁷ Wiindsón Agripa, nnajuøøbiøch jaduhñ coö miichä mädia'agy mmäbøcy, ja'a profetadøjc-hajxy jecy yhädiúunäbä.

²⁸ Mänitä Agripa yhadsooyy:

—Ja weenjátyhøch miich xquia'a yajniñähdujcä cooch jaduhñ nmäbógät ja'a Jesúscøxpä.

²⁹ Mänitä Pablo miänaañ:

—Hoy jia weenjaty hoy jia møjaty hajxy mga'a mäbøcyñä, chojpiä Dios ja'a jioot jaduhñ coö ja'a miädia'agy hajxy nägøxiä mmäbójcät ja'a Jesúscøxpä nébiøch nmäbøquiän, mäduhñtiä hajxy yaa mhamädoowhity, møød miich Wiindsón Agripa. Pero cáboch jaduhñ nmäna'añ coö hajxy tsumy mhídät nébiøch høøchän.

³⁰ Mänitä Agripahajxy tiänaayyø'cy, møødä Festo, møødä Berenice, møødä jäya'ayhajxy nägøxiä.

³¹ Mänitä hajxy tiøjpädsøømy. Mänitä Agripahajxy hawiing ñiñämaayyä mөөдä Festohajxy:

—Caj yø'ø craa tii cädieey miөөдä. Cab jaduñ yhahixø'øy coo tsumy jiaac hídät ni coo yagho'ogóøjät.

³² Mänitä Agripa ja'a Festo ñämaayy:

—Coo yø'ø craa häxøpy tөө quia'a mäna'añ coo jim nøcxy yajtøyhajtyega'añii Roma maa ja'a gobiernä wyiinduumän, tөө häxøpy yhøxmachii.

27

¹ Mänitä Festo wyiinmahñdyhajty coo ja'a Pablohajxy jim quixøøjät Italia barcojooty mөөд jiamiөөdhajxy, ja'a hajxy hänäjty tsumybiä. Mänitä Julio ja'a tsumyhäna'c yajcø'ødägøøyyä. Capitán ja'a Julio hänäjty tiuumby maa ja'a Augusto biatallóngän. Høøch Lucas, høøchä Pablo hänäjty nbanøcxaamby.

² Mänit højts hoy nbarcotägø'øy. Jimä barco hänäjty tөө chohnda'agy maa ja'a cajpt hänäjty xiøhatiän Adramitio. Tänaayyaambiä barco hänäjty ñøcxa'añ majatiä cajpt hänäjty miejypia'ajän jim Asianaaxooty. Jimä jäya'ay hänäjty tu'ug piadsoonä. Aristarco hänäjty xiøhaty. Jim hänäjty quiunaaxä Tesalónica, jim Macedonia-naaxooty. Mänit højts ndu'ubøjnä barcojooty.

³ Cujaboom højts nmejch maa ja'a cajpt hänäjty xiøhatiän Sidón. Jaanč tehñ yhojiootä Julio hänäjty miөөд ja'a Pablocøxpä. Paadiä Julio ja'a Pablo cuhdujt miooyy coo ja'a Pablo ja'a miägu'ughajpä nøcxy quihixy cajptooty, weenä Pablo jaduñ piuhbedyii.

⁴ Mänit højts jim jadähooc ndu'ubøjcumbä Sidón barcojooty. Møc højts hänäjty xjiøjcubojø'øy. Paady højts Chiprenaaxooty hahooyhaamby nwiinna-jxy maa hänäjty mõc quia'a jaty pojjiän.

⁵ Mänit højts jim nnaxøøyy Cilicia-naaxooty mөөд Panfilia-naaxooty. Mänit højts jim nmejch maa ja'a cajpt hänäjty xiøhatiän Mira, jim Licea-naaxooty.

⁶ Jimä Julio wiingbarco hoy piaady, ja'a hänäjty nøcxaambä Italia. Alejandria ja'a barco hänäjty tөө chohnda'agy. Mänit højts barcojooty hoy ndägøødiägach. Mänit højts ndägøøyy tu'uyohbiä jadähooc.

⁷ Je'enä højts hänäjty mõc xjiøjcubojø'øy, paady højts hänäjty hodiägaamby ndu'uyo'oy. Mädaaxxøø mägoøxxøø højts hänäjty tөө njaac nøcxy coo højts jim nmejch mäwiingón maa ja'a cajpt hänäjty xiøhatiän Gnido. Hobiänejpia højts jim nmejch. Cab højts hänäjty hoy ndu'uyo'oyaanä. Je'enä højts hänäjty mõc xjiøjcubojø'øy. Mänit højts wiingtuum nnøcxøøyy maa ja'a naax hänäjty xiøhatiän Creta. Coo højts jim nnaxøøyy mäwiingón maa hänäjty xiøhatiän Cabo Salmón, mänit højts Creta hänäjtyhaamby nnøcxøøyy maa hänäjty mõc quia'a jaty pojjiän.

⁸ Hamäjaa højts jim nmejypia'ayohy. Mänit højts jim nmejch maa ja'a cajpt hänäjty xiøhatiän Buenos Puertos, jim mäwiingón maa ja'a cajpt hänäjty xiøhatiän Lasea.

⁹ Maxiөө højts jim nhijty. Tөө højts hänäjty hanaxiä nhøxhaamø'øy. Mäjahñ ja'a tu'uyo'oyiibä hänäjty tөө jiajnä je'eguiøxpä coo tөөchpoj hänäjty tөө piädsøømnä. Mänitä Pablo miänaañ:

¹⁰ —Wiindsøndøjc, mäjahñdiägøøbiøchä tu'uyo'oyiibä jaduñ nhijxnä coo tөөchpoj tөө piädsøømnä. Wehndä barco jaduñ miä'adät mөөдä tsømydiajy cøxiä. Wehndä højts jaduñ nhó'cämät.

¹¹ Pero cabä Julio ja'a Pablo ja'a miädia'agy ñä'ä yajtuunä. Jue'e ja'a miädia'agyhajxy yajtuunäxä, ja'a barcoyajyohbiä mөөдä cubarco. Jaduñ hajxy hänäjty tөө miäna'añ cooc tyijy hänäjty quia'a mäjahñä.

12 Cab hānajt̃ yhahixø'ø̃y coo højts tøøchpoj jīm nyajnáxāt Buenos Puer-tos. Mānit hajxy nām̃ay miānaaŋ coo højts jadāhooc ndu'ubøjcumbāt bar-cojooty. Jīm hajxy hānajt̃ ñaxa'añ maa ja'a cajpt hānajt̃ xiøhatiān Fenice. Creta-naaxooty hānajt̃ je'e mejypia'a. Cab hānajt̃ jīm jiaty mājahñā je'eguiøxpā coo jīm møc quia'a pojy. Paadiā tøøchpoj hajxy hānajt̃ jīm yajnaxa'añ.

13 Mānitā jøømboj yuung piādsøømy. Mānit hajxy miānaaŋ cooc hajxy hoy jiaac tu'uyo'oya'añ barcojooty. Mānit højts njaančh tu'ubøjcumbā. Jīm højts njaac mejypia'ayohy Creta.

14 Weeñtiā højts hānajt̃ tøø njaac tu'uyo'oy, mānitā tsuxpoj møc piādsøømy.

15 Møc højts hānajt̃ xjiøjcubojø'ø̃y. Coo ja'a barcoyajyohbiā jaduhñ yhijsy coo hānajt̃ quia'a mājāda'aga'añ, mānit hajxy ñiñāmaayyā coo ja'a barco ween piabojy.

16 Mānit højts jīm nmejch maa ja'a naax mejyquiujc chuucpān, ja'a hānajt̃ xøhəpā Cauda. Mānit højts jīm nnaxøøyy hanajtyhaamby maa hānajt̃ møc quia'a pojjiān. Jīm højtsā barcohuung hānajt̃ nbawich. Hobiānejpiā højtsā barcohuung jiiby nyuugjādujty møjbarcojooty.

17 Coo hajxy yajwiimbejty, mānitā barco hajxy yagjuhmäguijwädijsy laansāhaam, jaduhñā barco quia'a má'adāt. Coo ja'a mejy hānajt̃ jīm quia'a jaty hagamā, paadiā barcoyajyohbiāhajxy hānajt̃ chähgø'ø̃y coo ja'a barco jiiby jie'xāt tsābiu'ujooty nøøba'c. Mānitā wit pojyohbiā hajxy yajmānajcy, ja'a barco hānajt̃ quiuhdøyhajpiā. Mānit hajxy miānaaŋ coo ja'a barco ween jaduhyyā piabojy.

18 Cujaboom, je'enā hānajt̃ møc piojy. Møcā barco hānajt̃ miøjpojpedyii. Ja'a tsømydiajy ja'a barco hānajt̃ yajnøcxypā, mānit hajxy ñøøjuip ñøøpøgøøyy mejjiooty.

19 Cujaboom højtsā tuumbejt̃ njaac nøøjuip njaac nøøpøgøøyy, møødä wit pojyohbiā, ja'a barco hānajt̃ quiuhdøyhajpiā, møødä wittøøbiejt̃.

20 Maxiøø højts jaduhñ nmānajxy nyajnajxy. Tehngajnā hānajt̃ møc piojy. Jaančh tehñ wyiimbøcy hānajt̃. Cabā xøø cabā madsa'a hānajt̃ quiähxø'ø̃gy ni weeñtiā. Cab højts hānajt̃ nnajuø'ø̃y maa højtsā poj hānajt̃ xchømnøcxy. Jaančh tehñ chähgøøby højts hānajt̃ coo højts nhó'ogāt.

21 Tøø højts hānajt̃ maxiøø nhity jaguiay. Mānitā Pablo tiānaayyø'cy jāya'ayhagujc. Mānit miānaaŋ:

—Wiindsøndøjc, coočhā nmādia'agy hajxy häxøpy tøø xyajtuunā, cab hajxy häxøpy jīm tøø mdsooñ Creta, y cabā tsø'ty cabā häyohn hajxy häxøpy tøø nbáatām.

22 Pero, ca'a hajxy mdsähgø'ø̃y. Caj pøn yho'oga'añ, hoyyā barco cu jia ma'ad.

23 Hix, haamyquiøødshøčhā Diosmoonsä tu'ug nwiinhijxy. Jīm chooñ Dioswiinduum. Nwiingudsähgøøbiøčhā Dios. Je'ečh jaduhñ xwyiinguejx.

24 Māniñthøčhā Diosmoonsä xñāmaayy: “Pablo, ca'a mdsähgø'ø̃y. Tsipcøxp yhahixø'ø̃y coo miich jīm mmédsāt Roma maa ja'a gobiernā wyiinduumān. Miichcøxpā ja'a Dios tøø miāna'añ cooc pøn quia'a ho'oga'añ māduhñtiā hajxy jiiby mnøcxy barcojooty”, nømñhøčhā Diosmoonsä xñāmaayy.

25 Paady, ca'a hajxy mdsähgø'ø̃y. Nmäböjcäbøčhā Dios ja'a miādia'agy jaduhñ cooc hajxy xyajnähwa'adsāanām, nebiátyhøčhā Diosmoonsä tøø xya-jmøødmādia'agy.

26 Jīm mejyquiujc, jīmā naaxhuung tu'ug. Jīm højts nøcxy nmøjpojpedāanām. Tøyhajt̃ jaduhñ —nømā Pablo miānaaŋ.

²⁷ Majmactsxøø højts hānajty tøø nbabojy barcojooty jim maa ja'a mejy hānajty xiøhatiān Adriática. Cuptsuhm hānajty jaduhñ, mānitā barcoyajy-ohbiāhajxy ñajuøøyy coo højts hānajty naaxpa'a tøø nmāwiingoñ.

²⁸ Mānitā nøø hajxy qyipyx māduhñtiā quiøøcā. Jue'e hānajty quiøøcā, hii'xmajmocxmetro. Coo hajxy weeñtiā jiaac nøcxy, mānit hajxy qyípxcumbā. Jue'e hānajty quiøøcā, hii'xjuxtujmetro.

²⁹ Tsāhgøøby hajxy hānajty coo ja'a barco tsaa nøøba'c miøjpohmbédāt, paadiā pujxthajo'c hajxy mādaaxc ñøøjuipøøyy barcohøxhaam. Cuxodsø'øyā pujxthajo'c hānajty. Paady hajxy jaduhñ ñøøjuipøøyy coo ja'a barco jaduhñ jiiby wiohñmāhmø'øwøøjāt. Jaanč tehñ jiootmayhajp hajxy hānajty. Jaduhñ hajxy hānajty miāna'añ coo paquiā cu jiobøøyy.

³⁰ Mānitā barcoyajyohbiā ja'a barcohuing hajxy quiuhdøøñajxy nøøjooty. Jaduhñ hajxy hānajty yajnānøma'añ cooc tyijy ja'a pujxthajo'c hānajty ñøøjuipø'øwa'añ barcojøbhaam. Ja wi'i piäyø'øgaambā barcoyajyohbiāhajxy hānajty jaduhñ ja'a barcohuingooty.

³¹ Pero cabā Pablo yajwiinhøhñ. Mānitā Juliohajxy ñāmaayyā møødā soldadohajxy:

—Coo yø'ø yajyohbiādøjc-hajxy häyaa piäyø'øgāt, mhó'ogāp hajxy jaduhñ —nøñā Pablo miānaañ.

³² Mānitā soldado ja'a barcohuing hajxy miābuxøøyy. Mānitā barcohuing chømnøcxā nähgapjooty.

³³⁻³⁴ Jobø'øwaamb hānajty jaduhñ, mānitā Pablo jäya'ay ñāmaayy:

—Joom, huuc wiingaañáxäts hajxy hii. Majmactsxøø hajxy tøø mhity jaguiay jamia'ay. Cab jaduhñ yhooyā coo hajxy jaguiay mjaac hídāt, coo hajxy jaduhñ mnä'ä päma'ayø'øwāt. Hix, cab hajxy nej mjada'añ.

³⁵ Coo ja'a Pablo jaduhñ quiapxpädøøyy, mānitā tsajcaagy quionø'cy. Mānitā Dios ñāmaayy “Dioscujú'uyāp” jiamioødwiinduum. Mānitā tsajcaagy yhaguidøøyy. Mānit tiägøøyy caabiā.

³⁶ Coo ja'a Pablo jaduhñ yhiixā coo hānajty quiaay, mānitā jiamioødhajxy jiootcugøøyy. Mānit hajxy piädägøøbiā caabiā.

³⁷ Jue'e højts hānajty nhity barcojooty nāmejtsmägo'xcudägøøghii'x cu maj-mocxtu'ug.

³⁸ Coo hajxy jaduhñ quiaabiädøøyy, mānitā trigo hajxy miejjwyipøøyy, jaduhñā barco ween pie'tiø'øy.

³⁹ Coo jiobøøyy, cabā barcoyajyohbiādøjc-hajxy hānajty yhajuo'øyii. Mānitā laguun hajxy yhiixy mejypia'a. Pa'adsäbiu'u hānajty je'e. Mānit hajxy miānaañ coo ja'a barco hajxy jim yajnøcxāt pu'uwiing, coo hajxy jim ya-jmøjyādsujtspédāt.

⁴⁰ Mānitā pujxthajo'c hajxy miābuxøøyy. Jiiby jaduhñ miāhmøøyy mejjiooty. Mānitā barcocaapt hajxy yajyuungøøyy, jaduhñā barco hoy yó'oyāt. Mānitā wit hajxy yujxojch barcojøbhaam, ja'a barco hānajty quiuhdøyhajpiā. Mānitā barco tiägøøyy yohbiā. Jim ñøcxøøyy pu'uwiing.

⁴¹ Mānitā barco jie'xy nøøba'c tsäbiu'ujooty maa nøø hānajty quia'a comān. Ja'a barcojøbhaam jaduhñ je'x. Mānitā barcohøxhaam tiägøøyyā møjcupéjtäbā. Mānit tiägøøyy ma'pä tsaybiig.

⁴² Coo ja'a soldadohajxy jaduhñ yhiixy coo ja'a barco hānajty mia'ada'añ, mānitā tsumyhāna'c-hajxy jia yagho'ogaanā, jaduhñ hajxy cu quia'a päyø'cy yāhwäp.

⁴³ Pero cabā Julio jaduhñ miānaañ coo ja'a tsumyhāna'c-hajxy yagho'ogøøjāt. Paady jaduhñ miānaañ je'eguiøxpä coo ja'a Julio ja'a Pablo

hänajty yajnähwa'adsa'añ. Mänitä Julio miänaañ coo hajxy ñøøga'awó'owät, pønjaty yaaw hänajty jajp, jaduhñ hajxy ñócxät tø'ødstuum yáhwäp.

⁴⁴ Pønjaty hänajty ca'a yaawjajp, wéenäc hajxy ñøcxy pu'uñähgøxp, møødä barcohadjcøxp. Jaduhñ højts nägøxiä ndsoocy tø'ødstuum.

28

¹ Coo højts jaduhñ nägøxiä ndø'ødspädsøømy, mänit højts nmädooyy coo ja'a naax hänajty xiøhaty Malta.

² Mänit højtsä jäya'ay xñäxuu'ch, ja'a hajxy hänajty jim nä'ägä tsänaabiä. Tuub hänajty; tøøchc hänajty jaduhñ. Mänitä jøøn hajxy yajmøjjøøyy. Mänit højts xñämaayy coo højts njøømba'axámät.

³ Mänitä Pablo ja'axy tø'ødspä miämejch tu'tso'oy. Jiibiä Pablo ja'axy hänajty piäda'agy jøønhaajiooty. Mänitä hawa'andsahñdy tu'ug piädsøømy jøønhaajiooty. Mänitä Pablo quiø'ømäwødsøøyyä.

⁴ Coo ja'a jäya'ayhajxy jaduhñ yhiijxy coo ja'a Pablo tsahñdy hänajty miøødä quiø'øgøxp, mänit hajxy ññämaayyä:

—Tøø yø'ø craada'a miäjäya'ay-yagho'ogy. Coo jaduhñ tøø quiädieey, paady jaduhñ tsipcøxp yho'oga'añ, hoy jaduhñ tøø jia tso'ogy mejjiooty.

⁵ Mänitä Pablo ja'a quiø'ø xiädiijty. Mänitä tsahñdy hoy quia'ay jøønhaajiooty. Cabä Pablo nej jiajty.

⁶ Nømä jäya'ayhajxy hänajty miäna'añ coog ja'a Pablo quiø'ø cu qyixta'ch, o cooc cu yho'cy. Pero coo hajxy yhiijxy coo ja'a Pablo nej quia'a jajty, mänit hajxy miänaañnä cooc tyijy ja'a Pablo Dyiosä.

⁷ Jimä jäya'ay hänajty tu'ug chäna'ay mäwiingón maa højts hänajty njøømba'axamiän. Publio hänajty xiøhaty. Gobernador ja'a Publio hänajty jim tiuumby Malta. Coo højts jim nmejch maa ja'a tiøjcän, mänit højts jim xyajmejtstaacy tågøøgxøø.

⁸ Jimä Publio tieedy hänajty pia'amgo'na'ay. Tóoyyap hänajty jaduhñ møødä nø'tiø'onøø hänajty miøødä. Mänitä Pablo jiiby tiøjtägøøyy maa ja'a Publio tieedy hänajty pia'amgo'na'ayän. Mänitä Pablo ja'a Dios pia'yaaxy. Mänitä Pablo ja'a pa'amjäya'ay ñähdoon. Mänit pia'amyajnajxä.

⁹ Coo ja'a pa'amjäya'ayhajxy jaduhñ jim miädoyhajty Malta, mänit hajxy hoy yajmøpcøjcäbä nägøxiä.

¹⁰⁻¹¹ Mänit højts madiu'u xñä'a mooyy cøxiä wiinä. Jimä barco hänajty tu'ug tiøøchpojnaxy. Jue'e ja'a barco hänajty xiøhaty: “Ja'a Hametsc-huung.” Alejandría ja'a barco hänajty tøø chohnda'agy. Coo højts hänajty jim tøø nhity Malta tågøøgpø'o, mänit højts nbejty barcojooty, ja'a hänajty xøhajpä: “Ja'a Ametsc-huung.” Mänit højtsä jäya'ay xjiaac mooyy tijaty højts hänajty nmänøcxaamby barcojooty. Ja'a jäya'ayhajxy hänajty tøø miøcpøquiäbä, je'e hajxy jaduhñ xmiooyy. Mänit højts jim ndu'ubøjnä Malta.

¹² Mänit højts nmejch maa ja'a cajpt hänajty xiøhatiän Siracusa. Jim højts njaac hijty tågøøgxøø.

¹³ Coo højts jim ndu'ubøjcumbä, mänit højts njaac mejypia'ayohy. Mänit højts jim nmejch maa ja'a cajpt hänajty xiøhatiän Regio. Cujaboomä jøømboj piädsøømy. Mänit højts jadähooc ndu'ubøjcumbä. Cumaaxc højts jim nmejch maa ja'a cajpt hänajty xiøhatiän Puteoli. Jim højtsä barco nnähmänajtuutnä.

¹⁴ Mänit højtsä jäya'ay näje'e nbaaty. Ja'a Diosmädia'agy hajxy hänajty miäbøjpy. Mänit højts xñämaayy coo højts jim nmejtstä'agät maa ja'a tiøjc-hajxiän. Juxtujxøø højts jim nhijty. Mänit højts jim ndu'ubøjcy tecy-yo'oyhaam. Jaduhñ højts hänajty jim njaac nøcxa'añ Roma.

15 Mänitä mǎbøjpǎdøjc-hajxy Rómabä miädoyhajty coo højts hǎnajty jim nnøcxy Roma. Mänit højts näje'e hoy xjiøjcubaadø'øj jim maa hǎnajty xiøhatiän Foro de Apio. Näje'e højts hoy xjiøjcubadøøbiä maa hǎnajty xiøhatiän Tres Tabernas. Coo ja'a Pablo jaduhñ yhijsy, mänitä Dioscujú'uyäp yejcy. Mänit jiootcugøøyy.

16 Coo højts jim ngoo'nä Roma, mänitä Pablo cuhdujt miooyyā coo ja'a yhamdsoo tøjc yhöxtá'awät maa jaduhñ yhidät. Mänitä soldado tu'ug yajcø'øwaanøøyyā coo ja'a Pablo cwieendāhadøøjät, coo ja'a Pablo jaduhñ ñä'a päyø'ögät. Mänitä tsumy'hāna'c-hajxy jiaac yajcø'ødägøøyyäbä ja'a soldado-wiindsøn, ja'a copc-hajpä.

17 Cudägøøgxøø ja'a Pablo ja'a judíos yajmøjyaaxä, ja'a hajxy hǎnajty møjhajpä maa ja'a chajtøjc-hajxiän. Coo hajxy hǎnajty tøø yhamugø'øj, mänit hajxy ñāmaayyā:

—Mägu'ughajpǎdøjc, mänāajøch jim nhitiän Jerusalén, jímhøch hǎna'c näje'e xmiājch, hōyhøch hǎnajty tøø nga'a jagä cādieey, hōyhøchä cuhdujt hǎnajty pedyii tøø nja cudiuñ nebiä nhaphǎjtāmā ndeedyhǎjtāmhajxy jecy yajt-sohñdaaquiän. Ja'a nmägunaaxhǎjtāmhajxy jaduhñ xmiājts. Mänitøch hajxy xquiø'øyejcy maa ja'a soldadohajxiän, ja'a hajxy yaa tsohmä Roma.

18 Coochä soldadoshajxy hǎnajty tøø xyajtøyhajtyecy, mänit hajxy jaduhñ ñajuøøyy cooch hǎnajty tøø nga'a cādieey. Mänit hajxy jia mänaañ cooch hajxy jaduhñ xyhøxmādsät.

19 Pero cabä judíoshajxy jaduhñ miānaambä cooch nyaghøxmādsät. Mänitøch nwiinmahñdyhajty coo jaduhñ yhahixø'øj cooch yaa ndøyhajtyégät Roma maa ja'a gobiernä wyiinduumän. Pero cáboch hǎnajty mänaañ coochä nmägunaaxhajxy nnäxø'øwø'øwät.

20 Hoorä, cooch jaduhñ tøø njaty tøø nhabety, páadyhøch mijts jaduhñ nmøødmādia'aga'añ. Páadyhøch cham ndsumy'hāna'ay coo højts judíos nmäbøjcām coo ja'a ho'ogyjiäya'ayhajxy jiuypio'ga'añ —nømä Pablo miānaañ.

21 Mänitä judíos ja'a Pablo hajxy ñāmaayy:

—Cab højts tii capxy tii mādia'agy tøø nmädoyhaty maa miichcøxpän. Caj miich pøn waamb tøø xñänømy, ja'a hajxy jim tsohmä Judea.

22 Jaduhñ højts tøø nmädoyhaty coo jäya'ayhajxy wiinduhmyhagajpt miädsiphadyii, ja'a hajxy jaduhñ mǎbøjpä coo ja'a Jesús Dyiosquexiä. Paady højts nhamädoowhida'añ nej miich mwiinmayyän —nømä judíoshajxy miānaañ.

23 Mänitä judíos ja'a Pablo hajxy miøødcojyquiapxytiuuñ mänaa hajxy jadähooc ñøcxät maa ja'a Pablo hǎnajty yhitiän. Coo yhabaaty, mänitä jäya'ayä Pablo hajxy nämay jiaanç nämejch. Tu'xøø ja'a Pablo jäya'ayä Diosmādia'agy yajwiingapxøøyy ja'a Jesúscøxpä, coo ja'a Dios ja'a Jesús hǎnajty tøø quiexy, nebiä Moisés jecy quiujahyyän, nebiä profetadøjc-hajxy jecy quiujahyyän. Jia wi'i yajniñähdugáanäbä Pablo ja'a jäya'ay hǎnajty coo hǎnajty tøyhajt miādia'agy ja'a Jesúscøxpä.

24 Näje'e hajxy miäbøjcy nebiatiä Pablo hǎnajty tøø miādia'aguiän. Näje'e hajxy quia'a mǎbøjcy.

25 Mänitä mādia'agy hajxy tiägøøyy yajcapxiøøbiä nebiä Pablo hǎnajty tøø miādia'aguiän. Coo ja'a miādia'agy hajxy quia'a yajnibiaatä, mänit hajxy tiägøøyy wiimbijpä. Mänitä Pablo miānaañ:

—Jéquiänä Dioshespíritu ja'a profeta Isaías miägapxy. Mänit højtsä nhaphǎjtāmā ndeedyhǎjtāmhajxy miägapxtägajtsä:

26 Nøcx yø'ø jäya'ay näma'aw:

Hoy hajxy mja madowa'añ, cab hajxy mwiinjuø'øwa'añ.

Hoy hajxy mja hixa'añ, cab hajxy mmäbøga'añ.

²⁷ Tøø hajxy mguhxexy. Jaduhñ hajxy mnibiäda'agyii nebiä wiindspän nebiä cuhnatpän.

Coo hajxy häxøpy tøø mga'a cuhxexy, cu mwiinjuøøyy hajxy.

Jaduhñä mhaxøøgwiinmahñdy hajxy cu mnajtshixøøyy.

Jaduhñ hajxy cu nyajnähwaach,

nømä Dioshespíritu jecy miänaañ. Tøyhajt jaduhñ miänaañ.

²⁸ Mänitä Pablo jaduhñ jiaac mänaañ:

—Huuc mäadow hajxy, ja'a jäya'ayhajxy ca'a judíospä, yajwiingapxø'øwáañäbä Diosmädia'agy hajxy je'e coo hajxy yajnähwa'adsáañäbä. Je'e hajxy mäßøcypiä mäßøgaamb.

²⁹ Coo ja'a Pablo jaduhñ quiapxpädøøyy, mänitä judíoshajxy quiøxy wiimbi-jnä.

³⁰ Mejtsjomøjtä Pablo jim jiaag hijty maa ja'a tøjc hñajty yhajoodiuquiän. Pønjaty hñajty jim mejtsp tøghayohbiä, mioobiä Pablo hñäaabejt hñajty.

³¹ Hagujc jootcujcä Pablo ja'a Diosmädia'agy hñajty yajwiingapxø'øy ja'a Jesúscøxpä coo ja'a Dios ja'a Jesús hñajty yaa tøø quiexy hädaa yaabä naaxwiin. Cabä Pablo hñajty yhagapxtugyii ni pøn.

Romanos

¹ Høøch hädaa nocy njahby, høøch Pablohajpä. Høøchä Jesucristo xya-jtuumb nebiä moonsän. Hamuumdu'jóothøchä miädia'agy jaduhñ nyajtu-unä. Dióshøch jaduhñ xpiädaac cooch ndúnät apóstol. Cooch jaduhñ nduñ apóstol, je'eduhñ ñänøømby coochä Dios xwyiinguejxy coochä miädia'agy nmäwädíjtät ja'a yHuungcøxpä, coo hajxy yaa hoy xñähho'túutäm.

² Jéquiänä Dios jaduhñ miänaañ cooc ja'a yHuung hñajty yaa quixa'añ hädaa yaabä naaxwiin. Jim jaduhñ myiñ cujaay maa ja'a Diosmädia'aguiän. Ja'a jäya'ayä Diosmädia'agy hajxy jecy yajwá'xäbä, jaaya'ayhajxy jaduhñ jecy cujahy.

³ Ja'a Jesucristo ja'a Dios jaduhñ yHuunghajpy, ja'a hajxy nWiindsøñhájttämbä. Jäya'ayhajt je'e hädaa yaabä naaxwiin neby højtshájttä. Ja'a rey David yhap yhoc hñajty je'e.

⁴ Y coo ja'a Jesucristo yho'cy, mänit jiuypiojtägajch ja'a yhEspírituhaam. Coo jaduhñ jiuypiojtägajch, jaduhñ yajnajuø'øy coo je'e ja'a Dios yHuunghadyii, coo møcmäjaa jiaanč tehñ miøødä, coo ja'a Dioshespíritu jiaanč tehñ miøødä.

⁵ Coo ja'a Jesucristo hajxy xñähho'túutäm, coo jiuypiojtägajch, páadyhøchä Dios tøø xquiexy wiinduhmyhagajpt mädia'agy-yajwa'xpä ja'a Jesucristocøxpä, weenä jäya'ayä Diosmädia'agy hajxy miäbøcy, ween hajxy hoy yajtuñ, weenä Jesucristo hajxy jaduhñ wyiingudsähgø'øy. Coochä Dios jaduhñ tøø xquiexy, yajcähxø'py je'eduhñ cooch jaduhñ xquiumay.

⁶ Møød mijtsä Dios xyajnähdijpä coo ja'a Jesucristo miädia'agy hajxy mbanøcxäbät, mijts jim hijpä maa ja'a cajpt jaduhñ xiøhatiän Roma.

⁷ Mijts hädaa nocy nyajnäjaayøøby, pønatiä Dios yaghijpy quio'øjooty jim Roma. Jaaya'ay mijts jaduhñ xyajnähdij coo ja'a miädia'agy hajxy mmäbøjcät. Xjiaanč tehñ chojp mijts jaaya'ay jaduhñ. Ween mijtsä hoyhajtä weenhajt xmio'oy møødä yHuung Jesucristo, ja'a hajxy nWiindsøñhájttämbä. Ja'a Dios hajxy nDeedyhájttä.

⁸ Jayøjphøchä Dios Dioscujú'uyäp nmo'oy. Coo ja'a Dioscujú'uyäp hajxy jaduhñ nyéjcäm, mänitä Jesucristo hajxy jaduhñ xñähgapxtúutäm. Wiinduhmyhagajptä mädia'agy wiädity cooc mijtsä Diosmädia'agy hoy mjaanč tehñ miäbøcy nägøxiä. Páadyhøchä Dioscujú'uyäp nyecy.

⁹ Ñajuøøbiä Dios cooch tøy nmädia'agy cooch nmäna'añ coo mijts homiänaajä njahmiech coochä Dios naxy nba'ya'axy. Hamuumdu'jóothøchä Dios nmøødtuñ coochä miädia'agy nyajwa'xä ja'a yHuungcøxpä.

¹⁰ Mayhóoc-høch jim tøø nja nøcxa'añ maa mijtsän. Jadúñnhøchä Dios nja wi'i ñäma'ay cooch jim xyajnøcxät. Wehndä jaduhñ miänáannät.

¹¹ Páadyhøch jim nja wi'i ñøcxa'añ maa mijtsän, jaduhñ mijts hoy nbuhbédät ja'a Dioshespíritucøxpä, jaduhñä Diosmädia'agy hajxy maas hoy mmäbøgät.

¹² Coo ja'a Diosmädia'agy hajxy näguipxy nmäbøjcäm, páadyhøch jim nja wi'i ñøcxa'añ maa mijtsän, jaduhñ hajxy hoy hamiñ haxøpy nnijoot-capxmøcpøjcämät.

¹³ Mägu'ughajpädøjc, jadúñnhøch nja wi'i miäna'añ cooch jim nja wi'i ñøcxa'añ maa mijtsän, cábøch jaduhñ nnä'ä yajnäbaadø'øy. Páadyhøch jim nja wi'i ñøcxa'añ, chójpøchä njoot jaduhñ coo hajxy mjaac mayø'owät maa ja'a Diosmädia'agy hajxy mmäbøquiän, nebiä mäbøjpädøjc-hajxy tøø miayø'øyän wiingtuumjaty, majátyhøchä Diosmädia'agy tøø nyajwa'xiän.

14 Jadúhnhöchä Dios xwyiinguejxy coöchä miädia'agy nyajwá'xät ja'a yHuungcöxpä wiinduhmyhagajpt majatiä jäya'ayhajxy griegohaam miädia'aguiän, mөөд majatiä jäya'ayhajxy griegohaam quia'a mädia'aguiän. Jadúhnhöch tөө xwyiinguejxpä coöchä jäya'ay jaduhñ năgöxiä nyajwiingapxö'öwät, hoy hajxy jia hөxpöquiä, hoy hajxy quia'a jagä hөxpöquiä.

15 Páadyhöch jim nja wi'i ñöcxaambä Roma maa mijtsän, jímhöchä jäya'ayä Diosmädia'agy nyajwiingapxö'öwaambä.

16 Hix, cáböchä Diosmädia'agy nmädsähdiuñ ja'a Jesucristocöxpä, je'eguiöxpä coo jäya'ayhajxy năgöxiä piäda'aga'añii hawa'adstuum ja'a Dios miäjaahaam, pönjatiä Diosmädia'agy măböjp ja'a Jesucristocöxpä. Højts judíos, højts ja'a Diosmädia'agy jayöjp nmădoodsöhn. Hөxhaamä jäya'ayhajxy jiaac mădooy, ja'a hajxy ca'a judíospä.

17 Ja'a miädia'agyhaamä Dios hajxy xyajwiinjuöyyäm coo piäda'aga'añ hawa'adstuum pönjaty jaduhñ măbögaamb coo ja'a Dios yajtöjiada'añ waambaty tөө quiapxy tөө miädia'agy. Pön jaduhñ ca'a măbögaamb, cab je'e piäda'aga'añii hawa'adstuum. Jaduhñ jim myiñ cujaay maa ja'a Diosmädia'aguiän: "Pönjaty jaduhñ măbögaamb coo ja'a Dios yajtöjiada'añ waambaty tөө quiapxy tөө miädia'agy, je'e ja'a Dios jaduhñ piäda'agaamby hawa'adstuum. Je'e jaduhñ nөcxaamb Dioswiinduum."

18 Hoy piönä jaduhñ ñajuö'öy coo ja'a Dios tsajpootypä yajcumădowa'añ pönjatiä Dios ca'a wiingudsähgöby, mөөд pönjatiä jioot ca'a tsojp coo ja'a Dios wyiingudsähgö'öwöjät wiinghäna'c. Paadiä jioothajxy jaduhñ quia'a tsocy je'eguiöxpä coo hajxy haxöög jiaac jatcö'öwa'añ.

19 Cabä tøyhajtpä hajxy chocy, hoyyă Dios hajxy tөө jia yajwiinjuö'öyii nebiatiä Dios jaduhñ wyiinmahñdyhaty.

20 Jéquiänä Dios cöxiä yhädiuñ, mөөд yö'ö tsajt, mөөд hädaa yaabä naaxwiin, cöxiä. Coo hajxy jaduhñ nhíxäm tijaty ja'a Dios jaduhñ tөө yhädiuñ, paadiä tøyhajtpä hajxy nmөөdhajtäm coo ja'a Dios mөcmăjaa miөөdä homiänaajä, mөөд coo cöxiä wiinä yhane'emy, hoyyă Dios hajxy nga'a jagä híxäm. Jaduhñä tøyhajtpä hajxy nmөөdhajtäm coo ja'a Dios hajxy nwiingudsähgöyyämät. Cab jaduhñ pön hawiinmats miäná'anät cooc tyijy hajxy quia'a najuö'öy coo ja'a Dios jyijä.

21 Ja'a häna'c-hajxy jaduhñ haxöög jatcöbiä, cabä Dios hajxy wyiingudsähgö'öy, hoy hajxy jaduhñ jia najuö'öy coo ja'a Dios jyijä. Ni cabä Dios Dioscujú'uyäp hajxy mio'oy. Paadiä wyiinmahñdyhajxy quia'a tsoobaada'añ. Ypaady hajxy tehngajnă wyiinmahñdyhada'añ haxöög. Cabä howyiinmahñdy hajxy hoy miөөdhadaañnä.

22 Hoy hajxy jia nibiäda'agyii nebiä jaanč tehñ jiajpän, cab hajxy tii ñä'ägädä jaty.

23 Ja'a Dios, möj jaanč je'e. Hoy miänaajä yhity. Cab jaduhñ mänaa yho'ogy. Pero cabä haxööghäna'că Dios hajxy wyiingudsähgö'öwa'añ. Jäya'ayhahädiuunnaxy hajxy wyiingudsähgöby, hoyyă jäya'ayhajxy jia ho'ogy; mөөdä muuxyhahädiuunnaxy hajxy wyiingudsähgöbiä, mөөdä tsahñdyhahädiuunnaxy, mөөdä animalhahädiuunnaxy ja'a hamădaaxtecypia.

24 Paady, cabä Dios waamb miäna'anaañnä, weenă jäya'ayhajxy haxöög wyiinmahñdyhaty nebiä jioot hajxy choquiän, coo hajxy cөxpänejpia ween ñidiuñii höchähdiuunnä,

25 je'eguiöxpä coo ja'a tøyhajtpä hajxy tөө quia'a măböcy ja'a Dioscöxpä. Ja'a höhnda'agymiädia'agy hajxy jaduhñ miăböjpy. Cabä Dios hajxy wyiingudsähgö'öy. Jue'e hajxy wyiingudsähgöby, tijatiä Dios yaa tөө quiunuu'xy

hädaa yaabä naaxwiin. Pero, hahixøøby coo ja'a Dios hajxy nwiin-gudsähgøøyyämät homiänaajä. Tøyhajt jaduhñ.

²⁶ Coo häna'cä Dios hajxy quia'a wiingudsähgø'øwa'añ, paadiä Dios waamb quia'a mäna'ana'añ, ween hajxy hoçhähdiiuunnä ñidiuunnä. Høxtä to'oxiøjpaadyhajxy jaduhñ jiatcø'ø. Cabä ñihyhap hajxy näje'e miøødtsäna'awaanä; quipxyjatiä to'oxiøjc-hajxy cøxypänejpiä ñidiuñii hoçhähdiiuunnä.

²⁷ Jaanä jaduhñä ya'adiøjc-hajxy näje'ebä, cabä tio'oxiøjc hajxy miøødtsäna'awaanä. Quipxyjatiä ya'adiøjc-hajxy ñimiøødtsäna'awa'añii. Hoçhähdiiuunnä hajxy jaduhñ ñidiuñii cøxypänejpiä. Coo hajxy jaduhñ jiatcø'ø, paady hajxy quia'a niyaghoyø'øyii maa ja'a ñi'xcøxp maa ja'a quiopcøxphajxiän, møød maa ja'a wiinmahñdycøxphajxiän.

²⁸ Coo ja'a haxøøghäna'cä Dios hajxy jaduhñ quia'a wiingudsähgø'øwa'añ, paady hajxy ñajtshixø'øyii ja'a Diósäm. Ja'a Dios, cab jaduhñ waamb miäna'anaanä, weenä yhaxøøgwiinmahñdy hajxy tiuñ, ween hajxy jaduhñ jiaac jiatcø'ø haxøøg.

²⁹ Madiu'u hajxy haxøøg jiatcø'ø cøxypänejpiä. Miøødtsänaabiä cuh-hiñdo'oxiøjc hajxy. Møødä jäya'ajie'e hajxy yhadsoy. Cab hajxy hojiäwø'ø pø jimä miägu'ughajpähajxy cøxiä wiinä miøødä. Høxtä niyaghó'cäp hajxy. Nimiädsiphájtäp hajxy. Høhndaacp hajxy. Niñähøøñøøyyäp hajxy.

³⁰ Niwyiingapxpéjtäp hajxy. Møødä Dios hajxy miähanhatty. Nibiéjxäp hajxy. Yajcumayaamb hajxy. Hawiinjembybiä haxøøgwiinmahñdy hajxy yajcojpy. Cabä tiaj, cabä tieediä miädia'agy hajxy miäbøjcä.

³¹ Jaanç tehñ quiuhxex hajxy. Ni ja'a yhamdsoo mädia'agy hajxy quia'a cudiuna'añ. Cab hajxy pøn chocy miee'xy. Ni cab hajxy pøn miee'xa'añ. Cabä hojiot hajxy ñä'ägädä møødä.

³² Ñajuøøby hajxy jaduhñ coo ja'a Dios tøø yhane'emy coo hajxy haxøøgjaty quia'a jiatcø'øwät nébiøch naamnä tøø nmädia'aguiän. Jaanä jaduhñ hajxy ñajuøøbiä, pøn jaduhñ haxøøg jiatcøøby, quiumädowaamby hajxy je'e tehngajnä. Pero nägø'ø nädecypiä hajxy jaduhñ jiatcø'ø, hoy hajxy jaduhñ jia najuø'ø. Høxtä xoonndaacp hajxy jaduhñ coo wiinghäna'c-hajxy jaduhñ haxøøg piajaticøøbiä.

2

¹⁻³ Nnajuøøyyäm hajxy jaduhñ coo jaduhñ yhahixø'ø coo ja'a Dios hajxy nägøxiä xyajcumädóowämät je'eguiøxpä coo hajxy nägøxiä haxøøg njaticøøyyäm. Cab jaduhñ yhahixø'ø coo højtsä jäya'ay nnänøømämät coo hajxy hoy quia'a hity, coo hajxy ween quiumädoy. Caj pues, haa ca'a, jaduhñ højts haxøøg nbajaticøøyyämbä. Hix, ni pøn jaduhñ hahixøøby quia'a mäná'anät cooc tyijy hoy tiehm yhity. Paady jaduhñ yhahixø'ø coo ja'a Dios hajxy nägøxiä xyajcumädóowämät, je'eguiøxpä coo hajxy hoy nga'a hoyhidáanäm.

⁴ Pero hojiotä Dios jiaanç tehñ miøød, paady hajxy xquia'a tsoj tsaächtiuunäm. Chojpiä jioot jaduhñ coo howyiinmahñdy hajxy nbadu'ubøjcänät, coo ja'a nhaxøøgwiinmahñdy hajxy nnajtshixøøyyänät.

⁵ Pero jii jäya'ayhajxy näje'e, jaanç tehñ xiexä quiopcä tiaatsc-hajxy. Cabä yhaxøøgwiinmahñdy hajxy ñajtshixø'øwa'añ. Y coo hajxy jaduhñ tehngajnä quia'a mabögät, manit hajxy hanaaty hanaxiä chaächpøga'añ coo yhabáadät coo ja'a Dios ja'a cahwiindøyhäna'c hanaaty chaächtiuna'añ.

⁶⁻¹⁰ Pønä jioot nägø'ø nädecypiä tsojp coo hoy yhidät, pønä jioot pädaacp coo jim ñöcxät Dioswiinduum, coo ja'a hoyhajtä weenhajt jim piáadät,

coo jim quiumayøjät ja'a Diósäm, pues je'edsä Dios jim yajnøcxaamby. Mio'owaambiä Dios je'e ja'a hoyhajtä weenhajt. Quiumayaambiä Dios jaduhñ. Yaghidaambiä Dios je'e jootcuyc homiänaajä, hopiønä, hoy jia judíosä, hoy quia'a jagä judíosä. Pero hoyhoyyä Dios chaächtiuna'añ pøn haxøøg jatcøøby, pønä Diosmädia'agy ca'a cudiunaamb, pøn ca'a yajmägäpax ca'a yaghane'emaamb waambatiä Dios hajxy jaduhñ xjia hanéhmäm. Hopiønä jaduhñ chaächpøga'añ, pønjaty jaduhñ haxøøg jatcøøby, hoy hajxy jia judíospä, hoy hajxy quia'a jagä judíospä.

¹¹ Hix, cabä Dios miøjpäda'agy pø mjudío miich, pø caj. Je'e yajcopcøøby pø mhoyhäna'c, pø caj.

¹²⁻¹⁵ Højts judíoshajpä, jequiän højtsä Dios xyhanehmy neby højts hoy nguhdujthädät. Mänitä Moisés ja'a mädia'agy jaduhñ quiujahy nebiaty højts hoy nguhdujthädät. Hoorä, ja'a häna'c-hajxy ca'a judíospä, cabä mädia'agy hajxy miädoyyä nebiä Moisés jecy quiujahyyän. Pero hoy hajxy quia'a jagä mädoyyä, coo hajxy hamdsoojoot hoy quiudiünät nebiä Dios jioot jia tsoquiän, cähxø'ögäp jaduhñ coo hajxy yhawáanäxä ja'a Diósäm ja'a wyiinmahñdyhaamhajxy. Jaduhñ hajxy hamdsoo ñajuø'øy pø hoy hajxy quiudiuñ, pø caj. Jaduhñ hajxy yajtuungpaady néjjiäm hajxy häxøpy tøø miädoy ja'a mädia'agy ja'a Moisés jecy quiujahyyäbä. Y coo hajxy hoy quia'a cudiünät neby hajxy ñajuø'øy ja'a wyiinmahñdyhaamhajxy, mänit hajxy quiümädowa'añ. Jaanä jaduhñ højtspä, højts judíospä, coo højts nga'a cudiünät neby højtsä Dios jecy xyhanehmiän, nebiä Moisés ja'a mädia'agy jecy quiujahyyän, jaduhñ højts ngumädowaambä. Hix, pøn jaduhñ cudiuumb nebiä Dios yhane'emiän, je'e ja'a Dios piäda'agaamby hawa'adstuum, hoyyä mädia'agy tøø quia'a jagä mädoyyä nebiä Moisés jecy quiujahyyän. Pero pøn jaduhñ ca'a cudiuumb, hoyyä mädia'agy tøø jia mädoyyä nebiä Moisés jecy quiujahyyän, cab je'eduhñ hawa'adstuum piäda'aga'añii ja'a Diósäm. Jaduhnds je'e, nägøxiä ja'a cahwiindøyhäna'c-hajxy quiümädowa'añ, hoy hajxy jia judíospä, hoy hajxy quia'a jagä judíospä.

¹⁶ Mänit hajxy jaduhñ quiümädowa'añ coo ja'a Dios ja'a Jesucristo hänajty yaa quiejxtägatsa'añ hädaa yaabä naaxwiin. Mänitä jäya'ayhajxy yhixa'añii ja'a Jesucristäm nebiaty hajxy hänajty yaa tøø jiatcø'øy. Mänit hajxy yagjahmiejtsta'aga'añii nebiaty hajxy hänajty tøø wyiinmahñdyhaty hamee'ch. Jaduhñä Diosmädia'agy miäna'añ ja'a Jesucristocøxpä, ja'açh nyajwa'xypä.

¹⁷ Højts judíoshajpä, naxy højts nniguiumayii coo højts njudíoshaty, coo højtsä mädia'agy nmäbøcy ja'a Moisés jecy quiujahyyäbä. Jaduhñ højts nniguiumäayyäbä coo højtsä Dios tøyhajt xquiu'ughaty, højtsyähajtiä, højts judíoshajpä.

¹⁸ Nnajuøøby højts jaduhñ nebiatiä Dios jioot chocy coo højts nhoyhäna'c-hädät. Y ja'a mädia'agy ja'a Moisés jecy quiujahyyäbä, je'e højts jaduhñ yhawáanäp neby højts nwiimbíwät tii hoy tii mäbaad.

¹⁹⁻²⁰ Niyhajuøøyyäp højts coo højts häna'c hoy nyajnähixø'øwa'añ, ja'a häna'cä Diosmädia'agy hajxy ca'a jappä ca'a najuøøbiä. Jim højtsä tøyhajt nbaady maa ja'a mädia'aguiän, ja'a Moisés jecy quiujahyyäbä.

²¹ Hoorä, coo højts häna'c jaduhñ nyajnähixø'øy ja'a Diosmädia'agy, hahixøøby jaduhñ coo højtsä Diosmädia'agy hoy ngudiünät. Cábøchä nmägunaaxhajxy näje'e hoy quiudiuñ. Y coo højts häna'c nmägapxy nhane'emy coo hajxy quia'a méedsät, hahixøøby jaduhñ coo højts nga'a mée'tspät. Jaduhñhöchä nmägunaaxhajxy näje'e jiatcø'øy.

²² Y coo højts häna'c nmägapxy nhane'emy coo wiinghäna'cä tio'oxiøjc hajxy quia'a møødtsänáayyät, cab jaduhñ yhahixø'øy coo højts jaduhñ

njatc'øbiät. Jadúhnhøchä nmägunaaxhajxy näje'e jiatc'øy. Cab højts quepychech naaxpoch nwiingudsähgø'y. Pero cab jaduhñ yhäxø'y coo højts xädø'ñ nméedsät tsajtøgooty maa ja'a quepychech naaxpoch yhitiän. Jadúhnhøchä nmägunaaxhajxy näje'e jiatc'øy.

²³ Niguiumáayyap højts jaduhñ coo højtsä mädia'agy nmäbøcy ja'a Moisés jecy quiujáhyäbä. Pero näje'ečhä nmägunaaxhajxy, cab hajxy hoy quiudiñ. Jaduhñ hajxy yajcähxø'øgy coo ja'a Dios hajxy tøyhajt quia'a wiingudsähgø'y.

²⁴ Jaduhñ jim myiñ cujaay maa ja'a Diosmädia'aguiän: “mijts judíoshajpä, coo ja'a Diosmädia'agy hajxy hoy mga'a cudiuñ, paadiä Dios haxøøgiaty ñähojyii ja'a häna'c-hajxy ca'a judíospä.” Tøyhajt jaduhñ.

²⁵ Højts, judíos højts nmäminø'y nmäga'awø'y. Mänit højtsä Dios xquiumáyät coo højtsä mädia'agy hoy ngudiünät, ja'a Moisés jecy quiujáhyäbä. Pero coo højts jaduhñ hoy nga'a cudiünät, cab højtsä Dios jaduhñ xquiumaya'añ.

²⁶ Hoorä, ja'a häna'c-hajxy ca'a judíospä, coo hajxy hoy quiudiünät nebiä Dios yhane'emiän, mänit hajxy quiumaya'añii ja'a Diósäm.

²⁷ Näje'ečhä nmägunaaxhajxy, cab hajxy hoy quiudiñ nebiä Dios yhane'emiän, hoy hajxy judíos jia mäminø'y jia mäga'awø'y, hoyyä mädia'agy hajxy jia mädoyyä, ja'a Moisés jecy quiujáhyäbä. Je'ehajxy mäbøcypä ca'a cumayáanäp ja'a Diósäm.

²⁸ Pønjaty hoy cudiumb nebiä Dios yhane'emiän, je'edsä Dios quiu'ughajpy, hoy hajxy judíos quia'a jagä mäminø'y quia'a jagä mäga'awø'y, hoyyä hijxtahnd hajxy quia'a jagä møødä maa ja'a ñi'xcøxphajxiän neby højts judíos nmøødän.

²⁹ Hix, coo pøn hoy quiudiünät hamuumdu'joot nebiä Dios choquiän, mänit hajxy quiu'ughada'añii ja'a Diósäm, hoyyä judíoshajxy näje'e quia'a ja mäna'añ cooc tyijy hajxy jaduhñ quia'a cu'ughadyii ja'a Diósäm. Hix, quiumaabiä Dios jaduhñ pøn jaduhñ cudiumb hamuumdu'joot.

3

¹⁻² Xchoobáatäp højts jaduhñ madiu'u coo højts judíos nmäminø'y nmäga'awø'y, coo højtsä hijxtahnd nyajpäda'agy maa højts nni'xcøxpän, ja'a jaduhñ yajcähxø'pä coo højtsä Dios xquiu'ughaty. Tøyhajt jaduhñ. Haa ca'a, Dios højts nhap ndeedy jecy xyajcø'ødägøyyä ja'a mädia'agy ja'a Moisés jecy quiujáhyäbä. Mänit hajxy ñämaayyä ja'a Diósäm coog hajxy hānajt quiu'ughada'añii.

³⁻⁴ Y je'enä højtsä Dios xquiu'ughatyñä neby højts jecy xyajwiinwaanøyyän, hoy højts nhap ndeedy nämay hoy quia'a jagä cudiuñ neby hajxy hānajt tøø yhane'emyiijän ja'a Diósäm. Tøyhajt jaduhñ coo ja'a Dios tiømiädia'agy. Cabä Dios mänaa yhöhnda'agy, hoy hajxy nägøxiä cu nja mänáanäm cooc tyijy ja'a Dios quia'a yajtøjiaty waambaty hajxy tøø xyajwiinwaanøyyäm. Jaduhñ jim myiñ cujaay maa ja'a Diosmädia'aguiän: Diosteedy, hopiønä jaduhñ ñajuø'y coo miich myajtøjiaty waambaty højts miich tøø xyajwiinwaanø'y.

Coo miich pøn xñäxø'øwø'øwät cooc tyijy miich jaduhñ mga'a yajtøjiaty waambaty miich tøø mmädia'agy,

cähxø'øgaamb jaduhñ coo je'e yhöhnda'agy, ja'a miich jaduhñ xñäxø'øwøøbiä.

⁵ Jaanč tehñ yhojyä Dios yhity. Pero højts, cab højts hoy nnä'ägä hjtäm. Tøyhajt jaduhñ. Paadiä, cähxø'p jaduhñ coo ja'a Dios jiaanč tehñ hoyyä. Hix, coo højts häxøpy nhjtäm hoy, cab jaduhñ häxøpy quiahxø'øgy coo ja'a Dios jaduhñ hoy jiaanč tehñ yhity. Pero jaduhñä jäya'ayhajxy näje'e

miäna'añ cooc tyijy ja'a Dios howyiinmahñdy quia'a mөөдä, je'eguiөxpä coo hajxy xyajcumädowáañäm.

⁶ Pero hahixөөby jaduhñ coo ja'a Dios hajxy xyajcumädowämät. Haa ca'a, coo ja'a Dios häxөpy hoy quia'a hity, cabä cuhdujt häxөpy miөөдä coo hajxy jaduhñ xyajcumädowämät.

⁷ Hoyyä jäya'ayhajxy näje'e jia mäna'añ cooc tyijy ja'a Dios quia'a yajtөjaty waambaty төө quiapxy төө miädia'agy, yajnajuөөby jaduhñ coo ja'a Dios төyhajt mänaa quia'a höhñda'agy. Jaduhñä jäya'ayhajxy nägөxiä ñajuө'өwa'añ coo jaduhñ yhäxө'өy coo ja'a Dios hajxy nwiingudsähgөөyyämät. Pero coo pөñä Dios jaduhñ ñänömät cooc tyijy quia'a yajtөjaty waambaty төө quiapxy төө miädia'agy, hahixөөby jaduhñ coo je'e quiumädowät.

⁸ Näje'eçhä jäya'ayhajxy xñähөөнө'өy cóogөch tyijy nmäna'añ cooc tyijy jaduhñ yhäxө'өy coo hajxy haxөөг njatcөөyyämät, jaduhñäc tyijy maas hoy quia'hө'өga'añ coo ja'a Dios jiaaңch tehñ yhoyyä. Ja'a hänä'c-hөch hajxy jaduhñ xñähөөнөөbiä, höhñdaacp hajxy jaduhñ. Hahixөөby jaduhñ coo hajxy quiumädowät.

⁹ Jaanä jaduhñ höjts judiөspä, cab höjtsä Diosmädia'agy maas hoy ngudiuñ quejee ja'a hänä'c-hajxy ca'a judiөspä. Haa ca'a, төөch nhuuc mänaambä coo hajxy jaduhñ hoy nga'a nä'ägä hojiäya'ayhajtäm, coo ni pөñä Diosmädia'agy hoy quia'a nä'ägä cudiuñ, ni höjts judiөs, ni ja'a hänä'c-hajxy ca'a judiөspä. Hamdsoojoot hajxy jaduhñ hoy nga'a jäya'ayhajtäm.

¹⁰ Jaduhñ jim myiñ cujaay maa ja'a Diosmädia'aguiän:
Ni pөñ hoy quia'a wädity.

¹¹ Ni pөñ jaduhñ quia'a wiinjuө'өwa'añ nebiä Dios wyiinmahñdyhatiän.

Ni pөñä jioot quia'a päda'agy maa ja'a Diosän.

¹² Төө ja'a jäya'ayä Diosmädia'agy hajxy nägөxiä ñajtshixөөñä.

Cөjnөө cөjtu'u hajxy төө piadu'ubөjnä.

Haxөөг hajxy jiäya'ayhajnä nägөxiä.

¹³ Jaanç tehñ yhäxөөг hajxy quiapxy miädia'agy.

Jaduhñä yhaawhajxy tiocxuugy nebiä ho'oguiäya'ajiut tiocxuuguiän, ja'a төө yhawä'açhäbä.

Jaanç tehñ yhöhñdaacp hajxy. Jaduhñä haxөөгpä hajxy yaghity yhaawjooty nebiä haxөөгtsahñdyhaawän.

Jaanç tehñ miägapxөjp hajxy.

¹⁴ Jaanç tehñ quiapxtägooby hajxy hoñejpiä nebiä jioot hajxy yajmädsoquiän. Jaanç tehñ yhäxөөг hajxy ñiñänөmyii.

¹⁵ Jaanç tehñ piaquiä jootma'ad hajxy piaadyii, mänitä miäya'adiөjc hajxy nөcxy yagho'oga'añ.

¹⁶ Jaanç tehñ chipyajpädө'p hajxy majaty hajxy wiädity. Chaaçhtiumbiä cu'ug hajxy jaduhñ.

¹⁷ Jaanç tehñ chiptsojp hajxy.

¹⁸ Cab hajxy tiajy miay pө yajcumädowáañäbä Dios hajxy.

¹⁹ Jaduhñds je'e, yajcumädowaambiä Dios ja'a jäya'ay nägөxiä, pөñä miädia'agy hoy ca'a cudiuñäp, mөөд höjts judiөs, mөөдä hänä'c-hajxy ca'a judiөspä. Höjts judiөs, höjtsä pojpä nmaas mөөд, je'eguiөxpä coo höjtsä Dios ja'a nhapä ndeedy jecy xjia hanehmä coo hajxy haxөөгjaty quia'a jatcө'өwät nébiөch naamnä төө ngujaayän. Pero cab höjts jaduhñ nnä'ägädä cudiuna'añ.

²⁰ Jéquiänä Dios ja'a Moisés yhanehmy coo ja'a miädia'agy quiujähyyäxät. Jaduhñ hajxy nnajuөөyyäm coo hajxy nägөxiä hoy nga'a jäya'ayhajtäm. Ni pөñ jaduhñ hoy quia'a cudiuna'añ ja'a Diosmädia'agy. Coo ja'a Jesucristo hajxy төө xñähho'túutäm, paadiä Dios hajxy xpiäda'agáañäm hawa'adstuum,

caj jie'eguiøxpä cooc tyijy ja'a mädia'agy hajxy hoy ngudiúunäm, ja'a Moisés jecy quiujáhyäbä.

21-26 Hoorä, nnajuøøyyäm hajxy jaduhñ coo hajxy nägøxiä haxøøg njatcøøyyäm, mäduhñtiä hajxy yaa ndsänáayyäm hädaa yaabä naaxwiin, møød højts judíos, møødä häna'c-hajxy ca'a judíospä. Cabä Dios pøn ñä'ägädä cumay. Jaduhñä jäya'ayhajxy näje'e miäna'añ cooc tyijy hajxy piäda'aga'añii hawa'adstuum coogä jecymiädia'agy hajxy hoy quiudiúnät, ja'a Moisés jecy quiujáhyäbä. Pero tøø hajxy nhíxäm coo ni pøn jaduhñ quia'a päda'aga'añii hawa'adstuum. Hoorä, jéquiänä Dios wyiinmaayy coo ja'a yHuung hñajty yaa quixa'añ maa højtshájtäm. Mayhajtä Dios hñajty tiunaamby maa højtshájtäm. Jaduhñ hajxy hñajty xpiäda'agáanäm hawa'adstuum. Jim jaduhñ myiñ cujaay maa ja'a jecymiädia'aguiän, ja'a Moisés jecy quiujáhyäbä. Pero cabä jecyjiäya'ayhajxy hñajty wyiinjuøøy. Hojiootä Dios miøød coo ja'a jecyjiäya'ayhajxy quia'a pädaacä haxøøgtuum, hoy hñajty jia hawiinmatsä coo hajxy jim cu piädaacä, je'eguiøxpä coo hajxy hñajty haxøøg jiatcøøy. Paadiä Dios ja'a yHuung ñähdujcy, jaduhñä jäya'ayä piojpä quiädieey hajxy ñähwá'adsät. Jaduhñ quiähxøøgy coo ja'a Jesucristo ja'a jecyjiäya'ay yajnähwaach ja'a piojpä quiädieeyhajxy. Høxtä jäda'anäbaadyñä ja'a Dios hajxy xyajwiinjuøøyyäm neby hajxy xpiädaacäm hawa'adstuum. Jaanä jaduhñ hajxy xyajwiinjuøøyyämbä coo hajxy piäda'aga'añii haxøøgtuum pønjaty haxøøg jatcøøby jäda'ahaty. Paadiä Dios ja'a yHuung ñähdujcy, ja'a Jesucristo, neby hajxy jaduhñ xñähho'túutämät. Y coo hajxy jaduhñ nmäbøjcämät coo ja'a Jesucristo hajxy tøø xjiaançh nähho'túutäm, jaduhñä Dios ja'a nbojpä ngädieey hajxy xyajnähwáatsäm, jaduhñ hajxy xpiädaacäm hawa'adstuum, hopiønä, møød højts judíos, näguipxy møødä häna'c-hajxy ca'a judíospä. Mayhajtä Dios jaduhñ tiuun maa højtshájtäm coo hajxy jaduhñ xpiädaacäm hawa'adstuum.

27-28 Cab jaduhñ yhawiinmatsä coo hajxy hamdsoo nniguiumáayyämät. Hix, coo hajxy nmäbøjcämät coo ja'a Jesucristo hajxy tøø xñähho'túutäm, paadiä Dios hajxy xpiäda'agáanäm hawa'adstuum, hoy hajxy nga'a jagä panócxcäm nebiä Moisés jecy quiujahyyän. Coo ja'a Dios hajxy häxøpy xpiädaacäm hawa'adstuum je'eguiøxpä coo ja'a jecymiädia'agy hajxy ngudiúunäm, ja'a Moisés jecy quiujáhyäbä, mänit hajxy mabøcy cu nniguiumáayyäm hamdsoo. Pero caj pøn jaduhñ piäda'aga'añii hawa'adstuum hamdsoohaam.

29-30 Tu'uquiä Dios jaduhñ. Tu'cuhdujtä Dios hajxy xyhíxäm nägøxiä, møød højts judíos, møødä häna'c-hajxy ca'a judíospä. Tøyhajt jaduhñ. Coo hajxy nägøxiä nmäbøjcämät coo ja'a Jesucristo hajxy tøø xñähho'túutäm, paadiä Dios hajxy jim xpiädaacämät hawa'adstuum nägøxiä.

31 Pero cábøch nmäna'ana'añ coo ja'a jecymiädia'agy quia'a tøyyä, ja'a Moisés jecy quiujáhyäbä, hoy hajxy nja wiinjuøøyyänä coo ja'a Jesucristo hajxy xpiädaacäm hawa'adstuum mänaa hajxy tøø xñähho'túutäm. Hix, maas hoy hajxy jaduhñ nwiinjuøøyyänä coo ja'a jecymiädia'agy jaduhñ jiaançh tøyyä, ja'a Moisés jecy quiujáhyäbä. Coo hajxy nmäbøjcäm coo ja'a Jesucristo hajxy tøø xñähho'túutäm, paady hajxy xpiädaacäm hawa'adstuum, caj jie'eguiøxpä cooc tyijy ja'a jecymiädia'agy hajxy jaduhñ hoy ngudiúunäm. Tøø hajxy jaduhñ nwiinjuøøyyänä coo jaduhñ tiøyhajtä.

4

¹ Højts judíos, højtsä Abraham jecy nhaphajt ndeedyhajt.

² Hoorä, Abraham hijty jiäya'ayhaty jegyhajty. Hoorä, coo ja'a Dios ja'a Abraham häxøpy tøø piäda'agy hawa'adstuum je'eguiøxpä coo ja'a Abraham hoy jia jäya'ayhajty, mänitä Abraham cu ñiguiumaayyä.

³ Hix, paadiä Dios ja'a Abraham piädaacy hawa'adstuum, coo ja'a Abraham ja'a Dios miädia'agy miäbøjcä cooc ja'a Dios yajtøjiaty waambaty tøø quiapxy tøø miädia'agy, ca'a jie'eguiøxpä coo ja'a Abraham hoy jiäya'ayhajty. Jaduhñ jim myiñ cujaay maa ja'a Diosmädia'aguiän.

⁴ Hoorä, ja'a cuduumbädøjc, paady hajxy miäjuyii coo hajxy quiuduñ, cab jaduhñ ñä'ä mayhajtä. Jaduhñ miäbaady nebiä jäya'ayhajxy näje'e wyiinmahñdyhatiän. Yajcumayaamb hajxy ja'a Diósäm, paady hajxy jia wi'i yhojiäya'ayhada'añ.

⁵ Pero pønjaty tøø miäbøcy coo ja'a Dios yajtøjiaty waambaty tøø quiapxy tøø miädia'agy, je'edshajxy jaduhñ hawa'adstuum päda'agáanäp. Paady hajxy jim piäda'aga'añii coo hajxy jaduhñ miäbøcy, ca'a jie'eguiøxpä coo hajxy hoy jia jäya'ayhaty. Jim hajxy jaduhñ piäda'aga'añii, hoy hajxy haxøøg tøø jia jatcø'ø. Tiumbiä Dios mayhajt jaduhñ. Coo ja'a Dios hajxy häxøpy xpiädáacäm hawa'adstuum je'eguiøxpä cooc tyijy hajxy hoy njäya'ayhajtäm, cab hajxy häxøpy nmänáanäm cooc ja'a Dios mayhajt tiuñ.

⁶ Jaduhñä David jecy miänaañ cooc hajxy jootcujc yhida'añ, pønjaty jaduhñ najuøøby coo ja'a Dios hajxy xpiädáacäm hawa'adstuum ja'a miayhajthaam, hoy hajxy hänajty haxøøg tøø jia jatcø'ø. Hix, cabä Dios miøjpäda'agy pø cabä häna'c hänajty hoy tøø jiäya'ayhaty.

⁷⁻⁸ Coo jaduhñ yhabáatnät coo Dios ja'a jäya'ay yajtøyhajtyega'añ nebiaty hajxy hänajty tøø quiädieeyän, mänit hajxy jootcujc yhida'añ pønjatiä Dios piädaacypy hawa'adstuum, pønjatiä Dios miee'xyp, pønjatiä piojhajpiä ja'a quiädieeyhajpiä hajxy yajnähwáatsäxä, nomä David jecy miänaañ.

⁹ Jue'e ja'a David jecy ñänøøm cooc hajxy jootcujc yhida'añ, pønjatiä Dios piädaacypy hawa'adstuum, hopiønä, møødä judíoshajxy, ja'a Dios quiu'ughajpiä, møødä cajpä judíoshajxy. Je'edshajxy ca'a cu'ughajtäp ja'a Dios. Hix, jaduhñ myiñ cujaay maa ja'a Diosmädia'aguiän: "Coo ja'a Abraham ja'a Dios miädia'agy miäbøjcä cooc ja'a Dios mänaa quia'a hønnda'agy, paady piädaacä hawa'adstuum."

¹⁰ Hoorä, jaduhñä judíoshajxy quiuhdujthaty, yajcircuncidarhajpä ya'adiøjc-hajxy. Jaduhñ miädia'agytiägø'øy coo hijxtahñd hajxy piädáacäxä maa ja'a ñi'xcøxpahxiän. Hoorä ja'a Abraham, tøøyyäm hänajty je'e piädáacänä hawa'adstuum, cajnä hijxtahñd hänajty jaduhñ piädáacäxä maa ja'a ñi'xcøxpän. Jaduhñä tøyhajt hajxy nmøødhajtäm coo häna'c-hajxy piäda'agyii hawa'adstuum je'eguiøxpä coo ja'a Dios miädia'agy hajxy miäbøjcä cooc ja'a Dios yajtøjiaty waambaty je'e tøø quiapxy tøø miädia'agy, hoyyä hijxtahñd hajxy quia'a jagä møødä maa ja'a ñi'xcøxpahxiän.

¹¹ Paadiä Abraham hijxtahñd jaduhñ piädáacäxä maa ja'a ñi'xcøxpän, jaduhñ yajnajuø'øy coo ja'a Abraham hänajty tøø piäda'agyii hawa'adstuum. Paady jim piädaacä coo ja'a Dios ja'a miädia'agy hänajty tøø miäbøjcäxä. Jaduhñä Abraham piädaactsohñä hawa'adstuum, hoyyä hijxtahñd hänajty jaduhñ quia'a jagä pädaacäxänä maa ja'a ñi'xcøxpän. Pønjaty jaduhñ mæbøjp nebiä Abraham jecy miäbøjquiän, jaanä jaduhñ hajxy yhixáanäbä ja'a Dios nebiä Dios ja'a Abraham jecy yhiixiän, hoy hajxy quia'a jagä judíospä. Coo hajxy jaduhñ nmæbøjcäm nebiä Abraham jecy miäbøjquiän, jaduhñ quiähxø'øgy coo ja'a Abraham hajxy nhøjxhajtäm ndecyhajtäm.

¹² Højts judíos hajxy, højtsä Abraham jecy nhaphajt ndeedyhajt. Jaaya'ay jaduhñ pädaactsohnä hawa'adstuum je'eguiøxpä coo jaduhñ miäbøjcy coo ja'a Dios yajtøjiaty waambaty hänajty tøø quiapxy tøø miädia'agy. Tøyhajt jaduhñ. Højts judíos, jaduhñ højts nyajcircuncidarhaty nebiä Abraham jecy yajcircuncidarhajtän. Pero tøyymä Abraham ja'a Dios ja'a miädia'agy hänajty miäbøjcä, cahnä hänajty yajcircuncidarhaty. Højts judíos, højts jaduhñ mäßbjpä, jaanä jaduhñ højts nmäßbjpä nebiä Abraham jecy miäßbjquiän. Jaduhñä tøyhajt hajxy nmøødhajtäm coo højtsä Abraham jecy nhøjxhajty ndecyhajty, coo højts jaduhñ nmäßbocy, højts judíos.

¹³ Jéquiänä Dios ja'a Abraham ñämaayy cooc hänajty yaa miähane'ema'añ hädaa yaabä naaxwiin näguipxy møødä yhap møødä yhoc. Ja'a Dios jaduhñ mänaañ. Paadiä Abraham jaduhñ ñämaayy je'eguiøxpä coo ja'a Abraham ja'a Dios miädia'agy hajxy miäßbjcä, ca'a jie'eguiøxpä cooc tyijy ja'a Abraham jia cudiunñ nebiaty hänajty tøø yhane'emyii. Pero coo ja'a Abraham jaduhñ miäßbjcy coo ja'a Dios yajtøjiaty waambaty hänajty tøø quiapxy tøø miädia'agy, paadiä Abraham jaduhñ ñämaayy coo ja'a Abrahamhajxy hänajty yaa miähane'ema'añ hädaa yaabä naaxwiin, møødä yhaphajxy, møødä yhoc-hajxy.

¹⁴ Haa ca'a, jaduhñä Dios miänaañ cooc hajxy yaa miähane'ema'añ hädaa yaabä naaxwiin pønjaty jaduhñ mäßbjp coo ja'a Dios yajtøjiaty waambaty hänajty tøø miäna'añ. Jaduhñ miädia'agytiägø'y coo ja'a Dios ja'a hoybä weenbä hajxy xmio'owáanäm je'eguiøxpä coo hajxy jaduhñ nmäßbjcäm. Pero coo ja'a hoybä weenbä hajxy häxøpy nbáatäm je'eguiøxpä coo ja'a jecymiädia'agy hajxy hoy ngudiünäm, ja'a Moisés jecy quiujáhyäbä, cab jaduhñ cu choobaaty coo ja'a Dios hajxy jaduhñ tøø xñämäayyäm coogä mayhajt hänajty tiuna'añ coo ja'a hoybä weenbä hajxy xmio'owáanäm. Ni jaduhñ cu quia'a tsoobaaty coo højts cu nmäßbjcäm coo ja'a Dios jaduhñ yajtøjiaty waambaty tøø quiapxy tøø miädia'agy.

¹⁵ Hix, cabä jecymiädia'agy hajxy hoy ngudiünäm, ja'a Moisés jecy quiujáhyäbä. Cooc hajxy jaduhñ nga'a cudiünäm, paady hajxy ngädiéhyäm. Y paady jaduhñ yhahixø'y coo hajxy ngumädóowämät. Pero pønjaty ja'a jecymiädia'agy tøø quia'a mädoy, ja'a Moisés jecy quiujáhyäbä, cab hajxy jaduhñ quiumädowa'añ, hoy hajxy tøø quia'a jagä tuñ nebiä Moisés jecy yhanehmiän.

¹⁶ Cooc ja'a Abraham jaduhñ jecy miäßbjcä ja'a Dios miädia'agy coo ñämaayy coogä Abrahamhajxy hänajty yaa miähane'ema'añ hädaa yaabä naaxwiin, møødä yhap møødä yhoc-hajxy, paadiä tøyhajt hajxy nmøødhajtäm coo ja'a Dios ja'a hoybä weenbä hajxy nägøxiä xmio'owáanäm nä'a mayhajt, coo ja'a Abraham hajxy nbamäßbjcämät coo ja'a Dios yajtøjiaty waambaty tøø miäna'añ, møød højts judíos, møød mijts ca'a judióspä. Cooc ja'a Abraham hajxy jaduhñ nbamäßbjcämät, jaduhñ mäwiin hajxy nägøxiä xyajmäbáatäm nebiä Abraham hajxy xyhaphajtäm xyhoc-hajtäm. Jaduhñ quiahxø'øgy coo ja'a Abraham hajxy nhøjxhajtäm ndecyhajtäm.

¹⁷ Hix, jaduhñ jim myiñ cujaay maa ja'a Diosmädia'aguiän cooc ja'a Dios ja'a Abraham piädaacy coo ja'a jäya'ayhajxy mayhagajtpä yhaphat yhoc-hadøøjät ja'a Abraham. Y miäßbjcä ja'a Abraham jaduhñ coo jaduhñ ñämaayy coogä tio'oxiøjc hänajty quio'na'awa'añ, hoy hajxy hänajty tøø jia miäjaanä. Paadiä Abraham jaduhñ miäßbjcy, ñajuøøby hänajty jaduhñ coo ja'a Dios mäjaa miøødä coo ja'a ho'oguiäya'ay yagjujypjøtgätsät, y coo mäjaa miøødäbä coo ja'a jäya'ay quiunúu'xät ja'a hajxy hänajty ca'a miimb ca'a cahbnä. Y coo ja'a Abraham hajxy jaduhñ nbamäßbjcäm, jaduhñ mäwiin

hajxy nmäbáatäm nebiä Abraham hajxy xyhaphájtäm xyhoc-hájtäm. Jaduhn̄ quiähxø'øgy coo ja'a Abraham hajxy nhøjxhájtäm ndecyhájtäm.

18-21 Coo ja'a Dios ja'a Abraham jaduhn̄ jecy ñämaayy coogä mayhaga-jptpä-jäya'ayhajxy hñajty yhaphada'añ tieedyhada'añ ja'a Abraham, tøø ja'a Abrahamhajxy hñajty miäjaanä møøddä tio'oxiøjc. Mägo'x-jomøjtä Abraham hñajty miøøddä. Y ja'a tio'oxiøjc, ja'a Sarahajpä, cahnä hñajty ñä'ägädä huungpaadyñä, hoyyä jomøjt hñajty tøø jia nøcxnä coo yhuungpáadät. Pero cabä Abraham jaduhn̄ ñä'ägädä møjpdäacy coo hajxy hñajty tøø miäjaanä. Hamuumdu'jootä Abraham jaduhn̄ miäbøjcy nägø'ø nädecypiä neby hñajty tøø ñäma'ayijän ja'a Diósäm coog hñajty jäya'ay may yhaphat yhoc-hada'añii. Paady jaduhn̄ tiøjiajty. Jaduhn̄ jim̄ myiimbä cujaay maa ja'a Diosmädia'aguiän cooc ja'a Abraham yhap yhoc-hajxy hñajty jiaančh teh̄m̄ miayø'øwa'añ. Paadiä Abraham jaduhn̄ miäbøjcy, ñajuøøby hñajty jaduhn̄ coo ja'a Dios mäjaa miøøddä coo jaduhn̄ yajtøjiádät waambaty hñajty tøø quiapxy tøø miädia'agy. Mänitä Abraham ja'a Dios jaduhn̄ miøjpdäacy jiaančhpädaacy.

22 Coo ja'a Abraham jaduhn̄ miäbøjcy, paady hawa'adstuum piädaacä.

23 Jaduhn̄ jim̄ myiñ cujaay maa ja'a Diosmädia'aguiän coo ja'a Abraham piädaacä hawa'adstuum je'eguiøxpä coo ja'a Dios miädia'agy miäbøjcxä coogä Dios yajtøjiaty waambaty tøø quiapxy tøø miädia'agy.

24 Jaanä jaduhn̄ højtsä Diosmädia'agy xñänøømämbä. Coo ja'a Dios ja'a miädia'agy hajxy jaduhn̄ nmäbøjcxämbät, jaduhn̄ä Dios hajxy xpiädäacämbät hawa'adstuum, je'eguiøxpä coo ja'a Dios ja'a Jesucristo yagjujypiøjtägajch. Ja'a Jesucristo, je'e hajxy nWiindsønähájtäm.

25 Jaaya'ay jaduhn̄ nähdujcä coo hajxy xñähho'túutäm. Jaduhn̄ä nbojphájtäm ja'a ngädieeyhájtäm hajxy xyajnähwáatsäm. Y coo ja'a Jesucristo jaduhn̄ yagjujypiøjtägajtsä, jaduhn̄ hajxy nmähmøøyyänä hawa'adstuum.

5

1 Hoorä, coo hajxy nmäbøjcxäm coo ja'a Jesucristo hajxy tøø xñähho'túutäm, paadiä Dios hajxy tøø xyajnähwáatsäm ja'a nbojphájtäm ja'a ngädieeyhájtäm. Paady hajxy xpiädäacäm hawa'adstuum. Jootcujcä Dios hajxy jaduhn̄ xmiøødhíjtäm.

2 Coo ja'a Jesucristo hajxy jaduhn̄ tøø xñähho'túutäm, coo je'e jiu-jypiøjtägajch, paadiä Dios hajxy xquiumáayyänä. Paady hajxy nxoonäacäm. Y coo jaa tøyhajt hajxy jaduhn̄ nmøødhájtäm coo ja'a Dios hajxy jim̄ xya-jnøcxäänäm maa ja'a wyiinduumän, paady hajxy jootcujc nhíjtäm.

3-4 Jaanä jaduhn̄duhmbä, xoonäacäm hajxy hädaa yaabä naaxwiin, hoy hajxy yaa nja tsaačhpøjcxäm. Coo hajxy nmee'xtújcämät, jaduhn̄ä Diosmädia'agy hajxy hoy ngudiúunämät. Y coo hajxy jaduhn̄ hoy ngudiúunämät, jaduhn̄ä tøyhajt hajxy nmøødhadäänäm coo ja'a Dios hajxy jim̄ xyajnøcxäänäm maa ja'a wyiinduumän. Coo hajxy jaduhn̄ nnajuøøyyäm coo hajxy jim̄ xyajnøcxäänäm, paady hajxy yaa nxoonäacäm, hoy hajxy yaa nja tsaačhpøjcxäm.

5 Coo ja'a Dios jaduhn̄ miäna'añ coog hajxy jim̄ xyajnøcxäänäm maa ja'a wyiinduumän, yejpiä Dios ja'a tøyhajt jaduhn̄. Cab hajxy jaduhn̄ xwyiinhøhnäm. Hix, tøø ja'a Dioshespíritu hajxy xyhadägøøyy xjioottägøøyyäm. Jaduhn̄ hajxy xyajnajuøøyyäm coo hajxy xjiaančh teh̄m̄ chójcxäm hamuumdu'joot.

6 Coo ja'a Dios yajnähdiij coo hñajty tøø yhabaatnä, mänitä Jesucristo hajxy hoy xñähho'túutäm. Jaduhn̄ä nbojphájtämä ngädieeyhájtäm hajxy xya-

jnähwáatsäm. Cab hajxy hánajty hoy nnähwa'adsáanäm hamdsoo je'eguiøxpä coo hajxy hánajty ngahwiindøyhájtäm.

⁷ Hix, caj miich põñ xchoj nähho'tú'udät, hoy miich hánajty mja ho-jiäya'ayhaty.

⁸ Pero ja'a Dios hajxy xjiaanč tehñ chójcäm, paadiä Jesucristo hajxy hoy xñähho'túutäm, hoy hajxy hánajty nja cuboj nja cugädieeyhájtäm.

⁹ Hoorä, coo ja'a Jesucristo hajxy tøø xñähho'túutäm, coo ja'a Dios hajxy tøø xpiädäacäm hawa'adstuum, jaduhñä tøyhajt hajxy nmøødhájtäm coo ja'a Dios hajxy xquia'a yajcumäadowáanäm.

¹⁰ Coo hajxy hijty cøxypänejpä njäya'ayhájtäm, jaduhñ mäwiin hijty pi-aady néjjiäm coo ja'a Dios hajxy hijty nmädsiphájtäm. Pero coo ja'a yHu-ung Jesucristo hajxy hoy tøø xñähho'túutäm, ja'a hajxy nWiindsønähájtämbä, paady cabä Dios hajxy nmädsiphájtänä. Hoyyä Dios hajxy xyhuunghájtänä. Tu'ugjoot tu'ugwiinmahñdiä Dios hajxy nmøødhájtänä. Y coo ja'a Jesucristo jiuypijotägajch, coo jim ñøcxtägajch maa ja'a Tieediän, jaduhñä tøyhajt hajxy nmøødhájtäm coo hajxy jim xyajncxáanämbä.

¹¹ Jaduhñä tøyhajt hajxy nmøødhájtämbä coo ja'a Dios hajxy xquiumáayyänä. Paady hajxy jaduhñ xquiumáayyänä coo ja'a Jesucristo ja'a nbojpä ngädieey hajxy tøø xyajnähwáatsäm. Tsøcxä hajxy jaduhñ xoonädäacäm.

¹² Hoorä, tu'jäya'ay jecy quia'a cudiuundsohñ neby hánajty tøø yhane'emyijän ja'a Diósäm. Ja'a Adánhøch jaduhñ nnänøømby, ja'a hajxy jecy nhaphájtäm ndeedyhájtäm. Jaduhñä pojpa cädieey yaa chohnädaacy hädaa yaabä naaxwiin. Y coo ja'a Adán jaduhñ jecy quiädiehy, paady jaduhñ yhuuc ho'tsohmä. Y coo ja'a Adán hajxy jaduhñ jecy nhaphájtäm ndeedyhájtäm nägøxiä, paady hajxy nbagädiéhyyäm, paady hajxy nbahó'cäm.

¹³⁻¹⁴ Høxtä jecyjiäya'abiaady hajxy haxøøg jiäya'ayhajty, paady hajxy nägøxiä yho'cy, hoyyä Moisés hánajty quia'a jagä miññä, quia'a jagä ca'ayñä, hoyyä Dios hánajty quia'a jagä hane'emyñä coo ja'a jäya'ayhajxy hoy jiäya'ayhädät nebiä Moisés jecy quiujahyyän, hoy hajxy hánajty quia'a jagä pagädiehbiä nebiä Adán hánajty tøø quiädieeyän. Hoyyä Dios hánajty quia'a jagä hane'emyñä coo ja'a jäya'ayhajxy hoy jiäya'ayhädät, nägøxiä jäya'ayä pojpa cädieey hajxy hánajty miøødä. Y ja'a Adán, jaduhñ je'e jecy ñämaayyä cooc hánajty yho'oga'añ, põ cab hánajty jaduhñ quiudiuna'añ nebiä Dios hánajty tøø yhane'emiän. Y coo ja'a Moisés jaduhñ cujecy quiujahy nebiatiä Dios hánajty tøø yhane'emiän, jaduhñä jäya'ayhajxy nägøxiä ñämáayyäbä coogä Adán hajxy hánajty nägøxiä piaho'ogaambä, põ cab hajxy hánajty quiudiuna'añ nebiä Dios hánajty tøø yhane'emiän. Ja'a jecyjiäya'ayhajxy hánajty jiibä, cahnä Moisés hánajty quiujaayñä nebiatiä Dios hánajty tøø yhane'emy, cab hajxy hánajty jaduhñ nämay ñajuø'øy coo hajxy hánajty yho'oga'añ, põ haxøøg hajxy hánajty jiäya'ayhaty.

¹⁵ Coo ja'a Adán ja'a Dios miädia'agy jaduhñ jecy quia'a cudiuunä, paady hajxy nägøxiä nhó'cäm. Pero coo ja'a Jesucristo ja'a Tieediä miädia'agy jaduhñ quiudiunä, paady hajxy nnähwaats nguhwáatsäm. Coo ja'a Jesucristo hajxy jaduhñ hoy xñähho'túutäm, paadiä Dios hajxy xpiädäacäm hawa'adstuum. Møjmayhajtä Dios jaduhñ tiuun maa højtshájtäm, põnjatiä miädia'agy tøø miäböjcä ja'a Jesucristocøxpä. Paady hajxy jim xyajncxáanäm maa ja'a wyiinduumän.

¹⁶ Coo ja'a Jesucristo hajxy hoy tøø xñähho'túutäm, jaduhñä tøyhajt hajxy nmøødhájtäm coo ja'a nbojpä ngädieey hajxy jaduhñ xyajnähwáatsäm nägøxiä, põnjaty tøø miäböcy ja'a Jesucristocøxpä. Paadiä Dios hajxy

xpiädaacäm hawa'adstuum. Paady hajxy jim xyajnøcxáanäm maa ja'a wyi-induumän.

¹⁷ Jaduhnds je'e, coo ja'a Adán ja'a Dios miädia'agy jecy quia'a cudiuunä, paady hijty yhawinmatsä coo ja'a Dios hajxy xpiädaacämät haxøøgtuum. Pero tøø ja'a Jesucristo hajxy xyajnahwaats xyajcuhwáatsäm. Møjmayhajtä Dios jaduhñ tiuun. Paadiä Dios hajxy xquia'a päda'agáanäm haxøøgtuum, pønjaty hawa'adstuum. Y paady højtsä hoyhajtä weenhajt yaa nbaadaanäm hädaa yaabä naaxwiin je'eguiøxpä coo ja'a Jesucristo hajxy tøø xyajnahwaats tøø xyajcuhwáatsäm.

¹⁸⁻¹⁹ Mänaa ja'a Jesucristo yaa yhitiän hädaa yaabä naaxwiin, ca'xiä Tieediä miädia'agy quiudiuunä mäduhñtiä yaa yhiyty. Y coo hajxy jaduhñ xñähho'túutäm, ja'a Tieediä miädia'agy jaduhñ quiudiuunä. Jaduhñ hajxy xyajnahwáatsäm. Coo hajxy jaduhñ nmäbøjcämät coo ja'a Jesucristo hajxy tøø xjiaanç nähho'túutäm, mänitä Dios hajxy xpiädaacämät hawa'adstuum. Hoorä, ja'a Adán, haxøøg je'e jecy jiäya'ayhajty. Cabä Adán ja'a Dios miädia'agy jecy ñä'ägädä cudiuunä. Y coo ja'a Adán hajxy jecy nhaphájtäm ndeedyhájtäm, paadiä Dios miädia'agy hajxy nga'a nä'ägädä cudiunáanämbä. Coo hajxy jaduhñ nga'a cudiunáanäm, paady hijty yhawinmatsä coo ja'a Dios hajxy jiiby cu xpiädaacäm haxøøgtuum. Pero coo ja'a Jesucristo hajxy tøø xñähho'túutäm, paady hajxy jim xyajnøcxáanäm Dioswiinduum. Jaduhñä Dios mayhajt møj jiaanç tehñ tiuun maa højtshájtäm.

²⁰⁻²¹ Coo ja'a Dios jecy yhanehmy coo ja'a jäya'ayhajxy hoy jiäya'ayhädät, mänitä Moisés jaduhñ quiujahy. Y coo ja'a nocy hajxy ngäpxämät, ja'a Moisés jecy quiujáhyäbä, jaduhñ hajxy nnajuøøyyämät coo hajxy njaanç cädiéhyä. Hoy hajxy jaduhñ nja najuøøyyäm, cab hajxy nmäbøjcäm. Pero xjiaanç tehñ ñäxúu'tsäma Dios. Paadiä møjmayhajt jiaanç tehñ tiuun maa højtshájtäm. Jaduhnds je'e, coo hajxy ngädiéhyä, paady hajxy nhó'cäm. Pero coo ja'a Dios hajxy xñäxúu'tsä, paadiä Jesucristo hajxy hoy xñähho'túutäm, ja'a hajxy nWiindsønähjtämbä. Jaduhñä Dios hajxy xpiädaacäm hawa'adstuum. Mänit hajxy xyagjugyhadáanäm cøjxta'axiøø nebiä Dios jiugyhatiän.

6

¹ Cab jaduhñ ñä'ägädä hahixø'øy coo hajxy nmänáanämät: "Tsøg hajxy cädiéhyä tehngajnä. Haa ca'a, tehngajnä Dios hajxy xñäxuudsáanäm."

² Caj pues, cab jaduhñ yahixø'øy coo hajxy tehngajnä ngädiéhyämät. Haa ca'a, tøø ja'a pojpä cädieey hajxy nnajtshixøøyyänä coo ja'a Diosmiädia'agy hajxy tøø nmäbøjcäm ja'a Jesucristocøxpä.

³⁻⁵ Tøgä cab hajxy mnajuø'øy coo ja'a Jesucristo hajxy nmøødhájtäm tu'ugjoot tu'ugwiinmahñdy coo hajxy tøø nnäbéjtäm ja'a Jesucristocøxpä. Y coo hajxy jaduhñ tøø nnäbéjtäm ja'a Jesucristocøxpä, jaduhñ mäwiin pi-aady néjjiämä Jesucristo hajxy häxøpy näguipxy tøø nmøødhó'cäm. Jaanä jaduhñ mäwiin piaatpä néjjiämä Jesucristo hajxy häxøpy näguipxy tøø nmøødnaaxtägøøyyäm. Coo ja'a pojpä cädieey hajxy tøø nnajtshixøøyyänä, jaduhñ miädia'agytiägø'øy coo hajxy jaduhñ ween nga'a jatcøøyyänä haxøøg. Y coo ja'a Dios ja'a Jesucristo yagjujypiøjtägajch ja'a miäjaahaam, mänitä Jesucristo jugyhajt hawiinjemybiä miøødhajty. Jaanä jaduhñ højtshájtämbä, coo hajxy nnäbéjtäm, jaduhñ mäwiin piaady néjjiämä Jesucristo hajxy häxøpy näguipxy tøø nmøødjujypiøjtägátsäm. Paadiä jugyhajt hajxy hawiinjemybiä nmøødhájtämbä. Tøyhajt jaduhñ. Jaduhñä hojiootä howyiinmahñdy hajxy nmøødhájtämät. Jaduhñ miädia'agytiägø'øy coo ja'a Dios hajxy xyagjugyhadáanäm cøjxta'axiøø neby je'e jiugyhatiän.

⁶ Coo ja'a Jesucristo hajxy tøø xñähho'túutäm cruzcøxp, mänitä nhaxøøgwiinmahndyhajxy quiuhdägooyänä nebiä haxøøgwiinmahñdy hajxy nägøxiä hijty nmøødhájtäm. Coo ja'a nhaxøøgwiinmahñdyhajxy jaduhñ quiuhdägooyänä, paadiä Jesucristo hajxy nmøødhíjtänä tu'ugjoot tu'ugwiinmahñdy. Paady hajxy jaduhñ tøø xñähho'túutäm, jaduhñä nhaxøøgwiinmahñdyhajxy jaduhñ quiuhdägooyänä. Jaduhñä njoot hajxy nga'a pädáacänät maa ja'a haxøøgpän.

⁷ Pønä Jesucristo hñajty møødhíj tu'ugjoot tu'ugwiinmahñdy mänäa ja'a Jesucristo yho'oguiän, cabä jioot piädaacnä maa ja'a haxøøgpän.

⁸ Coo hajxy nmäbøjcäm coo ja'a Jesucristo hajxy jaduhñ tøø xñähho'túutäm møød coo jadähooc jiuypiojcy, jaduhñ mäwiin miäbaady néjjiäm coo ja'a Jesucristo hajxy häxøpy näguipxy tøø nmøødjiuypiojcam. Paady hajxy jaduhñ njugyhadaänäm cøjxta'axiøø neby je'e jiu gyhatiän.

⁹ Coo ja'a Jesucristo jiuypiojtägajch, cab jaduhñ mänäa yho'tägatsaännä. Homiänaaxøøjä homiänaadsuujä jiu gyhada'añ. Tøyhajt jaduhñ.

¹⁰ Hix, tähoocnähho'tu'utiä ja'a Jesucristo hajxy xñähho'túutäm. Jaduhñä nbojpä ngädieey hajxy tøø xyajñähwáatsäm. Y coo ja'a Jesucristo tøø jiuypiojtägajtsnä, paady homiänaaxøøjä homiänaadsuujä ja'a Dios miøødhidaännä.

¹¹ Jaanä jaduhñ højtshájtämbä, coo ja'a Jesucristo hajxy nmøødhíjtänä tu'ugmädia'agy, tsøg hajxy jahmiejtstáacäm coo ja'a nhaxøøgwiinmahñdyhajxy tøø quiuhdägooyänä. Jaduhñ hajxy tsøc jahmiejtstáacämbä coo hawiin-jemybiä jugyhajt hajxy nmøødhájtänä nebiä Jesucristo hñajty miøødhatiän mänäa jiuypiojtägachän. Paadiä Dios hajxy nmøødhíjtämbä tu'ugmädia'agy.

¹² Cab hajxy cøxypänejpiä tsøc jatcøoyyänä. Cabä njootä ngopc hajxy nbädaacänät maa ja'a haxøøgpän.

¹³ Cabä ngø'ø ndecy hajxy nyaghanáxänät, ni ja'a nhaawhájtäm. Tsøgä Diosmädia'agy hajxy hamuumdu'joot cudiüünäm. Coo ja'a Jesucristo hajxy hñajty nmøødhíjtäm tu'ugjoot tu'ugwiinmahñdy mänäa yho'oguiän, møød mänäa jiuypiojtägachän, paadiä Dios hajxy nmøødhíjtänä tu'ugjoot tu'ugwiinmahñdy.

¹⁴⁻¹⁵ Paadiä Dios hajxy xquiumáayyäm coo mayhajt tøø tiuñ maa højtshájtäm, ca'a jie'eguiøxpä coo ja'a mädia'agy hajxy nja wi'i quiudiunáanäm, ja'a Moisés jecy quiujáhyyäbä. Coo ja'a Dios mayhajt jaduhñ tiuñ maa højtshájtäm, je'eçh jaduhñ nnänøømby coo hajxy xyajñähwaats, coo hajxy xyajcuhwáatsäm. Hoyyä Dios mayhajt jaduhñ tiuñ maa højtshájtäm, cab jaduhñ ñä'ägä hahixø'øy coo hajxy haxøøg njatcøoyyämät tehngajnä.

¹⁶ Tsøg hajxy paquiä mädiáacäm neby hajxy yaa nguhdujthájtäm hädaa yaabä naaxwiin. Jaduhñä cuhdujt hajxy nmøødhíjtäm coo hajxy nwiimbíiwämät pøn jaduhñ nmädunáanäm. Y jaduhñ hajxy ngudiüünäm nebi-atiä nwiindsøn hájtäm hajxy xyhanéhäm. Jaanä jaduhñä cuhdujt hajxy nmøødhíjtämbä coo hajxy nwiimbíiwämät mädyii hajxy nyajtunáanäm, ja'a Diosmädia'agy, o ja'a nhaxøøgwiinmahñdyhájtäm. Coo ja'a Diosmädia'agy hajxy nyajtuünämät, mänitä Dios hajxy jaduhñ xquiumáayyämät. Pero coo ja'a nhaxøøgwiinmahñdy hajxy nyajtuünämät, cabä Dios hajxy jaduhñ nmøødhíjtämät tu'ugjoot tu'ugwiinmahñdy. Mänitä Dios hajxy xpiädaacämät haxøøgtuum. Tøyhajt jaduhñ.

¹⁷ Dioscujú'uyäp ja'a Dios coo mijtsä Diosmädia'agy hamuumdu'joot myajtuunnä neby hajxy tøø mmäbøquiän. Cahnä Diosmädia'agy hajxy mmädoyñä, haxøøg hajxy hijty mjäya'ayhaty.

¹⁸ Coo mijts tøø mmäbøcy coo ja'a Jesucristo hajxy tøø xñähho'túutäm,

paadiä mhaxøøgwiinmahñdy hajxy tøø mnajtshixøøñä. Tøø ja'a mjoot hajxy mbäda'agy coo hajxy hamuumdu'joot mhojiäya'ayhájnät.

¹⁹ (Páadyhøch jaduhñ nmädia'agy neby hajxy yaa nguhdujthájtäm hädaa yaabä naaxwiin, jaduhñ hajxy hoy mwiinjuø'øwät. Cab hajxy jaduhyyä hoy mwiinjuø'øwa'añ.) Hijty, jaanč tehñ yhaxøøgaty hajxy hijty mjäya'ayhaty. Cøxypänejpiä hajxy hijty mjaanč tehñ jiatcø'øy. Maas hanaxiä hajxy hñajty mjatcø'øwa'añ tehñgajnä. Pero tøø ja'a Diosmädia'agy hajxy mmäbøjnä ja'a Jesucristocøxpä, paadiä Diosmädia'agy hajxy myajtuñnät nägø'ø nädecypiä.

²⁰ Coø ja'a mhaxøøgwiinmahñdy hajxy hijty myajtuñ, cabä mjoothajxy hijty chocy coo hajxy hoy mjäya'ayhädät. Coø hajxy häxøpy tøø mhojiäya'ayhaty, tøø ja'a Dios hajxy häxøpy xquiumay.

²¹ Hočhähdiiuñnä hajxy hijty mjatcø'øy. Cabä tii hoybä hajxy hijty mbaady. Haxøøgtuum hajxy hijty mnä'ägädä häda'aga'añ.

²² Paadiä Jesucristo hajxy tøø xñäho'túutäm, coo ja'a mhaxøøgwiinmahñdy hajxy jaduhñ mnajtshixø'øwät. Tøyhajt jaduhñ. Paadiä Jesucristo hajxy mmøødhijnä tu'ugjoot tu'ugwiinmahñdy. Coø ja'a mjoot hajxy hamuumdu'joot tøø mbäda'agy coo ja'a Dios hajxy mmøødtuna'añ, paadiä hoyhajtä weenhajt hajxy mbaada'añ. Jaduhñ miädia'agytiägø'øy, coo mijtsä Dios hoyhäna'c xyagjada'añ nebiä Jesucristo yhoyhäna'c-hatiän, paadiä Dios hajxy xyagjugyhada'añ cøjxta'axiøø neby je'e jiugyhatiän.

²³ Coø hajxy cøxypänejpiä njatcøøyyämät, cabä Dios hajxy jaduhñ nmøødhíjtämät tu'ugmädia'agy, møød haxøøgtuum hajxy nhädaácämät. Pero tøø ja'a Dios mayhajt tiuñ coo ja'a yHuung hajxy yaa tøø xyajnäguéjxäm, ja'a Jesucristo, ja'a hajxy nWiindsøñhájtämbä. Hoyyä Jesucristo hajxy tøø xñäho'túutäm. Jaduhñä Dios hajxy xpiädaácäm hawa'adstuum. Coø hajxy jaduhñ nmäbøjcämät, mänitä Dios hajxy xyagjugyhájtämät cøjxta'axiøø neby je'e jiugyhatiän.

7

¹ Mägu'ughajpädøjc, mnajuøøby hajxy jaduhñ nebiä cuhdujt yaa myiñ hädaa yaabä naaxwiin. Ja'a häna'c-hajxy møjcuuhdujtmøødpä, ja'a häna'c hajxy jaduhñ xyhanéhñäm mäduhñtiä hajxy yaa njugyhájtäm, túhmäts. Pero coo hajxy nhó'cänä, cab hajxy jaduhñ xyhanéhñänä.

²⁻³ Høxtahñdsä to'oxiøjc ja'a ya'adiøjcmmøødpä, jaduhñä cuhdujt myiñ coo hajxy ñimiøødtsäna'awøøjät mäduhñtiä hajxy nämetsc jiugyhaty. Hoorä, coo ja'a to'oxiøjc wiingya'adiøjc miøødtsäná'awät, y je'enä ñihyhap jiugyhatyñä, haxøøgä to'oxiøjc jaduhñ jiatcø'øwät. Hix, cabä cuhdujt jaduhñ myiñ coo jaduhñ jiatcø'øwät. Pero coodsä ñihyhap yhó'ogät, mänitä quixy cuhdujt miøødänä coo piøjtägätsät, y cab jaduhñ ñejpiä.

⁴ Hoorä, mägu'ughajpädøjc, coo mijtsä Jesucristo hñajty mmøødhity tu'ugjoot tu'ugwiinmahñdy mänaa yho'oguiän, paadiä jecymiädia'agy hajxy xquia'a hanehñnä, ja'a Moisés jecy quiujáhyäbä. Jaanä jaduhñduhmbä, tu'ugjoot tu'ugwiinmahñdiä Jesucristo hajxy hñajty mmøødhíjtäbä mänaa jiuypiojtägachän. Tøø ja'a mjoot hajxy mbäda'agy coo jaaya'ay hajxy mmøødtúnät. Jaduhñä Dios hajxy mmøødtúumbät.

⁵ Cahnä hajxy hñajty nmäbøjcäm coo ja'a Jesucristo hajxy hoy xñäho'túutäm, jaduhñä njoot hajxy hñajty nnä'ägädä pädaácäm coo hajxy hñajty jaduhñ njatcø'øwáanäm hoñejpiä. Paady hajxy hijty nhäda'agáanäm jiiby møjcu'uhaam. Jaanč tehñ yhaxøøg hajxy hñajty nwiinmahñdyhájtäm. Hoyyä mädia'agy hajxy hñajty nja mädóowäm, ja'a Dios ja'a Moisés jecy ñajtsapxøøyyäbä, cab hajxy hñajty nyajtunáanäm.

6 Cahnä Diosmiädia'agy hajxy hānajtj nmäbójcām ja'a Jesucristocōxpä, tehngajnā ja'a jecymiädia'agy hajxy hānajtj nja wi'i quiudiunāanām, ja'a Moisés jecy quiujáhyäbä. Jadúhnāc tyijj hajxy hānajtj nnāhwa'adsāanām. Pero coo ja'a Jesucristo hajxy tōø xñāhho'túutām, paadiä jecymiädia'agy jaduhmbä xquia'a hanéhmā. Coo ja'a Jesucristo hajxy tōø xyajnāhwāatsām, jaduhñ hajxy xyagjugyhadāanām cōjxta'axiōø neby jaaya'ay jiugyhatiān. Y xpiuhbéjtāmā Dioshespíritu hajxy nebiä Dios hajxy hoy nmøødtúunāmāt.

7-9 Cahnōchä jecymiädia'agy hānajtj nmädoyñā, ja'a Moisés jecy quiujáhyäbä, cábōch hānajtj nnajuø'oy cooçh hānajtj hoy nga'a jäya'ayhaty. Pero cooçh jecymiädia'agy jaduhñ nwiinjuøøñā, páadyhōch nnajuøøñā cooçh cōxypānejpiä njatcø'oy hoñejpiä. Cooçhā haxøøgwiinmahñdy jaduhñ njaançh tehñ miøødä, páadyhōchä njoot hijty chocy cooçh cōxypānejpiä njatcø'owāt hoñejpiä nebiatiä jecymiädia'agy hajxy xjia hanéhmām coo hajxy nga'a jatcøøyyāmāt, ja'a Moisés jecy quiujáhyäbä. Y cooçhā jecymiädia'agy jaduhñ nmädoy, maas hanáxiōch cōxypānejpiä njaac jatcø'oy tehngajnā. Páadyhōchä tøyhajt nmøødä cooçh hijty nga'awa'añ haxøøgtuum.

10 Hóyhōch ndijj jaduhñ ngudiuna'añ ja'a jecymiädia'agy, ja'a Moisés jecy quiujáhyäbä. Y cooçh haxøpy hoy ngudiun, hawa'adstúumhōchä Dios cu xpiädaacy. Pero cábōchä jecymiädia'agy jaduhñ hoy nnä'ägädä cudiuna'añ, páadyhōch hawiinmats nhädá'agät haxøøgtuum.

11 Hoy ndíyhōchä jecymiädia'agy hānajtj nyajtuna'añ, ja'a Moisés jecy quiujáhyäbä. Jaduhñ ndíyhōchä Dios ja'a hoyhajtä weenhajt xmio'owa'añ. Pero cábōchä tøyhajt hānajtj nnä'ägä møødä. Cooçhā haxøøgwiinmahñdy hānajtj nmøødä, páadyhōchä jecymiädia'agy hānajtj hoy nga'a yajtuñ, ja'a Moisés jecy quiujáhyäbä. Páadyhōch hānajtj nga'awa'añ haxøøgtuum.

12 Ja'a jecymiädia'agy ja'a Moisés jecy quiujáhyäbä, je'e hajxy xyhanéhmām coo hajxy hoy njäya'ayhajtāmāt. Jaduhñ miädia'agy neby hajxy hoy njäya'ayhajtāmāt. Xyajnajuøøyyām hajxy jaduhñ coo ja'a Dios howyiinmahñdy jiaançh tehñ miøødä.

13 Paadiä jecymiädia'agy jaduhñ yhooyä, ja'a Moisés jecy quiujáhyäbä. Pero hóyhōch hānajtj tōø nja mädoy, tehngajnōch hānajtj haxøøg nwi'i jäya'ayhatyñā. Páadyhōch hijty jiiby nga'awa'añ haxøøgtuum. Hix, cábōchä nwiinmahñdy hānajtj yhooyä. Y cooçhā jecymiädia'agy jaduhñ nmädooy, ja'a Moisés jecy quiujáhyäbä, maas hanáxiōch hānajtj haxøøg njatcø'owa'añ.

14 Jaduhñä tøyhajt hajxy nmøødhajtām coo ja'a jecymiädia'agy hajxy xyhawāanām coo ja'a Dios howyiinmahñdy jiaançh tehñ miøødä. Jaanä jaduhñ hajxy xyhawāanāmbä coo Dios ja'a jioot chocy coo hajxy hoy njäya'ayhajtāmāt. Pero hōjts, cab hōjts hoy nnä'ägädä jäya'ayhajtām, je'eguiøxpä coo hōjts hädaa yaabä naaxwiimbä wiinmahñdy nmøødhajtām. Hamdsoojoot hajxy jaduhñ haxøøg njatcøøyyām.

15 Jaduhñä njoothajxy jia wi'i chójcām coo hajxy hoy njäya'ayhajtāmāt, pero cab hajxy nnä'ägädä jadāanām hojiäya'ayhat. Pātiidä hajxy jaduhñ coo nga'a jadāanām. Cōxypānejpiä hajxy nwi'i jatcøøyyām, hoy hajxy nja najuøøyyām coo jaduhñ yhaxøøgä.

16 Nnajuøøyyām hajxy jaduhñ coo ja'a jecymiädia'agy yhooyä, ja'a Moisés jecy quiujáhyäbä. Jaduhñä njoothajxy jia tsójcām coo hajxy ngudiunāmāt nebiatiä jecymiädia'agy hajxy xyhanéhmām. Pero cab hajxy hoy nnä'ägädä cudiunāanām.

17 Pero, ca'a yhamdsoojoot hajxy jaduhñ haxøøg njatcøøyyām. Ja'a nhaxøøgwiinmahñdy hajxy jaduhñ xyagjatcøøyyām haxøøg.

18-19 Cabä Diosmädia'agy hajxy hoy ngudiunáanäm hamdsoojoot, hoyyá njoothajxy jia tsójcäm coo hajxy ngudiúunämät. Haxøøg hajxy njatcøøyyäm, hoyyá njoothajxy jaduhñ quia'a jagä tsójcäm coo hajxy jaduhñ njatcøøyyämät.

20-21 Hix, ja'a nhaxøøgwiinmahñdy hajxy haxøøg xyagjatcøøyyäm, ca'a yhamdsoojootä.

22 Jaduhñä Diosmädia'agy hajxy xyhanéhmäm nebiaty hajxy hoy njäya'ayhájtämät. Njoodótyhøch ngopcóotyhøch jaduhñ njuø'øy coo ja'a Diosmädia'agy jiaançh tehñ yhooyä.

23 Nnajuøøbiøch jaduhñ cooçhä haxøøgwiinmahñdy njaançh tehñ miøødä. Páadyhøçhä howyiinmahñdy hoy nga'a nä'ägädä yajtuna'añ. Hix, ja'a nhaxøøgwiinmähñdyhøch haxøøg xyagjäya'ayhajp. Y cábøch hoy nnä'ägädä najtshixø'øwa'añ.

24 Cooçh häxøpy pøn hoy xquia'a yajnähwa'adsa'añ ja'a nhaxøøgwiinmähñdyhøch, cábøçhä Dios häxøpy hoy nmøødhida'añ tu'ugjoot tu'ugwiinmahñdy. Jíibyhøch häxøpy nhäda'aga'añ møjcu'uhaam. Jaançh tehñ yhoñäxúu'tsnøch häxøpy nhity.

25 Pero nmóobiøçhä Dios Dioscujú'uyäp cooçhä Jesucristo tøø xya-jnähwa'açh, ja'a hajxy nWiindsøn'hájtämbä. Páadyhøçhä Diosmädia'agy hoy nyajtuna'añ ja'a nhowyiinmahñdyháamhøch, hóyhøçhä haxøøgwiinmahñdy nja møødnä. Je'eçh tähoocjaty haxøøg xyagjatcøøby.

8

1 Hoorä, hawa'adstuum hajxy nmähmøøyyänä coo ja'a Jesucristo hajxy nmøødhíjtäm tu'ugmädia'agy. Jaduhñ hajxy ngudiúunäm nebiä Diosmädia'agy hajxy xyhanéhmäm. Cab hajxy cøxypänejpä njatcøøyyänä.

2 Coo ja'a Jesucristo hajxy tøø xñähho'túutäm, paady hajxy xmiøødhíjtäm tu'ugjoot tu'ugwiinmahñdy. Paadiä Dioshespíritu hajxy xyagjugyhadáanäm cøjxta'axiøø nebiä Dios jiugyhatiän. Paadiä Dios hajxy tu'ugjoot tu'ugwiinmahñdy xmiøødhidáanäm homiänaajä. Coo ja'a Jesucristo ja'a nhaxøøgwiinmahñdy hajxy tøø xyajnähwáatsäm, paady hajxy jiiby nga'a häda'agáanänä haxøøgtuum.

3-4 Coo ja'a Dios ja'a yHuung yaa quiejxy hädaa yaabä naaxwiin, jaduhñ yaa jiäya'ayhajty neby højtshájtäm. Jesucristo je'e. Pero cabä Jesucristo haxøøg jiäya'ayhajty neby højtshájtäm. Mänitä Jesucristo hajxy xñähho'túutäm. Hoyyá Jesucristo ja'a jecymiädia'agy quiudiuuñ, ja'a Moisés jecy quiujáhyäbä. Pero højtshájtäm, cab hajxy jaduhñ ngudiúunäm. Paady jaduhñ yhahixø'øy coo hajxy ngumädóowämät. Coo ja'a Jesucristo hajxy xñähho'túutäm, quiumädoow je'e ja'a højtscøxphájtäm jaduhñ. Paadiä jecymiädia'agy hajxy xquia'a hanéhmänä, ja'a Moisés jecy quiujáhyäbä. Ja'a Dioshespíritu hajxy xpiuhbéjtänä coo ja'a Dios hajxy xmiøødhíjtämät tu'ugjoot tu'ugwiinmahñdy. Jaduhñ hajxy xpiuhbéjtämbä coo hajxy haxøøg nga'a jäya'ayhájtänät.

5 Y coo ja'a Dioshespíritu hajxy jaduhñ xpiuhbéjtäm, paady hajxy nxiictaac nmädiaactáacäm nebiä Diosmädia'agy hajxy maas hoy nyajtúunämät. Pero ja'a jäya'ay ja'a Dioshespíritu ja'a miädia'agy hajxy ca'a cudiunáanäbä, jaduhñ hajxy xyiicta'agy miädiaacta'agy nebiä yhamdsoo wiinmahñdy hajxy yajtuñ.

6 Pøn jaduhñ xiictaacp mädiaactaacp nebiä Dioshespíritu ja'a miädia'agy maas hoy miäböjcät, je'e ja'a Dios jaduhñ miøødhijpy tu'ugjoot tu'ugwiinmahñdy. Je'eduhñ nøcxaamb Dioswiinduum. Jootcuyc je'e jim

yhida'añ mөөдä Dios. Pero pөнä yhamdsoo wiinmahñdy wi'i yajtunaamb, ja'a Dios ja'a miädsip je'eduhñ. Haxөөgtuum je'eduhñ ñä'ägä häda'aga'añ,

⁷⁻⁸ je'eguiөxpä coo ja'a Dios miädsiphaty. Cabä Diosmädia'agy hoy yaj-tuna'añ, ni ja'a jioot jaduhñ quia'a tsocy coo yajtúnät. Y cab jaduhñ quiu-mayii ja'a Diósäm.

⁹ Pөнä Dioshespíritu ca'a mөөdhijp tu'ugmädia'agy, cabä Diosmädia'agy miäböcy ja'a Jesucristocөxpä. Coo mijts jaduhñ mjaančh mäböcy, paady mijtsä Dioshespíritu mmөөdhity tu'ugmädia'agy. Y coo ja'a Dioshespíritu hajxy jaduhñ mmөөdhity, paadiä mhaxөөgwiinmahñdy hajxy төө mhөxhiñnä.

¹⁰ Tөyhajt jaduhñ coo hajxy nho'ogáanäm, je'eguiөxpä coo ja'a Adán jecy quiädiehy, ja'a hajxy jecy nhaphájtäm ndeedyhájtäm. Pero coo mijtsä Dios төө xpiäda'agy hawa'adstuum, y coo ja'a Jesucristo hajxy mmөөdhity tu'ugmädia'agy, paady mijtsä Dioshespíritu xyagjugyhada'añ homiänaajä nebiä Dios jiugyhatiän. Jim hajxy xyajnөcxa'añ Dioswiinduum.

¹¹ Coo ja'a Dioshespíritu hajxy xmiөөdhíjtäm tu'ugmädia'agy, paadiä Dios hajxy xyagjuypiөjtägatsáanäm ja'a yhEspirituhaam coo hajxy hñajty төө nhó'cäm. Jaduhñ hajxy xyagjuypiөjtägatsáanäm nebiä Jesucristo yagju-jypiөjtägajtsän.

¹² Mägu'ughajpädөjc, jaduhñds je'e, hahixөөby jaduhñ coo ja'a Diosh-espíritu miädia'agy hajxy nyajtúunämät. Cab jaduhñ yhahixө'өy coo ja'a nhamdsoo wiinmahñdy hajxy nyajtúunänät tehñgahnä.

¹³ Hix, coo hajxy tehñgahnä haxөөg njatcөөyyänät, cabä Dios hajxy hoy nmөөdhíjtämät tu'ugjoot tu'ugwiinmahñdy. Mänit hajxy jilby nhädaacämät haxөөgtuum. Pero coo ja'a nhaxөөgwiinmahñdy hajxy nnajtshixөөyyämät ja'a Dioshespirituhaam, jaduhñä Dios hajxy hoy nmөөdhíjtänät tu'ugjoot tu'ugwiinmahñdy.

¹⁴ Hix, pөнjaty jaduhñ puhbéjtäp ja'a Dioshespíritu nebiä Diosmädia'agy hajxy jaduhñ hoy yajtúnät, Dios yhuung hajxy je'e.

¹⁵ Haa ca'a, ja'a yhEspirituhaamä Dios hajxy xyhuunghájtäm, paady hajxy nnämäayyäm: "Diostedy." Y coo ja'a Dios hajxy xyhuunghájtäm, paadiä Dios hajxy nga'a tsähgөөyyänä neby hajxy hijty ndsähgөөyyäm coo hajxy hijty xquia'a pädaacämnä hawa'adstuum.

¹⁶ Y coo ja'a Dioshespíritu hajxy jaduhñ xmiөөdhíjtäm, jaduhñä төyhajt hajxy xmiөөyyäm coo ja'a Dios hajxy xyhuunghájtänä.

¹⁷ Coo ja'a Dios hajxy xyhuunghájtäm näguipxy mөөдä Jesucristo, paadiä Jesucristo hajxy jim xyajnөcxaanäm Dioswiinduum. Paadiä Dios hajxy madiu'u xquiunuu'xáanäm näguipxy mөөдä Jesucristo, nebiä Dios jecy miänaañän cooc hajxy xquiunuu'xáanäm. Y coo hajxy ndsaačhpөjcämät ja'a Dioscөxpä nebiä Jesucristo chaačhpөjquiän, mänitä Dios hajxy mөj jaančh xpiädaacämät näguipxy mөөдä Jesucristo.

¹⁸ Hөөch jaduhñ mänaamb coo hajxy yaa weeñtiä ndsaačhpөjcäm hädaa yaabä naaxwiin. Pero cab jaduhñ ñä'ägädä mäbaady ni weeñtiä nebiä Dios ja'a hoyhajtä weenhajt hajxy jim xmio'owáanäm maa je'e wyiinduumän.

¹⁹ Tijatiä Dios yaa төө quiunuu'xy hädaa yaabä naaxwiin, jia wi'i jiөbhixyp hajxy jaduhñ coo yhabáadät coo ja'a Dios ja'a hoyhajtä weenhajt mio'owa'añ pөнjaty jaduhñ yhuunghajpy. Mänitä Dios jaduhñ miäna'ana'añ coo hajxy nga'a tsaačhpөgáanänä.

²⁰⁻²¹ Coo ja'a Adán jaduhñ jecy jawyiinhajt quiädiehchohñ, ja'a hajxy jecy nhaphajt ndeedyhájtämbä, paadiä Dios ja'a tsө'ty ja'a häyohn yaa quiejxy hädaa yaabä naaxwiin. Mäduhñtiä Dios yaa төө quiunuu'xy cөxiä hädaa yaabä naaxwiin, cөxaamb jaduhñ quiuhdägoyya'añ. Pero cabä pojpa hajxy

tii miøødä. Ca'a jie'eguiøxpä ja'a Dios ja'a tsø'ty ja'a häyohn yaa quiejxy. Hix, jagooyyä jäya'ay pojpa cädieey hajxy miøødä, paadiä Dios tsø'ty häyohn yaa quiejxy. Jéquiänä Dios jaduhñ wyiinmaayy coo cøxiä wiinä chaačhpógät näguipxy møødä jäya'ayhajxy, tijatiä Dios yaa tøø quiunuu'xy, høxtä coonä yhabáadät coo ja'a Dios hajxy xquia'a yajtsaačhtiunáanänä. Mänitä Dios ja'a hoyhajtä weenhajt hajxy nägøxiä xmio'owáanäm, højts Dioshuung, näguipxy møød tijaty ja'a Dios yaa tøø quiunuu'xy.

22 Hix, tijatiä Dios yaa tøø quiunuu'xy hädaa yaabä naaxwiin, jia wi'i jìøbhijxyp hajxy jaduhñ coo yhabáadät coo ja'a Dioshuung ja'a hoyhajtä weenhajt hajxy mio'owa'añii. Tøyhajt jaduhñ. Pero cahnä yhabaady, jaančh tehñ chaačhpøjp hajxy jaduhñ.

23 Jaanä jaduhñ højtshájtämbä, jaduhñ højts ndsaačhpøjcämbä, jaduhñ højts nja wi'i jìøbhíxämbä coo yhabáadät coo ja'a Dios hajxy pedyii xmio'owáanäm ja'a hoyhajtä weenhajt. Coo Dios hajxy xyhuunghájtäm, paady hajxy jaduhñ xmio'owáanäm. Mänitä Dios ja'a hawiinjemybiä ni'xcopc xmio'owáanäm, ja'a mänaa ca'a ma'p ca'a tägoobiä. Coo ja'a Dios ja'a yhEspíritu hajxy tøø xyajnäguéjxäm, jaduhñä tøyhajt hajxy nmøødhájtäm coo ja'a Dios hajxy xjiaančh huunghájtäm. Jaanä jaduhñä tøyhajt hajxy nmøødhájtämbä coo ja'a Dios ja'a hoyhajtä weenhajt hajxy pedyii xmio'owáanäm.

24 Coo ja'a Diosmädia'agy hajxy tøø nmäbøjcäm ja'a Jesucristocøxpä, paady hajxy nnähwaats nguhwáatsäm, paadiä Dios hajxy xmiøødhíjtänä tu'ugjoot tu'ugwiinmahñdy. Y paady hajxy nja wi'i jìøbhíxäm coo yhabáadät coo ja'a Dios hajxy xmio'owáanäm ja'a hoyhajtä weenhajt cøxiä. Cahnä yhabaady, paady hajxy nja wi'i jìøbhíxämnä. Coo häxøpy tøø yhabaatnä, cab hajxy häxøpy njøbhíxänä.

25 Coo hajxy hamuumdu'joot nmäbøjcäm coo ja'a Dios hajxy tøyhajt xmio'owáanäm tijaty hajxy xyajmädsøjcäm, paady hajxy tsøc mee'xtújcäm mäduhñtiä hajxy yaa njaac jøbhíxäm, hoy hajxy nej nja jajt nja habéjtäm.

26 Y xpiuhbéjtämä Dioshespíritu hajxy nebiaty hajxy hamdsoo nga'a jadáanäm. Hix, coo ja'a Dios hajxy naxy nja wi'i pia'ya'axáanäm, cab hajxy naxy nnajuøøyyäm tijatiä Dios hajxy nmäyujwáanämb, waambatiä Dios hajxy nmänuu'xtáacämät. Naxy hajxy jaduhñ njájtäm coo ja'a capxy ja'a mädia'agy hajxy hoy xquia'a habädsømáanäm. Nä'a møcxéjjäm nä'a ho'ogyxiéjjäm hajxy jaduhñ. Pero coo hajxy nga'a najuøøyyämät nebiä Dios hajxy nmänuu'xtáacämät, mänitä Dioshespíritu hajxy xpiuhbéjtämät.

27 Piuhbejpiä Dioshespíritu pønjatiä Diosmädia'agy tøø miäbøcy. Hoorä, ñajuøøbiä Dioshespíritu jaduhñ waambatiä Dios jioot chocy coo ja'a Dios hajxy nmänuu'xtáacämät. Jaduhñä Dioshespíritu hajxy xyajxiic xyajmädiäacäm ja'a ngopcootyhájtäm. Y ñajuøøbiä Dios jaduhñ waambaty hajxy nxiic nmädiäacäm ja'a ngopcootyhájtäm.

28 Hoorä, cab hajxy njootmayhájtämät coo Dios ja'a tsaachpä peenä hajxy xmiøøyyämät. Haa ca'a, nnajuøøyyäm hajxy jaduhñ coo Dios quiøxy najuøøy nebiaty hajxy njajt nhabéjtäm, pønjatiä Dios tsojp. Nnajuøøyyäm hajxy jaduhñ coo Dios wyiinmay coo hajxy ween xyhoyøøyyäm cøxiä wiinä. Tøø hajxy xyajnähdíjjäm coo hajxy njäya'ayhájtämät nebiä jioot choquiän. Jaanä jaduhñ hajxy xyhawáanämbä cooc hajxy xyhuunghadáanäm.

29 Hix, jéquiänä Dios yhuuc najuøøbiä pønjatiä miädia'agy hñajty mäbøgáanäxäp. Je'ehajxy jaduhñ yajnähdiijä coo hajxy yhojiäya'ayhádät nebiä Jesucristo yhojiäya'ayhatiän, ja'a Dios yHuung. Jaduhñä Dios hajxy nägøxiä xyhixáanänä nebiä Jesucristo yhuchän. Højts jaduhñ xñänøømäm

coo Jesucristo hajxy nbuhya'ayhadáanäm, je'eguiøxpä coo Dios hajxy xyhuunghájtäm.

³⁰ Coo Dios hajxy jecy xyajnáhdíjjäm coo miädia'agy hajxy nmäbójcämät, paady hajxy tøø xyhawáanäm cooc hajxy xyhuunghadáanäm. Y coo miädia'agy hajxy jaduhñ tøø njaančh mähbójcäm, mänit hajxy xpiädáacäm hawa'adstuum. Jaduhñ tøø miänaambä coogä cuhdujt hajxy nmøødhadáanäm nebiä Jesucristo miøødän.

³¹ Homiädoonä hädaa mädia'agy, túhmäts. Coo Dios hajxy jecy xyajnáhdíjjäm coo hajxy xyhuunghájtäm, ni pøn jaduhñ xquia'a yajtu'udägooyämät. Tøyhajt jaduhñ coo Dios yajtøjiada'añ tijaty tøø wyiinmay ja'a højtscøxphájtäm.

³² Xjiaančh tehñ chójcämä Dios jaduhñ. Høxtä ñähdujc ja'a yhamdsoo Uung coo hajxy hoy xñähho'túutäm nägøxiä. Jaančh tehñ miøjjä Dios mayhajt jaduhñ tiuunñ ja'a højtscøxphájtäm. Jaduhñä tøyhajt hajxy nmøødhájtäm coo ja'a mayhajt jaduhñ tehngajnä jiaac tuna'añ.

³³ Coo Dios hajxy tøø xyajnáhdíjjäm coo miädia'agy hajxy nmäbójcämät, paady hajxy pøn hoy xquia'a näxø'øwø'øwáanäm maa Dioswiinduumän. Haa ca'a, tøø Dios hajxy xpiädáacäm hawa'adstuum.

³⁴ Ni pøn hajxy jaduhñ hoy xquia'a päda'agáanäm haxøøgtuum. Haa ca'a, jimä Jesucristo hajxy xñähgapxtúutäm Dioswiinduum. Ja'a Dios yha-hooyhaambiä Jesucristo yhäña'ay. Møj jaančh jim yhity. Paady hajxy jim xñähgapxtúutäm, coo hajxy hoy tøø xñähho'túutäm, møød coo hoy tøø jiuypiojtägach. Jaduhñ hajxy tøø xyajnáhwaats tøø xyajcuhwáatsäm.

³⁵ Xjiaančh tehñ chójcämä Jesucristo hajxy jaduhñ nägø'ø nädecypiä. Nnä'ägädä møødhájtämä tøyhajt hajxy jaduhñ coo hajxy mänaa xquia'a nähgue'egáanäm, hoyyä tsaachpä peenä hajxy cu nja páatäm, hoy hajxy pøn cu xjia tsaačhtiüunäm ja'a Diosmädia'agyquiøxpä, hoyyä yuu hajxy cu xjia páatäm, hoyyä wit tucxy hajxy cu nja yajmaajiájtäm, hoy hajxy mähahñdium cu nja wädíjtäm, hoyyä cahwiindøyhäna'c hajxy cu xjia yaghó'cäm.

³⁶ Jaduhñ jim myiñ cujaay maa Diosmädia'aguiän:

Xøømdsuhñ højtsä cahwiindøyhäna'c xjia wi'i yagho'oga'añ ja'a miičh mmädia'agyquiøxpä;

ho'cøøc højts xñä'ägädä wa'ana'añ,
nømä Dios ñämaayyä.

³⁷ Hoy hajxy jaduhñ cu nja jajt, hoy hajxy jaduhñ cu nja habéjtäm, nnä'ägädä mee'xtugáanäm hajxy jaduhñ. Ja'a Jesucristo hajxy jaduhñ xñä'ägädä puhbéjtäm, je'eguiøxpä coo hajxy xjiaančh tehñ chójcäm. Naamgahnä hajxy tii xjiájtäm xyhabéjtäm, jaduhñä Jesucristo hajxy maas hoy nbanøcxämät hamuumdu'joot.

³⁸⁻³⁹ Coo Dios hajxy xjiaančh tehñ chójcäm, jaduhñä tøyhajt hajxy njaančh tehñ miøødhájtäm coo Jesucristo hajxy tehngajnä xñä'ägädä puhbedáanäm, hoy ñejiä hajxy cu nja jajt cu nja habéjtäm, hoy yhädaa yaabä naaxwiinä, hoy hajxy cu nja hó'cäm, hoy hajxy cu nja tägóoyyäm, hoy hajxy cu nja jaac jugyhájtäm, hoy hajxy cu nja jaac tsuxc-hájtäm, hoyyä møjcuhdujtmøødpädøjc hajxy cu xjia mädsiphájtäm, ja'a pojhajpä täxa'ahajpä, hoyyä møjcu'ugong hajxy cu xjia mädsiphájtäm, hoy miaajä hajxy jia hity, hoy yhädaa yaabä naaxwiinä, hoy jyim tsajpootypä, hoy jyiiby møjcu'uhaamä. Pero cabä cuhdujt hajxy ñä'ägädä møødä maa Jesucristocøxpän, ja'a hajxy nWi-indsønähájtämbä. Paadiä Jesucristo hajxy homiänaajä xchójcäm; paady hajxy homiänaajä xcwieendähájtäm.

9

1-3 Jaančh tehñ jiootmayhájpöchä judíoscøxpähajxy je'eguiøxpä coo hajxy quia'a mǎbøga'añ coo ja'a Jesucristo hajxy tøø ñähho'tu'udyii. Høøch nmägunaaxhajxy je'e. Jaančh tehñ chaačhøøbiøch njoot jaduhñ coo hajxy quia'a mǎbøga'añ. Tøyhøch jaduhñ nmǎdia'agy. Coochä Jesucristo nmøødhity tu'ugjoot tu'ugwiinmahñdy, jaduhñä tøyhajt hajxy mmøødhádät cooch nga'a høhñda'agy. Ja'a nhamdsoo juøhñdyháamhøch jaduhñ nnajuø'øyy cooch nga'a høhñda'agy, møød coo Dioshespíritu jaduhñ miánaambä. Jaančh tehñ chaačhøøbiøch njoot jaduhñ coochä nmägunaaxhajxy quia'a mǎbøga'añ; høxtä cu nja nǎhhädaactu'udáanhøch hajxy jiiby haxøøgtuum coo Dios jaduhñ cu miánaañ. Jadúhñhøch nmána'ana'añ coochä Jesucristo cu xquia'a yajñähwaach, pero coochä nmägunaaxhajxy cu yajñähwaatsä. Hoorä, ja'a Israel, højts nhap ndeedy hijty je'e jegyhajty.

4 Jéquiänä Dios ja'a Israel miøødyajcuhdujcy coo Israel yhap yhoc-hajxy hñajty piuhbedaanäxä. Jaančh huunghajtä hajxy je'eduhñ ja'a Diósäm. Je'eduhñ ñänøømby coo hajxy jaduhñ quiu'ughajtä ja'a Diósäm. Yhijx hajxy jaduhñ coo Dios ja'a miäjaa yajcähxø'cy jim mǎdøyyä maa Diostøjcän. Jaduhñ hñajty quiähxø'øgy nebiä jocän. Mänitä Dios hajxy yhanehmä madiu'u. Mänitä Moisés quiujahy nebiatiä Dios hñajty tøø yhane'emiän. Mänitä Dios cuhdujt yeycy nebiatiä Dios hajxy jaduhñ jim wyiingudsähgø'øwät. Mänitä Dios tøyhajt yeycy coo ja'a yajñähwaatspä hajxy hñajty yajñäguexa'añii. Cooch jaduhñ nnänømy coo hajxy yhaphaty yhoc-hadyii ja'a Israel, højts jaduhñ niñänøømäp, højts judíoshajxy.

5 Højtsä jecyjiäya'ay nhaphajt ndeedyhajt, ja'a Abraham møødä Isaac møødä Jacobo. Cumaayyä ja'a jecyjiäya'ayhajxy jaduhñ ja'a Diósäm. Y coo Cristo yaa hoy jiäya'ayhaty hädaa yaabä naaxwiin neby højtshájtäm, jaanä jaduhñ je'e yhaphájtäbä yhoc-hájtäbä ja'a Israel. Dioshajpä Cristo. Cøxiä wiinä je'eduhñ yhane'emy homiaajä. Tsøc hajxy wiingudsähgøøyyäm homiánaaxøøjä coo miøjjä coo jiaančh. Tøyhajt jaduhñ.

6 Cooch nmána'añ coochä nmägunaaxhajxy quia'a mǎbøga'añ coo Jesucristo hajxy tøø xñähho'túutäm, cábøch jaduhñ nmána'ana'añ cooc tyijy ja'a Dios ja'a miǎdia'agy tøø quia'a yajtøjiaty coo jecy miánaañ coogä Israel yhap yhoc-hajxy hñajty yajñähwa'adsa'añii. Hix, coo Dios ja'a Israel jecy ñämaayy coo yhap yhoc-hajxy hñajty yajñähwa'ads yajcuhwa'adsaanäxä, cabä Dios hñajty miána'ana'añ cooc tyijy hajxy hñajty nägøxiä ñähwa'ads quiuhwa'adsa'añ. Jue'e hñajty ñänøømby pønjaty mǎbøjp coo Dios yajtøjiaty waambaty tøø quiapxy tøø miǎdia'agy. Hix, cabä Israel yhap yhoc-hajxy nämay miäbøcy coo hajxy tøø ñähho'tu'udyii ja'a Jesucristäm. Pønjaty jaduhñ mǎbøjp, je'eds hajxy jaduhñ tøyhajt haphájtäp hoc-hájtäp ja'a Israel. Pønjaty jaduhñ ca'a mǎbøjp, cab hajxy tøyhajt yhaphaty yhoc-hadyii ja'a Israéläm.

7 Jaanä jaduhñä Abraham ja'a yhuunghajxy je'ebä. Tu'uquiä jaduhñ ñänøømä ja'a Diósäm coo hoyhajt weenhajt hñajty mio'owáanäbä nebiä Abraham hñajty mio'owa'añii. Ja'a Abraham ja'a yhuung tu'ugpä, cab je'e jaduhñ ñänøømä coo tii mio'owa'añii. Jaduhñ jim myiñ cujaay maa Diosmǎdia'aguiän: "Ja'a miich mhuung Isaac, je'e yhap yhoc-høch jaduhñ nhixáanäp nej miich mhaph nej miich mhocän", nømä Dios ja'a Abraham jecy ñämaayy.

8 Jaduhñä tøyhajt hajxy nmøødhájtäm coo Isaac yhap yhoc-hajxy quiu'ughájtäxä ja'a Diósäm. Paadiä Isaac yhap yhoc-hajxy jaduhñ quiu'ughájtäxä ja'a Diósäm coo Abraham jecy yhawaanä coo tio'oxiøjc hñajty yhuungpaada'añ. Coo ja'a Abraham jaduhñ yhawáanäxä, tøø ja'a

Sara hānajty miājay, y cabā yhuung hānajty ni tu'ugtā.

⁹ Hix, cahnā Sara hānajty yhuungpaadyñā, tōyyāmā Dios ja'a Abraham hānajty jaduhñ ñāma'ay: “Coo jaduhñ yhabáadāt, mānit miich mhixa'añ coochā nmādia'agy nyajtōjiada'añ. Co'na'awaambā mdo'oxiōjc Sara. Ya'ayhāna'c jaduhñ minaañb ca'awaamb”, nōmā Dios ja'a Abraham jecy ñāmāguiumbā. Ja'a Isaac jaduhñ nānōmā coo hānajty myina'añ quia'awa'añ.

¹⁰ Jaanā jaduhñā Rebécabā, ja'a Isaac tio'oxiōjc, coo je'e quio'naabiā, mānitā pigāna'c-hajxy myiñguiahy tāhoocmechpā.

¹¹⁻¹² Cahnā Rebeca hānajty quio'na'ayñā, tōyyām hānajty ñāma'ayii ja'a Diósām coo ja'a Jacobo ja'a Esaú hānajty yhane'ema'añ, hoyyā Esaú jayōjp jia mejch, hoyyā Jacobo jia jaac tehñ miejch hōxhaam. Paadiā Dios jaduhñ miānaañ, tōyyām hānajty wyiinmahñdyhaty coo Jacobo yhap yhoc-hajxy hānajty quiu'ughadāñāxā ja'a Diósām, mōød coo Esaú yhap yhoc-hajxy hānajty jaduhñ quia'a cu'ughadāñāxā, hoy hānajty quia'a jagā cāhxō'ōgyñā pō hoyhāna'c-hadaambā Rebeca yhuunghajxy hānajty, pō caj. Hix, hamd-soojootā Dios jaduhñ wyiinmahñdyhajty nebiā Jacobo hānajty yhixa'añ, nebiā Esaú hānajty yhixa'añ.

¹³ Jaduhñ jim myiimbā cujaay maa Diosmādia'aguiān: “Ndsōjc-hōchā Jacobo mōødā yhap mōødā yhoc-hajxy, pāadyhōch hajxy nnāxuudsa'añ. Pero ja'a Jacobo yhajch, ja'a Esaú, cābōch je'e nnāxuudsa'añ. Ni cābōchā yhap yhoc-hajxy jaduhñ nnāxuudsāñābā”, nōmā Dios cujecy miānaañ.

¹⁴ Pero cab hajxy hawiinmats waamb nmānāñāmāt cooc tyijy Dios hoy quia'a wiinmahñdyhajty coo miānaañ coogā Jacobo yhap yhoc-hajxy hānajty piuhbedāñāxā, mōød coogā Esaú yhap yhoc-hajxy hānajty quia'a puhbedāñāxā. Caj pues. Haa ca'a, hoyyā Dios jaduhñ wyiinmahñdyhaty homiānaaxōjā.

¹⁵ Hix, jaduhñā Dios ja'a Moisés jecy ñāmaayy: “Nnāxúu'chpōch nba'hāyōobiōch pōnjātyhōch njoot chojpy cooch jaduhñ nnāxúudsāt, cooch jaduhñ nba'hāyōwāt. Cābōch nnāxuudsa'añ pōnhōch njoot quia'a tsojpy cooch nnāxúudsāt.”

¹⁶ Coo Dios jaduhñ miānāxuuch, jaduhñ hajxy nyajnajuōyyām coo hojioot jiaanč tehñ miōødā. Hamdsoo ñāgapxy pōñ ñāxuudsaamby. Hamdsoojoot jaduhñ miānāxuuch, caj jie'eguiōxpā coo hajxy cu nja nāmāyyām coo hajxy ween xñāxúu'tsām, coo hajxy ween xpia'hāyōowām. Ni quia'a je'eguiōxpā coo njoot hajxy nbādācām coo hajxy hoy njāya'ayhājāmāt.

¹⁷⁻¹⁸ Hix, ñāxuu'chpā Dios pōñ ñāxuudsaamby. Jaanā jaduhñduhmbā, yajñādhijpiā Dios coo quiopc-hajxy xiéxāt pōñā Dios jaduhñ yajmādsōjpy coo quiopc-hajxy jaduhñ xiéxāt. Jaduhñā Dios ja'a gobiernā ja'a quiopc jecy yajxejxā, ja'a hānajty jim hanehmbā Egiptonaaxooty. Tōyhajt jaduhñ. Haa ca'a, jaduhñ jim myiñ cujaay maa Diosmādia'aguiān coo Dios ja'a gobiernā jaduhñ ñāmaayy: “Pāadyhōch miich tōō nyajmōjtāgō'oy, tōōch hānajty nwiinmay coochā nmājaa hānajty nyajcāhxō'ōga'añ maa mijts mnaax maa mijts mgajptān. Cooch ngu'ug jim nhōxwoobādsōmāt maa mijts mnaax maa mijts mgajptān, jaduhñhōch nmājaa njaanč tehñ yajcāhxō'ōga'añ. Jaduhñā mādia'agy wiādita'añ wiinduhmyhagajpt ja'a hōōchcōxpā cooch njaanč tehñ miōjā cooch njaanč tehñ jiaančā”, nōmā gobiernā jecy ñāmaayyā.

¹⁹ Jii hāna'c-hajxiāda'a naje'e miāna'ana'añ: “Cabā Dios wyiinmahñdy yhooyā je'eguiōxpā coo hajxy xñāxō'ōwōōyyām cooc hōjts pojpy cādieey nmōōdhājām. Haa ca'a, hamdsoo hōjts ngopc tōō xyajxéjxām. Paady hōjts pojpy cādieey nmōōdhājām.”

20 Pero cab jaduhñ yhahixø'øy coo pøn jaduhñ miäná'anät. Tøyhajt jaduhñ. Caj pues. Haa ca'a, yaa hajxy njäya'ayhájtäm. Cabä cuhdujt hajxy nnä'ägädä møødhájtäm ni weeñtiä coo Dios hajxy nhadsóowämät. Hix, jaduhñ mäwínäts højts Dios xyajnáhdíjjäm nebiä tu'tspojtspädøjc-hajxy piochän nebiä jioot hajxy yajmädsoquiän. Co tu'ts quiapxø'øgät, cabä pojtspä hawiinmats ñámá'awät: "Tiičh yajxón coo xquia'a pojch." Caj pues, cab jaduhñ yhahixø'øy coo tu'ts jaduhñ miäná'anät.

21 Haa ca'a, miøødä tu'tspojtspädøjc cuhdujt hajxy jaduhñ coo tu'tsnaax hajxy yajtúnät nebiä jioot hajxy yajmädsoquiän. Pø chojpiä jioothajxy jaduhñ coo tsowdu'ts hajxy piódsät, pues miøødä cuhdujt hajxy jaduhñ coo hajxy jaduhñ piódsät. Y pø chojpiä jioothajxy jaduhñ coo cuhga'aybä hajxy piódsät, jaduhñ cuhdujt hajxy miøødäbä coo hajxy jaduhñ piódsät. Jaduhñ mäwínädsä Dios cuhdujt miøødäbä coo hajxy xyajnáhdíjjämät nebiä jioot choquiän. Co jioot jaduhñ chógät coo hajxy xpiädáacämät hawa'adstuum, pues miøødä cuhdujt jaduhñ coo hajxy jim xpiädáacämät. Y coo jioot jaduhñ chógät coo hajxy xpiädáacämät haxøøgtuum, jaduhñ cuhdujt miøødäbä coo hajxy jaduhñ jim xpiädáacämät.

22 Y jaanä jaduhñä Dios cuhdujt miøødäbä coo jaduhñ miee'xtujcy ja'a cahwiindøjiäya'aguixpä. Miøødä Dios cuhdujt jaduhñ coo ja'a cahwiindøjiäya'ayhajxy yajcumädowøøjät. Pero cab hajxy choj cumädowa'añ, hoy hajxy tøø jia cädieey hanaxiä. Hawiinmats hit jaduhñ coo hajxy paquiä quiumädówät. Y coo Dios hñajty yajcumädowa'añ ja'a quiädieeguiøxpähajxy, hijxtahñdä Dios jaduhñ yajcähxø'øgaamby coo mäjaa møc miøødä. Jaduhñ yajcähxø'øgaambä coo haxøøghäna'c-hajxy tehngajnä quia'a mee'xtuga'añii.

23-24 Co Dios jaduhñ jecy wyiinmahñdyhajty coo haxøøghäna'c yajcumädowa'añ, paady jaduhñ wyiinmahñdyhajty neby højts jaduhñ hoy nwiinjuøøyyämät coo jaduhñ yhawiinmatsä coo haxøøghäna'cä quiädieey hajxy quiumädówät. Jaanä jaduhñduhmbä, paadiä Dios jäya'ay näje'e quia'a yajcumädoy, je'eguiøxpä coo hajxy ñäxuüchii ja'a Diósäm, hoy hajxy hñajty tøø jia cädieey. Jequiän hajxy jaduhñ yajnáhdíjjä coo hajxy jim ñöcxät Dioswiinduum. Højts jaduhñ xñänøømäm coo Dios hajxy tøø xyajnáhdíjjäm coo hajxy jim xyajnöcxáañäm wyiinduum, pønjaty hajxy tøø xyajwiinwaanøøyyäm coo hajxy xyhuunghadáañäm, møødä judíosahajxy, møødä cajpä judíosahajxy. Jaduhñ hajxy nwiinjuøøyyäm coo Dios møjmayhajt tøø tiuñ maa højtscøxphájtäm, møød coo hojioot jiaañch tehñ miøødä.

25 Maa Oseas nocy jecy quiujahyyän, jaduhñ jim myiñ cujaay coo Dios jaduhñ miänaañ:

Yø'ø jäya'ayhajxy cajpä judíos, cábøch hijty ngu'ughaty.

Cábøch hijty ndsocy. Pero tøøch nyajnáhdijnä coöch ngu'ughadáañnä.

Ndsójnäbøch jaduhñ.

26 Wiingtuum miänáangumbä: "Cábøch mijts hijty ngu'ughaty."

Pero jaduhñhájtøch mijts nhuunghadaañnä, homiaajä hajxy mhity, nømä Dios miänaañ. Homiänaajä Dios yhity.

27 Y ja'a Isaías, jaduhñ je'e jecy quiujahy: "Yø'ø judíosahajxy, hoy hajxy jaduhñ jia nämayyä nebiä tsäbiu'ujän, näweeñtiä hajxy jaduhñ cho'oga'añ.

28 Ja'a jäya'ayhajxy yaa cädiehbiä hädaa yaabä naaxwiin, mobädajpä hajxy yajcumädowa'añii ja'a Diósäm. Tähooc-yajcumädoybä hajxy yajcumädowa'añii hoyhoy."

29 Jaanä jaduhñä Isaías jecy miädiáaccumbä ja'a judíosøxpähajxy:

Cøxiä wiinä Dios yhane'emy homiaajä. Co højtsä Dios häxøpy tøø xquia'a näxúu'tsäm,

tøø hõjts häxøpy ngøxy cuhdägoöyyäm, nebiä jäya'ayhajxy jecy quiuhdägoöyyän,

ja'a hajxy hijty jegyhajty tsänaabiä maa cajpt hijty xiøhatiän Sodoma mөөd Gomorra.

³⁰ Nébiøch cham tøø ngujaayän, jequiän hõjtsä Dios xyajnähdijy coo hõjts hänajty xquiu'ughada'añ, hõjts judíoshajpä. Pero, ja'a jäya'ayhajxy cajpä judíos, cabä Dios hijty je'e ñäxuuch. Ni ja'a jäya'ayhajxy hijty quia'a näxúu'tsäbä, ja'a hajxy hänajty ca'a tajp ca'a maabiä maa ñähwaatstaact hajxy piáadät. Pero cahnä jiegø'øy coo mädia'agy hajxy tøø miädoonä coogä Dios ja'a Jesucristo yaa quiejxy, cooc ja'a Jesucristo hajxy hoy xñähho'túutäm. Cooc hajxy jaduhñ miädooy, näje'e hajxy miäbøjcy; paady hajxy tøø ñähwa'açh, paady hajxy tøø quiuhwa'açh.

³¹⁻³² Pero yø'ø judíoshajxy, jadúhñäc tyijy hajxy hijty ñähwa'adsa'añ je'eguiøxpä cooc tyijy hajxy hoy quiudiuñ nebiä Moisés jecy quiujahyyän. Pero cab hajxy jaduhñ ñä'ä nähwaach je'eguiøxpä coo tøyhajt hajxy quia'a mөөdä coo Dios miäyajnähwa'açh je'eguiøxpä coo hojioot miөөdä, ca'a jie'eguiøxpä coo jäya'ayhajxy hoy jia wi'i jiäya'ayhada'añ. Paadiä judíoshajxy quia'a nähwaach je'eguiøxpä coo hajxy quia'a mäbøjcy coo hõjtsä Jesucristo xñähho'túutäm. Jaduhñ mäwiin hajxy jiaty nebiä häna'c quiuhnepiän tsaanähgøxp päyø'cujc. Cab hajxy ñä'ägä mech maa hajxy hänajty jia wi'i ñøcxa'añän.

³³ Tøøyyämä Dios hänajty ñajuø'øy coo judíoshajxy hänajty quia'a mäbøga'añ coo Dios ja'a Jesucristo yaa quiejxy hädaa yaabä naaxwiin. Jimä cajpt tu'ug xiøhaty Sión. Jimä judíoshajxy chäna'ay, ja'a Dios quiu'ughajpiä. Jaduhñ jim myiñ cujaay maa Diosmädia'aguiän:

Jímhøch ngu'ug chäna'ay maa cajpt jaduhñ xiøhatiän Sión.

Jímhøchä tsaa tu'ug nbäda'aga'añ, weenä jäya'ayhajxy jim quiuhnepy maa tsaajän, ween hajxy jim quiäday.

Ja'a Jesucristo jaduhñ mäbaat neby yø'ø tsaajän. Hix, pøn jaduhñ ca'a mäbøjp coo hõjtsä Jesucristo hoy xñähho'túutäm, jaduhñ je'e miäbaady nebiä häna'c cuhnejpän. Quiumädowaamby je'e. Pero pøn jaduhñ jaançh mäbøjp ja'a Jesucristocøxpä, je'eds hodium päda'agáanäp.

10

¹ Mägu'ughajpædøjc, jia tsøjpiøch njoot jaduhñ coo judíoshajxy ñähwá'adsät. Jadúhñhøchä Dios nja pa'ya'axy jaaya'aguiøxpä. Haa ca'a, judíohájpxøch høøchpä.

² Jia wi'i quiudiunaambiä Diosmädia'agy hajxy. Tøyhajt jaduhñ. Pero cabä Diosmädia'agy hajxy hoy wyiinjuø'øy.

³ Hamdsoo hajxy jia wi'i yajniñähwa'adsa'añii yhamdsoo cuhdujtcøxpä. Hix, cab hajxy jaduhñ wyiinjuø'øy tiiguiøxpä Dios ja'a jäya'ay piäda'agy hawa'adstuum. Paady hajxy jim piäda'agyii coo Dios ja'a miädia'agy hajxy miäbøjcä coo hajxy jaduhñ ñähwa'adsa'añii.

⁴ Pønjaty mäbøjp coo hajxy tøø ñähho'tu'udyii ja'a Jesucristäm, je'edsä Dios ñäxuu'chp. Cooc Jesucristo hajxy cu xquia'a nähho'túutäm, ngumädowaanäm hajxy hijty, je'eguiøxpä coo jecymiädia'agy hajxy tøø nga'a cudiúunäm, ja'a Moisés jecy quiujahyyäbä. Ja'a Jesucristo mäbøcypä, ca'xiä jecymiädia'agy quiudiuñ, ja'a Moisés jecy quiujahyyäbä, nebiä Dios hänajty tøø yhane'emiän. Jaançh tehñ yhooyä Jesucristo jaduhñ yhäna'c-hajty. Cabä pojpä cädieey hänajty ñä'ägädä mөөdä ni weentiä. Paady hijty jaduhñ quia'a hahixø'øy coo jaduhñ cu yho'cy. Pero coo ja'a Jesucristo hajxy hoy

xñähhö'túutäm, paady yø'ø jecymiädia'agy hajxy jaduhñ xquia'a hanéhmänä, ja'a Moisés jecy quiujáhyyäbä.

⁵ Jaduhñä Moisés jecy quiujahy coo judíoshajxy pedyii quiudiúnät nebiaty hánajty tøø quiujaay. Jaduhñägä hoyhajtä weenhajt hajxy piáadät.

⁶ Coo hajxy nmäbójcämät maa Jesucristocøxpän, jaduhñä hoyhajtä weenhajt hajxy nbáatämät. Ja'a Diosmädia'agy jaduhñ mänaamb. Pero cab hajxy ndaj nmáayyämät: “Pøñ jim nøcxäp tsajpootyp coo yajnáhwaatspä wioománacät.”

⁷ Ni jaduhñ hajxy nga'a taj nga'a máayyämät: “Pøñ jiiby hädá'agäp møjcu'uhaam coo ja'a yajnáhwaatspä wioobédät, jiiby maa ho'ogyjiäya'ay yháañämähajxy yhitiän.” Paady hajxy jaduhñ nga'a taj nga'a máayyämät je'eguiøxpä coo Jesucristo yaa tøø yhoonä hädaa yaabä naaxwiin, coo hajxy hoy tøø xñähhö'túutänä, møød coo jadähooc jiuypiojtägajch. Hix, jaduhñ hajxy tøø xyajnáhwaats tøø xyajcuhwáatsäm.

⁸ Nägooyä hajxy jaduhñ nmäbójcämät coo Jesucristo hajxy tøø xñähhö'túutäm, jaduhñ hajxy nnähwáatsämät. Cab hajxy jaduhñ pøñ xñámáayyämät coo nähwaatstaact hajxy wiingtuum nhøxtáayyämät. Cab hädaa mädia'agy jaduhñ ñä'ägä tsipä. Howyiinjuøñä hädaa mädia'agy jaduhñ. Jaduhñ højts nnä'ägä yajnáhixø'øyhaty.

⁹ Coo hajxy mejtstu'u ngudiúunämät, mänit hajxy nnähwáatsämät. Je'eçh jaduhñ nnänøømby mejtstu'u, coo hajxy nnägápxämät cu'ughagujc coo Jesucristo hajxy nWiindsønähjtäm, møød coo hajxy nmäbójcämät hamuumdu'joot coo Dios ja'a Jesucristo yagjuypiojtägajch mänaabä hánajty tøø yho'oguiän. Coo Dios ja'a Jesucristo jaduhñ yagjuypiojtägajch, jaduhñ hajxy nnajuøøyyäm coo Dios ja'a Jesucristo quiumay, møød pønjaty ja'a Diosmädia'agy mabøjp ja'a Jesucristocøxpä.

¹⁰ Coo hajxy jaduhñ nnä'ägä mabójcämät hamuumdu'joot, jaduhñä Dios hajxy xquiumáayyämät. Y coo Jesucristo hajxy nmädiáacämät cu'ughagujc coo hajxy nWiindsønähjtäm, mänit hajxy nnähwáatsämät.

¹¹ Jaduhñä Diosmädia'agy miäna'añ: “Pøñ jaduhñ jaançh mabøjp ja'a Jesucristocøxpä, je'eds jaduhñ päda'agáañäp hodium ja'a Diósäm.”

¹² Hix, tu'cuhdujt højtsä Jesucristo xyhíxäm, møødä judíoshajxy, møødä ca'a judíoshajxypä. Tu'cuhdujt højtsä Jesucristo jaduhñ xyhuunghajtäm. Coo højtsä Jesucristo nba'yáaxämät coo nbojpä ngädieey hajxy xyajnáhwaatsämät, tsipcøxp højts jaduhñ xñäxúu'tsämät, tsipcøxpä mayhajt jaduhñ tiúnät maa højtsøxpähajtäm.

¹³ Jaduhñä Diosmädia'agy miänáangumbä: “Pøñä Jesucristo pa'yaaxp, hodium je'eduhñ piäda'aga'añii ja'a Diósäm.”

¹⁴ Pønjaty ca'a mädoobnä ja'a Jesucristocøxpä, cabä Jesucristo hajxy jaduhñ hoy miänuu'xta'aga'añ. Tøyhajt jaduhñ. Pø cahnä hajxy jaduhñ miädoyhaty coogä Jesucristo hajxy tøø xñähhö'túutäm, cab hajxy hoy miäbøga'añ. Pø cahnä hajxy yajwiingapxø'øyii ja'a Jesucristocøxpä, cab hajxy hoy miädowa'añ.

¹⁵ Ja'a Diósädsä cugapxy quejx coo ja'a miädia'agy yajwá'xäxät maa jäya'ayhajxiän, ja'a cahnä hajxy hánajty miädoybä. Jaduhñ jim myiñ cujaay maa Diosmädia'aguiän: “Pønhatiä Diosmädia'agy tøø miädoy coogä Dios yajnáhwa'açh pønhatiä Dios pa'yaaxp, paady hajxy xioonäda'agy coo hajxy jaduhñ tøø miädoonä. Jaançh tehñ yhoy jaduhñ coo Diosmädia'agy jaduhñ wia'xy.”

¹⁶ Pero cabä jäya'ayä Diosmädia'agy hajxy nägøxiä tøø miäbøcy ja'a Jesucristocøxpä. Jaduhñä Isaías jecy quiujahy: “Dios, tøø miich mmädia'agy nja

yajwa'xä, pero cab pøn tøø miäbøcy."

¹⁷ Mayhagajptä Diosmädia'agy tøø wia'xy ja'a Jesucristocøxpä. Tøø jäya'ayhajxy may miädoonä. Näje'e hajxy hoy tøø wyiinjuø'øy. Je'eds hajxy jaduhñ tøø miäbøcy. Coø hajxy quia'a mädówät, cab hajxy jaduhñ miäbógät.

¹⁸ Hoorä, ja'a judíos hajxy, tøyhajt jaduhñ coø hajxy je'e miädóyyäbä. Haa ca'a, jaduhñ jim myiñ cujaay maa Diosmädiá'aguiänä: "Wiinduhmyhagajptä mädia'agy tøø wia'xy ja'a Dioscøxpä."

¹⁹ Y jia wiinjuøøyy ja'a judíos ja'a mädia'agy hajxy jaduhñ ja'a Jesucristocøxpä. Pero cab hajxy miäbøjc. Ja'a jäya'ayhajxy ca'a judíospä, je'eds hajxy jaduhñ mabøjc. Jaduhñä Moisés jecy quiujahy coogä judíos hajxy ñämaayyä ja'a Diósäm:

Mbejxyp mijts pønjaty ca'a judíos hajpä cóogøch tyijy nga'a cu'ughaty.

Pero ngu'ughadáambiøch hajxy je'e. Jaduhñ mijts mnänømy cooc tyijy hajxy tii quia'a jaty quia'a najuø'øy.

Pero nnäxuudsáambiøch hajxy je'e, paady mijts mjootma'ada'añ, nømä judíos hajxy jecy ñämaayyä.

²⁰ Mänitä Isaías høxhaam jiaac cujahy coogä Dios miänaañ:

Pønhatiä nähwaatstaact hijty ca'a høxtaaby, tøøchä nmädia'agy hajxy xmiäbøjcänä.

Cábøch hajxy hijty xyajtøy, pero tøøch hajxy nyajwiinjuøøñä coøch hojioot njaanç tehñ miøødä.

²¹ Jaduhñägä Dios miänáangumbä: "Yø'ø judíos hajxy, tøøch hajxy jaduhñ nja wi'i miänuu'xta'agy coøch nmädia'agy hajxy xmiäbøjcät. Pero cab hajxy jaduhñ ñä'ägä mabøga'añ. Jaanç tehñ xiexä quiopcä tiaatsc-hajxy jaduhñ", nømä Dios jecy miänaañ.

11

¹ Pero cábøch nmäna'ana'añ coø judíos hajxy tøø ñajtshixø'øyii ja'a Diósäm. Caj pues, caj tiähoocnajtshixø'øyyä; paquiä hajxy ñajtshixø'øyyä. Haa ca'a, judíoshájpøch høøchpä. Abrahámhøch nhaphajt ndeedyhajt. Y ja'a Benjamínhajpä, møød je'eçh nhaphajty ndeedyhajty. Ja'a Abraham yhap yhoc je'ebä, ja'a Benjamínhajpä.

² Cab højtsä Dios tøø xñajtshixø'øy, højts judíos hajpä. Hix, jequiän højtsä Dios xyajnähdiij coø højts hñajty xquiu'ughada'añ. Jaduhñ jim myiñ cujaay maa Diosmädia'aguiän coogä Elías ja'a miägunaax jecy ñäxø'øwøøyy, ja'a judíos hajxy, ja'a Diosmädia'agy hajxy hñajty quia'a mabøgaambiä. Ja'a Elías, jequiän je'e quiuguexyhajtä Diósäm. Pia'yaaxypä Elías ja'a Dios hñajty coø jaduhñ miänäxø'øwøøyy:

³ "Dios, yø'ø judíos hajxy, haxøøg hajxy tøø jiatcø'øy. Tøø miäch mguguexyhajxy xyagho'cä. Tøø tsaamaa'xy hajxy yajma'ady maa animalho'ogy hajxy hijty ño'oguiän coø miäch hajxy hijty xwyiingudsähgø'øy. Nägøxiä jäya'ayhajxy tøø yagho'ogyii, ja'a miäch hajxy hijty xwyiingudsähgøøbiä. Nidiúhmhøch tøø nmähmø'øy jujcy. Høøchpaady hajxy xjia wi'i yagho'ogaambä", nømä Elías ja'a Dios jecy ñämaayy.

⁴ Mänitä Dios yhadsooyy: "Caj tiøyyä coøch miäch nidiuhm xjiaac wiingudsähgø'øyñä. Jé'enøchä jäya'ayhajxy xwyiingudsähgø'øyñä ja'a hajxy nájxutujmilpä. Cabä Baal hajxy wyiingudsähgø'øy. Quepychech je'e ja'a Baalhajpä", nømä Dios jecy miänaañ.

⁵ Ja'a judíos hajxy, jequiän hajxy jaduhñ yajnähdiijä ja'a Diósäm coø hajxy hñajty quiu'ughada'añii. Paady hajxy jaduhñ quiu'ughadyii coø Dios hojioot jiaanç tehñ miøødä. Pero näweeñtiä judíos ja'a Dios miädia'agy hajxy miäbøjcä, caj ñämayyä. Jäda'anäbaadyñä, jiinä judíos ja'a Dios miädia'agy

hajxy näje'e miäbøjcä. Je'enä hajxy quiu'ughadyiinä ja'a Diósäm. Coö hajxy jaduhñ ñäxuüchii, paady hajxy je'enä wioowhidyii, jaduhñä Dios miädia'agy tehñgajñä miäbøjcäxät.

⁶ Jaduhñä judíoshajxy yajñähdijä coö ja'a Dios miädia'agy hajxy miäbøjcät ja'a Jesucristocøxpä. Paady hajxy jaduhñ yajñähdijä je'eguiøxpä coö Dios hojioot miøødä, ca'a jie'eguiøxpä coö hajxy hoy jiäya'ayhaty. Coö jäya'ayhajxy häxøpy ñäxuüchii ja'a Diósäm je'eguiøxpä cooc tyijy hajxy hoy jiäya'ayhaty, cab hajxy jaduhñ cu nmänáanäm coö Dios hojioot miøødä.

⁷ Hix, näje'e judíoshajxy yajñähdijä coö hajxy ñähwá'adsät näweeñtiä. Jaduhñä Dios miädia'agy hajxy miäbøjcä ja'a Jesucristocøxpä. Ja'a judíoshajxy nämaybä, cab hajxy jaduhñ yajñähdijä, hoy hajxy hñajty jaduhñ jia wi'i ñähwa'adsa'añ. Hix, xeix ja'a quiopcä tiaatsc-hajxy jaduhñ. Cabä Dios miädia'agy hajxy miäbøjcä ja'a Jesucristocøxpä.

⁸ Jaduhñ jim myiñ cujaay maa Diosmädia'aguiän: "Tøø quiopcä tiaatsc-hajxy yajxéjxäxä ja'a Diósäm. Jaduhñ hajxy yhity nebiä wiindspän nebiä cuhnatpän høxtä jädä'anäbaadyñä."

⁹ Jaduhñä David jecy quiujahbiä:

Xøødsuu ja'a judíoshajxy naxy yagjajtäp. Jaduhñäc tyijy ja'a Diosmädia'agy hajxy hoy quiudiuñ.

Jaduhñäc tyijy hajxy quiumayii ja'a Diósäm. Pero ween hajxy hoy quiumädox.

Hix, cab hajxy tøyhajt miäbøga'añ.

¹⁰ Ween hajxy jaduhñ jiaty nebiä wiindspän nebiä xoodspän.

Ween hajxy ni mänaa quia'a wiinjuøøy nebiä piojpä quiädieeyhajxy ñähwá'adsät.

Jaduhñä David jecy quiujahy.

¹¹ Hoorä, nämayyä judíoshajxy tøø quia'a mabøcy ja'a Jesucristocøxpä. Pero cab hajxy nägøxiä ñajtshixøøwa'añii ja'a Diósäm. Cab hajxy nägøxiä quiumadowa'añ. Pero jaduhñä Dios wyiinmaayy coö jäya'ayhajxy ween miäbøcy ja'a Jesucristocøxpä, ja'a hajxy ca'a judíospä. Coö ja'a ca'a judíoshajxy ñähwaatsnä, paadiä judíoshajxy näje'e jia mänaambä coö hajxy ween ñähwáatspät.

¹² Coö judíoshajxy quia'a mabøjcy ja'a Jesucristocøxpä, paady hajxy paquiä ñajtshixøøyyä ja'a Diósäm. Pero mänitä Dios wyiinmaayy coö jäya'ayhajxy ween ñähwa'açh wiinduhmyhagajpt, ja'a hajxy cajpä judíos. Paadiä judíos ja'a quiopcä tiaatsc-hajxy yajxéjxäxä ja'a Diósäm. Paadiä hoyhajtä weenhajt hajxy quia'a mooyyä ja'a Diósäm. Cu miooyyä hajxy jaduhñ coö hajxy cu miäbøjcy ja'a Jesucristocøxpä. Pero ja'a jäya'ayhajxy ca'a judíospä, ja'a hajxy jim tsänaabiä wiinduhmyhagajpt, je'edsä hoyhajtä weenhajt mabøcypä mooyyä. Hoorä, habaadaamb jaduhñ coö judíoshajxy miäbøgaambä ja'a Jesucristocøxpä. Mänit hajxy je'e ñähwa'adsaambä. Jaançh tehñ jiootcuyc hajxy jaduhñ yhidáanñäbä. Mänitä jäya'ayä hoyhajtä weenhajt hajxy maas may jiaac mo'owa'añii wiinduhmyhagajpt.

¹³ Mijts jaduhñ ca'a judíoshajpä, mijts nyajwiinmädiaagøøñäp. Dióshøch jaduhñ tøø xwyiinguexy coöchä miädia'agy jim nyajwá'xät maa mijtsän. Xtiunngmóoyhøchä Dios jaduhñ. Nägøø nädécypiochä nduunng jaduhñ nnä'ägä tuñ,

¹⁴ ween mijts nämay mmabøcy ja'a Jesucristocøxpä, ween mijtsä judíos jaduhñ xpiahixy. Coö mijtsä judíos jaduhñ xyhíxät coö mijtsä Dios ja'a hoyhajtä weenhajt tøø xmio'oy, mänitä judíoshajxy miäbøgaambä ja'a Jesucristocøxpä. Høøch nmägunaaxhajxy je'e ja'a judíoshajxy. Ween hajxy jaduhñ ñähwáatspät neby mijts tøø mnähwa'açhän.

¹⁵ Coo judíosahajxy quia'a mabøjcy ja'a Jesucristocøxpä, paady hajxy ñajtshixøøyyä ja'a Diósäm. Paadiä Dios hñajaty tøø wyiinmay coo mijtsä miädia'agy mmabøjcänät, pønjaty jaduhñ ca'a judíospä. Y coo judíosahajxy jaduhñ miabøjpät ja'a Jesucristocøxpä, mänit hajxy quiuhbøgáanägumbä ja'a Diósäm. Mänit hajxy yagjugyhada'añii homiänaajä ja'a Diósäm neby jaaya'ay jiugyhatiän.

¹⁶ Ja'a judíosahajxy, ja'a Abraham hajxy jecy yhaphajt tieedyhajt. Yhaadshajt tyictshajt ja'a Abraham hajxy jaduhñ. Jéquiänä Dios ja'a Abraham quiu'ughajty. Paadiä judíosahajxy jäda'ahaty quiu'ughájtäbä ja'a Diósäm. Jaduhñ mäwiinä Abraham miäbaady nebiä quepytyictsän. Y ja'a judíosahajxy, jaduhñ mäwiin hajxy miäbaatpä nebiä quepyhaa'xän.

¹⁷ Hoorä, nämayyä judíosahajxy tøø quia'a mabøcy ja'a Jesucristocøxpä. Paady hajxy tøø ñajtshixøøyyii ja'a Diósäm. Jaduhñ mäwiin hajxy miäbaady nebiä olivohaa'x tøø piuhdøjjiän. Jaduhñ miädia'agytägøøy coo judíos ja'a hoyhajtä weenhajt hajxy quia'a mo'owáanänä ja'a Diósäm. Y mijts ca'a judíospä, jaduhñ mäwiin hajxy mmäbaatpä nebiä yuuc-holivohaa'xän coo tøø yagjøjheedsøøy maa olivohaa'x tøø piuhdøjjiän. Coo hajxy tøø mmabøjnä, paadiä Dios hajxy xmiooñä ja'a hoyhajtä weenhajt.

¹⁸ Pero caj mijtsä judíos hawiinmats mbéxät. Ca'a hajxy mniguiumayii. Cab hajxy mmäná'anät: "Cabä judíosahajxy quiu'ughájtänä ja'a Diósäm. Højtsä Dios xquiunuu'xy je'eguiøxpä coo Abraham jecy quiunuu'xä møødä yhap møødä yhoc, ja'a judíosahajxy. Coo Dios ja'a Abraham jecy cu quia'a cunuu'xy, ni mijts hijty xquia'a cunuu'xaambä.

¹⁹ Wehñdä pøn miäná'anät: "Yøø judíosahajxy tøø quia'a mabøquiäbä ja'a Jesucristocøxpä, høøhcøxpä hajxy tøø ñajtshixøøyyii ja'a Diósäm. Hix, páadyhøchä Dios xchocy cooch nga'a judíosä. Cabä judíosahajxy chójcänä ja'a Diósäm."

²⁰ Tøyhajt jaduhñ. Paadiä judíosahajxy tøø ñajtshixøøyyii ja'a Diósäm coo hajxy tøø quia'a mabøcy ja'a Jesucristocøxpä. Y mijts, coo hajxy tøø mmabøcy, paady mijtsä Dios tøø xquiunuu'xy. Pero ca'a hajxy mniguiumayii coo Dios hajxy jaduhñ xñä'ä najtshixøøbiät. Hix, caj mijts hijty hoy mjäya'ayhaty. Coo Dios hojiot miøødä, paady hajxy xquiunuu'xy.

²¹ Jaanč tehñ yajcumayaambä judíosahajxy jaduhñ. Paady hajxy jaduhñ ñiguiumayii coo hajxy tøø quia'a mabøcy coo hajxy tsipcøxp ñäxuudsøøjät ja'a Diósäm. Paady hajxy ñajtshixøøyyä ja'a Diósäm, hoyyä Abraham hajxy jecy jia haphajty jia teedyhajty. Jaanä jaduhñ mijtspä, mijts ca'a judíospä, coo mijts jaduhñ mniguiumáayyäbät, mänitä Dios hajxy jaduhñ xñajtshixøøbiät.

²² Hix, jiaanč tehñ quiunuu'xypä Dios ja'a quiu'ug. Pero pønhatiä Dios tøø ñajtshixøøy, je'eds hajxy jaduhñ jaanč tehñ yajcumäadowáanäp ja'a Diósäm. Paady mijtsä Dios xjiaanč tehñ quiunuu'xy, coo hajxy mmabøcy. Pero pø cab hajxy jaduhñ mmabøgaañnä, mänitä Dios hajxy xyajcumäadowaambä.

²³ Hoorä, ja'a judíosahajxy tøø quia'a mabøquiäbä, coo hajxy jaduhñ miabøjpät, mänit hajxy jadähooc quiu'ughájtägumbät ja'a Diósäm. Haa ca'a, miøødä Dios mäjaa jaduhñ coo hajxy jaduhñ quiu'ughájtägumbät.

²⁴ Hix, ja'a judíosahajxy, Abraham hajxy jecy yhaphajt tieedyhajt. Jéquiänä Abrahamhajxy yajnähdiijä ja'a Diósäm coog hajxy jaduhñ quiu'ughadøøjät ja'a Diósäm, møødä Abraham yhap yhoc-hajxy, ja'a judíosahajxy. Tøyhajt jaduhñ, paadiä Abrahamhajxy paquiä hoy quiu'ughadäänägumbä Diósäm. Y mijts, jaanä jaduhñ mijtsä Dios xquiunuu'ughájnäbä, hoy mijts hijty jegyhajty xquia'a cu'ughaty. Paady, ca'a hajxy mmäna'añ cooc tyijy ja'a judíosahajxy

quia'a cu'ughajtägatsa'añii ja'a Diósäm.

²⁵⁻²⁶ Mägu'ughajpädøjc, nébiøch cham nmädia'aga'añän, náamnøchä Dios tøø xñajtsapxøyyä. Cahnä jäya'ay hädaa mädia'agy hajxy nämay miädoyñä. Paady mijts jaduhñ nhawáanäm, jaduhñ hajxy mga'a niguiumayøøjät, hoyyä Dios hajxy tøø xjia cu'ughaty. Tøyhajt jaduhñ coo judíoshajxy nämay tøø quia'a mæbøcy ja'a Jesucristocøxpä. Pero habaadaamb jaduhñ coo hajxy nägøxiä miäbøgaanä. Mänit hajxy jaduhñ miäbøga'añ coo mijts hñajty tøø mmæbøcy, ja'a mijts ca'a judíospä, mäduhñtiä hajxy hñajty mmæbøga'añ. Jaduhñ jim myiñ maa Diosmädia'aguiän:

Mänitä yajnähwaatspä jim choona'añ maa cajpt jaduhñ xiøhatiän Sión, maa judíoshajxy chäna'ayän.

Cøxaambä judíoshajxy jaduhñ miäbøga'añ ja'a yajnähwaatspäcøxpä. Cøxaambä pojpä quiädieeybä hajxy ñähwa'adsa'añ.

²⁷ Cooch hajxy jaduhñ nyajnähwá'adsät, mänit jaduhñ tiøjiada'añ nébiøch hajxy hijty tøø nyajwiinwaanø'øyän mänáajøch hajxy nmøødyajcuhduquiän hawiinjemy, nomä Dios miänaañ.

²⁸ Coo judíoshajxy tøø quia'a mæbøcy ja'a Jesucristocøxpä, paady hajxy tøø ñajtsixø'øyii ja'a Diósäm. Y coo hajxy jaduhñ tøø ñajtsixø'øyii, paady mijtsä Dios tøø xyajnähdiij coo hajxy mmæbøgät ja'a Jesucristocøxpä, mijts ca'a judíospä. Pero, hoyyä judíoshajxy tøø quia'a jagä mæbøcy, tsójcäpnä hajxy jaduhñ ja'a Diósäm je'eguiøxpä coo yhapä tieedyhajxy jecy yajnähdiijäxä ja'a Diósäm coo hajxy quiu'ughadøøjät.

²⁹ Hix, cabä Dios mänaa yhøhnda'agy. Homiänaajä yajtøjiaty waambaty quiapxy miädia'agy. Y coo Dios jaduhñ jecy miänaañ coogä judíoshajxy homiänaajä quiu'ughada'añii, yejcä Dios ja'a tøyhajt jaduhñ. Hix, cabä Dios ja'a miädia'agy mänaa yajtägach. Jaduhñä tøyhajt hajxy nmøødhájtäm coo Dios jiaançh yajtøjiada'añ waambaty tøø miäna'añ ja'a judíoscøxpähajxy.

³⁰ Mijts ja'a ca'a judíospä, cabä Diosmädia'agy hajxy hijty mmädoyyä. Cabä Dios hajxy hijty mwiingudsähgø'øy. Y coo judíoshajxy tøø quia'a mæbøcy ja'a Jesucristocøxpä, paadiä Dios hojioot miøødä ja'a mijtsøxpä.

³¹ Jäda'anäbaadyñä, cabä judíos ja'a Dios miädia'agy jäda'ahaty miäbøgaanä ja'a Jesucristocøxpä. Coo hajxy jaduhñ quia'a mæbøga'añ, paady mijtsä Dios xñäxuu'tsnä, mijts ca'a judíospä. Hoorä, coo mijtsä judíos xyhíxät coo mijtsä Dios xñäxuu'ch, mänit hajxy jaduhñ miäbøgaambä ja'a Jesucristocøxpä. Mänit hajxy ñäxuudsáanäbä ja'a Diósäm.

³² Jéquiänä Dios jäya'ay yhawaanä nägøxiä coo pojpä cädieey hajxy miøødä, møødä judíoshajxy, møødä ca'a judíoshajxypä. Jaduhñ hajxy jecy yhawáanäxä coo hajxy hawiinmats quiumädówät. Hix, paadiä Dios jaduhñ miänaañ, je'eguiøxpä coo jäya'ayhajxy hñajty nägøxiä ñäxuudsa'añii tu'cuhdujt, møødä judíoshajxy, møødä ca'a judíoshajxypä. Coo Dios hajxy häxøpy tøø xquia'a näxúu'tsäm, nägøxiä hajxy hijty ngumädowáanäm.

³³ Jaançh tehñ jiajp, jaançh tehñ ñajuøøbiä Dios. Cab hajxy hoy nnä'ägä wiinjuø'owáanäm nebiatiä Dios wyiinmay. Hix, hojiootä Dios jiaançh tehñ miøød coo hajxy nägøxiä tøø xñäxúu'tsäm, møødä judíoshajxy, møød cajpä judíoshajxy. Nägøxiä ja'a hoyhajtä weenhajt hajxy xmio'owáanäm tu'cuhdujt.

³⁴ Jaduhñ jim myiñ cujaay maa Diosmädia'aguiän: "Cabä Dios ja'a wyiinmahñdy pøn ñajuøøyyäxä. Cabä Dios pøn miäyajtøy nebiä wyiinmahñdyhádat.

³⁵ Cabä Dios pøn miänuu'xyhaty."

³⁶ Hamdsoojootä Dios ja'a naaxwiimbä jecy yhädiuñ møødä jäya'ay nägøxiä. Tijaty yaa jájtäp túunäp hädaa yaabä naaxwiin, ja'a Dios jaduhñ

hanehm̄b coo jaduhñ jiadóøjät, coo jaduhñ tiunóøjät. Y tijaty jaduhñ jadaañäpnä tunáañäpnä, ja'a Dios jaduhñ yajtøjiadaamb nebiaty hñajty tøø wyiinmay. Tsøgä Dios hajxy mõj jaančh pädaacäm homiänaajä. Tsøg hajxy homiänaajä wiingudsähgøøyyäm. Amén.

12

¹ Mägu'ughajpädøjc, miøødä Dios hojioot maa højtscøxphájtäm. Chamčh mijts nhane'emy coo hajxy hamuumdu'joot mniyegóøjät Dios quiø'øjooty tiecyjiooty. Jaduhñä Diosmädia'agy hajxy hoy mgudiúnät hamuumdu'joot. Jaduhñä Dios hajxy hoy mwiingudsähgø'owät nebiä Dios hajxy xyajmädsoquiän.

² Ca'a hädaa wiinmahñdy hajxy myajtuñ nebiä jäya'ay wyiinmahñdyhajxy yaajän. Pønatiä Dios quia'a cu'ughajpy, je'eds hädaa yaabä wiinmahñdy hajxy yajtuumb. Cabä yhaxøøgwiinmahñdy hajxy ñajtshixø'owa'añ. Ca'a hajxy mbahixy. Hawiinjemybiä wiinmahñdy hajxy jaduhñ mmøødhájnäp, je'eguiøxpä coo Jesucristo hajxy mmøødhijnä tu'ugjoot tu'ugwiinmahñdy. Jaduhñä tøyhajt hajxy mmøødhádät tijatiä Dios hajxy xyajmädsojp coo hajxy mdúnät. Homiänaajä Dios hajxy xyajmädsojcäm coo hajxy hoy njäya'ayháltämät, coo hajxy hoy ndúunämät. Coø hawiinjemybiä wiinmahñdy hajxy jaduhñ nmøødháltämät, jaduhñä tøyhajt hajxy jaduhñ nmøødháltämät tijatiä Dios hajxy xyajmädsojcäm coo hajxy ndúunämät.

³ Mayhajtä Dios jaduhñ ñä'a tuun ja'a høøhcøxpä cooča cuhdujt jaduhñ xmiooyy cooča mijts nmägapx nhané'emät. Ca'a hajxy mniguiumayii cooc tyijy hajxy cøxiä wiinä mjaančh tehñ jiaty. Tijatiä tuungä Dios hajxy tøø xmio'oy, je'eds hajxy mmøjpäda'agäp. Ca'a wiingtuung hajxy mmøjpäda'agy. Hoy hajxy mdúnät nebiatiä Dios hajxy tøø xyajnáhdijy.

⁴ Hix, nägøxiä ni'xcopc hajxy nmøødháltäm møødä cø'ødecy, møødä wiinjøjp, møødä copctaatsc. Cab hajxy tiu'ugtuungä; haagä hawiingjaty hajxy tiuñ. Pero haagä tuungpaatp hajxy jaduhñ.

⁵ Jaduhñ mäwiin højts nmäbaatäm nebiä tu'ugni'x tu'ugcopcän coo hajxy tu'cuhdujt nmäböjcäm ja'a Jesucristocøxpä, hoy hajxy nja nämayháltäm. Jaduhñ hajxy hawiingjaty ndúunäm. Jaduhñ hajxy nnibiuhbéjtäm hamiñ haxøpy.

⁶ Tsøg hädaa tuung hajxy hoy yajnócxäm nebiatiä Dios hajxy tøø xyhanéhäm. Mayhajtä Dios jaduhñ tiuun coo wiinmahñdy hajxy cøjwiinduum xmiooyyäm nebiaty hajxy ndúunämät. Pønaty tøø tiuungmo'oyii coo Dios ja'a miädia'agy hajxy yajwá'xät nebiaty hajxy hñajty tøø ñajtscapxøøyyäxä, ween hajxy jaduhñ yajwa'xy nebiaty hajxy hñajty piuhbedyii.

⁷ Pønaty tøø tiuungmo'oyii coo hajxy miäbuhbédät, ween hajxy hamuumdu'joot tiuñ. Pønaty tøø tiuungmo'oyii coo Diosmädia'agy hajxy yajwá'xät, ween hajxy hoy yajwa'xy.

⁸ Pønaty tøø tiuungmo'oyii coo hajxy miäjootcapxmøcpógät, ween hajxy hoy tiuñ. Pønaty mäyøø, weenä häyoobä hajxy piuhbety hamuumdu'joot. Pønaty tøø tiuungmo'oyii coo hajxy miähané'emät maa tsajtøjcän, ween hajxy hoy miähané'emy. Hix, Dios ja'a cuhdujt jaduhñ yejc coo hajxy jaduhñ miähané'emät. Pønaty tøø tiuungmo'oyii coo mayhajt hajxy tiúnät maa häyoobädøjcän, møød maa yaamgto'oxyhajxiän, ween hajxy hamuumdu'joot piuhbety. Møød weenä pa'amjäya'ay hajxy quiuhixy.

⁹ Tsøg hajxy hamuumdu'joot ničhójcäm nibia'häyóowäm. Tsøgä haxøøgpä hajxy najtshixøøyyäm. Tehngajnä howyiinmahñdy hajxy tsøc tsójcäm.

¹⁰ Hamiñ haxøpy hajxy mniçhogóøjät mnibia'häyowóøjät neby tu'ugpuhya'ay neby tu'ugpuhdo'oxypän. Hamiñ haxøpy hajxy mniwyiingudsähgø'owóøjät. Cab hajxy mnibiexóøjät.

¹¹ Hamuumdu'jootä Wiindsón Jesucristo hajxy mmädúnät. Jootcuyc hajxy jaduhñ mdúnät. Cab hajxy jaduhñ mänaa mnänuuxó'owät.

¹² Coø hajxy pøn xchaaçhtiúnät, cab hajxy mmøjpädá'agät; mmee'xtúgäp hajxy jaduhñ. Mnajuøøby hajxy jaduhñ coø hajxy jim mnøcxa'añ maa Dioswiinduumän. Paady hajxy jaduhñ mxoondá'agät. Homiänaajä Dios hajxy mba'yá'axät.

¹³ Coø pøn tii yajmaajiádät, naxy hajxy mdehm piuhbédät. Je'eçh jaduhñ nnänøømby pøn jaduhñ mæbøjp ja'a Jesucristocøxpä. Pønjaty jaduhñ mejtsp maa mdøjc-hajxiän, myajtøjtägó'owäp hajxy je'e. Myajcáyäp myaghú'ugäp hajxy jaduhñ.

¹⁴ Coø hajxy pøn xchaaçhtiúnät, cab hajxy mmähanhádät. Pero mmänuu'xtá'agäp ja'a Dios hajxy coø hajxy ween ñähwa'açh.

¹⁵ Pønjaty xoondaacp, mmøødxoondá'agäp hajxy je'e. Pønjaty jøøby xuu'tsp, mmøødjø'ow mmøødxúudsäp hajxy je'ebä.

¹⁶ Tu'ugcopc tu'ugwiinmahñdy hajxy mnimiøødhidóøjät. Cab hajxy pøn mbéxät. Jootcuyc hajxy mhídät, hoyyä møjtuung hajxy mga'a jagä møødä. Cab hajxy mänaa mniguiumayóøjät.

¹⁷ Coø häna'c hajxy xyhäyoowhíxät, cab hajxy myaghawiimbijtagátsät. Hoy hajxy mjäya'ayhádät, jaduhñä Dios hajxy jaduhñ xquiumáyät; jaduhñ mijtsä cu'ug waamb xquia'a nänómät. Pero xwyiingudsähgø'owäbä cu'ug hajxy jaduhñ.

¹⁸ Coø mijtsä cu'ug xjia wi'i jiojcapxó'owät coø hajxy jaduhñ mbahíxät nebiaty hajxy haxøøg jiatcø'oyän, cab hajxy jaduhñ mbahíxät. Pero coø hajxy waamb xquia'a nämá'awät, mänit hajxy hoy yajxón mmøødmädiá'agät. Cab hajxy pøn mmädsiphádät.

¹⁹ Mägu'ughajpædøjc, coø hajxy pøn xyhäyoowhíxät, cab hajxy myaghawiimbijtagátsät. Dios jaduhñ yaghawiimbídäp. Jaduhñ jim myiñ cujaay maa Diosmädia'aguiän coogä Dios jaduhñ miänaañ: "Høøch jaduhñ nyaghawiimbídäp."

²⁰ Coø hajxy pøn xmiädsiphádät, cab hajxy mmädsiphajtägátsät. Jaduhñä Diosmädia'agy miäna'añ: "Pø yähó'cäbä häna'c ja'a miích hñajty jaduhñ xmiädsiphajpä, myajcáyäp myaghú'ugäp jaduhñ. Pø tødsøøyyäp, mmó'owäbä nøø. Coø jaduhñ mgudiúnät, hoyhoyyä häna'c chähdiúnät, ja'a miích hñajty jaduhñ xmiädsiphajpä."

²¹ Nägüeenä hajxy mhídät, cabä haxøøgpä hajxy myaghawiimbijtagátsät. Coø hajxy jaduhñ mjatcø'owät, myajcähxó'ogäp hajxy jaduhñ coø mhaxøøgwiiinmahñdy hajxy hñajty tøø mbadu'ubøjcumbä. Pero coø häna'c hoy yajxón mmägápxät, ja'a mijts hñajty xmiädsiphajpä, jaduhñ hajxy myajcähxó'ogät coø hawiinjemybiä wiinmahñdy hajxy hñajty mmøødhajnä. Mänitä Dios jaduhñ xquiumáyät.

13

¹ Tsøg hajxy nägøxiä cudiúunäm nebiatiä cuduung hajxy xyhanéhmäm. Hix, Dios ja'a cuhdujt møc møød. Je'e ja'a cuhdujt yejp jadähooc. Pønä cuhdujt møød, paady jaduhñ miøødä coø tøø mio'oyii ja'a Diósäm.

² Pøn jaduhñ ca'a cudiunaamb nebiatiä cuduung jia hane'emiän, quiumädowaamby hajxy je'e. Hix, ja'a Dios ja'a cuduung pädaac coø yhané'emät. Jaduhñds je'e, pø cab hajxy jaduhñ mgudiuna'añ nebiatiä

cuduung yhane'emiän, jaduñ miäbaady coo Dios miädia'agy hajxy mga'a cudiunaañä.

³ Pønjaty hoy wädijp, cabä cuduung hajxy chähgø'ø. Pero pønjaty hoy ca'a wädijp, je'eds mähøcypä tsähgøøby. Coö hajxy hoy mwädítät, mänitä cuduung hajxy xquiumáyät. Cab hajxy jaduñ xchaačhtiünät.

⁴ Hix, ja'a cuduunghajxy, moonsähájtäp hajxy je'e ja'a Diósäm. Paady hajxy jaduñ tiuñ, coö mijts hajxy jaduñ xwioowhídät. Jaduhñä cuhdujt hajxy tøø miöoyyabä coö mijts hajxy xyajcumädówät coö mijts hñajty tøø mgädieey. Paady hajxy jaduñ mdsähgø'øwät.

⁵ Naxy hajxy mdehm quiudiünät nebiatiä cuduung hajxy xyhane'emiän, coö Dios hajxy jaduñ xñä'ä yajcumädówät. Jaanä jaduñduhmbä, coö hajxy hamdsoo mnajuø'ø coö jaduñ yhahixø'ø coö hajxy hoy mwädítät, paady hajxy jaduñ mgudiünät waambatiä cuduung hajxy xyhane'emiän. Coö hajxy jaduñ mga'a cudiünät, cab hajxy jootcujc mhídät, je'eguiøxpä coö hajxy hñajty mnajuø'ø hamdsoo coö hajxy hñajty tøø mgädieey.

⁶ Jaanä jaduñduhmbä, tsipcøxp hajxy mnähjuudiú'udät tijaty hñäc hajxy xyajnämaaby coö hajxy mnähjuudiú'udät. Hix, ja'a Dios ja'a cuhdujt jaduñ yejc coö mijtsä hñäc jaduñ xyagjúyät.

⁷ Hahixøøby jaduñ coö cuduung hajxy mmäjúyät nebiaty hajxy xyajnäma'ay. Jaanä jaduñ yhahixøøbiä coö cuduung hajxy mwiingudsähgø'øwät, miøjjä miuutscä.

⁸ Naxiä mnuu'xy hajxy mdehm jiahmiédsät. Naxy hajxy mniçhogóøjät nebiä tu'ugpuhya'aybän, nebiä tu'ugpuhdo'oxypän. Hix, pøn wiinghñäc tsojp, hoy jaduñ quiudiuñ nebiatiä Dios hajxy xyhanéhmäm.

⁹ Jaduhñä Diosmädia'agy miäna'añ: “Pøjim miich mdo'oxiøjc, cabä wiingpä mmøødhídät. Cab mmäyaghó'ogät. Cab mméedsät. Cabä mmädøjcä jie'e mhadsóçät.” Hoorä, coö wiinghñäc mdsógät hamuumdu'joot, hoy jaduñ mgudiünät nébiøch naamnä tøø nmädia'aguiän.

¹⁰ Hix, pøn wiinghñäc jaançh tsojp hamuumdu'joot, cab jaduñ mänaa yhäyoowhixa'añ. Hoorä, coö wiinghñäc mjaançh tsógät hamuumdu'joot, hoy ca'xy mgudiünät nebiä Dios yhane'emiän.

¹¹ Naxy hajxy jaduñ mdehm niçhogóøjät. Hix, mnajuøøby hajxy jaduñ coö tøø jiecy mänaa hajxy tøø mmähøquiän. Habáatnäp jaduñ coö Jesucristo hajxy min xyajpäðø'ogáañäm, coö hajxy jim xyajnøcxáañäm tsajpootyp. Nägüeenä hajxy jaduñ mwädítät. Hix, cab hajxy nnajuøøyyäm mänaa Jesucristo yaa quiädaactägatsa'añ, coö hajxy jaduñ xñä'ä nähgädaacpéjtämät. Hix, coö jaduñ quiädaactägätsät, mänit hajxy xyajtøyhajtyegáañäm.

¹² Habáatnäp jaduñ coö hajxy yaa ndsoonáañäm, coö hajxy jim nnøcxáañäm tsajpootyp. Tsøcxä ja'a haxøøgpä hajxy najtshixøøyyäm neby hajxy yaa tøø njäya'ayhájtäm, cahnä Dios hajxy hñajty nwiingudsähgøøyyäm.

¹³ Tøø Dios hajxy xyajnähdiñäm coö hajxy homiänaajä njugyhájtämät neby je'e jiugyhatiän. Paadiä Diosmädia'agy hajxy hoy nbanøcxáañäm. Tsøcxä hajxy hoy wädíjtäm, ca'a jiaduñä nebiä hñäc-hajxy hagoonstuum wädijpän. Cab hajxy mhaxøøghu'ug mhaxøøgjøø'xät. Cab hajxy comjaty mhú'ugät. Cab hajxy jim mnøcxät maa cuhhiñdo'oxiøjc-hajxiän. Tsøgä to'oxiøjc hajxy wiingudsähgøøyyäm. Hix, ja'a cu'ug hajxy xyhiñxäm neby hajxy njäya'ayhájtäm, pø hoy, pø caj. Cab hajxy haxøøg mnä'ägä jatcø'øwät. Cab hajxy pøn mmähänhádät, hoy hajxy jia mäyøøjä que mijts. Cab hajxy tii mmädsibø'øwät.

¹⁴ Ja'a Jesucristo hajxy nWiindsønähjäm. Je'e hajxy xyhanéhmäm. Jaançh tehñ yhoy je'e wyiinmahñdyhaty. Naxy hajxy jaduñ mdehm

miøødhídät tu'ugjoot tu'ugwiinmahñdy. Jaduhnä mhaxøøgwiinmahñdy hajxy hoy mhøxhíxät. Jaduhn hajxy hoy mhäna'c-hádät.

14

¹ Jii jäya'ayhajxy näje'e, cahnä Diosmädia'agy hajxy hoy yhabøcyñä, hoy hajxy tøø jia mäßøcy ja'a Jesucristocøxpä. Hahixøøby jaduhn coo hajxy mmägu'ughádät. Pero cab jaduhn yhahixø'øy coo mädia'agy hajxy mmøødyajyónät ja'a cuhdujtcøxpä.

² Pønjetiä Diosmädia'agy hoy tøø yhabøcy, ñajuøøby hajxy je'eduhn coo jaduhn yhawiinmatsä coo hotyijä mgáyät. Pero pønjaty hoy tøø quia'a habøcy, cábac tyijy yhooyä coo tsu'uch ndsú'tsämät. Pádiäc tyijy quia'a hoyyä coo tsu'uch ndsú'tsämät, yajnajuøøby jaduhn coo häna'c ja'a tsu'uch hajxy hñajty tøø quiunuu'xy maa habojtsnaxy wyiinduumän. Jadúhñäc tyijy miäbaady néjjiämä habojtsnaxy jaduhn mwiingudsähgøøbiän.

³ Hoorä, pø mdsu'chp miichä tsu'uch, cab jaduhn mbéxät ja'a häna'cä tsu'uch ca'a tsu'tspä. Jaanä jaduhnduhmbä, pønä tsu'uch ca'a tsu'tsp, cab jaduhn waamb ñämä'awät ja'a häna'cä tsu'uch tsu'tspä cooc tyijy jaduhn quiädieey. Haa ca'a, ja'a Dios yhuung je'ebä.

⁴ Cabä cuhdujt jaduhn myiñ coo waamb mnämä'awät pønä Diosmädia'agy panøcxp. Haa ca'a, ja'a Dios ja'a mioonsä je'ebä. Jagooyyä Dios cuhdujt jaduhn miøødä coo miäná'anät pø hoyyä mioonsä quiudiuñ, pø caj. Hamdsoojä Dios jaduhn ñämä'awät neby hoy wiädítät. Haa ca'a, ja'a Dios je'e hanehmb.

⁵ Näje'ejä jäya'ayhajxy miäna'añ coo poo'xxiøø jyijä mädyii hajxy yhamajtschádäp. Näje'e hajxy miänaambä coo Dios hajxy homiänaajä nwiingudsähgøøyyämät. Pero mijts, jaduhn hajxy mgudiúnät nebiä Dios hajxy hamdsoo tøø xyajwiinjuø'øyän.

⁶ Hix, pønjaty jaduhn mänaamb coogä poo'xxiøø jyijä, nägüeentä hajxy jaduhn wiädity ja'a poo'xxiøøjooty. Jaduhnä Dios hajxy wyiingudsähgø'øy. Jaanä jaduhnduhmbä, pønjaty jaduhn mänaamb cooc jaduhn quia'a cädieeyä coo tsu'uch ndsú'tsämät, hoy hñajty tøø jia cunuu'xyii maa habojtsnaxy wyiinduumän, mioobiä Dios Dioscujú'uyäp jaduhn coo jaduhn yajcayii. Jaanä jaduhnduhmbä, pøn jaduhn mänaamb cooc jaduhn quia'a hoyyä coo tsu'uch ndsú'tsämät, jaanä jaduhnä Dios Dioscujú'uyäp mioobiä coo jaduhn yajcayii.

⁷ Coo Diosmädia'agy hajxy nmäbøjcäm ja'a Jesucristocøxpä, paady hajxy xmioonsähájtäm. Paady jaduhn quia'a hahixø'øy coo hajxy njäya'ayhájtämät nebiä nhamdsoojoot hajxy chójcäm. Ni ja'a cuhdujt hajxy nga'a møødhájtäm coo hajxy hamdsoo nniyajnähdíjjämät mänaa hajxy nho'ogáañäm ndägoyyáañäm.

⁸ Ja'a Jesucristo hajxy xmioonsähájtäm mäduhñtiä hajxy yaa njugyhájtäm, hoy ñeipiä hajxy cu nja jajt cu nja habéjtäm. Y coo hajxy nho'c coo hajxy ndägóoyyämät, je'enä hajxy hñajty xmioonsähadáañäm homiänaajä.

⁹ Coo ja'a Jesucristo hajxy xñähho'túútäm, mänit jadähooc jiuypiojtägajch. Jaduhn hajxy xquiu'ughájtäm, pønjaty jaduhn mäßøjp, møød hajxy tøø yhó'oguiäbä, møød hajxy jaac jujcypiä jaac tsuxpä. Jaanä jaduhn hajxy xyhanéhmbä.

¹⁰ Cabä mmägu'ughajpä hajxy hawiinmats mbéxät, hoyyä Diosmädia'agy hajxy hoy quia'a jagä habøcyñä. Cab hajxy pøn mnämä'awät cooc tyijy hajxy hoy quia'a cudiuñ, hoyyä wiingcuhdujt hajxy jia panøcxy. Hix, coo Jesucristo yaa quiädaactägátsät, mänit hajxy nägøxiä jim nnaxø'øwáañäm ja'a Jesucristo wyiinduum tøyhajtyejpä.

- ¹¹ Jaduhñ jim myiñ maa Diosmädia'aguiän:
Nägøxiöchä jäya'ayhajxy nøcxy xwyiinjiina'awa'añ.
Xwyiingudsähgø'owáambøch hajxy jaduhñ. Jadúhñhøch hajxy xquiapx-
paadaambä cooçh nidiuhñ nDioshaty. Tøyhajt jaduhñ,
nømä Dios miänaañ.
- ¹² Jaduhñ hajxy nyajnajuøøyyäm coo hajxy nägøxiä jim nøcxy
ndøyhajtyegáañäm Dioswiinduum.
- ¹³ Cab hajxy tsøc niñänøømänä cooc tyijy ja'a Diosmädia'agy hajxy hoy
nga'a panøcxäm. Pero jaduhñ tsøc cudiúunäm nebiatiä mabøjpädøjc-hajxy
quiudiuñän, jaduhñ hajxy waamb xquia'a nänøømämät. Pøn jaduhñ
mänaamb cooc tyijy quia'a hawiinmatsä coo tsu'uçh ndsú'tsämät, pues,
hahixøby jaduhñ coo mga'a tsú'udsät coo hñajty mmøødhity. Hix, wehñdä
miich jaduhñ xpiadsú'udsät. Coo miich jaduhñ xjiaançh padsú'udsät,
cädiéeyäp je'eduhñ.
- ¹⁴ Cab jaduhñ quiädieeyä coo tsu'uçh ndsú'tsämät, hoy hñajty tøø jia
cunuu'xyii maa habojsnaxy wyiinduumän. Nmøødhøchä tøyhajt jaduhñ.
Hix, tu'ugmädiä'agyhøchä Jesucristo nmøødhity, ja'a nWiindsønñajtämbä.
Pero jii jäya'ayhajxy näje'e miäna'añ cooc tyijy quia'a hoyyä coo tsu'uçh
ndsú'tsämät. Coo hajxy jaduhñ jiaançh tsú'udsät, ja'a hajxy jaduhñ
mänaambä, pues, cädiéeyäp hajxy jaduhñ.
- ¹⁵ Hoorä, coo miichä tsu'uçh jaduhñ mdsú'udsät, y coo jaaya'ay jaduhñ
xpiähixät, ja'a jaduhñ mänaambä cooc tyijy quia'a hoyyä coogä tsu'uçh
mdsú'udsät, myajcädiéeyäp miich je'eduhñ. Pø jaançh tøy mdsocy, cab
jaduhñ myajcädiéeyät, je'eguiøxpä coo Diosmädia'agy miäbøcy. Hix, ja'a Jesu-
cristo jaaya'ay tøø ñähho'tu'udy. Pero coo myajcädiéeyät, wehñdä Jesucristo
miädia'agy ñajtshixøøyyäxät.
- ¹⁶ Y coo jaaya'ay jaduhñ myajcädiéeyät, wehñdä miich myajnänømät.
Y wehñdä jaaya'ay yajnänøømbät, ja'a Jesucristo miädia'agy tøø
ñajtshixøøyyäbä. Jaduhñds je'e, maas hoy hit jaduhñ coo tsu'uçh mga'a
nä'ägä tsú'udsät, hoy jaduhñ mja najuøøy coo jaduhñ quia'a cädieeyä coo
mdsú'udsät.
- ¹⁷ Coø hajxy tøø nmabøjcäm ja'a Jesucristocøxpä, paadiä Dios hajxy xy-
hanéhñänä. Hix, cabä Dios waamb miäna'añ coo hajxy hotyijä ngaayy
nhúucäm; ni jaduhñ quia'a mänaambä coo hajxy tii nga'a caayy nga'a
húucämät. Coo Dios hajxy tøø xpiädäcäm hawa'adstuum, paady hajxy hoy
njäya'ayhajtäm, paady hajxy jootcujc nnimiøødhijtäm, paadiä Dioshespíritu
hajxy xyajxoondäcäm.
- ¹⁸ Hoorä, pønä Jesucristo miädia'agy jaduhñ cudiunáañäp, cumayáañäp
je'e ja'a Diósäm møødä cú'ugäm. Tsøcxä hajxy jaduhñ cudiúunäm nebiä
mabøjpädøjc-hajxy quiudiuñän.
- ¹⁹ Mägu'ughajpädøjc, tsøgä hoybä hajxy tehñgajnä høxtáayyäm, jaduhñ
hajxy jootcujc nnimiøødhijtämät, jaduhñ hajxy hoy nniguiapxmøcpøjcämät,
jaduhñä Jesucristo miädia'agy hajxy hoy ngudiúunämät hamuumdu'joot.
- ²⁰⁻²¹ Cab jaduhñ quiädieeyä coo hajxy hotyijä ngaayy nhúucämät. Pero
pø jii mabøjpädøjc-hajxy jaduhñ näje'e miäna'añ cooc tyijy ja'a tsu'uçh hajxy
nga'a tsú'tsämät, cooc tyijy ja'a vino hajxy nga'a húucämät, pues, maas hoy
jaduhñ coo mga'a tsú'udsät, coo mga'a hú'ugät. Hix, coo hajxy jaduhñ
xyhixät coo hñajty jaduhñ mgay mhu'ugy, wehñdä hajxy jaduhñ xpiähixät.
Y coo hajxy jaduhñ xpiähixät, cädiéeyäp hajxy jaduhñ. Jaduhñ quiähxø'øgät
coo miich hñajty tøø myajcädieey. Y cab jaduhñ yhooyä coo mabøjpädøjc
myajcädiéeyät hoy ñä'a tiiguiøxpä. Hix, jia wi'i pianøcxáañäbä Jesucristo

miädia'agy hajxy jaduhñ, y coo hajxy jaduhñ quiädiéeyät, cab hajxy jaduhñ hoy pianócxät.

²² Hoy miich mja najuø'øy coo quia'a cädieeyä coo hotyijä mgay mhú'ugät, cab jaduhñ yhooyä coo wiinghãna'c mmøødyajtsibó'øwät. Ja'a Dios miich jaduhñ xyhijxp coo hoy mgudiuñ. Pøn jaduhñ najuøøby coo quiunuyii ja'a Diósäm nebiä quiuhdujthaty, jootcuyc je'eduhñ yhity.

²³ Pero pøn jaduhñ ca'a najuøøby pø yejpiä Dios cuhdujt jaduhñ coo tsu'uçh ndsú'tsämät, pø caj, coo je'e jiaançh tsú'udsät, cädieeyäp je'eduhñ, hoy hamdsoo jaduhñ jia mäna'añ cooc tyijy ja'a Dios tøø miäna'añ coo hajxy nga'a tsú'tsämät. Paady jaduhñ miäna'añ, wehñdä tsu'uçh hãnajty tøø quiunuu'xyii maa habojsnaxiä wyiinduumän. Jaanä jaduhñduhmbä, hoy ñä'ä tiiguiøxpä, pøn jaduhñ ca'a najuøøby pø tøø Dios cuhdujt yecy je'eguiøxpä, o pø caj, coo jaduhñ jiaançh jatcø'øwät, cädieeyäp jaduhmbä.

15

¹⁻² Nnajuøøyyäm hõjts jaduhñ coo quia'a cädieeyä coo hajxy hotyijä ngaayy nhúucämät. Pero tsögä nmägu'ughajpädøjc ja'a Diosmädia'agy jaac yajmábøjcäm, ja'a hajxy naamdägø'øy habøjpä, ja'a hajxy jaduhñ mänaambä cooc tyijy quia'a hawiinmatsä coogä tsu'uçh ndsú'tsämät, coogä vino nhúucämät. Cabä nhamdsoo cuhdujthajtiä hajxy nyaghíjtämät; møødä Dioscuhdujt hajxy nyaghíjtämät.

³ Hix, mänaa Jesucristo yaa yhitiän hädaa yaabä naaxwiin, cabä yhamdsoo cuhdujt hãnajty yaghity. Ja'a Tieediä miädia'agy jaduhñ quiudiuunä, paady jaduhñ chaachpøjcy. Jaduhñ jim myiñ cujaay maa Diosmädia'aguiän: "Pønjaty miich haxøøg xñänøømb, jaduhñ mäwiin miäbaady néjjiäm høøch xñänøømbän", nømä Jesucristo ja'a Tieedy ñämaayy.

⁴ Ja'a hõjtscøxpä Dios ja'a miädia'agy jecy yajcujahyyä, jaduhñ hajxy hoy ngapxtáacämät. Jaduhñ hõjtsä tøyhajt nmøødhájtäm coo Dios yajtøjiada'añ neby jecy yajcujahyyän coo hõjts jim xyajnøcxáanäm maa wyiinduumän. Coö hajxy jaduhñ nnajuøøyyäm coo hajxy jim nnøcxáanäm, paady hajxy hotyijä nmeexútjcämät. Cab hajxy tsøc jootmayhájäm, hoy hajxy cøxypänejpiä cu nja jajt cu nja habéjtäm.

⁵ Ja'a Dios hajxy jaduhñ xpiuhbéjtäm coo hajxy jaduhñ nmeexútjcämät, coo hajxy jaduhñ nga'a jootmayhájämät. Ween mijtsä Dios xpiuhbety coo hajxy jaduhñ mbahíxät nebiä Jesucristo hoy yhitiän. Jootcuyc hajxy jaduhñ mnimiøødhidøøjat tu'ugmädia'agy.

⁶ Jaduhñ hajxy tu'ugmädia'agy mhídät coo Dios hajxy mgapxpáadät mõj jaançh. Ja'a Dios, ja'a Jesucristo Tieedy je'e. Ja'a Jesucristo hajxy nWiindsønájäm.

⁷ Hoorä, nebiä Jesucristo hajxy xchójcäm, jaanä jaduhñ hajxy hamuumdu'joot nniçhójcämbät. Coö cu'ug hajxy jaduhñ xyhíxämät coo hajxy hãnajty nniçhójcäm, jaduhñä cu'ughajxy ñajuø'øwaambä coo Dios miøjjä jiaançh.

⁸ Jéquiänä Dios jaduhñ miänaañ coogä yajnähwaats yajcuhwaatspä quixa'añ maa judíoshajxiän. Ja'a judíos ja'a yhapä tieedy hajxy, je'eds hajxy jaduhñ jecy hawáanäxä, møødä Abraham, møødä Isaac, møødä Jacob. Coö Jesucristo yaa quiejxä hädaa yaabä naaxwiin, hoyyä judíoshajxy piuhbedyii. Tøjiajt jaduhñ nebiä Dios jecy miänaañ coo yajnähwaats yajcuhwaatspä hãnajty quixa'añ. Hix, tømädiaacpä Dios. Caj mänaa yhøhnda'agy. Tøyhajt jaduhñ.

⁹ Jaanä jaduhnduhmbä, paadiä Jesucristo yaa quiejxä, hoyyä jäya'ayhajxy piuhbéjtäbä, ja'a hajxy ca'a judíospä. Coó hajxy jaduhñ ñäxúu'tsäbä ja'a Diósäm, paadiä Dios hajxy mõj jaančh quiapxpaady. Jaduhñ jim myiñ cujaay maa Diosmädia'aguiän:

Miičh ngapxpaadaamby mõj jaančh näguipxy mөөd hajxy ca'a judíospä. Høyháamhøch miičh nwiingudsähgø'øwa'añ, nömä Dios ñämaayyä.

¹⁰ Wiingtuumä Diosmädia'agy myíingumbä cujaay:

Mijts ca'a judíospä, xoonđa'ag hajxy mөөdä Dios quiu'ughajxy näguipxy.

¹¹ Jaduhñ cujaay myíingumbä wiingtuum:

Mijts ca'a judíospä, weenä Dios hajxy mõj jaančh mgapxpaady wiin-duhmyhagajpt.

¹² Wiingtuumä Isaías jecy quiujáhguiumbä:

Ja'a Isaí yhapä yhoc, minaamb je'e miähane'ema'añ.

Ja'a jäya'ayhajxy ca'a judíospä, je'eds hajxy jaduhñ hane'emáañäp.

Jaaya'ay hajxy jaduhñ jiøbhijxyp coó hajxy min yajnähwa'ads yajcuhwa'adsa'añii,

nömä Jesucristo jecy ñänøømä, mөөdä jäya'ayhajxy ca'a judíospä.

¹³ Hoorä mijts, coó Diosmädia'agy hajxy tөө mmäbøcy, weenä Dios hajxy hoyhoy xyajxoonđa'agy, ween hajxy xyaghity jootcujc. Hix, tөө Dios hajxy xyhawáañäm coogä hoyhajtä weenhajt hajxy xmio'owáañäm ca'xy pedyii. Hamuumdu'joot hajxy jaduhñ mjøbhíxät. Xpiuhbédbä Dioshespíritu hajxy jaduhñ ja'a miäjaahaam.

¹⁴ Mägu'ughajpädøjc, nmøødhøčhä tøyhajt jaduhñ coó hajxy hamuumdu'joot mničhocy mnibia'häyoyii, mөөd coó hojioot hajxy mmөөdä, mөөd coó Diosmädia'agy hajxy hoy mwiinjuø'øy, mөөd coó hajxy mjaty mägapx hane'em.

¹⁵⁻¹⁶ Nébiøch hädaa nocy cham ngujaayän, hamøc hadsaäch mijts tөө nmägapxy tөө nhane'emy. Nyagjahmiejchp mijts jaduhñ jadähooc. Nmøødhøčhä cuhdujt jaduhñ coočh mijts nyagjahmiédsät. Hix, ja'a Dióshøch jaduhñ tөө xtiuungmo'oy coočhä miädia'agy nyajwá'xät ja'a Jesucristocøxpä jim maa mijtsän, mäduhñtiä hajxy mga'a judíoshaty. Coó jäya'ayhajxy nämay miäbøgät hamuumdu'joot ja'a Dioshespíritu miäjaahaam, mänit hajxy quiumaya'añii ja'a Diósäm.

¹⁷ Jootcújc-høch jaduhñ nnijwiø'øyii coočhä nduung tөө yhoyø'øy, ja'a Dióshøch tөө xmió'oyäbä. Ja'a Jesucristøch jaduhñ xpiuhbejp, páadyhøch nduung tөө yhoyø'øy.

¹⁸ Jayóoyyøch cham nmädia'aga'añ nebiátyhøčhä Jesucristo xpiuhbejty mänáabøčhä jäya'ay ja'a Diosmädia'agy nyajmäbøquiän, ja'a hajxy ca'a judíospä. Cábøch nmädia'aga'añ nebiatiä wiinghäna'c-hajxy tөө tiuñ. Mädia'agyháamhøchä jaaya'ay nyajmäbøjcy, mөөd coočhä hoy-yagjuøñäbä hñajty nyajcähxø'øgy.

¹⁹ Ja'a Dios, ja'a miäjaahaamä hijxtahnd tөө yajcähxø'øgy hoy-yagjuøñä. Ja'a yHespírituhaamä jäya'ay tөө yajmäbøcy. Wiinduhmyhagájpthøčhä Diosmädia'agy hoy nyajwa'xy ja'a Jesucristocøxpä, coó jaaya'ay hajxy hoy xñähho'túutäm. Jimhøch ndägøøyy wädijpä Jerusalén. Jäguémhøch hoy nwädity. Høxtä jimhøch hoy nwädity maa naax xiøhatiän Iliria.

²⁰ Jayóoyyøch jim tөө nwädity majatiä Jesucristo hñajty tөө quia'a mädoyhadyijän. Jadúhnhøch nnä'ägä wädityhaty. Hix, cábøchä Dios xtiuungmooyy coočh nwädität maa wiinghäna'cä Diosmädia'agy hñajty tөө yajwa'xiän.

21 Pønjatiä Diosmädia'agy tøø quia'a mädooy, je'ečh tøø nyajwiingapxø'oy. Jaduhñ jīm myiñ cujaay jaaya'aguiøxpä maa Diosmädia'aguiän, ja'a hānajtý cahnä miädoybä:

Pønjaty ca'a mädoobnä coo Dios ja'a yajnähwaatspä tøø quiexy, je'edshajxy jaduhñ mädoyhadaamb.

Ja'a jäya'ayä Diosmädia'agy hajxy hijty ca'a mädoobnä, jaduhñ hajxy yajmøødmädia'aga'añii coo hajxy ñäxuuchii ja'a Diósäm.

22 Tøøch jīm mayhooc nja nøcxa'añ maa mijtsän jīm Roma. Pero cábøch hijty xñäbaadøyyä cooçh jīm nnøcxät. Hix, ja'a Diosmädiá'agyhøch hijty nyajwa'xyp wiinduhmyhagajpt.

23 Pero tøøch nwädiypädøøñä wiinduhmyhagajpt. Mobädájpnoch jīm nnøcxaanñä maa mijtsän. Tøø jaduhñ majiomøjt yhiñä cooçh jīm tøø nja wi'i ñøcxa'añ maa mijtsän.

24 Cooçh mabøcy hānajtý jīm nnøcxa'añ España, mänítøch mabøcy jīm ndu'unaxø'øwät maa mijtsän. Jootcújc-høch jaduhñ nnijwiø'øwøøjät cooçh mijts jaduhñ nguhíxät. Mänítøch njaac tu'uyó'oyät cooçh hānajtý jīm nnøcxa'añ España. Mänítäts mijts hii xpiuhbédät.

25-26 Pero cab jaduhñ choj näbaadø'øwa'añ cooçh jīm nnøcxät maa mijtsän. Hix, Jerusalénhøch jayøjp nnøcxa'añ. Xädø'øñhøch jīm nøcxy nyega'añ. Ja'a häyoobädøjc-høch nøcxy nmo'owa'añ, ja'a hajxy mabøjpä. Ja'a mabøjpädøjc-hajxy jīm tsānaabiä Macedonia møød jīm Acaya, jaaya'ayä xädø'øñ hajxy yajmujc. Høøchä xädø'øñ hajxy xyajmäguexaamb cooçh hānajtý jīm nnøcxa'añ Jerusalén.

27 Hamdsoojoot hajxy yajmujcy, ca'a yhøøchä nnämaayy coo hajxy yajmúgät. Hawiinmats jaduhñ coo mabøjpädøjc-hajxy piuhbedøøjät, ja'a hajxy jīm tsānaabiä Jerusalén. Hix, judíoshajp hajxy je'e. Jaaya'ayä Diosmädia'agy hajxy jīm mabøjtsohñ Jerusalén mänaabä Diosmädia'agy tiägø'øyän wädiypä ja'a Jesucristocøxpä. Mänitä jäya'ayhajxy høxhaam jiaac mädoyhajty, ja'a hajxy ca'a judíospä. Miäbøjc hajxy je'ebä. Paady jaduhñ yhawiinmatsä coo ja'a judíoshajxy piuhbedøøjät ja'a jäya'ayháxiäm, ja'a hajxy ca'a judíospä.

28 Hoorä, cooçhä xädø'øñ hānajtý jīm hoy tøø nyecy Jerusalén, mänítøch mabøcy jīm nnøcxa'añ España. Mänítøch jīm ndu'unaxø'øwät maa mijtsän jīm Roma.

29 Y cooçh jīm nmédsät maa mijtsän, nägø'ø nädécypiøchä Jesucristo xpiuhbeda'añ cooçh mijtsä Diosmädia'agy yajnähixø'øwät, jaduhñ hajxy tu'ugmucy nhíjtämät jootcujc. Nmøødhøchä tøyhajt jaduhñ.

30 Mägu'ughajpädøjc, tu'ugmädia'aguiä Jesucristo hajxy nmøødhíjtämbä, ja'a hajxy nWiindsøñhíjtäm. Ja'a Dioshespíritu hajxy xyajniçhójcäm. Huuc tunä mayhajt hajxy maaçh høøchcøxpän. Tsøgä Dios hajxy hamuumdu'joot mänuu'xtáacäm maaçh høøchcøxpän

31 cooçhä Dios jīm xñäwá'anät Judeanaaxooty maa jäya'ayhajxy ca'a mabøjpän. Jaduhñä Dios hajxy nmänuu'xtáacämbät cooçhä mabøjpädøjc-hajxy jīm jootcujc xtiøjmó'owät jīm Jerusalén cooçh jīm nmédsät xädø'øñjejpä.

32 Y coo Dios jaduhñ miäná'anät, mänítøch jīm nwiimbídät, mänítøch jīm jootcujc nnøcxät maa mijtsän. Jootcújc-høch jaduhñ jīm nbóo'xät. Hamiñ haxøpy hajxy mänit nnijjootcapxmøcpøjcämät.

33 Xmióoyyämä Dios ja'a hoyhajtä weenhajt hajxy. Wéenäts mijts nägøxiä xpiuhbety.

16

¹ Jímhøchä nmägu'ughajpä tu'ug chäna'ay maa cajpt xiøhatiän Cencrea. Febe xiøhaty. Diosmädia'agymiäbøjp je'ebä. To'oxiøjc je'eduhñ. Mäbuhbejp jaduhñ maa tsajtøjcän.

² Coø Febe jim miédsät maa mijtsän, naxy hajxy jootcujc mdehm miägu'ugpøgät ja'a Jesucristocøxpä. Hawiinmats coø hajxy jaduhñ mmägu'ugpøgät pønhatiä Diosmädia'agy mäbøjp. Mmó'owäbä Febe hajxy jaduhñ tijaty yajmaajiajpy. Hix, náxyhøch jaduhñ xpiuhbety. Nämays hajxy jaduhñ tøø piuhbedyii.

³ Nyajpóo'xypøchä Prisca møødä Aquila. Tøøch hajxy jaduhñ xmiøødtuñ ja'a Jesucristocøxpä.

⁴ Tøøch hajxy jaduhñ jim xñäwa'añ mähahñdium. Páadyhøchä Dioscujú'uyäp nmo'oy. Jaduhñä mäbøjpädøjcä Dioscujú'uyäp hajxy yejpä, ja'a hajxy ca'a judiøspä, wiinduhmyhagajpt.

⁵ Møødhøchä jäya'ay jaduhñ nyajpoo'xpä, pønhaty jaduhñ hamugøøby Dioswiingudsähgøøbiä maa Prisca tiøjc-hajxiän. Møødhøchä Epeneto nya-jpoo'xpä. Jaanç tehñ yhöyhøch je'eduhñ xmiägu'ughaty. Jaayá'ayäts jim mäbøjtsohn ja'a Jesucristocøxpä maa naax jaduhñ xiøhatiän Asia.

⁶ Nyajpóo'xypøchä Mariábä. Jaanç tehñ yhoj jim tiuñ maa mijtsän.

⁷ Nyajpóo'xypøchä Andrónico møødä Junias. Høøch nmägunaaxhajxy je'e. Näguipxyhøch hajxy hijty xmiøødtsumychäna'ay. Hoy piønä jaduhñ ñajuø'oy coø hajxy Dyiosquexiä. Paady hajxy jaduhñ quiejxä, coø Diosmädia'agy hajxy jaduhñ yajwá'xät. Jayøjp hajxy miäbøjcy ja'a Jesucristocøxpä. Høøch høxhaam njaac mäbøjc.

⁸ Nyajpóo'xypøchä Ampliato. Høyhøch je'e xmiøødnijootpaadyi ja'a Jesucristocøxpä, ja'a hajxy nWiindsønñájtäm.

⁹ Nyajpóo'xypøchä Urbano. Näguipxy hajxy je'e xmiøødtuñäm ja'a Jesucristocøxpä. Nyajpóo'xypøchä Estaquis. Høyhøch je'eduhñ xmiägu'ughaty.

¹⁰ Nyajpóo'xypøchä Apeles. Tøø jiaanç tehñ miee'xtucy ja'a Jesucristocøxpä. Nyajpóo'xypøch pønhaty jaduhñ jim tsänaaby maa Aristóbulo tiøjcän, ja'a hajxy mäbøjpä.

¹¹ Nyajpóo'xypøchä Herodiön. Høøch nmägunaax je'ebä. Nyajpóo'xypøch pønhaty jaduhñ jim tsänaaby maa Narciso tiøjcän, ja'a hajxy mäbøjpä.

¹² Nyajpóo'xypøchä Trifena møødä Trifosa. Tuumb hajxy jaduhñ ja'a Jesucristocøxpä, ja'a hajxy nWiindsønñájtämbä. Nyajpóo'xypøchä Pérsida. Jaanç tehñ chójcäp je'e. Hoy jiaanç tehñ tiuumbä maa Jesucristocøxpän.

¹³ Nyajpóo'xypøchä Rufo møødä tiaj. Jaanç tehñ yhojy Rufo ja'a Jesucristo miädia'agy pianøcxä. Jaduhñhøchä tiaj njuøøyyä nébiøch nhamdsoo tajiän.

¹⁴ Nyajpóo'xypøchä Asíncrito, møødä Flegonte, møødä Hermas, møødä Patrobas, møødä Hermes, møødä mäbøjpädøjc jaac jimä.

¹⁵ Nyajpóo'xypøchä Filólogo, møødä Julia, møødä Nereo møødä piuhdo'oxy, møødä Olimpäs, møødä Diosmädia'agymiäbøjpähajxy jaac jimä.

¹⁶ Xi'ig xon hajxy mniyajpoo'xøjät ja'a Jesucristocøxpä. Xyajpoo'xp mijtspä, ja'a hajxy mäbøjpä ja'a Jesucristocøxpä wiinduhmyhagajpt.

¹⁷ Mägu'ughajpädøjc, jii jäya'ayhajxy näje'e wiädity, wiing hajxy yajnähiø'oy; cab hajxy yajnähiø'oy nej mijts tøø mhabøquiän ja'a Jesucristocøxpä. Cabä jioot hajxy xyajmädsocy coø mijts tu'ugmädia'agy mhídat maa Diosmädia'agyquiøxpän. Jaduhñ hajxy yajnähiø'oy coø wiingmädia'agy hajxy mbadu'ubøgät. Naxy hajxy mdehm

ñigwieendähadóǵjät maa jaaya'ayhajxy jaduhmbän. Cab hajxy jim mnöcxó'owät maa jaaya'ayhajxy jaduhmbän.

¹⁸ Hix, cabä Diosmädia'agy hajxy yajnähixó'oy ja'a Jesucristocöxpä. Jaduhñ hajxy yajnähixó'oy nebiä cu'ughajxy jia mädowna'añän. Paady hajxy jaduhñ yajnähixó'oy, yajmäjuyaamb hajxy jaduhñ; jaduhñ hajxy hoy jiatcö'owa'añ nebiä jioot hajxy choquiän. Hoy yajxon hajxy jia capxy jia mädia'agy. Pero xjia wi'i yajtägoyyaamb mijts jaduhñ.

¹⁹ Hopionä tөө miädoxyaty coo mijtsä Diosmädia'agy hamuumdu'joot mmäböcy ja'a Jesucristocöxpä; páadyhöch jootcuyc mnijiäwö'oyii ja'a mijtsöxpä. Jaduhñ mijts nyajmädsocy coo hajxy mniyajcopcö'owóǵjät, jaduhñ hajxy hoy mwädität, jaduhñ hajxy haxöǵg mga'a jäya'ayhädät.

²⁰ Ja'a Dios hajxy xyaghidaamb jootcuyc. Coö hajxy mga'a möjpädá'agät waambatiä höhndaacpä hajxy xjia wi'i yajnähixó'owa'añ, jaduhñä Dios ja'a möjcu'ugong quia'a yajmäjädá'agät. Y cabä möjcu'ugong hajxy nej xtiúunnät. Ween mijtsä Jesucristo ja'a hoyhajtä weenhajt tehngajnä xmio'oy, ja'a hajxy nWiindsöñhajtämbä.

²¹ Xyajpoo'xp mijtsä Timoteo. Hööch jaduhñ xmiöödtuumb. Jaanä xyajpoo'xp mijts jaduhñ ja'a Lúciobä, möödä Jasón, möödä Sosípater. Haagä hööch nmägunaaxhajxy je'e.

²² Hööch Tercio, hööch hädaa nocy ngujahby. Jaanä hööch mijts nyajpoo'xpä ja'a Jesucristocöxpä.

²³ Xyajpoo'xp mijtsä Gayo. Yaäch jaduhñ nhity ja'a Gayo tiögooty. Yejpiä tiöjc jaduhñ coo mäböjpädöjc-hajxy yaa yhamugó'owät Dioswiingudsähgööbiä. Xyajpoo'xp mijtsä Erasto. Jim je'e tiuñ hagujc. Xädö'öñgieendähajp jim. Möödä hermano Cuarto hajxy xyajpoo'xpä.

²⁴ Ween mijtsä Jesucristo ja'a hoyhajtä weenhajt xmio'oy nägöxiä. Amén.

²⁵ Hoorä, tsögä Dios hajxy möj jaanč capxpáatäm. Jaaya'ay mijts hamuumdu'joot xjiaac yajmäböǵap ja'a Jesucristocöxpä. Jaduhñhöch nnä'ägä yajnähixó'oyaty coo Dios ja'a Jesucristo quiejxy. Jaduhñä Jesucristo hajxy hoy xyajnähwáatsäm nägöxiä, möödä judíoshajxy, näguipxy möödä ca'a judíoshajxypä. Töyhajt jaduhñ. Jéquiänä Dios jaduhñ wyiinmaayy, pero cab jaduhñ choj yajtöjiajty. Paady hajxy nga'a tsoj wiinjuóöyyäm.

²⁶ Pero jim jaduhñ myiñ cujaay maa Diosquexyhajxy jecy quiujahyyän. Jim jaduhñ cöxiä quiapxtöy. Naamnä hajxy jaduhñ tөө nwiiñjuóöyyäm. Paadiä Dios jaduhñ yhanehmnä coo mädia'agy ja'a Jesucristocöxpä wiá'xät wiinduhmyhagajpt, jaduhñä jäya'ayhajxy nägöxiä miäböǵät, jaduhñ hajxy quiudiúumbät. Homiänaajä Dios yhity.

²⁷ Jagooyyä Dios tөө wyiinmay coo hajxy xyajnähwáatsäm, coo hoyhajtä weenhajt hajxy xmióöyyäm. Ja'a Jesucristocöxpä Dios möj jaanč quiapxpaadyii cöjxta'axiöö. Amén.

1 Corintios

¹⁻² Høøch Pablo hädaa nocy cham njahby. Dióshøch xwyiinguejx cooçhä Jesucristo xquiuguexyhádat. Mijts hädaa nocy cham nyajnájahby, pønjaty ja'a Diosmädia'agy mabøjp maa ja'a cajpt jaduhñ xiøhatiän Corinto. Dios ja'a Jesucristo jaduhñ quejx coo hajxy hoy xñähho'túutäm, pønjaty ja'a Jesucristo miädia'agy mabøjcäp wiinduhmyhagajpt. Jaaya'ay hajxy nWiindsønähjtäm. Dios hajxy xyajnáhdíjjäm coo ja'a Jesucristo hajxy xñähho'túutämät. Ja'a hermano Sóstenes, xyajpoo'xp mijts je'ebä.

³ Weenä Dios hoyhajt weenhajt hajxy xmio'oy mөөdä Jesucristo. Ja'a Dios hajxy nDeedyhajtäm.

⁴ Homiänáajøch ja'a Dios nnäma'ay Dioscujú'uyäp je'eguiøxpä coo Dios mayhajt tiuñ maa mijtsøxpän. Paadiä Dios mayhajt jaduhñ tiuñ, coo Jesucristo hajxy tu'ugmädia'agy mmөөdhity.

⁵ Coo hajxy jaduhñ mmөөdhity, paadiä Dios hajxy tөө xpiuhbety møj may, jaduhñ hajxy hoy mgápxät, jaduhñ hajxy hoy mwiinjuó'øwät cøxiä.

⁶ Coo højts mijts ja'a mädia'agy tөө nyajwiingapxø'øy coo Jesucristo hajxy xñähho'túutäm, paadiä Diosmädia'agy hajxy hamuumdu'joot mmabøjnä.

⁷ Coo hajxy jaduhñ mmabøjnä hamuumdu'joot, paadiä Dios mäjaa hajxy xjiaanç tehñ mio'oy coo hajxy mgudiun waambaty hajxy xyhane'emy. Mjøbhiixyp mhajuøøbiä Jesucristo hajxy jaduhñ coo quiädaactägatsa'añ.

⁸ Dios hajxy xpiuhbedaamb coo miädia'agy hajxy hoy mgudiunät. Paady mijts Dios hñajty xpiäda'aga'añ hawa'adstuum coo ja'a Jesucristo ja'a haxøøgjäya'ay hñajty yajcumädowaannä.

⁹ Tøyhajt ja'a Dios miädia'agy jaduhñ. Cabä Dios mänaa yhöhnda'agy. Jaaya'ay hajxy tөө xyajnáhdijy coo yHuung hajxy mmөөdhíjtät tu'ugmädia'agy. Ja'a Jesucristo je'e.

¹⁰ Hermanodøjc, ja'a Jesucristo miädiä'agyhøch mijts cham nyajmөөdcapx nyajmөөdmädiaactägatsaamby coo hajxy tu'ugjoot tu'ugwiinmahñdy mhídät maa tsajtøjcän. Cab hajxy tii myajtsibø'øwät.

¹¹ Páadyhøch jaduhñ nmäna'añ, tөөçhä hermanohajxy xyajmädoyhaty coog hajxy mnimiädsibø'øyii. Jim hajxy choon maa Cloé tiøjcän.

¹² Wiingátiägä mädia'agy hajxy mbanøcxy. Naje'e hajxy miäna'añ cóogøch hөөch nmädia'agy hajxy xpianøcxä. Naje'e hajxy miänaambä coogä Apolos miädia'agy hajxy pianøcxä. Naje'e hajxy miänaambä coogä Pedro miädia'agy hajxy pianøcxä. Y naje'e hajxy miänáangombä coogä Jesucristo miädia'agy hajxy pianøcxä.

¹³ Pero cabä Jesucristo miädia'agy hajxy madiu'u xyajnáhixøøyyäm. Hix, jaaya'ay mijts jaduhñ xñähho'tuut cruzcøxp, ca'a yhöøch mijts nnähho'tuut. Paady hajxy mnäbejty coo Jesucristo miädia'agy hajxy mbanøcxä, ca'a jie'eguiøxpä cooçh hөөch nmädia'agy hajxy xpianøcxä.

¹⁴⁻¹⁵ Jagóoyyøch ja'a craa Crispo nyajnábejty maa mijtsän mөөdä craa Gayo. Cábøchä wiinghāna'c jim nnä'ä yajnábejty. Cab hajxy jaduhñ mmäná'anät cooc xtyijy nyajnábejty. Páadyhøchä Dios jaduhñ nnäma'ay Dioscujú'uyäp.

¹⁶ (Jexioo, chamçh njahmiejtstáacombä cooçhä Estéfanashajxy nyajnábejpä, mөөdä yhuung mөөdä tio'oxy. Cab ndijy wiinghāna'c njaac yajnábejty.)

¹⁷ Ca'a jiäya'ay-yajnábéjpøch Jesucristo xquiejxy. Diosmädia'agy-yajwá'xpøch xquiejxy coo hajxy xñähho'túutäm cruzcøxp. Cooçh jaduhñ nwädity Diosmädia'agy-yajwa'xpä, howyiinjuøøñøch hñajty ngapxy nmädia'agy. Páadyhøch jaduhñ ngapxy nmädia'agy howyiinjuøøñä, chójpiøch njoot

jaduhn coo hajxy hoy mwiinjuó'owät ja'a Jesucristocøxpä. Cábøch njoot chocy cooçh nmädia'agy hajxy xquiumáayyät je'eguiøxpä coogøch tyijy yajxón ngapxy nmädia'agy.

¹⁸ Nmäbøjcäm ja'a mädia'agy hajxy jaduhn coo Jesucristo hajxy xñähho'túutäm cruzcøxp. Pønjaty häda'agaamb møjcu'uhaam, coo hajxy miädoy coo Jesucristo hajxy tøø xñähho'túutäm cruzcøxp, ñäxiicy py hajxy jaduhn je'eguiøxpä cooc tyijy jagooyyä cädieeyhäna'c-hajxy yagho'ogyii cruzcøxp.

¹⁹ Jaduhn jim myiñ cujaay maa Diosmädia'aguiän: Ja'a häna'c-hajxy cuwiinmahñdypä, ja'a tyijy hajxy howyiinmahñdymøødpä, cábøçhä wyiinmahñdyhajxy nyajtsoobaadaanä, nømä Dios miänaañ.

²⁰ Hoorä, yajcähxø'piä Dios coo jäya'ay wyiinmahñdyhajxy quia'a tsoobaada'añ, ja'a hajxy niñänøømäbä cuwiinmahñdy, ja'a tyijy hajxy howyiinmahñdymøødpä. Ñäxiicy piä Dios jaduhn.

²¹ Jaançh tehñ quiuwiinmahñdiä Dios tu'uquiä. Je'e jaduhn mänaañ coo højts ja'a miädia'agy nyajwá'xämät coo Jesucristo hajxy xñähho'túutäm. Pønjaty jaduhn mabøjp, Dios jaduhn wiinmahñdyhajt coo hajxy jaduhn yajnahwa'adsøøjät ja'a piojpä quiädieeyhajxy, hoyyä jäya'ayhajxy näje'e jia näxi'igy. Ca'a yhöjts nhamdsoo wiinmahñdyhaam ja'a Dios ja'a miädia'agy hajxy xyajwiinjuøøyyäm. Jaduhnä Dios miänaañ.

²² Ja'a judíos hajxy, coogä hoy-yagjuøøñäbä hajxy yhíxät, mänítäc tyijy hajxy jaduhn miäbøga'añ. Y ja'a griegohajxy, mänítäc tyijy hajxy jaduhn miäbøga'añ coogä jäya'ay miädia'agy hajxy miädóowät, ja'a hajxy niñänøømäbä cuwiinmahñdy, ja'a tyijy hajxy howyiinmahñdymøødpä.

²³ Pero højtshájtäm, jaduhn højts nmädiäcäm coo Jesucristo hajxy xñähho'túutäm cruzcøxp. Cabä judíos hajxy jaduhn miäbøcy. Cab hajxy jaduhn miäna'añ cooc tyijy Jesucristo quia'a Dioshuungä. Hiç, nøm hajxy miäna'añ cooc tyijy ja'a Dioshuung quia'a ho'oga'añ cruzcøxp. Hoorä, ja'a jäya'ayhajxy ca'a judiøspä, ni je'e hajxy quia'a mabøjpä. Hoñäxiicnä Diosmädia'agy hajxy miädoy.

²⁴ Pero coo Dios hajxy tøø xwyiimbíiwäm, paady hajxy nmäbøjcäm coo Jesucristo hajxy xñähho'túutäm, hoy hajxy nja judiøsäm. Coo hajxy jaduhn xñähho'túutäm, jaduhnä Dios yajcähxø'cy coo mäjaa miøødä, coo quiuwiinmahñdiä.

²⁵ Coo Dios ja'a yHuang ñähdujcy coo yagho'ogøøjät, paadiä jäya'ayhajxy näje'e miäna'añ cooc tyijy Dios quia'a cuwiinmahñdiä, cooc tyijy mäjaa quia'a møødä. Cabä Diosmädia'agy hajxy miäbøcy, paady hajxy jaduhn miäna'añ. Hoyyä Dios ja'a wiinmahñdy häxøpy weeñtiä jia møødä, ni jaduhnä jäya'ay wyiinmahñdyhajxy häxøpy quia'a najtspaadøøyyä. Jaanä jaduhnduhmbä, hoyyä Dios ja'a mäjaa häxøpy weeñtiä jia møødä, ni jaduhnä jäya'ay miäjaahajxy häxøpy quia'a najtspaadøøyyä.

²⁶ Hermanodøjc, huuc madow hajxy, mänaa mijts Dios xwyiimbiiyyän, cab hajxy hñajty nämay mhøxpøquiä, näjé'eyyäm; cab hajxy hñajty nämay mmäyøøjä, näjé'eyyäm; cabä møjcuhudjt hajxy hñajty nämay mmøødä, näjé'eyyäm.

²⁷⁻²⁸ Nmäbøjcäm ja'a Diosmädia'agy hajxy. Xpiéjxäm jäya'ay hajxy hijty coo hajxy hijty nga'a høxpøquiäm, coo hajxy hijty nga'a mäyøøjäm, coo møjcuhudjt hajxy hijty nga'a møødhájtäm. Xxiøøghájtäm ja'a jäya'ay hajxy hijty jaduhn. Pero coo Dios hajxy xwyiimbíiwäm, jaduhnä Dios ja'a jäya'ay yajtsähdiuundägajch, ja'a hajxy hijty xpiéjxämbä. Jaduhnä Dios yajcähxø'cy

coo hajxy hānajtj tøyhajt quia'a hōxpøquiä, coo hajxy hānajtj tøyhajt quia'a māyøøjä, coo mõjcuhdujt hajxy hānajtj tøyhajt quia'a møødä.

²⁹ Hix, cab jaduhñ pøn jim ñiguiumayáanänä Dioswiinduum.

³⁰ Dios hajxy jaduhñ xpiädäacäm tu'ugmädia'agy møødä Jesucristo. Jaduhñä Dios yajcähxø'cy coo quiuwiinmahñdiä coo Jesucristo yaa quiejxy hädaa yaabä naaxwiin, coo hajxy hoy xñähho'túutäm. Jaduhñ hajxy xyajñähwáatsäm ja'a nbojpä ngädieeyhajtäm. Jaduhñ hajxy xpiädäacäm hawa'adstuum.

³¹ Jaduhñä Diosmädia'agy miäna'añ: “Cab hajxy hamdsoo nniguiumäyyämät. Tsögä Dios hajxy mõj jaančh pädäacäm.”

2

¹ Hermanodøjc, mänáajøch mijts nnähoočhooñän, mänáajøch mijts ja'a Diosmädia'agy nyajwiingapxøøčhooñän, cab mijts yajxón nmøødmädiaacy.

² Cooch hānajtj jim nnøcxa'añ maa mijtsän, tøøch hānajtj nwiinmahñdyhaty coo Jesucristo hajxy hānajtj nyajmøødmädia'aga'añ, coo hajxy hānajtj je'e tøø xñähho'túutäm cruzcøxp. Cábøch wiingmädia'agy hānajtj nmädia'aga'añ.

³ Nnajuøøbiøch hānajtj cooch hānajtj hoy nga'a capxa'añ ja'a nhamdsoo copc-háamhøch. Høxtä tsähgøøbiøch hānajtj; høxtä tsäyúubiøch hānajtj.

⁴ Hóyhøch hānajtj yajxón nga'a jagä mädia'agy, xpiuhbéjpøch ja'a Diosh-espíritu hānajtj ja'a miäjaahaam neby hajxy jaduhñ ca'xy mwiinjuø'owät.

⁵ Hix, chojpiä Dios ja'a jioot jaduhñ coo miädia'agy hajxy mmäbøjcät. Ja'a miäjaahaamä Dios hajxy xyajmäbøcy, ca'a quiuwiinmahñdyhāna'c hajxy jaduhñ xyajmäbøjp.

⁶⁻⁷ Ja'a hāna'c-hajxy cuwiinmahñdypä hädaa yaabä naaxwiimbä, cábøch hajxy jaduhñ xñänømy cooch nguwiinmahñdiä. Jaduhñhøch hāna'c-hajxy xñänømbä cooch nga'a cuwiinmahñdiä, ja'a mõjcuhdujtmøødpähajxy ja'a hädaa yaabä naaxwiimbä, ja'a Diosmädia'agy hajxy ca'a mäbøjpä. Mänitä miäjahajxy piögáanäxä møødä wyiinmahñdyhajxy coo hädaa yaabä naaxwiimbä hānajtj quiuhdägoyya'añ. Pønatiä Diosmädia'agy ca'xy cudiumb, ñajuøøby hajxy jaduhñ coo Dios tøyhajt quiuwiinmahñdiä. Paady hajxy jaduhñ ñajuø'øy cooch jaduhñ tøø nyajmøødmädia'agy coo Jesucristo hajxy tøø xñähho'túutäm, møød coo hajxy jim nnøcxáanäm Dioswiinduum. Jequiän ja'a Dios jaduhñ wyiinmaayy. Cahnä naaxwiimbä hānajtj yhawijy tiøø'xta'agy. Cabä Dios ja'a wyiinmahñdy choj yajwiingähxø'cy. Cahnä hajxy xyajwiinjuøøyyäm høxtä jäda'anäbaadyñä.

⁸ Pero cabä mõjcuhdujtmøødpähajxy jaduhñ wyiinjuø'owa'añ. Coo hajxy cu wyiinjuøøyy, cabä Jesucristo hajxy cu miøjpahbejty cruzcøxp. Piädaac ja'a Dios ja'a yHuung jaduhñ coo yaa wyiingudsähgø'owøøjät hädaa yaabä naaxwiin.

⁹ Jaduhñä Diosmädia'agy miäna'añ:

Ni pøn quia'a hixyñä, ni quia'a mädoynä,

ni quia'a wiinmayñä nebiatiä Dios hoyhajt weenhajt mio'owa'añ pøn jaduhñ chojpy.

¹⁰ Ja'a højtshajtäm, tøø Dios hajxy xyajwiinjuøøyyäm ja'a yhEspírituhaam nebiaty jaduhñ wyiinmahñdyhajty. Yhøxtaabiä yhEspíritu jaduhñ neby hajxy hoy xyajwiinjuøøyyämät.

¹¹ Cabä wiinghāna'c jaduhñ xñajuøøyyät nebiaty hānajtj mwiinmay. Jagooyyä miičh mhamdsoo juøhñdy jaduhñ ñajuø'owät. Jaanä jaduhñä Diospä, cab jaduhñ pøn ñajuøøbiä nebiatiä Dios wyiinmay. Jagooyyä Dios yhamdsoo Espíritu jaduhñ ñajuø'øy.

¹² Tøø Dios ja'a yhEspíritu hajxy xmióoyyäm coo højts ja'a miädia'agy jaduhñ nmäbøjcam. Ja'a yaabä juøhñdy, cab jaduhñ miäbaady nebiä Dios ja'a yh-Espíritän. Paady hajxy jaduhñ xmióoyyäm, jaduhñ hajxy xyajnajuøoyyäm coo hoyhajt weenhajt hajxy xñä'ä móoyyäm.

¹³ Jaduhñä jäya'ay hajxy nhawaandägájsäm coo hajxy jaduhñ xñä'ä móoyyäm. Jaduhñ hajxy nhawáanäm nebiatiä Dioshespíritu hajxy xyajwi-injuøoyyäm. Jaduhñ hajxy nyajwiinjuøødiägájsäm je'eguiøxpä coo Diosh-espíritu hajxy miøødhajpä. Ja'a häna'c-hajxy tyijy cuwiinmahñdypä, cabä wiinmahñdy hajxy ca'xy miøødä coo tijaty mädia'agy hajxy hñajty xya-jmøødmädia'aga'añ. Paadiä wiinmahñdy hajxy ca'xy quia'a møødä coo Diosh-espíritu hajxy quia'a møødä. Pero højts, cab højts nmädiäacäm ja'a nhamdsoo wiinmahñdyhaam.

¹⁴ Pønjetiä Dioshespíritu ca'a møød, cab hajxy wyiinjuø'øy nebiatiä Diosh-espíritu hajxy jia wi'i yajmøødmädia'aga'añii. Cábäc tyijy jaduhñ choobaady. Hix, coo Dioshespíritu hñajty mga'a møødä, cab jaduhñ mnä'ägädä wiin-juø'øwät nebiä Dioswiinmahñdy.

¹⁵ Pønjetiä Dioshespíritu møød, quiøxy wiinjuøøby hajxy jaduhñ. Pønä Dioshespíritu ca'a møød, cabä cuhdujt hajxy miøødä coo hajxy miäná'anät cooc tyijy jäya'ay ja'a Diosmädia'agy hajxy hoy quia'a yajnähixø'øy, ja'a jäya'ay ja'a Dioshespíritu hajxy møødpä.

¹⁶ Jaduhñ jim myiñ cujaay maa Diosmädia'aguiän: “Cabä Dios wyiin-mahñdy pøn ñajuøoyyä. Cabä Dios pøn yajnähixø'øyii.” Pero nmøødhájtäm ja'a Jesucristo wyiinmahñdy hajxy jaduhñ.

3

¹⁻² Hermanodøjc, cooçh jim nhooçhohñ maa mijtsän, cáboçh mijts tsipjaty nyajnähixøoyy. Ja'a ca'a tsipjátypøch mijts jaduhñ nyajnähixøoyy. Hix, je'enä hajxy hñajty mhityñä nebiä naamdagø'øybän maa Jesucristocøxpän. Jaduhñ hajxy hñajty mhity nebiä Diosmädia'agy ca'a mæbøjpän. Cahnä hajxy hñajty may mwiinjuø'øyñä maa Dioshespíritucøxpän. Y høxtä jäda'anäbaadyñä, cahnä hajxy jaduhñ may mwiinjuø'øyñä.

³ Je'enä hajxy mniwyiinhecy mniwyiindoyiinä coo hajxy mga'a hity tu'ugmädia'agy. Cab hajxy jaduhñ mniçhocy mnimiee'xyii. Je'enä hajxy jaduhñ mjäya'ayhaty nebiä Diosmädia'agy ca'a mæbøjpän.

⁴ Näje'e hajxy mmäna'añ: “Høøçh ja'a Pablo miädia'agy nbanøcxäp.” Näje'e hajxy mmänaambä: “Høøçh ja'a Apolos miädia'agy nbanøcxäp.” Coo hajxy jaduhñ mga'a hity tu'ugmädia'agy, cåhxø'p jaduhñ coo hajxy jaduhñ mjäya'ayhatyñä nebiä Diosmädia'agy ca'a mæbøjpän.

⁵ Høøçh Pablo, cáboçh møjcuhtdujt nmøødä. Ni ja'a Apolos jaduhñ quiaa møødäbä. Cab jaduhñ yhahixø'øy coo højts nmädia'agy hajxy jaduhñ xya-jtsibøoyyät. Jue'e højts, Dios højts jaduhñ xñä'ä moonsähajp. Dios højts jaduhñ xquiejx coo mijts jaduhñ nyajnähixø'øwät. Jaduhñ hajxy mmæbøjcy ja'a Dioscøxpä. Cøjwiinduum højts ja'a Dios ja'a tuuñg xmiøoyy.

⁶ Høøçh mijts ja'a Diosmädia'agy nyajnähixøøçhohñ. Mänitä Apolos hajxy jaduhñ xjiaac yajnähixøoyy. Pero Dios, je'e mijts jaduhñ xyajmæbøjc. Y tehñgahnä hajxy xjiaac yajmæbøga'añ. Tehñgahnä hajxy xjiaac yajmayø'øwa'añ.

⁷ Høøçh Pablo, cáboçh møjcuhtdujt nmøødä. Ni ja'a Apolos jaduhñ quia'a møødäbä. Jagooyyä Dios møjcuhtdujt miøødä. Je'eduhñ tu'ug xyajmæbøgäp. Je'eduhñ tu'ug xyajmayø'øwäp.

⁸ Tu'ugmädiä'agyhøch ja'a Apolos nmøødhity, hoy højts cøjwiingtuuñg nja møødä. Coø højts hoy ndünät, mänitä Dios møjmayhajt tiünät maa højtscøxpän.

Pero coo hõjts hamuumdu'joot nga'a túnät, mänitã Dios mayhajt hãnajty weeñtiã tiunaambã maa hõjtsçxpã.

⁹ Hõjts ja'a Dios nmøødtuumby. Y coo mijts hoy mjäya'ayhaty, jaduhñä jäya'ay tøyhajt hajxy miøødã coo Dios hajxy hoy xyagjäya'ayhaty. Mijts ja'a Dios ja'a mwiinmahñdy xyajtägätsäp neby hajxy jaduhñ mhídät nebiatiã jioot chocy.

¹⁰⁻¹¹ Tøøchã Dios xwyiinguexy coo mijts ja'a miädia'agy nyajñähixøøyyät ja'a Jesucristocøxpä. Xmióoyyhøchã wiinmahñdy jaduhñ nébiøch mijts jaduhñ hoy nyajñähixø'ød. Cabã cuhdujt jaduhñ myiñ coo pøn ja'a Dios miädia'agy yajtägätsät ja'a Jesucristocøxpä. Ween hajxy jaduhñ yajñähixøøbiã nébiøch tøø nyajñähixø'øyan.

¹² Pønjetiã Diosmiädia'agy mæbøjp, jaduhñ hajxy tiuunghaty nebiã jäya'ayhajxy jaduhñ miädoyhädät ja'a Jesucristocøxpä. Nãje'e hermanodøjc-hajxy hoy tiuñ. Paady hajxy jiaançh tehñ quiiumayii. Jiiby hajxy nãje'e, cab hajxy hoy tiuñ. Paady hajxy jaduhñ quia'a cumayii.

¹³⁻¹⁴ Coo Jesucristo hãnajty yaa quiädaactägatsa'añ, mänit jaduhñ quiähxø'øga'añ pønjaty hãnajty hoy tøø tiuñ. Cøjxta'axiøø ja'a Dios jiahmiedsa'añ neby hajxy hãnajty hoy tøø tiuñäbã. Møjmayhajt ja'a Dios tiunaambã maa hãna'c hoy tøø tiuñän. Jaduhñ je'e quiähxø'øgaambã pønjaty hãnajty hoy tøø quia'a tuñ. Cabã Dios mayhajt tiuna'añ maa hãna'c hoy tøø quia'a tũñäbän.

¹⁵ Hawa'adstuum hajxy yaghida'añii, pero hobiã nejpiä.

¹⁶ Jaduhñ hajxy nmäbáatäm hädaa hajxy njoothájtämbã nebiã Diostøjcän coo Dioshespíritu hajxy nmøødhájtäm maa hädaa njoodootyhajxiän. Mna-juøøby hajxy jaduhñ, túhmäts.

¹⁷ Pønjaty haxøøg nã'ägädã jäya'ayhajp, hoyyã Dioshespíritu hajxy jia møødã jioodooty, päda'agáanäp hajxy hajøøxc. Hix, coo ja'a Dioshespíritu hajxy mmøødã ja'a mjoodooty, páadiäts mjoot hajxy wa'ads myaghídät. Hix, cabã Dioshespíritu hoñä'ä maajã yhida'añ majaty hãnajty quia'a wa'adsä.

¹⁸⁻¹⁹ Nãje'eg tyijy mijts madiu'u mnajuø'øy neby hädaa yaabã naaxwiimbã wiinmahñdy myiñ. Cab hajxy hamdsoo mniguiumayøød coo hajxy mjaty coo hajxy mnajuø'øy. Nømã Dios miäna'añ cooc hädaa yaabã naaxwiimbã wiinmahñdy quia'a tsoobaady. Hahixøøby jaduhñ coo mhamdsoo wiinmahñdy hajxy mnajtshixøøñät, coo hajxy jaduhñ mnibiäda'agøøjät nebiã ca'a wiinjuøøbiän. Jaduhñ ja'a Dioswiinmahñdy hajxy hoy mwiinjuø'owät nebiã tiøyyän. Jaduhñ jim myiñ cujaay maa Diosmiädia'aguiän: "Dios yajcumädoowaamb ja'a hãna'c jaançh tehñ jiajpä mäwiinhøøn."

²⁰ Jaduhñ jim myiimbã cujaay maa Diosmiädia'aguiän: "Ñajuøøbiã Dios coo jäya'ay wyiinmahñdyhajxy quia'a tsoobaady, ja'a hajxy tyijpiä cuwiinmahñdy."

²¹⁻²² Nãje'e jäya'ayhajxy ñiguiumayii je'eguiøxpä coo jäya'ay miädia'agy hajxy pianøcxä ja'a tyijy tøyhajtmøødpä. Cab hajxy jaduhñ mbahíxät. Mijtsçxpä Dios cøxiã yhädiuunñ tijaty yaa hijp hädaa yaabã naaxwiin. Møød hõjts ja'a Dios jaduhñ xyhädiuumbã ja'a mijtsçxpä, hõjts yajñähixøøbiädøjc, møød høøch, møødã Apolos, møødã Pedro. Paadiã Dios jugyhajt hajxy xmióoyyäm neby hajxy jaduhñ hoy nyajtuungpáatämät. Hoy hajxy cu nja hó'cäm, hoy hajxy nyajtuungpadaañäm tijaty jãda'ahaty jájtäp túunäp, chaads tijaty jadaañäp tunañäp, je'eguiøxpä coo Diosmiädia'agy hajxy nbanøcxäm.

²³ Hix, coo Jesucristo hajxy mWiindsønhaty, paadiã miädia'agy hajxy myajtuunä. Y jaduhñä Jesucristobã, yajtúunäbã Tieedy miädia'agy je'ebä.

4

¹ Cab hõjts mõjcuhdujt jaduhñ nmøødä, ni høøch ni Apolos; xñä'ä moonsähajp hõjts ja'a Jesucristo jaduhñ. Dios hõjts jaduhñ tøø xwyiinguexy coo hõjts ja'a Diosmädia'agy ca'xy ngapxtówät, mädyijaty ja'a jäya'ayhajxy hijty jegyhajty quia'a wiinjuøøby.

² Mäduhñtiä jäya'ay mioonsähadyii, tsipcøxp hajxy quiudiúnät neby hajxy yhane'emyii. Paady hõjts jaduhñ ngudiunaambä neby hõjts ja'a Dios tøø xwyiinguexy.

³⁻⁴ Pero høøch, cábøch jaduhñ tii nmøjpäda'agy cooçh pøn waambaty xñänómät pø hõyhøch nyajñähixø'øy, pø caj. Hõyhøch cu nja mäna'an cooçh hoy nyajñähixø'øy, cab jaduhñ choobaada'añ. Tu'uquiä Jesucristo jaduhñ ñajuø'øy pø hõyhøch njaançh yajñähixø'øy. Y høøch, cooçh hamdsoo nniñänómøøjät pø hõyhøch nyajñähixø'øy, pø caj, cábøch nmädia'agy jaduhñ choobáadät. Cábøch nnajuø'øy pø hõyhøch tøø nyajñähixø'øy, pø caj. Pero, cab jaduhñ ñeipiä pø nnajuøøbiøch, pø cábøch nnajuø'øy. Ja'a Jesucristo tu'uquiä nägapxaamb pø hõyhøch tøø nyajñähixø'øy, pø caj.

⁵ Caj pøn nä'ä nägoobä mnä'ä nänómät coo tøø quiädieey pø cabä tøyhajt hñajty mnä'ä møødä. Coo Jesucristo yaa quiädaactägátsät, mänit hñajty jaduhñ yajcähxø'øga'añ neby hajxy nwiinmahñdyhájtäm, nebiaty hajxy hñajty hamee'ch tøø njäya'ayhájtäm. Mänitä Dios hajxy xquiumayáañäm coo hajxy hñajty hoy tøø ngudiúuñäm.

⁶ Páadyhøch cham tøø nmädia'agy ja'a høøchcøxpä møødä Apoloscøxpä neby hõjts nyajñähixø'øy, cábøch njoot jaduhñ chocy coo hajxy jaduhñ mnänómät coo tu'jäya'ay jiaty, coo tu'jäya'ay quia'a jaty. Pønñatiä Diosmädia'agy yajñähixøøby, je'eçh jaduhñ nnänøømby coo hajxy jaduhñ mga'a nänómät.

⁷ Cab jaduhñ yhooyä coo hajxy mniguiumayøøjät. Hix, Dios mäjaa hajxy jaduhñ xmiooby neby hajxy jaduhñ hoy mmädúnät. Cab jaduhñ yhooyä coo hajxy mmáná'anät coo hajxy hamdsoohaamby mbaady. Caj mijts pøn xñänømy cooc tyijy mijts mjaançh tehñ miøj mjaançh tehñ jiaançhä.

⁸ Nøm mijtsäda'a hamdsoo mniñänømyii cooc tyijy Jesucristo mmäbaatnä nej yhojiäya'ayhatiän, y cooc tyijy ja'a Diosmäjaa hajxy mjaançh tehñ miøødä. Jaduhñ mäwiin mijts mnibiädáacänä nebiä jäya'ayhajxy hanehmñbän, cooc tyijy mijts cuhdujt mmaas møødä que hõjts. Pero mgapxtägooby hajxy jaduhñ. Hoy hijty jaduhñ coo hajxy cu mhanehmñy. Näguipxy hajxy jaduhñ cu nhanéhmñäm.

⁹ Pero hõjts Diosquexypä, jaduhñ mäwíinhøch ndijy hõjts Dios xpiädaacy nebiä cuhdujtmøød ca'a hidaambän. Jaduhñ mäwiin hõjts xpiädaacpä nebiä cädieeyhäna'c yagho'oga'añijän. Hijxwiinduum hõjts jaduhñ njaançh tehñ chaachpøcy. Ja'a Diosmoonsähajxy tsajpootypä, je'e hõjts jaduhñ xyhijxp, møødä jäya'ayhajxy hädaa yaabä naaxwiimbä.

¹⁰ Nømä jäya'ayhajxy miäna'añ cooc tyijy hõjts tii nga'a jaty nga'a najuø'øy. Paady hõjts jaduhñ xñänømy coo hõjts ja'a Jesucristo miädia'agy nyajwa'xä. Pero mijts, mjaançh tehñ ñiguiumáayyap hajxy jaduhñ cooc tyijy mijts ja'a Dios xjiaançh tehñ yajwiinjuø'øy ja'a Jesucristocøxpä. Jaduhñ hõjts jäya'ayhajxy xñänøømbä cooc tyijy hõjts Diosmäjaa nga'a møødä. Pero mijts, mjaançh tehñ miøød ja'a Diosmäjaa tyijy. Mijts ja'a jäya'ayhajxy xñä'ägä wiingudsähgøøby. Pero hõjts jäya'ay xjiaançh tehñ piejxp xjiaançh tehñ tiehmñb cooc tyijy hõjts tii nga'a jaty nga'a najuø'øy.

¹¹ Jaguiay jayhu'ugy hõjts naxy nhity homiänaaxøøjä. Hagøødsø'øy hõjts nwit nducxy naxy nmäwädity. Xjiaançh tehñ chaachtiumñb hõjts

jäya'ayhajxy yaa homiänaaxøøjä. Cab højts tsänaadiaact maa tøø nmøødhaty ni mänaa.

¹² Hamdsoo cø'øhaam hamdsoo teciyaam højts nduñ nxajy. Jaduhñ højts nnägaayyøøc nbaady. Coø højts jäya'ay naxy xñänømy haxøøgjaty, cab højts ndsippäda'agy nma'adpäda'agy. Yajxón højts nhadsoy. Coø højts jäya'ay naxy xyajtsaachpøcy, nmee'xtujpy højts jaduhñ. Cab højts waamb jaduhñ nnä'ägädä mäna'añ.

¹³ Coø højts jäya'ay naxy xñähwaambety nä'ä nägoobä, mee'xxieemy højts jaduhñ njaanč tehñ yhadsoy. Høxtä jäda'anäbaadyñä højts jäya'ay xyhixy nebiä hujts nebiä haayän.

¹⁴ Hermanodøjc, jaduhñhøch mijts njuøøñä nebiä hamdsoo huungän. Páadyhøch mijts jaduhñ nmägapxy nhane'emy. Cábøch mijts jaduhñ nya-jtsähdiuna'añ.

¹⁵ Hoy mijts häna'c xjia yajnähiø'øy nämay ja'a Jesucristocøxpä, høøch mijts jaduhñ tu'uquiä xtieedyhajp ja'a Jesucristocøxpä, je'eguiøxpä coøch mijts jayøbajt nyajnähiøøyy coø Jesucristo hajxy tøø xñähho'túutäm, y coø jadähooc jiuypjøjtägajch.

¹⁶ Jaduhñhøch mijts nja näma'ay coøch hajxy jaduhñ xpiahíxät.

¹⁷ Y ja'a Timoteo, jaduhñhøch je'e ndsocy nébiøch nhamdsoo huungän ja'a Jesucristocøxpä. Pedyii jaduhñ jiaanč tehñ quiudiuñ ja'a Diosmädia'agy. Páadyhøch jim tøø nguexy maa mijtsän nébiøch mijts jaduhñ xjiahmiejt-stá'agät coøchä Jesucristo nbanøcxy. Wiinduhmyhagájpthøchä Jesucristo miädia'agy nyajwiingapxøøyyä maa tsajtojcän.

¹⁸⁻¹⁹ Høøch, mobädájpøch jim nnøcxaambä maa mijtsän coø Dios jaduhñ miäná'anät. Cabä jäya'ayhajxy näje'e miäbøcy cooc tyijy jaduhñ jim nga'a nøcxa'añ, je'eguiøxpä cooc tyijy njaanč tehñ chähgø'øy. Paady hajxy jiaanč tehñ ñiguiumayii. Howiaambaty hajxy jiaanč tehñ miäna'añ. Pero coøch jim jaduhñ njaanč nøcxät maa mijtsän, mänitøch jaduhñ jim nhixa'añ pø jaanč tøyhajt ja'a Diosmäjaa hajxy jiaanč møødä, ja'a hajxy jaduhñ niguiumäayyabä. Paady hajxy ñiguiumayii cooc tyijy ja'a Diosmäjaa hajxy jiaanč tehñ miøødä.

²⁰ Je'e jaduhñ jaanč tehñ choobaatp coø Diosmädia'agy hajxy hoy mgudiúnät. Cab jaduhñ choobaady coø hajxy nä'ä nägoobä mnä'ä xi'ig mnä'ä mädiá'agät.

²¹ Nøcxaambøch jim maa mijtsän. Coø mhaxøøgcuhdujt hajxy mnajtshixø'øwät, mänitøch hajxy hoy yajxón nmøødmädiá'agät. Pero pø cabä mhaxøøgcuhdujt hajxy nnajtshixø'øwa'añ, nmøødhøch cuhdujt jaduhñ coø hajxy nyajcumädówät.

5

¹ Tøøch nmädoyhaty coø tu'jäya'ay haxøøg jiaanč tehñ jiatcø'øy maa mijtsän, hoyyä Diosmädia'agy hajxy mja mäbøcy. Yhamdsoo huudájjac jaduhñ miøødtsänaaby. Ni pøn jaduhñ quia'a jatcø'øy, ni ja'a cajpä jiudíoshajxy.

² Hahixøøby jaduhñ coø yø'øya'ay hajxy mga'a mägu'ughájñät. Cu mhojy hajxy jaduhñ. Jaduhñ hajxy cu mjootmayhajty. Pero cab hajxiäda'a waamb tøø mnä'ägädä näma'ay. Høchähdiuunnä jaduhñ coø hajxy mga'a hojy. Cab jaduhñ yhooyä coø hajxy mniguiumayii.

³⁻⁴ Hóyhøch jim nga'a jagä hity maa mijtsän, nmøødhøch cuhdujt jaduhñ coøch mijts nhané'emät ja'a Jesucristocøxpä coø jaaya'ay hajxy mga'a mägu'ughájñät, ja'a yhamdsoo huudaj jaduhñ miøødtsänaabiä. Mänit hajxy myajpädsómät coø hajxy hänäjty mhamugø'øy. Dióshøch ja'a cuhdujt jaduhñ xmiooyy coøch mijts jaduhñ nhané'emät.

⁵ Cab hajxy jim myajméjtsnät maa tsajtøjcän. Ween jaduñ chaaçhtiuñii ja'a møjcu'ugóngäm. Wehndä jaduñ yhuuc tehm wyiinmahñmédsät coo haxøøg jiatcø'øy. Mänit jaduñ ñähwá'adsät ja'a piojpä quiädieey. Mänit jaduñ jim ñøcxpät tsajpootyp coo Jesucristo yaa quiädaactägätsät, ja'a nWi-indsønñhajtäm.

⁶ Cab jaduñ yhooyä coo hajxy myajcumáyät. Huuc mäadow hajxy, coo jäya'ay tsajcaagy hajxy yajcojy, mänitä chooy hajxy piädaacä harinajooty. Mänit hajxy yajmätijwäditø'øy. Mänitä harina chooy yajtägø'oyii.

⁷ Paadiä craa hajxy mga'a yajméjtsnät maa tsajtøjcän coo mijts jaduñ mnä'ä pahíxpät ja'a haxøøgpä. Jaduñ mijts jaduñ mga'a padu'udägóobiät. Hix, tøø Jesucristo hajxy xñähho'túutäm. Jaduñ nbojhajtäm ngädieeyhajtäm hajxy xyajñähwäatsäm.

⁸ Jaduñds je'e, tsøgä haxøøgpä hajxy najtshixøøyyäm. Tsøgä tøyhajtpä hajxy hamuumdu'joot hoy yajtu'uyóhyäm.

⁹ Tøøch mijts ja'a nocy tu'ug nyajnäjaayø'øy coo hajxy mga'a mägu'ughädät ja'a jäya'ayhajxy haxøøgwädijpä.

¹⁰⁻¹³ Je'eçh jaduñ nnänøømby pønda'a tyijy tuumb hermano. Cab hajxy jaduñ mmägu'ughädät ja'a hajxy wiingto'oxiøjc pawädijpä, møød hajxy jäya'ajie'e hadsojpä, møød ja'a quepychech hajxy wiingudsähgøøbiä, møød hajxy jäya'añähwaambejpä, møød hajxy jaduñ múucäp wädijpä, møødä jäya'ayhajxy mee'tspä. Ni jäya'ay jaduñmbä hajxy mga'a møødcáyät, pøn tyijy jaduñ tuumb hermano. Tsipcøxp hajxy jaduñ jim mhøxquejxpädsømat maa tsajtøjcän, pønjaty jaduñ haxøøgwädijpä. Pero cab højts cuhdujt nmøødhajtäm maa jäya'aguiøxpähajxiän, ja'a hajxy ca'a tuumbä hermano, hoy hajxy jaduñ jia wädijpä haxøøg. Dios jaduñ najuøøby nebiä tsaachpä hajxy mio'owa'añii. Homiajatiä jäya'ay hajxy nbáatäm ja'a hajxy haxøøgwädijpä, møød ja'a jäya'ajie'e hajxy hadsojpä, møød ja'a mee'tspähajxy, møød ja'a quepychech hajxy wiingudsähgøøbiä.

6

¹ Hermanodøjc, coo mijts hänäjty mniñäxø'øwø'øwa'añii, jim hajxy mnøcxät maa Dios quiu'ugän; cab hajxy jim mnøcxät maa cuduunghajxiän, ja'a Diosmädia'agy hajxy ca'a mabøjpä. Jaduñä hermanohajxy näje'e jiatcø'øy.

² Tøgä cab hajxy mnajuø'øyä coo højts jäya'ayhajxy nägøxiä nyajtøyhajtyegáanäm ja'a hädaa yaabä naaxwiimbä, coo Jesucristo quiädaactägätsät. Paady hajxy hänäjty jaduñ ndunáanäm coo Dios hajxy xquiu'ughajtäm. Hoorä, pø myajtøyhajtyegaamby hajxy hänäjty jaduñä, tii hajxy coo mga'a jajpä yajtøyhajtyec mädyiibä ca'a tsipjaty.

³ Tøgä cab hajxy mnajuø'øyä coo Diosmoonsäbaady hajxy nya-jtøyhajtyegáanämbä, ja'a hajxy jim hijpä Dioswiinduum. Jaduñds je'e, hoy hajxy jaduñ nyajtøyhajtyécämät mädyiijaty hädaa yaabä naaxwiimbä.

⁴ Pø jii hajxy tijaty myajtsibø'øy ja'a hädaa yaabä naaxwiimbä, tii hajxy jim coo nøcxy myajtødiägø'øy maa hajxy ca'a mabøjpän.

⁵ Hoçhähdiuunnä hajxy jaduñ mjatcø'øy. Jii jajpähäna'cäda'aduñ maa mitsän tu'ug metsc. Je'eduhñ xyajtødiägøøyyäp ja'a mdsiphajxy, hermanodøjc.

⁶ Cab jaduñ yhooyä coo hajxy hamiñ haxøpy mniñäxø'øwø'øwø'øjät maa cuduunghän, ja'a Diosmädia'agy ca'a mabøjpä.

⁷ Coo hajxy hänäjty tijaty myajtsibø'øy, myajcähxø'py hajxy hänäjty jaduñ coo Diosmädia'agy hajxy hoy mga'a cudiuñ. Maas hoy hit jaduñ coo pøn xmiägädiéyät, coo pøn xmiämédsät, cab hajxy mnäxø'øwø'øwät.

⁸ Pero cab jaduhñ yhooyä coo hajxy mnimiägädieeyóøjät, coo hajxy mnimiämeedsóøjät, haagä hermanodøjc.

⁹ Tøgä cab hajxy mnajuó'oyä coo haxøøghäna'c-hajxy jim quia'a tågø'owa'añ maa Dioswiinduumän. Tøyhajt jaduhñ. Jue'eñ jaduhñ nnänøømbby ja'a haxøøgjäya'ayhajxy, ja'a hajxy nimiøødtsänáayyabä jabiøcy, møød hajxy quepychech naaxpoch wiingudsähgøøbiä, møød hajxy wiingjäya'ay tio'oxiøjc møødtsänaabiä, møødä jäya'ay miäya'adiøjc møødtsänaabiä,

¹⁰ møødä mee'tspähajxy, møød hajxy jäya'ajie'e hadsojpä, møød hajxy müucäp wädiypä, møød hajxy wi'i quiapxpä, møød hajxy mee'tspä höhnda'agyhaam. Pønjaty jaduhñ jatcøøby, cab hajxy jim tiägø'owa'añ maa Dioswiinduumän.

¹¹ Jaduhñ hajxy hijty näje'e mbajatcøøbiä. Pero tøø Dios ja'a mbojpa mgädieeyhajxy xyajnähoa'añ ja'a yHespírituhaam maa Jesucristocøxpän, ja'a hajxy nWiindsønähjtämbä. Jaduhñä Dios hajxy tøø xpiädáacäm coo hajxy hoy nwädíjtämät, coo hajxy hoy njäya'ayhájjtämät nebiä jioot jaduhñ chocy.

¹² Jaduhñä jäya'ayhajxy näje'e miäna'añ coogä cuhdujt jaduhñ myiñ cooc hajxy hotyijatiä ndúunämät nnáxxämät. Tøyhajt jaduhñ. Pero cab jaduhñ xyhahixøøyyämät coo hajxy cøxiä wiinä ndúunämät nnáxxämät. Y cab hajxy ndehm yaghanáxxämät nebiä nwiinmahñdy hajxy hoy nhøxhíxxämät.

¹³ Paadiä Dios jøø'xytiøjc caadiøjc hajxy xmióoyyäm coo hajxy jaduhñ ngáayyämät coo hajxy jaduhñ nhúucämät. Pero nä'ä mädøyyä hajxy ngáayyämät nhúucämät, cab hajxy ngaayyahanáxxämät. Pero cab jaduhñ ñejiä pø cáayyäm pø ca'a ngáayyäm; hix, ñä'ägädä yajcuhdägoyyaambiä Dios je'e. Paadiä Dios hajxy xpiädáacäm coo miädia'agy hajxy ngudiúunämät. Pero cabä jioot jaduhñ chocy coo hajxy haxøøg nwädíjtämät.

¹⁴ Nebiä Dios ja'a yHuung yagjujypiøjquiän, jaanä jaduhñ højts xyagjujypiøgäänämbä ja'a miäjaahaam.

¹⁵ Huuc mäadow hajxy, coo Jesucristo hajxy nWiindsønähjtäm, paady jaduhñ quia'a nä'ägädä hoyyä coo cuhhiñdo'oxiøjc hajxy nmøødmáawämät.

¹⁶ Jaduhñä Diosmiädia'agy miäna'añ, coo jäya'ayhajxy ñimiøødma'awóøjät, jaduhñä Dios yhixy nebiä tu'ugpä jäya'ayän. Jaduhñds je'e, coo cuhhiñdo'oxiøjc hajxy nmøødmáawämät, jaduhñä Dios hajxy xyhíxxäm nebiä tu'ugpä jäya'ayän.

¹⁷ Pero coo Jesucristo miädia'agy hajxy nbanøcxämät, tu'ugjoot tu'ugwiinmahñdy ja'a Jesucristo hajxy jaduhñ nmøødhíjtämät.

¹⁸ Cabä cuhhiñdo'oxiøjc hajxy mmøødmá'awät; haxøøg jaduhñ. Hoy hajxy nej cu mja jatcøøw, cabä mni'x cabä mgopc nej jiaty jádät. Pero coo cuhhiñdo'oxiøjc hajxy mmøødmá'awät, mnä'ägädä mägädiehbiä mhamdsoo ni'x ja'a mhamdsoo copc hajxy jaduhñ.

¹⁹ Nej, cab hajxy mnajuó'oyä coo Dioshespíritu jiiby yhity mjuøhñdiootyhajxiä. Dios hajxy jaduhñ xmiiooyy. Jaaya'ay hajxy jaduhñ xyhuunghajp, paadiä miädia'agy hajxy myajtúunät; cabä mhamdsoo cuhdujt hajxy myajtúnät.

²⁰ Paady hajxy xyhuunghaty coo yHuung hajxy xñähho'tuuty. Paady hajxy hoy mwädítät, jaduhñ hajxy myajcähxø'øgät coo Dios miøjjä jiaanähä.

7

¹ Hoorä, tsøg hajxy mädiáacäm waambátyhøch mijts xmiäyajtøøyy nocyhaam. Hoy hit jaduhñ coo ya'adiøjc ja'a to'oxiøjc quia'a møødtsäná'awät.

² Pero coo hajxy hñajty mga'a mee'xtuga'añ, maas hoy hit jaduhñ coo to'oxiøjc hajxy mnä'ägädä pøgät, y weenä to'oxiøjc ja'a ñihyhap miøødhájpät.

3-4 Ja'a pøcyjiäya'ayhajxy, hamiñ haxøpy hajxy ñimiøødma'awóøjät. Cabä cuhdujt hajxy mmøødä maa mhamdsoo ni'xhajxiän. Hix, pø xmiøødma'awaambä mjamiøød jaduhñ, naxy mdehm miøødmá'awät, cab jaduhñ mnimiøøjjø'øgøøjät.

5 Jaduhñ hajxy mnä'ägädä cuhdujthädät coo møjcu'ugong hajxy xñä'ä yajtu'udägóyyät. Coö hajxy jaduhñ nämetsc mmäná'anät coö Dios hajxy mba'yá'axät, mänit jaduhñ yhooyä coö hajxy mga'a nimiøødma'awóøjät hamiñ haxøpy. Hoorä, coö Dios hajxy hñajty tøø mba'ya'axy, mänit hajxy mnimiøødmáawägombät. Mänitä møjcu'ugong hajxy jaduhñ xquia'a yajtu'udägóyyät.

6 Cábøch jaduhñ nmäna'añ coö hajxy mädsibø'øbä mbógät. Nnä'ä móobiøchä cuhdujt jaduhñ.

7 Maas hoy hit jaduhñ coö hajxy jaduhñ mnä'ägädä hídät nidiuhm nébiøch høøch jaduhñ nhitiän. Pero cøjhaminø'øy ja'a Dios hajxy tøø xpiädáacäm. Näje'e hajxy tøø xpiädáacäm coö hajxy nidiuhm nhítämät, näje'e caj.

8 Jaduhñds je'e, pøn jaduhñ nidiuhmhajpnä, jaduhñ ñä'ägädä mähmø'owät nidiuhm nébiøch høøch nhitiän. Y jaanä jaduhñduhmbä, ja'a yaamgto'oxyhajxy, cab hajxy piøjtägátsät.

9 Pero pø cab hajxy mmee'xtuga'añ, maas hoy hit jaduhñ coö hajxy mbógät, coö cuhhiñdo'oxiøjc hajxy xñä'ä yajcuhhínät.

10 Pero pønjaty jaduhñ tøø piøjnä, cham hajxy nmägapxy nhane'emy. Ca'a yhøøch nhamdsoo mädia'agy hädaa; Diosmädia'agy hädaa. Cab jaduhñ yhooyä coö to'oxiøjc ja'a ñihyhap piuhwá'adsät.

11 Pero coods jaduhñ piuhwá'adsät, cabä wiingya'adiøjc wyiingpógät. Maas hoy coö ñihyhap ñä'ägädä nämejtstägátsät. Y ja'a ya'adiøjc, jaanä jaduhñ je'ebä, cabä tio'oxiøjc yhøxmádsät.

12 Chámhøch njaac mädia'aga'añ. Ja'a nhamdsoo mädia'agyhøch hädaa; cab jaduhñ jim myiñ cujaay maa Diosmädia'aguiän. Pø jii ya'adiøjc tu'ug mäßøjpä, pø cabä tio'oxiøjc miäbøcy, cabä tio'oxiøjc yhøxmádsät pø jaac møødtsäna'awáanäp ja'a tio'oxiøjcäm.

13 Jaanä jaduhñduhmbä, pø jii to'oxiøjc mäßøjpä, pø cabä ñihyhap miäbøcy, cabä ñihyhap ñähgué'egät pø jaac møødtsäna'awáanäp ja'a ñihyhápäm.

14 Coö ya'adiøjc ja'a Diosmädia'agy hñajty quia'a mäßøcy, yaghoyóøyyäp je'e ja'a tio'oxiøjcäm je'eguiøxpä coö tio'oxiøjc miäbøcy. Jaanä jaduhñduhmbä, coö to'oxiøjc ja'a Diosmädia'agy hñajty quia'a mäßøcy, yaghoyóøyyäp je'ebä ja'a ñihyhápäm je'eguiøxpä coö ñihyhap miäbøcy. Coö hajxy jaduhñ yhodiuumä, paadiä yhuunghajxy jaduhñ yhodiúumäbä. Pø cabä tiaj tieedy häxøpy nidu'jäya'adiä quia'a mäßøcy, cab hajxy häxøpy yhodiúumäbä.

15 Pøn jaduhñ mäßøjp, coö jiamiøød ja'a ca'a mäßøjpä hadsip miäná'anät coö hajxy ñiyhøxmadsoøjät, ween hajxy jaduhñ ñiyhøxmächii. Jaduhñ jiájcombät nebiä tøø quia'a pøquiäbä. Hix, chojpiä Dios jioot jaduhñ coö hajxy hoy nhítämät.

16 Pøn jaduhñ mäßøjp, cab jaduhñ yajnajuø'øy pø yajmäßøgaambytiä ja'a jiamiøød ja'a ca'a mäßøjpä.

17 Cøjhaminø'øy ja'a Dios hajxy tøø xpiädáacäm. Jaduhñ hajxy jootcujc njaac hítämät neby hajxy hñajty nhítäm mänaa Dios hajxy xyajnáhdijäm coö hajxy nmädúunämät. Hädaa mädia'agyhøch homiaajä nyajnáhixøby majatiä hermanodøjc-hajxy yhamugø'øyän Dioswiingudsähgøøbiä.

18 Højts judíos, coö Jesucristo miädia'agy hajxy nbanócäxäm, cab hajxy ndsähdíuunämät, hoy hajxy nja judíoshájtäm. Y ja'a jäya'ayhajxy ca'a judíospä,

ja'a Jesucristo miädia'agy hajxy panøcxpā, ni je'ehajxy quia'a tsähdiúnāt, hoy hajxy quia'a ja judíoshaty.

¹⁹ Cab jaduhñ ñejpiä pø mjudíoshájp, pø caj. Je'e nä'ägädä tsoobaatp coo Dios miädia'agy mgudiúunāt.

²⁰ Jaduhñ hajxy mjaac hídāt neby hajxy hānajtý mhitian mānaa Dios hajxy xyajñahdijjiān coo miädia'agy hajxy mmäbójcāt.

²¹ Nāje'e mijts jāya'ay xjie'ehaty nebiä waj nebiä cuaayān, hoyyā Diosmādia'agy hajxy mja panøcxy. Cab hajxy jaduhñ mmøjpadā'agāt. Pero pø cabä mwiindsøn hajxy xyajtunaanñā, ween hajxy xyhøxmajtsnā.

²² Tøø mijts ja'a Dios xyajñahdijy coo miädia'agy hajxy mmäbójcāt, hoyyā jāya'ay hajxy hānajtý xjia je'ehaty nebiä waj nebiä cuaayān. Hix, tøø Jesucristo hajxy xyajñahwāatsām ja'a nbojpāhajtām ja'a ngädieeyhajtām. Hoorā, pønjatý hānajtý ca'a je'ehajtāp jaduhñ nebiä waj nebiä cuaayān mānaa hajxy yajñahdijjiān ja'a Diósām coo miädia'agy hajxy miäbójcāt, moonsā hajxy je'e tiúnāp ja'a Jesucristocøxpā.

²³ Tøø Jesucristo hajxy xñähho'túutām, paadiä Dios miädia'agy hajxy nmäbójcānā. Cabä jāya'ay miädia'agy hajxy nmäbójcānāt.

²⁴ Jaduhñds je'e, hermanodøjc, jaduhñ hajxy mjaac hídāt neby hajxy hānajtý mhitian mānaa Dios hajxy xyajñahdijjiān coo miädia'agy hajxy mmäbójcāt. Jaduhñä Dios hajxy hoy mmädúnāt.

²⁵ Myajtøøw hajxy jaduhñ pø hahixøøby jaduhñ coo cäxyiihāna'c-hajxy piógāt. Høøch nhamdsoo mādia'agy hādaa; cab jaduhñ jim myiñ cujaay maa Diosmādia'aguiān. Pero hahixøøby jaduhñ coöch mijts nmādia'agy xmiäbójcāt; hix, Dióshøch jaduhñ tøø xyajñahdijy coöch nmädúnāt.

²⁶ Pues høøch jaduhñ mānaamb coo jaduhñ yhahixø'øy coo hajxy mga'a pógāt, je'eguiøxpā coo tsø'ty häyohn wiädiñä jādā'ahaty.

²⁷ Pø jii mdo'oxiøjc, caj mhøxmádsāt. Y pø cabä to'oxiøjc mmøødä, ca'a mhøxta'ay.

²⁸ Cab jaduhñ yhaxøøgä coo mbógāt; y coo cäxyiihāna'c jaduhñ piógāt, ni jaduhñ quia'a haxøøgä. Pero coo hajxy jaduhñ piógāt, maas hamājaa jiugyhajt hajxy miānaxa'añ. Pāadyhøch jaduhñ nja māna'añ coo hajxy quia'a pógāt.

²⁹ Hermanodøjc, jue'eçh jaduhñ nja māna'ana'añ, ja ween quia'a habaady coo Jesucristo yaa quiädaactägatsa'añ hādaa yaabä naaxwiin. Cab hajxy yaa jejcy njaac tunāanām. Jaduhñds je'e, pønjatý to'oxiøjmøød, jaduhñ hajxy xyiicta'ag miädiaactā'agāt nebiä Dios hajxy hoy miädúnāt. Cabä yhuung tio'oxy hajxy ñādaj ñāmāañāt.

³⁰ Pønjatý jaduhñ jootmayhajp, ween hajxy jaduhñ quia'a jootmayhajñä. Pønjatý jaduhñ xoondaacp, ween hajxy jaduhñ quia'a xoondaacnā. Y ja'a haju-ubiädøjc-hajxy, ween hajxy jaduhñ yhity nebiä toogy hajxy ca'a møødpän.

³¹ Pønjatý jaduhñ yaa tsānaaby häyoob hādaa yaabä naaxwiin, ween hajxy jaduhñ yhity neby hajxy tii ca'a møødpän. Hix, hādaa yaabä naaxwiin, neby hajxy chamñ nhíxām, cøxaamb hādaaduhñ quiuhdägoyya'añ.

³² Jaduhñhøch njoot chocy coo hajxy tii mga'a nādaj mga'a nāmáyāt. Ja'a ya'adiøjc nidiuhmhajpā, caj tii ñādajy ñāmay. Jagoo tiajy miay nebiä Dios hoy miädúnāt.

³³ Pero ja'a craa to'oxiøjmøødpā, je'e tiajpy miaaby nebiä yhuung nebiä tio'oxy hoy miøødhídāt.

³⁴ Y cabä Dios hoy miäduna'añ. Jaanä jaduhñä cäxyiihāna'c-hajxypā, cab hajxy tii tiajy miay. Jagoo hajxy tiajy miay nebiä Dios hajxy hoy miädúnāt.

Hamuumdu'jootä Diosmädia'agy hajxy quiudiuna'añ. Pero ja'a to'oxiøjc ja'a ya'adiøjmmødpä, nebiä ñihyhap hoy miøødhídät, je'eyyã ñä'ä tajpy ñä'ä maaby.

³⁵ Páadyhøch jaduhñ nmäna'añ, mijts jaduhñ nja puhbedaan. Caj mijts jaduhñ nhane'ema'añ. Pero chójpíøch njoot jaduhñ coo hajxy hoy yajxón mwädítät, coo Diosmädia'agy hajxy hamuumdu'joot mgudiúnät.

³⁶ Pø jii mhuunghajxy tøø quiäxyijø'ø, ween hajxy piøcy, pø chojpy mjoothajxy jaduhñ. Cab jaduhñ yhaxøøgä coo hajxy jaduhñ piøgät.

³⁷ Pero pø cabä mjoothajxy chocy coo hajxy piøgät, ween hajxy jaduhñ quia'a pøcy. Hix, cabä cuhdujt pøn miøødä coo miich xyhané'emät maa mhuungcøxpän.

³⁸ Hoy jaduhñ coo mhuung myajpøgät. Jaanä hoy jaduhmbä coo mga'a yajpøgät; cab jaduhñ ñejpiä.

³⁹ Ja'a to'oxiøjc ya'adiøjmmødpä, cabä cuhdujt miøødä coo wiingpä miøødtsáná'awät. Pero coo ñihyhap yhó'ogät, mänit mabøcy wyiingpøgät pøn jaduhñ chojpy. Pero tsipcøxpä hermano wyiingpøgät.

⁴⁰ Pero maas jootcujc yhídät coo quia'a nä'ägädä pøjtägátsät. Høøch jaduhñ mänaamb. Ja'a Dioshespíritøch ndijy jaduhñ xñajtsapxøøyyäp.

8

¹ Näje'eç hajxy tøø xmiäyajtø pø hoy jaduhñ coo animalho'ogy hajxy ndsú'tsämät ja'a häna'c-hajxy quepychechwiinduum yojxypä. Tøyhajt jaduhñ coo hajxy nägøxiä tøø nmädoyhájtäm hädaagøxpä. Cab jaduhñ yhooyä coo hajxy nmänáanämät cooc tyijy hajxy cøxiä nwiinjuøøyyäm. Jaduhñä häna'c-hajxy näje'e miänaambä, ja'a hajxy yajcumayaambä. Pero coo hajxy hamiñ haxøpy nniçhojc nnimié'e'xämät, mänitä Diosmädia'agy hajxy maas hoy nmäbøjcämät.

² Pøn jaduhñ mänaamb cooc tyijy hotyiijä jiaty, høhndaacp jaduhñ. Cab jaduhñ tiøyyä coo hotyiijä jiaty. Ween jaduhñ jiaac habøcy.

³ Pønä Dios jaduhñ wiingudsähgøøby, ñajuøøbiä Dios jaduhñ pøn je'e.

⁴ Tsøg hajxy jadähooc jaac mädiáacäm pø hoy jaduhñ coo animalho'ogy hajxy ndsú'tsämät, ja'a häna'c-hajxy quepychechwiinduum yojxypä. Bueno, nnajuøøyyäm hajxy coo quepychech naaxpoch quia'a jujyquiä. Y nna-juøøyyäm hajxy coo Dios tiu'ugä.

⁵ Mayyä jäya'ayhajxy jaduhñ miäna'añ cooc tyijy ja'a Dioshajxy miayyä jim tsajpootyp chaads yaa hädaa yaabä naaxwiin. Je'eg hajxy jaduhñ jiaanç wiingudsähgøøby.

⁶ Pero højts jaduhñ mänáanäm coo Dios tiu'ugä, ja'a nDeedyhájtäm. Je'e jaduhñ hädiuun cøxiä näguipxy møødä yHuung. Paady hajxy jaduhñ xquiunú'u'xäm xpiädáacäm coo hajxy jaduhñ ween nwiingudsähgøøyyäm. Jaduhñ hajxy nmänáanäm coo Jesucristo hajxy nWiindsøn'hájtäm. Cabä wiingpä hajxy nwiindsøn'hájtäm. Møød je'e cøxiä yhädiuumbä. Høxtä højtspadyhájtäm hajxy xquiunú'u'xäm.

⁷ Pero cabä jäya'ayhajxy nägøxiä miäbøcy coo quepychech quia'a jujyquiä, coo naaxpoch quia'a jujyquiä. Näje'e jäya'ay quepychech naaxpoch hajxy wyiingudsähgøøyyä. Y coo hajxy jaduhñ chú'udsät tijaty jäya'ayhajxy yojxyp quepychechwiinduum, jootmayhajp hajxy jaduhñ cooc tyijy jaduhñ quia'a hoyyä coo hajxy chú'udsät. Hix, je'enä hajxy jaduhñ miäbøcyñä cooc tyijy quepychech jiujyquiä.

⁸ Nnajuøøyyäm hajxy coo Dios quia'a møjpäda'agy pø ndsú'tsäm pø caj ndsú'tsäm. Cab jaduhñ ñejpiä pø ndsú'tsäm pø caj ndsú'tsäm.

⁹ Pero hoy hajxy nja najuøøyyäm jaduhñ coo quia'a nejpiä pø ndsú'tsäm pø caj ndsú'tsäm, maas hoy hit jaduhñ coo nga'a tsú'tsämät, pø jii hermanohajxy näje'e quia'a najuøøbiä coo jaduhñ quia'a nejpiä coo hajxy ndsú'tsämät.

¹⁰ Tsøc mädiáacäm coo miich mnajuø'øy coo jaduhñ quia'a nejpiä coo yø'øduhmbä tsu'uäch mdsú'udsät. Hoorä, tsøc mänáanäm coo miich yø'øduhmbä tsu'uäch hñanjty mdsu'uäch maa quepychechwiinduumän. Hoorä, coo hermano jaduhñ tu'ug xyhíxät, ja'a ca'a najuøøbiä coo jaduhñ quia'a nejpiä coo miich jaduhñ mdsú'udsät, wehñdä je'e xpiadsú'tspät. Wehñdä miáná'anät cooc tyijy jaduhñ tøø quiädieey coo jaduhñ tøø xpiadsu'uäch.

¹¹ Y coo jaduhñ quiädieeyät, miichä pojpä hñanjty mmøød je'eguiøxpä coo miich hñanjty jim mgay. Hix, tøø mähdiøjc ñähho'tu'udyii ja'a Jesucristäm.

¹² Y coo miichä mähdiøjc jaduhñ myajcädieeyät, jaduhñ hñanjty tøø piaady nejpä miichä Jesucristo hñanjty tøø mmägadieeyän.

¹³ Hoorä, pø cädieeyaambä hermano tu'ug je'eguiøxpä cooch høøch yø'øduhmbä tsu'uäch ndsu'uäch, cáboch jaduhñ nnä'ägädä tsú'udsät mänaa, coo hermano ñä'ä cädieeyät.

9

¹ Cáboch pøñ xyhane'emy, túhmäts. Dióshøch xwyiinguejx, túhmäts. Hamd-soochä Jesucristo nhijxy, túhmäts, ja'a hajxy nWiindsønñajtämbä. Mijts ja'a Diosmädia'agy nyajmábøjc, túhmäts.

² Näje'e jäya'ayhajxy miäna'añ cooc tyijy høøchä Dios tøø xquia'a wiinguexy. Pero mmøødä tøyhajt hajxy jaduhñ coochä Dios tøø xwyiinguexy, je'eguiøxpä cooch mijts nyajmábøjcy ja'a Diosmädia'agy.

³ Cooch pøñ mänaa xñäma'ay cooc tyijy høøchä Dios tøø xquia'a wiinguexy, jaduhñhøch naxxy nhadsoy:

⁴ Nmøødhøch ndijy cuhdujt jaduhñ cooch mijts cay hu'ugy nmäyujwá'anät je'eguiøxpä coochä Diostuung nduñ.

⁵ Ja'a Jesucristo yhuchhajxy, miøødä cuhdujt hajxy je'e coo hajxy wiädítät to'oxiøjmøød. Jaduhñä Pedro miøødäbä, møødä Dioswiinguexyypähajxy. Jaduhñhøch cuhdujt nmøødäbä, hoyyä jäya'ayhajxy näje'e jia mäna'añ cooc tyijy høøch nga'a møødä.

⁶ Tøgä mmänaamb mijts jaduhñä coo højts cuhdujt nga'a møødä coo højts nduung nnajtshixø'øwät, coo højts ja'a Diosmädia'agy nyajwá'xät, høøch møødä Bernabé. Ja'a Diosquexyhajxy nägøxiä, tøø tiuung hajxy ñajtshixø'øy coo Diosmädia'agy hajxy yajwa'xy.

⁷ Yajmäjuuby hajxy je'e, y jaduhñ højts nyajmäjuyaambä. Hix, yajmäjuubiä soldadohajxy. Y jaanä jaduhñduhmbä, ja'a cudsaatypcamhajxy, jiøø'xypä tsaatyptsa'am hajxy. Y jaanä jaduhñduhmbä, ja'a meegcueendähajpähajxy, yhuucypiä meegtsi'tsnøø hajxy.

⁸ Ca'a yhøøch nhamdsoo mädia'agy hädaa; jaduhñä mädia'agy miänaambä ja'a Moisés jecy quiujáhyäbä.

⁹⁻¹⁰ Jaduhñ jim myiñ cujaay: “Cabä waj mhaxuu'tsø'øgät coo trigopajc hñanjty tiehñjo'oöch.” Coo Dios jaduhñ jecy miänaañ, jaduhñ miänaañ coo højts nyajmäjúyät. Hix, ja'a häna'c naaxpuhbähajxy møødä tsijpädøjc-hajxy, ñajuøøby hajxy jaduhñ coo hajxy yajmäjuya'añ. Jaanä jaduhñ højtspä, jaduhñ højts nyajmäjúubiät.

¹¹ Coo højts mijtsä Diosmädia'agy tøø nyajnähixø'øy, paady hajxy xmiäjúyät.

¹² Mmäjuubiä Diosquexy hajxy, túhmäts; maas may højts cuhdujt nmøødä coo højts mijts xmiäjúubiät.

Pero cahnä hõjts mänaa nmäna'aññä coo hõjts nyajmäjüyät. Choippy hõjts njoot jaduhñ coo Diosmädia'agy wiá'xät, ja'a Jesucristocøxpä, paady hõjts nhity jamiäjuy.

¹³ Pero nmøød hõjts cuhdujt jaduhñ coo hõjts nyajmäjüyät. Hix, ja'a häna'c-hajxy jim tuumbä tsajtøgooty, miøødä cuhdujt hajxy je'e coo hajxy quiáyät tijatiä cu'ughajxy jim quiuyoxøøby maa altarän.

¹⁴ Jaanä jaduhñduhmbä, tøø Dios yhane'emy coo Diosmädia'agy-yajwa'xpähajxy yajmäjüyät. Ja'a jäya'ayhajxy madoobä, je'eds hajxy jaduhñ mäjüyap.

¹⁵ Pero høøch, cábøch mänaa tøø nmäna'añ cooçh mijts xmiäjüyät. Jadúhñhøch njoot chocy cooçh jamiäjuy ndúnät. Y cooçh häyaa nnä'a yuuhó'ogät, cab jaduhñ ñejpiä, nágooçh hñajty tøø nduñ jamiäjuy.

¹⁶ Näje'e jäya'ayhajxy yajcumaya'añ je'eguiøxpä coo Diosmädia'agy hajxy yajwa'xy. Pero Dióshøch xwyiinguejx cooçh nyajwá'xät høøch; cábøch hamdsoojoot nyajwa'xy. Paady, cábøch nyajcumaya'añ. Y cooçhä Diosmädia'agy jaduhñ nga'a yajwá'xät, xyajcumädówäbøchä Dios jaduhñ.

¹⁷ Cábøch hamdsoojoot ndägøøyy Diosmädia'agy-yajwa'xpä. Dióshøch jaduhñ xwyiinguejx cooçh miädia'agy nyajwá'xät. Cooçh häxøpy tøø ndägø'øyy hamdsoojoot, mänítøch cu nyajmäjuuyy.

¹⁸ Jaanç tehñ xioondáacpøch jaduhñ cooçhä Diosmädia'agy nyajwa'xy jamiäjuy, hóyhøchä cuhdujt nja møødä cooçh cu nyajmäjuuyy.

¹⁹ Hix, cooçh jaduhñ nduñ jamiäjuy, cábøch pøn xyhane'emy. Pero chójpíøch njoot jaduhñ cooçh hoy piønä xyhané'emät, nágoo Diosmädia'agy hajxy miábøgät.

²⁰ Cooçh jim nhijty maa judíoshajxiän, jadúhñhøch nguhdujthajpä nebiä judíoshajxy quiuhdujthatiän, weenä Diosmädia'agy hajxy jaduhñ cu miábøjcy. Y cooçh jim nhijty maa jäya'ayhajxy hñajty yhane'emyiijän ja'a Diosmädia'agy, ja'a Moisés jecy quiujáhyäbä, jadúhñhøch nyaghanehmbä neby hajxy hñajty yaghanehmbän, weenä Diosmädia'agy hajxy jaduhñ cu miábøjcy, hóyhøchä cuhdujt nja nmøødä cooçh nga'a yaghané'emät.

²¹ Y cooçh jim nhijty maa jäya'ayhajxiän, ja'a cajpä judíospä, ja'a mädia'agy hajxy ca'a cudiumbä, ja'a Moisés jecy quiujáhyäbä, jadúhñhøch nguhdujthajpä neby hajxy hñajty quiuhdujthatiän, weenä Diosmädia'agy hajxy jaduhñ cu miábøjpä. Cábøch nmäna'ana'añ cooçhä Dios ja'a miädia'agy hñajty nga'a mábøjcä. Hix, nmábøjcábøchä Jesucristo miädia'agy jaduhñ.

²² Y cooçh jim nhijty maa hermanohajxiän, ja'a Diosmädia'agy hajxy ca'xy ca'a wiinjuøøbiä, jadúhñhøch nbaguhdujthajpä neby hajxy hñajty quiuhdujthatiän, je'eguiøxpä cooçh hñajty nyajnähixø'øwa'añ nebiä Diosmädia'agy hajxy maas hoy wyiinjuø'øwät. Majátyhøch jaduhñ nwädity Diosmädia'agy-yajwa'xpä, cábøchä jäya'ayhajxy jaduhñ nyagjootma'ady, weenä Diosmädia'agy hajxy jaduhñ miábøcy.

²³ Páadyhøch jaduhñ nguhdujthaty, jadúhñhøchä Diosmädia'agy hoy nyajwá'xät. Y cooçhä jäya'ayhajxy may nyajmäbøgät, mänítøch jaduhñ nxoondá'agät.

²⁴ Coo jäya'ayhajxy naxy ñiyhøxpäyø'øgyii, tu'jäya'ay jaduhñ nøcxy quiuhäyø'øgy, ca'a ñägøxiä. Tøyhajt jaduhñ. Jaduhñ mäwiin hõjtshájtäm, coo Diosmädia'agy hajxy nbanøcxäm, naxy hajxy hoy ndehm quiudiúunämät, jaduhñ hajxy jim nnøcxämät Dioswiinduum.

²⁵ Høxtahmdsä häyø'pädøjc-hajxy, tu'jøjpiä jioot ja'a wyiinmahñdy hajxy naxy piäda'agy coo hajxy jaduhñ quiuhäyø'øgät, túhmäts. Paadiä haxøøgpä hajxy jaduhñ quia'a nä'ägä nähdoñ. Premio hajxy jaduhñ móoyyap, y cab jaduhñ ñä'a jecy. Pero hõjtshájtäm, coo Diosmädia'agy hajxy hoy njaanç

tehm̄ quiudiúunämät, mänit hajxy jaduhñ jim̄ nnócxämät Dioswiinduum. Jim̄ds hajxy jaduhñ nhíjtämät cøjxta'axiøø.

²⁶ Ja'a häna'c cuhäyø'pädøjc-hajxy, tøyyä hajxy jaduhñ ñä'ä päyø'øgy, cab hajxy jaduhñ yhimybiäyø'øgy miaamybiäyø'øgy. Ja'a boxeadorhajxy jajpä mägox mädex, cab hajxy jaduhñ ñä'ä yemy ñä'ä wopy. Jaduhñ mäwlinäts høøch, tu'jøjpiøchä Diosmädia'agy nbanøcxy.

²⁷ Cábøchä haxøøgpä jaduhñ nnä'ägä nähdoñ. Ngudiúumbiøchä Diosmädia'agy jaanç tehñ yhoy. Páadyhøchä Dios jim̄ xyajnøcxa'añ maa wyiinduumän. Y cooç jaduhñ hoy nga'a cudiúnät, cáboch jim̄ xyajnøcxät, hóyhøchä jäya'ayhajxy hñajty tøø nja yajwiinhixø'øgy.

10

¹ Hermanodøjc, huuc mädown hajxy jaduhñ. Jéquiänä Dios ja'a joc ja'a nämä'a jaduhñ quiejxy maa nhaphájtäm maa ndeedyhájtämhajxy hñajtiän, møødä Moisés. Mänit hajxy jaduhñ jecy piadu'ubøjcy nägøxiä näwiinä. Mänit hajxy nägøxiä ñøønajxy coo Tsaptsmejy paquiä tiøøch.

² Ja'a Moisés hajxy hñajty näguipxy miøødwädiipy nägøxiä maa joc hajxy hñajty piawädiän, maa hajxy ñøønajxiän Tsaptsmejjiooty.

³ Mänitä Dios hajxy mioyyä ja'a cay ja'a hu'ugy. Mänit hajxy quiaaayy nägøxiä.

⁴ Mänitä Dios ja'a tsaa tu'ug yajtsäbijty. Mänitä nøø tiägøøyy xee'xpä. Mänit hajxy nägøxiä ñøøhuucy. Jaduhñ mäwlinäts ja'a Cristo neby yø'ø tsaajän. Hix, puhbéjtäp hajxy hñajty ja'a Crístäm majaty hajxy hñajty wiädity. Ja'a Cristo, Dios yHuung je'e.

⁵ Pero cabä Diosmädia'agy hajxy hoy nämay quiudiuuñ. Cabä Dios hajxy jaduhñ quiumaayyä. Paady hajxy jim̄ tiu'uho'cy pactuum.

⁶⁻⁷ Paady hajxy jaduhñ jiajty yhabejty coo haxøøgpä hajxy yhadsojcy, coo quepychech ja'a naaxpoch hajxy wyiingudsähgøøyy. Hijxtahñd jaduhñ coo hajxy nga'a pahijx nga'a padúunämät. Jaduhñ jim̄ myiñ cujaay maa Diosmädia'aguiän: “Mänit hajxy quiaaayy yhuucy quepychechwiinduum; mänit hajxy yhejch piujty quepychechwiinduum.”

⁸ Naje'e hajxy haxøøg jiatcøøyy. Paady hajxy nähii'xtägøøg mil yho'cy tu'xøøbä. Paady hajxy jaduhñ nga'a pahijx nga'a padúunämät.

⁹ Naje'e Dios hajxy yhiixmajch pø tøyhajt hajxy hñajty yajcumädowa'añijäm ja'a Dios. Mänit hajxy chahñchu'tsä. Cøjx hajxy je'e yho'ogy. Paady hajxy jaduhñ nga'a pahijx nga'a padúunämät.

¹⁰ Naje'e hajxy hñajty jootcujc quia'a hity, je'eguiøxpä coo hajxy hñajty quia'a mabøcy. Paadiä Dios ja'a mioonsä quiejxy, hoy hajxy yagho'ogyii.

¹¹ Paady hajxy jaduhñ jiajty yhabejty, hijxtahñd jaduhñ coo hajxy nga'a pahijx nga'a padúunämät. Paady cujaay yhity. Hix, habáatnäp jaduhñ coo Jesucristo yaa quiädaactägatsa'añ.

¹² Pøn jaduhñ niñänøømäp coo hamuumdu'joot miäbøcy, naxy tiehm̄ ñiyajcopcø'øwøøjät coo ñä'ä tu'udägóyyät.

¹³ Mijts ja'a møjcu'ugong xjia wi'i yajtu'udägoyyaamb. Hoy piønä jaduhñ jia yagjatcø'øwa'añii haxøøg. Pero jaduhñä Dios miäna'añ cooc hajxy xpiuhbedáanäm, neby hajxy jaduhñ nga'a tu'udägóyyämät. Tøyhajt jaduhñ coo hajxy xpiuhbedáanäm. Hix, cabä møjcu'ugongä miäjaa jaduhñ miäbaady nebiä Dios mäjaa miøødän.

¹⁴ Jaduhñds je'e, hermanodøjc, cabä quepychech, cabä naaxpoch hajxy mwiingudsähgø'øwät.

¹⁵ Mnajuøøby hajxy jaduhñ cooçh tøyhajt nmädia'agy. Hix, mwiiñjuøøby hajxy hädaaduhñ.

¹⁶ Coø tsuugay nyagjåjtäm mänaa vino hajxy nhúucäm, mänitå Dioscuju'uyåp hajxy nyéjcäm. Je'e jaduhñ ñänøømby coo hajxy tu'ugcopc tu'ugwiinmahñdy nhíjtäm, je'eguiøxpå coo Jesucristo ñø'ty jiaançh tehñ yaghäyooyy mänaa hajxy je'e xñähho'túutäm maa hädaa yaabå naaxwiinän. Y coo tsajcaagy hajxy nyajniñäguidøøyyäm, je'e jaduhñ ñänøømgumbå coo hajxy tu'ugcopc tu'ugwiinmahñdy nhíjtäm, je'eguiøxpå coo Jesucristo ja'a ñi'x ja quiopc ñähdujcy mänaa hajxy je'e xñähho'túutäm.

¹⁷ Coø tu'ugpå tsajcaagy hajxy ngaamiújcäm, paady hajxy tu'ugcopc tu'ugwiinmahñdy nhíjtäm, hoy hajxy nja nämáyyäm.

¹⁸ Jaduhñå judíøshajxy yhiipå tu'ugcopc tu'ugwiinmahñdy møødå Dios mänaa animal hajxy chu'uçhån, ja'a jäya'ayhajxy yojxypå altarwiinduum.

¹⁹ Jaduhñhøch nmäna'añ coo quepychech naaxpoch quia'a jujyquiå. Jaduhñhøch nmänaambå coo animal quia'a cunuu'xiå ja'a jäya'ayhajxy yojxypå quepychechwiinduum.

²⁰ Caj pues. Ja'a jäya'ay ja'a Diosmädia'agy hajxy ca'a mæbøjpå, coo animal hajxy yoxxy quepychechwiinduum, ja'a møjcu'ugong hajxy jaduhñ wyiingudsåhgøøby, ca'a Dyioså. Cábøch njoot chocy coo jäya'ay hajxy mmøødhídat tu'ugwiinmahñdy, ja'a møjcu'ugong hajxy wyiingudsåhgøøbiå.

²¹ Pø mhu'ugaambiå vino hajxy ja'a Dioscøxpå, cab hajxy hoy mhú'ugåt ja'a møjcu'ugongcøxpå. Pø mgayaambiå tsajcaagy hajxy ja'a Dioscøxpå, cab hajxy hoy mgáyåt ja'a møjcu'ugongcøxpå.

²² Cab jaduhñ yhooyå coo Dios hajxy nyagjootmä'tämåt. Hix, maas mæjaamøødå Dios que højtshåjtäm.

²³ Jaduhñå jäya'ayhajxy miäna'añ cooc cuhdujt hajxy nmøødhåjtäm hoy ñejpiå. Tøyhajt jaduhñ. Pero cab jaduhñ yhawiiñmatså coo hajxy hoy ñejpiå njatcøøyyämåt. Hix, coo hajxy hoy ñejpiå njatcøøyyämåt, cabå Diosmädia'agy hajxy hoy nyajtu'uyóhyämåt.

²⁴ Næje'e jäya'ayhajxy yhøxta'ay coo hajxy chänä'awåt coo hajxy yhäyówåt. Pero maas hoy jaduhñ coo nmædøjc hajxy nbuhbéjtämåt.

²⁵ Tsu'udså tsu'uçh hajxy jaduhñ mädyiiaty jim too'cåp halaplazpa'c. Pero cab hajxy myajtówåt pø tøø jäya'ay animal hajxy yoxxy quepychechwiinduum. Cab hajxy je'eduhñ mnä'å taj mnä'å máyåt ja'a tsu'uçhcøxpå.

²⁶ Hix, jaduhñå Diosmädia'agy miädia'agy: "Dios jie'e hädaa cøxiå maa hädaa yaabå naaxwiimbån."

²⁷ Coø pøn hajxy jaduhñ xwiówåt mägaabiå, hoy jaduhñ coo hajxy mnøcxåt, hoyyå craa ja'a Diosmädia'agy hånajty quia'a jagå mæbøcy. Y cab hajxy myajtówåt pø tøø animal hånajty quepychechwiinduum yoxyii. Cab hajxy mdaj cab hajxy mmáyåt ja'a tsu'uçhcøxpå.

²⁸ Pero coø pøn hajxy jaduhñ xyhawáañåt coo häna'c yø'ø animal hånajty tøø yoxxy quepychechwiinduum, cab hajxy jaduhñ mdsú'udsåt, weenå craa jaduhñ quia'a jootma'ady ja'a hajxy tøø xyhawáañåbå. Jaduhñå craada'a tiajy miay coo jaduhñ quia'a hoyyå coo yø'øduhmbå tsu'uçh hajxy ndsú'tsämåt, ja'a häna'c yojxypå quepychechwiinduum.

²⁹ Ja'a craa tøø xyhawáañåbå, je'eçh jaduhñ nnänøømby coo wehñdå jiootma'ada'añ. Cábøch jaduhñ nmäna'ana'añ coo mijts mjootma'ada'añ.

Næje'e jäya'ayhajxiåda'a miäna'ana'añ: "Ween yø'ø craa jaduhñ ñä'å jootma'ady, nmøødhøch cuhdujt jaduhñ cooçhå animal ndsú'udsåt, hoy häna'c tøø jia yoxxy quepychechwiinduum.

³⁰ Haa ca'a, nnämaabiöchä Dios Dioscujú'uyäp coöchä tsu'u'ch hänäjty tøø ndsu'u'ch. Tii'ch yø'ø craa jaduhñ coo xñä'ä nāma'ay coöch nga'a tsú'udsät."

³¹ Jaduhñds je'e, tsögä mädia'agy hajxy hoy yajxón yajtuun yaghíjtām homiädyibä coo hajxy ngaayy coo hajxy nhúucām. Coö jäya'ay hajxy jaduhñ xyhíjxāmāt coo mädia'agy hajxy hänäjty hoy yajxón nyajtuun nyaghíjtām homiädyibä, mänitā Dios hajxy miöjpäda'aga'añ jiaančhpäda'aga'añ.

³² Hix, coo mädia'agy hajxy hoy yajxón nyajtuun nyaghíjtāmāt homiädyibä, ni pøn jaduhñ quia'a jootmä'adāt, ni ja'a judíoshajxy, ni ja'a jäya'ayhajxy cajpä judíoshajpä, ni ja'a jäya'ayhajxy ja'a Diosmädia'agy maböjpä.

³³ Jaduhñhøch høøchpä, hoy yajxónhøchä nyajtuñ nyaghity homiädyibä nébiöchä jäya'ayhajxy jaduhñ xquiumáyāt. Cábøch pøn jaduhñ nyagjootma'ady. Hix, chójpiøch njoot jaduhñ coo jäya'ayhajxy nägøxiä ñähwá'adsät ja'a piojpä ja'a quiädieeyhajxy. Cábøch njoot chocy coöch nidiuhñ nbáadāt ja'a hoybä ja'a weenbä.

11

¹ Nébiöchä Jesucristo nbahixiän, jaduhñhøch mijts xpiahíjxpät.

² Hermanodøjc, xoondáacpøch jaduhñ coöch mijts xjiahmiejsta'agy homiänaajä, y coo Diosmädia'agy hajxy homiänaajä myajtuñ nebiátyhøch hajxy tøø nnajtscapxøøyyām.

³ Chójpiøch njoot jaduhñ coo hajxy mwiinjuø'øwät coo Jesucristo ja'a Dios Wyiindsønhaty y coo højtsä Jesucristo nWiindsønhtëmbä, højts ya'adiøjc-hájtām. Jaanä jaduhñä ndo'oxiøjc-hájtām hajxy xwyiindsønhtëmbä, højts ya'adiøjc-hájtām.

⁴ Maa hermanodøjc-hajxy yhamugø'øyän tsajtøgooty, coo ya'adiøjc jim tu'ug Dyiospa'yá'axät cuhjupmøød, cabä Jesucristo hamuumdu'joot wyiin-gudsähgø'øy; ni jaduhñ coo Diosmädia'agy cuhjupmøød yajwiinhixø'øwät.

⁵ Jaanä jaduhñduhmbä, coo to'oxiøjc-hajxy jii by Dyiospa'yá'axät cuhwa'ads tsajtøgooty, o coo Diosmädia'agy hajxy jii by yajwiinhixø'øwät cuhwa'ads, høchähdiuunnä hajxy je'eduhñ. Jaduhñ je'eduhñ piaady nejpiän yø'ø to'oxiøjc quihwaay hajxy yhøxme'xypän.

⁶ Jaduhñds je'e, pø cabä to'oxiøjc-hajxy tiägø'øwa'añ tsajtøgooty cuhjuuxy, ween hajxy jaduhñ ñä'ägä yajcuhme'xy. Y pø tsähdiuumb hajxy jaduhñ cuhme'xy, ween hajxy ñiguiuhjuuxy.

⁷ Pero ja'a ya'adiøjc-hajxy, cab hajxy je'e ween tsajtøgooty cuhjupmøød tiägøøbiä. Hix, jaduhñä Dios ja'a ya'adiøjc yhädiuunñ nebiä Diosän. Ja'a ya'adiøjc-cøxpä jaduhñ quiähxø'øgy coo Dios mājaa jiaanč tehñ miøødä. Pero ja'a to'oxiøjc-cøxpä quiähxø'øgy coo ya'adiøjc mājaa miøødäbä.

⁸ Coö Dios ja'a to'oxiøjc jecy yhädiuunñ, jayøjpä ya'adiøjc ja'a quiaach tu'ug piøjcäxä. Mänitā to'oxiøjc yajwa'añguiojjä caachhaam. Jaduhñ jim myiñ cujaay maa Diosmädia'aguiän. Pero cab jaduhñ miäna'añ coo ya'adiøjc yajwa'añguiojjä ja'a to'oxiøjc quiaachhaam.

⁹ Ja'a ya'adiøjc-cøxpä ja'a to'oxiøjc yhädiuunñäbä. Cab hajxy nmänáanämāt coo ya'adiøjc yhädiuunñä ja'a to'oxiøjc-cøxpä.

¹⁰ Päädiädsä to'oxiøjc-hajxy wiädítāt cuhjuuxy, jaduhñ hajxy yajcähxø'øgät coo hajxy yhane'emyii ya'adiøjcām. Jaduhñä Diosmoonsähajxy quiumay, ja'a hajxy jim tsajpootypä.

¹¹ Pero jaduhñä Dios hajxy jecy xquiunúu'xām ya'adio'oxy.

¹² Hix, jéquiänä to'oxiøjc yajwa'añguiojjä ja'a ya'adiøjc quiaachhaam. Jaanä jaduhñduhmbä, ja'a to'oxiøjc-cøxpä ja'a ya'adiøjc myiñguia'ay.

13 Huuc mäna'an mijts pø hawiinmats jaduhñ coo to'oxiøjc-hajxy cuhwa'ads Dyiospa'yá'axät tsajtøgooty.

14 Hočhähdiiuunnä jaduhñ coo ya'adiøjc quiuhwaayhajxy yoñ yajyéegät. Hoy piønä jaduhñ miäna'añ.

15 Pero hahixøøyyäp ja'a to'oxiøjc-hajxy jaduhñ coo quiuhwaay hajxy yajyéegät yoñ; jaduhñ je'eduhñ miäbaady nebiä cuhmochpäñ.

16 Jaduhñ højts nnä'ägädä yajnähiø'ø y coo to'oxiøjc-hajxy cuhmoch Dyiospa'yá'axät tsajtøgooty. Y jaduhñä hermanohajxy nägøxiä yajnähiøøbiä tsajtøgooty wiinduhmyhagajpt. Hoorä, pønjaty jaduhñ mänaamb cooc tyijy jaduhñ quia'a nejpiä coo to'oxiøjc-hajxy jaguiuhmoch tsajtøgooty Dyiospa'yá'axät, cabä tøyhajt hajxy ñäl'ägädä møødä.

17-19 Tøøch nmädoyhaty coo hajxy näje'e haxøøgtøjiämuum mniñäma'ayii maa hajxy tsajtøgooty mhamugø'øyan. Tøyhajtäda'a jaduhñ. Cab jaduhñ yhooyä y cábøch jaduhñ ngumay, hóyhøch jaduhñ nja najuø'ø y coo jäya'ayhajxy yhixa'añ pønjaty tøyhajt hoy wädijp.

20 Coo Jesucristo hänäjty yagho'oga'añii, mänitä jiamiøød ñämaayy coo hajxy chuugaamiügät ja'a Jesucristocøxpä. Pero mijts, coo hajxy naxy tsajtøgooty mhamugø'ø y, coo hajxy naxy mdsuugaamiucy, cabä Jesucristo hajxy naxy mjahmiech.

21 Hanidiuhmjaty hajxy naxy mgay. Cab hajxy naxy mdajy mmay pø jii mmägu'ughajpä caayyøøc hajxy miøødä quia'a møødä. Näje'e hajxy naxy mmu'ugyii.

22 Jim hajxy hawiinmats mgay mhú'ugät maa mhamdsoo tøjc-hajxiän. Cab jaduhñ yhooyä coo hajxy jaduhñ mjatcø'ø y maa Diostøjcän. Mya-jtsähdiuumbiä häyoobäya'ay hajxy jaduhñ. Cáboch mijts jaduhñ nnä'ägädä cumay coo hajxy jaduhñ mjatcø'ø y.

23 Hamdsoöchä Jesucristo xyajnähiøøyy nébiøch mijts tøø nna-jtsapxøøyyäm: Hoorä, mänittsuu, coo Jesucristo hänäjty tiooga'añii, mänitä Jesucristohajxy tiägøøyy tsuugaabiä møødä jiamiøødhajxy. Mänitä Jesucristo tsajcaagy quionø'cy.

24 Mänit Dioscujú'uyäp yejcy. Mänitä tsajcaagy yhaguidøøyy. Mänit miänaañ: "Huuc cay hajxy. Høøch nni'x høøch ngopc hädaa. Mijtscoøxpøchä häna'c xtiooga'añ. Cooch mijts mänaa xjiahmiejtstä'agät, jaduhñä tsajcaagy hajxy mgáyät."

25 Y coo hajxy hänäjty tøø chuugaabiädøøñä, mänitä Jesús vino quionø'cy copajooty. Mänit miänáangombä: "Cooch mijts nnähho'tu'udaannä, cooch nnø'ty nyaghäyowaannä, hawiinjemybiä Dios hajxy xmiøødyajcuhduga'añ. Hoorä, hädaa vino, hijxtahnd jaduhñ miähmø'øwa'añ nébiøch nnø'tiän. Y naaghooc hädaa vino hajxy mhu'ugy, mänitøch hajxy xjiahmiejtstä'agät."

26 Homiänaajä hädaa tsajcaagy hajxy hänäjty mgaya'añ, homiänaajä hädaa vino hajxy hänäjty mhu'uga'añ, myajcøhxø'py hajxy hänäjty coo Jesucristo hajxy tøø xñähho'túutäm. Hiç, wiimbijtägatsaambä Jesucristo. Yaa jadähooc quiädaactägatsa'añ hädaa yaabä naaxwiin.

27 Nebiä Jesucristo jiamiøødhajxy miøødcaayy miøødhuuquiän, jadúhñäc hajxy ngaayy, jadúhñäc hajxy nhúucämbät. Pønjatä howyiinmahñdy hänäjty ca'a møød coo hänäjty jaduhñ quiaya'añ, coo hänäjty jaduhñ yhu'uga'añ, haxøøg hajxy jaduhñ jiatcø'ø y ja'a Jesucristo ñi'xcøxpä ñø'tycøxpä.

28 Jaduhñds je'e, coo hajxy hänäjty mgaya'añ ja'a Jesucristocøxpä, coo hajxy hänäjty mhu'uga'añ ja'a Jesucristocøxpä, naxy hajxy jayøjpiä mdehm ñiñajuø'owøøjät pø howyiinmahñdy hajxy hänäjty mjaanç møød.

²⁹ Pønjaty jaduhñ caaby huucp ja'a Jesucristocøxpä, coo hajxy jaduhñ quia'a mõjpäda'agät coo Jesucristo hajxy xñähho'túutäm, yajcumädoöwáanäp hajxy jaduhñ.

³⁰ Näje'e hajxy mba'ambety; näje'e hajxy mga'a majaamøødä. Høxtä näje'ejaty hajxy jaduhñ tøø yho'ogy. Paady hajxy jaduhñ mjaty mhabety coo hajxy mga'a mõjpäda'agy coo Jesucristo hajxy tøø xñähho'túutäm.

³¹ Pero cabä Dios hajxy xyajcumädoöwämät coo howyiinmahñdy hajxy hñajty nmøødhájtäm coo hajxy hñajty ngayáanäm ja'a Jesucristocøxpä, coo hajxy hñajty nhu'ugáanäm ja'a Jesucristocøxpä.

³² Paadiä Dios hajxy tähoogaty xyajcumädoöwäm, jaduhñ hajxy xyajna-juøøyyäm coo miädia'agy hajxy hñajty hoy nga'a yajtúunäm. Y coo miädia'agy hajxy hoy nyajtúunämät, cab hajxy jiiby nnä'ä hädáacämät mõjcu'uhaam maa jäya'ayhajxy yhäda'aga'añän, ja'a hajxy ca'a mabøjpä.

³³ Jaduhñds je'e, hermanodøjc, coo hajxy hñajty mänaa mgaamiuga'añ ja'a Jesucristocøxpä, coo hajxy hñajty mänaa mhuucmuga'añ ja'a Jesucristocøxpä, naxy hajxy tu'cuhtuñ mdehm quiaachóonät. Mniyhahixø'øwøøjap hajxy jaduhñ.

³⁴ Pø myähó'cäp hajxy hñajty, jayøjp hajxy mnä'ägä cáyät maa mdøjc-hajxiän. Jaduhñä Dios hajxy xquia'a yajcumädoöwät coo hajxy hñajty mgaamiuga'añ ja'a Jesucristocøxpä, coo hajxy hñajty mhuucmuga'añ ja'a Jesucristocøxpä. Madiu'uñ hajxy tøø xjiaac mäyajtøy. Cooch jim nnócxät maa mijtsän, mänítøch jim nyajtødiägø'øwät.

12

¹ Hermanodøjc, tsøg hajxy mädiäacäm nebiatiä Dioshespíritu hajxy xpi-uhbéjtäm, coo hawiingatiä tuuñ hajxy xmióoyyäm. Naxy hajxy jaduhñ mdehm wyiinjüø'øwät.

² Mnajuøøby hajxy jaduhñ, coo Diosmädia'agy hajxy hñajty mga'a panøcxyñä, je'enä quepychech naaxpoch hajxy hñajty mwiingudsähgø'øyñä. Cabä quepychech naaxpoch quiapxy miädia'agy. Jaduhñ hajxy hñajty mwädity nebiä tu'udägoybän.

³ Huuc wiinjuø'øw hädaa mädia'agy hajxy. Pønjatiä Dioshespíritu jaduhñ najtsapxøøyyäp, cabä Jesús hajxy je'e haxøøg ñänømy. Y pønjatiä Dioshespíritu jaduhñ ca'a najtsapxøøyyäp, cab hajxy hoy miäna'ana'añ coo Jesús hajxy nWiindsønähájtäm.

⁴ Coo Diostuuñ hajxy jaduhñ ndúunäm, hawiingatiä Diostuuñ hajxy jaduhñ xpiáatäm. Pero ja'a Dios ja'a yhEspírituhajtiä hajxy jaduhñ xtiuuñgmóoyyäm.

⁵ Madiu'u ja'a Diostuuñ hajxy jaduhñ njaançh túunäm, pero tu'jäya'ayyä hajxy jaduhñ nWiindsønähájtäm. Ja'a Jesucristo je'e.

⁶ Ja'a Dios hajxy xpiuhbéjtäm coo tiuuñ hajxy ndúunämät, nebiatiä tiuuñ hajxy xpiáatäm.

⁷ Paadiä Dioshespíritu hajxy hawiingaty xtiuuñgmóoyyäm, jaduhñ hajxy hoy nnibihbéjtämät hamiñ haxøpy.

⁸ Hix, näje'e hermanohajxy tiuunmo'oyii ja'a Dioshespíritäm coo hajxy quiapx coo hajxy miädiä'agät nebiä jajpä häna'cän.

⁹ Näje'e hermanohajxy piuhbedyii ja'a Dioshespíritäm coo hajxy hoy ji-aançh tehñ miäbógät ja'a Diosmädia'agy. Näje'e hajxy miäjaamo'oyii nebiä jäya'ay hajxy yajmøcpógät, ja'a pøjc ja'a híxäbä.

¹⁰ Näje'e hermanohajxy piuhbedyii ja'a Dioshespíritäm coo hajxy hoy-yagjuøøñä tiuñ ja'a Diosmäjaagøxpä. Näje'e hajxy tiuunmo'oyii coo

Diosmädia'agy hajxy yajwá'xät. Näje'e hajxy tiuungmóoyäbä coo hajxy yhøxcábät pøn najtscapxøøyyäp ja'a Dioshespíritäm, pøn najtscapxøøyyäp ja'a møjcu'ugóngäm. Näje'e hajxy piaadyii coo hajxy quiápxät wiinghayuucjaty. Näje'e hajxy piáatäbä coo hajxy quiapxhoyø'owät waambatiä hermanohajxy tøø quiapxy wiinghayuucjaty.

¹¹ Hanidiuhmjatiä Dioshespíritu hajxy xtiuungmóoyäm, nebiä jioot chocy. Tu'uquiä ja'a Dioshespíritu jaduhñ.

¹² Ja'a tu'ugpä ni'x, ja'a tu'ugpä copc, madiu'u pajc miøødä. Pero tu'ugpä ni'x tu'ugpä copc hajxy jaduhñ nmøødhájtäm. Jaduhñ mäwiin højtshájtäm, tu'ugmädia'agy hajxy nhíjtäm coo Jesucristo hajxy nWiindsøn hájtäm, hoy hajxy nja nämayhájtäm.

¹³ Coo hajxy nnäbéjtäm, jaduhñä Dioshespíritu hajxy xpiädáacäm tu'ugmädia'agy nägøxiä, møødä judíoshajxy, møødä cäjpä judíoshajxy, møødä jäya'ayhajxy je'ehájtäbä wiinghänä'cäm, møødä jäya'ayhajxy hijpä hawa'adstuum. Nägøxiä ja'a Dioshespíritu hajxy nmøødhájtäm.

¹⁴ Ja'a tu'ugpä ni'x ja'a tu'ugpä copc, madiu'u pajc hajxy nmøødhájtäm.

¹⁵ Coods yø'ø tecz jaduhñ ñä'ä mäná'anät: “Cábøch tii nmach cábøch tii nnähdoñ nej yø'ø cø'øjän, páadyhøch miich jaduhñ xquia'a yajtuna'añ”, cab jaduhñ ñä'ä tøyäbä; haa ca'a, nyajyohy nyajnájxäm ja'a tecz jaduhmbä.

¹⁶ Jaanä jaduhñduhmbä, coo yø'ø taatsc jaduhñ miänáambät: “Cábøch jaduhñ nhixy nej yø'ø wiinän, páadyhøch miich jaduhñ xquia'a yajtuna'añ”, cab jaduhñ ñä'ä tøyäbä; haa ca'a, nyajmädóowäm ja'a taatsc jaduhmbä.

¹⁷ Coo hajxy häxøpy nhaagä wiinhájtäm, cab hajxy häxøpy nmädóowäm. Y coo hajxy häxøpy nhaagä mädohndhájtäm, cab hajxy häxøpy tii xjiøjxuugøøyyäm.

¹⁸ Jaduhñä Dios hajxy xquiunúu'xäm nebiaty hajxy xyajmädsójcäm. Paadiä ni'x ja'a copc hajxy nmøødhájtäm, paadiä cø'ø ja'a tecz hajxy nmøødhájtäm.

¹⁹ Coo hajxy häxøpy nhaagä pajc-hájtäm, cabä nni'x ja'a ngopc-hajxy häxøpy yhijtäm.

²⁰ Madiu'u ja'a pajc hajxy nmøødhájtäm ja'a tu'ugpä jäya'ay. Tu'ugni'x tu'ugcopc hajxy jaduhñ nmøødhájtäm.

²¹ Coo wiin häxøpy quiapxy, cabä cø'ø jaduhñ ñämä'awät: “Cábøch miich nyajmaajiaty.” Jaanä jaduhñä copcpä, coo häxøpy quiapxy, cabä tecz jaduhñ ñämäabiät: “Cábøch miich nyajmaajiaty.”

²² Pero nhaagä yajtuungpáatäm ja'a ni'x ja'a copc cøxiä, hoyyä pajc näje'e quia'a jagä møcä.

²³ Cabä ni'x ja'a copc hajxy teeñmuum nyajcähxø'øgáanäm, paadiä wit hajxy nmøødhájtäm.

²⁴ Pero ja'a nwiin ja'a njøjphajtämhajxy, cab jaduhñ ñejpiä coo hajxy nyajcähxø'cämät. Jaduhñhøch cham tøø nmädia'agy nebiä Dios ja'a nni'x ja'a ngopc-hajtämhajxy xquiunúu'xäm tu'ughamuum. Hoorä, jaduhñ mäwiin højtshájtäm, tu'ugmädia'agy hajxy nnimiøødhájtäm coo Diosmädia'agy hajxy näguipxy nmäbójcäm, coo Jesucristo hajxy näguipxy nWiindsøn hájtäm. Jaduhñä Dios hajxy xquiunúu'xäm coo hermanodøjc hajxy nwiingudsähgøøyyämät, hoy hajxy jia xoñ jia häyoy.

²⁵ Jaduhñä Dios quiumay coo hajxy nhíjtämät tu'ugjoot tu'ugcopc, coo hajxy nniçhojc coo hajxy nnimiée'xämät hamiñ haxøpy.

²⁶ Coo tu'jäya'ay chaachpógät, mänit hajxy nägøxiä njootmayhájtämät. Jaanä jaduhñduhmbä, coo tu'jäya'ay wyiingudsähgø'owøøjät, mänit hajxy nägøxiä nxoondáacämät.

²⁷ Nwiindsøn^hájtämä Jesucristo hajxy năgøxiă pøn^jatiă Diosmădia'agy măbøjp. Hawiingatiă Dios hajxy tøø xquiunúu'xăm.

²⁸ Năje'e hermanohajxy tøø tiuungmo'oyii ja'a Diósăm. Ja'a Dios quiuguexyhăjtăbă, je'e hajxy jayøjp tuungpaat. Mănit hajxy je'e tiuungpaatpă, ja'a Diosmădia'agy-yajwa'xpăhajxy, møødă Diosmădia'agy-yajwiinhixøøbiăhajxy. Năje'e hermanohajxy hoy-yagjuøøñă tiuñ ja'a Diosmăjaagøxpă. Năje'e hermanohajxy yajmøcpøcy ja'a jăya'ayhajxy năhba'amguhba'ambă. Năje'e hermanohajxy miăbuhbety. Năje'e hajxy jaduhñ miăgapxy yhane'emy. Năje'e hajxy piaadyii coo wiinghayuucjaty hajxy quiăpxăt.

²⁹ Hooră, cabă Dios hajxy năgøxiă xquiuguexyhăjtăm. Cabă Diosmădia'agy hajxy năgøxiă nyajwă'xăm. Cab hajxy năgøxiă nyajnăhixøøyyăm. Cab hajxy năgøxiă ndúunăm hoy-yagjuøøñă ja'a Diosmăjaagøxpă.

³⁰ Cab hajxy năgøxiă nba'amyajnăxăm. Cab hajxy năgøxiă tøø xpiăatăm coo ngăpxămăt wiinghayuucjaty. Y cab hajxy năgøxiă tøø xpiăatăm coo hajxy ngapxhoyøøyyămăt waambatiă hermano tøø quiapxy wiinghayuucjaty.

³¹ Tsøgă njoot hajxy pădăacăm hamuumdu'joot coo Dios tuung hajxy ween xmióoyyăm ja'a maas tsoobaatpă. Chămhøchă mădia'agy hajxy nya-năhixø'øwa'añ nebiă Dios miădia'agy hajxy hoy mmaas yajtu'uyó'oyăt.

13

¹ Coo nmădøjc hajxy nga'a tsojc nga'a mée'xămăt, cabă Diosmădia'agy hajxy hănajty hoy ngudiúnăm, hoy hajxy cu nja capx cu nja mădiăacăm madiu'u nebiă jăya'ayhajxy yaa jia capxiăn hădaa yaabă naaxwiin, nebiă Diosmoonsăhajxy jim jia capxiăn tsajpootyp.

² Coo nmădøjc hajxy nga'a tsojc nga'a mée'xămăt, cab hajxy nnă'ăgădă tsoobăatămăt, hoy hajxy cu nja najuøøyyăm tii jadăanăp tii tunăanăp, hoy hajxy cøxiă wiină cu nja najuøøyy cu nja jahmiéjtsăm, hoyyă møcmăjaa hajxy cu nja jaančh tehñ miøødhăjtăm hoy ñă'ă tiigøxpă.

³ Coo nmădøjc hajxy nga'a tsojc nga'a mée'xămăt, cab hajxy nnă'ăgădă tsoobăatămăt, hoyyă hăyoobăjăya'ay hajxy cøxiă wiină cu nja móoyyăm măduhñtiă hajxy nmøødhăjtăm, hoyyă jăya'ay hajxy cu nja năhho'túutăm.

⁴ Pønă miădøjc tsojp mee'xp, mee'xxieemy hajxy jaduhñ yhity. Hoy hajxy jaduhñ miădøjc-haty. Cabă hadsocywyiinhăñdy hajxy miøødă. Cab hajxy yajcumaya'añ.

⁵ Pønă miădøjc tsojp mee'xp, cab hajxy chăhdiuhndăgoyyă. Cab hajxy wyiinducă. Cab hajxy jiootma'ady, hoy hajxy cøxypănejpiă cu jia tunøø.

⁶ Cabă haxøøgpă hajxy chocy; ja'a tøyhajtpă hajxy jaduhñ chojpy.

⁷ Pønă miădøjc tsojp mee'xp, miee'xtujpy hajxy. Coo hajxy cøxypănejpiă tiunøøjăt ja'a miădøjcăm, cab hajxy jiootma'ady. Cab hajxy ñăxø'øwø'øy, cab hajxy ñăhøønø'øy. Hoy hajxy miăxi'igy, hoy hajxy miăgapxy, weenă craa ja'a tøø quiădiéyăbă jaduhñ yhuuc wiinhăñmech coo jaduhñ tøø quiădieey.

⁸ Habaadaamb jaduhñ coo jăya'ayă Diosmădia'agy hajxy hănajty quia'a yajwa'xaannă. Habaadaamb jaduhñ coo jăya'ayhajxy hănajty quia'a capx quia'a mădia'agaannă wiinghayuucjaty. Habaadaamb jaduhñ coo quia'a tsoobaadaannă tijatiă jăya'ayhajxy yaa ñajuøøby hădaa yaabă naaxwiin. Pero cøjxta'axiøø hajxy nničhoc nnimiee'xăanăm.

⁹ Cahnă hajxy hoy nwiinjuøøyyăm je'eguiøxpă coo hajxy yaa nhíjtămnă hădaa yaabă naaxwiin. Cahnă Diosmădia'agy hajxy hoy nhabøjcăm coo hajxy nyajwă'xămăt.

¹⁰ Habaadaamb jaduhñ coo Diosmädia'agy hajxy maas ca'xy nwiinjuø'wáañäm, paady hñajty pøn quia'a wäditaannä Diosmädia'agy-yajwa'xpä.

¹¹ Coo hajxy nmuutsc-hájtämnä, cahnä hajxy hñajty nwiinmahñméjtsäm. Pero coo hajxy nmøjjøyyänä, mänit hajxy nnajuøyyänä. Tøø hajxy nwiinmahñméjtsänä; cab hajxy nwiinmahñdyhájtänä neby hajxy tøø nmuutsc-hájtäm.

¹² Jaduhñ mäwínäts je'e, coo hajxy yaa nhíjtäm hädaa yaabä naaxwiin, cahnä Diosmädia'agy hajxy hoy nwiinjuøyyämnä. Cahnä Dios hajxy nhixyhájtäm. Pero coo hajxy jim nnøcxáañäm tsajpootyp, mänitä Dios hajxy nhixyhadáañäm neby hajxy je'e xyhixyhájtäm. Mänitä miädia'agy hajxy ca'xy nwiinjuø'wáañäm.

¹³ Tägøøgtu'u ja'a Dios hajxy xyhanéhñäm; coo miädia'agy hajxy nmäbøjcämät coo tiøyhajtä, chaads coo Jesucristo hajxy njøbhíxämät coo yaa quiädaactägatsa'añ, chaads coo nmädøjc hajxy ndsojc nmée'xämät. Hädaa høxhaambä jaduhñ maas tsoobaadaamb coo nmädøjc hajxy ndsojc nmée'xämät.

14

¹ Naxy hajxy ndehmñ ñiçhojc ndehmñ ñimiée'xämät hoy miänaajä. Je'e maas tsoobaatp. Jaanä jaduhñduhmbä, tsögä Dios hajxy nämáayyäm coo mäjaa hajxy ween xmiøoyyäm coo tiuung hajxy jaduhñ ndúuñämät. Je'e tsoobaatp coo hermano ja'a Diosmädia'agy hajxy yajwa'xy.

² Näje'e hermanohajxy, coo hajxy hñajty quiapxa'añ tsajtøgooty, cab hajxy howyiinjuøøñä miädia'agy. Hix, ja'a Dios hajxy jaduhñ miøødmädiaacyp, ca'a yhøjtshájtäm, je'eguiøxpä coo Dioshajtiä wyiinjuø'ø. Cab højts jaduhñ nnä'ägädä wiinjuøoyyäm. Najtscapxøøyyäp hajxy jaduhñ ja'a Diosheshpíritäm. Jagooyyä Dios jaduhñ ñajuø'ø waambaty hajxy jaduhñ miädia'agy.

³ Pero coo Diosmädia'agy hajxy ngápxämät nebiä jäya'ayhajxy jaduhñ wyiinjuø'øwät, mänitä jäya'ay ja'a Diosmädia'agy hajxy hoy nyajwiingapxøoyyämät, hoy hajxy jaduhñ nmägapx nhané'emät, hoy hajxy jaduhñ ngapxmøcpøjcämät.

⁴ Pøn Dioshajtiä nä'ä møødmädiaacp, je'e mäjaa nidiuhñ móoyyäp nebiä Diosmädia'agy maas hoy jiaac wiinjuø'øwät. Hix, cabä jäya'ayhajxy jaduhñ wyiinjuø'ø waambaty jaduhñ miädia'agy. Pero coo hermanodøjc ja'a Diosmädia'agy hajxy nyajwiingapxøoyyämät howyiinjuøøñä, mänit hajxy miäjaamo'owøøjät nebiä Diosmädia'agy hajxy jaduhñ maas hoy jiaac wiinjuø'øwät.

⁵ Maas tsoobaatp jaduhñ coo Diosmädia'agy hajxy ngápxämät howyiinjuøøñä; jaduhñä hermanohajxy nägøxiä wyiinjuø'øwät, ja'a hajxy mädoobä. Hoy hit jaduhñ coo Dioshajtiä hajxy nägøxiä mmøødmädiä'agät. Mänit mabøcy yhoyø'øwät coo hajxy mgapxhoyø'øwät, jaduhñä hermanohajxy nägøxiä wyiinjuø'øwät.

⁶ Hermanodøjc, cooçhä Dioshajtiä nnä'ä møødmädiä'agät maa mijtsän, cab hajxy jaduhñ hoy mwiinjuø'øwät. Pero mänit hajxy jaduhñ mwiinjuø'øwät cooçhä mijtsä Diosmädia'agy hoy nyajwiinhixø'øwät nebiätyhøçhä Dios ja'a miädia'agy hñajty xñajtscapxøoyyä.

⁷ Høxtáhmädsä xuuxpädøjc-hajxy, coo hajxy hoy quia'a xú'uxät, nägoodä hajxy nøcxy ñä'ä yajxu'uxy ñä'ä yajpøgø'ø, y cab hoy yajmädo.

⁸ Jaanä jaduhñduhmbä maa jäya'ayhajxy chiptuñän, coo soldado ja'a corneta hoy quia'a yajxú'uxät, cabä jiamiøødhajxy jaduhñ hoy chiptúnät. Nä'ä himybiäyø'øg nø'ø maamybiäyø'øgäp hajxy jaduhñ.

⁹ Jaduhñ mäwíinäts højtshájtäm, coo Dioshajtiä hajxy nmøødmädiáacämät, cabä nmädia'agy hajxy jaduhñ nniwyiinjuóøyyämät hamiñ haxøpy. Xiøøbä hajxy jaduhñ nnä'ä capx nnä'ä mädiáacämät.

¹⁰ Madiu'u hayuuc hajxy yaa ngápxäm hädaa yaabä naaxwiin. Hawiingaty hayuuc hajxy nniwyiinjuóøyyäm.

¹¹ Y coo mädia'agy hajxy hamiñ haxøpy nga'a nniwyiinjuóøyyämät hawingjaty, cab hajxy jaduhñ hoy nnimiøødmädiáacämät.

¹² Jaduhñ mäwíinäts mijts, mjaançh tehñ miänaamb mijts jaduhñ coo Dioshespíritu hajxy xtiuungmó'owät. Y myujwá'anäp ja'a tuung hajxy mädyii maas tsoobaatp. Jaduhñä hermanodøjc hajxy maas hoy myajwiin-gapxó'owät nebiä Diosmädia'agy hajxy jaduhñ maas hoy wyiinjuó'owät.

¹³ Jaduhñds je'e, pøn jaduhñ howyiinjuóøñä ca'a capxp ca'a mädiaacp, weenä Dios jaduhñ ñäma'ay coo miäjaamo'owóøjät nebiä miädia'agy quiapx-hoyó'owät.

¹⁴ Coo Dios hajxy nba'yáaxämät ja'a hayuuc-haamby mädyii Dioshajtiä wyiinjuóøbiä, cab hajxy nwiinjuóøyyämät, hoy hajxy cu nja mädiáacäm wiinmahñdyhaam. Y cab hajxy jaduhñ nnä'ägädä wiinjuóøyyäm.

¹⁵ Jaduhñds je'e, tsøcxä Dios hajxy pa'yáaxäm juøhñdyhaam, pero howyiinjuóøñä. Tsøcxä Dioshøy hajxy høøwäm juøhñdyhaam, pero howyiinjuóøñä.

¹⁶ Coo Dios hajxy nnämäáyyämät “Dioscujú'uyäp”, ja'a hayuuc-haamby mädyii Dioshajtiä wyiinjuóøby, cab hajxy hamdsoo nwiinjuóøyyämät. Y ja'a jäya'ayhajxy jii mädoobä, ni je'e hajxy jaduhñ quia'a wiinjuó'owät. Y cab hajxy hoy piamáná'anät “Dioscujú'uyäp.”

¹⁷ Hoyyä Dios hajxy yajxón cu nja nämááyyäm “Dioscujú'uyäp”, ja'a jäya'ayhajxy jii mädoobä, cab hajxy wyiinjuó'owät. Y cabä Diosmädia'agy hajxy jaduhñ jiaac wiinjuó'owät.

¹⁸ Høøch, nnämäabiøchä Dios “Dioscujú'uyäp” je'eguiøxpä cooçh pøn jaduhñ xquia'a najtspaadøøy nébiøch hayuuc-haamby ngapxiän, ja'a Dioshajtiä wyiinjuóøbiä.

¹⁹ Pero maa hajxy nhamugóøyyämän tsajtøgooty Dioswiingudsähgøøbiä, tsoobaatp jaduhñ cooçh howyiinjuóøñä ngápxät, hoy jia weeñtiä. Cab jaduhñ jiaty tsoobáadät cooçh hayuuc-haamby ngápxät ja'a Dioshajtiä wyiinjuóøbiä, hóyhøch yoñ cu nja capx. Hiç, cooçh howyiinjuóøñä ngápxät, wyiinjuó'owäp ja'a hermanohajxy jaduhñ, jadúhñhøchä Diosmädia'agy hajxy hoy nyajwiingapxó'owät.

²⁰ Hermanodøjc, tsøg hädaa mädia'agy hajxy hoy wiinjuóøyyäm nebiä møjhäna'c-hajxy hoy wyiinjuó'oyän. Yøø pigäna'c-hajxy, cahnä hajxy wyiinmahñmechñä. Pero cahnä haxøøgpä hajxy yhiçy yhabaadyñä.

²¹ Jaduhñä Diosmädia'agy jecy miänaañ: “Ja'a judíoshajxy, cábøchä nmädia'agy hajxy xmiäbøgaanä. Nguexáambiøchä jäguembä jäya'ay jim maa judíoshajxiän. Mänit hajxy miøødmädia'aga'añii wiinghayuuc-haamby. Pero ni jadúhñhøchä nmädia'agy hajxy xquia'a mabøgaanä, nømä Dios miäna'añ.”

²² Ja'a jäya'ay ja'a Diosmädia'agy hajxy ca'a mabøjpä, je'eguiøxpä højts hayuuc-haamby ngápxäm, ja'a Dioshajtiä wyiinjuóøbiä, ca'a jie'eguiøxpä ja'a jäya'ayhajxy ja'a Diosmädia'agy mabøjpä. Coo hajxy naçy ngápxäm ja'a hayuuc-haamby mädyii Dioshajtiä wyiinjuóøby, jaduhñä Dios hijxtahñd xii yecy coo jäya'ay tsaachpä peenä hajxy piaada'añ, ja'a Diosmädia'agy hajxy ca'a mabøjpä. Pero coo Diosmädia'agy hajxy naçy ngápxäm howyiinjuóøñä, jaduhñä Dios hijxtahñd xii yecy coo jäya'ay hoybä weenbä hajxy piaada'añ, ja'a Diosmädia'agy hajxy mabøjpä.

²³ Hix, coo hajxy nägøxiä ngápxämät ja'a hayuuc-haamby mädyii Dioshajtiä wyiinjuøøby maa hajxy hñajty nhamugøøyyämän tsajtøgooty Dioswiingudsähgøøbiä, y coo jäya'ayhajxy jim tiägø'owät, ja'a Diosmädia'agy hajxy ca'a mabøjpä, jaduhnda'a hajxy miäna'anät cooc tyijy hajxy nguhhínäm.

²⁴⁻²⁵ Pero coo Diosmädia'agy hajxy nägøxiä ngápxämät howyiinjuøøñä, mñitä jäya'ayhajxy wyiinjuø'owät, ja'a hajxy ca'a mabøjpä. Mñit hajxy yhuuc tehñ wyiinmahñmédsät. Mñit hajxy hamdsooyyä ñiñajuø'owøjät coo hajxy hñajty hoy tøø quia'a jäya'ayhaty. Mñit hajxy jaduhñ jyi-jcadá'agät. Mñitä Dios hajxy yhuuc tehñ wyiingudsähgø'owät. Mñit hajxy yhuuc tehñ miäna'anät coo Dios hajxy hñajty tøy xjiaançh tehñ miøødhíjtäm.

²⁶ Hermanodøjc, maa hajxy nhamugøøyyämän tsajtøgooty Dioswiingudsähgøøbiä, tsøg hajxy yajxon yagjajtäm nägøxiä, jaduhñä Diosmädia'agy hajxy maas hoy nmaas mabøjcämät. Naje'e Dioshøy hajxy yhøwa'añ. Naje'e hajxy yajnähixø'owa'añ. Naje'e hajxy miädia'aga'añ waambatiä Diosmädia'agy hajxy hñajty tøø ñajtsapxø'øyii ja'a Diósäm. Naje'e hermanohajxy quiapxa'añ hayuuc-haamby mädyii Dioshajtiä wyiinjuøøby. Y naje'e hermanohajxy quiapxhoyø'owa'añ waambatiä hermanohajxy hñajty tøø quiapxy ja'a hayuuc-haamby ja'a Dioshajtiä wyiinjuøøbiä.

²⁷ Coo hajxy mänaa ngápxämät ja'a hayuuc-haamby ja'a Dioshajtiä wyiinjuøøbiä maa hajxy hñajty nhamugøøyyämän tsajtøgooty Dioswiingudsähgøøbiä, nämetsyä nädägøøquia hajxy ngápxämät hanidiuhmjaty. Mñitä hermano tu'jäya'ay xquiapxhoyøøyyämät.

²⁸ Pero pø cabä hermanohajxy jim naje'e jiaty capxhoyø'ow, mejor ween hajxy jim nga'a nä'ägädä cápxämät tsajtøgooty ja'a hayuuc-haamby mädyii Dioshajtiä wyiinjuøøby. Wiingtuum hajxy nøcxy nnä'ägädä cápxäm jaduhñ hanidiuhmjaty. Xmiädóowämäp ja'a Dios hajxy jaduhñ.

²⁹ Jaanä jaduhñduhmbä, coo hermanohajxy hñajty quiapxa'añ waambaty hajxy hñajty ñajtsapxø'øyii ja'a Diósäm, ween hajxy nämetsyä nädägøøquia quiapxy. Y ja'a hermanohajxy jaac jiiä, mñit hajxy jaduhñ miäna'anät pø tøø hajxy hoy miäday, pø caj.

³⁰ Y coo wiinghermano hñajty quiapxa'añ waambaty hñajty ñajtsapxø'øyii ja'a Diósäm, weenä hermano yhuuc hamoñ, ja'a hñajty capxpä.

³¹ Hanidiuhmjaty hajxy ngápxämät nägøxiä waambatiä Dios hajxy hñajty xñajtsapxøøyyäm. Jaduhñ hajxy nägøxiä maas hoy nhabøjcämät; jaduhñ hajxy nägøxiä nniguiapxwíjjämät.

³² Hix, coo miich hñajty mgapxa'añ waambaty miiçhä Dios hñajty xñajtsapxø'owaanä, mñit mgápxät coo hñajty tøø xyhabaatä.

³³⁻³⁴ Jaduhñä Dios quiumay coo hajxy hanidiuhmjaty ngápxämät. Cab jaduhñ quiumay coo hajxy nägøxiä nxiicmujc nmädiaacmújcämät tsajtøgooty.

Cab jaduhñ yhoyyä coo to'oxiøjc-hajxy jiiäby quiápxät tsajtøgooty maa Dios hajxy hñajty nwiingudsähgøøyyämän. Cabä Dios jaduhñ miäna'añ coo hajxy jiiäby quiápxät. Jaduhñä hermanohajxy nägøxiä quiuhdujthaty wiinduhmyhagajpt. Jaduhñä Diosmädia'agy miäna'añ coo to'oxiøjc-hajxy miädia'agymiäbógät.

³⁵ Hoçhähdiiuunnä jaduhñ coo to'oxiøjc-hajxy jiiäby quiápxät tsajtøgooty. Pø cabä Diosmädia'agy hajxy hñajty tøø wyiinjuø'øy tsajtøgooty, jimä ñihyhap hajxy miäyajtówät maa yhamdsoo tøgootyhajxiän.

³⁶ Jaduhñä hermanodøjc-hajxy nägøxiä miäna'añ wiinduhmyhagajpt coo to'oxiøjc-hajxy jiiäby quia'a capx quia'a mädiá'agät tsajtøgooty nebiä

Diosmädia'agy miäna'añ. Y mijts jim hijpä Corintos, jaduñ mijts mbaguhdujthájpät. Caj mijts mhamdsoo cuhdujt myajtúnät.

³⁷ Nébiøch cham ngujaay, Diosmädia'agy hädaaduhñ. Naxy hajxy jaduñ mdehm miäbøgät, pønjaty jaduñ niñanøømäp coo Dios hajxy ñajtscapxøøyyäxä, coo Dioshespíritu piuhbedyii.

³⁸ Pønjaty hajxy jaduñ ca'a mäbøgaamb, cabä Dios hajxy jaduñ quiu-maya'añii.

³⁹ Jaduhñds je'e, hermanodøjc, tsøgä Dios hajxy nämáayyäm coo hajxy tehngajnä ween xpiuhbéjtämät, coo miädia'agy hajxy xñajtscapxøøyyämät. Jaduhñä miädia'agy hajxy hoy nyajwä'xämät. Pøn jaduhñ capxaamb mädia'agaamb ja'a hayuuc-haamby ja'a Dioshajtiä wyiinjuøøbiä, ween hajxy jaduñ quiapxy, ween hajxy jaduñ miädia'agy.

⁴⁰ Pero tsøgä Diosmädia'agy hajxy hoy yajxon yagjåjtäm tsajtøgooty.

15

¹⁻² Hermanodøjc, tsøg hajxy jahmiejstáacäm coo Jesucristo hajxy tøø xñähho'túutäm. Jaduhñhøch mijts tøø nyajwiingapxøø'y. Tøø hajxy jaduñ nmäbøjcäm. Coø hajxy tehngajnä nmäbøjcämät hamuumdu'joot, mänit hajxy jim nnøcxämät Dioswiinduum. Pero coø hajxy jaduñ nga'a mäbøjcämät, cab hajxy jim nnä'ägädä nøcxämät.

³ Jaduhñhøch mijts tøø nyajwiingapxøø'y nebiátyhøchä Dios tøø xñajtscapxøøyyä. Jaanç tehñ choobaatp hädaa Diosmädia'agy jaduñ. Tøø Jesucristo hajxy xñähho'túutäm; jaduñä nbojpä ngädieyhåjtäm hajxy tøø xyajñähwáatsäm. Jaduhñ jim myiñ cujaay maa Diosmädia'aguiän.

⁴ Coø Jesucristo hänajty tøø yho'ogy, mänit hoy ñaaxtägøø'y. Mänit hoy jiu-jypiøjtägach cumaaxc. Jaduhñ jim myiñgombä cujaay maa Diosmädia'aguiän.

⁵ Mänitä Pedro ja'a Jesucristo hoy wyiinguhixøø'y. Mänitä Jesucristo hoy wyiinguhixøøyyägumbä ja'a jiamiøødhajxy, ja'a nämajmetspäjäya'ayhajxy.

⁶ Mänit hoy wyiinguhixøøyyägombä ja'a miägu'ughajpähajxy nämägooxmägo'xnaxiä. Näje'eyyä hajxy tøø yho'nä, caj ñämayyä.

⁷ Mänitä Jacobo ja'a Jesucristo jadähooc wyiinguhixøøyguombä. Mänitä Jesucristo hoy wyiinguhixøøyyägombä ja'a jiamiøødhajxy nägøxiä.

⁸ Høøch, høxháamhøchä Jesucristo njaac tehñ yhiixy. Pero cábøch mähdiøjc jaduñ nnä'ägädä tsoobaady.

⁹ Cábøch cuhdujt møc nmøødä nej yøø Dioscuguexypä cuhdujt hajxy møc jiaanç tehñ miøødän. Cábøch mähdiøjc nhawiinmatsä coøch mähdiøjc jaduñ nniñanømøøjät coøch Dios xquiuguexyhåjpä. Hix, haxøøghøch hijty njäya'ayhaty. Nyajtsaächpøjpøchä jäya'ayhajxy hijty, ja'a Diosmädia'agy hajxy hijty panøcxpä.

¹⁰ Pero coøchä Dios xjiaanç cuguexyhaty, páadyhøch jaduñ xpiuhbety. Hóyhøch nduñ. Maas máyhøchä Diosmädia'agy tøø nyajwa'xy ja'a nmädia'agyháamhøch que ja'a Dios quiuguexypähajxy tøø yajwa'xy, ja'a hajxy jaac jimä. Ca'a yhøøch jaduñ tøø nnä'a piy ngopcóotyhøch; Diøshøchä wiinmahñdy tøø xmio'oy. Jaduhñhøchä Dios xpiuhbety ja'a miäjaahaam.

¹¹ Pero cab jaduñ ñejpiä pønjaty mijtsä Diosmädia'agy tøø xyajwiingapxøø'y, pø høøch, pø wiinghäna'c. Tu'ugmädia'agy højtsä Diosmädia'agy nyajwa'xy. Y tøø mijtsä Diosmädia'agy mmäbøcy.

¹² Jaduhñ højtsä mädia'agy nyajwa'xy coø Jesucristo jiu-jypiøjtägajch coø hänajty tøø yho'ogy. Mayyä jäya'ayhajxy jaduñ quia'a mäbøcy cooc tyijy ja'a ho'oguiäya'ayhajxy quia'a jujypiøga'añ. Cabä tøyhajt hajxy jaduñ ñä'a møødä.

13 Pø cab häxøpy jaduhñ tiøyyä coo ho'oguiäya'ayhajxy jiuypipiøga'añ, cabä Jesucristo cu jiuypipiøjcy.

14 Y coo Jesucristo häxøpy tøø quia'a juypipiøcy, cajxä hädaa mädia'agy häxøpy choobaady neby højts jaduhñ nja yajwa'xy. Y nej mijtsä mädia'agy hajxy mja mäßøcy, ni je'e häxøpy quia'a tsoobaady.

15 Jaduhñ højtsä Diosmädia'agy nyajwa'xy coo Dios ja'a Jesucristo yagjuypipiøjcy. Pø cab häxøpy jaduhñ tiøyyä, høhñdaacp højts häxøpy ja'a Dioscøxpä. Hix, pø cab häxøpy jaduhñ tiøyyä coo ho'oguiäya'ayhajxy jiuypipiøga'añ, cabä Dios ja'a Jesucristo cu yagjuypipiøjcy.

16 Pø cab häxøpy jaduhñ tiøyyä coo ho'oguiäya'ayhajxy jiuypipiøga'añ, cabä Jesucristo cu jiuypipiøjcy.

17 Y coo Jesucristo cu quia'a juypipiøjcy, cabä mädia'agy häxøpy choobaady neby hajxy nmäßøjcäm. Y cabä nbojpä ngädieeyhajxy häxøpy ñähwáatsäm.

18 Y tøø ho'oguiäya'ayhajxy häxøpy yhäda'agy møjcu'uhaam, hoy hajxy cu jia mäßøc ja'a Jesucristo miädia'agy.

19 Coo Jesucristo cu quia'a juypipiøjcy, cab hajxy häxøpy jim nnøcxáanäm tsajpootyp. Tøø hajxy häxøpy nniwyiinhøhñäm hamiñ haxøpy. Hoñäxuu'tsnä jäya'ay hajxy häxøpy xyhíxäm.

20 Pero tøyhajt jaduhñ coo Jesucristo jiuypipiøjtägajch. Jayøjp je'e jiuypipiøjtsohñ. Høxhaam hajxy njaac juypipiøgáanäm.

21 Tu'jäya'ay jecy yho'tsohñ hädaa yaabä naaxwiin, ja'a craa Adánhajtäbä. Paadiä Adán jecy yho'cy, coo Dios ja'a miädia'agy quia'a cudiuunä. Y jaanä jaduhñduhmbä, tu'jäya'ay jiuypipiøjtsohñ; ja'a Jesucristo je'e.

22 Ja'a Adán, højts nhaphajt ndeedyhájtäm je'e, paady hajxy nägøxiä nbaho'ogáanäm. Y jaanä jaduhñduhmbä, nägøxiä hajxy njuypipiøgáanämbä, pønñatiä Jesucristo miädia'agy mäßøjcäp.

23 Coo Jesucristo hänajty tøø jiuypipiøjtägach, mänit jim ñøcxcombä maa Tieediän. Coo jim quioo'ty, mänit tiägøøyy hanehmbä. Y coo yaa quiädaactägátsät hädaa yaabä naaxwiin, mänitä ho'oguiäya'ayhajxy jiuypipiøjtägatsa'añ, ja'a Jesucristo miädia'agy hajxy hänajty tøø miäßøjcäbä.

24-26 Mänitä Jesucristo miäjäda'aga'añ. Mänitä Dios ja'a miädsip ja'a quihdujthajxy piøgáanäxä nägøxiä. Mänitä jäya'ayhajxy quia'a ho'ogaannä ni mänaa. Mänitä Jesucristo ja'a Dios cuhdujt yajcø'ødägø'øwa'añ neby jäda'ahaty yhane'emiän. Mänitä naaxwiimbä wyiimbidaannä:

27 "Tøø Dios ja'a Jesucristo cuhdujt mio'oy coo jäya'ay cøxiä yhané'emät." Nømä Diosmädia'agy jecy miänaañ. Mänit jaduhñ tiøjiajty mänaa Jesucristo tiägø'øyän jäya'ayhanehmbä. Pero cabä Diosmädia'agy jecy miänaañ coo Dios yaghane'emy. Hix, jaaya'ayä cuhdujt yejc coo Jesucristo jäya'ay cøxiä yhané'emät.

28 Coo Jesucristo ja'a miädsip hänajty tøø quia'a cøxy yajmäjäda'agy, mänitä Tieedy cuhdujt quiøxy yajcø'ødägø'øwa'añ mäduhñtiä cuhdujt hänajty tøø mio'oyii. Jaduhñä Jesucristo yhane'ema'añii ja'a Tiéediäm. Jaduhñä Dios cøxiä yhane'ema'añ.

29 Näje'e jäya'ayhajxy ñäbety ho'oguiäya'aguiøxpä. Pø cab häxøpy jaduhñ tiøyyä coo ho'oguiäya'ayhajxy jiuypipiøga'añ, tiiguiøxpä jäya'ayhajxy jaduhñ coo ñäbety ho'oguiäya'aguiøxpä.

30 Nmäßøjpy højts jaduhñ coo hajxy njuypipiøgáanäm, paady højts nga'a møjpäda'agy, hoy højts nja wädity mäjahñdium homiänaajä.

31 Cooch nmäna'añ cooch jaduhñ nwädity mäjahñdium, je'eçh jaduhñ nnänøømby coochä ca'awiindøyhäna'c-hajxy xjia wi'i yagho'oga'añ homiänaajä. Hermanodøjc, tehñ tiøyhajt jaduhñ cooch nxoonäda'agy

mijtsæxpä, je'eguiæxpä coo Jesucristo miädia'agy hajxy mmäbøjcä, ja'a hajxy nWiindsøn'hájtämbä. Hoorä, jaanä tøyhajt je'eduhmbä cooch nwädity mähäñdiuum homiänaajä.

³² Tøøchä ca'awiindøyhäna'c-hajxy mayhooc xjia wi'i yagho'oga'añ yaa Efeso ja'a Diosmädia'agyquiæxpä. Cooch häxøpy nga'a mæbøcy coo ho'oguiäya'ayhajxy jiuypio'ga'añ, cábøchä Diosmädia'agy häxøpy nyajwa'xy. Coo häxøpy jaduhñ quia'a tøyä coo ho'oguiäya'ayhajxy jiuypio'ga'añ, cu nmänaänäm hajxy jaduhñ: "Tsøg hajxy jaac cáayyäm, tsøg hajxy jaac húucäm, coo hajxy jaboom nho'ogáanäm."

³³ Cab hajxy myajwiinhøønät. Cab hajxy mmøødwädiymúgät ja'a häna'c-hajxy mänaambä cooc tyijy ho'oguiäya'ayhajxy quia'a juypiø'ga'añ coo hajxy jaduhñ xyajtu'udägyäat.

³⁴ Najtshixø'øw yø'ø mhaxøøgcuhdujt hajxy. Hoy hajxy myohy, hoy hajxy mnäxnät. Näje'e yø'ø mjamioødhajxy quia'a mæbøcyñä ja'a Diosmädia'agy. Höchähdiuunnä je'eduhñ.

³⁵ Näje'e jäya'ayhajxy yajtøwa'añ: "Nebiä ho'oguiäya'ayhajxy jiuypio'ga'añ. Tii ni'x tii copc hajxy miøødhadaamby."

³⁶ Hoy piønä jaduhñ ñajuø'øy. Coo mädyii tøømd mní'ibät, hoy trigo, tsipcøxp jaduhñ piu'udy; pø caj, cab jaduhñ ñä'ä muxy.

³⁷ Y ja'a tøømd jaduhmbä, coo mní'ibät, wiing jaduhñ jiajnä coo miuxy.

³⁸ Dios jaduhñ tøø wyiinmay nebiatiä tøømd jiädät. Wiingatiä tøømd quiunuu'xy.

³⁹ Jaanä wiingatiä Dios ja'a nni'x ja'a ngopc-hajxy xquiunúu'xämbä. Y wiingatiä animal ñi'x quiopc-hajxy quiunúu'xäxäbä, møødä animalhajxy ja'a tøødstuum tsänaabiä, møødä muuxy hajxy, møødä hacxhajxy.

⁴⁰ Ja'a hajxy jim hijpä tsajtcøxp, wiing hajxy jaduhñ quiähxø'øgy. Cab hajxy jaduhñ quiähxø'øgy neby hajxy yaa quiähxø'øguiän, ja'a hajxy yaa hijpä hädaa yaabä naaxwiin.

⁴¹ Haagä hajajp ja'a xøø møødä po'o møødä madsa'a, pero haagä wiingaty yhajajy. Jaanä jaduhñ ja'a madsa'abä, haagä wiingaty yhajajp.

⁴²⁻⁴⁴ Jaduhñ mäwíinäts højtshájtäm, coo hajxy nho'c coo hajxy ndägooyyäm, cabä mähäa hajxy nmøødhájtänä. Mänit hajxy nøcxy nnaaxtägøøyyänä. Ja'a naaxni'x ja'a naaxcøpc jaduhñ naaxtägøøby. Mänit hajxy ngøxy yajxee'xtúutänä jutjooty. Mänit hajxy njájtänä hoxiøøghajnä. Pero coo Jesucristo yaa quiädaactägatsáangombä hädaa yaabä naaxwiin, mänit hajxy njuypio'jtägatsáanägombä, coo hajxy hānajtý tøø nho'c coo hajxy hānajtý tøø ndägooyyäm. Wiing hajxy jaduhñ njadáanänä coo hajxy jim nnøcxáanänä Dioswiinduum. Hoy yajxón hajxy hānajtý njadáanäm haagä mähāamøød. Y cab hajxy hānajtý mānaa nho'tägatsáanänä. Wiing hajxy yaa nhíjtäm hädaa yaabä naaxwiin; wiing hajxy hānajtý jim nhidáanänä Dioswiinduum.

⁴⁵ Jaduhñä Diosmädia'agy miäna'añ: "Coo Adán jaduhñ quiunuu'xtsohnä, mänitä jugyhajt miooyyä." Pero coo Jesucristo jiuypio'jtägajch, paadiä tøyhajt hajxy nmøødhájtäm coo hajxy nbajuypiø'jtägatsáanämbä.

⁴⁶ Jawyiin hajxy yaa nhíjtäm hädaa yaabä naaxwiin. Coo hajxy njuypio'jtägatsáanäm, mänit hajxy jim nnøcxáanäm Dioswiinduum.

⁴⁷⁻⁴⁹ Ja'a craa Adánhájtäbä, jecy je'eduhñ quiunuu'xtsohnä naaxoc-haam. Yaa jaduhñ jecy chānaabiä hädaa yaabä naaxwiin. Jaanä jaduhñ højtshájtämbä, naaxoc hajxy nni'xhájtäm ngopc-hájtäm nebiä Adángän. Hix, je'e højts nhaphajt ndeedyhájtäm. Haa ja'a Jesucristo, jim je'eduhñ chohñ tsajpootyp. Coo yaa quiädaactägatsa'añ hädaa yaabä naaxwiin, mänit hajxy

njujypioḡáanām, pønjatiä miädia'agy hänajty tøø miäbøjcä. Jaduhn hajxy jim nhidáanām tsajpootyp nebiä Jesucristo jim yhitiän.

⁵⁰ Hermanodøjc, huuc mädown hajxy, cab hajxy jim hoy nnøcxämät Dioswiinduum ni'xcopcmøød nebiä nni'xä ngopc hajxy yaa nmøødhájtäm hädaa yaabä naaxwiin, je'eguiøxpä coo hajxy nho'og coo hajxy ndägoyyáanām. Coö hajxy ndägájtsämät nebiä Jesucristo yhitiän, mänit mæbøcy hajxy jim nnøcxämät tsajpootyp.

⁵¹ Huuc mädown hajxy nébiøchä Dios jaduhn xñajtsapxøøyyä. Coö Jesucristo quiädaactägatsa'añ, cahnä hajxy hänajty nägøxiä nho'c ndägóoyyäm. Naje'e hajxy hänajty njújqüämnä. Pero nägøxiä hajxy ndägatsáanām, møødä jujcypiä møødä ho'ogypiä.

⁵² Nägooyyä Diosmoonsä ja'a corneta hänajty høxhaam jiaac yajx-uuxmaya'añ, ja'a tsajpootypä, mänitä ho'oguiäya'ayhajxy jiuypioḡtägatsa'añ. Cab hajxy hänajty mänaa yho'tägatsaanä. Mänitiä hajxy nägøxiä ndägatsáanām, møød hajxy hänajty yaabä jujcypiä, møød hajxy hänajty tøø yho'oguiäbä.

⁵³ Hädaa naaxni'x hajxy nmøødhájtämbä, nä'ägädä ho'og nä'ägädä tägooyyáanām hajxy jaduhn. Tsipcøxp hädaa nni'x hädaa ngopc-hajxy tiägatsáanām, mänit hajxy jim nnøcxáanām Dioswiinduum. Y cab hajxy hänajty nho'tägatsáanänä ni mänaa.

⁵⁴ Y coö hajxy jaduhn njadáanām, mänitä Diosmädia'agy tiøjiada'añ coö jaduhn miäna'añ: “Cabä jäya'ayhajxy hänajty mänaa yho'og tiägoyyaañnä.” Coö Jesucristo hajxy tøø xñähho'túutäm, paady hajxy jiiby nga'a häda'agáanām møjcu'uhaam.

⁵⁵ Y coö hajxy jiiby nga'a häda'agáanām, paady hajxy nga'a tsähgøøyyänä coö hajxy hänajty nho'ogáanām.

⁵⁶ Hoorä, coö Diosmädia'agy hajxy hoy nga'a cudiúunām, paady hajxy ngädiéhyyäm, paady hajxy nhø'cäm.

⁵⁷ Tsøgä Dios hajxy nämáayyäm “Dioscujú'uyäp”, je'eguiøxpä coö Jesucristo hajxy xñähho'túutäm, ja'a hajxy nWiindsønähájtämbä. Coö hajxy xñähho'túutäm, paady hajxy jiiby nga'a häda'agáanām møjcu'uhaam.

⁵⁸ Jaduhnds je'e, hermanodøjc, tsøg hajxy hoy túunām hamuumdu'joot ja'a Dioscøxpä. Cabä miädia'agy hajxy mänaa nnajtshixøøyyämät, howyiaambatiä jäya'ay hajxy cu xjia nämáayyäm. Nnajuøøyyäm hajxy jaduhn coö Dios hajxy xpiuhbedáanām.

16

¹ Mguexaambiä xädø'øñ hajxy jim Judeanaaxooty maa hermanodøjc-hajxiän. Jaduhn hajxy myajmújpät nébiøchä hermanodøjc-hajxy nhanehmy jim Galacianaaxooty.

² Näxøøbaadiä xädø'øñ hajxy mbuhgónät mäduhñtiä hajxy hänajty tøø mguduñ. Hawiing hajxy jaduhn myaghídät. Mänitøch hajxy xmió'owät coöch jim nmédsät maa mijtsän neby hajxy jaduhn mänit møc hadø'øchä mga'a wädijtá'agät.

³ Mänitä hermano hajxy mwiimbíwät pønjátyhøchä xädø'øñ hänajty nyajmägüexaamby jim Jerusalén maa hermanodøjc-hajxiän. Nocymioød hajxy ñøcxät nebiä hermanohajxy jim ñajuø'øwät coöch hänajty tøø nguexy.

⁴ Pø hahixøøby hänajty coöch jim nnøcxät, mänitøch hajxy xpianøcxät.

⁵ Coöch hänajty jim nnøcxa'añ Corintos, tu'unaxáambøch jim Macedonia.

⁶⁻⁷ Coö Dios jaduhn miäná'anät, jégäbøch jim maa mijtsän. Wéhndøch jim nga'a tsoj wiimbídät høxtä coö tøøchpoj hänajty tøø ñaxy. Jadúhnhøch

mijts jejcy nguhíxät. Jadúhnhöch hajxy xpiuhbédät majátyhöch hānajtý njaac wädita'añ.

⁸ Pero cáboch yaa ndsoj tu'ubøga'añ yaa Efeso. Coo Pentecostésxøø hānajtý tøø yhabaady, mänítöch ndu'ubøga'añ.

⁹ Hix, jaanč tehñ miäbøgaambä jäya'ayhajxy yaa, hóyhöch nmädsiphajxy jia nāmayyā.

¹⁰ Coo Timoteo jim miédsät maa mijtsän, hoy yajxón hajxy myajmédsät. Hix, jaduhñä Diostuung tiuumbä nébiöch nduñän.

¹¹ Cab hajxy jaduhñ mbéxät. Mbuhbédäp hajxy jaduhñ nebiaduhñ jootcuyc jiaac mínät yaa maačh høöchän. Nja wi'i jibbhixyp hõjts yaa møødä hermanodøjc-hajxy.

¹² Y ja'a hermano Apolos, nja mänuu'xtáac-höch je'e coo hermanodøjc cu miøødnøcxy maa mijtsän, pero cab jäda'a tiehñ ñøcxa'añ. Cooc ñäbaadø'øwáanäxä, mänítnäc hānajtý ñøcxa'añ.

¹³ Mniyajcopcø'øwøøjäp hajxy. Hoyyä Diosmädia'agy hajxy myajtu'uyó'oyät. Cab hajxy pøn mdsähgø'øwät. Mmee'xtúgäp hajxy.

¹⁴ Mničhoc mnimiee'xøøjäp hajxy hamuumdu'joot.

¹⁵ Hermanodøjc, mnajuøøby hajxy coo Estéfanas ja'a Diosmädia'agy hajxy jayøjp miäbøjtsohñ jim Acayanaaxooty, møødä yhuung møødä tio'oxy. Jimä hermanodøjc hajxy piuhbety.

¹⁶ Jadúhnhöchä njoot chocy coo hajxy mbahix mbadúnät nebiä Estéfanashajxy tiuñän.

¹⁷ Xoondáacpøch jaduhñ coo Estéfanashajxy tøø miech møødä Fortunato møødä Acaico. Nñajootmayhájpíoch mijts coo hajxy mjäguemä. Pero coo Estéfanashajxy tøø miech, paady cáboch njootmayhajnä.

¹⁸ Tøöchä njoot hajxy xyajmøcpøjcä. Jadúhnhöchä mjoothajxy nya-jmøcpøgáanäbä. Mnajuø'øwäp hajxy jaduhñ coo Estéfanashajxy hoy tiuñ.

¹⁹ Mijtsä hermanodøjc-hajxy xyajpoo'xp ja'a hajxy jim tsänaabiä Asianaaxooty. Xyajpoo'xp mijtsä Aquilahajxypä ja'a Dioscøxpä, møødä Priscila, møødä hermanodøjc-hajxy jim hamugøøbiä Dioswiingudsähgøøbiä maa tiøjc-hajxiän.

²⁰ Xyajpoo'xp mijtsä hermanodøjc-hajxy nägøxiä. Hoy yajxón hajxy mniya-jpoo'xøøjät.

²¹ Nhamdsoo cø'øháamhöch hädaa nocy njahmiay, høöch Pablo.

²² Pønä Jesucristo ca'a tsojp, ja'a hajxy nWiindsøn hájtämbä, ween haxøøgtuum ñøcxy. Wiindsøn, min hadø'öchä.

²³ Weenä Jesucristo hajxy xmio'oy ja'a hoyhajt ja'a weenhajt, ja'a hajxy nWiindsøn hájtämbä.

²⁴ Ndsøjpiöch mijts nägøxiä ja'a Jesucristocøxpä. Amén.

2 Corintios

¹ Høøch Pablo hädaa nocy njahby. Jesucristøch tøø xwyiinguexy cooçh ja'a miädia'agy nyajwá'xät. Ja'a Dios jaduhñ mänaamb cooçh nyajwá'xät. Ja'a hermano Timoteo, tu'ugwiinmáhñdyhøch je'e xmiøødhity cooçh hädaa nocy njaay. Mijts hädaa nocy nyajnäguexaamby pønjaty Diosmädia'agymiäbøjp maa ja'a cajpt xiøhatiän Corinto, møød maa ja'a naax xiøhatiän Acaya wiin-duhmyhagajpt.

² Ween mijts ja'a Dios hoyhajt weenhajt xmio'oy møødä Jesucristo. Dios hajxy nDeedyhájtäm. Jesucristo hajxy nWiindsønhájtäm.

³ Tsøgä Dios hajxy tehngajnä wiingudsähgøøyyäm. Tsøc hajxy tehngajnä nämäaayyäm Dioscujú'uyäp. Ja'a Jesucristo Tieedy je'e. Jaançh tehñ yhojioot ja'a Dios miøød. Xjiootcapxmøcpøjcäm hajxy homiänaajä,

⁴ hoy ñebiaty hajxy cu nja jajt cu nja habéjtäm. Paady hajxy jaduhñ xjiootcapxmøcpøjcäm, jaduhñ hajxy hoy njootcapxmøcpøjtägájsämd pønjaty häyohmbaatp.

⁵ Hix, nebiä Jesucristo chaachpøjquiän, jaanä jaduhñ hajxy ndsaachpøjcämbä. Y coo ja'a Jesucristo hajxy nmøødhíjtäm tu'ugmädia'agy, paadiä Dios hajxy xjiaançh tehñ jiootcapxmøcpøjcäm.

⁶ Coø højts ndsaachpøcy, mänit højts Dios xjiootcapxmøcpøcy. Y jaduhñ mijts njootcapxmøcpøjtägajtpä. Y jaduhñ mijts Diosmädia'agy nyajwiin-gapxø'øwät neby hajxy jaduhñ mnähwá'adsät. Coø mijts mdsaaçhpøjpät neby højts ndsaachpøquiän, mänit mijts njootcapxmøcpøgät neby hajxy jaduhñ hoy mmee'xtúgät.

⁷ Nnajuøøby højts coø mijts mmee'xtuga'añ, coø mijts Dios xjiootcapxmøcpøga'añ, hoy miäduhñtiä mijts cu mja tsaachpøc neby højts ndsaachpøquiän. Nmøød højts ja'a tøyhajt jaduhñ.

⁸ Mägu'ughajpädøjc, chojpy højts njoot coø hajxy mnajuø'øwät nebiaty højts jim ndsaachpøjcy maa ja'a naax jaduhñ xiøhatiän Asia. Hanaxiä højts jim njajty nhabejty. Jaançh tehñ jiootmayhajp højts hñajty. Høxtä mänaañ højts jaduhñ coø ndijy højts hñajty jim nho'oga'añ,

⁹ coø ndijy häna'c hñajty tøø quiojyquiapxytiuñ coø højts hñajty xyagho'oga'añ. Paady højts jaduhñ njajty nhabejty, jaduhñ højts nnajuø'øwät coø jagoøyyä Dios xñäwá'anät, cab højts hamdsoo hoy nniñäwa'anøøjät. Haa ca'a, Dios jaduhñ yagjuypiojtägajtpä ja'a tøø yho'oguiäbä.

¹⁰ Xñäwaan højts ja'a Dios coø højts häna'c hñajty jim xjia yagho'oga'añ. Homiänaajä højts jaduhñ xñäwa'ana'añ. Nmøød højts ja'a tøyhajt jaduhñ.

¹¹ Naxy mijts ja'a Dios mdehñ pia'yá'axät maa højtscøxpän. Jaduhñ højts mijts hoy xpiuhbédät. Coø jäya'ayhajxy nämay Dyiospa'yá'axät maa højtscøxpän, mänit højts ja'a Dios xñäwa'ana'añ, mänitä jäya'ay ja'a Dios hajxy nämay ñäma'awa'añ "Dioscujú'uyäp", je'eguiøxpä coø højts Dios hoyhajt weenhajt xmio'oy.

¹² Jootcujc højts nnijiäwø'øyi coø højts hoy tøø njäya'ayhaty maa mitsän hädaa yaabä naaxwiin. Dios højts jaduhñ xpiädaac coø højts hoy njäya'ayhádät. Jaaya'ay højts xyhijxp coø højts hoy njaançh jäya'ayhaty. Xpiuhbejp højts jaduhñ neby højts hoy njaac jäya'ayhádät. Cab højts hamdsoo hoy nhojiäya'ayhádät.

¹³⁻¹⁴ Hix, howyiinjuøøñä mijts tøø nnäjaayø'øy, caj chipjatiä. Caj mits mänaa tøø nwiinhøøñ. Tøø højts nmädia'agy hajxy siémpräm xwyiinjuøøyyä. Chojpy højts njoot coø hajxy ca'xy mwiinjuø'øwät, jaduhñ hajxy

mxoondá'agät maa höjtscøxpän coo ja'a Jesucristo hänajty quiädaactägatsa'añ. Je'e hajxy nWiindsøn'hájtäm. Mänit höjts nxoon'da'agaambä maa mijtscøxpän.

¹⁵ Nmøødhøch tøyhajt jaduhñ coo höjts nmädia'agy hajxy ca'xy xwyiin-juø'øwaanä, páadyhøch hijty tøø nja wiinmay coo mijts jadähooc nøcxy cu nguhijxy. Jaduhñ hajxy jadähooc cu nxoon'dáacäm nägøxiä.

¹⁶ Hix, nøcxáambøch hijty jim maa ja'a naax jaduhñ xiøhatiän Macedonia, y jim mijts hijty ndu'uguhixa'añ Corinto. Y cooñ hijty nwiimbidaannä Macedonia, mänit mijts hijty jadähooc ndu'uguhixáangombä cooñ hijty jim nnøcxa'añ maa ja'a naax jaduhñ xiøhatiän Judea. Jim mijts jaduhñ cu xpiuhbejty.

¹⁷ Pero cabä Dios jaduhñ miänaañ cooñ jim cu nminøøyy maa mijtsän. Ca'a yhamdsoojóotøch jim tøø nga'a naxø'øy. Cab jaduhñ yhooyä coo hajxy mmäná'anät cóogøch tyijy jaduhñ ndu'ugcapxy nmetscapxy, cooñ jim tøø nga'a naxø'øy. Ja'a häna'c-hajxy ca'a mabøjpä, je'eds hajxy tu'ugcapxp metscapxp, ca'a yhøøchä.

¹⁸ Dios höjts xyhijxp coo höjts nga'a höhnda'agy. Cab höjts mijts mänaa tøø nmøødtu'ugcapxy tøø nmøødmetscapxy.

¹⁹ Hix, ja'a Jesucristo, ja'a Dioshuung, cab je'eduhñ mänaa tiu'ugcapxy mietscapxy. Homiänaajä tiømiädia'agy. Y coo höjts mijts nyajwiingapxøøyy ja'a Jesucristocøxpä, paady höjts nga'a tu'ugcapxy nga'a metscapxy, ni høøch Pablo, ni hermano Silvano, ni hermano Timoteo.

²⁰ Waambatiä Dios jecy miänaañ coo hänajty yajtøjiada'añ, cøjx jaduhñ tiøjiaty ja'a Jesucristocøxpä. Y coo höjts ja'a mädia'agy nmäbøjcäm ja'a Jesucristocøxpä, jaduhñä Dios møj jaançh nbädáacäm.

²¹ Pero ja'a Dios hajxy xpiuhbéjtäm nebiä Jesucristo hajxy jaduhñ nmøødhíjtämd tu'ugmädia'agy tehngajnä, møød höjts møød mijts nägøxiä. Jaanä Dios höjts jaduhñ xwiinguejxpä coo höjts ja'a miädia'agy nyajwá'xät.

²² Xyaghijp höjts ja'a Dios quiø'øjooty ja'a yhEspirituhaam. Xyhuunghajp höjts jaduhñ. Xmióøyyäm ja'a tøyhajt hajxy jaduhñ coo hajxy homiänaajä xcwieendähadäänäm.

²³ Dios ja'a tøyhajt møød cooñ nga'a höhnda'agy. Páadyhøch jim tøø nga'a naxø'øy Corinto maa mijtsän, cábøch njoot hänajty chocy coo mijts nhójät.

²⁴ Pero cab höjts mijts nhane'ema'añ nebiatiä Diosmädia'agy hajxy mmäbøgät. Hix, nnajuøøby höjts jaduhñ coo hajxy hamuumdu'joot mmäbøcy. Nja wi'i piuhbedaamby höjts mijts jaduhñ nebiä Diosmädia'agy hajxy maas hoy mbanøcxät. Jaduhñ hajxy maas jootcuyc mhídät.

2

¹ Mänáajøch jim nhuug hoobiän maa mijtsän, mänítøch mijts nhojy je'eguiøxpä coo hajxy hänajty hoy mga'a tuñ. Jootmayhájtäbøch jim nwiimbijty. Hoorä, tøøch nmädoyhájcombä coo hajxy hoy mga'a túungombä. Tøøch nwiinmahñdyhaty cooñ jim nga'a tsoj nøcxtägatsa'añ maa mijtsän, coo mijts jim nnä'ä hojtägätsät.

² Hix, coo mijts nhojtägätsät, mänítøch jadähooc njootmayhada'añ. Pero chøjpiøch njoot jaduhñ coo hajxy hoy mdúnät. Jadúhñhøch jootcuyc nhídät.

³⁻⁴ Mänáajøch mijts jayøbajt nhuuc näjaayøøbiän, mänit mijts nmägapxy nhanehmy coo ja'a mhaxøøgcuhdujt hajxy mnajtshixø'øwät. Jaançh tehñ jootmayhájpøch hänajty coo ja'a Diosmädia'agy hajxy hänajty hoy mga'a panøcxy. Høxtä jøøyyhøch jaduhñ. Paady mijts jaduhñ nmägapxy nhane'emy nocyhaam, njaançh tehñ chojpy mijts jaduhñ. Cábøch njoot chocy coo hajxy mjootmayhädät. Coo ja'a mhaxøøgcuhdujt hajxy mnajtshixø'øwät nébiøch chamñ nmägapxy nhane'emiän nocyhaam, mänítøch jim jootcuyc nnøcxa'añ

maa mijtsän. Coo mijts ja'a Diosmädia'agy hoy cu mbanøcxy, cábøch jaduhñ mänaa cu njootmayhajty. Nnajuøøbiøch jaduhñ coo ja'a Diosmädia'agy hajxy hoy mja wi'i pianøcxa'añ. Y coo hajxy jaduhñ hoy mbanøcxät, jaduhñ hajxy nägøxiä jootcuyc nhíjtämd, møød høøch møød mijts.

⁵ Ja'a mijts mmägu'ughajpä ja'a tøø quiädiéeyäbä, nägøxiä hajxy jaduhñ tøø xñägädieeyøøyyäm, ca'a yhøøchähajtiä nidiuhñ. Pero cábøch nmäna'añ coo hanaxiä tøø quiädieey. Hix, cábøch hanaxiä nyajtsähdiuna'añ.

⁶ Hoorä, tøø ja'a mmägu'ughajpähajxy chaačhpøcy. Tu'ugwiinmahñdy hajxy mnibiaatä, paadiä mmägu'ughajpä hajxy myajcumädooyy. Hoorä, tøø jaduhñ chaačhpøjnä.

⁷ Hahixøøby hajxy jaduhñ mmämée'xnät. Jaduhñ hoy jiootcugøøguiumbät, y cab jaduhñ hanaxiä jiootmayhädät.

⁸ Coo hajxy jaduhñ mmämée'xnät, myajcøxø'øgaamby hajxy jaduhñ coo hajxy mjaanč tehñ chocy.

⁹ Paady mijts jayøbajt nnäjaayøøyy, nhijxmajts mijts jaduhñ pø tøyhájthøch nmädia'agy hajxy hñajty xmiäbøgaanä hamuumdu'joot.

¹⁰ Pønjaty mijts mmämée'xyp, jaanä jaduhñhøch nmämée'xaambä. Haa ca'a, pø tøøch hñana'c nmämée'xy, páadyhøch tøø nmämée'xy, jaduhñ mijts jootcuyc mhídat. Jesucristøch jaduhñ xyhijxp cooçh nga'a høhnda'agy.

¹¹ Coo hajxy jaduhñ nnimiämée'xämd, cabä møjcu'ugong miäjädá'agät maa højtscøphájtäm. Nnajuøøyyäm hajxy coo ja'a møjcu'ugong jiaanč tehñ miäwiinhøøñ.

¹² Cooçh jim nmejch maa ja'a cajpt jaduhñ xiøhatiän Troas Diosmädia'agy-yajwa'xpä ja'a Jesucristocøxpä, nbáathøch hawa'adspä cooçh jim ndägø'øwät Diosmädia'agy-yajwa'xpä.

¹³ Pero cooçhä hermano Tito jim nga'a paaty maa ja'a hermanodøjc-hajxiän, mänítøch ndägøøyy jootmayhajpä. Mänítøch nwiimbijnä. Mänítøch nnøcxy maa ja'a naax jaduhñ xiøhatiän Macedonia.

¹⁴ Dioscuju'uyäp ja'a Dios coo højts xpiuhbety, coo højts xyaghity tu'ugmädia'agy møødä Jesucristo. Jaduhñ højts ja'a Dios xpiuhbety coo højts ja'a møjcu'ugong nga'a yajmäjäda'agy majaty højts ja'a Diosmädia'agy nyajwa'xy ja'a Jesucristocøxpä. Homiädoonä ja'a jäya'ayhajxy miädoy nebiaty højts nyajwiingapxø'øy.

¹⁵⁻¹⁶ Xquiumaaby højts ja'a Dios coo højts ja'a miädia'agy nyajwa'xä ja'a Jesucristocøxpä. Pønjaty hoy mädooob, pønjaty mæbøjp, je'eds nähwa'adsaamb. Juyghadaamb hajxy je'eduhñ cøjxta'axiøø nebiä Dios jiugyhatiän. Pero pønjaty hoy ca'a mädooob, pønjaty ca'a mæbøjp, cab hajxy jaduhñ nähwa'adsa'añ. Je'eds hajxy haxøøgtuum nøcxy miähmø'øwa'añ. Caj pøñ yhamdsoo jada'añ Diosmädia'agy-yajwa'x.

¹⁷ Højts mæbøcypiä njajpy je'eguiøxpä coo højts ja'a Dios xwyiinguejxy. Hamuumdu'joot højts nduñ je'eguiøxpä coo højts ja'a Jesucristo tu'ugmädia'agy nmøødhity. Xyhijxp højts ja'a Dios jaduhñ coo højts hoy nduñ. Jii hñana'c näje'e, cab hajxy hoy tiuñ. Ja'a Diosmädia'agy tyijy hajxy yajwa'xyp. Pero yhamdsoo mädia'agy hajxy wyi'i miädiaacypy, je'eguiøxpä coo hajxy jia wi'i quiänaarhada'añ. Højts, cab højts jaduhñ nbahixy.

3

¹ Cab hajxy mmäná'anät coo tyijy højts nniguiumayii nebiä hñana'c ñiguiumayijän, ja'a yhamdsoo mädia'agy hajxy miäwädiippiä. Coo hajxy hñajty maa ñøcxa'añ, mänitä hermanodøjc hajxy ñäma'ay coo nocy hajxy jaduhñ ween yhädiúunäxä cooc tyijy ja'a Diosmädia'agy hajxy hoy tøø yajwa'xy. Pero

højts, cab højts jaduhmbä nocy nyajmaajiaty, ni coo mijts nyaghíxät, ni coo mijts xmió'owät.

² Hoy piønä ñajuø'øy coo højts ja'a Diosmädia'agy hoy nyajwa'xy. Haa ca'a, tøø ja'a Diosmädia'agy hajxy mmäbøcy mänaa højts jim hoy nyajnahixø'øyän. Hix, njaančh tehñ chojpy højts mijts hamuumdu'joot. Homiänaajä højts mijts njahmiejtsta'agy.

³ Coø ja'a Diosmädia'agy hajxy tøø mmäbøcy, jaduhñä cu'ug ja'a tøyhajt hajxy miøødä coo højts ja'a Jesucristo jaduhñ xwyiinguejxy maa mijtscøxpän, coo højts mijts ja'a Diosmädia'agy nyajwiingapxø'owät. Jujcy ja'a Dios. Yh-Espírituhaam ja'a Dios hajxy xyajmäbøjcy. Jaduhñ miäbaady coo ja'a Jesucristo tøø yuugjaay maa ja'a jäya'ay quiorazoncøxphajxiän. Cab jaduhñ tøø yuugjaay tsaagøxp tintaahaam nebiä Dios jecy yuugjahyyän tsaagøxp maa ja'a tun xiøhatiän Sinaí.

⁴ Paady højts jaduhñ nmäna'añ, nmøød højts ja'a tøyhajt coo højts ja'a Jesucristo xwyiinguejxy.

⁵ Pero cab højts tii njada'añ hamdsoo. Dios højts jaduhñ xpiuhbejp coo højts njädät.

⁶ Jaaya'ay højts jaduhñ tøø xyajnahdijy coo højts ja'a hawiinjemybiä mädia'agy nyajwä'xät ja'a Jesucristocøxpä. Hädaa hawiinjemybiä mädia'agy, yhEspírituhaam højts ja'a Dios tøø xmiø'oy. Cabä Dios tøø jiahñä tsaagøxp nebiä jecyquihdujt jecy jahyyän tsaagøxp. Yø'ø jecyquihdujt, cab jaduhñ pøn hoy quiudiuna'añ, paady hijty pøn quia'a pädsøma'añ haxøøgtuum. Pero coo ja'a hawiinjemyädia'agy hajxy mmäbøgät, mänitä Dios hajxy xyagjughädät cøjxta'axiøø yhEspírituhaam neby je'e jiugyhatiän.

⁷ Hoorä, coo ja'a Dios ja'a jecyquihdujt jiahy tsaagøxp, høxtä haamb høxtä tsämaamb ja'a Moisés ja'a wyiin jiojp hänajty, høxtä cabä israelita ja'a Moisés ja'a wyiin jiojp hajxy hänajty hoy yheebaanä. Pero paquiä ja'a Moisés ja'a wyiin jiojp jaduhñ ñä'ä haañ ñä'ä tsämaamy. Paadiä Moisés ja'a wyiin jiojp hänajty yhañ chämaamy, tøø ja'a Moisés hänajty yhoy jim Dioswiinduum maa ja'a Dios hänajty tøø quiäda'aguiän jim tungøxp. Y møcmäjaa ja'a Dios jiaančh tehñ miøød. Hoorä, yø'ø jecyquihdujt, cab jaduhñ pøn hoy quiudiuna'añ, paady hijty pøn quia'a pädsøma'añ haxøøgtuum.

⁸⁻⁹ Hoorä, coo ja'a Dios ja'a Moisés ja'a wyiin jiojp jecy yaghaanä yajtsämaamä, jaduhñä Dios yajcähxø'cy coo møcmäjaa miøødä. Y coo ja'a Dios ja'a hawiinjemyädia'agy tøø yejnä coo hajxy tøø xpiädäacäm hawa'adstuum, ja'a yhEspírituhaam ja'a Dios ja'a hawiinjemyädia'agy tøø yecy. Jaduhñä Dios maas hoy tøø yajcähxø'øgy coo møcmäjaa miøødä. Hix, hoy-yagjuøøñä ja'a Moisés ja'a wyiin jiojp jecy yhaañ chämaamy. Maas hanaxiä ja'a hawiinjemyädia'agy yhoy-yagjuøøñä, ja'a højts nyajwa'xypä.

¹⁰⁻¹¹ Jaduhñ quiähxø'øgy coo ja'a jecyquihdujt jaduhñ quia'a jaty tsoobaatnä. Ja'a hawiinjemyädia'agy ja'a Jesucristocøxpä, je'eds jaduhñ tsoobáatnäp. Y cab jaduhñ mänaa tiägoyya'añ.

¹² Tøyhajt jaduhñ, paady højts nga'a tsähdiuñ mänaa højts ja'a Diosmädia'agy nyajwa'xiän, ni nga'a mädsähdiuñii højts jaduhñ.

¹³ Hix, haamb tsämaambä Moisés ja'a wyiin jiojp hänajty coo ja'a Dios ja'a Moisés ja'a miädia'agy miooyy. Mänitä Moisés ja'a cu'ug ja'a Diosmädia'agy yajwiingapxøøyy. Coø ja'a Moisés miädiaacpædøøyy, mänitä wit ñiyajwiinguwidøøyyä, je'eguiøxpä coo ja'a wyiin jiojp hänajty jecy quia'a hanaannä quia'a tsämamaannä. Paady jaduhñ miädsähdiuunä. Hix, yhixaambiä israelita ja'a Moisés hajxy hänajty coo ja'a Moisés ja'a wyiin jiojp hänajty quia'a haannä quia'a tsämaamñä.

14-16 Pero ja'a israelitahajxy, jaančh tehñ quiuhxex hajxy hñajty, cab hajxy hñajty miädia'agywyiinjuø'oy. Høxtä chamñäbaadyñä hajxy jaduhñ quiuhxexä. Coø ja'a jecyquiuhdujt hajxy mänäa miädooy, cab hajxy jaduhñ wyiinjuø'oy, ja'a Moisés jecy miädiäacäbä. Mänit hajxy jaduhñ wyiinjuø'owät coø hajxy hñajty tøø miäbøcy hamuumdu'joot ja'a Jesucristocøxpä. Je'e hajxy nWiindsønñhajtäm.

17 Hoorä, tu'ugjuøhñdy ja'a Jesucristo yhity møødä Tieediä yhEspíritu. Y coø hajxy nmäbøjcäm ja'a Jesucristocøxpä, jaduhñä cuhdujt hajxy xmióoyyäm coø Dios hajxy nba'yäaxämd.

18 Hoorä, pønjaty jaduhñ hamuumdu'joot mabøjp ja'a Jesucristocøxpä, tøø hajxy ngøxy wiinjuøoyyäm coø ja'a Jesucristo miøjjä jiaančhä. Tehñgajñä ja'a Jesucristo hajxy xyaghaguipxyjatiøoyyäm neby je'e yhitiän. Hix, tu'ugjuøhñdy je'e yhity møødä Tieediä yhEspíritu.

4

1 Hojiøot ja'a Dios jiaančh tehñ miøød, paady højts tøø xwyiinguexy coø højts ja'a miädia'agy nyajwá'xät ja'a Jesucristocøxpä. Paady højts nga'a jootmayhaty ni mänäa.

2 Nyejpy højts ja'a tøyhajt coø højts ja'a Diosmädia'agy nyajwa'xy. Cab højts jaduhñ mänäa nhøhñda'agy. Ñajuøøbiä cu'ughajxy jaduhñ coø højts mänäa nga'a nhøhñda'agy. Xyhijxp højts ja'a Dios jaduhñ. Ja'a hñana'c-hajxy hønñdaacpä, cabä Diosmädia'agy hajxy ca'xy yajwa'xy. Yhamdsoo mädia'agy hajxy jaduhñ yajmämädiaagøøby magämaa. Höchähdiuunñä hajxy jaduhñ jiatcø'oy. Pero højts, ja'a tøyhajt højts nmädiaacypy.

3 Cabä jäya'ay ja'a mädia'agy hajxy nägøxiä wyiinjuø'oy, ja'a højts jaduhñ nyajwa'xypä ja'a Jesucristocøxpä. Paady hajxy jaduhñ quia'a wiinjuø'oy coø hajxy haxøøgtuum wiädity.

4 Paadiä Diosmädia'agy hajxy quia'a mabøga'añ, tøø ja'a wyiinmahñdyhajxy piädiäacäxä haxøøgtuum ja'a møjcu'ugóngäm, ja'a yaa hanehmbä hädaa yaabä naaxwiin. Coø ja'a wyiinmahñdyhajxy tøø piädiäacäxä haxøøgtuum, paadiä Diosmädia'agy hajxy hoy quia'a wiinjuø'owa'añ maa jaduhñ myiñän cujaay coø ja'a Jesucristo møcmäjaa miøødä. Tu'ugmädia'agy ja'a Jesucristo yhity møødä Tieedy.

5 Coø højts ja'a Diosmädia'agy nyajwa'xy, ja'a Jesucristo højts nmädiaacypy coø hajxy nägøxiä nWiindsønñhajtäm. Cab højts jaduhñ nyajcumaya'añ. Jaduhñ højts njoot chocy coø højts mijts nbuhbédät, je'eguiøxpä coø højts ja'a Jesucristo nWiindsønñhaty.

6 Dios jecy mänäan coø jøøn jiájät hagoonstuum. Cahnä ja'a naaxwiimbä hñajty yhooyø'oy. Jaaya'ay højts ja'a miädia'agy jaduhñ tøø xyajwiinjuø'oy coø je'e møcmäjaa miøødä. Coø ja'a Jesucristo hajxy tøø xyajnahwaats tøø xya-jcuhwáatsäm, jaduhñ hajxy nyajnajuøoyyäm coø ja'a Dios møcmäjaa miøødä.

7 Jaaya'ay højts tøø xwyiinguexy coø højts ja'a miädia'agy nyajwá'xät ja'a Jesucristocøxpä. Jaančh tehñ choobaatp ja'a miädia'agy jaduhñ. Højts, cab højts møcmäjaa nhamdsoo møødä. Dios højts jaduhñ xpiuhbejp coø højts ja'a miädia'agy nyajwá'xät. Coø højts jaduhñ xpiuhbety, jaduhñ yajnajuø'oy coø ja'a Dios møcmäjaa jiaančh tehñ miøødä.

8 Tøø højts häyohn may nmänaxy nyajnaxy, pero cab jaduhñ tiehm yhanaxiä. Naxy højts nga'a najuø'oy neby højts njatcø'owät, pero cab højts hanaxiä njootmayhaty.

⁹ Tøø hõjts häna'c mayhooc xjia wi'li chaaçhtiuna'añ, pero cab hõjts ja'a Dios mänaa xñajtsixø'ø. Hoy hõjts häna'c mayhooc tøø xjia häyoowhixy, cab hõjts nmõjpäda'agy. Hix, homiänaajä hõjts ja'a Dios jaduhñ xcwieendähaty.

¹⁰⁻¹¹ Nebiä Jesucristo hijty mähahñdium wiäditiän jabom-jabom, jaanä jaduhñ hõjts mähahñdium nwädijpä homiänaajä. Ja'a Jesucristocøxpä hõjts häna'c xjia wi'li yagho'oga'añ. Pero cab hõjts Jesucristo xñä'ägä nähducy. Hix, coo ja'a Jesucristo yho'cy, mänit jiuypiojtägajch. Mänit jim ñøcxy maa ja'a Tieediä wyiinduumän. Jimä møcmäjaa jäda'ahaty miøødänä. Paady hõjts jaduhñ homiänaajä xcwieendähaty.

¹² Paady hõjts mähahñdium nwädity coo hõjts Diosmädia'agy nyajwa'xy. Coo ja'a Jesucristo jiugyhaty, paady hajxy xcwieendähajtäm homiänaajä.

¹³ Jaduhñ jim myiñ cujaay maa ja'a Diosmädia'aguiän coo tu'jäya'ay jecy miänaañ: “Nmäbøjpöch ja'a Diosmädia'agy, päadyhøch ja'a Dios ngapxpaady”; jaanä jaduhñ hõjts ja'a Diosmädia'agy nmäbøjpä, paady hõjts ja'a Dios ngapx-paatpä.

¹⁴ Coo ja'a Dios ja'a Jesucristo yagjuypiojtägajch, ja'a nWiindsønähajtäm, jaduhñ hõjts ja'a tøyhajt nmøødä coo hõjts xyagjuypiojtägatsaambä näguipxy møød mijts. Paadiä Dios hajxy xyagjuypiojtägatsaanäm coo hajxy nhijtäm tu'ugmädia'agy møødä Jesucristo. Mänitä Dios hajxy nägøxiä xyajnøcxäänäm jim maa ja'a wyiinduumän näguipxy møød mijts.

¹⁵ Paady hõjts häyohn nmänaxy nyajnaxy, chojpy hõjts njoot jaduhñ coo mijts ja'a Diosmädia'agy hamuumdu'joot mmäbøgät cooc ja'a Jesucristo hajxy tøø xñähho'túutäm. Jaanä jaduhñ hõjts njoot chojpä coo ja'a jäya'ayhajxy maas nämay jiaac mäbøgät, weenä Dios hajxy nämay ñäma'ay: “Dioscujú'uyäp”, je'eguiøxpä coo ja'a Dios hojioot jiaançh tehñ miøødä. Y weenä Dios hajxy nämay ñämaabiä coo møcmäjaa jiaançh tehñ miøødä.

¹⁶ Nnajuøøby hõjts jaduhñ coo ja'a Dios hajxy xyagjuypiojgäänäm, paady hõjts nga'a jootmayhaty. Tehngajnä hõjts ja'a Dios møcmäjaa xjiaac mo'oy maa hõjts njuøhñdycøxpän, hoy hõjts nni'x ngopc tehngajnä jia mäjay.

¹⁷ Neby hõjts häyohn yaa nmänaxy nyajnaxiän, cab hõjts jecy nmänax nyajnaxa'añ. Y cab hõjts jaduhñ njaty tsaaçhpøcy. Coo hõjts jaduhñ tøø njaty tøø nhabety, paadiä Dios ja'a mayhajt møj may tiuna'añ maa hõjtscøxpän cøjxta'axiøø.

¹⁸ Pero cab hõjts jaduhñ nmõjpäda'agy coo hõjts jaduhñ yaa njaty nhabety hädaa yaabä naaxwiin. Hix, paquiä hõjts nnä'ä jaty nnä'ä habety. Jim hõjts njoot nbäda'agy maa ja'a Dios ja'a wyiinduumän. Cøjxta'axiøø hajxy jim xyaghidäänäm.

5

¹ Tsipcøxp hajxy nho'ogäänäm ndägoyyäänäm. Pero nmøødhajtäm ja'a tøyhajt hajxy jaduhñ coo ja'a Dios hajxy tøø xyajnahdijjäm cooc hajxy jim xyaghidäänäm maa ja'a wyiinduumän cøjxta'axiøø. Diósäts hajxy jim xyaghidäänäm, ca'a wyiingjäya'ayä hajxy jim xyaghidäänäm.

² Coo hajxy yaa ndsaaçhpøjcäm hädaa yaabä naaxwiin, paadiä njoot hajxy jaduhñ tøø nbädaacäm coo hajxy jim nnøcxäänäm tsajpootyp.

³ Coo hajxy jim ngóo'tämd, jaançh tehñ jiootcujc hajxy jim nnijiäwø'owäänäm jim Dioswiinduum.

⁴ Mäduhñtiä hajxy yaa njaac hjtäm hädaa yaabä naaxwiin, cab hajxy jiootcujc nhijtäm je'eguiøxpä coo hajxy yaa ndsaaçhpøjcäm. Pero cab hajxy ndsójcäm coo hajxy paquiä nho'c ndägóoyyämd. Je'e hajxy ndsójcäm coo njugyhajtäm cøjxta'axiøø nebiä Dios jiugyhatiän.

⁵ Ja'a Diósäts hajxy jaduhñ xyajnáhdíjjäm coo hajxy jim xyajnøcxáanäm maa ja'a wyiinduumän. Tøø ja'a yhEspíritu hajxy jaduhñ xyajnáguéjxäm coo hajxy jaduhñ xmiøødhíjtäm tu'ugmucy. Jaduhñä tøyhajt hajxy nmøødhájtäm coo ja'a Dios hajxy tøyhajt xjiaančh yagjugyhadáanäm cøjxta'axiøø neby je'e jiugyhatiän.

⁶ Paady højts jootcuje nhity jabom-jabom. Mäduhñtiä højts yaa njaac jugyhaty hädaa yaabä naaxwiin, cab højts jim ndsoj nøcxa'añ maa ja'a Jesucristo wyiinduumän. Tøyhajt jaduhñ.

⁷ Hoy højts ja'a Jesucristo yaa nga'a ja hixy hajujcy, nmäbøjcäp højts ja'a miädia'agy jaduhñ.

⁸ Cab højts nnä'ägä jootmayhaty ni weeñtiä. Choippy højts ja'a njoot coo højts nhó'ogät, coo højts jim nnøcxät maa ja'a Jesucristo wyiinduumän.

⁹ Cab højts nmøjpäda'agy pø ho'ogaamb højts, ó pø cab højts ndsoj ho'oga'añ. Pero choippy højts njoot jaduhñ coo højts ja'a Jesucristo miädia'agy hoy ngudiúunät. Jaduhñ højts ja'a Jesucristo xquiumáyät.

¹⁰ Hix, nægøxiä ja'a Jesucristo hajxy nøcxy nwiindäna'awáanäm. Mänit jaaya'ay ñägapxa'añ pøn hänäjty hoy tøø quiudiuñ, pøn hänäjty hoy tøø quia'a cudiuñ. Pønjaty hänäjty hoy tøø quiudiuñ, je'eds ja'a hoyhajt ja'a weenhajt hajxy paadaamb. Pero pønjaty hänäjty hoy tøø quia'a cudiuñ, quiumädowaamb by hajxy je'e.

¹¹ Nwiingudsähgøøby højts ja'a Jesucristo. Jia wi'i choippy højts ja'a njoot jaduhñ coo højts xquiumáyät. Nja wi'i yajmäbøgaamb by højts ja'a cu'ughajxy coo højts ja'a Jesucristo tøyhajt tøø xwyiinguexy. Ñajuøøbiä Dios coo højts ja'a miädia'agy hamuumdu'joot ngudiunä. Chójpíøčhä njoot jaduhñ coo mijts mnajuøøbiät coo højts ja'a Diosmiädia'agy hamuumdu'joot ngudiunä.

¹² Cab højts nyajcumaya'añ, hoy højts jaduhñ nja niñänømyii coo højts ja'a Jesucristo tøø xwyiinguexy. Paady højts mijts jaduhñ nhawáanäm, jaduhñ mijts mnajuø'owät neby højts mijts xpiuhgapxø'owät coo højts häna'c hänäjty jaduhñ tøø xñähwaambety. Ja'a häna'c-hajxy jaduhmbä, je'e hajxy yajcopcøøby pø hoy yhamdsoo cuhdujt hajxy quiudiuñ. Cab hajxy ñä'ägädä wiinjuø'oy coo ja'a wyiinmahñdyhajxy quia'a nä'ägädä hoyyä.

¹³ Jaduhñ højts häna'c xñänømy cooc tyijy højts nguhmännø'oy coo højts ja'a Dios ndsocy. Diósäts højts xñajuøøby coo højts nga'a cuhhiñ coo højts nga'a cuhmännø'oy. Hix, choippy højts ja'a njoot jaduhñ coo mijts ja'a Dios ja'a hoyhajt ja'a weenhajt xmió'owät.

¹⁴ Coø højts ja'a Jesucristo xjiaančh tehñ chójcäm, paady højts ja'a miädia'agy ngudiunäm hamuumdu'joot. Nmøødhájtäm ja'a tøyhajt hajxy jaduhñ coo jaaya'ay hajxy hoy xñähho'túutäm nægøxiä. Xyajnähwáatsäm ja'a nbojpä ngädieeyhajtämhajxy.

¹⁵ Coø ja'a Jesucristo hajxy hoy xñähho'túutäm, paadiä nhamdsoo cuhdujt hajxy nga'a yajtúunänä. Tsøgä miädia'agy hajxy jaduhñ cudíunäm mäduhñtiä hajxy yaa njaac jugyhájtäm. Y coø ja'a Jesucristo jiuypíøjtägajch, jaduhñä tøyhajt hajxy nmøødhájtäm coo hajxy xyagjugyhadáanäm cøjxta'axiøø nebiä Tieedy jiugyhatiän.

¹⁶ Cab højts pøn nyajcopcøøñä pø mäyøøhajxy, pø häyoobhajxy. Ja'a Jesucristo, jaduhñ højts hijty nhixy nebiä pajäya'ayän. Pero cab højts jaduhñ nhijxnä nebiä pajäya'ayän.

¹⁷ Hoorä, pønjaty ja'a Jesucristo tu'ugjoot tu'ugjuøhñdy møødhíjnäp, hawiin-jembiä wiinmahñdy hajxy jaduhñ miøødhájnäp. Tøø ja'a yhaxøøgwiinmahñdy hajxy jaduhñ yhøxhijxnä.

18-19 Ja'a Dios jaduhñ mänaañ coo hawiinjembä wiinmahñdy hajxy nmøødhájtämd. Y coo ja'a Jesucristo hajxy hoy xñähho'túutäm, jaduhñä Dios ja'a nbojpä ngädieey hajxy xyajñähwáatsäm. Jaduhñ hajxy xmiøødnijootpáatäm. Y højts jaduhñ tøø xwyiinguexy coo højts ja'a miädia'agy jaduhñ nyajwá'xät coo ja'a Jesucristo hajxy tøø xñähho'túutäm, y coo ja'a Dios hajxy xyajñähwáatsäm, y coo ja'a Dios hajxy jaduhñ xmiøødnijootpaadäänäm.

20 Ja'a Dios højts tøø xwyiinguexy coo højts ja'a Jesucristo miädia'agy nyajwá'xät. Jaduhñ højts tøø xñäma'ay coo højts mijts nmänuu'xtá'agät coo miädia'agy hajxy mmäbøjcät. Jaduhñä Dios hajxy xyajñähwá'adsät. Jaduhñ hajxy ween xmiøødnijootpaadøøjät.

21 Cabä Jesucristo ja'a Dios mänaa miägädiehy. Pero coo Dios hajxy xjiaançh tehñ chójcäm, paady miänaañ coo ja'a Jesucristo ja'a nbojpä ngädieeyhajxy xchømø'cämd. Y coo ja'a Jesucristo hajxy xñähho'túutäm, jaduhñä Dios hajxy xyajñähwáatsäm. Jaduhñ hajxy xpiädäacäm hawa'adstuum.

6

1 Tøø ja'a Diosmiädia'agy hajxy mmäbøcy, paadiä Dios ja'a hoyhajt ja'a weenhajt hajxy tøø xmio'oy. Højts mijts nmänuu'xtaacyy coo ja'a Diosmiädia'agy hajxy hoy mgudiúnät. Paady mijts jaduhñ nmänuu'xta'agy, coo højts ja'a Dios nmøødtuñ.

2 Hix, jaduhñ jim myiñ cujaay maa ja'a Diosmiädia'aguiän: Tøøch nyajñahdiy mänáajøch miich ja'a hoyhajt ja'a weenhajt hawiinmats nmó'owät.

Cooch miich mänit xpia'yá'axät, mänitøch miich nmädówät. Mänit nbuhbédät. Mänit nyajñähwa'ads nyajcuhwá'adsät, nmä Diosmiädia'agy miäna'añ. Hoorä, tøø yhabaatnä coo ja'a Dios hajxy nba'yáaxämd. Jaduhñä Dios hajxy xyajñähwaats xyajcuhwáatsämd.

3 Maa højts ja'a Diostuung nduñän, hoy højts njäya'ayhaty. Hix, cab højts ndsocy coo højts pøn xñähwaambédät.

4 Hoy højts ja'a Diostuung njaançh tuñ. Nmee'xtujpy højts hoy tyiiä, hoy ñejpiä højts nja jaty nja habety. Hanaxiä højts tøø ndsaaçhpøcy. Tøø højts häyohn mayhooc nmänaxy nyajnaxy.

5 Tøø højts mayhooc nyajwobho'ogy. Tøø højts mayhooc nyajtsumy. Tøø højts ja'a cu'ug mayhooc xñäbädø'ogy. Tøø højts mayhooc nhanuu'xø'øy ja'a Diosmiädia'agyquiøxpä. Tøø højts jamia'ay nhity mayhooc ja'a Diosmiädia'agyquiøxpä. Tøø højts mayhooc jaguiay jayhu'ugy nhijpä.

6 Coo højts ja'a Diostuung nduñ, cab højts haxøøgwiinmahñdy nnä'ägä møødä. Nwiinjuøøby højts ja'a Diosmiädia'agy. Mee'xxieemy højts nhity, cab højts tii nmøjpäda'agy. Hojioot højts nmøød. Hix, ja'a Dioshespíritu højts nmøød. Hamuumdu'joot højts jäya'ay jaduhñ ndsocy nba'häyoy.

7 Nyajwa'xyp højts ja'a tøyhajt. Ja'a Diosmäjaa højts nmøød. Jaançh tehñ yhoy højts njäya'ayhaty nebiä Dios choquiän. Jaduhñ højts ja'a haxøøgpä nga'a yajmäjäda'agy.

8 Näje'eyyä højts jäya'ay jaduhñ xwyiingudsähgø'øy. Näje'e højts xquia'a tsocy xquia'a mee'xy. Näje'e højts xquiumay, näje'e højts xñähøjy. Tømiädiaacp højts, hoy højts jäya'ay näje'e xjia nänømy cooc tyijy højts nhøhnda'agy.

9 Hoy højts ja'a tsaangu'ug xjia hixyhaty, cab højts häna'c näje'e xmiämøj xmiämayø'øy. Mäjahñdium højts njaançh tehñ wiädity, høxtä xyagho'ogaamb højts jäya'ay. Pero ja'a Dios højts jaduhñ xcwieendhapp. Tøø højts ja'a Dios xyajcumädoy, pero cabä Dios jaduhñ miäna'añ coo højts nhó'ogät.

10 Jootcuyc højts nnä'ägä hity homiänaajä, hoy højts wiingumänaajaty nja mänaxy nja yajnaxy. Hoy højts nja häyoy, nyajñähixøøby højts ja'a jäya'ay ja'a

Diosmädia'agy nämäy, jaduñä hoyhajt ja'a weenhajt hajxy piáadät. Hoy højts tii nga'a ja mөөдä, Dios højts xmioby tijaty højts nyajmaajiajpy.

¹¹ Mägu'ughajpädöjc, ja'a mijts jim hijpä Corintos, mijts jaduñ nmägapxyp. Tөө mijts ngөxy hawáañäm nebiaty højts ja'a mädia'agy nmөөдä. Njaanč tehñ chojpy højts mijts jaduñ.

¹² Nja wi'i miөөdnijootpaadäänäp højts mijts. Cab højts nnajuø'öy pө jaduñ mijts xjiäwөөbiä.

¹³ Tunä mayhajt hajxy, tsөc hajxy nijootpáatäm. Jaduhñ mijts nmägapxy nebiä huungän.

¹⁴ Cab hajxy mmөөdwädiymúgät pөñ ja'a Diosmädia'agy ca'a mäßөjp, coo hajxy jaduñ mnä'a pahíxpät neby hajxy yhaxөөgwäditian. Hix, pөñjaty ja'a Diosmädia'agy mäßөjp, hoy hajxy quiudiuñ. Hawa'adstuum hajxy je'e. Pero pөñjaty ca'a mäßөjp, cab hajxy quiudiuñ. Wiing ja'a wyiinmahñdyhajxy. Haxөөgtuum hajxy je'ebä.

¹⁵ Hix, cabä Jesucristo tu'ugmädia'agy yhity mөөдä möjcu'ugong. Jaanä jäduñduhmä, pөñ ja'a Diosmädia'agy mäßөjp, cab hajxy tu'ugmädia'agy yhiipä mөөд ja'a Diosmädia'agy hajxy ca'a mäßөjpä.

¹⁶ Cabä cuhdujt jaduñ myiñ coo häna'c quepychech naaxpoch hajxy wyi-ingudsähgө'öwät maa ja'a Diostөcän. Cabä quepychech naaxpoch jiujuquiä. Ja'a Diösäts mäßөcy juicy. Y coo ja'a Diosmädia'agy hajxy nmäßөjcäm, jaduñ mäwiin hajxy nmäbáatäm nebiä Diostөcän, je'eguiөxpä coo ja'a Dioshespíritu hajxy nmөөdhájtäm. Jaduhñä Dios jecy miänaañ:

Pөñjatyhöchä nmädia'agy xmiөbөjcäp, je'ečhä nhEspíritu nmo'owaamby. Nwoowhidáambiөch hajxy je'e.

Xwyiingudsähgө'öwáambiөch hajxy je'e. Ngu'ughadáambiөch hajxy je'e, nөmä Dios hajxy jecy xmiädiáacäm.

¹⁷ Jaduhñä Dios jecy miänaamä:

Puhwaatsnä hajxy ja'a häna'c ja'a quepychech hajxy wiingudsähgөөbiä, ja'a häna'c ja'a naaxpoch hajxy wiingudsähgөөbiä.

Cab hajxy mmөөdwädiymúñät. Hөxhix ja'a haxөөgpä hajxy. Mänítөch mijts xquiө'ödägөөñät.

¹⁸ XTieedyhadáambiөch mijts hñajtiän. Nnөөxhadáambiөch nmajc-hadáambiөch mijts hñajtiän, nөmä Dios jecy miänaañ. Möccuhdujt ja'a Dios miөөд. Hoy piөñä jaduñ yhane'emy.

7

¹ Mägu'ughajpädöjc, töyhajt jaduñ coo ja'a Dios hajxy xyhu-unghájtäm. Tsөcxä haxөөgwiinmahñdy hajxy najtshixөөyyäm cөxiä. Yө'ө haxөөgwiinmahñdy, xyajmá'täp ja'a mni'x ja'a mjuөhñdy jaduñ. Tsөгä Dios hajxy wiingudsähgөөyyäm. Tsөгä njoot hajxy pädiáacäm maa ja'a Dioscөxpän.

² Cham højts mijts nnämäaguumbä, tunä mayhajt hajxy, tsөc hajxy nijootpáatäm. Cab højts pөñ tөө nhäyoowhixy, cab højts pөñ haxөөgwiinmahñdy tөө nyajnahixө'öy, cab højts pөñ tөө nwiinhөөñ.

³ Pero cábөch nmäna'añ coöch pөñ tөө xñähөөнө'öy. Njaanč tehñ chojpy højts mijts jaduñ mäduhñtiä hajxy yaa njaac jugyhájtäm hädaa yaabä naaxwiin. Jaduhñ mijts hijty tөө nhuuc nämaabiä.

⁴ Nnajuөөbiөch coo mijts ca'xy mgudiuna'añ waambátyhöch mijts tөө nmägapxy tөө nhane'emy. Ngumáabiөch mijts jaduñ. Jootcүjc-hөch njaanč tehñ ñijiäwө'öyii maa mijtscөxpän. Jaanč tehñ xioondáacpөch, hoy højts madiu'u nja tsaačhpөcy.

⁵ Coo hõjts ja'a hermano Tito jim nga'a paaty maa ja'a cajpt jaduhñ xiøhatiän Troas, paady hõjts jim nwiimbijty. Y coo hõjts yaa nmejch Macedonia-naaxooty, ni yaa hõjts ja'a hermano Tito nga'a paatpä. Coo hõjts yaa nga'a tsoj paaty, paady hõjts hijty jootcuje nga'a nä'ägädä nijiäwø'øyii. Xmiädsiphajp hõjts jäya'ayhajxy hijty ja'a Diosmädia'agyquiøxpä. Jootmayhajp hõjts hijty je'eguiøxpä cooc tyijy mijts jaduhñ mga'a mæbøga'añ.

⁶ Ja'a Dios, yagjootmøcpøjpy je'e pønjaty jaduhñ jootmayhajp. Y coo ja'a hermano Tito jiaančh mejch, mänit hõjts ja'a Dios xyagjootmøcpøjcy.

⁷ Xjiaančh tehñ yagjootmøcpøjc hõjts ja'a Dios jaduhñ coo hõjts ja'a hermano Tito xyhawaanä coo mijts je'e myagjootmøcpøjcy mänaa jim yhitiän maa mijtsän. Cøjx hõjts xyhawaanä cóogøch mijts xjia wi'i jiøbhixy cooçh jim nnócxät maa mijtsän. Jaduhñ hõjts tøø xyhawaanäbä cooc mijts mjootmayhaty je'eguiøxpä cooçh mijts hijty tøø xyhuuc yagjootmayhajpä. Y jaduhñ hõjts tøø xyhawaanäbä cóogøch mijts xjiaančh tehñ jiahmiejsta'agy. Coo hõjts jaduhñ tøø xquiøxy hawaanä, páadyhøch njaančh tehñ xioonda'agy.

⁸ Mänáajøch mijts ja'a nocy jawyiinhajtpä nyajnäguexiän, nhójjøch mijts jaduhñ siémpräm. Paady hajxy weeñtiä mjootmayhajty. Jootmayháthøch høøch wéeñtiäbä coo mijts nhojy.

⁹ Coo mijts nhojy, paadiä mhaxøøgcuhdujt hajxy mhøxhijxy. Xquiumaayy mijts ja'a Dios jaduhñ coo hajxy jaduhñ mhøxhijxy. Coo hajxy jaduhñ mhøxhijxy, páadyhøch nxoonä'agy, ca'a jie'eguiøxpä coo hajxy mjootmayhajty.

¹⁰ Pønjaty yhaxøøgcuhdujt høxhijxp, je'edshajxy hodium mähmø'øwäp. Cumay hajxy jaduhñ piädsómät maa ja'a Diosän. Y cab hajxy jaduhñ jiootmayhájnät. Pero pønjaty yhaxøøgcuhdujt ca'a høxhijxp, haxøøgtuum hajxy miähmø'øwät. Hoy miänaaxøø hajxy jaduhñ jiootmayhada'añ.

¹¹ Pero mijts, hamuumdu'joot hajxy mgudiuñ nebiaty mijts tøø nmägapxy tøø nhane'emiän mänáajøch ja'a jayøbajtpä nocy nguexiän. Mjaančh høxhijx ja'a mhaxøøgcuhdujt hajxy nebiä Diosmädia'agy yhane'emiän. Mjootmayhajt hajxy jaduhñ coo hajxy hijty tøø mgädieey. Y mdsähgøøyy hajxy jaduhñ weeñtiä. Chøpy ja'a mjoothajxy coo mijts ngumáyät, paadiä craa hajxy mhøxquejxpädsøømy, ja'a haxøøgjatcøøyyäbä. Tøø hajxy myajcähxø'nø coo hajxy tii pojpä tii cädieey mga'a møødän.

¹² Paady hõjts ja'a nocy jim nguejxy maa mijtsän, coo häna'c-hajxy haxøøg tøø ñidiuñii. Ca'a jie'eguiøxphajtiä hõjts yø'ø nocy nguejxy. Paady hõjts nguejxpä, chojpy hõjts ja'a njoot hänäjty coo hajxy myajcähxø'øgät coo hõjts mijts xchocyñä. Xyhijxp hõjts ja'a Dios jaduhñ coo hõjts nga'a hønnda'agy.

¹³ Coo hõjts mijts jaduhñ xchocyñä, paady hõjts nxoonä'agy.

¹⁴ Xoonäacp hõjts jaduhmbä coo ja'a hermano Tito xioondaacpä. Paady xioonda'agy coo ja'a Diosmädia'agy hajxy hänäjty hoy mbanøcxyñä nägøxiä mänaa jim yhitiän maa mijtsän. Tøøchä hermano Tito hijty nnäma'ay coo mijts ja'a Diosmädia'agy hoy mgudiuñ. Y tøyhajt hajxy mjaančh cudiuñ.

¹⁵ Hamuumdu'joot mijts ja'a hermano Tito xjiaančh tehñ chocy, je'eguiøxpä coo mijts ja'a miädia'agy mmäbøjcä hamuumdu'joot nebiaty mijts xyhanehmiän.

¹⁶ Nnajuøøbiøch coo mijts ja'a Diosmädia'agy hoy mbanøcxaannä; páadyhøch nxoonä'agy.

8

¹ Hoorä, mägu'ughajpædøjc, cham hõjts mijts nyajmøødmädia'aga'añ nebiaty ja'a Dios mayhajt tøø tiuñ ja'a mæbøjpædøjcøxpahajxy, ja'a hajxy jim

tsänaabiä Macedonia-naaxooty.

² Jaančh tehñ xioondaacp hajxy, hoy hajxy jaduhñ tøø jia tsaačhpøcy hoyhoy, hoy hajxy jaduhñ jia häyoy hanaxiä. Coø hajxy jaduhñ jiaančh tehñ xioonda'agy, paadiä xädø'øñ hajxy may tøø yajmucy. Hojioot hajxy jiaančh tehñ miøød, paady hajxy may tøø yajmucy. Tøø ja'a häyoobäjäya'ay xädø'øñ hajxy mio'oyii; ja'a hermanodøjc-hajxy jaduhñ tøø yecy.

³ Hamuumdu'joot hajxy jaduhñ tøø yecy, ca'a yhadsipä, ca'a yha-jootma'adä. Tøøch nhamdsoo hixy coø hojioot hajxy jaduhñ jiaančh tehñ miøødä. Høxtä yejnaxypä xiädø'øñ hajxy jaduhñ näjootpä.

⁴ Coø hajxy miädoyhajty coø højts ja'a häyoobäjäya'ay hñajty nbuhbeda'añ xädø'øñhaam, ja'a Diosmädia'agy hajxy mabøjpä, mänit højts xñämaayy coogä xädø'øñ hajxy jaduhñ quixaambä, ja'a hajxy jim tsänaabiä Macedonia. Hamuumdu'jootäc hajxy jaduhñ quixa'añ.

⁵ Xoonäac højts jaduhñ coø ja'a hermanodøjc xädø'øñ hajxy may yejcy, ja'a hajxy jim tsänaabiä Macedonia. Y coø hajxy miänaañ coø ja'a Dios ja'a miädia'agy hajxy hamuumdu'joot quiudiunaanä, paady højts maas hanaxiä nxoonäacy. Dios jaduhñ mänaañ coø hajxy jaduhñ quiudiünät. Jaduhñ hajxy miänaambä cooc højts ja'a nmädia'agy hajxy xquiudiunáanäbä.

⁶ Mänaa ja'a hermano Tito jim jayøbajt yhooyän maa mijtsän, mänit hajxy xñämaayy coø xädø'øñ hajxy myajmügät. Hoorä, jim højts ja'a hermano Tito nguejxtägatsaambä maa mijtsän, weenä xädø'øñ hajxy mgøxy yajmucy. Mänit hajxy jim mguéxät maa ja'a häyoobäjäya'ayhajxiän, ja'a Diosmädia'agy hajxy mabøjpä.

⁷ Jaančh tehñ yhoy ja'a Diosmädia'agy hajxy mmabøcy. Jaančh tehñ yhoy hajxy myajwiingapxø'øy. Jaančh tehñ yhoy hajxy mwiinjuø'y. Hamuumdu'joot hajxy jaduhñ mmabøcy. Xjiaančh tehñ chojpy højts mijts. Hoorä, chojpy højts ja'a njoot coø mijts ja'a häyoobäjäya'ay mjaančh tehñ piuhbédät hamuumdu'joot xädø'øñhaam.

⁸ Cábøch mijts ndehm yhane'emy coø hajxy mbuhbédät. Paady mijts jaduhñ nyajmøødmädia'agy nebiatiä wiingjäya'ayhajxy tøø miäbuhbetiän, ween hajxy jaduhñ mbahjxpät. Jaduhñ hajxy myajcähxø'øgät coø hajxy tøyhajt mjaančh mädsojpä.

⁹ Tøyhajt jaduhñ coø ja'a Jesucristo hojioot jiaančh tehñ miøødä, ja'a nWi-indsønñajtämhajxy. Cahnä hñajty yaa quiäda'agyñä hädaa yaabä naaxwiin nebiä pajäya'ayän, jim hijty møc yhane'emy maa ja'a Tieedy ja'a wyiinduuman. Pero coø yaa quiädaacy, mänit jaduhñ jiajty nebiä hädaa yaabä jäya'ayhajxiän, neby hajxy yaa nhäyóowäm. Jaduhñ hajxy hoy xñähho'túutäm. Y coø hajxy jaduhñ tøø xñähho'túutäm, paady hajxy jim xyajnøcxáanäm maa ja'a Tieediä wyiinduuman, pønñatiä miädia'agy jaduhñ mabøjcäp.

¹⁰⁻¹² Cham mijts nwiingapx njøjcäpø'øwa'añ coø ja'a xädø'øñ hajxy myajpedøød neby hajxy hadojumøjt mwiinmahñdyhajtiän coø hajxy hñajty myajmuga'añ. Mja nähmajts hajxy jaduhñ, pero cahnä hajxy myajpedyüi. Hahixøøby jaduhñ coø hajxy myajpedøød, jaduhñ hajxy myajcähxø'øgät coø hojioot hajxy tøyhajt mjaančh møødä. Mijts jaduhñ mwiinmahñdyhajtsøn coø xädø'øñ hajxy hñajty myajmuga'añ. Jaduhñ hajxy myégät neby hajxy mmäjäda'aga'añ. Mädyöyyä jaduhñ. Cab jaduhñ yhahixø'øy coø hajxy hanaxiä myégät. Hix, jaduhñä Dios ja'a jioot chocy coø hajxy myajcähxø'øgät coø hojioot hajxy jaduhñ mjaančh møødä.

¹³ Cábøch nmäna'añ coø hajxy mhäyoodägø'øwät, páadyhøch tøø nmäna'añ coø hajxy hanaxiä mga'a yégät.

¹⁴ Jadúhnhöchä njoot chocy coo pøn tii quia'a yajmaajiádät. Jaduhnds je'e, hahixøøby jaduhñ coo mijts ja'a häyoobäjäya'ay mbuhbédät, je'eguiøxpä coo mijts nä'ä tägø'øbä mmøødä jäda'ahaty. Y coo mijts hānajtý tøø mhāyoodägø'øý, mānit mijts xpīuhbejtägātsāt, pø jim hajxy hānajtý miøødä nä'ä tägø'øbä.

¹⁵ Jaduhñ jim myiñ cujaay maa ja'a Diosmādia'aguiān: “Pønjatý may yajpādø'c, piuhmooyy hajxy je'e pønjatý weeñtiä yajpādø'c. Yaghaguipxy-jatiøøyy hajxy jaduhñ tu'cuhdujt.”

¹⁶ Dios ja'a hermano Tito jaduhñ tøø yajnāhdijy coo hojioot miøødhádät maa mijtsøxpä, neby højts hojioot nmøødän maa mijtsøxpän. Dioscujú'uyäp ja'a Dios jaduhñ.

¹⁷ Coø højts ja'a hermano Tito nnāmaayy coo jim ñócxāt maa mijtsän, jootcugøøyy je'e coø højts jaduhñ nnāmaayy coo jim ñócxāt. Hix, hamdsoojoot hijty jaduhñ ñä'ägä nøcxa'añ.

¹⁸ Nyajmäguexø'øwaamby højts ja'a hermano Tito ja'a mägu'ughajpä wiingpä. Wiinduhmčhajtøjc tøø yajmādoxyaty coo ja'a Diosmādia'agy hoy yajwa'xy ja'a Jesucristocøxpä.

¹⁹ Jaduhñä mǎbøjpādøjc-hajxy tøø miānaambä coø højts nmødhádät majaty højts ja'a xādø'øñ nyajmucy mānaa højts ja'a häyoobäjäya'ayhajxy hānajtý nõcxy nmo'owa'añän. Cāhxø'øgaamb jaduhñ coo ja'a Dios miøjjä jiaanchä. Jaduhñ quiāhxø'øgaambä coø højts hojioot nmøødä.

²⁰ Paady højts nāmetsc nādägøøg nwädity xādø'øñyajmujpä, cab højts ndsocy coø højts pøn xñānómāt cooc tyijy højts nje'ehada'añ. Hix, majiaty højts xādø'øñ nyajmucy.

²¹ Chojpy højts ja'a njoot jaduhñ coø højts ja'a jäya'ayhajxy xquiumáyät neby højts ja'a Dios xquiumáyyän.

²² Chaads højts ja'a mägu'ughajpä mäwiingpä nguexáangumbä møødä hermano Titohajxy. Mayhooc højts hoy tøø xmiøødtuñ hoy ñä'ä mädyii tuungä. Hamuumdu'joot jim ñøcxa'añ maa mijtsän. Hix, ñajuøøby jaduhñ coø mijts hoy myajtøjtägø'øwa'añ.

²³ Naxiä hermano Tito hajxy hoy mdehm yajtøjtägø'øwät coø hajxy jim miédsāt. Haa ja'a hermano Tito, hoy miānāajøch jaduhñ xñä'ägä møødtuñ, páadyhöch jim nguexa'añ maa mijtsän. Y ja'a jiamiøødhajxy nāmetspä, ja'a mǎbøjpādøjc-hajxy yaabä, jaduhñ hajxy tøø miānaambä coø hajxy jim ñócxāt. Hoyyā Jesucristo hajxy wyiingudsähgø'øý.

²⁴ Coø mijts ja'a hermano Tito hoy myajtøjtägø'øwät møødä jiamiøødhajxy, jaduhñ mijts ja'a mǎbøjpādøjc hajxy xyhíxāt coø hajxy tøyhajt mjaančh mǎdsocy. Tøjjiádäp jaduhñ neby højts mijts tøø nmādia'aguiān coø mijts hojioot mjaančh tehñ miøødä.

9

¹ Høøch mijts jaduhñ nnä'ä jaac näjaayøøby. Nnajuøøbiøch jaduhñ coø mijts ja'a häyoobäjäya'ayhajxy mbuhbeda'añ, ja'a Diosmādia'agy hajxy mǎbøjpä.

² Hix, nnajuøøbiøch coø hajxy hamuumdu'joot mbuhbeda'añ. Jadúhnhöchä mǎbøjpādøjc-hajxy tøø nhawaanä, ja'a hajxy jim tsānaabiä Macedonia-naaxooty. Jadúhnhöch hajxy tøø nhawaanä coø mijts hadojumøjt mdägøøyy xādø'øñyajmujpä, pønjatý Diosmādia'agy jim mǎbøjp Acaya-naaxooty. Y coø mijts jayøjp mnāhmajch, paadiä Macedóniabä jäya'ayhajxy nāmāy xpīahixaambä. Jaduhñ hajxy hamuumdu'joot miābuhbedaambä nej mijts mmābuhbeda'añän hamuumdu'joot.

³ Páadyhöchä hermano Titohajxy jim nguejxø'øga'añ maa mijtsän, weenä xādø'øñ hajxy paquiä myajmujpādø'øý. Jaduhnds je'e, coøch jim nnócxāt,

tøø ja'a xädø'øñ hajxy hānajtʸ mgøxy yajmujnā. Haa ca'a, tøøchā Macedo-niabāhajxy nhawaanā coo mijts ja'a xädø'øñ myajmuga'añ.

⁴ Hix, wéhndøchā Macedóniabā jāya'ayhajxy nāje'e nmødhādāt jim maa mijtsān. Y coo hajxy jaduhñ xyhíxāt coo ja'a xädø'øñ hajxy hānajtʸ mga'a cøxy yajmucyñā, mdsāhdiunaamb hajxy jaduhñ. Jadúhñhøch ndsāhdiúumbāt je'eguiøxpā cooçh mijts tøø nmādia'agy coo ja'a xädø'øñ hajxy hānajtʸ myaj-muga'añ.

⁵ Páadyhøch jaduhñ nwiinmaayy coo hijty yhahixø'øý cooçhā hermano Titohajxy jawyiin nguejxø'øgāt maa mijtsān, jaduhñ mijts jim xpíuhbédāt maa ja'a xädø'øñ hajxy myajmuquiān. Jaduhñā xädø'øñ hajxy myaghídāt nāhix hahixø'ø cooçh jim nmédsāt, neby hajxy jaduhñ tøø mmāna'añān coo hajxy myaghida'añ. Jaduhñ hajxy myajcāhxø'øgāt coo ja'a xädø'øñ hajxy myega'añ hojiootcøxpā. Cab pøn jaduhñ miáná'anāt cooc tyijy mijts hadsip tøø nhane'emy coo hajxy myégāt.

⁶ Jaduhñds je'e, pønjatʸ jaduhñ wiinduc wiindsaaçh, cabā hoyhajt hajxy piaada'añ. Pero pønatiā hāyoobājāya'ay nāxuu'tsp, je'edsā hoyhajt hajxy jaduhñ paadaamb. Tøyhajt jaduhñ.

⁷ Jootcujc hajxy myégāt hamuumdu'joot neby hajxy hānajtʸ myega'añān, ca'a yhadsipā ca'a yhajootma'adā, ca'a hajxy tii mnajtshāyowø'øý. Hix, je'e ja'a Dios chojpy pønjatʸ jaduhñ jootcujc yejp.

⁸ Møj jaançhā Dios. Xmió'owäp mijts ja'a hoyhajt ja'a weenhajt møj may, jaduhñ hajxy tii mga'a yajmaajiādāt ni mānaa. Nā'ä tågø'øbā hajxy jaduhñ xmió'owāt, jaduhñā wiingjāya'ay hajxy hoy mbuhbejtägätsāt hoy ñeipiä.

⁹ Jaduhñ jim myiñ cujaay maa ja'a Diosmädia'aguiān:

Pøn hojiāya'ay, møj mayyā hāyoobājāya'ay piuhbety.

Hoy miānaaxøø ja'a Dios jaduhñ piuhbejtägätsa'añ.

¹⁰ Ja'a Dios, yejpy je'e ja'a tøømd mädyii mní'ibäp, mädyii mdúnäp. Yajmayøøby jaduhñ nebiā mgáyāt nebiā mhú'ugāt. Jaanā jäduhñduhmbā, xmió'owäp mijts ja'a Dios nā'ä tågø'øbā tijaty hajxy hānajtʸ myajmaajiajpy, jaduhñ mijts ja'a hāyoobājāya'ay mmoodiägätsāt.

¹¹ Y coo mijts ja'a hāyoobājāya'ay jaduhñ hamuumdu'joot mbuhbédāt, mänit mijts ja'a Dios ja'a hoyhajt ja'a weenhajt møj may xmió'owāt. Y coo højts ja'a hāyoobājāya'ay xädø'øñ nøcxy nmo'oy, ja'a mijts hānajtʸ tøø myéquiäbā, mänitā hāyoobājāya'ay ja'a Dios hajxy ñāma'awa'añ: “Dioscujú'uyäp.”

¹² Hix, coo mijts ja'a hāyoobājāya'ay jaduhñ mbuhbédāt, mejtstu'u ja'a hoybā hajxy jaduhñ mduna'añ. Piaadaambiā hāyoobājāya'ayhajxy tijaty hajxy hānajtʸ yajmaajiajpy, y tehngajnā ja'a Dios hajxy jaduhñ ñāma'awa'añ: “Dioscujú'uyäp.”

¹³ Coø mijts ja'a hāyoobājāya'ay jaduhñ mbuhbédāt jootcujc hoy miädyii cajptā, myajcāhxø'øgaamby hajxy jaduhñ coo ja'a Dios ja'a miādia'agy hajxy mgudiuunā ja'a Jesucristocøxpā. Jaduhñā hāyoobājāya'ay ja'a Dios hajxy møj jaançh ñāma'awa'añ, je'eguiøxpā coo mijts ja'a Dios ja'a miādia'agy mgudiuunā, møød coo hojioot hajxy mjaançh tehñ miøødā ja'a hāyoobājāya'aguiøxpāhajxy.

¹⁴ Coø mijts ja'a Dios ja'a hoyhajt ja'a weenhajt møj may tøø xmio'oy, paady mijts ja'a hāyoobājāya'ay xchoga'añ xpia'hāyowa'añ, møødā Dios hajxy pia'ya'axa'añ ja'a mijtsøxpā.

¹⁵ Tsøcxä ja'a Dios hajxy nāgøxiä nāmáayyām: “Dioscujú'uyäp”, je'eguiøxpā coo ja'a yHuung yaa quiejxy hādaa yaabā naaxwiin, coo hajxy hoy xñähho'túutām. Møjmayhajt ja'a Dios jaduhñ tiuun hoy-yagjuøøñā.

10

¹ Høøch mijts cham nmägapxaamby nhane'emaamby, høøch Pablohajpä. Mänaa ja'a Jesucristo yaa wiäditian hädaa yaabä naaxwiin, jaanč tehñ miøødä hojoot hānajtj. Mee'xxieemy hānajtj jiaanč tehñ wiädity. Jadúhñhøch je'e nja pahixaañ cooçh mijts jaduhñ nmägapxa'añ nhane'ema'añ. Ja'a nmädsiphøchhajxy, jadúhñhøch hajxy xñänømy cooc tyijy mijts hānajtj tsähgø'ø tsähgø'ø nmägapxy nhane'emy mänáajøch jim nhitiän maa mijtsän, pero cooc tyijy høøch nga'a tsähgøøñä coo mijts nmägapxy nhane'emy nocyhaam. Cab jaduhñ tiøyyä, nä'ä høhñdaacp hajxy jaduhñ.

² Mägu'ughajpædøjc, huuc tunä mayhajt hajxy, høxhix ja'a haxøøgpä ja'a ca'a hoybä hajxy. Coo hajxy jaduhñ mhøxhixät, cab mijts jim waamb nnämä'awät cooçh jim nnøcxät maa mijtsän. Pero pøn jaduhñ mänaamb cooc tyijy højts hoy nga'a wädity nebiä hädaa jäya'ayhajxy hoy quia'a wäditiän hädaa yaabä naaxwiin, je'eçh mæbøcy hajxy nhøjäp hajäya'ayhaam. Nya-jcähxø'øgäbøch jaduhñ cooçh hānajtj tøyhajt nga'a tsähgø'ø.

³⁻⁴ Hoy højts yaa nja tsäna'ay hädaa yaabä naaxwiin, cab højts ja'a nhamd-soo wiinmahñdy nyajtuñ nebiä yaabä jäya'ayhajxy yajtuñän. Ja'a Dios højts xpiuhbejp ja'a miäjaahaam, cab højts ja'a Dios ja'a miädsip jaduhñ nyajmäjädaacä.

⁵ Jii jäya'ayhajxy näje'e wiädity, yajcumayaamb hajxy, høhñdaacp hajxy. Cabä jioothajxy yajmädsocy coo wiinghäna'c ja'a Dios hajxy pia'häyowät. Nyajcähxø'py højts jaduhñ coo yø'ø häna'c-hajxy jaduhñ yhøhñda'agy. Y coo højts hānajtj tøø nga'a yajmäjäda'agy, mänit højts nyajmäbøga'añ ja'a Jesucristocøxpä, coo ja'a miädia'agy hajxy ween quiudiuunä.

⁶ Y coo mijts hānajtj hoy tøø mgudiuñ, cab højts mijts hānajtj waamb nnämä'awaanä. Pero pønjatj jaduhñ ca'a nä'ägädä cudiunaamb, je'eds højts hahoy nhøxquexaamby maa ja'a tsajtøjcän.

⁷ Pønjatj jaduhñ najuøøby coo hajxy tøø wyiinguexyii ja'a Jesucristäm, ween hajxy ñajuøøbiä cooçh ja'a Jesucristo tøø xwyiinguejxpä. Tøyhajt jaduhñ. Hoy piønä jaduhñ ñajuø'ø.

⁸ Ja'a Jesucristo højts ja'a cuhdujt jaduhñ tøø xmio'oy coo højts mijts nmägapx nhané'emät. Chojiä jioot jaduhñ coo mijts ja'a miädia'agy mjaac mæbøjcät. Cabä jioot chocy coo hajxy mdu'udägóyyät. Tøyhajt jaduhñ cooçhä Jesucristo ja'a cuhdujt jaduhmbä tøø xmio'oy. Cooçh jaduhñ nniñänømyii, cábøch ndsähdiuna'añ, hóyhøch häna'c jaduhñ xjia nänømy cóogøch tyijy nya-jcumaya'añ hanaxiä.

⁹ Cábøch mijts nhadsähgø'øwa'añ, hoy mijts nocy naxy nja yajnäguexy.

¹⁰ Ja'a nmädsiphøchhajxy, jaduhñ hajxy miäna'añ cooc tyijy mijts møc nhane'emy nocyhaam. Pero jaduhñ hajxy miänaambä cooc tyijy hānajtj møc nga'a hane'emy mänáagøch jim nhitiän maa mijtsän, cooc tyijy hānajtj weenjaty ndsähgø'ø.

¹¹ Pero pønjatj jaduhñ mänaamb, cabä tøyhajt hajxy miøødä. Jaduhñdsä tøyhajtpä, neby højts mijts møc nhane'emiän nocyhaam, jaanä jaduhñ mijts møc nhane'emaambä coo højts jim nnøcxtägätsät maa mijtsän.

¹² Jii häna'c-hajxy näje'e, jaanč tehñ yajcumayaamb hajxy cooc tyijy hajxy jiaanč tehñ jiaty jiaanč tehñ ñajuø'ø. Hamiñ haxøpy hajxy jaduhñ ñiguiumayii. Y cabä wiinghäna'c hajxy quiumay. Pero cabä tøyhajt hajxy miøødä. Højts, cab højts jaduhñ nhäna'c-haty. Cab højts jaduhñ niguiumayii.

¹³ Caj pues, cab højts nyajcumaya'añ. Jaduhñ højts nduna'añ neby højts ja'a Dios tøø xyajnähdijjiän coo højts ndúnät. Jaduhñ højts tøø xyajnähdijj coo højts jim ndúnät høxtä jimbaady maa mijtsän.

¹⁴ Coo hõjts jim nduñ maa mijtsän, ngudiumby hõjts jaduhñ neby hõjts ja'a Dios tõe xñäma'ayän. Hix, hõjts ja'a Diosmädia'agy jim nyajwa'xtsohn maa mijtsän, ja'a Jesucristocøxpä.

¹⁵ Majaty wiinghäna'c jaduhñ tõe tiuundsooñän, cab hõjts jaduhñ nmäna'añ coo hõjts jim tõe nduñ. Cab hõjts jaduhñ nguhdujthaty. Pero chojpy hõjts ja'a njoot coo mijts ja'a Diosmädia'agy maas hoy mmäbögät, jaduhñ hõjts maas hoy njaac tehñ tiúnät maa mijtsän.

¹⁶ Y jaduhñ hõjts ja'a Diosmädia'agy hoy nyajwá'xät jäguembaady maa pøn ja'a Diosmädia'agy quia'a mädoyñän. Hix, cab hõjts nduna'añ maa wiinghäna'c jaduhñ tõe tiuundsooñän. Hix, cab hõjts jaduhñ nyajcumaya'añ.

¹⁷ Jaduhñ jim myiñ cujaay maa ja'a Diosmädia'aguiän: “Cab jaduhñ yhahixø'oy coo hamdsoo mniguiumayøjät. Pero jaduhñ yhahixø'oy coo ja'a Dios hajxy mõj jaančh mnänømat.”

¹⁸ Je'eduhñ tsoobaatp coo ja'a Dios jaduhñ xquiumáyät. Cab jaduhñ choobaady coo hamdsoo mniguiumayøjät.

11

¹ Huuc tunä mayhajt hajxy, huuc mee'x hajxy weeñtiä. Chámhøch weeñtiä nhuuc mädia'aga'añ nebiä jäya'ayhajxy yajcumayaambän. Cooch jaduhñ weeñtiä nniguiumayii, jaduhñ yajmädoy nebiä cuhhiimbähajxy miädia'aguiän.

² Nej mijts ja'a Dios xchoquiän, jaduhñhøch mijts ndsojpä, je'eguiøxpä cooçh mijts ja'a Diosmädia'agy tõe nyajmäbøcy ja'a Jesucristocøxpä. Chójpøçhä njoot jaduhñ coo ja'a mjoot hajxy mbädá'agät hamuumdu'joot maa ja'a Jesucristocøxpän. Cabä mjoot hajxy wiingtuum mbädá'agät.

³ Mnigwieendähadøjöp hajxy, jaduhñ hajxy pøn xquia'a jøjcapxø'owät, coo hajxy xyagjahdiägóyyät ja'a Jesucristo. Jii häna'c-hajxy näje'e wiädity mäwiinhøhmbä. Cab mijts xyajmädsocy coo ja'a Jesucristo hajxy hamuumdu'joot mbanøcxnät. Paquiä hajxy jaduhñ xwyiinhøønät. Haa ca'a, jaduhñä Eva jecy yhuuc wiinhøhñäbä ja'a mõjcu'ugóngäm mänaa ja'a mõjcu'ugong ñibiäda'aguijän nebiä tsahñdiän. Siémprämä mõjcu'ugong quiuwiinmahñdiä. Paquiä ja'a Eva yajwiinhøhñ.

⁴ Paquiä mijts ja'a miädia'agyhajxy jaduhñ mmäbøjcø'cä pønjaty mijts jaduhñ wiing xyajnähihøøby ja'a Jesucristocøxpä. Cab hajxy jaduhñ yajnähihøøby neby hõjts ja'a Diosmädia'agy nyajnähihøøyän ja'a Jesucristocøxpä. Cab hajxy jaduhñ yajnähihøøby ja'a Dioshespíritucøxpä neby hõjts nyajnähihøøyän. Paquiä mijts ja'a miädia'agyhajxy jaduhñ mbadu'ubøjcä.

⁵ Yø'ø häna'c-hajxy jaduhñ wiing yajnähihøøbiä ja'a Jesucristocøxpä, jaduhñ hajxy ñiñänømyii nebiä Dioswiinguexyypän, neby jaančh tehñ jiajpän. Cab jaduhñ yhooyä coo hajxy mmäná'anät cooc tyijy hajxy miaas jaty queeçh høøch njaty.

⁶ Wehñdäda'a jaduhñ tiøyyä cooçh hoy yajxón nga'a xi'igy nga'a mädia'agy; cab jaduhñ ñejpiä. Pero tøyhajt jaduhñ cooçh madiu'u njaty nnajuø'oy ja'a Diosmädia'agyquiøxpä. Homiänaajä hõjts mijts ja'a tøyhajt nmo'oy hoy ñä'a tiiguiøxpä.

⁷ Mänájøch mijts ja'a Diosmädia'agy nyajwiingapxø'oyän, cábøch mijts jaduhñ mänaa nnämaayy cooçh mijts xmiäjúyät. Niguiudúunäbøch hñajty hamdsoo, je'eguiøxpä cooçhä njoot hñajty chocy coo mijts ja'a Diosmädia'agy maas hoy mmäbögät. Y cooçh hñajty hamdsoo nniguiudúunäxä, páadyhøçhä jäya'ayhajxy näje'e xñänømy cóogøch tyijy hñajty hoy nga'a cuduiñ. Pero cab jaduhñ tiøyyä.

⁸ Wiingjäya'ayhøchhajxy hānajt̃ xpiuhbejp, ja'a Diosmādia'agy hajxy hānajt̃ mǎbøjpǎ wiingtuumjaty. Páadyhøch hajxy hānajt̃ xpiuhbety cooçh mijts ja'a Diosmādia'agy hānajt̃ nyajwiingapx nyajwiinmādiaagø'ø.

⁹ Mānāajøch jim̃ nhitiān maa mijtsān, cábøch hānajt̃ pøñ nnāma'ay cooçh hajxy xpiuhbédāt xādø'øñhaam, hóyhøch hānajt̃ tii nja yajmaajiaty tāhoocjaty. Hix, xpiuhbéjpøchä jäya'ayhajxy hānajt̃, ja'a Diosmādia'agy hajxy hānajt̃ mǎbøjpǎ, ja'a hajxy hānajt̃ jim̃ tsohm̃bä Macedonia-naaxooty. Xmióobiøch hajxy hānajt̃ tijátyhøch hānajt̃ nyajmaajiajpy. Y cábøch mijts mānaa nnāma'awa'añ cooçh mijts xpiuhbédāt xādø'øñhaam.

¹⁰ Tømiādiāacpøch jaduhñ nebiā Jesucristo tiømiādia'aguiān. Cábochä xādø'øñ pøñ nmäyujwa'añ jim̃ maa mijts mdsāna'ayān Acaya-naaxooty.

¹¹ Coø pøñ jaduhñ miānā'anāt cóogøch tyijy mijts nga'a tsocy, høhndaacp hajxy jaduhñ. Ja'a Dios jaduhñ najuøøby cooçh mijts njaançh tehñ chocy njaançh tehñ pia'häyoy.

¹²⁻¹³ Jii hāna'c-hajxy näje'e wiädity mǎwiinhøhmbä. Ja'a Jesucristäc tyijy hajxy tøø wyiinguexyii coo ja'a Diosmādia'agy hajxy yajwá'xāt maa ja'a mǎbøjpädøjc-hajxiān, neby højts ja'a Jesucristo tøø xwyiinguexiān coo højts ja'a Diosmādia'agy nyajwá'xāt. Pero høhndaacp hajxy; cab hajxy tøyhajt tøø wyiinguexyii ja'a Jesucristām. Paady hajxy jaduhñ yhøhnda'agy coo hajxy yajcumaya'añ.

¹⁴⁻¹⁵ Yø'ø hāna'c-hajxy, ja'a møjcu'ugong hajxy wyiindsøñhajpy. Jaaya'ay hajxy jaduhñ piahijxyp. Nnajuøøyyām hajxy coo ja'a møjcu'ugong ñibiāda'agyii nebiā jaançh tehñ yhojbān, nebiā Diosmoonsān. Hoorä, cab jaduhñ yhoj-yagjuøøñä coo ja'a møjcu'ugongä mioonsāhajxy pīajatcø'ø, coo hajxy yhøhnda'agy cooc tyijy hajxy tøø wyiinguexyii ja'a Jesucristām. Y coo hajxy jaduhñ haxøøg jīäya'ayhaty, je'e hajxy jaduhñ quiumādowaamby.

¹⁶ Hoorä, chámhøch mijts nmägápxcombä. Cab hajxy jaduhñ mmānā'anāt cóogøch tyijy tøø nguhhiñ, hóyhøch weeñtiä nja niguiumayii. Pero, pø mjaançh mānaamb hajxy jaduhñ cóogøch tyijy tøø nguhhiñ, huuc tunä mayhajt hajxy, høøchä nmādia'agy hajxy weeñtiä huuc hamādoowhíjtäc. Nhuuc nimiādia'agyijøch weeñtiä. Nhuuc niguiumayíijøch weeñtiä.

¹⁷ Cáboch nmāna'añ cooçhä Dios ja'a cuhdujt tøø xmio'oy cooçh jaduhñ nniguiumayøøjät. Jadúhñhøch nniguiumayii nebiä cuhhiimbān.

¹⁸ Hix, ja'a jäya'ayhajxy nāmāybä, miāniguiumáayyāp hajxy tijaty hajxy yaa miøød hādaa yaabä naaxwiin, møød tijaty hajxy jaduhñ tøø tiuñ. Jaduhñch høøchpǎ, wéeñtiøch cham̃ nmāniguiumayāanābä tijátyhøch tøø nduumbä.

¹⁹ Jaduhñ mijts mjaançh tehñ ñibiāda'agyii nebiä jaançh tehñ jiajpān nebiä jaançh tehñ ñajuøøbiān. Paady mijts ja'a cuhhiimbāhāna'cä miādia'agyhajxy mhamādoowhidaañä. Pero cab hajxy tøyhajt mjaançh jaty mjaançh najuø'ø.

²⁰ Hix, mmee'xtujpy hajxy hoy ñä'ä tijatiä, hoy mijts yø'ø hāna'c-hajxy hoy ñebiatiä xjia häyoowhixy, yø'ø hāna'c-hajxy høhndaacpǎ, yø'ø miādia'agy hajxy mjaançh tehñ yhamādoowhidāanābä. Xyhanehmb mijts jaduhñ nebiä moonsān. Y xñägáayyāp xñähúucāp mijts ja'a mxādø'øñ. Xwyiinhøhmb mijts yø'ø hāna'c. Xpiejxp mijts yø'ø hāna'c. Høxtä xquiojxp mijts yø'ø hāna'c, y cab hajxy waamb mmāna'añ. Cab mijts yø'ø hāna'c xyhixy nebiä jäya'ayān.

²¹ Pero højts, cab mijts jaduhñ mānaa nhäyoowhixy neby mijts yø'ø hāna'c xyhäyoowhixiān, yø'ø hāna'c-hajxy høhndaacpǎ. Cab højts jaduhñ njootmøjjä.

Chámhøch weeñtiä nhuuc mǎdia'agāangumbä nebiä cuhhiimbān. Tijaty yø'ø hāna'c-hajxy miāniguiumáayyāp, nmøødhøchä cuhdujt høøchpǎ cooçh jaduhñ nmāniguiumáayyābät.

²² Niguiumáayyap hajxy je'eguiøxpä coo hajxy yhebreojäya'ayä, coo ja'a Abraham hajxy jecy yhaphajty tieedyhajty mөөдä Israel. Pues jaanä jaduhñch hөөчпä, jaduhñch nniñänöömäbä coöchä Abraham tөө nhaphajpä tөө ndeedyhajpä.

²³ Jaduhñ hajxy ñiguiumáayyabä je'eguiøxpä cooc tyijy hajxy mioonsähadyii ja'a Jesucristom. Pues xmioonsähájpöchä Jesucristo hөөчпä. Ymaas hóyhöch nduñ que yø'ø häna'c-hajxy tiuñ. Cooch jaduhñ weeñtiä nniguiumayii, jaduhñ yajmädooy nebiä cuhhiimbähajxy miädia'aguiän. Maas möc-höch tөө nduñ que yø'ø häna'c-hajxy tөө tiuñ. Mayhóoc-höch tөө nyajtsumy tөө nyajmach. Ni pøn jaduhñ quia'a yajtsumy quia'a yajmachñä nébiöch tөө nyajtsumiän. Mayhóoc-höchä häna'c tөө xjiaanç tehñ wiobho'ogy. Mayhóoc-höchä häna'c ja'a weenjaty tөө xquia'a yagho'ogy.

²⁴ Mägooxc-höoc-höchä judíoshajxy tөө xjiu'xy hii'xmajmocxmädaaxcø'ø.

²⁵ Tägoøghöoc-höchä häna'c tөө xwiopy paxyhaam. Tähóoc-höchä häna'c xjia ca'ch; xquiuhga'adsäamböch hajxy hñajty. Tägoøghöoc-höchä barco tөө xmiäma'adø'øy mejjiooty. Xjia möödnöögugulinhöch jaduhñ. Mänáajöchä barco tähooc xmiägüiñän, tu'xөөч jiiby nhijty mejywyiing mööd tu'tsuhm.

²⁶ Mayhóoc-höchä yoñdiu'u tөө ndu'uyo'oy. Mayhóoc-höch ja weenjaty tөө nga'a nöøho'ogø'øy möjnöögujc. Tөөчä mee'tspädøjc mayhooc nyohbi-aady. Tөөчä nhamdsoo mägunaax mayhooc xjia yagho'oga'añ. Tөөчä wiinghäna'c xjia yagho'ogaambä; ca'a yhööchä nmägunaaxhajxy je'e. Tөөчä nwädity mähñdiuum jim cajptooty, mööd jim pactuum, mööd jim mejjiooty. Tөөчä häna'c mayhooc xchaaçhtiuñ, ja'a hajxy jaduhñ mänaambä cooc tyijy hajxy miäböcy.

²⁷ Tөөчä tuung mayhooc xyaghanuu'xø'øy; höxtä xyajtsaaçhpöjc-höch jaduhñ. Mayhóoc-höch tөө ndsunaxy jamia'ay jayhity. Tөөчä yuu mayhooc nmänaxy nyajnaxy möödä tödsø'ø. Tөөчä mayhooc nhity jaguiay jayhu'ugy. Tөөчä tөөчпä mayhooc nmänaxy nyajnaxy. Nja yajmaajjájpöchä wit tucxy hñajty.

²⁸ Tөөчä madiu'u ndsaaçhpöcy, pero cáböch jaduhñajtä ngøxy mädia'aga'añ. Je'eçh nmädia'agaamby coöchä mähöjpädøjc jabom-jabom nnädajy nnämay wiinduhmçhajtøjc, pø hoy pø ween hajxy yhity. Hix, hөөчä ngø'jooty hajxy jaduhñ yhity.

²⁹ Pønä Diosmädia'agy hoy ca'a cudiunaamb, hoy hajxy jia mähöcy, nnäjootmayhájpöch hajxy jaduhñ. Pøn jaduhñ cädiehby je'eguiøxpä coo tөө wyiinhöøñii, nmäjootma'adhájpöchä häna'c ja'a tөө miäwiinhöøñäbä.

³⁰ Hөөч, cáböch nyajcumaya'añ. Pero coöch häxøpy nyajcumaya'añ, je'eçh häxøpy nyajniguiumayäänäp coöchä häyohn mayhooc tөө nmänaxy tөө nyajnaxy.

³¹ Ja'a Dióshöch jaduhñ xñajuøøby coöch nga'a höhnda'agy. Ja'a Jesucristo ja'a Tieedy je'e. Tsögä Dios hajxy cøjxta'axiøø wiingudsähgøøyyäm. Ja'a Jesucristo hajxy nWiindsønñájtäm.

³² Mänaa ja'a Aretas hñajty tiuñän gobiernä, mänítöchä mioonsä xjia yajmadsaañ jim maa ja'a cajpt jaduhñ xiøhatiän Damasco. Juhmuu'tswäditiä cajpt hñajty jaduhñ. Jia pädaac ja'a hadänaabiä hajxy majatiä tägø'øwøødiaact nébiöch jaduhñ nga'a pädsömät.

³³ Pero päyø'c-höch. Ja'a nmägu'ughajpöchhajxy hoy xquiuhdöøñaxy cachjooty maa ja'a muuçh hñajty jiütän.

12

¹ Cab jaduhñ yahixø'øy coöch nyajcumáyät. Pero nébiöch cham

nmädia'aga'añän, jaduhñ yajmädowa'añ nébiöch nyajcumaya'añän. Je'e'ch chamñ nmädia'agaamby nebiátyhøchä Jesucristo hijxtahñd tøø xyajwiin-hixiän.

²⁻³ Nmøødhípiøchä Jesucristo tu'ugmädia'agy. Tøø yhiñä majmactsjumøjt coo'chä Dios jimñ tøø xyaghoy tsajpootyp maa ja'a wyiinduumän. Cábøch nnajuø'ø y pø ni'xhaam pø copc-háamhøch jimñ nhooyy, o pø juøhñdyhaam. Ja'a Dios jaduhñ nidiuhñ najuøøby.

⁴ Madiú'ujøchä hoy-yagjuøøñäjatypä jimñ nmädooyy tsajpootyp. Cábøchä cuhdujt nmøødä coo'ch nmädiaactägätsät.

⁵ Coø wiinghäna'c häxøpy jimñ tøø yhoy tsajpootyp, mänitøch häxøpy nmøjpäda'aga'añ. Pero høøch, cápøch hamdsoo nniguiumaya'añii. Jagóoyyøch nmädia'aga'añ nebiátyhøchä häyohn tøø nmänaxy tøø nyajnaxy.

⁶ Nmøødhøchä cuhdujt jaduhñ coo'ch nmädiá'agät nebiátyhøchä Dios tøø nmøødtuñ. Hix, tøyhájthøchä Dios jaduhñ tøø nmøødtuñ. Cábøch nmädia'aga'añ coo'ch jimñ nhooyy tsajpootyp, je'eguiøxpä coo'chä njoot quia'a tsocy coo'ch pøn xmiøjpäda'agät. Coo'chä jäya'ayhajxy xyhíxät coo'ch hoy njäya'ayhaty, coo'ch hajxy xmiädówät coo'ch hoy ngapxy nmädia'agy, mänitøch hajxy xquiumäyät.

⁷ Jaan'ch tehñ yhoy-yagjuøøñäjätyhøch jimñ nwiinhijxy tsajpootyp. Pero cabä Dios ja'a jiøot chocy coo'ch nniguiumayøøjät. Paadiä Dios miänaañ coo'chä møjcu'ugong ja'a tsaachpä xyajpáadät, jadúhñhøch hamdsoo nga'a niguiumayøøjät.

⁸ Tägøøghóoc-høchä Jesucristo nja mänuu'xtaacy coo'ch cu xyajnähwaach.

⁹ Mänitøch xyhadsooyy: “Njaan'ch tehñ chojpy njaan'ch tehñ pia'häyóobiøch miich. Páadyhøch miichä mdsaa'hpä nga'a yajnähwa'adsa'añ, nyajcähxø'øgáambiøch jaduhñ coo miich mduñ ja'a høøchä nmäjaagøxpä”, nómhøchä Jesucristo xñämaayy. Xoonäacpøch jaduhñ coo'chä ndsaa'hpä xquia'a yajnähwa'adsaannä, je'eguiøxpä coo'ch tøø xñäma'ay cóogøch xyajtuna'añ ja'a miäjaagøxpä.

¹⁰ Xoonäacpøch jaduhñ coo'chä Jesucristo xyajtuñ, hóyhøchä tsaachpä nja paady madiu'u. Náxyhøchä häna'c xyhäyoowhixy. Náxyhøch cøxiä wiinä nyajmaajiaty. Náxyhøchä häna'c xchaa'htiuñ ja'a Diosmädia'agyquiøxpä. Náxyhøchä häyohn nmänaxy nyajnaxy. Pero cápøch nnä'ägä møjpäda'agy coo'ch jaduhñ njaty nhabety. Hix, coo'ch jaduhñ njaty nhabety, cähxø'p jaduhñ coo'ch tii nga'a tuñ ja'a nhamdsoo mäjaaháamhøch; ja'a Jesucristo miäjaaháamhøch jaduhñ nduñ.

¹¹ Hoorä, hóyhøch tii nga'a ja jada'añ hamdsoo, nmaas jájpiøch høøch quejee yø'ø häna'c-hajxy, yø'ø hajxy jaduhñ niñänøømäbä cooc tyijy hajxy Dyioswiinguexiä. Cábäc tyijy pøn jaduhñ jiaty nébiäc hajxy jiatian. Y coo'ch yø'ø häna'c-hajxy jaduhñ tøø xñähwaambety, tiich mijts jaduhñ coo tøø xquia'a nähgapxtu'udy. Coo'ch mijts tøø xquia'a nähgapxtu'udy, páadyhøch chamñ hamdsoo nniñähgapxtu'udyii. Jaduhñ weenjaty yajmädoy nebiä ya-jcumayaambän.

¹² Mänáajøch jimñ nhitiän maa mijtsän, mänithøchä hijxtahñd madiu'u nyajcähxø'cy hoy-yagjuøøñäjatypä. Ja'a Diosmäjaaháamhøch jaduhñ nyajcähxø'cy. Nyajcähxø'c-høch jaduhñ coo'chä Dios jaduhñ tøyhajt tøø xwyi-inguexy. Mee'xtújpøch hñajty.

¹³ Jaan'ch tehñ yhóyhøch nduñ hoy miädyii tsajtøgootiä. Jaanä jadúhñhøch jimñ hoy nduumbä maa mijtsä mdsajtøjcän. Pero je'e mijts mga'a hojiäwøøby coo'ch mijtsä xädø'øñ tøø nga'a mäyujwa'añ nébiøch wiingtuumjaty nyujwa'añän. Jaan'ch tehñ wyiingä wiinmahñdy hajxy mmøødä. Pø tøøch mijts

nyagjootma'ady, hөөч hajxy huuc мее'xäc.

¹⁴ Metsc-höoc-höc jim tөө nһoonä maa mijtsän. Miädägөөghöocpөc cham nnөcxáangumbä. Cábөc mijts tii nmäyujwa'ana'añ. Cábөчhä njoot chocy coo hajxy tii xmió'owät. Jaduhn mijts ndsocy nebiä hamdsoo huungpän, paady mijts jaduhn nbuhbeda'añ. Pero cábөc nmäna'añ coöc mijts xpiuhbe-jtägätsät xädө'өнhaam.

¹⁵ Tөөчhä njoot hamuumdu'joot nbäda'agy maa mijtsän coo mijts nbuhbédät hoy ñejiä, hóyhөc cөxypänejiä cu nja jat cu nja habet maa mijtscөxpän. Njaanч tehm chojpy mijts jaduhn; pätiidä mijts jaduhn coo xquia'a tsojtägach.

¹⁶ Mänáajөc jim nhoyyän maa mijtsän, cab mijtsä xädө'өн nmäyujwaañ. Mnajuөby hajxy jaduhn, tuhmds. Pero näje'e mijts jaduhn mmäna'añ cöogөc tyijy mijts tөө nwiinhөөñ

¹⁷ mänáajөchä nmägu'ughajpähajxy jim nguexiän maa mijtsän xädө'өнyajmujpä. Jaduhnägäts tyijy mijts tөө nmämeeч. Pero cab jaduhn tiöyyä.

¹⁸ Mänáajөчhä hermano Titohajxy jim nguexiän maa mijtsän mөөdä mägu'ughajpä tu'ugpä, ni je'e mijts xquia'a mäme'e'tspä. Hix, jaduhnä hermano Tito howyiinmahñdy hajxy miөөdäbä nébiөc nmөөdän. Hoguiuhdujt hajxy miөөdäbä nébiөc nmөөdän.

¹⁹ Jaduhn mijtsäda'a mmäna'añhaty cooc tyijy höjts nja wi'i ñiñähgapxtu'uda'añii maa mijtscөxpän. Pero cab jaduhn tiöyyä. Ja'a Dios höjts xyhijxp coo höjts ja'a Jesucristo tu'ugmädia'agy nmөөdhity. Mägu'ughajpädөc, paady höjts mijts ja'a Diosmädia'agy jaduhn nyajwiingapxө'өy, chojpy höjtsä njoot jaduhn coo mijts hamuumdu'joot mjaac mäbөгät.

²⁰ Cöcөc jim nnөcxtägätsät maa mijtsän, mänítөc jootcuyc nhídät pө hoy hajxy hänajty mwädity. Jaduhn hajxy jootcuyc mhíjpät ja'a hөөчcөxpä. Pero pө cab hajxy hänajty hoy mwädity, jootmayhádäbөc jaduhn. Jaanä jaduhn mijts mjootmayhápät. Je'eч jaduhn cham nnädaj nnämaaby. Je'eч jaduhn nnänөөmby ja'a ca'a howiädit, pө mnimiädsibөөyyäp hajxy hänajty, pө cab hajxy hänajty myajniyajmädsogyii, pө mnimiäjootmä'täp hajxy hänajty, pө mnimiädsiphájtäp hajxy hänajty, pө mniwyiingapxpéjtäp hajxy hänajty, pө mniñänөөmäp hajxy hänajty cөxypä waamb, pө mniguiumäayyäp hajxy hänajty, pө mdsipyagíjtäp hajxy hänajty.

²¹ Pө jaduhn hajxy hänajty mjaanч jootcө'өy coöcөc jim nnөcxtägätsät maa mijtsän, wéhndөчhä Dios weenjaty xyajtsähdiúnät maa mijtscөxpän. Je'eч cham nnädaj nnämaaby. Nnäjootmayhádäbөc hajxy je'e, pөnjatiä yhaxөөгcuhdujt hajxy hänajty tөө quia'a najtshixө'өy. Je'eч jaduhn nnänөөmby coo wiingto'oxiөc hajxy piawädity tehngajnä.

13

¹ Miädägөөghöocpөc jim nnөcxa'añ maa mijtsän. Jaduhnä cuhdujt myiñ, coo hajxy hänajty pөñ mnäxө'өwө'owa'añ, tsipcөxpä testigo hajxy mya-jcähxө'өгät mejtstägөг.

² Mänáajөc jim nhuug hoobiän maa mijtsän ja'a miämetsc-hoocpä, mänítөc hajxy nyajcuhojөөy coo hajxy haxөг quia'a jootcөñät, pөnjaty hänajty haxөгwädiyp. Y chámhөc mijts jadähooc nnäma'awáangumbä nägөxiä coo hajxy mga'a haxөгwädítät. Y pө je'enä hajxy hänajty mhaxөгwädity coöcөc jim nnөcxtägätsät maa mijtsän, tsipcөxpөc mijts nөcxy nyajcumädowa'añ.

³ Jadúhnhøch nyajcähxø'øga'añ cooçhä Jesucristo miädia'agy tøyhajt nya-jnajxä. Haa ca'a, jadúhnhøch mijts tøø xyhuuc nämaabiä cooçhä jaduhñ nyajcähxø'øgät. Hix, møcmäjaahaamä Jesucristo hajxy xyajcumädówät coo hajxy hoy mga'a wädítät.

⁴ Coo ja'a Jesucristo miøjpahbejtä cruzcøxp, cabä miøcmäjaa hñajty yajcähxø'øgy. Pero coo jiuypiojtägajch, coo jim ñøcxtägajch maa ja'a Tieediän, jimäts jaduhñ yhiñä ja'a Tieediä miøcmäjaahaam. Nebiä Jesucristo ja'a miøcmäjaa hijty quia'a yajcähxø'øguiän, jaduhñ højts mäjaa nga'a møødäbä hamdsoo. Pero coo højtsä Jesucristo nmøødhity tu'ugmädia'agy, paady højts mijts hoy nhane'ema'añ ja'a Dios ja'a miøcmäjaahaam.

⁵ Huuc niñajuø'øwøø hajxy hamdsoo. Coo ja'a Jesucristo ja'a miädia'agy hajxy hoy mbanøcxät, jaduhñ hajxy myajnajjuø'øwät coo ja'a Jesucristo hajxy tøyhajt mjaanç møødhity tu'ugmädia'agy. Pero coo hajxy hoy mga'a panøcxät, cabä Jesucristo hajxy tøyhajt mmøødhidät tu'ugmädia'agy.

⁶ Chojpy højtsä njoot coo hajxy mnajuø'øwät coo højtsä Jesucristo tøyhajt nmøødhity tu'ugmädia'agy. Cab højts jaduhñ nhøhnda'agy.

⁷ Nmānuu'xtaacy py højtsä Dios coo hajxy hoy mwädítät, coo hajxy haxøøg mga'a jäya'ayhädät. Pø mwädijp hajxy hñajty hoy coo højts jim nnøcxtägätsät maa mijtsän, cab højts hñajty nyajcähxø'øga'añ coo højtsä Jesucristo ja'a cuhdujt tøø xmio'oy coo højts mijts nyajcumädówät. Y coo højts jaduhñ nga'a yajcähxø'øgät coo højtsä Jesucristo ja'a cuhdujt jaduhñ tøø xmio'oy, cab jaduhñ ñeipiä. Je'e højtsä njoot chojpy coo hajxy hoy mwädítät.

⁸ Pø mjaanç wädijp hajxy hñajty hoy coo højts jim nnøcxät, cab højts mijts hñajty waamb nnäma'awa'añ. Chojpy højtsä njoot coo hajxy tøyhajt hoy mwädítät. Pero pø cab hajxy hñajty tøyhajt hoy mwädity, mänit højts mijts mabøcy nhoja'añ.

⁹ Coo hajxy hoy mwädítät, xoondä'agäp højts jaduhñ. Cab højts jaduhñ nyajcähxø'øgät coo højtsä Jesucristo ja'a cuhdujt hñajty tøø xmio'oy coo højts mijts jaduhñ nyajcumädówät. Nmānuu'xtaacy py højtsä Dios jaduhñ coo ja'a mhaxøøgcuhdujt hajxy mgøxy najtshixø'øwät, coo ja'a hoguihdujt hajxy hamuumdu'joot mjaac panøcxät tehngajnä.

¹⁰ Páadyhøch mijts cham weenjaty nhojy nocyhaam, jadúhnhøchä njoot chocy coo hajxy hoy mwädítät. Ja'a Jesucristøchä cuhdujt jaduhñ tøø xmio'oy maa mijtsøxpän, weenä miädia'agy hajxy maas hoy mjaac mabøjcä. Cabä Jesucristo jioot chocy coo hajxy mdu'udägóyyät. Y pø mjaanç wädijp hajxy hñajty hoy cooçhä jim nnøcxtägätsät maa mijtsän, cáboch mijts hñajty waamb nnäma'awa'añ. Pø caj, mänit højts mijts mabøcy nyajcumädówät.

¹¹ Hoorä, mägu'ughajpädøjc, chámhøch jaduhñ nyajmayaannä maa hajxy cham nmägapxy nhane'emiän. Huuc cudiún hajxy jaduhñ nébiøch cham nnäma'ayän. Yaghoyø'øw ja'a mdu'u hajxy. Ca'a haxøøgtu'u hajxy mbanøcxnä. Tsøc hajxy jaduhñ nimiøødhíjtäm tu'ugmädia'agy. Cab hajxy tii myajtsip myajma'adøøñät. Jaduhñä Dios hajxy xmiøødhíjnät. Xchójcäm ja'a Dios hajxy. Chojpiä jioot jaduhñ coo hajxy jootcujc nhíjtämät.

¹² Mniyajpoo'xøøjäp hajxy hamuumdu'joot, ween jaduhñ quiähxø'øgy coo ja'a Diosmädia'agy hajxy mmabøcy.

¹³ Xyajpoo'xp mijtsä hermanodøjc-hajxy yaabä, ja'a Diosmädia'agy hajxy yaa mabøjpä.

¹⁴ Weenä Jesucristo hajxy nägøxiä xmio'oy ja'a hoyhajt ja'a weenhajt. Je'e hajxy nWiindsønhíjtäm. Weenä Dios hajxy xchójcäm homiänaajä. Weenä Dioshespíritu hajxy xmiøødhíjtäm nägøxiä. Amén.

Gálatas

¹⁻² Høøch Pablo, hädaa nócyhøch nhädiuumby mөөдä hermanohajxy yaabä nägøxiä. Mijts hädaa nocy nyajnäguejxyp, mijts hermanodøjc jim tsänaabiä Galacia. Cab hajxy mmäná'anät cooçh jäya'ay tөө xwyiinguexy. Jesucristøch xwyiinguejx mөөдä Dios ja'a nDeedyhajtäm. Jaayá'ayädsä Jesucristo yagju-jypiøjc.

³ Weenä Dios ja'a nDeedyhajtäm hajxy xmio'oy ja'a hoyhajt ja'a weenhajt mөөдä Jesucristo ja'a nWiindsønajtäm.

⁴ Jaaya'ay hajxy xñähho'túutäm ja'a nbojpä ngädieeyhajtäm nebiä Dios ja'a nDeedyhajtäm tөө miäna'añän. Paadiä Jesucristo hajxy xñähho'túutäm nebiä haxøøgpä hajxy yaa xñähwáatsämät hädaa yaabä naaxwiin.

⁵ Tsøgä Dios hajxy møj jaançh pädáacäm cøjxta'axiøø. Amén.

⁶ Hermanodøjc, Dios hajxy xmiøjyáaxäm je'eguiøxpä coo ja'a Jesucristo hajxy xchójcäm. Pero tөөch nmädoyhaty coo ja'a Diosmädia'agy hajxy mga'a panøcxnä je'eguiøxpä coo ja'a wiingmädia'agy hajxy tөө mbadu'ubøjnä. Nyagjuøøbiøch jaduhñ coo ja'a Dios hajxy paquiä tөө mnajtshixøøñä.

⁷ Pero cabä wiingmädia'agy jii neby hajxy mnähwá'adsät. Jaduhñä hänä'c-hajxy näje'e wiädity yajnähixøøbiä. Xjia jøjcaxø'øwaamb mijts jaduhñ. Ja'a hønnda'agymiädia'agy mijts hajxy xyajnähixøøby ja'a Jesucristocøxpä.

⁸⁻⁹ Tөөch mijts jaduhñ nhuuc nämaabiä, y chaaçh jadähooc nmänáangumbä, tөөch mijts ja'a Diosmädia'agy nyajnähixø'øy neby hajxy jaduhñ mnähwá'adsät. Pero coo mijts pøn wiingmädia'agy xyajnähixø'øwät, jiiby nøcxy quia'awa'añ haxøøgtuum, hoy piønä, hoy yhøøchä, hoy jim jia tsooñ tsajpootyp.

¹⁰ Ndsøjpiøch cooçhä Dios xquiumáyät. Cábøch ndsocy cooçhä cu'ughajxy xquiumáyät. Cooçh häxøpy jaduhñ ndsocy, cábøchä Jesucristo häxøpy hoy nbanøcxnä.

¹¹⁻¹² Hermanodøjc, huuc wiinjuø'ow hajxy jaduhñ, hädaa mädiä'agyhøch mijts nyajwiingapxøøbiä, ja'a Jesucristøch xmiooyy; ca'a jäya'ayä xmiooyy hädaa yaabä naaxwiimbä.

¹³ Tөө hajxy nmädoyhaty nébyhøch hijty nwädity, mänáajøçhä judíos miädia'agy hajxy hänäjty nbanøcxnä. Mnajuøøby hajxy nébyhøçhä jäya'ayhajxy hijty ndsaächtiuñ nägø'ø nädecypiä, ja'a Diosmädia'agy hajxy panøcxpä. Páadyhøch hijty ndsaächtiuñ nebiä Diosmädia'agy hajxy jaduhñ ñajtshixø'owät.

¹⁴ Maa yø'ø judíos miädia'agyhajxy myiñän, maas hóyhøch hijty nbanøcxy. Cábøch nmägunaax pøn hijty xyhabexy, ja'a høøch nmädu'ugyee'taact. Hix, maas pedyíijøch hijty ngudiuñ ja'a nhap ndeedy quiuhdujthajxy ja'a jecypiä.

¹⁵ Pero tөөçhä Dios hijty xwyiimbiy, cáhnøch hänäjty nmiñ nga'ayñä. Páadyhøch tөө xmiøjya'axy cooçh xjiaançh tehñ chocy.

¹⁶ Mänitä Dios miänaañ cooçhä yHuung nhixyhajtät, nébiøçhä miädia'agy jaduhñ nyajwiingapxøøyyät ja'a hajxy ca'a judíospä, neby hajxy jaduhñ ñähwá'adsät. Cooçh jaduhñ najty, cábøch hoy pøn tөө nyajmøødmädia'agy,

¹⁷ ni ja'a hermanodøjc-hajxy jim hijpä Jerusalén, ja'a hajxy hijty tөө wyinguexyíjábä ja'a Dios. Pero jimhøch nnøcxtøøyy Arabianaaxooty. Mänitøch nwiimbijty, nmejtstägajch maa ja'a cajpt xiøhatiän Damasco.

¹⁸ Coo tægøøgjomøjt hänäjty tөө ñajxnä, mänitøch jim nnøcxy Jerusalén. Jimhøchä Pedro hoy nhixyhaty. Mänitøch nmøødhijty majmocxxøø.

¹⁹ Jímhøchä Jacobo nhixyhajpä ja'a nWiindsønhájtämä piuhya'ay. Pero cábøchä hermano wiingpä nhijxy, ja'a wiinguexypä.

²⁰ Tehm tiøyhajt jaduhñ nébiøch cham njaayän. Cáboch nhøhnda'agy. Diøshøch jaduhñ xyhijxp cooçh nga'a høhnda'agy.

²¹ Mänitøch hoy nwädity Sirianaaxooty møødä Cilicanaaxooty.

²² Ja'a hermanodøjc-hajxy jim hijpä Judeanaaxooty, ja'a Jesucristo miädia'agy hajxy hñajty panøcxäbä, cáhnøch hajxy hñajty nhixyhatyñä.

²³ Jagooyyä hajxy hñajty miädooyyä cooçhä Diosmädia'agy hñajty nyajwa'xnä. Tøø hajxy hijty miädooyaty cooçhä hermanohajxy hijty ndsaachtuñ, nebiä Diosmädia'agy hajxy ñajtshixø'owät. Pero cooçhä Diosmädia'agy hñajty nyajwa'xnä høøchpä,

²⁴ paadiä Dios hajxy miooyy Dioscujú'uyäp ja'a høøchcøxpä.

2

¹ Coø majmactsjomøjt hñajty tøø ñajxnä, mänitøch hoy ngoo'nä Jerusalén møødä Bernabé møødä Tito.

² Diøshøch jim xquiejx. Jímhøchä Jacobo nmøødhamugøøyy hamee'ch møødä Pedro møødä Juan. Jim hajxy hñajty quiopc-haty maa ja'a hermanodøjc-hajxiän. Mänitøch hajxy nyajmøødmädiaacy nebiätyhøchä jäya'ay ja'a Diosmädia'agy hajxy nyajwiingapxø'oy, ja'a hajxy ca'a judíospä, neby hajxy hoy ñähwá'adsät. Páadyhøchä copc-hajpådøjc jawyiin nyajmøødmädiaacy, nébiøch hajxy jaduhñ xquia'a jøjcaxø'owät.

³⁻⁵ Xjiøjpøgøøyy højts jaduhñ; cab højts waamb xñämaayy. Tøø häna'c-hajxy näje'e yajtägø'oy maa ja'a hermanodøjc-hajxiän; nøm hajxy hñajty miäna'añ cooc tyijy hajxy pianøcxpä; pero cab hajxy hñajty tøyhajt pianøcxy. Højts hajxy xjia jøjcaxø'owaan. Coø højtsä Jesucristo miädia'agy hñajty nbanøcxänä, cab højtsä judíospä cuhdujt hñajty nbanøcxnä. Pero cab højts nmøjpädaacy, neby højts mijts hoy njaac yajwiingapxø'owät ja'a tøyhajt, nej mijts jaduhñ hoy mnähwá'adsät. Jaduhñ hajxy hñajty jia mänaambä coo ja'a Tito ween yajcircuncidarhaty nebiä judíoshajxy quiuhdujthatiän, hoyyä Tito hñajty quia'a ja judíospä. Cabä copc-hajpähajxy miänaañ coo ja'a Tito yajcircuncidarhädät.

⁶⁻⁹ Cábochä Jacobohajxy hñajty nmøjpäda'agy, hoy hajxy hñajty tøø jia päda'agyii copc-hajpä. Hix, cabä Dios hajxy xmiøjpädaacäm, hoyyä møjtuung hajxy nja møødhájtäm. Mänitøch hajxy xyhixyhajty cooçhä Dios hñajty tøø xwyiinguexy, cooçhä miädia'agy nyajwiingapxø'oyyät ja'a ca'a judíospähajxy, nebiä Pedro hñajty tøø wyiinguexyiijän coo ja'a judíoshajxy yajwiingapxø'owät. Mänit højts ja'a copc-hajpähajxy xjiøjpøgøøyy møødä Bernabé. Mänit højts tu'ugmädia'agy nmähmøøyy coo højts nwädítät maa ja'a ca'a judíospän, chaads häna'c-hajxy jaduhñ wiädítät maa ja'a judíospän. Y cáboch hajxy nej xyhanehmy.

¹⁰ Jagooyyä højts xñämaayy coo højtsä häyoobäya'ayhajxy nbuhbédät. Jaduhñch nnä'ägä cuhdujthaty.

¹¹⁻¹⁴ Mänitøchä Bernabé nmøødhädaacy maa ja'a cajpt xiøhatiän Antioquía. Cujecy højtsä Pedro xpiagädaacy. Mänitä Pedro tiägøøyy caamiupä møødä hermanodøjc ja'a ca'a judíospä. Mänitä Jacobo miägu'ughajpähajxy näje'e quiädaacpä. Mänitä Pedro quia'a møødcaamiúcänä ja'a hajxy ca'a judíospä. Hix, chähgøøbiä Pedro hñajty coo ja'a hermanodøjc-hajxy miädoyhädät jim Jerusalén, ja'a hajxy hñajty jaac panøcxpä ja'a judíosjuhdujt. Mänitä Bernabé piäjatcøøbiä møødä hermanodøjc-hajxy nägøxiä ja'a judíos, coo hajxy quia'a møødcaamiugaannä ja'a hajxy ca'a judíospä. Hix, mejtstu'u ja'a wyiinmahñdyhajxy hñajty. Y cooçh nhijxy neby hajxy hñajty jiatcø'oyän, coodsä tøyhajt hajxy quia'a panøcxnä, ja'a Diosmädia'agy, mänitøchä Pedro

njøjcuhojoojy ja'a hermanodøjc wyiinduumhajxy. “Jue'e miičh, mjudíos miičh, y caj miičh hijty nbanøcxy ja'a judíosuhdujt. Caj miičhä cuhdujt mnä'ägä mөөдä coo miičhä wiinghana'c mädsibø'øbä mnämä'awät coo hajxy pianøcxät ja'a judíosuhdujt.” Páadyhøchä Pedro jaduhñ nhojy coo je'e ja'a pojpä hñajty miөөдä.

¹⁵ Jue'e højtshájtäm, judíos højts nmiin ngáhñäm. Caj tyijy højts ngahwi-indøyyä nebiä wiingjäya'ayhajxiän.

¹⁶ Pero, paadiä Dios hajxy xpiädáacäm hawa'adstuum je'eguiøxpä coo ja'a Jesucristo miädia'agy hajxy hamuumdu'joot nmäbøjcäm, ca'a jie'eguiøxpä coo hajxy ngudiüünäm nebiä jecyquihdujt myiñän. Coo ja'a Jesucristo miädia'agy mga'a mäbøjcät, cabä Dios xpiädá'agät hawa'adstuum, hoy mja cudiuñ nebiä jecyquihdujt myiñän.

¹⁷ Pero tsøc mänáañäm, coo jaduhñ quiähxø'øgät coo højts ngahwiindøyyäbä, hoyyä Jesucristo miädia'agy nja mäbøjcäm, cab hajxy nmänáañämät cooc tyijy ja'a Jesucristo tøø xyajtu'udägooyyäm.

¹⁸ Coo højtsä jecyquihdujt nnajtshixøøyyämät, cab jaduhñ yhooyy coo hajxy jadähooc nbadu'ubøjcämät. Hix, cähxø'øgäp jaduhñ coo højts ja'a pojpä cädieey nmөөдhájtäm.

¹⁹ Pero høøch, cábøchä jecyquihdujt nbanøcxnä. Tøøch nnajtshixøøñä, nébiøchä Dios hamuumdu'joot jaduhñ nbanøcxnät.

²⁰ Coo ja'a Jesucristo hajxy tøø xñähhø'túutäm cruzcøxp, páadyhøch je'e hamuumdu'joot nbanøcxy; cábøch nhamdsoo wiinmahñdy nyajtu-naannä. Tu'ugmädiä'agyhøchä Jesucristo xmiөөdhijnä. Xchójpøch je'eduhñ, páadyhøch tøø xñähhø'tu'udy.

²¹ Paadiä Dios hajxy xpiädáacäm hawa'adstuum je'eguiøxpä coo ja'a Jesucristo miädia'agy hajxy nmäbøjcäm; ca'a jie'eguiøxpä coo ja'a jecyquihdujt hajxy ngudiüünäm. Coo häxøpy quia'a jaduhñä, xiøøbä ja'a Cristo häxøpy tøø ñä'ä ho'ogy. Paady, cábøchä hoyhajt nnajtshixø'øwa'añ mädyíijøchä Dios tøø xmio'oy.

3

¹⁻⁵ Mijts hermanodøjc, nej, mguhmañøøby hajxy jaduhñä coo ja'a Diosmädia'agy hajxy mga'a panøcxaanñä. Nej, mbanøcxtägatsaambiä jecyquihdujt hajxy jadähoocä. Mnajuøøby hajxy coo ja'a Jesucristo hajxy tøø xñähhø'túutäm. Coo mijtsä Jesucristo miädia'agy tøø mmäbøjcä, paadiä Dios ja'a yhEspíritu hajxy tøø xmio'oy, paadiä hoy-yagjuøøñäjatypä tøø yajnaxy maa mijtsän. Ca'a jie'eguiøxpä coo ja'a jecyquihdujt hajxy hijty mgudiüñ. Pero cabä ndijy ja'a Diosmädia'agy hajxy tøyhajt mnajtshixø'øwa'añ.

⁶ Ja'a Abraham, ja'a hajxy nhaphájtäm ja'a hajxy ndeedyhájtämbä, miäbøjc je'e ja'a Diosmädia'agy. Paadiä piädaacä hawa'adstuum.

⁷ Y coo højtsä Diosmädia'agy nbamäbøjcämät, mänitä Dios hajxy xpiädáacämät nebiä Abraham yhap yhocän. Mänit højts xpiädáacänät hawa'adstuum.

⁸ Jéquiänä Dios ja'a Abraham ñämaayy: “Miičhcøxpøchä jäya'ayhajxy nbuhbeda'añ nägøxiä ja'a wiinduhmyhagajtpä je'eguiøxpä coo miičh tøø mmäbøcy.” Jiiby jaduhñ myiñ cujaay maa ja'a Diosmädia'aguiän. Jaduhñ hajxy nyajnajuøøyyäm coo ja'a Dios hajxy xpiäda'agäänäm hawa'adstuum pønjaty mäbøjp, hoy hajxy quia'a ja judíosä.

⁹ Entonces, ja'a hajxy mäbøjpä, jaduhñ hajxy piuhbedyii nebiä Abraham jecy piuhbejtän.

¹⁰ Ja'a hajxy jaduhñ mänaambä cooc tyijy hajxy ñähwa'adsa'añ je'eguiøxpä coo ja'a jecyquihdujt hajxy quiudiuñ, haxøøgtuum hajxy je'e piäda'aga'añii.

Jaduhñ jiĩby myiñ cujaay maa ja'a jecyquihdujtän, “Haxøøgtuum piäda'aga'añii pøñjaty hoy ca'a cudiumb nebiaty hädaa libro xyhanéh̃mām.”

¹¹ Jaduhñ jiĩby myiimbä cujaay maa ja'a Diosmädia'aguiän: “Coo ja'a Diosmädia'agy hajxy nmäbøjcāmät, mänitā Dios hajxy xyajñahwáatsāmät.” Ca'a jie'eguiøxpä cooc tyijy hajxy ngudiúunām ja'a jecyquihdujt.

¹² Pero jaduhñä jecyquihdujt miäna'añ: “Pøñä jecyquihdujt cudiumb, hawa'adstuum piäda'aga'añii.”

¹³ Coodsä jecyquihdujt hajxy hijty hoy nga'a cudiunáanām, haxøøgtuumä Dios hajxy hijty xpiäda'agáanām. Pero xñäxúu'tsāmä Dios hajxy jaduhñ; paadiä Jesucristo hajxy xñähho'túutām; paadiä Dios hajxy xpiädáacām hawa'adstuum. Jaduhñä jiĩby myiñ cujaay maa ja'a Diosmädia'aguiän: “Pøñ möjpahbéjtäp quepyquiøxp, tøø hñajty piäda'agyi haxøøgtuum.”

¹⁴ Paadiä Jesucristo hajxy tøø xñähho'túutām, nebiä jäya'ayhajxy jaduhñ piuhbéjtäbät, ja'a hajxy ca'a judíos̃pä, nebiä Abraham jecy piuhbejtän. Y coo hajxy nmäbøjcāmät, mänitā Dios ja'a yhEspíritu hajxy xmio'owáanām nägøxiä neby hajxy jecy xyajwiinwaanøøyyām cooc hajxy xmio'owáanām.

¹⁵ Hermanodøjc, tsøg hajxy mädiáacām neby hajxy yaa nguhtujthájtām hädaa yaabä naaxwiin. Coo pøñ tii yajcuhdúgät maa ja'a hagujtøjcän, coo fyirmarhadät, ni pøñ jaduhñ quia'a yajtagátsät, ni quia'a mäná'anät coo quia'a hoyyä.

¹⁶ Bueno, coo ja'a Dios ja'a Abraham miøødyajcuhdujcy cooc hoy miänaajä piuhbeda'añ, jaduhñ miänaambä cooc ja'a Abraham yhap yhoc miøødyajcuhdújcäbä. Jaduhñ jiĩby myiñ cujaay maa ja'a Diosmädia'aguiän. (Cab jaduhñ myiñ cooc hajxy nämay miøødyajcuhdujcä.) Coo jaduhñ miäna'añ: “Abraham yhap yhoc”, ja'a Jesucristo jaduhñ nänøømöp.

¹⁷ Y coo mädaaxmägo'xcuhii'xmajcjomøjt hñajty tøø ñaxy, mänitā jecyquihdujt piädaacä. Pero cab jaduhñ yajtagajch nebiä Dios ja'a Abraham hñajty tøø miøødyajcuhduquiän.

¹⁸ Coo häxøpy quia'a tøyhajtä jaduhñ, cab häxøpy tiuñ nebiä Dios jecy yajcuhdujquiän.

¹⁹ Paadiä Dios ja'a jecyquihdujt yejcy neby jaduhñ quiähxø'øgät coo ja'a pojpä cädieey hajxy nmøødhájtām. Pero coo ja'a Jesucristo yaa tøø yhoy hädaa yaabä naaxwiin, ja'a hñajty tøø miøødyajcuhdugyíjábä, cabä jecyquihdujt jaduhñ tiunaanñä. Bueno, coo ja'a Dios ja'a jecyquihdujt piädaacy, mänitā mioonsä tsajpootypä ja'a Moisés hoy mio'oy. Mänitā Moisés jiøyejnajxy.

²⁰ Pero hamdsoo ja'a Dios ja'a Abraham miøødyajcuhdujcy; cabä jiøyejnajxpä jaduhñ ñä'ä yajtuuñ.

²¹ Cab hajxy nmänáanāmät coo ja'a jecyquihdujt yajtagajch nebiä Dios hñajty tøø yajcuhduquiän. Coo ja'a Dios häxøpy tøø miäna'añ coo hajxy cu nnähwáatsäm maa ja'a jecyquihdujtän, pues tøø ja'a jecyquihdujt hajxy häxøpy xyajñahwáatsäm ja'a nbojpä ngädieeyhájtām.

²² Ja'a Diosmädia'agy jaduhñ mänaamb coo hajxy nägøxiä nhíjtām haxøøgtuum je'eguiøxpä coo ja'a pojpä cädieey hajxy nmøødhájtām. Pero coo ja'a Jesucristo miädia'agy hajxy nmäbøjcāmät, mänitā Dios hajxy jaduhñ xyhuunghájtāmät nebiä jecy yajcuhdujquiän.

²³⁻²⁵ Tuuñgpaatpä jecyquihdujt hijty. Tsipcøxp højts hijty ngudiúunām. Pero coo ja'a Jesucristo tøø yhoy, cab højtsä jecyquihdujt nbanøcxänä. Coo ja'a Jesucristo miädia'agy hajxy nmäbøjcāmät, jaduhñä Dios hajxy xyhuunghájtāmät.

26 Y xjiaanč huunghajp mijts ja'a Dios je'eguiøxpä coo ja'a Jesucristo miädia'agy hajxy mmäbøjcä, coo ja'a Jesucristo hajxy mmøødhity tu'ugmädia'agy.

27 Y coo hajxy jaduhñ mmøødhídät, coo hajxy jaduhñ mnäbétät, mänitä Dios hajxy xyhuunghádät, nebiä Dios ja'a Jesucristo yHuunghatiän.

28 Tu'ugmädia'agy hajxy mhijnä møødä Jesucristo. Cabä Dios tiehm yajtøy pø mjudíos, pø caj, pø mmäyøø, pø caj mmäyøøjä. Cabä Dios yajtøy ja'a haagä tehñ ya'adiøjcpä, ja'a haagä tehñ tio'oxiøjcpä. Jøjwa'achä yajtøy. Jaduhñä Dios hajxy xyhijxnä nebiä yhamdsoo huungän.

29 Y coo ja'a Jesucristo hajxy mmøødhity tu'ugmädia'agy, paadiä Dios hajxy xyhuunghaty, nebiä Dios ja'a Abraham jecy yhuunghajtän.

4

1-2 Jaduhñds je'e, coo jäya'ayhajxy hñajty näje'e yho'ogaannä, mänit hajxy miäna'añ coo yhuunghajxy yhíxäxät ja'a miägu'ughajpähajxy. Coo ja'a yhuunghajxy miøjjøøñät, mänit nädeedy hajxy miämähmøøñät. Pero coo hajxy hñajty miuutsnä, jaduhñ hajxy yhane'emyii nebiä moonsän, høxtä coonä hajxy hñajty tøø miøjjøøñä.

3 Y højtshájtäm, coo ja'a Jesús hajxy hñajty nga'a hixyhájtämnä, jaduhñ mäwílnäts hajxy hijty nhíjtäm nebiä hane'emybiän coo ja'a jecyquiuhdujt hajxy hijty tehñgajnä nbanøcxäm.

4 Pero coo yhabaaty, mänitä Dios ja'a yHuung quiejxy; Jesucristo je'e. Hoy je'e miñguia'ay neby højtshájtämän yaa judíosnaaxooty, maa ja'a jecyquiuhdujt tiuñän.

5 Paadiä Jesús quiejxä neby højts jaduhñ xñähho'túutämät, je'eguiøxpä coo højts ja'a jecyquiuhdujt hijty nbanøcxäm tehñgajnä. Coo hajxy xñähho'túutäm, xyhuunghájtäm ja'a Dios hajxy jaduhñ.

6-7 Xmio'owáanäm hajxy jaduhñ nebiaty ñägapxy. Cab hajxy nhíjtänä nebiä hane'emybiän. Coo ja'a Dios hajxy xyhuunghájtäm, paadiä yhEspíritu hajxy xyajnäguéjxäm. Paady hajxy je'e nnämäáayyäm: "Teedy" hamuumdu'joot.

8 Jue'e mijts hijty mwi'i wyiingudsähgøøby, quepychech naaxpoch. Cahnä ja'a Dios hajxy hñajty mhixyhatyñä.

9 Pero coo ja'a Dios hajxy tøø xwyiimbiy, paady hajxy mhixyhajnä. Cab jaduhñ yhahixø'øy coo ja'a jecyquiuhdujt hajxy jadähooc mbadu'ubøjcombät. Cab hajxy nyaghanéhmänät maa ja'a jecyquiuhdujtän.

10 Pero mijts, je'enä xøø hajxy mwi'i yagjadyii. Jaduhñ tyijy hajxy mnähwa'adsa'añ.

11 Nej, xiøøbøch mijts ja'a Diosmädia'agy tøø nja yajwiinhixø'øyä. Pø tøyhajt jaduhñ, njaanč tehñ yagjuøøbiøch jaduhñ.

12-14 Hermanodøjc, nnämä'awäbøch mijts cooçh mijts xpiahíxät. Najtshixø'ow ja'a jecyquiuhdujt hajxy nébiøch tøø nnajtshixø'øyän. Mänáajøch mijtsä Diosmädia'agy nyajwiingapxøøçhooñän, hóyhøch mijts xmiägu'ugpøjcy. Jaduhñhøch hajxy xjiøjpøgøøyy nebiä Diosquexiän, nebiä Jesucristän. Cábøch hajxy xxiøøghajty, hóyhøchä pa'am hñajty nja møødä, hóyhøch mijts hoxiøøghajnä hñajty xjia hixy. Cooçhä pa'am hñajty nmøødä, páadyhøch jim nmähmøøyy maa mijtsän.

15 Pero mijts, cab hajxy jootcuyc mhijnä. Pänebiä hajxy tøø mjaty. Mänáajøch jim nhitiän maa mijtsän, høøhcøxpä mijts hñajty mduñ hoy miädyii mayhajtä. Xmiøøbiøch mijts hñajty hoy tyijä.

16 Páadyhøch mijtsäda'a xquia'a mägu'ughadaannä cooçh mijts tøø nhawáanäm ja'a tøyhajt.

¹⁷ Y häna'c-hajxy höhndaacpä, paady mijts hajxy xmiägu'ughada'añ nébiøch mijts jaduhñ xquia'a panócxnät. Pero caj mijts hajxy hamuumdu'joot xmiägu'ughada'añ. Xñä'ä wiinhøønaamb mijts hajxy jaduhñ.

¹⁸ Hoy hit jaduhñ coo mijts pøñ hamuumdu'joot xmiägu'ughadät hoy miänaajä, hóyhøch hñajty jim nga'a ja hity maa mijtsän.

¹⁹ Mägu'ughajpä, jaanç tehñ jiootmayhájpøch jadähooc ja'a mijtsøxpä. Jiaanç tehñ chójpøch njoot coo mijts ja'a Jesucristo mmøødhídät tu'ugmädia'agy.

²⁰ Cu nnócyhøch jim maa mijtsän. Cu nmøødmädiáacyhøch mijts jaduhñ yajxón. Cooch mijts hoy nga'a møødmädia'aga'añ hajäya'ayhaam, cábøch nnajuø'ø y nébiøch ndaj nmáyät ja'a mijtsøxpä.

²¹ Hoorä, pø chojpiä mjoothajxy tehngajnä coo ja'a jecyquihdujt hajxy mbanøcxa'añ, huuc mäadow hajxy neby jiiby myiñän maa ja'a jecyquihdujtän.

²²⁻²³ Metscä Abraham yhuung hñajty. Tu'ug hñajty xiøhajty Isaac. Tøø Dios Abraham hñajty jaduhñ yajwiinwaanø'ø coo ja'a Isaac hñajty myina'añ quia'awa'añ. Abraham yhamdsoo huunghajxy je'eduhñ møødä tio'oxiøjc. Jatu'ugpä, Ismael je'e xiøhajpä. Jaduhyyä je'e ñä'ä miññ ñä'ä cahy. Moonsä je'e tiajhajt.

²⁴⁻²⁵ Hädaa mädia'agy, nebiä hijxtahñdän hädaa jaduhñ. Ja'a Ismael tiaj, ja'a Agarhajpä, moonsähajp hñajty je'e. Cabä yhamdsoo cuhdujt hñajty yaghity. Hoorä, coo ja'a Dios ja'a cuhdujt yecy maa ja'a tun hñajty xiøhatiän Sinaí, jim Arabianaaxooty, jaduhñ mäwínäts hajxy nhíjtäm nebiä Agar hñajty mioonsähatiän. Cabä nhamdsoo cuhdujt hajxy nyaghíjtäm. Mejtstu'u ja'a tun hñajty xiøhaty. Xøhajp hñajty Sinaí, møødä hñajty xiøhaty Agar. Ja'a cajpt jaduhñ xøhajpä Jerusalén, ja'a hädaa yaabä naaxwiimbä, jaduhñ mäwínäts je'e nebiä Agarän. Hix, cabä Jerusalénpä-jäya'ay yhamdsoo cuhdujt hajxy yaghity.

²⁶ Jaduhñ ja'a cajpt jim xiøhajpä tsajpootyp Jerusalén. Jim hajxy nxøønájxäm. Cabä jecyquihdujt jim tiuunnä nebiä Dios yejquiän Sinaí. Jemyguiuhdujtäts jim túunnäp.

²⁷ Jaduhñ jiiby myiñ cujaay maa ja'a Diosmädia'aguiän: Huuc xoonä'ag, hoyyá huung mga'a ja paadyñä, Maas may miiç huung mbaada'añ. Cabä mmoonsä may jiaty paada'añ.

²⁸ Hoorä, hermanodøjc, tøø ja'a Dios hajxy xyajnáhdíjjäm coo hajxy xyhuunghadäänäm, nebiä Isaac yajnáhdíjjän.

²⁹ Dios ja'a yhEspíritu ja'a Isaac yajmágunuu'xøøyy coo myínät. Cabä Ismael yajmädsojcy coo ja'a Abraham ja'a Isaac yhuunghadät. Jaduhñ mäwínäts højtsä jäya'ayhajxy xquia'a yajmädsójcäm coo ja'a Dios hajxy xyhuunghájtämät.

³⁰ Jaduhñ jiiby myiimbä cujaay maa ja'a Diosmädia'aguiän: "Høxquejxpädsøm yø'ø to'oxymoonsä møødä yhuung." Cabä moonsä yhuung ñä'ägädä puhmo'owa'añii ñädeedy. Pero yhamdsoo to'oxiøjc yhuung, je'eds jaduhñ mio'owaamby.

³¹ Hermanodøjc, coo ja'a Diosmädia'agy hajxy hamuumdu'joot ndsójcäm, jaduhñ mäwínäts hajxy nhíjtäm nebiä Isaac jecy yhiytiän. Pero ja'a hajxy ca'a tsojpä, jaduhñ mäwínäts hajxy je'e nebiä Ismaelän, ja'a moonsä yhuung.

5

¹ Coo ja'a Dioscuhdujt hajxy nyaghíjtäm, mädyii ja'a Moisés jecy miähooyy, jaduhñ mäwínäts hajxy hijty nhíjtäm neby hajxy hadsip yajtuñíjjän.

Coo ja'a Jesucristo quiädaacy, mänit hajxy xñámáayyäm coo ja'a jecyquihdujt hajxy nga'a mõjpädäacänät. Xyhawáanäm hajxy jaduhñ neby hajxy nnähwáatsämät. Hamuumdu'jootä Jesucristo miädia'agy hajxy mbanócxät. Cabä Moisés jiecyquihdujt hajxy mbadu'ubójcät jadähooc.

² Huuc hamädoowhit hajxy. Coo hajxy nyajcircuncidarháltämät cooc tyijy hajxy jaduhñ nnähwa'adsáanäm, xiøøbä ja'a Jesucristo hajxy häxøpy tøø xñä'ä nänho'túutäm. Høøch jaduhñ mänaamb, Pablo. Diosquexyhøch høøch.

³ Jadúhñhøch jadähooc nmänáangombä, pønjaty mänaamb coo hajxy yajcircuncidarhádät, tsipcøxp hajxy quiudiúnät nebiatiä Moisés jiecyquihdujt yajnähdiyy coo hajxy quiudiúnät.

⁴ Jii häna'c-hajxy näje'e miäna'añ: “Páadyhøch nnähwa'adsa'añ cooçhä Moisés jiecyquihdujt hoy ngudiunä.” Pero cab jaduhñ tiøyyä coo hajxy ñähwa'adsa'añ. Hix, cabä Jesucristo hajxy miøødhijnä tu'ugmädia'agy.

⁵ Pero nmäbójcäm højts coo hajxy nnähwa'adsáanäm ja'a Jesucristocøxpä. Ja'a Dioshespíritu hajxy xpiuhbedáanäm.

⁶ Coo ja'a Jesucristo hajxy tu'ugmädia'agy nmøødhíjtämät, cab jaduhñ ñejpiä pø tøø hajxy nyajcircuncidarháltäm, o pø caj. Je'eduhñ tsoobaatp coo ja'a Jesucristo miädia'agy hajxy nmäbójcämät y coo hajxy hamiñ häxøpy nniçhójcämät nebiä Jesucristo hajxy xchójcäm.

⁷ Hoy ja'a Diosmädia'agy hajxy hijty mbanøcxy. Pätiiä hajxy coo tøø mnajtshixø'y. Päbøndä hajxy tøø xwyiinhøøñ.

⁸ Ca'a Dyiosä hajxy xyajnajtshixøyy. Jaaya'ay hajxy xyajnähdíjjäm coo ja'a miädia'agy hajxy nbanøcxämät.

⁹ Jaduhñä jäya'ayhajxy miäna'añ: “Coo tsajcaagyooy weeñtiä nbädäacämät, cøxiä harina yajtägø'yii.” Jaduhñ mäwíinäts højtsháltäm coo häna'c høhñda'agymiädia'agy hajxy xyajnähixøyyämät; nägøxiä hajxy jaduhñ nmá'tämät.

¹⁰ Nbädäacypiøchä njuøhñdy ja'a Dioscøxpä coo wiingmädia'agy hajxy mga'a mäbógät. Dios jaduhñ yajcumädowaamb pøn mijts høhñda'agymiädia'agy xyajnähixøøby.

¹¹ Tehngájnøchä Diosmädia'agy nyajwa'xy coo ja'a jäya'ayhajxy ween miäbøcy; je'eguiøxpä coo ja'a Jesucristo hajxy tøø xñähho'túutäm cruzcøxp. Páadyhøchä jäya'ayhajxy xmiähanhaty. Näje'e hajxy miäna'añ cooc tyijy høøchä mädia'agy nyajwa'xy coo hajxy ween ñiseñapäda'agyii. Pero cab jaduhñ ñä'ä tøyyä. Cooçhä mädia'agy häxøpy nyajwa'xy coo hajxy yajcircuncidarhádät, cábøchä jäya'ayhajxy häxøpy xmiähanhaty.

¹² Yøø häna'c mijts xjia wí'i ñämaabiä coo hajxy myajcircuncidarhádät, ween hajxy jaduhñ xpiuhwaatsnä.

¹³ Tøø mijts ja'a Dios xyajnähdiyy coo ja'a Moisés jiecyquihdujt hajxy mnajtshixøøyyät. Pero cabä Dios jaduhñ miäna'añ coo hajxy cøxypänejpiä mjäya'ayhádät. Jaduhñ miäna'añ coo hajxy yajxón mniçhogóøjät, coo hajxy yajxón mnibihbedóøjät.

¹⁴ Jaduhñä Dios jiecyquihdujt miäna'añ coo hajxy hoy piønä mdsoc mba'häyówät hädaa yaabä naaxwiin nebiä mhamdsoo ni'x nebiä mhamdsoo copc hajxy mdsoquiän.

¹⁵ Cab jaduhñ yhooyä coo hajxy mnimiähanhadóøjät tu'ugpä tsajtøjc, jaduhñ hajxy mga'a niyajtägoyyóøjät.

¹⁶ Hoy hajxy mwädítät ja'a Diosmäjaagøxpä. Cabä mhamdsoo wiinmahñdy hajxy myaghíjnät, hoyyä mjoothajxy hänäjty tii jia tsocy.

¹⁷ Ja'a Diosmäjaa, cabä tu'ugjuøhñdy yhity møødä haxøøgcuhdujt. Coo hänäjty haxøøg mjatcø'øwa'añ, Dios xyhadujp mga'a jatcø'øy jaduhñ

cøxypänejpiä. Hoorä, coo ja'a mjoot hānajty chocy coo hānajty hoy mwādita'añ, ja'a mhaxøøgwiinmahñdy jaduhñ xyhadujp.

¹⁸ Pø chojpiä mjoot jaduhñ coo ja'a Diosmäjaagøxpä mwādítät, cabä Moisés jiecycuiuhdujt mbanøcxänät.

¹⁹ Madiu'u ja'a jäya'ayhajxy yhaxøøgcuhdujthaty: jabiøcy hajxy ñimiøødsäna'ayii; cøxypänejpiä hajxy jiäya'ayhaty; haxøøg hajxy wiädity, hoy hajxy jia to'oxiøjcmøødä;

²⁰ wyiingudsähgøøbiä quepychech naaxpoch hajxy; mähijxp mähäxujp hajxy; nimiädsiphájtäp hajxy; yhadsojpy hajxy mädyijjatiä miägu'ughajpähajxy miøød; paquiä hajxy ñimiäjootma'adyii; wiinduc-ho'p hajxy; nibiuhy-ohdiúutäp hajxy; cab hajxy tiu'ugmädia'aguiä;

²¹ hadsojt hajxy wyi'i miøød; jäya'ay-yagho'p hajxy; haxøøghuucp hajxy, haxøøgjøøxp hajxy; madiu'u hajxy jaduhñ jiatcø'ø. Tøøds mijts nja yag-jahmiech, chaads jadähooc nhawáañäm: pøn haxøøgcuhdujt møød, cab jim ñøcxa'añ tsajpootyp.

²² Pero coo ja'a Diosmäjaagøxpä hajxy nwädíjtämät, Dios hajxy jaduhñ xpuihbéjtäm coo ja'a jäya'ay hajxy hoy nmägu'ughájtämät, coo hajxy nx-oondáacämät, coo hajxy jootcuyc nhíjtämät, coo hajxy nmee'xtújcämät, coo ja'a nmäjøøn coo ja'a nmädøjc hajxy yajxón nmägu'ughájtämät, coo ja'a hojioot hajxy nmøødhájtämät, coo hajxy nga'a høhñdáacämät,

²³ coo hajxy mee'xxieemy nhíjtämät, coo hajxy jootxeemy nhíjtämät. Coo hajxy jaduhñ njäya'ayhájtämät, cab hajxy pøn waamb xñámáayyämät.

²⁴ Pønä Jesucristo miädia'agy panøcxäp hamuumdu'joot, tøø ja'a yhaxøøgcuhdujt yhøxhixy, y cab jaduhñ jiahmiejtsnä.

²⁵ Pø mänáañäm hajxy jaduhñ coo ja'a Diosmäjaagøxpä hajxy nhíjtäm, tsøg hajxy hamuumdu'joot pawädíjtäm.

²⁶ Cab hajxy nyajcumáayyämät; cab hajxy nniyagjootmá'tämät hamiñ haxøpy; cab hajxy cøxiä wiinä nniyhadsójcämät.

6

¹ Hermanodøjc, coo pøn tiu'udägóyyät, mee'xxieemy hajxy mmägäpx mhané'emät, nej mijtsä Diosmäjaa mmøødän, weenä yhaxøøgpä yhøxhijxnä. Pero mnigwieendähadøjöp hajxy coo mijts jaduhñ mnä'ä tu'udägóobiät.

² Nibiuhbedøø hajxy neby hajxy jaduhñ mmäjädá'agät, neby hajxy jaduhñ mga'a tu'udägóyyät. Jaduhñdsä Jesucristo miädia'agy hajxy mgudiúunät.

³ Pøn yajcumayaamb je'eguiøxpä cooc tyijy miøjjä, caj ñä'ä tøyýä coo miøjjä. Nä'ä niwyiinhøhñäp jaduhñ.

⁴ Cøjwiinduum hajxy mniyhixøøjät pø hoy hajxy tøø mgudiuñ. Y pø tøø hajxy hoy mgudiuñ, mänit hajxy mxoondá'agät. Pø tøø ja'a mmägu'ughajpähajxy mbexy, cab hajxy nøcxy mniguiumayii.

⁵ Cøjwiinduum hajxy mniyajcopcø'øwøøjät pø hoy hajxy mgudiuñ.

⁶ Pøn jaduhñ yajnähixøøyyäp ja'a Diosmädia'agy, tsipcøxpä ofrenda hajxy yégät, mio'owøøjät ja'a yajnähixøøbiä.

⁷ Ca'a hajxy myajwiinhøøñ; ñajuøøbiä Dios neby hajxy nwiin-mahñdyhájtäm. Nej tøø mjäya'ayhatiän, høxtä jaduhñ mguhbédät.

⁸ Pønä Dioshespíritu panøcxp, je'e cøjxta'axiøø jugyhadaamb nebiä Dios jiugyhatiän; pero pøn yhamdsoo cuhdujt yajtuumb, cab jaduhñ jiugyhada'añ nebiä Dios jiugyhatiän.

⁹ Tsøgä njoot hajxy møc pädáacäm; coo hajxy tehngajnä hoy nwädíjtämät, mänit hajxy jim nnøcxämät tsajpootyp coo yhabáatnät.

¹⁰ Hoy miänaajä ja'a jäya'ay hajxy mbuhbédät nägøxiä. Tsipcóxpädsä hermanodøjc hajxy mnä'ägädä puhbédät.

¹¹ Hamdsóojøch hädaa letra nhädiuñ, paady miøjjatiä.

¹² Pønjaty mijts xjia wi'i ñämaaby coo hajxy myajcircuncidarhádät, paady hajxy jaduhñ miäna'añ coo hajxy wyi'i yajcumaya'añ cu'ughagujc. Hix, tsähgøøby hajxy jaduhñ coo hajxy miädsibø'øwøøjät ja'a homiädia'agyquiøxpä, coo ja'a Jesucristo hajxy tøø xñähho'túutäm cruzcøxp.

¹³ Hoy hajxy näje'e tøø jia yajcircuncidarhaty, cabä Moisés jiecyquiuhdujt hajxy yajtuunä. Paady mijts hajxy xjia wi'i ñäma'ay coo hajxy myajcircuncidarhájpät, yajcumayaamb hajxy jaduhñ ja'a mijtsøxpä.

¹⁴ Pero høøch, cábøch nmäna'añ coo mädyii miøjjä jiaančhä. Jagóoyyøch nmäna'añ coo miøjjä jiaančhä coočhä Jesucristo tøø xñähho'tu'udy cruzcøxp. Cábočhä njoot yaa nbädaacnä hädaa yaabä naaxwiin. Hoyyä jäya'ay hajxy waambaty jia mäná'anät, cábøch tii nmøjpädaacnä. Cáboch tii hadsojt nmøødän hädaa yaabä naaxwiin.

¹⁵ Cab jaduhñ ñejpiä pø tøø myajcircuncidarhaty o pø caj. Je'eduhñ tsoobáatnáp coo ja'a Dios hajxy tøø xpiädáacäm hawiinjemy.

¹⁶ Pønä Diosmädia'agy hoy cudiumb, je'eds hoyhajt weenhajt mo'owáanäp.

¹⁷ Páadyhøch chaa nnähxäguučh nguhxäguučhä coočhä Jesucristo miädia'agy tøø nmädiaacä. Y coočh jaduhñ tøø ngudiuñ, páadyhøchä cuhdujt nmøødän. Páadyhøch hajxy tii xquia'a yajnämáañät.

¹⁸ Hermanodøjc, weenä Jesucristo hajxy xcwieendähaty. Amén.

Efesios

¹ Høøch xøhajt Pablo. Høøch hädaa nocy njahby. Ja'a Dios jaduhñ mänaañ cooçhä Jesucristo xwyiinguéxät. Mijts hädaa nocy nyajnäjaayøøby pønatiä Diosmädia'agy mæbøjp jim maa ja'a cajpt jaduhñ xiøhatiän Efeso, pønatiä Jesucristo miädia'agy jim hoy yajtúunäp.

² Weenä Dios hajxy xmio'oy ja'a hoyhajt ja'a weenhajt, møødä Jesucristo. Ja'a Dios hajxy nDeedyhájtäm. Ja'a Jesucristo hajxy nWiindsønähájtäm.

³ Tsøgä Dios hajxy wiingudsähgøøyyäm. Ja'a Jesucristo, Dyioshajpiä Dios je'eduhmbä; y jaduhñ je'e Tieedyhajpä. Coø ja'a Jesucristo hajxy xmiøødhíjtäm tu'ugmädia'agy, paadiä Dios tsajpootypä ja'a mayhajt madiu'u tiuñ ja'a højtscøxphájtäm.

⁴ Cahnä hädaa yaabä naaxwiin hñajty chohnda'agy, tøøyyämä Dios hajxy hñajty xwyiimbíiwäm coø ja'a Jesucristo hajxy xmiøødhíjtämät tu'ugmädia'agy. Jaanä jaduhñ hajxy xwyiimbíiwämbä coø hajxy hoy njäya'ayhájtämät, coø hajxy nga'a cädiéhyämät, jaduhñ hajxy wa'ads hoy nhíjtämät maa ja'a Dioswiinduumän.

⁵ Coø ja'a Dios hajxy xchójcäm, paadiä Jesucristo yaa quiejxä hädaa yaabä naaxwiin ja'a højtscøxphájtäm. Paadiä Dios ja'a Jesucristo yaa quiejxy coø ja'a Dios hñajty tøø wyiinmay coø hajxy xyhuunghadäänäm. Hamdsoojootä Dios jaduhñ miänaañ coø hajxy xyhuunghájtämät.

⁶ Tsøcxä Dios hajxy wiingudsähgøøyyäm coø hajxy xjiaançh tehñ chójcäm, coø ja'a Jesucristo yaa quiejxä maa højtshájtäm. Jaduhñä Dios ja'a mayhajt møj tiuñ ja'a højtscøxphájtäm. Paady hajxy xchójcäm coø ja'a Jesucristo hajxy xmiøødhíjtäm tu'ugmädia'agy. Hix, jaançh tehñ chójcäbä Jesucristo ja'a Tiéediäm.

⁷ Coø ja'a Dios hajxy jaduhñ xjiaançh tehñ chójcäm, paadiä Jesucristo hajxy yaa hoy tøø xñähho'túutäm, jaduhñä nbojpä ngädieey hajxy xyajnähwaats xyajcuhwáatsäm. Jaduhñä Dios hajxy xmiée'xäm.

⁸ Coø hajxy jaduhñ xjiaançh tehñ chójcäm, paady hajxy hoy tøø xyajwiinjuøøyyäm nebiaty jaduhñ tøø wyiinmay ja'a højtscøxpä.

⁹ Tøø ja'a wyiinmahñdy hajxy xyhawäänäm ja'a hijty jaduhñ quiuyu'chpä. Hamdsoojootä Dios jaduhñ tøø wyiinmahñdyhaty. Chojpiä jioot hñajty jaduhñ coø ja'a mayhajt hñajty tiuna'añ ja'a højtscøxphájtäm.

¹⁰ Jaduhñä Dios tøø wyiinmahñdyhaty coø ja'a Jesucristo Wyiindsønähadøøjät cøxiä tijaty jim tsajpootyp, møødä tijaty yaa hädaa yaabä naaxwiin. Coø ja'a Dios jaduhñ yaghabáadät, mänit hñajty tiøjiada'añ coø ja'a Jesucristo jaduhñ Wyiindsønähada'añii.

¹¹ Ja'a Dios, yajtøjiajpy je'eduhñ nebiaty je'e wyiinmay. Hoorä, jéquiänä Dios wyiinmaayy coø højts ja'a yHuung xyajnähwa'ads xyajcuhwá'adsät, højts judíospä, coø højts jaduhñ nmøødhídat tu'ugmädia'agy.

¹² Jequiän højts ja'a nhap ja'a ndeedy ja'a Dios ja'a miädia'agy hajxy tiägøøyyä mæbøjcäbä coø højts xyajnähwa'ads xyajcuhwá'adsät. Hoorä, paadiä Dios jaduhñ jecy wyiinmaayy coø højts ja'a yHuung xyajnähwa'ads xyajcuhwá'adsät, jaduhñä jäya'ayä Dios hajxy nägøxiä wyiingudsähgøøwät coø jiaançh tehñ miøjjä coø jiaançh tehñ jiaançhä.

¹³ Y mijts ja'a ca'a judíospä, jaanä jaduhñä Dios tøø wyiinmaabiä coø mijts ja'a yHuung xyajnähwaats xyajcuhwáatspä. Y jaduhñ hajxy tøø mmæbøjpä coø ja'a yHuung hajxy tøø xyajnähwaats tøø xyajcuhwaatspä. Jaançh tehñ tiømiädiaacpä Dios jaduhñ. Coø hajxy jaduhñ nmæbøjcäm, paadiä

Dios ja'a yhEspíritu yaa tøø quiexy maa højtshájtäm, jaduhnä tøyhajt hajxy nmøødhájtäm coo ja'a Jesucristo hajxy tøø xjiaančh yajnähwaats tøø xjiaančh yajcuhwáatsäm. Hix, jéquiänä Dios jaduhn miänaañ cooc ja'a yhEspíritu hānajty quiexa'añ maa ja'a jäya'ayhajxiän, ja'a miädia'agy hajxy hānajty mabójcäbä coo hajxy hānajty yajnähwa'ads yajcuhwa'adsa'añii. Jaduhnä Dios ja'a tøyhajt hajxy xmióoyyäm coo hajxy hoy miänaajä xcwieendāhadāañäm.

14 Y coo ja'a Dios ja'a yhEspíritu tøø jiaančh quejxnä maa højtshájtäm, jaduhnä tøyhajt hajxy nmøødhájtämbä coo hajxy jim xyajnøcxāañäm maa ja'a wyiinduumän. Jaduhnä DioshEspíritu hajxy xmiøødhidāañäm høxtä coonä yhabáadät coo ja'a Dios hajxy jim xyajnøcxāmät maa ja'a wyiinduumän, y coo ja'a Dios ja'a mayhajt jaduhn tiuñ ja'a højtscøxphájtäm, páadiäts hajxy nwiingudsähgøøyyāmät coo jiaančh tehñ miøjjä coo jiaančh tehñ jiaančh.

15 Nmädóyhøch jaduhn coo ja'a Jesús ja'a miädia'agy hajxy tøø mmabójcä, ja'a hajxy nWiindsønähájtämbä. Jadúhnhøch nmädóyyäbä coo hajxy mdsocy mba'häyoy pønatiä Diosmädia'agy panøcxp.

16 Cooch jaduhn nmädoyyä, páadyhøch Dios Dioscujú'uyäp nmo'oy ja'a mijtscøxpä hoy miänaajä, cooch hānajty nDiospa'ya'axy ja'a mijtscøxpä.

17 Nmānuu'xtāacypiøchä Dios coo ja'a wyiinmahñdy hajxy jaduhn ween xmiø'oy ja'a yhEspirituhaam, y coo ja'a wyiinmahñdy hajxy jaduhn ween xya-jwiinjuø'oy. Dioshájtäbä Dios ja'a Jesucristäm, ja'a hajxy nWiindsønähájtämbä. NDioshájtämä Dios hajxy. Møj jaančh je'e. Hawiinmats hajxy jaduhn nwiingudsähgøøyyāmät.

18 Jadúhnhøchä Dios nmānuu'xtaäcpä coo hajxy ween xyajwiinjuø'oy coo je'e tøø wyiinmay coo hajxy jim xyajnøcxāañäm maa ja'a wyiinduumän. Paady hajxy jim xyajnøcxāañäm coo hajxy xyhuunghájtäm. Jaančh tehñ yhoy jaančh tehñ yajxón hajxy jim nhidāañäm.

19 Weenä Dios hajxy xyajwiinjuøbiä coo møcmäjaa jiaančh tehñ miøødä, coo ja'a miäjaahaam hajxy xpiuhbéjtäm coo ja'a miädia'agy hajxy nmabójcäm coo tiømiädia'agy.

20 Jaanä miäjaahaamä yHuung jaduhn yagjujypijtagajtpä. Mānit jim yaj-nøcxy maa ja'a wyiinduumän. Mānit ñāmaayy coo yhøxtä'agät maa ja'a quiø'ø hahooyhaampiän. Jimä Jesucristo ja'a Tieedy miøødhanehmä.

21 Ni pønä cuhdujt jaduhn quia'a nä'ägädä møødä nebiä Jesucristo møjcuhdajt miøødän, ni jim tsajpootyp, ni hädaa yaabä naaxwiin. Ni pønä cuhdujt mānaa quia'a møødhada'añ nebiä Jesucristo møjcuhdajt miøødän.

22 Jaduhnä Jesucristo piädaacä coo cøxiä wiinä yhané'emät hoy miaajä. Jaduhn je'e piädäacäbä coo højts nWiindsønähájtämät coo ja'a miädia'agy hajxy nmabójcäm coo tiømiädia'agy.

23 Hoyyä Jesucristo cøxiä wiinä jia hane'emy hoy miaajä, coo hajxy jaduhn nmabójcäm, xjiotcädäacäm hajxy jaduhn coo hajxy xmiøødhájtämät tu'ugmädia'agy. Ni tii jaduhn quia'a jootcädaacy neby højts xjiotcädäacäm.

2

1 Jue'e mijts hijty, cabä Dios hajxy hijty mwiingudsähgø'oy, je'eguiøxpä coo ja'a pojpa cädieey hajxy hijty mmøødä, coo ja'a Diosmädia'agy hajxy hijty mga'a cudiuñ.

2 Jaančh tehñ yhaxøøgtuum hajxy hijty mnä'ägädä hity. Jaduhndsä jäya'ayhajxy yhity ja'a Diosmädia'agy hajxy ca'a mabøjpa. Ja'a møjcu'ugong ja'a miädia'agy hajxy hijty mmabójcäp. Jaayá'ayäts møjtuungmøød tsajtcøxp. Yhanehmby jaduhn pønatiä Diosmädia'agy ca'a mabøjp.

³ Jaduhñ hajxy hijty nägøxiä njatcøøyyämbä. Haxøøg hajxy hijty nwädíjtäm nebiä njootä ngopc-hajxy hijty chójcäm. Paadiä Dios hajxy hijty xya-jcumädo_wáanäm nägøxiä näguipxy møødä haxøøgjäya'ayhajxy.

⁴ Pero hojiootä Dios jiaanč tehñ miøød. Xjiaanč tehñ chójcäm hajxy.

⁵ Hoyyä Dios ja'a miädia'agy hajxy hijty nga'a ja cudiúunäm, ja'a miäjaahaamä Dios ja'a nwiinmahñdyhajxy tøø xyajtägájsäm, nebiä miädia'agy hajxy jaduhñ hoy ngudiúunämät, nebiä Jesucristo yagjujypiøjcän ja'a Tieediä miäjaahaam. Coö ja'a Dios hajxy xjiaanč tehñ chójcäm, paady hajxy tøø xpiädáacäm hawa'adstuum.

⁶ Nebiä Dios ja'a Jesucristo yagjujypiøjtägajchän, jaanä jaduhñ højts xyagjujypiøjtägatsáanämbä. Tøø hajxy xpiädáacäm coö ja'a Jesucristo hajxy nmøødhíjtämät tu'ugmädia'agy. Y nebiä Dios ja'a Jesucristo ja'a cuhdujt miooyyän coö jim miähané'emät tsajpootyp, jaanä jaduhñ højtsä cuhdujt xmió'owáanämbä.

⁷ Paadiä Dios ja'a cuhdujt hajxy jaduhñ xmióoyyäm, jaduhñ yajcähxø'øga'añ coö hojioot jiaanč tehñ miøødä maa højtscøxpän, coö hajxy xjiaanč tehñ chójcäm. Paadiä Jesucristo yaa quiejxä hädaa yaabä naaxwiin; paady hajxy hoy xñähho'túutäm. Jimä Dios hajxy hoy miänaajä xyaghidáanäm maa ja'a wyiinduumän.

⁸ Cab hajxy hamdsoo tøø nhawa'adspädsøømäm. Ja'a Dios hajxy tøø xpiädáacäm hawa'adstuum. Paady hajxy xyaghawa'adspädsøømäm coö hojioot jiaanč tehñ miøødä, coö hajxy nmäbøjcäm coö hojioot miøødä.

⁹ Coö ja'a nbojpä ngädieey hajxy hamdsoo tøø nga'a yajniñähwáatsäm, paady hajxy hamdsoo nga'a niguiumáayyämät, hoy hajxy tøø nja hojia'ayhajtäm.

¹⁰ Hix, tøø ja'a Dios ja'a nwiinmahñdyhajxy xyajtägájsäm coö ja'a Jesucristo hajxy xmiøødhíjtäm tu'ugmädia'agy. Tøø ja'a Dios ja'a mäjaa hajxy xmióoyyäm neby hajxy hoy nhíjtämät. Jéquiänä Dios jaduhñ wyiinmaayy coö hajxy jaduhñ hoy nhíjtämät.

¹¹ Hoorä, højts judíospä, yajcumaaby højts jaduhñ coö højts nyajcircuncidarhaty. Jaduhñ højts tyijy nyajcähxø'øgy coö højtsä Dios xquiu'ughaty. Coö højts jaduhñ nyajcircuncidarhaty, je'eduhñ ñänøømby coö højtsä seña nbäda'agy maa højtsä nni'xcøxpän. Paady højts mijts nxøøghaty, mijts ca'a judíospä, coö hajxy mga'a yajcircuncidarhappä. Tøyhajt jaduhñ.

¹² Hix, højts judíospä, ja'a Dios højts jecy xquiu'ughajt. Jaduhñ højtsä Dios xmiøødyajcuhdujcy coö højts hñajty xyajnähwa'ads xyajcuhwa'adsa'añ. Pero mijts ca'a judíospä, caj mijtsä Dios xñämaayy coö mijts xquiu'ughada'añ, coö mijts xyajnähwa'ads xyajcuhwa'adsa'añ. Hix, cahnä Diosmädia'agy hajxy hñajty mmädoyñä ja'a Cristocøxpä. Paady hajxy hijty mga'a najuø'øy coö mijts ja'a Dios xyajnähwa'ads xyajcuhwa'adsaambä.

¹³ Caj mijtsä Dios hijty xquiu'ughaty. Cabä Diosmädia'agy hajxy hijty mmädooyyä. Pero coö ja'a Jesucristo hajxy tøø xñähho'tu'udy, paadiä Dios hajxy xquiu'ughajnä.

¹⁴ Coö ja'a Jesucristo hajxy tøø xñähho'túutäm, jaduhñ hajxy tøø xpiädáacäm tu'ugmädia'agy nägøxiä, møød højts judíospä näguipxy møød mijts ca'a judíospä. Hamiñ haxøpy hajxy hijty nnimiädsiphajtäm. Pero tøø hajxy nnimiägapxø'cänä je'eguiøxpä coö ja'a Jesucristo hajxy tøø xñähho'túutäm.

¹⁵ Højts judíospä, mijts hijty nmøødnimiädsiphajtäp, mijts ca'a judíospä. Hix, højtsä Dios jecy xyhanehm madiu'u, ca'a myijtsä. Mänitä Moisés quijahy nebiaty højtsä Dios xyhanehm, y coö ja'a Jesucristo hajxy hoy xñähho'túutäm, paadiä Dios ja'a mädia'agy yaghamaadiujnä nebiä Moisés

hänajty jecy tøø quiujaayän. Jaduhñä Jesucristo hajxy tøø xpiädäacäm tu'ugmädia'agy møød je'e, møød højts judíospä näguipxy møød mijts ca'a judíospä. Paady hajxy nga'a nimiädsiphájtänä hamiñ haxøpy neby hijtiän, højts judíospä møød mijts ca'a judíospä.

¹⁶ Coø ja'a Jesucristo hajxy tøø xñähho'túutäm cruzcøxp, paadiä Dios hajxy tu'ugmädia'agy xmiøødhíjtänä, møød højts judíospä näguipxy møød mijts ca'a judíospä. Cabä Dios hajxy jaduhñ nmädsiphájtänä.

¹⁷ Hoyyä Jesucristo hajxy xyhawáanäm coogä Dios ja'a jioot quia'a tsocy coø ja'a Dios hajxy nga'a mädsiphájtänät. Jaduhñägä jioot chocy coø hajxy nmøødhíjtänät tu'ugmädia'agy nägøxiä, møød højts judíospä näguipxy møød mijts ca'a judíospä.

¹⁸ Hix, coø ja'a Jesucristo hajxy nägøxiä tøø xñähho'túutäm, paadiä Dios hajxy nägøxiä nmøødhíjtänä tu'ugmädia'agy, møød højts judíospä näguipxy møød mijts ca'a judíospä. Ja'a yhEspírituhaam hajxy jaduhñ xyajmøødhíjtäm tu'ugmädia'agy nägøxiä.

¹⁹ Xquiu'ughájnäp mijtsä Dios møødä jäya'ayhajxy nägøxiä, ja'a Diosmädia'agy hajxy mæbøjpä, hoy hajxy mga'a jagä judíospä. Xyhuunghájnäbä Dios hajxy jaduhñ. Cabä Dios hajxy hijty xquiu'ughaty xyhuunghaty, coø ja'a miädia'agy hajxy hijty mga'a mæbøjcä.

²⁰ Coø ja'a Jesucristo hajxy hoy tøø xñähho'túutäm, mänit je'e hoy jiu-jypiøjtägach. Mänitä Diosquexy ja'a Diosmädia'agy hajxy tiägøøyy yajwa'xpä. Mänitä Diosmädia'agy hajxy nmæbøjcäm.

²¹⁻²² Paadiä Jesucristo hajxy xmiøødhíjtäm tu'ugjoot tu'ugwiinmahñdy coø ja'a Diosmädia'agy hajxy näguipxy nmæbøjcäm, møød højts judíospä, møød mijts ca'a judíospä. Hix, tøø ja'a Dios hajxy xyajnähwaats xyajcuhwáatsäm ja'a nbojpä ngädieeyhájtäm. Ja'a yhEspírituhaam hajxy jaduhñ xyajmøødhíjtäm tu'ugjoot tu'ugwiinmahñdy.

3

¹ Høøch Pablo, páadyhøch chaä ndsumyčhäna'ay coöchä Jesucristo miädia'agy nyajwa'xä maa mijtsän, mijts ca'a judíospä. Coø ja'a Jesucristo hajxy tøø xpiädäacäm tu'ugmädia'agy nägøxiä, páadyhøchä Dios nba'ya'axy ja'a mijtsøxpä.

² Tøø hajxiäda'a mmädoyhaty coöchä Dios tøø xwyiinguexy coø mijtsä Diosmädia'agy nyajwiingapxø'øwät, coø ja'a Dios ja'a hojioot miøødä ja'a mijtsøxpä.

³ Jéquiänä Dios wyiinmaayy coø højtsä nbojpä ngädieey xyajnähwaats xya-jcuhwáatsät, højts judíospä. Nnajuøøby højts hijty jaduhñ. Pero cuyu'uchä Dios hijty yaghity coø hänajty tøø wyiinmaabiä coø mijts xyajnähwa'ads xya-jcuhwa'adsaambä, mijts ca'a judíospä. Hoorä, tøøchä Dios hädaa mädia'agy xyajwiinjuøøñä nébiøch hädaa mädia'agy weenjaty cham njaayän.

⁴ Coø hädaa mädia'agy hajxy mgápxät, jaduhñ hajxy mnajuø'øwa'añ coöchä Dios ja'a mädia'agy tøø xyajwiinjuø'øy, ja'a Jesucristocøxpä, ja'a cuyu'uch tøø yhítiäbä.

⁵ Cab hädaa mädia'agy hijty pøñ miädoyyä. Pero tøø ja'a Dios ja'a wyiinguexyhajxy yajwiinjuøøñä. Ja'a yhEspírituhaam jaduhñ yajwiinjuøøyy.

⁶ Jaduhñ hajxy nnajuøøyyäm coø ja'a Dios jecy wyiinmaayy coø ja'a Jesucristo hajxy hänajty xñähho'tu'udäänäm, coø hänajty jiu-jypiøjtägatsa'añ. Y coø ja'a Diosmädia'agy hajxy nmæbøjcäm, paadiä Jesucristo hajxy nägøxiä nmøødhíjtäm tu'ugjoot tu'ugwiinmahñdy, møød højts judíospä näguipxy møød mijts ca'a judíospä. Jaduhñä Dios hajxy nägøxiä xyhuunghájtäm.

Tu'ugmädia'aguiä Dios hajxy jaduhñ xyaghjítäm ja'a Jesucristocøxpä. Paadiä Dios hajxy jaduhñ xyajñähwaats xyajcuhwáatsäm coo ja'a Jesucristo hajxy hoy tøø xñähho'túutäm. Jéquiänä Dios jaduhñ wyiinmaayy.

⁷⁻⁸ Ja'a miøcmäjaaháamhøchä Dios tøø xtiuungmo'oy cooçh ja'a miädia'agy nyajwá'xät maa ja'a ca'a judíoshajxypän. Xtiuungmóoyhøchä Dios jaduhñ cooçhä judíoshajxy nyajwiingapxø'øwät coo Dios ja'a mayhajt møj may tiuna'añ ja'a højtscøxphjítäm, je'eguiøxpä coo ja'a Jesucristo hajxy hoy tøø xñähho'túutäm. Hojiootä Dios miøød, páadyhøch jaduhñ xtiuungmooyy, hóyhøch nga'a jagä mäna'añ cooçh nga'a tsoobaady cooçh jaduhñ ndúnät, hóyhøch nja mäna'añ coo ja'a Dioshuunghajxy miaas tsoobáadät, coo hajxy jaduhñ tiúnät.

⁹ Jaanä jaduhñhøchä Dios tøø xtiuungmoobiä cooçhä jäya'ayhajxy nägøxiä nyajwiinjuø'øwät coo ja'a Dios jecy wyiinmaayy coo mijtsä Jesucristo hñajty xyajñähwa'ads xyajcuhwa'adsaambä, mijts ca'a judíospä. Mänitä Dios jaduhñ wyiinmaayy mänaa cøxiä wiinä yhädiuññän. Cab hajxy xchoj yajwiinjuøyyäm. Jejcy jaduhñ yaghijty cuyu'uuch.

¹⁰ Hoorä, coo ja'a Jesucristo hajxy nägøxiä tøø xyajñähwaats tøø xya-jcuhwáatsäm, møød højts judíospä näguipxy møød mijts ca'a judíospä, coo ja'a Diosmädia'agy hajxy näguipxy nmäbøjcäm coo tiømiädia'agy, jaduhñä Diosmoonsä hajxy jim ñajuøøñä tsajpootyp coo ja'a Dios jiaançh tehñ quiuwiinmahñdiä madiu'u. Haa ca'a, xyhíxämä Diosmoonsä hajxy coo hajxy tu'ugmädia'agy jaduhñ nhjítänä.

¹¹ Jaduhñä Dios ñä'ägädä wiinmaayy jequiän, jajty hädaa naaxwiin yhädiuññ. Jaduhñ yajtøjiajty coo ja'a Jesucristo hajxy hoy xñähho'túutäm, ja'a hajxy nWiindsønähjítämbä.

¹² Coo ja'a Jesucristo hajxy nmøødhjítäm tu'ugmädia'agy, coo ja'a miädia'agy hajxy nmäbøjcäm, jaduhñä tøyhajt hajxy nmøødhjítäm coo ja'a cuhdujt hajxy nmøødhjítäm coo ja'a Dios hajxy nba'yáaxämät. Jaduhñä tøyhajt hajxy nmøødhjítämbä coo hajxy xmiädóowäm.

¹³ Mijts nmänuu'xtaacypy coo hajxy mga'a jootmayhádät, hóyhøch yaa nja tsaaçhpøcy. Páadyhøch chaa ndsaaçhpøcy cooçhä Diosmädia'agy nyajwa'xy maa mijtsän. Páadiäts hajxy jaduhñ mxoondá'agät.

¹⁴⁻¹⁶ Ja'a nWiindsønähjítäm Jesucristo, Dios je'e Tieedyhajpy. Tieedyhajpiä Dios hajxy je'ebä pønjaty jim tsänaaby tsajtcøxp møød pønjaty yaa tsänaaby hädaa yaabä naaxwiin. Coo ja'a Jesucristo hajxy tøø xpiädäacäm tu'ugmädia'agy møød højts judíospä näguipxy møød mijts ca'a judíospä, páadyhøchä Dios hamuumdu'joot nmänuu'xta'agy coo mijtsä mäjaa ween xmio'oy ja'a yhEspírituhaam, neby hajxy jaduhñä mjuøhñdyhaam mmee'xtúgät. Xpiuhbédäbä Dios hajxy jaduhñ je'eguiøxpä coo je'e miøjjä jiaançh.

¹⁷ Jaduhñhøchä Dios nmänuu'xtaacypy coo ja'a Jesucristo yhEspíritu hajxy ween mjaac møødhajtä, je'eguiøxpä coo ja'a miädia'agy hajxy nmäbøjcä. Jaduhñ hajxy hoy yajxón mniçhoc mnimiee'xøøjät hoy miänaaxøøjä.

¹⁸⁻¹⁹ Y jaduhñ hajxy mwiinjuøøbiät coo ja'a Jesucristo hajxy xjiaançh tehñ chójcäm møj may. Hanaxiä hajxy jaduhñ xjiaançh tehñ chójcäm. Cab hajxy ca'xy nwiinjuøøyyäm nebiaty hajxy jaduhñ xjia tsójcäm. Cab hajxy pedyii nwiinjuøøyyäm. Coo hajxy hoy nwiinjuøøyyämät, hoyyä nwiinmahñdyhajxy jiadäänäm nebiä Dios ja'a wyiinmahñdiän.

²⁰ Jaançh tehñ miäjaamøødä Dios. Ja'a miäjaahaamä nwiinmahñdyhajxy xyajtägájtsäm. Jaanä miäjaahaamä mayhajt møj may tiuumbä ja'a højtscøxphjítäm. Høxtä cab hajxy hoy nwiinjuø'øwäänäm nebiatiä mayhajt

jaduhn tiuun̄. Møj mayyā mayhajt jaduhn tiuun̄, hoy hajxy nga'a jagā māyujwāanām.

²¹ Tsögä Dios hajxy hoy miānaajä wiingudsähgøøyyām, coo ja'a miädia'agy hajxy nmäbøjcam, je'eguiøxpä coo ja'a Jesucristo hajxy tøø xñähho'túutām. Tøyhajt jaduhn.

4

¹ Coochä Jesucristocøxpä nduñ, páadyhøch chaa ndsumyčhāna'ay. Coo mijtsä Dios tøø xyajnähdijy coo hajxy hoy mwädítät, paady hajxy jaduhn mgudiúnät.

² Cab hajxy myajcumáyät. Mee'xxieemy hajxy mhídät. Mmee'xtúgäp hajxy jaduhn. Hamiñ haxøpy hajxy mničhoc mnimíee'xøøjät.

³ Naxy hajxy tu'ugcopc tu'ugwiinmahñdy mdehm̄ yhídät. Ja'a Dioshespíritu hajxy jaduhn xyaghídäp tu'ugmädia'agy.

⁴ Tu'ugmuquiä Jesucristo miädia'agy hajxy nbanøcxām, møød højts judíos pä näguipxy møød mijts ca'a judíos pä. Tu'ugmuquiä Dioshespíritu hajxy nmøødhájtām. Nägøxiä Dios hajxy xyajnähdíjjām coo hajxy jim̄ xya-jnøcxāanām maa ja'a wyiinduumān. Tu'ugmucy hajxy jaduhn njøbhíjxām.

⁵ Tu'ugmuquiä Jesucristo hajxy nWiindsøn hájtām. Tu'ugmuquiä miädia'agy hajxy nmäbøjcam coo tiømiädia'agy. Ja'a Jesucristocøxpä hajxy nägøxiä nnäbéjtām.

⁶ Tu'ugmuquiä Dios hajxy nDeedyhájtām nägøxiä. Jaaya'ay hajxy xy-hanéhmām nägøxiä. Ja'a højtscøxphájtām jaaya'ayā mayhajt tiuun̄ nägøxiä. Jaaya'ay hajxy hoy xmiøødhájtām nägøxiä.

⁷ Cøjhawiingatia Jesucristo hajxy tøø xyajnähdíjjām nebiaty hajxy ndúunāmät.

⁸ Jaduhnä Diosmädia'agy miāna'añ:

Coo jim̄ ñøcxy tsajpootyp, tsumiä miädsip yajnøcxy, ja'a hajxy hānajty tøø quia'a mājädá'aguiäbä.

Mānitä jiamioød madiu'u miooyy cøxiä wiinä.

⁹⁻¹⁰ Coo jaduhn miāna'añ coo ja'a Jesucristo ñøcxy tsajpootyp, jaduhn miāna'ana'añ coo hānajty yaa tøø yhoy hädaa yaabä naaxwiin. Jim̄ hānajty tøø yhuuc tsohndaacpä tsajpootyp. Y coo jim̄ ñøcxtägajch Dioswiinduum, jim̄ møj jaanč yhiñä. Jim̄ jaduhn yhanehm̄nä tsajpootyp møød hädaa yaabä naaxwiin.

¹¹ Ja'a Jesucristo højts xpiädaac coo højts madiu'u ndúnät jaaya'aguiøxpä. Näje'e højts xyajnähdijy coo højts ndúnät apóstol. Je'eč jaduhn nnänøømby coo højtsä Jesucristo xquiejxtsohñ Diosmädia'agy-yajwa'xpä wiinduhmyhagajpt. Näje'e hajxy yajnähdíjjäbä coo ja'a Diosmädia'agy hajxy jiaac yajwá'xät. Näje'e hajxy yajnähdíjjäbä coo ja'a Diosmädia'agy hajxy yajwiingapxø'øwät. Näje'e hajxy yajnähdíjjäbä coo ja'a Diosmädia'agy hajxy yajnähixø'øwät. Näje'e hajxy yajnähdíjjäbä coo hajxy quiopc-hádät maa ja'a hermanodøjc-hajxy yhamugø'øyān Dioswiingudsähgøøbiä.

¹² Paady hajxy jaduhn tiuñ, jaduhnä Diosmädia'agy hajxy maas hoy quiudiúnät coo ja'a Diosmädia'agy hajxy miäbøcy. Jaanä jaduhn hajxy tiuumbät ja'a Dioscøxpä. Jaduhn hajxy maas hoy wiädítät nägøxiä coo ja'a Jesucristo hajxy pianøcxy.

¹³ Jaduhnä Dios ja'a miädia'agy hajxy tu'ugmucy hoy nmäbøjcamät nägøxiä coo tiømiädia'agy ja'a Jesucristocøxpä. Y jaduhnä Jesucristo hajxy hoy nmøødhájtāmät tu'ugmädia'agy, ja'a Dioshuung. Jaduhnä Diosmädia'agy hajxy maas hoy nwiinjuøøyyāmät. Jaduhn hajxy maas hoy nyajtúunāmät. Mānit

hajxy hoy nwiinmäáyyämät nebiä Jesucristo wyiinmayyän. Y jaduñ hajxy hoy nwädíjtämät nebiä Jesucristo hoy wiäditiän.

¹⁴ Pønjetiä Diosmädia'agy hoy ca'a wiinjuøøbyñä, jaanč tehñ piaquiä hajxy yajwiinhøøñ. Hoy tyii mädia'aguiä hajxy miäbøga'añ. Hiñ, ja'a häna'c-hajxy mäwiinhøhmbä, jiaanč tehñ jiajpy hajxy mäwiinhøøn. Jaanč tehñ piaquiä hajxy jaduñ xwyiinhøønät. Pero højtshájtäm, cab højts jaduñ nyajwiinhøhñämät.

¹⁵ Pero, tsøg hajxy tøguiápxäm, tsøg hajxy tømiädiäacäm. Tsøg hajxy tsójcäm, tsøg hajxy mée'xäm pønjaty hajxy nmøødmädiäacäm. Jaduhñ hajxy hoy nwädíjtämät nebiä Jesucristo hoy wiäditiän, ja'a hajxy nWiindsøn'hájtämbä.

¹⁶ Coö hajxy nhíjtämät tu'ugmädia'agy, coö hajxy nnibiuhbéjtämät hamiñ haxøpy nebiatiä Dios hajxy tøø xtiuungmöoyyäm, jaduñä Jesucristo hajxy xpiuhbéjtämät, neby hajxy jaduñ maas hoy nničhojc nnimiée'xämät hamiñ haxøpy, nebiä Diosmädia'agy hajxy jaduñ maas hoy nwiinjuøøyyämät, neby hajxy jaduñ maas hoy ngudiüñämät.

¹⁷⁻¹⁹ Pønjetiä Diosmädia'agy ca'a panøcxp, cab hajxy miøjpäda'agy tijaty jaduñ tsoobaatp. Cab hajxy tii wyiinjuø'ø. Jaanč tehñ xiexä jiootä quiopc-hajxy; paady hajxy quia'a wiinjuø'ø coö ja'a Dios ja'a møjmayhajt tøø tiuñ ja'a højtscøxphájtäm, paady hajxy quia'a cumayii ja'a Diósäm. Tsähdiuhndägoy hajxy jaduñ. Hanaxiä hajxy yhaxøøgjatcø'ø cøxypänejpä. Paady mijts jaduñ nmägapxy nhane'emy ja'a Jesucristocøxpä coö hajxy jaduñ mga'a pajatcøøbiät.

²⁰ Coö hajxy tøø mhabøcy ja'a Jesucristocøxpä, paady hajxy mnajuø'ø coö jaduñ quia'a hoyyä coö hajxy jaduñ mga'a haxøøgwädíjnät, neby hajxy naamñä tøø nmägapxy tøø nhane'emiän.

²¹ Tøyhajt jaduñ coö hajxy tøø mhabøcy ja'a Jesucristocøxpä. Jaaya'ay hajxy xyajñähixøøyy ja'a yhEspírituhaam. Hiñ, tøguiapxp tømiädiäacp je'e.

²² Jaduhñ hajxy xyajñähixøøyy coö ja'a mhaxøøgcuhdujt hajxy mnajt-shixø'øwät neby hajxy hijty mhaxøøgjäya'ayhatiän. Mdu'udägoyyaamb hajxy hijty je'eguiøxpä coö hajxy hijty cøxiä wiinä mhadsoy, cooc tyijy hajxy hijty jaduñ mbaada'añ ja'a hoyhajtä weenhajt. Pero myajwiinhøhmb hajxy hijty. Hiñ, cabä hoyhajtä weenhajt hajxy jaduñ mbáadät.

²³ Pero, yajtägatsä mjootä mwiinmahñdy hajxy.

²⁴ Tøø ja'a Dios hajxy xmióoyyäm ja'a hawiinjembä howyiinmahñdy nebiä Dios hajxy jaduñ hoy nbahíxämät. Jaduhñ hajxy tøyhajt hoy mjäya'ayhádät. Jaduhñ hajxy tøyhajt haxøøg mga'a wädíjnät.

²⁵ Jaduhñds je'e, cab hajxy mhøhñdáacnät. Tøyhajt hajxy mmädiäacnät. Hiñ, tu'ugmädia'agy hajxy nhíjtäm.

²⁶⁻²⁷ Coö hajxy tähoocjaty mnimiäjootma'adøøjät, paquiä hajxy jadähooc mnimiägäpxø'cägumbät, coö ja'a møjcu'ugong hajxy jaduñ paquiä xñä'a yajcädiéeyät.

²⁸ Pønjaty mee'tsp, cab hajxy miée'tsnät. Ween hajxy tiuunnä, jaduñä wiingjäya'ay hajxy piuhbédat pøn jaduñ yajmaajiajp.

²⁹ Cab hajxy mhaxøøgcápxät. Coö hajxy hoy mgäpx mmädiä'agät, jiaac wiinjuø'øwaambiä jäya'ayhajxy, ja'a homiädia'agy hajxy hoy mädoobä. Jaduhñä Dios ja'a mayhajt tiúnät jaaya'aguiøxpähajxy, ja'a hajxy jaduñ mädoobä.

³⁰ Cabä Dioshespíritu hajxy myagjootmadiägø'øwät. Hiñ, jaaya'ay hajxy jaduñ xcwieendähadäänäm høxtä coonä ja'a Jesucristo hñajty yaa quiädaactägatsa'añ. Mänit jaduñ quiäxø'øga'añ coö hajxy hñajty tøø xyajñähwaats tøø xyajcuhwáatsäm, møød coö hajxy hñajty tøø xyajpädsøømäm haxøøgtuum.

³¹ Cab hajxy mnixiøøghájtänät. Cab hajxy mnimiädsiphájtänät. Cab hajxy mnimiäjootmä'tänät. Cab hajxy mniyhójjänät. Cab hajxy mniñähójjänät. Cab hajxy mnimiähanhájtänät.

³² Pero, mniçhoc mnimiee'xóøjäp hajxy hamiñ haxøpy. Mniñäxuudsóøjäp hajxy jaduhñ. Mnimiee'xóøjäp hajxy jaduhñ. Hix, jaduhñä Dios hajxy tøø xmiée'xäm ja'a Jesucristocøxpä.

5

¹ Xyhuunghájtämä Dios hajxy; xchójcäm hajxy jaduhñ. Naxiä Dios hajxy ndehm piahíxämät.

² Mniçhoc mnimiee'xóøjäp hajxy nebiä Jesucristo hajxy xchójcäm. Coø hajxy jaduhñ xchójcäm, paady hajxy tøø xñähho'túutäm. Quiumaayy ja'a Dios jaduhñ.

³ Coø ja'a Dios hajxy xyhuunghájtäm, paady hajxy haxøøg mga'a nä'ägädä jatcø'owät. Ni mga'a hadsógät jäya'adio'oxiøjc hajxy. Jaanä jaduhñ mijts to'oxiøjc-hajxypä, caj mijts wiingya'adiøjc mmøødmáabät. Ni mga'a hadsójcät hajxy ja'a mmädo'oxiøjcä ñihyhap. Ni cab hajxy mhaxøøgcápät.

⁴ Cabä haxøøghaaw hajxy mmøødhádät. Cab hajxy mguhhiñmädiä'agät. Cab hajxy mhanähádät. Cab jaduhñ yhawinmatsä coø hajxy jaduhñ mjatcø'owät. Pero ja'a Dios hajxy mnämä'awäp: "Dioscujú'uyäp."

⁵ Tøyhajt jaduhñ, pøñ haxøøg jatcøøby, pøñ jäya'ajie'e jaanç tehñ yhadsojp, cab jim tiägø'owa'añ maa ja'a Jesucristo wyiinduumän, maa ja'a Dios ja'a wyiinduumän. Hix, pøñ jäya'ajie'e hadsojp, cabä Dios hoy wyiingudsähgø'oy.

⁶ Cab hajxy nyajwiinhóhñämät coø jäya'ay hajxy hñajty xjia nämáayyämät cooc tyijy yhooyä coø hajxy haxøøg njatcøøyyämät, nébiäts naamñä tøø nmägapxy tøø nhane'emiän. Ja'a häna'c-hajxy ca'a mabøjpä, ja'a häna'c-hajxy jaduhñ haxøøg jatcøøbiä, nébiäts naamñä tøø nmägapxy tøø nhane'emiän, yajcumädoṵáañäp hajxy je'eduhñ ja'a Diósäm.

⁷ Paady jaduhñ, tsøc ca'a møødjatcøøyyäm näguipxy.

⁸ Mijts, cabä Diosmädia'agy hajxy hijty mmädoyyä. Mhaxøøgwädiyp hajxy hijty, møød hajxy hijty haxøøgjaty mjatcø'oy. Pero coø ja'a Jesucristo miädia'agy hajxy tøø mmäbøjcänä, paadiä mwiinmahñdy hajxy mmøødän hawa'adstuum. Jaduhñä mwiinmahñdy hajxy mjaac yaghídät.

⁹ Pøñjatiä wyiinmahñdy hawa'adstuum, hojiøot hajxy miøød. Hoy hajxy jiäya'ayhaty. Tøguiapxp tømiädiacp hajxy je'e.

¹⁰ Mjaac habøgäp hajxy jaduhñ nebiatiä Dios hajxy xyajñähixø'oy neby hajxy jaduhñ maas hoy mjäya'ayhádät. Jaduhñä Jesucristo hajxy xmiaas cumáyät.

¹¹ Ja'a häna'cä Diosmädia'agy hajxy ca'a mabøjpä, cab hajxy hoy jiäya'ayhaty. Cab hajxy jaduhñ cøxypänejpä mmøødjatcø'owät; pero mwiinguhojø'owäp hajxy jaduhñ.

¹² Jaanç tehñ yhoçhähdiiuññä hajxy hamee'ch jiatcø'oy; päadyhøch nga'a nägapxa'añ nebiaty hajxy jaduhñ jiatcø'oy.

¹³ Coø jäya'ay hajxy nwiinguhojøøyyämät coø hajxy yhaxøøgwädity, nebiä Diosmädia'agy miäna'añän, mänit hajxy jaduhñ yhooc tehñ ñajuø'owät coø hajxy tøyhajt yhaxøøgwädity.

¹⁴ Jaduhñä jäya'ayhajxy näje'e miäna'añ:

Pøñ jaduhñ maab, ma'abiädø'og hajxy;

pøñ jaduhñ tøø yho'ogy, mjujypiøjtägätsäp hajxy.

Ja'a Jesucristo mijts xquiujajaamb xquiudøø'xaamb.

Jaduhñ miädia'agytiägø'ø, pønä Diosmädia'agy ca'a mæbøjp, ween hajxy miæbøcy. Jaduhñä Jesucristo hajxy xyajwiinjuø'øwät coo je'eyyâ jaduhñ tu'uquïä ja'a mbojpä mgädieey hajxy xyajnähwáatsät.

¹⁵ Jaduhñds je'e, nägüentä hajxy mwädítät. Cab hajxy mnibiäda'agøøjät nebiä jäya'ayä Diosmädia'agy hajxy ca'a wiinjuøbiän. Paady hajxy hoy mwädítät coo ja'a Diosmädia'agy hajxy mwiinjuø'ø.

¹⁶ Naxy hajxy hoy mdehm wiädítät. Hix, jiaanch tehñ miäwädiipiä jäya'ayä haxøøgwiinmahñdy hajxy jäda'ahaty.

¹⁷ Hoorä, cab hajxy mnibiäda'agøøjät nebiä jäya'ayhajxy ca'a jajpän. Naxiä Dios ja'a miädia'agy hajxy mdehm wyiinjuøøyyät mdehm wyiinnmädoówät nebiatiä jioot chocy coo hajxy mgudiúunät.

¹⁸ Cab jaduhñ yhooyä coo hajxy mmu'ugøøjät; yajtägoobiä jocnøø jaduhñ. Pero weenä Dioshespíritu hajxy xjiaac puhbéjtäm coo ja'a miädia'agy hajxy jaduhñ njaac cudiúunäm.

¹⁹ Coo ja'a Dioshespíritu hajxy xpiuhbéjtäm, jaduhñ hajxy nnijioot-capxmøpcøjcäm ja'a Dioshøyaam. Jaduhñä Dios hajxy hamuumdu'joot mwiinhøw mwiinyá'axät.

²⁰ Hoy miäduhñajtä Dios hajxy mnämä'awät: "Dioscujú'uyäp", ja'a Jesucristocøxpä, ja'a hajxy nWiindsøn'hájtämbä. Paadiä Dios hajxy jaduhñ mnämä'awät: "Dioscujú'uyäp", coo ja'a hoyhajtä weenhajt hajxy je'e xmióoyyäm. Hix, je'e hajxy nDeedyháltäm.

²¹ Hoorä, coo ja'a mmähermano waamb xyhané'emät, hamuumdu'jootä miädia'agy mgudiúunät, je'eguiøxpä coo ja'a Jesucristo hajxy hoy nwiin-gudsähgøøyyäm.

²² Mijts to'oxiøjc-hajxy, mgudiúunäbä mnihyhapä miädia'agy hajxy. Jaduhñä Jesucristo hajxy xyhane'emy, ja'a hajxy nWiindsøn'hájtämbä.

²³ Coo ja'a mnihyhaphajxy quiopc-haty maa mijtsän, jaduhñ mäwiin miäbaady coo ja'a Jesucristo hajxy nWiindsøn'hájtäm coo ja'a miädia'agy hajxy hoy nmæbøjcäm. Jaaya'ay hajxy xyajnähwáatsäm.

²⁴ Coo ja'a Jesucristo miädia'agy hajxy ngudiúunäm, jaduhñ mijtsä mnihyhapä miädia'agy mgudiúunäbät, waambaty hajxy jaduhñ xyhane'emy.

²⁵ Hoorä, mijts ya'adiøjc-hajxy, mdsógäp mmée'xäbä mdo'oxiøjc hajxy nebiä Jesucristo hajxy xchøjcäm. Hix, tøø hajxy xñähho'túutäm.

²⁶ Paady hajxy tøø xñähho'túutäm, jaduhñ hajxy tøø xyajnähwáatsäm ja'a nbojpä ngädieeyháltäm. Paady hajxy jaduhñ tøø xyajnähwáatsäm coo ja'a miädia'agy hajxy tøø nmæbøjcäm. Y coo hajxy nnäbéjtäm, jaduhñ hajxy nmánaanäm coo ja'a nbojpä ngädieey hajxy tøø xñähwáatsäm.

²⁷ Paadiä Jesucristo hajxy tøø xñähho'túutäm, jaduhñ hajxy hoy yajxon xyhíxämät nebiä pujoy nebiä je'eçhpän coo hänajty yaa quiädaactägatsa'añ. Hix, tøø ja'a nbojpä ngädieey hajxy hänajty xyajnähwáatsäm.

²⁸ Jaduhñds je'e, mijts ya'adiøjc-hajxy, mdsógäp mmée'xäbä mdo'oxiøjc hajxy nebiä mhamdsoo ni'x nebiä mhamdsoo copc hajxy mjuø'øyän. Pønä tio'oxiøjc tsojp mee'xp, jaduhñ miäbaady nebiä yhamdsoo ni'x nebiä yhamdsoo copc choquiän. Hix, tu'ugni'x tu'ugcøpc hajxy jiaty coo to'oxiøjc hajxy wyiingpøcy.

²⁹ Hix, cap pønä yhamdsoo ni'x yhamdsoo copc xiøøghaty. Pero ngüendäháltämä nni'x ja'a ngopc-háltäm hajxy; jaduhñ mäwlinäts miäbaady nebiä Jesucristo hajxy xcwieendäháltäm.

³⁰ Hix, tu'ugjoot tu'ugwiinmahñdiä Jesucristo hajxy xmiøødháltäm coo hajxy nWiindsøn'hájtäm.

³¹ Jaduhnä Diosmädia'agy miäna'añ: “Jaduhnds je'e, coo ja'a ya'adiøjc to'oxiøjc piaady, mänitā tiaj tieedy piuhyohdiuutnä. Jaduhn mäwínädsä ya'adiøjc-hajxy jiaty mөөдä tio'oxiøjc nebiä tu'ugni'x nebiä tu'ugcopcän.”

³² Jaančh tehñ yajxón hädaa mädia'agy jaduhn. Cabä Dios hajxy hijty xchoj yajwiinjuøyyäm. Jaduhnčh nwiinjuø'y, coo ja'a ya'adiøjcä tio'oxiøjc miøødhity tu'ugmädia'agy, coo jaduhn miøødhity tu'ugni'x tu'ugcopc, jaduhn mäwínäts miäbaady coo ja'a Jesucristo hajxy xmiøødhíjtämbä tu'ugmädia'agy coo ja'a miädia'agy hajxy nmäbøjcäm.

³³ Jaduhnds je'e, jaduhnä mdo'oxiøjc hajxy mdsoc mmée'xät nebiä mhamd-soo ni'x nebiä mhamdsoo copc hajxy mdsoquiän. Y mijts to'oxiøjc-hajxy, jaanä jaduhnä mnihyhap hajxy mwiingudsähgøøbiät.

6

¹ Mijts pigäna'tøjc-hajxy, mgudiúunäbä mdajjä mdeediä miädia'agy hajxy ja'a Jesucristocøxpä, ja'a hajxy nWiindsøn'hájtämbä. Hahixøøby jaduhn coo hajxy jaduhn mgudiúnät.

²⁻³ Jaduhnä Diosmädia'agy miäna'añ: “Pønjetiä tiaj tieedy wiingudsähgøøby, je'ečh hajxy hoy nyajtsäna'awaamby nyaghäyowaamby hädaa yaabä naaxwiin; je'ečh hajxy jejcy nyagjüghadaamby”, nömä Diosmädia'agy miäna'añ. Coo ja'a Dios hajxy jaduhn jecy xyhanéhäm, mänit jaduhn miänaandsohñ coo ja'a mayhajt hānajtj tiuna'añ ja'a højtscøxphájtäm.

⁴ Mijts taj teedyhajxy, cabä mnøøx cabä mmajc hajxy hanaxiä mhójt coo hajxy xmiāhanhádät. Jaduhnä mhuung hajxy mmägapx mhané'emät coo hajxy hoy wiädítät. Jaduhn hajxy quiumayøøjtät ja'a Jesucristäm, ja'a hajxy nWiindsøn'hájtämbä.

⁵ Näje'e mijtsä jäya'ayhajxy xjie'ehaty nebiä waj nebiä cuaayän. Mgudiúunäbä mwiindsønä miädia'agy hajxy hamuumdu'joot, ja'a hajxy hädaa yaabä naaxwiimbä. Mwiingudsähgø'øwäp hajxy jaduhn nebiä Jesucristo hajxy nwiingudsähgøøyyäm.

⁶⁻⁷ Hoyyä jäya'ayhajxy tiuñ coo ja'a wyiindsøn hajxy hānajtj wyiindäna'ayii neby hajxy jaduhn quiumayøøjtät ja'a wyiindsønäm. Pero näje'e jäya'ayhajxy hoy quia'a tuñ coo ja'a wyiindsøn'hajxy hānajtj quia'a jimä. Mijts, cab hajxy jaduhn mbahíxät. Hamuumdu'jootä mwiindsøn hajxy mmädúnät. Jaduhn hajxy hoy myajcāhxø'øgät coo ja'a Jesucristo hajxy hoy mjaančh mäduñ. Jaaya'ay hajxy nmaas Wiindsøn'hájtäm. Jaduhnä Dios chojpä. Ja'a Jesucristocøxpä hajxy jaduhn mdúnät. Ca'a jiäya'aguixpähajtiä hajxy mdúnät.

⁸ Mjahmiédsäp hajxy jaduhn, coo ja'a nwiindsøn hajxy hoy nmädúunämät, hoy hajxy xjia je'ehájtäm nebiä waj nebiä cuaayän, mänitā Jesucristo ja'a hoyhajtä weenhajt hajxy xmióoyämät.

⁹ Jaduhn mijtspä, cumoonsädøjc, mnäxúudsäbä mmoonsä hajxy jaduhn. Cab hajxy mhadsähgø'øwät. Haa ca'a, jaduhn mijtsä Dios hajxy xyhanehmbä nebiä mmoonsä hajxy xyhanéhmbän ja'a Diósäm, ja'a jim tsajpootypä. Haa ca'a, cabä Dios hajxy wiing xyhíxäm. Haa ca'a, tu'ugjäya'ayhájjtäm hajxy nägøxiä.

¹⁰⁻¹¹ Hoorä, mänuu'xta'agä Dios hajxy coo hajxy ween xpiuhbety ja'a miäjaahaam; jaduhnä miädia'agy hajxy maas hoy mjaac mäbøjcät. Hix, jaančh tehñ miäwiinhøhmbä møjcu'ugong. Pero jiaančh tehñ mөөдä Dios mājaa. Y coo hajxy jaduhn xpiuhbédät, cabä møjcu'ugong hajxy jaduhn myajmäjädá'agät.

¹² Hix, ja'a møjcu'ugong hajxy yaa xmiädsibøøyyäm mөөдä mioonsä hajxy, ca'a jiäya'ayhajxiä ja'a hädaa yaabä naaxwiimbä. Haxøøgä møjcu'uhajxy

jiäya'ayhaty. Pojhaam hajxy wiädity. Cabä ni'x copc hajxy tiehm miøødä neby højtshájtäm. Møcä mäjaa hajxy jiaančh tehñ miøødä. Ja'a hädaa yaabä naaxwiimbä haxøøgjäya'ayhajxy hanéhmäbä møjcu'ugóngäm. Hoy chajtcøxpä ja'a møjcu'uhajxy wiädity.

¹³ Paadiä Dios hajxy mmänuu'xtá'agät coo hajxy ween xpiuhbety ja'a miäjaahaam. Jaduhñä møjcu'ugong hajxy hoy mjøjtänä'awät. Jaduhñ hajxy mga'a yajmäjädá'agät.

¹⁴ Jøjtäna'awxä ja'a møjcu'ugong hajxy. Naxy hajxy hoy miänaaxøøjä mdehm tiømiädiá'agät. Jaduhñ hajxy hoy mmee'xtúgät. Jaduhñ mäwíinäts miäbaady nebiä soldadohajxy mœc ñiwiøhñta'ačhiijän coo hajxy hñajty chip-tuna'añ. Naxy hajxy hoy yajxón mdehm wiädität. Jaduhñä Dios hajxy xñäwá'anät. Jaduhñ mäwíinäts miäbaady nebiä soldado latapujxt hajxy yajniguiaačhjübø'øyijän. Jaduhñ hajxy hoy miäjäda'aga'añ.

¹⁵ Niyhahixø'øwøø hajxy nebiä Diosmädia'agy hajxy jaduhñ hoy mmäwädität. Coö jäya'ayä Diosmädia'agy hajxy miäbøgät, jaduhñ hajxy jootcuyc yhidät. Jaduhñ mäwíinäts miäbaady nebiä soldadohajxy ñiyhahixø'øyijän coö ja'a quiø'øg hajxy piägø'øy.

¹⁶ Naxiä Dios ja'a miädia'agy hajxy mdehm miäbøjcät coö ja'a Jesucristo hajxy tøø xyajnähwáatsäm. Jaduhñä møjcu'ugong hajxy mga'a yajmäjädá'agät. Jaduhñ mäwíinäts miäbaady nebiä soldado escudo hajxy yajniyhawähajtugyijän neby hajxy jaduhñ quia'a tøpxøøjät ja'a tøpxquepty tóoyyáp queecpä.

¹⁷ Naxiä Diosmädia'agy hajxy mdehm miäbøgät coö ja'a Jesucristo hajxy tøø xñähho'túutäm. Jaduhñ mäwíinäts miäbaady nebiä soldado pujxcuhjup hajxy miøødän. Naxiä Diosmädia'agy hajxy mdehm yhabøgät nebiä Dioshespíritu hajxy xyajnähxøøyyäm. Jaduhñ mäwíinäts miäbaady nebiä soldadohajxy espadacap chiptuñän.

¹⁸ Coö ja'a Dios hajxy mba'yá'axät, mmäyujwá'anäp hajxy tijaty hajxy hñajty myajmaajiajpy. Mmäyajtøwäbä Dios hajxy ja'a yhEspírituhaam tijaty hajxy mmäyujwá'anäp. Mmänuu'xtá'agäbä Dios hajxy ja'a jäya'aguiøxpä, ja'a Diosmädia'agy hajxy panøcxpä. Cab hajxy mnänuuxø'øwät coö ja'a Dios hajxy hñajty mba'ya'axa'añ.

¹⁹⁻²⁰ Møød høøchcøxpøchä Dios hajxy xpia'yáaxäbät coöchä Dios xñajtscapxøøyyät waambátyhøch ngapx nmädiá'agät coöchä miädia'agy hñajty nyajwa'xä, ja'a hijty yaghijpiä cuyu'uch. Ja'a Diøshøch jaduhñ xwyiinguejx coöchä miädia'agy jaduhñ nyajwá'xät. Páadyhøch chaa ndsumyčhänä'ay ja'a Diosmädia'agyquiøxpä. Jaduhñhøchä Dios hajxy xpia'yáaxäbät coöch nga'a tsähgø'øwät coöchä miädia'agy hñajty nyajwa'xä, nébiøch jaduhñ hoy ngudiúnät.

²¹⁻²² Nguexáambiøchä hermano Tíquico jim maa mijtsän. Coö jim miédsät, jim hajxy jaduhñ xyhawáanät nebiaty højts chaa ngudiuñ nguñaxy, coö højts hoy ween nhity, neby hajxy jaduhñ mga'a jootmayhájnät ja'a højtscøxpä. Hóyhøchä hermano Tíquico nmøødnijootpaadyii. Hóyhøch jaduhñ xmiøødtuñ ja'a Jesucristocøxpä.

²³ Ween mijtsä Diosteedy hajxy xmio'oy ja'a hoyhajtä weenhajt møødä Jesucristo, ja'a hajxy nWiindsønhájtämbä. Weenä Dios hajxy xpiuhbety nebiä miädia'agy hajxy maas hoy mjaac mäbøjcät, neby hajxy jaduhñ maas hoy mničhoc mnimiee'xøøjät.

²⁴ Weenä Dios ja'a mayhajt tiuñ ja'a højtscøxphájtäm nägøxiä coö ja'a Jesucristo hajxy nwiingudsähgøøyyäm hamuumdu'joot, ja'a hajxy nWiindsønhájtämbä. Tøyhajt jaduhñ. Amén.

Filipenses

¹ Jesucristo højts xmioonsähajp, høøch Pablo mөөдä Timoteo. Højts mijts hädaa nocy nyajnäjaayөөby mäduhñtiä mijts ja'a Diosmädia'agy hajxy jim mbanөcxy maa ja'a cajpt xiөhatiän Filipos, nägөxiä mөөдä mwiindsөnhajpä jiiьy tsajtөгootypä, mөөд hajxy jiiьy puhbejpä.

² Weenä Dios hajxy xmio'oy hoyhajt weenhajt, ja'a nDeedyhajtäm hajxy jim tsajpootypä mөөдä Jesucristo hajxy nWiindsөnhajtämbä.

³ Naaghóoc-hөch mijts njahmiejtsta'agy, nnämäabiөch ja'a Dios "Dioscujú'uyäp" maa ja'a mijtscөxpän.

⁴ Naaghóoc-hөch ja'a Dios nba'ya'axy, nmäyujwáambiөch hoyhajt weenhajt ja'a mijtscөxpä. Coochä Dios hänäjty nba'ya'axy ja'a mijtscөxpä, jootcújc-hөch hänäjty nnijiäwө'öyüi,

⁵ Je'eguiөxpä coo ja'a Diosmädia'agy hajxy näguipxy төө nyajwá'xäm, mänaa hajxy төө mmädoodsooñän høxtä je'enä jäda'anäbaadyñä.

⁶ Ja'a Dios ja'a hodiуung yajtsohndaac ja'a mijtscөxpä. Nmөөdhөchä төyhajt jaduhñ coo ja'a Dios ja'a tiуung hoy yajtu'uyo'oya'añ høxtä coonä Jesucristo hänäjty quiädaactägatsa'añ.

⁷ Páadyhөchä төyhajt nmөөдä cooch mijts njaanч tehñ chocy njaanч tehñ pia'häyoy, coo ja'a Dios hajxy xpiuhbéjtäm näguipxy, homiäajөch nhity, hoy piujxtөгootiä, hoy yhagujcä, cooch hänäjty nmädia'agy coo ja'a Diosmädia'agy tiөyyä.

⁸ Ñajuөөbiä Dios cooch mijts njaanч tehñ chocy njaanч tehñ pia'häyoy nägөxiä, nebiä Jesucristo hajxy xchójcäm.

⁹ Nmänuu'xtäacypiөchä Dios coo hajxy hamuumdu'joot mjaac niчhoc mjaac nibia'häyowөjät, coo hajxy hoy mguhwiyyhädät,

¹⁰ neby hajxy jaduhñ mnajuө'өwät mwiimbíwät ja'a hojiatypä hajxy. Jaduhñ hajxy mhídät hawa'adstuum nebiä Dios hajxy xyajmädsójcäm, høxtä coonä Jesucristo hänäjty quiädaactägatsa'añ.

¹¹ Xpiuhbédäp ja'a Jesucristo hajxy neby hajxy jaduhñ hoy mwädítät. Jaduhñdsä Dios hoy quiähxө'өгät coo miөjjä coo jiaanчhä.

¹² Hermanodөjc, huuc wiinjuө'өw hajxy jaduhñ; cooch yaa ndsumychäna'ay, maas hóyhөchä Diosmädia'agy jaduhñ yaa nyajwa'xy.

¹³ Nägөxiä cu'ughajxy төө miädoxyaty coochä Jesucristo miädia'agy ngudsumychäna'awөөyyä, nägөxiä, mөөдä soldadohajxy jim hadänaabiä maa ja'a gobernador tiөjcän.

¹⁴ Ja'a Jesucristo miädiä'agyhөch ngudsumychäna'awөөby. Cáбөch ndajy nmay. Cooch nga'a tajy nga'a may, paadiä hermanodөjc-hajxy nämay quia'a nä'ägädä taj quia'a nä'ägädä maabiä coo ja'a Diosmädia'agy hajxy yajwa'xy, hoy hajxy cu jia tsúumäbä. Cab hajxy ñä'ägädä tsähgө'өy ni weeñtiä. Hix, høøch hajxy jaduhñ xpiahijxp.

¹⁵⁻¹⁷ Paadiä Diosmädia'agy hajxy yajwa'xy cooch hajxy xchocy xpia'häyoy. Hojiot hajxy jiaanч tehñ miөөд. Ñajuөөby hajxy jaduhñ coochä Diosmädia'agy ngudsumychäna'awө'өy. Pero jii hajxy näje'ebä, paadiä Diosmädia'agy hajxy yajwa'xy, cooch hajxy xmiädsiphaty. Төyhajt jaduhñ. Je'eч hajxy xyajmädsөjp cooch yaa ndsaachpөгät pujxtөгooty. Cabä hojiot hajxy ñä'ägädä mөөдä ja'a høøchcөxpä.

¹⁸ Pero cáбөch jaduhñ nmөjpäda'agy, hóyhөch hajxy jaduhñ xjia mädsiphaty.

Xoonḁáacpøch jaduhñ coo ja'a Jesucristo hajxy miädia'agy, hoy hojioot hajxy quia'a ja møødä ja'a høøchcøxpä.

¹⁹ Y jaac xoonḁa'agáambøch jaduhñ. Nnajuøøbiøch cooñ hodium nmähmø'øwa'añ. Hix, mijts ja'a Dios hoyhajt weenhajt mmäyujwaamby ja'a høøchcøxpä. Y xpiuhbéjpøchä Dioshespíritu ja'a Jesucristocøxpä.

²⁰ Cábøchä njoot ñä'ägädä tsocy cooñ ndsähgø'øwät mänáajøchä Jesucristo hánajty nmädia'aguiän. Cábøch mänaa ndsähgø'øy ndsähdiuñ. Chójpíøch njoot jaduhñ cooñä Jesucristo nyajcähxø'øgät coo miøjjä coo jiaančhä, hóyhøch njadehm quiuho'ogø'øwät.

²¹ Madúhñtiøch yaa njaac jugyhaty, nyajcähxø'øgäbøchä Jesucristo coo miøjjä coo jiaančhä. Y cooñ nhó'nät, maas hoy hánajty quiähxø'øgaanñä coo miøjjä coo jiaančhä. Mänitøch jim nnøcxaanñä maa je'e wyiinduumän.

²²⁻²³ Mejtstú'ujøchä njoot nyajmøødmädia'agy. Cooñ nhó'ogät, mänitøch cu nnøcxnä maa ja'a Jesucristän. Maas jootcújc-høch jim nnijiäwøøyyänät. Pero cooñ yaa njaac jugyhádät, maas hóyhøchä Jesucristo jaduhñ njaac mädúnät. Cábøch ndehm yhoñajuø'øy pø maas hoy cooñ nhó'nät, o pø caj.

²⁴ Høøch jaduhñ mänaamb cooñ hit nga'a tsoj hó'ogät; jadúhñhøch mijts ja'a Diosmädia'agy tehngajnä njaac yajnähixø'øwät.

²⁵ Nmøødhøchä tøyhajt jaduhñ cooñ mijts njaac møødhida'añ. Njaac yajnähixø'øwáambiøch mijts tehngajnä, neby hajxy jaduhñ maas hoy mmäbøgät, neby hajxy jaduhñ mjaac xoonḁaacpøgät.

²⁶ Cooñä Jesucristo jim xyajnøcxtägätsät maa mijtsän, mänit hajxy mmäna'ana'añ coo tiøyyä coo Jesucristo miøjjä jiaančhä.

²⁷ Naxiä Jesucristo miädia'agy hajxy mdehm yajtúunät. Jaduhñä Diosmädia'agy hajxy näguipxy myajwá'xät tehngajnä, hóyhøch jim nga'a ja nøcxät maa mijtsän.

²⁸ Cabä mmädsip hajxy mnä'ägädä tsähgø'øwät. Jaduhñ hajxy ñajuø'øwa'añ coo hajxy haxøøgtuum yajca'awa'añijäm ja'a Diósäm, møød coo mijts ja'a Dios xpiäda'aga'añ hodium.

²⁹⁻³⁰ Tiuumbiä Dios ja'a mayhajt coo hajxy xyajnähdiy coo ja'a miädia'agy hajxy mmäbøjcät ja'a Jesucristocøxpä, nébiøch cham ndsaačhpøquiän. Tøøch hajxy hamdsoo xyhixy xmiädoy cooñ yaa ndsaačhpøcy ja'a Jesucristocøxpä.

2

¹ Coo mijts ja'a Jesucristo xchocy, paady hajxy xjiootcapxmøcpøcy. Coo mijts ja'a Dioshespíritu tu'ugmädia'agy mmøødhity, paady hajxy hamiñ haxøpy mničhocy mnibia'häyoyii.

² Jadúhñhøch njoot jiaančh tehñ chocy coo hajxy tu'ugmädia'agy mhídät. Coo hajxy mničhoc mnibia'häyowøøjät, maas hóyhøch nnijiäwø'øwøøjät.

³ Ca'a mhamdsoo wiinmahñdy hajxy mwi'i yajtuñ. Ca'a hajxy mniguiumayii. Jaduhñ hajxy mmäná'anät coo ja'a mmägu'ughajpä miaas jaty quejee miich.

⁴ Hamiñ haxøpy hajxy mnigwieendähadøøjät.

⁵ Mbahíäp ja'a Jesucristo hajxy neby je'e jecy wiädijtiän.

⁶ Hoyyä Jesucristo jia Dioshuungä, caj jiootma'ty coo ñämaayyä coo yaa jiäya'ayhádät hädaa yaabä naaxwiin.

⁷ Coo yaa jiäya'ayhajty, yhøxhix yhamdsoo cuhdujt jaduhñän. Jaduhñ ñibiädaacánä nebiä moonsän. Cab hánajty hamdsooyyä miøjhada'añ.

⁸ Mänitä Dios miädia'agy quiudiuunä coo yhó'ogät. Höchähdiuunñä jim cruzcøxp miøjpahbejtä.

⁹ Coo ja'a Jesucristo quiudiuuñ ney ñämaayyän, paadiä yajmøjhajtä ja'a Diósäm. Ni pøn jaduhñ quia'a mäbaady nebiä Jesucristän.

¹⁰ Weenä Jesucristo hajxy nägøxiä wyiingudsähgø'ø, jim tsajpootyp, mөөд hädaa yaabä naaxwiin, homiaajä.

¹¹ Weenä Jesucristo hajxy nägøxiä quiapxpaady coo hajxy wyiindsønhaty. Jaduhñä Dios jim quiähxø'ögät möj jaanč, ja'a nDeedyhajtäm.

¹² Mägu'ughajpädøjc, mänáajøch jim nhitiän maa miytshajxiän, xmiäbøjcäbøchä nmädia'agy hajxy hñajty. Hoorä, cooçh yaa jäguem nhijnä, miaas tsøjpiøch njoot cooçh nmädia'agy hajxy tehngajnä xmiäbøjcät. Naxiä Diosmädia'agy hajxy mdehm miäbøgät, neby hajxy jaduhñ hodium mmähmø'owät. Naxiä Dios hajxy mdehm wyiingudsähgø'owät. Cab hajxy nä'ä nägoodä mnä'ä niguumayøjät.

¹³ Jaduhñä Dios jioot chocy coo hajxy hoy mwädítät. Xpiuhbédäp ja'a Dios hajxy jaduhñ.

¹⁴ Hoy hajxy mwädítät. Cab hajxy tii mwi'i chippädá'agät. Cab hajxy tijaty myajniuguuhojø'owøjät.

¹⁵⁻¹⁶ Jaduhñ hajxy hoy mwädítät nebiä Dioshuungän maa ja'a ca'awiindøyhäna'c-hagujcän. Coo ja'a Diosmädia'agy hajxy myajnähixø'owät, jaduhñ hajxy mwädítät nebiä jøøn yhajajjiän hagoonstuum; coo jäya'ayhajxy jaduhñ miäbøgät, mänit hajxy hodium piäda'agøjät. Coo hajxy mgudiünät neby hajxy chaa nnäma'ayän, mänitøch nxoondá'agät, mänaa ja'a Jesucristo hñajty jadähooc quiädaactägatsa'añän. Cähxø'øgaamb jaduhñ cooçh hñajty hoy tøø nduñ maa miytscøxpän.

¹⁷ Coo Diosmädia'agy hajxy hamuumdu'joot mmäbøcy, páadyhøch nxoonda'agy, hóyhøch cu nja ho'og. Chójpøch njoot coo hajxy nmøødxoondá'agät.

¹⁸ Tsøgxä hajxy jaduhñ xoondáacäm.

¹⁹ Coo ja'a Jesucristo ja'a nWiindsønajtäm jaduhñ miäná'anät, mobädájpøch mijts ja'a Timoteo nyajnäguexa'añ. Cooçhä Timoteo min jadähooc xyhawaanä coo mijts hoy mhity, hóyhøch hñajty nnijiäwø'owa'añii.

²⁰ Páadyhøchä Timoteo jim nguexa'añ cooçh je'e nidiuhm xmiøødhity tu'ugmädia'agy maa miytscøxpän. Xpiuhbedaamb mijts jaduhñ hamuumdu'joot.

²¹ Ja'a häna'c-hajxy jaac yaabä, yhamdsoo tuung hajxy tiuumby. Cabä Jesucristo tiuung hajxy hamuumdu'joot tiunaanä.

²² Mnajuøøby hajxy jaduhñ cooçhä Timoteo hoy xmiøøduñ maa ja'a Diosmädia'agy myiñän, nébiøch nhamdsoo huungän.

²³ Mänitøchä Timoteo nguexät cooçh hñajty tøø nnajuø'ø pø pädsømäambøch.

²⁴ Coo ja'a Dios jaduhñ miäná'anät, mobädájpøch jim nnøcxa'añ maa mi-jtsän.

²⁵ Tøøch mijts ja'a hermano Epafrodito hijty xyajnäguexy cooçh jaduhñ xpiuhbédät. Hóyhøch jaduhñ xjiaanč møøduñ cooçhä Diosmädia'agy nya-jwa'xy. Hahixøøby cooçh mijts nyajnäguexjtägätsät,

²⁶ je'eguiøxpä coo mijts xjia wi'i quiuhijxtägatsa'añ. Jaanč tehñ tiajp jaanč tehñ miäabiäc je'eduhñ coo mijts tøø mmädoyhaty coo hijty piøgyii.

²⁷ Tøyhajt hijty piøgyii. Ja weenjaty jaduhñ quia'a ho'cy. Miøødhajt ja'a Dios hojiot ja'a Epafroditocøxpä møødhøøhcøxpä. Coo häxøpy tøø yho'ogy, maas hanáxiøch häxøpy njootmayhaty.

²⁸ Páadyhøch mijts ja'a Epafrodito nyajnäguejxtägatsa'añ, neby hajxy jaduhñ mxoondá'agät coo mijts jadähooc xñämejtstägatsa'añ. Coö hajxy jaduhñ mxoondá'agät, mänítøch jaduhñ hoy nnijiäwøøyyäbät.

²⁹ Coö jim miédsät maa mijtsän, xi'ig xon hajxy myajpóo'xät nebiä hermanän. Homianaajä hajxy mwiingudsähgø'øwät pønjetiä Diosmädia'agy pawädiyp nebiä Epafrodito piawädiän.

³⁰ Paady je'e ja weenjaty quia'a ho'cy coöch jaduhñ xmiøødtuñ maa ja'a Diosmädia'agy myiñän. Pero cabä miøjpäda'agy coö ja weenjaty tøø quia'a ho'ogy. Coöch yaa xpiuhbety, mijts yaa xñähduunduutp. Hix, cábøch mijts hoy yaa xpiuhbeda'añ; jäguem mijts jaduhñ xpiaatä.

3

¹ Hermanodøjc, tsøg hajxy xoondáacäm ja'a Dioscøxpä. Chaa hajxy jadähooc nhawaandägätsänäm neby hajxy tøø nhuuc nämaabiän. Coö hädaa mädia'agy hajxy jaduhñ myajtúnät, cab hajxy myajwiinhøønät. Ni mänáajøch jaduhñ nga'a nänuuxø'øy, hoñaaaghoocä hajxy jaduhñ nhawáanamät.

² Mnigwieendähadøjöp hajxy maa häna'c-hajxy jaanç tehñ quia'awiindøybän, ja'a hajxy jaduhñ mänaambä coö hajxy tsipcøxp nyajcircuncidarhajtämät.

³ Tøyhajtä Dios hajxy xjiaanç circuncidarhajtäm coö hajxy nwiingudsähgøøyyäm. YhEspirituhaam hajxy nwiingudsähgøøyyäm. Jootcuyc hajxy jaduhñ nnijiäwøøyyäm ja'a Jesucristocøxpä. Cab hajxy nmänáanäm coö ja'a jecyquiuhdujt hajxy xyajnáhwáatsäm.

⁴ Høøch, jaduhñhøch hijty nmänaambä cooc tyijy ja'a jecyquiuhdujt hajxy xyajnáhwáatsäm. Pedyíijøch hijty ngudiuñ nej yhane'emiän. Cab jaduhñ pøn ñä'ägä cudiuñ nébiøch hijty ngudiuñän.

⁵ Judíoshøch høøch. Judíospøch hijty ndajhajpy ndeedyhajpy. Benjamínhøch hijty nhaphajpy ndeedyhajpy. Mänáajøch nmiñ nga'ayän, cuductujxøøjøch hoy nyajcircuncidarhaty, nebiä judíoshajxy quiuhdujthatiän. Ja'a fariseos miädiä'agyhøch hijty nbanøcxäp.

⁶ Nägø'ø nädécypjøch hijty ngudiuñ, høxtä ja'a hermanobáadyhøch hijty nyajtsaachpøcy. Jaanç tehñ piedyíijøchä ley hijty ngudiuñ; cábøch hijty pøn waamb xñäma'ay.

⁷ Jaanç tehñ ñiguiumáayäbøch hijty coöch hijty jaduhñ hoy ngudiuñ. Pero cábøch nniguiumayáanänä, je'eguiøxpä coöchä Jesucristo miädia'agy tøø nbadu'ubøjcänä.

⁸ Cøjxhøch nnajtshixøøñä mädyijátyhøch hijty nyajtuumby. Páadyhøch tøø nnajtshixøøñä, nébiøchä Jesucristo miädia'agy jaduhñ hoy nbanøcxät. Maas tsoobáatnäp hädaa coöchä Jesucristo tu'ugmädia'agy nmøødhijnä ja'a nWiindsønhaipiä.

⁹ Coöchä Jesucristo miädia'agy nmäbøjcä, páadyhøchä Dios tøø xya-jnáhwa'açh. Cábøch nmänaanä cóogøch tyijy ja'a jecyquiuhdujt xya-jnáhwa'adsät.

¹⁰ Chøjpiøch njoot coöchä Jesucristo tu'ugmädia'agy nmøødhijnät. Coö ja'a Jesucristo jadähooc jiujypiøjcy, paadiä majaa jaduhñ miooyyä coöch jaduhñ xpiuhbédät. Chogáambiøch njoot coöch ndsaachpøgät ja'a Jesucristocøxpä. Høxtä ho'ogáambøch jaduhñ neby je'e yho'quiän.

¹¹ Páadyhøch njoot jaduhñ chocy coö ja'a Dios jaduhñ ween miäna'añ coöch xyagjujypiøjtägätsät.

¹²⁻¹⁴ Hermanodøjc, cábøch jaduhñ nmäna'añ coöch tøø nyajpedyii. Cábøch njahmiejtsnä nébiøch hijty nwädity. Coöchä Jesucristo xmioonsähaty,

páadyhøch miädia'agy nyajcopcøøyyänä, nébiøch jaduhñ ca'xy ngudiúunänät. Nä'ägädä tsójpíøch njoot nãgø'ø nãdecypiä cooçh ca'xy ngudiúunät. Jadúhñhøçhã Dios jim xmiøjyá'axät tsajpootyp, je'eguiøxpä cooçhã Jesucristo tøø xyajñähwa'açh.

¹⁵ Tsøg hajxy tu'ugcopc hñjtäm nébiøch jaduhñ naamñä ngujaayän, pønjaty ca'xy cudiumb. Pønjaty xquia'a møødhñjtäm tu'ugcopc, weenä tøyhajt hajxy mio'oyíjäm ja'a Diósäm.

¹⁶ Tsøg hajxy tehngajnä yajtu'uyóhyäyäm nebiä Dios hajxy xyajñähixøøyyäm.

¹⁷ Hermanodøjc, xpiahíxäbøch hajxy jaduhñ nébiøch hoy nwäditiän. Xpi-ahíxpøch hajxy jaduhñ nämäy. Mbahíxäp hajxy je'eduhmbä.

¹⁸ Tøøçh mijts mayhooc nnäma'ay coo ja'a høhñdaacpähajxy may wiädity. Cábäc tyijy jaduhñ tiøyyä coo ja'a Jesucristo hajxy tøø xñähho'túutäm cruzcøxp. Chääjäs jadähooc nnämáaguumbä. Jaançh tehñ høñäjøøñä jaduhñ.

¹⁹ Haxøøgtuum hajxy yhida'añ cøjxta'axiøø. Hix, cabä Dios hajxy wyiingudsähgø'øy. Yhamdsoo cuhdujt hajxy yajtuumby. Tijaty maas høçhähdiuunñä, je'e hajxy ñä'ägä cumaaby. Je'e hajxy jaduhñ wyi'i chojpy coo hoyhajt weenhajt hajxy cu piaaty hädaa yaabä naaxwiin.

²⁰ Pero højtshájtäm, jim højts njoot hamuumdu'joot nbädáacäm tsajpootyp. Ja'a Jesucristo, ja'a hajxy nWiindsøn'hájtämbä, je'e hajxy xyajñähwáatsäm. Je'e hajxy nhahíxäm coo jim choona'añ tsajpootyp, coo yaa miänaca'añ hädaa yaabä naaxwiin.

²¹ Mänitä nnaaxni'xhajxy xyhädiuundägatsáanänä. Jaduhñ hajxy yajxón ngähxø'øgáanäm nebiä Jesucristo yhamdsoo ni'x yhamdsoo copcän. Miøødä Jesucristo cuhdujt jim cøxp møød hädaa yaabä naaxwiin homiaajä. Paadiä nnaaxni'xhajxy xyhädiuundägatsáanäm coo cuhdujt jaduhñ miøødä.

4

¹ Hermanodøjc, njaançh tehñ chojpy njaançh tehñ pia'häyóobiøch mijts jaduhñ. Páadyhøch nja wi'i ñøcxa'añ maa mijtsän. Jaançh tehñ xioondáacpøch jaduhñ ja'a mijtsøxpä, je'eguiøxpä coo mijts ja'a Diosmädia'agy jaançh tehñ yhoy mgudiunñ, coo hajxy jim mnøcxa'añ tsajpootyp. Tehngajnä ja'a Dios hajxy mmøødhídät tu'ugmädia'agy.

² Evodia møødä Síntique, mijts nmänuu'xtaacypy coo hajxy mhídät tu'ugmädia'agy. Jaduhñä Diosmädia'agy hajxy hoy myajtuunmúgät.

³ Chaads miich mägu'ughajpä, høyhøch miich xjiaançh tehñ jiamiøødhaty, tunä mayhajt, mmägápxäp mhané'emäp ja'a Evodia møødä Síntique coo hajxy tu'ugmädia'agy yhíñät. Näguípxyhøçhã Diosmädia'agy hajxy hoy nmøødyajwa'xy, møødä Clemente møødä hermanodøjc-hajxy may. Jim hajxy nøcxy yhidaaannä tsajpootyp cøjxta'axiøø.

⁴ Tehngajnä hajxy homiänaajä mxoondá'agät ja'a Dioscøxpä.

⁵ Hoy hajxy mjaançh tehñ jiäya'ayhádät cu'ughagujc. Mäwiingoomb jaduhñ coo ja'a Jesucristo quiädaactägatsa'añ.

⁶ Cab hajxy tii mdaj mmáyät. Dios hajxy mmäyujwá'anäp coo hajxy xpiuhbédät. Mnämá'awäp ja'a Dios hajxy jaduhñ "Dioscujú'uyäp."

⁷ Mänitä Dios hajxy xmió'owät hoyhajt weenhajt. Jaduhñ hajxy tii mga'a taj mga'a máañät. Jagoo hajxy jaduhñ mjaac taj mjaac máyät ja'a Jesucristocøxpä. Ni pøn jaduhñ xquia'a puhbédät nebiä Dios hajxy xpiuhbetiän.

⁸ Hermanodøjc, chaaçhã nocyhädiún nyajmayaannä. Je'e hajxy myajcopcø'øwäp mädyiijaty jaduhñ tøyhajt, mädyiijaty jaduhñ howyiingudsähgøøñä, mädyiijaty jaduhñ hoy, mädyiijaty jaduhñ yajxón, mädyiijaty jaduhñ hoguiumaañä.

⁹ Tehngajnä hajxy hoy mgudiúnät neby hajxy tøø nyajnähixø'øyän. Jadúhnhøch hajxy xpiahíxät nébiøch hoy ngudiuñän. Jaduhñä Dios hajxy xmiøødhídät tu'ugmädia'agy. Jaduhñ hoyhajt weenhajt hajxy xmió'owät.

¹⁰ Xoondáacpøch je'eguiøxpä cooçh mijts jadähooc xpiuhbéjcumbä xädø'øñhaam. Páadyhøchä Dios jaduhñ nnäma'ay “Dioscuju'uyäp.” Jia tsojc ja'a mjoothajxy cooçh hajxy cu xpiuhbejty, pero cab hajxy xñä'ä näbaadøøyyä.

¹¹ Cábøch hñajty ndsippäda'agy, hóyhøch hñajty tii nja yajmaajiaty. Tøøch nhabøjnä nébiøch jootcujc nhíjnät, hóyhøch hñajty tijaty nja yajmaajiaty.

¹² Cábøch nmøjpädaacnä mädyiijátýhøch nyajmaajiajpy. Cábøch nøcxy nniguiumayii cooçhä Dios xpiuhbety.

¹³ Hotyíjøch njada'añ. Ja'a Jesucristøch homiänaajä xpiuhbejp.

¹⁴ Hoyøøyy cooçh mijts xpiuhbejty xädø'øñhaam.

¹⁵ Pero jadúhnhøch mijts naxy xñä'ägädä puhbetyhaty. Cooçh hñajty jim ndsoona'añ Macedonianaaxooty, mänitøchä xädø'øñ hajxy hoy xmiø'oy. Páadyhøch hajxy hoy xmiø'oy cooçhä Diosmädia'agy jim hoy njaançh tehñ yajwa'xy jim maa mijtsän jim Filiposcajptooty. Cábøch wiinghänä'c-hajxy hñajty tii xñä'ägädä mo'owa'añ.

¹⁶ Mänáajøch hñajty jim nhityñä maa ja'a cajpt xiøhatiän Tesalónica, coo hajxy mmädoyhajty cooçh hñajty nyajmaajiaty, metsc-hooc tågøøghøc-høch xädø'øñ hajxy jim xyajnäguejxy.

¹⁷ Cab hajxy mmäná'anät cóogøch tyijy xädø'øñ nwi'i quiuhbøcjuø'øy. Cooçh mijts xpiuhbety, paadiä Dios hajxy xmiø'owa'añ hoyhajt weenhajt. Høøch, páadyhøch nxoonäda'agy.

¹⁸ Cábøch tii nyajmaajiajnä. Nä'ä tågø'øbøch mijts xyajnäguejxy, ja'a Epafrodito miäméjtsäbä. Xjiaançh tehñ quiumaabiä Dios hajxy jaduhñ cooçh hajxy xjiaançh tehñ piuhbety.

¹⁹ Coø hajxy hñajty tii myajmaajiaty, xmió'owäp ja'a Dios hajxy ja'a Jesucristocøxpä. Jim cøxiä miøødä tsajpootyp.

²⁰ Tsøgä Dios hajxy nämáayyäm cøjxta'axiøø coø miøjjä coø jiaançhä; je'e hajxy nDeedyhájtäm. Amén.

²¹ Ja'a hermanodøjc-hajxy yaabä, højts mijts nyajpoo'xyp pønatiä Diosmädia'agy jim mabøjp Filipos.

²² Pønatiä Diosmädia'agy yaa mabøjp, je'eds mijts xyajpoo'xp, møød hajxy yaa tuumbä maa ja'a gobiernä tiøjcän.

²³ Weenä Jesucristo hajxy xmiø'oy hoyhajt weenhajt. Je'e hajxy nWiindsønhájtäm. Amén.

Colosenses

¹⁻² Høøch jaduhñ xøhajp Pablo. Jesucristøch xquiuguexyhajp. Ja'a Dios jaduhñ mänaañ cooçh jaduhñ xquiuguexyhádät. Højts hädaa nocý nhädiuumby mөөдä mägu'ughajpä Timoteo. Mijts jaduhñ nnocyñäjaayøøby, pønhatiä Diosmädia'agy jim mæbøjp maa ja'a cajpt xiøhatiän Colosas. Tu'ugmädia'agy mijtsä Jesucristo mmөөдhity. Weenä Dios ja'a hoyhajtä weenhajt hajxy xmio'oy. Hix, jaaya'ay hajxy jaduhñ nDeedyhájtäm.

³ Naaghooc højtsä Dios jaduhñ mba'ya'axy ja'a mijtsçxpä, nnämaaby højtsä Dios “Dioscujú'uyäp.” Haa ja'a Jesucristo, ja'a hajxy nWiindsønñájtämbä, ja'a Dioshuung je'e.

⁴ Tøø højts jaduhñ nmädoyhaty coo mijtsä Jesucristo miädia'agy mmæbøjcä, mөөд coo mijtsä mæbøjpädøjc nägøxiä mdsocy, ja'a Diosmädia'agy hajxy mæbøjpä.

⁵ Tøø ja'a mjoot hajxy jim mbäda'agy tsajpootyp coo hajxy jim nøcxy mhida'añ cøjxta'axiøø. Mänitä mjoot hajxy jim mdehm piädaacy mänaa ja'a Diosmädia'agy hajxy mmädoodsooñän, ja'a jaançh tehñ tiøyhajtpä.

⁶ Wiinduhmyhagajptä Diosmädia'agy wia'xnä. Jaduhñä jäya'ayhajxy wiinduhmyhagajpt miäbøjnäbä. Jaduhñ mijts tøø mmæbøjpä coo ja'a Dios hajxy tøyhajt xchójcäm.

⁷ Højts nmägu'ughajpä Epafras, jaaya'ayä Diosmädia'agy hoy yajwa'xtsooñ maa mijtsän. Jaanä Jesucristo quiuguexy je'ebä. Hoy højts jaduhñ xmiøødtuñ.

⁸ Je'e højts hoy xyhawaanä cooc mijtsä mæbøjpädøjc mjaançh tehñ chocy mjaançh tehñ pia'häyoy ja'a Dioshespírituçxpä.

⁹ Jajty højts jaduhñ nmädoyhajty cooc hajxy hoy mjaançh tehñ miäbøcy, jabom-jabom højtsä Dios nba'ya'axy ja'a mijtsçxpä, ween hajxy jaduhñ mnajuø'øy tií ja'a Dios hajxy xyajmädsojp, mөөд weenä Dios ja'a miädia'agy hajxy cøxiä xyajwiinjuø'øy.

¹⁰ Jaduhñ højtsä Dios nba'yaaxpä coo hajxy hoy mwädítät. Jaduhñä Jesucristo hajxy xquiumáyät. Jaduhñä hoybä hajxy madiu'u mgudiúnät. Maas hoyyä Dios hajxy jaduhñ mmөөдhídät tu'ugmädia'agy, mөөд jaduhñ hajxy xquiumáabiät.

¹¹ Jaduhñ højtsä Dios nba'yaaxpä coo ja'a Dios hajxy ween xpiuhbety ja'a miäjaagøxpä ja'a jim miøødpä tsajpootyp. Jaduhñ hajxy hoy mmee'xtúgät, hoy hana'c hajxy nebiaty cu xjia tun. Tehngajnä hajxy jaduhñ mxoondá'agät, hoy hajxy nej cu mja jat cu mja habet.

¹² Tehngajnä ja'a nDeedyhájtäm hajxy jaduhñ mnämä'awät “Dioscujú'uyäp.” Hix, jaaya'ay hajxy hawa'adstuum xpiädáacäm mөөдä jäya'ayhajxy nägøxiä, ja'a miädia'agy hajxy mæbøjcäbä.

¹³ Tøø ja'a Dios hajxy xyajpædsøømäm hagoonstuum. Hodium hajxy hoy nmähmøøyyäm maa ja'a yHuung yhane'emiän. Jiaançh tehñ chojpiä Dios ja'a yHuung jaduhñ.

¹⁴ Jaayá'ayäts hajxy jaduhñ xñähho'túutäm; jaduhñä nbojpä ngädieey hajxy xyajnáhwáatsäm.

¹⁵ Haa ja'a Jesucristo, jíiyyäm hñajty je'e mänaa hädaa yaabä naaxwiin yhawijy tiøø'xta'aguiän. Tu'uquiä Jesucristo jaduhñ mөөдä Dios. Mänitä Jesucristo hoy yaa jiäya'ayhaty hädaa yaabä naaxwiin. Nhíxäm hajxy jaduhñ. Haa ja'a Dios, cab hajxy mänaa nhíxäm.

¹⁶ Cøxiä Jesucristo yhädiuñ jim tsajpootyp mөөд yaa hädaa yaabä naaxwiin, tijaty hajxy yaa nhíxäm, mөөд tijaty hajxy yaa nga'a híxäm,

møødä poj møødä täxa'a, ja'a jim mähanehmbä tsajtcøxp, møød pønjaty yaa mähanehmb hädaa yaabä naaxwiin, møød pønjaty jim jaac mähanehmb tsajpootyp. Paadiä Jesucristo jaduhñ cøxiä yhädiuun coo hñajty jaduhñ tøø yhane'emyii ja'a Tieedy. Madiu'u ja'a tuung jim tsajpootyp maa ja'a Jesucristo ja'a Diosmoonsä hoy piäda'aguiän. Hamdsoo ja'a Jesucristo jaduhñ cøxiä ñiyhädiuunäxä.

¹⁷ Jiyyäm hñajty je'e mänaa hädaa yaabä naaxwiin yhawijy tiøø'xta'aguiän. Je'enä yaghityñä tijaty yhädiuun.

¹⁸ Jaayá'ayäts jaduhñ copc-hajp maa ja'a Diosmädia'agy hajxy nmäbójcäm. Coo hajxy hoy xñähho'túutäm, coo jadähooc jiuypijøjtägajch, paady møj jaançh yhiñä. Hiç, jayøjp je'e jiuypijøjcy. Y coo jaduhñ jiuypijøjtsohñ, paady møjcuhtujt miøødän.

¹⁹ Nebiä Dios jim yhiñä tsajpootyp, jaanä jaduhñä Jesucristo jim yhiñäbä. Jaduhñä Dios ja'a yHuung Jesucristo yajmädsøjcy coo ja'a Jesucristo pedyii Dyioshädät nebiä Tieedy Dyioshatiän.

²⁰ Jaduhñä Dios ja'a jioot jia tsojpä coo hoy piønä miøødhädät, møød coo ja'a Dios hajxy jaduhñ nga'a mädsiphajtänät. Paadiä Dios ja'a yHuung yaa quiejxy coo hajxy jaduhñ xñähho'túutämät cruzcøxp.

²¹ Mijts, cabä Dios hajxy hijty mmøødhity tu'ugmädia'agy. Mmädsiphajpiä Dios hajxy hijty jaduhñ. Haxøøg hajxy hijty mwädity.

²² Coo ja'a Jesucristo hoy yaa jäya'ayhaty hädaa yaabä naaxwiin, coo hajxy hoy xñähho'túutäm, tu'ugmädia'agy hajxy jaduhñ xmiøødhíjtänä. Jaduhñä nbojpä ngädieey hajxy xyajñähwáatsäm. Jaduhñä Tieedy tøø yhawaanä coo hajxy tøø nnähwáatsäm.

²³ Hoyyä Jesucristo hajxy tøø xjia yajñähwáatsäm, pø cabä Diosmädia'agy hajxy hoy ngudiunáanäm, cabä Dios hajxy jaduhñ xquiumáayyämät. Paadiä Diosmädia'agy hajxy hamuumdu'joot mgudiúnät nebiä Epafras hajxy xyajñähixøøyyän. Cab hajxy mnajtshixø'øwät. Jaduhñ hajxy jim mnøcxät tsajpootyp. Wiinduhmyhagajptä Diosmädia'agy jäda'ahaty wia'xñä. Høøch jaduhñ nyajwa'xyp, høøch Pablo.

²⁴ Xoondáacpøch je'eguiøxp cooch jaduhñ ndsaaçhpøcy ja'a mijtsçøxpä pønjetiä Jesucristo miädia'agy mabójcäp. Jaduhñä Jesucristo hajxy maas hoy mmøødhídät tu'ugmädia'agy. Jaduhñch ndsaaçhpøjpä nebiä Jesucristo chaachpøjquiän.

²⁵ Jaayá'ayhøch jaduhñ xpiädaac coods mijtsä Diosmädia'agy ca'xiä ngøxy yajñähixø'øwät. Jaduhñch xpiädaacpä coochä jäya'ay nägøxiä nbuhbédät, ja'a miädia'agy hajxy jaduhñ mabójcäbä.

²⁶ Cabä Dios ja'a wyiinmahñdy choj yajwiingähxø'cy. Cujecy hajxy jaduhñ tøø xyajmädoyhajtäm pønjetiä miädia'agy mabójcäp.

²⁷ Jaduhñä Dios wyiinmahñdyhajty coo ja'a Jesucristo hajxy nägøxiä nmøødhíjtämät tu'ugmädia'agy møød mijts ca'a judióspä. Mänit hajxy nägøxiä jim mnøcxaannä tsajpootyp. Hoy-yagjuøøñä ja'a Dios jaduhñ wyiinmahñdyhajty.

²⁸ Hoy miaajä højts Jesucristocøxpä nwädity yajñähixøøbiä coo jäya'ayä yhaxøøgcuhtujt hajxy ñajtshixø'øwät, møød coo ja'a Jesucristo miädia'agy hajxy cøxiä ween yajtuungpaatä. Ja'a Dios højtsä wiinmahñdy xmiooby nebiaty højts nyajñähixø'øwät. Jaduhñ højtsä Jesucristo nhawaanä coo ja'a jäya'ayä Jesucristo miädia'agy hajxy hoy yajtúunänä. Cumayáanäp hajxy jaduhñ ja'a Jesucristo.

²⁹ Hamuumdu'jóothøch jaduhñ nduunghaty nägø'ø nädecypiä. Ja'a Jesucristøch xpiuhbejp. Je'eçhä mäjaa xmiooby pedyii.

2

¹ Jabom-jabomhøchä Dios mœc-mœc nmänuu'xta'agy ja'a mijtsœxpä mœødä mæbœjpädœjcœxpähajxy, ja'a hajxy jim tsänaabiä Laodicea, mœødä mæbœjpädœjc-hajxy nägœxiä pœnjátyhœch xquia'a hixyhajpnä.

² Ween mijtsä Dios xquiapxmœcpœcy. Jaduhnä Jesucristo hajxy maas hoy mmœødhídat. Ween hajxy hamiñ haxœpy mniçhocy mnibia'häyoyii. Mmœødhájnäbä tœyhajt hajxy jaduhn coo ja'a Jesucristo hajxy xmiœødhijnä tu'ugmädia'agy. Ween hajxy jaduhn tehngajnä mjaac habœcy.

³ Y coo ja'a Jesucristo hajxy tu'ugmädia'agy xmiœødhijnä, jaduhn hajxy mnajuœñä nebiatiä Dios wyiinmahñdyhaty, coo cœxiä wiinä jiaanç tehñ ñajuø'œy, coo cœxiä wiinä jiaanç tehñ jiaty.

⁴ Paady mijts jaduhn nhawáanäm, jaduhn hajxy mga'a yajwiinhœønät, hoy häna'c hajxy yajxón cu xjia mœødmädia'ag.

⁵ Hóyhœch jim nga'a ja hity maa mijtsän hajäya'ayhaam, njahmiejchp mijts jaduhn. Xoondáacpœch jaduhn coo ja'a Jesucristo miädia'agy hajxy hamuumdu'joot mmæbœjcä, mœød coo hajxy tu'ugmädia'agy mhity.

⁶ Tœø ja'a Jesucristo miädia'agy hajxy mmæbœjcä, ja'a hajxy nWiindsœnhájtämbä. Paady hajxy mmœødhíjnät tu'ugmädia'agy. Paadiä miädia'agy hajxy pedyii mgudiúunänät.

⁷ Ca'xy hajxy jaduhn mgudiúnät nebiä Epafras hajxy xyajnáhixœyyän. Mijts, mmæbœjcäbä Jesucristo miädia'agy hajxy. Tsipcœxpä Dios hajxy jabom-jabom mnämä'awät "Dioscujú'uyäp." Hix, coo ja'a Jesucristo hajxy tœø xyajnáhwa'aç, paady hajxy jaduhn mmæbœgät.

⁸ Mnigwieendähadœjöp hajxy. Cabä häna'cä miädia'agy hajxy mmæbœjcät, ja'a häna'cä Jesucristo hajxy ca'a capxpaatpä. Hœhndaacpä hajxy jaduhn wiädity. Cab tii tœyhajt hajxy ñä'ägädä yecy.

⁹ Nebiä Dios jim yhiitiän cœxp, jaanä jaduhnä Jesucristo jim yhiipä. Hix, pedyii ja'a Jesucristo Dyioshaty nebiä Tieedy Dyioshatiän.

¹⁰ Coo ja'a Jesucristo hajxy xmiœødhijnä tu'ugmädia'agy, jaduhnä Dios hajxy xmiœødhijpä. Haa ja'a Jesucristo, nägœxiä ja'a Diosmoonsähajxy jim yhanéhmänä tsajpootyp ja'a Jesucristo.

¹¹ Coo ja'a Jesucristo hajxy jaduhn xmiœødhíjtäm tu'ugjoot tu'ugwiinmahñdy, jaduhn hajxy xyhíxäm nejjiän coo hajxy häxœpy tœø nyajcircuncidarhájtäm, je'eguiœxp coo ja'a nhaxœøgwiinmahñdy hajxy tœø nhœxhíxäm. Jaduhnä jäya'ayhajxy näje'e jia wi'i miäna'añ coo hajxy nyajcircuncidarhájtämät, hœjts ya'adiœjc-hájtäm. Coo ja'a Jesucristo ja'a nbojpä ngädieey hajxy häxœpy tœø xquia'a yajnáhwáatsäm, cabä circuncisión häxœpy tiuunœpaady.

¹² Coo hajxy nnäbéjtäm, jaduhn hajxy ngähxœ'cäm coo ja'a nhaxœøgcuhdujt hajxy tœø nnajtshixœyyänä, mœød coo ja'a Diosmädia'agy hajxy nmæbœjcänä coo ja'a Jesucristo hajxy xñäho'túutäm, mœød coo yagjuypiojtägajtsä ja'a Dios.

¹³⁻¹⁴ Jaduhn mäwíinäts hajxy hijty nhíjtäm nebiä ho'ogypiän coo ja'a pojpä cädieey hajxy hijty njaanç tehñ miœødhíjtäm coo hajxy hijty haxœøg njaanç tehñ jiäya'ayhájtäm. Jéquiänä Moisés hajxy xyhanéhmäm nebiä hoguiuhdujt hajxy ngudiúunämät. Pero cab hajxy hoy ngudiunáanäm. Paadiä Moisés jecy miänaañ coo hajxy cu ngumädóowäm. Mänitä Dios miänaañ coo ja'a Jesucristo hajxy xñäho'túutämät cruzcœxp. Jaduhnä nbojpä ngädieey hajxy cœjx xyajnáhwáatsäm. Jaduhnä Jesucristo hajxy tu'ugmädia'agy nmœødhíjtänä.

15 Coo ja'a Jesucristo hajxy jaduhñ xñähho'túutäm cruzcøxp, mänitã møjcu'ugongã quiuhdujt hajxy quiøxy pójcãxã ja'a højtscøxpã. Tøø ja'a Dios jaduhñ yajcãhxø'øgy coo ja'a Jesucristo ja'a møjcu'ugong hoyhoy tøø quia'a yajmãjãda'agy.

16 Coo mijts pøn xjia wi'i yhane'emá'anät coo ja'a quiuhdujt hajxy mya-jtúunät, cab hajxy mnä'ägädã møjpadá'agät. Madiu'u cuhdujt hajxy miøødã, coo hajxy tijaty mga'a hu'ug mga'a cáyät, møød coo ja'a xøø hajxy myag-jadóøjät, ja'a jomøjthaambã, ja'a po'ohaambã, ja'a poo'xxiøøhaambã. Cabã cuhdujt jaduhmbã hajxy mgudiúnät.

17 Hix, cab jaduhñ tiuunã, je'eguiøxpã coo ja'a Jesucristo yaa yhooyy hädaa yaabã naaxwiin. Jaayá'ayädsã quiuhdujt jaduhñ túunãp.

18 Näje'e jäya'ayã Diosmoonsã hajxy wyiingudsähgø'øgy. Pádiãc hajxy jaduhñ wyiingudsähgø'øgy je'eguiøxp cooc tyijy hajxy quia'a jada'añ nebiã Dios hajxy wyiingudsähgø'øwät. Haxøøg hajxy jiaanç tehñ wyiin-mahñdyhaty. Jaanç tehñ ñiguiumáayyãp hajxy je'eguiøxp cooc tyijy hajxy naxy cøxiã wiinã wyiinhixy. Coo mijts xjia wi'i yhane'emá'anät coo hajxy mbahixät, cab hajxy mnä'ägädã yajwiinhøønät.

19 Yhøxhijxypã Jesucristo hajxy jaduhñ. Haa ca'a, je'e hajxy ngopc-hájtãm nägøxiã, mäduhñtiã Diosmädia'agy hajxy nmäbójcãm. Tu'ugmädia'agy hajxy xmiøødhíjtãm. Je'e ja'a mäjaa hajxy xmióoyyãm nebiã Diosmädia'agy hajxy jaduhñ maas hoy ngudiúunãmät, neby hajxy jaduhñ tu'ugmädia'agy nnim-iøødhíjtãmät hamiñ haxøpy. Chojpiã Dios ja'a jioot jaduhñ.

20 Tøø ja'a Jesucristo hajxy xñähho'túutãm. Paadiã mhamdsoo wiin-mahñdy hajxy tøø mnajtshixø'øgy. Tii hajxy coo mwi'i quiuhdujthatyñã nebiã hãna'c-hajxy yhuuc cuhdujthatiãn, ja'a hajxy ca'a mäbøjpã.

21 Madiu'u hajxy jaduhñ jiaanç tehñ quiuhdujthaty. Jaduhñ hajxy miãna'añ coo hajxy tijaty mga'a nä'ä jøø'xät, møød coo hajxy tijaty mga'a nä'ä nähdonät, je'eguiøxp cooc tyijy quia'a hoyyã.

22 Yhamdsoo cuhdujt hajxy jaduhñ yaghijpy coo hajxy jaduhñ miãna'añ coo hajxy tijaty nga'a jøø'xãmät, coo hajxy tijaty nga'a nähdonãmät. Hix, cab tii jaduhñ ñä'ägädã jecy. Paadiã cuhdujt jaduhmbã quia'a jegaambã.

23 Coo hajxy jaduhñ quiuhdujthaty, hamuumdu'joot hajxy jaduhñ quiudiuñ nägø'ø nädecypiã. Jaduhñ hajxy jia nibiãda'agyii nebiã jaanç tehñ jiootxeemybiãn. Hamdsoo hajxy jia niçhaačtiũii, cooc tyijy yhaxøøgwiinmahñdy hajxy jaduhñ hoy yhøxhixa'añ. Tøyhajt jaduhñ coo ja'a cuhdujt jaduhmbã hoy jia cãhxø'øgy; pero cab jaduhñ ñä'ägädã tuungpaady.

3

1-2 Coo ja'a Jesucristo jiuypiojcy, paady hajxy jim nnøcxáanãm maa yhäña'ayän, jim hahooyhaamby maa ja'a Dios yhäña'ayän. Tsøcxã Diosmädia'agy hajxy hamuumdu'joot mäbójcãm. Cab hajxy nyajcopcøøyyãmät ja'a hädaa yaabã naaxwiimbã.

3 Tøø hajxy jaduhmbã nnajtshixøøyyänã je'eguiøxp coo ja'a Jesucristo hajxy xñähho'túutãm. Coo hajxy tu'ugmädia'agy nmøødhíjtãm, paadiã Dios hajxy jim xyaghidáanãm maa je'e yhitiãn. Tøø ja'a hawiinjemywyiinmahñdy hajxy xmióoyyãm.

4 Y coo ja'a Jesucristo yaa quiãdaactägatsa'añ, mänit hajxy min xya-jpadø'øgáanãm. Mänit hajxy jim xyajnøcxáanãm tsajpootyp. Hoy miãnaajã hajxy jim xyaghidáanãm.

5 Paadiã mguhdujt hajxy naxy mdehm ñajtshixø'øwät, ja'a hajxy yaa mya-jtuumbiã hädaa yaabã naaxwiin. Cabã to'oxiøjc hajxy nä'ä nägoobã mnä'ä

møødtsänä'awät jabiøcy. Cab hajxy haxøøg mjäya'ayhádät. Cabä mjoot hajxy mbädá'agät maa haxøøg ca'a hoybän. Cabä mmäjøønä mmädøjc hajxy tijaty mhadsójcät. Jaançh tehñ yhaxøøg jaduhñ. Jaduhñ miäbaady nej coo jäya'ayä quepychechá naaxpoch hajxy wyiingudsähgø'øý.

⁶ Coø hajxy jaduhñ jiatcø'øý, ja'a hajxy ca'a mæbøjpä, paady hajxy yajcumädowa'añii ja'a Dios.

⁷ Jaduhñ hajxy hijty mbajatcøøbiä haxøøg.

⁸ Coø ja'a Jesucristo hajxy xñähho'túutäm, hahixøøby jaduhñ coø ja'a mhaxøøgcuhdujt hajxy mnajtshixø'øwät. Cab hajxy mnimiäjootma'adøøjät. Cab hajxy mniyhøjøjät. Cab hajxy haxøøg mniñänømøøjät. Cab hajxy mhaxøøgcapx mhaxøøgmädiä'agät.

⁹ Cab hajxy hamiñ haxøpy mniwyiinhøønoøjät. Jaduhñ hajxy hijty mjatcø'øý. Cab hajxy jaduhñ mjatcøøñät.

¹⁰ Ja'a hawiinjemywyiinmahñdy hajxy mhabøjñäp, jaduhñä Dios hajxy hoy mbahijx mbadúunnät, je'eguiøxp coø hajxy tu'ugmädia'agy nmøødhíjtäm. Paadiä Jesucristo ja'a hawiinjemywyiinmahñdy hajxy xmióoyyäm tehñgajnä, jaduhñ hajxy maas hoy nbahíxämät.

¹¹ Je'eduhñ tsoobaatp coø ja'a Jesucristo hajxy nmøødhíjtäm tu'ugjoot tu'ugwiinmahñdy, je'eguiøxp coø hajxy nägøxiä xñähho'túutäm wiinduhmyhagajpt, hoy piønä. Cabä Jesucristo hajxy wiingaty xquiunúu'xäm. Tu'cuhdujt hajxy xquiunúu'xäm haagä hawa'adstuum. Cab jaduhñ miøjpäda'agy pø judíoshíjtäm hajxy, pø caj. Cab jaduhñ ñeipiä pø høxpøcyhíjtäm hajxy, pø caj. Cab jaduhñ ñeipiä pø cudoogø'øyhíjtäm hajxy, pø caj.

¹² Mijtsä Dios tøø xyajnähdiyy coø ja'a tiuung hajxy jaduhñ mdúunät. Paady hajxy xjiaançh tehñ chocy. Naxiä hojioot hajxy mdehm miøødhádät. Naxy hajxy jaduhñ mhídät mee'xxieemy. Mmee'xtúgäp hajxy jaduhñ.

¹³ Cab hajxy tii mdsippadá'agät, cab hajxy tii mma'adpádä'agät. Coø hajxy mniñägädieeyø'øwøøjät, mnimiämee'xøøjap hajxy jaduhñ, nebiä Jesucristo hajxy xmiée'xäm. Coø hajxy jaduhñ xmiée'xäm, paady hajxy mmämée'xät pøñ xñägädieeyøøby.

¹⁴ Hamiñ haxøpy hajxy mniçhogøøjät. Jaduhñ hajxy hoy mjaançh tehñ yhídät tu'ugmädia'agy.

¹⁵ Weenä Jesucristo hajxy jaduhñ jootcuyc xyaghíjtäm tu'ugmädia'agy neby hajxy yaa tøø xpiädáacäm. Jabom-jabom hajxy tsøc híjtäm jootcuyc. Tsøgä Dios hajxy nämáayyäm “Dioscujú'uyäp.”

¹⁶⁻¹⁷ Mhabøjcäbä Jesucristo miädia'agy hajxy cøxiä. Myajtuungpáadäp hajxy jaduhñ. Ja'a Dioswiinmahñdyhaam hajxy myajniñähixø'øwøøjät. Jaanä jaduhñ hajxy mnijootcapxmøcpøjcäbät. Hamuumdu'jootä Dioshøy hajxy mhøwät. Naxiä Diosteedy hajxy mdehm ñämä'awät “Dioscujú'uyäp”, je'eguiøxp coø ja'a Jesucristo hajxy xñähho'túutäm. Je'e hajxy nWiindsønähíjtäm. Ja'a Jesucristocøxpä hajxy tijaty mdúnät.

¹⁸ Mijts to'oxiøjc hajxy, tsipcøxpä mnihyhapä miädia'agy hajxy mmæbøjcät. Cähxø'øgaamb hänäjty jaduhñ coø ja'a Diosmädia'agy hajxy mmæbøcy. Chøjpiä Dios ja'a jioot jaduhñ coø hajxy jaduhñ mgudiúnät.

¹⁹ Mijts, ya'adiøjc-hajxy, yajxonä mdo'oxiøjc hajxy jaduhñ mdsoc mba'häyøwät. Cab hajxy mnä'ägä hójät.

²⁰ Pønjaty høxcujc-hajp, mmæbøjcäbä mdajjä mdeediä miädia'agy hajxy jaduhñ cøxiä. Xquiumáyäbä Dios hajxy jaduhñ.

²¹ Jaanä jaduhñ mijts teedyhajpä, cabä mnøøxä mmajc hajxy nä'ä nägoobä mnä'ä yagjootmä'adät, coø hajxy jaduhñ ñä'ä jootmayhádät.

²² Jaanä jaduhñ mijtspä, mijts moonsähajpä, hamuumdu'jootä mwiindsønä miädia'agy hajxy mgudiuun mguñáxät, nebiaty hajxy xyhane'emy. Jaduhñä häna'c-hajxy näje'e jiatcø'øy, coo ja'a wyiindsøn hajxy hñajty jim tiäna'ay, mänit hajxy hñajty jøjwidsø'ø tiägø'øy tuumbä. Yajcumayaamb hajxy hñajty coo hajxy hñajty jiaančh tehñ tiuñ. Caj mijts jaduhñ mjatcø'biät. Coo hajxy hoy mdúnät, cāhxø'ögäp jaduhñ coo ja'a Dios hajxy hoy mwiingudsähgø'øy.

²³ Hamuumdu'joot hajxy mdúnät hoy tiehñ miädyii tuungä, jaduhñä Dios hajxy xquiumáyät. Cab hajxy mnä'ä yajcumayá'anät cu'ughagujc.

²⁴ Paady hajxy jaduhñ hoy mdúnät, tøø hajxy mnajuø'øy coo ja'a Dios hajxy jim xyajncxa'añ tsajpootyp, je'eguiøxp coo ja'a Jesucristo hajxy mmäduñ. Hiñ, tøyhajt hajxy jaduhñ mnä'ägädä Wiindsønhaty.

²⁵ Pøn hoy ca'a jäya'ayhajp, tsipcøxp jaduhñ nøcxy quiumäowa'añ. Hoy jia mayøøjä, cabä Dios miøjpäda'agy.

4

¹ Hoorä, pønjaty moonsämøød, hoyyä moonsä hajxy myajtúnät. Cab hajxy mdsaačhtiúnät nä'ä nägoobä. Naxy hajxy mdehñ jiahmiédsät coo mijtsä mWiindsøn jyijäbä, ja'a jim hijpä tsajpootyp.

² Tehñgajnä Dios hajxy mba'yá'axät hamuumdu'joot. Ca'a Diosmädia'agy hajxy mmäniyhøxmaaho'ogyii. Mnämä'awäbä Dios hajxy “Dioscujú'uyäp.”

³ Mba'yá'axäbä Dios hajxy ja'a højtscøxpä coo højts ween xyajyajnäbaadø'øy coo højtsä miädia'agy njaac mädiäacät ja'a Jesucristocøxpä, ja'a naam ya-jmädoyhátäbä. Coočh jaduhñ tøø nmädia'agy, páadyhøch yaa ndsumyhäña'ay.

⁴ Pa'ya'axä Dios hajxy ja'a høøhcøxpä, jaduhñchä Diosmädia'agy howyiin-juøøñä nyajnahixø'øwät. Jaduhñä Dios jiaančh tehñ quiumay.

⁵⁻⁶ Ja'a häna'cä Diosmädia'agy hajxy ca'a mabøjpä, hoy yajxón hajxy mmøødmädiä'agät hoy miänaajä. Cab hajxy mmädsip, cab hajxy mmäma'adø'øwät. Coo ja'a Dios jaduhñ miäná'anät, naxy hajxy mdehñ quiudiúnät. Jaduhñ hajxy paquiä mnajuø'øwät neby hajxy hoy mhadsówät hoy tiehñ piønä.

⁷ Haa ja'a mägu'ughajpä Tíquico, jaančh tehñ yhóyhøch je'e xmiøødtuñ ja'a Dioscøxpä. Coo jim miédsät maa mijtsän, mänit hajxy xyhawaanaañä cøxiä ja'a høøhcøxpä.

⁸ Mänit hajxy xjiootcapxmøcpøga'añ.

⁹ Quipxiä Onésimo miødhada'añii. Hóyhøch je'e xmiøødtuumbä. Jim je'e chohmbä maa mijtsän. Xyhawaanaañäp mijts jaduhñ nebiaty yaa jiadyii.

¹⁰ Haa ja'a Aristarco, yaačh je'e xmiøødtsumčhänäabiä. Xyajpoo'xp mijts je'ebä. Møødä Marcos hajxy xyajpoo'xpä. Ja'a Bernabé jiuuy miägu'ug je'eduhñ. Tøø mijts nnocyñäjaayø'øy ja'a Marcoscøxpä. Coo jim miédsät maa mijtsän, mänit hajxy hoy yajxón mwiingudsähgø'øwät.

¹¹ Jaduhñä Jesús Justo hajxy xyajpoo'xpä. Haa ja'a judíoshajxy yaabä, ja'a Diosmädia'agy hajxy tøø miäbøquiäbä, cábøchä Diosmädia'agy hajxy xmiøødyajwa'xa'añ. Jagóoyyøchä Aristarcohajxy xmiøødtuñ, møødä Marcos, møødä Jesús Justo. Hóyhøch hajxy jaduhñ xpiuhbety.

¹²⁻¹³ Xyajpoo'xp mijtsä Epafras jaduhmbä. Ja'a Jesucristo tiuung je'e tiuunäbä. Jim je'e chohmbä maa mijtsän. Høøchä tøyhajt nmøød coo ja'a Epafras ja'a Dios jiaančh tehñ miänuu'xta'agy ja'a mijtsøxpä, møødä mabøjpädøjcøxpähajxy, ja'a hajxy jim tsänaabiä Laodicea, møød jim Hierápolis. Jaduhñä Epafras ja'a Dios miänuu'xta'agy coo mijtsä Diosmädia'agy pedyii myajtúnät hamuumdu'joot. Jaduhñä Dios hajxy xquiumáyät.

¹⁴ Jaduhñ mijts ja'a Demas xyajpoo'xpä, møødä Lucas ja'a mädsooyøøbiä.

¹⁵ Huuc yajpoo'xä mǎbǝjpǎdǝjc hajxy, ja'a hajxy jim hijpǎ Laodicea. Jaduhnǎ hermana Ninfa hajxy myajpóo'xpǎt, mǝǝdǎ mǎbǝjpǎdǝjc-hajxy, ja'a hajxy jim nǝcǝpǎ Dioswiingudsǎhgǝǝbiǎ maa ja'a Ninfas tiǝjcǎn.

¹⁶ Coǝ hǎdaa nocy hajxy hǎnajty tǝǝ mǝapxy, mǎnit hajxy jim mǝuejxtǎgǎtsǎt Laodicea, weenǎ mǎbǝjpǎdǝjc-hajxy jim quiǎpxpǎt. Mǎnitǎ nocy hajxy mǝǎpxpǎt, ja'aǎh jim tǝǝ nguǎxiǎbǎ Laodicea.

¹⁷ Huuc nǎma'awǎ Arquipo hajxy jaduhn coǝ nǎxy hoy tiehm quiudiúnǎt nebiaty tǝǝ yhane'emyii ja'a Dios.

¹⁸ Hamdsoo cǝ'ǝjaayhǎambyhǝch hǎdaa nocy nyajmaya'añ. Huuc pa'ya'axǎ Dios hajxy ja'a hǝǝchcǝxpǎ coǝch ween xpiuhbety maaǎh yaa ndsumyǎhǎna'ayǎn. Weenǎ Dios ja'a hoyhajtǎ weenhajt hajxy xmio'oy. Amén.

1 Tesalonicenses

¹ Chaa hõjts hädaa nocy nhädiuunmuga'añ, hõöch Pablo, mөөдä Silvano, mөөдä Timoteo. Mijts hädaa nocy nyajnäjaayөөby, pønjatiä Diosmädia'agy jim määbõjp Tesalónica. Mwiingudsähgөөbiä Diosteedy hajxy mөөдä Jesucristo, ja'a hajxy nWiindsõnhájtämbä. Tu'ugmädia'agy hajxy mmөөdhity. Weenä Dios ja'a hoyhajtä weenhajt hajxy xmio'oy mөөдä Jesucristo.

²⁻³ Tehngajnä hõjtsä Dios nnäma'ay “Dioscujú'uyäp” ja'a mijtscõxpä nägõxiä. Jaanä mijtscõxpä hõjtsä Diosteedy nmänuu'xta'agy tehngajnä. Jaduhñ hõjtsä Dios nnäma'ay coo mijtsä miädia'agy hamuumdu'joot mmääbõjcä, paady hajxy hoy mjaançh tehñ quiudiuunä. Paady hajxy jaduhñ mgudiun, coo ja'a Dios hajxy mjaançh tehñ chocy. Coo ja'a Jesucristo hajxy hamuumdu'joot mjõbhixy, paady hajxy nägөө nädecypiä mmee'xtucy.

⁴ Mägu'ughajpädõjc, xchojpä Dios hajxy jaduhñ. Nnajuөөby hõjts jaduhñ coo ja'a Dios hajxy tөө xwyiimbiy.

⁵ Hix, coo hõjts mijts nyajwiingapxөөyy coo ja'a Jesucristo hajxy tөө xñähho'túutäm, ja'a Dioshespíritu hõjtsä määja hänäjty xmiooby. Cab hõjts hänäjty nä'ä nägoobä nnä'ä capxy nnä'ä mädia'agy. Coo hõjtsä määja jaduhñ xmiooyy, paady hõjts hänäjty nnajuөө'oy coochä tøyhajt hänäjty nyecy. Mänaa hõjts jim nhitiän maa mijtsän, hoy hõjts jim nhijty. Paady hõjts jaduhñ hoy nhijty coo hõjts mijts hänäjty jaduhñ hoy ween xpiahity. Mjahmiejchp hajxy jaduhñ, túhmäts.

⁶ Jaduhñ hõjts mijts hoy xjiaançh pahity. Jaduhñä Wiindsõn Jesucristo hajxy hoy tөө mbahijxpä. Yajxonä mädia'agy hajxy jaduhñ mmädooyy, ja'a hõjts mijts nyajwiingapxөөyyäbä ja'a Jesucristocõxpä, ja'a hõjtsä Dios xñajtsapxөөyyäbä. Mxoondaac hajxy jaduhñ coo hajxy jaduhñ mmädooyy, hoy hajxy hänäjty jaduhñ hanaxiä mja tsaachpocy. Ja'a Dios hajxy jaduhñ xyajxoondaac.

⁷ Coo ja'a Diosmädia'agy hajxy tөө mmääbõcy, hoy hajxy hänäjty mja tsaachpocy, paadiä määbõjpädõjc-hajxy hoy miääbõjpä nägõxiä, ja'a hajxy jim tsänaabiä maa ja'a naax xiõhatiän Macedonia mөөд Acaya.

⁸ Ca'a jyimiähajtiä ja'a Diosmädia'agy jaduhñ tөө wia'xy ja'a Jesucristocõxpä. Wiinduhmyhagajpt jaduhñ wia'xnä. Jaanä jaduhñä mädia'agy wia'xpä wiinduhmyhagajpt coo mijtsä Diosmädia'agy mmääbõjtsohñ. Coo ja'a määbõjpädõjc-hajxy jaduhñ tөө miädoyhajnä, paady hõjts jaduhñ nga'a nägapxy.

⁹ Hix, majaty hõjts nwädity, jaduhñ hõjtsä määbõjpädõjc xñäma'ay coog hõjts mijts hoy yajxõn xyajtõjtägөөyy mänaa hõjts jim nhoyyän maa mijtsän, mөөд coogä quepychechä naaxpoch hajxy tөө mnajtshixөөñä. Päädiäc hajxy tөө mnajtshixөө'oy coogä Dios hajxy mwiingudsähgөөñä, mөөд coogä Diosmädia'agy hajxy hamuumdu'joot myajtuunnä. Tøyhajtä Dios jiujuqiä. Cabä quepychechä naaxpoch jiujuqiä.

¹⁰ Mөөд jaduhñ hajxy miänaambä cooc mijtsä Dioshuung Jesucristo hajxy mjõbhixy coo yaa quiädaactägatsa'añ hädaa yaabä naaxwiin. Tsajpootyp chohñda'aga'añ coo hänäjty yaa miänaca'añ. Coo ja'a Jesucristo hänäjty tөө yho'ogy, mänit yagjuypiõjcä ja'a Tieedy. Mänit jim ñocy tsajpootyp. Ja'a Jesucristo hajxy jaduhñ xyajnähwa'adsaanäm coo ja'a haxөөgjäya'ayhajxy hänäjty yajcumädowa'añii ja'a Dios.

2

1-2 Mägu'ughajpädøjc, coo hõjts jim̄ nhooyy Filipos Diosmädia'agy-yajwa'xpä, mänit hõjtsä jäya'ay jim̄ xxiøøghajty. Høxtä xchaaçhtiuun hõjts jaduhñ. Pero coo hõjts mäniitiä nnøcxy maa mijtsän, mänit hõjtsä Dios xjiotcapxmøcpøjcy, hoy hõjtsä jäya'ay hānajty xjiaançh tehñ miädsiphaty. Y coo hõjts mijtsä Diosmädia'agy nyajwiingapxøøyy, mänit hajxy mmäbøjcy hamuumdu'joot. Tøyhajt jaduhñ, túhmäts. Coo hõjtsä Dios xpiuhbety, paady hõjtsä miädia'agy hamøj jootmøj nyajwa'xä.

3 Tøyhajtä Diosmädia'agy jaduhñ. Hamuumdu'joot hõjts nyajwa'xy. Cab hõjts nhøhñda'agy.

4 Haa ca'a, ja'a Dios hõjts xwyiinguejx Diosmädia'agy-yajwa'xpä, paady hõjts hamuumdu'joot nyajwa'xy ca'xy pedyii. Cab hõjts nyajtägach ni weeñtiä. Ja'a Dios hõjts xquiumaayy. Jaduhñ hõjtsä njoot chocy coo hõjts xquiumáyät. Cab hõjts nmøjpäda'agy pø cab hõjtsä cu'ug xquiumay. Hix, jaduhñä Dios hajxy xñajuøøyyäm neby hajxy nwiinmahñdhajtäm.

5 Mänaa hõjts jim̄ nhoyyän maa mijtsän, cab hõjts mijts hānajty nwiin-høøna'añ. Jii jäya'ayhajxy näje'e, yajxón hajxy miäwiinhøøñ je'eguiøxp coo hajxy yajcumaya'añ. Pero hõjts, cab hõjts jaduhñ mänaa njatcø'øyy. Ni cab hõjtsä xädø'øñ mänaa nhadsocy. Jii jäya'ayhajxy näje'ebä, yajxón hajxy miäwiinhøøñ, weenä xädø'øñ hajxy jaduhñ mio'oyii. Pero hõjts, cab hõjts jaduhñ njatcø'øyy. Tøyhajt jaduhñ. Xñajuøøbiøchä Dios jaduhñ cooçh nga'a hønñda'agy.

6 Cab hõjts jaduhñ nmäna'añ coo hõjts pøn xwyiingudsähgø'øwät, ni mijts ni pøn, hoy jaduhñ jia hawiinmatsä coo hõjts cu xwyiingudsähgøøyy, je'eguiøxpä coo hõjtsä Jesucristo tøø xwyiinguexy.

7 Pero nnäxuu'chp hõjts mijts. Mijtsøxpä hõjtsä hojiot nmøødhaty. Høxtahm̄dsä tajjäya'ay ja'a yhuung hajxy cwieendähaty, jaduhñ hõjts mijts ngüeendähajpä.

8 Njaançh tehñ chojpy hõjts mijts, paady hõjts mijtsä Diosmädia'agy hoy nyajwiingapxø'øyy. Høxtä cu nnähho'tuuty hõjts mijts coo ja'a Dios jaduhñ cu miänaañ. Hix, hoyhoy hõjts mijts ndsocy nba'häyoy nägø'ø nädecypiä.

9 Mägu'ughajpädøjc, mänaa hõjts mijtsä Diosmädia'agy hoy nyajwiin-gapxø'øyyän, nnajuøøby hõjts hānajty coo mijtsä xädø'øñ hānajty may mga'a møødä. Paady hõjts hānajty møc nduñ nxajy xøømdsuhñ. Mjahmiejch hajxy jaduhñ, túhmäts. Ja'a nhamdsoo caayyøøc hõjts hānajty nguduumby nguxajpy. Cab hõjts hānajty nmäna'añ coo hõjts mijtsä caayyøøc xñä'ä mó'owät.

10 Mägu'ughajpädøjc, hoy hõjts jim̄ nwädipty maa mijtsän. Cab hõjts jim̄ nmee'ch nbojty. Cab hõjts jim̄ nduundägooyy nnajxtägooyy. Ni weeñtiä hõjts jim̄ nga'a cädiehy. Tøyhajt jaduhñ, túhmäts. Jaduhñ hõjtsä Dios xñajuøøbiä coo tiøyyä.

11 Høxtahm̄dsä teedyjäya'ayä yhuung hajxy jiotcapxmøcpøcy, jaanä jaduhñ hõjts mijts njootcapxmøcpøjpä. Tøyhajt jaduhñ, túhmäts. Jaduhñ mijts nmägapx nhanehm̄bä coo hajxy hoy yajxón mjäya'ayhädät.

12 Jaduhñä Dios jiot chocy. Coo hajxy jaduhñ hoy yajxón njäya'ayhajtämät, paadiä Dios hajxy jim̄ xyajnøcxäänäm tsajpootyp maa miähane'emiän, maa wyiingudsähgø'øyyijän.

13 Paady hõjtsä Dios tehngajnä nnäma'ay “Dioscujú'uyäp.” Hix, coo hõjts mijtsä Diosmädia'agy hoy nyajwiingapxø'øyy, mänit hajxy hamuumdu'joot mguhbøjcy. Jaduhñ hajxy mmäbøjcy coo jiaançh Diosmädia'aguiä. Cab hajxy mmänään cooc tyijy jäya'ay tøø yhädiuñ. Tøyhajt jaduhñ coo ja'a Dios tøø yhädiuñ. Y coo hajxy jaduhñ mmäbøcy, paady hajxy hoy mjäya'ayhajnä.

¹⁴ Mägu'ughajpädøjc, coo ja'a mhamdsoo mägunaax hajxy xchaaçhtiüñ, ja'a judíoshajxy, jaduhñ hajxy mjañt mhabejpä nebiä mabøjpädøjc-hajxy jim chaaçhpøquiän Judea-naaxooty, ja'a hajxy mabøjpä ja'a Diosmädia'agy møødä Jesucristo miädia'agy. Jaduhñ hajxy chaaçhtiüñäbä ja'a yhamdsoo mägunaaxhajxy, ja'a judíoshajxy.

¹⁵ Coo ja'a Wiindsøn Jesucristo yagho'cä, ja'a judíoshajxy jaduhñ jatcøøyy. Jaduhñä judíos ja'a profetadøjc hajxy jecy yagho'pä. Højtspadiä judíos xjiaac hadsaaçhtiüñajxpä. Coo ja'a judíoshajxy jaduhñ haxøøgyhäna'c-haty, paady hajxy quia'a cumayii ja'a Dios. Hoy piønä hajxy jaduhñ miädsiphaty.

¹⁶ Hix, coo højtsä jäya'ayä Diosmädia'agy hänajty nyajmøødmädia'agy, ja'a hajxy ca'a judíospä, ween hajxy jaduhñ ñähwaats quiuhwaatspä, mänit højtsä judíos hänajty xjia wi'i yhaduga'añ. Coo ja'a judíoshajxy jaduhñ jiatcø'øy, tehñgajnä hajxy hanaxiä haxøøg jiaac tehñ jiatcø'øy. Pero mobädajpä hajxy hoyhoy yajcumadowa'añii ja'a Dios.

¹⁷⁻¹⁸ Hoorä, mägu'ughajpädøjc, coo højts jim nhooyy maa mijtsän, mänit højts jim nwiimbíjcumbä. Mänit højts yaa nmänajcy. Pero cab højts hijty yaa njega'añ. Ja wi'i ñøcxtägatsaamb højts jim jadähooc maa mijtsän. Hix, jaduhñ højts mijts njuø'øy nebiä hamdsoo huungpän. Hoy miänaajä mijts njahmiejtsta'agy, hoy hajxy nga'a ja niyhíxäm hajujcy. Høøch Pablo, mayhóoc-høch jim tøø nja wi'i ñøcxtägatsa'añ, pero cab højtsä møjcu'ugong tøø xyajnäbaadøøyyä coo højts jim nnøcxtägätsät.

¹⁹⁻²⁰ Haa ja'a Jesucristo, ja'a hajxy nWiindsønähjätämbä, coo je'e yaa quiädaactägätsät hädaa yaabä naaxwiin, mänit hajxy hänajty mgähxø'øga'añ maa wyiinduumän coo ja'a Diosmädia'agy hajxy hänajty hamuumdu'joot tøø mmäbøcy. Paady højts njøbhixy coo ja'a Jesucristo yaa quiädaactägatsa'añ. Mänit højts jaduhñ nxoonda'aga'añ nägø'ø nädecypiä ja'a mijtsæxpä. Mänit højtsä Dios xquiumaya'añ je'eguiøxp coo ja'a miädia'agy hajxy hoy mgudiüñä mänaabä højts mijts hoy nyajwiingapxø'øyän.

3

¹⁻³ Coo højts jaduhñ nmädoyhajty coog hajxy hijty mjaanç tehñ chaaçhpøcy, mänitøch njaanç tehñ jiootmayhajpøjcy je'eguiøxp cooçh hänajty nga'a najuø'øy pø mjøjtänaabiä møjcu'ugong hajxy hänajty. Páadyhøçhä njoot hänajty jiaanç tehñ chocy cooçh jim nnøcxät maa mijtsän, nmäyajtøwáambiøch mijts hänajty pø hoy hajxy hänajty mmee'xtucy. Pero cab hänajty ñäbaadø'øwa'añ cooçh jim nnøcxät. Mänitøch jaduhñ nwiinmahñdyhajty cooçhä hermano Timoteo jim nguéxät nidiuhñ, y cooçh jiiby nidiuhñ nmähmø'øwät Atenas. Näguipxy højtsä hermano Timoteo xmiøødtuñ Diosmoonsä maa højtsä Diosmädia'agy nyajwa'xiän ja'a Jesucristocøxpä. Páadyhøçhä hermano Timoteo jim nguejxy maa mijtsän coo mijts jaduhñ xjiootcapxmøcpøgät maa hajxy hänajty mdsaaçhpøquiän, weenä Diosmädia'agy hajxy hänajty jaduhñ maas hoy mmäbøcy hamuumdu'joot, møød ween hajxy hänajty jaduhñ mga'a jootmayhaty. Hix, ja'a Dios hajxy jaduhñ tøø xyajnähdíjjäm coo hajxy jaduhñ ndsaaçhpøjcämät ja'a Jesucristocøxpä. Tøyhajt jaduhñ, túhmäts.

⁴ Haa ca'a, mänaa højts jim nhoyyän maa mijtsän, mänit hajxy nhawáanäm coo hajxy hänajty tsipcøxp ndsaaçhpøgáanäm. Jaduhñ hajxy tøø njaanç jajt tøø njaanç habéjtäm, túhmäts.

⁵ Hoorä, cooçh hänajty nga'a najuø'øy pø hoyyä møjcu'ugong hänajty mjøjtäna'ay maa hajxy hänajty xjia wi'i jiojcapxø'øyän, mänitøch jaduhñ nja mänaañ cooçh jim nnøcxät maa mijtsän. Pero coo hänajty quia'a näbaadø'øwa'añ cooçh jim nnøcxät høøch, páadyhøçhä hermano Timoteo jim

nguejxy, ween mijts jaduhñ xmiäyajtøy pø hoyyã møjcu'ugong hajxy hñanjty tøø mjøjtäna'ay, pø hoyyã Diosmädia'agy hajxy hñanjty mbanøcxyñä. Hix, ndsähgøøbiøch hñanjty coo ja'a møjcu'ugong hajxy hñanjty tøø xjiøjcapxø'øy. Coo hajxy häxøpy tøø mga'a mee'xtucy, xiøøbä højts mijtsä Diosmädia'agy häxøpy hoy tøø nyajwiingapxø'øy.

⁶ Coo ja'a Timoteo jim jiaanç hooyy maa mijtsän, mänit wyiimbíjcumbä. Hoy yaa miejtstägach maa højtsän. Mänit højts xyhawaanä coogä Diosmädia'agy hajxy tehngajnä mmäbøcy hamuumdu'joot, møød coog hajxy hamiñ haxøpy mniçhogyii. Hoxioondaacnä jaduhñ. Jaduhñä Timoteo miänaambä cóogøch mijts hoy miänaajä xjiahmiejtsta'agy, møød cóogøch mijts xchocy xpia'häyoy. Jadúhñägøch mijts xjia wi'i yhixa'añ nébiøch mijts nja wi'i yhixa'añän.

⁷ Mägu'ughajpädøjc, coo højts jaduhñ nmädoyhajty coogä Diosmädia'agy hajxy hñanjty tehngajnä mmäbøcy hamuumdu'joot, mänit højts njootcugøøyy, hoy højts hñanjty hanaxiä nja tsaaçhpøcy, hoy højts hñanjty møj may nyajmaa-jiaty.

⁸ Paady højts jootcuyc nnijiäwøøyyänä coo mijtsä Diosmädia'agy tehngajnä mbanøcxy hamuumdu'joot ja'a Jesucristocøxpä.

⁹ Coo mijts jaduhñ mmäbøcy tehngajnä, paady højts njaanç tehñ xioonda'agy Dioswiinduum, paady højtsä Dios hoy miänaajä nnäma'ay "Dioscuju'uyäp."

¹⁰⁻¹¹ Xøømdsuhñ højtsä Diosteedy mba'ya'axy møødä Wiindsón Jesucristo. Jaduhñ højts nmänuu'xta'agy hamuumdu'joot coo hajxy ween yajnäbaadø'øy coo højts jim nnøcxtägätsät maa mijtsän, jaduhñ højts mijtsä Diosmädia'agy njaac yajnähixø'øwät nebiaty hajxy pedyii mga'a mabøcyñä,

¹² møød weenä Jesucristo hajxy xjiaac puhbety coo hajxy hamuumdu'joot mjaac niçhogøøjät hamiñ haxøpy neby højts mijts ndsoquiän, møød coo jäya'ay hajxy jaduhñ nägøxiä mdsoc mba'häyowät,

¹³ møød weenä Jesucristo hajxy xjiaac puhbety coo ja'a Diosmädia'agy hajxy hamuumdu'joot mbanøcxät, møød coo hajxy mga'a najtshixø'øwät, møød coo hajxy mga'a wädität haxøøg, jaduhñ hajxy mhídät hawa'adstuum, jaduhñ hajxy pøn xquia'a nähwaambédät maa ja'a Diosteedy wyiinduumän coo ja'a Wiindsón Jesucristo hñanjty yaa tøø quiädaactägach hädaa yaabä naaxwiin. Näguipxiä Jesucristo ja'a mioonsä hñanjty nägøxiä miøødcäda'aga'añ møød pønjiatiä Diosmädia'agy hñanjty tøø miäbøcy.

4

¹ Hoorä mägu'ughajpädøjc, ja'a Jesucristocøxpä højts mijts cham nmägapxy nhane'emy coo hajxy hoy mjaac tehñ jiäya'ayhädät, jaduhñä Dios hajxy xquiumáyät. Jaduhñ højts mijts jayøbajt nyajnähixøøyy. Y jaduhñ hajxy hoy mjaanç jäya'ayhaty.

² Jaduhñ højtsä Wiindsón Jesucristo tøø xñajtscapxø'øy coo højts mijts nya-jwiingapxø'øwät, túhmäts.

³ Jaduhñä Dios hajxy xyajmädsójcäm coo hajxy hoy ngudiúunämät nebiaty hajxy tøø xyhanéhmäm coo hajxy hoy nwädíjtämät, møød coo ja'a haxøøgwiinmahñdy hajxy ngøxy najtshixøøyyämät.

⁴ Jaanä jaduhñä Dios hajxy tøø xyhanéhmämbä coo ja'a ndo'oxiøjc hajxy hoy yajxón nmøødtsänáyyämät, møød coo hajxy nwiingudsähgøøyyämät.

⁵ Haa ja'a jäya'ayä Dios hajxy ca'a hixyhajpnä, cabä miädia'agy hajxy jaduhñ quiudiunä. Hix, wiingto'oxiøjc hajxy wyi'i yhadsojpy. Pero mijts, ca'a hajxy jaduhñ mbajatcø'øy.

⁶ Ca'a mmäjøøñ mmädøjcä tio'oxiøjc hajxy jaduhñ mmägapxtägooyyā. Pønjaty jaduhñ jatcøøby, tsipcøxp hajxy hoyhoy yajcumädowa'añii ja'a Jesucristo. Haa ca'a, jaduhñ højts mijts tøø nhuuc hanehm̄bä.

⁷ Hix, jaduhñä Dios hajxy tøø xyajnähdíjjām coo hajxy hoy yajxón njäya'ayhájtāmāt. Cab hajxy jaduhñ xyajmädsójcām coo hajxy haxøøg nwädíjtāmāt.

⁸ Jaduhñds je'e, paadiä Dios ja'a yhEspíritu tøø xmióoyyām, jaduhñ hajxy hoy njäya'ayhájtāmāt. Pønjaty jaduhñ ca'a cudiunaamb nébiøch cham nmädia'aguiän, ja'a Dios hajxy jaduhñ ñägädieeyøøby, ca'a jiäya'ayä.

⁹ Mägu'ughajpädøjc, ja'a Dios hajxy jaduhñ tøø xyajnähxixøøyyām coo hajxy hamiñ haxøpy nniçhójcāmāt, pønjetiä Diosmädia'agy mæbøjp. Hoorä, coo ja'a Dios hajxy jaduhñ tøø xyajnähxixøøyyām, cab yhadsipä cooçh mijts jaduhñ njaac yajnäjaayó'øwāt coo hajxy jaduhñ nniçhójcāmāt.

¹⁰ Tøyhajt jaduhñ coo ja'a mæbøjpädøjc hajxy nägøxiä mdsocy yaa Macedonia-naaxooty wiinduhmyhagajpt. Jaduhñ højts mijts mæbøcy nmānuu'xta'agy coo hajxy maas hamuumdu'joot mmädsógāt.

¹¹ Jaduhñ højts mijts tøø nhuuc hanehm̄bä coo hajxy hamoñ haducy mhídāt, coo hajxy mga'a yajtägó'øwāt maa cueendä hajxy mga'a møødän, møød coo hajxy mniyhix mnimiähäyowøøjät hamdsoohaamby. Jaduhñä mjoot hajxy mbädá'agāt coo hajxy jaduhñ mgudiúnāt,

¹² jaduhñä cu'ug hajxy xquiumáyāt, møød jaduhñ hajxy tii mga'a yajmaa-jiádāt.

¹³ Mägu'ughajpädøjc, ja'a jäya'ayhajxy ca'a mæbøjpä, coo ja'a jiuuy ja'a miägu'ug hajxy yho'ogy tiägoy, mänit hajxy jiaançh tehñ jiootmayhaty. Paady hajxy jaduhñ jiootmayhaty coo hajxy quia'a najuø'øy coo ja'a Dios ja'a ho'oguiäya'ay yagjuypiojtägatsa'añ, ja'a hajxy hñajty tøø miäbøquiäbä. Paady højts mijts cham nhawáañām, cab højtsä njoot chocy coo hajxy mjootmayhájpāt.

¹⁴ Hoorä, coo hajxy jaduhñ nmæbøjcām coo ja'a Jesucristo jiuypiojtägajch mänaabä hñajty tøø yho'oguiän, paady hajxy jaduhñ nmæbøjcämbä coo ja'a Dios ja'a ho'oguiäya'ay yagjuypiojtägatsa'añ, ja'a hajxy hñajty tøø miäbøquiäbä ja'a Jesucristocøxpä, ja'a Jesucristo hajxy møødhijpä tu'ugmädia'agy.

¹⁵⁻¹⁷ Hädaa mädia'agy jaduhmbä, ja'a Jesucristøch jaduhñ xñajtsapxøøyyä. Hoorä, coo ja'a Jesucristo hñajty yaa quiädaactägatsa'añ hädaa yaabä naaxwiin, mänit jim choona'añ tsajpootyp. Mänit møc ya'axa'añ nebiä soldadowiindsøñhajxy møc ya'axiän coo hajxy hñajty chiptuna'añ. Mänitä Diosmoonsä møc ya'axaambä, ja'a møjtuung jim møødpä tsajpootyp. Mänitä Dios ja'a xiuuxt yajxu'uxa'añii møc. Mänitä ho'oguiäya'ayhajxy jiuypioğa'añ, ja'a hajxy hñajty tøø miäbøquiäbä ja'a Jesucristocøxpä. Mänitä mæbøjpädøjc-hajxy nägøxiä chajpeda'añ, pønjaty hñajty jujyñä tsuxnä, näguipxy møød pønjaty hñajty tøø yho'ogy, ja'a hajxy hñajty tøø jiuypiojtägächäbä. Mänitä Jesucristo hajxy nägøxiä nøcxy njøjcubaadø'owáañām jim jocjooty, møød pønjaty hñajty tøø jiuypiojtägach, møød pønjaty hñajty jujyñä tsuxnä. Hoy miänaajä ja'a Jesucristo hajxy nägøxiä xmiøødhidáañām. Cab hajxy mänaa xpiuhwa'adsáañām.

¹⁸ Tøyhajt hädaa mädia'agy jaduhñ. Coo hajxy jaduhñ mmæbøcy, jaduhñ hajxy hamiñ haxøpy mnijiootcapxmøcpøgøøjät.

5

¹⁻² Mägu'ughajpädøjc, mnajuøøby hajxy jaduhñ coo jaduhñ quia'a

yajnajuø'øy mänaa xøø tiempo yhabaada'añ coo ja'a Jesucristo yaa quiädaactägatsa'añ hädaa yaabä naaxwiin. Paady, cab yhadsipä cooçh mijts njaac yajnäjaayø'øwät mänaa jaduñ jiada'añii. Pero jaduñ mäbøcy, mnajuøøby hajxy jaduñ coo ja'a Jesucristo hajxy xyajcädaacpedáanäm jaguiapxy jamiädia'agy.

³ Jaduñä cu'ughajxy hñajty miäna'ana'añ: "Jootcujc hajxy nhíjtäm; cab hajxy nej njadäänäm, cab hajxy nej nhabetäänäm", nøm. Mänitä tsø'ty häyohn jaguiapxy jamiädia'agy yhabaada'añ. Paquiä cu'ughajxy jaduñ jiada'añii tiuna'añii jaduñ mäwiin nebiä to'oxiøjc-hajxy jiaty yhabetiän coo ja'a yhuunghajxy hñajty myina'añ quia'awa'añ. Cabä cu'ughajxy hñajty hoy piäyø'øga'añ.

⁴ Pero mijts, mägu'ughajpädøjc, mwiinjuøøby hajxy jaduñ. Cab hajxy jaduñ myagjuø'øwa'añ coo ja'a Jesucristo hajxy jaduñ xyajcädaacpéjtämät jaguiapxy jamiädia'agy.

⁵ Hix, coo ja'a Diosmädia'agy hajxy nmäbøjcäm ja'a Jesucristocøxpä, paady hajxy jaduñ mäwiin nmäbaatäm nebiä jäya'ayhajxy xøøm wädijpän. Hoy hajxy yhixy. Cab hajxy nhíjtäm hagogdstuum.

⁶⁻⁸ Coo hajxy jaduñ nmäbøjcäm ja'a Jesucristocøxpä, tsøcxä hajxy híjtäm nähix hahixø'ø. Tsøc hajxy híjtäm wijy quejy. Jaduñ hajxy nga'a híjtämät nebiä jäya'ay maabän, nebiä jäya'ay müucäbän. Jaduñä haxøøgpä hajxy hoy njøjtänäayyämät nebiä soldadohajxy chiptuñän nähbujxt cuhbujxt. Tsøcxä Diosmädia'agy hajxy hamuumdu'joot mäbøjcäm. Tsøgä jäya'ay hajxy nägøxiä tsojc pa'häyóowäm. Tsøgä Jesucristo hajxy jøbhíjxäm coo hajxy xyajnahwa'ads xyajcuhwa'adsäänäm.

⁹ Hix, cabä Dios hajxy xyajmädsøjcäm coo hajxy ndsaachpøjcämät. Caj pues. Jaduñ hajxy tøø xyajnähdíjjäm coo ja'a Wiindsøn Jesucristo hajxy xyajnahwaats xyajcuhwáatsämät.

¹⁰ Paady hajxy hoy xñähho'túutäm, jaduñ hajxy hoy xmiøødhidäänäm cøjxta'axiøø. Coo yaa quiädaactägatsa'añ hädaa yaabä naaxwiin, mänit hajxy nägøxiä xwiowø'øgäänäm, møød pønjaty hñajty jujyñä tsuxnä, møød pønjaty hñajty tøø yho'ogy tøø tiägoy.

¹¹ Hoorä, jaac nijootcapxmøcpøgøø hajxy hamiñ haxøpy. Jaac niya-jnähixø'øwøø ja'a Diosmädia'agy hajxy. Jaduñ hajxy jäda'ahaty mjaançh cudiuñ.

¹² Mägu'ughajpädøjc, mijts nmänuu'xtaacy py coo ja'a wiindsøndøjc hajxy mwiingudsähgø'øwät, ja'a hajxy jim tuumbä maa ja'a Diostøjcän, ja'a mijts xwyiingapx xjijcapxøøbiä.

¹³ Coo hajxy jaduñ tiuñ, paady hajxy hamuumdu'joot mdsoc mba'häyówät. Jootcujc hajxy mnimiøødhidøøjät. Cab hajxy mnimiäjootma'ad mnimiädsiphadøøjät.

¹⁴ Mägu'ughajpädøjc, jaduñ mijts njaac yajwiinxiic njaac yajwiingapxø'øy coo häna'c hajxy mhójät, ja'a hajxy naxy nuuxho'pä, coo hajxy ween tiuñ; møød coo häna'c hajxy mjootcapxmøcpøgät, ja'a hajxy jootmayhajpä; møød coo häna'c hajxy mwiingapx mjøjcapxø'øwät, ja'a hajxy hoy ca'a mäbøgaambä. Mee'xxieemy hajxy jaduñ nägøxiä mmägapx mhané'emät.

¹⁵ Mniyajcopcø'øwøøjap hajxy. Coo pøn ñägädieeyø'øwøøjät, cab yaghawi-imbídat. Jaduñä mjoot hajxy hoy miänaajä mbädá'agät coo mayhajt hajxy mduñhátät hoy ñä'a pønä, møødä mäbøjpädøjc-hajxy, møødä cu'ughajxy nägøxiä.

¹⁶ Hoy ñä'a mänaajä hajxy mxoondá'agät.

¹⁷ Tehngajnä Dios hajxy mba'yá'axät.

¹⁸ Mnämä'awäbä Dios hajxy “Dioscujú'uyäp”, hoy hajxy nej cu mja jat cu mja habet. Chojpiä Dios jioot jaduhñ coo hajxy jaduhñ ngudiúunämät, je'eguiøxp coo ja'a miädia'agy hajxy nmäbøjcam ja'a Wiindsón Jesucristocøxpä.

¹⁹ Cabä Dioshespíritu hajxy mänaa mhadúgät.

²⁰ Cab hajxy mbéxät pønhatiä Diosmädia'agy najtscapxøøby.

²¹ Pero cóxäbä mädia'agy hajxy mmädoomach mädyii hoy mädyii mäbaad. Je'eds hajxy mguhbøgäp hamuumdu'joot.

²² Møødä haxøøgjootä haxøøgwiinmahñdy hajxy mgøxy najtshixø'øwät.

²³ Ja'a Dios ja'a hoyhajtä weenhajt hajxy xmióoyyäm. Ween hajxy xquiøxy yajnäbwa'açh xquiøxy yajcuhwa'açh. Ween hajxy xyaghity hawa'adstuum, møødä mjuøhñdyhajxy, møødä mni'xä mgopc-hajxy, høxtä coonä ja'a Wiindsón Jesucristo yaa quiädaactägätsät hädaa yaabä naaxwiin.

²⁴ Ja'a Dios hajxy tøø xwyiimbliwäm. Jaaya'ay hajxy tsipcøxp xyajnäbwa'ads xyajcuhwa'adsäñäm neby hajxy tøø xyajwiinwaanøøyyäm. Tøyhajt jaduhñ. Hix, cabä Dios mänaa yhøhnda'agy.

²⁵ Mägu'ughajpädøjc, huuc Diospa'ya'ax hajxy tehngajnä ja'a højtscøxpä.

²⁶ Huuc näma'aw ja'a mäbøjpädøjc hajxy jaduhñ nägøxiä coo højts hamuumdu'joot ndsocy nba'häyoy.

²⁷ Naxiä mäbøjpädøjc hädaa nocy hajxy mdehm yajwiingapxø'øwät nägøxiä. Ja'a Jesucristo jaduhñ hanehmb.

²⁸ Ween mijtsä Wiindsón Jesucristo ja'a hoyhajtä weenhajt møj may xmio'oy. Amén.

2 Tesalonicenses

¹ Chaa højts hädaa nocy nhädiuunmuga'añ, høøch Pablo, mөөдä Silvano, mөөдä Timoteo. Mijts hädaa nyajnäjaayөөby, pөnjaty jim hamugөөby Dioswiingudsähgөөbiä Tesalónica. Ja'a Dios hajxy nDeedyhájtäm, mөөдä Jesucristo hajxy nWiindsөnhájtäm.

² Ween mijtsä Dios ja'a tsooctä mayhajt xtiuunä, ween mijtsä hoyhajtä weenhajt xmio'oy.

³ Mägu'ughajpädөjc, ja'a mijtscөxpä højtsä Dios hoy miänaajä nnäma'ay “Dioscujú'uyäp.” Hawiinmats jaduhñ. Hix, tehngajnä Diosmädia'agy hajxy mjaac mäböcy, mөөд hajxy tehngajnä mjaac niçhogyii hamiñ haxөpy.

⁴ Hoy miajatiä højts nwädity maa ja'a Diostөjcän, jaduhñ højts nmädia'agy ja'a mijtscөxpä coo ja'a Diosmädia'agy hajxy hoy mjaanç tehñ miäböcy, mөөд coo hajxy hoy mjaanç tehñ miee'xtucy, hoy hajxy hanaxiä mja tsaaçhpөcy ja'a Dioscөxpä.

⁵ Coo hajxy jaduhñ mmee'xtucy, paadiä Dios hajxy jim xpiäda'aga'añ hawa'adstuum coo hñajty miähane'ema'añ. Xyhixpä Dios hajxy coo hajxy je'e myajcudsaaçhpөгө'өy. Hoy jaduhñ coo hajxy jim xpiädá'agät.

⁶ Pөnjaty mijts jaduhñ xchaaçhtiumb, yaghawiimbidaambiä Dios jaduhñ. Jaduhñä Dios jioot chocy.

⁷ Coo ja'a Wiindsөñ Jesucristo yaa miänajtägatsa'añ hädaa yaabä naaxwiin, jim choona'añ tsajpootyp. Ja'a mioonsä miөөdmänacaamby, ja'a hajxy mäjaamөөdpä. Hajájjäbä Jesucristo quiäda'aga'añ. Mänitä Dios hajxy nägөxiä xyajpoo'xäänäm, mөөд højts mөөд mijts nägөxiä. Cab hajxy jaduhñ xyajt-saaçhtiuñäänänä.

⁸ Coo ja'a Jesucristo hñajty yaa tөө quiäda'agy, mänitä jäya'ayhajxy quiumädowa'añ pөnjatiä Dios hñajty tөө quia'a möjpädá'aguiäbä, pөnjatiä miädia'agy hñajty tөө quia'a mäböjcäbä ja'a Wiindsөñ Jesucristocөxpä.

⁹ Cөjxta'axiөө hajxy jiiby chaaçhpөгa'añ haxөөgtuum. Cab hajxy jim mänaa yajtägө'өwa'añii Dioswiinduum, maa ja'a Dios möj jaanç yhäña'ayän, maa möcmäjaa miөөdän.

¹⁰ Coo ja'a Jesucristo hñajty yaa tөө quiäda'agy, mänitä jäya'ayhajxy ji-aanç tehñ yagjuө'өwa'añ, ja'a Diosmädia'agy hajxy hñajty tөө miäböquiäbä, ja'a hajxy hñajty tөө ñähwa'açh tөө quihwá'açhäbä. Mänitä Jesucristo hajxy wyiingudsähgө'өwa'añ. Jim mijts hñajty mbahidaambä je'eguiөxp coo ja'a Diosmädia'agy hajxy hñajty tөө mmäböjpä neby højts mijts tөө nyajnähiç'өyän.

¹¹ Ja'a mijtscөxpä højtsä Dios hoy miänaajä nba'ya'axy coo ja'a miädia'agy hajxy hoy mgudiúñät, ween hajxy jaduhñ xquiumay. Paady hajxy tөө xyajnähdijy coo hajxy mnähwa'ads mguhwá'adsät. Ween hajxy xpiuhbety ja'a miäjaahaam coo ja'a miädia'agy hajxy hoy mmäböjcät, jaduhñä hojioot hajxy mmөөdhädät.

¹² Coo ja'a hoybä weenbä hajxy jaduhñ mgudiúñät, jaduhñä cu'ugä Wiindsөñ Jesucristo hajxy wyiingudsähgө'өwät, mөөд jaduhñ mijtsä cu'ug xwyiingudsähgөөbiät. Ja'a nDioshájtäm mөөдä Wiindsөñ Jesucristo, jaaya'ay mijtsä tsooctä mayhajt xtiúñäp.

2

¹⁻² Mägu'ughajpädөjc, chámhөch nmädia'aga'añ coo ja'a Wiindsөñ Jesucristo yaa quiädaactägatsa'añ hädaa yaabä naaxwiin, mөөд coo hajxy

xmiøjya'axáanäm coo hajxy jim nhamugóøyyämät maa je'ejän. Hoorä, coo hajxy mmädoyhádät cooc tyijy tøø yhabaatnä coo ja'a Jesucristo quiädaactägatsaannä, cab hajxy mdsoj mábøgät. Cab hajxy mjootmayhádät. Cab hajxy mdsähgø'øwät. Hix, jaduhñä häna'c-hajxy näje'e tøø yhøhnda'agy cooc tyijy ja'a Dios jaduhñ tøø miäna'añ, møød cooc tyijy højts jaduhñ tøø nmäna'añ, capxyhaam, nocyhaam. Pero cab jaduhñ ñä'ä tøyyä. Paady højts mijts cham nmänuu'xta'agy

³ coo hajxy mga'a yajwiinhøønät ni weeñtiä. Hix, cab jaduhñ choj habaada'añ. Jayøjpä jaya'ayä Diosmädia'agy hajxy nämay ñajtshixø'øwa'añ. Mänitä haxøøgjäya'ay wyiingähxø'øga'añ, ja'a hñajty jiiby ca'awaambä haxøøgtuum.

⁴ Mänitä haxøøgjäya'ayä Dios miädsibø'øwa'añ møødä jäya'ayhajxy yaa wyiingudsähgøøbiä cøxiä. Jaanç tehñ yajcumayaamb hñajty jaduhñ. Mänitä yhanehm̄daact jiiby piäda'aga'añ maa Diostøjcän. Jaduhñ hñajty ñibiäda'aga'añii nebiä Diosän. Yajwiingudsähgø'øwaamb hñajty jaduhñ nebiä Diosän.

⁵ Mänáajøch jim nhitiän maa mijtsän, mänitøch jaduhñ nhuuc hawáanäm coo jaduhñ jiada'añ. Mjahmiejchp hajxy jaduhñ, túhmäts.

⁶ Cabä haxøøgjäya'ay jaduhñ choj wiingähxø'øga'añ je'eguiøxp coo yhadugyii høxtä coonä Dios yaghabáadät coo jaduhñ wyiingähxø'øgät. Mnajuøøby hajxy jaduhñ pøn mähadujp.

⁷ Tøø ja'a haxøøgwiinmahñdy tiägøøñä wädijpä. Hamee'ch jaduhñ wiädity. Jaanä jaduhñ je'e yhadújcäbä. Coø yhabáadät coo quia'a hadújcänät, mänitä mähadujpä jiøwa'adsa'añ.

⁸ Mänitä haxøøgjäya'ay jaduhñ jiaanç wiingähxø'øga'añ. Mänitnä Wiindsøn Jesucristo yaa quiädaactägatsa'añ mäjaamøød. Mänitä Jesucristo ja'a haxøøgjäya'ay yajcuhdägoyya'añ. Piäxuyhaam jaduhñ yagho'oga'añ.

⁹ Coø ja'a haxøøgjäya'ay jaduhñ wyiingähxø'øga'añ, ja'a møjcu'ugong puhbedaamb. Møcmäjaa miøødhadaamb. Mänitä hijxtahñd yajcähxø'øga'añ hoy-yagjuøøñä. Jaduhñä cu'ug hñajty wyiinhøøna'añ.

¹⁰ Haxøøgwiinmahñdyhaam hñajty miäwiinhøøna'añ. Ja'a jäya'ayhajxy hñajty tu'udägoyyaambä, je'edshajxy jaduhñ yajwiinhøønaamb. Paady hajxy hñajty tiu'udägoyya'añ coo ja'a tøyhajt hajxy hñajty tøø quia'a tsocy. Paady hajxy hñajty quia'a nähwa'ads quia'a cuhwa'adsa'añ.

¹¹⁻¹² Pønjetiä tøyhajt jaduhñ ca'a tsojp, ja'a haxøøgpä hajxy wyiinxoonäacypy. Jaduhñä Dios miäna'añ coo hajxy ween yajwiinhøøñ, møød coo ja'a høhnda'agymiädia'agy hajxy ween miäböcy, jaduhñ hajxy jiiby quia'awät haxøøgtuum.

¹³ Mägu'ughajpädøjc, xjiaanç tehñ chojpy mijtsä Dios. Ja'a mijtscøxpä højtsä Dios hoy miänaajä nnäma'ay “Dioscujú'uyäp.” Hawiinmats jaduhñ. Paady højts jaduhñ nnäma'ay je'eguiøxp coo ja'a Dios hajxy jecy xyajnähdijy coo hajxy mnähwa'ads mguhwá'adsät. Cahnä hädaa yaabä naaxwiin hñajty yhawijy tiøø'xta'agy coo hajxy jaduhñ xyajnähdijy. Coø ja'a tøyhajt hajxy tøø mmäböcy, paadiä Dios hajxy xyajnähwa'aç xyajcuhwa'aç ja'a yh-Espirituhaam.

¹⁴ Coø ja'a Dios hajxy jaduhñ xyajnähdijy, paadiä tøyhajt hajxy tøø mmäböcy mänaa højts mijts hoy nyajwiingapxø'øyän. Jaduhñ hajxy tøø xyajnähdijpä coo ja'a Wiindsøn Jesucristo hajxy xmiøødhídät cøjxta'axiøø.

¹⁵ Mägu'ughajpädøjc, tøø højts mijtsä cuhdujt madiu'u nyajnähixø'øy capxyhaam møød nocyhaam. Hamuumdu'joot hajxy jaduhñ mmäböçgät tehñgajnä. Cab hajxy nnajtshixø'øwät.

¹⁶ Xjiaančh teh̃m chójcām ja'a Wiindsón Jesucristo hajxy mөөдä Diosteedy. Tөө mayhajt hajxy xtiúunām coo hajxy tөө xyajwiinwaanöyyām cooc hajxy hoy miänaajä xmiөөdhidäänām.

¹⁷ Weenä Dios hajxy xpiuhbety coo hajxy hoy mgudiúnät, mөөд coo hajxy hoy mgápxät.

3

¹ Hoorä, mägu'ughajpädöjc, huuc pa'ya'axä Dios hajxy ja'a höjtscöxpä, ween höjtsä mädia'agy ja'a Jesucristocöxpä paquiä nöcxny nyajwa'xy, weenä cu'ughajxy miäböcy nej mijts tөө mmäbөquiän,

² mөөд ween höjtsä Dios xñäwa'añ maa ja'a haxөөghäna'c-hajxiän, maa ja'a cahwiindöyhäna'c-hajxiän. Hix, cabä jäya'ayhajxy nägөxiä miäböcy.

³ Pero tömiädiaacpä Dios. Xpiuhbedaamb hajxy jaduhñ. Xñäwa'anaamb hajxy jaduhñ maa ja'a haxөөgpän.

⁴ Jaanä jaduhñduhmbä, nmäböjcäp höjtsä Dios ja'a miädia'agy ja'a mi-jtscöxpä. Nnajuөөby höjts coo mijtsä cuhdujt mgudiuna'añ, ja'a höjts mijts cham nyajwiingapxө'өwaambiä.

⁵ Weenä Dios hajxy xjiaac yajwiinjuө'өy tiiguiөxpä hajxy jaduhñ coo xchójcām, mөөд tiiguiөxpä Jesucristo coo miee'xtujcy mänaa yaa yhitiän hädaa yaabä naaxwiin.

⁶ Mägu'ughajpädöjc, tөө höjts nmädoyhaty cooc mijts näje'e mwi'i ñuuxho'ogy, mөөд cooc hajxy näje'e mga'a nä'ägädä tuna'añ. Hoorä, jaduhñ höjts mijts nmägapxy nhane'emy ja'a Wiindsón Jesucristocöxpä coo hajxy mbuhwá'adsät pөnjaty jaduhñ wi'i ñuuxho'p, ja'a cuhdujt hajxy ca'a cudiunaambä, ja'a höjts mijts tөө nyajwiingapxө'өyabä.

⁷ Mnajuөөby hajxy coo höjts hawiinmats xpiahíxät neby höjts hoy nwäditiän. Hix, mänaa höjts jim nhitiän maa mijtsän, cab höjts hānajtj jim nnuuxho'ogy.

⁸ Caj pues. Xөөmdsuhm höjts hānajtj nduñ nxajy. Paady höjts hānajtj jaduhñ nguhdujthaty, cab höjts hānajtj ndsocy coo höjts mijts cu xpiuhbejty. Ngujuuby höjts hānajtj tijaty höjts hānajtj ngaaby.

⁹ Paady höjts hānajtj jaduhñ nguhdujthaty, jaduhñ höjts hānajtj ndsocy coo höjts mijts jaduhñ xpiahíxät, hoy höjtsä cuhdujt hānajtj nja mөөдä coo höjts mijts cu xpiuhbejty.

¹⁰ Mänaa höjts jim nhitiän maa mijtsän, jaduhñ höjts hānajtj nmägapxy nhane'emy coo hajxy nägөxiä mdun mxájät. Pөñ jaduhñ ca'a tunaamb, cabä caayyөөc hajxy mmó'owät.

¹¹ Coo höjts jaduhñ tөө nmädoyhaty cooc hajxy jaduhñ näje'e mwi'i ñuuxho'ogy, mөөд cooc hajxy näje'e mga'a nä'ägädä tuna'añ, mөөд cooc hajxy näje'e mwi'i yajtägө'өy maa cueendä hajxy mga'a mөөдän,

¹² pөnjaty jaduhñ jatcөөby, jaduhñ höjts nmägapxy nhane'emy ja'a Wiindsón Jesucristocöxpä coo hajxy jootcujc ween tiuñ xiajy, jaduhñä quiaayyөөc hajxy ñiguiudúunäxät.

¹³ Mijts, mägu'ughajpädöjc, cab hajxy mnānuuxө'өwät coo ja'a hoybä weenbä hajxy mdúnät.

¹⁴ Pөñ jaduhñ ca'a cudiunaamb neby höjts cham ngujaayän maa hädaa noquiän, myajcopcө'өwäp hajxy jaduhñ. Cab hajxy mmөөdwädiymúnät. Ween jaduhñ chāhdiuñ.

¹⁵ Pero cab hajxy mmädsiphädät. Jaduhñ hajxy mhoj mmägápxät nebiä huch nebiä puhya'ayän.

¹⁶ Yeippiä Dios ja'a hoyhajtä weenhajt. Ween mijtsä hoyhajtä weenhajt mõj may xmio'oy hoy miänaajä. Ween hajxy nägøxiä xmiøødhity.

¹⁷ Høøch Pablo, hamdsoo cø'øháamhøch cham njahmiaya'añ. Jadúhnhøch nxøø ngujaay hoy ñä'ä mädyii nocyjiootiä: Pablo.

¹⁸ Ween mijtsä Wiindsøñ Jesucristo ja'a tsooctä mayhajt xtiuunä nägøxiä. Amén.

1 Timoteo

¹ Pablohájpøch høøch. Ja'a Jesucristøch xquiuguexyhajp. Ja'a Diosteedy møødä Wiindsøn Jesucristo, mänitøch hajxy tøø xyhane'emy cooçh jaduhñ ndúnät cuguexy. Ja'a Dios hajxy jaduhñ xyajnáhwaats xyajcuhwáatsäm. Ja'a Jesucristo hajxy njøbhíxäm coo hajxy hawa'adstuum xpiäda'agáanäm.

² Timoteo, míichhøch hádaa nocy nyajnájaayøøby. Jadúhñhøch miich njuø'øý nebiä hamdsoo huungpän coo ja'a Diosmädia'agy nmäbøjcäm. Tøyhajt jaduhñ. Ja'a Diosteedy møødä Wiindsøn Jesucristo, ween miichä tsooctä mayhajt hajxy xtiuunä, ween xñäxuuch, weenä hoyhajtä weenhajt xmio'oy.

³ Hoorä, mänaa højts jim tøø nhíjtäm Efeso, mänitøch nwiinmahñdyhajty cooçh jim nnøcxät Macedonia-naaxooty. Mänitøch miich nmänuu'xtaacy coo jim mmähmø'øwät Efeso nidiuhm, coo jaduhñ jim ween mduñ wiindsøn maa ja'a Diostøjcän. Jadúhñhøch miich cham nnämáaguumbä coo jim mjaac túnät. Hix, jii jäya'ayhajxy näje'e, cabä Diosmädia'agy hajxy hoy yajnáhixø'øý neby højts nyajnáhixøøyyäm. Wiingaty hajxy yajnáhixø'øý. Mhójäp jaduhñ coo hajxy jaduhñ wiing quia'a yajnáhixøøñät.

⁴ Jaanä jaduhñduhmbä, mhójäp je'ebä pønhatiä nähap hajxy wi'i miädiaacp, møød pønhati yajcopcøøby tijatiä jecyjiäya'ayhajxy hijty xiøhaty. Cab jaduhñ choobaady coo jaduhmbä capxy coo jaduhmbä mädia'agy hajxy tehngajnä yajcapxiø'øý. Jue'e tsoobaatp coo ja'a Diosmädia'agy hajxy nmäbøjcäm coo ja'a Dios hajxy xpiädäacäm hawa'adstuum.

⁵ Pero jaduhñä Dios jioot chocy coo hajxy hamuumdu'joot nniçhojc nnibia'häyóowämät hamiñ haxøpy. Pønhati howyiinmahñdy møød, je'ehajxy jaduhñ hamuumdu'joot niçhojc nibia'häyóowäp, møød pønhati haxøøgwiinmahñdy ca'a møød, møød pønhatiä Diosmädia'agy hamuumdu'joot mähøjp.

⁶ Tøø jäya'ayä Diosmädia'agy hajxy ñajtshixøøñä näje'e. Tøø hajxy jaduhñ tiu'udägoonä. Xiøøbä hajxy yajcapxiø'øý mädyii ca'a tsoobaatp.

⁷ Jaduhñä jioot hajxy jia wi'i piäda'agy coo ja'a jecyquihdujt hajxy yajnáhixø'øwät, ja'a Moisés jecy quiujähyyäbä. Pero cab hajxy wyiijnjuø'øý neby hajxy jia wi'i yajnáhixø'øwa'añ cooc tyijy tiøyyä.

⁸ Coo ja'a jecyquihdujt hajxy jaduhñ hoy nyajtúunämät, mänit jaduhñ tiuungpaady. Tøyhajt jaduhñ, túhmäts.

⁹ Paadiä Dios ja'a jecyquihdujt piädaacy coo ja'a haxøøgjäya'ayhajxy jaduhñ quiumädowät, ca'a jie'eguiøxpä ja'a hojiäya'ayhajxy. Tøyhajt jaduhñ, túhmäts. Jue'eçh jaduhñ nnänøømby ja'a haxøøgjäya'ayhajxy, pønhatiä Diosmädia'agy ca'a mähøjp, møød pønhatiä Dios ca'a wiingudsähgøøby, møødä cubojpä cugädieebiähajxy, møød pønhatiä haxøøgwiinmahñdy møød, møød pønhatiä Dios mägapxtägooby, møød pønhatiä tiaj tieedy yagho'p, møødä jäya'ay-yagho'pähajxy,

¹⁰ møød pønhatiä wiingto'oxiøjc møødtsänaaby, møød pønhatiä miäya'adiøjc møødmaab, møødä jäya'amiee'tspähajxy, møødä høhndaacpähajxy, møødä mänähøønøøbiähajxy, møød pønhatiä hoguiapxiä homiädia'agy hajxy ca'a cud-iuumb.

¹¹ Hädaa hoguiapxy hädaa homiädia'agy hädaaduhmbä, jim jaduhñ myiñ cujaay maa ja'a Diosmädia'aguian coo ja'a Dios hajxy tøø xpiädäacäm hawa'adstuum. Dióshøch jaduhñ tøø xyajnáhdijy coo ja'a miädia'agy nya-jwá'xät. Jaançh tehñ jiootcujä Dios jaduhñ.

¹² Haa ja'a Wiindsón Jesucristo, je'ečhä mäjaa tøø xmio'oy. Páadyhøch jaduhñ nnäma'ay "Dioscujú'uyäp" cooçh tøø xwyiinguexy cooçhä miädia'agy jaduhñ nyajwá'xät. Xyaghijxnájxhøch jaduhñ cooçh hñajty hoy nduna'añ,

¹³ hóyhøch hijty haxøøg nja wiingapxpety. Nmädsibóobiøch hijty. Nhøxpäbóobiøch hijty pønjaty mäßøjp ja'a Jesucristocøxpä. Pero cábøçhä Dios xyajcumädooy. Xñäxúu'tshøch jaduhñ je'eguiøxp cooçh hñajty nga'a nnajuø'øyñä cooçh hñajty haxøøg njatcø'oy.

¹⁴ Mänítøçhä Dios ja'a tsooctä mayhajt møj may xtiuunä. Mänítøch xpiädaacy tu'ugmädia'agy mөөдä Jesucristo. Páadyhøçhä Diosmädia'agy nmäßøjnä. Páadyhøçhä jäya'ay nägøxiä ndsojc nba'häyoonä.

¹⁵ Paadiä Jesucristo yaa yhooyy hädaa yaabä naaxwiin, ja'a cubojpä ja'a cugädieebiähajxy hoy yajnähwa'açh yajcuhwa'açhii. Tehm tiøyhajt jaduhñ. Tsøc hajxy hamuumdu'joot mäßøjcäm. Høøçh, hanáxiøçhä pojpä cädieey hijty nmөөдä may. Cab ndijy pøn hijty xmiäbaady nébiøçhä pojpä cädieey hijty nmөөдä.

¹⁶ Hóyhøçhä pojpä cädieey hijty may nja mөөдä hanaxiä, mänítøçhä Dios xñäxuu'ch, jaduhñä Jesucristo yajcähxø'cy cooçh hñajty xjiaançh tehñ miee'xtucy, weenä cubojpä cugädieebiähajxy jaduhñ wyiinjuø'oy coo hajxy hawiinmats miäbøgät ja'a Diosmädia'agy ja'a Jesucristocøxpä, mөөд ween hajxy jaduhñ wyiinjuøobiä coo hajxy hoy jiugyhada'añ cøjxta'axiøø nebiä Dios jiugyhatiän.

¹⁷ Tsøgä Dios hajxy hoy miänaajä wiingudsähgøøyyäm. Nidiuhm jaduhñ miähane'emy cøjxta'axiøø. Cab jaduhñ mänaa yho'oga'añ tiägoyya'añ. Cab hajxy jaduhñ mänaa nhíjäm. Tehm tiøyhajt jaduhñ.

¹⁸⁻¹⁹ Huong Timoteo, chámhøch miich nwiingapx njøjcaxø'oy coo ja'a Diosmädia'agy hamuumdu'joot mmämøjtäná'awät, mөөд coo tehñgajnä mmäßøgät, mөөд coo hojiot howyiinmahñdy mjaac panøcxät. Jaduhñ miichä Dioscugapxyhajxy jecy tøø xyhuuc mädiaacpä coo miich jaduhñ mgudiuna'añ. Najtscapxøøyyä hajxy jaduhñ ja'a Dioshespíritu. Jii jäya'ayhajxy näje'e, coo ja'a yhojiotä yhowyiinmahñdy hajxy tøø ñajtshixø'oy, paady hajxy tøø tiu'udägoonä. Cabä Diosmädia'agy hajxy miäßøjnä.

²⁰ Jaduhñä Himeneohajxy tøø jiaty mөөдä Alejandro. Tøøçhä møjcu'ugong hajxy nyajcø'ødägø'oy, weenä Dios hajxy jaduhñ miänuu'xta'agy coo hajxy miämee'xøøjät, mөөд coo hajxy ween wyiinjuø'oy coo jaduhñ yhaxøøgä coo ja'a Dios hajxy ñähojy.

2

¹ Hoorä, chámhøch nyajwiinxiic nyajwiingapxø'øwa'añ nebiatiä Dios hajxy nba'yaaxmújcämät. Tsøgä Dios hajxy mänuu'xtáacäm ja'a jäya'aguiøxpähajxy nägøxiä mäduhñtiä hajxy yaa chäna'ay hädaa yaabä naaxwiin. Tsøgä Dios hajxy nämáayyäm "Dioscujú'uyäp."

² Pønjaty hajxy xyhanéhmäm, je'eguiøxpä Dios hajxy tsøc mänuu'xtáacäm, mөөдä gobiernähajxy, mөөдä gobernadorhajxy, mөөдä cuduunghajxy. Jaduhñ hajxy hagujc jootcujc nhíjtämät. Jaduhñä cu'ug hajxy xquia'a hadsíjpämät. Jaduhñä Diosmädia'agy hajxy hoy ngudiúunämät. Jaduhñä Dios hajxy hoy nwiingudsähgøøyyämät.

³ Hahixøøby jaduhñ coo ja'a Dios hajxy jaduhñ nmänuu'xtáacämät ja'a gobiernäcøxpähajxy. Jaduhñä Dios hajxy xquiumáayyämät. Jaaya'ay hajxy jaduhñ xyajnähwaats xyajcuhwáatsäm.

⁴ Jaduhnä Dios jioot chocy coo hajxy nägøxiä nnähwaats nguhwáatsämät mäduhñtia hajxy yaa ndsánáayyäm hädaa yaabä naaxwiin, møød coo ja'a tøyhajt hajxy nwiinjuøøyyämät ja'a Jesucristocøxpä.

⁵⁻⁶ Hix, tu'uquiä Dios hajxy nDeedyhajtäm. Jaanä jaduhnduhmbä, tu'jäya'ay hajxy jim xñähgapxtúutäm Dioswiinduum. Ja'a Jesucristo je'e. Mänitä Dios miänaañ coo ja'a Jesucristo yaa jäya'ayhádät hädaa yaabä naaxwiin. Mänitä Jesucristo hamdsoojoot ññähdujcä. Mänit hajxy nägøxiä hoy xñähho'túutäm. Jaduhn nbojpä ngädieey hajxy nägøxiä xyajnáhwaats xyajcuhwáatsäm.

⁷ Páadyhøchä Dios xpiädaacy cooch xquiuguexyhádät coochä mädia'agy jaduhn nyajwá'xät coo ja'a Jesucristo hajxy tøø xñähho'túutäm, møød coochä jäya'ayä Diosmädia'agy nyajwiingapxø'owät, ja'a hajxy ca'a judíosä, ween hajxy jaduhn miäböcy, møød weenä tøyhajt hajxy jaduhn wyiinjuø'oy. Tømiädiäacpøch jaduhn, cáböch nhøhnda'agy.

⁸ Jaduhnds je'e, jadúhnhøchä njoot chocy coochä nmäya'adiøjcä Dios hajxy pia'yá'axät, hoy ñä'ä majatiä hajxy mhamugø'oy Dioswiingudsähgøøbiä. Hojioot howyiinmahñdymøød hajxy jaduhn mba'yá'axät, ca'a yhadsip ca'a yhajootma'adä, ca'a yhaxøøgwiinmahñdymøødä.

⁹ Jaanä jaduhnduhmbä, cáböchä njoot chocy coo ja'a to'oxiøjc-hajxy hochähdiuunä ñibiäda'agøøjät. Cabä quiuhwaay hajxy hanaxiä yajcopcø'owät. Cabä oro hajxy piädá'agät ni perlas. Cabä wit tsowjatypä hajxy miäwädítät.

¹⁰ Jaduhnä jioot hajxy piädá'agät coo ja'a mayhajt hajxy tehngajnä tiúnät, jaduhn hajxy yajcähxø'ogät coo ja'a Dios hajxy tøyhajt wyiingudsähgø'oy hamuumdu'joot.

¹¹ Hamoñ haducy ja'a to'oxiøjc-hajxy jim yhamädoowhídät maa hajxy naxy mhamugø'oyän. Jaduhnä Diosmädia'agy hajxy hoy yhabøgät. Møød mee'xxieemy hajxy jim yhídät.

¹² Jadúhnhøch nmägapx nhanehmbä coo ja'a to'oxiøjcä Diosmädia'agy hajxy jim quia'a yajnáhixø'owät maa hajxy naxy mhamugø'oyän. Hamoñ haducy hajxy jim ñä'ägä hídät. Cabä to'oxiøjc cuhdujt hajxy miøødä coo ja'a ya'adiøjc hajxy yhoj yá'axät.

¹³ Hix, ja'a Adán, jawyiin je'e yhädiuunä; høxhaamä Eva jiaac hädiuunä.

¹⁴ Jaanä jaduhnduhmbä, ja'a Eva jaduhn wiinhøhñä ja'a møjcu'ugong, ca'a yhAdángä. Jaduhnä Eva quiädiehchøhñ.

¹⁵ Paadiä to'oxiøjc-hajxy jiaanç tehñ chaächpøcy coo yhuunghajxy myiñ miech. Pero coo ja'a Dios ja'a miädia'agy hajxy tehngajnä miäböjcät, jaduhnä piojpä quiädieey hajxy yajnáhwa'ads yajcuhwa'adsaanäxä. Jaduhnä Dios chojpä coo ja'a to'oxiøjcä mabøjpädøjc hajxy hamuumdu'joot choc pia'häyówät, møød coo hojioot howyiinmahñdy hajxy miøødhádät, møød coo hajxy mee'xxieemy yhídät.

3

¹ Hahixøøby jaduhn coo ja'a mjoot hajxy mbädá'agät coo hajxy mdúnät wiindsøn maa ja'a mabøjpädøjc-hajxiän. Hodiuunğ jaduhn. Tehñ tiøyhajt jaduhn.

² Pøn jaduhn tuumb wiindsøn maa ja'a Diostøjcän, tsipcøxpä howyiinmahñdy miøødhádät. Jagooyyä to'oxiøjc tu'ug yaghídät, ca'a mietsc ca'a tiägøøgä. Cabä vino comjaty yhú'ugät. Cabä haxøøgwiinmahñdy miøødhádät. Hoy wiädítät. Coo pøn miédsät tøghayohbiä maa ja'a tiøjcän, piu'umió'owäp quioñdymó'owäp jaduhn. Jiädäp yajnáhixø'ow jaduhn.

³ Cab yhu'ug cab jiøø'xät. Cab chiptúnät. Mee'xxieemy jaduhñ quiapx miädiá'agät. Cab tii yajtsiptá'agät. Cabä xädø'øñ yhadsógät.

⁴ Pøn jaduhñ tuumb wiindsøn maa ja'a Diostøjcän, tsipcøxpä yhuungä tio'oxy hoy miägapx yhané'emät, weenä yhuunghajxy miädia'agymiäböcy, ween wyiingudsähgø'øyii ja'a yhuung.

⁵ Hix, pønä yhamdsoo huungä yhamdsoo to'oxy hoy ca'a hane'emaamb, cab hoy miähane'ema'añ maa ja'a Diostøjcän.

⁶ Cab jaduhñ yhahixø'øy coo ja'a naamdägø'øbä tiúnät wiindsøn maa ja'a Diostøjcän, coo jaduhñ ñä'ä niguiumayøøjät. Wehñdä jaduhñ quiumädówät nebiä møjcu'ugong quiumädooyyän.

⁷ Pøn jaduhñ tuumb wiindsøn maa ja'a Diostøjcän, tsipcøxp jaduhñ hoy wiädítät maa jäya'ayhagujcän, ja'a hajxy ca'a Diosmädia'agymiäböjpä. Jaduhñ quia'a nähøjøjät, jaduhñ quia'a yajtu'udägoyyøøjät ja'a møjcu'ugong.

⁸ Jaanä jaduhñduhmbä, ja'a ya'adiøjc-hajxy jim mäbuhbejpä maa ja'a Diostøjcän, tsipcøxp hajxy hoy jiäya'ayhädät. Cab hajxy ñä'ä metscapx ñä'ä tægøøgcápät. Cab hajxy yhu'ug cab hajxy jiøø'xät. Cabä jäya'axiädø'øñ hajxy yhadsógät.

⁹ Tsipcøxpä tøyhajt hajxy miäböğät ja'a Jesucristocøxpä, ja'a hijty cuyu'učhpä. Howyiinmahñdymøød hajxy jaduhñ miäböğät.

¹⁰ Pønhatiä jioot tsojp coo hajxy miäbuhbédät maa ja'a Diostøjcän, cab hajxy mdsoj pädá'agät. Ween hajxy jayøjp mhuuc hijxmach pø hoy hajxy hñajty tiuna'añ. Coö hajxy hñajty tøø mhijxmach coö howyiinmahñdy hajxy jiaanč møødä, mänit hajxy mbädá'agät coö hajxy jaduhñ miäbuhbédät.

¹¹ Jaanä jaduhñä to'oxiøjc-hajxypä, ja'a hajxy jim mäbuhbejpä maa ja'a tsajtøjcän. tsipcøxp hajxy hoy jiäya'ayhájpät. Cab hajxy pøn ñähøønó'owät. Cab hajxy yhu'ug cab hajxy jiøø'xät. Hamuumdu'jootä hoybä weenbä hajxy quiudiúnät cøxiä.

¹² Hoorä, ja'a mäbuhbejpädøjc-hajxy, ja'a ya'adiøjc-hajxypä, jagooyyä to'oxiøjc hajxy tu'ug yaghídät. Hoy ja'a yhuungä tio'oxy hajxy miägapx yhané'emät.

¹³ Ja'a mäbuhbejpädøjc-hajxy jaduhñ hoy tuumbä, cumayáanäp hajxy jaduhñ ja'a mabøjpädøjc, møød jaduhñä møjjuøhñdy hajxy miøødhädät coö hajxy hñajty miädia'aga'añ coog hajxy miäböcy ja'a Jesucristocøxpä.

¹⁴⁻¹⁵ Jaduhñhøchä njoot jia tsocy coöch jim mobädajpä nnøcxät maa miičhän. Pero coöch jaduhñ jim nga'a nä'ä tsoj nøcxät, páadyhøch hädaa nocy nyajnäjaayø'øy, jaduhñ mnajuø'owät nebiä mabøjpädøjc-hajxy jim hoy yhidät maa ja'a Diostøjcän. Hoy miänaajä Dios yhity. Hoy miänaajä Dios ja'a mabøjpädøjcä tøyhajt yajnahixø'øy ja'a Jesucristocøxpä. Hamuumdu'joot hajxy jaduhñ ñäwa'añii.

¹⁶ Jaanč tehñ miøj jaanč tehñ jiaanč hädaa mädia'agy jaduhñ ja'a Jesucristocøxpä, coö hajxy hoy xyajnahwaats xyajcuhwáatsäm. Tehñ tiøyhajt jaduhñ. Cuyu'učhä Dios hädaa mädia'agy hijty yaghity. Mänit hajxy jaduhñ tøø xyajwiinjuøyyäm. Hoorä, coö ja'a Dios jaduhñ miänaañ, mänitä yHuung yaa quiejxy hädaa yaabä naaxwiin. Ja'a Jesucristo je'e. Jaduhñ je'e jiäya'ayhajty neby højtshájtäm. Mänitä Dioshespíritu jaduhñ yajcähxø'cy coö ja'a Jesucristo yhity hawa'adstuum. Mänitä Jesucristo yhiixä ja'a Diosmoonsä, ja'a hajxy jim tsohmbä tsajpootyp. Mänitä Jesucristo jim ñøcxy tsajpootyp. Mänitä mädia'agy wia'xy ja'a Jesucristocøxpä maa ja'a jäya'ayhajxy chäna'ayän, ja'a ca'a judíoshajxypä. Mänitä jäya'ayhajxy yaa may miäböjcy ja'a Jesucristocøxpä hädaa yaabä naaxwiin.

4

1-2 Hoorä, howyiinjuøøñä ja'a Dioshespíritu tøø miäna'añ coogä mäwiinhøhmbähajxy piädø'øga'añ. Jadúhñäc hajxy ñibiäda'aga'añii nebiä hoyhäna'cän. Pero yhamdsoo cuhdújtäc hajxy yajtunaamby. Haxøøgcuhdújtäc hajxy miøødhadaamby møødä haxøøgjuøhñdy. Jadúhñägä mäwiinhøhmbähajxy yajtägø'øwa'añii ja'a møjcu'u. Jadúhñäc hajxy ñajtsapxø'øwáañäxä nébiägä høhnda'agymiädia'agy hajxy yajnähixø'øwät. Mänitägä mabøjpädøjcä høhnda'agymiädia'agy hajxy nämay yhamädoowhida'añ. Mänitäc hajxy jaduhñ miäbøga'añ. Mänitägä tømiaädia'agy ja'a Jesucristocøxpä hajxy ñajtshixø'øwa'añ.

3-4 Jadúhñägä mäwiinhøhmbähajxy hñajty yhøhnda'aga'añ cooc tyijy yhaxøøgä coo hajxy nbøjcämät, møød cooc tyijy quia'a hahixø'øy coo hajxy cøxiä wiinä njøø'xämät, hoy ja'a Dios cøxiä wiinä tøø jia päda'agy. Hix, tijatiä Dios tøø piäda'agy, haagä hoy je'e. Hahixøøby jaduhñ coo hajxy nguhibøjcämät, pønjetiä tøyhajt mabøjp ja'a Jesucristocøxpä. Coo hajxy jaduhñ nguhibøjcäm, jaduhñä Dios hajxy nnämäayyämät “Dioscujú'uyäp.” Y cab jaduhñ yhahixø'øy coo hajxy nwiingápçämät.

5 Coo ja'a Dios jaduhñ tøø miäna'añ, møød coo ja'a Dios hajxy nba'yáaxäm, jaduhñä Dios cøxiä wiinä quiunuu'xy.

6 Naxy miichä mabøjpädøjc jaduhñ mdehm ñajtsapxø'øwät nébiøch cham nmädia'aguiän, jaduhñä Jesucristo hoy mbuhbédät, jaduhñä homiädia'agy hoy mjaac habøgät ja'a Jesucristocøxpä, ja'a hajxy nmabøjcämbä. Je'e miich mnä'ägä panøcxyhajpy.

7 Cabä nāhapmädia'agy myajcopcø'øwät nebiä teedyhaphajxy wyl'i miädia'aguiän. Høhnda'agymiädia'agy je'e jaduhñ. Jimä mjoot mnä'ägä päda'agät nebiä Diosmädia'agy maas hoy mjaac panøcxät.

8 Tsoobaatp jaduhñ siémpräm coo nni'xä ngopc hajxy møc nyaghíjtämät. Pero maas nä'ägädä tsoobaatp coo ja'a Diosmädia'agy hajxy tehngajnä nbanøcxämät. Hix, coo hajxy jaduhñ hoy ngudiúunämät, jaduhñä Dios hajxy tøø xyajwiinwaanøøyyäm coo hajxy hodium xyaghidáañäm hoy miänaajä, møød jada'ahaty, møød miimnä mejtsnä. Jaduhñ hajxy xyagjugyhadáañäm cøjxta'axiøø neby je'e jiugyhatiän.

9 Tehm tiøyhajt hädaa mädia'agy jaduhñ. Tsøg hajxy hamuumdu'joot mabøjcäm.

10 Coo ja'a Dios hajxy jaduhñ xyaghidáañäm hodium hoy miänaajä, paady hajxy møc nduun nxájjäm. Jujquiä Dios. Coo ja'a miädia'agy hajxy nmabøjcäm coo ja'a Jesucristo ja'a jäya'ay nägøxiä tøø ñähho'tu'udy, paady hajxy xya-jnähwa'ads xyajcuhwa'adsáañäm.

11 Jaduhñä mabøjpädøjc mwiingapx møjcapxø'øwät nébiøch naamnä tøø nmädia'aguiän.

12 Tehngajnä hoguiuhdujt myaghídat, jaduhñ pøn xquia'a péxät, hoy jomøjt may mga'a ja møødä; møød jaduhñä mabøjpädøjc xpiahíxät. Hoy yaxón mgapx mmädiä'agät. Caj mänaa mgapxtägóyyät. Hoy piønä mdsoc mba'häyówät. Hoy ja'a Diosmädia'agy mmabøgät. Mmøødhádäbä howyiin-mahñdy.

13 Mäduhñtiøch jim nga'a tsoj nøcxy maa miichän, tehngajnä Diosmädia'agy mgapx mmädiä'agät coo hajxy jim naxy mhamugø'øy maa ja'a Diostøjcän. Jaduhñä mabøjpädøjc myajwiinxiiic myajwiingapxø'øwät.

14 Mänaa miichä majjäya'adiøjc jim xquiø'ønähgapiän maa ja'a Diostøjcän, mänit miichä Dioshespíritu xñägäpçy cooc miichä Diosmädia'agy myajwa'xa'añ. Mänit miichä häna'c jaduhñ xñajtsapxøøyyä. Mänit miichä Dios

mäjaa xmiooyy coo ja'a miädia'agy jaduhñ myajwá'xät. Naxy mdehm jiah-miejtstá'agät coo ja'a mäjaa jaduhñ xmiooyy. Caj mnajtshixó'owät.

¹⁵ Jaduhñä mjoot mbädá'agät coo ja'a Diosmädia'agy jaduhñ hamuumdu'joot myajwá'xät hoy miänaajä. Coo jaduhñ mgudiún mguñáxät, jaduhñä cu'ug xyhíxät coo jaduhñ hoy myajtu'uyo'oy.

¹⁶ Niyajcopcø'owøø nej mwädity, nej myajnáhixø'oy. Tehñgajnä jaduhñ mgudiún mguñáxät, jaduhñ mnähwa'ads mguhwá'adsät näguipxy møødä jäya'ayhajxy hamädoowhijpä.

5

¹ Cabä majjäya'adiøjc mhoj myá'axät. Mee'xxieemy mwiingapx mjøjcaxø'owät nebiä mhamdsoo teediän. Møødä muutsc-häna'c-hajxypä, jaduhñ mmägapx mhané'emät nebiä mhamdsoo puhya'ayän.

² Jaanä jaduhñä tsø'daj mmägapx mhanéhmbät nebiä mhamdsoo tajjän. Møødä to'oxiøjc-hajxy muutspä, jaduhñ mmägapx mhanéhmbät nebiä mhamdsoo puhdo'oxiän. Caj mmägapxtägöyyät.

³ Jii yaamgto'oxyhajxy näje'e, cab hajxy pøn ñä'ägädä møødä. Tøyhajt hajxy ñidiuhmhaty. Je'eds hajxy mbuhbédäp.

⁴ Pero ja'a yaamgto'oxyhajxy jaac jimbä, pø jimä yhuunghajxy, pø jimä yhoc-huunghajxy, ween hajxy jaduhñ piuhbedyii nägø'ø nädecypiä ja'a yhamdsoo huunghajxy, ja'a yhamdsoo hoc-huunghajxy. Jaduhñä mabøjpädøjc-hajxy quiumayøøjät ja'a Dios coo tiaj tieedy hajxy jaduhñ piuhbejtägätsät. Jaduhñ hajxy yajcähxø'ögät coo ja'a tiaj tieedy hajxy jiaanč wiingudsähgø'oy.

⁵ Hix, ja'a yaamgto'oxyhajxy tehñ tiøyhajt nidiuhmhajpä, ja'a Dios hajxy yhajodhajpy. Xøømdsuhñ hajxy miänuu'xta'agy.

⁶ Pero ja'a yaamgto'oxy ja'a Dios hajxy ca'a hajodhajpä, coo ja'a jioot hajxy chógät coo hajxy xyi'ig xioonda'aga'añ, jaduhñä Dios yhixy nebiä ho'ogypiän, hoy hajxy jia jujyñä, hoy hajxy jia tsuxnä.

⁷ Jaduhñä mabøjpädøjc mwiingapx mjøjcaxø'owät coo ja'a homiädia'agy hajxy pedyii ween quiudiuñ, jaduhñ hajxy quiumayøøjät ja'a cu'ug.

⁸ Pønhatiä jiuju miägu'ug ca'a hijxp ca'a mähäyoob møødä yhuung møødä tio'oxy, tøø ja'a Diosmädia'agy hajxy ñajtshixøøñä neby hajxy hijty miäbøquiän ja'a Jesucristocøxpä. Maas haxøøg hajxy jiatcø'oy quejee häna'c-hajxy ca'a nä'ägä mabøjpä.

⁹ Mgujáhyäbä yaamgto'oxiä xiøø hajxy pønhati hajxy mbuhbedaamby. Je'e xiøøhajxy pédäp pønhati tagøøghii'x jomøjt tøø yhabéjtäxä, møød pønhatiä ya'adiøjc tu'uquiä tøø miøødsäna'ay,

¹⁰ møød pønhatiä cu'ughajxy ñänøømby coo ja'a mayhajt hajxy tøø tiúunäxä, møød pønhatiä ñøøxä miajc hoy yajxón tøø yajtso'ogy tøø yajyeegy, møød pønhatiä pu'umiooby coñdymooby ja'a jäya'ayhajxy jim miimb mejtspä maa ja'a tiøjcän, møød pønhatiä mabøjpädøjc cø'øbujp tecypiujp, møød pønhatiä puhbejp ja'a jäya'ayhajxy häyohmbaatpä, møød pønhatiä jioot tøø piäda'agy coo ja'a hoybä weenbä hajxy quiudiún quiuñáxät hoy ñä'a tiijä. Ja'a yaamgto'oxy hädaa hoguiuhdujt jaduhmbä hajxy yajtuumbä, je'eds hajxy mbuhbédäp.

¹¹⁻¹² Pero ja'a yaamgto'oxy tsaanbä muutspähajxy, cabä xiøøhajxy quiujähyyäxät, cab hajxy mbuhbédät. Hoy hajxy tøø jia mäna'añ coogä Jesucristo hajxy hamuumdu'joot miäduna'añ maa ja'a tsajtøjcän, mänitä jioot hajxy näje'e piäda'agy coo hajxy piøjtägätsa'añ coo hajxy yhuuctägätsa'añ. Cabä Jesucristo hajxy jaduhñ hoy miädunaanä. Y tu'udägöyyäp hajxy jaduhñ.

¹³ Jaanä jaduhnä yaamgto'oxy tsaanbä muutspä hajxy näje'e jiajpä, wi'i ñuuxho'p hajxy, tøjc-tøjc hajxy wiädity. Wi'i miädia'agy-yajnajxp hajxy. Ñä'a yaghadsoy ñä'a yajpøgø'oy hajxy cøxiä tøø jiaty. Cøxiä hajxy ñä'a pamädia'agy mädyijaty ca'a jagä hawiinmats.

¹⁴ Jadúhnhöchä njoot jia tsocy coo ja'a yaamgto'oxyhajxy piøjtägátsät, ja'a hajxy tsaanbä muutspä, weenä ñøøxä miajc hajxy jaduhn jiaac yajtso'ogy, weenä jiøønä tiøjc hajxy hoy yajxón cwieendähaty, jaduhn hajxy quia'a hoj quia'a ya'axøøjät ja'a miädsiphajxy.

¹⁵ Hix, tøø hajxy näje'e tiu'udägoonä. Tøø ja'a møjcu'ugongä miädia'agy hajxy jiøjpøgøyyänä.

¹⁶ Mijts, puhdo'oxytiøjc, pø jim mijtsä yaamgto'oxy mmøødä maa ja'a mjujy maa ja'a mmägu'ughajxiän, ween hajxy jaduhn mbuhbety, jaduhnä mabøjpädøjc-hajxy quia'a taj quia'a máyät neby hajxy jaduhn piuhbédät. Hix, jaduhnä mabøjpädøjcä yaamgto'oxy hajxy hoy piuhbédät, ja'a hajxy pøn ca'a jaančh møødpä.

¹⁷ Ja'a majjäya'adiøjc-hajxy, ja'a hajxy jim hoy tuumbä wiindsón maa ja'a Diostøjcän, ween hajxy hoy miäjuyii, møødä Diosmädia'agy hajxy yajñähixøøbiä. Ween hajxy nä'a tægø'øbä miäjuyii.

¹⁸ Hix, jaduhnä Diosmädia'agy miäna'añ: "Maa ja'a weeyä trigo hajxy hñajty myajtehndse'ediän, weenä weeyä jaduhn piuhjøø'xy." Jaanä jaduhn miänaambä: "Weenä cuduumbä cubøjpä miäjuyii."

¹⁹ Coo ja'a Diostøgootypä wiindsón ñäxø'owø'owøøjät, mänitä mæxøhbä miädia'agy miäbøjcäxät pø jimä capxtøøbä miøødä mejtstägøøg. Pø cab jaduhn miøødä, cabä miädia'agy jaduhn miäbøjcäxät.

²⁰ Ja'a Diostøgootypä wiindsønhajxy hoy ca'a wädijpä, mhójäp myá'axäp jaduhn maa ja'a mabøjpädøjc-hajxy nägøxiä yhamugø'oyän, weenä miäwiindsønhajxy jaduhn chähgø'oy.

²¹ Miičh nwiingapx njøjcapxøøby coo hädaa cuhdujt jaduhmbä tsipcøxp mgudiún mguñáxät. Cabä mmähäna'c nä'a nägoobä mnä'a tsaächtiúnät, ni caj nä'a nägoobä mbuhbédät. Tu'cuhdujtä häna'c mnä'a híxät, hoy jaduhn xjia mägu'ughaty, hoy jaduhn xjia mädsipaty. Xyhíxäbä Dios jaduhn møødä Jesucristo, møødä Diosmoonsähajxy jim tsajpootypä, ja'a hajxy wiimbíyyäbä.

²² Coo pøn hñajty tiägø'owa'añ tuumbä tsajtøjwiindsón, caj mdsoj cø'ønähgábät. Jayøjp mwiinmahñdyhádät hodiägaamby pø hoy hñajty tiuna'añ, pø caj. Hix, coo jaduhn ñä'a tu'udägóyyät, wehndä miičh cu'ug xñänómät cooc tyijy miičh tøø mbuhbety. Howyiinmahñdy myaghídäp hoy miänaajä.

²³ Timoteo, naxy miičh mjootpädø'ogyii. Hahixøøby coo vino weenñtiä mhú'ugät. Cabä nøøyyähajtiä mhúucnät.

²⁴ Jii jäya'ayhajxy näje'e, coo hajxy mänaa quiädieey, paquiä jaduhn wyiingähxø'ogy, cahnä hajxy hñajty miøjya'axyii haguyc. Pero jii wiinghäna'c-hajxy, cabä piojpä quiädieeyhajxy choj wiingähxø'ogy, høxtä coonä hajxy hñajty tøø miøjya'axyii haguyc.

²⁵ Jaanä jaduhnduhmbä, jii jäya'ayhajxy näje'ebä, paquiä jaduhn wyiingähxø'ogy coo hojioot hajxy jiaančh tehñ miøødä. Hoy jaduhn quia'a ja tsoj wiingähxø'ogy, tsipcøxp cujey wyiingähxø'oga'añ.

6

¹ Mijts mabøjpädøjc, nämay hajxy mhity cudoogø'oy. Naxiä mwiindsón hajxy mdehm wyiingudsähgø'owät. Naxy hajxy jaduhn mdehm

miädia'agymiäbógät. Hix, coo hajxy jaduhñ hoy mga'a cudiún mga'a cuñáxät, wehñdä mwiindsón ja'a Dios haxøøg ñänómät møødä Diosmädia'agy.

² Jaanä jaduhñduhmbä, pønatiä wyiindsónä Diosmädia'agy mäßøjp, cabä mwiindsón hajxy mbéxät. Pero hamuumdu'joot hajxy mwiingudsähgø'owät. Maas hoy hajxy jaduhñ mmädia'agymiäbógät je'eguiøxp coo ja'a Diosmädia'agy miäßøjpä, møød coo hajxy mmøødniçhogyii. Naxiä mäßøjpädøjc hädaa cuhdujt jaduhmbä mdehm wyiingapx mdehm jiøjcaxø'owät.

³ Jii häna'c-hajxy näje'e, wiing hajxy yajnähiçø'øy. Cabä hoguiapxiä homiädia'agy hajxy wyiinjuø'owa'añ neby hajxy nyajnähiçø'øyyäm ja'a Wiindsón Jesucristocøxpä coo ja'a hoybä weenbä hajxy jaduhñ nbáatäm.

⁴ Ja'a häna'c-hajxy jaduhñ wiing yajnähiçø'øbiä, jaanç tehñ ñiguiumáayyap hajxy jaduhñ cooc tyijy hajxy jiaanç tehñ jiaty, cooc tyijy hajxy jiaanç tehñ ñajuø'øy. Pero cab hajxy tii ñä'ägädä jaty, cab hajxy tii ñä'ägädä najuø'øy. Hanaxiä mädia'agy hajxy yajtsip yajma'adø'øy, ja'a ca'a tsoobaatpä. Coo hajxy jaduhñ jiatcø'øy, paady hajxy cøxiä wiinä yajcapxiø'øy, paady hajxy miänähøønø'øy, paady hajxy haxøøgjaty ñiñäma'ayii.

⁵ Coo hajxy jaduhñ jiaanç tehñ chiptsocy, paady hajxy jiaanç tehñ ñibiamädsibø'øyii. Jaanç tehñ yhaxøøgä wyiinmahñdyhajxy. Tøø ja'a tøyhajt hajxy ñajtshixø'øñä. Wi'i yajmäjuyaamb hajxy, paady hajxy ñibiäda'agyii cooc tyijy ja'a Diosmädia'agy hajxy miäßøcy, cooc tyijy hajxy yajnähiçø'øy. Naxiä häna'c jaduhmbä mdehm piuhwá'adsät.

⁶ Coo ja'a Diosmädia'agy hajxy hoy nmäßøjcämät, jaduhñä hoyhajtä ween-hajt hajxy møj may nbáatämät, jaduhñ hajxy jootcuyc nhíjtämät.

⁷ Haa ca'a, coo hajxy yaa nmiin ngáhwäm hädaa yaabä naaxwiin, cab hajxy tii nmämiin nmägáhwäm. Nähwa'ads hajxy nmaaxhuunghájtäm. Jaanä jaduhñduhmbä, coo hajxy nho'c ndägóoyyäm, mänit hajxy cøjx nhøxhó'cäm tijaty hajxy yaa nmøødhájtäm hädaa yaabä naaxwiin. Cab hajxy tii hoy nmädsöonáanäm. Tehñ tiøyhajt jaduhñ.

⁸ Hoorä, coo wit tucxy hajxy nmøødhájtäm, coo cay hu'ugy hajxy nmøødhájtäm, paady hajxy jootcuyc tsøc híjtäm.

⁹ Pero jii häna'c-hajxy näje'e, jaduhñ hajxy wyi'i miäna'añ coo hajxy miäyøøjø'owa'añ. Paadiä haxøøgwiinmahñdy hajxy pianøcxa'añ. Jaduhñ hajxy haxøøgtuum nøcxy quia'awa'añ. Je'e hajxy yhøxtaaby mädyii jaduhñ ca'a howyiinmahñdy. Je'e hajxy jaduhñ quiumäadowáanäp.

¹⁰ Jiyyä haxøøgpä ca'a hoybä ñä'ägädä tsohñda'agy coo jäya'ayhajxy wyi'i xiädø'øñhadsocy, møød coo hajxy wyl'i wyiinduc-haty. Paadiä Diosmädia'agy hajxy näje'e tøø ñajtshixø'øy. Paady hajxy jiaanç tehñ jiootmayhajnä.

¹¹ Pero miich, coo miichä Dios xquiuguexyhaty, cabä haxøøgpä ca'a hoybä mädyii mgudiún mguñáxät. Ja'a hoybä weenbä jaduhñ mgudiúnäp. Ja'a Dios mwiingudsähgø'owäp. Mmäßøjcäbä miädia'agy. Mmädsoc mba'häyówäp. Mmee'xtügäp hoy mja tsaaçhpøcy. Mee'xxieemy mhäna'c-hádät.

¹² Hahixøøby coo ja'a Diosmädia'agy hamuumdu'joot mmäßógät, jaduhñä Dios xyagjugyhádät cøjxta'axiøø neby je'e jiugyhatiän. Mänit miichä Dios jaduhñ xyajnähdijy coo jaduhñ mjugyhádät cøjxta'axiøø mänaa miich nnägapxiän cu'ugwiinduum coo ja'a Diosmädia'agy tøø mmäßøcy.

¹³⁻¹⁴ Chaads miich nwiingapx njøjcaxø'øy coo ja'a Dioscuhdujt tehngajnä mjaac cudiún mjaac cuñáxät, møød coo mga'a yajtägátsät, jaduhñä Dioscuhdujt quia'a nänømøøjät haxøøg, høxtä coonä yhabáadät coo ja'a Wiindsón Jesucristo yaa quiädaactägatsa'añ hädaa yaabä naaxwiin. Ja'a Dios hajxy jaduhñ xyhíxäm møødä Jesucristo. Ja'a Diósädsä jugyhajt mooby hoy piønä

hoy tyijä. Haa ja'a Jesucristo, coo hänajty jim tøø yajmečhii maa ja'a Poncio Pilato wyiinduumän, mänit ñägapxy coogä Dios tøyhajt yHuunghadyii.

¹⁵ Ja'a Dios jaduñ yaghabaadaamb mänaa ja'a Jesucristo yaa quiädaactägatsa'añ hädaa yaabä naaxwiin. Jaanč tehñ jiootcujcä Dios. Nidiuhñ tiuñ Wiindsøn. Nidiuhñ miähane'emy. Ni pøn jaduñ quia'a mäbaady. Nägøxiä gobiernähajxy yhane'emyii møødä reyhajxy.

¹⁶ Hoy miänaajä Dios yhity. Jim maa ja'a Dios yhitiän, jaanč tehñ miøc jim yhajajy. Paady hajxy jim hoy nga'a wiingumedsøøyyäm. Tsøc hajxy hoy miänaajä Wiindsønähjätäm.

¹⁷ Pønajaty mäyøø hädaa yaabä naaxwiin, jaduñ miich mwiingapx mjøjcapxø'øwät coo hajxy quia'a niguiumayøøjät, møød coo ja'a Dios hajxy yhajodhädät. Møj jaančhä Dios. Cøxiä wiinä hajxy xmióoyyäm, jaduñ hajxy jootcujc nhjätäm. Pero cabä mäyøøjäya'ayä xädø'øn hajxy yhadsógät. Hix cøjxp tägooby ja'a hajxy miämäyøøhajpiä.

¹⁸ Jaduhñä mäyøødøjc mwiingapx mjøjcapxø'øwät coo hojioot hajxy jiaanč tehñ miøødhädät. Weenä häyoobädøjc hajxy piuhbety. Cab hajxy wyiinduc-hädät.

¹⁹ Coo hajxy jaduñ yaa yhojiäya'ayhädät hädaa yaabä naaxwiin, mänitä hoyhajtä weenhajt hajxy møj may piädät Dioswiinduum. Y jaduñ hajxy cøjxta'axiøø yagjugyhadøøjät nebiä Dios jiugyhatiän.

²⁰⁻²¹ Timoteo, coo miichä Dios tøø xyajnähdijy coo ja'a miädia'agy mya-jwá'xät, paady hamuumdu'joot mgudiúnät, paady jaduñ mnäwá'anät. Hix, tøø jäya'ayä Diosmädia'agy hajxy näje'e ñajtshixø'øy. Wiingmädia'agy hajxy tøø piadu'ubøcy cooc tyijy miaas yajxonä. Pero cabä mädia'agy jaduhmbä tiøyyä. Cab jaduñ choobaady. Nä'ä nägoobä yhøhnda'agy ja'a Dioscøxpä. Cabä høhnda'agymiädia'agy jaduhmbä mmøjpädä'agät.

Ween miichä Dios ja'a tsooctä mayhajt xtiuunä. Amén.

2 Timoteo

¹ Høøch hädaa nocy nhädiuumby, høøch Pablohajpä. Ja'a Jesucristøch jaduhñ xquiuguexyhajp. Ja'a Dios jaduhñ mänaamb coöch jaduhñ xquiuguexyhädät. Coö ja'a Jesucristo hajxy xmiøødhájtäm tu'ugjoot tu'ugwiinmahñdy, paadiä Dios hajxy tøø xyajwiinwaanøøyyäm coö hajxy cøjxta'axiøø xyagjugyhadáanäm neby je'e jiugyhatiän.

² Miiçh Timoteo, miiçhhøch hädaa nocy nyajnäjaayøøby. Jadúhñhøch miiçh ndsocy nébiøch nhamdsoo huungän. Ween miiçhä Diosteedy mayhajt xtiunä møødä Wiindsøn Jesucristo. Ween xñäxuuçh. Weenä hoyhajtä weenhajt xmiø'oy.

³ Hojioot howyiinmahñdymøødhøchä Dios nwiingudsähgø'øyy nébiøchä nhap nébiøchä ndeedyhajxy jecy wyiingudsähgøøyyän. Hoy ñaaghóoc-høchä Dios nba'ya'axy, mänitøch miiçh njahmiejtsta'agy. Mänitøchä Dios jaduhñ nnäma'ay "Dioscujú'uyäp" ja'a miiçhcøxpä.

⁴ Nja wi'i yhiçxtägatsáambiøch miiçh, jadúhñhøch nxoonäacpógät. Xøømdsúhmhøch miiçh njahmiejtsta'agy. Njahmiejchpøch jaduhñ coö miiçh hñajty mjaançh tehñ jiootmayhaty mänaa hajxy jim nniwiá'xäm.

⁵ Jadúhñhøch njahmiejtpä coö miiçhä Diosmädia'agy hamuumdu'joot mmäbøcy. Ja'a mdajhoc Loida møødä mdaj Eunice, jaaya'ayä Diosmädia'agy hajxy jayøjp mabøjtsohñ. Tøyhajt jaduhñ coö miiçh jaduhñ mbamäbøjpä.

⁶ Mänäajøch miiçh jim ngø'ønähgapiän, mänit miiçhä Dios mayhajt xtiunä. Jaduhñ miiçh mäjaa xmiøoy coö ja'a tiuung mdúunät. Cham nnäma'ay coö mga'a najtshixø'øwät ja'a mayhajt ja'a Dios mänit xtiunäbä, pero ween hamuumdu'joot mjaac yajtuñ.

⁷ Hix, jaduhñä Dios hajxy xyajmädsójcäm coö hajxy nga'a tsähgøøyyämät. Jaduhñ hajxy xyajmädsójcämbä coö hajxy ndúunämät ja'a miäjaahaam, møød coö hajxy hamiñ haxøpy nniçhojc nnibia'häyóowämät, møød coö hojioot howyiinmahñdy hajxy nyajtúunämät.

⁸ Jaduhñds je'e, cab mdsähdiúnät ja'a Dioscøxpä coö ja'a miädia'agy hñajty myajwá'xä. Ni jaduhñ mga'a tsähdiúumbät ja'a høøhcøxpä, hóyhøch yaa nja tsumyçhänä'ay. Páadyhøch yaa ndsumyçhänä'ay coöchä Dios ja'a miädia'agy nyajwá'xäbä. Cab mdsähgø'øwät coö mdsaaçhpógät ja'a Diosmädia'agyquiøxpä nébiøch ndsaaçhpøquiän høøch. Hix, xpiuhbédäbä Dios jaduhñ ja'a miäjaahaam.

⁹ Ja'a Dios hajxy tøø xyajnähwaats tøø xyajcuhwáatsäm. Jaaya'ay hajxy tøø xpiädäacäm coö ja'a miädia'agy hajxy hoy ngudiúunämät. Paadiä Dios hajxy jaduhñ xyajnähwaats xyajcuhwáatsäm coö hajxy xchójcäm, møød coö mayhajt hajxy jecy xtiúunäm ja'a Jesucristocøxpä; ca'a jie'eguiøxpä cooc tyijy hajxy hoy nguhdujthájtäm. Cahnä hädaa yaabä naaxwiin hñajty yhawijy tiøø'xta'agy, tøøyyämä Dios ja'a mayhajt hajxy hñajty jaduhñ xtiúunäm.

¹⁰ Coö ja'a Jesucristo hajxy yaa hoy tøø xyajnähwaats tøø xyajcuhwáatsäm, jaduhñä Dios ja'a mayhajt yajwiingähxø'nä, ja'a hajxy jecy xtiúunämbä. Coö ja'a Jesucristo hajxy yaa hoy tøø xñähho'túutäm, jaduhñ quiähxø'øgy coö hajxy cøjxta'axiøø xyagjugyhadáanäm neby je'e jiugyhatiän. Jaduhñ jiiby myiñ cujaay maa ja'a Diosmädia'aguiän.

¹¹ Páadyhøchä Jesucristo jaduhñ xquiuguexyhaty coöchä Diosmädia'agy jaduhñ nyajwá'xät coö jaaya'ay hajxy jaduhñ tøø xyajnähwaats tøø xyajcuhwáatsäm.

¹² Coočh jaduhn nyajwa'xy, páadyhøch jaduhn ndsaačhpøcy. Pero cábøch ndsähdiuñ. Hix, coočhä Dios ja'a miädia'agy jaduhn nmäbøjcä coočh jaduhn xyajnäwha'adsa'añ, páadyhøchä tøyhajt nmøødä coo jaduhn hoy cwieendähada'añ pønjátyhøch tøø xyajcø'ødägø'øy. Paady jaduhn cwieendähada'añ coo ja'a Jesucristo yaa quiädaactägatsa'añ hädaa yaabä naaxwiin.

¹³ Jaac panøcx ja'a hoguiuhdujt, ja'ačh miičh tøø nyajnähixø'øyäbä. Coö ja'a Jesucristo hajxy nmøødhjätäm tu'ugjoot tu'ugwiinmahñdy, paadiä miädia'agy hamuumdu'joot mmäbøjcät, paadiä jäya'ay hamuumdu'joot md-soc mba'häyówät, ja'a miičh myajnähixø'øbiä.

¹⁴ Hamuumdu'jootä tøyhajt myajwá'xät, ja'a Dios tøø xyajcø'ødägø'øyäbä. Caj myajtägätsät. Coö ja'a Dioshespíritu hajxy nmøødhjätäm, paady miičh jaduhn xpiuhbeda'añ.

¹⁵ Tøø miičhädä'a mmädoyhaty coočhä mäßøjpädøjc nämäy tøø xpiuhwaat-snä, ja'a hajxy jim tsohmä Asia-naaxooty, näguipxy møødä Figelo møødä Hermógenes.

¹⁶⁻¹⁸ Pero cábøchä Onesíforo mäßøcy tøø xmiädsähdiuñ, hóyhøch yaa nja tsumyčhänä'ay. Weenä Dios ja'a Onesíforo ja'a yhuungä tio'oxy ñäxuu'tsä. Coö miejch Roma, mänitøch nägø'ø nädecypiä xyhøxtaayy. Y coočh yaa xpiaaty, mänitøch mayhooc xpiuhbejty. Y hamuumdu'joot hajxy jim xpiuhbéjtäm Efeso, túhmäts. Coö yhabáadät coö ja'a Dios hajxy hänäjty xya-jtøyhajtyegäänäm, weenä Dios ja'a Onesíforo mänit ñäxuučh.

2

¹ Huang Timoteo, weenä Jesucristo xpiuhbety, jaduhn mga'a tsähgø'øwät mänaa. Coö ja'a Jesucristo hajxy jaduhn nmøødhjätäm tu'ugjoot tu'ugwiinmahñdy, paadiä mayhajt hajxy jaduhn xtiúunäm.

² Mänáajøch miičhä Diosmädia'agy nyajwiingapxø'øyän, nämayyä jäya'ayhajxy hänäjty miämädoona'ay. Jaduhn miičh wiinghana'c mnajtscapxøødiägätsät, ja'a hajxy hoy cudiumbä, ween wiinghänä'c hajxy jiaac tehñ näjtscapxøødiägätsägumbä.

³ Ja'a Jesucristocøxpä mmee'xtúgät coö hänäjty mdsaačhpøcy, nebiä soldadohajxy miee'xtuquiän.

⁴ Hix, ja'a soldadohajxiä, jaduhnä jioot hajxy piäda'agy coö hajxy ween quiumayii ja'a wyiindsøñhajxy. Cab jaduhn yhähixø'øy coö wiingtuung hajxy yhøxtá'awät.

⁵ Jaanä jaduhnduhmbä, ja'a häyø'pädøjc-hajxiä, coö hajxy jaduhn hoy yhäyø'ögät nebiä cuhdujt myiñän, mänit hajxy hawiinmats quiuhäyø'ögät. Pero coö hajxy quia'a häyø'ögät, cab hajxy tii piäadät.

⁶ Jaanä jaduhnduhmbä, ja'a yuubä pujxpähajxy hoy cuduumbä, je'edshajxy jaduhn jawyiin mäjúuyyap.

⁷ Yajcopcø'ow hoy nébiøch cham nmäna'añ, weenä Dios jaduhn xquiøxy yajwiinjuø'øy.

⁸ Ja'a Jesucristo, ja'a David jecy yhaphajt yhoc-hajt. Coö ja'a Jesucristo hänäjty tøø yho'ogy, mänit jiujypiøjtägajch. Ja'a Jesucristocøxpøch nnä'ägädä yajwiingapxø'øhyaty.

⁹ Coočhä Jesucristocøxpä jaduhn nyajnähixø'øy, páadyhøch yaa ndsaačhpøcy. Páadyhøch yaa ndsumyčhänä'ay nebiä cahwiindøybän. Pero cabä Diosmädia'agy jaduhn mänaa yhadugyii. Wiinduhmyhagajpt jaduhn wia'xy.

¹⁰ Coo jaduhñ hoy miaajä wia'xy, páadyhøch yaa hoy ñejpiä nmee'xtucy, weenä jäya'ayhajxy jaduhñ ñähwaats quiuhwaatspä, ja'a Dios jaduhñ tøø ya-jnähdiñjiäbä coo ja'a Jesucristo hajxy miøødhídät tu'ugjoot tu'ugwiinmahñdy, møød ween hajxy yagjugyhadyii cøjxta'axiøø nebiä Dios jiugyhatiän.

¹¹ Hix, coo hajxy nniñähdujcämät coo hajxy nhó'cämät nebiä Jesucristo yho'quiän, mänit hajxy jaduhñ njugyhájtämät cøjxta'axiøø nebiä Jesucristo jiugyhatiän. Møød jaduhñ hajxy jim nhidáanäm maa je'e yhitiän. Tehm tiøyhajt jaduhñ.

¹² Jaanä jaduhñduhmbä, coo hajxy nmee'xtújcämät, mänitä Jesucristo hajxy jim xmiøødhanéhmämät. Pero coo hajxy nniñiøgápämät cooc tyijy hajxy nga'a hixyhájtäm, cab hajxy jim xyajtägøøyyämät maa je'e yhitiän.

¹³ Hoy hajxy nja hønhdáacäm, cabä Jesucristo mänaa yhønnda'agy. Hoy miänaajä tiømiädia'agyhaty.

¹⁴ Myagjahmiejtstä'agäbä mæbøjpädøjc jaduhñ nébiøch naamnä tøø ngu-jaayän. Hoorä, jaduhñ myajwiingapxø'øwät coo ja'a capxiä mädia'agy hajxy quia'a yajtsibø'øwät, ja'a ca'a tsoobaatpä. Jaduhñä Dios hajxy xyhanéhmäm. Cab jaduhñ tiuungpaady coo hajxy jaduhñ yajtsibø'øy. Ja'a jäya'ayhajxy jaduhñ hamädoowhijpä, cabä hoguiapxiä homiädia'agy hajxy jaduhñ hoy yhabøga'añ.

¹⁵ Hamuumdu'jootä tøyhajt myajnähixø'øwät ja'a Jesucristocøxpä, jaduhñä Dios xquiumáyät, jaduhñ mga'a tsähdiúnät.

¹⁶ Cabä capxiä mädia'agy myajcapxiø'øwät, ja'a ca'a tsoobaatpä. Ja'a jäya'ayhajxy jaduhñ tehngajnä yajcapxiøøbiä, tehngajnä hajxy jaduhñ nøcxy tiu'udägoyya'añ.

¹⁷ Y maas nämayyä jäya'ayhajxy jaduhñ tiu'udägoyya'añ coo ja'a capxiä mädia'agy hajxy jaduhñ miädówät, ja'a jaduhñ ca'a tsoobaatpä. Tøø ja'a Himeneo jaduhñ tiu'udägooñä møødä Fileto.

¹⁸ Tøø ja'a tøyhajt hajxy ñajtshixøøñä. Jaduhñ hajxy yhønnda'agy cooc tyijy hajxy nga'a jujypiøjtägatsáanäm. Ja'a mæbøjpädøjc-hajxy näje'e, coo hajxy jaduhñ wyiinhøøñii, cabä Diosmädia'agy hajxy jaduhñ hoy miäbøgaanä.

¹⁹ Pero tøø ja'a Dios hajxy xpiädáacäm coo ja'a miädia'agy hajxy tehngajnä nbanøcxämät. Jaduhñä Dios tøø miäna'añ cooc ñajuø'øy pønä miädia'agy hamuumdu'joot mæbøjcäp. Jaduhñ tøø miänaambä coo ja'a haxøøgcuhdujt hajxy ween ñajtshixø'øy pønjaty niñänøømäp coogä Diosmädia'agy hajxy miäbøcy.

²⁰ Maa ja'a mäyøøjäya'ay tiøjcän, madiu'u texy jiiby. Jiibiä orotexy, møødä platatexy, møødä quepychehtiexy, møødä pochtiexy. Tsoobaatpä orotexy møødä platatexy. Cabä quepychehtiexy jiaty tsoobaady møødä pochtiexy.

²¹ Jaanä jaduhñduhmbä, pønhatiä haxøøgwiinmahñdy najtshixøøby, hoy ja'a Diosmädia'agy hajxy jaduhñ pianøcxät. Hoy hajxy jaduhñ quiudiúnät waambaty hajxy yhane'emyii ja'a Wiindsøn Jesucristo. Jaduhñ hajxy quiu-mayøøjät.

²² Pero miich, mnajtshixø'øwäbä haxøøgwiinmahñdy nebiä muutsc-häna'c-hajxy naxy yhadsoquiän. Ja'a mæbøjpädøjcä Dios hajxy hamuumdu'joot pa'yaaxpä, howyiinmahñdy hajxy miøød. Miäbøjpiä Diosmädia'agy hajxy. Hamiñ haxøpy hajxy ñichocy ñibia'häyoyii. Cab hajxy chiptsocy. Jaduhñ miich hamuumdu'joot mbahíxät.

²³ Caj myajtägø'øwät maa häna'cä capxiä mädia'agy hajxy nä'a nägoobä yaj-capxiø'øyän, ja'a ca'a tsoobaatpä, ja'a ca'a tuungpaatpä. Ja'a capxiä mädia'agy jaduhmbä, ja'a tsipä pleetä yhøjx tiecy je'eduhñ, túhmäts.

²⁴ Pønjaty yaa moonsähjätap ja'a Dios hädaa yaabä naaxwiin, cab hajxy tii yajtsiptá'agät. Hojiot hajxy miøødhádäp hoy ñä'ä pøngøxpä. Hoy yajxón hajxy yajnáhixø'øwät. Mee'xtúgäp hajxy jaduhñ. Cab hajxy jiootmä'adät.

²⁵ Mee'xxieemiä miädsip hajxy yhoj miägápxät. Wehñdä Dios jaduhñ miäná'anät coo ja'a miädsipä yhaxøøgcuhdujt hajxy ñajtshixø'øwät, weenä tøyhajt hajxy jaduhñ wyiinjuø'øy.

²⁶ Ween hajxy jaduhñ wyiinmahñmech, hoy hajxy hñajty tøø jia wiinhøøñii ja'a møjcu'ugong. Paadiä møjcu'ugong jaduhñ jia wi'i miäwiinhøøna'añ; ja wi'i miähane'emaamb jaduhñ.

3

¹ Pero huuc wiinjuø'øw miich hädaa. Coo hñajty yhabaada'añ coo ja'a Jesucristo yaa quiädaactägatsa'añ hädaa yaabä naaxwiin, mänitä tsø'ty häyohn jiada'añii yhabeta'añii.

² Haxøøgjatiä jäya'ayhajxy hñajty jiatcø'øwa'añ. Jootmøj hajxy hñajty ñibiäda'aga'añii. Jiaanç tehñ yhadsogaambiä xädø'øñ hajxy. Niguiumayáanäp hajxy hñajty. Yajcumayaamb hajxy hñajty. Capxtägoyyaamb hajxy hñajty. Cabä tiaj tieedy hajxy hñajty wyiingudsähgø'øwa'añ. Cab hajxy hñajty tii yhojiäwø'øwa'añ. Cabä Diosmädia'agy hajxy hñajty miäbøga'añ.

³ Cabä yhuungä tio'oxy hajxy hñajty choga'añ. Cab hajxy hñajty pøn miee'xa'añ. Mänähøøñø'øwaamb hajxy hñajty. Cabä howyiinmahñdy hajxy hñajty miøødhada'añ. Mähäyoowhixaamb hajxy hñajty. Cabä hoybä weenbä hajxy hñajty choga'añ.

⁴ Tioogaambiä miägu'ughajpä hajxy hñajty. Cab hajxy hñajty hodiägaamb wyiinmahñdyhada'añ tii hajxy hñajty tiunaamby. Yhøxta'awaamby hajxy hñajty neby hajxy xioondá'agät. Cabä Dios hajxy hñajty wyiingudsähgø'øwa'añ.

⁵ Jaduhñ hajxy hñajty ñibiäda'aga'añii nebiä häna'cä Diosmädia'agy mabøjpän, pero cab hajxy hñajty tøyhajt miäbøga'añ.

Pønjaty jaduhñ haxøøg jatcøøby, naxy jaduhñ mdehñ piuhwá'adsät.

⁶ Jii cahwiindøyhäna'c-hajxy näje'e, jaanç tehñ yhøhñdaacp hajxy. Naxiä to'oxiøjc hajxy wyiinhøøñ, ja'a hajxy tii ca'a jajp ca'a najuøøbiä. Ja'a to'oxiøjc-hajxy jaduhñbä, cabä howyiinmahñdy hajxy ñä'ägädä møødä. Hamdsoojoot hajxy jaduhñ yajwiinhøøna'añ.

⁷ Hoy ñä'ä mädyii mädia'aguiä hajxy jaduhñ jia wi'i yhabøga'añ, pero cabä tøyhajt hajxy ñä'ägädä wiinjuø'øwa'añ.

⁸ Ja'a häna'c-hajxy jaduhñ høhñdaacpä, haxøøgä wyiinmahñdy hajxy. Cabä Diosmädia'agy hajxy miäbøga'añ. Jaduhñä tøyhajt hajxy miädsibø'øy nebiä Janes ja'a Moisés hajxy jecy miädsibøøyyän møødä Jambres.

⁹ Cabä Janeshajxy jecy miäjädaacy. Paady hajxy jaduhñ quia'a mäjädaacy coo howyiinmahñdy hajxy hñajty quia'a møødä. Ni häna'c-hajxy jaduhñ quia'a mäjäda'agaambä, ja'a hajxy jäda'ahaty høhñdaacpä.

¹⁰ Hoorä, tøøch miich xyhixy coöchä tøyhajt nyajnáhixø'øy, coöch hoy njäya'ayhaty. Howyiinmahñdyhøch nmøød. Nmäbøjpøchä Diosmädia'agy hamuumdu'joot. Mee'xxiéemyhøchä jäya'ay nmägapxy. Hoy piøñøch ndsocy nmee'xy. Cábøchä Diosmädia'agy mänaa nnänuuxø'øy.

¹¹ Jaanä jaduhñhøch miich tøø xyhixpä coöch hoy miänaajä nmee'xtucy, hoy ñéjpøch hñajty nja tsaaçhpøcy, nébiøch jim tøø njaty tøø nhabetiän Antioquía, møød jim Iconio, møød jim Listra. Madiú'ujøch jim ndsaaçhpøjcy. Pero cábøchä Dios mänaa xñajtshixø'øy. Hoy miänáajøch jaduhñ xcwieendähaty.

¹² Haaga jaduhñä jäya'ayhajxy chaaçhpøgaambä pønatiä jioot pädaacp maa ja'a Jesucriston coo hajxy jaduhñ hoy jäya'ayhädät.

¹³ Pero ja'a cahwiindøybähajxy møødä høhndaacpähajxy, maas haxøøg hajxy tehngajnä jiatcø'øwa'añ. Mäwiinhøønaamb hajxy møød hajxy yajwiinhøønaambä.

¹⁴ Pero miich, naxiä Diosmädia'agy tehngajnä mjaac tehñ pianøcxät, ja'a miich hamuumdu'joot tøø mmäbøquiäbä. Haa ca'a, høøch miich jaduhñ tøø nyajñähixø'øy, møødä mdaj møødä mdajhoc. Paady miich hoy tøø mhabøcy.

¹⁵ Chuucnä miichä Diosmädia'agy mdägøøyy capxtaacpä. Jiibiä tøyhajt hajxy nbáatäm neby hajxy hoy nnähwaats nguhwáatsämät. Coo hajxy jaduhñ nmäbøjcäm ja'a Jesucristocøxpä, jaduhñ hajxy nnähwaats nguhwáatsäm.

¹⁶ Ja'a Diosmädia'aguiä, cøxiä Dios jaduhñ yagjahyyä. Jaanch tehñ tiuungpaatpä Diosmädia'agy jaduhñ. Hahixøøby jaduhñ coo ja'a jäya'ay hajxy nyajñähixøøyyämät. Jaduhñ hajxy njoj nmägäpxämät. Jaduhñ hajxy nya-jwiinxiic nyajwiingapxøøyyämät coo ja'a tøyhajt hajxy pianøcxät, møød coo hajxy hoy jäya'ayhädät.

¹⁷ Pønatiä Dios tøø yajnähdiy coo ja'a miädia'agy yajwá'xäxät, ween hajxy ca'xy pedyii yhabøcy, jaduhñ hajxy hoy yajtuungpáadät hoy ñä'ä maajä.

4

¹ Coo ja'a Jesucristo yaa quiädaactägatsa'añ hädaa yaabä naaxwiin, mänit tiägø'øwa'añ mähanehmbä. Mänitä jäya'ayhajxy nägøxiä yajtøyhajtyega'añii, møød hajxy hñajty jujcypiä, møød hajxy hñajty tøø yhö'oguiäbä. Ja'a Dioscøxpä møødä Jesucristocøxpä, jaduhñhöch miich nmägäpxy nhane'emy

² coo ja'a Diosmädia'agy hoy ñä'ä mänaajä myajwá'xät, møød coo ja'a cu'ug myajmábøgät, møød coo mhoj mmägäpxät, møød coo myajwiingapxø'øwät coo hajxy jaduhñ miäbøgät. Mee'xxieemiä Diosmädia'agy myajñähixø'øwät tehngajnä.

³⁻⁴ Hix, habáatnöp jaduhñ coo ja'a cu'ugä Diosmädia'agy hajxy quia'a tsogaanä. Cabä tøyhajt hajxy jaduhñ miadowaanä. Hoy ñä'ä mädyii mädia'aguiä hajxy hñajty wyi'i miadowa'añ, nägoo hñajty quia'a tøyyä. Mayyä yajnähixøøbiädøjc hajxy jaduhñ yhöxta'awa'añ, ween hajxy hñajty jaduhñ yajnähixø'øyii nebiatiä jioothajxy hñajty chocy.

⁵ Pero miich, tehngajnä howyiinmahñdy mmøødhädät. Mmee'xtúgäp jaduhñ coo hñajty mdsaaçhpøcy. Myajwá'xäbä Diosmädia'agy. Hamuumdu'joot mgudiúnät waambatiä Dios tøø xyhane'emy.

⁶ Høøch, ja weenjaty quia'a habaady cooch hñana'c xyagho'oga'añ ja'a Jesucristocøxpä. Nähjøjp tu'ujøjphøch hädaajän.

⁷ Tøøchä haxøøgpä njøjtäna'ay. Tøøch nmäjäda'agy. Tøøch hamuumdu'joot ngudiuñ waambátyhöchä Dios tøø xyhane'emy.

⁸ Chámhöch njøbhixy coochä Wiindsøn Jesucristo jim xpiäda'aga'añ hawa'adstuum. Mänitøch jim xpiäda'aga'añ coo ja'a jäya'ayhajxy hñajty nägøxiä yajtøyhajtyega'añii. Hoguiuhdujthaamä Jesucristo hajxy jaduhñ xyajtøyhajtyegäänäm. Cábøch nidiuhm jim xpiäda'aga'añ hawa'adstuum. Pønjaty jaduhñ jøbhixp hamuumdu'joot coo ja'a Jesucristo yaa quiädaactägatsa'añ hädaa yaabä naaxwiin, nägøxiä hajxy jim piäda'agäänäbä hawa'adstuum.

⁹ Huuc min yaa maaçh høøchän. Mhadø'ødsäp jaduhñ.

¹⁰ Hix, tøøchä hñana'c xpiuhwa'açh nämay. Haa ja'a Demas, tøø je'e ñøcxy Tesalónica. Paady yaa tøø choon coo chäna'awa'añ yhäyowa'añ. Haa ja'a Crescente, tøø je'e ñøcxy Galacia. Haa ja'a Tito, tøø je'e ñøcxy Dalmacia.

¹¹ Jagóoyyöchä Lucas yaa xjiaac mөөdhity. Tunä mayhajt, nөcxä Marcos wowө'өг. Yaa mwoomínät. Hóyhөch yaa xpiuhbédät.

¹² Haa ja'a Tíquico, jímhөch tөө nguexy Efeso.

¹³ Coо miičh yaa mmínät, mhuuc túnäbä mayhajt. Hөөchä nnähgämem tu'uwíjsäc. Jímhөch tөө nnähgue'egy Troas maa ja'a Carpo tiөjcän. Mөөdhөchä nnocy xpiөcmínät mөөdä animalhac-hädiúñäbä.

¹⁴ Haa ja'a Alejandro, ja'a pujxthädiuumbä, tөөch cөxypänejpy xñähөөnө'өy. Ja'a Dios jaduhñ yaghawiimbídäp.

¹⁵ Cahwiindөy ja'a Alejandro jaduhñ. Mniyajcopcө'өwөjäp. Mөj may ja'a Alejandro xmiädsiphájtäm coo ja'a Diosmädia'agy hajxy naxy nyajwá'xäm.

¹⁶ Mänäajөch jayөbajt nyajnäxө'өwө'өyän, cábөch pөñ mänit xñähgapxtuuty. Nägөxiөchä häna'c xpiuhwaach. Pero cab jaduhñ ñejpiä. Weenä Dios jaduhñ miee'xy.

¹⁷ Mäjahñdiuumhөch hänäjty. Mänítөchä Dios xñäwaañ. Mänítөchä mäjaa xmiooyy, jadúhñhөchä jäya'ayä Diosmädia'agy hoy nyajwiingapxөөyy, ja'a hajxy ca'a judíospä, ween hajxy jaduhñ nägөxiä miäbөcy.

¹⁸ Xcwieendähadäämbөchä Dios maa ja'a haxөөг ca'a hoybän. Xya-jnähwa'ads xyajcuhwa'adsäämbөch jaduhñ. Jadúhñhөch jim xyajnөcxa'añ tsajpootyp maa je'e yhane'emiän. Tsөгä Dios hajxy hoy miänaajä wiin-gudsähgөөyyäm. Amén.

¹⁹ Huuc yajpoo'x ja'a Prisca ja'a hөөchcөxpä, mөөdä Aquila, mөөdä Onesíforo yhuungä tio'oxy.

²⁰ Haa ja'a Erasto, jim je'e miähmөөyy Corinto. Haa ja'a Trófimo, jímhөch nnähgueecy Mileto. Pөjcäp hänäjty je'e.

²¹ Habáatnäp jaduhñ coo tөөchc yhida'añ. Naxy mdehm myínät. Mhadө'өdsäp jaduhñ. Nägөxiä miičhä mähөjpädөjc yaa xyajpoo'xy mөөdä Eubulo, mөөdä Pudente, mөөdä Lino, mөөdä Claudia.

²² Ween miičhä Wiindsөñ Jesucristo xmiөөdhity. Weenä hoyhajtä ween-hajtä xmio'oy. Amén.

Tito

¹ Pablohájpøch høøch. Ja'a Dióshøch xmioonsähajp. Ja'a Jesucristøch xquiuguexyhajp. Jadúhnhøch tøø xwyiinguexy coöchä jäya'ayä Diosmädia'agy nyajwiinhixó'øwät, pønhatiä Dios tøø wyiimbiy, ween hajxy jaduhñ miäbøcy, weenä tøyhajt hajxy jaduhñ miøødhaty, jaduhñä Dios hajxy hoy wyiingudsähgø'øwät.

² Jéquiänä Dios hajxy xyajwiinwaanóøyyäm coo hajxy xyagjugyhadäänäm cøjxta'axiøø neby je'e jiugyhatiän. Cabä Dios mänaa yhöhnda'agy, jaduhñä tøyhajt hajxy nmøødhajtäm coo hajxy jaduhñ xyagjugyhadäänäm.

³ Coo yhabaaty, mäniä Dios hajxy jaduhñ xyhawäänäm coo hajxy jaduhñ xyagjugyhadäänäm. Tøøchä Dios jaduhñ xyhane'emy coöchä miädia'agy jaduhñ nyajwá'xät. Xtiehm wyiinguéjxhøch jaduhñ. Ja'a Dios hajxy xya-jnähwaats xyajcuhwáatsäm.

⁴ Tito, miíchhøch hädaa nocy nyajnäjaayøøby. Tehm tiøyhájthøch miích njuø'øy nébiøch nhamdsoo huungän. Tu'cuhdujt højtsä Diosmädia'agy nmäbøjcäm. Ja'a Diosteedy møødä Wiindsøn Jesucristo, ween miíchä may-hajt hajxy xtiunä, ween miíchä hoyhajtä weenhajt hajxy xmio'oy. Ja'a Jesucristo hajxy xyajnähwaats xyajcuhwáatsäm.

⁵ Mänáajøch jim nwiimbitiän Creta, páadyhøch miích jim nyajmähmøøyy coo mjaac yaghoyø'øwät tijaty højts hänäjty nga'a yajpéjtäpnä. Jadúhnhøch miích nhane'emy coo wiindsøn mbädá'agät maa tsajtøjcän wiinduhmyhagajpt.

⁶ Je'e mbädá'agäp pøn hoy jäya'ayhajp, pøn to'oxiøjc tu'ug yaghijp, pøn yhuung mäbøjpä Diosmädia'agy, pøn yhuung hoy wädiip, pøn yhuung mädia'agymiäbøjp.

⁷ Ja'a jäya'ayhajxy jaduhñ tunaambä wiindsøn, ja'a Dios hajxy moonsähadäänäp. Howyiinmahñdy hajxy yaghídäp. Cab hajxy jootmøjhádät. Cab hajxy yhawa'andá'agät. Cab hajxy yhu'ug cab hajxy jiøø'xät. Cab hajxy chiptsógät. Cabä jäya'axiädø'øñ hajxy yhadsógät.

⁸ Yajtøjtägø'øwäp hajxy pønhati mejtsp maa tiøjc-hajxiän; piu'umió'owäp quioñdymó'owäp hajxy jaduhñ. Chógäp ja'a hoybä hajxy. Cab hajxy choj jootmá'adät. Hoy hajxy jiäya'ayhádät. Hoy ja'a Diosmädia'agy hajxy quiudiúnät. Cabä haxøøgwiinmahñdy hajxy yajtúnät.

⁹ Cabä tømiaädia'agy hajxy ñajtshixó'øwät, ja'a hajxy tøø yajnähixø'øyiíjábä, jaduhñä mäbøjpädøjcä hoguiuhdujt hajxy yajwiingapxø'øwät. Jaduhñ hajxy yajcähxø'øgät coo häna'c-hajxy yhöhnda'agy, ja'a wiingmädia'agy hajxy ya-jnähixøøbiä.

¹⁰ Nämayyä höhndaacpähajxy wiädity. Cabä Diosmädia'agy hajxy quiudiuna'añ. Nä'ä nägoodä hajxy jaduhñ ñä'ä capxy ñä'ä mädia'agy. Jaduhñä häna'c-hajxy nämay jiatcøøbiä, ja'a hajxy jaduhñ mänaambä coo ja'a mäbøjpädøjc-hajxy tsipcøxp yajcircuncidarhádät.

¹¹ Tsipcøxp myaghamónät pønhati jaduhñ wiing yajnähixøøby. Cabä cuh-dujt hajxy miøødä coo hajxy jaduhñ wiing yajnähixø'øwät. Yajmäjuyaamb hajxy, paady hajxy jaduhñ wiing yajnähixø'øy. Höchähdiuunnä hajxy jaduhñ jiatcø'øy. Haa ja'a mäbøjpädøjcä wiingmädia'agy hajxy jaduhñ ya-jnähixøøyyäbä, naxy hajxy jaduhñ yajtu'udägoyyi, ja'a hajxy tu'jøøn tu'tøjcpä.

¹² Jaduhñä Cretabäjäya'ay tu'ug tøø yhuuc mänaambä coogä miägunaaxhajxy jiaanç tehñ yhöhnda'agy, møød coog hajxy hanaxiä quiahwiindøyyä, møød coog hajxy jiaanç tehñ quiaxä, møød coog hajxy

jiaančh tehñ ñuuxho'ogy. Jaaya'ay jaduñ tøø miäná'añäbä, profeta hijty tiuumby.

¹³ Tehñ tiøyhajt jaduñ coo ja'a Cretabä-jäya'ayhajxy jaduñ haxøøg jiäya'ayhaty. Paady miičh møc-haamby mhoj mmägápxät, weenä Diosmädia'agy hajxy jaduñ hoy miäbøcy.

¹⁴ Cabä høñda'agymiädia'agy hajxy miøjpädá'agät, ja'a judíoshajxy naxy ya-jnähixøøbiä. Møød weenä mädia'agy hajxy quia'a cudiuñ nebiä häna'c-hajxy jia hane'emiän, ja'a tøyhajt hajxy ca'a tsojpä.

¹⁵ Ja'a häna'cä howyiinmahñdy hajxy møødpä, cumáayyäbä Dios hajxy jaduñ, hoy hajxy quia'a ja cudiuñ nebiä häna'c høñdaacpähajxy jia hane'emiän. Pero ja'a häna'cä Diosmädia'agy hajxy ca'a mæbøjpä, caba Dios hajxy quiumayii je'eguiøxpä coo haxøøgwiinmahñdy hajxy jiaančh tehñ miøødä. Cab hajxy tii hoy ñänømy.

¹⁶ Jaduñ hajxy jia mäna'añ cooc tyijy ja'a Dios hajxy yhixyhaty, pero coo hajxy haxøøgjaty wyi'i jiatcø'ø, jaduñ hajxy yajcähxø'øgy coo hajxy tøyhajt quia'a hixiä. Cabä Diosmädia'agy hajxy quiudiuna'añ. Cabä hodiung hajxy ñä'ägädä jada'añ. Paady hajxy xiøøghadyii ja'a Dios.

2

¹ Pero miičh, ja'a hoguiuhdujt myajnähiç'øwäp, jaduñä mæbøjpädøjcä Diosmädia'agy hajxy hoy quiudiünät.

² Jaduñä majjäya'adiøjc myajwiinxiic myajwiingapxø'øwät coo hajxy quia'a hu'ug quia'a jøø'xät. Cab hajxy nä'a nägoodä ñä'a xi'ig ñä'a hanähátät. Hoy hajxy jiäya'ayhädät. Hamuumdu'jootä Diosmädia'agy hajxy miäbøgät. Hoy ja'a miäjøøn miädøjc hajxy choc pia'häyówät. Míee'xtúgäp hajxy coo hajxy hanaity chaachpøcy.

³ Jaduñä tajhoctøjc myajwiinxiic myajwiingapxøøbiät coo howyiinmahñdy hajxy miøødhädät, jaduñ hajxy hoy quiuhdujthädät. Cab hajxy pøn ñähøønø'øwät. Cab hajxy yhu'ug cab hajxy jiøø'xät. Ja'a hoybä weenbä hajxy yajnähixø'øwäp.

⁴ Jaduñä tajhoctøjcä miädsaan miädo'oxy muutspä hajxy yajwiinxiic yajwiingapxø'øwät coo ja'a yhuung coo ja'a ña'ay hajxy chógät,

⁵ møød coo hajxy hoy jiäya'ayhädät. Ja'a howyiinmahñdy hajxy miøødhädäp. Hoy yajxonä jøøn tiøjc hajxy cwieendähädät. Miøødhädäbä hojiot hajxy. Wyiingudsähgø'øwäbä ñihyhap hajxy. Coo hajxy jaduñ hoy quiuhdujthädät, jaduñä cu'ugä Diosmädia'agy hajxy wyiingudsähgø'øwät.

⁶ Jaanä jaduñduhmbä, jaduñä muutsc-häna'ctøjc myajwiinxiic myajwiingapxø'øwät coo howyiinmahñdy hajxy miøødhädät.

⁷ Jaanä jaduñ miičhpä, tehñgajnä hoy mwädítät, weenä mæbøjpädøjc jaduñ xpiahixy. Howyiinmahñdymøød myajnähiç'øwät. Caj nä'a nägoodä mnä'a xi'ig mnä'a hanähátät.

⁸ Ja'a hoguiapxy ja'a homiädia'agy jaduñ myajnähiç'øwäp, jaduñ pøn xquia'a jøcäpxø'øwät. Jaduñä nmädsiphajtämhajxy chähdiünät, cab hajxy jaduñ hoy xñänøømämät haxøøg.

⁹ Hoorä, ja'a häna'c-hajxy hijpä cudoogø'øyä, jaduñ myajwiinxiic myajwiingapxø'øwät coo ja'a wyiindsønä miädia'agy hajxy pedyii quiudiun quiuñájxät, hoy hajxy nä'a waambaty yhane'emyii. Cab hajxy yhadsoowiimbídät.

¹⁰ Cab hajxy miéedsät. Hamuumdu'jootä wyiindsønä miädia'agy hajxy yajtuünät, ween hajxy jaduñ quiumayii, wehñdä wyiindsønä Dios miädia'agy hajxy jaduñ xmiäbøjcät. Ja'a Dios hajxy xyajnähaats xyajcuhwáatsäm.

¹¹ Hix, tøø ja'a Dios jaduhñ yajcähxø'øgy coo ja'a mayhajt tøø tiuñ, coo hajxy nägøxiä xyajnähwaats xyajcuhwáatsäm, mäduhñtiä hajxy yaa nhíjtäm hädaa yaabä naaxwiin.

¹² Jaduhñä Dios hajxy xyhanéhmäm coo ja'a haxøøgwiinmahñdy hajxy nnajtshixøøyyämät møødä hadsojtwiinmahñdy, møød coo ja'a howyiinmahñdy hajxy nyaghíjtämät møødä hoguiuhdujt, møød coo ja'a Dios hajxy hamuumdu'joot nwiingudsähgøøyyämät, jaduhñ hajxy hoy nwädíjtämät hädaa yaabä naaxwiin,

¹³ je'eguiøxp coo ja'a Jesucristo hajxy jaduhñ njøbhíjxäm coo yaa quiädaactägatsa'añ neby hajxy tøø xyajwiinwaanøøyyäm. Xi'ig xon hajxy jaduhñ njøbhíjxäm. NDioshájtäm ja'a Jesucristo hajxy jaduhñ. Møj jaançh je'e. Je'e hajxy xyajnähwaats xyajcuhwáatsäm. Yajxón jiaançh tehñ quiäda'aga'añ.

¹⁴ Paady hajxy hoy xñähho'túutäm, jaduhñä haxøøg ca'a hoybä hajxy xquiøxy yajnähwaats xquiøxy yajcuhwáatsäm. Jaduhñ hajxy xquiuhghájtäm, weenä hoybä weenbä hajxy jaduhñ hamuumdu'joot ndúunäm.

¹⁵ Jaduhñdsä mæbøjpädøjc myajwiinxiic myajwiingapxø'owät coo hajxy jaduhñ miäbøgät. Mmøød miiçhä cuhdujt jaduhñ coo mhoj coo mmägápxät pøn ca'a mæbøgaamb, jaduhñ mga'a yajpéxät.

3

¹ Jaduhñä mæbøjpädøjc myagjahmiejtstá'agät coo ja'a gobiernähajxy wyiingudsähgø'owøøjät møødä cuduunghajxy, møød coo ja'a miädia'agyhajxy quiudiúunäxät. Cabä mæbøjpädøjc-hajxy ñuuxhó'ogät. Tiúnäp ja'a cu'ugtuunghajxy.

² Cab hajxy pøn ñähøønø'owät. Cab hajxy chiptsógät. Mee'xxieemy hajxy jiäya'ayhädät. Hoy piønä hajxy wyiingudsähgø'owät.

³ Hix, hijty, cabä Diosmädia'agy hajxy hijty nwiinjuøøyyäm. Cab hajxy hijty ngudiúunäm. Tu'udägoøyyäm hajxy hijty. Hanaxiä haxøøg ca'a hoybä hajxy hijty nhadsójcäm. Haxøøg hajxy hijty njäya'ayhájtäm. Hadsojtwiinmahñdy hajxy hijty nyaghíjtäm. Xxiøøghájtäm ja'a cu'ug hajxy hijty. Hamiñ haxøpy hajxy hijty nnimiähán nnimiägø'owhájtäm.

⁴⁻⁵ Pero mänitä Dios yajwiingähxø'cy coo hajxy xñäxúu'tsäm, møød coo hojiot jiaançh tehñ miøødä. Mänit hajxy xyajnähwaats xyajcuhwáatsäm coo hajxy jaduhñ xñäxúu'tsäm, ca'a jie'eguiøxpä cooc tyijy hajxy hoy tøø ngudiúunäm. Jaduhñ hajxy xyajnähwaats xyajcuhwáatsäm coo hawiinjemyjiot coo hawiinjemywyiinmahñdy hajxy xmióoyyäm, møød coo ja'a Dioshespíritu hajxy xyagjeem xyajtägájtsäm.

⁶ Coo ja'a Jesucristo hajxy hoy xñähho'túutäm, jaduhñä Dios ja'a yhEspíritu hajxy møj may xmióoyyäm.

⁷ Paadiä Dios ja'a yhEspíritu hajxy xmióoyyäm, jaduhñ hajxy xpiädáacäm hawa'adstuum. Møjjä mayhajt hajxy jaduhñ xtiúunäm. Møød jaduhñ hajxy xyagjugyhadáanäm cøjxta'axiøø nebiä Dios jiugyhatiän. Jaduhñ hajxy tøø xyajwiinwaanøøyyäm. Paady hajxy jaduhñ njøbhíjxäm.

⁸ Tehñ tiøyhajt jaduhñ. Naxy miiçhä mæbøjpädøjc jaduhñ mdehm miägäpx mdehm yhané'emät coo hajxy hamuumdu'joot hoy quiuhdujthädät, ja'a Diosmädia'agy hajxy tøø miäbøquiäbä. Tehngajnä hoybä weenbä hajxy tiúnät. Tsoobaatp jaduhñ. Jaduhñ hajxy ñiyaghoyø'owøøjät.

⁹ Pero caj myajtägø'owät maa ja'a høhnda'agymiädia'agy hajxy naxy yajcapxiø'øyän, maa ja'a jecyquiuhdujt hajxy naxy yajtsipta'aguiän, maa ja'a

jecyjiäya'ay xiøø hajxy naxy yajtøøw yajtøø'xän. Cab jaduhmbä capxy mädia'agy jaduhñ ñä'ägädä tuungpaady.

¹⁰ Jii häna'c-hajxy näje'e maa ja'a tsajtøjcän, wiingjaty hajxy yajnähixø'ø. Y coo ja'a mabøjpädøjc-hajxy jaduhñ näje'e miäbøcy, tu'udägooby hajxy jaduhñ. Cabä jiamiøød hajxy hoy miøødhijnä tu'ugmädia'agy. Pønjaty jaduhñ wiingjaty yajnähixøøby, mhójäp jaduhñ táhooc metsc-hooc, ween hajxy yhuuc hamoñ. Ypø cab hajxy jaduhñ yhamona'añ, mänit mga'a mämøjø'øwät mga'a mämayø'øwät.

¹¹ Pønjaty jaduhñ jatcøøby, cabä howyiinmahñdy hajxy miøødä. Haxøögä wyiinmahñdyhajxy jaduhñ. Paady hajxy haxøøgtuum piäda'aga'añii.

¹² Jímhøchä Artemas nguexa'añ maa miičhän. Coo ja'a Artemas jaduhñ quia'a yajnäbaadø'øwät coo jim ñócxät, mänitøchä Tíquico mabøcy jim nguéxät. Coo jim miédsät, mänitøch miičh jim nøcxy xpiaady Nicópolis. Jímhøch nhida'añ høxtä coo tøøchpä ñáxät. Mhuuc hadø'ødsäp jaduhñ.

¹³ Jimä Apoloshajxiäda'a wiädity Creta møødä Zenas, ja'a cuhdujtya-jnähixøøbiä. Coo hajxy hñajty tiu'ubøga'añ, mänit miičh cøxiä wiinä mmó'owät tijaty hajxy hñajty yajmaajiadaamby.

¹⁴ Jaduhñä njamiøødhajtäm myajwiinxiic myajwiingapxø'øwät coo ja'a hoyba weenba hajxy tehngajnä tiúnät, ween hajxy jaduhñ piuhbety pøn hñajty yajmaajiajp. Cab hajxy ñä'ä nuuxhó'ogät.

¹⁵ Ja'a njamiøødhøch hajxy yaa xmiøødhijpä, xyhaagä yajpoo'xp miičh jaduhñ. Huuc tunä mayhajt, huuc yajpoo'x ja'a høøchcøxpä pønjaty højts jim xchojp xpia'häyoob ja'a Diosmädia'agyquiøxpä. Ween mijtsä Dios ja'a hoyhajtä weenhajt xmio'oy nägøxiä. Amén.

Filemón

¹ Høøch hädaa nocy njahby, høøch Pablohajpä. Tsumyčhänäabiøch cham je'eguiøxpä coochä Jesucristo miädia'agy nyajwa'xä. Haa ja'a hermano Timoteo, tu'ugwiinmáhñdyhøch xmiøødhity cooch hädaa nocy njaay.

² Miičh Filemón, miičh hädaa nocy nyajnäguexaamby. Hoy hajxy nničhojc nnibia'häyóowäm coo hajxy nduunmújcäm ja'a Jesucristocøxpä. Nya-jpoo'xyp højts ja'a hermana Apiahajpä. Jaduhn je'e njuø'øy nebiä hamdsoo puhdo'oxypän. Njaanä yajpoo'xyp højts ja'a hermano Arquipohajpä. Quipxy højts je'e xmiøødtuumbä maa højts ja'a Diosmädia'agy nyajwa'xiän. Nägøxiä højtsä jäya'ay nyajpoo'xy ja'a hajxy jim mejtspä maa miičhä mdøjcän, ja'a Diosmädia'agy hajxy mæbøjpä.

³ Ween mijtsä Dios ja'a hoyhajtä weenhajt hajxy xmio'oy møødä Jesucristo. Ja'a Dios hajxy nDeedyhajtäm. Ja'a Jesucristo hajxy nWiindsønajtäm.

⁴ Naaghóoc-høchä Dios nba'ya'axy, ngapxpáatypøch miičhä mxøø, Filemón. Nnämäabiøchä Dios: “Dioscujú'uyäp”, coo miičh hoy mjaančh tehñ tiuñ.

⁵ Tøøch nmädoyhaty coo miičhä Jesucristo miädia'agy hamuumdu'joot tøø mmæbøjcä. Jadúhñhøch tøø nmädoyhajpä coo miičhä jäya'ay mjaančh tehñ chocy mjaančh tehñ pia'häyoy, ja'a Diosmädia'agy hajxy mæbøjpä.

⁶ Coo miičhä Diosmädia'agy hamuumdu'joot tøø mmæbøcy, paady miičhä hojioot mjaančh tehñ miøødä, weenä jäya'ayhajxy jaduhn jiaac tehñ wyiin-juø'øy nebiatiä Jesucristo ja'a mayhajt tiuñ ja'a højtscøxphajtäm.

⁷ Mägu'ughajpä, jaančh tehñ jiootcújc-høch jaduhn nnijiäwø'øyii coo miičhä jäya'ay tøø mjootcapxmøcpøcy, ja'a Diosmädia'agy hajxy mæbøjpä. Paady miičh jaduhn tøø mjootcapxmøcpøcy coo miičh mjaančh tehñ chocy mjaančh tehñ pia'häyoy.

⁸⁻¹⁰ Høøch Pablo, tøøch nmäjaanä. Chámhøch jaduhnajtä ndsumyčhänä'ay ja'a Jesucristo miädia'agyquiøxpä. Huuc møødhatä hojioot ja'a høøchcøxpä. Miičh nmänuu'xtaacy py coo miičhä mayhajt cu mduuñ ja'a Onésimocøxpä. Coo miičhä hojioot mjaančh tehñ miøødä, páadyhøch miičh jaduhn nmänuu'xta'agy, hóyhøchä Jesucristo cuhdujt tøø xjia mo'oy cooch miičh nhané'emät. Jadúhñhøch ja'a Onésimo njuø'øy nébiøch nhamdsoo huungpän, je'eguiøxpä cooch je'e ja'a Diosmädia'agy jaduhn tøø nyajmæbøcy yaa maačh yaa ndsumyčhänä'ayän.

¹¹ Cahnä ja'a Onésimo hānajt jim piäyø'øgyñä maa miičhän, cab miičh mmädia'agy hānajt xquiudiuunä. Cab hānajt tiuna'añ. Pero coo yaa tøø miech maačh høøchän, jaančh tehñ yhóyhøch yaa xmiøødtuñ. Jaančh tehñ yhoy miičh xmiøødtunaambä.

¹² Nguejxtägatsäambiøch jim maa miičhän, hóyhøch yaa nja tsocy hamuumdu'joot.

¹³ Jadúhñhøch nja mānaañ cooch cu xmiøødmähmøøyy yaa maačh yaa ndsumyčhänä'ayän. Cu xpiuhbétyhøch jaduhn maa miičhcøxpän. Ja'a Diosmädia'agyquiøxpøch cham ndsumyčhänä'ay.

¹⁴ Páadyhøch ja'a Onésimo jim nguejxtägatsa'añ maa miičhän, cábøch nnajuø'øy pø mmāna'anaamb miičh jaduhn coo yaa cu miähmøøyy. Pø mdunaambiä mayhajt jaduhn, ween hamdsoojoot mdúnät; ca'a yhadsipä, ca'a yhajootma'adä; ca'a tii mnajtshäyowø'øy.

¹⁵ Wehndä Dios jaduhn tøø miäna'añ coo jim piäyø'øgät maa miičhän, coo yaa yhidät paquiä maačh høøchän. Hix, tøø ja'a Diosmädia'agy yaa miäbøcy. Y coo jim ñøcxtägätsät maa miičhän, cab jaduhn mānaa xpiuhwa'adsaanä.

¹⁶ Moonsä miičh Onésimo hijty mwa'añ. Pero coo jim ñøcxtägátsät maa miičhän, jaduñ miičh mjuø'øwa'añ neby hamdsoo huch neby hamdsoo puhya'aybän. Jaduhñ miičh mdsogaambä nébiøch høøch ndsoquiän. Maas hanaxiä miičh mdsoga'añ. Hix, maas hoy miičh mmädia'agy xquiudi-unáañä. Xímnäts mijts jaduñ tu'ugymädia'agy mhidaañä ja'a Jesu-cristocøxpä.

¹⁷ Tøyhajt højts nnijiootpáatäm. Tunxä mayhajt jaduñ. Tsøc Onésimo jaduñ møødnijiootpáatäm neby højts nnijiootpáatäm.

¹⁸ Pø tøø miičh xñägädieeyø'y hoy ñejpiä, pø xmiänuu'xyhajt miičh jaduñ, høøchä güeentä jaduñ.

¹⁹ Høøch nyajñhwa'adsaamby mäduhñtiä xmiänuu'xiä. Tøyhajt jaduñ. Hamdsoo cø'øháamhøch hädaa nocy jaduñ njaay; jaduñ miičh tøyhajt mmøødhádät cooçh nga'a hønnda'agy. Y jim miičh cueentä mmøødäbä maa høøchcøxpän. Hix, høøch miičh jaduñ tøø nyajmæbøcy ja'a Diosmädia'agy.

²⁰ Mägu'ughajpä, coo ja'a Onésimo jaduñ mmøødnijiootpaadøød, jaduñ miičh myajcähxø'øga'añ cooçh miičh tøyhajt xjiaançh tsocy. Tunxä mayhajt jaduñ. Hix, näguipxy højts ja'a Jesucristo jaduñ nmøødhíjtäm tu'ugmädia'agy.

²¹ Hamdsoo cø'øháamhøch chamñ njaay. Nnajuøøbiøch jaduñ cooçh miičh ja'a nmädia'agy xquiudiunaanä nébiøch chamñ tøø nnäma'ayän. Njaanä najuøøbiøch jaduhmbä coo miičh hojioot mjaançh tehñ miøødhada'añ ja'a Onésimocøxpä.

²² Chámhøch mayhajt tu'ug nmäyujwa'anáangombä. Høøch maadaact hahixøødiáacäc. Pa'ya'ax ja'a Dios hajxy cooçh ween xyajpædsømy pu-jxtøgooty. Mäniñhøch jim nnøcxät maa mijtsän.

²³ Xyajpoo'xp mijts ja'a hermano Epafrashajpä. Yaaçh jaduñ xmiøødtsumyçhänä'ay ja'a Jesucristo miädia'agyquiøxpä.

²⁴ Xyhaagä nä'ä yajpoo'xp mijts ja'a hermano Marcoshajxy, møødä hermano Aristarco, møødä hermano Demas, møødä hermano Lucas. Xyhaagä nä'ä møødtúumbøch hajxy yaa ja'a Diosmädia'agyquiøxpä.

²⁵ Weenä Jesucristo hoyhajt weenhajt hajxy xmio'oy coo jaaya'ay hajxy jaduñ mmøødhity tu'ugjoot tu'ugjuøhñdy. Amén.

Hebreos

¹ Jecy ja'a Dios quiuguexy quiejxy maa højts nhaphájtäm maa højts ndeedyhájtäm. Diosmädia'agy-yajwa'xpä hajxy quiejxä. Mayhooc hajxy quiejxä. Madiu'u hajxy miädiaacy.

² Tøø ja'a Dios ja'a yHuung hajxy yaa xyajnäguéjxäm hädaa yaabä naaxwiin. Cahnä jiegø'øy coo yaa tøø yhoy. Je'e ja'a Diosmädia'agy hajxy tøø xji-aac hawáanäm. Jequiän je'eduhn wyiinguejxä coo ja'a xøøwiin naaxwiin yhädiúnät cøxiä møødä xøø, møødä po'o, møødä madsa'a. Mänit yajnähdiijä coo yhané'emät.

³ Jaduhnä Dios yHuung miøjjä jiaančhä nebiä Diosän. Tu'ugjoot tu'ugwiinmahñdy hajxy yhity. Jim hajxy yhane'emy cøxp chaads hädaa yaabä naaxwiin. Tøø højts hoy xñähho'túutäm. Tøø ja'a nbojpä ngädieeyhajxy xyajnähwáatsäm. Mänit jim ñcxtägajch tsajpootyp maa ja'a Diosän. Jim je'eduhn yhanehmbä jäda'anäbaadyñä.

⁴ Ja'a Dios yHuung, maas møj ja'a cuhdujt miøødä quejee ja'a Dios mioonsä ja'a tsajpootypähajxy miøødä, je'eguiøxpä coo je'e Dyios yHuungä.

⁵ Cabä Dios ja'a mioonsä mänaa ñäma'ay:
Míichhøch jäda'a ndehm yHuunghadaamby.

Ni mädyii mioonsä quia'a nänømy:

Yø'øjøch jaduhn xTieedyhadaamby;

nHuunghadaambiøch yø'øduhn.

⁶ Coo ja'a Dios ja'a yHuung yaa quiejxy hädaa yaabä naaxwiin, mänitä Dios miänaañ:

Wéenhøch nHuung xwyiingudsähgøøyyä ja'a nmóonsøchhajxy, ja'a hajxy jim tsajpootypä.

⁷ Paquiä Dios ja'a miädia'agy quiudiúunäxä ja'a mioonsähajxy, nebiä pojtägoy wiäditiän, nebiä padoooy wiäditiän.

⁸ Pero ja'a yHuung, je'eduhn ñämaayy:

MDioshajp miičh, homiänaajä miičh mhane'emy;

homiänaajä miičhä tøyhajt myega'añ.

⁹ Mdsojpy miičh ja'a tøyhajtpä;

cabä haxøøgpä mdsocy.

Maas jootcújc-høch miičh nyaghity quejee ja'a nmóonsøchhajxy, ja'a hajxy jim tsajpootypä.

¹⁰ Jaduhnä Dios jiaac mänaambä:

Miičh jecy mhädiuun ja'a naaxwiimbä møødä tsajpootypä.

¹¹⁻¹² Cuhdägoyyaambä naaxwiimbä møødä tsajpootypä;

tägatsaamb jaduhn; jaduhn jiada'añ néjjiämä wit coo tiujnä;

caj tiuunngaadaañ. Pero miičh, cøjxta'axiøø miičh mhida'añ;

caj miičh mjugyhajt mänaa quiøxa'añ.

¹³ Cabä Dios ja'a mioonsä mänaa ñäma'ay:

Yaačh miičh xmiøødhané'emät. Caj miičh mmädsip myajmäjäda'aga'añ.

¹⁴ Ja'a Dios ja'a mioonsähajxy ja'a tsajpootypä, jaduhn mäwíinäts hajxy je'e nebiä pojjan. Cab hajxy quiähxø'øgy. Dios jaduhn quejxp coo hajxy piuhbédät pønhatiä Dios piäda'agaamby hawa'adstuum.

2

¹ Tsipcøxpä Diosmädia'agy hajxy nyajcopcøøyyämät, ja'a hajxy tøø nmädóowämbä; jaduhn hajxy nga'a tu'udägóoyyämät.

² Haa ja'a Diosmoonsähajxiä, ja'a tsajpootypä, jéquiänä Diosmädia'agy hajxy yaa yajcädaacy hädaa yaabä naaxwiin. Tøyhajt ja'a Diosmädia'agy jaduhñ; pønjaty ca'a cudiumb, haxøøgtuum hajxy miähmø'øwa'añ.

³ Møjcuhtujtmøødä Jesucristo. Hamdsoo hajxy je'e hoy xyhawáanäm neby hajxy nnähwáatsämät. Haa ja'a hajxy jayøbajt mädóowäbä, tøjiajt ja'a mädia'agy jaduhñ maa hajxy je'ejän. Mänit højts jaduhñ xyhawaandägäjsäm. Coö ja'a mädia'agy hajxy nga'a yajtúunämät, cab hajxy jaduhñ nnähwáatsämät.

⁴ Madiu'u ja'a Dios ja'a hijxtahnd tøø yajcähxø'øgy, ja'a hoy-yagjuøøñäjatypä; jaduhñ hajxy nmäbøjcämät coö ja'a miädia'agy tiøyhajtä. Tøø ja'a yhEspíritu hajxy xyajnäguéjxäm coö hajxy jaduhñ xpiuhbedáanäm mädyijaty tuung hajxy xmióoyyäm. Jaduhñä jioot chocy.

⁵ Haa ja'a Dios mioonsähajxiä, ja'a tsajpootypä, cabä Dios jaduhñ tøø miäna'añ coö hajxy yhané'emät mänaa ja'a naaxwiimbä hñajty wyiimbida'añ.

⁶ Jiiby jaduhñ myiñ cujaay maa ja'a Diosmädia'aguiän:

Dios, tiiguiøxpä ja'a jäya'ay coö mjahmiejtsta'agy, coö mbuhbety.

⁷⁻⁸ Maas møc ja'a mmoonsä cuhdujt hijty tøø mmo'oy quejee ja'a jäya'ayhajxy. Pero mänitä jäya'ay møjcuhtujt mmooyy coö cøxiä yhané'emät tijaty miich tøø mbäda'agy.

Jaduhñä Dios ja'a jäya'ay piäda'aga'añ møj jaançh, coö jaduhñ ween wyiingudsähgø'øyii. Coö ja'a Dios jaduhñ hamdsoo miänaañ, jaduhñä tøyhajt hajxy nmøødhajtäm coö ja'a møjcuhtujt hajxy tøø xmióoyyäm coö hajxy cøxiä nhanéhmämät. Pero cajnä quiähxø'øgyñä coö hajxy cøxiä nhane'emáanäm.

⁹ Jaduhñä Jesucristo, mänaa yaa yhitiän hädaa yaabä naaxwiin, cabä cuhdujt hijty jiaty møødä nebiä Dios mioonsähajxy miøødän, ja'a hajxy tsajpootypä. Mänitä Dios miänaañ coö ja'a Jesucristo hajxy xñähho'túutämät nägøxiä, je'eguiøxpä coö ja'a Dios hajxy xchójcäm. Coö ja'a Jesucristo yho'cy, paadiä møj jaançh piädaacä, paadiä møjcuhtujt miooyyä coö yhané'emät.

¹⁰ Paadiä Dios cøxiä wiinä piädaacy, weenä jäya'ayä Dios hajxy jaduhñ wyiingudsähgø'øy. Chojiä jioot jaduhñ coö ja'a yhuunghajxy jim yhidät nägøxiä maa je'ejän, pønhatiä miädia'agy mähøjcäp. Y jaduhñä Dios miänaañ coö ja'a Jesucristo quiumädówät ja'a højtscøxpä. Jiaançh cudiuun je'eduhñ coö hajxy xñähho'túutäm.

¹¹ Ja'a Jesucristo hajxy jaduhñ xyajnähwáatsäm. Quipxiä Dios hajxy nDeedyhajtäm møødä Jesucristo. Paadiä Jesucristo hajxy xquia'a mädsähdiúunäm. Hix, hamdsoo miänaañ coö hajxy tu'ugpuhya'ay xmiøødhajtäm.

¹² Jaduhñ jiiby myiñ cujaay maa ja'a Diosmädia'aguiän:

Nmøødmädia'agáambiøch nbuhya'ayhajxy ja'a miichcøxpä.

Nguyhøwáambiøch miich jim tsajtøgooty, jim cu'ughagujc.

¹³ Jaduhñ jiiby myiimbä:

Ni mänáajøchä Dios xquia'a wiinhøøñ, páadyhøch nga'a tsähgø'øy.

Jaduhñ wiingtuum myíingumbä:

Chaaçh nhity møødhøch nhuunghajxy;

Diøshøch jaduhñ xmióoyy.

¹⁴ Pøn jaduhñ tu'que'ex, tu'ugjoot tu'ugnø'ty hajxy jaduhñ. Jaduhñä Jesucristo hajxy tøø xmiøødhajtäm tu'ugjoot tu'ugnø'ty mänaa yaa yhitiän hädaa yaabä naaxwiin. Paady hajxy jaduhñ xmiøødhajtäm, jaduhñ hajxy hñajty xñähho'tu'udáanäm. Jaduhñä møjcu'ugong hoy quia'a mähädaacnä. Coö cu miähädaacy, jaayá'ayädsä mähäa häxøpy møød coö hajxy cu xyajtu'udägóoyyäm.

¹⁵ Coo ja'a Jesucristo miädia'agy hajxy nmäbójcämät, cabä nho'og hajxy jaduhñ ndsähgööyyänät. Pøn jaduhñ ca'a mabøj, je'eds ja'a yho'og tsähgööby mädu'ñtiä jia jugyhaty.

¹⁶ Coo ja'a Jesucristo yaa yhooy hädaa yaabä naaxwiin, ja'a Abraham yhap yhoc-hajxy yajnäguéjxä, neby hajxy jaduhñ piuhbedójjät. Ca'a Dyios-moonsähajxiä yajnäguéjxä, ja'a tsajpootypä. Tøyhajt jaduhñ.

¹⁷ Y paadiä Jesucristo yaa hoy jiäya'ayhaty neby højtshájtäm; jaduhñ hajxy hoy xñähgapxtúutäm maa ja'a Diosän; jaduhñä nbojpä ngädieey hajxy hoy xñähho'túutäm. Hojiot ja'a Jesucristo miøødhajpy. Pedyii jaduhñ quiudiuuñ.

¹⁸ Hoyyä Jesucristo jia tsaaçhpøjcy, cabä møjcu'ugongä miädia'agy yajtúunäxä. Y coo ja'a møjcu'ugong hajxy hänäjty xjia wi'i yajtu'udägoyyäänäm, xpiuhbéjtäm ja'a Jesucristo hajxy jaduhñ je'eguiøxpä coo ja'a møjcu'ugong miädia'agy quia'a mabójcäxä ja'a Jesucristäm.

3

¹ Hermanodøjc, tøø ja'a Jesucristo ja'a nbojpä ngädieey hajxy xya-jnähwäatsäm. Tøø ja'a Dios hajxy xyajnähdíjjäm coo ja'a miädia'agy hajxy nmäbójcämät. Tsögä Jesucristo hajxy jahmiéjtsäm; høxtahmds højts ja'a Dios yaa xyajnäguéjxäm. Jaduhñ hajxy njahmiéjtsämät coo hajxy jim xñähgapxtúutäm maa ja'a Dioswiinduumän.

² Haa ja'a Moisésä, pedyii je'e jecy quiuduuñ maa ja'a Dios ja'a tiøjcän. (Je'eduhñ nänøømby ja'a judíoshajxy.) Jaanä jaduhñä Jesucristo pedyii quiudiumbä coo wyiinguejxä coo højts jaduhñ xñähgapxtúutämät.

³ Maas hoy jaduhñ coo ja'a Jesucristo hajxy nwiingudsähgööyyämät quejee ja'a Moisés. Høxtahmdsä tøjcojpä, je'eds jaduhñ wiingudsähgööyyäp; cabä tøjc jaduhñ wyiingudsähgøøyii.

⁴ Cabä tøjc hamdsoo quiojy; häna'c jaduhñ cojp. Pero ja'a Dios, cøxiä je'eduhñ piädaacy tijaty yaa hijp hädaa yaabä naaxwiin møødä jim tsajpootyp.

⁵⁻⁶ Ja'a Moisés, jayøjpä tøyhajt jaduhñ miädiaactsohñ mädyii ja'a Dios hänäjty cujegy quiapxtøwaamby. Pedyii ja'a Moisés quiudiuuñ maa ja'a Dios ja'a quiu'ugän. Pero cabä møjcuhdajt miooyyä nebiä Jesucristo miøødän. Hix, ja'a Jesucristo, ja'a Dios yhamdsoo Ung je'e. Y pedyii jim quiudiuuñ maa ja'a Dios ja'a quiu'ugän. Pero ja'a Moisés, jaduhñ je'e yhiyty nebiä moonsän. Coo hajxy hamuumdu'joot nmäbójcämät, coo ja'a Jesucristo hajxy jootcujc njøbhíxämät coo hänäjty miejstägatsa'añ, mänitä Dios hajxy nägøxiä xquiu'ugnäbójcämät.

⁷ Jaduhñ jiihy myiñ cujaay maa ja'a Diosmädia'aguiän:

Cooch nmädia'agy hajxy jäda'anäbaady xmiädóowät,

⁸⁻⁹ hamuumdu'joot hajxy jaduhñ myajtúnät.

Haa ja'a jecyjiäya'ayhajxiä, ja'a mijts mhap mdeedyhajxiä, cábøch nmädia'agy hajxy jecy xyajtuunä, hóyhøch hijxtahnd may nja yajcähxø'cy, mänáajøch hajxy jecy nyajwädiän pactuum juxychägui'xjomøjt.

Cooch nmädia'agy hajxy xquia'a mabójcä, páadyhøch hajxy nyajcumädooyy.

¹⁰⁻¹¹ Xyagjootmadiägøyyhøch hajxy je'e. Mänítøch nmänaañ:

“Tøø hajxy jaduhñ mdu'udägoonä. Cábøch nmädia'agy hajxy xyhabøgaanä.

Tøyhajt jaduhñ, cábøch mijts jim nyajmedsaannä maaçh mijts hijty nya-jpoo'xa'añän.”

Jaduhñä Dioshespíritu miänaañ maa ja'a Diosmädia'aguiän.

¹² Hermanodøjc, mnigwieendähadøøjap hajxy nebiä Diosmädia'agy hajxy mga'a najtshixø'øwät; jaduñ hajxy mga'a tu'udägóyyät. Jujcy ja'a Dios; ca'a jiaduñä nebiä jäya'ayhajxy yaabä Dyioshajpiän.

¹³ Pero mäduñtiä hajxy mjugyhaty, mniguiapxmøcpøgøøjap hajxy jabom-jabom, neby hajxy jaduñ mga'a tu'udägóyyät.

¹⁴ Coø hajxy tehngajnä nmäbøjcämät, neby hajxy tøø nmäbøjtsóhñäm, mänitä Jesucristo hajxy jim xmiødhájtämät tsajpootyp.

¹⁵ Jaduñ jii by myiñ cujaay maa ja'a Diosmädia'aguiän: Coø ja'a Diosmädia'agy hajxy mmädówät jäda'anäbaady, hamuumdu'joot hajxy myajtúnät.

Ja'a jecyjiäya'ayhajxy, cabä Diosmädia'agy hajxy jecy miäbøjcy.

¹⁶ Jimä Moisés ja'a jäya'ay hoy wioobädsømy Egiptonaaxooty; je'eds hajxy jecy ca'a mäbøjc ja'a Diosmädia'agy, hoy hajxy hñajty tøø jia mädooy.

¹⁷ Je'eds hajxy hoy tiu'udägooñä. Jim hajxy hoy quiøxy ho'nä pactuum. Je'edsä Dios hoyhoy ñäjootmayhajt juxychägui'xjomøjt.

¹⁸⁻¹⁹ Je'edsä Dios jaduñ ñämaayy coø quia'a yajmedsaannä maa hijty jaduñ yajpoo'xa'añän, je'eguiøxpä coø hajxy hñajty quia'a mäbøcy.

4

¹ Tsøg hajxy nigwieendähájtäm; jaduñ hajxy nga'a tu'udägóyyämät. Coø hajxy ndu'udägóyyämät, cabä Dios hajxy jii by xyajtägøøyyämät maa hajxy xyajpoo'xáanäm. Tøø hajxy hijty xyajwiinwaanøøyyäm coø hajxy jii by xyajtägø'øwáanäm.

² Tøø ja'a Diosmädia'agy hajxy nmädóowäm nebiä jecyjiäya'ayhajxy jia mädooyän. Xiøøbä hajxy jaduñ jia nä'ä mädooyy, cab hajxy ñä'ä mäbøjcy.

³ Højts, tøø højts nmäbøjcäm, paadiä Dios hajxy jim xyajtägø'øwáanäm maa hajxy xyajpoo'xáanäm. Jimä Dios jaduñ ñänøømy:

Cooch hajxy nnäjootmayhajty, páadyhöch hajxy nnämaayy:

“Tøyhajt jaduñ, cábøch mijts jim nyajmedsaannä maa ch mijts hijty nyajpoo'xa'añän.”

Coo ja'a Dios ja'a naaxwiimbä yhädiuumbädøøyy, mänit jaduñ pioo'xnä.

⁴ Jii by jaduñ myiñ cujaay maa ja'a Diosmädia'aguiän:

Mänitä Dios hoy pioo'xnä ja'a miäjuxtujxøøbä, coø ja'a naaxwiimbä hñajty tøø yhädiuumbädøøñä.

⁵ Wiingtuumä Dios miänáangombä:

Cábøch hajxy nyajmedsaannä maa ja'a poo'xtaactän.

⁶ Ja'a jecyjiäya'ayhajxy, ja'a Diosmädia'agy hajxy jayøbajt ja mädoowäbä, cab hajxy ñä'ä yajtuuñ. Paady hajxy jim quia'a mejch maa ja'a poo'xtaactän. Pero näje'ejatiä jäya'ayhajxy miedsa'añ maa ja'a poo'xtaactän.

⁷ Cujequiä Dios ja'a David yajmänaañ:

Coo ja'a Diosmädia'agy hajxy mmädówät jäda'anäbaady, hamuumdu'joot hajxy mmäbøgät.

Je'eduhñ ñänøømy by coø hajxy jäda'anäbaady jim ndägøøyyämät maa ja'a poo'xtaactän.

⁸ Coø ja'a Josué ja'a judíoshajxy jecy wioomejch maa ja'a Palestinanaaxootiän, cabä poo'xtaact hajxy ñä'ä paaty. Paadiä Dios jaduñ miäna'añ coø højts jäda'anäbaady ndägøøyyämät maa ja'a poo'xtaactän.

⁹ Jimnä ja'a poo'xtaact yhityñä maa ja'a Dios ja'a quiu'ughajxy tiägø'øwa'añän.

¹⁰ Pøn jim tægøøby maa ja'a Dios ja'a pioo'xtaactän, jim jaduñ pioo'xaannä nebiä Dios pioo'xnän mänaa ja'a naaxwiimbä hñajty tøø yhädiuumbädøøyyän.

¹¹ Tsögä Diosmädia'agy hajxy hamuumdu'joot mǎbǝjcam; jaduñ hajxy hoy ndǎgǝǝyyāmāt maa ja'a Dios ja'a pioo'xtaactān. Cabä Diosmädia'agy hajxy nnajtshixǝǝyyāmāt nebiä jecyjiäya'ay hajxy jiatcǝǝyyān. Cab hajxy miǎbǝjcy, paady hajxy jim quia'a tǎgǝǝyy maa ja'a poo'xtaactān.

¹² Ja'a Diosmädia'agy, tuumnä je'eduhñ. Mǎjaamǝǝdnä je'eduhñ. Ja'a Dios hajxy xyajcǎhxǝ'cām ja'a miǎdia'agyhaam pǝ nmǝǝdhǎjtām ja'a howyiin-mahñdy hajxy, pǝ caj.

¹³ Caj tii hayu'u'ch hamee'ch mnä'ägädä túnāt. Tsipcǝxpä Dios ja'a nwi-inmahñdyhǎjtām hajxy nǎgǝxiä xyhixyhǎjtām neby hajxy njäya'ayhǎjtām pǝ hoy, pǝ ca'a hoy. Pǝ cab hajxy hoy njäya'ayhǎjtām, mänitä Dios hajxy haxǝǝgtuum xpiäda'agāñām.

¹⁴ Ja'a Jesucristo, ja'a Dioshuung, tǝǝ jim quioody Dioswiinduum. Jim hǝjts xñǎhgapxtúutām. Paady, tsögä Diosmädia'agy hajxy hamuumdu'joot panǝcxām. Cabä wiinghāna'c hajxy pǝñ xñǎhgapxtúutām jim Dioswiinduum.

¹⁵ Ñajuǝǝbiä Jesucristo neby hajxy yaa ndsaačhpǝjcam hädaa yaabä naaxwiin. Hiñ, tǝǝ je'e yaa jiäya'ayhaty neby hǝjts yaa njäya'ayhǎjtām. Tǝǝ jia yajtagoyya'añii ja'a mǝjcu'ugóngām, neby hǝjts xjia wi'i yajtagoyyañāmbä. Pero cabä Jesucristo mänaa tiu'udǎgoy.

¹⁶ Tsögä Dios hajxy pa'yáaxām hamuumdu'joot. Xchǝjcam Dios hajxy. Miǝǝdhajpiä hojiot je'eduhñ maa hǝjtshǎjtām. Xpiuhbéjtām hajxy jaduñ coo hǝjts tii nyajmaajiǎjtāmāt.

5

¹ Ja'a teedywiindsǝñhajxy, ja'a hajxy jim tuumbä maa ja'a judíos cha-jtǝjc-hajxiän, jaduñ hajxy piäda'agyii coo ja'a cu'ug hajxy ñǎhgapxtú'udāt maa ja'a Diosän, mǝǝd coo hajxy cǝxiä quiuyoxǝ'ǝwāt, mǝǝd coo animal hajxy yǝxāt, weenä cu'ug ja'a piojpä quiǎdieey hajxy jaduñ ñǎhwa'ačh quiuhwa'ačh,

²⁻³ mǝǝd weenä yhamdsoo pojpa yhamdsoo cǎdieey ñǎhwaatsnä. Hiñ, jäya'ayhajp ja'a teedyhajxy neby hǝjtshǎjtām. Jimä piojpä quiǎdieeyhajxy je'ebä. Paady hajxy mee'xxieemy miǎgapxy yhane'emy pǝñjaty ca'a najuǝǝby, pǝñjaty tu'udǎgooby.

⁴ Cabä teedyhajxy hamdsoo nibiäda'agyii. Dios hajxy jaduñ pädaacp nebiä Aarón jecy piädaacñ.

⁵ Ni ja'a Jesucristo hamdsoo quia'a nibiädaacä nebiä teedywiindsǝñän. Ja'a Dios jaduñ pädaac. Jaduhñä Dios ja'a Jesucristo ñāmaayy:

Míichhǝch jǎda'a ndehm yHuunghadaamby.

⁶ Wiingtuumä Dios jaduñ miānaañ:

Cǝjxta'axiǝǝ miičh mduna'añ teedy nebiä Melquisedec jecy tiuññän.

⁷ Ja'a Jesucristo, mänaa yaa yhitiän hädaa yaabä naaxwiin, mänitä Dios mǝc pia'yaaxy. Jǝǝby hǎnajty. Miānuu'xtaac ja'a Dios coo piuhbedǝǝjät mänaa hǎnajty yho'oga'añän. Wyiingudsǎhgǝǝbiä Dios hǎnajty je'e, paadiä miǎdia'agy miǎdǝwǎxä.

⁸ Hoyyä Jesucristo jia Dioshuungä, quiudiuunä Tieedy miǎdia'agy coo chaäčhpǝgāt.

⁹ Coo miee'xtujcy mänaa chaäčhpǝquiän, xyajñǎhwáatsām ja'a nbojpä ngǎdieeyhǎjtām hajxy jaduñ pǝñjatiä miǎdia'agy mǎbǝjcap. Cǝjxta'axiǝǝ hajxy hodium xyaghidāñām.

¹⁰ Mänitä Dios ja'a Jesucristo piädaacy teedywiindsǝñ nebiä Melquisedec jecy tiuññän.

¹¹ Madiu'u mijts hädaaduhmbä nja wi'i yajmøødmädia'aga'añ tsipjaty, pero caj mijts mwiinjuø'owa'añ.

¹²⁻¹³ Tøø jiegøøñä mänaa ja'a Diosmädia'agy hajxy mmäbøjtsooñän. Hahixøøby hijty jaduhñ coo wiinghäna'c hajxy myajñähixøøñät. Pero jaduhñ mijts tøø mjaty nebiä naamdägø'øybän. Caj mijts ja'a Diosmädia'agy ja'a tsipjatypä mjada'añ. Je'enä hajxy mhabøcyñä ja'a cajpä chipjatiä. Cahnä hoguiuhdujt hajxy mhabøcyñä.

¹⁴ Coo ja'a Diosmädia'agy hajxy hamuumdu'joot mgudiünät, mänitä tsipjatypä hajxy jaduhñ mwiinjuø'owät; y coo ja'a hoguiuhdujt hajxy tehngajñä mbanøcxät, mänit hajxy mnajuø'owät mädyii hänäjty hoguiuhdujt, mädyii hänäjty haxøøgcuhdujt.

6

¹ Tøø mijts ja'a mädia'agy mayhooc mmädoy ja'a Jesucristocøxpä, ja'a cajpä chipjatiä. Tøø hajxy mmädoy coo ja'a mhaxøøgcuhdujt hajxy mnajtshixø'owät, coo ja'a Diosmädia'agy hajxy hamuumdu'joot mmäbøgät.

² Mnajuøøby hajxy tii hajxy coo tøø mnäbety, tii hajxy coo tøø mgø'øniñähgabyii. Jaduhñ hajxy tøø mmädoy coo ja'a ho'ogyjiäya'ayhajxy jiuypioğa'añ, coo ja'a Dios ja'a haxøøgjäya'ayhajxy yajtsaaçhpøga'añ cøjxta'axiøø, coo ja'a naaxwiimbä wyiimbida'añ.

³ Pero tsøgä Diosmädia'agy hajxy pedyii jaac habøjcäm, pø chojpiä Dios jioot jaduhñ.

⁴⁻⁶ Pøñä Diosmädia'agy najtshixøøby, hoyyä Diosmädia'agy tøø jia wiinjuøøñä coo ja'a Jesucristo hajxy tøø xñähho'túutäm, hoyyä piojpä quiädieey tøø jia yajñähwáatsäxä ja'a Jesucristäm, hoy tøø jia puhbedyijäm ja'a Diosh-espíritu, hoy jia najuø'øy coo ja'a Dios ja'a miäjaa quíexa'añ, coo ja'a Diosmädia'agy hajxy jaduhñ ñajtshixø'owät, cab hajxy hoy miäbøgaannä. Jaduhñ hajxy yajcähxø'øgy coo ja'a Dioshuung hajxy yagho'tägach, coo hajxy ñäxi'igy hijxwiinduum.

⁷ Pøñä Diosmädia'agy hoy cudiumb, quiumaabiä Dios jaduhñ. Jaduhñ mäwínäts hajxy je'e nebiä hoñaaxän. Coo tiu'uy, mänit hotyijä jaduhñ tiøømbety, tijaty tøø piäda'agyii, y quiunuu'xypä Dios jaduhñ.

⁸ Pøñ hoy ca'a cudiumb, haxøøgtuum jaduhñ ñä'ä nøcxø'owaambä. Jaduhñ mäwínäts je'e nebiä naax ca'a hoybän, maa haagä hapyti tiøømbetiän. Ño'py hajxy jaduhñ.

⁹ Hermanodøjc, hoy mijts naamnä weenjaty tøø nja hadsähgø'øy, nna-juøøbiøch jaduhñ coo mijts ja'a Dios jaançh tehñ yhoy xpiuhbeda'añ, je'eguiøxpä coo ja'a mbojpä mgädieey hajxy xyajñähwaatsä.

¹⁰ Jaançh tehñ yhojiäya'ay ja'a Dios jaduhñ. Jiahmiejchp jaduhñ coo mijts hoy mgudiün, coo mijtsä hermanodøjc tehngajñä mbuhbety, je'eguiøxpä coo mijtsä Dios mjahmiech.

¹¹ Jaduhñhøch njoot chocy coo hajxy hoy mgudiünät mäduhñtiä hajxy yaa mjugyhaty hädaa yaabä naaxwiin. Mänit hajxy jim mnøcxät tsajpootyp nebiä Dios hajxy tøø xñäma'ayän.

¹² Cab hajxy mnänuuxø'owät. Jaduhñ hajxy mgudiünät nebiä jäya'ayhajxy jecy quiudiuuñän, ja'a hajxy jim tøøbä ñøcxäbä tsajpootyp. Ja'a Dios jaduhñ yajwiinwaanøøyy coo hajxy jim ñøcxät, je'eguiøxpä coo ja'a Diosmädia'agy hajxy hänäjty hoy miäbøcy tehngajñä.

¹³⁻¹⁴ Jéquiänä Dios ja'a Abraham yajwiinwaanøøyy: "Tøyhájthøch miich nbuhbeda'añ. Nyajpu'uwáambiøch nyaghi'igáambiøch miich." Hamdsoo

cuhdujtcøxpä Dios jaduhñ miänaañ. Hix, caj pøn møjcuħdujt miøødä nebiä Dios miøødän.

¹⁵ Yajtøjiajtä Dios jaduhñ nebiä Abraham yajwiinwaanøøyyän, je'eguiøxpä coo Abraham hñajty tehñgajnä miäbøcy.

¹⁶ Ja'a Dioscøxpä jäya'ayhajxy hamuumdu'joot jaduhñ waambaty miäna'añ; y coo hajxy jaduhñ miäna'añ hamuumdu'joot, cab jaduhñ pøn waamb miänaañnä. Tødiägøøby jaduhñ.

¹⁷ Paadiä Dios jaduhñ miänaañ: “Tøyhájthøch tøø nyajwiinwaanø'øý cooçh nbuhbeda'añ”, neby hajxy jaduhñ ñajuø'øwät coo hajxy tøyhajt piuhbeda'añii, coo ja'a Dios ja'a wyiinmahñdy ni mänaa quia'a yajtägatsa'añ. Hamdsoo ja'a Dios jaduhñ miänaañ.

¹⁸ Jaduhñdsä tøyhajt hajxy nmøødhájtäm coo ja'a Dios ni mänaa quia'a høhnda'agy. Jaduhñdsä tøyhajt hajxy hoy nmøødhájtäm coo hajxy homiänaajä xpuihbedäänäm coo ja'a miädia'agy hajxy nmäbøjcämät.

¹⁹⁻²⁰ Jimä Jesucristo hajxy xñähgapxtúutäm tsajpootyp. Je'e jim tuumb teedywiindsøn nebiä Melquisedec jecy tiuñän. Cøjxta'axiøø ja'a Jesucristo jim tiuna'añ tsajpootyp. Jaduhñä tøyhajt hajxy hoy nmøødhájtämät coo hajxy jim homiänaajä xyaghidäänäm.

7

¹⁻² Coo ja'a Abraham ja'a reyhajxy hñajty hoy tøø yagho'ogy, mänaa hajxy hoy chiptuñän, mänitä Melquisedec hoy miøødnijøjcubaadø'øyii. Mänitä Melquisedec miänaañ cooc ja'a Dios ja'a Abraham hñajty piuhbeda'añ. Mäduhñtiä ja'a Abraham hñajty tøø piaady maa hñajty hoy tøø chiptuñän, majc-hit jaduhñ piädaacy tu'cuħdujtjaty. Mänitä Melquisedec piuhmooyy ja'a tu'hitpä. Mejtstu'u ja'a Melquisedec hñajty tiuñ. Tøø ja'a Dios tsajpootypä hñajty piäda'agy coo tiúnät teedy. Y gobiernä hñajty jim tiuumby maa ja'a cajpt xiøhatiän Salem. Jaduhñ miädia'agytiägø'øý coo hajxy jootcujc yhity. Jaduhñdsä Melquisedec xiøø miädia'agytiägøøbiä coo hoy guiobiernähaty.

³ Cab jaduhñ pøn ñä'ägädä najuø'øý pønä Melquisedec tiajhajt tieedyhajt, pøn yhaphajt tieedyhajt. Cab jaduhñ pøn ñajuø'øý mänaa myiñ mänaa quiahy, mänaa yho'cy mänaa tiägooyy. Coo je'e tiuñ teedywiindsøn cøjxta'axiøø, jaduhñ mäwlinäts je'e tiuñ nebiä Jesucristo tiuñän, ja'a Dios yHuung.

⁴ Cähxø'p jaduhñ coo ja'a Melquisedec møjcuħdujt hñajty jiaanç tehñ miøødä, je'eguiøxpä coo piuhmooyy ja'a tu'hitpä, mäduhñtiä ja'a Abraham hñajty tøø piaady maa hñajty hoy tøø chiptuñän. Y ja'a Abrahamä, mijts mhap mijts mdeedy je'eduhñ.

⁵ Y ja'a Leví yhap yhoc-hajxiä, ja'a hajxy tuumbä teediä, jaduhñ jim myiñ maa ja'a jecyquihdujtän coo hajxy piuhmo'owøøjät ja'a tu'hitpä maa ja'a majc-hitcøxpän. Ja'a miägunaaxhajxy jaduhñ yégäp, hoyyä Abraham hajxy quipxy jia møødhaphaty jia møødteedyhaty.

⁶ Pero ja'a Melquisedec, cabä Abraham hñajty jiuhyhaty miägu'ughaty. Hawiing hñajty tiuñ teedy. Pero puhmooyy je'e ja'a tu'hitpä. Ja'a Abraham jaduhñ yejc, ja'a Dios hñajty tøøbä yajwiinwaanø'øýäbä coo hñajty yajpu'uwa'añ yaghi'iga'añ. Mänitä Melquisedec ja'a Abraham ñämaayy coo ja'a Abraham hñajty piuhbeda'añijäm ja'a Diósäm.

⁷ Y tøyhajt jaduhñ coo ja'a Melquisedec møjcuħdujt hñajty jiaanç tehñ miøødä. Cabä Abraham quihdujt hñajty miøjjä nebiä Melquisedec quihdujtän. Hix, ja'a Melquisedec jaduhñ mänaañ coo ja'a Dios ja'a Abraham piuhbédät.

⁸ Haa ja'a hajxy yaa tuumbä teedy jäda'anäbaadyñä, ho'p hajxy, hoyyā tu'hitpä hajxy jia puhmo'oyii ja'a majc-hitcøxpä. Haa ja'a Melquisedecä, jaanä puhmooyyā je'ebä, pero cabä Diosmädia'agy miäna'añ coo tøø yho'ogy.

⁹⁻¹⁰ Hoyyā Levíhajxy hijty jia tuñ teedy, cabä quiuhdujthajxy hānajty miäbaady nebiä Melquisedec quiuhdujtān, je'eguiøxpä coo ja'a Abraham ja'a Melquisedec ja'a tu'hitpä hānajty tøø piuhmo'oy. Ja'a Abraham, je'edsä Levíhajxy hānajty yhaphajpy tieedyhajpy.

¹¹ Pero ja'a teedyhajxy, ni mänaa hajxy xquia'a yajnähwáatsämät. Paadiä Dios ja'a Cristo quiejxy coo je'e tiúnät teedy nebiä Melquisedec jecy tiuunñän. Cabä tiuñ nebiä Aarónhajxy tiuunñän.

¹² Coo ja'a Dios miänaañ coo ja'a Leví yhap yhoc-hajxy quia'a túunnät teedy, mänitā jecyquiuhdujt yajtägajtspä.

¹³ Coo ja'a Dios ja'a Jesucristo yaa quiejxy, yajtägajts ja'a jecyquiuhdujt jaduhñ, je'eguiøxpä coo ja'a Jesús tiuun teedy, hoyyā Leví quia'a ja haphaty quia'a ja teedyhaty.

¹⁴ Hix, ja'a Judá je'e yhaphajt tieedyhajt. Y cabä Moisés waamb miänaañ coo ja'a Judá yhap yhoc-hajxy tiúnät teedy.

¹⁵ Y coo ja'a Jesucristo teedy tiuñ nebiä Melquisedec jecy tiuunñän, cāhxø'p jaduhñ coo ja'a Dios ja'a jecyquiuhdujt tøø yajtägajtsnä.

¹⁶ Paadiä Jesús piädaacä teedy coo cøjxta'axiøø jiugyhada'añ. Cab jaduhñ yhity nebiä yaabä teedyhajxiän.

¹⁷ Jaduhñä Dios ja'a Jesús ñämaayy:

Cøjxta'axiøø miich mduna'añ teedy nebiä Melquisedec jecy tiuunñän.

¹⁸⁻¹⁹ Coo ja'a Moisés ja'a jecyquiuhdujt hajxy xquia'a yajnähwáatsäm, paadiä Dios jaduhñ miänaañ coo quia'a túunnät. Mänitā Dios ja'a Jesucristo yaa quiejxy coo hajxy hoy xyajnähwáatsämät. Mänitā Jesucristo hajxy jim xwioonøcxáañäm maa ja'a Dioswiinduumän.

²⁰⁻²¹ Coo ja'a Dios ja'a Jesús piädaacy teedy, mänit miänaañ coo ja'a miädia'agy jiaanč tehñ tiøyhajtä. Jaduhñds jim myiñ cujaay maa ja'a Diosmädia'aguiän:

Ja'a Dios mänaañ coo ja'a miädia'agy jiaanč tehñ tiøyhajtä; cábagä wyiin-mahñdy mänaa yajtägatsa'añ:

“Cøjxta'axiøø miich mduna'añ teedy nebiä Melquisedec jecy tiuunñän”, nømä Dios ja'a Jesús ñämaayy.

Pero coo ja'a wiingteedy piädaacä, cabä Dios waamb miänaañ.

²² Coo ja'a Jesucristo cøjxta'axiøø yhida'añ, jaduhñä tøyhajt hajxy nmøødhajtäm coo hajxy maas hoy xyajnähwa'adsáañäm quejee ja'a Moisés ja'a jecyquiuhdujt. Cab hajxy je'e xyajnähwáatsäm.

²³ Ja'a teedyhajxy hädaa yaabä naaxwiimbä, coo hajxy yho'ogy, mänit hajxy ñiguiuwichii. Paady hajxy may tøø tiuunñä.

²⁴ Pero cabä Jesucristo mänaa yho'ogaanñä. Cøjxta'axiøø jaduhñ tiuna'añ teedy. Cabä wiinghäna'c ja'a tuung jaduhñ yajmämähmø'øwa'añ.

²⁵ Cøjxta'axiøø ja'a Jesucristo yhida'añ. Hoy jiaanč yajnähwa'adsaannä pønä jioot tsojp coo ñähgapxtu'udøøjät ja'a Jesucristäm maa ja'a Dioswiinduumän homiänaajä.

²⁶ Coo ja'a Jesucristo jaduhñ tiuñ teedywiindsøn, jaanč tehñ yhoy hajxy jaduhñ ñähgapxtúutäm. Ni mänaa wiinghäna'c hajxy jaduhñ xquia'a nähgapxtúutäm nebiä Jesúsän. Cabä Jesús tii pojpä tii cädieey ñä'ägädä møødä. Ni pøn jaduhñ quia'a mäbaady nebiä Jesúsän. Nhaagä møødhajtäm pojpä cädieey hajxy. Jimä Jesucristo yhiñä tsajpootyp; møjcuhtdujt jim miøød.

²⁷ Haa ja'a teedywiindsón hajxy hädaa yaabä naaxwiimbä, jabom-jabomä animal hajxy yoxy. Jadúhñac tyijy ja'a piojpä quiädieey hajxy ñähwa'ads quiuhwá'adsät, mөөdä cu'ug piojpä quiädieeyhajxy. Jayøjp hajxy yoxy ja'a yhamdsoo pojpä yhamdsoo cädieeguiøxpä. Mänit hajxy jiaac yoxy ja'a cu'ug piojpä quiädieeguiøxpä. Pero cabä Jesucristo animal mänaa yoxy. Hix, tähooc jaduhñ ñiñähdujcä coo yho'cy.

²⁸ Ja'a jecyquihdujt jaduhñ mänaamb coo ja'a jäya'ayhajxy tiúnät teedywiindsón, hoyyá pojpä cädieey hajxy jia mөөdä. Mänitä Dios cujecy miänaañ coo ja'a Jesucristo tiúnät teedywiindsón. Ja'a tøyhajtä Dios jaduhñ yejc coo jaduhñ miänaañ. Ni mänaa ja'a Jesús pojpä cädieey quia'a mөөdä.

8

¹ Hoorä, jadúhñhöch tөө nmädia'agy coo ja'a Jesucristo hajxy jim xñähgapxtúutäm tsajpootyp. Jim jaduhñ tiuñ teedywiindsón. Hahooyhaamby jim yhäña'ay maa ja'a Diosän.

² Jim tiuñ tsajpootyp maa ja'a tsajtøjc hoybän, ja'a Dios yhädiúunäbä. Ca'a jäya'ayä je'e hädiuun.

³ Haa ja'a hajxy yaa tuumbä teedywiindsón hädaa yaabä naaxwiinä, jaduhñ hajxy piäda'agyii coo animal hajxy yóxät, coo hajxy cøxiä wiinä quiuyoxø'owät. Jadúhñac tyijy ja'a piojpä quiädieey hajxy ñähwa'ads quiuhwá'adsät. Y coo ja'a Jesucristo jim teedywiindsón tiuñ tsajpootyp, paady jaduhñ ñiñähdujcä.

⁴ Coo häxøpy yaa yhity hädaa yaabä naaxwiin, cab häxøpy tiuñ teedywiindsón. Haa ja'a hajxy yaa tuumbä teediä, je'eds hajxy cuyoxøøby nebiä jecyquihdujt yhane'emiän.

⁵ Haa ja'a tsajtøjc yaabä maa hajxy tiúñänä, cab jaduhñ miäbaady nebiä tsajtøjc jim tsajpootypän. Coo ja'a Moisés ja'a wittsajtøjc hñajty quioja'añ, mänitä Dios ja'a Moisés ñämaayy: “Tspicøxpä wittsajtøjc jaduhñ mgójät nébiøch jim nyaghijxiän tunguhduum coo mnähguipxtú'udät.”

⁶ Tөө ja'a Dios ja'a hawiinjemybiä yajcuhducy coo hajxy jim xyaghidáanäm tsajpootyp cøjxta'axiøø. Haa hädaa hawiinjemybiä ja'a Dios yajcuhdújcäbä, maas hoy je'eduhñ quejee ja'a Moisés jecy yéjcäbä. Paadiä Jesucristo maas hoy tiuñ teedywiindsón quejee ja'a teedyhajxy, ja'a hajxy hädaa yaabä naaxwiimbä. Ja'a Moisés jecy yéjcäbä, cab hajxy jaduhñ xjiaty puhbéjtäm nebiä hawiinjemybiän, ja'a jäda'ahatypän.

⁷ Coo hajxy häxøpy xpiuhbéjtäm ja'a Moisés jecy jia yéjcäbä, cabä Dios ja'a hawiinjemybiä häxøpy tөө ñä'a yajcuhducy.

⁸ Cabä Dios ja'a jecyjiäya'ayhajxy quiumaayy je'eguiøxpä coo hajxy hoy quia'a cuduuñ. Jaduhñ jim myiñ cujaay maa ja'a Diosmädia'aguiän:

Ja'a Dios jaduhñ mänaamb:

Abaadaamb jaduhñ coöchä jäya'ayhajxy nmөөdyajcuhduga'añ ja'a hawiinjemybiä,

ja'a hajxy jim tsänaabiä judíos-naaxooty mөөd Judábä-naaxooty.

⁹ Maas hóyhöch jaduhñ nmөөdyajcuhduga'añ quejéjøch ja'a yhap ja'a tieedyhajxy nmөөdyajcuhdujcän mänáajøch hajxy jim hoy nwoobädsømiän Egiptonaaxooty.

Cab hajxy hoy ñä'a cuduuñ nébiøch nja yajcuhdujquiän.

Páadyhöch hajxy jaduhyyä nnä'a nähgueecnä, nømä Dios miänaañ.

¹⁰ Coo jaduhñ yhabáadät, mänitøchä jäya'ayhajxy nmөөdyajcuhduga'añ ja'a hawiinjemybiä, ja'a hajxy jim tsänaabiä judíos-naaxooty, nømä Dios miänaañ.

Nyajnähixø'owáambiøch nmädia'agy hajxy hoy, neby hajxy hamuumdu'joot jaduhñ wyiñjuø'owät.

Mänitøch hajxy jaançh tehñ yhoy xwyiingudsähgø'øwa'añ.

Høøch hajxy ngu'ughadáannäp.

¹¹ Nägøxiøchä nmädia'agy hajxy xmiäbøgaanä ñämaj ñäbetiä.

Haagä mæbøgaamb hajxy jaduhñ.

¹² Nyajnähwa'adsáanäbøch ja'a piojpä quiädieey hajxy. Cábøchä piojpä quiädieeyhajxy mänäa njahmiedsáanänä.

¹³ Coø ja'a Dios miäna'añ coø ja'a hawiinjemybiä tøø yajcuhducy, jaduhñ miänaambä coø ja'a jecypiä quia'a tsoobaatnä, coø quia'a tunaannä.

9

¹ Jaduhñä jecyquiuhdujt myiimbä mädyii ja'a jäya'ayhajxy quiudiünäp maa ja'a chajtøjc-hajxiän.

²⁻³ Jaduhñdsä wittsajtøjc hajxy jecy yhädiuñ. Coø ja'a wit hajxy yaghadøødiujcy, metscä cuarto jaduhñ hoy miähmø'ø. Tu'nax hoy møj miähmø'ø; ja'a cujpä muutsc hoy miähmø'ø. Ja'a cuarto møjpä, je'eduhñ xøhajt “cunuu'xytiøjc”; jiibiä ceratoyøhñdy hajxy yaghijty møødä meexä maa ja'a cunuu'xyhajcaagy hajxy hñajty yujcoñän. Ja'a cuarto muutspä, je'eduhñ xøhajt “cunuu'xytiøjc maa ja'a Dios yhäña'ayän.”

⁴ Ja'a orohaltar jiiby hijt maa ja'a poom hajxy hñajty jioquiän, møødä cuhdujtcajä; oronähwopy hñajty je'e. Jiiby cajäjooty ja'a orotu'ts yhiyty maa ja'a maná hajxy hñajty yaghitiän. Ja'a maná, je'edsä tsajcaagy hñajty xiøhaty ja'a Dios jecy quiéjxäbä. Jiibiä Aarón ja'a quiuhdajt yhiypä ja'a jecy wáamäbä. Jiibiä tsaa yhiypä maa ja'a Dios ja'a cuhdujt jecy yuugjahyyän.

⁵ Cajänähgøxpä querubín yhädiuñnaxyhajxy yhiyty “maa ja'a Dios yhäña'ayän.” Jimä quieecthajxy quiäjøjna'ay “maa ja'a Dios pojpa cädieey miee'xiän.” Cábøch ngapxtøwa'añ nebiaty hädaaduhmbä hijty tiuñ.

⁶ Coø ja'a wittsajtøjc hajxy hñajty tøø quiojnä, mänitä teedyhajxy jiiby tiägøøchohnä maa ja'a møjcunuu'xytiøjcän. Jiiby hajxy jabom-jabom tiuunnä.

⁷ Pero jiiby maa ja'a muutscunuu'xytiøjcän maa ja'a Dios hñajty yhäña'ayän, jagooyyä teedywiindsøn hijty jiiby tiägø'ø. Tähooquiä hajxy hijty jiiby tiägø'ø ja'a tu'ugjomøjtpä. Coø hajxy hñajty jiiby tiägø'øwa'añ, jayøjpä animal hajxy hijty yagho'ogy. Mänitä animalnø'ty hajxy hijty jiiby nøcxy quiuyoxø'ø muutscunuu'xytiøgooty, ja'a piojpä quiädieeguiøxpähajxy, møødä cu'ugä piojpä quiädieeguiøxpähajxy.

⁸ Jaduhñä Dioshespíritu hajxy xyajwiinjuøøyyäm coø hajxy hoy nga'a tägøøyyämät maa ja'a Dioswiinduumän mäduhñtiä ja'a jecyquiuhdujt hajxy yajtuññä.

⁹ Jaduhñ hajxy jäda'anäbaadyñä nhíjtäm. Je'enä animal hajxy yoxy; je'enä hajxy cøxiä wiinä quiuyoxø'ø. Paady hajxy jaduhñ quiuhdujthatyñä, jaduhñäc tyijy ja'a Dios jiaançh tehñ quiumay. Cab hajxy jaduhñ ñähwa'açh quiuhwa'açh, hoy hajxy jaduhñ jia cuhdujthatyñä.

¹⁰ Jagooyyä ja'a quiuhdujthajxy yhane'emy tijaty hajxy quiáyäp yhú'ugäp, neby hajxy ñibiuj ñijie'edsøjät, neby hajxy yaa jäya'ayhädät hädaa yaabä naaxwiin. Pero yø'ø cuhdujt jaduhmbä, cab jaduhñ tiuunnä. Tøø ja'a Dios ja'a hawiinjemybiä yajcuhdujnä, mädyii jaduhñ tunaamb.

¹¹ Mänitä Jesucristo hajxy hoy xjiaançh tehñ yajnähwáatsäm. Jaaya'ay jaduhñ túunnäp teedywiindsøn jim tsajpootyp maa ja'a tsajtøjc jaançh tehñ yhoybän. Ca'a jäya'ayä hajxy hädiuñ hädaa yaabä naaxwiimbä.

12 Tøø ja'a Jesucristo jim tiägø'øy maa ja'a Dioswiinduumän ja'a tähooctagø'öyyä. Hamdsoo hänajty tøø ññähdugyii coo højts hänajty xñähho'tu'udáanäm. Cabä tii nø'ty quiuyoxøøyy maa ja'a yaabä tsajtøjcän nebiä yaabä teedyhajxy quiuhdujthatiän coo chivo hajxy yoxy, coo waj hajxy yoxy. Coö ja'a Jesucristo hajxy tøø xñähho'túutäm, paady hajxy jim nhidáanäm Dioswiinduum cøjxta'axiøø.

13 Jaduhnä jäya'ayhajxy quiuhdujthaty, coo hajxy yho'ogø'øy, mänitä chivonø'ty wajnø'ty hajxy yajniñähxänicxyii. Mänitä wajcujiaam hajxy yajniñähwøjyii, ja'a hajxy hänajty tøø ñäno'ogø'øyäbä maa ja'a altarän. Jaduhn hajxy ñiyajñähwa'ačhii.

14 Hoorä, ja'a chivonø'ty, ja'a wajnø'ty, cabä pojpa cädieey mänaa yajñähwa'ačh. Ja'a Jesucristo hajxy jaduhn xyajñähwáatsäm mänaa hajxy xñähho'túutäm. Cabä Jesucristo tii pojpa cädieey miøødä. Cab jaduhn mänaa yho'ogaannä. Hamdsoo jim ññähdujca maa ja'a Dioswiinduumän. Jaduhnä nhaxøøgcuhdujt hajxy xyajñähwáatsäm, nebiä Diosmädia'agy hajxy jaduhn maas hoy nmäbøjcämät.

15 Coö ja'a Dios ja'a hawiinjemybiä tøø yajcuhducy, paadiä Jesucristo hajxy xñähho'túutäm, pønjetiä Dios jaduhn wyiimbiiw. Xyajñähwáatsäm ja'a nbojpa ngädieey hajxy nebiaty hajxy tøø njäya'ayhajtäm maa ja'a jecypiä yhiitiän. Y jim hajxy xyajñøcxáanäm tsajpootyp nebiä Dios hajxy xyajwiinwaanøøyyäm.

16-17 Homiädyii testamentänoquiä, cahnä tiuungpaadyñä, jugyhajpnä jaaya'ay jaduhn. Coonä yho'ogät, mänitnä ja'a nocy tiuungpaada'añ.

18 Paadiä Dios jaduhn miänaañ coo animal hajxy yóxät, mänaa ja'a jayøbhajtpä yajcuhduquiän.

19 Coö ja'a Moisés ja'a cu'ugä jecyquiuhdujt hänajty tøø quiøxy mo'oy, mänitä wajhuung vojxy møødä chivohuung. Mänitä ñø'ty hoy ñøødemøøyyä. Mänitä tsaptsmeegpøjt hoy piäda'agy nø'ñøøjooty møødä hisopohaa'x. Mänitä cu'ug ja'a nø'ñøø yajñähxänicxy møødä jecyquiuhdujttsaa.

20 Mänitä Moisés miänaañ: "Haa hädaa nø'tiä, hijxtahnd hädaaduhñ coo mijtsä Dios xmiøødyajcuhdujcy."

21 Mänitä Moisés ja'a wittsajtøjc ja'a nø'ñøø hoy yajñähxänicxpä møød tijaty hajxy jiiby yajtuumby mänaa ja'a Dios hajxy hänajty wyiingudsähgø'øyän.

22 Jaduhnä jecyquiuhdujt hijty yhane'emy cooc cøxiä ñähwa'ačhii nø'tyhaam. Coögä animal hajxy quia'a yóxät, cábagä piojpa quiädieey hajxy ñä'a nähwá'adsät.

23 Haa ja'a wittsajtøjc hädaa yaabä naaxwiimbä, møød tijaty jiiby hijp tsajtøgootiä, animalnø'tyhaamä Moisés yajñähwaach. Pero højtshajtäm, ni mänaa ja'a animalnø'ty hajxy xquia'a yajñähwáatsämät. Paadiä Jesucristo hajxy hoy xñähho'túutäm, jaduhn hajxy nnähwáatsäm.

24 Tøø ja'a Jesucristo jim tiägø'øy maa ja'a Dioswiinduumän. Jim hajxy xñähgapxtúutäm. Ca'a yhädaa yaabä tsajtøgootiä tiägøøyy. Haa ja'a tsajtøjc yaabä, cab jaduhn tiehm miäbaady nebiä tsajtøjc jim tsajpootypän.

25-26 Haa ja'a teedywiindsøn hädaa yaabä naaxwiimbä, jomøjt-jomøjt jiiby tiägø'øy maa ja'a muutscunuu'xytiøjcän. Jiibiä animalnø'ty nøcxy quiuyoxø'øy. Pero ja'a Jesucristo, tähooquiä yho'cy. Cabä Dios jaduhn miänaañ coo mayhooc yho'ogät. Coö yhabaaty, mänitä Jesucristo hajxy hoy xñähho'túutäm ja'a nbojpa ngädieeyhajtäm.

27 Ja'a Dios hajxy xquiunúu'xäm xpiädáacäm coo højts tähooquiä nho'ogáanäm. Mänitä Dios hajxy xyajtøyhajtyegáanäm.

28 Jaanä tähooquiä ja'a Jesucristo hajxy xñähho'túutämbä ja'a nbojpa ngädieeyhajtäm. Tähooxyajñähwa'achä hajxy xyajñähwaats xyajcuhwáatsäm.

Coo jadähooc quiädaactägatsa'añ, mänit hajxy jim xyajnöcxáanänä maa ja'a Dioswiinduumän, pönjaty hánajty jaduhñ jii jøbhijxp.

10

¹ Haa ja'a jecyquiuhdujt, hijxtahñd hánajty jaduhñ hijp coo ja'a Jesucristo hajxy hánajty xñähho'tu'udáanäm. Nebiä jecyquiuhdujt hánajty yhane'emiän, jomøjt-jomøjtä animal hajxy jia yoxy. Pero ni pøn hánajty quia'a nähwa'açh quia'a cuhwa'açh, pönjaty hánajty ja wi'i tiägø'øwáambäp maa ja'a Dioswiinduumän.

² Coo hajxy häxøpy tøø jiaançh nähwa'açh tøø jiaançh cuhwa'açh ja'a piojpä quiädieey hajxy, cabä animal hajxy häxøpy yojxnä. Tähooquiä hajxy jaduhñ cu yojxy, mänit jaduhñ cu yhojøøyy. Hamdsoo hajxy cu ñajuøøyy coo pojpä cädieey hajxy quia'a mõødänä.

³ Pero coo animal hajxy hánajty jaduhñ yoxynä jomøjt-jomøjt, ñajuøøby hajxy hánajty jaduhñ coo pojpä cädieey hajxy miøødä.

⁴ Hix, ni mänaa ja'a wajnö'ty ja'a chivonø'ty ja'a pojpä cädieey quia'a yajnáhwa'açh quia'a yajcuhwa'açh.

⁵ Paadiä Cristo ja'a Dios ñämaayy, mänaa hánajty jaduhñ yaa tøø quiäda'aguiän hädaa yaabä naaxwiin:

Caj miich mjoot jaduhñ chocy coo ja'a animal hajxy tehngajnä yóxät.

Páadyhöch miich yaa xquiejxy hädaa yaabä naaxwiin cooçh yaa njäya'ayhádat, nébiøçhä jäya'ayhajxy jaduhñ yaa nnähho'tu'udät.

⁶ Caj miich mjoot jaduhñ chocy coo animal hajxy yóxät, coo hajxy ñó'ogät.

Paadiä animal hajxy yoxy, nähwaatspä piojpä quiädieeyhajxy jaduhñ.

⁷ Mänitøch nmänaañ:

“Dios, páadyhöch jaduhñ yaa tøø ngäda'agy nébiøch jaduhñ yaa ngudiúnät nébiøch miich xñämaayyän,

neby jaduhñ jim myiñän cujaay maa miich mmädia'aguiän ja'a høøchcøxpä”, nõmä Cristo ja'a Dios ñämaayy.

⁸ Jayøjpä Cristo miäna'añ cooc ja'a Dios jioot quia'a tsocy coo animal hajxy quia'a yóxät ni quia'a nó'ogät. Ja'a piojpä quiädieey hajxy jaduhñ yajnáhwaatsäp yajcuhwáatsäp. Hoyyä jecyquiuhdujt jia hane'emy coo hajxy tehngajnä yóxät, cabä Dios jaduhñ quiumay.

⁹ Jaduhñ miänaangombä: “Teedy, páadyhöch yaa tøø ngäda'agy nébiøch jaduhñ yaa ngudiúnät nébiøch miich xñämaayyän.” Jaduhñ miädia'agytiägø'øy coo ja'a Cristo hánajty jaduhñ yhane'ema'añ coo animal hajxy quia'a yójxnät, nebiä Tieedy miädia'agy jaduhñ quiudiúunät.

¹⁰ Hoyyä Jesucristo ja'a Tieedy miädia'agy jiaançh cudiuunä coo højts jaduhñ tähooquiä xñähho'túutäm; paadiä Dios hajxy xyajnáhwaats xyajcuhwáatsäm.

¹¹ Jaduhñä jecyquiuhdujt hijty yhane'emy coo ja'a teediä animal hajxy jabom-jabom wyi'i yóxät. Hoy hajxy jaduhñ jia cudiuun, cab hajxy jaduhñ ñä'ägädä nähwaach ñä'ägädä cuhwaach.

¹² Coo ja'a Jesucristo ja'a nbojpä ngädieey hajxy hánajty tøø xñähho'túutäm tähooquiä, mänit hoy yhäñaaguiäda'agy maa ja'a Dios yhahooyhaampiän.

¹³ Jim jaduhñ yahixy coo ja'a miädsiphajxy quia'a mäjäda'aga'añ.

¹⁴ Tähooquiä hajxy tøø xñähho'túutäm. Jaduhñä nbojpä ngädieey hajxy xyajnáhwaats xyajcuhwáatsänä.

¹⁵ Jaduhñä tøyhajt hajxy nmøødhájtäm coo tiøyyä, je'eguiøxpä coo ja'a Dioshespíritu jaduhñ miänaambä maa jaduhñ cujaay myiñän:

¹⁶ Coo jaduhñ yhabáadät, mänitøch hajxy nmøødyajcuhduga'añ, nõmä Dios miäna'añ:

Nyajnähixø'owáambiøch nmädia'agy hajxy hoy, neby hajxy jaduhñ hamuumdu'joot wyiinjuø'owät.

17 Mänit miänáangombä:

Cábøchä piojpä quiädieeyhajxy mänaa njahmiedsäanänä.

18 Jaduhñds je'e, tøø ja'a Jesucristo ja'a nbojpä ngädieey hajxy xyajnähwaats xyajcuhwáatsänä tähooquiä. Hoyyä animal hajxy jia yoxyñä, cab jaduhñ choobaatnä.

19-20 Hermanodøjc, maa ja'a jecyquihdujt myiñän, cabä cuhdujt pøn miøødä coo jiiby tiägø'owät maa ja'a muutscunuu'xytiøgootiän. Pero coo ja'a Jesucristo hajxy tøø xñähho'túutäm, paady hajxy jim hoy ndägø'owáanänä maa ja'a Dioswiinduumän. Tøø hajxy xyajnähwaats tøø hajxy xyajcuhwáatsäm ja'a nbojpä ngädieeyhájtäm.

21 Je'eds hajxy jim xñähgapxtúutäm Dioswiinduum.

22 Entonces, tsøg hajxy jim tægøøyyäm Dioswiinduum. Tsøgä miädia'agy hajxy hamuumdu'joot mabøjcäm coo ja'a cuhdujt hajxy nmøødhájtäm coo hajxy jim ndägøøyyämät, je'eguiøxpä coo ja'a Jesucristo hajxy tøø xñähho'túutäm. Jaduhñä nbojpä ngädieey hajxy tøø xyajnähwaats tøø xyajcuhwáatsäm.

23 Tsøgä Diosmädia'agy hajxy tehngajnä mabøjcäm. Cab hajxy nnajt-shixøøyyämät. Nmøødhájtäm ja'a tøyhajt hajxy jaduhñ coo ja'a Dios hajxy xmio'owáanäm nebiaty hajxy tøø xyajwiinwaanøøyyäm coo hajxy cøxiä wiinä xmio'owáanäm.

24 Tsøg hajxy niguiapxwíjjäm neby hajxy maas hoy nniçhojc nnibia'häyóowämät hamiñ haxøpy, neby ja'a Diosmädia'agy hajxy jaduhñ maas hoy ngudiúunämät.

25 Jaduhñ hajxy nyajnajuoøøyyäm coo miäwiingoonnä coo ja'a Jesucristo yaa quiädaactägatsa'añ. Paady, tsøg hajxy nijootcapxmøcpøjcäm. Tehngajnä hajxy nhamugøøyyämät ja'a Dioscøxpä. Näje'e hajxy, cab hajxy jaduhñ ñä'ägädä mejtsnä. Cabä quihdujthajxy jaduhñ yhooyä.

26 Coo hajxy tehngajnä haxøøg nwädíjtämät, hoyyä tøyhajt hajxy tøø nja wiinjuøøyyäm, cabä nbojpä ngädieey hajxy jaduhñ ñä'ägädä nähwáatsämät.

27 Haxøøgtuumä Dios hajxy jaduhñ xpiädáacämät maa ja'a jøøn tioyyän, maa ja'a Dios miädsiphajxy yhitiän. Höchähgøøñä jaduhñ jiiby.

28 Pøn jaduhñ ca'a cudiumb nebiä Moisés ja'a jiecycquihdujt yhane'emiän, pø tøø testigohajxy jaduhñ yhixy mejtstägøøgä, tsipcøxp jaduhñ yagho'oga'añii.

29 Maas hanaxiä hajxy jaduhñ quiumädowaannä pønjaty ja'a Diosh-espíritu jaduhñ haxøøg nänøømb, ja'a mayhajt tuumbä, pønjatiä Dioshuung jaduhñ xøøghajp, pønjatiä ñø'ty jaduhñ häyoowhíjxäp, hoy hajxy je'eduhñ tøø xjia nähho'túutäm, hoy hajxy je'eduhñ tøø xjia yajnähwaats tøø xjia yajcuhwáatsäm.

30 Tøyhajtä Dios jaduhñ miänaañ: “Høøch jaduhñ nyaghawiimbidaamby.” Chaadsä Diosmädia'agy miänáangumbä: “Dios quiu'ug jaduhñ yajcumädowaambä.”

31 Höchähgøøñä jaduhñ coo ja'a Dios hajxy xyajcumädóowämät; je'eduhñ jugyhajp cøjxta'axiøø.

32 Naxy hajxy mdehm jiahmiédsät nebiä Jesucristo miädia'agy hajxy mmädoodsohñän. Hamuumdu'joot hajxy mbadu'ubøjcy, hoy hajxy hänajty mja tsaaçhpøcy hoyhoy.

33 Näje'e hajxy myaghäyoowhijxy cu'ughagujc. Y mjootcapxmøcpøjpy hajxy hänajty pønjaty hänajty jaduhñ häyoowhíjxäp.

³⁴ Y mnäxuu'chp hajxy hānajtj pōnjaty hānajtj tsumyčhānaaby. Mxoondaacp hajxy hānajtj, hoy hajxy cōxiā wiinä xjia pōjcā. Mnajuøøby hajxy hānajtj coo hajxy jim mhida'añ tsajpootyp cōjxta'axiøø.

³⁵ Entonces, cab hajxy tii mdájāt mmáyāt; tehngajnā hajxy mmäbógāt coo ja'a Dios hajxy xyhixyñā. Mjahmiédsāp hajxy jaduhñ coo hajxy nōcxy jim mhidaaññā tsajpootyp.

³⁶ Naxy hajxy mdehm miee'xtúgāt, nebiā Diosmādia'agy hajxy jaduhñ hoy mgudiúnāt. Jaduhñ hajxy mbáadāt tijaty ja'a Dios hajxy tøø xyajwiin-waanøøyyām coo hajxy xmio'owáañām.

³⁷ Jaduhñā Diosmādia'agy miāna'añ:

Mobādajpā je'e quiāda'aga'añ pōñā Dios jaduhñ quiexaamby.

³⁸ Pōñā Diosmādia'agy hoy cudiumb, miäbøjpy je'eduhñ tehngajnā.

Pero coo ñajtshixø'øwāt, cabā Dios quiumayaaññā.

³⁹ Pero højtshájtām, cab hajxy mānaa ñajtshixø'øwáañām. Tehngajnā hajxy nmäbójcām. Paadiā Dios hajxy xyhuuc yajnāhwa'adsáañāmbā. Cab hajxy xyajcumāadowáañām.

11

¹ Coo hajxy nmäbójcām, mānitā tøyhajt hajxy nmøødhájtām coo hajxy nbaadāañām mädyijaty hajxy njøbhíxām, hoy je'eduhñ quia'a ja cāhxø'øgyñā.

² Ja'a jecyjia'ayhajxy, coo hajxy miäbøjcy, paadiā Dios quiumaayy.

³ Coo hajxy nmäbójcām, jaduhñ hajxy nyajnajuøøyyām coo ja'a Dios ja'a naaxwiin yajwa'añguiojy ja'a miādia'agyhaam, møødā madsa'a, møødā po'o, møødā xøø.

⁴ Coo ja'a Abel jecy miäbøjcy, paadiā Dios quiumaayy. Hix, hoyyā Abel quiudiuuñ coo animal yojxy ja'a Dioscøxpā. Ja'a Caín, caj quiumaayyā je'eguiøxpā coo hānajtj quia'a mäbøcy. Hix, cabā animal yojxy. Hoy jaduhñ coo ja'a Abel hajxy nbahíxāmāt, hoy jecy jia yagho'cā. Hix, miäbøjcy ja'a Abel.

⁵ Coo ja'a Enoc jecy miäbøjcy, paadiā Dios quiumaayy. Cabā Enoc ñā'ā ho'cy. Jaduhyyā Dios yajnøcxy tsajpootyp. Jaduhñ jim myiñ cujaay maa ja'a Diosmādia'aguiän.

⁶ Coo hajxy nga'a mäbójcāmāt, cabā Dios hajxy xquiumáayyāmāt. Tsipcøxp hajxy nmäbójcāmāt coo ja'a Dios tiømiādia'agy. Y jaduhñ hajxy nmäbójcāmāt coo ja'a Dios piuhbeda'añ pōñā Dios wiingudsāhgø'øwaamb.

⁷ Coo ja'a Dios ja'a Noé jecy ñāmaayy coo ja'a nøøgomdägoy ja'a naaxwiin hānajtj quiøxy wiinyeegø'øwa'añ, mānitā Noé ja'a Dios miādia'agy jaduhñ quiudiuuñā, hoyyā nøøgomdägoy hānajtj quia'a ja cāhxø'øgyñā. Mānitā barco cruundā yhädiuunñ. Jiibiā Noéhajxy choocy møødā yhuung møødā tio'oxy. Coo ja'a Noé jaduhñ miäbøjcy, paadiā Dios jiaanč tehñ quiumaayy. Pero ja'a wiinghāna'c-hajxy, cab hajxy miäbøjcy. Paady hajxy cōjx quiuhdägoy.

⁸ Coo ja'a Dios ja'a Abraham jecy ñāmaayy coo jim chóonāt ñaaxooty, coo jäguemnaax ñócxāt maa ja'a Dios ja'a Abraham yajnāhdijjiän coo chānaadiaacpógāt, miäbøjcy ja'a Abraham jaduhñ. Mānit jim jiaanč tsohññā ñaaxooty. Nā'ā nāgoobā ñā'ā tu'ubøjñā. Cab hānajtj ñajuø'øy maa ñócxāt.

⁹ Coo ja'a Abrahamhajxy jim miejch maa ja'a Dios hānajtj tøø yajnāhdijjiän, cab hajxy tiehm chānaadiaacpøjcy, je'eguiøxpā coo hānajtj jiāya'añaxootiä. Wittøgooty hajxy hānajtj chāna'ay. Pero miäbøjpiä Abrahamhajxy hānajtj coo ja'a naax hajxy hānajtj mio'owa'añii, neby hajxy hānajtj tøø yajwiin-waanø'øyijän ja'a Diósām. Jaduhñā Abraham yhuung Isaac ñāmáayyābā møødā yhoc-huang Jacob.

¹⁰ Hix, ñajuøøbiä Abrahamhajxy hñajty coo hajxy hñajty jim ñøcxa'añ tsajpootyp Dioswiinduum. Cab hajxy hñajty tiajy miay coo ja'a naax hajxy quia'a tsoj mooyyã.

¹¹ Jaanã jaduhñä Sara jecy miäbøjpä. Tøø hñajty miäjaanã mänaa ja'a Dios hoy piuhbetiän coo maaxhuung piäadät. Y jaanç huungpaat ja'a Sara jaduhñ je'eguiøxpä coo miäbøjcy nebiä Dios hñajty tøø yajwiinwaanø'øyän.

¹² Y ja'a Abrahamä, hoy hñajty tøø jia mäjaanã, møjjøøyy mayøøyy je'eduhñ. Tøø ja'a yhap yhoc-hajxy jaduhñ jiaanç tehñ miayøøñä. Cab hajxy jaduhñ hoy yajmäçhowa'añ. Jaduhñ hajxy miayyã nebiä madsa'ajän, nebiä tsabiu'ujän.

¹³ Coo ja'a Abrahamhajxy yho'cy, cahnä hajxy hñajty quiøxy paadyñä mädyijatiä Dios hñajty tøø yajwiinwaanø'øy. Pero miäbøjc hajxy jaduhñ. Ñajuøøby hajxy hñajty coo hajxy hñajty jim ñøcxa'añ tsajpootyp. Paady hajxy xioondaacy. Ñajuøøby hajxy hñajty coo hajxy hñajty nä'ä nägoobä wiädityñä.

¹⁴ Pønjaty jaduhñ wädijp, cahnä tsänaadiaact hajxy piaadyñä.

¹⁵ Coo ja'a jioothajxy cu chojcy, cu wyiimbijty hajxy, cu ñøcxtägajch hajxy je'e maa hajxy hñajty tøø yhuuc tsohmñän.

¹⁶ Pero jimä jioot hajxy hñajty hamuumdu'joot tøø piäda'agy tsajpootyp maa ja'a chänaadiaacthajxy hñajty tøø yahixøøyyäxän. Ja'a Dios jaduhñ hahixøøyy. Cabä Dios miädsähdiuñ ja'a Abrahamhajxy.

¹⁷⁻¹⁸ Coo ja'a Dios ja'a Abraham yhanehmy coo yhuung yóxät, ja'a Isaac-hajpä, miäbøgaambiä Abraham hñajty je'eduhñ, hoy ja'a yhuung hñajty jia tu'uquiä, hoyyã Dios hñajty tøø jia mäna'añ: "Møjø'øwaamb mayø'øwaamb miäch mhuung ja'a Isaac-hajpä." Ñä'ä joodhijx ja'a Dios ja'a Abraham jaduhñ pø jiaanç cudiunaamby hñajty jaduhñ.

¹⁹ Miäbøjpiä Abraham hñajty coo ja'a yhuung hñajty yagjuypioğáanäxä ja'a Diósäm. Mänitã Dios miänáangombä coo ja'a yhuung quia'a yaghó'ogät. Jaduhñ mäwíinäts ja'a Isaac hoy jiaty nebiä jadähooc tøø jiuypioquiäbän.

²⁰ Coo ja'a Isaac miäbøjcy, paadiä Jacob ñämaayy møødä Esau coo ja'a hoybä ja'a weenbä hajxy piaada'añ.

²¹ Coo ja'a Jacob miäbøjcy, paadiä yhoc-huunghajxy ñämaayy coo ja'a hoybä weenbä hajxy piaada'añ. Ja'a José yhuunghajxy je'e. Mänitã Jacob ja'a Dios wyiingudsähgøøyy. Cuhdajtcøxp hñajty ñiguiuhdijyi. Ho'ogáannäp hñajty je'eduhñ.

²² Coo ja'a José miäbøjcy, ñajuøøyy jaduhñ coo yhap yhoc-hajxy hñajty jim cujecy choona'añ Egiptonaaxooty. Paady jaduhñ yhanehmy coo ja'a piajç miänøcxäxät. Ho'ogáannäp hñajty je'ebä.

²³ Coo ja'a Moisés myiñguiah y jaanç tehñ yajxón, yu'uç hajxy yaghi-jty tågøøgpø'o. Hix, tøø ja'a gobiernä hñajty hoy yhane'emy coo ja'a pigäna'c-huunghajxy quiøxy yagho'ogøøjät ja'a ya'ayhäna'cpä. Ja'a Moisés tiaj tieedy, cabä gobiernä hajxy hñajty chähgø'øy. Miäbøjpiä Diosmädia'agy hajxy hñajty.

²⁴ Coo ja'a Moisés miøjøøñä, miäbøjc je'ebä. Cabä gobiernä hñajty tieedy-haphadaannä, ja'a hñajty jim tuumbä Egiptonaaxooty.

²⁵ Hamdsoo jaduhñ miänääñ coo ween yhäyoowhixyii møødä Dios quiu'ughajxy näguipxy. Cab hñajty jim miähmø'øwaanä maa ja'a haxøøgcuhdujt hajxy wyi'i tiuñän. Cab hajxy hñajty ñajuø'øy coo hajxy hñajty jecy quia'a xoonä'agaannä.

²⁶ Cabä Moisés ja'a jioot jim piädaacnä maa ja'a xädø'øñän jim Egipton-aaxooty. Maas jootcujc hñajty ñijiäwøøyyänä coo yhäyoowhixøøjät ja'a

jäya'aguiøxpä, ja'a Dios hänajty quixaambiä. Ñajuøøby hänajty jaduhñ coo ja'a hoybä weenbä mio'owa'añijäm ja'a Diósäm.

²⁷ Coo ja'a Moisés miäbøjcy, paady jim chohñnä Egiptonaaxooty. Hoyyä gobiernä hänajty jia jootma'ady, cabä Moisés ñä'ägädä tsähgøøyy. Tähooctu'ubøquiä ja'a Moisés tiu'ubøjnä. Ja'a Diosmädia'agy hänajty miäbøjpy, hoyyä Dios mänaa quia'a ja hixyii.

²⁸ Coo ja'a Moisés miäbøjcy, paadiä pascuaxøø yagjajtä. Jaduhñ yhanehmy coo ja'a tøghagø'øw nø'ty hajxy yajwiinxänicxø'øwät, nebiä judíos quioobhuunghajxy quia'a yaghó'cäxät, ja'a ya'ayhäna'cpä. Ja'a Dios ja'a mioonsä tsajpootypä tu'ug quejx coo ja'a quioobhuunghajxy yaghó'cäxät, ja'a ya'ayhäna'cpä, pønjatiä nø'ty hänajty tøø quia'a yajwiinxänicxø'øy ja'a tøghagø'øw.

²⁹ Coo judíoshajxy jaduhñ miäbøjcy, mänitä Dios ja'a Tsaptsmejy cujc yaghawaach maa hajxy jaduhñ ñaxø'øwät tø'ødstuum. Mänitä Egiptobä-jäya'ayhajxy hoy jia panaxaambä. Mänitä Dios ja'a nøø hoy yajtu'ugmújcombä. Cøjxä Egiptobä-jäya'ayhajxy ñøøho'ogø'øy.

³⁰⁻³¹ Coo ja'a judíoshajxy miäbøjcy, paadiä cajpt hajxy juxtujc-hooc jiuhy-ohwiädijty ja'a xøhajpä Jericó. Mänitä tsaamuuçh piuumñä. Je'e hänajty curaahajp wäditiä maa ja'a cajptän. Cøjxä jäya'ayhajxy jiiby yho'nä, ja'a hajxy hänajty ca'a mabøjpä. Coo ja'a quixy Rahab miäbøjcy, hoy hänajty jia tuñ maa ja'a burdelän, paady jaduhñ quia'a ho'cy, je'eguiøxpä coo ja'a judíos hänajty tøø yu'uçh, ja'a hajxy hänajty wädiipä hixøøbiä woodsøøbiä.

³² Coo cu ñäbaadøøyy, cu nmädiäacyhöch ja'a Gedeón, ja'a Barac, ja'a Sansón, ja'a Jefté, ja'a David, ja'a Samuel, møødä Dios ja'a quiuguexyhajxy.

³³ Coo hajxy miäbøjcy, paadiä miädsip ja'a ñaax hajxy hoy miämähmøøyyanä; paady hajxy hoy guiobiernähajty; paadiä Dios hajxy xpiuhbéjtäm nebiaty hajxy hänajty tøø xyajwiinwaanøøyyäm; paady hajxy quia'a leontsu'tsä;

³⁴ paady hajxy quia'a tooyy møjjøønhajjooty; paady hajxy quia'a cuhbujxä. Ja'a häna'c-hajxy ca'a møcpä, mänitä mäjaa hajxy piaaty mänaa hajxy hänajty chiptuna'añän. Cabä miädsip hajxy yajmäjädaacy, hoyyä miädsiphajxy hänajty jia nämayyä. Ñä'ägä yajpäyø'c hajxy je'e.

³⁵ Jii ja'a to'oxiøjc-hajxy hänajty näje'e ja'a yhuung ja'a ya'ay jiuypiojcy.

Näje'e ja'a Diosmädia'agy hajxy yajcudsaaçhtiunøøyyä. Coo ja'a Diosmädia'agy hajxy hänajty quia'a nä'ägädä najtshixø'øwa'añ, mänit hajxy yaghó'cänä. Tøø hajxy hänajty ñajuø'øy coo hajxy jiuypioğa'añ, coo hajxy jim ñøcxa'añ tsajpootyp.

³⁶ Näje'e hajxy wyiinwohñä wiobho'cä. Høxtä yajcudsumøøyyä hajxy näje'e cø'øxoch.

³⁷⁻³⁸ Näje'e hajxy quiuhga'tsä, näje'e hajxy jiøø'wa'xä, näje'e hajxy quiuhbujxä. Jim hajxy hänajty näje'e wiädity pactuum, wiinwa'adstuum, tunjooty. Jim hajxy hänajty näje'e chäna'ay tsaajutjooty. Cabä howyit hajxy hänajty miøødä. Meeghac chivohac hajxy hänajty wyithajpy. Jaguiay hajxy hänajty yhity. Xøøghäjtäp hajxy hänajty, häyoowhixäp hajxy hänajty. Paady hajxy hänajty jaduhñ jiaty yhabety coo ja'a Diosmädia'agy hajxy hänajty miäbøcy. Jaançh tehñ quiumáayyap hajxy hänajty ja'a Diósäm. Cabä Dios jaduhñ quiumay pøn ca'a mabøjp.

³⁹ Hoy hajxy jia cumaayyä, cab hajxy miooyyä mädyijatiä Dios hänajty tøø yajwiinwaanøø'øy.

⁴⁰ Jäguemiä Dios wyiinmahñdyhajty coo ja'a hoyhajt ja'a weenhajt hajxy xmio'owáanäm. Paadiä jecyjiäya'ayhajxy quia'a tsoj mooyyä, näguipxiä Dios hajxy jaduhñ xmio'owáanäm møødä jecyjiäya'ayhajxy.

12

¹ Tsögä jecyjiäya'ay hajxy jaduhñ pahíjxäm nebiä Diosmädia'agy hajxy miäbøjquiän. Tsögä haxøøgcuhdujt hajxy najtshixøøyyäm. Tsögä nhamdsoo cuhdujt hajxy høxhíjxäm. Je'eduhñ wiingtuum xjia wi'i wioonøcxáanäm. Tsög hajxy tehngajnä cudiúunäm nebiä Dios hajxy xyhanéhmäm.

² Tsögä Jesucristo hajxy hamuumdu'joot pahíjxäm. Jaaya'ay hajxy xyajñähixøøyyäm coo ja'a Diosmädia'agy hajxy hoy nmäbøjcamät. Hoçhähdiiuunnä ja'a Jesús mähdiøjc jaduhñ yho'cy cruzcøxp. Pero ñajuøøby hñajty je'eduhñ coo hñajty jim nøcxy xioonða'aga'añ tsajpootyp. Jim jaduhñ yhäñaanä maa Dios yhahooyhaampiän.

³ Tsögä Jesucristo hajxy jahmiejtstäacäm coo jiaançh tehñ chaaçhpøjcy. Ja'a cahwiindøyhäna'c-hajxy jaduhñ jatcøøyy. Míee'xtujc ja'a Jesucristo jaduhñ. Tsög hajxy jaduhñ pahíjxäm; jaduhñ hajxy nga'a jootmayhajtämät.

⁴ Hoyyä haxøøgpä hajxy xjia mädsiphajtäm, cahnä hajxy jaduhñ xyaghó'cäm.

⁵ Ja'a Dios hajxy jaduhñ xjiootcapxmøcpøjcäm maa ja'a miädia'agy cujaay myiñän:

Huong, ca'a mjootma'ady, hoyyä Dios tøø xjia yajcumädoy.

Hoy xjia hoy, ca'a mjootmayhaty.

⁶ Miägapxyp yhanehmbiä Dios pønjaty chojpy; yajcumädooby pønjaty yhuunghajpy.

⁷ Coo ja'a Dios hajxy xyajcumädowät, mmee'xtúgäp hajxy jaduhñ. Hopiønnä yhuung yajcumädoy.

⁸ Yajcumädoobiä Dios ja'a yhuunghajxy nägøxiä; y pø caj mijts jaduhñ xya-jcumädoy, cähxø'p jaduhñ coo ja'a Dios hajxy tøyhajt xquia'a huunghaty.

⁹⁻¹⁰ Ja'a hajxy ndeedyhajtämbä hädaa yaabä naaxwiimbä, nwiingudsähgøøyyäm hajxy jaduhñ, hoy hajxy hijty xyajcumädóowäm mänaa hajxy tøø nmuutsc-hajtäm. Paady hajxy hijty xyajcumädóowäm coo hajxy hijty nga'a mädia'agymiäbøjcam. Hoorä, tsögä nDeedyhajtäm hajxy mädia'agymiäbøjcam, ja'a jim tsajpootypä. Mänit hajxy jim xyaghajtämät. Paadiä Dios hajxy xyajcumädóowäm, nebiä miädia'agy hajxy jaduhñ maas hoy nmäbøjcamät, nebiä hawa'adstuum hajxy jaduhñ hoy nhíjtänät nebiä Dios yhitiän.

¹¹ Tøyhajt hajxy ndsaaçhpøjcäm mänaa ja'a Dios hajxy xyajcumädóowäm. Nbáatäm ja'a tsaachpä hajxy jaduhñ. Pøn jaduhñ mabøgaamb hamuumdu'joot, cab jaduhñ waamb miäná'anät, hoy hñajty jia tsaachpøcy. Maas hoy jiäya'ayhadaanä. Maas jootcujc yhidaanä.

¹² Naxy hajxy mdehm ñijiootcapxmøcpøgøøjät neby hajxy jaduhñ hoy myo'oy mnáxät.

¹³ Mhøxtá'awäp ja'a hodi'u hajxy, nebiä hermanodøjc hajxy jaduhñ hoy xpiawädítät, neby hajxy jaduhñ quipxy xquia'a padu'udägóyyät.

¹⁴ Naxy hajxy hoy mdehm yhidät tu'ugmädia'agy nägøxiä. Hoy hajxy mjäya'ayhädät. Pøn hoy ca'a wädiyp, cab jim ñøcxa'añ Dioswiinduum.

¹⁵ Tehngajnä hajxy mnigwieendähadóøjät, neby hajxy jaduhñ mga'a tu'udägóyyät. Coo pøn jaduhñ tiu'udägóyyät, je'e jioot ca'a tsojp coo piuhbedøøjät ja'a Diósäm. Cab hajxy mnimiäjootma'adóøjät. Coo hajxy haagä jaduhñ mjatcø'owät, pues nägøxiä hajxy jaduhñ mmá'adät.

¹⁶ Cab hajxy mhaxøøgwädítät. Cabä Diosmädia'agy hajxy myaghäyø'ögät. Jaduhñä Esau jecy jiatcøøyy, coo hñajty yäho'ogyii; yajwiingubøjc ja'a ñädeedy ja'a cay. Paadiä ñädeedy hñajty miøødä, coo hñajty quioobhuungä. Mo'owáanäp hñajty jaduhñ cøxiä mäduhñtiä ja'a tieedy hñajty miädsäna'ay.

¹⁷ Y coo ja'a Esau jioot hānajty chocy coo cōxiā mio'owōōjāt ja'a tiēdiām, cab tii ñā'ā mooyyā, hoy jia jōōyy. Hamdsoo jaduhñ quia'a niyaghoyōōyyā.

¹⁸⁻²² Ja'a Moisés hajxy, jequiān hočähgōōñābā hajxy jim yhi jxy miādooyy maa ja'a tunān ja'a xōhajpā Sinaí. Ja'a pojtaxa'a hajxy yhi jxy mōōdā jōōn jim maa hānajty jiaanč tehñ wyiingoodsān. Mānit hajxy miādooyy nebiā jāya'ay xiu'uxiān. Mānit hajxy miādooyy coo ja'a Dios quiapxy. Hočähgōōñā ja'a Dios quiapxy. Jaduhñā Dios yhanehm y coo hajxy hotyijatiā quiuhgā'adsāt tijaty jim mejtsp maa ja'a tunān, hoy jia animalā. Pero cab hajxy miee'xtujnā. Mānitā Dios hajxy miānuu'xtaacy coo quia'a cāpxnāt. Moisés paady je'e chähgōōñā. “Jaanč tehñ chähgōōbiōch, paady ndsāyuy”, nōmā Moisés miānaañ. Pero jim tsajpootyp jim Dioswiinduum, cab jim yhočähgōōñān. Siōn jim xiōhaty maa ja'a Dios yhäñā'ayān. Jaduhñ jim xiōhajpā, ja'a Jerusalén tsajpootypā. Tōō ja'a Dios cuhdujt hajxy xmio'oy coo hajxy mwiingudsähgō'ōwāt. Milhaamā Diosmoonsāhajxy jim xioōnda'agy Dioswiinduum.

²³ Jimā Dioshuung yhaañāmāhajxy tiu'ugmucy ja'a xiōōhajxy tōōbā yajcujaayijābā. Ja'a Diósām hajxy yajnāhwaats yajcuhwaatsā. Nāgōxiā ja'a Dios hajxy jim xwyiinmahñdyhixāñām.

²⁴ Jimā Jesucristo hajxy xñähgapxtúutām nebiā Dios hajxy tōō xmiōōdyajcuhdújcām hawiinjemy. Coo ja'a Abel jecy yagho'cā, mānitā Dios yaghawiimbijty. Pero coo ja'a Jesucristo hajxy tōō xñähho'túutām, xyajnāhwaats xyajcuhwáatsām ja'a Dios ja'a nbojpā ngādieey hajxy.

²⁵ Coo ja'a jecyjiāya'ay ja'a Diosmādia'agy hajxy yaa quia'a mǎbōjcy hādaa yaabā naaxwiin, mānit hajxy yajcumādoowā. Hoorā, coo ja'a Dios hajxy xyhamdsoo hanéhām jim tsajpootyp, maas hanaxiā hajxy jaduhñ njājtāmāt coo ja'a miādia'agy hajxy nga'a mǎbōjcāmāt. Entonces, tsōg hajxy hamuumdu'joot mǎbōjcām.

²⁶ Coo ja'a Dios jecy quiapxy, mānitā naaxwiin yajtsāyuyy. Jaduhñ tōō miānaañ coo cōxiā yajtsāyuyyaaññā jadāhooc mōōdā naaxwiin mōōdā tsajtcōxp.

²⁷ Jaduhñ miādia'agytiāgō'oy coo ja'a Dios yajcuhdāgoyya'añ tijaty tōō yhädiuñ mōōdā naaxwiin mōōdā tsajtcōxp. Pero mǎdyijaty jim tsajpootyp, caj yajcuhdāgoyya'añ.

²⁸ Tsōgā Dios hajxy nāmāyyām Dioscujú'uyāp je'eguiōxpā coo hajxy jim xyaghidāñām tsajpootyp cōjxta'axiōō. Hamuumdu'joot ja'a Dios hajxy nwiingudsähgōōyyāmāt. Jaduhñ ja'a Dios hajxy xquiumāyyāmāt.

²⁹ Yajcuhdāgoobiā Dios je'e tijaty jaduhñ quia'a cumaaby.

13

¹ Tsōg hajxy hamuumdu'joot ničhojc nibia'hāyóowām nebiā tu'ugpuhya'aybān.

² Coo pōñ miēdsāt maa ja'a mdōjcān, hamuumdu'jootā mjōōn mdōjc hajxy mmó'owāt. Nāje'e hajxy tōō tiōjmo'oy ja'a Diosmoonsā tsajpootyp-tsohmā. Cab hajxy hānajty ñajuō'oy pō Dios mioonsāhajxy je'e.

³ Mbuhbēdāp hajxy ja'a jāya'ayhajxy hijpā tsumy, mōōd hajxy hāyoowhijxābā. Hix, quipxy ja'a Diosmādia'agy hajxy mmōōdmǎbōcy.

⁴ Ja'a Dios jaduhñ mānaañ coo jāya'ayhajxy ñimiōōdtsāna'awōōjāt ya'adio'oxy. Cab jaduhñ yhooyy coo ja'a mmāgu'ughajpā tio'oxiōjc jaduhñ mnā'ā wi'i yhäyoowhijxāt, coo ja'a Dios jaduhñ xñā'ā yajcumādōwāt.

⁵ Cabā xādō'ōñ hajxy mwi'i piōcjuō'ōwāt. Jootcujcā xādō'ōñ hajxy mmāhídāt, māduhñtiā hajxy mmōōdā. Tōō ja'a Dios jaduhñ miāna'añ cooc hajxy ni mānaa xquia'a nāhgue'egāñām.

⁶ Paady hajxy hamuumdu'joot nmānāanāmāt:

Ja'a Dióshøch jaduhñ xpiuhbejp.

Cábøch jaduhñ pøn ndsähgø'ø, hoñéjpíøch hajxy cu xjia tun.

⁷ Mbahíäp jäya'ay hajxy, ja'a Diosmädia'agy hajxy tøø xyajnáhixø'øyábä. Hamuumdu'joot ja'a Diosmädia'agy hajxy miäbøjcy. Hoy hajxy jiaançh tehñ jiäya'ayhajty.

⁸ Cabä Jesucristo ja'a quiuhdujt mänäa yajtägach.

⁹ Cabä wiingmädia'agy hajxy mbadu'ubögät. Coø ja'a Dios hajxy xchójcäm, maas hoy jaduhñ coø ja'a miädia'agy hajxy nmäbøjcämät. Näje'e hajxy ñajtsapxø'ø cooc tyijy yhamajtsä, cábac tii mdsú'udsät mgáyät. Pero yø'ø cuhdujt jaduhmbä, caj yø'ø xpiuhbédat.

¹⁰ Tøø ja'a Jesucristo hajxy xñähho'túutäm, paadiä miädia'agy hajxy jaduhñ nbanøcxäm. Pero pønä jecyquiuhdujt panøcxnä, cabä cuhdujt hajxy miøødä coø ja'a Jesucristo hajxy pianøcxät.

¹¹ Jegyhaity ja'a teedywiindsøn animalnø'ty hajxy hijty quiuyoxø'øy maa ja'a muutscunuu'xytiøjcän, nebiä piojpä quiädieey hajxy jaduhñ ñähwa'ads quiuhwá'adsät. Mänitä animalho'ogy hajxy hijty nøcxy ño'ogy cajtpa'a.

¹² Jaanä jimä Jesús hoy yho'pä cajtpa'a. Jaduhñ hajxy xyajnáhwaats xyajcuhwáatsäm ja'a nbojpä ngädieeyhájtäm.

¹³ Tsøgä jecyquiuhdujt hajxy najtshixøøyyäm. Tsøgä Jesucristo miädia'agy hajxy hamuumdu'joot panøcxäm, hoyyä cu'ug hajxy xjia xøøghájtäm.

¹⁴ Haa hädaa yaabä naaxwiinä, caj jiega'añ. Pero jim njoot hajxy nbädäacäm tsajpootyp.

¹⁵ Tsøgä Dios hajxy tehngajnä wiingudsähgøøyyäm ja'a Jesucristocøxpä. Tsøg hajxy tehngajnä mänāanām coø ja'a Dios miøjjä jiaançh.

¹⁶ Naxy hajxy hoy mdehm jiäya'ayhädät. Mbuhmó'owäp ja'a wiinghäna'c hajxy tijaty hajxy mmøød. Jaduhñä Dios hajxy xjiaançh tehñ quiumáyät.

¹⁷ Mmäbøjcäp ja'a copc-hajpä miädia'agy hajxy. Xcwieendähajp hajxy jaduhñ neby hajxy mga'a tu'udägóyyät. Ñajuøøby hajxy coø hajxy wyi-inmahñdyhixa'añíjäm ja'a Diósäm. Naxy hajxy mdehm miäbögät nebiä mgopc-hajpähajxy jaduhñ yhídät jootcujc. Coø hajxy mga'a mäbögät, cab hajxy hñajty jaduhñ tøø mniyaghoyø'øyii.

¹⁸ Mdúnäbä mayhajt hajxy, pa'ya'axä Dios hajxy ja'a høøhcøxpä. Hóyhøch nwädity. Chójpiøchä njoot coøch homiänaajä hoy nwädítät.

¹⁹ Chójpiøchä njoot jaduhñ coøch jim jadähooc nnøcxtägátsät maa mijtsän. Mänuu'xta'agä Dios hajxy coøch jim ween xyajnøcxy.

²⁰ Jootcujcä Dios hajxy xjiaançh tehñ yaghíjtäm. Jaayá'ayädsä Jesucristo yagjuypíøjtägajts, ja'a nWiindsønhájtäm. Jaayá'ayäts hajxy xmiøødyajcuhdújcäm ja'a hawiinjemyguiuhdujt mänäa ja'a Jesucristo hajxy xñähho'túutäm. Cabä jemyguiuhdujt mänäa tiägatsaanä. Homiänaajä ja'a Jesucristo hajxy xñä'ägä cueendähájtäm.

²¹ Weenä Dios hajxy xpiuhbety, nebiä miädia'agy hajxy jaduhñ hoy mya-jtúunät, ja'a Jesucristocøxpä. Jaduhñä Dios hajxy xquiumáyät. Cøjxta'axiøø tsøg hajxy jaduhñ mänāanām coø ja'a Jesucristo miøjjä jiaançh.

²² Hermanodøjc, cab hajxy mdsippädá'agät. Cábøch mijts madiu'u tøø nmägapxy tøø nhane'emy.

²³ Tøø ja'a hermano Timoteo yhawa'adspädsøømnä maa ja'a pujxtøjcän. Coø yaa paquiä miédsät, mänitøch jim nmødhädät maa mijtsän.

²⁴ Yajpoo'x ja'a copc-hajpähajxy ja'a høøhcøxpä møødä hermanohajxy nägøxiä. Ja'a hermanodøjc-hajxy yaabä Italianaaxooty, xyajpoo'xp mijts jaduhñ.

²⁵ Weenä Dios hajxy jaduhñ xjiaac mo'oy ja'a hoyhajt ja'a weenhajt. Amén.

Santiago

¹ Høøch xøhajp Santiago. Ja'a Diostúunghøch nduumby. Ja'a Jesu-cristo, je'ečh nmäduumby. Hermanodøjc, mijtshajxy nyajpoo'xyp, mijts jäguemnaaxtsohm̄bā.

²⁻³ Coo hajxy mānaa mhäyohmbáadät, cab hajxy mmáná'anät cooc tyijy ja'a Dios hajxy xquia'a hijxnä. Tehngajnä ja'a miädia'agy hajxy mmäbøjcät coo hajxy xyhixy. Y coo hajxy mjaac häyohmbáadät, maas hoy hajxy mmäbøgät. Tøyhajt je'eduhñ, paady hajxy mjootcugó'øwät.

⁴ Coo hajxy maas hoy mmäbøgät, pedyii ja'a Diosmädia'agy hajxy jaduhñ mgudiúnät.

⁵ Coo pøn quia'a najuó'øwät nebiä wyiinmahñdyhádät, weenä Dios miānuu'xta'agy, mánitā wiinmahñdy mio'owóøjät. Coo ja'a Dios hajxy tii nmäyujwáanämät, mánit hajxy cøxiä xmióoyyämät, y cab hajxy waamb xñāmāayyämät.

⁶ Ween hajxy hamuumdu'joot nmānuu'xtáacām. Cab hajxy nmānāanämät coo hajxy xquia'a mo'owáanām. Pøn tu'joot ca'a mabøjp, cabä jiäwøhñdy tu'hityä yaghity. Jaduhñ mawíinäts je'e nebiä mejjiän coo ja'a poj yagja'tsyo'oy.

⁷⁻⁸ Hix, mejtstu'u ja'a wiinmahñdy miøødä. Cabä tu'hityä yhity. Cab hoy wiädity. Cab tii wiinmahñdy mio'owóøjät ja'a Diósäm je'eguiøxpä coo wiinmahñdy mejtstu'u miøødä.

⁹ Mädyii hermano häyoob, coo piuhbedøjät ja'a Diósäm, jootcugó'øwäp je'eduhñ.

¹⁰⁻¹¹ Mädyii hermano mäyøø, coo ja'a mäyøøhadyiibä quia'a hajoodhájnät, nā'ägä jootcugó'øwäp je'ebä. Hix, jaduhñ mawíinäts ja'a mäyøøjäya'ayhajxy nebiä pøjjiän. Hoy ja'a pøjy jiobø'øy; pero coo quiujyxiøøjø'øy, mánit ñii'xnä. Mánit ñähgahnä. Jaduhñdsä mäyøøjäya'ayhajxy quiuhdägoyyaambä. Yhøxho'ogaamby hajxy tijaty hajxy miāmäyøøhajpy.

¹² Jootcujc hajxy yhity pønjaty mee'xtujp, pønjaty ja'a møjcu'ugongä miädia'agy ca'a mabøjcäp. Pønjaty ja'a Dios jahmiejtsp, cøjxta'axiøø hajxy yagjugyhada'añii nebiä Dios jiugyhatian, nebiä Dios hajxy tøø xyajwiin-waanøøyyäm.

¹³ Coo ja'a mjoothajxy chógät coo hajxy haxøøg mjatcø'øwät, cab hajxy mmáná'anät cooc tyijy ja'a Dios hajxy xyagjatcø'øwa'añ. Hix, cabä Dios mānaaxøø haxøøg jiatcø'øy. Y caj mānaa miāna'añ coo hajxy haxøøg njatcøøyyämät.

¹⁴ Ja'a mhamdsoo copc xyajtägóyyäp.

¹⁵ Hix, ja'a mhamdsoo copcooty ja'a pojpa cädieey piädsømy. Y coo pønä pojpa cädieey tehngajnä tiúnät, jiiby yhäda'aga'añ haxøøgtuum.

¹⁶ Hermanodøjc, ca'a hajxy myajwiinhøøñ.

¹⁷ Ja'a hoybä ja'a mäbaadpä, Dios hajxy pedyii xmióoyyäm, ja'a tsajpootypä. Je'eduhñ cunuu'x ja'a jajpä ja'a tsämaambä. Cabä Dios wyiinmahñdy mānaa tiägach.

¹⁸ Hamdsoojoot ja'a Dios hajxy xpiädáacām hodiium je'eguiøxpä coo ja'a miädia'agy hajxy nmäbøjcām, ja'a tøyhajtpä. Paady hajxy jaduhñ xquiumāayyäm.

19 Hermanodøjc, homiänaajä ja'a Diosmädia'agy hajxy mmäadowá'anät; pero hodiägaamby hajxy mdaj mmáyät coo hajxy hānajtý mgapxa'añ mmädia'aga'añ. Y cab hajxy mjootmä'adät.

20 Coo hajxy njootmä'tämät, cabä Diosmädia'agy hajxy nyajtuungpáatänä.

21 Cøxy najtshixø'øw ja'a mhaxøøgcuhdujt hajxy, neby hajxy madiu'u haxøøg mjatcø'øyän. Mee'xxieemy ja'a Diosmädia'agy hajxy mmäbögät, ja'a hajxy tøø mmädóyyäbä. Y coo hajxy mjaančh mäbögät hamuumdu'joot, mänit hajxy jaduhñ mnähwá'adsät.

22 Mgøxy cudiünäp ja'a Diosmädia'agy hajxy jaduhñ. Coo hajxy mnähmädoonáxät, cab hajxy jaduhñ mnä'ä yajtuungpaady, hoy hajxy mja mäna'añ cooc tyijy hajxy myajtuungpaady.

23 Pønä Diosmädia'agy nähmädoonajxp, cab hoy quiudiuñ. Jaduhñ mäwíináts je'e nebiä jäya'ay ñiyhahijxnaxyijän hijxtjooty.

24 Paquiä jaduhñ ñiyhahijxnaxyii. Pero coo wyiimbijnä, cab jiahmiejtsnä nebiä wyiin jiojp quiähxø'øgy.

25 Pønä Diosmädia'agy tehñgajnä jahmiejts, pøn hoy cudiumb, jootcuyc jaduhñ yhida'añ. Hix, hodium piäda'aga'añii je'eguiøxpä coo ja'a Diosmädia'agy miäbøcy.

26 Pønjatý mänaamb cooc tyijy Dios hajxy wyiingudsähgø'øy, y nä'ä nägoodä hajxy ñä'ä capxtägoý, xiøøbä hajxy ñä'ä mäna'añ cooc tyijy Dios hajxy wyiin-gudsähgø'øy.

27 Coo ja'a yaamghuung hajxy mbuhbédät møødä yaamgto'oxy, coo hajxy hānajtý tii yajmaajaty, y coo hajxy haxøøg mga'a wädítät, mänit hajxy myajcähxø'øgät coo Dios hajxy mjaančh wiingudsähgø'øy.

2

1 Hermanodøjc, paadiä Jesucristo miädia'agy hajxy nmäbøjcäm coo jim yhity tsajpootyp maa ja'a jajpä tsämaambä miøødän. Jaaya'ay hajxy nWi-indsøn'hájtäm. Cabä yhahixø'øy coo pøn mxøøghádät.

2-4 Tsøg hajxy mädiácäm, coo jäya'ayhajxy nämetsc miédsät maa ja'a md-sajtøjc-hajxiän, tu'ug mäyøøbä, tu'ug häyoobä, tu'cuhdujt hajxy nämetsc mwi-ingudsähgø'øwät, hoyyä mäyøøbä orocø'øjädsøhñdy hānajtý jia møødä, hoyyä howyit hodiucxy hānajtý jia møødä. Cabä häyoobä hajxy mxøøghádät, hoyyä howyit hodiucxy hānajtý quia'a ja møødä. Hoorä, coodsä häyoobä hajxy mnämä'awät: "Jii miich huuc täna'aw", o coo hajxy mnämä'awät: "Jii miich mhāña'awa'añ naaxwiin", y tøø ja'a mäyøøbä hoyhāñaabiejt hajxy hānajtý mmo'oy, myajcähxø'py hajxy jaduhñ coo ja'a mguhdujthajxy quia'a hoyyä. Cähxø'p jaduhñ coo ja'a häyoobä hajxy tøø mga'a näxuuch.

5 Hermanodøjc, huuc madow hädaa mädia'agy hajxy. Pønjatý häyoob hädaa yaabä naaxwiin, Dios tøø yajnähdiý coo ja'a Diosmädia'agy hajxy miäbögät hamuumdu'joot, coo hajxy jim ñøcxät cøxp tsajpootyp. Jim hajxy ñøcxa'añ nägøxiä. Pønjatü Dios tøø jiahmiech tøø pia'häyoý, Dios jaduhñ tøø yajwiin-waanø'øy coo hajxy jim ñøcxät.

6 Pero mijts, mxøøghajpy hajxy ja'a häyoobädøjc. Hoorä, ja'a mäyøøddøjc-hajxy, xchaachtiumb mijts jaduhñ. Pawich pajäduty mijts xyajñøcxy haguyc.

7 Ja'a Jesucristo miädia'agy hajxy mbanøcxäp, y je'e ja'a mäyøøddøjc-hajxy wyiinwohmby.

8 Dios mänaamb coo ja'a mmäjøøn coo ja'a mmädøjc mdsógät mba'häyówät nebiä mni'x nebiä mgopc mdsoquiän. Ja'a Diosmädia'agy jaduhñ miimb. Bueno, pø mjaančh cudiünäp ja'a Dios miädia'agy jaduhñ, hoy jaduhñ.

9 Pero coo ja'a häyoobädøjc hajxy mxøøghádät, haxøøg hajxy jaduhñ mjäya'ayhaty. Ja'a Diosmädia'agy jaduhñ mänaamb cooc yhaxøøgä.

10 Pønä ley hoy tøø jia yajtuñ, pø weeñtiä tøø tiu'udägoy, jaanč tehñ miøj tøø quiuyo'oyø'oy.

11 Dios jaduhñ mänaañ, coo ja'a mhamdsoo to'oxiøjc hānajtj jyimān, cabä wiingto'oxiøjc mmøødhídät. Jaanä jaduhñ miānaambä coo mga'a jäya'ay-yaghó'ogät. Tsøghajxy mänāñām, pø tøø mjäya'ay-yagho'ogy, tøø ja'a ley jaduhñ mga'a yajtuñ, hoy wiingto'oxiøjc mga'a ja møødhity.

12 Hoy hajxy ngapx nmädiāacāmät, hoy hajxy njäya'ayhājtmät nebiä Jesucristo hajxy xyhanéhmām maa ja'a miādia'agy myiñān cujaay. Hix, xyhixāñām jaaya'ay njoot ngopc-hajtāmhajxy pø hoy hajxy njaanč jäya'ayhājtm. Xpiuhbedāñāmāp hajxy neby hajxy maas hoy njäya'ayhājtmät.

13 Pønjatiä jäya'ay näxuu'tsp, je'e hajxy päda'agāñāp hodium. Cab hajxy yajcumādowa'añii. Pønjatiä jäya'ay ca'a näxuu'tsp, je'eds hajxy yajcumādowañāp. Cab hajxy ñäxuu'tstägatsa'añii.

14 Hermanodøjc, näje'e jäya'ayhajxy miāna'añ cooc tyijj hajxy miäbøcy hamuumdu'joot, y cab hajxy hoy wiädity, nébiäc tyijjiäda'aduhñ yhuuc nä'a nähwá'adsät.

15-16 Coo mijts hermano nä'a nägoobä mnämä'awät: “Nøcx hajxy jootcuje wädit; pägø'ow jocxwit hajxy; hoy hajxy mgay mhú'ugät”, y cab hajxy hānajtj tii tøø mmo'oy, hoy hajxy hānajtj tii quia'a ja møødä, ni wit ni tucxy, ni cay ni hu'ugy, caj mijts mguhdujt hānajtj yhooyä.

17 Coo pøn miāná'anät cooc tyijj hoy wyi'i pianøcxy, pero cabä quiuhdujt ñä'a hóyyäbä, xiøøbä jaduhñ ñä'a mäna'añ cooc tyijj hoy pianøcxy.

18 Pero coo pøn miāná'anät: “Miič mahñdy hoy mbanøcxyp; høøčh, hóyhøch nguhdujt”, høøčh hijxtahñd yaghíxäc pø hoy mjaanč panøcxy, hoy mga'a ja yajcähxø'øgy pø hoy mguhdujt. Høøčh, cooč nguhdujt yhooyä, nyajcähxø'piøch jaduhñ cooč hoy njaanč panøcxy.

19 Miič mänaamb coo Dios tiu'ugä; hoy hit jaduhñ coo jaduhñ mmäná'anät. Pero jaduhñdsä møjcu'uhajxy miānaambä y chähgøøby hajxy je'e.

20 Nej, caj miič mnä'ägädä wiinjuø'øwa'añä, xiøøbä mja nä'a mäna'añ coo mmäbøcy, pø cabä mguhdujt ñä'a hoyä.

21-22 Abraham højts hijty nhaphājtmān ndeedyhājtm. Mänitā Dios ja'a Abraham ñāmaayy coo ja'a yhuung yóxät, ja'a Isaac-hajpä. Paadiaduhñ ñāmaayy coo ja'a yhuung yóxät, nebiä Dios jaduhñ wyiingudsähgø'owät. Jiaanč cudiunaambiä Abraham hānajtj jaduhñ. Coo jiaanč ja cudiunañ, paady hodium piädáacänä. Cähxø'p jaduhñ coo ja'a Diosmädia'agy hānajtj jiaanč mabøcy.

23 Tøjjajtä Diosmädia'agy jaduhñ nebiä myiñān cujaay: “Coo ja'a Abraham ja'a Dios ja'a miādia'agy miäbøjcä, paadiä hodium piädáacänä.” Y Abraham, hamdsoo Dios miānaañ coo Abraham hānajtj miägu'ughadyii.

24 Jaduhñds je'e, paadiä Dios hajxy hodium xpiädáacām coo hajxy hoguiuhdujt nyajtúñām, coo hajxy hoy nmäbøjcām.

25 Jaduhñä quixy Rahab yhuuc jajpä. Mänitā jäya'ayhajxy miejtstaacy maa ja'a Rahab tiøjcän. Hixøøby woodsøobiä hajxy hānajtj wiädity. Mänitā Rahab miäbuhbejty. Mänitā tu'u hajxy wiingpä yajnähixøøyyä. Paadiä Rahab piädáacänä hodium, hoyyā howyiinmahñdy hānajtj tøø quia'a ja møødhaty.

26 Entonces, coo hajxy nmänāñāmät cooc tyijj hajxy hoy nmäbøjcām, pero cabä nguhdujthajxy yhooyhājtm, xiøøbä hajxy nnä'a mänāñām coo hajxy hoy nmäbøjcām. Cab jaduhñ choobaady coo hajxy nä'a nägoobä

nmánáanämät cooc tyijy hajxy hoy nmábójcām; hōxtáhmäts ja'a ni'x ja'a copc coo yho'nä, cab je'e choobaatnä.

3

¹ Hermanodøjc, ca'a hajxy mwi'i ñiwyiindsønḡbāda'agyii. Hix, pønjaty hoy ca'a yajnāhixøøby, cab hajxy quiumaya'añii ja'a Diósäm.

² Madiu'u hajxy ngapxtägoóyyām nāgøxiä. Pøn ca'a capxtägooby, ca'xiä Diosmädia'agy jiaanč tehḡ quiudiuñ. Ni nej quia'a jatcø'øy.

³ Paadiä cuaay freno hajxy nbādāacām coo hajxy ween miädia'agymiäbøcy neby hajxy jaduhḡ hoy yó'oyät.

⁴ Jaanä jaduhḡduhmbä, ja'a barcotimón, chuucpä hajxy yajmäyohby, hoy ja'a barco jia hamøjjä, hoy møc jia pabojoy.

⁵⁻⁶ Y yøø haaw, hoy jia muutscä, jaduhyyä jäya'ay ñä'ä jaanč tehḡ miägapxtägoobiä møj may. Jaduhḡ mäwínäts yøø haaw nebiä jøønän. Coo ja'a yuuc tioyø'øgy, tu'lii'ty ja'a padoy chohḡda'agy. Yøø haaw, jiaanč tehḡ miøødä haxøøgpä yøø. Paquiä xyajtu'udägoóyyät. Y ja'a møjcu'ugong, je'eds hajxy xwyi'i yajcapxtägoóyyām.

⁷ Hoñä'ä mädyii animalä hajxy hoy nyajmaaxøøyyämät, caa, muuxy, tsahḡdy, møødä mejjiooty-tsänaabiä.

⁸ Pero yøø haaw, cab hoy miaaxøøwa'añ. Haagä haxøøgpä jaduhḡ miøød. Je'eduhḡ xyajtägoóyyām maa ja'a Dioscøxpän.

⁹⁻¹⁰ Jue'e yøø haaw, mejtstu'u myiñ. Je'e hajxy nyajtúunäm coo ja'a Dios-teedy hajxy ngapxpáatäm. Jaanä je'e hajxy nyajtúunäm coo ja'a jäya'ay hajxy nnähójjäm, ja'a Dios yajmägunuu'xøøyyäbä ja'a yhEspíritu. Hermanodøjc, caj yhyöy coo hajxy mejtstu'u njäya'ayhájtämät.

¹¹ Hix, maa tu'ugpä nøøgopcän, cabä nøø wiingä tägach xiee'xy. Tu'tu'uyyä ñä'ägädä xee'xy.

¹² Jaanä jaduhḡduhmbä, tu'tu'uyyä piids tiøømhaty; cabä aceituna miädøømhado'øy maa ja'a piidsän. Ni ja'a piids quia'a mädøømhado'øy maa ja'a tsaatypän. Y cabä hoñøø jimḡ mbáadät maa ja'a taamdsnøøgopcän.

¹³ Pøn wiinmahñmech maa mijtsän, ween hoy jiäya'ayhaty neby jaduhḡ yajcähxø'øgät coo hoguiuhdujt miøødä, coo mee'xxieemy jiäya'ayhaty.

¹⁴ Jii häna'c-hajxy näje'e miäna'añ coo hodiunḡ hajxy mio'owøøjät, coo wiinghäna'c quia'a mo'owøøjät, je'eguiøxpä cooc tyijy hajxy jiaanč tehḡ jiaty hoyhoy. Caj mniguiumayøøjät cooc tyijy mjaanč tehḡ jiaty. Hix, caj tiøyyä coo mjaanč jaty.

¹⁵ Yøø wiinmahñdy jaduhḡmbä, caj yøø jimḡ chooñ maa ja'a Diosän. Hädaa yaabä naaxwiin hajxy yajcojy. Ja'a møjcu'ugongä wyiinmahñdy jaduhḡ.

¹⁶ Ja'a häna'c-hajxy ca'a niyajmädsójcäbä coo wiinghäna'c hodiunḡ piáadät, cab hajxy hoy ñimiøødhidyii. Nijiøhoj nibiahójjäp hajxy jaduhḡ. Madiu'u hajxy haxøøg jiäya'ayhaty.

¹⁷ Pero jimä howyiinmahñdy chooñ maa ja'a Diosän. Coo hajxy je'e mmøødhádät, hoy hajxy jaduhḡ mjäya'ayhádät. Cab hajxy mdsiptsáná'awät, cab hajxy mma'adtsáná'awät. Mee'xxieemy hajxy mhídät. Cabä mhamd-soo wiinmahñdy hajxy mwi'i yajtúnät. Mmøødhádäp ja'a hojioot hajxy møødä jäya'ay. Cabä mwiinmahñdy hajxy mejtstu'u myajtúnät. Cab hajxy mhøhḡdá'agät.

¹⁸ Pønjaty ca'a tsiptsojp, jaanč tehḡ yhoy hajxy jiäya'ayhaty, møød ja'a hajxy nāgøxiä capxcuhgädaacpä.

4

¹ Jim mijts ja'a mdsip myajtsohnda'agy maa ja'a mhaxøøgwiinmahñdyhajxiän coo hajxy naxy mnimiädsibø'oyii.

² Coo hajxy tii mja hadsoga'añ, je'eds hajxy myajniguiuyagho'ogóøyyäp, je'eds hajxy myajniguiumädsiphadøøyyäp. Paady hajxy mga'a paady mädyii hajxy mja tsojpy coo ja'a Dios hajxy mga'a mäyujwa'añ.

³ Y coo hajxy tii mja yujwa'añ, cab hajxy mbaady, je'eguiøxpä coo ja'a mguhdujthajxy quia'a hoyyā. Hix, näjoot hajxy mwi'i yhadún mwi'i yhanäma'awø'oy mädyii hajxy mja yujwaamby.

⁴ Caj mijts Diosmädia'agy hoy mgudiun. Nej, cab hajxy mnajuø'oyä coo jaduhñ quia'a hoyyā coo ja'a mjoot ja'a mjuøhñdy hajxy yaa mbädá'agät hädaa yaabä naaxwiin. Coo hajxy jaduhñ mbädá'agät hädaa yaabä naaxwiin, Dios hajxy jaduhñ mmädsiphájnäp.

⁵ Nej, tögä xiøøbä ja'a Diosmädia'agy ñä'ä mäna'añ: "Tøø ja'a Dios ja'a yhEspíritu piäda'agy maa højtscøxpän. Xjiaančh tehñ chojc xjiaančh tehñ pia'häyóowäm hajxy jaduhñ."

⁶ Jaančh tehñ yhooyä Dios hajxy xpiuhbéjtäm neby hajxy jaduhñ hoy nmäjädaacämät. Jaduhñä Dios miädia'agy myiimbä: "Miädsiphajpiä Dios pøn ja wi'i yajcumayaamb. Pero pøn ca'a yajcumayaamb, piuhbejpiä Dios je'e."

⁷ Mäbøc ja'a Diosmädia'agy hajxy tehngajnä. Høxhixä ja'a møjcu'ugongä miädia'agy hajxy; mänit hajxy jaduhñ xñähguéecnät.

⁸ Hamuumdu'jootä Diosmädia'agy hajxy mbanøcxät; mänitä Dios hajxy xpiuhbejtägsät. Pønjetiä haxøøgcuhdujt møød, mhøxhixäp ja'a mguhdujt hajxy jaduhñ. Pønjaty mänaamb coo mejtstu'u pianøcxa'añ, møødä Dios, møødä hädaa yaabä naaxwiin, mnajtshixøøñäp ja'a mhaxøøgwiinmahñdy hajxy.

⁹ Mjootmayhädäp hajxy jaduhñ je'eguiøxpä coo haxøøgcuhdujt hajxy mmøødä. Cab hajxy mxoondáacnät.

¹⁰ Mba'yá'axäp ja'a Dios hajxy hamuumdu'joot. Mnägäpxäp hajxy nebiaty hajxy tøø mhaxøøgwädity. Mänitä Dios hajxy xyajmähmø'owät hodium.

¹¹ Hermanodøjc, ca'a hajxy mniñähojyii hamiñ haxøpy. Pøn wiinghermano nähojp, jaduhñ miäbaatnä nebiä Diosmädia'agy ñähojjiän. Cabä Diosmädia'agy hoy ñä'ä cudiun.

¹² Tu'ugä Dios hajxy xyhanéhmäm. Je'e hajxy xyhíxäm pø hoy ja'a miädia'agy hajxy ngudiúunäm. Jaayá'ayäts cuhdujtmøød pø xpiädaacäm hajxy hodium, pø xpiädaacäm hajxy haxøøgtuum. Pero miich, caj miichä cuhdujt mmøødä coo wiinghermano mnähójt.

¹³ Huuc mäadow hajxy, näje'e hajxy jaduhñ miäna'añ: "Jäda'a o jaboom højts nnøcxa'añ wiinghagajpt. Jim højts tu'jumøjt nniyhajada'añii. May højts xädø'øñ jim nbaada'añ."

¹⁴ Ni quia'a najuø'oy hajxy tii jaboom jadäänäp. Ja'a jugyhajt, paquiä quiøxy. Jaduhñ miäbaady nebiä näma'ajän coo paquiä tiägoy.

¹⁵ Jaduhñ hajxy mmäná'anät: "Pø mänaambä Dios jaduhñ, mänit hajxy njaac jugyhájtämät. Coo ja'a Dios jaduhñ miäná'anät, hotyijä hajxy njájtämät. Coo quia'a mäná'anät, cab hajxy tii nnä'ägädä jájtämät."

¹⁶ Pero mijts, tehngajnä mijts mwi'i ñiguiumayii. Haxøøg jaduhñ coo hajxy jaduhñ mjatcø'owät.

¹⁷ Pøn najuøøby neby hoy quiuhdujthädät, y cab hoy ñä'ä cuhdujthaty, haxøøg jaduhñ jiatcø'oy.

5

¹ Ween yø'ø mäyøødøjc-hajxy yhuuc yajcopcø'ø. Jø'øwaamb hajxy, tsaachya'axaamb hajxy, je'eguiøxpä coo ja'a tsaachpä hajxy piaada'añ.

²⁻³ Yø'ø hajxy cøxiä miämäyøøhajpiä, caj yø'ø choobaadaannä, hoy howyit hodiucxy hajxy jia møødä. Cøxaamb jaduhñ tiägoyya'añ. Coo hajxy miäyøøjä, cähxø'p hajxy coo ja'a häyoobädøjc hajxy quia'a näxuuch. Quiuhäyowø'øwaamb hajxy jaduhñ. Xiøøbä hajxy tøø ñä'ä yajmayø'øy maa hajxy miäyøøhatiän. Hix, mobädajpä naaxwiimbä wyiimbida'añ.

⁴ Cabä mioonsä hajxy ca'xy tøø yhuuc mäjuuñä. Paady hajxy jim ñäxø'wøøyyänä maa ja'a Diosän jim tsajpootyp. Miädoobiä Dios ca'xy.

⁵ Hoy yajxón hajxy tøø jiaanč tehñ chäna'ay hädaa yaabä naaxwiin. Tøø ja'a miäyøøhadyiibä hajxy jia yajmayø'øy. Pero mobädajpä hajxy quiuhäyowø'øwa'añ.

⁶ Tøø ja'a hojiäya'abiä hajxy chaačhtiuñ. Tøø hajxy yagho'ogy. Cabä hojiäya'ayhajxy ñä'ä niñawaanä.

⁷⁻⁸ Hermanodøjc, mmee'xtúgäp hajxy jaduhñ høxtä Jesucristo cädaactägätsäp. Mobädajpä quiädaactägätsa'añ. Cab hajxy tii mdaj mmáyät. Jaduhñ hajxy mmee'xtúgät nebiä jäya'ayhajxy miee'xtuquiän coo quia'a tsoj tu'uy.

⁹ Hermanodøjc, cab hajxy mniñähojøjät coo Jesucristo hajxy xya-jcumädówät. Mobädajpä quiäda'aga'añ.

¹⁰ Mjahmiédsäp hajxy nebiä jäya'ayhajxy jecy chaačhpøjquiän, ja'a Diosmädia'agy hajxy jecy yajwá'xäbä. Mee'xtujc hajxy je'e jejcy.

¹¹ Pøn mee'xtujp, hoy jia tsaachpøcy, jootcuyc hajxy yhity, nebiä Job jecy miee'xtuquiän mänaa chaačhpøquiän. Tøyhajt jaduhñ. Y ñäxuu'tstägajts ja'a Dios ja'a Job. Hix, hojiot ja'a Dios jiaanč tehñ miøød.

¹² Hoy hädaa mädia'agy hajxy mmädówät. Cabä Dios hajxy nä'ä nägoobä mgapxpáadät. Coo hajxy jaduhñ nä'ä nägoobä mgapxpáadät, mgapxtägöyyäp hajxy jaduhñ, y xyajcumädówäp ja'a Dios hajxy. Pø mmøødä tøyhajt hajxy, jaduhyyä hajxy mmäná'anät coo tiøyhajtä. Pø caj, jaduhyyä hajxy mmäná'anät coo quia'a tøyhajtä.

¹³ Pønjaty tsaachpøjp, weenä Dios hajxy pia'ya'axy. Pønjaty jootcuyc, weenä Dioshøy hajxy yhøy ya'axy.

¹⁴ Pønjaty pøjcäp, ween hajxy ñäma'ay ja'a tuungmøødpä maa ja'a tsajtøjcän coo oración hajxy tiúunäxät, coo aceite hajxy yajnähjaaxøjät ja'a Dioscøxpä.

¹⁵ Pø jaanč mæbøjp hajxy, ja'a hajxy oracióntuumbä, mänitä Dios ja'a pa'amjäya'ay ja'a pia'am yajnähwáatsät, møødä piojpä møødä quiädieey.

¹⁶ Myajniñägäpøjöp ja'a mbojpä mgädieeyhajxy hamiñ häxøpy. Mniñähgapxtu'udøjöp hajxy hamiñ häxøpy nebiä mba'am hajxy jaduhñ xñähwá'adsät. Jaanč tehñ tiuungpaatp jaduhñ coo ja'a hojiäya'ay hamuumdu'joot yhoracióntúnät.

¹⁷ Høxtahmdsä Elías, ja'a Diosmädia'agy jecy yajwá'xäbä. Jaduhñ je'e jiäya'ayhajty neby højtshájtämän. Coo ja'a Elías ja'a Dios miänuu'xtaacy coo quia'a yajtú'uwät, tægøøgjumøjt ja cupc quia'a tuuy hädaa yaabä naaxwiin.

¹⁸ Mänitä Elías ja'a Dios jadähooc miänuu'xtaactägajch coo yajtú'uwät. Mänit jadähooc tiägøøyy tuubä. Mänitä jäya'ay piäda'agyhajxy yhoyøøyyäxä.

¹⁹⁻²⁰ Hermanodøjc, coo pøn ja'a tøyhajt jøjyohdiú'udät maa mijsän, tu'udägöyyäp hajxy jaduhñ. Pero coo hajxy mjootcapxmøcpøgät, mänitä wyiinmahñdyhajxy miédsät. Cøxaambä piojpä quiädieey hajxy jaduhñ ñähwa'adsa'añ, y hodium hajxy jaduhñ miähmø'øwa'añ. Tøyhajt jaduhñ.

1 Pedro

¹ Høøch xøhajp Pedro. Jesucristøch xquiuguexyhajp. Mijts hädaa nocy nyajnäjaayøøby pønhatiä Diosmädia'agy mæbøjp. Xii yaa hajxy wiingtuumjaty mhadsäna'ay jim maa naax jaduhñ xiøhatiän Ponto, møød jim Galacia, møød jim Capadocia, møød jim Asia, møød jim Bitinia.

² Jequiän mijtsä Diosteedy xwyiimbiiyy. Tøø Dios hänajty ñajuø'øoy coo mijtsä miädia'agy hänajty mmæbøgaanä. Ja'a yhEspirituhaamä Dios hajxy tøø xyaghodiägø'øoy, weenä mädia'agy hajxy jaduhñ mmæbøgät ja'a Jesucristocøxpä. Jaaya'ay hajxy tøø xyajnähwäatsäm mänaa hajxy xñähho'túutäm. Weenä Dios ja'a hoyhajtä weenhajt hajxy xmio'oy møj may.

³ Tsøgä Dios hajxy wiingudsähgøøyyäm. Jaaya'ayä Jesucristo Tieedyhajpy. Højtsä Jesucristo nWiindsønñhajtäm. Hojiotä Dios jiaanç tehñ miøød ja'a højtscøxphajtäm, paady hajxy homiänaajä xyagjugyhadäänäm neby je'e jiu-gyhatiän. Coø Dios ja'a Jesucristo yagjujypiojtägajch coo hänajty tøø yho'ogy, jaduhñä tøyhajt hajxy nmøødhajtäm coo Dios hajxy jaduhñ xjiaanç yagjugyhadäänäm homiänaajä

⁴ jim tsajpootyp. Jimä hoyhajtä weenhajt hajxy møj may xmio'owäänäm, neby jaduhñ jecy miänään cooc hajxy hänajty xmio'owäänäm. Ti-jaty hajxy yaa nyagjugyhajtäm hädaa yaabä naaxwiin, tsipcøxp jaduhñ quiøxa'añ, tsipcøxp jaduhñ quiuhdägoyya'añ. Pero mädyiijatiä Dios hajxy jim xmio'owäänäm tsajpootyp, cab jaduhñ mänaa quiøxa'añ, cab jaduhñ mänaa mia'ada'añ, cab jaduhñ mänaa quiuhdägoyya'añ. Homiänaajä yajxøn yhida'añ.

⁵ Coø mijtsä Dios miädia'agy jaduhñ mmæbøjcä, paadiä Dios hajxy xcwieendähada'añ ja'a miøcmäjaahaam. Cab hajxy jaduhñ mänaa mguhdägoyya'añ. Coø ja'a Dios yHuung yaa quiädaactägatsa'añ hädaa yaabä naaxwiin, ja'a Jesucristohajpä, mänit hajxy jim xyajnøcxäänäm tsajpootyp Dioswiinduum. Jimä Dios hajxy homiänaajä xyagjugyhadäänäm neby je'e jiugyhatiän.

⁶ Paady mijts jootcuyc mhity, hoy hajxy jäda'ahaty madiu'u mja tsaachpøcy. Pero cab hajxy jecy mdsaaçhpøga'añ.

⁷ Høxtahmdsä oro, jøønhaamä jäya'ayä oro hajxy yhiixmach pø hoyhoro jaduhñ. Jaanä jaduhñ mijtsä Dios xyhiixmajtspä pø hamuumdu'jootä miädia'agy hajxy mmæbøjcä, hoy hajxy mja jaanç tehñ chaaçhpøcy. Jaanç tehñ choobaatp jaduhñ coo hajxy jaduhñ mmæbøgät tehñgajnä. Cabä oro jaduhñ jiaty tsoobaady neby jaduhñ choobaadiän nej mijts homiänaajä mmæbøquiän. Hix, tsipcøxpä oro jaduhñ quiuhdägoyya'añ. Y coø Jesucristo yaa quiädaactägatsa'añ, mänit mijts xquiumaya'añ je'eguiøxpä coo hajxy hänajty tøø mmæbøcy, hoy hajxy hänajty tøø mja jaanç tehñ chaaçhpøcy.

⁸⁻⁹ Hoyyä Jesucristo hajxy tøø mga'a jagä hixy, mdsojpy mba'häyooby hajxy jaduhñ, y mmæbøjcäbä miädia'agy hajxy jaduhñ. Hoy hajxy tøø mga'a jagä hixy, coo hajxy jaduhñ mmæbøcy, paady hajxy jaduhñ tøø xyajnähwa'açh. Coø hajxy jaduhñ tøø xyajnähwa'açh, paady hajxy jaduhñ mjaanç tehñ xioonda'agy nägø'ø nädecypiä.

¹⁰ Ja'a jäya'ayä Diosmädia'agy hajxy jecy yajwä'xäbä, jia wi'i yajtøøby jia wi'i yajtø'xyp hajxy hänajty neby hajxy piäda'agøøjät hawa'adstuum. Cab hajxy hänajty ñajuø'øoy neby hajxy jaduhñ jim piäda'agøøjät. Pero ñägäpax hajxy jaduhñ coo mijtsä Dios hänajty xpiäda'aga'añ hawa'adstuum, je'eguiøxpä coo hojiot miøødä.

11 Yajtøøby hajxy hānajtj pøn mijts hānajtj min xpiāda'aga'añ hawa'adstuum. Jaduhñ hajxy hānajtj yajtøøbä mānaa hānajtj myina'añ. Ja'a Dios jaduhñ hawaanä ja'a yhEspirituhaam cooc tu'jäya'ay hānajtj yaa min chaachpøga'añ. Y cooc hānajtj tøø yho'nä, mänitac hānajtj jiuypijøjtägatsa'añ. Mänitac hānajtj jim ñøcxtägatsa'añ tsajpootyp maa Dioswiinduumän. Pero ja'a jecyjia'ayhajxy, cab hajxy hānajtj jaduhñ ñajuø'øy pønä Dios hānajtj tøø ñānømy ja'a yhEspirituhaam. Nñä'ä cujahy hajxy jaduhñ nebiaty hajxy jaduhñ ñajtsapxøøyyä.

12 Mänit hajxy jecy yhawāanäxä coogä Dios jaaya'ay hānajtj quia'a tsoj quexa'añ, ja'a mijts hānajtj xpiāda'agaambä hawa'adstuum. Cujéquiägä Dios hānajtj quieja'añ. Hoorä, tøø quiejxnä. Jaduhñ tøø yajtøjiajnä coo ja'a yajnähwaatspä tøø quiejxnä. Y tøø mijts jaduhñ mjaančh mädoyhaty coo ja'a yajnähwaatspä yaa tøø yhoj. Ja'a Jesucristøch jaduhñ nnänøømby coo hajxy hoy xñähho'túutäm. Y jaaya'ay mijts xyajmädoyhajtäbä, ja'a Dios ja'a yhEspirituhaam hajxy jaduhñ ñajtsapxøøyyä nebiatiä Diosmädia'agy hajxy yajwá'xät. Tsajpootypä Dios ja'a yhEspiritu yajtsohndaacy coo jaduhñ yaa quiejxy hädaa yaabä naaxwiin. Haa ja'a Dios ja'a mioonsähajxiä, ja'a hajxy jaduhñ jim hijpä tsajpootypä, jiaančh tehñ yagjuøøby hajxy jaduhñ coo Dios ja'a yHuung jaduhñ yaa quiejxy hädaa yaabä naaxwiin, coo højts hoy xñähho'túutäm.

13 Y coo Jesucristo jaduhñ yaa jadähooc quiädaactägatsa'añ, mänit hajxy jaduhñ jim xyajnøcxāanäm tsajpootyp maa Dioswiinduumän, pønatiä Diosmädia'agy hānajtj tøø miäbøcy. Mänitä hoyhajtä weenhajtä hajxy jim ca'xy xmio'owāanäm. Coo Dios jaduhñ tøø miāna'añ coogä yHuung yaa quiädaactägatsa'añ, jaduhñä tøyhajt hajxy nmøødhajtäm coo jaduhñ tiøjiada'añ. Tsøcxä njoot hajxy pädaacäm maa hoyhajtän, maa weenhajtän, mädyii Dios hajxy hānajtj xmio'owāanäm. Tsøcxä hajxy hoy wädijtäm. Tsøc hajxy jahmiejtstäacäm coo Jesucristo yaa quiädaactägatsa'añ.

14 Coo Dios hajxy xyhuunghajtäm, paadiä miädia'agy hajxy tsøc mabøjcäm. Cabä haxøøgwiinmahñdy hajxy jadähooc mbadu'ubøjcumbät, neby hajxy hijty mjatcø'øyän coo Dioscapxiä Diosmädia'agy hajxy hijty mga'a mädoyhatyñä.

15 Ca'a haxøøgjoot ca'a haxøøgwiinmahñdy hajxy myaghity. Hix, cabä Dios haxøøgjoot haxøøgwiinmahñdy ñä'ägädä møødä. Jaaya'ay hajxy jaduhñ xyajñähdiñäm coo hajxy xquiu'ughadāanäm. Paadiä hojiot hajxy tsøc yaghijtäm nebiä Dios hojiot miøødän.

16 Jaduhñ jim myiñ cujaay maa Diosmädia'aguiän: "Høøch, cábøchä haxøøgjoot cábøchä haxøøgwiinmahñdy nnä'ägädä møødä. Høøch hajxy pahijx padúunäc", nømä Dios jecy miānaañ.

17 Ja'a Dios hajxy nwiingudsähgøøyyäm. NDeedyhajtäm hajxy jaduhñ. Paady hajxy hoy tsøc jäya'ayhajtäm mäduhñtiä hajxy yaa ndsänaayy nhäyóowäm hädaa yaabä naaxwiin. Hix, nnajuøøyyäm hajxy jaduhñ coo Dios hajxy xyajcumädoxāanäm nebiaty hajxy hānajtj yaa haxøøg tøø njatcøøyyäm hädaa yaabä naaxwiin, hoy hajxy hānajtj näje'e tøø nja mäyøødsänäyäm.

18-19 Ja'a nhaphajtäm ja'a ndeedyhajtämhajxy ja'a jegyhajtypä, coo yhamd-soo cuhdujt hajxy hijty hoy quiudiuñ, jaduhñäc tyijy hajxy ñähwa'adsa'añ. Y jaduhñ mijts tøø mbahabøjpä. Pero cab jaduhñbä cuhdujt choobaady. Coo Jesucristo hajxy hoy xñähho'túutäm, ja'a ñø'tyhaam hajxy xpiädäacäm hawa'adstuum. Ni tii hajxy jaduhñ xquia'a pädaacäm hawa'adstuum, ni xädø'øñ. Hix, paquiä xädø'øñ quiøxy. Jagooyyä Jesucristo hajxy xpiädäacäm hawa'adstuum ja'a ñø'tyhaam. Hix, cabä Jesucristo ni tii poj ni tii cädieey quia'a møødä. Paady hajxy je'e hoy xpiädäacäm hawa'adstuum. Coo Jesu-

cristo ja'a poj ja'a cädieey häxøpy miøødhaty, cab hajxy häxøpy tøø xpiädaacäm hawa'adstuum.

²⁰ Jéquiänä Dios ja'a yHuung jaduhñ yajnähdiyy cooc hānajt yaa quiexa'añ hādaa yaabā naaxwiin, cāhnāc hādaa naaxwiimbā hānajt yhawijy tiøø'xta'agy. Pero cabā Dios ja'a yHuung choj quejxy. Cujecy jaduhñ quiejxy mānaabā højts hānajt yaa njugyhājtāmbā. Højts hoy xñāhho'túutām.

²¹ Coø Jesucristo hānajt tøø yho'ogy, mānitā Dios yagjujypiojtāgajch. Mānit jim jadāhooc yajnøcxy maa wyiinduumān. Jim jāda'ahaty wyiingudsāhgø'øyyi. Y coø Dios ja'a yHuung jaduhñ yagjujypiojtāgajch, paadiā miādia'agy hajxy tsøc mǎbøjcām coog hajxy xyagjugyhadāanāmbā homiānaajā neby je'e jiugyhatiān.

²² Tøyyā Dios miādia'agy. Y coø mijtsā miādia'agy hoy mgudiuunā, paadiā mjootā mjuøhñdyhajxy nāhwa'ads yhity. Naxy hajxy jaduhñ mdehm ñiçhoc mdehm ñimiee'xøøjāt hamuumdu'joot. Jaduhñ hajxy mnijiāwø'øwøøjāt nebiā tu'que'expān nebiā tu'māgu'ugpān.

²³ Tøø haxøøgjoot tøø haxøøgwiinmahñdy hajxy nnajtshixøøyyām. Homiānaajā Dios hajxy xyagjugyhadāanām neby je'e jiugyhatiān. Jaduhñā hojiootā howyiinmahñdy hajxy xmiøøyyām hawiinjemy, je'eguiøxpā coø miādia'agy hajxy nmǎbøjcām. Cabā miādia'agy mānaa quihdāgoyya'añ. Jaaya'ay hajxy jaduhñ xyagjugyhadāanām homiānaajā neby je'e jiugyhatiān, ca'a piønā hādaa yaabā naaxwiimbā, ni ja'a ndajhājtām ni ja'a ndeedyhājtām. Haa ja'a hādaa yaabā naaxwiimbā jugyhajtā, tsipcøxp jaduhñ quiøxa'añ.

²⁴ Jaduhñ jim myiñ cujaay maa Diosmādia'aguiān:
Høxtahñdsā pøjy, hoy jaduhñ jia yajxonā, tsipcøxp je'e ñā'ägā tø'øch.
Jaduhñ mǎwiin højtshājtām, hoy hajxy møj jaançh nja nijiāwøøyyām, tsipcøxp hajxy nnā'ägā ho'og nnā'ägā tāgoyyāanām.

²⁵ Pero ja'a Diosmādia'agy, cab jaduhñ mānaa quiøxy tiägoy.
Ja'a Diosmādia'agy jaduhñ mānaamb coogā Jesucristo hajxy hoy xñāhho'túutām. Tøø mijtsā jāya'ay jaduhñ xyajmādoxyaty, ja'a Diosmādia'agy hajxy jecy yajwá'xābā.

2

¹ Coø Dios hajxy homiānaajā xyagjugyhadāanām neby je'e jiugyhatiān, jaduhñā hojiootā howyiinmahñdy hajxy tøø xmiøøyyām hawiinjemy. Paadiā haxøøgjootā haxøøgwiinmahñdy hajxy tsøc najtshixøøyyām cøxiā. Cab hajxy mnā'ägā høhñdā'agāt ni weeñtiā. Hamuumdu'joot hajxy jaduhñ tøy mjaançh hojiāya'ayhādāt. Jii jāya'ayhajxy naje'e, cabā Diosmādia'agy hajxy hoy quiudiuñ, hoy hajxy jia nidiyyi nebiā hojiāya'ayān. Ca'a hajxy jaduhñ mbahixy. Ca'a hajxy pøn cøxiā wiinā myajcuxøøghadø'øy. Cab hajxy mniñāhøøn mniñāhojøøjāt.

²⁻³ Tøyhajt jaduhñ coø Jesucristo mayhajt møj may tøø tiuñ maa mjtscøxpān. Mnajuøøby hajxy jaduhñ, túhmäts. Hahixøøbyxiā jaduhñ coø miādia'agy hajxy tehngajnā mbanøcxāt. Høxtahñdsā maaxhuunghajxy, coø hajxy hānajt chi'idsa'añ, mānitā tsi'tsc hajxy ñājø'øy. Jaduhñ mǎwiin mjijspā, mba'yá'axāp ja'a Dios hajxy coø quiapxiā miādia'agy hajxy ween tehngajnā xjiaac yaghabøcy. Jaduhñ hajxy ca'xy pedyi hoy myajtúnāt. Y cab hajxy jaduhñ mānaa mdudägóyyāt.

⁴ Tehngajnā Jesucristo wyiinmahñdy hajxy jaac tehñ piahijxā jaac tehñ piaduunā. Ja'a Dios jaduhñ jecy wiinmaayy coø højts hānajt jaduhñ xyhuunghadāanām ja'a Jesucristocøxpā. Ja'a Jesucristo, ja'a Dios yHuung je'e, paadiā cuhdujt jaduhñ miøødā coø hajxy nwiingudsāhgøøyyāmāt. Pero cabā

jäya'ayä Jesucristo hajxy näje'e jìjɔpɔgø'øɣ. Cab hajxy wyiingudsähgø'øɣ. Xiøøghajpy hajxy jaduhñ.

⁵⁻⁶ Jaduhñ jìṁ myiimbä cujaay maa Diosmädia'aguiän:

Jìṁ maa cajpt jaduhñ xiøhatiän Siön, jìmhøchä ndsajtøjc tu'ug ngojy.

Tú'ughøchä tsaa nwiimbiiyy coo jìṁ piäda'agøøjät maa tøjteecän.

Jaanč tehñ tiuungpaatp yø'ø tsaa jaduhñ.

Ja'a Dios ja'a Jesucristo jaduhñ yajmäbaat nebiä tsaa ja'a jaanč tehñ tiuungpaatpän, coo jaduhñ yaa quiejxy hädaa yaabä naaxwiin, coo hajxy hoy xyajnähwäatsäm. Jaduhñä Dios miänáangumbä cooc tsipcøxp yajtøjiada'añ coo hajxy jìṁ yajnøcxa'añii tsajpootyp maa Dioswiinduumän, pønjaty jaduhñ mæbøjp coo Jesucristo hajxy xyajnähwäatsäm, ca'a wyiinghäna'cä. Coe Jesucristo hajxy tøø xjiaanč yajnähwäatsäm, jaduhñä Dios hajxy tøø xya-jnähdíjjäm coo Jesucristo hajxy nmøødhíjtämät tu'ugmädia'agy. Tehñgajnä Diosmädia'agy hajxy tsøc hoy jaac tehñ quiudiúunäm. Tsøgä Dios hajxy hoy jaac tehñ wyiingudsähgøøyyäm. Jaduhñä Dios hajxy xquiumáayyämät.

⁷ Coe mijts jaduhñ mmæbøcy coo Jesucristo hajxy hoy xyajnähwäatsäm, paadiä Jesucristo hajxy mdsocy, paady hajxy mwiingudsähgø'øɣ. Hoorä, jaduhñ jìṁ myíingumbä cujaay maa Diosmädia'aguiän:

Jii tsaa tu'ug, cabä tøjmuu'tspädøjc-hajxy hijty hoy yhixy;

cab hajxy hijty yajtuna'añ.

Pero ja'a cudøjc, yajxón yø'ø tsaa yhixy, paady jìṁ yajpädaacä maa tøjteecän.

⁸ Jaduhñ wiingtuum myíingumbä:

Jii tsaa tu'ug, coo pøn quiuhnepy, cädaab hajxy jaduhñ.

Ja'a Jesucristo jaduhñ yajmäbaatä neby yø'ø tsaaajän.

⁹ Højtsä Dios tøø xyajnähdíjjäm coo miädia'agy hajxy nmæbøjcämät, coo hajxy xquiu'ughájtämät. Xyhuunghájtäm hajxy jaduhñ coo hajxy ween hoy njäya'ayhájtämät neby je'e hoy jiaja'ayhatiän. Tøø cuhdujt hajxy xmióoyyäm coo hajxy nDeedyhájtämät nebiä Jesucristo ja'a Dios Tieedyhatiän. Tøø Dios hajxy xyajpädsøømäm haxøøgtuum. Hodium hajxy hoy xpiädaactägájtsäm. Jaduhñä miädia'agy hajxy nyajwá'xämät coo møjmayhajt tøø tiuñ maa højtsøxphájtäm.

¹⁰ Coe mijts hijty mga'a mæbøcy, paadiä Dios hajxy hijty xquia'a cu'ughaty. Cabä Dios hajxy hijty xñäxuuch. Pero coo hajxy jaduhñ mmæbøjnä, paadiä Dios hajxy jaduhñ xñäxuu'tsnä. Paady hajxy xquiu'ughajnä.

¹¹ Mägu'ughajpædøjc, hoy hajxy yaa nja híjtäm hädaa yaabä naaxwiin, cabä njoot hajxy yaa tøø nbädäacäm maa hädaa yaabä naaxwiimbän. Jìṁä njoot hajxy tøø nbädäacäm maa Dioswiinduumän. Tsøcxä haxøøgwíinmahñdy hajxy høxhíxäm, jaduhñä Dios miädia'agy hajxy hoy ngudiúunämät.

¹² Hoy hajxy mja hity maa jäya'ayä Diosmädia'agy hajxy quia'a mæbøquiän, hoy hajxy mwädítät. Hoy hajxy jaduhñ mjäya'ayhádat, hoyä jäya'ay hajxy cu xjia nähøønø'øw. Coe Dios yaa quiädä'agät tøyhajtyajjepä, mänit mijtsä jäya'ay hñajty xyhixa'añ coo mijtsä Dios miädia'agy hñajty hoy tøø mjaanč cudiiunä, ja'a Diosmädia'agy hajxy hñajty tøø quia'a mæbøquiäbä. Mänitä Dios hajxy wyiingudsähgø'øwa'añ.

¹³ Mwiingudsähgøøyyäbä tuungmøødpä miädia'agy hajxy. Cabä pøn jaduhñ waamb xñänómät. Hix, mbanøcxypä Diosmädia'agy hajxy jaduhñ. Y coo ja'a tuungmøødpä miädia'agy hajxy mga'a wiingudsähgøøyyät, mäna'anaambä jäya'ayhajxy jaduhñ coogä mädia'agy quia'a hoyä, ja'a mijts jaduhñ mbanøcxypä. Mwiingudsähgøøyyäbä gobiernä miädia'agy hajxypä. Jaaya'ay møjtuung jaduhñ nä'ägä møød.

14 Mwiingudsähgǫǫyyäbä gobiernä mioonsä miädia'agy hajxypä, ja'a hajxy jaduhñ mǫjtuunǧmǫǫdpä. Pǫnjaty jaduhñ cädiehby, je'e hajxy jaduhñ yajcumädooby. Pǫnjaty hoy jäya'ayhajp, je'e hajxy jaduhñ quiumaaby.

15 Jaduhñä Dios chocy coo hajxy hoy mjäya'ayhädät. Jii jäya'ayhajxy näje'e, cabä Diosmädia'agy hajxy ñä'ägädä wiinjuǫ'ǫwa'añ. Jaanč tehñ quiuhxex hajxy jaduhñ. Hoy hajxy jaduhñ quia'a jagä wiinjuǫ'ǫwa'añ, nǫm hajxy wyl'i miäna'añ cooc tyijy ja'a Diosmädia'agy quia'a hoyyä. Hoorä, coo mijts tǫyhajt mhojiäya'ayhädät, caj mijtsä jäya'ay hoy xñähǫǫnǫ'ǫwät, ja'a Diosmädia'agy hajxy ca'a wiinjuǫ'ǫwaambä.

16 Näje'ejä jäya'ayhajxy miäna'añ cooc tyijy cuhdujt hajxy miǫǫdä coo hajxy hoñejpiä jiatcǫ'ǫwät, je'eguiǫxpä coogä Jesucristo hajxy tǫǫ yajñähwa'ačhii. Pero cab jaduhñ tiǫyyä. Cab jaduhñ yhooyä coo hoñejpiä njatcǫǫyyämät. Pero tsǫgä Dios miädia'agy hajxy cudiúunäm nebiaty hajxy xyhanéhñäm.

17 Mwiingudsähgǫ'ǫwäbä jäya'ay hajxy nägǫxiä. Mničhoc mnimiee'xǫǫjap hajxy pǫnjatiä Diosmädia'agy mǫbǫjp. Mwiingudsähgǫ'ǫwäbä Dios hajxy, jaduhñä gobiernä hajxy mwiingudsähgǫǫbiät.

18 Mijts hajxy moonsähajpä, mmǫbǫjcäbä mwiindsǫñä miädia'agy hajxy. Mwiingudsähgǫ'ǫwäp hajxy jaduhñ, hoy hñajty yhojiäya'ayä quia'a hojiäya'ayä.

19 Coo mwiindsǫñ hajxy xchaačhtiúnät nä'ä nägoobä, hoy hajxy hñajty tǫǫ mga'a jagä cädieey, mmee'xtúgäp hajxy jaduhñ. Mnajuǫǫby hajxy jaduhñ coo Dios hajxy jaduhñ xquiumáyät.

20 Pero pǫ tǫǫ hajxy hñajty mjaanč cädieey, hahixǫǫby jaduhñ coo hajxy mgumädówät. Y cabä Dios hajxy jaduhñ xquiumáyät, hoy hajxy cu mja mee'xtuc. Pero pǫ cab hajxy hñajty tǫǫ mgädieey, coo mwiindsǫñ hajxy nä'ä nägoobä xyajcumädówät, y coo jaduhñ mmee'xtúgät, mänitä Dios hajxy jaduhñ xquiumáyät.

21 Jaduhñä Dios hajxy tǫǫ xyajnähdíjjäm coo hñana'c hajxy nä'ä nägoobä xchaačhtiúunämät nebiä Jesucristo chaačhtiúunän. Hiñ, hǫjts jaaya'ay xñähho'túutäm. Y miee'xtujc jaduhñ. Jaduhñä Dios chocy coo Jesucristo hajxy nbahíxämät neby je'e miee'xtujquiän.

22 Cabä Jesucristo mänaa ñä'ägä cädieey. Ni mänaa quia'a hǫhñda'agy.

23 Coo haxǫǫg jia nämaayyä, cab haxǫǫg yhadsoodägajch. Coo chaačhtiúunä, cab jaduhñ waamb miänaañ coo hñajty yaghawiimbijtagatsa'añ. Ja'a Dios quiǫ'ǫjooty je'e ñibiädaacä. Hiñ, ñajuǫǫbiä Jesucristo hñajty jaduhñ coo jäya'ayhajxy hñajty nägǫxiä yajtǫyhajtyega'añii ja'a Diósäm. Jaduhñä Dios hajxy xyhíxäm neby hajxy njäya'ayhajtäm.

24 Coo Jesucristo hajxy hoy xñähho'túutäm cruzcǫxp, jaduhñä nbojpä ngädieey hajxy xyajnähwáatsäm. Tsǫcxä ja'a haxǫǫgwiinmahñdy hajxy najtshixǫǫyyäm. Tsǫc hajxy jahmiejtstáacäm coo Jesucristo hajxy nmǫǫdhíjtäm tu'ugmädia'agy mänaa yho'oguiän, mänaa jiuypipǫjtägachän. Paady hajxy njugyhadaañäm homiänaajä nebiä Dios jiu gyhatiän. Coo hajxy jaduhñ ngudiúunämät nebiä Dios hajxy xyhanéhñäm, mänitä Dios hajxy jaduhñ xquiumayáañäm.

25 Jaduhñ mäwiin hajxy hijty njäya'ayhajtäm nebiä meeghajxy tiägowiäditiän jäguemduum. Cabä mädia'agy hajxy hijty nmǫbǫjcäm ja'a Jesucristocǫxpä. Pero tǫǫ hajxy nmǫbǫjcänä. Y xcwieendähajtämä Jesucristo hajxy jaduhñ.

3

1-2 Mijts to'oxiǫjtǫjc, mwiingudsähgǫ'ǫwäbä mnihyhap hajxy. Coo mni-

hyhapä miädia'agy hajxy hoy mgudiúnät, y coo Jesucristo hajxy mwiin-gudsähgø'owät, wehndä mnihyhapä Diosmädia'agy hajxy miäbøgät, pø cahnä hajxy hānajtý miäbøcyñä, hoy hajxy hānajtý waamb mga'a jagä nāma'ay coo hajxy ween miäbøcy.

³⁻⁴ Je'e ja'a Dios jaduhñ quiumaaby coo hojioot hajxy mmøødhádät, coo mnihyhap hajxy mee'xxieemy mmägápxät. Je'eds jaduhñ tsoobaatp coo Diosmädia'agy hajxy jaduhñ mgudiúnät hamuumdu'joot. Y cab hajxy jaduhñ mānaa mdudägóyyät. Cab hajxy myajcumáyät pø jii howyit hodiucxy hajxy hānajtý mmøødä, pø jii oronaamdsøm, pø jii orotaatstøy hajxy hānajtý mmøødä, pø hoyyā mguhwaay hajxy howyit hoguiuhxotshaam hānajtý mgu'udy. Cabä Dios yø'øduhmbä jiaty møjpäda'agy, ni jaduhñ quia'a jega'añ.

⁵ Ja'a to'oxiøjcä Diosmädia'agy hajxy hijty jegyhajty panøcxpä, wyiin-gudsähgøøbiä ñihyhap hajxy hijty. Mee'xxieemy hajxy hijty. Miäbøjpiä Diosmädia'agy hajxy hijty coo hajxy hānajtý cwieendähada'añii ja'a Diósäm.

⁶ Jaduhñä Sara ja'a ñihyhap jecy wyiingudsähgøøyy, ja'a Abrahamhajpä. Mee'xxieemy hānajtý miägapxy. Quiumaayy ja'a Dios ja'a Sara jaduhñ. Y mijts to'oxiøjtøjc, jaduhñ mijtsä Dios xquiumáabiät coo mijtsä Sara wyiinmahñdy mbahijx mbadúunät. Hoy hajxy mwädítät ja'a Dioscøxpä. Y cabä mhaa mjoot hajxy myagjádät cooc tyijy ja'a mnihyhap hajxy hānajtý mmägapxtägoy.

⁷ Jaanä jaduhñ mijts nmägapx nhanehmbä, mijts ya'adiøjtøjc. Mdsoc mmée'xäbä mdo'oxiøjc hajxy. Mmøødhádäbä hojioot hajxy jaduhñ. Hix, cabä to'oxiøjcä miäjaahajxy miäbaady nebiä ya'adiøjc-hajxy miøcän. Paady hajxy mgüeendähádät. Hix, xmiooby mijtsä Dios ja'a hoyhajtä weenhajt näguipxy møødä mdo'oxiøjc. Hix, näguipxiä Dios hajxy xyajñähwa'açh møødä mdo'oxiøjc-hajxy. Tiuumbiä Dios mayhajt jaduhñ. Pero coo mdo'oxiøjc hajxy mga'a tsoc mga'a mée'xät, xiøøbä Dios hajxy jaduhñ mnä'ä pa'yáaxnät.

⁸ Mägu'ughajpádøjc, jaduhñ hajxy homiänaajä mnä'ägä niçhoc mnä'ägä nimiee'xøøjät nebiä tu'ugmägu'ug nebiä tu'ugpuhya'ayän. Mniñäxuudsøøjöp hajxy jaduhñ hamiñ haxøpy. Mee'xxieemy hajxy mnimiøødcapx mnimiøødmädia'agøøjät. Jaduhñ hajxy mhídät tu'ugmädia'agy nägøxiä. Jaduhñ hajxy hoy mdsáná'awät nägøxiä.

⁹ Coo mijts pøn cøxypänejpiä xtiúnät, cab hajxy myaghawiimbijtagátsät. Y coo hajxy pøn xwyiinwóonät, cab hajxy mhadsoowiimbídät. Mmänuu'xtá'agäbä Dios hajxy jaduhñ coo ween piuhbedyii ja'a tøø xwyiinwóonäbä. Jaduhñ mijtsä Dios tøø xyajñähdiij coo Dios ja'a hoyhajtä weenhajt hajxy xmió'owät.

¹⁰ Pø mdsojpiä mhoyhäyow ja'a mhoçhāna'a hajxy, cab hajxy mānaa mhøhñdá'agät.

Cab hajxy mānaa mgapxtägóyyät.

¹¹ Mnajtshixø'owäbä mhaxøøgwiinmahñdy hajxy.

Hoy hajxy mjäya'ayhádät. Cab hajxy mnimiädsip mnimiäma'adøøjät ni mānaa.

¹² Hix, cwieendähajpiä Dios pønatiä miädia'agy mabøjcäp.

Y coo Dios hajxy miānuu'xta'agy, mānit hajxy piuhbedyii.

Pero ja'a hāna'c-hajxy haxøøg wädijpä, cab hajxy ñäxuuchii ja'a Diósäm, nømä Diosmädia'agy miāna'añ.

¹³ Hoorä, coo hajxy hamuumdu'joot mhojiäya'ayhádät, cab hajxy jaduhñ pøn cøxypänejpiä xtiúnät.

¹⁴ Jii jāya'ayhajxy näje'e, mijts xjia wi'i chaaçhtiunaamb, hoy mijts mja hojiäya'ayhaty. Pero ca'a hajxy mdsähgø'øyy; ca'a hajxy tii mdajy mmay. Ja'a Dios hajxy jaduhñ xcwieendähadaamb.

15 Hamuumdu'jootä Jesucristo hajxy mwiingudsähgó'owät. Hix, jaaya'ay hajxy nWiindsønhájtäm. Y coo hajxy pøn xmiäyajtówät tiiguiøxpä Diosmädia'agy hajxy hānajtý coo mmäbøcy, cab hajxy mdsähgó'owät; mnägápxäp hajxy jaduhñ tiiguiøxpä hajxy coo mmäbøcy. Mee'xxieemy hajxy jaduhñ mhadsówät, ca'a yhajootma'adä.

16 Nägüentä hajxy tehngajnä mwädítät, coo hajxy jaduhñ mnä'ä cädiéeyät. Jaduhñä tøyhajt hajxy mmøødhádät coo hajxy hānajtý hoy mwädity. Hoy hajxy mwädítät, hoyyä jäya'ay hajxy xjia nāhojy xjia näya'axy coo Jesucristo miädia'agy hajxy hoy myajtuunä. Coo hajxy jaduhñ hoy mjaančh wädítät, mänitā hāna'c-hajxy jaduhñ chāhdiuna'añ coo mijts hānajtý jaduhñ tøø xñānømy.

17 Hoy jaduhñ coo hajxy hoy mwädítät, hoy hajxy hānajtý mja tsaächpøcy. Hix, ja'a Dios hajxy hānajtý tøø xyajnāhdijy coo hajxy tāhoocjaty mdsaačhpøgät, hoy hajxy hānajtý mja howiädity. Pero coo hajxy hānajtý haxøøgmjatcø'øy, cab jaduhñ yhooyä; mgumädówäp hajxy jaduhñ.

18 Hoyyä Jesucristo mānaa quia'a jagä cädieey, tsaächpøjc je'ebä. Coo hajxy hoy xñāhho'túutäm, jaduhñä nbojpä ngädieey hajxy xyajnāhwáatsäm. Y jaduhñ hajxy jim xyajnøcxāanām Dioswiinduum. Tāhooquiä hajxy xñāhho'túutäm. Ja'a ñi'xä quiopc-hajtiä jaduhñ ho'c. Pero ja'a jiootä yh-Espíritu, cab jaduhñ ñä'ä ho'cy; jujyñä hānajtý jaduhñ yhity.

19 Ja'a jiäwøhñdyhaamä Jesucristo yhooyy maa ho'ogyjiäya'ayhajxy hānajtý tsumy yhitian. Jimä hawiinjemybiä mädia'agy hajxy hoy yajwiingapxø'øyii coogä Dios ja'a Jesucristo hānajtý tøø quiexy mäyajnāhwaatspä.

20 Paady hajxy hānajtý tsumy yhity je'eguiøxpä coo Diosmädia'agy hajxy jecy quia'a mabøjcy mānaa Dios jia nägapxiän coo nøøgomdägoy hānajtý tiägø'owa'añ, mānaa Noé ja'a biarco hānajtý yhädiuñän. Cabä Dios mänitiä yajtagøøyy tuubä. Jia hahijx jecy pø mabøgāanāxäbä miädia'agy hānajtý. Coo jaduhñ yhijxy coo hajxy hānajtý nāmay quia'a mabøga'añ, mänitāts yajtagøøñä tuubä. Mänitā nøøgomdägoy tiägøøñä. Jagooyyā Dios yhijxy coo Noéhajxyhajtīä hānajtý miäbøga'añ, ja'a hajxy hānajtý näductújiäbä. Jagooyyā Noéhajxy jaduhñ miäbøjcy. Je'eds hajxy jaduhñ jiiby tsooc barcojooty, ja'a hajxy hānajtý tøø yhädiuñäbä.

21 Nebiä Noéhajxy jecy chooquiän jiiby barcojooty mānaabä nøøgomdägoy jaduhñ tiägø'øyän, jaduhñ mawínäts je'e miäbaady néjjiām coo hajxy nnäbéjtām nøøjooty, coo Jesucristo hajxy xyajnāhwáatsäm mānaa jiuypiojtägachän. Paady hajxy jaduhñ nnäbéjtām nøøjooty, hijxtahnd jaduhñ coo hajxy nnāhwáatsäm. Ja'a ngorazonghajxy jaduhñ wáatsäm, ca'a ja'a nni'xä ngopc-hájtām. Coo hajxy jaduhñ nnäbéjtām, jaduhñä Dios hajxy hamuumdu'joot nhawāanām coo Jesucristo miädia'agy hajxy nnä'ägädä panøcxāanām.

22 Coo Jesucristo hānajtý tøø jiuypiojtägach, mänit jim ñøcxy tsajpootyp. Jim yhäñaañä maa Dios quiø'ø hahooyyhaampiän. Je'e jaduhñ ñānøømby coo cuhdujt jim miøødä møj jaančh. Hix, wiingudsähgøøyyäbä Jesucristo jim. Ja'a Dios mioonsähajxy, ja'a hajxy jim hijpä tsajpootyp, je'eds hajxy jaduhñ mäwiingudsähgøøby, møødä cuhdujtmøødpähajxy. Høxtä møjcu'ubaadyhajxy yhane'emyii ja'a Jesucristām.

4

1 Coo Jesucristo chaačhpøjcy, miee'xtujc ja'a tsaächpä jaduhñ. Jaanä jaduhñ mijtspä, coo Jesucristo hajxy mmøødhity tu'ugmädia'agy, paady hajxy jaduhñ mmee'xtújpät, coo hajxy hānajtý pøn xyajtsaačhpøcy. Coo hajxy

jaduhn mjaančh tsaachpøjpät nebiä Jesucristo chaačhpøjquiän, jaduhn hajxy myajcähxó'ögät coo mhaxøøgwiinmahñdy hajxy tøø mhøxhijxnä.

² Coo mhaxøøgwiinmahñdy hajxy jaduhn mjaančh høxhixät, hoy hajxy jaduhn jäya'ayhada'añ mäduhñtiä hajxy yaa mjaac hida'añ hädaa yaabä naaxwiin. Jaduhnä Dios hajxy xquiumáyät.

³ Jue'e mijts hijty, haxøøg hajxy hijty mjatcø'øy nebiä häna'c-hajxy jiatcø'øyän, ja'a Diosmädia'agy hajxy ca'a mabøjpä. Cab jaduhn yhahixø'øy coo hajxy jaduhn mjatcø'øñät. Hanaxiä hajxy hijty haxøøg mjatcø'øy. Hanaxiä jocnøø hajxy hijty mjaančh tehñ yhu'ugy mjaančh tehñ jiøø'xy coo xøødsuu hijty maa jiadyii. Tsähdiuhndägo y hajxy hijty mjatcø'øy, ya'adiøjc møødä to'oxiøjc. Jäya'ayhadsejtsnaxy hajxy hijty naxy mwiingudsähgøøby møødä jäya'ayhabojtsnaxy.

⁴ Y ja'a jäya'ayä Diosmädia'agy hajxy ca'a mabøjpä, ja'a mijts hijty naxy mmägu'ughajpiä, yagjuøøby hajxy jaduhn coo mijtsä mhaxøøgwiinmahñdy mga'a yaghanajxnä neby hajxy hijty myaghanaxiän. Paadiä mmägu'ughajpä hajxy jäda'ahaty xñähojnä.

⁵ Pero coo Dios jaduhn yajnähdjät coo hänajty tøø yhabaatnä, mänit hajxy hänajty tiøyhajtyega'añ maa Dioswiinduumän. Mänitä hajxy yajcumadowa'añii ja'a Diósäm, hoy hajxy hänajty jia jujyquiä, hoy hajxy hänajty tøø jia ho'ogy.

⁶ Hix, jaduhnä Dios jioot chocy coo ho'ogyjiäya'ayä miädia'agy hajxy ween miäbøjcäxä, paadiä Dios ja'a yHuung Jesucristo jim quiejxy maa ho'ogyjiäya'ayhajxy hänajty tsumy yhitiän. Jimä Jesucristo ja'a Diosmädia'agy hoy yajnähxø'øy coogä Jesucristo miäyajnähwa'ačh. Jaduhnägä ho'ogyjiäya'ayä jäwøhñdyhajxy homiänaajä jiugyhádät nebiä Dios jiugyhatiän, hoyyä ñi'xä quiopc-hajxy hänajty tøø jia ho'ogy.

⁷ Habáatnäp jaduhn coo naaxwiimbä wyiimbidaañnä. Paady hajxy tehngajnä mniyajcopcø'øwøøjät nebiä mjoot hajxy yaa mga'a pädá'agät maa hädaa yaabä naaxwiimbän. Jaduhnä Dios hajxy hoy mba'yá'axät hamuumdu'joot.

⁸ Je'e jaduhn nä'ägä tsoobaatp coo hajxy hamiñ haxøpy mničhoc mnimiee'xøøjät. Hix, coo hajxy hamiñ haxøpy nničhójcämät, mänit hajxy hoy nnimiämée'xämät. Jaduhn hajxy hoy ndsänäayyämät.

⁹ Coo pøn jim quiuyo'oy quiunaxó'øwät maa mjøøn maa ndøjc-hajxiän, hamuumdu'joot hajxy myajtøjtägø'øwät. Myajcay myaghú'ugäp hajxy jaduhn hahoy haween.

¹⁰ Cøjwiinduumä Dios wiinmahñdy hajxy xmióoyyäm coo tuung hajxy wiingjaty nmøødhájtäm. Jaduhnä jäya'ayhajxy nägøxiä piuhbedøøjät, ja'a hajxy hänajty tøø miäbøquiäbä ja'a Jesucristocøxpä. Jaduhn hajxy mnibihbedøøjät nebiatiä Dios tuung hajxy cøjwiinduum tøø xmio'oyän.

¹¹ Pønjaty tøø tiuungmo'oyii coo Diosmädia'agy hajxy yajwá'xät, hoy hajxy quiapx miädiä'agät nebiä Dios quiapxy miädia'aguiän. Pønjaty tøø tiuungmo'oyii coo hajxy miäbuhbédät, ween hajxy jaduhn hamuumdu'joot miäbuhbety. Ja'a Dios jaduhn puhbédäp. Coo hajxy hänajty tijaty mduna'añ, hoy hajxy mdúnät; jaduhnä jäya'ayhajxy miäbøgät coo Dios miøjjä jiaančh. Wyiingudsähgø'øwaambiä Dios hajxy jaduhn je'eguiøxpä coo Jesucristo hajxy hoy xyajnähwaätsäm. Cøjxta'axiøø ja'a Dios wyiingudsähgø'øwa'añii. Cøjxta'axiøø møjcuhtuht miøødhada'añ. Amén.

¹² Mägu'ughajpædøjc, cab hajxy myagjuø'øwät coo tsaachpä hajxy naxy xpiaady møc-haampiä. Hix, tsipcøxpä tsaachpä hajxy xñä'ägä paada'añ.

¹³ Jaduhñ quiähxó'ógät pø hamuumdu'jootä Diosmädia'agy hajxy mjaančh mabøcy ja'a Jesucristocøxpä, pø caj. Hix, maas hanaxiä Jesucristo chaachpøjcy mänaa hajxy hoy xñäho'túutäm. Hix, coo Jesucristo hajxy jaduhñ mmøødhity tu'ugmädia'agy, paady hajxy jaduhñ tsipcøxp mbadsaačhpøjpät. Y coo Jesucristo hñajty yaa quiädaactägatsa'añ hädaa yaabä naaxwiin, mänit hajxy hñajty mjaančh tehñ xioonda'aga'añ. Paady hajxy jäda'ahaty mxoondáacnät, hoyyä tsaačhpä hajxy jaduhñ xjia paady. Pero cabä tsaačhpä hajxy jaduhñ myagjuó'owät.

¹⁴ Coo hajxy pøn xñähójat ja'a Jesucristocøxpä, cab hajxy myagjuó'owät. Pero mxoondá'agäp hajxy jaduhñ. Hix, jaduhñä Dios ja'a yhEspírituhaam hajxy xpiuhbédät møødä wyiinmahñdyhaam. Coo mijtsä jäya'ay xyhíxät coo hajxy mmee'xtucy coo hajxy hñajty mdsaačhpøcy, mänitä Dios hajxy wyiingudsähgø'owa'añ.

¹⁵ Hahixøøby jaduhñ coo hajxy mdsaačhpøgät, pø tøø hajxy hñajty mmäjäya'ay-yagho'ogy, pø tøø hajxy hñajty mmämeečh, pø tøø hajxy hñajty myajtägø'oy maa cueendä hajxy hñajty mga'a møødän. Cab jaduhñ yhooyä coo hajxy jaduhñ mjatcø'owät.

¹⁶ Pero je'e mabøcypä caj chähdiuhñdmøødä coo hajxy mdsaačhpøgät je'eguiøxpä coo Jesucristo hajxy hñajty mwiingudsähgø'oy. Jootcuyc hajxy jaduhñ mhídät. Mnämä'awäbä Dios hajxy "Dioscuju'uyäp" ja'a Jesucristocøxpä.

¹⁷ Tøø yhabaatnä coo Dios hajxy xyajtøyhajtyegáanäm. Coo Diosmädia'agy hajxy nmäbøjcam, paady hajxy jayøjp xyajtøyhajtyegáanäm, paady hajxy jayøjp xyajtsaačhpøjcam. Pero ja'a hñana'cä Diosmädia'agy hajxy ca'a mabøjpä, coo hajxy hñajty tiøyhajtyega'añ, maas hanaxiä hajxy hñajty chaachpøga'añ.

¹⁸ Siémprämä hojiäya'ayhajxy chaachpøga'añ. Maas hanaxiä ca'awiindøyhäna'c-hajxy chaachpøga'añ, ja'a Dios hajxy ca'a wiingudsähgøøbiä.

¹⁹ Coo hajxy hñajty pøn xyajtsaačhpøcy nä'ä nägoobä, cab hajxy mmøjpädä'agät. Tehñgajnä hajxy hoy mjaac jäya'ayhädät. Hix, ja'a Dios hajxy hñajty tøø xyajmädsocy coo hajxy mdsaačhpøgät.

5

¹ Mijts majjäya'adiøjc-hajxy, ja'a hajxy jim tuumbä tsajtøgooty, mijts cham nmägapx nhane'emaamby. Nmøødhøchä cuhdujt jaduhñ cooçh mijts jaduhñ nmägapx nhané'emät, je'eguiøxpä cooçh tøø nmäjaabä, møød cooçh jim nduumbä tsajtøgooty. Nhijxhó'c-høchä Jesucristo jim cruzcøxp. Y coo Jesucristo yaa quiädaactägätsät hädaa yaabä naaxwiin, näguipxy hajxy hñajty jim xyajnøcxáanäm tsajpootyp, høøch møød mijts. Jimä hoyhajtä weenhajt hajxy xmio'owáanäm pedyi.

² Mijts majjäya'adiøjc, hoyyä Diosmädia'agy hajxy myajnähxó'owät hamuumdu'joot, ca'a yhadsip ca'a yhajootma'adä. Hamuumdu'jootä cu'ug hajxy nmägapx mhané'emät. Hix, ja'a Dios hajxy tøø xpiäda'agy coo cu'ug hajxy jaduhñ myajnähxó'owät, møød coo hajxy nmägapx mhané'emät. Cab hajxy xädø'øñguiøxpä myajnähxó'owät.

³ Cab hajxy møc møc mhané'emät. Mee'xxieemy hajxy myajnähxó'owät. Hoyyä Diosmädia'agy hajxy myajtúnät; jaduhñä cu'ug hajxy xpiähix xpiadúnät.

⁴ Y coo Jesucristo yaa quiädaactägätsät, ja'a hajxy nWiindsønñájtämbä, mänit hajxy xquiumaya'añ pø tøø hajxy hñajty hoy myajnähxó'oy. Mänit hajxy hñajty jim xyajnøcxa'añ tsajpootyp. Cøjxta'axiøø hajxy hñajty jim mhida'añ.

⁵ Møød mijts muutsc-häna'c, jaduhñ mijtspä, mwiingudsähgø'øwäbä majjaya'ay hajxy. Coö hajxy waamb xmiägapx xyhané'emät, mgudiúnäp hajxy jaduhñ. Hahoy haween hajxy mnibihbedøøjät hamiñ haxøpy, hoy miøjjä hoy miuutscä. Hix, coö hajxy jootmøj mnibiäda'agøøjät, xyajcumädówäbä Dios hajxy jaduhñ. Pønjaty capxp mädiaacp mee'xxieemy, je'edsä Dios piuhbejpy. Móoyyäbä hoyhajtä weenhajt hajxy jaduhñ.

⁶ Coö Dios hajxy jaduhñ mänaa xyajtsaächpögät, cab hajxy mmøjpädä'agät. Jim hajxy mnibiäda'agøøjät maa Dios quiø'øba'c tiecypia'cän. Møcmäjaa Dios jiaančh tehñ miøød. Hix, cujequiä Dios ja'a tsaächpä hajxy xyajnähwä'adsät. Mänit hajxy jootcuyc xjiaančh tehñ yaghida'añ.

⁷ Coö hajxy hänajty tii mnädajy mnämay, mmänuu'xtä'agäbä Dios hajxy jaduhñ coö hajxy ween xyaghoyøøyyä. Hix, homiänaajä Dios hajxy xcwieendähaty.

⁸ Mniyajcopcø'øwøøjäp hajxy; jaduhñä Jesucristo miädia'agy hajxy hoy mbanøcxät tehngajnä. Jaduhñä møjcu'ugongä wyiinmahñdy quia'a mäjädä'agät. Hix, ja'a møjcu'ugong, homiänaajä hajxy jaduhñ xmiädsiphájtäm. Xjia wi'i yajtu'udägooyyäänäm hajxy jaduhñ.

⁹ Cabä møjcu'ugongä miädia'agy hajxy mmäbøjcät. Hamuumdu'jootä Diosmädia'agy hajxy myajtúnät tehngajnä. Hix, pønjatia Diosmädia'agy mabøjp wiinduhmyhagajpt, jaduhñ hajxy chaačhpøjpä nej mijts mdsaačhpøquiän.

¹⁰ Cab hajxy jejcy mdsaačhpøga'añ. Coö Dios ja'a tsaächpä hajxy hänajty tøø xyajnähwä'ačh, mänitä Dios hajxy hamuumdu'joot xyajmäbøgaannä ja'a Jesucristo miädia'agy. Ca'xy pedyii Dios ja'a wyiinmahñdy hajxy xyajnähixø'øwa'añ. Ja'a Diósäts hajxy jaduhñ xcwieendähájtäm, hoy hajxy nej cu nja jajt cu nja habéjtäm. Tiuumbiä Dios mayhajt jaduhñ maa højtscøxphájtäm. Jaaya'ay hajxy jaduhñ tøø xyajnähdijjäm coö Jesucristo hajxy jim xyajnäcxäänäm tsajpootyp. Cøjxta'axiøø hajxy jim nhidäänäm. Hix, cøxiä Dios ja'a hoyhajtä weenhajt hajxy jaduhñ xmióoyyäm.

¹¹ Cøjxta'axiøø ja'a Dios hajxy tsøc wiingudsähgøøyyäm. Cøjxta'axiøø ja'a Dios møjcuहुdujt miøødhada'añ. Tøyhajt jaduhñ.

¹² Ja'a mägu'ughajpä Silvano hädaa nocy jahby. Høøch nnajtscapxøøyyäp. Cab hädaa nocy jiaty yoñä. Hoyyä Silvano Diosmädia'agy jiaančh tehñ yajtuñ. Tøyháthøch cham tøø ngapxy tøø nmädia'agy nebiä Dios tøyhajt wyiinmayyän. Tøø Dios møjmayhajt tiuñ maa højtscøxphájtäm. Tøø hajxy jaduhñ xyajmädsøjcäm coö hajxy jim xmiøødhájtämät tsajpootyp.

¹³ Ja'a jäya'ayhajxy yaa tsänaabiä Babilonia, ja'a Diosmädia'agy hajxy mabøjpä ja'a Jesucristocøxpä, xyajpoo'xp mijts jaduhñ. Nej mijtsä Dios xyajnähdijjiän coö miädia'agy hajxy mmäbøjcät, jaanä jaduhñä jäya'ayhajxy yaabä yajnähdijjábä coö hajxy miäbøjpät. Jaduhñ mijtsä mmägu'ughajpä Marcos xyajpoo'xpä. Nébiøchä nhamdsoo húungänä Marcos njuø'øy.

¹⁴ Coö hajxy hänajty mhamugø'øy Dioswiingudsähgøøbiä, hamiñ haxøpy hajxy mniyajpoo'xøøjät. Jaduhñ hajxy myajcähxø'øgät coö hajxy tøyhajt mničhocy mnibia'häyoyii hamuumdu'joot.

Pønjatia Diosmädia'agy panøcxp ja'a Jesucristocøxpä, weenä hoyhajtä weenhajt hajxy mio'oyii ja'a Diósäm. Amén.

2 Pedro

¹ Høøch xøhajp Simón Pedro. Høøch hädaa nocy njahby. Ja'a Jesucristøch nmøødtuumby. Jaayá'ayhøch tøø xwiinguexy coochä miädia'agy nyajwá'xät. Tøø mijsä Jesucristo xyajnähdijy coo hajxy hoy mmäbögät jaduhñ mäwiin neby højts xyajnähdijjän. Tu'cuhdujt hajxy jaduhñ xquiumáayyäm nägøxiä je'eguiøxpä coo hajxy tu'cuhdujt nmäbøjcäm coo tiøyyä. Jaduhñ yajna-juø'oy coo Jesucristo yhojiäya'ayä. Jaaya'ay hajxy nDioshåjtäm. Tøø hajxy xpiädaacäm hawa'adstuum.

² Ween mijsä Dios ja'a hoyhajtä weenhajt xmio'oy møj may coo ja'a tøyhajt hajxy mmøødä ja'a Dioscøxpä møødä Jesucristocøxpä, ja'a hajxy nWiindsønåjtämbä.

³ Coo ja'a tøyhajt hajxy nmøødhåjtäm ja'a Jesucristocøxpä, paadiä Dios hajxy madiu'u xpiuhbéjtäm ja'a miäjaahaam, jaduhñ hajxy hoy njäya'ayhåjtämät. Mänitä Dios hajxy jaduhñ xquiumáayyämät. Jaanä miäjaahaamä Dios hajxy xyagjugyhadäänäm homiänaajä neby je'e jiugyhatiän. Coo Jesucristo miøjjä jiaançhä, coo jiaanç tehñ yhojiäya'ayä, paady hajxy tøø xyajnähdijjäm coo hajxy hoy njäya'ayhåjtämbät.

⁴ Coo Jesucristo jaduhñ miøjjä jiaançhä, paadiä mayhajt møj may tiuna'añ maa højtscøxphåjtäm. Jaduhñ jim myiñ cujaay maa Diosmädia'aguiän coogä Dios mayhajt may tiuna'añ maa højtscøxphåjtäm. Homiänaajä hajxy xyagjugyhadäänäm neby je'e jiugyhatiän. Y tøø hojiootä howyiin-mahñdy hajxy xmióoyyäm hawiinjemybiä. Jaduhñ hajxy hoy nmøødhåjtämät tu'ugmädia'agy. Jaduhñä haxøøgpä hajxy yaa hoy njøjyohdiúutämät hädaa yaabä naaxwiin. Ja'a häna'c-hajxy yaa ca'a mæbøjpä, hadsojwiinmahñdy hajxy miøød. Coo yhaxøøgwiinmahñdy hajxy jaduhñ quia'a najtshixø'øwa'añ, paady hajxy jiiby quia'awa'añ haxøøgtuum.

⁵⁻⁷ Paadiä Diosmädia'agy hajxy tsøc mæbøjcäm. Tsøc hajxy hojiäya'ayhåjtäm hamuumdu'joot. Tsøc hajxy jaac habøjcäm ja'a Dioscøxpä. Tsøc hajxy håjtäm najuø'øyhaamby. Tsøc hajxy mee'xtújcäm. Tsøgä Dios hajxy wiin-gudsåhgøøyyäm. Tsøc hajxy nichójcäm nebiä tu'ugpuhya'ayän, neby højtsä Jesucristo xchójcäm. Tsøgä jäya'ay hajxy nägøxiä tsojc mée'xäm, hoy hajxy näje'e quia'a jagä mæbøcy.

⁸ Coo hajxy jaduhñ hamuumdu'joot ngudiúunämät nébiøch naamnä tøø nmädia'agy, mänit hajxy nhoyøøyyämät. Mänitä Jesucristo tiuung hoy ndúunämät. Nmøødhåjtämä tøyhajt hajxy jaduhñ ja'a Jesucristocøxpä.

⁹ Hix, pønjaty jaduhñ ca'a cudiumb nébiøch naamnä tøø nmädia'agy, jaduhñ mäwíinåts hajxy je'e nebiä wiinds nebiä xoodspän je'eguiøxpä coo hajxy tøø jiahdiågoy coo piojpä quiädieey hajxy tøø ñähwa'ächii neby hajxy hijty jegyhajty jiäya'ayhatiän. Jaduhñ hajxy tøø jiahdiägoobiä coo Dios jioot chocy coo hajxy hoy jiäya'ayhådt. Paady hajxy jaduhñ jia yajnähwaatsä.

¹⁰ Hoorä, mägu'ughajpådøjc, tsøc hajxy hamuumdu'joot cudíúunäm nébiøch naamnä tøø nmädia'agy. Jaduhñ yajnajuø'øwa'añ coo Dios hajxy tøø xyaj-nåhdijjäm coo hajxy xquiu'ughadäänäm. Coo hajxy jaduhñ ngudiúunämät, cab hajxy jaduhñ mänaa ndu'udägøoyyämät.

¹¹ Jaduhñ hajxy hoy yajxón nnøcxämät Jesucristo wyiinduum maa cøjxta'axiøø yhane'emiän. Jaaya'ay hajxy nWiindsønåjtäm. Tøø hajxy jaduhñ xyajnähwåatsäm.

¹² Homiänaajäts mijts jaduhñ nyagjahmiejtsta'aga'añ nébiøch naamnä tøø nmädia'aguiän. Tøyhájtthøch jaduhñ tøø nmädia'agy. Hoy hajxy jaduhñ mjaty. Cab hajxy mdsoj jahdiägoyya'añ.

¹³ Hawiinmats jaduhñ cooçh mijts jaduhñ nyagjahmiejtstá'agät tehngajnä, mädúhñtiøch njaac jugyhaty.

¹⁴ Hamdsóojøçhä Jesucristo xñämaayy cóogøch mobädajpä nho'ogaannä, ja'a hajxy nWiindsønhájtämbä.

¹⁵ Pero cooçh hñajty tøø nho'ogy, hoy hajxy jaduhñ mjaac capxtá'agät nébiøch chamñ nmädia'aguiän. Jaduhñ hajxy hoy mjahmiejtstá'agät.

¹⁶ Tøø højts mijts nyajwiingapxø'øy coo Jesucristo møcmäjaa miøødä, y coo yaa jadähooc quiädaactägatsa'añ hädaa yaabä naaxwiin. Tøyhajt højts jaduhñ nmädiaacy. Cab højts hamdsoo nyajcojy. Diosmädia'agy hädaa jaduhñ. Ca'a ñä'ä cueentä nebiä jäya'ay cueentä hajxy yajcojjiän. Hamdsoo højtsä Jesucristo nhijxy coo møcmäjaa miøødä, coo je'e Dyiosä.

¹⁷⁻¹⁸ Mänaa højtsä Jesucristo hñajty jimñ nmøødän maa tunän, mänitä Diosteedy jimñ quiuhgapxnajxy tsajpootyp: "Høøch nhamdsoo Huung yø'ø. Njaançh tehñ chójpíøch yø'ø. Jaançh tehñ jiootcújc-høch nnijwiø'øwyii maaçh nHuungcøxpän", nømä Jesucristo ñänøømä. Njaançh mädoow højts jaduhñ. Møcmäjaahaamä Dios jaduhñ quiapxy. Jaançh tehñ yajxonä Jesucristo piädaacä ja'a Tiéediäm, nebiä hajajpän. Paady højts yø'ø tunñ nya-jxøøbejty: "Ja'a tunñ maa Dios ñägapxiän coogä Jesucristo yHuunghaty."

¹⁹ Tøyhajt jaduhñ jiaançh jajty nébiøch chamñ nmädia'aguiän. Hamdsoo højts nhijxy nmädooyy. Hahixøøby jaduhñ coo højts mijts nmädia'agy xmiäbøjcät. Maas hahixøøby jaduhñ coo Diosmädia'agy hajxy mmäbøjpät, ja'a jäya'ayhajxy jecy quiujáhyäbä. Jaduhñ mäwíinädsä Diosmädia'agy miäbaady nebiä jøøn tioyyän hagoonstuum. Hix, xyajwiinjuøøyyäm hajxy jaduhñ tijaty hajxy hoy hamdsoo nga'a wiinjuø'øwáanäm. Hahixøøby jaduhñ coo hajxy homiänaajä nyajcopcøøyyämät. Coo Jesucristo yaa quiädaactägätsät hädaa yaabä naaxwiin, mänit hajxy cøxiä xyajwiinmädiaagø'øwáanäm. Jaduhñ hajxy hoy nwiinjuø'øwáanäm cøxiä.

²⁰⁻²¹ Huuc wiinjuø'øw hajxy jaduhñ, coo jäya'ayä Diosmädia'agy hajxy jecy quiujahy, cab hajxy hamdsoo yajcojy. Näje'e hajxy jaduhñ quiujahy tijaty hñajty jadáanäp tunáanäp. Ja'a Dios je'e najtscapxøøyy ja'a yhEspírituhaam waamb hajxy quiujáayät.

2

¹ Jii jäya'ayhajxy hijty näje'e jegyhajty miäna'añ cooc tyijy Dios hajxy hñajty ñajtscapxøøyyäbä. Pero høhñdaacp hajxy hñajty jaduhñ. Ja'a Dioscu'ug hajxy hñajty jia wi'i wyiinhøønaamby. Jaanä jaduhñä høhñdaacpähajxy jiiby wiäditaambä maa mgajpthajxiän. Cabä cu'ug ñajuø'øwa'añ pø wiinhøhñäp hajxy hñajty jaduhñ. Høxtä mäna'anaambä høhñdaacpähajxy jaduhñ cooc tyijy ja'a Jesucristo hajxy tøø xquia'a nähho'túutäm. Paquiä hajxy yajcumädowa'añii. Pønjetiä høhñda'agymiädia'agy mabøgaamb, tu'udägoyyaamb hajxy jaduhñ. Ja'a häna'c-hajxy jaduhñ høhñdaacpä, niyhamigähadäänäp hajxy jaduhñ.

² Pahixäänäp hajxy jaduhñ nämay. Ja'a häna'c-hajxy mabahixaamb, ja'a tyijy ja'a Diosmädia'agy hajxy mabøjpä. Coo hajxy jaduhñ hoy quia'a hida'añ, ni häna'c-hajxy høhñdaacpä, ni häna'c-hajxy mabahixpä, paadiä cu'ugä tøyhajt hajxy quia'a tsoga'añ ja'a Jesucristocøxpä.

³ Ja'a høhñdaacpähajxy, xädø'øñ hajxy piøcjuø'øwaamby. Høhñda'agymiädia'agyhaamby mijts xyajnähixø'øwa'añ; jaduhñä xädø'øñ

hajxy xjia wi'i piøgaanä. Jéquiänä Dios tiägøøyy mänaandaacpä coogä häna'c-hajxy quiumadowa'añ, ja'a hønnda'agymiädia'agy hajxy yajñähixøöbiä. Jaduhnä Dios jecy miänaandaacpä cooc hajxy quiuhdägoyya'añ.

⁴ Hix, yajcumädoobiä Dios je'e pønjaty ca'a mabøgaamb. Coo mioonsähajxy näje'e jim jecy quia'a mabøjcy tsajpootyp, paady hajxy jecy quiumädooyy. Haxøøgtuum hajxy hoy quiuhjuipnaxyii maa jiaančh tehñ quiøöcän, maa yhagoodstuumän. Jim hajxy yhida'añ høxtä coonä yhabáadät coo Dios jaduhñ miäna'anät nebiaty hajxy jii jiaac tsaačhtiuna'añii.

⁵ Jaanä jaduhñä Dios ja'a jecyjiäya'ay yajcumädoobä, ja'a hajxy jecy tøø quia'a mabøquiäbä. Mänitä Dios nøøgomdägoy quiejxy. Jayooyyā Noéhajxy choocy møødä yhuung møødä tio'oxy ja'a näductujcpä. Jaduhñä Noé ja'a cu'ug hānajtý tøø jia yajwiingapxø'øy coogä yhaxøøgcuhdujt hajxy ñajtshixø'øwät, coogä Dios hajxy wyiingudsähgø'øwät.

⁶ Jaanä jaduhñä jecyjiäya'ayhajxy jiajpä, ja'a hajxy hijty jim tsänaabiä maa cajpt hijty jaduhñ xiøhatiän Sodoma møødä Gomorra. Cabä Dios hajxy hijty ñä'ägä wiingudsähgø'øy. Paady hajxy jøønhaam yajcuhdägooyyā. Cøjxä haxøøghāna'c-hajxy yho'ogy. Haagä cujiaam hajxy jiajnä møødä quiajpthajxy. Hijxtahñd ja'a Dios jaduhñ piädaac coo haxøøgjāya'ayhajxy nägøxiä yajcumadowa'añii.

⁷⁻⁸ Mānaa Dios ja'a jecyquiajpt jaduhñ yajcuhdägoyyān, jagooyyā tul'jāya'ay yajtsoocä, ja'a hānajtý xøhajpā Lot. Paadiä Lot yajtsoocä, je'eguiøxpä coo hānajtý hoy jiāya'ayhatý. Mänitä Dios ja'a Lot yhawaanä coogä quiajpt hānajtý quiuhdägoyya'añ. Paadiä Lot jim chohñ. Jaančh tehñ jiootmayhajpā Lot hānajtý jaduhñ coo cu'ughajxy hānajtý haxøøg jiatcø'øy jabom-jabom hijxwiinduum.

⁹ Nebiä Dios ja'a Lot jecy yajtsooquiän, jaanä jaduhñä Dios ja'a quiu'ug yajtso'ogaambä coo hajxy hānajtý chaachpøcy. Tøyhajt jaduhñ. Jaanä jaduhñ tiøyhájtäbä coo Dios yajcopcø'øy nebiatiä haxøøgjāya'ayhajxy jiatcø'øyān. Jéquiänä Dios jaduhñ miānaañ cooc hajxy quiumadowa'añ. Coo jaduhñ yhabáadät, mänitä Dios miāna'ana'añ nebiaty hajxy jii chaachtiuna'añii.

¹⁰ Nägø'ø nädequiä Dios yajcumadowa'añ pøn yajnähixøøby hønnda'agymiädia'agyhaam, pønä Diosmäjaa xøøghajp. Jaančh tehñ chähdiuhñdägoy hajxy ñibiäda'agyii, ja'a hønnda'agymiädia'agy hajxy mawädijpā. Jootmøj hajxy jaduhñ ñibiäda'agyii. Cab hajxy pøn wyiingudsähgø'øy. Haa jaaya'ayhajxy mõjtuungmøødpä maa Diosmädia'agy myññānā, wiingapxpéjtäp hajxy je'ebä.

¹¹ Haa ja'a Diosmoonsähajxy jim hijpā tsajpootypä, maas mõcmäjaa hajxy miøødä quejee ja'a hønnda'agymiädia'agy hajxy mawädijpā. Pero cabä Diosmoonsä ja'a mõjtuungmøødpä hajxy wyiingapxpety maa Dioswiinduumän; ni cab hajxy ñähojy.

¹² Jaduhñä hønndaacpähajxy ñibiäda'agyii nebiä yuughanimalän coo hajxy tii quia'a wiinjuø'øwa'añ ja'a Dioscøxpä. Hix, cabä yuughanimalhajxy tii wyiinjuaø'øy ja'a Dioscøxpä. Mädyijjatiä hønndaacpähajxy quia'a wiinjuøøby, je'e hajxy ñäxiicypy. Paquiä hajxy yajcuhdägoyya'añii nebiä animalhajxy paquiä quiuhdägoyyān coo hajxy yagho'ogyii.

¹³ Tsaačhtiunānābä hønndaacpähajxy jaduhñ je'eguiøxpä coo hajxy hānajtý tøø miädsaačhtiunñ. Xoonäacp hajxy jaduhñ coo hajxy cøxypänejpä jiatcø'øy xøømbaady. Høxtä jiiby hajxy yajtägø'øy maa mijts naxy mgaamiuquiän ja'a Jesucristocøxpä. Ja'a Jesucristo miädiä'aguiäc tyijy hajxy pianøcxäp. Pero haxøøgjaty hajxy wyi'i jiatcø'øy mijts mwiinduum maa hajxy hānajtý mgaamiuquiän. Høxtä jiibypiaady hajxy je'e yhønndaacpä.

¹⁴ Homiädyii to'oxiøjcä hajxy jaduhñ yhixy, yhadsojpy hajxy jaduhñ. Homiänaajä hajxy jaduhñ haxøøg jiatcø'øwa'añ. Wyiinhøhmby hajxy pønjetiä Diosmädia'agy hoy ca'a habøjpnä. Hadsojwiinmahñdy hajxy ñä'ägä yaj-tuumby. Tsipcøxp hajxy jaduhñ ñä'ägä cumädowa'añ.

¹⁵ Tøø tødiu'u hajxy jiojwa'ačh. Tøø hajxy jaduhñ tiu'udägoy. Ja'a Balaam hajxy jaduhñ piahijxyp, ja'a Beor yhuung. Jeguiajtiä Balaam hñajty quiudi-una'añ ja'a quia'awiindøguiøxpä møødä xädø'øñguiøxpä.

¹⁶ Mänitä Balaam wyiinhojnajxä tiic jaduhñ coo jiatcø'øwa'añ. Ja'a møjc burra jaduhñ mähoj. Jaduhñ quiapxy nebiä jäya'ayän. Mänitä Balaam ñajuøøñä coo jaduhñ quia'a hoyyä. Jaduhñä burra miädia'agy miäbøjcäxä.

¹⁷ Yø'ø häna'cä høhnda'agymiädia'agy hajxy mäwädiipä, jaduhñ mäwiin hajxy miäbaady nebiä nøøjut tøø tiø'øčhpän. Jaduhñ mäwiin hajxy miäbaatpä nebiä joc piojwäditypän coo hñajty quia'a nä'ägä tu'uy. Hix, cabä tøyhajt hajxy ñä'a yajñähixø'øy. Cøjxta'axiøø hajxy jiiby yhida'añ maa haxøøgtuumän. Ja'a Dios jaduhñ mänaañ cooc hajxy jiiby yhida'añ.

¹⁸ Yoñ hajxy jia mädia'agy. Ja wi'i yajcumayaamb hajxy jaduhñ. Pero cabä miädia'agy hajxy choobaady. Ja'a høhnda'agymiädia'agyhaam hajxy wyiinhøøñ pønjetiä Diosmädia'agy naamdägø'øy habøjp. Jøjcapxøøyyäp hajxy jaduhmbä, ween hajxy haxøøg jiatcøøguiumbä neby hajxy hijty jiatcø'øyän.

¹⁹ Jaduhñä høhndaacpähajxy yajñähixø'øy cooc tyijy quia'a nejpiä coo haxøøg mjäya'ayhädät. Hix, jaduhñ hajxy yajñähixøøbiä cooc tyijy ja'a Dios hajxy xquia'a hanéhmänä coo jecymiädia'agy hajxy ngudiüunämät, jaduhñ jia mänaambä cooc hajxy hoy njäya'ayhajtämät. Jaduhñ hajxy yhøhndaacpä cooc tyijy hajxy jaduhyyä nnähwáatsäm. Ni je'e hajxy tøø quia'a nähwa'ačh je'eguiøxpä coo yhaxøøgwiinmahñdy hajxy tøø quia'a najt-shixø'øy. Paady hajxy nøcxy quiuhdägoyyaannä. Jaanä jaduhñ højtshajtämbä, coo nhaxøøgwiinmahñdy hajxy nga'a najtshixøøyyämät, jaduhñ højts nøcxy nguhdägoyyaanämbä.

²⁰ Coo Jesucristo hajxy njøjpøgøøyyäm, ja'a hajxy nWiindsønähjtämbä, paadiä nhaxøøgwiinmahñdy hajxy xyajñähwáatsäm, neby hajxy yaa nmøødhajtäm hädaa yaabä naaxwiin. Pero, coo Jesucristo miädia'agy mjahdiägóoyyät, y coo mhaxøøgwiinmahñdy jadähooc mbadu'ubögät, maas haxøøg jadähooc mjada'añ.

²¹ Hix, pønjetiä Diosmädia'agy jaduhñ jahdiägooby, maas hoy haxøpy coo hajxy cu quia'a mäbøjcy. Hix, coo hajxy jaduhñ yhøxhíxät, maas hanaxiä hajxy jaduhñ quiumädowa'añ.

²² Jaduhñ hajxy jiädät nebiä hädaa mädia'agy miäna'añän: "Ja'a huc-hajxy, coo hajxy yhøøčh, ja'a yhamdsoo høøčh hajxy ñäwiimbijpy, nøcxy hajxy jadähooc jiøø'xø'øgy. Jaanä jaduhñä hädsømhajxy jiatcøøbiä, naamñä hajxy hñajty tøø chi'iy, mänit hajxy jadähooc nøcxy yajtsnä tiøø'pnä mo'ondsooty." Tøyhajt jaduhñ.

3

¹⁻² Mägu'ughajpädøjc, miämetsc-hoocpä mijts cham nnäjaayø'øy. Jaduhñ mijts cham miämetsc-hoocpä nmägapxy nhane'emy coo mädia'agy hajxy mjahmiejtstä'agät, ja'a Diosquexypähajxy jecy quiujähyyäbä. Jaduhñä howyi-inmahñdy hajxy mmøødhädät. Huuc jahmiets hajxy jaduhmbä nebiatiä Jesucristo hajxy xmiägapx xyhanéhmäm. Jaaya'ay hajxy tøø xñähho'túutäm, paady hajxy nWiindsønähjtäm. Ja'a Jesucristo quiugapxyhajxy, je'e mijts tøø xyhawaanä nebiatiä Jesucristo hajxy tøø xmiägapxy tøø xyhane'emy.

³ Naxy hädaa mädia'agy hajxy mdehm wyiinjuø'øwät nébiøch cham nmädia'aguiän. Coo naaxwiimbä hñajty wyiimbida'añ, mänitä jäya'ayhajxy

quiähxø'oga'añ coo Dios hajxy ñänøma'añ. Haxøøg hajxy jiatcø'owa'añ nebi-atiä yhamdsoo joot hajxy hānajt chocy, neby hajxy hānajt ñä'ägä cuhdu-jthatiän. Xñäxi'igaamb mijts jaduhñ.

⁴ Jaduhñ hajxy miäna'ana'añ: “Cab jaduhñ tiehm tiøjiada'añ coo Jesucristo wyiimbijtagatsa'añ neby jaduhñ tøø yhuuc mänaambä. Hix, caj tii mänaa tiägach. Je'enä cøxiä wiinä jaduhñ yhityñä mänaa naaxwiimbä jecy yhawijy tiøø'xta'aguiän, mänaa jecyjiäya'ayhajxy yho'oguiän”, nøm hajxy yhøhnda'aga'añ.

⁵ Pero tøyhajt jaduhñ coo naaxwiimbä jiaančh tägach. Pero ja'a hønndaacpähajxy, cabä tøyhajt hajxy wyiinjuø'owa'añ. Hix, haagä nøø hijty jegyhajty. Mänitä Dios ja'a tsajt jecy yhädiuun møødä naaxwiin. Jiibiä naaxwiimbä yajcojy nøøjooty. Mänit hoy piäda'agy nøøhagujc.

⁶ Mänitä Dios nøøgomdägoy cujecy quiejxy. Mänitä naaxwiimbä quiuhdägooyy. Cøjxä jäya'ayhajxy yho'ogy.

⁷ Ja'a tsajt møød hädaa yaabä naaxwiin, tøø Dios jaduhñ yajnähdiy coo quiøxy toya'añ. Mänitäc jaduhñ tioya'añ coo Dios ja'a jäya'ay yajcuhdägoyya'añ, ja'a Diosmädia'agy hajxy ca'a mæbøjpä.

⁸ Mägu'ughajpædøjc, tsøc hajxy jahmiéjtsäm coo Dios tu'xøø jaduhñ ñänømy jadu'miljomøjtpä; y jadu'miljomøjtpä, tu'xøøyyä jaduhñ ñänømy.

⁹ Näje'e jäya'ayhajxy miäna'añ cooc tyijy ja'a Jesucristo quia'a tsoj yajtøjiada'añ coo yaa quiädaactägatsa'añ, coo haxøøgjäya'ayhajxy yajcumädowa'añii. Pero cab jaduhñ tiøyyä neby hajxy jaduhñ jia wi'i yhøhnda'agy. Hix, mee'xtujpä Jesucristo ja'a mijtsøxpä. Cabä jioot chocy coo pøn quiuhdägóyyät. Jaduhñä jioot jia tsocy coo haxøøgcuhdujt hajxy nnajtshixøøyyämät.

¹⁰ Jaguiapxy yhabaada'añ coo Jesucristo yaa quiädaactägatsa'añ, coo haxøøgjäya'ayhajxy yajcumädowa'añii. Cabä pøn jaduhñ ñajuø'øy mänaa jaduhñ jiaančh habaada'añ. Mänitä tsajt quiuhdägoyya'añ. Jaduhñ yajmädowa'añ nebiä hānee møc ya'axiän. Cøxaambä xøø tioya'añ, møødä po'o, møødä madsa'a, møødä naaxwiimbä, møød tijaty yaa hijp hädaa yaabä naaxwiin.

¹¹ Coø cøxiä wiinä jaduhñ quiuhdägoyya'añ, paady hajxy tsøc hoy jäya'ayhajtäm. Tsøcxä Dios hajxy hoy wiingudsähgøøyyäm. Tsøcxä Diosmädia'agy hajxy hoy cudiuunäm.

¹² Tsøc hajxy jøbhíxäm coo Jesucristo yaa quiädaactägatsa'añ. Mänitä Dios ja'a tsajt yajtoya'añ, møødä xøø, møødä po'o, møødä madsa'a, møødä naaxwiimbä. Tsøgä jäya'ayä Diosmädia'agy hajxy yajmøødmädiäacäm nämay, ween hajxy miäbøcy; jaduhñä Dios paquiä yaghabáadät.

¹³ Tøø Dios jaduhñ miäna'añ coogä hawiinjemyčhajt yhädiuna'añ, møødä hawiinjemyñaaxwiin. Jimä njoot hajxy nbädäacäm coo Dios hajxy jim xyajnøcxäänäm. Cabä haxøøgpä jaduhñ jim mänaa tiägø'owa'añ maa ja'a hawiinjemybiä tsajtän, ni jim maa hawiinjemybiä naaxwiimbän.

¹⁴ Mägu'ughajpædøjc, tøyhajt jaduhñ coo Dios hajxy jim xpiäda'agáanäm, paadiä haxøøgpä hajxy tsøc najtshixøøyyäm hamuumdu'joot; jaduhñä Jesucristo hajxy xpiäatämät coo pojpa cädieey hajxy hānajt nga'a møødhajtäm, coo yaa quiädaactägätsät. Tsøc hajxy jootcujc nimiøødhajtäm nebiä tu'ugpuhya'ay nebiä tu'ugpuhdo'oxypän. Jaduhñä Dios hajxy hoy xyhíxämät coo hajxy hānajt hoy nduunäm.

¹⁵ Mjahmiédsäp hädaa mädia'agy hajxy jaduhñ. Paadiä Jesucristo jaduhñ miee'xtucy, weenä jäya'ayhajxy may miäbøcy, ween hajxy jaduhñ may ñähwa'ačh. Ja'a mägu'ughajpæ Pablo, jaduhñ mijts tøø xñäjaayøøbiä. Ja'a Dios

ja'a tøyhajt najtscapxøøyyä. Ja'a tsipjatypä ja'a Dios ja'a Pablo yajwiinjuøøyy. Jadúhñhøchä Pablo njuø'øyy nébiøchä nhamdsoo puhya'ayän.

¹⁶ Naaghooc mijtsä Pablo xñäjaayø'øyy, jaduhñ ñä'ägä mädia'agyhaty nébiøch cham njaayän. Tsipjatiä Pablo siémpräm miädia'agy. Ja'a häna'cä tøyhajt hajxy ca'a tsojpä, wiingä Pablo miädia'agy hajxy yajnähixøøyyä. Cab hajxy jaduhñ yajnähixø'øyy nebiä Pablo jia mänaañän. Wiingatiä Diosmädia'agy hajxy yajnähixø'øyy. Cabä tøyhajtpä hajxy miäbøga'añ. Paady hajxy quiuhdägoyya'añ.

¹⁷ Mägu'ughajpädøjc, mnä'ägä najuøøby hajxy jaduhñ coo hønndaacpähajxy jii wiädita'añ. Cabä tøyhajt hajxy chocy. Haxøøg hajxy jiaančh tehñ jiäya'ayhaty. Mnigwieendähadøøjäp hajxy; jaduhñä tøyhajt hajxy mga'a najtshixø'øwät. Cab hajxy myajwiinhøønät coo hajxy jaduhñ mnä'ä tu'udägóyyät.

¹⁸ Jaac habøcxä hajxy jaduhñ ja'a Jesucristocøxpä, ja'a hajxy nWiindsøn hájtämbä. Jaaya'ay hajxy xñähho'túutäm. Tehñgajnä miädia'agy hajxy mmäbøjcät; jaduhñä mayhajt møj may tiúnät ja'a mijtscøxpä. Tsøc hajxy homiänaajä capxpáatäm møj jaančh. Tsøc hajxy tehñgajnä wiingudsähgøøyyäm. Amén.

1 Juan

¹⁻³ Jue'e hõjts mijts nyajnájaayøøby, ja'a Jesucristo. Dioshuung je'e. Jíiyyäm je'e hánajty møødä Dios mänaa hädaa yaabä naaxwiin yhawijy tiøø'xta'aguiän. Jaayá'ayäts hajxy xyhawáanäm nebiä Dios wyiinmay. Jaayá'ayäts hajxy tøø xñähho'túutäm neby hajxy jaduhñ njugyhájtämät nebiä Dios jiugy-hatiän cøjxta'axiøø. Tøø hõjts nhamdsoo hixy; tøø hõjts nhamdsoo mädoy. Tøø hõjts nnähdoñ cø'øhaam. Tøyhajt jaduhñ. Paady hõjts mijts jaduhñ nhawáanäm neby hajxy jaduhñ nhíjtämät tu'ugmädia'agy, neby hõjts ja'a Dios xmiøødhitiän tu'ugmädia'agy møødä yHuung.

⁴ Paady jaduhñ nhawáanäm neby hajxy jaduhñ jootcuje nhíjtämät tehñgajnä.

⁵ Hoyyä Dios ja'a wyiinmahñdy; cabä pojpa cädieey ñä'ägädä møødä. Jaduhñ hõjts ja'a Jesucristo tøø xyhawaanä, y jaduhñ mijts nhawaandägátsäm.

⁶⁻⁹ Coø hajxy hoy nwädíjtämät nebiä Dios yhitiän, tu'ugmädia'agy hajxy jaduhñ nhíjtämät, je'eguiøxpä coø ja'a Jesucristo hajxy tøø xñähho'túutäm ja'a nbojpa ngädieeyhájtäm cøxiä. Xyajnähwáatsäm hajxy jaduhñ coø ja'a nbojpa ngädieey hajxy nnägápxämät. Tøyhajt jaduhñ. Cabä Dios yhøhnda'agy. Howyiinmahñdy je'eduhñ miøød. Pero coø hajxy nwädíjtämät haxøøgtuum, cabä Dios hajxy nmøødhíjtämät tu'ugmädia'agy. Høhndaacäm hajxy jaduhñ y cabä tøyhajt hajxy nnä'ägädä møødhájtäm.

Jaanä jaduhñduhmbä, coø hajxy nnä'ä mänáanämät cooc tyijy pojpa cädieey hajxy nga'a møødhájtäm, niwyiinhøhñäm hajxy jaduhñ,

¹⁰ y cabä Dios miädia'agy hajxy nmøødhájtäm, ja'a tøyhajt. Coø hajxy jaduhñ nmänáanämät, jaduhñ yajmadowa'añ cooc tyijy ja'a Dios yhøhnda'agy. Hix, je'e jaduhñ mänaamb coø pojpa cädieey hajxy nmøødhájtäm.

2

¹ Mägu'ughajpädøjc, cáboch njoot chocy coø hajxy haxøøg mjatcø'øwät. Páadyhøch mijts hädaa nocy nyajnájaayøøy. Coø pøn jaduhñ jiatcø'øwät, nähgapxtu'udøøjap je'e Jesucristäm jím maa Diosän. Cabä Jesucristo pojpa cädieey mänaa miøødä.

² Tøø ja'a nbojpa ngädieey hajxy xñähho'túutäm nägøxiä hädaa yaabä naaxwiin.

³ Coø hajxy ngudiúunämät nebiä Dios hajxy xyhanéhñäm, mänitä tøyhajt hajxy nmøødhájtämät coø je'e hajxy nhixyhájtäm.

⁴ Pøn jaduhñ nä'ä mänaamb: "Nhixyhájpøch je'e", hoy quia'a ja cudiuñ, høhndaacp je'eduhñ. Hix, ja'a Diosmädia'agy je'eduhñ quia'a tsojpy. Tøyhajt je'e.

⁵ Pero pøn jaduhñ cudiumb, cähxø'p jaduhñ coø ja'a Dios jiaançh tehñ jiahmiech. Jaduhñ hajxy nyajnajuøøyyämät coø hajxy nmøødhíjtäm tu'ugmädia'agy.

⁶ Pøn jaduhñ mänaamb coø ja'a Dios miøødhity tu'ugmädia'agy, tsipcøxp wiädítät nebiä Jesucristo hijty wiäditiän.

⁷ Hädaa mädiä'agyhøch cham nyajnähixøøbiä, tøø hajxy hijty mmädoy mänaa hajxy mmäbøjtsooñän.

⁸ Pero hädaa mädia'agy jaduhñ, jaduhñ mäwíinäts hädaa nebiä hawiin-jemybiän. Hix, jaduhñ hajxy mniçhocy mnibia'häyoyii nebiä Jesucristo hajxy xchójcäm. Tøyhajt jaduhñ. Coø ja'a Jesucristo yaa tøø yhoy hädaa yaabä

naaxwiin, mänitā homiädia'agy hajxy xyajwiinjuóøyyänä. Cab hajxy jaduhñ nwädíjtänä hagoonstuum.

9-11 Pøñ ja'a y'hermano tsojp pa'häyoob, hoyyā Diosmädia'agy jaduhñ quiudiuñ. Coö hajxy jaduhñ ngudiúnämät, cab hajxy ngädiéhyämät. Pero pøñ ja'a yhermano mähanhajp, hoy jia mäna'añ coö tyijy quiudiuñ ja'a Diosmädia'agy, je'enä wiädity hagoonstuum. Jaduhñ wiädity nebiä wiindspän. Cab jaduhñ ñä'ägä niyaghoyø'oyii.

12-14 Hermanodøjc, mίjtshøch hädaa nocy nyajnäjaayøøby. Mhixyhajpiä Dios hajxy, ja'a nDeedyhajtäm. Jaaya'ay ja'a nbojpä ngädieey hajxy tøø xyajnähwäatsäm je'eguiøxpä coö ja'a Jesucristo hajxy tøø xñähho'túutäm. Mijts majjäya'adiøjc, mhixyhajpiä Jesucristo hajxy jaduhñ. Jíyyäm jaaya'ay hānajt mānaa hädaa yaabä naaxwiin yhawijy tiøø'xta'aguiän. Y mijts muutsc-hāna'c-hajxy, xmioobiä Dios ja'a mājaa hajxy coö ja'a Diosmädia'agy hajxy tehngajnā mbanøcxy. Cabä møjcu'ugong hajxy tøø myajmäjäda'agy.

15 Cabä mjoot hajxy mbädä'agät hädaa yaabä naaxwiin. Coö pøñ jaduhñ piädä'agät, cabä Dios hoy jiahmiédsät, ja'a nDeedyhajtäm.

16 Ja'a møjcu'ugong jaduhñ mänaamb coö hajxy cøxiä wiinä nhadsójcämät hädaa yaabä naaxwiin, ja'a haxøøgpä. Jaanä jaduhñ miänaambä coö hajxy nyajcumäyyämät. Pero cabä Dios jaduhñ miäna'añ.

17 Cuhdägoyyaamb hädaa yaabä naaxwiin møødä haxøøgpä yaabä. Pero pøñ cudiumb nebiä Dios miäna'añän, cab jaduhñ mänaa quiuhdägoyya'añ. Jim yhida'añ maa ja'a Diosän cøjxta'axiøø.

18 Hoorä, habáatnäp jaduhñ coö ja'a naaxwiimbä wyiimbida'añ. Tøø hajxy mmädoyhaty coö ja'a Cristo miädsip quiähxø'øga'añ. Y tøø ja'a miädsiphajxy may quiähxø'øgy. Jaduhñ hajxy nyajnajuóøyyäm coö yhabaatnä.

19 Xmiøødhíjtäm ja'a Cristo miädsiphajxy hijty. Pero coö hajxy tøø xpiuhwäatsäm, cāhxø'p jaduhñ coö hajxy hijty tehñ tiøyhajt xquia'a møødhíjtäm hamuumdu'joot. Coö hajxy häxøpy hijty xmiøødhíjtäm, cab hajxy häxøpy tøø xpiuhwäatsäm.

20-21 Pero mijts, ja'a Jesucristo hajxy tøø xyajnäguexy ja'a Dios yhEspíritu. Mmøødhajpiä tøyhajt hajxy jaduhñ cøxiä. Paady mijts hädaa nocy nyajnäjaayøøby. Y mnajuøøby hajxy coö ja'a tøyhajt hajxy quia'a møødä, ja'a hāna'c hōhñdaacpāhajxy.

22 Je'eduhñ ñänøømby, pøñ jaduhñ mänaamb coö tyijy ja'a Jesús tøø quia'a quexyii ja'a Diósäm. Ja'a Cristo miädsip je'e, pøñ jaduhñ ca'a capxpäatp ja'a Dios møødä yHuung.

23 Pøñä Dios yHuung jaduhñ capxpäatäp, miøødhijpiä Dios je'e. Pero pøñä yHuung jaduhñ ca'a capxpäatäp, cabä Dios jaduhñ miøødhity.

24 Mgudiúnäp ja'a Diosmädia'agy hajxy tehngajnā neby hajxy mbanøcxtsohñän. Coö hajxy jaduhñ mgudiúnät, mänitā Dios hajxy tehngajnā mmøødhidät tu'ugmädia'agy møødä yHuung.

25 Y cøjxta'axiøø hajxy xyagjugyhadāanām neby je'e jiugyhatiän neby hajxy tøø xyajwiinwaanøøyyäm.

26 Naxy hajxy mdehm wyiinjuó'øwät coö mijts ja'a Cristo miädsiphajxy xjia wi'i wyiinhøøna'añ.

27 Mijts, cabä yajnähixøøbiä hajxy myajmaajiaty. Mmøødhajpiä Diosh-espíritu hajxy. Xyajnähixøøbiä tøyhajt hajxy cøxiä. Cab yhōhñda'agy. Mmøødhidäp hajxy jaduhñ tu'ugmädia'agy neby hajxy tøø xyajnähixø'øyän.

28 Hoorä, tu'ugmädia'aguiä Jesucristo hajxy mmøødhijnät neby hajxy jaduhñ mga'a tsähdiúnät coö quiädaactägätsät.

²⁹ Mnajuøøby hajxy coo ja'a Jesucristo pojpa cädieey quia'a mөөдä. Jaduhn hajxy mnajuøøbiät coo ja'a Dios yhuunghaty pønjaty hoy wädijp.

3

¹ Xjiaančh tehñ chójcām ja'a Dios hajxy. Hamuumdu'joot hajxy xyhuunghátām. Tøyhajt jaduhn. Pero cabä jäya'ay hajxy xñajuøøyyām coo ja'a Dios hajxy xyhuunghátām. Hix, cabä Dios hajxy yhixyhaty.

² Hoorä, tөө ja'a Dios hajxy xyhuunghátām. Cahnä yajnajuø'øy neby hajxy xyaghidäänām. Pero coo ja'a Jesucristo quiädaactägätsät, nnajuøøyyām hajxy coo hajxy jaduhn nhidäänām neby je'ejän. Nhixäänām hajxy jaduhn neby jaduhn yhitiän.

³ Pøn hamuumdu'joot mäßøjp, hoy jaduhn wiädity nebiä Jesucristo hoy yhitiän.

⁴ Pøn haxøøg jatcøøby, cabä Diosmädia'agy quiudiuñ. Je'e jaduhn xøhajp ja'a haxøøgpä coo ja'a Dios miädia'agy mga'a cudiüñät.

⁵ Paadiä Jesucristo yaa tөө yhoy hädaa yaabä naaxwiin nebiä nbojpa ngädieey hajxy xyajnhwäatsämät. Pero cab jaaya'ay pojpa cädieey ñä'ägädä mөөдä. Tøyhajt jaduhn.

⁶ Pønä Jesucristo tu'ugmädia'agy mөөdhijp, cab jaduhn haxøøg jiatcø'øy. Pøn jaduhn jatcøøby, cabä Jesucristo miädia'agy ñä'ägädä mäßøjcä.

⁷ Mägu'ughajpädøjc, cab hajxy myajwiinhöönät. Pøn hoy wädijp, cabä pojpa cädieey ñä'ägä mөөдä, nebiä Jesucristo quia'a mөөдän.

⁸ Pøn hoy ca'a wädijp, pianöcxäp je'e ja'a möjcu'ugongä miädia'agy. Homiänaajä ja'a möjcu'ugong haxøøg jiatcø'øy. Mänit jiatcøöchohñ mänaa hädaa yaabä naaxwiin yhawijy tiөө'xta'aguiän. Paadiä Dios yHuung yaa tөө yhoy, nebiä möjcu'ugong jaduhn quia'a mäjädä'agät.

⁹ Pønä Dios tehñ tiøyhajt Teedyhajp, cabä jioot chocy coo jaduhn jiatcø'öwät, je'eguiøxpä coo je'e miөөdhidyíijäm ja'a Diósäm. Coö je'e Dyios yhuungä, paady haxøøg quia'a jatcø'øy.

¹⁰ Jaduhn myajnajuø'öwät pøn Dioshuung. Entonces, pøn hoy ca'a wädijp, pønä miägu'ughajpä ca'a tsojp ca'a pa'häyoob, ca'a Dyios je'e yhuungä. Pero pianöcxäp ja'a möjcu'ugongä miädia'agy je'e.

¹¹ Mänaa ja'a Diosmädia'agy hajxy mmäßøjtsooñän, jaduhn hänäjty miäna'añ coo hajxy nničojc nnibia'häyóowämät. Høxtä jäda'anäbaadyñä jaduhn miäna'aññä. Cab jaduhn mänaa tiägach.

¹² Cab hajxy njatcøøyyämät nebiä Caín jecy jiatcøøyyän coo yhamdsoo puhya'ay yagho'cy. Paady jaduhn yagho'cy coo howyiinmahñdy hänäjty quia'a mөөдä, nebiä piuhya'ay howyiinmahñdy hänäjty miөөдän. Hix, pianöcxäp ja'a möjcu'ugongä miädia'agy hänäjty je'e.

¹³ Entonces, hermanodøjc, cab hajxy myagjuø'öwät coo häna'c hajxy xmiähanhátām.

¹⁴ Højtshátām, cøjxta'axiøø hajxy jim nhidäänām tsajpootyp. Cab hajxy mänaa jiiiby nhäda'agø'öwäänäm haxøøgtuum. Nmөөdhátām ja'a tøyhajt hajxy jaduhn je'eguiøxpä coo hajxy hamiñ haxøpy nničojc nnibia'häyóowäm. Pønä miägu'ughajpä ca'a tsojp ca'a pa'häyoob, je'eds jiiiby häda'agø'öwaamb haxøøgtuum.

¹⁵ Pønä miägu'ughajpä mähanhajp, jaduhnä wyiinmahñdy je'e nebiä jäya'ay-yagho'pan. Y cabä jäya'ay-yagho'pahajxy cøjxta'axiøø jiugyhada'añ nebiä Dios jiugyhatiän. Tøyhajt jaduhn.

¹⁶ Coo ja'a Jesucristo hajxy tøø xñähho'túutäm, jaduhnä tøyhajt hajxy nmøødhájtäm coo ja'a Dios hajxy xjiaanč tehñ chójcäm. Hawiinmats hit jaduhn coo hajxy hamiñ haxøpy nniñähho'túutämät.

¹⁷ Coo ja'a mäyøøjäya'ay ja'a häyoobä quia'a näxúudsät, cab jaduhn quiudiuñ nebiä Dios hajxy xyhanéhmäm coo hajxy hamiñ haxøpy nniçhojc nnibia'häyóowämät.

¹⁸ Mägu'ughajpädøjc, tsøgxä hajxy hamuumdu'joot niñäxúu'tsä. Jaduhn hajxy nyajcähxø'cämät coo hajxy hamuumdu'joot nniçhojc nnibia'häyóowäm. Coo hajxy nga'a niñäxúu'tsä, cab jaduhn tiuna'añ coo hajxy nja mänáanämät cooc tyijy hajxy nniçhojc nnibia'häyóowäm.

¹⁹ Hermanodøjc, coo hajxy hamuumdu'joot nniçhojc nnibia'häyóowämät, jaduhnä tøyhajt hajxy nmøødhájtäm coo ja'a Dios hajxy xyhuunghájtäm.

²⁰ Y coo ja'a njoothajxy hamdsoo miánáanämät cooc tyijy hajxy hoy nga'a jäya'ayhájtäm, tsipcøxp ja'a Diosmädia'agy hajxy nmäbøjcämät. Cabä nhamdsoo wiinmahñdyhajxy nyajcopcøøyyämät. Hix, xjiiodhíxäm ja'a Dios hajxy. Cøxiä hajxy xñajuóøyyäm.

²¹ Y coo ja'a njoothajxy waamb quia'a mänáanämät, jaduhnä tøyhajt hajxy nmøødhájtäm coo ja'a Dios hajxy xyhuunghájtäm.

²² Xmióøyyäm ja'a Dios hajxy tijaty hajxy nmäyujwáanäm, je'eguiøxpä coo hajxy ngudiúunäm nebiaty hajxy xyhanéhmäm. Paady hajxy xquiumáayyäm.

²³ Jaduhnä Dios hajxy xyhanéhmäm coo ja'a yHuung Jesucristo miädia'agy hajxy nmäbøjcämät, coo hajxy hamiñ haxøpy nniçhojc nnibia'häyóowämät, nebiä Jesucristo hajxy hamdsoo tøø xyajwiingapxøøyyäm.

²⁴ Pønä Dios miädia'agy cudiúunäp, tu'ugmädia'aguiä Dios jaduhn miøødhity. Y jaduhnä tøyhajt hajxy nmøødhájtäm coo ja'a Dios hajxy tu'ugmädia'agy xmiøødhíjtäm, je'eguiøxpä coo ja'a yhEspíritu hajxy tøø xyajnäguéjxäm. Ja'a yhEspirituhaam hajxy xyhawáanäm coo hajxy tu'ugmädia'agy xmiøødhíjtäm.

4

¹ Hermanodøjc, nämayyä hønndaacpähajxy jii wiädity. Cabä tøyhajtpä hajxy ñä'ägädä yecy. Entonces, cabä hoñä'a mädyii mädia'aguiä hajxy mmäbøgät nä'a nägoobä. Pero jawyiin hajxy mhuuc mädia'agyhíxät pø Diosmädia'agy jiaanč møød.

² Jaduhnä tøyhajt hajxy mmøødhádät pø Diosmädia'agy jiaanč møød. Pø mänáamb jaduhn cooc ja'a Dios yHuung Jesucristo tøø jiaanč jäya'ayhaty hädaa yaabä naaxwiin, pues Diosmädia'agy jaduhn jiaanč møød.

³ Pero pø cab jaduhn miäna'añä, cabä Diosmädia'agy miøødä. Ja'a Jesucristo miädsip miädia'agy jaduhn. Tøø hajxy mmädoyhaty coo ja'a miädsip yaa quiähxø'øga'añ hädaa yaabä naaxwiin. Bueno, yaadsä miädia'agy jaduhn wiädiñä hädaa yaabä naaxwiin.

⁴ Pero mijts, ja'a Dios hajxy xyhuunghajp. Tøø hajxy mga'a yajmäjäda'agy ja'a häna'c yø'øduhmbä hønnda'agymiädia'agy yajwädiñp. Hix, maas mäjaamøødä Dios quejee ja'a møjcu'ugong miøødä, ja'a yaa hanehmbä hädaa yaabä naaxwiin.

⁵ Yø'ø hønndaacpähajxy jaduhmbä, ja'a møjcu'ugong miädia'agy hajxy quiudiúunäp; paadiä møjcu'ugongä miädia'agy hajxy miädiaacä. Y paadiä miädia'agyhajxy yaa yajcopcøøyyäxä hädaa yaabä naaxwiin.

⁶ Pero højts, ja'a Dios hajxy xyhuunghájtäm. Y cab pøn nmädia'agyhajxy xyajcopcø'øwáanäm. Jagooyyä hajxy yajcopcø'øwa'añ pønä Diosmädia'agy mäbøjp. Jaduhnä tøyhajt hajxy nmøødhájtäm pøn tøyhajt Dioshuung. Pønä

nmädia'agyhajxy xyajcopcööyyäm, Dioshuung je'e. Pøn jaduhñ xquia'a mädóowäm, ja'a mõjcu'ugongä miädia'agy jaduhñ quiudiúunäp.

⁷ Hermanodøjc, tsøg hajxy tehngajnä niçhojc nibia'häyóowäm hamiñ haxøpy, je'eguiøxpä coo ja'a Dios hajxy xchójcäm.

⁸ Pero pøn xquia'a tsojc xquia'a pa'häyóowäm, cabä Diosmädia'agy miäbøcy. Xchójcäm ja'a Dios hajxy jaduhñ. Jaduhñ miäna'añ coo hajxy nniçhojc nnibia'häyóowämät.

⁹⁻¹⁰ Coo ja'a Dios hajxy xchójcäm, paadiä Dios ja'a yHuung Jesucristo hajxy yaa tøø xyajnäguéjxäm hädaa yaabä naaxwiin, neby hajxy jaduhñ xñähho'túutämät ja'a nbojpä ngädieyhájtäm, neby hajxy jim nhíjtämät tsajpootyp cøjxta'axiøø. Ca'a jie'eguiøxpä coo ja'a Dios hajxy njahmiéjtsäm.

¹¹ Coo ja'a Dios hajxy xjiaançh tehñ chójcäm, paady hajxy hamiñ haxøpy nniçhojc nnibia'häyóowämät.

¹² Tøyhajt jaduhñ, cabä Dios mänaa yhixyii. Pero cab jaduhñ ñejpiä. Hoyyä Dios hajxy mänaa nga'a híjxäm, coo hajxy hamiñ haxøpy nniçhojc nnibia'häyóowämät, jaduhñä tøyhajt hajxy nmøødhájtäm coo ja'a Dios hajxy homiänaajä xcwieendähájtäm. Y coo ja'a Dios hajxy xchójcäm, maas hoy hajxy nniçhojc nnibia'häyóowäm.

¹³ Bueno, coo ja'a Dios ja'a yhEspíritu hajxy tøø xmióoyyäm, jaduhñä tøyhajt hajxy nmøødhájtäm coo hajxy nmøødhájtäm tu'ugmädia'agy.

¹⁴ Y hamdsoo ja'a Jesucristo hajxy tøø nhíjxäm mänaa ja'a Dios yaa tøø quiexiän, mänaa hajxy tøø xñähho'túutäm. Tøyhajt jaduhñ.

¹⁵ Pøn jaduhñ mänaamb cooc ja'a Jesucristo Dyioshuungä, tu'ugmädia'agy ja'a Dios jaduhñ miøødhity.

¹⁶ Jaduhñä tøyhajt hajxy nmøødhájtäm coo ja'a Dios hajxy xchójcäm. Nmäbøjcäm hajxy jaduhñ. Xchójcäm ja'a Dios hajxy jaduhñ, paadiä Dios tu'ugmädia'agy miøødhity pøn homiänaajä jahmiejtsp ja'a Dios.

¹⁷ Coo ja'a Jesucristo hajxy xchójcäm, maas hoy hajxy nniçhojc nnibia'häyóowämät hädaa yaabä naaxwiin. Y coo hajxy jaduhñ nniçhojc nnibia'häyóowämät, cab hajxy jaduhñ ndsähgøøyyämät mänaa ja'a Jesucristo min chaaçhtiuna'añän ja'a hajxy ca'a mabøjpä.

¹⁸ Pønä Dios hamuumdu'joot ca'a jahmiejtsp, tsähgøøby je'eduhñ je'eguiøxpä coo yajcumädowa'añii. Pero coo ja'a Dios hajxy hamuumdu'joot njahmiéjtsämät, cab hajxy jaduhñ nnä'ägä tsähgøøyyämät. Hix, pøn jaduhñ tsähgøøby, cähxø'p jaduhñ coo ja'a Dios hamuumdu'joot quia'a jahmiech.

¹⁹ Jayøjpä Dios hajxy xchójcäm, paady hajxy jaduhñ njahmiejtsägájtsäm.

²⁰ Pøn jaduhñ nä'a mänaamb: "Njahmiéjchpøchä Dios", hoyyä miägu'ughajpä jia mähanhaty, høhnädaacp je'eduhñ. Pø cabä yhamdsoo mägu'ughajpä ñä'a tsocy ñä'a pa'häyoy, cabä Dios hoy jiahmiédsät. Haa ca'a, yhiixypä miägu'ughajpä homiänaajä, pero cabä Dios mänaa yhixy.

²¹ Hamdsoo ja'a Dios hajxy xyhanéhäm coo ja'a nmägu'ughajpä hajxy ndsojc nba'häyóowämät, jaduhñ mäwínäts nebiä Dios hajxy njahmiéjtsäm.

5

¹ Pøn jaduhñ mabøjp coo ja'a Jesucristo Dyiosquexiä, miäbøjpiä Diosmädia'agy je'e. Y pønä Dios jaduhñ jahmiejtsp, chojpy pia'häyooby je'e pønatiä Diosmädia'agy mabøjp.

² Coo ja'a Dios nDeedyhájtäm hajxy njahmiéjtsäm, coo ja'a miädia'agy hajxy ngudiúunäm, jaduhñä tøyhajt hajxy nmøødhájtäm coo hajxy nniçhojc nnibia'häyóowäm, je'eguiøxpä coo ja'a Dios hajxy xyhuunghájtäm.

³ Coo ja'a Dios hajxy njahmiéjtsäm, je'eduhñ ñänøømby coo ja'a miädia'agy hajxy ngudiúunäm. Y cabä Dios tsipjaty yhane'emy.

⁴⁻⁵ Coo ja'a Dios hajxy xyhuunghájtäm, coo ja'a miädia'agy hajxy nmäbójcäm, paadiä mójcu'ugong hajxy jaduhñ nga'a yajmäjädaacäm, je'eguiøxpä coo hajxy nmäbójcäm coo ja'a Jesucristo Dyioshuungä.

⁶ Tøyhajt jaduhñ coo ja'a Jesucristo ñäbejty. Jaanä tøyhajt jaduhmbä coo yho'cy cruzcøxp.

⁷ Jaduhñä Dioshespíritu miäna'añ cooc ja'a Jesucristo Dyioshuungä, y cabä Dioshespíritu mänaa yhøhnda'agy.

⁸ Coo ja'a Jesucristo jaduhñ ñäbejty, coo yho'cy cruzcøxp, y coo ja'a Diosh-espíritu jaduhñ miäna'añ, jaduhñä tøyhajt hajxy nmøødhájtäm coo ja'a Jesu-cristo Dyiosquexiä.

⁹ Maas tsoobaatpä Dios ja'a miädia'agy quejee ja'a jäya'ay ja'a miädia'agyhajxy. Y jaduhñä Dios miäna'añ cooc ja'a Jesucristo yHuunghaty.

¹⁰ Pønä Jesucristo miädia'agy mabójcäp, miøødä tøyhajt jaduhñ coo ja'a Jesucristo Dyioshuungä. Hix, ja'a Dios jaduhñ hawáanäp. Pero pønä Dios ja'a miädia'agy ca'a mabójcäp, jaduhñ je'e miäna'añ cooc tyijy ja'a Dios yhøhnda'agy. Hix, cabä Dios ja'a miädia'agy miäbójcäxä coo ja'a Jesucristo yHuunghaty.

¹¹ Paadiä Dios hajxy tøø xpiädaacäm hawa'adstuum coo ja'a Jesucristo hajxy tøø xñähho'túutäm. Paady hajxy jaduhñ njugyhadaanam nebiä Dios jiugyhatiän cøjxta'axiøø. Tøyhajt jaduhñ. Ja'a Dios jaduhñ mänaamb.

¹² Pønä Dioshuung ja'a miädia'agy mabójcäp, hodium je'eduhñ yhity. Cøjxta'axiøø jiugyhada'añ nebiä Dios jiugyhatiän. Pero pøn jaduhñ ca'a mabøj, cab jaduhñ jiugyhada'añ nebiä Dios jiugyhatiän.

¹³ Mijts, mmäbójcäp ja'a Dioshuungä miädia'agy hajxy. Mijtshøch hädaa nocy nyajnäjaayøøby nebiä tøyhajt hajxy jaduhñ mmøødhádät coo hajxy hodium mhity, coo hajxy mjugyhada'añ nebiä Dios jiugyhatiän cøjxta'axiøø.

¹⁴ Coo ja'a Dios hajxy tu'ugmädia'agy nmøødhíjtämät, jaduhñä tøyhajt hajxy nmøødhájtäm coo hajxy xmiädóowämät coo hajxy tijaty nmäyujwáanamät.

¹⁵ Paadiä tøyhajt hajxy jaduhñ nmøødhájtäm coo hajxy xmio'owáanam.

¹⁶⁻¹⁷ Ja'a häna'c-hajxy haxøøgwädijpä, haagä haxøøgtuum hajxy ñøcxø'øwa'añ. Y pø miøødä mmägu'ughajpä pojpä cädieey, mmänuu'xtá'agäp ja'a Dios coo ween yajnähwa'ačhii. Pero coo ja'a mmägu'ughajpä ja'a Diosmädia'agy tehngajnä quia'a mabógät cøjxta'axiøø, haxøøgtuum jaduhñ ñä'ägä hídät; y cabä piojpä quiädieey mänaa ñähwáatsnät. Y cabä Dios mmänuu'xtá'agät coo ja'a mmägu'ughajpä yajnähwa'adsøjät, je'eguiøxpä coo ja'a yhamdsoo wiinmahñdy jaduhñ yajtuñ.

¹⁸ Pønä Dios Teedyhajp, cab jaduhñ mänaa yhaxøøghäna'c-haty. Cueendähájtäp je'eduhñ ja'a Jesucristäm, ja'a Dioshuung. Cabä Jesucristo ja'a mójcu'ugong jaduhñ mänaa yajmäjäda'agy. Tøyhajt jaduhñ.

¹⁹ Jaduhñä tøyhajt hajxy nmøødhájtäm coo ja'a Dios hajxy xyhuunghájtäm. Pero pønä Dios ca'a Teedyhajp, tøø quia'a yajmäjäda'agyíjäm ja'a mójcu'ugongäm.

²⁰ Jaanä nmøødhájtäm ja'a tøyhajt hajxy jaduhmbä coo ja'a Jesucristo ja'a Dioshuung hajxy hoy tøø xyajnähixøøyyäm ja'a Diosmädia'agy, coo hajxy jaduhñ nmäbójcämät coo ja'a Dios tiu'ugä. Y tu'ugmädia'aguiä Dios hajxy nmøødhíjtäm møødä yHuung Jesucristo. Hodium hajxy tøø xpiädaacäm. Cøjxta'axiøø hajxy njugyhadaanam nebiä Dios jiugyhatiän.

²¹ Mägu'ughajpädøjc, cab hajxy tii mwiingudsähgø'øwät, ni quepychech, ni naaxpoch, ni tii. Jagoo ja'a Dios hajxy mwiingudsähgø'øwät, ja'a jim hijpä tsajpootyp. Amén.

2 Juan

¹ Juánhøch nxøhaty. Høøch hädaa nocy nhädiuumby møød hajxy nägøxiä ja'a tøyhajtmøødpä. Míjtshøch hädaa nocy nyajnájaayøøby pønhatiä Dios tøø wyiimbiy, pønhatiä Diosmädia'agy mæbøjp. Tøyhájthøch mijts ndsocy nba'häyoy,

² je'eguiøxpä coo ja'a tøyhajt hajxy nmøødhájtäm. Cøjxta'axiøø hajxy jaduhñ nmøødhadäänäm.

³ Weenä Dios nDeedyhájtäm hoyhajt weenhajt hajxy xmióoyyäm møødä yHuung Jesucristo. Nmøødhájtäm ja'a tøyhajt hajxy jaduhñ. Hamiñ haxøpy hajxy jaduhñ nniçhojc nnibia'häyóowäm.

⁴ Jootcújc-høch nnijiäwø'yii coo ja'a tøyhajt hajxy näje'e mjaançh panøcxy nebiä Dios hajxy tøø xyhanéhäm.

⁵⁻⁶ Hoorä, hermanodøjc, tsøg hajxy niçhojc nibia'häyóowäm nebiä Dios hajxy tøø xyhanéhäm. Coø hajxy jaduhñ ngudiúunämät, cähxø'p jaduhñ coo ja'a Dios ja'a miädia'agy hajxy njaançh mæbøjcäm.

⁷ Nämayyä høhndaacpähajxy yaa wiädity hädaa yaabä naaxwiin. Cab hajxy jaduhñ miäna'añ cooc tyijy ja'a Jesucristo hoy tøø jiäya'ayhaty hädaa yaabä naaxwiin. Ja'a møjcu'ugongä wyiimmahñdy hajxy miøødhájtäp; ja'a Jesucristo miädsip je'e.

⁸ Mnigwieendähadøøjäp hajxy. Cabä høhndaacpä miädia'agy hajxy mmæbøjcät coo ja'a tøyhajt hajxy mnä'ä najtshixø'øwät, nébiøch mijts tøø nyajnáhixø'yän. Coø ja'a høhndaacpä miädia'agy hajxy jaduhñ mga'a mæbøjcät, xpiädá'agäp ja'a Dios hajxy hodium. Cøjxta'axiøø hajxy jim mhídät tsajpootyp.

⁹ Pønä Jesucristo miädia'agy najtshixøøyyäp, cabä Dios tu'ugmädia'agy miøødhity. Pero pøn jaduhñ ca'a najtshixøøby, tu'ugmädia'agy ja'a Dios miøødhity møødä yHuung Jesucristo.

¹⁰ Homiädyii yajnáhixøøbiä hajxy myajtøjtägø'øwät coo jim miédsät maa ja'a mjøøn maa ja'a mdøjc-hajxiän. Pero coo miäná'anät cooc tyijy ja'a Jesucristo miädia'agy quia'a tøyyä, cab hajxy myajtøjtägø'øwät, ni mga'a yajpóo'xät hajxy,

¹¹ coo ja'a cu'ug jaduhñ ñä'ä mäná'anät cooc tyijy myiich mjamiøød je'eduhñä, cooc tyijy miich jaduhñ mbayajnáhixøøbiä.

¹² Madiú'ujøch mijts nja hawaanäänäm, pero cábøch njaayaannä. Ja wi'i chójpiøch njoot jaduhñ coøch jim nnøcxät maa mijtsän. Mänit hajxy haawhaam nmädiäacämät; jaduhñ hajxy maas jootcujc nhíjtämät.

¹³ Xyajpoo'xp mijts ja'a hermanodøjc-hajxy yaabä. Tøø hajxy je'e wyiimbíiwäbä ja'a Diósäm. Amén.

3 Juan

¹ Juánhøch nxøhaty. Mägu'ughajpä Gayo, míichhøch hädaa nocy nya-jnäjaayøøby. Tøyhájthøch miičh ndsocy nba'häyoy.

² Ween miičhä Dios hoyhajt weenhajt xmio'oy. Nnajuøøbiøch jaduhñ coo miičh hoy mwädity.

³ Tøøchhä hermanohajxy hoy näje'e xyhawaanä coo miičhä Diosmädia'agy hamuumdu'joot mbanøcxy. Páadyhøch jootcujc nnijiäwø'øyii.

⁴ Cooch nmädoyhaty cooch njamiøødä Diosmädia'agy hajxy hamuumdu'joot pianøcxy, jaančh tehñ xioondáacpøch jaduhñ.

⁵ Hoy miičhä Diosmädia'agy mgudiuñ coo ja'a hermanohajxy mbuhbety, ja'a hajxy jäguemgajpt-tsohmä.

⁶ Tøø hajxy ñägapxy maa ja'a tsajtøjcän coo miičh hajxy mjaančh tehñ chocy mjaančh tehñ pia'häyoy. Y coo hajxy hñajty jiaac tu'ubøgaanä, mmó'owäp hajxy tijaty hajxy hñajty yajmaajiajpy.

⁷ Hix, ja'a Jesucristocøxpä hajxy wiädity. Ja'a Diosmädia'agy hajxy yajwa'xyp. Y cab hajxy tii miäyujwa'añ ja'a Diosmädia'agy hajxy ca'a panøcxpä.

⁸ Paady jaduhñ yhahixø'øy coo ja'a hermano hajxy nbuhbéjtämät; jaduhñ hajxy hoy nmøødtúunämät maa ja'a Diostuung jaduhñ myiñän.

⁹ Tøøchhä hermano nocy hajxy tu'ug nja yajnäjaayø'øy, pero cábøchhä Diótrefes nmädia'agy xquiudiunaanä, je'eguiøxpä coo ja'a yhamdsoo mädia'agy jaduhñ yajtuna'añ maa ja'a hermanohajxiän.

¹⁰ Haxøøgiátyhøch naxy xñänømy. Y maas haxøøg jaduhñ jiatcø'øy coo ja'a hermano cuhdujt hajxy quia'a mo'oy coo hajxy jiojpoøgø'owät ja'a Diosmädia'agy hajxy yajwa'xpä. Y coo pøn hñajty jiojpoøgø'owa'añ, mänitä Diótrefes miäna'añ coo yajpädsøømänät maa ja'a tsajtøjcän. Cooch jim nnøcxät maa mijtsän, mänitøch ngøxy nägäpxät nebiaty jiatcø'øy.

¹¹ Miičh mägu'ughajpä, cab jaduhñ mänaa mbajatcø'owät. Pøn jaduhñ jatcøøby, cabä Diosmädia'agy miäbøcy. Pero pøn hoy wädiip homiänaajä, miäbøjpiä Diosmädia'agy je'e. Jaduhñ miičh mbahíxät.

¹² Pero ja'a Demetrio, cab jaduhñ jiatcø'øy nebiä Diótrefes jiatcø'øyän. Tøyhajtä Demetrio ja'a Diosmädia'agy pianøcxy hamuumdu'joot. Cumáayyap jaduhñ nägøxiä, y ngumáabiøch høøchpä. Mnajuøøby miičh jaduhñ cooçhä tøyhajt nmøødä.

¹³ Madiú'ujøch miičh nja hawaanäänäm. Pero cábøch njaayaannä.

¹⁴ Chójiøch njoot jaduhñ cooçh jim nnøcxät maa miičhän. Mänit haawhaam nmädiäacämät.

¹⁵ Ween miičh jootcujc mmähmø'øy. Xyajpoo'xp miičh ja'a mmägu'ughajpähajxy yaabä. Tunä mayhajt, yajpóo'xäc højts nmägu'ughajpähajxy jimbä nägøxiä.

Judas

¹ Høøch xøhajt Judas. Ja'a Jesucristøch ja'a tiuung ndúunäp. Høøch nbuhya'ay je'e ja'a Jacobo. Míjtshøch hädaa nocy nyajnäjaayøøby. Tøø højts ja'a Diosteedy xyajnáhdíjjäm coo ja'a miädia'agy nmäbøjcämät. Xchójcäm hajxy jaduhñ. Tu'ugmädia'agy hajxy xyaghíjtäm mөөдä Jesucristo.

² Ween mijts ja'a Dios hoyhajt weenhajt xmio'oy tehngajnä. Tsøg hajxy jahmiéjtsäm coo ja'a Dios hajxy xchójcäm tehngajnä.

³ Mägu'ughajpädøjc, jadúhñhøch mijts hijty nyajnäjaayø'øwa'añ coo ja'a Jesucristo hajxy tøø xñähho'túutäm. Pero maas hawiinmats jaduhñ coöch mijts nmänuu'xtá'agät coo ja'a Diosmädia'agy hajxy tehngajnä mbanøcxät, nebiä Dios hajxy tähoocmo'oyyä tøø xmióoyyäm. Cab hajxy myajwiinhóønät.

⁴ Hix, ja'a häna'c høhñdaacpähajxy, hamee'ch hajxy näje'e tøø yajtägø'øwø'øy. Ja'a Diosmädia'agy jecy mänaañ cooc ja'a høhñdaacpähajxy quiumädowna'añ. Jaduhñ hajxy yhøhñda'agy, cábäc jaduhñ tyijy ñejpiä coo mhaxøøgwädítät, hoyyä Dios ja'a mbojpä mgädieey tøø xjia yajnähwaatsä. Cabä Jesucristo hajxy quiapxpaatnä, ja'a nWiindsøn'hájtämbä. Tu'uquüä Jesucristo hajxy nWiindsøn'hájtäm.

⁵ Mnajuøøby hajxy jaduhñ, hoy ja'a Dios ja'a judíos jim jia woobädsøømy Egiptonaaxooty, mänit yajcuhdägooñä pønjaty hñanjty ca'a mäßøjp. Mjah-miédšap hajxy jaduhñ cøxiä.

⁶ Haa ja'a Diosmoonsähajxiä, coo hajxy jim näje'e chohñ tsajpootyp maa ja'a Dios hñanjty tøø piäda'aguiän, paady hajxy jiiby quiejxä tsumyčhänäabiä hagogdstuum ja'a Diósäm, høxtä coo yhabáadät coo hajxy hñanjty yajcumädowna'añijäm ja'a Diósäm.

⁷ Høxtáhmäts ja'a jecyjiäya'ayhajxy jiajty, ja'a hajxy hijty jim jegyhajty tsänaabiä maa ja'a cajpt hijty xiøhatiän Sodoma mөөдä Gomorra, mөөдä jimbä ja'a cajpt mäwiingonbä. Coo hajxy jiaanč tehñ yhaxøøg jiäya'ayhajty, paady hajxy jøønhaam yajcumädoowä ja'a Diósäm. Hix, høxtä ya'adiøjcpaady hajxy hijty yhaxøøgíatcø'øy. Hijxtahñd ja'a Dios hajxy jaduhñ xmióoyyäm.

⁸ Jaduhñä høhñdaacpähajxy jiatcøøbiä. Cabä tøyhajt hajxy miөөдä. Haxøøg hajxy wiädity. Cabä Diosmädia'agy hajxy miäßøcy. Haxøøgä Diosmoonsä hajxy ñänømy, ja'a hajxy tsajpootypä.

⁹ Ja'a Diosmoonsä møjhjäpä, ja'a xøhjäpä Miguel, cabä møjcu'ugong haxøøg ñämaayy mänaa ja'a dijunto Moisés hajxy hñanjty yajtsipta'aguiän. Jagooyyä ñämaayy: "Ja'a Dios xyhójäp."

¹⁰ Pero yø'ø høhñdaacpähajxy, hotyijatiä hajxy haxøøg ñänømy, hoy hajxy tii quia'a ja najuø'øy. Nä'ä nägoobä hajxy jaduhñ jiatcø'øy nebiä animalhajxiän. Paady hajxy quiumädownaannä.

¹¹ Haxøøg hajxy jiada'añ yhabeta'añ, je'eguiøxpä coo ja'a Caín hajxy pi-ahixy piaduñ. Jaduhñä Balaam hajxy piahijxpä. Tu'udägooyy ja'a Balaam jecy je'eguiøxpä coo xädø'øñ hñanjty jiaanč tehñ piøcjuø'øy. Yajcumädownaannä hajxy je'eguiøxpä coo ja'a Dios miädia'agy hajxy quia'a cud-iunaanä nebiä Coré jecy quia'a cudiuuñän. Yhamdsoo cuhdujt hajxy jia wi'i yaghidaamby.

¹² Jaanč tehñ yhočhähdiiuunnä ja'a høhñdaacpähajxy jiatcø'øy maa mijts ja'a cay ja'a hu'ug myagjadyiiän. Nä'ä pahuuc nä'ä pajøø'xpä hajxy jim miech. Jaanč tehñ jiootmøj hajxy ñibiäda'agyii. Cab hajxy pøn ñä'ägädä wiingudsähgø'øy. Cabä Diosmädia'agy hajxy hoy yajnähixø'øy.

¹³ Jaančh tehñ chähdiuhñdägoy hajxy jaduhñ. Coö hajxy tøø tiu'udägoonä, paady hajxy yaghidäänänä cøjxta'axiøø hagogdstuum.

¹⁴ Haa ja'a Enocä, ja'a Adán ja'a yhap yhoc je'e ja'a miäjuxtujcpä. Jecy ja'a Dios ja'a Enoc yajmädiaacy ja'a häna'c hønndaacpæcøxpä. “Huuc mäadow, milhaamä Dios ja'a mioonsä miøødcäda'aga'añ.

¹⁵ Cøxäänäm ja'a Dios hajxy xquiøxy yajtøyhajtyegäänäm. Mänit yajcumadowa'añ pønjaty haxøøg jäya'ayhajp, ja'a Diosmädia'agy hajxy ca'a mæbøjpä, ja'a Dios hajxy haxøøg nänøømbä.”

¹⁶ Yø'ø hønndaacpähajxy, jaančh tehñ wyiinhec hajxy jaduhñ. Cab hajxy tii quiumay. Ja'a haxøøgpä hajxy jiaančh tehñ yhadsojpy. Jaančh tehñ ñiguiumäayyap hajxy jaduhñ. Nä'a mänaamb hajxy jaduhñ cooc tyijy ja'a jäya'ay hajxy jiaančh tehñ wyiingudsähgø'øy. Paady hajxy jaduhñ miäna'añ, coö hajxy yajcumaya'añ.

¹⁷ Mägu'ughajpædøjc, mjahmiejchp hajxiäda'a coö ja'a nWiindsønähjätäm Jesucristo quiuguexy hajxy jäguemiä miänaa'ñ:

¹⁸ “Coö hñajty yhabaadaannä coö ja'a naaxwiimbä hñajty wyiimbida'añ, mänitä jäya'ay ja'a Diosmädia'agy hajxy näje'e wyiinwoona'añ. Ja'a haxøøgpä hajxy hñajty jiaančh tehñ yhadsogaamb.”

¹⁹ Jaančh tehñ chipyajpædø'øgaamb hajxy maa ja'a hermanodøjc-hajxiän coö ja'a hermanodøjc hajxy tu'ugmädia'agy quia'a híjnät. Haxøøg hajxy jiaančh tehñ wiädity. Cabä Dioshespíritu hajxy ñä'ägädä møødä.

²⁰ Pero mijts mägu'ughajpædøjc, tehñgajnä ja'a Diosmädia'agy hajxy maas hoy mjaac panøcxät nebiä Dios hajxy tøø xmióoyyäm. Mba'yá'axäp ja'a Dios hajxy ja'a yhEspíritucøxpä.

²¹ Hoyyä Diosmädia'agy hajxy mjaančh tehñ yajtúnät; mänitä Dios ja'a mbojpä mgädieey hajxy xyajnáhwa'ads xyajcuhwá'adsät. Xchójcäm hajxy jaduhñ, paady hajxy xyajnáhwa'ads xyajcuhwa'adsäänäm. Jimä mjoot hajxy mbädáacnät tsajpootyp coö ja'a Jesucristo hajxy jim xyajnøcxäänäm. Jim hajxy xyaghidäänäm cøjxta'axiøø. Hojioot jiaančh tehñ miøødhajpy møødä højtscøxpä.

²² Mjootcapxmøcpógäp hajxy pønjaty hamuumdu'joot ca'a mæbøjp.

²³ Naxiä jäya'ay Diosmädia'agy hajxy mdehñ yajmæbøgät; jaduhñ hajxy quia'a cá'awät haxøøgtuum. Mnäxúudsäp hajxy pønjaty hñajty haxøøg wädiyp. Pero nägueentä hajxy mmøødmädiä'agät, neby hajxy jaduhñ mga'a pahadägoonäxät.

²⁴⁻²⁵ Tu'ugä Dios jaduhñ. Jaaya'ay hajxy xyajnáhwáatsäm ja'a Jesucristocøxpä ja'a nWiindsønähjätäm. Je'eds mäjaamøød neby hajxy jaduhñ xcwieendähjätämät. Jaduhñ hajxy nga'a tu'udägooyyämät. Wa'ads hajxy jim xyajmedsäänäm tsajpootyp. Mänit hajxy jim nxoonäda'agäänäm. Tsøg hajxy mänäänäm cøjxta'axiøø coö ja'a Dios miøjjä jiaančhä. Homiänaajä ja'a cuhdujt jiaančh tehñ miøødä. Amén.

Apocalipsis

¹ Hädaa mädia'agy, yu'üch hijty jaduhñ yhity. Mänitā Dios ja'a Jesucristo ñajtsapxøøyyä coo ja'a Jesucristo ja'a mioonsāhajxy yhawaandägájtsät tijaty hānajt mobādajp jadāanāp tunāanāp. Mänitā Jesucristo ja'a quiuguexy jim quiejxtāgajch maa ja'a Juangān. Hoy ja'a Juan jaduhñ yhawaandägájtsäxä.

² Jaduhñā Juan yajwiinhijxä. Y yejc ja'a Juan ja'a tøyhajt jaduhñ mäduhñtiä wyiinhijxy, coo ja'a Diosmädia'agy tiøyyä nebiä Jesucristo hānajt tøø ñāgapxiän.

³ Jootcujc hajxy yhity pønjaty hädaa nocy capxp, pønjaty jaduhñ mädoob, pønjaty jaduhñ hoy cudiumb nej myiñän cujaay. Hix, mobādajp jaduhñ jiada'añii tiuna'añii.

⁴ Høøch Juan hädaa nocy nhädiuumby. Mijts hädaa nocy nyajnājaayøøby pønjetiä Diosmädia'agy panøcxp jim Asianaaxooty maa ja'a juxtujcpä cajp-tootypän. Weenä Dios ja'a hoyhajt ja'a weenhajt hajxy xmio'oy. Homiānaajä ja'a Dios ñä'ägädä hity. Y ja'a juxtujcpä juøhñdy jim hijpä Dioswiinduum, jaduhñ ja'a hoyhajt ja'a weenhajt hajxy xmioobiä.

⁵ Y ja'a Jesucristo, jaduhñ ja'a hoyhajt ja'a weenhajt hajxy xmioobiä. Yejpiä Jesucristo ja'a tøyhajt jaduhñ. Jaayá'ayäts jayøjp jujypiøjc. Jaayá'ayäts rey nägøxiä hanehm̄b. Xchójcām hajxy jaduhñ. Tøø hajxy xñähho'túutām. Tøø hajxy xyajñähwaats xyajcuhwáatsām ja'a nbojpä ngädieyhájtām.

⁶ Jaduhñ hajxy tøø xpiädáacām nebiä reyän, nebiä nähgapxtuutpän; jaduhñ ja'a Dios hajxy hoy nmädúunāmāt. Tsøg hajxy jaduhñ cøjxta'axiøø møj jaançh pädáacām. Amén.

⁷ Huuc madow hajxy; mobādajpä ja'a Jesucristo miānaca'añ jocjooty. Nägøxiä jäya'ayhajxy yhixa'añ, møød hajxy je'e tøøbä miäyaghó'oguiäbä. Coo hajxy jaduhñ yhixa'añ, mänitā jäya'ayhajxy nägøxiä jiø'owa'añ xiuudsa'añ wiinduhmyhagajpt. Tøyhajt jaduhñ.

⁸ “Høøch cøxiä nyajtsohndaac. Y høøch cøxiä nyajmayáangombä”, nømä Dios miānaañ. Jaduhñ miādia'agytiägø'oy coo ja'a Dios homiānaajä ñä'ägä hity. Ja'a Dios møjcuhtujt cøxiä møød.

⁹ Høøch Juan, haguípxyhøch mijts ja'a Diosmädia'agy nmøødpanøcxy; haguípxyhøch mijts tøø nmøødtsaächpøcy. Tøø ja'a Jesucristo mājaa hajxy xmióoyām neby hajxy jaduhñ nmee'xtújcāmāt. Cooçhä Diosmädia'agy-yajwa'xyiibä nga'a najtshixø'owa'añ, møødä Jesucristo miādia'agy, páadyhøch hāna'c yaa mädsibø'øbä tøø xquiexy maa xiøhatiän Patmos. Nebiä tsúmybiänøch jaduhñ yaa nhity.

¹⁰ Mänitøchä Dioshespíritu xñägädaacy. Näxøø hānajt jaduhñ. Mänitøch nmädooy møc quiapxy njøøxcø'ømáambiøch. Jadúhñhøch nmädooy nebiä xuuxtän.

¹¹ Mänitøch je'e xñāmaayy:

—Høøch cøxiä nyajtsohndaac; høøch cøxiä nyajmayaamby. Tijaty miich mwiinhixamby, jaduhñ mgujáayät librojooty. Mänit jim mguéxät maa ja'a hermanodøjc-hajxiän jim Asianaaxooty, maa ja'a juxtujcpä cajptootypän. Jaduhñā juxtujcpä cajpt xiøhaty: Efeso, Esmirna, Pérgamo, Tiatira, Sardis, Filadelfia, Laodicea.

¹² Mänitøch nwa'wiimbijty. Je'eçh hānajt nhixaamby pønñhøch hānajt xmiägapxp. Mänitøchä ceratoyøhñdy juxtujc nhijxy, haagä orohädiuñ.

¹³ Jimä Jesucristo hānajt tiāna'ay maa ja'a ceratoyøhñdy ñähmøjcän. Yoñä wyit hānajt miøødä. Orowøønhaam hānajt quiaächwøøñä.

14 Jaančh tehñ pioobä quiuhwaay hñajty. Jaduhnä wyiin hñajty quiähxø'ogy nebiä jøønhayän.

15 Jaduhnä tiecy hñajty yhaambä chämaambä, néjjiämä hobiujxt coo mbó'odät. Jaančh tehñ miøc hñajty quiapxy, nebiä mejy jiäditian.

16 Juxtujcä madsa'a hñajty quiø'ogonhaty maa ja'a yhaaoguiø'øjän. Yhaawjootiä pejyhespada hñajty miøødä, mejtsnaxä jiøjpä. Jaduhnä wyiin jiøjp hñajty quiähxø'ogy nebiä xøø møc yhañän.

17 Cooch jaduhñ nhijxy, mänitøch nwiingugädawøøyy nebiä ho'ogypiän. Mänitøch xquiø'ønähgajpy ja'a yhaaoguiø'øhaam. Mänitøch xñämaayy:

—Ca'a mdsähgø'øy. Høøch ja'a jayøbajtpä, høøch ja'a jaac høxhaambä.

18 Jújcyhøch hñajty, tøøch hijty nho'ogy. Mänitøch njujypiøjcombä. Cábøch mänaa nho'ogaannä. Høøchä cuhdujt jaduhñ nmøød maa ja'a ho'ogyiibä myinø'øyän, maa ja'a ho'pähajxy ñähgäda'aguiän.

19 Mgujáayäp jaduhñ nebiaty mwiinhixa'añ, tijaty jájtäp túunäp jäda'ahaty, møød tijaty jadäänäp tunäänäp.

20 Jaduhñ miädia'agytiägø'øy ja'a tøøbä mhíxiäbä. Ja'a juxtujcpä madsa'ajä, ja'a näjuxtujcpä Diosquexyhajxy je'e, ja'a Dios jim quiejxypä maa ja'a hermanodøjc-hajxiän, maa ja'a cajpt juxtujcpän. Y ja'a juxtujcpä orotoyøhñdiä, ja'a hermanodøjc-hajxy je'eduhñ, ja'a hajxy jim Diosmädia'agy panøcxpä maa ja'a cajpt juxtujcpän.

2

1 'Jaduhñä Diosquexy myajnäjaayø'øwät, ja'a tøø quiexyíijäbä maa ja'a hermanodøjc-hajxiän jim Efeso: “Ja'a Jesucristo, ja'a juxtujcpä madsa'a quionhippiä, jim je'e tiäna'ay maa ja'a ceratoyøhñdy ñähmøjcän; je'eds jaduhñ mänaamb:

2-3 Nnajuøøbiøch jaduhñ coo hajxy hoy mgudiuñ, coo hajxy møj mmee'xtucy, coo hajxy tøø mdsaačhpøcy ja'a høøchcøxpä, coo ja'a ca'awiindøybä hajxy mga'a mee'xy. Tøø hajxy mmädia'agyhixy ja'a häna'c-hajxy jaduhñ mänaambä cooc tyijy hajxy tøø quiexyii ja'a Diósäm. Tøø hajxy mnajuø'øy coo hajxy yhøhñda'agy. Hoy hajxy mmee'xtucy.

4 Je'ečh nga'a hojwiøøby coo hajxy mga'a nijiootpåatänä neby hajxy jecy mhøxtägøøyyän.

5 Tii hajxy hoy coo mga'a nijiootpåatänä. Naxy hajxy mdehm ñijiootpaadøøjät neby hajxy myajtsohñdaaquiän. Pø caj, nøcxáambøchä mceratoyøhñdyhajxy nbøgáanäm. Cähxø'p jaduhñ coochä nmädia'agy hajxy jaduhñ xquia'a panøcxänä.

6 Je'eds hoy coo ja'a nicolaíta miädia'agy hajxy mga'a mee'xä nébiøch jaduhñ nga'a mee'xiän.

7 Hamädoowhit hajxy nebiä Dioshespíritu ñäma'ay ja'a hermanodøjc-hajxy maa ja'a juxtujcpä cajptän. Pønjaty mäjädaacp, je'ečhä cuhdujt hajxy nmo'owaamby coo hajxy jim ñøcxät maa ja'a Dioswiinduumän. Jimä tøømdsa'am hajxy jiøø'xa'añ ja'a jugyhajtyejpä.”

8 'Jaduhñä Diosquexy myajnäjaayø'øwät ja'a tøø quiexyíijäbä maa ja'a hermanodøjc-hajxiän jim Esmirna. “Ja'a Jesucristo, ja'a jayøbajtpä je'e møødä høxhaambä. Tøø hijty yho'ogy; tøø jadähooc jiuypijøjtägach. Je'eds jaduhñ mänaamb:

9 Nnajuøøbiøch jaduhñ coo hajxy mjaančh tehñ chaachpøcy, coo hajxy mjaančh tehñ yhäyoy. (Høøch mijts ja'a hoyhajt ja'a weenhajt nmooby.) Nnajuøøbiøch jaduhñ coo mijtsä judíoshajxy haxøøg xñänømy. Jue'e hajxy jaduhñ, ja'a møjcu'ugongä miädia'agy hajxy miäbøjcäp. Ja'a hóybäc tyijy hajxy je'eduhñ wyi'i miäbøjpy; cab jaduhñ ñä'ä tóyyäbä.

¹⁰ Cab hajxy mdsähg'ó'wät hoy hajxy nej cu mja jat cu mja habet. Myajt-sumaamb hajxy näje'e ja'a mójcu'ugongcøxpä. Xñä'ä hijxmdsaamb hajxy jaduhñ pø tøyhajt hajxy jaduhñ mjaanč mabøcy. Majcxøøyyä hajxy mdsaačhpøga'añ. Coočhä nmädia'agy hajxy hamuumdu'joot xquiudiúunät, hoy hajxy cu mja ho'og, høøch mijts ja'a cuhdujt nmo'owaamby coo hajxy jim mnøcxät Dioswiinduum.

¹¹ Hamädoowhit hajxy waambä Dioshespíritu ñäma'ay ja'a hermanodøjc-hajxy maa ja'a juxtujcpä cajptän. Pønjaty mäjädaacp, cab hajxy ñä'ägädä tsaačhtiuna'añii ja'a Diósäm; cab hajxy piäda'aga'añii mójcu'uhaam.”

¹² 'Jaduhñä Diosquexy myajnäjaayó'wät ja'a jim tøø quiexyíjábä maa ja'a hermanodøjc-hajxiän jim Pérgamo: “Ja'a Jesucristo yhaawjooty ja'a pejyhespada miøødä, mejtsnaxä jìjöpä. Je'eds jaduhñ mänaamb:

¹³ Nnajuøøbiøch cooçh mijts nmädia'agy hoy xquiudiuunä homiänaajä, hoyyä Satanás jim jia gobiernähaty maa mijts mñitiän, hoyyä Antipas jim tøø jia yagho'ogyii. Paady yagho'cä cooçh nmädia'agy hijty xyajwa'xä. Ni wéeñtiøch nmädia'agy hajxy xquia'a høxhijxä.

¹⁴ Je'eçh mabøcy nga'a hojwiøøby coo häna'c wiingmädia'agy hajxy näje'ejaty yajñähixø'øy nebiä Balaam jecy yajñähixøøyyän. Je'edsä Balaam jøjcaxøøyy coo ja'a judíoshajxy ñäma'awóøjät cooc tyijy jaduhñ yhooyä coo hajxy ñiyhamigähamädownóøjät, coo hajxy quiaay yhú'ugät tijaty hajxy tøø yoxý maa ja'a quepychechwiinduumän.

¹⁵ Jii häna'c-hajxy näje'ebä, cabä nicolaíta miädia'agy hajxy ñajtshixø'øwaanä. Cábøch mabójnäbä ja'a mädia'agy jaduhmbä nme'e'xy.

¹⁶ Weenä mädia'agy jaduhmbä hajxy ñajtshixø'øy. Pø caj, nøcxäämbøch nmädsibø'owa'añ pønjaty jim haxøøg yajñähixøøby maa mijtsän. Hädaa pejyhespada yaaby nmøødpøch nhaawjooty, hädaajøch nmädsiptunaamby.

¹⁷ Mhamädoowhídäp hajxy waambä Dioshespíritu ñäma'ay ja'a hermanodøjc-hajxy maa ja'a juxtujcpä cajptän. Pønjaty mäjädaacp, je'eçh nyajcayaamby ja'a maná jim yu'učhpä. Møødøçhä poobtsaa nmo'owa'añ. Jimä jemxyiøø yuugjaayä poobtsaanähgøxp. Ni pøn jaduhñ quia'a høxcapy quia'a najuø'øy. Jagooyyä yhøxcapy ja'a tøøbä mio'oyíjábä.”

¹⁸ 'Jaduhñä Diosquexy myajnäjaayó'wät ja'a jim tøø quiexyíjábä maa ja'a hermanodøjc-hajxiän jim Tiatira; “Ja'a Jesucristo, jaduhñä wyiin quiahxø'øgy nebiä jøønhaayän. Jaanč tehñ yhaamb jaanč tehñ chämaambä tiecy néjjiämä hobiujxt coo mbó'odät. Jaayá'ayäts jaduhñ mänaamb:

¹⁹ Nnajuøøbiøch jaduhñ coo hajxy hoy mniçhogyii, coo hajxy hoy mmabøcy, coo hajxy hoy mgudiuñ, coo hajxy møj mjaanč tehñ miee'xtucy. Jaduhñhøch nnajuøøbiä coo hajxy jabom-jabom maas hojiaty mgudiuñ.

²⁰ Je'eçh mabøcy hoy nga'a mänijwiøøyyäp coo ja'a to'oxiøjc jii tu'ug maa mijtsän ja'a xøhajpä Jezabel. Ja'a Dioscøxpäc tyijy miädia'agy. Pero xjiøjcaxøøyyäbøch nmoonsähajxy. Jaduhñ yhøhñdaacpä cooc tyijy yhooyä coo hajxy ñiyhamigähamädownóøjät, coo hajxy quiaay yhú'ugät tijaty hajxy tøø yoxý maa ja'a quepychechwiinduumän.

²¹ Tøøçhä Jezabel mayhooc nja näma'ay coo ja'a mädia'agy jaduhmbä ñajtshixø'øñät. Pero cab jaduhñ ñä'ägädä najtshixø'øwa'añ.

²² Nyajpa'ambedäämbiøch je'eduhñ møødä yhamigohajxy, pø cabä yhaxøøgcuhdujt hajxy ñajtshixø'øwa'añ. Hoyhóyhøch hajxy nyajtsaačhpøga'añ.

²³ Ngøxy pøgáanäbøçhä yhuungä jiugyhajthajxy. Jaduhñä hermanodøjc-hajxy nägøxiä ñajuø'øwa'añ maa ja'a juxtujcpä cajptän cooçhä wyiinmahñdy hajxy nnajuøøyyä. Coo hajxy hoy mguhdujthädät,

nmo'owáambiöchä hoyhajt ja'a weenhajt hajxy jaduhñ. Pø cabä, nyajtsaaçhpøgåambiöch hajxy jaduhñ.

²⁴ Pønjaty jim jaac hijp Tiatira, ja'a haxøøgmädia'agy hajxy ca'a panøcxpä, ja'a Satanás miädia'agy hajxy ca'a panøcxäbä, cábøch hajxy waamb nhanehmñä. (Tøyhajtäc tyijy ja'a Satanás miädia'agy jaduhñ.)

²⁵ Jagóoyyøch hajxy njaac näma'ay coo hajxy hoy mgudiünät neby hajxy naxy mnä'ägädä cuhdujthatiän, høxtä cóonøch yaa ngädaactägätsät.

²⁶ Pønjaty mäjädaacp, pønjatyhøchä nmädia'agy hoy xyajtuunäp homiänaajä, je'eçhä cuhdujt hajxy nmo'owaamby coo hajxy guiobiernähädät wiin-duhmyhagajpt,

²⁷ nébiøch nDeedy xquihdujtmooyyän. Møcä cuhdujt hajxy miøødhada'añ. Coo ja'a miädia'agy hajxy quia'a mabøjcäxät, mänit hajxy chaaçhtiuna'añii, ja'a hajxy ca'a mabøjpä. Jaduhñ hajxy chaaçhtiuna'añii néjjiämä tu'ts mwo-jpú'uwät varillahaam.

²⁸ Nmo'owáambiöchä jaxiøøm hajxypä.

²⁹ Mhamädoowhídäp hajxy waambä Dioshespíritu ñäma'ay ja'a hermanodøjc-hajxy maa ja'a juxtujcpä cajptän."

3

¹ 'Jaduhñä Diosquexy myajnäjaayó'owät ja'a jim tøø quiexyíijäbä maa ja'a hermanodøjc-hajxiän jim Sardis: "Ja'a Jesucristo, je'edsä Dioshespíritu møødhajp ja'a juxtujcpä, møødä madsa'a juxtujcpä. Je'eds jaduhñ mänaamb: Nnajuøøbiøch cooçh nmädia'agy hajxy xquia'a yajtuunä, hoy häna'c-hajxy jia mäna'añ cooc tyijy mijts hoy mgudiunñ.

² Naxiä mwiinmahñdy hajxy mdehm yajmédsät. Cabä Diosmädia'agy hajxy hoy mjaty cudiunñ. Je'eçhä jaduhñ nja tsojpy coo hajxy pedyii mgudiünät, coo hajxy jaduhñ mga'a nä'ägä tu'udägóyyät.

³ Mjahmiédsäp ja'a homiädia'agy hajxy jaduhñ, ja'a hajxy hijty tøø mhabøquiäbä. Je'eds hajxy myajtuunäp tehngajnä. Najtshixøøñä ja'a mhamd-soo wiinmahñdy hajxy jaduhñ. Pø cabä, jaguiäpxyhøch mijts nyajcumädówät. Cab hajxy hñajty mnajuø'oy mänäajøch mijts nyajcumädowa'añ.

⁴ Jim häna'c näje'e maa mijtsän jim Sardis, cab hajxy nej jiatcø'oy. Coo hajxy hoy wiädity, páadyhøch hajxy xmiøødwädita'añ poobwitmøød.

⁵ Pønjaty mäjädaacp, poobwit hajxy miøødhadaamby. Cábøchä xiøøhajxy nbo'odaanä maa hajxy myiñän cujaay librojooty. Jim hajxy ñøcxa'añ maaçh nDeediän, maa ja'a Diosmoonsän. Mänitøch hajxy jim ngapxpaada'añ, pønjatiä xiøø hñajty miimb cujaay librojooty.

⁶ Mhamädoowhídäp hajxy waambä Dioshespíritu ñäma'ay ja'a hermanodøjc-hajxy maa ja'a juxtujcpä cajptän."

⁷ 'Jaduhñä Diosquexy myajnäjaayó'owät ja'a jim tøø quiexyíijäbä maa ja'a hermanodøjc-hajxiän jim Filadelfia: "Ja'a Jesucristo, cabä tii pojpa tii cädieey miøødä. Ja'a tøyhajtäts jaduhñ ñä'ägä møød. Miøødhajtäbä rey David yhawaatst je'eduhñ. Coo hñajty tii tøø yaghawa'açh, ni pøn jaduhñ quia'a hagó'owät. Y coo hñajty tii tøø yhawägüiich, ni pøn jaduhñ quia'a yaghawá'adsät.

⁸ Jaayá'ayäts jaduhñ mänaamb: Nnajuøøbiøch cooçh nmädia'agy hajxy hoy xyajtuunä, hoyyä møcmäjaa hajxy jaduhñtiäbaady mga'a ja møødä. Jaduhñhøch nnajuøøbiä cooçh mijtsä nxøø xquiapxpäatäbä. Páadyhøch mijts jaduhñ nguhdujtmø'oy coo hajxy jim mnøcxät Dioswiinduum.

⁹ Pønjatiä møjcu'ugong ja'a miädia'agy jaduhñ mabøjcäp, ja'a judíoshajxy, jaduhñ hajxy miänaambä cooc tyijy ja'a Diosmädia'agy hajxy hoy pianøcxpä.

Cab jaduhñ ñä'ä tóyyäbä. Nä'ä hōhñdaacp hajxy jaduhñ. Nyajmedsáambiōch hajxy maa mijts mwiinduumän. Mänítōch hajxy jim nyagjijcäda'aga'añ, neby hajxy jaduhñ ñajuó'owät cooçh mijts jaduhñ ndsocy.

¹⁰ Tōōch nmädia'agy hajxy xyajtuunä coo hajxy mmee'xtúgät. Páadyhōch mijts ngüeendähada'añ mänaa ja'a tsø'ty ja'a häyohn hñajty ñaxa'añän wiinduhmyñaaxwiin. Mänitä jäya'ayhajxy nägøxiä chaaçhpøga'añ.

¹¹ Mobädájpøch jiiby nhäda'aga'añ. Tehñgajnä hajxy jaduhñ hoy mgudiúnät. Jaduhñä cuhdujt hajxy ni pøn xquia'a pøjcät coo hajxy jim mnøcxät maa ja'a Dioswiinduumän.

¹² Pønjaty mäjädaacp, cøjxta'axiøø hajxy jim yhida'añ Dioswiinduum. Ni mänaa hajxy jim quia'a tsoonaannä. Ja'a nDéedyhōchä xiøø, jímhōch nyuugjaayaanä maa ja'a wyiinnähgopcøxphajxiän, møødä Dioscajptä xiøø, møød hōōch njemyxiøø. Ja'a Dioscajptä, ja'a Jerusalén jemýbiä je'e. Jim je'e choona'añ tsajpootyp maa ja'a Diosän.

¹³ Mhamädoowhídäp hajxy waambä Dioshespíritu ñäma'ay ja'a hermanodøjc-hajxy maa ja'a juxtujcpä cajptän."

¹⁴ Jaduhñä Diosquexy myajñäjaayó'owät ja'a jim tøø quiexyíjábä maa ja'a hermanodøjc-hajxiän jim Laodicea: "Ja'a Jesucristo, tøyhajtyejp je'e. Ni mänaa quia'a hōhñda'agy. Je'e cøxiä yajtsohñdaac mäduhñtiä Dios yhädiuuñ.

¹⁵ Jaayá'ayäts jaduhñ mänaamb: Nnajuóøbiōch jaduhñ cooçh nmädia'agy hajxy hamuumdu'joot xquia'a panøcxä, hoy hajxy mja mäna'añ cooc tyijy hajxy mmäbøcy. Maas hoy coo hajxy cu mnä'ägä mänaañ coo hajxy mga'a mäsøcy.

¹⁶ Entonces, coo hajxy hamuumdu'joot mga'a mäsøcy, páadyhōch mijts jaduhñ nxøøghada'añ.

¹⁷ Jaduhñ hajxy mmäna'añ cooc tyijy hajxy tii mga'a nä'ägädä yajmaajiaty, cooc tyijy hajxy hoy mjaançh tehñ wiädity. Pero cab hajxy jaduhñ mnajuó'øy coo hajxy tijaty mga'a møødä. Jaduhñ mäwínäts hajxy mhity nebiä häyoobän, nebiä wiindspän, nebiä nähwa'ads hōxwa'adspän.

¹⁸ Nhuuc yajmädógyhōch mijts oro hoybä, møødä poobwit, møødä wiindsooy. Jaduhñ hajxy hoy mhíxät. Cooçh mijts xmiänuu'xtá'agät, mänítōchä mbojpä mgädieey hajxy nyajñahwáatsämät. Jaduhñ hajxy hoy jim mnøcxät Dioswiinduum; cab hajxy jaduhñ mnä'ägädä tsähdiúnät.

¹⁹ Ndsójpíōch mijts, pero pø cábøch nmädia'agy hajxy xquiudiunaanä, mänit hajxy nyajcumädowa'añ. Nmägäpaxaamby nhane'emaamby hajxy jaduhñ. Entonces, naxiä mhaxøøgcuhdujt hajxy mdehm ñajtshixó'owät. Hix, coo hajxy jaduhñ mnä'ä cumädówät. Hamuumdu'jootä nmädia'agy hajxy xquiudiúnät.

²⁰ Huuc hamädoowhit hajxy, nja wi'i miänuu'xtáacypiōchä jäya'ayhajxy jaduhñ cooçh hajxy xjiøjpøgø'owät. Mänítōchä piojpä quiädieey hajxy nyajñahwáatsät. Mänítōch hajxy jaduhñ nmøødhíjnät tu'ugmädia'agy.

²¹ Pønjaty mäjädaacp, nmo'owáambiōchä cuhdujt hajxy jaduhñ cooçh hajxy xmiøødgobiernähädät. Jaduhñhōch tøø nmäjädaacp; páadyhōch nDeedy jaduhñ nmøødgobiernähajpä.

²² Mhamädoowhídäp hajxy waambä Dioshespíritu ja'a hermanodøjc ñäma'ay maa ja'a juxtujcpä tsajtjcan."

4

¹ Mänítōchä tsajpootyp nwiinhijxy coo yhawa'adsä. Mänítōch jaaya'ay xmiägäpxcombä, ja'a jayøbájthōch hñajty tøøbä xyhuuc mägapxpän. Jaduhñä yo't yajmädoooyy nebiä xuuxtän. Mänítōch xñämaayy:

—Huuc pet yam; nhuuc yaghíxyhøch miičh tii jaduhñ jadáanäp.

² Mänitøchä Dioshespíritu xñägädaacy. Mänitøchä Dios nwiinhijxy; jim hñajty yhäña'ay tsajpootyp.

³ Haamb tsämaambä Dios hñajty nebiä tsaa hoybän, nebiä jaspén, nebiä cornalinan. Yajxonä hi'inčh hñajty quiähxø'øgy maa ja'a Dios hñajty yhäña'ayän. Nebiä esmeraldatsaajän hñajty yhañ chämamy.

⁴ Jímhøchä majjäya'ay nhijxy nähii'xmädaaxc. Wäditiä ja'a Dios hajxy hñajty jiuhhäñaawiädity. Poobwitmøød hajxy hñajty. Oro hajxy hñajty quiuhjenhajpy.

⁵ Jimä wädsuc hñajty piädsømy maa ja'a Dios hñajty yhäña'ayän. Jädijpä hñee hñajty jim. Juxtujcä jøøn hñajty jim tiøy Dioswiinduum. Dioshespíritu je'eduhñ ja'a juxtujcpä.

⁶ Haa jim ja'a Dioswiinduumä, jaduhñä mejy hñajty jim quiähxø'øgy nebiä hijxt jaančh tehñ tiø'xypän.

Mädaaxcä animal ja'a Dios hajxy hñajty jim jiuhhäñaawiädity. Cøxiä ñi'x quiopc-hajxy hñajty wyiinmøødä, jayøjp jiøøxcø'ømhaambiaajpy.

⁷ Tu'ug hñajty quiähxø'øgy nebiä leóngän; tu'ug nebiä wajjän; tu'ug nebiä jäya'ayän; tu'ug nebiä jäyøøbiä wiistan.

⁸ Haagä queectmøød hajxy hñajty tädujcjaty. Cøxiä ja'a wiin hajxy hñajty miøødä møød nähgøxp møød joodooty. Xøømdsuhñ hajxy hñajty wyl'i miäna'añ:

Jaančh tehñ wia'adsä Dios;

je'e hajxy nWiindsønhtëm. Cøxiä majaa miøødä;

homiänaajä ñä'ägädä hity cøjxta'axiøø.

⁹ Jaančh hijpä Dios cøjxta'axiøø. Naaghoocä animal ja'a Dios hajxy wyiingudsähgø'øy,

¹⁰ mänitä majjäya'ay ja'a Dios hajxy hñajty wyiinjiicäda'agy, ja'a nähii'xmädaaxpä. Mänitä Dios hajxy hñajty jiaančh tehñ wyiingudsähgø'øy. Mänit hajxy hñajty wyl'i ñiguiuhjeendu'udyii. Mänitä quiuhjen hajxy hñajty jim ñajtsconø'øy Dioswiinduum. Mänit hajxy hñajty miäna'añ:

¹¹ Dios, højts miičh nWiindsønhajpy.

Hahixøøby jaduhñ coo højts miičh nwiingudsähgø'øwät, coo højts nmänä'anät coo miičh ja'a majaa mmøødä, coo miičh mmøjjä mjaančh.

Cøxiä wiinä miičh mjaančh tehñ quiunuu'xy mjaančh tehñ piäda'agy.

5

¹ Mänitøchä Dios nhijxy coo nocy hñajty quiø'øbøc-haty haxädsach, ja'a quiø'ø hahooyhaampiä. Mejtsnaxä nocy hñajty jiaayä. Juxtujc-hit hñajty yhahoočh.

² Mänitøchä Diosmoonsä tu'ug nhijxy, ja'a majaa jaančh tehñ miøødpä. Mänit je'e miänaañ:

—Pøñ cuhdujt møød coo yø'ø nocy yhahoo'tstú'udät.

³ Ni pøñ cuhdujt hñajty quia'a møødä coo ja'a nocy hajxy yhahoo'tstú'udät, coo hajxy yhéebät, ni ja'a jimä tsajpootypä, ni ja'a hädaa yaabä naaxwiimbä, ni ja'a jiipiä møjcu'uhaambä.

⁴ Mänitøch njaančh tehñ jiøøyy, coo pøñ cuhdujt hñajty quia'a møødä coo ja'a nocy hajxy yhéebät, coo hajxy quiäpxät.

⁵ Mänitøchä majjäya'ay tu'ug xñämaayy:

—Ca'a mjøøñä. Ja'a Jesucristo, je'eds mäjädaac. Je'e cuhdujtmøød coo yø'ø nocy yhahoo'tstú'udät. Ja'a David ja'a yhap yhoc je'e, ja'a jecy jim gobiernähäjtäbä Judánaaxooty. Paadiä Jesucristo xiøhaty ja'a León de Judá.

⁶ Mänitöchä Meeghuung tu'ug nhijxy. Jim hānajt̃y tiāna'ay Dioswiinduum, maa ja'a animal nāmādaaxpān, maa ja'a majjāya'ay nāhii'xmādaaxpān. Cāhxō'p hānajt̃y coo hānajt̃y tōø yagho'ogyii. Juxtujcā quīaa'pt hānajt̃y; juxtujcā wyiīn hānajt̃ypā. Haa ja'a wyiīn juxtujcpā, ja'a Dioshēspīrituhajxy hānajt̃y je'eduhñ ja'a juxtujcpā. Jim hajxy hānajt̃y wiādity wiīnduhmyhagajpt.

⁷ Mānitā Meeghuungā nocy hoy piōjt̃soy. Ja'a Dios jaduhñ yejc; yha-hooguiō'øhaamby hānajt̃y tōø quiō'øbōc-haty.

⁸ Mānitā Meeghuung wyiīnjicādaacā. Ja'a nāmādaaxpā animalhajxy māwiīnjicādaac mōōdā nāhii'xmādaaxpā majjāya'ayhajxy. Cōdu'ugā harpa hajxy hānajt̃y miōōdā. Jimā poom hajxy hānajt̃y miōōdā orojoōnebhñdiooty. Haa ja'a poom jaduhmbā, ja'a Diospa'yaaxōc je'eduhñ. Ja'a Diosmādia'agy hajxy mājōjpā, je'edsā Dios hajxy hānajt̃y pa'yaaxp.

⁹ Mānitā jem̃yhōy hajxy yhōōyy:

Miīch cuhdujtmōōd coo yō'ø nocy mhahoo'tstū'udāt.

Miīch hōjts xñāhho'tuut. Paady hōjts cuhdujt nmōōdā coo hōjts yaa nhīdāt Dioswiinduum.

Wiīnduhmyhagajpt hōjts ndsooñ. Cōjhayuuc hōjts ngapxy.

¹⁰ Miīch hōjts cuhdujt xmiooyy coo hōjts jim ngobiernāhādāt naaxwiīn.

Diostuung hōjts ndunaamby nebiā teediān.

¹¹ Mänitöchä Diosmoonsā nhijxy jaančh tehñ miay. Ja'a Dios hajxy hānajt̃y jiuhdānaawiādijpy mōōdā animalhajxy mōōdā majjāya'ayhajxy.

¹² Mānitā Diosmoonsāhajxy mōc jiaančh tehñ yaaxy:

Yō'ø Meeghuung, yō'ø tōø yagho'ogyii.

Yō'øds cuhdujtmōōd coo jiaančh tehñ wyiīgudsāhgō'owōōjāt.

Hahixōōby jaduhñ coo hōjts nmānāanāmāt coo cōxiā wiīnā miōōdā, mōōdā mājāa, mōōd coo quiuhwiijjiā, mōōd coo miōjjiā jiaančhā.

¹³ Mānit hajxy miānaañ nāgōxiā mādyiijaty ja'a Dios tōø quiunuu'xy, ja'a jimbā tsajpootypā, mōōdā hādaa yaabā naaxwiimbā, mōōdā jiipiā mōjcu'uhaambā, mōōdā jiipiā mejjiootypā:

Tsōgā Dios hajxy wiīgudsāhgōōyyām mōōdā Meeghuung.

Cōjxta'axiōō hajxy yhida'añ mōj jaančh. Mōjmājāa hajxy miōōd.

¹⁴ Mānitā nāmādaaxpā animalhajxy miānaañ:

—Tsōc.

Mānitā nāhii'xmādaaxpā majjāya'ay ja'a Dios hajxy wyiīnjicādaacy. Wyiīgudsāhgōōyy hajxy jaduhñ.

6

¹ Mänitöchä Meeghuung nhijxy coo ja'a nocy tu'hit yha-hoo'tstuuty ja'a hānajt̃y juxtujc-hithahoočhpā. Mānitā animal tu'ug miānaañ:

—Min huug hix.

Coo ja'a animal jaduhñ miānaañ, jaduhñ yajmādooyy nebiā hānee jiāditiān.

² Mänitöchä craa tu'ug nhijxy coo tōpxt hānajt̃y tu'ug miōōdā. Poobcuāañāhgōxp hānajt̃y yhāñā'ay. Mānitā cuhjeñ miooyyā. Mānit tiu'ubōjcy tsiptuumbā. Mājāda'agaamb hānajt̃y jaduhñ.

³ Mānitā Meeghuung ja'a nocy yha-hoo'tstuuty ja'a miāmetsc-hithahoočhpā. Mānitā miāmetspā animal miānaañ:

—Min huug hix.

⁴ Mänitöchä craa tu'ug nhijxcombā. Tsaptscuāañāhgōxp hānajt̃y yhāñābiā. Mānitā cuhdujt miooyyā coo ja'a jāya'ayhajxy nōcxy yajniimiādsibō'oyii hādaa yaabā naaxwiīn, coo ja'a jāya'ayhajxy nōcxy yajniyagho'ogyii. Mānitā yōñhespada tu'ug miooyyā.

5 Mänitā Meeghuung ja'a nocy yhahoo'tstúutcombä ja'a miädägøøghithahoočpä. Mänitā miädägøøgpä animal miänaañ:

—Min huug hix.

Mänitøchä craa tu'ug nhíxcombä coo ja'a quipxt hānajtý tu'ug miøødä. Jiñgwiaañähgøxp hānajtý yhäñaabiä.

6 Mänitøchä mädia'agy nmädooyy maa ja'a mädaaxpä animalhajxy hānajtian:

—Møjyuu jaduhñ jadāanäp. Ja'a trigo tu'kílobä, mägøøxmil chowhada'añ. Y ja'a cebada tægøøgkílobä, jaduhñ chowhadaambä mägøøxmil. Pero cap yø'ø hon myaghäyowät ni yø'ø vino.

7 Mänitā Meeghuung ja'a nocy yhahoo'tstúutcombä ja'a miämädaaxc-hithahoočpä. Mänitā miämädaaxpä animal miänaañ:

—Min huug hix.

8 Mänitøchä craa tu'ug njaac híxcombä, ja'a hānajtý xøhjäpä ja'a mäyagho'pä. Cuaañähgøxp hānajtý yhäña'ay ja'a poob-lómnäbä. Høxhaamä møjcu'uhaambä hānajtý piamiñ. Mänitā cuhdujt hajxy miooyyä hädaa yaabä naaxwiin coo jäya'ay hajxy yaghó'ogät tu'mädaaxc-hitpä. Hadsip hajxy hānajtý miäyagho'oga'añ, yuuhaam, pa'amhaam, caahaam.

9 Mänitā Meeghuung ja'a nocy yhahoo'tstúutcombä ja'a miämägøøxc-hithahoočpä. Mänitøchä háañämähajxy jiiby nhijxy altarpa'c, ja'a hajxy hānajtý tøø yagho'ogyíjábä ja'a Diosmädia'agyquiøxpä. Paady hajxy yagho'cä coo hajxy hānajtý hoy tøø jiaañch tehñ quiudiuñ.

10 Mänit hajxy møc yaaxy:

—Dios, miich højts nWiindsønñhajpy. Miichä tøyhajt mmøød. Mänaa højts nnø'ty xyaghawiimbíjtät jiiby naaxwiin.

11 Mänitā poobwit hajxy cødu'ug miooyyä. Mänit hajxy ñāmaayyä coo hajxy ween jiaac poo'xy høxtä coonä hānajtý pedyii tøø yagho'ogyii ja'a hermano ja'a Jesucristo hajxy mäduumbä.

12 Mänitā Meeghuung ja'a nocy yhahoo'tstúutcombä ja'a miädädujc-hithahoočpä. Mänitā hujx møc ñajxy. Mänitā xøø jyiñøøyy nebiä jiñwitän. Mänitā po'o quiähxø'cy nebiä nø'tiän.

13 Mänitā madsa'a tsajtcøxpä quiahy naaxwiin jaanč tehñ miay; jaduhñ quiahy nebiä piidstøøm piojca'ayän.

14 Mänitā tsajt yhadägøyyøñä nebiä nocy yhaxädsachän. Mänitā tun cøxiä wiingtuum ñä'ä yajnøcxä møødä naax hānajtý hijpä mejyquiujc.

15 Mänitā jäya'ayhajxy nägøxiä jiiby ñiguiyu'tsä tsaajutjooty, møødä jimbä tsaadunjootypä, møødä reyhajxy, møødä jäya'ayhajxy møjhjäpä, møødä mäyøøjäya'ayhajxy, møødä soldadowiindsønñhajxy, møødä jäya'ayhajxy ja'a møjcuhdujtmøødpä, møødä nä'ä pajäya'ayhajxy.

16 Mänitā tsaadún hajxy ñāmaayy:

—Højts nähgahbéjtäc. Jaduhñ højtsä Dios xquia'a híxät ja'a jim häñaabiä tsajpootyp. Jaduhñ højtsä Meeghuung xquia'a yajtsaačhpógät.

17 Tøø yhabaatnä coo højts hajxy xyajtsaačhpøgaannä nägøxiä. Cab højts hoy nmee'xtuga'añ.

7

1 Mänitøchä Diosmoonsä mädaaxc nhijxy coo hajxy hānajtý jim tiäna'ay hanidiuhmjaty mäduñjatiä naaxteec. Mädaaxnaax hajxy hānajtý tiäna'ay. Yhadupjiä poj hajxy hānajtý, jaduhñ quia'a pójnät naaxwiin ni mejywyiing ni quepyquiøxp.

² Mänítøchä Diosmoonsä tu'ug jadähooc nhíxcombä coo hänäjty piedø'øy xøøbädsømypiä, coo ja'a Diossello hänäjty miøødä. Mänit hajxy møc miøjyaaxä, ja'a nämädaaxpä, ja'a hajxy hänäjty tøø quiuhdujtmø'oylíjábä coo hajxy quiädiéeyät, coo hajxy cøxypänejpíä jiatcø'øwät hädaa yaabä naaxwiin møødä jim mejjiooty. Mänit hajxy ñämaayyä:

³ —Cab hajxy mgädiéeyät jim naaxwiin ni jim mejjiooty, ni yø'ø quepychaa hajxy nej mga'a tünät, høxtä coonä højtsä jäya'ayhajxy hänäjty tøø nseñapäda'agy wyiinnähgopcøxp, ja'a hajxy Diosmäduumbä.

⁴ Mänítøchä mächohnd nmädooy coo ja'a Israel yhap yhoc hajxy hänäjty yajseñapäda'aga'añ nämägo'x-cujuxychägui'xmädaaxmilpä. Nämajmetscjaty hajxy hänäjty yajseñapäda'aga'añ.

⁵ Nämajmejtsmil hajxy hänäjty yajseñapäda'aga'añ ja'a Judá yhap yhoc-hajxy, møødä Rubén yhap yhoc-hajxy, møødä Gad yhap yhoc-hajxy,

⁶ møødä Aser yhap yhoc-hajxy, møødä Neftalí yhap yhoc-hajxy, møødä Manasés yhap yhoc-hajxy,

⁷ møødä Simeón yhap yhoc-hajxy, møødä Leví yhap yhoc-hajxy, møødä Isacar yhap yhoc-hajxy,

⁸ møødä Zabulón yhap yhoc-hajxy, møødä José yhap yhoc-hajxy, møødä Benjamín yhap yhoc-hajxy.

⁹ Mänítøchä majiäya'ay nhijxy. Wiinduhmyhagajpt hajxy hänäjty chooñ. Cøjhayuucjaty hajxy hänäjty miädia'agy. Ja'a Dios hajxy hänäjty jim jiuhdänaawiädijpy maa ja'a Meeghuungwiinduumän. Jaanč tehñ miay hajxy hänäjty jaduñ; cab hajxy hänäjty hoy yajmäčhowa'añ. Poobwitmøød hajxy hänäjty. Møødä xi'iwhaay hajxy hänäjty quiø'øgaphaty.

¹⁰ Mänit hajxy nägøxiä yaaxy møc:

Xyajnäwaats højtsä Dios møødä Meeghuung. Gobiernähajpä Dios jaduñ.

¹¹ Nägøxiä ja'a Diosmoonsä ja'a Dios hajxy hänäjty jiuhdänaawiädity. Møødä majjäya'adiøjc-hajxy hänäjty jiuhdänaawiädijtäbä møødä animalhajxy ja'a nämädaaxpä. Mänitä Dios hajxy wyiinjiicädaacy; wyiingudsähgøøyy hajxy jaduñ.

¹² Mänit hajxy miänaañ:

Tsøgä Dios hajxy jaanč tehñ wyiingudsähgøøyyäm cøjxta'axiøø.

Tsøg hajxy mänáañäm coo miøjjä jiaančä, coo quiuhwijjiä, coo miäjaamøødä.

Tsøg hajxy nämáayyäm: “Dioscuju'uyäp.”

¹³ Mänítøchä majjäya'ay tu'ug xmiäyajtøøyy:

—Pøñäda'a yø'øduhñ poobwitmøød. Maa hajxiäda'a chooñ.

¹⁴ Mänítøch nhadsooy:

—Wiindsøñ, cáboch nnajuø'øy. Miichäda'a mnajuøøby.

Mänítøch xñämaayy:

—Yø'ø jäya'ayhajxy, tøø hajxy jiaanč tehñ chaačhpøcy. Tøø hajxy ñähho'tu'udyii ja'a Meeghúungäm. Jaduhñ hajxy tøø yajnähwáatsäbä.

¹⁵ Paady hajxy jim tiäna'ay Dioswiinduum. Xøømdsuhmä Diostuung hajxy jim tiuñ. Cueendähájtäp hajxy ja'a Diósäm.

¹⁶ Cabä yuu hajxy mänäa yagjuø'øwaañnä, ni cab hajxy tiødsø'øwáañänä. Cab hajxy xiøøno'ogáañänä, ni cab hajxy yhañho'ogáañänä.

¹⁷ Ja'a Meeghuung, jim yhity maa ja'a Dios yhäña'ayän. Je'e hajxy cweendähadaamb yajxón. Cab hajxy jiø'øwaañnä xiuudsaañnä je'eguiøxpä coo hajxy yajxoonda'aga'añii ja'a Diósäm.

8

¹ Mänitä Meeghuung ja'a nocy yhahoo'tstúutcombä ja'a miäjuxtujc-hithahoočhpä. Mänit jim yhamoon tsajpootyp cupc-hora.

² Mänitä Diosmoonsä juxtujc nhijxy coo ja'a Dios hajxy hānajtj jim wyi-indāna'ay. Mänitä xuuxt hajxy miooyyā cødu'ug.

³⁻⁴ Mänitä Diosmoonsä wiingpä miejtpä. Jimä orojøønebøhñdy hānajtj miøødä. Mänit hoy tiānaaxiøpy maa ja'a orohaltar mäwiingonān, jim mädøyyä maa ja'a Dios hānajtj yhäña'ayān. Mänitä poom may miooyyā coo jim jiögāt ja'a orohaltarnähgøxp. Coo'pä ja'a poomjoc hānajtj jim maa ja'a Diosān. Jimä Dios hajxy hānajtj pia'ya'axy, ja'a Diosmädia'agy hajxy hānajtj mæbøjpä.

⁵ Mänitä Diosmoonsä ja'a jøønebøhñdy quionø'cy. Mänitä jøømbajc hoy quiuwobø'øy, ja'a hānajtj jim hijpä maa ja'a altarān. Mänit quiuhga'tsnajxy naaxwiin. Mänit wiädsujcy møødä hānee yaaxy. Mänitä hujx ñajxy.

⁶ Haa ja'a näjuxtujcpä Diosmoonsähajxiä, ja'a xuuxtmøødpä cødu'ugä, mänit hajxy ñiyhahixøøyyānā coo hajxy hānajtj xiu'uxa'añ.

⁷ Mänit tu'ug xiuuxy. Mänitä caandøøtstuu quiahy hädaa yaabä naaxwiin møødä jøøn møødä nø'ty. Mänitä naaxwiin tiooyy ja'a hānajtj miädägøøghitpä cøxiä, møødä quepychaa møødä hujtshaay.

⁸ Mänitä Diosmoonsä ja'a miämetspä xiuuxy. Mänitädsä tun crúundäbä hoy quia'ay mejjiooty. Tooby hānajtj je'e.

⁹ Mänitä miädøøgpä mejy ñø'tiøøyy. Cøxy ho'c ja'a animalhajxy jaduhñ. Cøjxä barco qyiñ.

¹⁰ Mänitä Diosmoonsä miädägøøgpä xiuuxy. Mänitä madsa'a crúundäbä quiahy jim tsajpootyp. Tooby hānajtj je'ebä. Mänit hoy quia'ay maa ja'a miädägøøghitpä mõjnøøjān, maa ja'a miädägøøghitpä nøøgopcān.

¹¹ Jaduhñä madsa'a hānajtj xiøhaty Tahm. Mänitä nøø miädägøøghitpä tiahmøøbiä. Mänitä jäya'ayhajxy may yho'cy.

¹² Mänitä Diosmoonsä miämädaaxpä xiuuxy. Mänitä xøø tu'nax yho'cy maa hānajtj yhawijtstuquiān ja'a miädägøøghitpä. Jaduhñä po'o jiajpä møødä madsa'a. Mädaaxc-hora ja'a xøø hānajtj quia'a hañ xøøm; mädaaxc-hora ja'a po'o hānajtj quia'a hañ coods.

¹³ Mänitøchä wiistä tu'ug nhijxjäyøøyy tsajtcøxp. Mänit møc yaaxy:

—Coo ja'a Diosmoonsähajxy jiaac xú'uxät ja'a jaac tægøøgpä, mänitä jäya'ayhajxy jiaančh tehñ chaächpøga'añ, ja'a hajxy jiiby tsānaabiä naaxwiin.

9

¹ Mänitä Diosmoonsä miämägooxpä xiuuxy. Mänitøchä madsa'a tu'ug nhijxcahy, naaxwiin hoy quia'ay. Mänitä madsa'a hawaatst miooyyā coo ja'a jut jaduhñ yhawägüi'tstú'udät ja'a jaančh tehñ quiøøcpä.

² Mänitä jut yhawägüi'tstuuty. Mänitä jøønjoc qui'ixc piädsøømy. Mänit cøxp chajpejty. Mänitä xøø cøjx wyiindägø'øyii. Mänitä tsajt cøjx jiaty jøønjocjooty.

³ Mänitä mamiu'u jocjooty piädsøømy. Mänit hajxy yaa tiägøøyy jäyøøbiä hädaa yaabä naaxwiin. Mänitä mu'u tøjpt hajxy miooyyā nebiä caa'ptiøjptān.

⁴ Mänit hajxy yhanehmä coo hujtshaay hajxy quia'a jøø'xät ni quepychaa. Je'e hajxy tiøbäp pønjetiä Diosseñä hānajtj ca'a møød wyiinnähgopcøxp.

⁵ Coo pøn jaduhñ tiøbøøjät, jaduhñä mu'udøjpt jiäwø'owa'añ nebiä caa'ptiøjpt jiäwø'øyān. Mägooxpo'o ja'a mu'uhajxy hānajtj miädøba'añ. Pero cabä cuhdujt hajxy miooyyā coo jäya'ay hajxy yaghó'ogāt.

⁶ Ja wi'i yho'ogaambä jäya'ayhajxy hānajtj, pero cab hajxy jaduhñ ñä'a ho'oga'añ.

⁷ Jaduhn mäwíinádsä mu'uhajxy hānajty quiāhxø'øgy nebiä tsiptuumbä cuaayän. Jim hajxy hānajty miøødä quiuhduum nebiä orocuhjenbän. Jaduhnä wyiin jiojphajxy hānajty quiāhxø'øgy nebiä ya'adiøjcän.

⁸ Jaduhnä cuhwaay hajxy hānajty miøødä nebiä to'oxiøjcuhwaayän. Jaduhnä tiu'tsthajxy hānajty quiāhxø'øgy nebiä leóntu'tstän.

⁹ Nähbujxt cuhbujxt hajxy hānajty nebiä hacxpøjtän. Coø hajxy hānajty jiäyøy, jaduhn hajxy hānajty jiädity nebiä tsiptuumbä cuaaguiarretän.

¹⁰ Jaduhnä tøjpt hajxy hānajty miøødä nebiä caa'ptiøjptän. Jaduhnä cuhdujt hajxy hānajty miøødä coø jäya'ay hajxy tiøbät mägoøxpo'o.

¹¹ Haa ja'a mu'u wyiindsøn

¹² Jaduhnä tsø'ty tu'ug jiajtä. Metscä tsø'ty hānajty quia'a pedyiinä.

¹³ Mänitä Diosmoonsä miädädujcpä xiuuxy. Mänitøchä mädia'agymnädooyy coø jäya'ay jim quiapxy maa ja'a orohaltarän, jim Dioswiinduum. Hamädaaxteecä orohaltar hānajty.

¹⁴ Mänitä Diosmoonsä miädädujcpä ñämaayy, ja'a hānajty tøøbä xiu'uxiä:

—Nøcx ja'a Diosmoonsähajxy mädaaxpä mäguejø'øw, ja'a jim cuxochpä maa ja'a Eufratesmøjnøøjän.

¹⁵ Mänit hajxy hoy miäguejø'øyii. Mänit hajxy wyiinguejxä coø jäya'ay hajxy yaghó'ogät tu'ug tägøøgpuxy. Jäguemiä hajxy hānajty tøø yajnähdijyii coø hajxy miäyaghó'ogät. Coø ja'a miädädujcpä Diosmoonsä jaduhn xiuuxy, habaat jaduhn coø hajxy jiatcø'øwät.

¹⁶ Mänitøch nmädooyy coø mejtsmägo'xmillón soldado hajxy hānajty miøødä; haagä cuaayhāñaby hajxy hānajty jaduhn.

¹⁷ Haagä caačpujxtä soldadohajxy hānajty. Jaduhnä pujxt color hānajty miøødä, møødä tsaptspä, møødä hucypiä, møødä pu'tspä. Jaduhnä cuaay quiopc-hajxy hānajty nebiä leóncopcän. Tägøøgtu'u hānajty jii by piädsømy yhaawjooty, møødä jøøn, møødä joc, møødä azufre.

¹⁸ Jaduhnä jäya'ayhajxy yagho'cä ja'a tu'ug tägøøgpuxypä, jøønhaam, joc-haam, azufrehaam.

¹⁹ Jimä cuaay mäjaa hajxy hānajty miøødä maa yhaawhajxiän møød jii by maa tiu'tsthajxiän. Jaduhnä tiu'tsthajxy hānajty quiāhxø'øgy nebiä tsahñdycopcmøødpän. Ja'a tiu'tsthaama jäya'ay hajxy hānajty yajtsu'uch.

²⁰ Pero ja'a jäya'ayhajxy ja'a mähmøøyyäbä, cabä haxøøgcuhdujt hajxy ñajtshixøøyy. Møjcu'ugong hajxy hānajty jiaanč tehñ wyiingudsähgøøñäp, møødä oronähwopy, møødä platanähwopy, møødä hobiujxtnähwopy, møødä tsaahädiuñ, møødä quepychech. Cab yø'øduhmä ñä'a hixy, ni quia'a mädoy, ni quia'a yo'oy.

²¹ Wi'i jiäya'ay-yagho'pnä ja'a jäya'ayhajxy hānajty. Wi'i miäbädaacnä hajxy hānajty haxøøgwiinmahñdyhaam. Wiingä tägächä to'oxiøjc hajxy miøødsäna'aynä. Møød hajxy hānajty wyi'i mieečhñä.

10

¹ Mänitøchä Diosmoonsä tu'ug nhijxy jaanč tehñ miäjaamøød. Jim hānajty miänacy tsajpootyp. Jocjooty hānajty miänacy. Jimä hi'inč hānajty miøødä quiuhduum. Jaduhnä wyiin jiojp hānajty jiajy nebiä xøøjän. Jaduhnä tiecy hānajty quiāhxø'pä nebiä toobiän.

² Jimä nocyhuung hānajty quiø'øbøc-haty ja'a haxädsajtsu'udypä. Mänitä yhanajtytiecy piädaacy tøødstuum.

³ Mänit mœc yaaxy nebiä leóngän. Mänitä hänee ja'a juxtujcpä yaaxwiimbijty. Capx hajxy jaduhñ.

⁴ Mänitœch nja tägø'øwaañ cujahbiä waambä häneehajxy quiapxy. Mänitœchä jäya'ay tu'ug xñämaayy jim tsajpootyp:

—Cab jaduhñ mgujáayät nebiä häneehajxy quiapxiän. Ni pøn jaduhñ mga'a yajmøødmädiá'agät.

⁵ Haa ja'a Diosmoonsä hänajty jim tänaabiä mejywyiing møød jim tø'ødstuum, mänit yhahooguiø'ø chajxajy.

⁶ Mänit miänaañ:

—Cøjxta'axiøø ja'a Dios ñä'ägädä hity. Cøxiä quiunuu'xy møødä tsajt, møødä naaxwiin, møødä mejy, hotyehm miädyiijatiä. Ja'a Dios jaduhñ mänaamb cooc tøø yhabaatnä.

⁷ Coø yhabáadät coo ja'a miäjuxtujcpä Diosmoonsä xiu'uxa'añ, tøø ja'a Dios hänajty yajtøjaty nebiä quiuguexyhajxy hänajty jecy tøø yhawaanän. Cabä wiinghäna'c yhawaanä; ja'a quiuguexiähajtiä yhawaanä.

⁸ Mänitœchä jäya'ay jim tu'ug xñämáaguimbä tsajpootyp:

—Nœcx ja'a nocyhuung pøjtsow ja'a haxädsajtsu'udypä, ja'a Diosmoonsä quiø'øbœc-hajpiä.

⁹ Mänitœchä Diosmoonsä ja'a nocyhuung hoy nmäyujwa'añ coöch xmió'owät. Mänitœch xñämaayy:

—Pœc; pu'uy. Pa'ag mhaawjooty mjuø'øwa'añ nebiä møjtsiinnøøjän. Pero coo jiiby quiäda'aga'añ maa mjøø'xytiøjcän, mänit mjuø'øwa'añ coo tiahmä.

¹⁰ Mänitœchä nocyhuung hoy njaançh pøjtsoy. Mänitœch njaançh puhy. Pá'aghœch jaduhñ njaançh juøøyy nhaawjooty nebiä møjtsiinnøøjän. Pero coo jiiby jiaançh cädaacy maach njøø'xytiøjcän, mänitœch njaançh juøøyy coo tiahmä.

¹¹ Mänitœch hajxy xñämaayy:

—Tspicœxp mnägapxtägätsät nebiä jäya'ayhajxy jiada'añ yhabeta'añän, ja'a hajxy jim tsänaabiä wiinduhmyñaaxwiin, ja'a hajxy wiinduhmyhayuuc mädiaacpä, møødä gobiernähajxy.

11

¹ Mänitœchä paxyquipxt hajxy xmiøoyy. Mänitœch hajxy xñämaayy:

—Nœcx ja'a Diostøjc quipx møødä altar. Mächow ja'a jäya'ayhajxy, nanaagä Dios hajxy wyiingudsähgø'øy.

² Pero cab jaduhñ jim mguípxät Diostøghaguuy. Ja'a jäguembä-jäya'ay ja'a cuhdujt hajxy tøø mio'oyii coo hajxy jim guiobiernähädät maa ja'a Dioscajptän juxychägui'xmejtspo'o.

³ Ngue xáambiœchä nguguexy metscä coo hajxy jim miädiá'agät ja'a hœœhcœxpä juxychägui'xmejtspo'o. Jiñwitmøød hajxy wiädita'añ.

⁴ Haa ja'a Diosquexyhajxy nämetspä, ja'a olivoquepy hajxy je'e ja'a metspä, møødä ceratoyøhñdy metspä, ja'a jim tänaabiä Dioswiinduum. Ja'a Dios ja'a naaxwiin cunuu'x.

⁵ Coø ja'a Dioscuguexyhajxy hänajty cøxypänejpiä jia tuna'añii, mänitä jøøn hajxy yhœxpäxujja'añ yhaawjooty. Cøxy toyaambä miädsiphajxy hänajty jaduhñ. Jaduhñ hajxy yho'oga'añ.

⁶ Cuhdujtmøødä Dioscuguexyhajxy hänajty coo hajxy quia'a yajtú'uwät, naagxøø hajxy hänajty miädia'aga'añ ja'a Dioscœxpä. Jaduhñä cuhdujt hajxy hänajty miøødäbä coo nøø hajxy wia'añdiúnät, yajnø'tycójät. Jaduhñä cuhdujt hajxy hänajty miøødäbä coo ja'a jäya'ay hajxy yajpa'ambädät hädaa yaabä naaxwiin, coo häyohn hajxy yagjadøøjät, naaghoocä jiiothajxy hänajty chocy.

7 Coo hajxy hānajty tōō miādiaacpādōōñā, mānitā animal jiiby tu'ug piādsōma'añ maa ja'a jut jaanč tehñ quiōōcpān. Mānitā Dioscuguexyhajxy yagho'oga'añii.

8-9 Tägōōgxōō ja nāhgupc hajxy jim wyijtsna'awa'añ mōjcajptooty maa ja'a Jesús jecy miōjpahbejtān cruzcōxp. Haa ja'a cajptjāya'ayhajxiā, haxōōgā cuhdujt hajxy hānajty miōōdā nebiā jecyjiāya'ay ja'a cuhdujt hajxy hijty miōōdān, ja'a hajxy hijty jim jegyhajty tsānaabiā Sodoma mōōdā Egipto. Cabā cuhdujt hajxy ñā'āgā yega'añ coo ja'a ho'ogyjiāya'ayhajxy jim yaj-naaxtägō'ōwōōjāt. Minaamb hajxy yheeba'añii. Wiinduhmyhagajpt hajxy choona'añ. Cōjhayuuc hajxy miādia'aga'añ.

10 Jaanč tehñ xioōnda'agaambā jāya'ayhajxy hānajty coo ja'a Dioscuguexyhajxy hānajty tōō yho'ogy. Paady hajxy hānajty jootcujc ñijāwōōyyānā, cab hajxy hānajty yhadsibāānānā. Paady hajxy hānajty hotyijā ñā'ā nimio'owa'añii hamiñ haxōpy.

11 Coo tägōōgxōō ja nāhgupc hānajty tōō yhabety, mānitā Dios ja'a quiuguexyhajxy hānajty yagjujypioğa'añ jadāhooc. Pōnjaty hānajty hixaamb, mānit hajxy hānajty chāhgōōbiōğa'añ.

12 Mānitā Dioscuguexyhajxy miādowa'añ coo hajxy hānajty mōc miōjya'axyii jim tsajpootyp:

—Pet hajxy yam cōxp.

Mānit hajxy jocjooty ñōcxa'añ tsajpootyp. Hixāānāp hajxy ja'a miādsípām.

13 Mānitiā hujx jaanč tehñ miōc ñaxa'añ. Mānitā tōjc may piuma'añ ja'a miāmajc-hitpā jim cajptooty. Juxtujcmilā jāya'ayhajxy yho'oga'añ. Ja'a hajxy hānajty tōō jiaac māmō'ōyābā, jaanč tehñ chāhgō'ōwaamb hajxy jaduhñ. Mānitā Dios tsajpootypā hajxy wyiingudsāhgō'ōwa'añ.

14 Jaduhñ ja'a tsō'ty ñajxy ja'a miāmetsc-hoocpā. Paquiā yhabaadāāngombā coo ja'a miādāgōōgpā ñaxāāngombā.

15 Mānitā miājuxtujcpā Diosmoonsā xiuuxy. Mānit hajxy jim mōc yaaxy tsajpootyp:

Ja'a Jesucristo hajxy nWiindsōñhajtām.

Tōō je'e miōjtägō'ōy wiinduhmyñāaxwiin.

Cōjxta'axiōō guobiernāhadaāñnā.

16 Jimā nāhii'xmādaaxpā majjāya'ay ja'a Dios hajxy hānajty jiuhhāñāawiādity. Mānitā Dios hajxy hoy wyiinjiicāda'agy. Wyiingudsāhgōōyy hajxy jaduhñ.

17 Mānit hajxy miānaañ:

Dios, hōjts miīch nWiindsōñhajpy.

Cōxiā miīch mājaa mmōōdā. Cōjxta'axiōō miīch mhity.

Dioscujú'uyāp coo miīch tōō mmōjtägōōñā, coo tōō mdāgōōñā gobiernāhajpā.

18 Tōō ja'a jāya'ayhajxy nāgōxiā jia jootma'ady. Pero tōō yhabaady coo miīch myajcumādowaāñnā.

Tōō yhabaady coo miīchā ho'ogyjiāya'ayhajxy myajtōyhajtyegaāñnā, coo mya-jcuhdāgoyyaāñnā pōnjatiā jāya'ayhajxy yaa yajtu'udāgooby hādaa yaabā naaxwiin.

Jaduhñ tōō yhabaatpā coo miīchā hoyhajt ja'a weenhajt hajxy mmo'owa'añ pōnjaty miīch tōō xquiapxpaady, mōōd pōnjatiā mmādia'agy hamuumdu'joot tōō xyajtuunā,

mōōd pōnjaty miīch tōō xwyiingudsāhgō'ōy, hoyyā mōjtuung hajxy tōō quia'a ja mōōdhaty.

19 Mānitā Diostōjc jim yhawaach tsajpootyp. Mānitā cāja jiiby quiāhxō'cy tōgooty mōōdā contrato, ja'a Dios jecy yajcuhdūjcābā. Mānit tiāgōōyy

wädsujpä. Mänitä hänee mœc jiädijty; mœødä hujx mœc ñajxy. Mänitä caandœtstuu may quiahy.

12

¹ Mänitä hijxtahnd jim quiähxœ'cy tsajtcœxp jaančh tehñ hoy-yagjuœœñä. Jimä to'oxiœjc hñajty tu'ug yhajajy nebiä xœœjñ. Jimä po'o hñajty ya-jtehmbety. Majmetscä madsa'a hñajty quiuhjenhaty.

² Tœœ hñajty tiehñ yhabaatnä coo yhuungpaada'añ. Paady hñajty wyi'i ya'axy.

³ Mänitä hijxtahnd wiingpä wyiingähxœ'combä. Tu'ugä dragón hñajty cruundä. Tsaptsä ñi'x hñajty. Juxtujcä quiopc hñajty haagä cuhjenmœød. Majcä quiaa'pt hñajty.

⁴ Tiu'tsthaamä madsa'a tu'ug tägœœgpuxypä yajcahy naaxwiin ja'a tsajtcœxpä. Mänitä dragón hoy wyiindänaaxiœpy ja'a to'oxiœjc ja'a hñajty huungpaadaambä. Nägooyä yhuung hñajty myina'añ, mänit hñajty chu'udsa'añ.

⁵ Mänitä ya'ayhäna'c myiiñ. Je'e hñajty tunaamb gobiernä wiinduhmyñaaxwiin. Mœc hñajty jaduñ jiaančh tehñ yhane'ema'añ. Mänit jim yajnœcxä Dioswiinduum.

⁶ Mänitä to'oxiœjc piäyœ'cy. Pactuum ñœcxy. Jimä Dios hñajty tœœ yajnähdiij coo jim yajcayœœjät mil cumejtsmägo'x cudägoœœghii'xxœœ.

⁷ Mänitä tsip jim piädœ'nä tsajpootyp. Ja'a Miguel hñajty tuumb Diosmoonsäwiindsœñ. Je'e ja'a Diosmoonsähajxy miœœdpädœ'c. Ja'a dragón ja'a mioonsähajxy mœœdpädœ'pä. Mänit hajxy ñiñämejtsä.

⁸ Cabä dragónhajxy ñä'ä mäjädaacy. Mänit hajxy quia'a cuhdujtmœoyyänä coo hajxy jim jiaag hídät tsajpootyp.

⁹ Mänitä dragónhajxy jim yhœxquéjxänä; yaa hajxy miänajnä hädaa yaabä naaxwiin. Haa ja'a dragónhajpä, ja'a mœjcu'ugong je'e, ja'a jecychahñdy je'e. Jaduhñ je'e xiœhajpä Satanás. Je'e hajxy yaa xwiinhœhñäm hädaa yaabä naaxwiin.

¹⁰ Mänitä jäya'ay jim mœc yaaxy tsajpootyp.

—Tœœ ja'a Dios miäjäda'agy. Gobiernä je'e tiunaamby mœødä Jesucristo. Tœœ ja'a mœjcu'ugong yhœxquéjxänä. Xœœmdsuhñ hœjts nmägu'ughajpähajxy hijty jim yajnähdsœmyii Dioswiinduum.

¹¹ Paady hœjts nmägu'ughajpähajxy tœœ miäjäda'agy, coo ja'a Meeghuung hajxy tœœ xñähho'túutäm, mœød coo ja'a Dios hajxy quiaapxpaady. Hoy hajxy hñajty jia ho'oga'añ, cab hajxy hñajty chähgœ'œy. Hamdsoo hajxy jaduññiñähdujcä coo hajxy yhœ'ogät.

¹² Mxoondä'agäp hajxy, pœnjaty jim tsänaaby tsajpootyp. Pero pœnjaty jiiby tsänaaby naaxwiin, haxœœg hajxy mäßœcy mjada'añ mhabeta'añ, je'eguiœxpä coo ja'a mœjcu'ugong hajxy jiiby tœœ xñägäda'agy. Hawa'anda'agaambä mœjcu'ugong jaduñ. Ñajuœœby jaduñ coo cuhdujt jejcy quia'a mœœdhada'añ coo cœxypänejpä jiatcœ'œwät.

¹³ Coo ja'a dragón yhiixy coo hñajty tœœ quiäda'agy naaxwiin, mänitä to'oxiœjc tiägœœyy päboobiä, ja'a hñajty tœœ yhuungpádiäbä.

¹⁴ Mänitä to'oxiœjc wiistäqueect metsc miooyä mœjjaty, neby jaduñ jäyœy ñœcxät pactuum maa hñajty yajcaya'añiñän tägœœgjomœjtä cupc. Jäguemä dragón miähmœ'œwät.

¹⁵ Mänitä dragón nœœ com yhœxpäxujy nebiä to'oxiœjc jaduññœœgomdsœmœœjät.

¹⁶ Mänitä nœœgom cœjx yhuugœ'œy naaxooty. Puhbejtä ja'a to'oxiœjc jaduñ.

¹⁷ Mänitā dragón ja'a to'oxiøjc jiaanč tehñ ñähawa'andaacy. Mänitā dragón tiägøøyy tsiptuumbä møødä to'oxiøjc yhuunghajxy, ja'a hajxy hānajtý yaa tsānaabiä hädaa yaabä naaxwiin, ja'a Diosmädia'agy hajxy hānajtý mǎbøjpä, ja'a Jesucristo hajxy hānajtý capxpaatpä.

13

¹ Jímhøch hānajtý ndāna'ay mejypia'a. Mänitøchā animal cruundā nhi-jxpādsøømy mejjiootý. Juxtujcā quiopc hānajtý haagä xøømøød. Haa ja'a xøø jaduhmbä, haagä haxøøgjatiä Dios hajxy ñänømy. Majcā quiaa'pt hānajtý haagä cuhjenmøød.

² Jaduhnä ñi'x hānajtý nebiä cuxiøøbøjtän. Jaduhnä tiecy hānajtý nebiä osotequiän. Jaduhnä yhaaw hānajtý nebiä leónhaawän. Mänitā animal møjcuħdujt miooyyā møødä møcmājaa. Ja'a dragón jaduhn yejc; yhamdsoo je'e jaduhn.

³ Tu'ugā animal quiopc hānajtý quiāhxø'øgy nebiä cuhbuxypän. Tøø hānajtý chóoccombä. Mänitā jāya'ayhajxy nǎgøxiä jiaanč tehñ yagjuøøyy. Mänitā animal hajxy tiägøøyy pawādijpā.

⁴ Mänitā dragón hajxy wyiingudsähgøøyy, je'eguiøxpä coo ja'a animal møjcuħdujt hānajtý tøø mio'oy. Jaanä ja'a animal hajxy wyiingudsähgøøbiä. Jaduhn hajxy hānajtý miāna'añ:

—Ni pøn mājaa jaduhn quia'a møødä nej yø'ø animal mājaa miøødän. Ni pøn jaduhn quia'a mǎjädä'agāt coo yø'ø animal hajxy ñä'ä mǎdsibø'øwät.

⁵ Mänitā animal cuħdujt miooyyā coo ja'a Dios haxøøg ñänømät. Jaduhn quiuħdujtmøoyyābä coo yhané'emät juxychägui'xmejtspo'o.

⁶ Jaanč jatcøøyy jaduhn. Haxøøgä Dios jiaanč nänøømy, møødä Dios tiøjc, møød hajxy jím hijpā tsajpootyp.

⁷ Jaduhn quiuħdujtmøoyyābä coo miädsibø'øwät ja'a Dioshuunghajxy, coo ja'a Dioshuunghajxy quia'a yajmājädä'agøøjät. Mänit quiuħdujtmøoyyābä coo ja'a jāya'ayhajxy yhané'emät nǎgøxiä, ja'a hajxy yaa tsānaabiä wiin-duhmyñāaxwiin.

⁸ Je'eds hajxy jaduhn animalwiingudsähgøøyy, pønjatiä xiøø hānajtý jím ca'a miimb cujaay nocyquiøxp, ja'a Meeghuung miøødpä, ja'a højts xñāhho'túutāmbä. Pønjatý cøjxta'axiøø jugyhadaamb nebiä Dios jiugyhatiän, je'edsä xiøøhajxy jím miimb cujaay nocyquiøxp. Tøøyyāmā xiøøhajxy hānajtý quiujähyyäxä coo ja'a naaxwiimbä yhawijý tiøø'xtaacy.

⁹ Naxy hajxy hädaa mhuuc tehñ wyiinjuø'øwät.

¹⁰ Pønjatý mǎdsuumb, yajtsuumdägatsaamb hajxy je'ebä. Pønjatý mǎyagho'p espadahaam, jaanä jaduhn hajxy yagho'tägatsaanäbä espadahaam. Hix, pønjatý jaduhn Dioshuung, tsipcøxp hajxy miee'xtúgät; tsipcøxp hajxy miäbøgät.

¹¹ Mänitøchā animal wiingpä nhixnaaxwiimbädsøømy. Jaanä cruundā je'ebä. Metscā quiaa'pt hānajtý je'e nebiä meeghuungcaa'ptän. Wiing hānajtý quiapxy miādia'agy nebiä dragóngän.

¹² Jaduhnäsä møjcuħdujt hānajtý miøødäbä nebiä jayøbajtpä møjhanimalän. Quipxy hajxy hānajtý yhane'emy nāmetscä. Mänitā miämetspä møjhanimal yhanehmy coo ja'a jayøbajtpä wyiingudsähgø'øwøøjät, ja'a hānajtý cuhbuxypä tøø chó'oguiäbä.

¹³ Haa ja'a møjhanimal miämetspä, madiu'u hijxtahnd yajcähxø'cy haagä hoy-yagjuøøñājatý. Hijxwiinduumä jøøn yajcahy naaxwiin.

¹⁴ Coo ja'a jaya'ayä hijxtahnd hajxy yhijsy, yaghijxmañøøyyä hajxy jaduhñ. Mänit hajxy ñämaayyä coo ja'a animal hajxy yhahädiuunnáxät, ja'a hñajty tøø quiuhbuxyíjábä.

¹⁵ Mänitä miämetspä animal quiuhdujtmooyyä coo ja'a animal yhahädiuunnaxy yagjuypiógät, yajcapxø'ogät. Jaduhñ je'e quiuhdujtmóoyyábä coo yajyagho'ogøøjät pønñatiä animalhahädiuunnaxy ca'a wiingudsähgø'øwaamb.

¹⁶ Mänitä tsaangu'ughajxy nägøxiä yajseñapädaacy maa yha-hooguiø'øhajxiän, o maa wyiinnähgopcøxphajxiän, miøjjä miuutscä, miäyøø quia'a mäyøøjä.

¹⁷ Pøn hñajty ca'a señamøød, pønä animal xiøø hñajty ca'a møødhájtäp, o ja'a ñúmero, cabä cuhdujt hajxy hñajty mio'oyii coo hajxy jiúyät, coo hajxy tióogät.

¹⁸ Pøn cuhwijy, pøn wiinjuøøby, ween yhuuc najuø'øy nebiä animal ñúmero miädia'agytiägø'øy. Jaduhñ je'e nebiä jäya'ay ñúmeron. Jue'e ñúmero jaduhñ, tädumägo'x cudägøøghii'xtädujc.

14

¹ Mänitøchä Meeghuung nhijxy coo jim tiäna'ay Sióntunnähgøxp. Jimä jäya'ayhajxy hñajty piadänaabiä nämägo'x cujuxychägui'xmädaaxc mil. Yhaagä møød hajxy hñajty cujaay wyiinnähgopcøxphajxy ja'a Meeghuung xiøø møødä Tieedy xiøø.

² Mänitøch jim nmädooyy tsajpootyp nebiä møjnøø may jiäditiän, nebiä hñee møc ya'axiän. Jaduhñ hñajty yajmädoobä nebiä harpa may miäna'añän.

³ Ja'a nämägo'x cujuxychägui'xmädaaxc milpä jäya'ay, ja'a hajxy hñajty tøø yajnähwa'ačhíjábä hädaa yaabä naaxwiin, jemyhöy hajxy hñajty jim yhøøby Dioswiinduum. Haa ja'a nämädaaxpä animalhajxiä, jim hajxy hñajty piahäña'aymøødä majjäya'adiøjc-hajxy. Cabä wiinghäna'c-hajxy jiada'añ ja'a jemyhöy jaduhmbä.

⁴ Haa ja'a nämägo'x cujuxychägui'xmädaaxc milpä jäya'ayhajxiä, cabä wiingto'oxiøjc hajxy hñajty tøø miøødtsäna'ay. Jaanč tehñ yhoj hajxy hñajty jiäya'ayhaty. Majatiä Meeghuung hñajty ñøcxø'øy, pianøcxyp hajxy hñajty jaduhñ. Jayøbajt hajxy yajnähdiijä coo hajxy yajnähwa'adsøøjät, coo hajxy yhuunghadøøjät ja'a Diósäm møødä Meeghúungäm.

⁵ Ni mänaa hajxy quia'a høhñda'agy. Cab hajxy tii poj tii cädieey miøødä jim Dioswiinduum.

⁶ Mänitøchä Diosmoonsä wiingpä nhijxy; jim hñajty jiäyøøwiädity tsajtcøxp. Ja'a Diosmädia'agy hñajty yegaamby ja'a ni mänaa ca'a tågajtspä. Nägøxiä ja'a jäya'ayhajxy hñajty mio'owa'añii, ja'a hajxy yaa tsänaabiä wiinduhmyhagajpt, hoy hajxy wiinghayuucjaty jia møødä.

⁷ Mänitä Diosmoonsä møc miänaañ:

—Wiingudsähgø'øw ja'a Dios hajxy. Näma'aw hajxy jaduhñ coo miøjjä jiaančä. Tøø yhabaady coo ja'a Dios jäya'ay yajtøyhajtyega'añ. Je'eds cøjx yhädiuñ tsajpootyp møødä naaxwiin, møødä mejy, møødä nøøgopc.

⁸ Mänitä Diosmoonsä tu'ug jiaac mänaañ:

—Tøø ja'a møjcajpt Babilonia quiuhdägoj, je'eguiøxpä coo ja'a quiuhdujt jiaanč tehñ yhaxøögä. Tøø ja'a jäya'ayhajxy nägøxiä piajatcø'øy ja'a Babilonia quiuhdujt.

⁹ Mänitä miädägøøgpä Diosmoonsä møc miänaañ:

—Pønä animal wiingudsähgøøby møødä yhahädiuunnaxy, pøn yajseñapädaacp wyiinnähgopcøxp o quiø'øgøxp,

¹⁰ hoyhoyyā Dios jiaanch tehṃ yajcumādowa'añ. Jøønjooty, azufrejooty hajxy chaačhpøga'añ Diosmoonsäwiinduum mөөдä Meeghuungwiinduum.

¹¹ Cøjxta'axiøø hajxy chaačhpøga'añ xøømdsuhṃ, pønjatiä animal wiin-gudsähgøøby mөөдä yhähädiuunnaxy, pønjatiä seña jim mөөdhájtäp.

¹² Pønjatiä Diosmädia'agy määbøjp mөөдä Jesucristo miädia'agy, ween hajxy tehngajnā miee'xtucy.

¹³ Mänitøchä jäya'ay jim tsajpootyp xñämaayy:

—Cujaay jaduhṃ: “Pønjatiä Diosmädia'agy määbøjp, coo hajxy yhö'ogät, jootcuyc hajxy yhida'añ.” Tøyhajt jaduhṃ. Poo'xáannäp hajxy jaduhṃ. Jiah-miedsaambiä Dios jaduhṃ coo ja'a Diosmädia'agy hajxy hoy tøø yajtuñ. Nømä Dioshespíritu miäna'añ.

¹⁴ Mänitøchä jäya'ay tu'ug nyuughijxy. Poobjoccøxp hānajt yhäña'ay. Orocuñjēn hānajt quiuhjenhajpy. Arroztuñt hānajt quiø'øgaphajpy jaanch tehṃ jiøjp.

¹⁵ Mänitā Diosmoonsä tu'ug piädsøømy maa ja'a Diostsajtøjcän. Mänitā jäya'ay miøjyaaxä møc, ja'a hānajt hāñaabiä joccøxp:

—Tøø yhabaady coo ja'a päda'agy myajpädø'ogät jiiby naaxwiin. Tøø ja'a tiøøm miäjay. Nøcx yajpädø'og.

¹⁶ Mänitā päda'agy hoy jiaanch yajpädø'øgy arroztuñjtham hādaa yaabä naaxwiin. Jaduhṃ miädia'agytiağø'øy coo ja'a jäya'ayhajxy yajcumādowa'añii, ja'a hajxy haxøøgcuhdujtmөөдpä.

¹⁷ Mänitā Diosmoonsä wiingpä piädsøømgombä maa ja'a Diostsajtøjcän. Jimä arroztuñt hānajt quiø'øgaphajpä jaanch tehṃ jiøjp.

¹⁸ Mänitā wiing Diosmoonsä piädsøømøyy maa ja'a altarän. Je'e cuhdujtmөөд maa ja'a jøøngøxpän. Mänitā Diosmoonsä møc miøjyaaxä ja'a arroztuñt cabhiipä:

—Tøø ja'a tsaatyp jiiby cha'amy naaxwiin; nøcx yajpädø'og arroztuñjtham.

¹⁹ Mänitā tsaatyp hoy jiaanch yajpädø'øgy arroztuñjtham hādaa yaabä naaxwiin. Mänit hoy piäda'agy maa ñähhädiunø'øyän maa hajxy tiehñdse'ediän. Jaduhṃ mäwiinädsä Dios yajtsaačhpøga'añ ja'a hajxy tøø quia'a määbøquiäbä.

²⁰ Cajtpa'a ja'a tsaatyp hajxy hoy tiehñdse'edy. Comä nø'ty piädsøømy maa ñähhädiunø'øyän. Møjwiinä nø'tymejy quiojy tägøøgmägo'x kilómetro. Coo'pä nø'ty hānajt maa ja'a cuaay frenon.

15

¹ Mänitøchä wiinghijxtahnd jim nhijxy tsajpootyp jaanch tehṃ yhamøj, hoy-yagjuøøñä. Juxtújc-høchä Diosmoonsä nhijxy haagä häyohnmөөд. Je'eduhṃ ñänøømby coo ja'a Dios juxtújc-hooquiä jiaac yajtsaačhpøga'añ ja'a hajxy yaa ca'a määbøjpä hādaa yaabä naaxwiin.

² Mänitøchä hijxt nhijxy. Jim hānajt hamøj quioonna'ay. Nebiä mejjiän hānajt quiähxø'øgy. Jaduhṃ hānajt quiähxø'pä nebiä toobiän. Jimä jäya'ayä hijxt hajxy hānajt wyiindāna'ay, ja'a animal hajxy hānajt tøø quia'a yajmājädä'aguiäbä mөөдä seña, mөөдä xiøø, mөөдä ñúmero. Jimä harpa hajxy hānajt miøødäbä. Ja'a Dios jaduhṃ yejc.

³ Jaduhṃ hajxy hānajt yhöy nebiä Moisés jecy yhöøyyän. Je'e ja'a Dios jecy mäduun. Jaduhṃ hajxy hānajt yhöøbä nebiä Meeghuung yhöyyän:

Wiindsøn Dios, cøxiä miich cuhduj mjaanch tehṃ miøødä. Møj jaanch miich mjaanch tehṃ tiuñ.

Jaančh tehñ yhoy miich mguhdujt jaduhñ. Miich mhanehmby wiin-duhmyhagajpt.

⁴ Caj miich tii pojpa tii cädieey mmøødä. Nägøxiä miichä jäya'ayhajxy xwyiin-gudsähgø'ø.

Nägøxiä hajxy miäna'añ cooc mmøjja cooc mjaančhä. Minaamb miich jäya'ayhajxy nägøxiä xwyiingudsähgø'øwa'añ, ja'a hajxy wiinduhmyhagajptpä, je'eguiøxpä coo hajxy tøø yhixy tøø miädooy coo miich mguhdujt jiaančh tehñ yhooyä.

⁵ Mänitøchä Diostsajtøjc nhijxhawaach jim tsajpootyp maa ja'a Dios yhäña'ayän.

⁶ Mänitä Diosmoonsähajxy jiiby piädsøømy, ja'a häyohnmøødpähajxy ja'a näjuxtujcpä. Poobwit hajxy hñajty miøød jaančh tehñ wia'ads. Jimä orowøøn hajxy hñajty miøødä chi'tsnähgøxp.

⁷ Mänitä orotsim hajxy cødu'ugjaty miooyy. Tu'ugä animal jaduhñ yejcy ja'a nämädaaxpähajxy hñajty jim hñäabiä Dioswiinduum. Hujtsjatiä orotsim hñajty. Je'eduhñ ñänøømby coo ja'a Dios ja'a jäya'ayhajxy jiaančh tehñ yajcumädo'wa'añ, ja'a hajxy ca'a mabøjpä. Cøjxta'axiøø ja'a Dios ñä'ägädä hity.

⁸ Jiiby Diostsajtøgooty, haagä joc jiiby pu'xwädijp. Jimä joc choon maa ja'a Dios møj jaančh yhitiän. Caj pøn jiiby hoy ñä'ägädä tägø'øwa'añ tsajtøgooty høxtä coonä ja'a Dios hñajty juxtujc-hooc tøø yajtsaačhpøcy ja'a jäya'ayhajxy ca'a mabøjpä.

16

¹ Mänitøch nmädooyy coo jäya'ay møc quiapxy Diostsajtøgooty. Mänitä Diosmoonsä näjuxtujcpä ñämaayyä:

—Nøcx hajxy cuhmänactem jiiby naaxwiin ja'a orotsimjootypä. Je'eduhñ ñänøømby coo ja'a Dios jiaančh tehñ yajcumädo'wa'añ ja'a hajxy ca'a mabøjpä.

² Mänitä Diosmoonsä tu'ug hoy quiuhmänactemy hädaa yaabä naaxwiin ja'a yhorotsimjootypä. Pønjatiä animalseñä hñajty møød ja'a hamøjpä, pønjatiä yhädiuunnaxy hñajty wiingudsähgøøyyäp, nägøxiä haxøøgpu'uds hajxy piaatä ja'a jaančh tehñ piahmbä.

³ Mänitä Diosmoonsä miämetspä hoy quiudemø'øy mejjiooty ja'a yhorotsimjootypä. Mänitä mejyñøø jiajty nebiä ho'ogyjiäya'añø'tiän. Cøjx yho'ogy mädyiijaty jiiby tsänaaby mejjiooty.

⁴ Mänitä miädägøøgpä hoy møjnøøjooty quiudemø'øy ja'a yhorotsimjootypä møød jim nøøgopcjooty. Mänitä nøø jiajty nebiä nø'tiän.

⁵⁻⁶ Mänitä Diosmoonsä ja'a nøøgüendähajpä miänaañ:

—Wiindsøn Dios, caj miich tii pojpa tii cädieey mmøødä. Cøjxta'axiøø miich mhity. Hoy jaduhñ coo miichä jäya'ayhajxy tøø myajtsaačhpøcy, coo nø'ty hajxy tøø myaghu'ugy, je'eguiøxpä coo miich mgu'ug xyajpuhho'cä møødä miich mmädia'agy hajxy tøø xyajwä'xäbä.

⁷ Mänitä tu'jäya'ay miänaañ maa ja'a altarän:

—Tøyhajt jaduhñ. Wiindsøn Dios, hoy jaduhñ coo miichä jäya'ayhajxy tøø myajtsaačhpøcy. Miich cuhdujt cøxiä mmøød.

⁸ Mänitä Diosmoonsä ja'a miämädaaxpä ja'a xøø yajwiingutemøøyy ja'a yhorotsimjootypä. Mänitä xøø quiuhdujtmooyy coo ja'a jäya'ay ñó'ogät.

⁹ Hoyhooyy jäya'ayhajxy cøxiä tiooyy. Pero cabä yhäxøøgcuhdujt hajxy hñajty jia najtshixø'øwa'añ. Haxøøgiatiä Dios hajxy ñänøømy ja'a jim tsajpootypä. Cabä Dios hajxy piädaacy møj jaančh, hoyyä Dios cuhdujt jia møødä maa ja'a häyohngøxpän.

¹⁰ Mänitä Diosmoonsä miämägooxpä quiudemøøyy maa ja'a animal hānajtŷ yhäña'ayän, ja'a yhorotsimjootypä. Mänit cøjx wyiingoodsø'øyy majatiä animal hānajtŷ yhane'emiän. Mänitä jäya'ay tiots hajxy yajtsu'udsøøyy je'eguiøxpä coo hajxy hānajtŷ jiaanč tehñ chaačhpøcy.

¹¹ Paadiä Dios hajxy haxøøgjaty ñänøømy. Cabä yhaxøøgcuhdujt hajxy hānajtŷ jia najtshixø'øwa'añ.

¹² Mänitä Diosmoonsä ja'a miädädujcpä jiiby quiudemøøyy Eufratesmøjnøøjooty, ja'a yhorotsimjootypä. Mänitä nøø tiøøch. Jaduhñä reyhajxy hānajtŷ hoy ñaxø'øwa'añ, ja'a hajxy hānajtŷ jim tsohñda'agaambä maa ja'a xøø piädsømiän.

¹³ Mänitøchä haxøøgjuøhñdy tägøøg nhijxpädsøømy. Jiiby hajxy piädsømøøyy maa ja'a dragón yhaawjootiän, møød maa ja'a animal yhaawjootiän, møød maa ja'a miämetspä animal yhaawjootiän, ja'a møjcu'ugongä miädia'agy hānajtŷ yajwä'xäbä. Jaduhñä haxøøgjuøhñdy hajxy hānajtŷ quiähxø'øgy nebiä yocchän.

¹⁴ Hix, møjcu'uhajxy je'e. Hoy-yagjuøøñäjatŷ hajxy hānajtŷ yajcähxø'øgy. Mänitä reyhajxy hoy nägøxiä wioyii, ja'a hajxy hädaa yaabä naaxwiimbä, coo hajxy nøcxy chiptuna'añ møødä Dioscøxpä, mänaa ja'a Dios yajñähdiijiän coo chiptuna'añ. Mäjaamøødä Dios jaduhñ.

¹⁵ Jaaya'ay jaduhñ mänaamb: “Cab jaduhñ pøn ñä'ägädä najuø'øyy mänääjøch hānajtŷ ngäda'aga'añ. Jootcuic je'e pønä Diosmädia'agy hānajtŷ hamuumdu'joot mæbøjp. Jaduhñ mäwíinäts hānajtŷ yhida'añ nebiä jujcypiän. Cabä hānajtŷ chähdiunaanñä.”

¹⁶ Mänitä reyhajxy yhamugøøyy maa xiøhatiän Armagedón ja'a hebreo-hayuuc-haamby.

¹⁷ Mänitä Diosmoonsä ja'a miäjuxtujcpä cøxp quiuhdeemñajxy ja'a yhorotsimjootypä. Tu'ugä jäya'ay møc quiapxy maa ja'a Dios yhäñaadiaactän jim tsajpooty:

—Tøø jaduhñ miaañä.

¹⁸ Mänit wiädsujcy møødä hänee yaaxy. Mänitä hujx møc ñajxy. Cabä hujx jaduhñ mänaaxøø ñaxy neby jaduhñ tøø ñaxiän.

¹⁹ Mänitä møjcajpt ñiwia'xä. Tägøøghit jaduhñ hoy miähmøøñä. Mänitä tøjc cøjx piумы wiinduhmyhagajpt. Mänitä Dios jäya'ayhajxy chaačhtiuuñ hoyhoy, ja'a hajxy hānajtŷ jim tsänaabiä Babilonia-cajptooty.

²⁰ Mänitä tun cøjx yhadägoyyø'øyy møødä naax ja'a hānajtŷ jim hijpä mejyquijc.

²¹ Mänitä jäya'ayhajxy quiuhga'awøøyyä caandøøtstuu hamøjjaty. Juxy-chägui'x kilo hānajtŷ näje'e jiemchä. Coo hajxy jiaanč tehñ chaačhpøjcy, paadiä Dios hajxy haxøøgjaty ñämaayy.

17

¹ Mänitøchä Diosmoonsä tu'ug xñämejch, ja'a hajxy hānajtŷ näjuxtujcpä, ja'a orotsim hajxy hānajtŷ miøødäbä. Mänitøch xñämaayy:

—Jam nyajñähixø'øyy coo ja'a cuhñindo'oxiøjc ja'a møjpä yajtsaačhpøga'añii, ja'a jim häñaabiä mejywyiing.

² Tøø ja'a rey ja'a to'oxiøjc hajxy yaa miøødtsäna'ay hädaa yaabä naaxwiin. Ja'a to'oxiøjcøxpä ja'a jäya'ayhajxy nägøxiä yaa yhaxøøgwädity hädaa yaabä naaxwiin.

³ Mänitøchä Dioshespíritu xyajwiinhijxy. Mänitøchä Diosmoonsä jim xya-jnøcxy maa pøn quia'a tsäna'ayän. Mänitøchä to'oxiøjc tu'ug nhijxy. Animalnähgøxp hānajtŷ yhäña'ay. Tsaptsä animal ñi'x. Jimä mädia'agy hānajtŷ

miøødä cujaay ja'a ñi'xcøxp. Haxøøgjatiä Dios hänajty ñänømy. Juxtujcä quiopc hänajty je'e y majcä quiaa'pt.

⁴ Ja hucy ja tsaptsä to'oxiøjc wyit hänajty je'e. Oro hänajty ñaandsømhajpy møødä hočhaa møød perlas. Orotsim hänajty quiø'øgø'øwhajpy. Madiu'u haxøøgpä hänajty jiiby yhity orotsimjooty.

⁵ Jim hänajty miøødä wyiinnähgopcøxp cujaay: “Ja'a møjcajpt Babilonia hädaa. Ja'a cuhhiñdo'oxiøjc tiajhajxy hädaa. Ja'a haxøøgpä yhøjxä tiecy hädaaduhñ ja'a hädaa yaabä naaxwiimbä.” Cab jaduhñ yhowyiinjuøøñjä.

⁶ Mänitøch nnajuøøyy coo ja'a to'oxiøjc hänajty miu'ugyii. Ja'a Dioshuung ñø'tyhajxy hänajty tøø yhúucäxä møød hajxy tøø yagho'ogyijäbä je'eguiøxpä coo ja'a Jesucristo miädia'agy hajxy miäbøjcä. Cooch jaduhñ nhijxy, njaančh tehñ yagjuøøyyhøch jaduhñ.

⁷ Mänitøchä Diosmoonsä xñämaayy:

—Tii jaduhñ coo mwi'i yagjuø'øy. Nhawaanäanäbøch miičh ja'a to'oxiøjcøxpä møødä animalcøxpä, ja'a to'oxiøjc yaghäñaabiepiä, ja'a juxtujcpä quiopc, ja'a majcpä quiaa'pt.

⁸ Yø'ø animal tøø mwiinhíxiäbä, jugyhajp hijty yø'øduhñ. Hoy tøø jia cuhdägoy, jutpädsømaamb jadähooc. Mänit nøcxy yho'ogaanä. Pønjetiä xiøø jim ca'a miimb cujaay librojooty, coo ja'a animal hajxy yhíxät coo tøø jiutpädsømy, mänit hajxy hoyhoy yagjuø'øwa'añ. Pero pønjetiä xiøø jim miimb cujaay librojooty, je'eds hajxy cøjxta'axiøø jugyhadaamb nebiä Dios jiugyhatiän, je'eguiøxpä coo ja'a xiøøhajxy jim quiujähyyäxä mänäa ja'a naaxwiimbä yhawijy tiøø'xta'aguiän.

⁹ Pøn jaduhñ wiinjuøøby, ween hädaaduhñ hoy yhuuc wiinjuø'øy: Yø'ø quiopc juxtujcpä, jaduhñ mäwíinäts hajxy yø'ø nebiä juxtujcpä tunän. Jimä to'oxiøjc yhäña'ay.

¹⁰ Jaanä jaduhñduhmbä, jaduhñ mäwíinäts hajxy yø'ø nebiä juxtujcpä reyän. Nämägooxc hajxy jaduhñ tøø quiuhdägooñä. Tu'ug jäda'ahaty guio-biernähajnä. Jatu'ug, cahnä je'e tiägø'øyñä. Coo hänajty tøø tiägøøñä, cab jaduhñ jiega'añ.

¹¹ Haa ja'a animal tøø quiuhdägóyyäbä, tu'ugä näjuxtujcpä rey jaduhñ. Miämetsc-hoocpä jaduhñ tøø piädsøømgombä. Mänit nøcxy yho'ogaanä.

¹² 'Haa ja'a majcpä quiaa'pt tøø mwiinhíxiäbä, nämajcä reyhajxy jaduhmbä. Cahnä hajxy tiägø'øy gobiernähajpä. Jaduhñä møjcuhtujt hajxy mio'owa'añii tu'hora quipxy møødä animal.

¹³ Tu'ugmädia'aguiä reyhajxy yhity ja'a nämajcpä. Mänitä animal cuhtujt hajxy mio'owa'añ møødä mājaa.

¹⁴ Mänit hajxy tiägø'øwa'añ tsiptuumbä maa ja'a Meeghuungcøxpän. Mäjäda'agaambä Meeghuung jaduhñ. Hix, je'e ja'a møjcuhtujt nä'ägä møød. Pønjaty je'e jiamioødhajpy, Dioshuunghajxy je'eduhñ. Pedyii hajxy miäbøcy.

¹⁵ Mänitøchä Diosmoonsä xñämáaguiombä:

—Yø'ø mejy tøø mwiinhíxiäbä maa ja'a to'oxiøjc hijty yhäña'ayän, jaduhñ mäwíinäts yø'ø nebiä wiinduhmyhagajpt-tsohmñän. Madiu'u hayuuc hajxy quiapxy.

¹⁶ Y yø'ø animal quiaa'pt tøø mwiinhíxiäbä ja'a majcpä, mänitä to'oxiøjc hajxy miähanhada'añ. Nähwa'ads høxwa'ads hajxy jaduhñ ñähgue'egaanä. Chu'udsaamby hajxy jaduhñ; mänit hajxy ño'oga'añ.

¹⁷ Ja'a Dios jaduhñ tøø wyiinmahñdymo'oy coo hajxy jaduhñ quiudiúnät nebiä Dios tøø yajnähdiijiän, coo hajxy tu'ugmädia'agy yhidät, coo ja'a animal hajxy quiuhdujtmó'owät, høxtä coonä hänajty tøø yhabaady nebiä Dios yajnähdiijiän.

18 Haa yø'ø to'oxiøjc tøø mwiinhíxiäbä, jaduhñ mäwíinäts yø'ø nebiä møjcajptän maa ja'a reyhajxy nägøxiä xiøønaxiän.

18

1 Mänitøchä Diosmoonsä tu'ug njaag hijxy coo hānajty miānacy tsajpootyp. Mayyā cuhdujt hānajty miøødä. Haamb tsāmaamb hānajty jaduhñ. Hajaj jaduhñ hädaa yaabä naaxwiin.

2 Mänit møc yaaxy:

—Tøø ja'a møjcajpt Babilonia quiøxy pumy. Jimä møjcu'uhajxy chānaañä, møødä haxøøgjuøhñdy madiu'ubä, møødä haxøøghanimalhajxy jäyøøbiä.

3 Tøø ja'a jäya'ayhajxy nägøxiä quiøxy pahijxpä nebiä Babilonia haxøøgcuhdujt miøødän. Tøø ja'a reyhajxy miøødtsäna'ay. Tøø ja'a hajuubiädøjc-hajxy miäyøøjøñä je'eguiøxpä coo ja'a Babilonia hijty cøxiä wiinä yaghøxhāyoy.

4 Mänitøchä jäya'ay nmädooyy coo hānajty jim quiapxy tsajpootyp:

—Pønjätyhøch nhuunghajpy, mdsóonäp hajxy jim maa yø'ø cajptän, neby hajxy jaduhñ mga'a pajatcø'øwät, neby hajxy jaduhñ mga'a padsaächpøgät.

5 Haa ja'a jäya'ayhajxy jim tsānaabiä Babilonia, tøø hajxy møj may jiaanč tehñ quiädieey. Hoyhoyyā Dios jiaanč tehñ yajtsaächpøga'añ.

6 Jaduhñä Babiloniatsohmä hajxy mduundägätsät nebiä wiinghāna'c hajxy tøø tiuñän. Mejtsjäduhñtiä hajxy myajtsaächpøgät.

7 Tøø hajxy hanaxiä jiaanč tehñ ñiguiumayii. Cøxiä wiinä hajxy tøø jiaanč tehñ yaghøxhāyoy. Paady hajxy mjaanč tehñ yajtsaächpøgät. Jaduhñ quiopcooty jia wi'i miāna'añ: “Jaduhñhøch chaa nhāñä'ay nebiä møjcuuhdujtmøødpän. Nä'ä jäjtäbøchä nnihyhap jim. Cábøch jaduhñ mānaa nnä'ägä jootmayhada'añ.”

8 Coo jaduhñ miāna'añ, paquiä chaächpøga'añ. Piaadaambiä yuu møødä häyohn møødä ho'og tägoy. Toyāannäp je'eduhñ. Ja'a Dios jaduhñ mānaan coo jaduhñ chaächtiunøjät. Jaayá'ayäts møjcuuhdujtmøød.

9 Haa ja'a reyhajxy, ja'a to'oxiøjc hajxy hānajty tøø miøødtsäná'ayäbä, coo hajxy jaduhñ yhíxät coo hānajty tiooñä, mänit hajxy ñäjø'ow ñäxuudsä'añ.

10 Tsähgø'ø-tsähgø'ø hajxy hānajty jäguem tiāna'awa'añ. Mänit hajxy miāna'ana'añ:

—Miič Babiloniacajpt, may miič cuhdujt hijty mjaanč tehñ miøødä. Pero paquiä mjaanč tehñ quiuhdägooyy.

11 Mänitā hajuubiädøjc-hajxy ñäjø'ow ñäxuudsāmbä, je'eguiøxpä coo ja'a tioogyhajxy quia'a nä'ägädä juyāañäxä.

12 Madiu'u toogy hajxy hānajty miøødä: oro, møødä plata, møødä hočhaa, møødä perlas, møødä howyit, møødä linowit, møødä sedawit, ja hucy ja tsapts. Jaduhñä quepy hajxy hānajty madiu'u miøødäbä ja'a pa'agxuu'pä, ja'a tsowjatypä, møødä tijatiä elefantetøødshadeeñdiuc-hädiúñäbä, møødä hobiujxt, møødä pujxt, møødä mármoltsaa.

13 Jaduhñä canela hajxy hānajty miøødäbä, møødä jøø'xychooy ja'a jaanč tehñ pia'agxuu'pä, møødä poom, møødä mirra, møødä perfume, møødä vino, møødä hon, møødä harina hoybä, møødä trigo, møødä jäyujc, møødä waj, møødä meeg, møødä cuaay, møødä carreta, møødä moonsädøjc jamiäjúyyäbä.

14 Mänitā hajuubiädøjc-hajxy miāna'ana'añ:

—Tøø miič xquiøxy pøjcä tijaty miič mhadsojpy møødä mmäyøøhadyíjäbä.

¹⁵ Ñäjø'ow ñäxuudsaambiä hajuubiädøjc-hajxy, ja'a hajxy hānajty tøø miäyøøjø'öyabä maa yø'ø cajptän. Tsähgø'ø-tsähgø'ø hajxy hānajty tiāna'ay jäguem.

¹⁶ Mānit hajxy miāna'ana'añ:

—Tøø yø'ø møjcajpt jiaanč tehñ chaačhpøcy. Jaduhñ hijty je'e nebiä to'oxiøjc howyitmøødpän ja hucy ja tsapts, møødä oromøødpä, møødä hočhaamøødpä, møødä perlas-møødpä.

¹⁷ Paquiä ja'a miäyøøhadyíjábä tøø quiøxy pøjcäxä.

Haa ja'a jäya'ayhajxy hānajty wädijpä barcojooty, jäguem hajxy hānajty tiāna'awaambä, møødä wyiindsønñhajxy, møød hajxy nä'ä wädijpä.

¹⁸ Coø hajxy yhiijxy coø ja'a cajpt hānajty tiooñä, mānit hajxy yaaxy:

—Cab mädyii cajpt ñä'ägädä mäbaady nej yø'ø møjcajpt hijtiän.

¹⁹ Mānit hajxy tiägøøyy jøøbiä xuu'tspä. Mānit hajxy yáaxcombä:

—Tøø yø'ø møjcajpt jiaanč tehñ chaačhpøcy. Haa ja'a cubarcohajxiä, tøø hajxy jia mäyøøjøøñä coø yø'ø cajpt hijty jiaanč tehñ miäyøøjä. Paquiä tøø quiuhdägoonä.

²⁰ Pønjaty jim tsānaaby tsajpootyp, ween hajxy nägøxiä mxoonä'agy, møødä Diosquexy møødä Dioshuung, je'eguiøxpä coø ja'a Dios yø'ø cajpt tøø yajcumädoy.

²¹ Jaanč tehñ miøcä Diosmoonsä tu'ug. Mānitä cruundätsaa yajpädø'cy. Mānit miejyquia'adsøøyy. Mānit miānaañ:

—Jaduhñsä Babiloniacajpt jiadaambä yhabetaambä. Cab jaduhñ mānaa ñä'ägädä cāhxø'øgaannä.

²² Cab jaduhñ jim pøn xiu'uxaannä. Caj pøn jim tiunaannä. Cab hajxy jim jioðsaannä.

²³ Ni jøøn jim quia'a toyaannä. Cab hajxy jim piøgaannä yhu'ugaannä. Paadiä Babiloniacajpt jaduhñ jiada'añ yhabeta'añ je'eguiøxpä coø ja'a cu'ug jiaanč tehñ miäyøøjä. Tøø ja'a jäya'ayhajxy nägøxiä piahiixy ja'a Babilonia yhaxøøgcuhdujt.

²⁴ Haa ja'a Diosquexy møødä Dioshuunghajxiä, ja'a hajxy yaghó'cäbä, jimä ñø'tyhajxy tøø miähmø'öy maa yø'ø cajptootiän. Hix, cu'ug jaduhñ jatcøøyy.

19

¹ Mānitøch nmädooyy majiäya'ay hānajty jim ya'axy tsajpootyp:

Møj jaančhä Dios jaduhñ. Jaaya'ay hajxy xyajwaats xyajtséjcām.

Tsøg hajxy wiingudsähgøøyyām coø møcmäjaa miøødä.

² Hoyyä Dios quiudiuuñ coø ja'a cuhhiñdo'oxiøjc hoy piäda'agy haducytium, je'eguiøxpä coø ja'a yhaxøøgcuhdujt piahiixäxä ja'a jäya'ayhajxy nägøxiä, y coø tøø yagho'ogy ja'a Diosquexypä møødä Dioshuung.

Coo ja'a Dios ja'a ca'awiindøybä yajcumädowa'añ, yepiä tøyhajt jaduhñ; cab nä'ä nägoobä yajcumädoy.

³ Mānitä majiäya'ayhajxy miānaangombä:

Møj jaančhä Dios. Cøjxta'axiøø yø'ø cuhhiñdo'oxiøjc yhatoy yhapøgø'owa'añ.

⁴ Mānitä majiäya'ay ja'a Dios hajxy wyiinjiicādaacy, ja'a hajxy nāhii'xmādaaxpä møødä animalhajxy ja'a nāmādaaxpä. Mānit hajxy miānaañ:

—Tøyhajt jaduhñ, møj jaančhä Dios.

⁵ Mānitä jäya'ay jim tu'ug quiapxy maa ja'a Dios hānajty yhäña'ayän:

Nāma'aw ja'a Dios hajxy coø miøjjä coø jiaančhä, pønjaty Diosquexy, pønjatiä Dios wiingudsähgøøby, miøjjä miuutscä.

⁶ Mānitøch nmädooyy coø majiäya'ay hānajty quiapxy. Jaduhñ yajmädooyy nebiä mejy møc yhahøøchän, nebiä hānee møc ya'axiän:

Møj jaančhä Dios jaduhñ. Tøø tiägøøñä gobiernähajpä.

Jimä möjcuhdujt miøødä.

⁷ Tsøg hajxy jootcugøøyyäm, tsøg hajxy xoonđaacäm. Tsögä Dios hajxy möj jaančh päđaacäm.

Tøø yhabaatnä coo ja'a Meeghuung piøgaanä. Tøø ja'a jaxie'eb ñiyhahixøøyyänä.

⁸ Howyit jaduhñ jaančh tehñ yajpøgø'owáanäp, wa'adspä, haambä tsämaambä,

nömä majiäya'ayhajxy miänaañ. Haa ja'a howyitä, je'eduhñ ñänøømby coo ja'a Dioshuunghajxy hñajty hoy tøø wiädity hädaa yaabä naaxwiin.

⁹ Mänitøchhä Diosmoonsä xñämaayy:

—Cujaay jaduhñ: “Jootcujc hajxy yhity pønjaty tøø yajwoy tøø yajwich maa ja'a Meeghuung piøga'añän.”

Mänitøch xñämaaguiombä:

—Tøyhajtä Diosmädia'agy jaduhñ.

¹⁰ Mänitøchhä Diosmoonsä nja wiinjicädaacy. Nja wiingudsähgø'owáanhøch jaduhñ. Mänitøch xñämaayy:

—Ca'ačh xwyiingudsähgø'øy. Høøchhä Dios xmioonsähajp nej mijts xmioonsähajpän, coo mijtsä Jesucristo miädia'agy hoy myajtuunä. Ja'a Dios mäbøcy mwiingudsähgø'owäp.

Tøyhajtä Jesucristo miädia'agy. Tu'ugmädia'agy hajxy yhity, pønjatiä Jesucristo miädia'agy yajwä'xäp, pønjatiä Jesucristo capxpaatp.

¹¹ Mänitøch tsajpootyp nhijxy coo tøø yhawa'ačh. Mänitøchhä jäya'ay tu'ug nhijxy coo ja'a ca'awiindøybä hoy yajcumädowa'añ, coo hoy chiptuna'añ. Paady xiøhaty ja'a hoguiudiuumbä, ja'a tøyhajtyejpä. Poobcuaañähgøxp hñajty yhäña'ay.

¹² Jaduhñä wyiin hñajty quiähxø'øgy nebiä jøøn tioyyän. Mayyä cuhjén hñajty miøødä cuhdum. Jimä xøø hñajty miøødä cujaay. Ni pøn hñajty quia'a najuø'øy tii xøø je'e. Je'eduhñ nidiuhñ najuøøby.

¹³ Nø'tiä wyit hñajty tøø yaghucy. Ja'a Diosmädia'agy hñajty xiøhaty.

¹⁴ Jaančh tehñ miajiäya'ay hñajty panøcxp haagä poobcuaañähgøxp. Poob-wit hoybä hajxy hñajty miøød, jaančh tehñ pioob jaančh tehñ wia'ads.

¹⁵ Jim yø'øya'ay espada jaančh tehñ jiøjp hñajty miøødä yhaawjooty. Je'e ja'a jäya'ay hñajty yajpuxaamby. Jaančh tehñ miøc guiobiernähada'añ. Hoyhoyyä jäya'ay chaačhtiuna'añ nebiä Dios ja'a jäya'ay yajcumädoyyän.

¹⁶ Jimä xiøø hñajty miøødä cujaay wyitcøxp møødä piuuguiøxp: “Hädaa möjcuhdujtmøød; ni pøn möjcuhdujt jaduhñ quia'a møødä.”

¹⁷ Mänitøchhä Diosmoonsä tu'ug nhijxy coo hñajty jim tiäna'ay maa ja'a xøøjän. Mänit jaančh tehñ miøc yaaxy. Ja'a luudhajxy möjyaaxä, ja'a hajxy cøxp jäyøøwiädijpä:

—Min hajxy tsu'uds. Ja'a Dios hajxy jaduhñ xmio'owaamb.

¹⁸ Jäya'ay hajxy nägøxiä mdsu'udsaamby, miøjjä miuutscä, hopiønä, møødä rediøjc-hajxy, møød hajxy tuumbä soldadowiindsøn, møød hajxy møcmäjaamøødpä, møødä cuaay, møød hajxy cuaayhäñaabiä.

¹⁹ Mänitøchhä animal nhijxy. Møødä reyhajxy hñajty jim choonä møødä quiu'ughajxy. Tsiptunaamb hajxy hñajty jaduhñ møødä jaaya'aguiøxpä ja'a cuaañähgøxp wädijpä møødä quiu'ug.

²⁰ Mänitä animal miajtsä møødä craa ja'a jaančh tehñ jiäya'awyiinhøhmbä. Tøø ja'a craa hñajty yajcähxø'øgy hoy-yagjuøøñäjaty maa ja'a animal wyi-induumän. Jaduhñä craa hñajty tøø wyiinhøøñ pønjaty yø'ø animal seña

hänajty mөөdhájtáp, pønjaty yø'ø animal yhädiuunnaxy hänajty tөө wyi-ingudsähgөөyyä. Mänit hajxy nämetsc jiøønjuipөөyyä maa azufre hänajty tioyyän.

²¹ Mänitä quiu'ughajxy yaghó'cäxä. Jaaya'ay jaduhñ mäyagho'c, ja'a hänajty cuaayhäñaabiä. Espadahaam miäyagho'cy, ja'a jaanč tehñ jiøjpä, ja'a hänajty jim miøødpä yhaawjooty. Mänitä ho'ogyjiäya'ayhajxy chu'tsä. Ja'a luudhajxy jaduhñ mädsu'ts jaanč tehñ quiu'uxiä.

20

¹ Mänitöchä Diosmoonsä tu'ug nhijxy. Jim tsajpootyp hänajty miänacy. Jimä juthawaatst hänajty quiø'øgonhaty, ja'a hänajty jaanč tehñ quiøøcpä. Jimä cadena hänajty quiø'øwitshajpä.

² Mänitä mõjcu'ugong miajtsä, ja'a xøhajpä Satanás. Ja'a dragón je'e mөөdä jecychahñdy. Mänit quiø'øxojsä tiecyxiojsä cadenahaam.

³ Mänit quiujuipөөyyä jutjooty. Mänit yhawägüi'tsä. Mänitä Diosmoonsä yhahoo'ch maa ja'a juthaawän. Mil jomøjtä mõjcu'ugong hänajty jiiby yhida'añ, nebiä jäya'ay jaduhñ quia'a wiinhóhñnät. Coø hänajty mil jomøjt tөө yhabejnä, mänit yhöxmadsa'añii. Pero cab hänajty jejcy yajwädita'añii coø hänajty tөө yhöxmačhii.

⁴ Mänitöch nhijxy coø cu'ughajxy hänajty yhäña'ay. Haagä mõjcuhudjtmөөd hajxy hänajty coø hajxy nägøxiä yajtøyhajtyégät. Mänitöchä jäya'ayä yháañämähajxy nhixä, pønjaty hänajty tөө yo'puxyii. Paady hajxy yo'puxä coø hajxy hänajty tөө Dyiosmädia'agy-yajwa'xy coø ja'a Jesucristo Dyioshuungä. Cabä animal hajxy hänajty tөө wyiingudsähgø'øy, ni ja'a yhädiuunnaxy. Ni cab hajxy hänajty tөө piädäacäxä ja'a animal seña, ni wyiinnähgopcøxp ni quiø'øgøxp. Mänitöch nhijxy coø hajxy jiuypiojñä. Mänitä Jesucristo hajxy miøødtägөөyy gobiernähajpä. Mil jomøjt hajxy hänajty tiuna'añ.

⁵⁻⁶ Jayøjp hajxy jiuypiojtsøhñ. Jootcujc hajxy yhity. Nebiä teediän ja'a Dios hajxy miøødtuñ. Cab hajxy chaächtiuna'añii. Coø mil jomøjt hänajty tөө yhabety, mänitä jäya'ay yháañämähajxy jiaac jiuypioğaambä nägøxiä, ja'a hajxy hänajty hoy tөө quia'a wäditiäbä. Mänit hajxy yajcumädowa'añii.

⁷ Coø mil jomøjt hänajty tөө yhabejnä, mänitä Satanás yhöxmadsa'añii.

⁸ Mänit tiägø'øwa'añ jäya'awyiinhøhmbä wiinduhmyhagajpt. Yajwiinhøønaambä Gog mөөdä Magog. Mänit hajxy yhamugø'øwa'añ mөөdä quiu'ughajxy coø hajxy hänajty chiptuna'añ. Jaanč tehñ miay hajxy hänajty jaduhñ.

⁹ Wiinduhmyhagajpt hajxy choona'añ. Mänitä Dioshuunghajxy jiuhbic jiuhgodø'øwa'añii. Mänitä Dios jøøn yajca'awa'añ. Cøxy toyaambä Magoghajxy jaduhñ.

¹⁰ Mänitä mõjcu'ugong jiøønjuipөөyyä maa ja'a azufre hänajty tioyyän, maa ja'a animalhajxy hänajty tөө jiøønjuipø'øyiiñ, mөөdä craa hänajty tөө jiäya'awyiinhøñäbä. Cøjxta'axiøø hajxy jiiby chaächpøga'añ xøømdsuhñ.

¹¹ Mänitöchä Dios nhijxy coø hänajty yhäña'ay. Poobä yhäñaabiejt hänajty cruundä. Mänitä naaxwiimbä yhadägoyyөөyy maa ja'a Dioswiinduumän mөөd tsajtcøxp.

¹² Mänitöchä háañämähajxy nhijxy miøjjä miuutscä. Jim hajxy hänajty tiäna'ay Dioswiinduum. Mänitä Dios ja'a libro yaghawaach mөөdä libro wiingpä. Jiibiä xiøøhajxy hänajty myiñ cujaay ja'a hajxy jugyhadaambä cøjxta'axiøø nebiä Dios jiu gyhatiän. Mänitä Dios ja'a libro quiapxy pø hoyyä háañämähajxy hänajty tөө jiäya'ayhaty, pø caj.

¹³ Mänitä hääñämähajxy jiiby piädsøømy mejjiooty, ja'a hajxy hānajtj jiiby tøø yho'oguiäbä. Jaduhñ hajxy jiiby piädsøømbä naaxpa'c. Ja'a hajxy hānajtj hoy tøø jiäya'ayhātiäbä, hawa'adstuum hajxy hoy miähmøøñä. Ja'a hajxy hānajtj hoy tøø quia'a jäya'ayhātiäbä, haducytium hajxy hoy miähmø'øy.

¹⁴⁻¹⁵ Mänitä mõjcu'ugong jøønjooty piädaacä. Mänitä hääñämähajxy jøønjooty quiujuipøøyyä, pønjatiä xiøø hānajtj ca'a miimb cujaay librojooty. Cab hajxy cøjxta'axiøø jiugyhada'añ nebiä Dios jiugyhatiän.

21

¹ Mänitøchä tsajpootyp jembybiä nhijxy møødä naaxwiin jembybiä. Tøø ja'a tuctsajpootyp hānajtj tiägooñä møødä tucnaaxwiimbä. Møødä mejy hānajtj tøø tiägoobiä.

² Mänitøchä Dioscajpt nhijxy, ja'a Jerusalén jembybiä. Jim hānajtj miānacy tsajpootyp. Jim hānajtj tøø chooñ maa ja'a Diosän. Yajxón hānajtj quiahxø'øgy nebiä jaxie'eb ñiyhahixø'øyijän coo hānajtj piøga'añ.

³ Mänitä jäya'ay møc jiaanč tehñ quiapxy jim tsajpootyp:

—Huug hix, jimä Dios tøø chānaadiaacpøcy maa ja'a jäya'ayhajxiän. Quiu'ughadaambiä Dios ja'a jäya'ayhajxy. Wiingudsähgø'øwāanäp ja'a Dios jaduhñ.

⁴ Jaduhñä Dios miāna'ana'añ coo ja'a jäya'ayhajxy quia'a jøøñät. Cab hajxy pia'ambadaañä, yho'ogaañä. Cab hajxy jiø'øwaañä xiuudsaañä. Tøø yø'øduhmbä hānajtj quiøxy cuhdägooñä.

⁵ Mänitä Dios miānaañ:

—Tøøch cøxiä wiinä nhädiuundägach.

Mänit miānaañgombä:

—Cujaay jaduhñ. Tøyhájthøch nmädia'agy jaduhñ. Cábøch nhøhñda'agy.

⁶ Mänitøch xñämaayy:

—Tøø jaduhñ miaañä. Høøch nyajtsohñdaac; jaanä høøch nyajmaabiä. Pønä jioot hamuumdu'joot tøø piäda'agy coo jiugyhada'añ cøjxta'axiøø nébiøch njugyhatiän, nguhdujtmó'owäbøch jaduhñ coo jaduhñ jiugyhádät.

⁷ Pøn mājādaacp, je'e jugyhadaamb cøjxta'axiøø nébiøch njugyhatiän. Høøch cøjxta'axiøø xTieedyhadaamb. Nhuunghadāambiøch jaduhñ.

⁸ Haa ja'a hajxy jaduhñ ca'a mājādaacpä, jøønjooty hajxy nøcxy quia'awa'añ maa ja'a azufre tioyyän. Jiiby hajxy cøjxta'axiøø chaačhpøga'añ, møød hajxy ca'a mājøjpä, møød hajxy ca'awiindøybä, møød hajxy jäya'ay-yagho'pä, møød hajxy amigāhamādoobä, møød hajxy māvijts mājāxujpä, møød hajxy quepy-chechwīngudsähgøøbiä, møød hajxy høhñdaacpä.

⁹ Mänitøchä Diosmoonsä tu'ug nhijxy, ja'a hajxy nājuxtujcpä, ja'a orotsim hajxy miøødpä cødu'ug. Jimä tsø'ty häyohn hānajtj miøødä ja'a juxtujcpä orotsim. Mänitøch xñämaayy:

—Jamä jaxie'eb nyajñähixø'øy ja'a Meeghuung tio'oxiøjc-hadaambiä.

¹⁰ Nwiinhijxypøch hānajtj; ja'a Dioshespíritøch hānajtj xyajwiinhijxp. Mänitøchä Diosmoonsä xwioonøcxy maa ja'a cøxptunguhduumän. Mänitøchä Dioscajpt xyajñähixøøyy. Jerusalén xiøhaty. Jim hānajtj miānacy tsajpootyp maa ja'a Diosän.

¹¹ Jaanč tehñ yhaamb jaanč tehñ chāmaambä cajpt hānajtj nebiä Diosän. Jaduhñ hānajtj yhaambä chāmaambä nebiä høčhaa jaanč tehñ chowbän, nebiä jaspetsaajän. Jaduhñ hānajtj tiø'xiä nebiä hijxtän.

¹² Piquiä ja'a cajpt quiuraa hānajtj yhamuu'dsø'øguiä. Jaanč tehñ quiøxp hānajtj yhamuu'dsø'øguiä. Majmetscä curaahaaw hānajtj miøødä. Majmetscä Diosmoonsähajxy hānajtj jim yhadāna'ay. Cødu'ugjatj hajxy hānajtj

yhadäna'ay maa ja'a curaahaawän. Tu'ugjatiä curaahaaw hänajty miøødä cujaay nebiatiä judíoshajxy xiøhaty ja'a nämajmetscjatypä.

¹³ Tägøøgä curaahaaw hänajty xøøbädsøømypiä; tägøøg hänajty tsuxpojpejpä; tägøøg hänajty jøømbojmänajpä; tägøøg hänajty xøøguhnajxpä.

¹⁴ Majmetscä tsaa hänajty jiiby maa hänajty miuu'dsø'tsooñän. Jim tsaagøxp hänajty quiujaayä nebiatiä Meeghuungä quiuguexyhajxy hänajty xiøhaty, ja'a nämajmetspä.

¹⁵ Haa ja'a Diosmóonsøch hänajty xmiøødmädiaacpä, jimä oropaxyquipxt hänajty miøødä. Je'e ja'a cajpt hänajty yajquipxaamby møødä curaahaaw møødä yhamuu'dsø'øgy.

¹⁶ Haa ja'a cajpt, hamädaaxteec hänajty je'e. Jaduhñtiä yoñä nebiä yhoocän. Mänitä Diosmoonsä ja'a cajpt qyipy ja'a oropaxyquipxthaam. Mejtsmil cumejtsmägo'x kilómetro hänajty yoñä; jaduhñ hänajty quiøxpä; jaanä jaduhñ yhooc hänajtpä.

¹⁷ Haa ja'a yhamuu'dsø'øguiä, tägøøghii'x cumädaaxc metro hänajty quiøxpä.

¹⁸ Haagä jaspetsaahädiuñ ja'a hamuu'dsø'øgy hänajty. Haagä oro ja'a cajpt hänajty. Jaduhñ hänajty quiähxø'øgy nebiä hijxt jaanč tehñ tiø'xypän.

¹⁹ Haa ja'a majmetspä tsaa hänajty jiiby hijpä maa ja'a yhamuu'dsø'øgy miuu'dsø'tsooñän, haagä hočhaa hänajty miøød. Haa ja'a jayøjpä tsaajä, jaspe hänajty miøød; ja'a miämetspä, zafiro hänajty miøød; ja'a miädägøøgpä, ágata hänajty miøød; ja'a miämädaaxpä, esmeralda hänajty miøød;

²⁰ ja'a miämägøøxpä, ónice hänajty miøød; ja'a miädädujcpä, cornalina hänajty miøød; ja'a miäjuxtujcpä, crisólito hänajty miøød; ja'a miäductujcpä, berilo hänajty miøød; ja'a miädaaxtujcpä, topacio hänajty miøød; ja'a miämajcpä, crisoprasa hänajty miøød; ja'a miämajtu'ugpä, jacinto hänajty miøød; ja'a miämajmetspä, amatista hänajty miøød.

²¹ Ja'a majmetspä curaahagø'øw, haagä perlahädiuñ hänajty cødu'ugjaty. Haa ja'a møjtu'u, orohädiuñ je'e. Jaduhñ hänajty quiähxø'øgy nebiä hijxt tiø'xiän.

²² Cábøch tsajtøjc jim nnä'ägädä hijxy maa yø'ø cajptän, je'eguiøxpä coo ja'a Dios jim chäna'ay møødä Meeghuung. Møjcuhtujtä Dios miøød.

²³ Haamb tsämaambä Dios jim yhity møødä Meeghuung. Paadiä xøø jim quia'a hañ ni ja'a po'o.

²⁴ Coo ja'a Dioshajxy jim yhañ chämamy, paadiä jäya'ayhajxy jiiby wiädita'añ, ja'a hajxy hänajty tøø ñähwä'ačhäbä. Møødä reyhajxy jiiby wiäditaambä. Yajmedsaamby hajxy mädyijaty hoy yajxón.

²⁵ Cabä curaahaaw mänäa yhaduga'añ. Cab jaduhñ mänäa wyiin-goodsø'øwa'añ maa yø'ø cajptän.

²⁶ Medsaambä jäya'ayhajxy jim Dioswiingudsähgøøbiä.

²⁷ Cabä haxøøgpä jiiby mänäa tiägø'øwa'añ cajptooty, ni ja'a jäya'ayhajxy ca'awiindøybä ni ja'a høhndaacpä. Jagooyyä jäya'ayhajxy jiiby tiägø'øwa'añ pønjetiä xiøø jiiby miimb cujaay librojooty ja'a Meeghuung miøødpä. Jaaya'ayädshajxy cøjxta'axiøø jugyhadaamb nebiä Dios jiugyhatiän.

22

¹ Mänitøchä Diosmoonsä møjnøø tu'ug xyajñähixøøyy jaanč tehñ tiø'xy nebiä hijxtän. Jim hänajty piädsømø'øy maa ja'a Dios ja'a Meeghuung hänajty miøødhäñä'ayän. Ja'a møjnøø jaduhmbä, yejpiä jugyhajt jaduhñ.

² Møjtu'ugujcä møjnøø hänajty piäyø'øgy. Mejtsnøøba'a ja'a quepychaa hänajty tu'ug tiäna'ay, ja'a jugyhajt yejpä. Majmetshoocä quepychaa hänajty tiøømbety tul'jomøjtpä. Wiindu'ugäpo'ojaty hänajty tiøømhaty. Ja'a yhaay-haamä jäya'ayhajxy ñähwa'ač wiinduhmyhagajpt.

³ Cabä haxøøgpä jim yajpaada'añ. Hix, jimä Dioshajxy yhäña'awa'añ mөөдä Meeghuung. Jimä mióonsäm wyiingudsähgø'øwa'añijäm.

⁴ Jaduhnä wyiin jiojphajxy yhixáanäxä. Haa ja'a Dios xiøøhajxiä, jim cujaay miøødhadáanäxä maa ja'a mioonsä wyiinnähgøpcøxpän.

⁵ Cab jaduhn mänaaxøø wyiingoodsø'øwaanä. Cabä xøø jim yhanaannä, ni jøøn jim quia'a hajajaannä. Ja'a Dios jim hajajaamb cudøø'xaamb. Haa ja'a hajxy jim tsänaabiä, cøjxta'axiøø hajxy jim guiobiernähada'añ.

⁶ Mänitøchä Diosmoonsä xñämaayy:

—Tehm tiøyhajt hädaa mädia'agy jaduhn. Haa ja'a Diosä, quiejx ja'a quiuguexy jaduhn coo ja'a mioonsä nøcxy yhawáanäxä coo miäbodhaty tijaty jadáanäp tunáanäp. Ja'a Dios jaduhn najtscapxøøyy —nømhøchä Diosmoonsä xñämaayy.

⁷ —Mobädájpøch jiiby nhäda'aga'añ —nømä Dios miänaañ.

Jootcujc yhity pønhatiä Diosmädia'agy hoy cudiumb nej yaa myiñän cujaay hädaa librojooty.

⁸ Høøch jaduhn tøø nhixy tøø nmädooy, høøch Juanhajpä. Cooch nwiinhi-jxpädøøyy, mänitøchä Diosmoonsä nwiinjicädaacy, ja'açh hänäjty tøø xyajwi-inhixiäbä; nja wiingudsähgø'øwáanhøch jaduhn.

⁹ Mänitøch je'e xñämaayy:

—Ca'açh xwyiingudsähgø'øy. Høøchä Dios xmioonsähajp nej mijts jaduhn xmioonsähajpän coo ja'a Diosmädia'agy hajxy myajwa'xy. Pønhati hoy cudiumb nej yaa myiñän cujaay hädaa librojooty, moonsähájtäp hajxy je'ebä ja'a Diósäm. Ja'a Dios mæbøcy hajxy mwiingudsähgø'øwäp.

¹⁰ Mänitøch xñämáaguiombä:

—Tøø miäbodhaty coo ja'a Diosmädia'agy tiøjiada'añ nej yaa myiñän cujaay hädaa librojooty. Paady, cabä Diosmädia'agy yu'uçh myaghídat. Naxy mdehm yajwá'xät.

¹¹ Weenä ca'awiindøyhäna'c-hajxy jiaac jatcø'øy haxøøg. Weenä hoyhäna'c-hajxy jiaac cudiuñ hoy nebiä Dios yhane'emiän. Dioshuung hajxy je'eduhn —nømhøchä Diosmoonsä xñämaayy.

¹² —Tøyhajt jaduhn. Mobädájpøch jiiby nhäda'aga'añ. Nøcxáambøchä jäya'ayhajxy nbäda'aga'añ hodium, ja'a hajxy hoy tøø quiudiúñäbä. Haa ja'a jäya'ayhajxy tøø quia'a cudiúñäbä, haxøøgtúumhøch hajxy nøcxy nbäda'aga'añ.

¹³ Høøch cøxiä nyajtsohndaac. Høøch jadähooc cøxiä nyajmayáangombä —nømä Dios miänaañ.

¹⁴ Jootcujc hajxy yhity pønhati nähwaatsp. Je'edshajxy jiiby tägø'øwaamb Dioscajptooty. Je'edsä cuhdujt hajxy mo'owáanäp coo ja'a tømDSA'am hajxy jiøø'xät ja'a jugyhajtyejpä.

¹⁵ Pero cabä ca'awiindøyhäna'c-hajxy jiiby tiägø'øwa'añ, ni ja'a mäwijtspä ni ja'a mæbæxujpähajxy, ni ja'a amigähamädoobähajxy, ni ja'a jäya'ay-yagho'pähajxy, ni ja'a quepychechwiingudsähgøøbiähajxy, ni ja'a høhndaacpähajxy.

¹⁶ —Høøch Jesucristo, tøøchä nguguexy nguexy coo ja'a hermanohajxy cøxiä yhawáanäxät. Høøchä rey David nhaphajpy nhoc-hajpy. Y xyhaphajp xyhoc-hájjpøch je'ebä. Høøch, jaxiøømhájjpøch høøch —nømä Jesucristo miänaañ.

¹⁷ Jaduhnä Dioshespíritu miänaambä:

—Min —jaduhnä Meeghuung tio'oxiøjc miänaambä.

Pøn jaduhn mädoob, ween jaduhn miänáambät:

—Min.

Pøñä jioot pädaacp hamuumdu'joot coo cøjxta'axiøø jiugyhada'añ nebiä Dios jiugyhatiän, yagjugyhadáanäp jaduhñ nebiä jiugyhatiän. Cab jaduhñ yagjuya'añii.

¹⁸ Pøñjatiä Diosmädia'agy hamädoowhiip nej yaa myiñän cujaay hädaa librojooty, nnämäabiøch jaduhñ coo ja'a mhamdsoo mädia'agy hajxy mga'a yajmäjaayø'øwät. Coö hajxy jaduhñ mjatcø'øwät, mänitä Dios hajxy xjiaančh tehñ yajtsaačhpøgät nej yaa jaduhñ myiñän cujaay hädaa librojooty.

¹⁹ Y coö hajxy näje'ejaty mbuhgónät, cabä Dios hajxy xyagjugyhádät cøjxta'axiøø neby je'e jiugyhatiän, nej yaa myiñän cujaay hädaa librojooty. Cab hajxy jiiby xyajtägø'øwät Dioscajptooty.

²⁰ Jaaya'ay jaduhñ mädiaacpä, je'eduhñ mänaamb:

—Tøyhajt jaduhñ. Mobädájpøch jiiby nhäda'aga'añ —nømä Dios miänaañ.

Amén. Min paquiä Jesucristo. Miich højts nWiindsøñhajpy.

²¹ Ween mijtsä Jesucristo ja'a hoyhajt ja'a weenhajt nägøxiä xmio'oy. Amén.